


Ja øgyajpxy ja ømyadya'aky midi xukpaajtimp

ja nitso'ok'ajtin



New Testament in Mixe, Tlahuitoltepec (MX:mxp:Mixe,
Tlahuitoltepec)

Ja øgyajpxy ja ømyadya'aky midi xukpaajtimp ja nitso'ok'ajtin
New Testament in Mixe, Tlahuitoltepec (MX:mxp:Mixe, Tlahuitoltepec)

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

422dcf73-46a5-5403-b423-8406ed76ac1d

Contents

MATEO	1
MARCOS	57
LUCAS	94
JUAN	151
HECHOS	196
ROMANOS	251
1 CORINTIOS	273
2 CORINTIOS	294
GÁLATAS	307
EFESIOS	315
FILIPENSES	322
COLOSENSES	327
1 TESALONICENSES	332
2 TESALONICENSES	337
1 TIMOTEO	340
2 TIMOTEO	346
TITO	350
FILEMÓN	353
HEBREOS	354
SANTIAGO	369
1 PEDRO	374
2 PEDRO	380
1 JUAN	384
2 JUAN	390
3 JUAN	391
JUDAS	392
APOCALIPSIS	394

JA ØGYAJPX̄Y JA ØMYADYĀ'ĀKY MIDI JA MATEO YJĀĀY

Ja Jesucristo tyeety'aptøjk

¹ Ja' idø'ø̄n ja yiknajtskajpx̄ip pø̄n jaty ja nwindson'ajtim Jesucristo tyeety'apip ku ja teety'api ja Abraham jøts ja David,

² ku Abraham t'u'ngi ja Isaac, jøts ja Isaac t'u'ngi ja Jacob, jøts ja Jacob t'u'ngi ja Judá. Namay ja'adi møøt y'uch myigu'ukti. ³ Ja Judá møøt ja ñidø'ø̄xy Tamar ja'ats t'una'jk'ajttip ja Fares jøts ja Zara. Jøts ja Fares t'u'nk'aty ja Esrom, jøts ja Esrom t'u'nk'aty ja Aram. ⁴ Jøts ja Aram t'u'nk'aty ja Aminadab, jøts ja Aminadab t'u'nk'aty ja Naasón, jøts ja Naasón t'u'nk'aty ja Salmón. ⁵ Jøts ja Salmón møøt ja ñidø'ø̄xy Rahab tmajnk'atti ja Booz, jøts ja Booz møøt ja ñidø'ø̄xy Rut tmajnk'atti ja Obed, jøts ja Obed t'u'nk'aty ja Isai. ⁶ Jøts ja Isai t'u'nk'aty ja rey David, jøts ja rey David møøt ja tø'ø̄xyøjk midi ja Uriás wyinaty tø t'atsnidø'ø̄xy'aty, ja'ats idø'ø̄n tmajnk'ajttip ja Salomón.

⁷ Jøts ja Salomón t'u'ngi ja Roboam, jøts ja Roboam t'u'nk'aty ja Abías, jøts ja Abías t'u'nk'aty ja Asa. ⁸ Jøts ja Asa t'u'ngi ja Josafat, jøts ja Josafat t'u'ngi ja Joram, jøts ja Joram t'u'nk'aty ja Uzías. ⁹ Jøts ja Uzías t'u'ngi ja Jotam, jøts ja Jotam t'u'nk'aty ja Acáz, jøts ja Acáz t'u'ngi ja Ezequías. ¹⁰ Jøts ja Ezequías t'u'ngi ja Manasés, jøts ja Manasés t'u'ngi ja Amón, jøts ja Amón t'u'nk'aty ja Josías. ¹¹ Jøts ja Josías t'una'jk'aty ja Jeconías, namay ja'adi møøt y'uch myigu'ukti. Winet ets ja israelit jaa'y idø'ø̄n yiknajtswa'wigyøjxtøø jam jadu'ukpi etjotp midi yiktejp Babilonia.

¹² Tøts ja jade'en wyinaty y'ukjaty ku ja Jeconías tpaajty ja y'u'nk midi txøøw'ajtp Salatiel, jøts ja Salatiel ja Zorobabel ja y'u'ngip. ¹³ Jøts ja Zorobabel t'u'ngi ja Abiud, jøts ja Abiud t'u'ngi ja Eliaquim, jøts ja Eliaquim t'u'ngi ja Azor. ¹⁴ Jøts ja Azor t'u'ngi ja Sadoc, jøts ja Sadoc t'u'ngi ja Aquim, jøts ja Aquim t'u'ngi ja Eliud. ¹⁵ Jøts ja Eliud t'u'ngi ja Eleazar, jøts ja Eleazar t'u'ngi ja Matán, jøts ja Matán t'u'ngi ja Jacob. ¹⁶ Jøts ja Jacob t'u'ngi ja José midi tñidø'ø̄xy'ajtp ja María midi tyaagip ja nwindson'ajtim Jesús, ja Cristo midi yiknitsokp.

¹⁷ Makmajkts najtska'axits idø'ø̄n ja tpaajty ku ja cho'onda'aky Abraham ñikøjxp jøts ja ttamigugøxi ja David. David ñikøjxpts jadu'uk cho'onda'aky jøts ja jaduk jade'en ñajtska'axidyøø kunim ja israelit jaa'y yikwaanøjkxtøø aguwan'ampy jam Babilonia. Winetnims jadu'uk cho'ondaajky, ja'ats najtska'axidøø jaduk jadine'en ja makmajkts najtska'axi kunim kyaxi'jky ja Cristo ja yiknitsokpi.

Ku ja Jesucristo kyaxi'jky

¹⁸ Yide'en idø'ø̄n y'ejxi tyiyi sa jaty yjajty kyubejty ku nwindson'ajtim Jesucristo ojs kyaxi'iky: Ja María midi tyaagip, ja' idø'ø̄n wyinaty najts'awani'ejtnip jøts ja tmøøt'amajtskit ja José; nawyaawajnidipnim ja wyinaty ku ja María jam tnikøjxp'ajtni ja mutsk, Dios idø'ø̄n ja tuujnip jøts ja Espiritu Santo myøk'ajtin jade'en tyikmajada'aky.

¹⁹ Øy yikxonts ja José yjaa'y'aty midi idø'ø̄n ñiyaa'y'ajtpy, ka'ap ja pø̄n sa tjadyimñø̄jmi jøts ja María kyayikpøky'ext; myajtstu'utwampy ja' jøts ja ka'ap pø̄n ttuknijawiwya'añ.

²⁰ Ixam idø'ø̄n ja wyinaty jade'en wyinmay ku ja ojs agumaa'y'ampy tyuk'ijxyi ja Dios y'ankilis jøts ja ojs ñii'mxyi:

—José, metsxi mdeety'amø̄jip ja David, kidits mdsø'ø̄gi, møøt amajtski yø María. Yikaxø'ø̄kwampy mutsku'nk tu'uk, Dios y'Espiritu Santo jade'en myøk'ajtin tyikwingaxø'ø̄kp. ²¹ Mixyu'nk ja yikaxø'ø̄kp, ja'ats meets ja xyøøw mbiktaajkip JESÚS. Jade'en'ampy idø'ø̄n ja jade'en txøøw'att ja'agø̄jxp ku ja pojkipitumbi jaa'y ja ttuknitso'ok'att ja pyøky.

²² Tyimyjajt tyimgyubajts idø'øn ja jade'en sa nwindson'ajtim Dios wyinaty tø tyikwa'añ ja kyugajpxy ku ja wyaañ:

²³ Jøtpyip tu'uk ja kiixye'dø'øxy midi amaay tsinaapy, yikaxø'økpts ja tu'uk myajnkun'k, Emanuel ja xyøøw'atp, midi ayuujk pidsømp: Dios adøm møøt.

²⁴ Xjats kuts ja José ojts ñiwijy, jøts idø'øn ja jade'en tpaduun sa Dios y'ankilis ja wyinaty tø y'ane'emyiyi, jøts ja ojts tniðø'øxyiky ja María. ²⁵ Jøts idø'øn ja ka'ap jade'en tmøøtsøønim sam amajtsk'ajtin ñaxy kunim ja tø'øxy tyikaxi'iky ja myijawyeenu'nk; jøts ja ojts txødijy JESÚS.

2

Ku ja wijyjaay ojts t'ats'ejxti ja maxu'nk Jesús

¹ Jam ja Jesús ojts kye'exy Belén, jam kajpjotp midi Judeit etjotp, ja Herodes idø'øn jam wyinaty windsøn'ajtp, ja' wyinaty tuki'iyi tñitanaapy ja naajx jøts ja kajp. Xjats jam Jerusalén yja'attøø winaagin wijyjaa'dyi midi tsoo'ndip xøøbidsimy, ² ja'ats jam ojts tyiknidøwidi, yide'en ja wyandøø:

—¿Ma dø'øn ja tø kye'exy ja' pøn tniwindsøn'atp ja ya'it israelit jaa'y? Tøts øøts ja n'ejxpaajti ja myaadsa' ma øø tø ndsøøn, icyats øøts ja tø nnimiñ jøts øøts ja nwindso'øgiwya'añ.

³ Kuts ja windsøn Herodes ja ojts jade'en tñimadøy jøts ja tyatøjkiyi ja jotmay, nayide'en niduki'iyi ja Jerusaléngit jaa'dyi. ⁴ Winets ja windsøn Herodes tñankñamyujki niduki'iyi ja israelit teety windsøndøjkti jøts nayide'en pøn jaty tkajpxwejttip ja jaa'y, ja'ats idø'øn ja ojts ttiibyiky ma et idø'øn ja Cristo wyinaty kyaxø'økwa'añ. ⁵ Xjats ja tñimaadyøø:

—Jam Judeit etjotp ma kajp jam txøøwi Belén; pø yide'enimxi ja Dios kyugajpxy jekyip tjaadyañ:

⁶ Ja kajp midi yiktejp Belén, midi jam Judá etjotp, kidi tyimñugo kajp yø' sam o midi kajp ma jaty jam yikutukti ja windsøndøjkti wine'enin yjam'atti jam Judá; jam ja kyaxø'økt tu'uk ja møj windsøn, midi øts nIsraelit kajp x'ejx'ejtip.

⁷ Winets ja Herodes amaa'tsk twaadsøø ja wijyjaa'dyi midi idø'øn jam wyinaty tø choondi xøøbidsimy, jøts ja ojts ttiibyiky juuni dø'øn ja wyinaty tø t'ejxpaatti ja maadsa'.

⁸ Jøts ja ojts tkexy jøts ja ñøjkxtit jam Belén, yide'en ja tñimaay:

—Nøjkxti jam, øyim yikxonim idø'øn xyiknidøwidit ja mixyu'nk; kuts xpaattit, jatyits meets ja xnigajpxt jøts meets ja xukmado'ot, jøts øts ja nayide'en n'atswindsø'øgit.

⁹ Kuts idø'øn ja windsøn Herodes ja jade'en ñimaajyidøø, xjats idø'øn ja wijyjaay choo'ndøø. Jøts ja maadsa' ja wyinyø'øyidi midi ja jam wyinaty tø t'ejxti ma dø'øn ja jam choo'ndi xøøbidsimy, yø'øpy idø'øn ja' kunim ja yja'ljty jam ma dø'øn ja mutsku'nk Jesús wyinaty, jamnimts ja yø'øy'amøjkiyiñ. ¹⁰ Ku dø'øn ja wijyjaay ja jade'en t'ejxti ja maadsa', xjats ja yjantyimxyondaktøø; ¹¹ kuts ja tyøjkidøø jam tøjkjotp, japts ja tpaattøø t'ejxtøø ja mutsku'nk jøts ku ja tyaak María ja jap møøt. Winets ñagyuxendyaajkidøø jøts ja twindsø'jkidøø ja mutsku'nk. Ojts ja tyikni'awa'atsti ja oori, ja poom, jøts ja pa'akxuu'kpi midi tyejtíp mirra. Jade'en ja tyikni'awa'atstøø, ja'ats ja ojts ttamay'atti, ja' ja ojts ttawindsø'øgidi. ¹² Kuts idø'øn ja wyinaty jade'en tø t'ukwindsø'øgidi, xjats ja yiktukmadoodøø agumaa'yjotpy jøts ku ja ka'ap nayide'en y'ukwimbejtnidit midi ja wyinaty tø tmendi, ma ja windsøn Herodes ja jam wyinaty tø t'ukpaatti. Xjats idø'øn ja wyimbejtnidøø, abiktyuu' t'pøjktøø jøts ja ñøjkxniði jam pyuxkøjxp kyajpkøjxp.

Ku ja maxu'nk Jesús ojts yikmigue'exy jøts yikminijxy jam Egipto

¹³ Tøts idø'on ja wijyjaa'y jam wyinaty choondi, ku ja nwindson'ajtim ja y'ankilis ñanky'eixøø jøts ja José ja agumaa'yjotpy ojts t'ixy, yide'en ankilis ja ñimaajyøø:

—Tsojk pidø'øk, møøt tsoon yø mutsk møøt yø tyaak jøts mgaknøjkxtit jam Egiptit etjotp, taa'nidi jam. Pøni wine'en jam mdaa'nidi øtsnim ja kø'øm nnigajpxp, ja'agøjxp ku Herodes yø t'ixa'awa'añ yø mutsk jøts yø tyik'ookwa'añ.

¹⁴ Xjats ja José ojts pyidi'iky, jøts ja ojts koots tsa'angue'eky ja mutsku'nk, jøts ja tmøødiyøø ja tyaak jøts idø'on ja ojts tmøøtnijkxy jam Egipto. ¹⁵ Jam ja chinaadyi jeky kunim ja Herodes y'ø'jky. Jade'en'ampy idø'on ja jade'en tyimyajty ti mibaat ja Dios kyajpxy jadi'iñi y'uknaxt pø patyxi wyinaty yide'en tø tyikwaañ ja kyugajpxy: “Egiptit etjotp øts ja n'U'nk nyiktsø'øñ ku øts ja nwaadsøø.”

Ku ja Herodes tyikutuky jøts ja mutsk mixyuna'jk y'oo'køxtit

¹⁶ Kuts ja Herodes tnija'wiyi'iñ jøts kudam ja wijyjaa'y ja wyinaty tø wyin'iiñiyi, xjats ja yjantyimy'ambijky; jøts ja ojts tni'ane'emy ku y'oo'køxtit ja mixyuna'jk. Majtsk jumøjt pibaat ja ojts tñankyik'øøgyiyi wine'enin ja mixyuna'jk jam wyinaty Belén, jøts nayi wine'en ja kajp jam tmiwingon'aty. Ja jumøjt idø'on ja pyayø'øpy sa ja wijyjaa'y ja wyinaty tø tyukmadøyi. ¹⁷ Ka'pxy idø'on ja jade'en yajty sa ja kugajpxy Jeremías wyinaty ja nøky tø tja'ay ku ja wyaañ:

¹⁸ Yikmadoop ayuujk jam Ramá,

sam yjawi øy pøn ti tpaji'iy tpaya'axy;

ja tø'øxyøjk Raqueldam idø'on y'u'nk y'una'jk tpajipy tpayaxp jade'en,

jøts ja ka'ap tkupiky jøts ja yikpa'ayo'ot, pø tøxi y'u'nk y'una'jk ja y'oo'køjxni.

¹⁹ Xjats ku y'ø'jky ja Herodes, winets nay'agumaa'yjotpy tja'wiyi'iñ ja José jøts ku t'ijxy tu'uk ja Dios y'ankilis jam Egiptit etjotp, jøts ja ñimaajyøø:

²⁰ —Pidø'øk, jøts xmøødit yø mixyu'nk yø Jesús møøt yø tyaak, wimbejtnidi nøjkxnidi jam Israelit etjotp, tø ja y'oo'køjxnidi pøn jaty y'ijty tyik'ookwandip yø mutsku'nk.

²¹ Winets ja José pyidi'jky jøts ja tyiktsø'øñ ja mutsku'nk. Ja Jesús idø'on yikwaadso'omp møøt ja tyaak jøts ja ojts ñøjkxti jam Israelit etjotp. ²² Kuts ja José tnija'wiyi'iñ jøts kudam ja Arquelao jam wyinaty wyindsøn'aty Judeit etjotp, ja tyety Herodes ja kyudanaapy ku dø'on ja wyinaty tø y'ø'øky, jøts ja José tsø'jkip ja', jade'ents ja jade'en'ampy kyanijkxy; tøts idø'on ja wyinaty yiktukmadoogojmi agumaa'y'ampy jøts ja ojts ñøjkxti jam Galileit etjotp. ²³ Kuts idø'on ja jam yja'attøø, jøts ja ñøjkxti tsinaabyi ma kajp txøøwi Nazaret. Ka'pxy idø'on ja jade'en tyuujni yajty sa Dios kyugajpxy wyinaty tø wya'andi jøts ku ja nwindson'ajtim Jesús jam kyugajpi Nazaret.

3

Ku ja Juan Bautista kya'amaay jam abak etjotp

¹ Tøts ja tiempi wyinaty ñaxy jøts ja Juan Bautista midi yiknøbajtp, jam wya'kaxi'jky Judeit y'abak'etjotp, jøts ja jam kyajpxwa'kxy, ² yide'en ja jam wya'añ:

—Jawidi mbøky, yiktigajtsti mdsinaa'yindi, ja wyingøñ ja Dios kyutujk midi ja tyanitanaapy ja yjaa'y.

³ Yø Juan idø'on ja' midi ja kugajpxy Isaías ñigajpx ku ja yide'en tjaadyaañ:

Yikmadoop ayuujk jam abak etjotp ku wya'añ møk'ampy:

“Awejxidi ja nwindson'ajtim y'ixpøjkin;

yiktøwdi yiktuuda'akti mwinmaa'ñ.”

⁴ Kameeyi pøjk idø'on ja Juan jam wyinaty wyet'ajtpy, jøts jiyujk'ak tendsum'aty, ja mu' dø'on ja jam chu'chpy jøts jiyujk pa'ak ja tji'kxy midi jam muum ujtsjotp, ja'ats idø'on ja jam ñidsinaapy. ⁵ Jøts idø'on ja jam øy pøn jaa'y ñimiñiyi jøts ja tmadowdi sa wya'añ, mendip ja' pøn tsoo'ndip jam møj kajpkøjxp Jerusalén, nayide'en wine'enin jam pøngapøn

chøøniidi jam Judeit etjotp, midi tmiw'ingon'ajtp ja nøø midi txøøwip Jordán; ⁶ kuts idø'øn ja jaa'y ja pyøky tmayatsti, jøts ja Juan ja tyiknøbety mā ja Jordángit nøø jam.

⁷ Jøts ku dø'øn Juan ojts t'ixy jøts ku ja fariseotøjk may'ampy yjanchmendi nøbajtpi møøt ja saduceotøjkti, jøts ja tniṁaay:

—jMee miku'! ¿Pøn mee tø mni'i'mxyi jøts ku jade'en mgayiktabayø'ødyit ja mbøky, jøts ku yø'øyi chøkyi ku meets ya nøbajtpi tø mmiñ? ⁸ Yikxon idø'øn mjaa'y'attit, wan idø'øn tyik'ijxy jøts ku ja mdsinaa'yin tø xyiktigatsti, ⁹ jøts kidi mee kø'øm mnawya'añidi namyikajxim: “Tixi ka'ap ti chøkyi kumi ja Abraham adøm n'apteety'amøj'ajtyindip”; jøts ka'ats yjade'eni ti Dios kamajyip øy ja pøn ttukmigu'uk'att ja Abraham pøni pøn ja kø'øm y'a'ejxip. ¹⁰ Jøts tsojk ja nøjkx yiktidyuñ pøn jaty tkami'øy'ajtip ja Dios. ¹¹ Tiy janch ixyam ndyimdyukmadowdi jøts ku øts yø'øyi tø nnimiñ jøts meets nøø nduktanøbattit. Jade'en'ampy yikni'jawit jøts ku mdsinaa'yindi tø xyiktigatsti; jats øts tu'uk ix'oojk xpamiñ pøn meets Espiritu Santo mduktatøkiyip jøts ja' tmiime'ent ja tiidyu'unin. Møk'ampy kutujk ja tmiimiñ, nijuuni øts ja møøt nganamyibaat'atiyit. ¹² Jade'en ja ttu'unt ja na'xwii'ñit jaa'y sam ariindøøm yikwigumy'in, abiky ja tpi'ktaajkit ja y'ak jøts ja tni'ø'øty ja jøøn midi nijuuni kape'tsp, jøts ja ariinbajk abiky yikpøk'jø'økt. Jade'ents idø'øn ja jaa'y yiktu'undit sa pønjabøn tmi'øy'aty tkami'øy'aty ja Dios.

Ku ja Jesús ñøbejty

¹³ Xjats idø'øn ja Jesús yja'jty jam mā ja Jordánk nøø, jam ja chøøñ Galileit etjotp jøts idø'øn ja jam yja'jty mā ja Juan wyinaty, ja' ja ñini'jkxpy jøts ja yiknøbatit. ¹⁴ Ka'ap ja Juan ja twa'añ jøts ja tyiknøbatt, yide'en ja Jesús yikni'ṁaay:

—¿Jawyeen me xtsøky jøts me nyiknøbatt? Pø metsxi dø'øn ndijy xyiknøbatp.

¹⁵ Yide'en ja Jesús y'adsøøy:

—Wan idø'øn t'ukjaty; jade'en ne'egi ndyimdyøø'jint jøts ku ja'ayi nbadu'unint sa Dios Teety tyiy'ajtin wya'añ.

Kyupøjk idø'øn ja Juan ja jade'en. ¹⁶ Ja'ayi ja Jesús ñøbejty, jøts ja pyidsiimy jam nøøjotp. Winets nay jaty adsu'jky y'awaajch ja tsajp, jøts ja ojts t'ejxpaatti ja Dios y'Espiritu Santo ku ja ñigida'agy sam tsapakin jøts ja tyakakpajti. ¹⁷ Winets ja Dios Teety y'ayuujk yikmadøøy, yide'en ja jap tsajpjøtpy wya'añ:

—Ya'at øts idø'øn n'U'nk'ajtpy, yø' øts idø'øn ndsøky'ajtpy, njantyajotkujk'ajtpyts øts yø'.

4

Ku ja Jesús yikjot'amutsk'ejxwa'añ

¹ Xjats ja Dios y'Espiritu Santo ojts yikni'jkxyi ja Jesús jam abak etjotp, jøts miku' ja jam jyot'ejxit.

² Wixijxxyøøw wixijxchuu' idø'øn ja jam y'ayuu'ajty, jøtsnim yuu ja pyaajti. ³ Winets miku' ja jam ñimeejni jøts ja yikpøktyunwa'añi, yide'en ja ojts ñi'imxyi:

—Pøni janch ku me mjanchdiosu'ngi, yiktsapakakyjat yø tsaa.

⁴ Xjats ja Jesús y'adsøøy:

—Yide'en Dios kyajpxy wya'añ: “Kuuyi Dios kyajpxy myøji, kidi ja'ajip na'xwii'ñit jaa'y nugo tyajujky'attip ti jaty yikjøø'kxp.”

⁵ Winets miku' ja ojts yikni'jkxyi jam Jerusalén midi Dios kyunuu'kxkyajp'ajtpy, jamts ja ojts yikøxpetyi tsaptøjk kubajk ⁶ jøts ja ojts ñi'i'mxyi:

—Pøni janch Dios U'nk mets, kajtswoon ya; pø nømpxi ja Dios kyajpxy jøts ku:

Ja tñøjmit y'ankilis jøts me myik'ejx'ett jøts ku me ka'ap ti mjattit.

Jøts ku mets ja ankilis mdsa'anjø'økit,

jøts mdeky tsaa kyakumit kyayo'odsit.

⁷ Xjats ja Jesús t'adsøøy jøts ja tni'ṁaay:

—Janch nayinømts Dios kyajpxy: “Kidi mDios xjot'ixy.”

⁸ Xjats ja miku' ja ojts wyaanøjkxkojmiyi jam møj kojpkøjxp, jøts ja jam tyuk'ejxøø wine'en ja kajp naxwiiñ jøts ku janchkumeeñ janchjotkujk; ⁹ yide'en ja ojts ñii'mxyi:

—Ngøyajjøjxp øts yø kajp tuki'iyi jøts mets yø xja'bøkøxt, pøni xwinguxanaapy øts, pøni xwindsø'jkip øts.

¹⁰ Winets ja Jesús wyaañ jøts ja tnimaay:

—Miku', jiwā'ak, kidi øts ya xwin'ixy, pø yide'ents Dios kyajpxy wya'añ: “Ja Dios Teety tu'ugyi mwindsø'øgip, ja' mbadu'ump pøni sa ja wya'añ.”

¹¹ Xjanimts ja nwindsøn'ajtim Jesús ja miku' myajtstujtiyøø, jøts ja ankilis ja ñimeejnøø, ja'ats ja ojts pyudøkiyi.

Ku ja Jesús tpadøjkiyñ ja tyunk

¹² Kuts ja nwindsøn'ajtim Jesús tnimadøø yøts ku ja Juan jam wyinaty puxøjkjotp, winets ja ojts ñijkxy jam Galileit etjotp. ¹³ Jøts nika'ap ja tyaa'niyiñ jam Nazaret, ne'egi ja ojts ñijkxy tsinaabyi ma ja kajp jam mejy'am midi Zabulón etjotp jøts Neftali etjotp, jam idø'on ja ojts ñijkxy Capernaumit kajpkøjxp. ¹⁴ Ka'pxy idø'on ja jade'en tyuujni yjajti sa ja Dios kyugajpxy Isaías wyinaty tø wya'añ ku ja yide'en tjaadyaañ:

¹⁵ Meets Zabulónit jaa'y, meets Neftalít jaa'y, ma tuu' wingon ñaxy jam mejy'am, midi yiknido'onip xøøbidsimy ku nnøjkxint jam Jordán.

Meets Galileit tsinaabyidi, pøn ka'israelit jaa'dyi.

¹⁶ Jade'en meets x'ejxpaattit midi Dios Teety ñajtskajxip sam ja jajin pøn wimbeets kugoots tyimy'ejtnidip,

nisudso mgawinmaa'nbyaatti pøni sadam idø'on ja Dios mdsøkyidi, tøts ja tyikujajtaagi tyikudøø'kxaagi pøn ja pyøky tmi'ookwanidip jadi'iñi, jøts tø ja Dios mduu'mø'øyidi sudso mnitso'ok'attit.

¹⁷ Kuts ja Jesús ja'ayi jam Capernaum kyajpkøjxp yja'aty, yide'en ja kyajpxwa'kxnibøjkiyiñ:

—Jawidi mbøky, yiktigatsti mdsinaa'yindi, ja'agøjxp ku ja wyingøñ ja Dios kyutujk midi ja tyanitanaapy ja naxwii'ñit jaa'y.

Ku ja Jesús twaadsøøy nimaktaxk ja ajkxmajki

¹⁸ Jam ja Jesús wyinaty ñaxy mejpya'am midi jam Galilea etjotp, ku ja t'ejxpaajty nama-jtsk ja jaa'y midi ttukmiga'ax'ajttip, tu'uk txøøw'aty Simón, nayi yikxøømøøpy ja Pedro, jøts jadu'uk Andrés. Ajkxmakk idø'on ja tyunk'ajttip ixam ja wyinaty tyimñiwejtspatti ja tya'ajkxmajk. ¹⁹ Winets ja nwindsøn'ajtim Jesús ja ñimaajyidøø:

—Mada'akti, møøt widettik øts jøts nduknijawidit sudso jaa'y ja nitso'ok'ajtin tpaatt.

²⁰ Jøts idø'on ja nay jatyi tnajtswøjdidøø ja tya'ajkxmajk jøts ja ojts tmøødidi.

²¹ Tø wyinaty waani yø'ødyi, jamts ja Jesús ojts t'ejxpatkojmi nayi namajtsk ja jaa'dyi midi tukjaa'dyi: tu'uk yJacobo'aty jøts jadu'uk Juan txøøwi, ja Zebedeo dø'on ja y'una'jk. Jam ja wyinaty møøt ja tyeety barkijotp, ja tya'ajkxmajk ja jam wyinaty y'adajkidip. Winets Jesús ja ojts yaajxiyidi, ²² jøts ja nay jatyi tmajtstuttøø ja tyeety jam barkijotp, jøts idø'on ja tmøødidøø ja Jesús.

Ku ja Jesús tyik'ixpijky ja mayjaa'y

²³ Øy ja Jesús øy madsoo tyimwyidity jam Galileit etjotp, ku ja øy magajp yja'aty jøts ja yik'ixpiky jam tsaptøjkjotp, jøts ja tkajpxwa'kxy ja Dios y'øgyajpxy midi ja tyanitanaapy ja yjaa'y, jøts ja øy pønjabøn tyiktsø'øky pøn jam tigati pa'am pøjkip. ²⁴ Jøts ja Jesús yiknija'wiyiiñ, ñija'wigyøjxtøø ja' pønity tsinaadyip jam Siria etjotp, ja'ats ojts ja pyamaa'y tyikmendi pøn jaty jam o tigati pa'am pøjkidip ajnidip, jøts ñayikmemidi ja' pøn ja miku' tø tyatøkiyidi jøts pøn ja mø'ødyi pa'am pøjkidip, pøn køxujxtip pakxujxtip. Xjats idø'on ja nwindsøn'ajtim Jesús ja tyiktsokijxy. ²⁵ Jøts idø'on ja mayjaa'y jam jade'en

yja'atti choondi pøn tso'ondip jam Galileit etjotp, jøts ja yikpawidity ja Jesús. Jam ja'adi pøn kugajp'ajttip mā jaty ja kajp midi kyutujktaajk tjagyajptip Decápolis jøts Jerusalén, jøts nayide'en pøn tso'ondip Judeit etjotp, jøts nayide'en jamidi pøn kugajp'ajttip jaduk-tamajñ'ampy mā ja Jordánit nøø tyañ.

5

Ku ja Jesús ojts kya'amay jam kojpkøjxp

¹ Xjats ku ja Jesús ojts t'ixy ja mayjaa'y jam, winets ja ñijkxy kojpkøjxp jøts ja jam y'ixaajky, jamts pyabøjkpitøjk ja ñachinaa'y'awidejtøø, ² jøts ja ojts yide'en tyik'ixpøjktøki:

Ja' pøn nekim t'ejxtip

³ —Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaattip ja Dios kyutujk midi ja tyanitanaapy ja yjaa'y.

⁴ Tya'øy'ajtidip Dios kyunuu'kxin ja'adi pøn jotmayaxtip pøn jotmay'oo'ktip, ja' idø'øn Dios ayo'ejxidip.

⁵ Tya'øy'ajtidip ja' Dios kyunuu'kxin pøn myiduda'aky'ajttip ja y'awejax'ajtin, ja'ats pyaattip ja øy'ajtin midi ja Dios tø tni'adsowi.

⁶ Nayide'ents ja tta'øy'ajtmidit ja Dios kyunuu'kxin pøn tjantyimtyojktip ja øy'ajtin ja tiy'ajtin midi Dios yja'ajip, pudøkiyidipts ja' jøts ja jade'en ttu'undit sam idø'øn ja ttsokti.

⁷ Ñayi tya'øy'ajtidip Dios kyunuu'kxin ja'amidi pøn t'ayo'ejxtip ja myigu'uk, ayo'ejxidipts Dios ja nayide'endi.

⁸ Tya'øy'ajtidip Dios kyunuu'kxin ja'adi pøn ja yjanchja'win tu'ugyi yik'ejttip, kuwanits ja Dios ja tpaattit.

⁹ Tya'øy'ajtidip Dios kyunuu'kxin ja'adi pøn yikxon tkajpx'øydip jøts tsep tkananktyuñidi, ja'abi jaa'y idø'øn Dios u'nk'atidip una'jk'atidip.

¹⁰ Ñayi tya'øy'ajtidip Dios kyunuu'kxin ja'amidi pøn tku'ayo'ombaajtidip ja øy chinaa'yin, jøts yikjemdundi yiktedundi, ja'abits idø'øn paat'ajtidip ja Dios kyutujk midi ja tyanitanaapy ja yjaa'y.

¹¹ Ñayi tya'øy'ajtidip Dios kyunuu'kxin ja'amidi pøn yikjemnimaadyip yiktenimaadyip uk yikjemdundi yiktedundi, yikniwambatti a'øy'ampy øts køjxp. ¹² Kidits xkumayjawidi, xonjajti jotkujk'atti meets, møj'ampy meets ja nøjkx mwingaxø'jkxiyi jap tsajpjøtpy, pø nayide'enxi ja yikjemdundøø yiktedundøø pøn jaty tø y'atstsøñidi y'atstanidi pøn kugajpxy'ajtidip ja Dios.

Ja' pøn jade'en naxwiiñ tundip sam ja jaj tyuñin sam ja kaan tyuñin

¹³ Jade'en meets idø'øn sam kaan tyuñin midi wa'ats midi naxwiiñit jaa'y yiktundip jøts chul'ch kyawindigø'ødyit. Nayide'en idø'øn ndejint mdunkpaattit ku mmigu'uk xuk-mado'odit ja Dios yja' sudso'ampy y'anmija'win kyawindigø'ødyit. Kuts ka'ap jade'en mdu'undit tø wyinaty mbidsømdi ejxim ja kaanin midi kawa'ats midi katump.

¹⁴ Kuwani myik'ejxtit myiknijawidit nayide'en sami kajp yik'ijxyin midi jam ejxin'am midi jam kojpkøjxp. Jade'en meets idø'øn ejxpajt mwa'andip sam jaj yjajyin tyii'kxyin.

¹⁵ Kidi ja'apxi yø jaj tniðøbyøki jøts ja yikpikta'akt kajuun patki'py, pø ja'axi ja wya'ant jøts ja yikpikta'akt jam ejxin'am mā ja tyikujajit tyikudøø'kxiit pøn jaty tsinaadyip jam tøjktotp. ¹⁶ Nayide'ents meets idø'ønmi, tuk'ejxti ja jaa'y ja øy'ajtin ja xondaajkin jøts t'ejxtit tnijawidit jøts kudam meets xuñ ja tiy'ajtin, mjajotwamp tam meets, myijawidipts kyunuu'kxyjawidipts ja' ja Dios Teety midi mee mnitanaajyip o madsoo midi jap tsajpjøtpy.

Ku ja nwindson'ajtim Jesús tnigajpxy sa tyu'unt ja Moisés kyutujk

¹⁷ Kidi meets jade'en mwinmaañidi jøts ku øts ja' tø nnimiñ jøts øts ja Moisés kyutujk jøts øts ja Dios kyugajpxy y'ixpøjkin nyikudigøjyidit; kidi ja'apts ø tø nnimiñ, ja'axi ø

nnimimpy jøts øts ja jade'en yikxon njaaktyimñigajpxy sa jaty ja tø wya'andi. ¹⁸ Janch øts idø'øn nwa'añ, pøni wine'en iiy tyaa'ni yø naajx yø tsajp, niwine'enints ja kutujk kyagudigøøty kunim ja tuki'iyi ka'pxy jade'en tyimyjatt pøni ti jaty idø'øn tunipnim. ¹⁹ Paty ja ka'ap yikmøj'ext ku Dios kyutujk ttanitanit ja yjaa'y pøni pøn yiin waan tkayikmøjip ja Dios kyutujk, kuts ja myigu'uk ja nayide'n ttukpabiky sam ja kø'øm tpaduñ yiin waan, ja'ats idø'øn ja Dios kamøj'ejxip nayide'en. Pønts ka'pxy tpadump jøts myigu'uk ja nayide'en ttukpabiky, møj'ejxipts Dios ja' ku kyutujk ja ttanitanit ja yjaa'y. ²⁰ Paty mee ndukmadø, pøni ka' øy yikxon mjaa'y'atti, pøni mdundip nayide'en sam yø fariseotøjkti sam yø kajpxwejpitøjkti, nijuunits meets Dios kyutujk jade'en xkapaajtiyidit midi yjaa'y ja tyanitanaapy.

Ku ja Jesús tnigajpxy sa kya'øyi ja aki jøts ja jotma'jtin

²¹ 'Tøxi xnimadowdi ku ja n'apteety'amøj yikniimaadyøø: "Kidi myikjaa'y'øøky, pøni pøn yikjaa'y'oo'kp yiktiidyu'ump ja'." ²² Yide'ents mee nnøjmi pøni pøn ja myigu'uk tmi'ambøjkp, nayi yiktiidyu'ump ja'. Uk jam o pøn ja myigu'uk tjemnøjmi ttenøjmi, tiidyunidipts ja' ja kutujk adsinaabyidi ma ja kutujktaajk jam; uk pøn tnimaapy ja myigu'uk jøts ku ja myø'øty, paat'ajtip ja' jøts ja y'ayo'ot ma jøøn jap ayodaajkjotpy.

²³ 'Paty pøni mbikta'akwandip ja myøxy jam altajrwemp, kuts jam mja'atti jøts winet xja'myatsti jøts kudam ja mmigu'uk jap tu'uk pøn mmidsep'ajtip, ²⁴ jamyits ja altajrwemp xmajstutu'uttit midi myoxwandip, jøts ja jawyeen x'atskajpx'øyidit møøt ja mmigu'uk. Pøni ti dø'øn mnadyami'ambøjkidip jøts mnamyijotjimbetidit xem yam møøt ja mmigu'uk, winetnimts jadigojk mnøjkt jam altajrwemp, jøtsnim ja xyoxtit midi jam tø x'ukyiknøjkxti.

²⁵ 'Ku pøn mni'øøniwya'añidi jøts ja myiknøjkw'a'añidi jam kudunk wyindum, namga'anim jam myiknijkxyidi, tiku yikxon xkakajpx'øyidi jøts ja møøt mnamyijotjimbetidit jadigojk, jøts kidi myiknijkxyidi jam windsøn tiidyumbi wyindump. ¿Ja ti nø'ømp ja windsøn jam? Pø mgøyakidipxi ja jam jøts mee myikøyakt ma ja tajk mayojr jamdi, ja'ats mee myikpuxøjktøkiyip jøts mee myiktsu'umt. ²⁶ Øts idø'øn wamp, jøts ku jaanim mbidsø'ømdit ku wyinaty tø ja multi xkubatkojxti.

Ku ja Jesús tnigajpxy pøn tø'øxy yaa'y nabyøjkkidip

²⁷ 'Tø meets inet ja xnimadøy ku jekyip yide'en yjawa'andi: "Kidi mmigu'uk ñiyaa'y ñidø'øxy xpøjkyi." ²⁸ Yide'ents øts nwa'añ, pøn ja'ayi t'ejxip ja tø'øxyøjk øy ja nugo y'am yjotp yjawnmay, pøkyumpt idø'øn ja jade'en.

²⁹ 'Pøni ka'ap yø mween y'øyi ku yø mduktunk'aty jøts myikpøkyunwa'añ, jade'en ne'egi mdyimdyø'øt jøts ku mnawyenjuudit, jøts jagam xpikta'akt ja mween; ne'egi øy'ajtp jade'en ku ja'ayi wyindigø'øty midi myikpøkyunwajnip, jøts kidi amuum mwindigøøgyixy, jøts kidi amuum mnijky jap ayodaajkjotpy. ³⁰ Uk nayide'ents mgø' myikpøkyunwa'añi, ne'egits xkajtspøtt jøts køtuk mda'ant; ne'egi øy'ajtp jade'en ku ja'ayi wyindigø'øty midi myikpøkyunwajnip, jøts kidi amuum mwindigøøgyixy, jøts kidi amuum mnijky jap ayodaajkjotpy.

Ku ja Jesús kyajpxwijy sudso ja amajtsk'ajtin ñaxy

³¹ 'Nayi tø jekyip yiknigajpxy: "Pøni pøn ñidø'øxy tmajstutu'utwamp, tiy'ajtingøjxpts ja tminawya'kxit, kojpu tu'uk ja nøky." ³² Yide'ents ø nwa'añ, ku pøn yaa'dyøjk ñidø'øxy tminawya'kxyi a'øy'ampy, ku ka'ap ja wyinaty ja wenk yaa'dyøjk tmøøt'aty, møj tundigø'øyin ja tyumpy, jøts ja tø'øxy pyøkyuñ ku ja wenk yaa'dyøjk ja møøt y'amajtskimyi. Nayi pøky ja yaa'y nayide'en taja'jtipp pøni myøøt'amajtskip ja tø'øxyøjk ja' midi tø wyinaty yikmajstutu'uty.

Ku ja Jesús tnigajpxy ku ka'ap Dios køjpx nugo ndaay'ajtin

³³ 'Nayi tōts inet xnimadowdi ku ja mdeety'aptōjk jekyip yiknimaadyi: "Pōni ti mni'adso'owip Dios wyingujkp, kidits meets ja xka'ukyik'adujkni ja mgajpxy ja m'ayuujk." ³⁴⁻³⁵ Øtsts wamp jōts pōni ti ja mmigu'uk mdamini'adso'owip, ka'ap ja Dios nugo xyiktestigi'att. Ni xkakajpxpaattit ja tsajp jōts ja naajx, jabi Diosxi ja nayide'en yja'ajtpy; ni ja Jerusalén kajp xkakajpxpaattit, jabi nay ja Dios mōj yikutujkpxi kyajp ja'. ³⁶ Uk kō'ōmbaat mgubajk x'awanidi ku ja kyayikmibiky midi mjadukjanchjawiwandyip o pōn, kidits jade'en nugo mwa'andi, kidi kō'ōmipxi meets mwaay mgubajk xyik'ōyi, pō nay Dios ja jade'en kō'ōm mmōjyidip. ³⁷ Ka'ap nugo ti xkajpxjimbettit xkajpx'adōjtīt pōni ka'adam ja ka'pxy xnijawidi, jade'ents idō'ōn ja miku' ja tyunkjōjōp tyikyō'ōy ku xkajpxyondi.

Ku ja Jesús tnigajpxy sa pōn ja pyōky ñanktyukubetyidi

³⁸ 'Nayi tō net xnimadowdi ku ojts jekyip yide'en yiknigajpxy: "Jōts nayide'en pōngapōn ja myigu'uk tyik'ayo'ombaat pōni ti ayo'on ja jade'en ttuñ, nayide'ents idō'ōn ja tyimiyktu'unt." ³⁹ Yide'ents ø nwa'añ: Jōts kidi mee nayide'en xuñ sam ja ka'ōyjaa'yindi; pōni mgojxip mdse'jkīp, ja' øy ku xmaa'kxuktīt. ⁴⁰ Kuts øy pōn mniwambatwa'añidi jōts adsepkojxp myikpōjkxiwya'andi ja mnijān, mo'odits, jōts pōni yjaaktyimbyōkwampy ja yukwop, kidits ayuujk nugo xyikyondi, mo'odi. ⁴¹ Pōni myiktaguwa'anidip jōts tsimy xpadsō'ōmdit, jōts ja jam xyikja'attīt pōni mā tō t'a'ejxidi, mjaaktyimdyuujnidipts ja may'ajt ja' jōts ja jawaani jagam xyikja'jtīdit. ⁴² Pōni myik'amidoodip øy ti, mo'odits, kidi meets ja kamō'ōyin x'ixy; nayide'en pōni pōn anuu'kxy øy ti m'amidojīdip, kidi mee tō mwa'akjimbejtīni jōts mmigu'uk mōj may x'adsowdi.

Sudso yikminamyayit ja midseptōjk

⁴³ 'Nayi tō xnimadowdi ku jekyip yide'en yiknigajpxy: "Ja' mōōt mnamyayit pōn mōōt mnamyigu'ukwa'añi, jōts ja kawin'ijxyim xjawit pōn mōōt mnamyidsep'atyī." ⁴⁴ Yide'en ø nwa'añ: Jōts xtsoktīt xmiyujy'attīt ja mmidseptōjkti, ødyejtī ja' pōn mga'ødyejīyīdip, pudōki ja mmigu'uk pōn mjami'ajkidip mjamijotma'jtīdip, ku'amidowidi meets ja' pōn mjemniamaajyīdip mdeniamaajyīdip, pōn mjemduujnidip mdeduujnidip. ⁴⁵ Jade'en'ampy meets ja Dios Teety tsajpjotpit mja'bōkidit jōts ja m'u'nk'atīdit; pō tum ja'axi tyikni'amp tyikni'ajp ja øyjaa'y ja ka'ōyjaa'y, uk ku tyu'uy ja'ats ja nōō tuu tkajxp. ⁴⁶ Kuts meets ja'ayī mōōt mnamyayī pōn mee mmiyujy'ajtip, çtīt ja jade'en ñiwya'ant, ti may'ajt meets ja jade'en myiktagumōyīp? Pōn ja jade'en tkajajtp, yikugubajtpī paat ja jade'en ttuñ. ⁴⁷ Uk xkajpxpoo'kxtīt ja'ayī pōn jaty mmigu'uk'ajtip pōn tu'ugyī ja mdsinaa'yīn mōōt ñabyaadyī, çti øy'ajtin meets idō'ōn jade'en mdumpy? Ti pōn ja jade'en tkajajtp, pō nayide'enxi ja y'adō'ōtstī pōn Dios tkajanchja'widip. ⁴⁸ Yikxonts mjaa'y'attīt øy wa'ats, nayide'en sam ja mgunuu'kxyeety midi jap tsajpjōtpy.

6

Ku ja Jesús tnanky'ixpikyī ja ødyu'unin

¹ 'Øyim x'ejxtīt, jōts kidi mdsinaa'yīn nugo xa'ødyōki ñadyjyī ja mmigu'uk xuk'ejxtī øy paat. Pōni m'adō'ōtswandipts jade'en, niwine'enints meets Dios Teety may'ajtin ja mgadagumōyīdit ja' midi jap tsajpjōtpy. ² Paty ku xpudōkidit øy pōn ayoobi jaa'y, kidits meets ja niduki'yī jaa'y xamimadyakixy, kidi mee nayide'en m'adōtsni sam ja jaa'dyī midi jam tsajptōjkjotp, midi jam nōō'am tuu'am win'ōō'ndip. Jade'en'ampy idō'ōn ja jade'en y'adō'ōtstī jōts ja kajxa'aky pyidsō'ōmdit, jade'eñits myay'ajtin ja tpokti. ³ Jōts ku xmo'ot øy ti ja ayoobi jaa'y, tunts idō'ōn jade'en jōts kidibaat ja xukni'ajwī pōn me mjadyimyjāmōjmīgu'uk'ajtpy, ⁴ ne'egi øy ku ka' pōn xukni'ajwīt ku jade'en xu'unt. Jōts ja Dios Teety wa'ats ja t'ixy ti jaty me mdumpy øy ja pōn xjagadukni'ajwī, mbaajtipts mets ja myay'ajtin ja'.

Ku ja Jesús tnanky'ixpiky ja Dios'ajot'ajtin

⁵ Jøts ku mdsapkajpxtit, kidi jade'en xundi sam ja jaa'y midi win'øø'ndip, ja' midi tsojktip jøts ja tani Dios'ajot'attit jap tsaptøjkjøtpy, uk mā jaa'y y'ejxidit jøts ja jade'en yikajxa'aktit. Jade'eñits ja kø'øm ñadyukpikyidi ja myay'ajtindi. ⁶ Kuts ja Dios x'ajot'attit, tøkidi mdøjkjøtpy, agø'ødi ja mdøjk jøts xminuu'kxa'aktit anadyu'uk'ampy ja mDios Teety, pø ixajpxi ja nayide'en jøts y'ijxpy ja' ti jaty mee mdumpy, øy meets ja pøn xjagaduknijawī.

⁷ Jøts ku dø'øn jade'en ja Dios x'ajot'attit, kidi ja xkajpxjimbetti xkajpx'adøjti midi tø xja'ukajpxti, kidi jade'en m'adøtsnidi sam ja jaa'dyi pøn Dios tkanija'widip, pøn winmaadyip ku ja y'øømayidit kyajpxmayidit winets Dios ja myadowidit. ⁸ Kidits meets nayide'en m'adi'ich sam ja y'adøtstin; pø wā'atsxi Dios Teety ja ne'egi tñijawi pøni ti meets idø'øn mga'ejtxip, pøni ti meets idø'øn mdsøjkpy, wā'ats ja tñija'wiñi yam meets ja xka'amidøynim. ⁹ Paty idø'øn yide'en ja Dios x'ajot'atti:

Dios Teety tsajpjøtpit,
kuuyi mets jadu'uk øy wā'ats.

¹⁰ Øyts ku xmimiñ ja mgutujk midi mdanitanaapy ja mjaay'y.

Yikjatts ya naxwiññ nayide'en kø'ømsojkingøjxp pøni sã xamidsøky nayide'en sam jap xuñin tsajpjøtpy.

¹¹ Møøkyts øøts icyam ja ngaajyik n'uujkik midi øøts xka'ejtxip.

¹² Maa'kxik øøts ja nga'øy'ajtin ti jaty øø tø nduñ, kumi tø øøts nayide'en nmaa'kxuky pøn øøts xjemdump xedump.

¹³ Agidyujk øøts axajtujk øøts, kidi øøts xmajtstu'uty jøts kidi myajada'aky ja miku' yja'. Pø metsxi ja' mgutujk midi ja mjaay'y mdanitanaapy, mets amuum møk'ajtin, jøts ja øy'ajtin xondaajkin midi xemikøjxp. Jade'en idø'øn ja yjatt.

¹⁴ Pøni mmaa'kxuktip ja jaa'y pøn mjemduujnidip mdeduujnidip, nayide'ents meets ja Dios Teety mmaa'kxukidit pøn jap tsajpjøtpy; ¹⁵ kuts pøn xkamaa'kxuktit, ka'ats meets ja Dios Teety mbojpkimaa'kxidit.

Ku ja Jesús tñigajpxy ja amaay'ajtin

¹⁶ Jøts ku m'amaay'attit ku ø xkagugayidit xkagu'uugidit, kidi meets jotmay'øøgyim x'ejxnidi, kidi meets ja jade'en xyiknigaxi'iky sam y'adøtstti ja win'øø'mbi jaa'dyi; jade'en'ampy ja jade'en ttundi jøts ja ttuk'ejxti øy pøn jaa'y ku ja jade'en y'amaay'atti. Jade'eñi ja tpaatti ja may'ajtin jøts ja ka'ap Dios yja' tpaajtidi. ¹⁷ Kuts mee m'amaay'att, nawyoogi nagaaxi, puj mween m'aaw, ¹⁸ jøts ja jaa'y kidi tñijawidi jøts kudam me m'amaay'aty. Ja Dios Teety ja tu'ugyi tñija'wip, pø ixajpxi mets ja møøt. Øy mets ti xuñ xkajpxy, ñija'wipts ja wā'ats; nay ja'ats mets ja may'ajtin mmo'ojip.

Ja kunuu'kxy jujky'ajtin midi jap tsajpjøtpy

¹⁹ Kidi meñ kidi pikta'aky ya naxwiññ nugo x'abøjktøkidi mā ja'ambi jøø'kxpi tyikudigøy ja pikta'aky, jøts mā maa'tspi kadye'ebyi tyøkidi jøts ja tuki'iyi tyikpidsømguixy ja pikta'aky. ²⁰ Ne'egi øbyidsø'ømp jade'en ku xjøp'ijxy'attit jøts xpaattit ja jujky'ajtin midi jap tsajpjøtpy, midi ka'ap mwindigø'xiyidip. ²¹ Pøni mā xnajtsjawidi xpaatwā'andi ja jujky'ajtin, nay japts meets ja mwinmaa'ñ y'ity.

Ja øy jaj midi ja jaa'y tyikja'gyukip

²² Xjats ja Jesús yjaakwaañ:

—Jade'en idø'øn yø mween n'ukpiktaajkint sam ja jajin, yøøts tyikujajtaajkip tyikudøø'kxaajkip amuum ja mne'kx mgojpk; kuts ja mween y'øy'aty, nayide'ents ja amuum tjagyepy ja ne'kx ja kojpk, ka'ap ja ttuktuñ ja kya'øybi; ²³ kuts ja mween kya'øyi, nayide'ents ja tyikjaty ja ne'kx ja kojpk sam pøn kube'ets kugoots y'ity. Pøni jamts ja jaj xmøødi jøts kuts ja xjaaktyimyik'ookni ku ja jade'en yjaaktyimyajtni sam kyoots'ityin, jjaaktyimyjinajxpts ja' yam ja tø yjakoodsimyi!

Ku ka' tuk'ojkyi majtskjøøjp n'ajot'ajtin jade'en ja Dios jøts jade'en ja meeñ

²⁴ 'Ka' pøn tumbi namajtsk wyindsøn tmiduñ, ku ja jade'en ttu'unt, tu'ukts ja pyidsø'omt pøn ja wyinjawip, jøts ja yjadu'ukpi ja tkawinjawit, tu'uk ja t'ømyidu'unt jøts ja yjadu'ukpi ja tka'ømyidu'unt. Paty nayide'en ka' pyaat'aty jøts nmidu'unin ja meeñ ixyadamts Dios njamidu'unma'andi, tu'ugyi Dios n'ajot'ajtin.

Ku ja Dios t'ejx'ity pøn jaty ja y'u'ngip y'una'jkip

²⁵ 'Ja'agøjxp øts idø'øn nwa'añ, jøts kidi xjotmay'atti pøni ti dø'øn mga'adyip m'uuktip, pøni ti dø'øn mdajujky'attip, ni ja mwet mnaamy xkajotmay'attit ti dø'øn mnadyaxoxidip. ¿Ti jade'en ja jujky'ajtin yikpaaty sami kaaky jii'kxyin? Pø ka'axi. ¿Jøts ja wet naamy mibaat ja t'uk'amibaat nayide'en pøni sa dø'øn ja ne'kx ja kojpk yikmøt'aty? ²⁶ Ejxti yø joon, ejxti yø jiyujk midi kakwidejttip jam tsajpwemp, ka'axi yø ñe'epi kyojti, ka'axi pyikta'aky yø tyikpidø'økti, ka'axi pyikta'aky yø tpøkjø'økti jøts tpikta'aktit jap tsa'jxjøtpy; øy yø jade'en yjagatundi, yikmøodyipts yjii'kxy yø', ja' yø tmøøpy pøn mee m'ajot'ajttip, ja Dios Teety pøn jap tsajpjøtpy. iTits mee mdsow sa ja jiyujk jade'en ja yja' yikmo'odi! ²⁷ ¿Pøn kø'ømdsøky tyimy'uknankyojnip jagujkp metrin, øy ja mabaat jade'en tjadyimyjatsøky?

²⁸ '¿Jøts tiku xjotmay'atti ja wet ja xox? Ejxti yø ujts ejxti yø pijy midi yomp aayjøøjty ujtsjøøjty, ka'axi yø pyeetti kyojti, ka'axi yø ti ttundi; ²⁹ jøts øts idø'øn yam wamp, jøts ku ni ja rey Salomón jade'en ojts kyanadyaxøxyi ja xyox ti jaty ja jam wyinaty myøøt'ajtpy, sam yø ujts sam yø pijy tmidsujkaxi'iky ja xyox. ³⁰ Pøni xyøjxpy tamts Dios jade'en ja ujts midi ja ixyam yomp ja aayjøøjty ja ujtsjøøjty, øy ja jabom wixøjpk jjayiknitsaañit, jtits mee mdsow sa ja ujts sa ja pijy jade'en yjaakyikxøxy, meets kaja'gyukibidi meets ka'ajot'ajtpidi! ³¹ Paty kidi mmaydi mdajti, jøts kidi mwa'andi: "¿Ti dø'øn ngaa'yim njøø'kxim? uk ¿ti dø'øn n'uujkim? uk ¿ti dø'øn nwet'ajtim nnaamy'ajtim?" ³² Tum yø yjade'emb i pikta'aky pyawinmaadyip ja jaa'y pøn Dios yja' tkaja'gyukiyidip; meetsts mjagyajpip ja Dios Teety midi jap tsajpjøtpy, ja' ja tnija'wip pøni ti mee mga'ejtxip. ³³ Ja'ats meets jawyeen mjotmay'atp sa xpaattit ja Dios kyutujk midi ja tyanitanaapy yjaa'y, jøts nayide'en ja y'øy'ajtin chuj'ajtin midi yja'ajtpy, mbaatpts meets ja yjade'emb i pikta'aky tuki'iyi. ³⁴ Paty kidi nugo xjotmay'atti pøni ti me'emp kida'akp jabom wixøjpk, jabi kø'ømxi ja ñanky'ejxit ñankñijawiyit ja jabomit'ajtin.

7

Kidi pøn o ti xawindsø'ødyi

¹ 'Kidi pøn nugo o ti xapøky'ejxti, jøts Dios nayide'en mgapøky'ejxidit. ² Nayide'en meets Dios ja mdagubatiyit pøni sa meets ja mmigu'uk xuñ, nay ja'ats ja yik'awetsp. ³ ¿Sudso dø'øn ja mmigu'uk pyøky x'ejxpaa'jtyi, jøts ja mja' ne'egi xka'ixy kudam ja jawaani møj? ⁴ Jøts, ¿sudsots mets idø'øn namyikajxim xkajpx'øyiwy'añ yam mets ja mdsinaa'yin øy xkayikyø'øy? ⁵ iMeets win'øø'mbi ataadyi! yik'øyidi jawyeen ja mga'ochinaa'yindi, winetnimts ja mmigu'uk chinaa'yin xkajpx'øyiyidit.

⁶ 'Jøts kidi nugo ajaw i øy pøn xmo'odi midi ja Dios yja'ajip, kidi jade'en xundi sam uk'otigati nugo ajaw i yikmø'øy, ku ja nay ja'ayi m'uktanibidø'jknidyidit, jøts tsojk tatsu'utsa'am m'ukyik'ejxnidit. Jøts kidi nugo ajaw i xukmadowdi Dios kyajpxy pøn tkaja'gyukidip, ku ja nugo t'uk'amnixeknidi t'uktsaachnixeknidi, taxi'iky nugo tjawidi.

Amidowdi pøktsowdi, ixa'adi kugajpxidi øy ma

⁷ 'Amidowdi pøktsowdi, jøts Dios mmo'ojidit; ixa'adi pøni ti mga'ejtxidip, mdukpaadipts meets Dios ja'; uk ku mgugajpxidit muum, yik'awa'atspts øy pøn ja tøjk'aaw. ⁸ Ti ja kidyimy'ukyikmøøpy pøn t'amidoop pøn tpøktsoop, pyajtpy ja' pøn tigati t'ixaapy; uk ku pøn kyajpxwidity kyugajpxi, øy muum yik'awaajtsxiyipts ja tøjk'aaw ja øy pøn.

⁹ ¿Ti wan meets ja ndejin winaagin pøn y'u'nk y'una'jk tmøøpy tsaā ku ja t'amidøy tsapkaaky? ¹⁰ ¿Uk tmøøpy tsaā'ñ ku ja t'amidøy ajkx tsa'ay? ¹¹ Øyts mee mabaat mjagatyimy'øyjaa'y'atti, mjaajtips ku xmo'odit m'u'nk m'una'jk midi øy tsuj pidsømp, jtits Dios tyungip pø tsajpjøtpyxī ja', myo'opts ja' ja øy'ajtin ja tsuj'ajtin pøni pøn ja amido'oxiyip!

¹² Jade'en idø'øn xun'ettit, meets idø'øn ja mmigu'uk mwindsø'øgip sam meets ja kø'øm xjatsøky ja nawyindsø'øgi; kumi yø' idø'øn ja Moisés kyutujk ñi'ane'empy, jøts nayide'en wya'añ ja kugajpxtyøjk ja ñøkyi.

Ja mutsk tøjk'aaw

¹³ Jap idø'øn mdøkidit ma ja tøjk'aaw kadanaxyim midi mutsk midi xu'uts. Møj ñidøjk'aaw ja', møj ñiduu' ja' midi nøjkxp jap ayodaajkjøtpty manim idø'øn tuki'iyi wyindigøøgyixy, may ja' pøn jap tøjkidip; ¹⁴ jøts ja tøjk'aaw, jøts ja tuu' midi nøjkxp jap ma tsinaa'yin xemikøjxp nbaajtindit, mutsk ja' xu'uts ja', niwaani ja iidy pøn idø'øn ja tøjkidip.

Pøni sa wyimbidsimy øy ti, ja'ats tyikwingaxø'kp pøni sa ti y'øyi kya'øyi

¹⁵ Øyim mnay'eix'etidit, øyim x'eixtit ja jaa'y pøn win'øø'ndip, ñadyijiywya'andi jøts ku Dios yja' ja tkajpxidi. Ñadyijyi ja mninijkxyidi amyuyj tsaachyuyj, ja' y'aawidip yjojtidip ja kubety'ajtin, ja' wyinmaa'ñ'ajttip ja kya'øybi. ¹⁶ Ja' meets ja mda'eixkap pøni ti jaty tyundip, pøni sa jaty y'adø'øtsti; ka'axi uvi tsa'am yikwiduky jam kujp kipkyøjxp, ni iigi tsa'am kyawinaky jam kujp'aagyipkyøjxp. ¹⁷ Paty idø'øn ja kipy midi øy, pøni øgyipy ja', nayide'ents tyøøm ja øy tyikpidsimy; midi'lits ka'øy, nayide'ents tyøøm ja tyikwingaxi'iky ka'øy. ¹⁸ Ka'ap ja øgyipy tyøøm tyikwimbidsimy ka'øy, ni ja ka'øgyipy ka' tyøøm tyikwingaxø'økmi janch øy. ¹⁹ Ja kipy midi jaty ja tyøøm ka'øy, jøts kumi nayide'en idø'øn ja kipy kya'øyi, yikpootp ja' jøts ja ñitø'øty jap jønjøtpty. ²⁰ Jade'en meets idø'øn ja jaa'y x'eixkapt, ja' ja tñigajpxp pøni ti jaty tyundip pøni sa jaty y'adø'øtsti.

Ku ka'ap pøn nugo ajawi tyøkit ma Dios ja kyutujk ja naxwii'ñit jaa'y ttanitani

²¹ Pøni pøn jaty øts jade'en nugo xkajpxpatp, jøts nika'ap ja Dios Teety yja' tpadu-ujniyidi, ja'ats ka' tpaatti ja Dios kyutujk. ²² Ku tpaatt ja'abi tiempi, ku yja'att ja xøøw jumøjt, may øts ja jaa'y xnøjmidit: “Windsøn'ajtim, windsøn'ajtim, ja'ats øøts tø ngajpxwa'kxy mets ja mja', mets køjxp øøts ja jade'en tø nduñ ku øøts ja miku' tø ngajpxpidsimy jøts øøts jaa'y ja ndukmajtstu'uty, jøts ku øøts ja milagri nayide'en may'oijk tø nduñ.” ²³ Kuts ja jaa'y jade'en xnøjmit, winets n'adso'ot: “Ka'axi mee ma møøt nnay'ijxy'aty, jiwa'akti ya kidi øts ya xwin'ejxti, ku meets kawine'en tø mgawindiy'aty jøts xundi ja kya'øybi.”

Majtsk jøøjp ja pøch kyojpk

²⁴ Pøn ø xmimadoop jøts jade'en ttuñ sa nwa'añ, jade'en idø'øn ja' sam ja jaa'y midi wijy midi tyøjk tkojp tsaagøjxp, tum tsaā ja amuum tyukojpk'ajtpy. ²⁵ Kuts ja tuu myiñ, jøts ja nøgom pyidi'jky, amuum ja nøø'aaw nøøjoojt kyombejty, jøts ja poj jadi'iñi tyikpojwimbetwani ja tøjk; jøts ja nigidi kyidaay, kumi tum tsaā ja jap wyinaty amuum kyojpk'ajtpy. ²⁶ Pønts ø xkamimadoop ku ka'ap jade'en ttuñ sa nwa'añ, jade'en idø'øn ja' sam ja jaa'y midi tkaja'gyukip o ti, midi ja tyøjk ojts tkøjy jam pu'jotp. ²⁷ Ku ja tuu ojts myiñ, jøts ja nøø'aaw nøøjoojt kyøømy, jøts ja poj jadi'iñi tyikpojwimbejtñi ja tøjk, ojts ja tøjk kyiday. ¡Adsø'jkibim ja ojts yjanchkujeti!

²⁸ Ku dø'øn ja nwindson'ajtim Jesús kyajpx'abajtiyii'ñ jøts ja jaa'y janchñigyumaap tja'widøø ja ixpøjkin; ²⁹ pø jade'enxi ja yik'ixpikyidi sam o pøn møk'ampy kutujk tjagyepy, ka'ap ja jade'en yik'ixpikyidi sam ja kajpxwejpitøjkti.

8

Ku ja Jesús tyiktsøjky ja jaa'y pyu'uts

¹ Ku Jesús chøø'ñ jam kojpkøjxp jøts kyidaajky, may jaa'y ja ojts pyadsøøñi. ² Xjats jaa'y ja ojts tu'uk wingon ñinijkxyi, møj pu'uts pa'am ja pøjkip, ja'ats idø'øn jam ojts ñagyuxendya'agyí jam nwindson'ajtim Jesús wyingujkp, jøts ja tnimaay:

—Teety, mmøøt'ajtpy ja møk'ajtin jøts xyiktso'okt, yiktsokts øts mdsojk'ajtingøjxp.

³ Xjats ja ojts ja'ayi tkønixajy, yide'en ja tnimaay:

—Ndsøky'ajtpy øts jøts mdso'okt. Tsokni.

Ja'ayi ja jade'en wyaañ, jøts ja pu'uts pøjkibi jatyi ñajxy ja pya'am, jatyi tyaagyijxy ja pyu'uts. ⁴ Jøts nwindson'ajtim ja ojts ñii'mxyi:

—Øyim x'ext, kidi pøn xukmadø; øy ja'ayi xninøjkxt ja teety ja', ja'ayi m'atspaap jøts ja myøxy ja'ayi xpikta'akt midi ja Moisés ojts tni'ane'emy, jøts ja jaa'y t'ejxtit jøts ku tø mdsø'øky.

Ku ja Jesús tyiktsøjky ja romanit soldadi tyumbi

⁵ Xjats ku ja Jesús kyajtpøjkijy'ñ ma ja kajp jam txøøwi Capernaum, jamts ja tu'uk ñimejni ja romanit jaa'y midi wyinaty tniwindsøn'ajtp nidukupiky ja soldadidi, ja'ats ja møk'ampy nimaajyøø, ⁶ yide'en ja wyaañ:

—Teety, ixajp øts tu'uk ndumbi pa'am tmigo'kni ndøjkjøtpy, jadi'iñi tø myujkni xyujxni, yjanchkupijky idø'øn ja jap ja jajyi tøøyi.

⁷ Winets ja nwindson'ajtim Jesús ja tnimaay:

—Øy øts ja n'atsyiktso'okt.

⁸ Jøts ja jaa'y yide'en y'adsowimbijty midi idø'øn twindsøn'ajtp nidukupiky ja soldadidi:

—Teety, ka'ap ø xpaat'aty jøts mets mdøkit ndøjkjøtpy; ana'am ja'ayi jøts cho'okt øts ja ndumbi. ⁹ Nayide'en øts ane'emy n'ity, nay jats øts ndumbimi midi ø n'ana'amp. Ku øts nidu'ugin nnøjmidi, nøjkx, nøjkpts ja jatyi; uk nnøjmits øts jadu'uk jøts mye'ent, mempts ja jatyi; uk nduktunwa'añ øts ja ndumbi øy ti pøn øts jadi'iñi ñyiktumpy ndøjkjøtpy, tyumpts ja' pøni sa øts ja n'ane'emy.

¹⁰ Xjats ku Jesús ja jade'en tmadøø, ñigyumaap ja tjä'wiyi'ñ, jøts ja tnimaay pøn jaty ja jam wyinaty payø'øyiip:

—Janch øts idø'øn nwa'añ, ni Israelit jaa'y øts ya ma jade'en ngapaadynim sam ya'at jaa'y tmøødin ja janchja'win møk'ampy. ¹¹ Øts idø'øn wamp jøts ku may nayjade'embí jaa'y øy madsoo choondit, jøts møøt jujky'ajtpi y'ixa'aktit ja Abraham, ja Isaac jøts ja Jacob; yik'ejxti jap ma Dios kyutujk ttanitani ja yjaa'y; ¹² jøts pøn japaat'ajtidip jøts ja yjap'attit ma Dios kyutujk ttanitani ja yjaa'y, yikajxpidsø'ømdipts ja jap jøts ñøjkxtit ma kube'ets kugoots, jøts ja jap chabaawidettit y'amdøtskaattit chaachtøtskaattit.

¹³ Jøts idø'øn ja nwindson'ajtim Jesús tnimaay ja jaa'y midi tniwindsøn'ajtp tukpiky ja soldadidi:

—Nøjkxni mdøjkwindum, jøts sa tø xjanchjawí yiktu'umpts ja jade'en.

Jøts ja tumbi nay jatyi myøkpiky.

Ku ja Jesús tyiktsøjky ja Pedro tyaakmø'jt

¹⁴ Winets ja Jesús ojts ñijkxy Pedro tyøjkwindum, jøts ja jam ojts tpaajti ja tyaakmø'jt, jøts kudam ja møk jømba'am ja jam tmigo'kni. ¹⁵ Ojts ja tniixaji kyø'køjxp, jøts jømba'am ja ojts jatyi ñiwa'achiyi; ojts ja jatyi wya'kuki jøts ja nay jatyi wyindsø'jkidyøjkijyidøø.

Ku ja Jesús tyiktsøjky ja maabyamaq'y

¹⁶ Xjats ku kyoodsiyi'ñ, jøts ja nwindson'ajtim Jesús may'ampy ja jaa'y yiktaniamiñ midi ja miku' wyinaty tø tyatøkiyidi; jøts ja ojts ja'ayi tuk'aawyí tmigajpxy, ja'ayits ja tyuk-tapidsøøm ja maamyiku' jøts ja tyikmøkpøkiixy niduki'iyi ja pamaa'y. ¹⁷ Jade'en'ampy idø'øn ja jade'en yjajty, jøts idø'øn ja jade'en tyimyjaty sa wyinaty tø tniigajpxy ja

kugajpxy Isaías, ku ja yide'en wyaañ: “Ja' tuki'iyi tmidanaagyøjxp adøm n'ayo'on, nay ja' tmidanaapy adøm ja nbøjkin n'aa'nin.”

Ja jaa'y midi wyinaty tpawidetwamp ja Jesús

¹⁸ Xjats ku ja nwindson'ajtim Jesús ojts t'ixy ku mayjaa'y ja yjanchtamujkniyi, winets ja ojts wya'aañ jøts ttanaxtit ja nøø jøts ñøjkxtit jam jaduktamajñ. ¹⁹ Winets tu'uk ja kajpxwejpi myiñ mā ja Jesús jam wyinaty, jøts ja Jesús ojts yiknøjmi:

—Windsøn, tsoomp øts, nbanøjxpx mets øy madsoo pøni mā me mnijxxy.

²⁰ Jøts ja nwindson'ajtim Jesús y'adsøøy, yide'en ja wyaañ:

—Ne'egi jaa ja waajx yjut, ne'egi jaa ja joon pya'an; øtsts, niti ø xka'ejtxi øyik øts idø'on mā n'øøni'int.

²¹ Xjats ja jaa'y jadu'uk wyami midi ja wyinaty pyabøjkpi'ajtpy, yide'en ja ñimaajyøø:

—Windsøn'ajtim, tniyxxy øts jawyeen ja ndeety t'atsyiknaxøki.

²² Winets ja Jesús y'adsøøy jøts ja wyaañ:

—Møødik øts, majtstu'ut yø oo'kpi, wan ja tyikpidø'økti ja myi'oo'kpi pøn y'anmija'win jajujkyi tø tyik'oo'knidi.

Ku ja Jesús tyiknajxy ja møk poj jøts ku ja tyik'amøkiy'iñ ja mejy

²³ Jøts ja nwindson'ajtim Jesús tyøjkiñaa jam barkijotp møøt ja pyabøjkpitøjk. ²⁴ Winets ja poj møk'ampy yjantyimyñ jam mejyjotp, jadi'iñi ja nøø yjanchtojmjø'kni jøts jap barkijøtpy yjanch'ayø'øyini. Maapts ja nwindson'ajtim Jesús wyinaty. ²⁵ Winets pyabøjkpitøjk ja ojts yuxyiyi, yide'en ja ojts ñi'mxyiyi:

—iWindsøn'ajtim, ejx øø nnøøjøø'kxni, yiknitsok øøts! iPø nøøjkiy'adøjtsnampts!

²⁶ Jøts ja t'adsøøy yide'en:

—¿Ti mdsø'jkidip ku mdsø'øgidi? iJanch yii'nim meets ja janchja'win xmøøt'aty!

Xjats ja tyanaagyukiyiñ, jøts ja ojts tnøjmi ja poj jøts wan tnaxy jøts ja mejy kya'uk'adøtsnit; jøts idø'on ja jadi'iñi myøøñ, nayide'en jotkujk'atyim tyaañ sam idø'on ku ja et kyapøjy. ²⁷ Jøts ñigyumaap ja tyimya'widøø, nømdip ja':

—¿Ti pøn jaa'y yø jade'en, mimadoojipaät poj yø', mimadoojipaät mejy yø'?

Ja Gadarit jaa'y pøn wyinaty ja miku' tø tyatøkiyi

²⁸ Xjats ku ja nwindson'ajtim Jesús yja'jty jaduktamajñ mejy'agø'øm, jamts ñaxwimbidsømdøø Gadara y'etjotpti, winets jaa'y namajtsk pyidsømdøø jam kamisantijotp mā oo'kpi ñaxøkidi, jøts ja ojts tnimendi ja nwindson'ajtim Jesús. Miku' ja wyinaty tø tyatøkiyidi tum jade'en ja namajtskti, janch tyimgyubetyts idø'on ja'adi, ka'ap idø'on ja jam øy pøn tkunaxi jam tuu'am. ²⁹ Jøts ja yjanchabaabinaxwa'aktøø:

—¿Ti øø xanibøjkip, ti tsepxik adøm njagyejpyim, mets Jesús, mets Dios U'nk? ¿Ja' mets ya tø xnimiñ jøts øøts ixyamyi xtyimyk'ayo'ombaatwangøjy?

³⁰ Nay jamyits idø'on wingon wyinaty y'ojkwidejtmidi maagyuch; ³¹ winets ja miku' nuu'kxaaajkingøjxp t'amidoodøø ja Jesús, yide'en ja tnimaadyøø:

—Pøni xyikpidsømwamp øøts, wants øøts yø' kuch ttatøki.

³² Xjats ja Jesús wyaañ, yide'en ja tnimaay:

—Nøjkxti.

Jøts idø'on ja miku' jade'en pyidsømdøø, ojts tmajtstu'utti ja jaa'y jøts ja maagyuch ja ttøjkidyøø; winets ja kuch niduki'iyi yjanchnabyagunajxidøø jap jaa'jøtpy jøts ñaxkidaktøø jap nøøjøtpy, japts ja ñøøjøø'kxkøjxtøø.

³³ Jøts ja jaa'y midi wyinaty kuch'ejxtip, ojts ja kya'akti, janch tsø'jkidip ja', jøts ku ja jam kajpjotp yja'ttøø, jamts ja tuki'iyi tnimadyakøjxtøø sa wyinaty ja jaa'y tø yjatti kyubatti pøn ja miku' wyinaty tø y'uktatøkiyidi. ³⁴ Winets ja jaa'y niduki'iyi cho'ondøø pøn jaty jam wyinaty kajpjotpti, jøts ja ojts ñøjkxti mā ja Jesús jam wyinaty; kuuyits ja ojts t'ejxti, jøts ja tnimaadyøø møk'ampy jøts ja jam tyimbyidsø'ømt ja' y'etjotpti.

9

Ku ja Jesús tyiktsøøjky ja kəxujxpi pakxujxpi

¹ Xjats ja Jesús tyøjkiyiñ barkijotp, jøts ja ojts ñijkxy jam jaduktamajñ, ojts ja ñøønaxy jøts ja yja'jty kyajpkøjxp. ² Jamts jaa'y ja ojts tu'uk yiktaninijkxy midi kəxujxp pakxujxp, ki'y ja jam ojts tyiknøjkxti. Jøts ku dø'øn ja nwindson'ajtim Jesús ojts jade'en t'ixy ja jaa'y jøts kudam ja møk'ampy ja janchja'win tjanchmøødidi, jøts ja pamaa'y ja tnimaay:

—Kidi u'nk nugo mdyimyjotmay'øøky; nbojkipimee'kxpy mets.

³ Winets winaagin ja kajpxwejpitøjk wyinmaadyøø jøts ja wyandøø: “Dios yø jade'en kya'ømyigajpxpy, pø nugo jaa'yxi yø!” ⁴ Jøts kumi wa'ats ja nwindson'ajtim Jesús ja tnijawi sa jaty ja wyinmaydi, jøts ja tnimaay:

—¿Tigøjxp ku jade'en ka'øwyinmaa'ñ xjagyapti? ⁵ ¿Ja ti ne'egi jawaani jajtñi, kuts yø pa'amjaa'y nnøjmit: “Nmee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nøjkxni mdigam”? ⁶ Ixyamnim meets inet x'uk'ext mabaat øts idø'øn ja møk'ajtin nmøøt'aty ya naxwiñ jøts ø nmaa'kxt ja pøky.

Xjats ja tnimaay ja kəxujxpi pakxujxpi:

—Pidø'kni wa'kukiñi, wejtsjø'øk yø mmaabajt jøts mnøjkxni mdigam.

⁷ Winets ja pamaa'y jaty wya'kukiyiñ jøts ja ojts ñijkxy jam tyøjkwindum. ⁸ Kuts ja mayjaa'y ja ojts jade'en t'ejxti, xjats ja yjanchø'jkiñidi, winets ja tja'myajtsti ja Dios jøts ja tmøja'widøø tkunuu'kxyja'widøø, ja'agøjxp ku ja jade'en t'ejxti jøts kudam ja Dios Teety myøk'ajtin tmøøt'ajtti, pø niñugo jaa'yxi ja ttejti.

Ku ja Jesús tpawaay ja Mateo

⁹ Xjats ja nwindson'ajtim Jesús jam ojts chøøñ, jøts ja ojts t'ejxpaaty tu'uk ja jaa'y pøn txøow'ajtp Mateo, jam ja wyinaty chøøni ma ja yikugubajtpi y'ixa'akti, jøts idø'øn ja tnimaay:

—Mada'ak, møøt widetk øts.

Winets ja Mateo tyanaagyukiyiñ, jøts ja ojts pyadsøøñiyi.

¹⁰ Ku wyinaty ja nwindson'ajtim Jesús jam kyay Mateo tyøjkjotp, winets ja mayjaa'y jam mendøø pøn yikugubajtip, møøt ja'adi pøn ka'øy jaa'y yiktejtíp. Ja'ats idø'øn ojts yjam'atti, jøts ja tmøøt'ixaktøø jam kaadyaajk windum møøt ja Jesús jøts ja pyabøjkpitøjkti. ¹¹ Ja'ayi ja fariseotøjk ja ojts jade'en t'ejxti, xjats ja nwindson'ajtim Jesús pyabøjkpitøjk yik'amidoodøø:

—¿Tigøjxp ku yø mwindsøn tmøøtkay yø yikugubajtpitøjkti møøt yø kawindiyjaa'dyi?

¹² Ojts ja nwindson'ajtim Jesús ja tmadøy, xjats ja kø'øm tnimaay ja fariseotøjk:

—Pøn møk pøn kasajajtíp, ¿ti ja tyikwa'andit ja tsøøyibi? Ja' ja ttojktíp pøn pøjkidíp.

¹³ Kidi ja'ajip ø tø nnimiñ pøn øy pøn wa'atsti, ja' ø tø nnimiñ pøn pøkyundíp jøts ja chinaa'yin tyiktigatstít. Nøjkxti jiwa'akti, pamaadyi padajti pøni ti dø'øn tyijpy ya'at Dios kyajpxy: “Ja' ø ndsøjkpy jøts xmøøt'attit ja pa'ayo'owin ja ayo'ejxin, jøts ne'egi kidi yik'ookti yø jiyujk yø tsakaa midi jaty myojxtíp.”

Ku ja Jesús yiktibyijky tigøjxp ku ja kya'ayuu'atti

¹⁴ Winets ja Juan Bautista tyumbi myendøø ma ja nwindson'ajtim Jesús jam wyinaty, jøts ja ojts tyiktøwdi, yide'en ja tnimaadyøø:

—¿Tigøjxp ku øø n'amaay'aty møøt ja fariseotøjkti, ngakay nga'uuky øøts jøts mets yø mbabøjkpitøjk jaayi yjanchkaydi yjanchjøø'kxti, niwine'en kya'amaay'atti?

¹⁵ Xjats ja nwindson'ajtim Jesús y'adsøøy jøts ja tnimaay:

—¿Ma meets jade'en tø x'uknijawí jøts ku tø'øxñigaabyi tø'øxñi'ukpi winet y'amaay'atti winet kyakaydi kya'uukti ku ja jemyaa'y jamni? Abikñimts ja tiempi tyimyjatmit ku ja jemyaa'y wyinaty kya'uk'ejtñi ku ja jam wyinaty tø cho'oni, jaanimts idø'øn tiy pøn kya'ukaañit kya'uk'uknit; jaanim idø'øn ja y'amaay'attit.

¹⁶ 'Ka'axi pøn wyetpach tta'agiyi jemwyet midi tyimyjemñim, ku ja jade'en yiktu'unt jøts kumi mujkpi ja jemwyet jøts ja tjaaktyimgyøø'tsni ja wetpach, jaaktyimyiwenip ja kyøøts'ajtin ja'. ¹⁷ Jøts nayide'en ka' y'øyi jøts yikpikta'akt ja vino jap po'dukjõtpy midi namii'kxñim; ku ja jade'en ndu'unint, takøø'tsipts ja po' jøts jade'en nugo wyindigøy, windigøøpy ja po' jøts nayide'en ja vino. Paty ja vino midi namii'kxñim nda'ada'amyin ja jembyo'ak jøts jade'en nimidi kyawindigøøty.

Ja Jairo ñøøx, jøts ja tø'øxyøjk pøn ja Jesús ja wyet ojts ttojni

¹⁸ Ixam idø'øñ ja nwindson'ajtim Jesús jade'en wyinaty wya'añ, ku yja'jty tu'uk ja windsøn pøn tnigubajk'ajtip ja israelit jaa'y, jøts ja ojts ñagyuxendya'agyi ja' wyingujkp, jøts ja ñimaajyøø:

—Tø øts nnøøxu'nk y'øøky tyimy'ixanim; kudsik mets inet ja'ayi mme'ent jøts waani xkønixajt, jujkpyøjkp inet ja jadigojk.

¹⁹ Xjats ja nwindson'ajtim Jesús wya'kukiyii'ñ jøts ja ojts tmøødi ja jaa'y møøt ja pyabøjkpitøjk. ²⁰ Winets tu'uk ja tø'øxyøjk myiiñ jam nwindson'ajtim Jesús yjixkøøm jøts wyet pa' ja ojts yiktøñ. Myakmajtsk jumøjtíp idø'øñ ja wyinaty tø pyaajtniyi ja taxnaxyi jøts ja jadine'en tmi'ity; ²¹ jøts kumi yide'en idø'øñ ja wyinmay: “Ja'ayik øts ja wyet inet yø ndojnit jøts øts inet ndso'okt.” ²² Jøts ja nwindson'ajtim Jesús ojts wya'kjimbity, ojts ja tyimy'ixy ja tø'øxyøjk jøts ja tnimaay:

—Kidi u'nk mdsø'øgi; ja'agøjxp tø mdsø'øky ku ø tø xjanchjawí.

Jøts idø'øñ ja nay jatyí myøkpíjky.

²³ Kuts ja nwindson'ajtim Jesús yja'jty jam israelit windsøn tyøjkwindum, jøts ojts t'ixy ku ja xuxpi ixapnidi, ja oo'kpi ja yikpidø'økwandip, jøts ja mayjaa'y xem yam yjanchya'ahti, ²⁴ xjats ja tnimaay:

—Pidsømdi; ka'ap yø kiixyu'nk y'øøgyi, maap yø ja'ayi.

Jøts ja yjanchyikniixijky ku dø'øñ ja jade'en wya'añ. ²⁵ Kuts ja tyikpidsømgijxy ja mayjaa'y, winets ja tyøjkii'ñ jøts ja ojts kyø'køjxp tmach ja kiixyu'nk, jøts ja nay jatyí pyidi'jky. ²⁶ Jøts idø'øñ ja jam jade'en øy mā yiknija'wiyii'ñ ja kajpxy ja ayuujk midi wyinaty tø tyuñi.

Ku ja Jesús tyikwin'eixwa'kxy ja winap jaa'y

²⁷ Kuts ja nwindson'ajtim Jesús jam chøø'ñ, winets ja winap jaa'y namajtsk tuu'ajy pyadso'oniyi, møk ja yjanchnømdi:

—¡Rey David me m'ap'ajtip, ayo'ejxk øøts!

²⁸ Kuts ja Jesús tyøjkii'ñ jap tøjkjõtpy, winets ja namajtskpi winap jaa'y ñimejni, xjats ja tnimaay jøts ja ttiibyijky:

—¿Mwandip idø'øñ amumjoojt jøts ku øts yø yjade'embí xma'aty?

Jøts ja ñømdøø:

—Windsøn'ajtim, wamp øøts idø'øñ jade'en.

²⁹ Winets ja nwindson'ajtim Jesús ja mimøj twingudo'oniyii'ñ, yide'en ja tnimaay:

—Wan idø'øñ jade'en tjaty pøni mabaat mee nayide'en ja mjanchja'win xmøøt'aty.

³⁰ Jøts wyeen ja øy tyandøø, ojts ja wyin'ejxpøkti. Jøts ja nwindson'ajtim Jesús ja møkta'aky tnimaay:

—Øyim mnay'ejxidit jøts kidi pøn xuknijawidi.

³¹ Jøts ja'ayi ja jap ñibyidsømdøø, ojts ja tnimadyakøxti sa nwindson'ajtim Jesús ja wyinaty tø yikmøkpikyidi, ojts ja tnimadya'akti øy madsoo wine'enin ja et jam.

Ku ja Jesús tyikajpxpiky ja uum jaa'y

³² Kuts ja jam wyinaty wya'kpidsomdi, winets winaagin ja jaa'y ttanimendi ja nwindson'ajtim Jesús tu'uk uum jaa'y, miku' idø'øñ ja wyinaty mi'ejtiiyip, ja'ats ja ka'ukyikajpxniyip. ³³ Ja'ayits ja nwindson'ajtim Jesús tyikpidsii'ny ja miku', jøts ja

uum jaa'y jatyi jadigojk y'awijy. Jøts idø'øn ja mayjaa'y ñigyumaap yjajtøø, yide'en ja wyandøø:

—Ka'anım ya Israel pøn jade'en t'ijxñim sam ıxyam yik'ijxyın.

³⁴ Ja fariseotøjkti yide'en ja wyamıdi:

—Jade'en'ampy yø jaa'y tyikpıdsımy yø mıku' ku yø nayı' wyındsøn myøk'ajtin tyıktu-ujniyi.

Ku ja Jesús t'ayo'ıjxy ja mayjaa'y

³⁵ Wıdeıtp idø'øn ja nwindson'ajtim Jesús øy madsoo wan tkamjotpi wan tkajpjotpi, jøts ja yik'ıxpiky ma jaty ja tpaaty ja tsaptøjk kajp kajp. Ja Dios y'øgyajpxy y'ømyadya'aky ja kyajpxwa'kxip sa ttanıtanit ja yjaa'y, jøts ja tyıknaxy øy ti pa'am, øy ti pøjkin aa'nın. ³⁶ Ku ja ojts t'ıxy ja mayjaa'y, jøts ja ojts t'ayo'ıxy ku ja tsaach'ıjxyımdi, janchjotmay'oo'ktip ja', nugo ja jadi'ıñi myondi tyukti, jade'en ja yjawı yjajtnıdi sam borreek ñı'ejxpi kya'ejtxıyıdi. ³⁷ Xjats ja tnımaay ja pyabøjkpitøjk:

—Janch øts idø'øn nwa'añ, ku ja jaa'y may pøn tnıjawıwyandıp ja Dios yja', jats ka'ejtip pøn ttukmadowıdıp. ³⁸ Paty x'amıdo'odıt ja Dios Teety jøts ja tyumbı ttanıgaxt ja'abi jaa'y.

10

Ku ja Jesús twıwıjch nımakmajtsk pøn wyınaty kyudanaabyı'atwampy

¹ Xjats ja nwindson'ajtim Jesús tyaxmujky ja pyabøjkpitøjk midı nımakmajtskti, jøts myøk'ajtin ja ojts tmø'øy, ja'ats ja ttuktabıdsø'ømdıt ja mıku' jøts ja tyıkmøk'øktıt pøn øy tıgati pa'am pøjkıdıp.

² Yide'en idø'øn ja nımakmajtskpi pabøjkpitøjk ja xyøøwdı: tu'uk Simón txøøwi, nayı yıktejp ja Pedro, jøts ja y'uch txøøwi Andrés; Jacobo møøt ja' y'uchmı midı txøøw'ajtp Juan, ja Zebedeo y'unajjk; ³ Felipe, Bartolomé, Tomás, jøts Mateo ja yıkugubajtpı; jøts ja Alfeo myajnk pøn txøøw'ajtp Jacobo; jøts Lebeo pøn nayı yıktejp Tadeo; ⁴ jøts jadu'uk Simón cananista; jøts ja Judas Iscariote pøn tnankmyajtsıp ja nwindson'ajtim Jesús.

Ku ja Jesús tkexy ja pyabøjkpitøjk kajpxwa'kxpi

⁵ Yide'en ja nwindson'ajtim Jesús t'ane'emy ja ñımakmajtskpi pabøjkpitøjk ku ja ojts tkajxtsøø'ñ:

—Kıdi jam etjotp mnøjkxtı ma chøønıdi pøn ka'israelıt jaa'dyi, ka'abaat mnøjkxtıt ma jaty ja kajp jam Samaria; ⁶ ja'ayi mee mnınøjkxp midı ya Israelıt naxjøøjty, ja' idø'øn ejtnıdıp sam ja borreek tyıgøydi. ⁷ Nøjkx xkajpxwa'kxtı jøts ku Dios kyutujk wyıngøñ midı ja tyanıтанаapy yjaa'y. ⁸ Yıktso'oktı pøn pøjkıp ja møk pu'uts pa'am, jøts pøn tıgati jajtıdıp, yıkjıjkyøktı ja oo'kpıdi, jøts kajpxpıdsømdi ja mıku' jøts tmajtstu'utt ja jaa'y. Meets idø'øn yø yjade'embı møk'ajtin tø mnıyıkmø'øy; nayıde'ents xyıktunkpaattıt sam tø myıkmo'odi.

⁹ 'Kıdi ti meeñ xkondi, ni oori, ni plati, ni cobre, ¹⁰ ni pejnbaat xkawetstıt. Mnımdajk nıti xkako'ondıt, tu'ugyi mwet xmnınøjkxtıt midı ıxja mwet'ajttıp; tumbıxi mnøjkxtı, mgaabyaapt meets.

¹¹ 'Ku øy ma mja'attıt wan tkamjotpi wan tkajpjotpi, jamts x'ıxa'adıt tu'uk ja jaa'y midı nıjawı, midı tsojkp ja Dios yja', ja' tyøjkjotp mja'da'aktıt kunım mdsoondıt jam kajpjotp, wınetnımts jam mbıdsø'ømdıt. ¹² Ku mdøkıdıt tøjkjøtpy, kajpxpoo'kxtı ja jaa'y. ¹³ Pøni m'adsojıdıp ja jaa'y, øy'ajtp; kuts ja ka' t'adsojımbıty, majtstu'uttıt ja'. ¹⁴ Jøts ku pøn mgagupøkıdıt, uk ka' paat tmadowa'andı pøni sa me mjawa'añ, pıdsømdıt jam ja'abi tøjkjotp uk ja'abi kajp. Wınaptı ja pu'ux midı jam mdekyøjxp, jøts jade'eñı xuk'ejxtıt jøts ku jade'eñı tø mnañıwa'achıdi. ¹⁵ Øts idø'øn wamp ku wyınaty yja'aty ja tıdyu'unın, ne'egi kajaa yø yjade'embı jaa'y ja ayo'on tyımbıyaattıt, jøts nıgıdı jade'en y'ayo'ombıyaattıt ne'egi ja kawındıy jaa'dyi pøn jam tsınaadyøø jam Sodoma jøts jam Gomorra.

Ku ja yiknigajpxy jøts ku ja pabøjkpitøjk yikmatswa'andit

¹⁶ 'Øyim xmodo'odit jøts xnijawidit jøts ku meets jam nguexy ma ka'ap nugo ajawi øy pøn tyøki! Mjadyimñay'ejx'etidip, yikxonim mnañiwijy'atidit, kidi øy ti xtsepøkti, yujy kø'øm mnabyikta'agidit. ¹⁷ Øyim x'ejxtit, øyxi dø'øn jaa'y mgøyakidit ma kudunktøjk jamdi, jøts myikwinwoptit myikjøpwoptit jam tsaptøjkjotp. ¹⁸ Myiknøjkxi paat meets ja jaa'y jam ma jaty ja møj windsøn yikutukti, ja'agøjxp ku øts nja' xpabøjkidi; jats idø'øn ja ñibidsømit jøts meets ja xukmodo'ot pøni sa øts idø'øn ja n'ixpøjkin, ja'abaat meets xukmodo'odit pøn ka'israelit jaa'dyi. ¹⁹ Kuts myikøyaktit jam kudunk wyindumdi, kidi xkumayjawidi, kidi meets ja xpamaañi xpadajni pøni ti dø'øn jam mgajpxtip, uk pøni sa dø'øn jam mwa'andit; ja'ayi ja y'ukja'att pøni juuni dø'øn mgajpxtit, nagyø'ømts Dios mmo'ojidit ja ayuujk pøni sa dø'øn mwa'andit. ²⁰ Kidi meedsipxi ja mmiwinmaa'nbyaatp ku mee mgajpxt, pø ja Dios Teetyxi y'Espiritu Santo myikajpxidip.

²¹ 'Jade'en nøjkx jaty kyubety pøni pøn øts nja' wyinaty xkupøjkiiyip, jøts ja myigu'uk paat ja tyamidsepøkit jøts ja tñankyik'oogit, jøts ja u'nkteety jøts ja u'nktaak nayide'en ttumidit ja y'una'jk nay ja'agøjxp ku øts nja' janchpabøjkidi nidu'ugin; jøts ja u'nk una'jk nayide'ents ttumidit ja tyeety tyaak, tyik'ooktit paat ja'adi. ²² May jaa'y mee mmi'akiiyip mmijotma'adiyip ja'agøjxp ku meets nja' xpabøjkiiyi; pønts tmidanaapy øy wine'en paat, ja yjade'embii jaa'yts idø'øn nits'o'ok'atp. ²³ Ku myiktabawidetit ja kipy ja tsaa, kaknøjkxtits ma kajp jam jadu'uk; øts idø'øn wamp, jøts ku øts wyinaty jawyeen tømneni yannim meets ja kajp xka'ayø'ø'y'abidsømdi midii jaty ja israelit jaa'y kyajp'ajttip.

²⁴ 'Ka' pøn ixpøjkpi tjaaktyimyjinaxy ja mya'estri, jøts ni ja tumbi tkajinaxy ja wyindsøn. ²⁵ Tyajotkujk'attip idø'øn ja ixpøjkpi, janch møj idø'øn ja wyinaty ku yja'attit jade'en sam ja mya'estri, jøts ja tumbi sam ja wyindsønin. Pøni mikudam ø nyiktijy ku mee nniwindsøn'aty, çtits meets mdsow, ti meets jade'en mjaakayiktejp?

Ja' midi yiktsø'ogip

²⁶ 'Paty ka' pøn xtsø'ogidit. Ka'axi ti kyanigaxi'ikyy øy pøn ti tjadyimy'ama'atsk'aty, ka'ats ja kyayiknijawi øy pøn ti tjadyimyjayu'uch'ity. ²⁷ Pøni ti mee nda'agajpxip, tukmadowdits meets ja jaa'y ja'; nigajpxtits ja yikxon pøni ma x'a'ejxidi myikmadowdi ømyadsowi. ²⁸ Kidi yikjaa'y'oo'kpi xtsø'ogidi, pø ka'axi anmija'win ja tjadyimyik'ookti; ja Dios ja' idø'øn tiy ne'egi mdsø'ogidip, pø ja'axi møk'ajtin tjagyajp jøts ja jaa'y tyikwindigøy møøt ja y'anmija'win jap ayodaajkjøtpy.

²⁹ 'O dø'øn ja joon mabaat kyidyimchobaaty, nayide'en idø'øn ja Dios Teety ja t'ejx'ity. Ni tu'ugin ja kyawindigøy pøni ka'ap ja kø'øm tyikutuky. ³⁰ Tu'uk tu'uk meets mwaay machøy y'ity. ³¹ Kidi mdsø'ogidi, ne'egi jawaani jinaxy mee mnibayø'øyi, çti ti meets mdsow, ti sa ja mayjoon chobaaty?

Pøn tmøjpiktaktip ja Jesucristo jam mayjaa'y agujkp

³² 'Pøn jaty ø xpukajpxip, pøn wamp mayjaa'yjøøjty jøts ku øts ja xpabiky, nayide'ents øts ja møk nnitanit jam Dios Teety wyingujkp pøn jap tsajpjøtpy. ³³ Pønts ø xkabukajpxip, pøn wamp mayjaa'yjøøjty jøts ku øts ja ka' xpabiky, nayide'ents øts ja niwine'enin nga'ejxjimbett, niwine'enin nganitanit jam Dios Teety wyingujkp.

Jesús køjxp ja jaa'y ñawya'kxyidi

³⁴ 'Kidi mee mwani jøts ku øts jaa'y kuwani xtyimyjatyajotkujk'attit, pø may idø'øn ja nøjkx kyanachokidit øts køjxp. ³⁵ Jade'en ja tpatni jøts jaa'y ja y'u'nk y'una'jk y'ukmidsepøjkniyit, ja u'nk ja xa'kxy ja u'nk ja nøøx ñamyatsidit; ³⁶ tukmigu'uk ja jade'en y'uknamyidsepøjkniyidit.

³⁷ 'Pøn tyeety tyaak jawaani tyikmøjtøjkip sam ø ka'ap xmøjpikta'agyin, ka'ap øts ja mibaat nja'aty; jøts nayide'en pøn y'u'nk y'una'jk jawaani tyikmøjtøjkip jøts nigidi ka'ap øts, nayide'en øts ja ka'ap mibaat nja'biky; ³⁸ jøts pøn ø xkagu'ayo'ombaadiwyamp ku

jaa'y yik'ookwa'anit, jøts øts ja nja' jade'en xkatunwajni, ka'ats øts ja mibaat nja'bøkt. ³⁹ Pøn kasajatyim nay'ejxip, pøn nabya'ayojip, ka'ap ja mibaat ja nitso'ok'ajtin tpaaty; pønts kanabya'ayojip wan tjaty sa yjaty øts køjxp, ja'ats idø'on tpaatp ja nitso'ok'ajtin.

Ja may'ajt

⁴⁰ Ja jaa'y pøni pøn mgupøjkidip, øts idø'on ja wyinaty jade'en xkupøjktip; jøts pøn øts jade'en xkupøjkip, ja'ats ja nayide'en kyupijky pøn ø xkajxp. ⁴¹ Pøni pøn tkajpxkyupøjkip ja Dios kyugajpxy, jøts kumi Dios ja kajxip, nayide'en ja jaa'y yikmay'att sam ja Dios kyugajpxy yikmay'atyin; jøts pøn tkajpxkyupøjkip ja øyja'a'y ja'agøjxp ku y'øyja'a'y'aty, nayide'en ja yikmay'att sam ja øyja'a'y yikmay'atyin. ⁴² Jøts pøn ø xmøøjyip ja n'u'nk n'unā'jk øy tukvasin ja tsujxk nøø jøts kumi øts ja nja'ajtpy, jøts janch øts idø'on nwa'añ ku ja nayide'en yikmay'att.

11

Ja jaa'dyi pøn ja Juan Bautista ojts tkexy

¹ Xjats ku nwindson'ajtim Jesús tta'ana'am'abajtyiñ ja nimakmajtskpi pabøjkpitøjk, winets ja ojts chøøn, jøts ja ñijkxy yik'ixpøjkpi kajpxwa'kxpi ma jaty ja kajp jam ja'abi etjotp.

² Jøts ja Juan Bautista, ku ja jam wyinaty puxøjkjotp, jøts ja tnija'wiyiñ ti jaty wyinaty tyump ja Cristo ja yiknitsokpi, winets ja tkejxy namajtsk ja pyabøjkpi jøts ja t'ats'ejxtit ja nwindson'ajtim Jesús, ³ jøts ja t'atsyiktø'ødit yide'en:

—¿Mjanchjacristo mets idø'on, ja yiknitsokpi midi tijy menwamp, uk njøp'ejxp øøts idø'on jadu'ukpi?

⁴ Xjats ja nwindson'ajtim Jesús y'adsojimbijty:

—Nøjkxti jøts jade'en xukmado'odit ja Juan sa jaty ti jaty m'ejxtip mnija'widip.

⁵ Tamimadya'akti sa winap jaa'y wyin'ejxwa'kxti, sa pakma'at jaa'y yø'øyjø'økti, sa yø pu'uts pøjkibi cho'økti tuki'iyi, sa nat jaa'y myadoobøkti, sa oo'kpi yjukpyøkti, jøts sa ayoobi jaa'y ja Dios kyajpxy yiktukmadowdi. ⁶ Nekim ja'adi pøn tu'ugyi ja janchja'win tmøøt'ajttip, ka'ap winguwopi jøpkuwopi tmijattit ku ø xjanchjawidi.

⁷ Ixanim idø'on ja wyinaty tyimchoondi ja Juan Bautista yja'a'y midi ja pyabøjkpi'ajtpy, ku ja nwindson'ajtim Jesús tnimadyaktøjkijyiñ ja Juan, yide'en ja tnimaay ja mayja'a'y:

—¿Ti ojts x'ejxti jam abak etjotp ku jam ojts mnøjkxti? ¿Ojts meets jam yjawi x'ixy tu'uk ja jaa'y midi jade'en ajtp sam kapy pyojimbity pyoj'adijy? Pø ka'axi, pø tu'ugyixi ja tm'iity ja wyinmaa'ñ. ⁸ ¿Tits idø'on ojts x'ats'ejxti? ¿Uk ojts x'ejxti tu'uk ja jaa'y midi janchweti janchnaamyi, midi janch tsuj ja wyet tø tyikpety? Pø wa'atsxi xnijawidi pøn jade'en naxyoixidip jøts ku ja jam ñachøkyidi ma ja windsøndøjk jam chøønidi. ⁹ ¿Tits inkwan idø'on mjantyim'ats'ejxtøø? ¿Tu'uk ja Dios kyugajpxy? Janch ja'ats idø'on pøn jawaani tjaaktyimyøj, nigidibaat ja yjadu'ukpi jade'endi. ¹⁰ Ja Juan idø'on jade'en yiknigajpx ku wya'añ Dios kyajpxy yide'en:

Ngajxjawyenip øts, u'nk, ja ngugajpxy tu'uk,

jøts ja jaa'y ja wyinmaa'ñ ja tyiktøøjit tyiktuudaajkit, jøts mets ja m'ixpøjkin yikjøp'ext.

¹¹ Tyiiby øts idø'on nmadya'aky, jøts ku ka'ap jade'en pøn myajada'akñim Dios kyugajpxy sam ja Juan Bautista; pøni pønts øts nja' xpaduujnip jøts ku tyøki ma øts ngutujk ttanitanit ja jaa'y, ja'ats ne'egi yikmøjpiktaktip jøts nika'ap ja Juan Bautista.

¹² Jaayip ja Dios kyutujk cheptak'okwani ku yø Juan Bautista myiñ jøts ixymbaatnim kyakixy kyanaxy. Aguwani ja tjadyimyjamimajada'akwa'andi pøn nadya'aja'wiyidip ja yjotmø'ajtindi. ¹³ Pøn ja Dios kyutujk yjawi tka'uknigajpxip, ni'ijtyi ja tnigajpxti pøn Dios kugajpxy'ajtidip, jøts nayide'en ja Moisés kyutujk tyikwa'añ jøts jaabaatnim ja tø yikni'amøñ ku ja Juan Bautista yam tø myiñ; ¹⁴ jøts pøni mjantyimyjanchjawiwandip,

ja Juan idø'øn ja' pøn yiknigajpxp jøts ku mye'ent jadigojk ja Dios kyugajpxy midi txøøw'ajtp Elías. ¹⁵ Pøni pøn yikxon tñimadoop, wants tjä'gyuki.

¹⁶ Jade'en meets mdami'ejxi sam ja mutskuna'jk muum y'adø'øtsti jam maayjotp, ku ja myi'unä'jk nisudso'ampy tkagupøjkijidi ja kyuyajtin midi ja yja' ttsøjkpy yjaguyatwampy, jade'en ja yiknimaadyi: ¹⁷ "Tø øø njaxu'uxy, ka'ats m'atswa'andi; tø øøts ja canción jotmay'øøgyim nja'øømi, ni jade'ents tø mgaya'axti." ¹⁸ Tøxi yø Juan myiñ jøts ka' yø kyay jøts ka' yø y'uuky, jøts mwa'andi jøts ku miku' yø myøøt'ajtpy. ¹⁹ Xjats ø tø njamemi, kaapy ukpts øts, jøts mwamidi jøts ku øts janchkaxim ngay n'uuky, jøts ku øts ja møøt nnamyayi pøn yiktejtjip jantyimbyojkpitumbijaa'dyi, jøts nayide'en møøt ja yikugubajtpitøjkti. Pøni pønts ja Dios yja' tkupøjkjip, ja'ats tjä'gyukjip sam ja Dios yja' tsøkyin.

Ja kajp midi kamadoodip

²⁰ Xjats ja nwindson'ajtim Jesús ttamigajpxkijxy ja kajp ma jaty ja wyinaty tø ttuñ ja milagri'ajtin, ku dø'øn ja jaa'y jam ka' tyimyiktigatstinim ja chinaa'yin. Yide'en idø'øn ja wyaañ:

²¹ —iMjanch'ayøøy meets, Corazíngit jaa'dyi! iMjanch'ayøøy meets Betsaidit jaa'dyi! Ku jeexyip ja milagri'ajtin tyuñi jam Tiro jøts jam Sidón midi meets ya tø myiktu'unxi, ku ja jeexyip jam yiktuujnidi ja milagri'ajtin, windi'ixyip ja jeexyip tyiktigajtsnidi ja chinaa'yindi, ku ja pyøky jeexyip tyimchaachjawidi. ²² Øtsts yam wamp jøts ku nøjkx ja tiidyu'unin ñaxy, mgu'ayowip meets ja jinaxy, nika'ap ja ne'egi jade'en y'ayo'odit pøn tsinaadyip jam Tiro jøts Sidón. ²³ Jøts meets Capernaumit jaa'dyi, ¿ma mee xijy mnøjkxti tsajpjøtpty? Pø japxi meets ayodaajkjøtpty mnøjkxtit. Ku jeexyip ja milagri'ajtin yiktuñ jam Sodoma midi meets ya tø myiktu'unxi, ne'egi nay jaa ja kajp jeexyip, ka'ap ja jeexyip sa yjaty. ²⁴ Øtsts idø'øn tyimwyamp ku wyinaty ja tiidyu'unin ñaxy, ne'egi yikxon mee ne'egi mjaaktyimy'ayo'onbaatt, jøts nigidi jade'en pøn jaty tsinaadyøø jam Sodoma.

Ya mendi jøts mboo'kxtit

²⁵ Xjats ja nwindson'ajtim Jesús yjaakwaañ:

—Dios Teety tsajpjøtptip, yikjujky'ajtpi ya naxwiiñ, nmøja'wip mets ngunuu'kxyja'wip mets, ja'agøjxp ku tø xamidsøky o pøn ja mnitsoojkin jøts yø wijy jaa'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'øn ka'ejxiyimdi. ²⁶ Jade'ents Teety tø xuñ sa kø'øm xamidsøky øy pøn.

²⁷ Xjats ja Jesús tñimaay ja mayjaa'y:

—Tum ja' øts ndeety xuktump midi ja kø'øm tyunwampy. Ka'ap øts pøn jade'en xnijawi sam øts ndeety kø'øm xnijawi; nika'ats øts ndeety pøn wa'ats ñijawiyi sam øts ja kø'øm ndyimñijawi, jøts pøni pøn øts ja nduknijawiwampy, ja'ats tñijawidip ja Dios Teety. ²⁸ Øts idø'øn xnime'endip pøn jaty agøjxtip jotkøjxtip, pøn jaty ø xku'ayo'ombaajtidip, øts mee nyikpoo'kxp. ²⁹ Kupøjkidik øts ja n'ixpøjkin jøts mwinmaa'nbyaattit jade'en sa meets tø ndaniwinmayi, yujy øts winmaa'ñ njagyepy; pyaatpts meets ja m'anmija'win ja øy'ajtin ja kunuu'kx'ajtin. ³⁰ Yø ixpøjkin midi meets yam nmøøpy, ka'ap yø chepi, jajtni yø', ja'ayi xka'ixmatsttit.

12

Ku ja Jesús ttøjtøø ja ariin yam poo'kxin xøøw

¹ Tuu'yø'øpy ja nwindson'ajtim Jesús wyinaty, poo'kxin xøøwts idø'øn, jøts ja jam wyinaty ñaxti ma kam jam. Janch yuu'oo'kktipts ja pyabøjkpitøjk jøts ja ariin uun ja ttøjpinaxwa'ktøø, jøts ja pyajk ja tjøø'kxiyidi. ² Xjats kuts ja fariseotøjk ja jade'en t'ejxtøø, winets ja ttamajstøø ja nwindson'ajtim Jesús:

—Ejx yø mbabøjkpitøjk jade'en y'adø'øtsti, jøts ka'ats pyaat'aty: jøts yø jade'en y'adø'øtstit ku poo'kxin xøøw.

³ Xjats ja yide'en yiknimaadyøø:

—¿Ti ka'anim meets ja Dios kyajpxy x'ixy midi tnigajpxp sa ja David tuk'ojk tmøøt'adijch ja myigu'uk, ku yuu ja wyinaty yik'ookwa'anidyidi? ⁴ Tsaptøjkjotpyxi ja ojts tyøki, japts ja ojts tkay ja kunuu'kxy chapkaaky midi ja Dios yiktamiyoxp, midi ja ka'ap pyaat'aty jøts ja tka'aty, uk jøts ja ttuka'aty ja myigu'uk, ja'ayi ja paat'ajtidip pøn teety'ajtip. ⁵ ¿Jøts nigidibaatnim meets ja kutujk x'ejxni midi ja Moisés yjaay, midi wamp jøts ku teetyøjk ka' pyoo'kxti jap tsaptøjkjotpy ku poo'kxin xøøw, jøts nika'ats ja pyøkyi? ⁶ Øts wamp jøts ku ja jadu'uk jawaani møj, nika'ap tsaptøjk yja' jade'en. ⁷ Ka' meets yø xnimadø y pøni sa dø'øn yø tjatijy ya'at Dios kyajpxy ku ja Dios Teety wyaañ: “Ja' ø ndsøjkpy jøts xmøøt'attit ja pa'ayo'owin ja ayo'ejxin, jøts ne'egi kidi xyik'oockti yø jiyujk yø tsakaa midi jaty myojxtip.” Kuk y'ijty xja'gyukidit, ka'abik mmigu'uk y'ijty xpøky'ejxtit øy ja ti pøky tjagatundi. ⁸ Ngudanaapy øts ja naxwii'ñit jaa'y jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y midi ja kyø' jadi'iñi tøtsnip

⁹ Xjats ja nwindson'ajtim Jesús jam chøø'ñ jøts ja ojts ñijkxy, tyøjkiyii'ñ jam tsaptøjkjotp ¹⁰ ma wyinaty jam tu'uk ja jaa'y midi ja kyø' jadi'iñi tøtsnip tuktamajñ; jøts kumi øy idø'øn ja tyimy'ixa'adi ti ja yjadyimy'uktani'øønidip ja nwindson'ajtim Jesús, jøts ja tyiktøødøø t'amidoodøø ñadyijyi:

—¿Kutujk yø' ku pamaa'y jaa'y nyiktsojkin ku poo'kxin xøøw, u ka'?

¹¹ Jøts ja nwindson'ajtim Jesús ja ojts t'adsøy, yide'en ja tnimaay:

—¿Wan meets ja mborreek ndejin jadi'iñi xmajtstu'utt ku ja wyinaty tø kyunaxy jap jutjotpy yam poo'kxin xøøw? Pø kuwanixi ja xninøjkxtit jøts ja x'atsjuuttit. ¹² ¿Ti sats ja jiyujk jade'en yjaakyikjotmay'aty, jøts ja jaa'y jadi'iñi yikmajtstu'utt? ¡Pø ka'axi, pø jaa'yxi ja! Paat'ajtip n'ødyu'unin øy pøn ku poo'kxin xøøw.

¹³ Xjats ja yiknimaay midi ja kyø' wyinaty tøtsp:

—Xajtøw.

Jøts ku dø'øn ja ojts xyajtiy, tyimyøkpøjk ja kyø' ja', nayide'en ja tyimyja'wiyii'ñ sam ja yjadu'ukpi kø' midi møk. ¹⁴ Winets ja fariseotøjk wya'kpidsømdøø, jøts ja tkajpxy'ajtpinibøjkidøø sudso ja tjadyimy'ukyik'oocktit ja nwindson'ajtim Jesús.

Ku ja Dios kyugajpxy Isaías tnigajpxy sa ja Jesús jyatwa'añ kyubatwa'añ

¹⁵ Kuts ja nwindson'ajtim Jesús ja tñija'wiyii'ñ, winets ja jam ojts cho'oni jøts mayjaa'y ja ojts pyadsøøñi. Yikmøkpøjkijpxy idø'øn ja pamaa'y ja', ¹⁶ jøts ja yikxon ttukmadø y jøts ja ka'ap ñimadya'agidit pøni pøn idø'øn ja'. ¹⁷ Jade'en'ampy idø'øn ja jade'en yjaty, jøts ja jade'en ka'pxy tyimyjatt sa wyaañ Dios kyugajpxy midi Isaías'ajtp, ku ja yide'en wyaañ:

¹⁸ Yø' øts idø'øn tø n'a'ejxi, øts yø' ndumbi,

yø' ø ndsøjkpy jøts yø' ø ndajotkujk'ajtpy.

Nmo'op øts yø' ja nmøk'ajtin ja n'Espíritu Santo,

jøts øts yø xnigajpxit ja ndiy'ajtin o magajp.

¹⁹ Ka'ap yø cheekt, ka'ap yø wyopt, ka'ap yø ya'axt yjokt, niduk'aawin yø kyayikmado'ot ja y'aaw y'ayuujk ja nøø'ajy tuu'ajy.

²⁰ Ka'ap yø øy pøn nugo tyimdy'a'oo'kpety,

ka'ap yø nugo tukmajada'ak tyimyajada'aky øy pøn mabaat tyimyjatundigøy,

kunim yø yikxon tpikta'akt ja kyutujk ja tyiy'ajtin.

²¹ Jøts yø ødyimbyøngajpi y'ajot'attit.

Ku ja Jesús yiknimaay jøts ku miku' myøk'ajtin ja tyiktuujni

²² Xjats ja nwindson'ajtim Jesús ojts yiktaninijkxy tu'uk ja jaa'y midi winap midi uum, jøts tø miku' ja wyinaty tyatøkiyi. Ojts ja tyikmøkpøjkpy jøts ja jaa'y wyin'ejxwa'kxy jøts ja y'awijy jadigojk. ²³ Jøts idø'øn ja jaa'y ja ñigyumaap tyimyja'widøø, yide'en ja ojts wya'andi:

—¿Ti ya'at ndejin, ja rey David y'apip?

²⁴ Xjats ja fariseotøjkti ja'ayi ja ojts jade'en tñimyadowdi, xjats ja wyandøø:

—Jade'en'ampy ya'at jaa'y tyikpidsimy yø miku' kumi ja møj miku' myøk'ajtin yø yiktuujnip, jøts yø ttuktabsimy ja myimiku', yø'øts yø wyindsøn'ajtip.

²⁵ Wa'ats ja nwindson'ajtim Jesús ja tñijawi sa jaty ja wyinaty wyinmaydi, jøts ja tñimaay:

—Nimidi'ibi kutujk køømyi ñamyidsep'aty, kuts ja cheptundi ja xem yam jadi'iñits ja ñankyudigoyidi; u ku kajp u ku jaa'y tukmigu'uk ñamyidsepikyidi jøts ñawya'kxyidi, ka'ap ja yikjøp'ijxy'aty jøts ja jeky ñankchøøniyidit. ²⁶ Jøts nayide'en yjaty ku ja møj miku' tyikpidsimy ja myimiku', tøts idø'on ñamyayi ñawya'kxniyi; ¿sudso'ampyts ja jade'en y'ett ja myøk'ajtin? ²⁷ Pø jade'enxi mee mwa'añ jøts ku øts jade'en'ampy ja miku' nyikpidsimy ku øts ja møj miku' myøk'ajtin nyiktuujniyi; pøni janch jade'ents, ¿pønts meets ja mmigu'uk ja myøk'ajtin yiktuujnip ku ja miku' ja nayide'en tyikpidsømdi? Ja'axi mee mni'øø'niyidip jøts ku nugo jade'en nugo mjadyimgyajpxigoydi. ²⁸ Kuts øts, jade'en'ampy øts ja miku' nyikpidsimy ku øts ja Dios myøk'ajtin nyiktuujniyi, jade'ents meets idø'on yø xja'gyukit jøts ku Dios ja kyutujk tø mdanija'adyidi midi ja tyanitanaapy yjaa'y.

²⁹ ¿Pønts øy nugo tyimy'uknidøjkp ja jaa'y jap tyøjkjøtpy midi janch kamaabyim, øy ja pøn tyimyjapøjkxiwyajni ja pyikta'aky? Jawyeenxi ja yikøwøønt yikpak-wøønt, winetnims ja yikpøjkjøxit ja pyikta'aky, pø tøxi øts nayide'en ja miku' yja'nmimajada'aky.

³⁰ 'Pøn ø xkabudøjkp, ja' øts idø'on xmidsepwamp; jøts ku øts pøn ti møøt njapøkmukwa'añ, jøts ja jinaxy tøkwa'kxy.

³¹ Paty meets idø'on nnøjmi, jøts ku øy tyimyjapøni yikmaa'kxkøjxp ja' pyøky, pøni ti jaty pøn tyumpy kyajpxpy; kuts pøn tka'uk'ømyigajpxt ja Espíritu Santo, niwindem ja mibaat kyayikpojkipimee'kxy. ³² Jøts øy øts pøn xjaga'ømyigajpxy, jaakyikpojkipimee'kxp ja'; jøts ja' pøn tka'ømyigajpxp ja Espíritu Santo, ka'ap ja mibaat yikpojkipimee'kxy ya naxwiñ, jøts øy tyimyjamaðso'ji.

Pøni sa wyimbidsimy øy ti, ja'ats tyiknigaxø'kp pøni sa ti y'øyi kya'øyi

³³ 'Ku kipy y'øyi, nayide'en ja øy tyøøm tyikwingaxi'iky; jøts midi ka'øy, nayide'ents tyøøm ja tyikwingaxi'iky ka'øy. Ja tyøømts ja kipy yikta'ejxkajp pøni sa øy ka'øy tyøømi. ³⁴ ¡Meets win'øø'mbidi! ¿Sudso mee m'øgyajpxt jøts ka'ats m'øyjaa'yidi? Jøts pøni sa y'awa'kxy yø aaw, tum jamts yø chøøn midi jam ujts abøki yikmøøt'ajtp jam amjotp. ³⁵ Pøn øy jaa'y, jade'en'ampy ja tyikpidsimy ja øgyajpxy ja øwyinmaa'ñ, kumi tum'øwyinmaa'ñ ja yjagyejpy jam y'am yjotp; jøts idø'on ka'øyjaa'myidi jade'en'ampy tkayikpidsimy ja øwyinmaa'ñ, kumi tum ja ka'øybi ja jam myøøt'ajtpy y'am yjotp. ³⁶ Øtsts mee nnimaapy jøts ku wyinaty ja tiidyu'unin ñaxy, ja'abi xøøwts tuki'iyi yikøyajkøxt ja øgyajpxy ja ka'øgyajpxy pøni sa pønjabøn tø wya'añ. ³⁷ Pøni sa ja m'ayujuk pøni sa ja mwinmaa'ñ, nayide'ents myiktiidyu'undit, nay ja' myiktapøky'ejxtip, nay ja'ats mgayiktapøky'ejxtip.

Ku ja ka'øyjaa'y t'amidowdi jøts yiktuk'ejxtit ja milagri

³⁸ Winets ja nwindson'ajtim Jesús ja fariseotøjk ñimaajyøø møøt ja kajpxwejpitøjkti: —Windsøn, ja' øø n'ejxwampy jøts øøts xuk'ext tu'ugin ja milagri'ajtin, pøni janch ku mjanchdiosu'ngi:

³⁹ Xjats ja nwindson'ajtim Jesús ja t'adsøøy:

—Ja' idø'on ja milagri'ajtin amidoodip pøn kawindiyjaa'y'ajttip; ka'ats ti milagri'ajtin y'ukyiktuk'ejxnidit, wan ja'ayi sa yjajty kyubejty ja Jonás ja Dios kyugajpxy. ⁴⁰ Nayide'en ja Jonás y'ijty tigøøk xøøw tigøøk tsuu jam ajkx yjotp jøts pyidsiimy jujky, nayide'ents øts idø'on jap naxpatki'py n'ett tigøøk xøøw tigøøk tsuu jøts nbidsø'ømt jujky. ⁴¹ May'ampy

pyidø'øktit ja jaa'y pøn jaty tsinaadyøø jam Nínive ku yja'att ja tiidyu'unin xøøw, ku yø jaa'y yiktiidyu'undit pøn jaty ixyam tsinaadyip jujky'ajttip ya naxwiiñ, yø'øts idø'øn yikpøky'ejxtip; kumi ne'egi yiktigajstøø ja Nínive jaa'y chinaa'yindi ku ja Jonás ja ojts tyukmadøyidi ja Dios kyajpxy, jadyimy'ixyats idø'øn ja' midi jawaani møj jøts nika'ap jade'en Jonás, jøts ka'ap meets ja xmøjpikta'aky. ⁴² Nayi pidø'økp nayide'en ja windsøndø'øxy ku tiidyu'unin xøøw, ku ya'at naxwii'ñit jaa'y yiktiidyu'undit jøts pyøky ja yiktani'øønidit; kumi jagam et ja ojts chøøñ, jøts ja ojts jadine'en tnimiñ ja Salomón ku ja tpatmadoowajni ja kyajpxwejin, ixyats jadu'uk midi jawaani tnija'wip jøts nigidi jade'en Salomón, jøts ka'ap meets ja xmøjpikta'aky.

Ku ja miku' jadigojk t'awimbeti ja chinaadyaajk

⁴³ 'Ku miku' tmajstutu'uty ja jaa'y, jøts ñijkxy widejtpi tø'øts etjotp, tja'ixa'ay ja pyoo'kxaajk; jøts kuts nima tkapaaty, xjats wyinmay: ⁴⁴ "Nay ja ndøjk ø n'awimbetip ma ø tøndøøñ." Kuts wyimbity, jøts ja jaa'y jade'en yikpaaty sam tøj tawa'ats, pe'ety jaaxy ja jap. ⁴⁵ Xjats ja chøøñ, jøts ja tjaaktyimy'atsway ja niwixujk ja myimiku' midi jawaani ka'øydi, jøts ja niduki'iyi ttatøkidi ja jaa'y, tsinaadyaajk ja tyikwa'andi. Nayide'ents idø'øn yø kawindiy jaa'y yjattit.

Ja Jesús tyaaq jøts ja y'uch

⁴⁶ Exam idø'øn ja nwindson'ajtim Jesús wyinaty jade'en tmigajpxñim ja jaa'y, ku ja tyaaq yja'jty jøts y'uchti myigu'ukti. Japyi ja ojts tøk'agui'py y'awejxti, ja' ja tyimy-jamigajpxwandip. ⁴⁷ Jøts ja nwindson'ajtim Jesús yiktukmadøø, jam idø'øn ja pøngapøn tnigajpxkøjy:

—Ixap ja mdaak tøjkwimpy y'awixy møøt ja m'uch, jøts mets mmigajpxwajnip.

⁴⁸ Jøts ja tnimaay pøn wyinaty jade'en tø tyukmadøyi:

—¿Pøn øts ndaagip, pøn øts idø'øn n'uchip?

⁴⁹ Winets ja tnigu'umiyi'ñ ja pyabøjkpitøjk jøts wyaañ:

—Yø' øts idø'øn ndaagidip, yø' øts idø'øn n'uchidip. ⁵⁰ Pøn øts ja ndeety kyutujk tpaduujniyip midi jap tsajpjøtpy, yø' øts idø'øn nmigu'ugidip, yø' øts idø'øn ndaagidip.

13

Ku ja Jesús tmadyakpaaty ja jaa'y pøn nøjkx neppi

¹ Jøts ja nwindson'ajtim Jesús jam tøjkjotp pyidsiimy, jøts ja ojts ñijkxy jam mejy'am, jamts ja y'ixaajky. ² Jøts kumi janch may ja jaa'y ñamyujkidi ma ja jam wyinaty, winets ja nwindson'ajtim Jesús tyøjkiyi'ñ jap barkijøtpy, japts ja y'ixaajky, jøts ja mayjaa'y jam niduki'iyi tyandøø nøø adsayjotp. ³ Xjats ja ttuk'ixpijky ja y'ixpøjkin, ñimay idø'øn ja ojts tnigajpxkøjy. Tum ejxpajtin madya'aky ja tyanimadyakpy pøni midi idø'øn ja y'ukyiktamija'gyukip, yide'en ja wyaañ:

—Tu'uk ja jaa'y chøøñ neppi; ⁴ jøts ku ja ojts twijy ja tyømt, xjats ja tømt winaagin ñaxkidaajky jam tuu'am, ja'ats ja joon ojts tnimendi jøts ja wa'ats tpeemujkøjxtøø.

⁵ Winaagin ja tømt ñaxkidaajky jam tsaajotp ma ja naajx kyamajpxyi; ja'ats ojts tsojk myujxkojti kumi ka'ap ja naajx kyøjki. ⁶ Kuts ja xøøw ja'ayi pyidsiimy, ja'ats ja ojts chaa'yiyi, yats y'aats ja yjaakidyimy'ejtnidi, xjats ja tuki'iyi ojts tyøtskøjxni. ⁷ Jøts ja tømt winaagin ñaxkidakmøø jam maagyujp'agujkp, jøts ku ja maagyujp yøøñ, ja'ats ja ojts ñi'aa'mbajtniyi. ⁸ Jøts ja tømt ojts waani ñaxkidakmi ma øñaajx, ja'ats janch'øyiyi'ñ; winaagin magø'pxy pyajkpejty ja tu'ukpi tømt, winaagints tugui'pxy, jøts winaagin ee'pxmajk. ⁹ Pøni pøn ja ja'gyukin tmøøt'ajtp, wan tja'gyukidi.

Tigøjxp idø'øn ja Jesús ejxpajtin madya'akyøjxp ja y'ixpøjkin tyaky

¹⁰ Winets ja nwindson'ajtim Jesús ja pyabøjkpitøjk ñimejniyi wingon jøts ja tyiktøøddøø:

—¿Jadits ku yø jaa'y jade'en xamimadya'aky ejxpajtin madya'aky ku xyik'ixpiky?

11 Jøts ja t'adsøøy:

—Meets Dios ja'ayi mduknija'wiyip ja kyutujk jap tsajpjøtpty midi pøn tkanija'wipnim; jøts ka' yø mibaat tnijawidit. 12 Pønts tjagyajp ja ja'gyukin, jaaktyimyikmo'opts ja' jøts yikxon tyimyja'gyukit; jøts pøn kaja'gyukip, jaaktyimyikpøjkxipts ja' pøni wine'en paadin ja jap tjaakjamøødi ja wyijy'ajtin. 13 Paty øts yø jade'en ndukmadowdi wenk madya'akyøjxp; yjadyimy'ejxtipxi jade'ents yjatti sam tø tkidyimy'ejxti, yjadyimyja-madoodip jade'ents yjatti sam ti tkidyimñimadowdi, uk sam pøn ti tkidyimyadøyin. 14 Jade'en idø'øn ixyam tyimyjati sam wyaañ ja Isaías ja Dios kyugajpxy, ku ja yide'en wyaañ:

Mjadyimyjamado'odip jøts ka' xnimado'odit;

mjadyimyja'ejxtip jøts jade'en mjattit sam pøn ti tkidyimy'ijxñim.

15 Nisudso'ampy yø yjade'embijaa'y kya'ukmadoonidi ja y'anmija'win, tum ka'øyt nmadowdi,

jøts wimbeets kugoots y'ejtnidi;

ka'ap ja wyeen ttawin'ejxti,

nika'ap ja tyatsk ttamadowdi,

nika'ap ja kyubajk yja'gyukidi,

jøts ni øts xkanimendi øyik øts idø'øn nyiktso'oktit.

16 Xjats ja Jesús tjaaknimaay ja pyabøjkpitøjk:

—Meetsts idø'øn janchjotkujk'atyim, kumi mda'ejxtip ja mween jøts kumi mdamadoodip ja mdatk. 17 Jøts janch øts idø'øn nwa'añ, jøts ku may ja jaa'y pøn jaty Dios kugajpxy'ajtidip, pøn jaty øyjaa'y'ajttip, jade'en tyimyjawemp'ejxwandi pøn meets ixyam m'ijxpy, jøts nijuunits tø tka'ejxti; yjadyimyjamadoowandi ya'at jade'en midi meets ixyam mmadøøpy, nijuunits ja tkamadowdi.

Ku ja Jesús tnigajpxy sudso dø'øn yikja'gyukit ku jaa'y neppi ñijky

18 'Ukpatmadowdim meets, jøts xja'gyukidit pøni sudso'ampy idø'øn ya'at madya'aky tijy ku ja jaa'y chøø'ñ neppi. 19 Pøn tjamadojidip ja Dios kyajpxy sa ja ttanitanit ja yjaa'y jøts nika'ap tmøjpikta'akti, ja'ats idø'øn jade'en jajtipp sam ja tømt midi naxkidaajk jam tuu'am; jøts miku' ja jaty ñimiñiyi jøts ja pyøjkxiyi ja Dios kyajpxy midi ja tø tja'ukja'gyuki. 20 Jøts ja tømt midi naxkidaajk jam tsaajotp, jade'en idø'øn ja ñamyayi yjaty sam jadu'uk ja jaa'y pøn tpatmadojidip ja Dios kyajpxy jøts ja jotkujk'atyim tkupøjkojti, 21 jøts kumi jade'ents yjatti sam ja ujts ya'ats kya'ejtxiyi, jøts ja nigidi jeky tmi'etti; ku ja tku'ayo'ombaadidi ja Dios kyajpxy uk yiktabawopti paat, jøts ja jaty tyim'yajojidi. 22 Jøts ja tømt midi yikwøj jam maagyujp agujkp, jade'en idø'øn ja n'ukpiktaajkin sam ja jaa'y pøn tpatmadojidip ja Dios kyajpxy, jøts ja pikta'aky jøts ja jotkujk'ajtin ja' ne'egi yjotmay'ajttip, ja' ja win'øø'nidip, jøts ja Dios yja' tyigøøñi jøts ja jaa'y ja yjanchja'win nika'ap tyikwingaxi'iky. 23 Ja tømt midi ojts ñaxkida'aky jam øñaxjotp, jade'en ja nbiktaajkin sam ja jaa'y pøn tpatmadojidip ja Dios kyajpxy jøts yja'gyukidip, jøts yikwingaxø'øktip. Jade'en ja winaagindi sam ja tu'ukpi tømt pyajkpety magø'pxy, jøts winaagin jade'en sam ja' midi pajkpajtp tugui'pxy uk ee'pxmajk.

Ku ja ariin yiktamineepi ja ka'øyt ujts

24 Jøts ja nwindson'ajtim Jesús tjaaktamimadyaajky jadu'uk ja madya'aky, jøts ja mayjaa'y yide'en tnimaay:

—Jade'en idø'øn ja Dios kyutujk midi yjaa'y ja tyanitanaapy sam tu'uk ja jaa'y twijyin ja ødyømt jam kyamjotp, 25 jøts ku ja wyinaty ixjam myaanidi niduki'iyi, winets ja kugam myidsep ojts tyatøjkxiyi ja kyam, jøts ja ojts t'atswijy ja ka'øyt ujts jam ariinjotp. 26 Kuts ja ariin yøøñ ku ja y'uuniyi'ñ, jøts ja ka'øyt ujts jam nayide'en pyidsimy. 27 Winets ja tumbi t'atsnimaadyøø ja wwindson: “Wwindson, pø janch tum ødyømts mets ojts xijy xwijy jam mgamjotp, ¿mats yø ka'øyt ujts tø chøø'ñ?” 28 Jøts ja wwindson ja ñimaajyidøø: “Ja

ta'ajkiibi ja tajotma'tpi net jade'en tɔ y'adɔ'ɔtsti." Xjats ja tumbi tyiktɔwdi jɔts ja wyandɔɔ: "¿Mdsɔjkpy jɔts ɔɔts ja ka'ɔy ujts n'atswejxkɔxt?" ²⁹ Yide'ents ja ojts y'adsɔyidi: "Ka', ku net ja ka'ɔy ujts yjayikwext, nayide'ents inet ja ariin yikwejxnit. ³⁰ Ne'egi tyimy'ɔy'atp jɔts jade'en xmajtstu'uttit, wan jade'en tyondi, jaanim ku wyinaty tɔ tyimbyaaty jɔts yikwejxnit; winets ɔts ja tumbi ngaxt jɔts ja jawyeen twejxmujkɔxtit ja ka'ɔy ujts, yikxon t'adsu'umdit tuk'ɔɔxy jaty jɔts ja jade'en yiknitsa'at, jɔts ja ariin yikpɔkjɔ'ɔkt jap abɔjk'i'i'ñjɔtpy."

Ku ja Jesús tmadyakpaaty ja mortas tɔmt

³¹ Nayi myadyaajk ja nwindson'ajtim Jesús jadu'uk ja madya'aky:

—Jade'en idɔ'ɔn ja Dios kyutujk midi yjaa'y ja tyanitanaapy sam ja mɔj mortas tɔmdin midi jaa'y wyijpy kyamjɔtpy. ³² Jɔts kumi jaaktyimchuu'kxni ja ñidɔmt yɔ', ka'ap jadu'uk jade'en ujts midi yjamigu'uk'ajtpy; kuts yɔñ, yikxon yjantyimyɔñ mɔj tukmɔj kipyin, janch mɔj idɔ'ɔn yɔñ ti sɔ ɔy ti joon myendi kixy kida'aky, jɔts ja ñabye'eñidi jam kipy awajkɔjxp.

Ku ja Jesús tmadyakpaaty ja levaduri

³³ Nayi tyamimadyaajk jadu'uk madya'aky:

—Jade'en idɔ'ɔn ja Dios kyutujk midi yjaa'y ja tyanitanaapy sam ja levaduri midi tɔ'ɔxyɔjk tyamimɔɔ'kxyip ja ariin way ku ja tɔ tkijpxy tigɔɔk ojk a'ejxi, jɔts ja jich yikxon yaa'kpiky.

Tigɔjxp ku Jesús xumi jade'en tyik'ixpiky ja jaa'y ejxpajtin madya'akyɔjxp

³⁴ Ejxpajtin madya'akyɔjxp idɔ'ɔn ja nwindson'ajtim ja y'ixpɔjkin tnigajpxy, jɔts tum jade'en idɔ'ɔn ja tnigajpxy pɔni ti dɔ'ɔn ja ñimadya'akwampy. ³⁵ Ja'agɔjxp ja jade'en yjajty jɔts ka'pxy wyimbidsɔ'ɔmt sɔ wyaañ ja Dios kyugajpxy ku ja yide'en tjaadyaañ: Ejxpajtin madya'aky ɔ nyiktu'ump ku ti ngajpxwa'ant; jɔts nnigajpxp ɔts ja' midi ka' pɔn tnigajpxnim, wine'en yam kujk y'ity kuuyip ja Dios tyik'ɔyiyi'ñ ja naxwii'ñit jɔts ɔxyambaat.

Ku ja Jesús tnigajpxy sudso dɔ'ɔn yikja'gyukit ku ja ariin yiktamineejpi ja ka'ɔy ujts

³⁶ Xjats ja nwindson'ajtim Jesús ojts tminawya'kxyi ja jaa'y jɔts ja tyɔjkiyi'ñ tɔjkjɔtpy, japts pyabɔjkpɔtɔjk ja ojts ñimiñiyi, jɔts ja ñimaajyiyi:

—Tuknimadook ɔɔts yikxon ja madya'aky ku tɔ xnimadya'aky ja ka'ɔy ujts midi yomp jam kamjɔtp.

³⁷ Winets nwindson'ajtim Jesús ja ñimaajyidi:

—Ja tɔmt wɔjpi, ɔts idɔ'ɔn ja', ³⁸ jɔts ja kam, naxwii'ñit ja'. Jɔts ja ɔdyɔmt, ja jaa'dyi pɔn Dios kyutujk tpaduujnidip, jɔts ja ka'ɔy ujts, ja jaa'yts ja'adi pɔn ja miku' yja' tpaduujnidip, ³⁹ jɔts ja ta'ajkiibi tajotma'atpi midi tnepp ja ka'ɔy ujts, nay ja miku' ja kɔ'ɔm. Jɔts ku tpaaty ja ariin wejxk'aats, ja dɔ'ɔn ja' ku naxwii'ñit jaa'y yiktiidyu'undit, jɔts pɔn tɔpkmuktip ja pikta'aky, ja ankilis ja'adi. ⁴⁰ Nayide'en idɔ'ɔn yjatt ku naxwii'ñit kyɔxt sam ja ka'ɔy ujts yikpɔkmukyin, sam ja yikpikta'agyin jap jɔnjɔtpy jɔts ja jap ñitɔy. ⁴¹ Ngaxp ɔts ja n'ankilis jɔts ja twaamujkɔxtit pɔn jaty ja myigu'uk tyikpɔktyundip, jɔts pɔn nayide'en ttunk'ajttip ja pɔktyunk, jɔts ja ttukmajtstu'uttit ɔts ja ngutujk jɔts kidi mibaat ttatɔkidi. ⁴² Jap ja mɔj jɔndɔɔdyajkjɔtpy tɔpikta'aktit ma ja yikxon tmiɔ'ɔdit tmiya'axtit, tmiwingidsetstit tmi'agidsetstit ja jɔɔn. ⁴³ Jɔts pɔnts ja Dios tpadundip pɔni sɔ ja wya'añ, ja'ats idɔ'ɔn jap ja mɔj kunuu'kxin tmɔɔt'ajttip ma ja Dios Teety ja kyutujk ttanitani ja yjaa'y. Pɔni mmɔɔt'ajttip ja ja'gyukin, ja'gyukidits!

Ku ja Jesús tmadyakpaaty ja meen midi jaa'y yikyu'uch y'ijtpy naxjɔtpy

⁴⁴ Nayide'en idɔ'ɔn ja Dios kyutujk sam meen yu'uch'ityin ya naxjɔɔjty kamjɔɔjty. Xjats jaa'y ja tpaaty jɔts ja nay jap jadigojk tyu'uch; jɔts kumi yjantyaxondakpy winets

ñijkxy jøts t'atsto'okixy tuki'iyi ja pyikta'aky ti jaty jam yjagyeyjpy, jøts ja naajx tjuy ma tø t'ukyu'uch ja meen' midi tø tpaaty.

Ku ja Jesús tmadyakpaaty ja tsaa meen'

⁴⁵ 'Nayide'en idø'øn ja Dios kyutujk midi yjaa'y tyanitanaapy sam tu'uk ajuubyi agajpxpi, pøn t'ixaapy tum ja øybi tsaa meen' midi ja chow kawinmaani, ⁴⁶ kuts ja tpaaty tu'uk midi janch tsobatp, winets ñijkxy jøts tuki'iyi y'atsnawyidoo'kixyi ti jaty jam yjagyeyjpy, jøts ja tjuy ja tsaa meen'.

Ku ja Jesús tmadyakpaaty ja xuummy midi' yikta'ajkxmakp

⁴⁷ 'Nayide'en idø'øn ja Dios kyutujk sam tu'uk ja xuummy midi yikta'ajkxmakp, kuts ja yiknøwejtspety jam mejyotp, jøts ja tyikpidsimy køx kida'ak ja ajkx. ⁴⁸ Jøts ku ja xuummy tø y'uch, winets ja ajkxmakpi ja twejtspidsømdi jøts ja tyiknøjkxti jam nøø'adsayjotp, jøts jam y'ixa'akti jøts ja jam twi'ejxti ja ajkx; kachjotpy ja tpikta'akti midi janch tum'øy jøts ja ka'øy ajkx yik'ixwijy. ⁴⁹ Jade'ents idø'øn yjatt ku naxwii'ñit jaa'y kyøxt; nibidsømidip ja' ja ankilis jøts ja abiky pyikta'agidit pøni sa pønjabøn y'øyi kya'øyi, ⁵⁰ jøts ja ka'øysi yikpikta'aktit jap møj jøndøødyajkjotpy ma ja yikxon yjødøit ya'axtit, wyingidsetstit y'agidsetstit.

Sa ja Dios kyutujk nyiknigaxø'jka'ant

⁵¹ Winets ja nwindsøn'ajtim Jesús ja yiktøjidi:

—¿Mnimadoodip idø'øn tuki'iyi?

Xjats ja wyandøø:

—Nnimadøøpy øø nwindsøn'ajtim yø'.

⁵² Winets ja ñimaajyidi:

—Ku tu'uk ja kajpxwejpi t'ukni'ixpøki sudso tnijawit ja Dios kyutujk midi yjaa'y ja tyanitanaapy, jade'ents ja pyidsimy sam tu'uk ja windsøn midi tjajtp tyikw'ingaxø'kp ja yjotkujk'ajtin ku ja tnanky'ijxyi øy ti køx kida'ak, wan tjemyi wan tku'aamyi.

Ku ja Jesús yja'jty jadigojk Nazaretit kajpjotp

⁵³ Xjats ku ja nwindsøn'ajtim Jesús jade'en tnmadyak'abajtiyi'ñ, winets ja jam chøø'ñ ⁵⁴ jøts ja ojts yja'aty jam kyø'øm etjotp ma ja kyugajpi. Jamts ja yik'ixpøjktøjkøø tsaptøjkjotp midi jam wyinaty, jøts ja jaa'y ñigyumaap yjanchajtøø, yide'en ja wya'andi:

—¿Ma yø jaa'y jade'en tø tjaty yø'øbi ixpøjkin? ¿Sudso yø jade'en ttuñ milagri'ajtin? ⁵⁵ Pø ja tsajtspits yø' y'u'nk, jøts ja María ttaagi. Kidi ja Jacobo yø' y'ajchti, jøts ja José møøt ja Simón, jøts Judas. ⁵⁶ Nayats ja y'uch kiixy yø chinaamyidi ma adøm ya. ¿Ti mats yø jade'en tuki'iyi tø tjaty?

⁵⁷ Patyts idø'øn ja jade'en ka' tmøjpikta'akti. Xjats ja nwindsøn'ajtim Jesús ja ñimaajyidi:

—Tum yiktsojpk ja Dios kyugajpxy øy ma, kuts kyø'øm kajpkijxy ku kyø'øm tøjkjøøjty, ka'abimts ja tiy yiktsøky.

⁵⁸ Jøts idø'øn ja jam ka'ap jadine'en ttuñ ja milagri, kumi ka'ap ja tjanchjawidi.

14

Ku ja Juan Bautista ja o'jkin tpaajty

¹ Nayi winet ets ja nwindsøn'ajtim Jesús yiknimadøøy jam Galilea, ja Herodes idø'øn ja tnmadoop pøn jam wyinaty windsøn'ajtp, ² jøts ja tñimaay pøn jaty ja wyinaty møøt tyuñ:

—Ja Juan Bautista net ja' midi y'ijty yiknøbajtp, ja' inet tø yjujkyiky jadigojk. Paty yø jade'en tmøøt'aty ja møk'ajtin jøts yø jade'en ttu'unt ja milagri'ajtin.

³ Jøts kumi ja Herodes ja Juan wyinaty tø chumyi, ja' ja wyinaty tø ñi'ane'emyi jøts ja pujx kadeen ja yiktagøwøønt yiktabakwøønt jap puxøjkjøtpy, ja'agøjxp ku ja ojts

ttamigajpxy ja Herodías, pøn ja Herodes ja y'uch Felipe ñidø'øxy'ajtpy. ⁴ Yide'en idø'øn ja Juan wyinaty tø tñimaañi ja Herodes:

—Ka' pyaat'atyí jøts yø jade'en xtyimñidø'øxy'att.

⁵ Jøts idø'øn ja Herodes tyimyjayik'ookwa'añ ja Juan, ja mayjaa'yts chø'jkíp; kumi tyumnija'widíp ja' jøts ku ja Juan tum ja Dios yja' tkajpxi. ⁶ Kuts ja Herodes ja xyøøw ja yjumøjt txøduuñ, winets ja Herodías ñøøx pyidsiimy ajtspi ma ja mayjaa'y jam wyinatyí tø yikwawdi yikwetsti migaabyi mi'ukpi, ja'ats ja Herodes yjantyaxondaajk, ⁷ jøts ja tñimaay møk'ampy jøts ku ja tmo'ot øy ti pøni ti ja kø'øm y'amidoowampy. ⁸ Xjats ja kiixy, tø tyaak ja wyinaty jawyeen y'agajpxiyi ku ja tñimaay ja Herodes:

—Møøky øts platijøtp ja Juan Bautista kyubajk.

⁹ Ja'ats ja windsøn Herodes kyujotmaadyøjkijyiñ; jøts kumi tøts ja wyinaty kø'øm møk'ampy ñimy jøts ku ja tmo'ot øy ti, tøts ja jaa'y ja wyinaty tmadowdi pøn jaty jam wyinaty migaadyip mi'uktip, xjats idø'øn ja øjts wya'añ jøts yikmo'ot. ¹⁰ Øjts tyikutuky jøts ja Juan Bautista ja kyubajk y'atsyikajtspoot jap puxøjkjøtpy; ¹¹ jatyí dø'øn ja øjts tyikmendi jap platijøtpy jøts ja kiixy ja yikømøøy, jøts tyaak ja tmøøy.

¹² Xjats ja Juan Bautista yjaa'y yja'atti, ja'ats ja ñine'kx ja øjts yiktsoo'nxiyi jøts ja y'atsyiknitajt; kuts ja t'ukyiknaxøjkidøø, winets ja ñøjkxtøø jøts ja øjts t'atstumadowdi ja nwindsøn'ajtim Jesús.

Ku ja Jesús tyikaay ja ñimagoxk milbi jaa'y

¹³ Kuts ja tñija'wiyiñ, jøts ja chøø'ñ nadyu'uk jap barkijøtpy, jøts ja ñijkxy ma jam nipøn kya'ity. Jatyits ja jaa'y ja tñija'widøø, winets ja øjts choondi ma jaty ja kajp jam, jøts ja tpanøjkxti tekyjø'øm. ¹⁴ Kuts ja Jesús pyidsiimy jam barkijøtp, jøts ja øjts t'ixy jøts kudam jaa'y jam wyinaty janch namaydi, jøts idø'øn ja øjts t'ayo'ixy, may tyikmøkpijky ja pamaa'y midi ja jam yiktanimeen. ¹⁵ Tsuu'jiñipts wyinaty, winets ja pyabøjkpitøjk ja øjts ñimiñiyi jøts ja ñimaajyøø:

—Tøts ja et chuul'jiñi, jøts ka' ya pøn chøøni. Kajxni yø jaa'y, jøts wan tñøjkxnidi ma jaty kajp jøts jam tju'udyit kyaaky tyojkx.

¹⁶ Xjats nwindsøn'ajtim Jesús ja tñimaay:

—Ka' yø ñøjkxtit; yikaydi meets yø'.

¹⁷ Jøts ja wyandøø:

—Ka'ap øøts ya ti nmøødi, ja'ayi tsapkaaky jap ja magoxkyi, jøts ajkx jamajtskyi.

¹⁸ Winets ja nwindsøn'ajtim Jesús ja ñimaajyidi:

—Ya yikmendi.

¹⁹ Jøts ja øjts tñøjmi jøts y'ixa'aktit jam miyjøtp. Xjats ja tñixajiyiñ magoxk ja tsapkaaky jøts majtsk ja ajkx, jøts ja øjts tkunuu'kxy jøts ja ttatujkiyiñ, jøts ja tkømøøy ja pyabøjkpitøjk, ja'ats ja øjts tyikwa'kxti jøts ja tmøødyi ja mayjaa'y. ²⁰ Niduki'iyi ja kyaydi ku'uxyi; jøts ja makmajtsk kach ujts wyindaañ ja aga'ak abu'xk. ²¹ Ñimagoxk mil ja jaa'y kyaydi tum yaa'dyøjk, jøts abiky ja tø'øxyøjkti møøt ja mutsk una'jkti, ka'ap ja yikmachowdi.

Ku ja Jesús yø'øy jam mejwyingøjxp

²² Xjats ja nwindsøn'ajtim Jesús nay jatyí tyiktøjkijyiñ ja pyabøjkpitøjk jap barkijøtpy, jøts ja ñøjkxtit jawyeen jam jaduktamajñ, yam ja ixjam tyañim jøts ja tminawya'kxit ja mayjaa'y. ²³ Kuts ja t'ukminawya'kxøø, xjats ja nadyu'uk pyatøjkijyiñ tsapkajpxpi jam kojpkøjxp. Jøts ku kyoodsiñaa, ixjam idø'øn ja wyinaty nadyu'uk, ²⁴ jøts ja barki ixjamni ja mejkyujk'am jagamni ja wyinaty. Janch jadi'iñi ja jam yikwibejpyø'øñi ku ja nøø tyojmji'iky, jade'en'ampy ja poj myiñ midi ja ñøjkxtip. ²⁵ Xjats ku yjøpkyoots'ajty, winets ja nwindsøn'ajtim Jesús ja jam ñimejnidøø, jadi'iñi ja yø'øy jam nøøwingøjxp. ²⁶ Kuts ja pyabøjkpitøjk ja øjts jade'en y'ixxyi jøts ku ja yø'øy jam nøøwingøjxp, xjats ja yjantyimchø'jkidøø, jøts nay ja tsø'øgi ja møk'ampy yikwajnidøø:

—iTi miku' yø jade'en!

²⁷ Jøts ojts ja nwindson'ajtim Jesús ja myigajpxyidi, jøts ja ñimaajyidøø:

—iKidi mdsø'ogidi, yikmøjkidi m'aaw mjoojt; øts idø'øn wamp!

²⁸ Winets ja Pedro wyaañ, xjats ja tnimaay:

—Windsøn'ajtim, pøni janch mets idø'øn, yikyø'øky øts nøøwingijxy jøts øts xyiknøjkxt ma mets ixjam.

²⁹ Xjats ja nwindson'ajtim Jesús ja ñimaajyøø:

—Men.

Winets ja Pedro pyidsiimy jam barkijotp, jøts ja yø'ochøø'ñ nøøwingøjxp, jøts ja ñijkxy ma ja nwindson'ajtim Jesús jam wyinaty. ³⁰ Kuts tjə'wiyi'ñ ja møk poj, ja'ats chø'jkiñøø; jøts enkyi køjk yjøptək'adøtsni, winets møk chabaguejky jøts wyaañ:

—iWindsøn'ajtim, yikpidsømk øts!

³¹ Jøts ja nwindson'ajtim Jesús nay jatyi tmajch kyø'køjxp, jøts ja tnimaay:

—iTyimwyinii'nxyip mets mjanchja'win? iTiku tø mnayjøpjawiyi?

³² Xjats ku ja tyøjkidøø jap barkijøtpy, jøts ja poj jatyi y'amø'jty. ³³ Winets ja jaa'y ja wyinguxanaajyi pøn jaty jap wyinaty; jap barkijøtpy, yide'en ja wya'andi:

—Mets tam idø'øn mjantyimdiosu'nk.

Ku ja Jesús tyiktsøjky ja mayjaa'y jam Genesaret

³⁴ Xjats ja ttanajxtøø ja mejy jøts ja naajx ja tpaattøø yja'ttøø Genesaret. ³⁵ Xjats ku ja jaa'y t'ejxkapti ja nwindson'ajtim Jesús pøn jaty jam kugajp'ajttip, ja'ats ja ayuujk tyikyø'odyøø, jøts tnija'wigyøjxtøø pøn jaty jam tsinaadyip ja'abi et, jøts ja tyikmendøø niduki'iyi pyamaa'y ma ja nwindson'ajtim Jesús wyinaty. ³⁶ Møk ja ttanuu'kxa'akti øy ja ja'ay tyukpaadidit ja wyet pa'; jøts pøn ja wet jade'en yjøjxtøø, møkpojxjxtøø ja'.

15

Ja ka'øy winmaa'ñ ja jaa'y tyikpøkpyajtp

¹ Winets ja fariseotøjk winaa'in tñimendøø ja nwindson'ajtim Jesús, møøt ja kajpxwejpitøjkti midi jam wyinaty tø choondi Jerusaléngit kajpkøjxp, jøts ja ojts yiktøwdi:

² —iTigøjxp ku yø mbabøjkpitøjk tkabadundi ja møjaa'ychinaa'yin? Ka'ats ttundi ja windsø'jkin ku kyøbujti ku kyawya'andi.

³ Jøts ja nwindson'ajtim Jesús ja ojts nayide'en tyiktøøjimbity:

—iJøts tigøjxpts ku meets ja Dios Teety kyutujk xkamimadojyi, jøts ja' mee myikmajadakpy ja møjaa'ychinaa'yin? ⁴ Jøts yide'ents Dios wyaañ: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan tpa'øøky.” ⁵ Jøts ka' meets jade'en mwa'añ, pø mnømpxi meets jøts wan jaa'y tnøjmi ja tyeety tyaak: “Niwine'enin ngabudøkit, tø øts Dios ndamay'ajtkøjxni ti jaty øts jap nmøøt'ajtpy”; ⁶ jøts ku jade'en pøn wya'añ, ka'ats tyeety tyaak ja t'ukpudøjkiñi. Jade'ents meets ja Dios kyutujk xka'ukmøjpiktaajkniiyi jøts meets ja mgostumbri xyikmajadakni. ⁷ iMeets win'øø'mbidi! Yikxon yjawañ ja Isaías ja Dios kyugajpxy jøts mdi meets msə meets, ku ja nøky ja yide'en tjaay:

⁸ Nugo aaw nugo ayuujk, yø' øts yø jaa'y xawindsø'jkidip, pø ma yø y'aaw yjoojt yø'ødi.

⁹ Jøts ti yø ñiwyaa'ant øy øts yø wine'en xjawindsø'ogidi, pø ja'axi y'ixpøjkin'ajtip pøni sa jaa'y kø'øm tyikutuky.

¹⁰ Winets ja tyaxtsøøy ja mayjaa'y jøts ja tnimaay:

—Ukmadowdi meets jøts xja'gyukidit: ¹¹ Kidi yø'øjip jaa'y yikpøkpyajtip midi tøjkip y'aawjøtpy. Yø' jaa'y yikpøkpyajtip midi pidsømp y'aawjøtpy.

¹² Xjats ja pyabøjkpitøjk ja ñimejniyi, jøts ja ñimaajyøø:

—¿Tø x'ixy yø fariseotøjk, ku jade'en tø tmadowdi sa tø xnøjmi jøts yikxon tø yjanty-imy'ambøkti?

¹³ Jøts ja Jesús yide'en y'adsojimbijty:

—Øy ja tyimyidi xpøjkin, pøni ka'ap ja tminabyaadyi ja Dios yja' møøt, windigøøpy ja y'ity. ¹⁴ Exmatsti; jade'en yjatti sam ja winap jaa'y ttuu'wawdi ja myiwinap jaa'dyi. Jøts ku ja winap jaa'y tjanch'uktuu'way ja myiwinap jaa'y, kuts jut ja tpaattit namajtskts ja jap kyunaxtit.

¹⁵ Winets ja Pedro wyaañ, jøts ja tnimaay ja nwindson'ajtim Jesús:

—Tukmadook øøts ti yø yjade'embí madya'aky tyijpy.

¹⁶ Xjats ja nwindson'ajtim Jesús wyaañ:

—¿Ni meets paat yø xkanimadooni? ¹⁷ ¿Yø' idø'on mgaja'gyukidip, midi tøjkip aawjotpy jøts ja ñijkxy jam maatsjotp, jøts pyidsimy ku nnawwyiyø'øyin? ¹⁸ Midi'its yø aaw yikpidsimpy, jam idø'on ja chøøn amjotp; yø'øts idø'on jaa'y yikpøkpyajtip. ¹⁹ Jam ja amjotp chøøn ja ka'øwyinmaa'ñ ku jaa'y myigu'uk tyik'øøky, ku jaa'y ñiyaa'y uk ñidø'øxy tpøjkxi, ku jaa'y kyawindiy winmaa'ñ tyiktuñ, ku jaa'y myeech, ku jaa'y tyaayi, jøts ku jaa'y øy ti tumjiwimbet tmadyaknaxy. ²⁰ Yø yjade'embí winmaa'ñ idø'on ja jaa'y yikpøkpyajtidip; jøts kidi yø'øjip ku jaa'y tkatuñ jade'en ja windsø'jkin ku tkapujy ja kyø' ku kyaawya'añ.

Ku ja Tiro tø'øxyøjk tjanchja'wiyi'ñ ja Jesús

²¹ Xjats ja nwindson'ajtim Jesús jam choo'naa, jøts ja ojts ñijkxy ma ja jaa'y y'et jamdi, pøn kugajp'ajttip Tiro jøts Sidón. ²² Jøts tu'uk ja tø'øxyøjk myiñ midi tso'omp cananea, midi jam wyinaty tsinaapy ja'abi etjotp, jøts ja tnimiñ ja nwindson'ajtim Jesús, yide'en ja møk'ampy tnimaay:

—jWindsøn'ajtim, metsxi rey David m'u'nk'ajtip m'ap'ajtip, ayo'ejxk øts! Yø nøøx øts idø'on ja miku' tø tyatøjkiniyi, jøts yø' møk yjanchyik'ayojip.

²³ Jøts ja nwindson'ajtim Jesús ka'ap ja t'adsøy niwine'enin ja agøjxp ku ja tkamigugajpi, winets ja pyabøjkpitøjk myendøø, jøts ja møkta'aky wyandøø, møkta'aky yiknimaay:

—Kajxni, janch na'ambim adøm yø xpayø'øyim.

²⁴ Winets ja nwindson'ajtim Jesús wyaañ:

—Yø'øyi øts Dios Teety xanigajxp pøn ja Dios kyutujk kapaajtipnim ya Israelit naxjøøjtjy, ya Israelit kajpjøøjtjy.

²⁵ Jøts ja tø'øxyøjk myiñ wingon jøts ja ojts wyinguxaniyi, yide'en ja wya'añ:

—jWindsøn'ajtim, pudøjkik øts!

²⁶ Jøts yide'en nwindson'ajtim Jesús ja t'adsøøy:

—Ka' y'øyi ku u'nk una'jk yikpøjkxit ja chapkaaky jøts uk ja yikmo'ot.

²⁷ Jøts ja tø'øxyøjk wyaañ:

—Nwindson'ajtim, janch jade'en idø'on ejx ixa mwa'añ; ja ukts yjøø'kxmukøxtip ja kaaky abu'xk midi ja wyindsøn yika'adip jap mesi patki'py.

²⁸ Jøts ja nwindson'ajtim Jesús ja ñimaajyøø:

—jJanch møj mjanchja'win! Wan jade'en tyiktuñ sam idø'on xtsøky'aty.

Jøts ja nay jatyí myøkpíjky ja ñøøx.

Ku ja Jesús tyiktsøøjky ja mayjaa'y

²⁹ Xjats ja nwindson'ajtim Jesús jam chøø'ñ, jøts ja ñajxy Galileit mejpya'am; winets ja pyatøjkiyi'ñ ma jam ja kojpk tu'uk jøts ja y'ixaajky. ³⁰ Janch namay ja jaa'y jam yja'tti ma ja jam wyinaty, jade'en ja tyikmendi pøn tekmya'at, pøn winap, pøn uum, pøn køma'at, jøts pøn tigati pa'am pøjkidip. Jøts ja jam tyimwyingon tpiktaktøø ma ja nwindson'ajtim wyinaty, xjats ja tyikmøkpøjkijxy. ³¹ Janch ñigyumaap idø'on ja jaa'y ja tyimyja'widøø ku ja jade'en t'ejxti y'awijy ja uum jaa'y, jøts ku kyø' ja myøkpøkti pøn

kōma'atti, jōts ku yō'ōyjo'ōkti pōn tekmya'atti, jōts ja winap jaa'y wyin'ejxwa'kxti. Xjats ja tjanchtukmōja'widōō ja Dios Teety pōn ja Israelit jaa'y Dios'ajtip.

Ku ja Jesús tyikaay ja ñimaktaxk milbi jaa'y

³² Winets ja nwindson'ajtim Jesús tyaxtsōoy ja pyabōjkpitōjk jōts ja tnimaay:

—Njanch'ayo'ijxpy ōts yō jaa'y, tigōōk xōōw ōts yō kujk xmōōtsinaañidi, jōts tō ja kyaaky kyōjxnidi. Ka' ōts yō ayuu ngaxwa'andi jam tyōjkwindum, kuts yō jadi'iñi tuu'ajj y'ukjotkōjxnidit.

³³ Xjats ja pyabōjkpitōjk ñimaajjyiyi:

—¿Mats ya jadine'en nbōjkin ja kaaky ja jii'kxy jōts yō mayjaa'y jadine'en kya'adyit, jōts nipōnts ya?

³⁴ Jōts ja ojts tyiibyikyidi:

—¿Winaak mdsapkaaky japti?

Jōts ja wyandōō:

—Wixujkyi, jōts ja ajkxuna'jk waani.

³⁵ Xjats ja wyaañ jōts ku ja jaa'y y'ixa'aktit, ³⁶ jōts ja tnixajiyi'ñ wixujk ja tsapkaaky mōōt ja ajkx, jōts ttamōja'wiyi'ñ ja Dios Teety. Jōts ja ttatujkiyi'ñ jōts ja ojts tmō'oy ja pyabōjkpitōjk, ja'ats ja yikwa'kxti jōts ja tmōōdyi ja mayjaa'y. ³⁷ Niduki'iyi ja jaa'y ojts kyaydi jōts niduki'iyi kyujxidi. Yjaaktyimbyōkmujktinim ja' ja kaakwyindank ja wixujk kach. ³⁸ Nimaktaxk mil idō'ōn ja jaa'y ojts kyaydi tum yaa'dyōjk, abiky ja tō'ōxyōjkti mōōt ja mutskuna'jkti, ka'ap ja yikmachowdi. ³⁹ Jōtsnim ja nwindson'ajtim Jesús tminawya'kxi ja jaa'y, jōts ja ojts ttatōjkiñi ja barki jōts ja ñijkxy jam Magdala etjotp.

16

Ku ja fariseotōjk t'amidōōdōō ja Jesús jōts ja ttuk'ejxtit ja myilagri'ajtin

¹ Kuts idō'ōn ja jam jade'en ñijkxy, xjats ja fariseotōjk ja nimejniyōō mōōt saduceotōjkti, jōts ja nugo kyajpxy'ejxwa'añiyi. Ja' ja ojts t'amidowdi jōts ja myilagri'ajtin ja ttu'unt, jōts tyuk'ejxidit ja myōk'ajtin jam tsajpwemp, pōni janch ku dō'ōn ja y'ukdiosu'ngi. ² Jōts ja yide'en t'adsōoy:

—Ku ja et chuu'ji, pō mnōmpxi meets: “Tō'kxwamp tam yō et, kumi tsajpts yō tsajp kyaxi'iky”; ³ jōts ku yjōpy'aty jōts mnōmidi: “Ka' tam yō et yam tyō'kxwa'añ, kumi tsajpts yō tsajp kyaxi'iky jōts yoots mōōt.” ¡Meets win'ōō'mbidi! ¿Sa ja tsajp wa'ats xnijawidi ku ja jade'en kyaxi'iky, jōts meets ōts nja' ka' xnija'wiyi ku ja mjayiktuk'ejxti?

⁴ Yō tsaachka'ōyjaay ōts idō'ōn jade'en x'amidōōdōō jōts yiktuk'ejxtit ja milagri; ja'ayits jadu'uk y'ukyiktuk'ejxnidit nayide'en sa ja Dios ttuun ja Jonás.

Xjats ja twinwa'ktuujty, jōts ja tyuu'dōjkiyi'ñ.

Ja fariseit jaa'y y'ixpōjkin

⁵ Kuts ja pyabōjkpitōjk ñajxtōō jam nōō agō'ōm jam jaduktamajñ, jōts ja tja'dyigōydi ja chapkaaky, ka'ap ja wyinaty tō tkondi. ⁶ Winets ja nwindson'ajtim Jesús ja ñimaajjyidi:

—Ukmadowdim; ōyim mnay'ejx'etidit, ejxim yō fariseotōjk, ejxim yō saduceotōjk xkaajjyidi yō chapkaaky midi wenk lewaduri mōōt.

⁷ Jōts ja pabōjkpitōjk agō'ōmyi ñawyambi ñaxwa'jkidōō:

—Ja'agōjxp yō jade'en wya'añ ku ndsapkaaky tō ngakō'ōñidi.

⁸ Myadoow ja nwindson'ajtim Jesús ja', jōts ja tnimaay:

—¿Tigōjxp ku jade'en mwa'andi jōts ku mdsapkaaky kya'etti? ¡Niwine'enin meets ja janchja'win xkidyimyjagyepy! ⁹ ¿Ka'ap meets ja xja'gyuki, jōts ka' meets ja xja'myech ja tsapkaaky midi magoxk, midi ōts ojts nyikwa'kxy, jōts ōts ja ojts nmo'odi ja ñimagoxk milbi jaa'y, jōts ka' meets ja xja'myech winaak kach ojts xpōkmukti ja abu'xk? ¹⁰ ¿Jōts ni ja'baat xkaja'myatsti ja wixujkpi tsapkaaky midi ndagumaay ja maktaxk milbi jaa'y, jōts winaak kach ojts xjaakpōkmukti? ¹¹ ¿Sudso'ampyts ka' xja'gyukidi jōts ku ōts ka'

ndijj ja tyimchapkaaky midi wenk levaduri møøt, midi yja'ajttip ja fariseotøjk møøt ja saduceotøjkti?

¹² Xjaanimts ja tja'gyukidi jøts ku ja nwindson'ajtim Jesús kidi tyimyjatsapkaagyip ja wyinaty tønigajpxy midi wenk levaduri møøt, pø ja xpøjkinxi ja wyinaty tønij jade'en midi ñanky'ixpøjkidip ja fariseotøjkti møøt ja saduceotøjkti.

Ku ja Pedro wyaañ jøts ku ja Jesús yja'aji yiknitsokp, ja Cristo

¹³ Xjats ku ja nwindson'ajtim Jesús yja'jty jam etjotp midi ja Cesarea de Filipit kajp y'etip, jamts ja tyiktiy ja pyabøjkpitøjk, jøts ja tnimaay:

—¿Sa jaa'y wya'andi, pønik øts?

¹⁴ Jøts ja wyandi:

—Jade'en winaagin wya'andi jøts ku mets Juan Bautista; jøts jadu'uk wyamidi jøts ku mets mElías, jøts pømbits wamidip jøts ku mets mJeremías, uk pøngapøn Dios kyugajpxy.

¹⁵ Winets ja Jesús tyiktiy:

—Jøts meets, ¿sa mee mwa'añ, pøn øts idø'on?

¹⁶ Xjats ja Simón Pedro t'adsøoy:

—Ja yiknitsokpi mets, ja Cristo, ja Dios U'nk.

¹⁷ Jøts nwindson'ajtim Jesús ja t'adsøoy, jøts ja tnimaay:

—Mets Simón idø'on janchjaakxønim, Jonás myajnku'nk, ka' pøn jaa'yip mets yø jade'en mduk'ejxip, ja Dios Teetyxi dø'on yø jade'en mduknija'wiyip pøn jap tsajpjøtpy.

¹⁸ Tiyy me mwinmay, møk me mwinmay, patyts idø'on myikxømø'øoy Pedro midi tyijpy tsaa. Tøts mets nikøjxp øts yam nyiktso'onda'akwa'añ ja nja'; jøts øts ja nyikmøjta'akt, ni o'jkin niti ja mibaat kyamimada'agit. ¹⁹ Øts me nmøøpy ja kutujk'ajtin; pøni pøn mets ya ja pyøky maa'kxujkip, nayide'en ja tsajpjøtpy yikmaa'kxukt. Jøts pøni pøn mets ya mgamaa'kxujkpy, nayide'en ja tsajpjøtpy kyayikmaa'kxukt.

²⁰ Xjats ja nwindson'ajtim Jesús tnimaay møkta'aky ja pyabøjkpitøjk, jøts ja ka'ap pøn ttukmado'odit ku ja' Cristo, ku ja yiknitsø'øky.

Ku ja Jesús tnigajpxy ja y'o'jkin

²¹ Winetyipts ja nwindson'ajtim Jesús wa'ats tnigajpxøjkiyñ, jøts ja ttukmadøoy ja pyabøjkpitøjk jøts ku ja ñøjkxt jam Jerusalén, jøts ku ja møjaa'dyøjk ja yikxon yik'ayo'ombaa'diyit møøt ja teetywindsøndøjkti jøts ja kajpxwejpitøjkti. Ojts ja ttukmadøoy jøts ku ja yik'oogit, jujkpyøkpts ja jadigojk, jøts ja kyidigøøk xøøw pyidsø'ømt jadigojk oo'kpi jutjøtpy. ²² Winets ja Pedro ja ojts yiknijkxyi abiky, jøts ja møkta'aky ñimaajyi:

—iWindsøn'ajtim, katsojknim Dios Teety jøts jade'en mjatt! iKa'ap jade'en mdyimyjatt mdyimgyubatt!

²³ Xjats ja nwindson'ajtim Jesús tnawa'kjimbijty ja Pedro, jøts ja tnimaay:

—iMets miku' jawa'ak, majtstutk øts!, nugo mets mjanchyik'adukti. Ka' mets jade'en mwinmay sam Dios Teety wyinmayin, jade'en me mwinmay sam øy pøn naxwii'ñit jaa'y.

²⁴ Winets ja nwindson'ajtim Jesús tnimaay ja pyabøjkpitøjk:

—Pøni pøn tsojkin tmøøt'ajtp jøts øts nja' jade'en xpaduujnit, ka' mibaat kø'øm ñadyunk'atit, ja'ayi ku amumjoojt ñadyamiyoxit ja ayo'on jøts idø'on jade'en tpadu'unt.

²⁵ Pønts kajade'enduñim nay'ejxip, niwindem ja tkapaaty ja nitso'ok'ajtin; jøts pøn ø xku'ayo'ombajtip, ja' idø'on tpaatp ja nitso'ok'ajtin. ²⁶ ¿Ja ti ja ñiwy'a'ant øy ja jaa'y tjaja'bøjkixy ja naxwii'ñ'ajtin, jøts ja y'anmija'win ne'egi wyindigøoy? Jabi ka'axi mibaat ja ñitso'ok'ajtin ja tkuju'uty. ²⁷ Ja Dios Teety øts myøk'ajtin nmimejnip møøt ja ankilistøjkti, jøts øts nwandu'undit sa jaty nidu'uk nidu'uk pyaat'aty yiktu'undit. ²⁸ Janch øts idø'on nwa'añ, jøts ku ya ja winaagindi pøn ka'ooktip kunim ja jawyeen tyimy'uk'ejxtit ku ø nmime'ent ja Dios Teety kyutujk midi yjaa'y ja tyanitanaapy.

17

Ku ja Jesús adsu'jky y'atstigajch, amuum chamambøjkiyxy

¹ Xjats ku kyidudujk xøøw'ajty, winets ja nwindson'ajtim Jesús tmøødiyiiñ ja Pedro, jøts ja Juan møøt ja y'ajch Jacobo, jøts ja ojts ñøjkxti ma ja kojpk jam janch køjxp; ² jamts ja ñanktyigajtsi, wemp am ja tyimy'ejxti ku wyeen y'aaw ja jade'en yjajty sam xøøw y'añin, jøts ja wyet jade'en pyoobiyiiñ sam ja jajin. ³ Jøts ja jotmøñ t'ejxpaatti ja Moisés jøts ja Elías, ku nwindson'ajtim Jesús ja tmøøtmadya'aky. ⁴ Winets ja Pedro tnimaay ja nwindson'ajtim Jesús:

—Windsøn'ajtim, ityimy'øy'ajtp ku øø ndyimyam'aty! Pøni mdsøjky jøts øøts ujt'saadyøjk tigøøk nyik'øyit; tu'uk mets mja', tu'uk Moisés yja' jøts tu'uk Elías yja'.

⁵ Nay ixamnim ja Pedro jade'en wya'añ ku ja yoots jam yja'jty janchyikwin'oo'kpim, jøts ja tuki'iyi tyik'adigøøy; jøts jap yootsjøtpy ja Dios Teety y'ayuujk yikmadøøy ku yide'en wya'añ:

—N'u'nk øts idø'on ya'at, yø' øts idø'on njaaktajotkujk'ajtpy. Mimadowdi pøni sa wya'añ.

⁶ Kuts ja jade'en tmadowdi, xjats ja winda'ak ñaxkidakti, yikxon ja yjantyimchø'jkidøø.

⁷ Jøts nwindson'ajtim Jesús ja ñimejnidi, jøts ja tyojnidi, yide'en ja ñimaajyidi:

—Pidø'økti; kidi mdsø'øgidi.

⁸ Xjats ku ja y'ejxjø'øktøø nima ja pøn tka'uk'ejxpatnidi, nadyu'uk ja nwindson'ajtim Jesús jam.

⁹ Jøts ja kyidaknidi, ku kojpkøjxp choondi, jamts ja nwindson'ajtim Jesús ja møkta'aky y'ana'amidøø:

—Kidi yø pøn xamimadya'akti midi tø x'ejxti, jaanin ku øts wyinaty tø njujkpyiky jadigojk.

¹⁰ Winets ja pyabøjkitøjk ja tyiibyøjkiyi:

—¿Tigøjxpmits yø kajpxwejpitøjk jade'en wya'andi jøts ku ja Elías jawyeen mye'ent, jøts ix'oojknim ja yiknitsokpi?

¹¹ Xjats ja nwindson'ajtim Jesús ja ojts yide'en t'adsøy:

—Janch me'emp idø'on ja Elías, jøts ja tuki'iyi tyik'øyigyøxt. ¹² Øtsts wamp jøts meets nnøjmi jøts ku Elías tø y'atsmengojmi, jøts nigidi tø t'ejxkapti, tø ja twandundi sam y'anmija'win tyimñekti. Nayide'ents øts yø xyik'ayo'ombaattit.

¹³ Jaanims ja pyabøjkitøjk ja tja'gyukidøø, jøts kudam ja nwindson'ajtim Jesús ja ja' tyamimadya'agyidi ja Juan Bautista ku ja Elías tijy tø y'atsmengojmi.

Ku ja Jesús tyikmøkpiky tu'uk ja mixyu'nk pøn wyinaty ja miku' tø tyatøkiyi

¹⁴ Xjats ku ja ojts yja'atti ma jaa'y jam wyinaty, jamts ja nwindson'ajtim Jesús tu'uk ja jaa'y ñimejniyi jøts ja ojts wyinguxanay'øyiyi, yide'en ja ñimaajyidi:

¹⁵ —Me teety, ayo'ejxik øts n'u'nk, adsu'jky adsu'jky mø'ødyi pa'am yø pyaadyiyi jøts tsaach'ijxyim tyuñiyi; atsnaxkidakp may'ojk jam jønnotp, uk nøøjøtpy paat ñødøki.

¹⁶ Ixyats mets yø mbabøjkitøjk yø tø njadanimiñ, ka'ats yø myayidi jøts yø tyikmøkpøktit.

¹⁷ Jøts ja nwindson'ajtim Jesús y'adsøøy, jøts tnøjmi pøn jam wyinaty:

—iMee kajanchja'wibidi, yø mbøky nugo myikmajadaktip! ¿Ma windemnim meets ngajpxy n'ayuujk xpabøjkit? ¿Jøts windemnim meets yø yjade'embi xuktatso'okt ku øts yø ejtp njanchjanigajpx'ity? Meets, yikmen yø pamaa'y.

¹⁸ Jøts ja nwindson'ajtim Jesús ojts tkajxpidsimy ja miku', ojts ja ttukmajtstu'uty ja mixy jøts idø'on ja jade'en jaty tyimøkpiky.

¹⁹ Winetnims ja nwindson'ajtim Jesús ja pyabøjkitøjk myigajpxi jibiky'ampy, jøts ja ojts yiktiiyiyi:

—¿Tigøjxp ku øøts yø miku' tø ngayikpidsimy?

²⁰ Xjats ja nwindson'ajtim Jesús ja ñimaajyidi:

—Ja'agøjxp ku mjanchja'win kyamøkidi. Janch øts idø'øn nwa'añ ku jeexyip ja mjanchja'win ñiyjade'en xmøøt'atti sam mortas pajkin, øyts meets yø kojpk xnøjmit: “Jiwa'ak ya jøts mnøjkxt abikytsoo”; jiwa'akpts ja kojpk. Ka' mee ti mgamayit ku janchja'win møk xjanchmøøt'attit. ²¹ Yø yjade'emb i miku' ja yø iiy pyidsimy ku Dios n'ajot'ajtint, ku n'amaay'ajtint ngagugaa'yint ngagu'uujka'ant.

Ku ja Jesús tnigajpxy jadigojk ja y'o'jkin

²² Nay ixjamnim idø'øn ja wyinaty wyidetinim ma ja et txøøwi Galilea, ku ja nwindson'ajtim Jesús ja ojts tyukmadøyiidi jøts ku mayjaa'y ja kyøyakit, ²³ jøts ja yik'oogit, jujkpyøkpts ja jadigojk kyidigøøk xøøw. Ja'ats ja tyimchaachjotmayja'widøø ku ja jade'en tnija'widøø.

Ku ja tsaptøjk yikugubety

²⁴ Xjats ku ja nwindson'ajtim Jesús tmøøtja'jty ja pyabøjkpitøjk jam Capernaumit kajpkøjxp, jamts ja jaa'dyi pøn yiktsaptøjkugubajttip, ja'ats idø'øn ojts tninøjkxti ja Pedro, jøts ja ojts tyiktøwdi:

—¿Ka' meets yø myik'ixpøjkpi tkugubety yø tsaptøjk?

²⁵ Jøts ja Pedro y'adsøøy:

—Kyugubejtpyxi yø'.

Xjats ku ja Pedro tyøjkiyii'ñ tøjktøpy, japts ja nwindson'ajtim Jesús ja jawyeen ñimaajyi:

—¿Sa me Simón mwinmay? ¿Pøn yjawi yø windsøndøjk tyukugubajttip, ja kyø'ømiguk uk ja wenk jaa'y?

²⁶ Jøts ja Pedro y'adsøøy:

—Ja wenk jaa'y yø tyukugubajttip.

Jøts ja nwindson'ajtim Jesús y'adsowimbijty:

—Aaa ka'ats tam adøm idø'øn xpaat'ajtyim nyajkint ja tsaptøjk kugubajtin, pøni abiky jaa'y tyukugubajttip. ²⁷ Jøts nipøn ngayik'ambøjkin, nøjkx mejy'agø'øm jøts jam xjuutt ja ajkx, pøni midi inet mijawyeen mjuu'tpy, ja' y'aawjøtpyts inet meen xpaatt tu'uk. Pyaatpts inet ja' jøts ja namajtsk ngugubajtin'ajtin; ja'ats myiknøjkxp jøts x'atsmo'ot ja yikugubajtpi.

18

Pøn idø'øn jawaani møj ma Dios ja yjaa'y ja kyutujk ttanitani

¹ Ñiñayi winets ja nwindson'ajtim Jesús pyabøjkpitøjk ñimejniyi, jøts ja ojts yiktiiyiyi:

—¿Pømbi øø nidu'ugin ja tyimy'ukmøjtøkip ku ja mgutujk xyiknaxkida'akt?

² Winets ja nwindson'ajtim Jesús tyaajxiyii'ñ tu'uk mutsk mixyu'nk, jøts ja tyikwa'k'øiyii'ñ ja' y'agujk'amdi, ³ jøts ja tnimaay ja pyabøjkpitøjk:

—Janch øts idø'øn nwa'añ, pøni ka' meets ja mdsinaa'yin xyiktigach, pøni ka' meets jade'en mnabyikta'agyi sam ne'egi mutskuna'jk yja'gyukindi, ka' mee mibaat jade'en myikupøkt jøts mdøkidit ma Dios ja kyutujk ttanitani ja naxwii'ñit jaa'y. ⁴ Patyts ja' myøjtøkit jam ma Dios ja kyutujk ttanitani ja naxwii'ñit jaa'y ja' pøn yik'ayowim jaa'y'ajtp, pøn jade'en nabyiktaajkip sam ya'at mutsku'ngin. ⁵ Jøts øy pøn pøni xukpøjkidip øts ja nja' midi yik'ayowim jaa'y'ajttip sam ya'at mutsku'ngin, øts idø'øn ja wyinaty kø'øm xkupøjkp.

Ja' midi yikpøkpyajtp

⁶ Jøts pøni pøn t'ukyikpøkyu'ump øts ja nja' pøn ø xjanchja'widip, ne'egi ja øyik y'ijty jøts ja mejyøtpy yikuwibejpit, ku møj paandaak ja y'ukyiktayukxøtsit. ⁷ Janch kawindøøp yø naxwii'ñit ku ja y'ity midi jaa'y tyikpøkpyajtp! Nøjkx naxpyim yø jade'en, jøts iyjanch'ayøøy ja' pøn ja myigu'uk yikpøkyundip!

⁸ 'Paty nayide'en pøni myikpøkpyajttip mgø' mdeky, ja'ayi ku xtyimwyiboottit jøts jagam xpikta'aktit; ne'egi øy'atp ku køkuk paktuk mdøkit jap ma Dios jam, jøts kidi ka'pxy xminiikxy ja mgø' mdeky jap infierno. ⁹ Jøts pøni yø mween myikpøktyuujnip, nawyeenjuudits jøts abiky xpikta'akt; ne'egits øy'atp ku ne'egi wendu'uk mdøkit jap ma ja Dios, jøts kidi yø mween ka'pxy xmidøki ku myikuwibepit jap jønjøtpy midi jap infierno.

Ku ja Jesús tmadyakpaajty tu'uk ja borreek midi tigøøpy

¹⁰ 'Kidits øts ja n'u'nk n'una'jk xmijotma'jtidi. Janch øts idø'øn nwa'añ jøts ku y'ankilis ja jap tsajpjøtpyti Dios Teety wyingujkpy. ¹¹ Pø ja'axi tøn nniimiñ jøts øts ja nyiknitso'ok'attit pøn ja pyøky yikwindigø'øyiñidip.

¹² '¿Sā mee m'ukwa'añ? Ku jaa'y jam wyinaty tmøøt'aty nimagø'pxy ja borreegi, jøts kuts ja tu'uk tyigø'øty, ¿ti ka'ap ja t'ats'ixa'at? Kuwanixi ja jam kojpkøjxp tyikta'ant ja ñimakta'pxy myaktaxujkpi, jøts ja t'ats'ixa'at midi tø tyigøy. ¹³ Kuts ja tpaatt, ne'egi tyaxonda'akpts ja' midi tø y'uktigøy jøts nika'ap ja jade'en ne'egi yiktaxonda'akti ja ñimakta'pxy myaktaxujkpi midi kadigøødyip. ¹⁴ Jade'ents meets idø'øn ja Dios Teety mjawiyidi pøn jap tsajpjøtpy, ka'ap ja ttsøky jøts y'u'nk y'una'jk ja jade'en tyigø'øty.

Sā nmigu'uktøjk nmaa'kxuujkint

¹⁵ 'Pøni jam mmigu'uk mga'ødyuñiyi, nagyajpxidits anadyu'uk jøts xukwinjawit ja pyøky. Pøni kyupijkpyts, tøts ja mja' wyinaty myajada'aky jøts ja pyøky nayide'en tkagu'ayo'ombaadit. ¹⁶ Kuts mgagupøkit ku ka' mmadoowa'anit, winets tu'uk majtsk jaa'y xwaadso'ot jøts ja t'ejxtit tnijawidit pøni sā jam pøn wya'añ. ¹⁷ Kuts ja kyayikmøjpiktakmidit, winets xukmado'ot ja mayjaa'y pøn tjanchja'widip ja Dios; jøts ku ni ja'baat kyayikmøjpiktakmidit, winets ja jade'en xpikta'aktit sam ja jaa'y pøn Dios tkajanchja'widip, uk jade'en sam yikugubajtpitøjk yikwa'andi yiktejt.

¹⁸ 'Janch meets idø'øn nnøjmi, pøni pøn meets ya ja pyøky maa'kxuujkip, nayide'en ja tsajpjøtpy yikmaa'kxukt. Jøts pøni pøn mets ya mgamaa'kxuujkpy, nayide'en ja tsajpjøtpy kyayikmaa'kxukt.

¹⁹ 'Nayi ndukmadoodip ixyam, pøni pøn tu'uk majtsk nagyajpxidip, jøts t'amidoowa'andi tøktoowa'andi tigati ja Dios Teety, mo'ojidipts ja'. ²⁰ Pøni ma tu'uk majtsk ñamyukyidi ja jaa'y øts køjxp, jamts øts ja møøt n'ity.

²¹ Xjats ja Pedro ojts tniniikxy ja nwindson'ajtim Jesús, jøts ja ttiibyijky:

—Windsøn'ajtim, ¿winaak ojk in øts ja nmigu'uk nmaa'kxt ku øts ja xka'ødyu'unt kawinaak ojk? ¿Øy ku wixujk ojk in?

²² Jøts ja nwindson'ajtim Jesús y'adsøøy:

—Ka'axi me nnøjmi jøts ku ja'ayi wixujk ojk. Nømpxi øts yam nwa'añ jøts kawinaak ojk pøni winaak ojk meets ja jaa'y mmidundigøyidi.

Ku ja Jesús tmadyakpaajty ja tumbi pøn tkamaa'kxuujk ja myigu'uk

²³ 'Jade'en idø'øn ja Dios kyutujk sam tu'uk ja windsøn in pøn ja tyumbitøjk ojts tyojpayø'øy. ²⁴ Exam idø'øn wyinaty tnibøkinim, ku ja ojts yiktaniway tu'uk ja tyumbi midi ja wyinaty kawine'en miyoj'ajtiyip. ²⁵ Kumi ka'ats ja tyumbi myeeñ ti ja tyagubatp ja yoj, winets ja windsøn wyaañ jøts wan tyiknitookti møøt y'u'nk ñidø'øxy, jøts pøni ti jaty jam pyikta'aky'ajttip. Jøts pøni wine'en ja choobaatti, ja'ats ja yoj kyudøkip. ²⁶ Xjats ja tumbi tminuu'kxaajky ja wyindsøn, ojts ja twinguxani, yide'en ja tnimaay: "Windsøn, miduda'aky'ajtk øts, ngubatp øts ja tuki'iyi." ²⁷ Xjats ja windsøn ja ojts y'ayo'ijxyi, jøts ja yoj ja tyamaa'kxuujkiyi jøts ja yik'awa'atspidsøøjmiyi. ²⁸ Kuuyi ja tumbi ja'ayi pyidsimy, jøts ja ojts tu'uk tminabyaadyiyi ja myigu'uk ja myøøtumbi, ja' ja miyoj'ajtiyip tu'uk pesi majtsk pesi. Yukpajkiixpy ja ojts tyimyach jøts ja jadi'iñi tyukpani, yide'en ja møk'ampy tnøjmi: "¡Pe'tpy xkubatt ja yoj, yak putyi!" ²⁹ Winets ja myigu'uk ñagyuxendyaajkøø ja' wyindum jøts ja ojts myinuu'kxa'agyiyi: "Miduda'aky'ajtk øts, ngubatp øts ja tuki'iyi."

³⁰ Jøts ja yjadu'ukpi, ka'ap ja tkupijky, ojts ja ñijkxy jøts ja ojts tpihta'aky ja myigu'uk jap puxøjkjøtpy kunim ja tyimgyubatt ja voj. ³¹ Kuts ja yjadu'ukpi ja jade'en t'ejxtøø, tyimy'ayojidi ja' jøts ja ojts t'atstukmadowdi ja wyindsøn sa jaty ja wyinaty tø t'ejxti. ³² Winets ja windsøn ja tyumbi tñankwyadsojøø midi idø'øn jade'en adøtsp, jøts ja tñimaay: “iMets miku', burri! Tø mets ja myoj ndamee'kxy ku me tø xminuu'kxa'aky. ³³ Nayide'en me ndijy jeexyip ja mmigu'uk x'ayo'ijxy sa me tø n'ayo'ijxyin.” ³⁴ Yikxon ja windsøn yjantyimy'ambijky, jøts ja tkejxy ayoobi kunim ja myigubajtkøxit.

³⁵ Jøts ja nwindson'ajtim Jesús yide'en myadyak'abajtiyii'ñ:

—Nayide'en meets ja Dios Teety mduniyit pøni ka' amumjoojt xmaa'kxukti ja mmigu'uk.

19

Ku ja Jesús kyajpxwiyj sudso ja amajtsk'ajtin ñaxy

¹ Ku ja nwindson'ajtim Jesús jade'en wyinaty tø wya'añ, xjats ja chøø'ñ Galilea etjotp, jøts ja ñijkxy jam Jude'it etjotp midi tamp nøøbukø'øm Jordán. ² May jaa'y ja pawidejtiiyip, jøts ja jam may tyiktsøøjky ja pamaa'y.

³ Winets ja fariseotøjk winaagin tñimendi ja nwindson'ajtim Jesús jøts ja tka-pxy'ejxwā'andi, ojts ja tyiktøwdi:

—¿Kutuky yø jade'en jøts øy pøn tmajtstu'utt ñidø'øxy ku ja yiin waan tyundigøy?

⁴ Jøts ja t'adsøøy:

—¿Ka'aním meets ja Dios kyajpxy x'ejxi? Pø patyxi ja yaa'y ja tø'øxy tyik'øyiyii'ñ pøn xyiktso'ondaajkindip. ⁵ Nayi nøøm ja': “Ja'agøjxp ja yaa'dyøjk ja tyeety ja tyaak tmajtstu'utt, jøts ja ñidø'øxy ja møøt tu'ugyi ja'ayi chøønit.” ⁶ Tu'ugyi ja ñamyayi tyimbyaaty øy ja jaa'y yjanamajtskidi, paty ka'ap pyaat'aty jøts jaa'y ja tñankñawya'kxit midi Dios tø ttanibiktaagi tu'uk yaa'y jøts tu'uk tø'øxy.

⁷ Xjats ja ttiibyøjkti:

—¿Jøts tigøjxpts ja Moisés tyajky ja tiy'ajtin ja tø'øxyøjk jøts øy ja yikmajtstu'utt?

⁸ Jøts ja nwindson'ajtim Jesús ja t'adsøøy:

—Meets jade'en ja mgawindiy'ajtin myikmajadakpy ku ja Moisés ojts tyikutuky jøts øy xminawya'kxidit ja mnidø'øxy; ka'apts yø y'ijty jade'en tso'onda'agyip. ⁹ Øts wamp, pøni pøn tminawya'kxip ja ñidø'øxy a'øy'ampy, ku ja wenk yaa'dyøjk ja wyinaty tjagamøøt'aty, jøts ja tmøøt'amajtskigyojmi ja wenk tø'øxyøjk, ja' idø'øn pøkyump; nayi pøky ja nayide'en pøn tmøøt'amajtskiyip ja tø'øxyøjk midi tø yikmajtstu'uty.

¹⁰ Xjats ja pyabøjkpitøjk ja ñimaajyiyøø:

—Pøni jade'endam yaa'dyøjk tmøøtsøøni ja ñidø'øxy, ne'egi øy tamts ja' ku nguidyimy'amajtska'ant.

¹¹ Jøts ja nwindson'ajtim Jesús ja ñimaajyidøø:

—Pø janch jade'en, ka'apts niduki'iyi tkupøkti. Ka'ap ya'at winmaa'ñ pøn nugo ajawi tjā'gyuki, ja'ayi dø'øn tkupøjktip pøn Dios møøjyidip. ¹² Ja mayjøøjp ja winmaa'ñ jøts jaa'y kya'amajtskidi: ku winaagin ka'pxy kyamendi naxwiin, winaagints kø'øm ñadyuñidi ku ñay'isabikyidi jøts ka' y'amajtskidi, jøts ja winaagin pøn tkagu'amajtskip ja Dios kyutujk. Pøni pøn jade'en ttunwamp, wants jade'en ttuñ.

Ku ja Jesús tkunuu'kxy ja mutskuna'jk

¹³ Winets ja nwindson'ajtim Jesús yiktanímiiñ mutsk mixyuna'jkti jøts ja tkønixajt jøts ja tku'amidowit; jøts ja pyabøjkpitøjk yide'en ja tñimaay ja jaa'y pøn twaamendip ja mutskuna'jk jøts kyatøkidit ja mutskuna'jk. ¹⁴ Yide'ents ja nwindson'ajtim Jesús wyaañ:

—Majtstu'utti, wan øts yø mutskuna'jk xnimendi, kidi meets yø xkayiknajxni; yø' dø'øn Dios ja'ajtidip pøn jade'endi sam yø mutskuna'jkindi, ja'ats tpaattip ja Dios kyutujk.

15 Jøts ja ojts tkunuu'kxy ja mutskuna'jk, jøts ja jam ojts cho'oni.

Ja kumeeñ jaa'y

16 Tu'uk idø'on una'jk jaa'y, ja'ats ojts t'ats'ixy ja nwindson'ajtim Jesús, jøts ja t'atsnimaay:

—Mets øyjaa'y yik'ixpøjkpi, ¿ti øy'ajtin ø ndu'ump jøts øts ja n'anmija'win ja jujky'ajtin tpaatt xemikøjxp?

17 Xjats ja nwindson'ajtim Jesús ja tnimaay:

—¿Tiku ø xnøjmi jøts ku ø n'øyi? Tu'ugyi ja' midi øy, jøts ja Dios idø'on ja'. Pøni mbaatwampyts ja jujky'ajtin xemikøjxp, paduujnits ja Dios kyutujk.

18 Jøts ja una'jk jaa'y wyaañ:

—¿Midi'ibi?

Jøts ja nwindson'ajtim Jesús tnimaay:

—Kidi myikjaa'y'øøky; kidi mmigu'uk ñidø'øxy xpøjkxi; kidi mmeech; kidi pøn xwindaay'aty; 19 windsø'øgi mdeety mdaak; jøts tsok mmigu'uk sam kø'øm mnachøkyin.

20 Jøts ja una'jk jaa'y yide'en tnimaay ja nwindson'ajtim:

—Tø øts yø jade'en njatunguixy, jaayim øts yø jade'en mbaduñ ku nmutsk'aty. ¿Tits øts idø'on njaaktu'ump?

21 Jøts ja nwindson'ajtim Jesús ja ñimaajyøø:

—Pøni øy yikxon mjaa'y'atwa'añ, nøjkx x'atsto'okjø'økixy ti jaty jam mjagyejpy jøts xmo'ot ja ñimeeñ ja ayoobi jaa'y, winets xpaatt ja øy'ajtin ja xondaajkin jap tsajpjøtpy; ku jade'en x'uktu'unt, winets mme'ent jøts ø xpawidett.

22 Xjats ku ja jade'en tmadøøy, jøts ja yjotmadyøjkii'ñ, kumi jantyingyumeeñ, kumi jantyingyubikta'aky idø'on ja'.

23 Winets ja nwindson'ajtim Jesús tnimaay ja pyabøjkpitøjk:

—Øts yam tyimwyamp jøts ku møk y'adukyi jøts kumeeñ jaa'y tpaajttit ja Dios kyutujk midi jap tsajpjøtpy. 24 Jøts jaaktyimwyamp øts jøts ku ja kumeeñ jaa'y janch apeni ñaxti ma Dios ja kyutujk ttanitani tuki'iyi, pø ne'egi tsojk ñaxt ja møj jiyujk jap xu'unjutjøtpy.

25 Kuuyi ja pyabøjkpitøjk ja jade'en tmadoodøø, janch ñigyumaap ja tyimyja'widøø, jøts ja xem yam ñayiktøøjidøø:

—¿Pønims idø'on nitso'ok'atp?

26 Xjats ja nwindson'ajtim Jesús ja ojts y'ijxyidi, jøts ja ñimaajyøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint, niti Dios tkatsepjawi.

27 Xjats ja Pedro tyiktiy:

—Windsøn'ajtim, tø øø tuki'iyi n'ixmajtskixy ti jaty øøts y'ity njagyejpy, jøts øø tø ndsøøñ jøts me myikpawidity. ¿Tits øøts idø'on nbaatp, ti øøts idø'on nbøkp?

28 Jøts ja nwindson'ajtim Jesús ja t'adsøøy:

—Janch øts idø'on nwa'añ, ku yja'att ja xøøw ja jumøjt ku tuki'iyi yjemyigyøxt jadigojk, ku ø n'ixa'akt ngutujktaajkjøtpy ku øts ja møk'ajtin nmi'ixa'akt, jøts meets wine'enin meets ixa xpawidity, xnayimøøt'ixa'akp meets nayide'en nimakmajtsk jap kutujktaajkjøtpy, jøts xiidyu'undit ja Israelit jaa'y niduki'iyi. 29 Jøts nayide'en pøn jaty tø tmajstutkøxti ja tyøjk, ja myigu'uktøjk, chø' y'uch, tyety tyaak, y'u'nk ñidø'øxy, uk ñaajx kyam tmajstutu'uttibaat øts ngutujkøjxp, yikmo'odipts ja jinaxy jinaxy øy ti, jøts pyaattip ja' ja jujky'ajtin midi xemikøjxp. 30 Jøts may ja wyindigø'ødyit pøn ixyam namyøjpiktaajkidip kø'øm; jøts pøn ixyam ne'egi windigø'y'ejttip, ja'ats ne'egi nøjkx møjto'kidip.

20

Ku ja Jesús tmadyakpaajty ja tumbitøjk

1 'Jade'enin idø'øñ ja Dios kyutujk midi yjaa'y tyanitanaapy sam tu'uk jaa'y kyugam'atyin jøts ja chøøñ jøpyi jøpyi tumbi ixaabyi jøts ja y'uvitsa'am pyidø'økt. 2 Ojts ja tyikwin'øyiidi møøt ja tumbitøjk, øy ja tmiju'uty tu'uk puxmeeñ tukxøøw, jøts ja ojts tkexy tumbi jam kyamjotp. 3 Jøts idø'øñ ja ojts cho'ongojmi, ja xøøw wyinaty tuk'ajopu'nk, jøts ja jap maayjotpy ojts tjaak'ixy ja jaa'y pøn awatsidip. 4 Yide'en ja tnimaay: "Nøjkx mee nayide'en mduñ jap kamjotpy, jøts nmiju'udyit nayide'en sam pyaat'aty." Winets ja ojts ñøjkxti. 5 Xjats ja windsøn cho'ongojmi ku ja xøøw kyukiyi'ñ, nayide'en winakxyøøw nay ja tumbi dø'øñ ja y'ats'ejxkojmip. 6 Jøts ku ja xøøw jawaani kyajajxni, xjats ja ojts cho'ongojmi tumbi ixaabyi, jøts ja ojts ñijkxy nay jap maayjotpy, jøts ja ojts tjaakpaaty ja jaa'y pøn wyinaty awatsidip, yide'en ja tnimaay: "¿Tiku meets ya nugo mxinaxy, ti kidi mee mdunwa'añ?" 7 Yide'ents ja y'adsoodø: "Kumi ka'ap øø pøn xyiktunkpaatwa'añ." Xjats idø'øñ ja tnimaay: "Nayi nøjkxts mduñ øts ngamjotpy, jøts nmiju'udyit." 8 Xjats ku y'ux'ajty, winets ja windsøn tnimaay ja tyumbi midi yiktump: "Yaajxi yø tumbitøjk jøts xmo'ot myijuu'ñ yø' jawyenidip pøn ix'oojk tø tyøkidi tumbi, jøts ja ix'oojk xmiju'uty pøn jawyeen tø tyøkidi tumbi." 9 Winets ja myendøø pøn wyinaty ix'oojk tø tyøkidi tumbi ku ja xøøw jawaani kyajajxni, jøts ja myijuu'ñ ja ojts ka'pxy t'axajidi tu'uk puxmeeñ nidu'uk nidu'uk. 10 Xjats ku yja' ja tyaja'jtidøø pøn wyinaty jawyeen tø tyøkidi tumbi, jade'en ja wyinmaydi yikmiju'udyip ja tijy jawaani tsowi; nayide'en myijuu'ñ ja ojts t'axajidi tu'uk puxmeeñ nidu'ukjaty. 11 Ku ja jade'en ojts t'axajidi ja myijuu'ñ, xjats ja tmi'ambøjktøø ja wyindsøn, 12 yide'en ja tnimaadyøø: "Pøn ne'egi oojk tø yja'atti, ja'ayi tø tyundi tuk'hori; jøts ne'egi nayide'en tø xmijuy sam øø tø xmijuyin, jøts tøts øøts yikxon nduñ jøts øøts yikxon tukxinaxy tø nni'añ." 13 Jøts ja windsøn y'adsøøy, yide'en ja winaagin yiknimaadyøø: "Ka' me migu'uk yam sa nduñ. ¿Ti kidi tø nnagyajpxyin jøts ku nmiju'uty tu'uk puxmeeñ? 14 Axaji yø mmijuu'ñ jøts mnøjkxnit. Nayide'en øts yø nmijuuwya'añ pøn oojk tø tyøkidi tumbi sam mee tø myikmijuyin. 15 ¿Pøn øts yø ndejin jade'en xkaduktu'ump pøni sa øts nmeen kø'øm nyiktunkpaatwa'añ? ¿Uk yø' idø'øñ m'ama'at'ajtpy ku n'øyjaa'y'aty?"

16 Jøts ja Jesús jadigojk yide'en wya'añ:

—Jade'ents idø'øñ ejx øts ja nwa'añ, pøn tandip ix'oojk, ja'ats ne'egi jawyenidip, jøts pøn jawyenidip, ja'ats ta'andip ix'oojk. Kumi may ja'adi pøn yiktukmadoodip jøts mye'endit, niwaanits ja'adi pøn yik'a'ejxidip jøts ty'a'andit. Nayide'ents ja Dios Teety ttu'unt ja naxwii'ñit jaa'y.

Ku ja Jesús tnigajpxy jadigojk ja y'o'jkin

17 Xjats ku ja nwindsøn'ajtim Jesús jam wyinaty tuu'amni midi Jerusalén nøjkxp, winets ja abiky tjawaay ja pyabøjkpitøjk midi nimakmajtskti, jøts ja tnimaay:

18 —Ixya tø nbejtyindi Jerusalén ma øts nyikøyakt, jøts øts ja teetywindsøndøjk, jøts øts ja kajpxwejpitøjk nyiktagidøkit pøn ø xyik'ooktip. 19 Ja'ats ø xkøyaktip jøts øts ja xagidøkidit pøn ka'israelit jaa'dyi, ja'ats ø xnixe'ektip xjaxe'ektip, ja'anim ø xwinwoptip xjipwoptip jøts øts ja xyikruspattit; kidigøøk xøøwts øts ja o'jkin nmimada'akt jøts ø njujukpyøkt jadigojk.

Ku ja tø'øxyøjk t'amidøøy ja may'ajtin midi tyaak'ajtp ja Jacobo møøt ja Juan

20 Winets ja Zebedeo y'unajk jam myendøø møøt ja tyaak ma ja nwindsøn'ajtim Jesús jam wyinaty. Ja Juan idø'øñ ja' møøt ja Jacobo, ja'ats idø'øñ ja tyaak jam ojts twinguxani ja nwindsøn'ajtim Jesús, jøts ja t'amidoowa'añ tu'uk ja may'ajt. 21 Jøts nwindsøn'ajtim Jesús ja ojts yiktiiyi:

—¿Ti dø'øñ mdsøjkpy?

Jøts ja t'adsøøy, yide'en ja tnimaay:

—Tun may'ajt, jøts øts n'u'nk xyik'ixajkit adsow aduuk ku mgutujk xyiknaxkida'akt, tu'uk aga'ñ jøts jadu'uk anajy, jøts jade'en ja kutujk tmida'andit.

²² Jøts ja nwindson'ajtim Jesús ja y'adsoojidøø:

—Ka' mee xnijawidi põni ti mee m'amidoodip. ¿Mgupøkp meets ja ayo'on midi ø nbaatp?

Jøts ja wyandi:

—Ngupøkp øøts ja'.

²³ Xjats ja tnimaay:

—Janch tügyajpxy. Mgupøkp meets ja' sa jaty ø njatt ngubatt; jøts kuts øts idø'on xmøøtsinaawya'andi tu'uk aga'n jøts jadu'uk anajy, ka'øtsip ja xpaat'ajtip jøts meets jade'en nyik'ixa'akt, ja' ja yikmo'odip põni pøn ja Dios Teety kø'øm jade'en tø tyanibiktaagiyidi.

²⁴ Xjats ku ja jade'en tmadowdi ja yjanimajkpidi, jøts ja tjantyimy'i'ambøjktøø ja ñamajtskpidi midi tukjaa'dyi. ²⁵ Jøts nwindson'ajtim Jesús ja ojts yjayajxniiyidi niduki'iyi, jøts ja ojts ñii'mxyidi:

—Jade'en sam x'ejxtin xnijawidi, ja jaa'y pøn tñitanaadyip ja naajx ja kajp, øy ja sagasa y'adøtsnidi põni sa ja kø'øm ttsokti; kuts jam pøngapøn møk yjaakyikutujkni, tu'ugyits yja' ja tyikmøji. ²⁶⁻²⁷ Jøts ka' meets mja' jade'endi, ne'egi yide'en meets mja'. Pøni pøn namyøjpikta'akwajnip, ja' idø'on paat'ajtip jøts ja tuki'iyi ttu'unt põni ti myigu'uk ejtxidip ka'ejtxidip, ja' idø'on ja twindsø'øgit, ²⁸ jade'en sam ø nduñin, kaja'ajipxi ø tø nnimiñ jøts øts jawyeen nyikwindsø'øgit, pø ja'axi ø tø nnimiñ jøts øts ja windsø'jkin nyakt, jøts øts kø'øm ngudanit ja pojkpitumbi jaa'y pyøkyi, jøts ja may ñitso'ok'attit.

Ku ja Jesús tyikwin'ejxwa'kxy ja winap jaa'y

²⁹ Xjats ku ja jam wyinaty cho'onidi jam Jericó, jøts nwindson'ajtim Jesús may ja jaa'y ja ojts pyadsøøñiyi. ³⁰ Jamts wyinaty namajtsk winap jaa'y chøøniidi tuu'am, jøts ku ja tmadowdi ku ja nwindson'ajtim Jesús jam wyinaty ñaxy, jøts ja møkta'aky tnimaadyøø:

—jWindsøn'ajtim, rey David y'u'nk y'ap, ayo'ejxk øøts!

³¹ Jøts ja mayjaa'y ja ojts y'øjyidi, ojts yiknøjmidi jøts y'amo'ondit, jøts ja tjaaktyimyikjinajxtøø jawaani møk:

—jWindsøn'ajtim, rey David y'u'nk y'ap, ayo'ejxk øøts!

³² Winets ja nwindson'ajtim Jesús wya'k'øyyi'ñ, jøts ja tyaa'jxi'ñ ja winap jaa'dyi jøts ja ttiibyijky, yide'en tnimaay:

—¿Ti dø'on mdsojktip, ti ø ndu'ump?

³³ Jøts ja ojts y'adsowdi:

—Windsøn'ajtim, jawin'ejxwamp øøts.

³⁴ Winets ja nwindson'ajtim Jesús ja jaa'y ojts t'ayo'ixy jøts ja ojts twinguxaji. Jøts ja winap jaa'y nay jaty wyin'ejxwa'kxtøø, jøts ja ojts tpadsoondi ja nwindson'ajtim Jesús.

21

Ku ja Jesús kyajptøjkii'ñ Jerusalén

¹ Kuts jam Jerusalén wyinaty yja'atwanidi, jøts ja kajp ojts tpaatti midi txøøw'ajtp Betfagé, midi jam tmawingon'ajtp ja kojpk midi yiktejp Olivos, winets ja nwindson'ajtim Jesús tkejxy namajtsk ja pyabøjkpi, ² yide'en ja tnimaay:

—Nøjkxti ixø kajpjøøjty ixø wingon. Jamts inet buuri tu'uk xpaattit kuwiiñ møøt y'u'nk. Ja'ats inet migajidip jøts ya xyikme'endit. ³ Jøts ku pøn sa wya'ant, jade'en xnøjmidit jøts ku ø ndsøky, jøts ku ø tsojk ngøyajkojmit.

⁴ Jade'en'ampy idø'on ja jade'en yjajty, jøts tyimyjade'en yjatt sa wyaañ ja Dios kyugajpxy ku ja yide'en tjaay ja nøky:

⁵ Nøjmidi ja Israelit kajp:

“Ejx yø mwindsøn mnimiñiyi mnija'adyiyi, amyujy tsaachuyuj, taku'xni byuuri'u'nk.”

6 Xjats ja pyabøjkpi ojts choondi jøts ja ojts ñøjkxti, ojts ja jade'en ttundi sa nwindson'ajtim Jesús ja wyinaty tø y'ane'emyidi. 7 Ojts ja twetsti ja buur møøt y'u'nk, jøts ja ojts wyet ttajiba'andi jøts nwindson'ajtim Jesús ja ojts ttawaa'tspety. 8 Jøts ja jaa'dyi janch namay ja'adi, jøts ja ojts tya'apti ja wyet jam tuu'am; pømbi twidøjti ja ujts'aay jøts ja ojts tpikta'akti jam tuu'am. 9 Jøts ja jaa'y møk wyambinaxwa'ktøø pøn jawyeen yø'ødyip, jøts nayide'en pøn ix'oojk payø'ødyip:

—¡Dios Teety tsajpjotpit! ¡Kunuu'kx yø rey David y'ap y'u'nk pøn me tø xkexy! ¡Kuuyi Dios Teety jadu'uk yjaak'øyi!

10 Xjats ku ja nwindson'ajtim Jesús kyajptøjkijyñ jam Jerusalén jøts ja kajp kya-jotkukidi, may ojts ja jaa'y wyā'andi:

—¿Pøn yø jade'en?

11 Jøts ja jaa'y wyandøø:

—Ja Jesús yø' ja Dios kyugajpxy, pøn kyugajp'ajtp Nazaret jam Galile'it etjotp.

Ku ja Jesús twojpidømguixy ja too'kpitøjk jam tsaptøjkjotp

12 Jøtsnim ja nwindson'ajtim Jesús tyøjkijyñ møj tsaptøjkwimpy, jøts ja ojts tka-jxpidsømguixy pøn jaty jap wyinaty too'ktip yajktip, juudyip kajpxtip jap tsaptøjkwimpy. Ojts ttejtsapwajkixy ja mesi midi ja jaa'y yiktundip pøn ja myigu'uk myeeñ tkugojnidi, jøts nayide'en chinaabyajt ja yiktejimbejtøø ja paktoo'kpidi; 13 jøts ja tnimaay:

—Yide'en jap nøkyjxpy wyā'añ, jøts ku ajot'ajtaajk ja chaptøjk wyā'ant, jøts jade'ents meets yø tø xpiktakni sam maa'tspitøjk chinaadyøjkti.

14 Jøts ja nwindson'ajtim Jesús jam tsaptøjkjotp winaagin ñimejniyi ja jaa'dyi pøn winapti pøn pakma'atti, jøts ja ojts tyikmøkpøjkixy. 15 Kuts ja teetywindsøndøjk jøts ja kajpxwejpitøjk ojts t'ejxti ku ja jade'en ttuñ milagri, jøts ku ja ojts tmadowdi ku ja mutskuna'jk jap tsaptøjkjotpy møk wyā'andi: “¡Dioskujuyip rey David y'ap y'u'nk!”, jøts ja yjantyimy'ambøjktøø 16 jøts ja ojts tnøjmidi ja nwindson'ajtim Jesús:

—¿Madøøpy yø' ku yø ixa jade'en wyā'andi?

Jøts ja nwindson'ajtim Jesús ja t'adsøøy:

—Nmadøøpy øts yø'. ¿Ti ka'anim meets ja Dios kyajpxy x'ejxi ku yø tø tjanigajpxy? Yide'enxi ja wyā'añ:

Tø ndanibiktaagi jøts øts mutskuna'jk xjanchjawidit xjanchkunuu'kxyjawidit.

17 Xjats ja Jesús tmajtstuupty, jøts ja ojts chøøñ jam Jerusalén jøts ja ñijkxy Betania, jamts ja ojts myā'ay.

Ku ja Jesús ojts t'ayo'onmigajpxy ja iigi tsa'amguipy midi ja tyøøm ka'ejtp

18 Xjats ku yjøpy'ajty, jøts ja wyimbejtøjmi ñøjkxkojmi jam kajpjotp, winets yuu ja ojts pyaadyiyi. 19 Xjats ja t'ejxpaajty tu'uk iigi kipy jam tuu'ba'am, jøts ja ojts tninijkxy, ojts ja kipy tjawi'ixy jøts ja ni tu'uk tyøøm tkapajtøø, nugo janchtum'aay ja'. Winets ja nwindson'ajtim Jesús ojts tnøjmi ja iigi kipy:

—¡Nijuuni mga'uktøømiñit!

Jade'en ja ojts wyā'añ, jøts ja iigi kipy jaty tyimdyijch. 20 Xjats ku ja pyabøjkpitøjk ja ojts jade'en t'ejxti, jøts ja jantyimyñigyumaap tjantyimyja'widøø, winets ja tyiktøødøø ja nwindson'ajtim Jesús jøts ja tnimaadyøø:

—¿Sudso yø iigi kipy tsojk tø tyimdyi'ich?

21 Jøts ja nwindson'ajtim Jesús ja t'adsøøy:

—Janch øts idø'on nwa'añ, pøni mjanchmøøt'ajttip ja janchja'win, jøts ku køøm ka' xwinma'adyit majtsk'aaw majtskjoojt, kidi yø'øyipts mee mjatp sam øts yø iigi kipy ixa tø nduñin, yø kojpk paat mee xnøjmit: “Jiwa'ak ya jøts mnøjkxt mejyotp”, jantyimyjatpts idø'on ja jade'en. 22 Jøts ku øy ti x'amido'odit xpøktso'odit ajot'ajtingøjxp, pøni amumjoojt ja janchja'win xmøøt'atti, myikmo'odipts ja' pøni ti m'amidoodip.

Ja Jesús myøk'ajtin

²³ Jøts ja nwindson'ajtim Jesús tyøjkiyi'ñ tsaptøjkjøtpy, ixap ja wyinaty yik'ixpiky ku winaagin jap myendøø ja teetywindsøndøjkti jøts ja møjaa'dyøjkti, jøts ja ojts tyiibyikyiyi, yide'en ja ñimaajyøø:

—¿Pøn yø yjade'embì mdanigutujk'ajtip jøts yø jade'en xu'unt? ¿Pøn yø kutujk jade'en tø mmø'øyi?

²⁴ Jøts ja nwindson'ajtim Jesús t'adsøøy:

—Nayide'en meets yam nyiktøøwami; jøts pøni m'adsowimbejtíp inet, winets meets ja ndukmado'ot pøni pøn øts yø jade'en xanigutujk'ajtp ku øts yø jade'en nduñ. ²⁵ ¿Pøn ojts Juan Bautista tyanigutukyiyi jøts ja ya yiknøbatt? ¿Dios, uk jaa'y?

Jøts ja xem yam kø'ømyi tkajpxy'ajtpinaxwaktøø, yide'en ja ñawya'añidi:

—Ku net yø njanima'ayin jøts ku Dios ja tni'ane'emy, yide'ents inet yø x'adso'owin: “Jøts ¿tigøjxp ku ja ojts xkajanchjawidi?” ²⁶ Jøts ku net njanima'amyaa'n jøts ku nugo jaa'y ja ojts kyexyi yiknøbatpi, winets yø mayjaa'y xnibidø'jka'andit; kumi niduki'iyi yø jade'en tni'awidip jøts ku ja Juan tum ja' tkajpxy midi Dios yja'ajip.

²⁷ Jøts ja ojts nugo t'uknimaañidi ja nwindson'ajtim Jesús:

—Ka'ap øø nnijawi.

Winets ja ojts ñi'mxyidi:

—Ni øts meets inet ja ngadukmado'ot pøni pøn øts yø jade'en xanigutujk'ajtp ku øts yø jade'en nduñ.

Ku ja Jesús tmadyakpaajty namajtsk ja jaa'y tukmiga'axpi

²⁸ Xjats ja tjaaknimaay:

—¿Så meets idø'øn x'ukja'gyuki ya'atpi ayuujk? Tu'uk idø'øn jaa'y, jamts namajtsk myajnk; jøts ja tu'uk tni'maay: “Mets u'nk, icyam mnøjkxt tumbi jøts ø x'atstujkit ja n'uvi tsa'am.” ²⁹ Jøts ja myajnk ojts yide'en y'adsøyi: “iKa' nnøjkxwaa'añ!” Winmaadyigajts ja jadigojk xjats ja ñijxxy tumbi. ³⁰ Jøts ja u'nkteety ojts ja tni'ijxxy ja yjadu'ukpi majnk, jøts ja ojts nayide'en tnøjmi, jøts ja ojts yide'en y'adsojiyi: “Øyip teety, øy ø nnøjkxt.” Jøts ja nigidi y'uknøjkxni. ³¹ ¿Pømbits ja tpaduun jade'en så ja møjaa'y tjatsøky?

Jøts ja wyandøø:

—Ja' midi ja jawyeen y'uknimaay.

Xjats ja nwindson'ajtim Jesús wyaañ:

—Janch øts idø'øn nwa'aañ, jøts ku ja ne'egi jawyeen ja Dios kyutujk ttatøjkiyidit ja'adi pøn pøkyun'ejt kunajxtip, jøts nigidi meets. ³² Kumi ja' meets ja Juan Bautista tø mdanimiñiyi jøts ja mduk'ixpikyidi så mdsøonidit mdanidit så mjujky'attit, jøts ka'ats ja tø xmibøkti; ne'egi ja' ja ojts tjanchjawidi ja jaa'dyi pøn pøkyun'ejt kunajxtip. Jøts kuts meets øy ja ojts jade'en xja'ejxti, ka' meets ja ojts xjanchjawidi, jøts ka' mdsinaa'yin xyiktigajstøø.

Ku ja Jesús tmadyakpaajty ja ka'ødyumbi

³³ 'Ukmadowdim jadu'uk ya'at madya'aky: Tu'uk ja jaa'y midi ja kam kaja'ampy tjagyajp, ja'ats ojts tni'ipy ja uvi kipy jam kyamjotp, jøts ja ojts tnaguemy; jøts ja ojts tyik'øyi tu'uk ja abøjk'i'ñ ma ja uvi nøø yik'amøø'kxit, jøts tu'uk ja ne'ey janch køjxp ma ja kam yik'ejx'ett.

'Xjats ja ojts winaagin ja tyumbi tmø'øy ajuudyujk ja kyam, jøts ja ojts tkømø'øy jøts ja chøø'ñ widejtpi. ³⁴ Xjats ku tpaajty ja uvi tujk'aats, winets ja ojts tkexy winaagin ja tyumbi, jøts ja ttaniguexy ja yjadu'ukpi tumbidi midi ja wyinaty tyuk'ajuudyujkpy ja kyam, jøts ja yik'amido'odit ja pikta'aky midi ja paat'ajtiyip. ³⁵ Ka'ap ja ñømdøø, ojts ja tmajtsti ja tumbi midi yikajxtip, pømbi yikwojpp yiktse'jk, pømbi o'jk jøts pømbi yikwinga'jts yikjøpkajts. ³⁶ Jøts ja kugam ojts tjaakajxkojmi ja tyumbi jawaani namay, nigidi jade'en sam ja yjawyeembidi; nayide'ents ja kam ejx'ejtpi ja ojts tyungojmiyidi.

³⁷ Jøtsnim ja ojts tkexy ja kyø'øm'u'nk, yide'en idø'øn ja y'ukwinmay: “Yikwindsø'øgip øts n'u'nk.” ³⁸ Jøts kuts ja ojts ja'ayi yik'ixy, winets ja kam ejx'ejtpi ñawyajnidøø: “Yø' yø kam yø' yø pikta'aky tmidanwangøjxp, yø' yø tmaabyøkwamp; wan tyimyikpa'ø'jkyindi jøts adøm yø nmidaangøjxint.” ³⁹ Xjats idø'øn ja tmajtstøø, jøts ojts tyikpidsømdi jam kamjotp, jøts ja ojts tyik'ookti.

⁴⁰ Winets ja nwindson'ajtim Jesús ttiibyijky, jøts ja wyaañ:

—Ku mye'ent ja kugam, ¿sats ja tumbitøjk yiktu'undit midi kam'ejx'ejtpi?

⁴¹ Jøts ja teetywindsøndøjk jøts ja møjaa'dyøjk wyandøø:

—Niwine'en ja tkidyimy'ayo'ext yø yjade'embí ka'øy jaa'dyi, yikpa'ookp ja', jøts ja t'ayajknaxt jadigojk ja ñaajx, jøts ja abiktyumbi ja tmo'ot pøn ja mo'ojyip ja pyikta'aky pøni wine'enin ja pyaat'aty.

⁴² Winets ja nwindson'ajtim Jesús ja ñimaajyidøø:

—¿Niwindinim meets Dios kyajpxy xka'ejxi? Yide'enxi ja wyaañ:

Ja tsaa midi ja pojtspi kya'uk'a'ejxidøø,

ja'ats ne'egi ixyam tø y'ukyikpiktakni jam pøch kyubajkp jøts ja t'amajtsmujkixy ja pøch.

Ja Dios Teety idø'øn yø jade'en tø ttuñ,

øy yø ñigyumaap njaja'wandi.

⁴³ Jade'ents ja Dios kyajpxy wyaañ, paty mee nnøjmi jøts ku ka' myikmo'odit jøts xatøjkidit ja Dios kyutujk, ja' ja ne'egi yikmo'odip pøn tyikwingaxø'jkidip ja Dios yja' midi ja yja'ajtpy. ⁴⁴ Jøts ja tsaa ku jam pøn y'uknaxkidat'akt, windigø'øpy ja ayoobi; jøts ku ja tsaa pøn y'uktanaxkidakpatit; yikpu'xkiyip ja'.

⁴⁵ Kuts ja teetywindsindøjk jøts ja fariseotøjk jade'en tmadoodøø ja madya'aky midi ja nwindson'ajtim Jesús ja tamimadyaajkidip, ojts ja tja'gyukidi jøts ku ja' yiknimadya'akti.

⁴⁶ Winets ja tjadyimyjamatswandøø, ja mayjaa'yts chø'jkidip pøn tnija'widip jøts ku ja nwindson'ajtim Jesús ja Dios Teety yja' tkajpxi.

22

Ku ja Jesús tmadyakpaajty sam tu'uk windsøn tyik'amajtski ja myajnk

¹ Xjats ja nwindson'ajtim Jesús ojts jadigojk ttamimadyaktøjkigyojmi jadu'uk madya'aky, yide'en ja wyaañ:

² —Jade'en ja Dios kyutujk midi yjaa'y ja tyanitanaapy sam tu'uk windsøn pøn xødump jøts myajnk ja tyik'amajtski, ³ jøts ja tyumbi ja ttaniguexy pøn jaty ja yikaawyampy yik'uukwampy jøts ja t'atswa'adit, ka'ats ja jaa'y ja pyadsoo'nidøø. ⁴ Jøts ja ojts abiktyumbi tjadanigajxkojmi, yide'en ja t'uknimaay: “Nøjkx ja x'atstukmadowdi pøn jaty ø nwaawampy, jøts ku ja kaaky jii'kxy ya abaadi y'ejtñi. Tø øts ndsaka nyik'øøky jøts tyimdyumjane'kxpi tyimdyumjayeekpyi, abaadi a'ejxi y'ejtñi, wan tmenidi tø'øxñigaabyi tø'øxñi'ukpidi.” ⁵ Kidyimyøjpiktakti ja' pøn idø'øn jayikwaadsoodip migaabyi mi'ukpi. Pømbi nøjkxni kyamjotp, jøts pømbi tyunk tniyø'øyini ma jaty pøngapøn myeembyiky, ⁶ jøts pømbi axaji tyikja'jttøø ja windsøn tyumbi jøts ja tjemdunidi tedunidi, yik'oo'ktibaat ja'. ⁷ Winets ja windsøn yikxon yjantyimy'ambijky, jøts ja ojts tkexy syoldaditøjk jøts ja tyikpa'ooktit ja jaa'y pøn tyimyikjaa'y'oo'knidip, jøts ja tnitsaajyidit ja kyajp. ⁸ Winets ja tnimaay tyumbitøjk: “Tum ja abaadi y'ejtñi jøts xøøw yiktu'unt, ka'adamts yø yjade'embí jaa'y pyaat'atyidi jøts yø nyikmiga'ayin nyikmi'uujkin. ⁹ Nøjkxtits jam ma jaa'y ñaxy tyøki, jøts ja niduki'iyi xwa'adit tø'øxñigaabyi tø'øxñi'ukpi pøni pøn jaty jam mbattip.” ¹⁰ Jøts ja tumbi cho'ondøø ñøjkxtøø jam tuu'am, jøts ja ojts twaamukti pøn jaty ja jam pyattøø, jam øyjaa'byi ka'øyjaa'byi; jøts ja mayjaa'y jade'en tyik'ujtstøø ja tøjkojot.

¹¹ Xjats ja windsøn jam tyøjkiyi'ñ jøts ja t'ejxwa'añ pøn jaty tø yja'atti migaabyi mi'ukpi, winets ja jap t'ejxpaajty tu'uk ja yaa'dyøjk, jøts ku ja ka'ap jade'en xyøxyi sam idø'øn pyaat'atyidi ñaxyoxidit ja tø'øxñigaabyidi ja tø'øxñi'ukpidi. ¹² Jøts ja tnimaay: “¿Sudso mets ya tø mdøki, jøts ka'ats jade'en mxøxyi sam idø'øn pyaat'atyidi ku tø'øxñigaaky

ku tø'øxñi'ukk ñaxy?" Jøts ja nisa kidyimwya'añ, amøñi ja y'ity. ¹³ Winets ja windsøn ja tnimaay pøn jaty jam wingiidyip wimbøjktip, yide'en ja tnimaay: "Ixe køwøøndi pakwøøndi jøts xwibojpidsø'ømdit, wan tniykxy agugootstujpy ma yjø'øt ma ya'axt, ma wyingidsetst y'agidsetst." ¹⁴ Kumi may ja yjayikwaadsowdi øy pøn, jøts waanits ja'adi pøn yik'a'ejxidip.

Ku yikajpxy'aty ja kugubajt

¹⁵ Jøts ja fariseotøjk jam ojts choondi, jøts ja ojts tkajpxy'ejxw'a'andi, ja'ats ja tyikpøky'attip jøts ja ttani'øønidit pøni sa yjadyimy'ukw'a'añ. ¹⁶ Xjats ja jade'en winaagin tkajxtøø ja yjaa'y møøt ja Herodes yjaa'myi, jøts ja t'atstuknimaawya'a'andi ja nwindson'ajtim Jesús:

—Windsøn, tø øø nnijawi jøts ku tiy mgajpxy, jøts ku tiy janch ja Dios yja' xnigajpxiyi, ka' xmøjpikta'aky øy jaa'y sa yjawa'a'andi kumi ka' mets pøn xkupiky xkagupiky. ¹⁷ Tukmadooks øøts sa me m'ukw'a'añ: ¿Nmo'op øøts kugubajt ja møj windsøn midi jam Roma tsinaapy? ¿Nmo'op øøts u ka'?

¹⁸ Yja'wiyiñits ja nwindson'ajtim Jesús ja' jøts ku ja kya'ødyunw'a'añiyi, jøts ja tnimaay: —Meets win'øømbidi, ¿tiku øts jade'en xkajpxy'ejxti? ¹⁹ Tuk'ejxtik øts ja meeñ midi myiktundip ku ja kugubajt xyakti.

Jøts ja ojts t'atskondi tu'uk ja pujxmeeñ. ²⁰ Ku ja ojts t'uk'ixy ja nwindson'ajtim Jesús, jøts ja tyiktiy:

—¿Pøn yø' wyeen y'aaaw, jøts pøn yø' xyøøw iza kyøxja'ayi?

²¹ Jøts ja t'adsoodøø:

—Ja nwindson.

Winets ja ñimaajyidi ja nwindson'ajtim Jesús:

—Yø'øts meets yø windsøn mmo'op midi yø yja'ajtpy, jøts Dios yø xmo'odit midi Dios yja'ajtpy.

²² Xjats ku ja jade'en tmadoodøø, ñigyumaap idø'on ja tyimyajjtøø; jøts ja ojts jade'eñi tmajtstu'utti jøts ja choo'nidi.

Ku ja jaa'y tyiktøwdi pøni janch idø'on ja' ku oo'kpi jadigojk yjukpyøktit

²³ Jøts nay ja'abi xøøw ja saduceotøjk ojts t'ats'ejxti ja nwindson'ajtim Jesús. Jade'en idø'on ja' ja wyinmaa'ñ tjagyapti jøts ku oo'kpi ka' y'ukjukpyøjknidit; paty ja yide'en tnimaadyøø ja nwindson'ajtim Jesús:

²⁴ —Windsøn, yide'en ja Moisés wyaañ: kuk pøn tku'oockt ñidø'øxy jøts ku ka' tyiktañ ni tu'uk y'u'nk, pøni jamts y'ajch uk y'uch, ja'ats ja ku'økyø'øxy tmøøt'amajtskip jøts ja tyika'axt, jøts ja myigu'uk kyagudigø'øty midi tø y'øøky. ²⁵ Jats øøts y'ity nmigu'uk tu'uk midi jaa'y'ajttip niwixujk yaa'y. Jøts ja jagyooop y'amajtskiy'i'ñ, o'jkts ja'. Jøts kumi ka' y'u'nk y'una'jk tyiktaañ, jøts ja y'uch ojts tmidañ ja kyap, ja ku'økyø'øxy. ²⁶ Jøts nayide'en yjajty ja myimajtskpi, jøts ja myidigøøkpi nayide'en, tumjade'en ñajxkøjxti niwixujk. ²⁷ Jøts ku ja jade'en y'oo'køjxtøø, jøts ja tø'øxyøjk yjaaktyimy'ø'jky. ²⁸ Jøts kuts ja jadigojk pyidsø'ømdit jujky'ajtpi, ¿midi'ibits ja tñidø'øxy'atp, pø tøxi ja t'atsnidø'øxy'ajtkøxti?

²⁹ Jøts ja ojts yide'en y'adsøyidi ja nwindson'ajtim Jesús:

—Kajaa mdigøydi, ja'agøjxp ku ka' xnija'wiyidi ja Dios kyajpxy, ni ja myøk'ajtin xkanija'wiyidi. ³⁰ Kuts jadigojk ja oo'kpi yjukpyøktit nipøn kya'uk'amajtskiñit, ka' pøn y'u'nk ñøøx tkøyakt jøts ja y'amajtskit, jade'ents ja chinaañidit sam ankilisti midi jap tsajpjøtpy. ³¹ Jøts ku ja oo'kpi yjukpyøkti, ¿ka'anim meets ja nøky x'ixy sa Dios kø'øm tø wya'añ? Nøømx i ja': ³² "Tum øts xDios'ajttip ja Abraham, ja Isaac, jøts ja Jacob." Kidi oo'kpipts ja ñiDios'ajtpy, pø ja'axi ja ñiDios'ajtpy jøts ja tyikjuky'att øy pøn.

³³ Ku ja jaa'y jade'en tmadoodøø, jøts ja ñigyumaap tja'widøø ku ja jade'en yik'ixpikyidi.

Ja møj kutujuk midi ja Dios ñi'ane'empy

³⁴ Winets ja fariseotøjk ojts tñimadowdi jøts ku ja nwindson'ajtim Jesús wyinaty tø tyik'amõñ ja saduceotøjkti, jøts ja ñamyujkidøø; ³⁵ jamts tu'uk kajpxwejpì tmøødidi, ja'ats ja tja'ukajpxy'ejxwaan ja nwindson'ajtim Jesús. Jøts ja tyiktiy:

³⁶ —Windsøn, ¿midi'ibi kutujk jawaani mõj midi ja Dios kyutujk myøøt'ajpty?

³⁷ Jøts nwindson'ajtim Jesús t'adsøøy:

—“Windsøøgi ja Dios amunjoojt, jade'en xtsokt mabaat myajada'aky m'anmija'win, mabaat myajada'aky m'aaw mjoojt.” ³⁸ Yø' idø'on mõj jøts yø' idø'on jawyenip. ³⁹ Jøts ñiñayjade'en ja myimajtskpi, yide'en ja wya'añ: “Jade'en mmigu'uk xtsokt sam køøøm mnachøkyin.” ⁴⁰ Yø'øbi kutujk majtsk mõj midi ja Moisés tø tja'ay jap kyutujkjøtpy, jøts midi ñigajpxtip ja Dios kyugajpxy ku yik'ixpøkti.

¿Janch idø'on ku ja David t'ap'aty ja Cristo?

⁴¹ Nay ixamnim ja fariseotøjk wyinaty amuki y'etinim, ⁴² jøts ja nwindson'ajtim Jesús ttiibyiky:

—¿Sa mee mwinmay, pøn yø Cristo? ¿Pøn yø' y'u'nk?

Jøts ja tñimaadyøø:

—Ja rey David yø' y'ap.

⁴³ Winets ja nwindson'ajtim Jesús ja tñimaay:

—¿Jøts sudsomts ja rey David ja Espiritu Santo yikwajnøø jøts ja ojts tijy windsøn? Tiku ja David yide'en wya'añ:

⁴⁴ Nømp ja nwindson'ajtim ja Dios Teety ñimaajyøø:

“Putsinaaky øts n'aga'ñ'ampy, kunim øts yø nmimajadaakøxt pøn jaty mmidsep'ajtip.”

⁴⁵ ¿Sudso ja Cristo ja yiknitsokpi, sudso ja David ja y'ap'aty, jøts yide'ents ja David køøøm wya'añ jøts ku ja twindsøni?

⁴⁶ Jøts nipøn nisa kidyimwya'añ, jøts ja'abi xøøw ttamajstuttøø, jøts ka'ap pøn y'uktiibyøjkniiyi tigati.

23

Ku ja Jesús ttamigajpxy sa y'adøøtsti ja fariseotøjkti møøt ja kajpxwejpitøjkti

¹ Xjats ja nwindson'ajtim Jesús tñimaay ja mayjaa'y jøts ja pyabøjkpitøjk:

² —Yø kajpxwejpitøjkti jøts yø fariseotøjkti, jade'en yø wya'andi jøts ku yø tyimbyaat'atyidi, yø' idø'on ja tyimñigajpxtip wa'ats, yø' idø'on ja tyimñija'widip ja Moisés kyutujk. ³ Jade'ents meets yø xpadu'unt, tundi dø'on jade'en tuki'iyi pøni sa mñii'mxyidi; kidits nayide'en m'adøøtsti sam yø y'adøøtsti, kumi jade'en'ajtip yø', wenk yø jaayi y'ukwa'andi jøts wenk y'adøøtskojmidi. ⁴ Nugo tukmajada'ak myajada'akti midi janch kamaabyim, jøts ja'ats ja jaa'y tyukpadunwandip; jøts niwine'enin ja køøøm jade'en tkatunwa'andi. ⁵ Jade'en'ampy jade'en y'adøøtsti jøts ja kajp y'ejxidit, jøts ja mayjaa'y y'ejxidit. Wyet nikijxy tkøxja'adi wan jaty ja Dios kyutujk, jøts yik'agajpxtit ku ja tjan-tyimbyadundi, jøts nayide'en ñachojkmiyidi jøts wyet tum yøñ tñajtskudiiyi tñiwidettit, ka'ap jade'en tyiktundi sam o pøn jaa'y. ⁶ Ja' chojktip jøts tum jam tyimy'ixa'aktit ma ja windsøn tsinaabyajt jam ku xøøw ku ti tyuñi tsaptøjkjøtpy, ⁷ jøts jade'en ttsokti jøts ja jaa'y nøø'ajy tuu'ajy wyindsøøgiyidit kyajpxpoo'kxiyidit, jøts ja tyimyiktejt ku ja kyajpxwejti.

⁸ Jøts meetsts kidim jade'en jaa'y xnimaañidi jøts jade'en myiknøjmidit jøts ku mee mgajpxwiijy, pø tu'ugyixi mee tum jade'en mnay'uch'atidit mnay'ajch'atidit, jøts tu'ugyits ja mgajpxwejpidi midi mgajpxwejidip, ja Cristo ja', ja yiknitsokpi. ⁹ Jøts kidi pøn xejti teety ya naxwiiñ naxkijxy, tu'ugyixi meets mdeety ja' pøn jap tsajpjøtpy. ¹⁰ Jøts nika' mnawyindsøndejidit, pø tu'ugyixi ja' pøn mwindsøn'ajtip, ja Cristo, ja yiknitsokpi.

11 Pøn ja myigu'uk twindsø'jkip, ja' idø'øn møj, ja' idø'øn nmigubajk'ajtidip. 12 Pøn ja namyøjpikta'akwajniyip kø'øm, yik'amutski ja nøjkx yjaty, jøts pønts nabyiktaajkip yik'ayowim, ja'ats idø'øn nøjkx mõjtøjkip.

13 'iTi jade'en mnadyatuujnidip meets kajpxwejpitøjkti meets fariseotøjkti, wine'enin win'øø'ndsøø'nidi! Meets ja m'agajpxujkpy jøts mmigu'uk xkaduktatøkwy'a'andi ja Dios kyutujk. Jøts ka'ats kø'øm mdøkidi, jøts nika' xyiktøkwyamidi pøn ja tsojkin tjajagyajp.

14 'iMjanch'ayøøy meets kajpxwejpitøjkti, meets fariseotøjkti, wine'enin xnidunk'atti ja win'øø'nk!, ku ja ku'øktyøøxy ja tyøjk ja pyikta'aky xpøjkxidi jøts ñadyijyi xkayikni gaxø'økti, ñadyijyi ja tsapkaajpxy janch yøñ xkajpxti, yø' meets yikxon myiktagubatp.

15 'iTi jade'en mnadyatuujnidip meets kajpxwejpitøjkti, meets fariseotøjkti, wine'enin ja mmigu'uk xwin'øø'ndi! Mjantyimyijotigøødyip meets, jøts ja jaa'y xukupøktit ja mdsinaa'yindi sa mee m'adø'øtsti, jøts kuts ja jaa'y jade'en tø xundi, ne'egi jawaani ka'øy meets ja jaa'y xjaaktyimdyuñ, jade'en ja tpatni sa ja øy øy tyimñøjkxt jap infierno, jøts nigidi meets jade'en mdyimyjatt.

16 'iMjanch'ayøøy meets tuu' niwaabidi, jade'ents xundi sam winapjaa'yindi!, ku mee mwaa'ñ: “Ku pøn wyanda'aky jøts tyiktestigi'aty ja tsaptøjk, jade'ents ja yikpikta'aky sam pøn kyawanda'agyin; jøts pønts wandakp jøts tyiktestigi'aty ja oori midi ja tsaptøjk yja'ajtpy, ja'ats idø'øn tyy janchwandakp.” 17 iMeets mo'otpidi, jade'en xundi sam winap jaa'yindi! ¿Midi'ibi dø'øn jawaani jaaktyimyøj: ja oori, uk ja tsaptøjk midi tyikunuu'kxy jajtp ja oori ku ja yikajpxpaaty? 18 Jøts nayide'en mwamidi: “Ku pøn wyanda'aky jøts tyiktestigi'aty ja altajr, ka'ap ja wyanda'agy; kuts pøn wyanda'aky jøts tyiktestigi'aty ja limunsi midi yikyoxp jam altajrkøjxp, ja'ats idø'øn tyy janch wanda'aky.” 19 iMee mo'otpidi, mee wimbeets kugoots ejtpidi! ¿Midi'ibi jawaani jaaktyimyøj: ja yojxin, uk ja altajr midi tyikunuu'kxyjajtp ti jaty jam yikyoxp? 20 Jøts pønts tyiktestigi'ajtp ja altajr ku wyanda'aky, kidi ja'ayip ja nugo yiktestigi'ajtpy, nayide'en ja tjestigi'aty ti jaty jam altajrkøjxp; 21 jøts pøn tyiktestigi'ajtp ja tsaptøjk, kidi ja'ayip ja nugo yiktestigi'ajtpy ku ja wyanda'aky, nayide'en Dios ja tyiktestigi'aty pøn ja chaptøjk'ajtpy. 22 Nayide'en pøn wandakp jøts tyiktestigi'aty ja tsajp, ja Dios idø'øn chinaadyaajk ja yiktestigi'ajtip, jøts ja Dios kø'øm midi jap tsinaapy.

23 'iMjanch'ayøøy meets kajpxwejpitøjkti, meets fariseotøjkti, ku ja win'øø'nk xunk'atti! Køx kida'ak meets xjanchkugubatkixy, jøts ka'ap ne'egi xpadu'unxidi midi ja Dios kyutujk jawaani ne'egi yjani'ane'empy ku ja ttsøky ja ødyiidyu'unin, ja pa'ayo'ejxk jøts ja janchja'win. Ya'atpi meets idø'øn ne'egi jawaani mjapaat'ajtip mbadu'ump. 24 iMeets winap tuu'waabidi, ku ti x'uukti tum axity ja xyiknaxti jøts ja uux jam kyatøki, jøts nika'ats xjawidi ja mõjpi jiyujk ku ja amuum xjøøndi!

25 'iTi jade'en mnadyatuujnidip meets kajpxwejpitøjkti jøts meets fariseotøjkti ku xunk'atti ja win'øø'nk! Ja'ayi mee mjanchkamijotkukip sudso ja texy ja tas nikijxyi nadyijyi wa'ats y'ett, jøts ka'ap ja xunk'atti pøni sadam ja yjotpy. Ni xkaja'gyukidi kudam m'amp mjotp tum ja axøøkp i yigaappi xjamøøt'atti, ku jaa'y nugo xwin'øø'ndi xwimaatsti. 26 Meets fariseo winapti: jawyeen yø mga'øy'ajtin xmajtstu'uttit, jøts jade'en ja m'anmija'win ttaniwa'ats'attit ejxim n'uk'ejxint tasi nyikwaajtsin, jade'en nikijxy jade'en jøtpyi.

27 'iMjanch'ayøøy meets kajpxwejpitøjkti jøts meets fariseotøjkti, meets win'øø'mbidi!, jade'en mee mgaxi'iky sam ja oo'kpi nipotsin midi tø yikpoobi jøts ja janch tsuj nikijxy kyaxi'iky, jøts ku jap jøtpy ujts abøki oo'kpi pajk jap, jøts tum ja axøøk ja jap myøøt.

28 Jade'enxi meets idø'øn; wemp am ñadyijyi xuk'ejxti ja jaa'y jøts ku mee m'øyyaa'yi. Midi'its jap m'aawidip mjoojtidip, tum ja taay'ajtk, tum ja kya'øybi jap mwinmaa'ñ'ajtip.

29 'iMjanch'ayøøy meets kajpxwejpitøjkti jøts meets fariseotøjkti, meets win'øø'mbidi! Meetsxi ja Dios kyugajpxy ja ñipots myik'øyidip ku ja y'ookti, jøts ja xyo'om

yik'øyidi wyingi'jy pøn tō y'ats'øyjaa'y'atti, ³⁰ jōts mjanch'uknōmdi: “Kuk adōm jeexyip n'ukja'ajtyindi, ka'ap adōm ja mōjaa'dyōjk jeexyip tō nbudōjkindi ku ja tō tyik'ookti ja Dios kyugajpxtyi.” ³¹ Yō'øyits meets kō'ōm mnadyani'ōō'niyip jōts ku ja xeety'apidi pøn ja Dios kyugajpxy tō tyik'ookti. ³² ;Yik'abaadidits inet midi ja mdeety'aptōjk tō ttunjōpidi! ³³ ;Meets win'ōō'mbidi! ;Meets kawindiyjaa'dyi! ;Sudso meets xijy ja ayo'on m'ukniwaaajtsniyidit midi jap ayodaajkjōtpy mbaattip? ³⁴ Yō'ōgōjpx ōts kugajpxy ngaxt mōōt ja wijyjaa'dyi mōōt ja yik'ixpōjkpidi. Jōts myik'ookpts meets ja winaagin jōts ja xyikruspattit, jōts pōmbi yiktseep yikwopp jap tsaptōjkjōtp, jōts pōmbi yik'ixa'ap yik-pawidetp kajp kajp. ³⁵ Jade'ents meets ja pōky mdaja'adit, jōts ja xkubattit ku ja ōyjaa'y kawine'en tō xyik'oo'knidi, Abel ñikōjxp cho'onda'aky pøn ōy pøn yikxon jaa'y'ajtp, kunim ja Zacarias ttamigugōxi pøn ja Berequias myajnk'ajtpy, pøn mee myik'o'jk jap tsaptōjkjōtpy mā ja altajr y'ity. ³⁶ Janch ōts idō'ōn nwa'añ, ku jade'en yiktuñ yō'ōbi pōky, yō ya'atpi jaa'y yō taja'adidip jōts yō yiktagubattit pøn jaty ja ixyam tsinaadyip.

Ku ja Jesús t'ayo'ijxy ja Jerusaléngit kajp

³⁷ ;Jerusaléngit kajp, Jerusaléngit kajp, meetsxi myik'ōō'kpy ja Dios kyugajpxy, jōts xwinga'atsti xjōpkā'atsti pøn ja Dios kyajpxy tyikyō'ōyidip, pøn ja Dios mjadanigajxidip! ;Tō meets njapeemukwā'añ njakonmukwā'añ kawinaak ojk, sam tsikuna'jk ja tyaak ñimu'uxyi, ka'ats meets ja jade'en tō xkupiky! ³⁸ Ejxtits inet ja tsaptōjk ku ja abak tyani; ³⁹ ōts idō'ōn wamp jōts ku meets xka'uk'ejxnit tsojk, jōts ku meets jaanim x'ejxtit pōni juuni ja tiempi yja'aty ku mnō'ōmdit: “Ejxik Dios ja kyunuu'kxyu'nk ñadyaguguexyi midi mmime'enxiyip ja kyutujk.”

24

Ku ja Jesús tnigajpxy jōts ku ja tsaptōjk kyida'att

¹ Xjats ja nwindson'ajtim Jesús pyidsimy jam tsaptōjkjōtp, jōts ixam ja wyinaty ñajxni ku ja pyabōjkpitōjk ja jam wingon ñimejniyōō, jōts ja tyukmadoobinaxwā'jkōō sa jaty ja tsaptōjk jam t'ijxy ku ja janch tsuj janch ōy. ² Jōts nwindson'ajtim Jesús ja t'adsōy:

—;M'ejxtip ixa jade'en tuki'iyi? ōts wamp jōts ku ya nitu'ugin ja tsaa kyata'ant nikiibyety, kuja'jigyōxp yō tuki'iyi.

Ja ejxa'an midi yik'ejxp ku wyinaty yiktidyunwanidi ja naxwii'ñit jaa'y

³ Winets ja ojts ñōjkxti jam kojpkōjxp midi yiktejp Olivos; jōts ku ja nwindson'ajtim Jesús ixam wyinaty tō y'ixa'aky, winets ja pyabōjkpitōjk ja ojts ñinijkxyiyi, jōts ja ojts ñimaajyidi amaa'tsk:

—Ja' ōō ndsōjkpy jōts ōōts xukmado'ot windem idō'ōn ja jade'en yjatt. ;Ti ejxpajt ti ejxa'an ōō n'ejxp jōts ku wyinaty mmenwā'añ, jōts ku wyinaty yja'atwā'añ ja tiidyu'unin xōōw?

⁴ Jōts nwindson'ajtim Jesús ja ñimaajyidōō:

—Ōyim mnay'ejx'etidit jōts kidi ōy pøn nugo mwin'ñidi. ⁵ Kumi may ja jaa'y mye'endit jōts ja jade'en ñadyejidit jōts ku ja y'ōtsi, yide'en ja wya'andit: “Ōts idō'ōn Cristo ja yiknitsokpi”; jōts mayts ja jade'en twin'ōōndit ja jaa'y. ⁶ Jōts mmado'op meets jōts ku jaa'y tnigajpxtit ja tsep, uk tnigajpxtit sa jaty ja tsep yjaaktunit, sa jaty ja ayo'on yikpaatt; kidits mdsō'ōgidi, jatp idō'ōn ja jade'en; ka'anims wyinaty tmibaat'aty jōts ja naxwii'ñit jaa'y yiktidyu'undit. ⁷ Kumi tseptu'undip ja jaa'y pøn ki'abikñaaix ki'abikyajpti jōts ñañibidō'ōgidit xem yam, jōts ja windsōndōjk nayide'en cheptu'undit ja xem ja yam pøn jaty ja kajp ja naajx tnitanaadyip naxwiiñ; etp yuu xōōw, jōts pa'am kōx kida'ak jōts uix ñaxt maawyeen. ⁸ Tso'ondakpnim ja ayo'on wyinaty jade'en midi yikxon yik'ejxpnim.

⁹ Winets meets myikōyakt jōts myikjemdu'undit myiktedu'undit, jōts jaa'y yik'ōogidit, jōts nipōn mgatsokidit o magajp, ja'agōjxp ku mee xjanchjawi. ¹⁰ Winet ets ja jaa'y may ja yjanchja'win t'ixmatstit, yja'dyigōōgyōxnidip ja Dios yja' ja'ami jōts ja myigu'uktōjk

tkøyajknidit. ¹¹ May ja windaay'ajtpi pyidsø'ømdit, ñadyijyiwyā'andit jøts ku Dios yja' ja tñigajpxidi, jøts may ja myigu'uk twin'øøndit. ¹² Kawine'en ñaxt ja ka'ødyu'unin jøts ja ka'øwiyinmaa'ñ, may ja jaa'y xem yam kawin'ijxyim ñayjawiyidit. ¹³ Jøts pøn tmidanaapy jøts pøn tu'ugyi winmaapy, ja'ats idø'øn nøjx nitso'ok'ajtp ja y'anmija'win. ¹⁴ Jøts ya'at øy madsoo yikajpxwā'kxt wine'enin naxwii'ñit y'ity, ya'at Dios y'øgyajpxy y'ømyadya'aky, jøts naajx kajp ja møj ja mutsk tñijawidit; jats idø'øn tmibaat'att jøts naxwii'ñit jaa'y yiktiidyu'undit.

¹⁵ Ja Daniel, pøn ja Dios kyugajpxy'ajtpy, ja' yide'en tñajtsja'wiyii'ñ jøts tñigajpxy ti yikpøkpyajtp, ti midundigøøpy; jøts kuts x'ejxtit jøts ku ja'baat jap yik'ejxni yikpatni ma ja tsaachjagunuukxy chaptøjk jap, japts ja mga'ukmaa'kxniyidit. Pøni pøn ya'atpi nøky kajpxp, wan tja'gyuki. ¹⁶ Wants ja tka'akti pøni pøn tsinaadyip jam Judea jøts kyaknøjkxtit jam kojpkøjxp. ¹⁷ Jøts pøni jam wyinaty pøngapøn tø pyety tyøjkøjxp ja'abi xøøw, ka'ats t'ukniwinajknit ok idø'øn ti tjaak'atsjuutt jap tyøjkøjtpy; ¹⁸ jøts pøni jam wyinaty pøngapøn wyidity kyamjotp, wan ka' t'ukwimbejtñi, ni wyet ni ñaamy tka'atswetst. ¹⁹ jAyo'ijxyim ja tø'øxyøjk yjanchjattit pøn jaty mutsk jam wyinaty tñikøjxp'ajttip, pøn jaty myaxu'nk jam wyinaty tø tyikaxø'økti! ²⁰ Amidowdi pøktsowdi Dios jøts kidi ja et mga'akti ku ja et y'amxuxy chaachxuxy, jøts kidi wyinaty yjaty ku poo'kxin xøøw; ²¹ møk ja ayo'on yik'ext sam ka' windi yjatyin wine'en ixyam kujk ñaxy ku ñaxwii'ñit cho'ondaajky. Jøts ku ja ñaxt ni kya'ukyik'ejxnit jadu'uk nayide'en. ²² Jøts ku Dios tyikjakt ja ayo'on jøts jeky y'ett, ka' pøn ñitsoojkin tpaatt; jøts ka'apts jade'en ttu'unt, ja'agøjxp ku ttsøky ja jaa'y jøts tpa'ayøp pøn ja kø'øm tø twi'ixy.

²³ Jøts ku winet pøn mnøø'mxidit: “Ejxti, ixya ja Cristo midi yiknitsokp”, uk ñø'ømdit “Ejxti, ixem ja”, kidi xmibøkti. ²⁴ May ja windaay'ajtpi mye'endit jøts myikwin'øøndit, ñadyijyi ja ñadyejidit Cristo midi yiknitsokp, uk ñadyijyi ja ñabyikta'agit jade'en sam ja jaa'y pøn Dios yja' tkajpxidip; jøts tñanky'ejxidit ja ejxa'an ja ejxpajt, ñadyijyi ttu'undit ja milagri jøts ja jaa'y ttawin'øøndit, ja'baat ja twin'øønwā'andit pøn ja Dios kø'øm tø wyi'ijxyidi. ²⁵ Patki'jyi meets yø ixyam ndukmadø, ²⁶ kuxip myiknøjmimidit: “Ejxti, ixem ja abak etjotp”, kidits jam mnøjkxti; uk mjayiknøjmimidits; “Ejxti, ixyajp tam ja tøjkjøtpy”, kidits meets ja xmibiky. ²⁷ Ku ø nme'ent, jade'en ø nme'ent sam wyidsukyin ku ja kyaxi'iky jam xøbidsimy, nayide'ents ja nay jaty kyaxø'kmi xøjexy jam tsajpwemp. ²⁸ Niduki'iyi meets ja xñijawit ku nme'ent.

Sa mye'ent ja Dios ja myøjkudanaabyi ja yiknitsokpi

²⁹ Kuuyi ja ayo'on jade'en y'uknaxt, winets ja xøøw y'ookt, winets ja po' ka' y'uk'anit, jøts ja maadsa' kya'adit. Ku ja tsajp y'adøtspøjkøxnit, tuki'iyi tum jade'en yjattit ti jaty jam ejtp tsajpwemp. ³⁰ Winetnimts ja x'ejxtit jam tsajpwemp midi øts jawyeen nanky'ejxip, jøts ja naxwii'ñit jaa'y ni'ijtyi ya'axtit, jøts t'ejxtit jøts ku ø nmime'ent yootsjøtpy ja nmøk'ajtin jøts ja kunuu'kxin. ³¹ Winets ja puxujx yikmado'ot møk'ampy jøts ø ndanigaxtit ja ankilistøjk, ja'ats twaamukøjxp pøn jaty ø nja'ajtpy wine'en naxwii'ñit jaa'y amuum tuk'ojkyi tuktsajp'agida'aky.

³² Øy x'ukja'gyukidit yø madya'aky ku yø iigi kipy yiknimadya'aky: Ku ja y'awaj y'axeeñ u'nknim, jøts pyidsimy ja y'aay, jade'ents meets ja xñijawi ku ja y'anda'akwani. ³³ Nayide'ents idø'øn ja nbiktaajki ku ja ayo'on jade'en x'ejxtit, jade'ents meets ja xñijawit jøts ku wyingøñ juuni ja tiidyu'unin ñaxkida'akt, tyimy'ixaani dø'øn ja wyinaty jøts ja jade'en yjatt. ³⁴ Jade'en øts idø'øn nwa'añ, jøts ku ja jaayi jade'en yjatt namga'anin y'oo'køxti pøn jaty ja juky'ajttip ixyam. ³⁵ Najxp y'ity yø naajx tsajp, øy yø juuni kyudigø'øty, jøts øts n'ayuujk nijuuni yø kyakixy kyanaxy kunim jade'en tyimyjatt.

³⁶ Ka'ats pøn tñijawi pøni ti xøøw pøni ti jumøjt ja jade'en yjatt, ni ja ankilistøjk ja tñanijawidi pøn jap tsajpjøtpyti, jøts ni øts ja kø'øm nganijawi. Tu'ugyi ja Dios Teety ja tñijawi.

³⁷ 'Nayide'en sam ja Noé yjajty, nayide'ents jadigojk yjatt ku ø nme'ent. ³⁸ Ku dø'øn jekyip, ku ja ayo'onduu wyinaty ka'aním myiñ, jøts ja jaa'y wyinaty yikxon yjanchkaydi yjanch'uukti jotkujk, pømbi amajtskip, pømbi y'u'nk ñøøx jam tni'adso'owip jøts yaa'byøkt, jaabaat jade'en yjaaktyimy'adø'øtsti ku ja Noé tyøjkijii'ñ jap møj barkijøtpy; ³⁹ jøts nigidiyi ja tyimy'ejxtøø ku ja møktuu ku ayo'onduu myiñ, jøts ja nøøgom ja ojts yiktso'onguixyidi. Nayide'ents idø'øn nøjkx yjaty ku ø nmemit, ka'ap pøn xjøp'ejxtit. ⁴⁰ Winaagin jaa'y jam wyinaty namajtsk tyundi jam kamjotp; tu'ukts ja ñitso'ok'att jøts jadu'uk wyindigø'øty. ⁴¹ Jøts winaagin tø'øxyøjk jam wyinaty namajtsk yjotsti; tu'ukts ja ñayide'en ñitso'ok'att jøts jadu'uk wyindigø'øty.

⁴² 'Nayjøp'ejxidits meets, kumi ka' xnijawidi pøni juuni ø nme'ent. ⁴³ Ukmadowdam ya'at, ku n'ukmadyaajkint ku pøn kudøjk wyinaty t'uknijawi juuni yja'att ja maa'tspi ku koots, çti jats ja jujky kyadsunaxt, ti jaa ja tmajststutt ja tyøjk jøts wan ja maa'tspi tyik'awatsnidi? ⁴⁴ Paty idø'øn nnøjmidi, jøts jøp'ijxy xyik'ettit yam meets ja xkagumay ku øts jotmøñ nme'ent.

Ja ødyumbi ejx'ejtpi

⁴⁵ 'Pømbi tumbi dø'øn wijy, ja'ats idø'øn ja tyimyida'amp pøn jaty ja windsøn jam yiktsinaapy tyøjkjotp, jøts ja abaadi tmo'ot kyaaky yji'kxy. ⁴⁶ ¿Kidi ja'ajip nekim pøn ja wyindsøn paajtip, jøts ku ja ixam ka'pxy tpaduñ sa ja tø yik'ane'emy ku ja wyindsøn yja'aty? ⁴⁷ Janch øts idø'øn nwa'añ, ja'abi tumbi dø'øn ja windsøn pyikta'akp jøts ja ttuk'ejx'ett tuki'iyi pøni ti jaty ja jam yjagyeypy. ⁴⁸ Kuts ja tumbi kya'ø'y'att, ku nichøky wyinma'aty jøts ku wyindsøn ka' chojkja'aty, ⁴⁹ jøts ja tjemdumbinaxwa'jki ttedumbinaxwa'jki ja wyindsøn tyumbi, uk myu'ugyi kyu'uxyi møøt ja amu'ukyjaa'dyi, ⁵⁰ jøts kuts ja wyindsøn wyimbett agumoni yam ja tkajøp'ijxy ja'abi xøøw; ⁵¹ jøts ja yikxon tyagubatit, nayide'en yiktu'unt sam ja jaa'dyi pøn ja win'øø'nk ttunk'ajttip. Jøts ya'axt yjø'øt tmiwíngidsetst tmi'agidsetst ja ayo'on.

25

Ku ja Jesús tmadyakpaajty nimajk ja kiixye' una'jk

¹ 'Jøts ja Dios kyutujk jade'en yjatt midi yjaa'y ja tyanitanaapy sam nimajk ja kiixye' una'jkindi, midi ja yjaj ojts t'ukondi jøts ja tminøjkxti ma ja jaa'y jam y'amajtskiwya'andi, jøts ja jemyaa'y twindsø'øgiwya'andi. ² Nimagoxk ka' ti møj tjawidi, jøts ja nimagoxk janchwijy ja yjaa'y'atti. ³ Pønts ka' ti møj tjawidi ku ja tkondi yjaj, nika'ap ñøø ja ojts tkojnidi, ka'ap ja te midi ja tyukta'utstip jadigojk ku ja kyøxt ja yjaj; ⁴ pønts wijtyi ojts ja abiky tkondi ja nøø midi ja yjaj tyuktatøødyip, jøts abiky ja' midi ja jaj jap yjaakmøøt'ajtpy. ⁵ Jøts kumi ka'ap ja jemyaa'y chojkja'tni, xjats ja niduki'iyi maa'y'øøgyi pyaajtniyidøø, jøts ja ojts yjadyimy'ukma'oo'køjxnidi. ⁶ Xjats tsuu'm et tmadoodøø ja ayuujk kuk yjawi wya'añ møk: "¡Ixa myiñ ja jemyaa'y; pidsømdi jøts xjøpkubaadidit!" ⁷ Jøts ja kiixye' una'jk pyidø'køjxtøø, jøts ja yjaj ja t'a'ejxidøø. ⁸ Jøts ja ñimagoxkpi midi ka'ap øy ti tmøjawidi, ja'ats ja yjanimagoxkpi tnimaadyøø midi wijtyi midi winmaadyip: "Møøky øøts yø mjajnøø waani, oo'knip øøts yø njaj." ⁹ Jøts ja ñimagoxkpi y'adsoodøø: "Ka' øøts yø nyaky, ku øøts inet yø nyakt ka' øøts inet nja' tpaatt, jøts ni meets inet mja' yø tkaatmit. Jam ne'egi mninøjkxtit ma tyøøgyi jøts jam mnadyanijuyidit." ¹⁰ Ixam ja wyinaty tø tyimñøjkxti jøts ja t'atsjuuwya'andi ja jajnøø, ku ja jemyaa'y yja'jty. Jade'ents ja tyøjkidi pøn a'ejxi nayjagyajpidip, jøts ja ojts tmøøtøkidi ja jemyaa'y ma ja jap y'amajtskiwya'añ, jøts ja tøjk'aaw y'adujknaa. ¹¹ Jøts ja yjanimagoxkpi kiixye' oojknim yja'ukja'tnidøø, jøts ja yja'ukwanidi: "¡Yik'awa'ats windsøn yø tøjk!" ¹² Jøts ja ojts yide'en yik'adsowdi: "Ka'axi mee nnijawi pøni mbøn meets."

¹³ Jøts idø'øn ja nwindsøn'ajtim Jesús ja pyabøjkpitøjk yide'en tnimaay:

—Jøp'ijxy mnanky'etidit, kidi nugo mdyimyaanøjkxti, kumi ka' xnijawidi pøni juuni øts ja tiidyu'unin nmime'ent.

Ku ja Jesús tmadyakpaajty ja tumbiktøjk pøn ja wyindsøn ja myeeñ tyanipiky

¹⁴ 'Nayide'en idø'øn Dios kyutujk midi yjaa'y ja tyanitanaapy, sam tu'uk jaa'y wyinaty choonwani, jøts ja ñøjkxwani abikñaajx abikyajp, winets ja ojts twaadsøy pøn jaty ja jam yiktumpy jøts ja ttanipijky ja myeeñ.

¹⁵ 'Tu'uk tmøøy magoxk mil, jøts jadu'uk majtsk mil, jøts jadu'uk tukmil, jade'en ja ojts tmøøy sa pønjabøn ja wijy'ajtin tmøødi. Jøts ja chøø'ñ ñijkxy widejtpi abiky'et. ¹⁶ Ja tumbi pøn ja meeeñ yikmøøy magoxk mil, ojts ja tta'ajuy tta'agajpxy jøts ja tyik'u'nkjajty ja nayidinø'øn. ¹⁷ 'Nayide'en jadu'uk ja meeeñ ojts tyiktunkpatmi pøn yikmøøy majtsk mil, jøts jaa ja nayide'en tyik'u'nkjajty majtsk mil. ¹⁸ Pønts ja meeeñ yikmøøy tukmil, myidsø'on ja' jøts ja ayu'uch etjotp tu'uk ja jut tyik'ø'yiyi'ñ, japts ja meeeñ ja tnitajy.

¹⁹ 'Xjats kyimjekñim ja tumbiktøjk wyindsøn wyimbijty, xjats ja tyikwingukidi ja meeeñ. ²⁰ Jawyeen yja'jty pøn ja meeeñ wyinaty tø yikmøøy magoxk mil, jøts ja tjaakmøøy jamagoxk mil ja wyindsøn midi ja wyinaty tø tyik'u'ngi, yide'en ja tnimaay: "Magoxk milxi, windsøn, ojts xyaky ja meeeñ, ixya'ts jamagoxk mil midi tø nyik'u'ngi." ²¹ Xjats ja windsøn ja ojts y'adsøy: "Øy'ajtp, øy idø'øn mduñ jøts øy idø'øn mjaa'y'aty; nayide'en sam øy tø x'ejx'lity yø meeeñ øy yø kyamabaadi, ndanipøkp inet ja myayjawibi. Jøts ya men, nax, jøts jawaani may xpøkt ja n'øy'ajtin." ²² Jøts jadu'uk yja'tmi pøn ja meeeñ yikmøøy majtsk mil, jøts ja wyaañ: "Windsøn, ixya ja meeeñ majtsk mil midi øts ojts xmø'øy, jøts ixya ja majtsk mil midi tø nyik'u'ngi." ²³ Jøts ja wyindsøn ja y'adsoji: "Øy'ajtp, øy idø'øn mduñ jøts øy idø'øn mjaa'y'aty; nayide'ents sa tø x'ejx'lity yø meeeñ øy yø kyamabaadi, njaakmo'opts nayide'en jawaani may. Men, tøk'i ndøjkjøøjty, paat ja m'øy'ajtin." ²⁴ Jøts ku yja'jty ja tumbi pøn ja meeeñ wyinaty tø yikmøøy tukmil, yide'en ja tnimaay ja wyindsøn: "Windsøn, nni'ja'wipxi øts ku mets ka' ti jadi'iñi xnajtsjaw'i, ja'baat me xpayø'øy øy mets ja xjagaja'aji, myikpidø'økwambya'at mets ja pikta'aky øy me mjagani'ipy. ²⁵ Paty ø ndsø'øgi, paty øts ojts n'atsyu'uch ja meeeñ jap naxjøtpy. Ixyats ja', pø mja'ajtpxi yø'." ²⁶ Jøts ja wyindsøn ja ojts yide'en y'adsøyiyi: "Tsaachnuuxjaa'y mets ka'ødyumbi, pøni mnija'wip tam ku øts jade'en njaa'y'aty, ku øts nbøkmuky midi ø ngapiktakpy, ku øts ja xijy nyikpidø'økt paat midi ø ka' nni'ipy, ²⁷ jøts çti kuts øts ja nmeeeñ tø xka'anuu'kxyajki, jøts ja meengyojpk ja jeexyip tø nbaaty møøt ja meeeñ'u'nk ku tø nja'aty?" ²⁸ Winets ja windsøn tnimaay ja jaa'y pøn jaty jam wyinaty jam'ajtjip: "Pøjkxidi yø meeeñ midi tukmil, jøts ja xmo'odit pøn ja yja' majk mil. ²⁹ Pøn ja yja' jam, jaaktyimyikmo'opts ja', jøts ja may'ampy tjagyapt; pønts niti tkamøøt'ajtp, jøts ku jap yii'nim tjaakjamøødi, ja'baats ja yjaaktyimyikpøjkxit. ³⁰ Yø yjade'emb'i tumbi midi niti kawamp, ixep wibejpidø'mdi agugootstujpy, japts ya'axt yjø'øt tmiwingidsetst tmi'agidsetst ja ayo'on."

Ku ja naxwii'ñit jaa'y yiktidyu'undit

³¹ 'Ku ø nme'ent windsøn'ajtpi, ni'awidity niduki'iyi ja ankilistøjk nmøøtme'ent, jøts ø n'ixa'akt jam kunuu'kxy kyutujktaajk jøp'am. ³² Jøts ja naxwii'ñit jaa'y niduki'iyi ñamyukidit øts nwingujkp, jøts øts ja nwejtswa'kxtit jade'en sam ja jiyujk'ejxpi ja byor-reek t'awojpakyin møøt ja chiibi. ³³ Aga'ñ'ampy øts ja borreek nbikta'akt jøts anajy'ampy ja chiibi ndejint. ³⁴ Jøts winets ø nnøjmit ja n'aga'ñ'ambyitti: "Ya mendi pøn tø tpaajtidi ja Dios Teety kyunuu'kxin; kupøjkidi ja Dios kyutujk midi yjaa'y ja tyanitanaapy, jaayip yø myiktanibiktaajkniyidi ku Dios ja naxwii'ñit tyik'ø'yiyi'ñ. ³⁵ Tø nyu'øøky nxø'øøky, meetsts ojts xyikay; tø øts adøødsi n'ity, jøts meets ojts xyik'uuky; jøts ku øts ojts nja'aty ndsøøñ øy magajp, meets ojts xmø'øy nja'ataajk. ³⁶ Ku øts nwet ojts xka'ejtxi, meets ja ojts xmø'øy; jøts ku øts ojts nbiky, meets ojts x'atskajpxjot'amøki; ku øts ojts nyiktsomy, jap meets ojts xkugajpxi." ³⁷ Jøts pønts wyinaty tø yikupøkti jøts øts ja xnøjmidit: "Windsøn'ajtim, çwindiixik me n'ijxy jøts ku me myu'øøky, jøts øø nyaky kaaky? çUk

windits me myik'ijxy mdøødsi, jøts øø nyaky ja nøø? ³⁸ ¿Uk windits øø n'ijxy jøts ku me mja'aty mdsøøñ mā jaty kajp, jøts øø nyaky ja ja'taajk, uk windits øts ja wet naamy nyaky? ¿Juuni øøts ja tø n'uk'ixy jøts ku ja mga'ejtxiyi? ³⁹ ¿Uk windits me m'ukyik'ijxy jøts ku me mbiky, uk windi øø n'uk'ijxy ku me myiktsumy, jøts øø n'atsku'ejxi jap puxøjkjøtpy?" ⁴⁰ Jøts yide'en ø n'adso'ot: "Janch øts idø'on nwa'añ, øy yiini wyaani midi tø xuujnidi, midi øts tø xmøøjyidi ja nmigu'uk pøn ka'ejtxidip ja pudøjkin, øts idø'on ja jade'en ñamyayi tø xundi."

⁴¹ 'Winets øts ja nnøjmidit ja n'anajy'ambyitti: "Jiwa'akti, kidi øts ya xwin'ejxti meets kawindiidyumbidi; nøjkxti jap mā ja jøøn jap nijuuni kya'øøky, midi ja miku'yiktajøp'ejxtip møøt ja miku'ankilistøjkti. ⁴² Tøxi ø nyu'øøky, jøts meets ojts ka' xmø'øy ja ngaaky; ojts ø ndøødsi, jøts meets ojts ka' xyik'uuky; ⁴³ ojts ø nja'aty ndsøøñ mā jaty kajp, jøts mee ka' xyikja'taajky. Ku øts nwet ojts kya'ity, jøts meets ja nwet ojts ka' xmø'øy; ka' meets ojts xku'ejxi ku øts ojts nbiky, ku øts ojts nyiktsumy." ⁴⁴ Jøts øts ja xnøjmidit: "Windsøn'ajtim, ¿windixik me n'ijxy jøts ku mets wyinaty yuu xøøw myik'ookwa'aníyi, uk tøødsi wyinaty myik'ookwa'aníyi, uk ku me mja'aty mdsøøñ øy magajp, uk ku mwet mnaamy kya'ityxi, uk mbiky m'añi, uk myiktsumy myiktiy, jøts øøts idø'on niti pudøjkin nguidyimdyuñ?" ⁴⁵ Jøts øts ja yide'en n'adso'odit: "Janch øts idø'on nwa'añ, øy yiini wyaani jøts ku ka' tø xuujnidi niti pudøjkin pøn ja ayo'on tyanaxpy, ni øts køjxp ja tø xkatuujnidi." ⁴⁶ Winets ja jaty ñøjkxtit ayoobi xemikøjxp, jøts pøn wyinaty yikupøkti jøts ja ñøjxmidit tsinaabyi xemikøjxp mā ja tpaajtidit ja Dios kyunuu'kxin jøts ja tsinaa'yin øy yikxon.

26

Ku ja Jesús yikajpxy'aty sudso ja yikmatst

¹ Ku ja nwindson'ajtim Jesús jade'en y'ukwan'abajtiyiñ, jøts ja tnimaay ja pyabøjkpitøjk:

² —Mni ja'widipxi jøts ku ja paski xøøw ja majtsk xøøwni; jade'ents ø nyikøyakt jøts øts jaa'y xyikruspattit.

³ Jøts ñiñayjaty ñamyujkidøø ja teetywindsøndøjkti, ja kajpxwejpitøjkti, jøts ja israelit møjaa'dyøjkti, jam ja tøjkwemp ñamyujkidøø mā ja Caifás jam kyutujktaajk midi ja teetywindsøndøjk wyindsøn'ajttip. ⁴ Jam ja ojts tkajpxy'atti jøts ja ttanibiktaajkidøø sudso ja yiknidaayit ja nwindson'ajtim Jesús jøts ja tyimyatst, jøts ja tyimyik'ooktit. ⁵ Jøts yide'en idø'on ja wyandøø:

—Ka' y'øyt ku xøjøjty jade'en ndu'unindit, jøts jaa'y kidi xem yam nañibidi'igyidi.

Ku ja Jesús yiktagutajmji'iky ja pa'akxuu'kpi

⁶ Jøts ja nwindson'ajtim Jesús jam ja wyinaty Betania, jam Simón tyøjkwindum pøn ja møj pu'uts pa'am øjkip; ⁷ jøts tø'øxyøjk ja jam ñimejni pøn t'ukoon tukmøj abøjk'iñu'nk ja aceite midi pa'akxuu'kp, ujtsoni ja tmimiiñ jøts ja'abi midi idø'on janch tsowi. Xjats ku ja nwindson'ajtim Jesús jam wyinaty tø twingu'ixaagi ja mesi, winets ja tø'øxyøjk tpiktaajky ja aceite midi pa'akxuu'kp jam nwindson'ajtim Jesús kyubajkøjxp. ⁸ Jøts ku ja pyabøjkpitøjk jade'en ojts t'ejxti, jøts ja yjantyimy'ambøjktøø jøts ñømbinaxwa'ktøø:

—¿Jøts tigøjxp ku yø jade'en nugo wyindigøy? ⁹ Tøxik yø jeexyip yiktøøky jøts maamy-eñ jeexyip yikpøjkp, jøts ayoobi jaa'y ja jeexyip yiktabudøkidi.

¹⁰ Tyimyadoow ja nwindson'ajtim Jesús ja', jøts ja tnimaay ja pyabøjkpitøjk:

—¿Tigøjxp ku yø tø'øxyøjk jade'en jotkøjxpim xnøjmidi? Pø yø'øxi dø'on øy'ajtp ku øts yø jade'en tø xuñ. ¹¹ Jaakmibaat yø ayoobi jaa'dyi, ka'axi yø mā ñøjkxti, ejtpyim yø xmøøt'ejtkunaxtit; øtsts ka', ka' mee xumi ya nwindsonaagyunaxt. ¹² Yø' midi'ibi yø tø'øxyøjk tø ttuñ, ku øts nne'kx aceite yø tø xpiktaajkiyi midi pa'akxuu'kp, ja'agøjxp yø jade'en tø ttuñ kuts ja n'o'jkin wyingoni. ¹³ Janch øts idø'on nwa'añ, ømyadso'att pøni mā

yikajpxwa'kxy ya'at øgyajpxy ya'at ømyadya'aky midi tnigajpxp sa nitso'ok'ajtin yikpaaty, jøts yiktukmidøy ja naxwii'ñit jaa'y, yikajpxpim yikmadya'akpim yø' midi yø tø'øxyøjk yam tø ttuñ.

Ku ja Judas ñay'awajniyi jøts ja tkøyakt ja Jesús

¹⁴ Xjats nidu'ugin ja ñimakmajtskpi pabøjkpitøjk, pøn txøøw'ajtp Judas Iscariote, ja' ojts tninijkxy ja teetywindsøndøjk, jøts ja ojts tminagyajpxyi, ¹⁵ yide'en ja tnimaay:

—¿Wine'en ø xmiyu'udyit jøts øts ja nwindson'ajtim Jesús ngøyakt?

Xjats ja ojts tmijuydi ee'pxmajk, jade'en ja meñ ja ojts tmo'odi tum puxplati. ¹⁶ Jøts jaayip ja Judas ja twinmaa'ñ'ajtni juuni ja tjadyimy'ukøyakt ja nwindson'ajtim Jesús.

Ku nwindson'ajtim yjaak'uk'a'ux'ajtni møøt ja pyabøjkpitøjk

¹⁷ Xjats ku ja xøøw midukxøøw tyuujnøø, ku ka' pyaat'aty jøts ja tsapkaaky yika'aty levaduri møøt, ja'abi xøøwts idø'on ku ja nwindson'ajtim Jesús ja pyabøjkpitøjk ñimejniyi wingon jøts ja ojts tyiibyikyiyi, yide'en ja wyandøø:

—¿Ma xtsøky nyiknajxint ja paski a'ux jøts øøts ja n'a'ejxit?

¹⁸ Jøts ja tnimaay:

—Nøjkxti jam kajpopt ma chøøni ja jaa'y, tø xnijawidi pøni pøn, ja'ats mnøjmidip: “Yide'en ja windsøn wya'añ: Wingomp øts ja n'o'jkin, jøts mets mdøjkjotpy øts ja paski a'ux nyiknaxwa'añ møøt øts ja nbabøjkpitøjk.”

¹⁹ Jøts ja ojts jade'en tpadundi sa ja nwindson'ajtim Jesús ja wyinaty tø y'ane'emyidi, ojts ja tyik'øyidi ja paski kaaky jøts ja yik'a'ux'att.

²⁰ Xjats ku kyoodsiyii'ñ, winets ja nwindson'ajtim Jesús tmøøt'ixaajky nimakmajtsk ja pyabøjkpitøjk ma ja mesi jam wyinaty; ²¹ jøts ixam wyinaty tyimgyaydi ku tnimaay ja pyabøjkpitøjk:

—Janch øts idø'on nwa'añ jøts ku mee nidu'ugin amaa'tsk'ampy xkøyakwa'añ.

²² Jøts ja yjotmadyøjkidøø, jøts xem yam wyandøjkidøø:

—¿Øts me windsøn'ajtim ndejint xejp?

²³ Jøts nwindson'ajtim Jesús ja ojts yide'en y'adsøyidi:

—Pøn ø møøt tø ngay tø nji'kxy, ja'ats øts idø'on xkøyakwamp. ²⁴ Janch jajtp øts inet ixyam jade'en sam ja Dios kyajpxy wya'añ. ¡Yjanch ayøøy ja jaa'yu'nk pøn x'ukøyaj'oo'kp! Ne'egi tyimdyøøbik jeexyip ku jeexyip kyidyimgye'exy.

²⁵ Winets ja Judas ojts kyajpxy, pøn idø'on wyinaty køyakwajnip, jøts ja wya'añ:

—Windsøn, ¿ti wan ja ndejin y'øtsi?

Jøts nwindson'ajtim Jesús ja t'adsøøy:

—Paty mets.

²⁶ Ixam wyinaty kyaydi, jøts ja nwindson'ajtim Jesús tnixajiyii'ñ tu'uk ja tsapkaaky, jøts ja ttukmøja'wiyii'ñ ttukunuu'kxyja'wiyii'ñ ja Dios Teety, jøts ja ojts t'adujkpaky, winets ja tmøøy ja pyabøjkpitøjk, yide'en ja wya'añ:

—Kaydi ya'at; yø' øts idø'on ñamyayi nne'kx'ajtpy.

²⁷ Winets ja tnixajigyojmi tu'uk ja uujk'ii'ñ, jøts ja ojts ttukmøjawii'ñ ttukunuu'kxyjawi ja Dios Teety, jøts ja ojts tmøøy ja pyabøjkpitøjk, jøts ja t'ukwa'kxtit, yide'en ja tnimaay:

—Uukti ya'at niduki'iyi, ²⁸ øts idø'on yø' ñamyayi nni'jpy midi yam jadigojk tnankñamyi'øbyøjkp ja jaa'y møøt Dios, midi ø nyikwidsump nyikwidajpxy ja'agøjpx jøts pojkpitumbi jaa'y yikpojkipmaa'kxtit, jøts ja Dios Teety ja wyanda'aky jade'en tyik'adukt. ²⁹ Janch øts idø'on nwa'añ jøts ku øts ya'at uvi nøø ka' tsojk n'uk'uknit, jaanim jadigojk n'uujkindit jotkujk ku Dios Teety ja kyutujk tyiknaxkida'akt midi yjaa'y ja tyanitanaapy.

Ku Jesús ja ojts køøm tnigajpxy jøts ku Pedro ja kyu'øøniyt

³⁰ Xjats ku ja t'øøgøjxtøø ja iy midi ja Dios yja'ajpty, winets ja ñøjkxtøø jam kojpkøjpx midi yiktejp Olivos. ³¹ Jamts ja nwindson'ajtim Jesús ja ojts ñii'mxyidi:

—Kuwaní meets inet xmajtstutkøxt ya'atpi koots; pø yide'enxi jap nõkyijxpy wya'añ: “Nyik'ookp øts ja borreegi ejxpi, wan ja byorreek jadi'iñi tyø'øwya'kxy.” ³² Kuts øts ja o'jkin n'ukmimajada'akt ku øts jadigojk njujkpyøkt jøts ø nbidsø'ømt jap oo'kpi jutjøtpy, winets ø nnøjkxt jawyeen jam Galilea, namga'aním meets jam wyinaty mnijxxy.

³³ Xjats ja Pedro ja ojts y'adsøyyi:

—Øy me niduki'iyi jaa'y mjaja'dyigøøgyxyi, øts niwindem ø ngaja'dyigøy.

³⁴ Winets nwindson'ajtim Jesús ja yide'en tnimaay:

—Janch øts idø'øn nwa'añ, jøts ku yam koots inet ku ka'ap tsapni'aaw y'ayajxji'ikñim, tigøøok ojk mets wyinaty tø xku'iñ jøts ku me xka'ijxy'aty.

³⁵ Jøts ja Pedro tjaaktyimñimaay ja nwindson'ajtim:

—Nijuuni øts jade'en nga'adi'ich, njadyimyja'øøky me møøt.

Jøts ja yjadu'ukpimidi, nayide'en ja wyamidí.

Ku ja Jesús t'ajot'ajty ja Dios Teety jam Getsemaní

³⁶ Jøts idø'øn ja nwindson'ajtim Jesús tmøøtja'jty ja pyabøjkpitøjk ma ja et jam txøøwi Getsemaní, jamts ja tnimaay:

—Ya awejxti, wan øts ja Dios Teety t'ats'ajot'aty.

³⁷ Jøts ja tmøødiyii'ñ ja Pedro møøt namajtsk ja Zebedeo y'una'jk, jøts ja jotmay yjanchtatøjkiniyi. ³⁸ Xjats ja tnimaay ja pyabøjkpi midí ja y'ukwaaw nidigøøok:

—Janch køjxp øts njoojt jadi'iñi, o'jkin'ampy ø tø njotmaadyøki. Awejxtits ya, kidim mma'oo'knidi, møøtwijy'ejtik øts.

³⁹ Winets ja nwindson'ajtim Jesús jawaani yjaaknajtsyø'øyyii'ñ, jøts ja ojts jadi'iñi ñagyuxendya'agiyi, jøts ja ojts t'ajot'aty ja Dios Teety, yide'en ja wyaañ:

—Dios Teety, øyik jade'en xjanchkayikjatt, jøts øts kidi jadine'en ayo'on ndyimbyaaty; øy idø'øn kidyimyjade'eni sam ø ndyimyjatsøkyin, jade'en øts idø'øn ngupøkt pøni sa me xamidsøky.

⁴⁰ Xjats ja wyimbijty nay jam ma ja pyabøjkpi jam wyinaty nidigøøok tø t'ukyiktañ, kuts ja tpaajty tødamik ja mya'oo'knidi; winets ja ojts tnøjmi ja Pedro:

—¿Niwine'enin mee tø mguidyimyjada'aky jøts meets jeexyip xmøøtwijy'ity? ⁴¹ Wejti kajti, ajot'ajtti ja Dios Teety, nay'ejx'etidi jøts kidi mmimajada'agidi ja ayo'on midí wingomp. Janch øts idø'øn nwa'añ ku ja winmaa'ñ yjanchja'ødyunwa'añ, ja ne'kxts jaayi ja ka'øybi tumbi amutsk'ejxiyip.

⁴² Xjats ojts ñøjkxkojmi nay jam jadigojk, winets ojts yide'en t'ajot'aty ja Dios Teety:

—Dios Teety, pøni ka'ap jade'en xyikjaty jøts øts ja ayo'on xkadukpaatt, wants idø'øn jade'en tjaty pøni sa me kø'øm xamidsøky.

⁴³ Xjats jam yjaakwimbijty jøts ja pyabøjkpitøjk jadigojk tpatkojmaa, janchmaadip ja jam, wimbeets ja tsuu ja yik'ejtniyidi. ⁴⁴ Jøts ja nay jam tnikejky, jøts midigøøok ojk ñijxxy Dios Teety ajot'ajtpi, nayide'en wyangojmaa. ⁴⁵ Winetnimts ojts ñijxxy ma ja pyabøjkpitøjk jam wyinaty, jøts ja tnimaay:

—Tøts inet, maanidi poo'kxnidi, wan jade'en tjaty. Tø dø'øn tyimbyaaty jøts ku ø nyikøyakt jøts ø nyiktagidøkit ja pojkpitumbi jaa'dyi. ⁴⁶ Pidø'økti, wan tjaa'myindi; ixa wyingøñ pøn ø xkøyakwamp.

Ku ja Jesús yikmajch

⁴⁷ Nay ixamnim ja nwindson'ajtim Jesús wyinaty jade'en wya'añ ku yja'jty ja Judas, pøn ja y'ukpabøjkpi'ajtpy jøts ja møøt tyika'pxy nimakmajtsk ja pyabøjkpitøjk, ja'ats idø'øn jam tmøøtmeen ja mayjaa'y tum tsujx møøt jøts tum kipkyapidi. Ja teetywindsøndøjk, ja israelit møjaa'dyøjk, ja' dø'øn ja kajxidip. ⁴⁸ Jøts ja Judas, pøn ja nwindson'ajtim tkøyajkp, yide'en ja wyinaty ja tiy'ajtin tø tyaky, yide'en ja wyinaty tø wya'añ:

—Pøni pøn øts inet ndsu'kxpy, ja' idø'øn ja wyinaty; jøts ja' idø'øn mmatstip.

⁴⁹ Xjats ja myiñ jøts ja nwindson'ajtim Jesús yikniñi, yide'en ja tnimaay:

—jØts windsøn memþ!

JØts ja ojts ttsu'kxy. ⁵⁰ JØts ja nwindson'ajtim Jesús ja ojts yide'en y'adsøyiyi:

—¿Ti migu'uk mnimimpy? ¿Ti mdsøjkpy?

Winets ja jaa'y ja wingon ñimejniyøø jØts yiknixajiyii'ñ ja nwindson'ajtim Jesús, ojts yikmajtsni.

⁵¹ Winets tu'uk ja nwindson'ajtim Jesús myigu'uk tju'jty tu'uk ja tsujx, jØts ja ojts ttaxikpo'otu'uty tu'uk ja teetywindsøn tyumbi. ⁵² Winets ja nwindson'ajtim Jesús ja tnimaay:

—Øødyuñ yø mdsujx nay jap xtyimbyikta'akt ma yø tø xjuuty. Pøni pøn ttatseptump ja tsujx, nay ja'ats ja tya'ookp. ⁵³ ¿Ka' xnijawi jØts ku øts jotmøñ n'amido'ot ja Dios Teety, jØts øts ja xanigaxt ixamyi naxy nimakmajtsk piky ja ankilistøjk midi tseptundip? ⁵⁴ Kuts ja jade'en yjatt, ¿ti jats jade'en y'adukt ja Dios kyajpxy? Pø yide'enxi ja wya'añ jØts ku tyimyjade'en yjatt sa dø'on yam yjatwa'añin.

⁵⁵ Xjats ja nwindson'ajtim Jesús tnimaay ja mayjaa'y:

—ja tsujx, ja kipy, ja tsaa meets yam x'uktanimenip, tø øts yjawi nmaa'tsni! Ejtp meets jam y'ijty jabom jabom nmøøt'ixakunaxy, jØts mee nyik'ixpiky jam tsaptøjkjotp, ¿tikuts øts jamyi xkamajtstøø? ⁵⁶ Ja'agøjxp ya'at jade'en yjaty jØts ka'pxy pyidsø'ømt sa jaty ja Dios kyugajpxy wyandøø, ku ja tnigajpxidi ja Dios kyajpxy.

Winets ja nwindson'ajtim Jesús pyabøjkpitøjk ojts kyaakøxti jØts ja nadyu'uk y'ukyikmajtstutnaa.

Ku ja Jesús yikwaanijkxy jam kutujktaajkjotp

⁵⁷ JØts ja jaa'dyi pøn ja majtsiyi, jam ja tyiknøjkxti Caifás wyindum, ja teetywindsøndøjk myøjwindsøndi ma wyinaty tø ñamyukyidi ja kajpxwejpitøjkti møøt ja møjaa'dyøjkti. ⁵⁸ JØts ja Pedro ja ojts pyanijkxyi, jagam ja pyayø'øyi jØts ja ojts tpaja'aty jap møj windsøn tyøk'agui'py, jØts ja jap tyøjkiyii'ñ jØts ja tmøøt'ixaajky ja ejx'ejtpitøjkti, jØts ja t'ejxwa'añ sa dø'on ja yjade'embi yjadyimy'ukugøxit.

⁵⁹ JØts ja teetywindsøndøjkti, jØts ja møjaa'dyøjkti, jØts niduki'iyi ja kutujk adsinaabyidi, ja' ja yjadyimy'ixaadyip ti ja yjadyimy'uktani'øønidip ja nwindson'ajtim Jesús, øy ja yjagajade'eni jØts ja ttaguwaniwya'andi ja o'jkin. ⁶⁰ Ja'ats kyapattip sudso tyiidyøkit, may ja jaa'y yjamendøø, jØts ja tjadyimñi'øø'ndaagidi ja nwindson'ajtim. Xjats yja'tinim namajtsk ja ni'øø'ndaajkibidi midi ñadyijyi tsaach'a'ejxnaxtip, ⁶¹ jØts ja yide'en wyandøø:

—Yø jaa'y yide'en waan: “Ixe øts yø Dios chaptøjk nyikiday, jØts øts yø kyidigøøk xøøw nyik'øyigyojmit.”

⁶² Winets ja teetywindsøndøjk myøjwindsøn wya'kukiyii'ñ, jØts ja nwindson'ajtim Jesús yik'amidøøy:

—¿Niwine'enin yø xka'adsowimbetwa'añ? ¿Ti dø'on yø' ixa jade'en myiktani'øøni?

⁶³ JØts ja Jesús ka'ap ja ojts t'adsøy. Xjats ja wyindsøn ojts ñii'mxyi:

—Tuk'ejx Dios, jØts xnigajpxt tiy janch. Tukmadook øøts pøni mets idø'on mjanchCristo pøn ja Dios Teety y'u'nk'ajtpy.

⁶⁴ JØts ja nwindson'ajtim Jesús ja tnimaay:

—Øts ja', sam ixa tø mwa'añin. JØts nayi ndukmadooðip ixyam jØts ku ø x'ejxtit ku n'ixa'akt jam Dios Teety kyutujktaajk jøp'am.

⁶⁵ Winets ja teetywindsøndøjk myøjwindsøn ttakø'jtsiyii'ñ ja wyet, jØts ja wyaañ:

—Tø ya'at jaa'y tmigajpxigøy ja Dios; ¿ti ejxpi ti nija'wibi jaaktsojkiyip? Tøxi xmadojidi ja y'ayuujk jØts ku kya'øgyajpxy; ⁶⁶ ¿sa mee m'ukwa'añ?

Xjats ja wyandøø:

—Taja'jtíp pøky yø', wan t'øøky.

⁶⁷ Winets ja ojts twingutsujidi, jØts twojptøø jØts ttsee'ktøø, pømbi ja kojxiyip wemp'am,

⁶⁸ jØts ja yiknøjmi:

—Pø metsxi mCristo, juknajtsjawits pøn tø mgøxyi!

Ku ja Pedro tku'ññ jøts ku ja ka' t'ijxy'aty ja Jesús

⁶⁹ Ìxap idø'øn ja Pedro chøøni tøjkwimpy, jøts ja tu'uk tø'øxyøjk ñimejni midi jam tump, jøts ja ojts ñii'mxyiyi:

—¿Kidi metsip y'ijty mmøøtwidijtpy yø Jesús midi Galileit etjotp tsoo'mp?

⁷⁰ Ka'ats ja Pedro ja tkupiky ma ja mayjaa'y jam wyinaty, yide'en ja wyaañ:

—Ka' nnijawi pø ti mets jade'en mgajpxpy.

⁷¹ Ìxap ja Pedro wyinaty pyidsømwani ma ja tøjkaaw, ku ja ojts jadu'uk ja tø'øxyøjk y'ijxyi, jøts ja ojts ttukmadø y pøn jam wyinaty:

—Yø jaa'yxi tmøøtwidejtp yø Jesús pøn Nazaret kugajpip.

⁷² Jøts ja Pedro jadigojk tkagupøjkojmi, yide'en ja tyimwyaañ:

—Ka' øts yø jaa'y n'ijxyi.

⁷³ Xjats ku jawaani y'ijty, jøts ja Pedro ja jaa'y ñimejnøø pøn jaty jam wyinaty, jøts ja ojts ñii'mxyiyi:

—Janch nayide'endam mets, nayi Jesús tam me mjanchmigu'uk'ajtpy, kø'ømts yø m'aaw m'ayujuk myiknigaxi'igy.

⁷⁴ Jøts ja Pedro janch wenk ja kø'øm ñawya'añi ñadyiyi, ka'ap ja tyimgyupiky, tyuk'eix ja Dios ja', tiy janch ja tyimwya'añ ku ja tka'ijxyi:

—Nguidyimy'ijxy'ajtpy øts yø jaa'y.

Winets ojts nay jaty y'aya'axy tu'uk tsapni'aaw. ⁷⁵ Xjats ja Pedro ja tja'myejchnim ku ja nwindson'ajtim Jesús ja wyinaty tø ñii'mxyiyi: “Yam ja tsapni'aaw kya'aya'axñim, tø mets wyinaty tigøøk ojk mwani jøts ku me xka'ijxy'aty.” Jøts ja Pedro jam pyidsiimy, jøts ja nugo y'uk'amyaxni y'uktsaachyaaxni.

27

Ku ja Jesús yiktagidøjkiy'ñ ja Pilato

¹ Xjats ku yjopy'ajty, jøts ja teetywindsøndøjk møøt ja israelit møjaa'dyøjkti ojts ja tkajpxy'atti, jøts ja tu'ugyi tniwinmaa'yidøø jøts ja tyik'ooktit ja nwindson'ajtim Jesús.

² Xjats ja køwiñ tyiknøjkxti jøts ja yiktagidøjkiy'ñ ja Poncio Pilato, pøn jam wyinaty windsøn'ajtp.

Ku ja Judas y'ø'jky

³ Jøts ku ja Judas ojts t'ixy, pøn tkøyajkp ja nwindson'ajtim, jøts ku ja nwindson'ajtim Jesús tø yiktaguwaañ'niñi ja o'jkin, ja'ats ja ojts jadigojk tsaachkuwinmayi jøts ja tyikwimbijty ja meen ee'pxmajk tum plati, jade'en ja tkømøø y jadigojk ja teetywindsøndøjk jøts ja israelit møjaa'dyøjkti, ⁴ yide'en ja tnimaay:

—Tø njantymdyundigø y, møk ø tø njantymdyundigø y ku øts yø tø ngø yaky jøts yø y'ookt, jøts niti tundigø'øyin yø tkamøøt'aty.

Jøts ja ojts yide'en yik'adsø y:

—Jøts, ¿ti øøts ja ndungi? ¡Mgø'ømwinmaa'ñxi mets yø'!

⁵ Winets ja Judas tnajtswøjjiy'ñ ja meen jap tsaptøjkjotpy, jøts ja chøø'ñ jøts ja ñijkxy nayuktsuujmibi.

⁶ Jøts ja teetywindsøndøjk tkonjø'ktøø ja meen jøts ja wyandøø:

—Ka'ap yø kyutujkyi jøts yø meen jap ngugo'ona'andit jap limunsi abøjk'ññjotpy, kumi jaa'y chow yø'.

⁷ Jøts ja nay jaty tkajpxy'ajttøø, tyiktunkpaatwa'andi ja meen jøts ja ttaju'udyit naajx jøts y'ø yit jadu'uk kami santi ma ñaxøkidit ja jaa'y pøn tso'ondip abikyajp. Campo del Alfarero, ja' ja naajx xyøøw. ⁸ Ja'agøjxpts ixymbaat ja naajx yiktijy Ni'jpkyam.

⁹ Jade'ents ja Jeremías ja y'ayujuk tyiy ku ja Dios ja wyinaty yide'en jekyip yikwa'añiyi: “Jøts ja tñaxjidøø ja meen ee'pxmajk tum plati (ja' ñimeen midi ja Israelit jaa'y ja

wyinaty tɔ pyiktaajkxiyi), ¹⁰ jɔts ja ttajuudyøø ja naajx, jade'ents øts ja Dios Teety xnimaay.”

Ku ja Jesús twinguwa'jkiyü'ñ ja Pilato

¹¹ Jɔts idø'øn ja nwindson'ajtim Jesús ja jaa'y yiknøjkxiyi jam øyikutujkpi wyingujkp, jɔts ja yide'en tyiibyøjkxiyi:

—¿Mets idø'øn israelit jaa'y mjanchniwindsøn'ajtpy?

Jɔts ja nwindson'ajtim Jesús yide'en tnimaay:

—Janch jade'en idø'øn ja', sam ixa tɔ mwä'añin.

¹² Jɔts ku ja teetywindsøndøjk kyajpxjð'ktøø møøt ja møjaa'dyøjkti, jantyimy'øø'ndip idø'øn ja', jɔts ja nwindson'ajtim Jesús ja tkidyimy'adsøy. ¹³ Winets ja Pilato ja ñimaajyøø:

—¿Ka'ap yø xmadøy sä jaty ixa myikni'øøni?

¹⁴ Jɔts ja nwindson'ajtim Jesús ka'ap y'adsøy; ja'ats ja yikutujkpi ñigyumaap yja'wiyü'ñ jɔts ka'ap ja y'uktaabyatni.

Ku ja Jesús ñidujkiyü'ñ jɔts ja y'oookt

¹⁵ Jade'ents idø'øn ja yikutujkpi txumikostrumbri'aty ku xøøw tyuñi, jɔts ja tu'uk tyik'awa'atspidsimy ja tsumyjaa'y, ja mayjaa'y ja kø'øm twi'ejxtip, pøni pøn ja chojktip ja'ats ja yik'awa'atspidsømdip. ¹⁶ Jamts idø'øn tu'uk ja tsumyjaa'y wyinaty, Barrabás ja xyøøw. Tyimyjanijawi ja' ku ja møj tundigøøbyi; ¹⁷ jɔts ku ja jaa'y ñamyujkøjxidøø, winets ja Pilato yiktiiy:

—¿Pømbi mdsøjktip jɔts ø nyik'awa'atspidsø'ømt: yø Barrabás, uk yø Jesús, midi yiktejp Cristo?

¹⁸ Tøts ja wyinaty tñijawi ja yikutujkpi jɔts ku ja ja'agøjxp tkøyakti ku ja nawyinaxi tjawidi.

¹⁹ Ixam ja Pilato wyinaty chøøni kyutujktaajkjotp, ku ja ñidø'øxy ñimaajyøø: “Ti yø øyjaa'y tɔ xanibøjkiñi; majtstu'ut, janch wenk ø ngumaay tsu'uuy yø'øgøjxp.”

²⁰ Jɔts ja teetywindsøndøjkti møøt ja møjaa'dyøjkti ojts ja ttukmibøkti ja mayjaa'y jɔts ja t'amido'odit jɔts wan t'awa'atspidsimy ja Barrabás, jɔts y'oookt ja nwindson'ajtim Jesús.

²¹ Xjats ja yikutujkpi ja jadigojk ñimaajyidøø, jɔts ja ojts tyiktiiy:

—¿Pømbi mee ndsøjkpy jɔts ø nyik'awa'atspidsø'ømt?

Jɔts ja mayjaa'y ñømdøø:

—Wan yø Barrabás t'awa'atspidsimy.

²² Jɔts ja Pilato tjaaktyiktiiy:

—¿Jɔts sä øts yø ndu'unt yø Jesús midi yiktejp Cristo?

Jɔts ja ojts niduki'iyi y'adsowdi:

—¡Yikruspat!

²³ Winets ja Pilato ja ñimaajyidøø:

—¿Ti tundigø'øyin yø tɔ ttuñ?

Jɔts ja jadigojk jawaani møk wyandøø:

—¡Yikruspat!

²⁴ Xjats ku ja Pilato ojts t'ixy jɔts ku nisudso'ampy kya'øyi, ne'egi jinaxy ja jaa'y tseeni mo'tsni y'adøtsnidi, winets ja nøø ja ojts t'atsnanky'iyi, jɔts ja kyøbuuy jam mayjaa'y wyingujkp, yide'en ja wyaañ:

—Kidi øtsip wamp jɔts yø y'oookt, ka' øts yø nbøky'ixy. Meets yø mnija'wip pøni sä yø xunwa'andi.

²⁵ Xjats ja jaa'y niduki'iyi y'adsoodøø:

—¡Niduki'iyi øøts yø xpaat'aty ja y'o'jkin, nayide'en ja møj ja mutsk, u'nk una'jk, pøn yø kapaadip!

²⁶ Xjats ja Pilato tyik'awa'atspidsimy ja Barrabás; jɔts ja ojts tñ'ane'emy jɔts ja nwindson'ajtim Jesús yikwopt, jɔts ja ojts tkøyaky jɔts wan tyikruspatti.

²⁷ Jøts nay ja' ja syoldadi tyiknøjkxtøø ja nwindson'ajtim Jesús jam kutujktaajk agø'øm, jøts ja jam ojts twaamujkøxti niduki'yiyi ja soldadi, jøts ja ojts tnabejkidi ja nwindson'ajtim Jesús. ²⁸ Jøts ja wyet ja ojts tjajniidi, jøts ja tsajpts wet ja ttanijandøø, ²⁹ jøts koroni ja ojts ttagujandi tum kujp awiity ja', jøts ja kipy ja ttagøkajpidøø y'aga'ngyøjø'øm. Winets ja twinguxanaadyøø jøts ja ojts tjanchaxe'ekti, yide'en ja tnøjmidi:

—¡Dios kunuu'kxip ya'at israelit jaa'y wyindsøn!

³⁰ Jøts ja tnitsujidi, jøts ja jamyi tnixajidi ja kipy jøts ja ttaguwojppjø'økti. ³¹ Xjats ku ja jade'en t'uktaguyajtøø, t'uknixektøø t'uktaxe'ektøø, winets ja ttanijanduttøø ja tsajpts wet jøts tpiktaajkidi jadigojk ja kyø'øm wet. Jøts ja tyiknøjkxti jøts ja kyiruspatt.

Ku ja Jesús kyiruspejty

³² Tyimy'ixam wyinaty tø choondi ku ojts tpaatti tu'uk jaa'y pøn kugajp'ajtp Cirene, Simón'ajtp ja'; ja'ats ja ojts ttaguwanidi jøts ja ttsøjmit ja nwindson'ajtim Jesús kyirus.

³³ Jøts idø'øn ja jade'en yja'ttøø mā ja et txøøwi Gólgota, midi yide'en ayuujk pidsøømp: Oo'kp; Kyubajk Pajk. ³⁴ Jamts ja tmøødyi ja vino adaamuky møøt ja ujts ta'am nøø; kuts ja tja'gyajpy xjats ja nika'ap t'uujky.

³⁵ Kuts ja wyinaty tø tyikruspajtnidi, winets ja soldadi tniguyajtidøø ja nwindson'ajtim Jesús wyet, jøts ja ojts twejtswa'kxti. Jade'ents ja Dios kyugajpxy tyimdyiy ja y'ayuujk ku ja wyaañ: “Tø øts nwet ja xwejtswa'kxidi, tø ja tniguyatti jøts ja t'ejxti pøn uktaja'atip.”

³⁶ Winets ja jamyi y'ixaktøø jøts ja t'ejx'etwa'andi. ³⁷ Jøts ja jam y'agubajkp ojts tkøxjajyidi ja letri midi wamp jøts ti tyuku'o'jkidip. Yide'en ja wya'añ: “Ya'at idø'øn txøøw'ajtp Jesús, israelit jaa'y wyindsøndi.”

³⁸ Namajtsk møj maa'tspi ja ojts tmøøtkruspety, tu'uk y'aga'ngyøjø'øm jøts tu'uk y'anajkyøjø'øm. ³⁹ Jøts ku jam pøn ñaxy tum wenk ja myigajpxyi, tum kubajkwibejttip ja', ⁴⁰ jøts ja wya'andi:

—Metsxi xijy tsaptøjk myikidaapy jøts jadigojk xyik'øyi kyidigøøkxøøwyi, wants mga'uk'øøky. Pøni mjanchDiosu'nk tam mets, winak jam kruskøjxp.

⁴¹ Nayide'en ja tyaxe'jkmiiyi ja teetywindsøndøjkti ja kajpxwejpitøjkti, ja fariseotøjkti, jøts ja møjaa'dyøjkti, yide'en ja agø'ømyi ñawya'añidi:

⁴² —Tø wyenkpi tyiktsø'øky, ka'ats tjaty jøts kø'øm ñankcho'ogit. Pøni janchts ku ja Israelit jaa'y tjanchwindsønidi, wan jam t'ukwinaky kruskøjxp, jaanimts idø'øn njanchja'want. ⁴³ Pø Diosxi y'ajoojtjip; wants inet idø'øn t'ukpidøkiyi jøts kyayik'oogit, pøni janch ku ja yjanchøkyi; tøxi yø kø'øm wya'añ jøts ku yø Dios U'ngi.

⁴⁴ Ja maa'tspibaat ja nayide'en yjanchka'uk'ømyigajpxmiiyi midi ja jam wyinaty møøt tø kyiruspety.

Ku ja Jesús y'ø'jky

⁴⁵ Winets ja et kyoodsiyi'ñ kujkxyøøw, jøts møj winakxyøøwnim yjajtaajky jadigojk.

⁴⁶ Jøts nay jatyi ja nwindson'ajtim Jesús møk wya'añ:

—Elí, Elí, ¿lama sabactani? —midi yide'en tyijpy: Dios Teety, Dios Teety, ¿tigøjxp ku øts jade'en tø xnanktyuñi?

⁴⁷ Ojts ja winaagin tmadowdi pøn jatyi jam wyinaty, jøts ja ñømdøø:

—Ja Elías yø jaa'y wyaadsøøpy, ja Dios kyugajpxy.

⁴⁸ Winets ja jatyi nidu'uk putyi t'atskøøñ tu'uk ja tanøxe'jts, jøts ja ojts ttabadijy ja vino ta'am, winets ja kipy jøp'am tkøxkøøñ, jøts ja ojts tta'agonji'iky jøts ja txeetst. ⁴⁹ Yide'ents abiky wyamidøø:

—Majtstu'ut; wan t'uk'ijxyim pøni janch nimejnip inet ja Elías jøts ja o'jkin kyadukpaadit.

⁵⁰ Jøts ja nwindson'ajtim Jesús jadigojk ojts møk ja y'ayuujk pyidsimy, jøtsnim ja y'o'jky.

⁵¹ Winets ja møj tsaptøjk awejtstuk nay jatyi tyakø'øtsiyi'ñ, kubajkp ja kyø'øts'awiyi'ñ jøts ja ok'am kyø'øtskidaajky. Jøts ja uxx ñajxy jøts ja tsaa kyu'kx'awigyijxy, ⁵² ojts

ja oo'kpi nipots may y'awa'ach; jujukpyøjktibaat ja oo'kpidi pøn wyinaty ja Dios tø tjanchjawidi ku ja yjuky'ajttøø. ⁵³ Jøts ja pyidsømdi jap yjutjøtpy ku ja nwindson'ajtim Jesús wyinaty tø yjukpyiky jadigojk, jøts ja kyajptøjkidøø jam Jerusalén midi ja Dios kyunuu'kxkyajp'ajtpy, mā mayjaa'y ja ojts y'ijxyidi.

⁵⁴ Xjats ku dø'øn ja capitán pøn jaty ja jam wyinaty møøt t'ejx'ity ja nwindson'ajtim Jesús, ku ja ojts t'ejxti jøts ku ja uyx ñaxy jøts tuki'iyi sã jaty ojts yjaty, jøts ja yjadyim-chø'jkidøø, yide'en ja wyandøø:

—Janch ja' tam yø jaa'y tø y'ity, ja Dios U'nk.

⁵⁵ Jøts ja maadyø'øxyøjk jam wyinaty a'ejxujktip jagam, tum ja' pøn jam wyinaty Galilea tø tpadsoondi ja nwindson'ajtim Jesús, jøts pøn jaty ja wyinaty tø pyudøkiyi. ⁵⁶ Ja María Magdalena dø'øn jam, jøts jadu'uk ja María pøn ja Jacobo tyaagip møøt ja José, jøts ja Zebedeo ñidø'øxy.

Ku ja Jesús ja ñine'kx yikpiktaajky jap oo'kpi tsaa jutjøtpy

⁵⁷ Xjats ku ja et yjoo'xni jøts kyoodsiwyani, winets myiñ tu'uk kumeeñ jaa'y pøn txøøw'ajtp José, jam ja kyugajpi Arimatea, jøts nayi tø dø'øn ja wyinaty tpadøjki ja nwindson'ajtim Jesús yja'. ⁵⁸ Ja'ats ojts t'ats'ixy ja Pilato jøts ja t'amidøøy ja nwindson'ajtim Jesús ñine'kx. Jøts ja Pilato ja ojts tyikutuky jøts wan tyikømø'øy.

⁵⁹ Winets ja José ja t'axajøø, jøts ja wa'ats wet ja tta'abijty, ⁶⁰ jøts ja t'atspiktaajky jam oo'kpi jutjøtpy midi ja wyinaty tø tyimyikjemy'øyinim. Kø'øm jap y'uktøkiwya'añ mā ja tsaa jut jam. Xjats ku ja møj tsaa ja tu'uk t'ukta'agiiñaa mā ja yiknidøki, jøts ja ojts ñøjkxni.

⁶¹ Nay ixam idø'øn ja wyinatymidi ja María Magdalena møøt jadu'uk ja María, jam ja wyinaty chøønidi jam oo'kpi jut agø'øm.

Ja soldaditøjk pøn jam y'ejx'ejttip ja oo'kpi jut

⁶² Xjats ku kyimjabom'ajty ku wyinaty tuki'iyi tø yik'a'ejxigyøxni, tum abaadi y'ejtni ti jaty tsojkip ku poo'kxin xøøw, winets ja teetywindsøndøjk møøt ja fariseotøjk ojts t'ats'ejxti ja Pilato, ⁶³ jøts ja t'atsnimaadyi:

—Windsøn, ja' øøts yam tø nja'myech ku yide'en wyaañ ja windaay'ajtpi jaa'y, ku ja wyinaty jaak ja yjuk'aty, ku ja tijy kyidigøøk xøøw yjukpyøkt jadigojk, jade'en pyidsø'ømt jadigojk jap oo'kpi jutjøtpy. ⁶⁴ Paty jade'en tigøøk xøøw xjadyimñanky'ejx'etit ja oo'kpi jut, jøts ja pyabøjkpitøjk kidi myendi koots jøts ja kidi tmaatsti ja oo'kpi ñine'kx ku ja tnøjmidit ja jaa'y: “Tø ja tmimajada'aky ja o'jkin, tø ja yjukpyiky jadigojk.” Kuts jade'en tyaay'attit, yø'øts ne'egi janchka'ukmaañip, ne'egi ka'ap ja jawyeembi taay.

⁶⁵ Winets ja Pilato ja ñimaajyidøø:

—Ixyadi yø mdsoldadi ka'pxy niwine'enin yø y'ejx'etti. Nøjxiti meets jøts yikxon xyik'adujkøxtit mābaat meets jam kø'øm x'ixy.

⁶⁶ Winets ja ñøjxxtøø jøts ja ojts yikxon tyik'adujkøxti ja oo'kpi jut, ojts ja t'axotsti ja tsaa midi tya'agidyip jøts ja t'adsaadyøø, ojts ja seeyi tpikta'akti jøts ja jam tyiktandøø ja soldaditøjk pøn jam ejx'ejttip.

28

Ku ja Jesús yjukpyiky jadigojk

¹ Xjats ku wyinaty tø ñaxy ja poo'kxin xøøw, jøts wyinaty kyujajta'aky kyudøø'kxa'aky myidukxøøw ja yjadu'ukpi samaan, winets ja María Magdalena møøt jadu'uk ja María tninøjxiti ja oo'kpi jut jøts ja t'ats'ejxwa'andi. ² Jøts jotmøñ myiñ ja uyx janch møk, ja nwindson'ajtimdamik ja y'ankilis jam wyinaty kidakp tsajpwemp, jøts ku ja ojts yja'aty mā ja oo'kpi jut jam, jøts ja tjigiyy ja tsaa midi ja tø yikta'agi'iy, jøts ja tta'ixakpejty.

³ Jade'en ja yjajy tyii'kxy sam widsukin, jøts ja wyet jade'en pyoobi sam tsap'øø'pkyin.

⁴ Xjats ku ja soldadi jade'en t'ejxtøø, jøts tsø'øgi ja yjanchyikmibejpnnyidi, jøts jade'en tyandøø sam ja jaa'y øøgyindi. ⁵ Winets ja ankilis tnimaay ja tø'øxyøjkti:

—Kidi mdsø'ogidi. Nnija'wip øts jøts ku ja nwindson'ajtim Jesús x'ixa'adi pøn kruskøjxp o'jk. ⁶ Ka'ap ja ya ukpøni, tø ja yjujkpyiky, tø ja tmimajada'aky ja o'jkin, tø ja jade'en jyaty sam ja ojts kø'øm tñigajpxyìn. Men x'ejxti ma ojts yikpikta'aky. ⁷ Tsojk nøjkxti, jøts x'atstukmado'odit ja pyabøjkpitøjk jøts ku ja tø yjujkpyiky jadigojk, jøts ku ja jawyeen ñøjkxt jam Galilea jøtsnim mee mnøjkxt; jamts ja x'ejxtit. Yø'øyi dø'øn ja ndukmadoowandip.

⁸ Xjats ja tø'øxyøjk jam putyi cho'ondøø ma ja oo'kpi jut jam, jade'en ja chø'ogidi jøts jade'en ja yjanchxonda'akti; jøts ja ojts tsojk tyiknøjkxti ja kajpxy ja ayuujk ma ja nwindson'ajtim Jesús pyabøjkpitøjk jam. ⁹ Exam ja wyinaty jade'en ñaxti ku ja nwindson'ajtim Jesús wya'kaxi'jky jøts ja ojts kyajpxpøø'kxyidi. Winets ja wingon twingunøjkxidøø jøts ja twinguxanaay'øyi, nagyumajtsidi ja' tyekyøjxp, ¹⁰ jøts ja yide'en ñimaajyidi:

—Kidi mdsø'ogidi. Nøjkx øts ja nmigu'uktøjk x'atstukmadojidi pøn jaty ø nbabøjkpi'ajtip jøts ñøjkxtit jam Galilea, jam øts ja xpaattit x'ejxtit.

Ku ja soldadi t'atstukmadowdi ja teetywindsøndøjk sa ja jut y'awajch

¹¹ Examnim ja tø'øxyøjk wyinaty yø'ødyi, jøts ja soldadi winaagin ñøjkxtøø jam kajpjotp pøn ejx'ejttip, jøts ja t'atstukmadoodøø ja teetywindsøndøjk ti jaty wyinaty tø tyuñi. ¹² Winets ja teetywindsøndøjk ojts tninøjkxti ja møjaa'dyøjk jøts ja tkajpxy'ajtti kyijpxy kyajpxy; ojts yikxon ja maamyeeñ tmo'odi ja soldaditøjk, ¹³ jøts ja tnimaadyøø:

—Jade'en mee mwa'ant jøts ku koots, ixap mee wyinaty mma'ay, ku ja Jesús pyabøjkpitøjk ojts yja'atti jøts ja ojts t'atsmaatsti ja oo'kpi ñine'kx. ¹⁴ Jøts øy ja windson ja wyinaty tjanijawi, øøts ja møøt nnagyajpxit jøts ja ka' sa wya'ant, jøts mee ka' ti pøky mdaja'adit.

¹⁵ Xjats ja soldaditøjk t'axajidøø ja meen, jøts ja ojts jade'en tpadundi sa jaty ja wyinaty tø yik'ana'amdi. Jøts jade'en ixyambaat tnimadya'akti ja israelit jaa'dyi.

Ku ja Jesús ttaguwa'anÿi'ñ ja tunk ja pyabøjkpitøjk

¹⁶ Jøts jade'en ñøjkxtøø ja ñimaktu'ukpi jaa'dyi jam Galilea, ja nwindson'ajtim pyabøjkpitøjk. Ja'ttøø ja jam kojpkøjxp midi ja wyinaty tø tyukmadøyi. ¹⁷ Jøts ku ja t'ejxpattøø ja nwindson'ajtim Jesús, jøts ojts ja ñagyuxendya'agyidi, øy ja jam winaagindi kø'øm pøn ja tkamibøjktip. ¹⁸ Winets ja nwindson'ajtim Jesús wingon wyingunøjkxiyidi jøts ja ñimaajyidi yide'en:

—Tø øts møk'ajtin nyikmøøy jøts øts ja nyiktu'unt wan tsajpjøtpyi jøts wan tñaxwiiñi. ¹⁹ Ninøjkxtits ja jaa'y øy manaajx øy magajp jøts ø xukpabøjkpi'attit; myiknøbattipts ja' Dios Teety køjxp, Dios y'U'nk køjxp, jøts Dios y'Espíritu Santo køjxp, ²⁰ jøts yik'ixpøkti jøts tpadu'undit tuki'iyi ti jaty mee tø ndani'ane'emy. Jøts nimadowdi jøts ku meets ejtp nmøøt'ity øy juuni xøøw, kunim ø nme'ent jadigojk. Jade'en idø'øn ja y'ejxi.

JA ØGYAJPXY JA ØMYADYA'AKY MIDI JA MARCOS YJAAÿ

Ku Juan Bautista kya'amaay abak etjotp

¹ Yide'en yiknimadyak'okwaañ ja øgyajpxy ja ømyadya'aky midi ja nwindson'ajtim Jesucristo yja'ajtpy, ja Dios U'nk. ² Yide'en ja y'ejxi tyiyi tø dø'øn ja Dios wyinaty kø'øm tnimaañi ja kyugajpxy Isaías, jøts ja yide'en tjaadya'ant ja ayuujk ku ja Dios Teety ja y'u'nk yide'en tnimaay:

Ngajxjawyeenip øts, u'nk, ngugajpxy tu'uk pøn nøjxpx jawyeen kugajpxy'ajtpi, ja'ats ja naxwii'ñit jaa'y tnøjmip, jøts wan ja tyiktøwdi tyiktuuda'akti ja wyinmaa'ñ, jøts mets ja m'ixpøjkin jade'en yikupøkt.

³ Pø patyxi ja kugajpxy ñijkxy jawyeen abak etjotp jøts myigu'uk ja tnøjmit møk'ampy: "Awejxidi Dios y'ixpøjkin, yiktøwdi yiktuuda'akti mwinmaa'ñ yikxon."

⁴ Ja Juandam idø'øn jam jade'en memp abak etjotp jøts jaa'y ja tyiknøbety, yide'en ja wya'añ jøts ku ja jaa'y tuki'iyi tja'dyigøøgyøxti ja kya'øyjaa'y'ajtin jøts wan tnøbajtkøxti, kuts idø'øn ja jade'en ttu'undit winets ja yikpojkipimaa'kxtit. ⁵ Mayjaa'y idø'øn ja jam nimejniyip jøts ja pyatmadøyi, mendip ja jaa'y jam pøn tsinaadyip Jude'it etjotp, jøts nayide'en pøn kugajp'ajtmidip Jerusalén; jade'en Juan ja mayjaa'y jam ñimiñiyi møj nøøjotp midi txøøw'ajtp Jordán, jøts ja jam ñøbatti ku pyøky ja tkajpxnaxkøxti.

⁶ Kameeyi pøjk wyet'ajtpy idø'øn ja Juan wyinaty, jøts po'ak ja tsum'aty; ja' ja tø ñadyatsumyi jøts møj mu' ja jam tnidsøøni møøt ja jiyujk pa'ak, ja' ja jam yji'kxpy. ⁷ Yide'en idø'øn kya'amay mayjaa'y agujkp:

—Ja øts ja jaa'y tu'uk ix'oojk xpamiñ pøn møkta'aky yikutukp ja'agøjpx ku kutujk ja tmimiñ møk'ampy, ka'ap øts ja nmi'abaaty jade'en sa yikutuky, nijuuni øts ja møøt nganamyibaat'atiyit. ⁸ Paty meets ixyam tiy janch ndyimdyukmadøy, jøts ku øts ja'ayi tø nnimiñ jøts meets nøø nduktanøbatt; jøts ku dø'øn ja yja'att pøn øts idø'øn ndijpy ix'oojk memp, jawaani øy ja tyunk ja ttu'unt kumi Espíritu Santo ja tyuktatøkip ja jaa'y.

Ku ja Jesús ñøbejty

⁹ Xjats ja Jesús winet et chøø'ñ Nazaret, jam kajpkøjpx midi wyinaty Galile'it jaa'y y'etjotp, jøts ja ñijkxy nøbajtpi møj nøøjotp midi txøøw'ajtp Jordán, ma Juan ja yiknøbajti.

¹⁰ Xjats ku ja pyidsimy møj nøøjotp, winets ja ojs t'ixy ja tsajp jøts ku ja y'awa'ach, jøts Espíritu Santo ja jade'en ñigida'agy sam ja tsapak. ¹¹ Xjats yikmadøøy ja Dios Teety y'ayuujk jap tsajpøtpty, yide'en ja wya'añ:

—Øts me n'u'nk'ajtpy; njanchøjkpy mets jøts njanchtajotkujk'ajtpy mets.

Ku ja Jesús miku' øjts yjot'ijxyi

¹² Winets ja Espíritu Santo yiknøjkxøø jam abak etjotp, ¹³ jøts ja Jesús jam wixijkxyøøw chinaay. Xjats ja miku' ja yikpojkipitunwa'añi, jøts ja nijuuni tkamimadøøy. Jam idø'øn ja chinaay ma ja may awa'añ jiyujk jam chøøniidi, xjats ja ankilis ja pyudøjkøø.

Ku ja Jesús tpadøjkiy'ñ ja tyunk

¹⁴ Jøts ku ja Juan wyinaty tø yikpiktakni jap puxøjkjøtpty, winets ja Jesús chøø'ñ jøts ja ñijkxy Galile'it etjotp, ma ja tniga'amaay ja øgyajpxy ja ømyadya'aky, midi ñigajpxpy sa Dios ja yjaa'y ttanitanit ja kyutujk. ¹⁵ Yide'en ja wya'añ:

—Tønim inet ja xøøw ja et yja'aty, wingomp ixyam ja Dios kyutujk midi ya tu'ump. Yiktigatsti ja mdsinaa'yindi, ja'dyigøøgyøxti tuki'iyi ja mga'øyjaa'y'ajtindi, jøts janchjawidi ja øgyajpxy ja ømyadya'aky.

Ku ja Jesús twaadsøøy nimaktaxk ja ajkxmakpi

16 Jam idø'øn mejpya'am midi txøw'ajtp Galilea, jam ja Jesús wyinaty ñaxy ku ja t'ejxpaa'jty namajtsk ja jaa'y, ja Simón jam wyinaty møøt ja y'uch Andrés. Ajkxmaktip idø'øn ja tyunk'ajttip, xyuumy ja jam wyinaty ñøøwejtspajttip midi ja tya'ajkxmaktip.

17 Xjats Jesús ja tnimaay:

—Mada'akti, møøt widettik øts jøts nduknijawidit sudso jaa'y ja nitso'ok'ajtin tpaaty.

18 Ku ja jade'en yiknimaydi, winets ja jaty t'ajstuttøø ja xyuumy midi ja wyinaty tya'ajkxmaktip, jøts ja tpadsoo'ndøø.

19 Jawaani ja Jesús ojts yø'ø yxjats ja ojts t'ejxpaa'jty ja Jacobo, pøn ja Zebedeo wyinaty myajnk'ajtpy. Ja' jam wyinaty barkijotp t'adajkyidip ja xyuumy møøt ja y'uch Juan.

20 Xjats ja tyaajxyi'ñ, wyaadsoow ja'; winets ja tyeety ja tunk ja ttukmidandøø jam barkijotp møøt ja tyumbi, jøts ja Jesús ja tmøøtnøjkxti.

Tu'uk ja yaa'dyøjk pøn ja miku' wyinaty tø tyatøkiyi

21 Xjats ja ojts yj'atti Capernaum, jam møj kajpkøjxp; jøts ku poo'kxin xøøw tpaajty, winet ja Jesús ñijkxy yik'ixpøjkpi jam israelit jaa'y chaptøjkjotp. 22 Xjats ja jaa'y ja jam ñigyumaap tjawidi, ku Jesús ja jade'en yik'ixpikyidi sam ja jaa'y pøn ja møk kutujk tmøøt'ajtp, ka'ap ja jade'en yik'ixpikyidi sam ja kajpxwejpitøjk pøn yik'ixpøjktip jap israelit jaa'y chaptøjkjotpy. 23 Japts wyinaty tu'uk ja jaa'y tsaptøjkjotpy pøn wyinaty ja miku' tø tyatøkiyi, ja' møk yide'en waan:

24 —¿Mets Jesús, Nazaretit jaa'y, tiku øø tø xnimiñ, sa øø xunwa'añ? ¿Ja' mets tø xnimiñ jøts øø xyikudigøøgyøxt? Wa'ats me n'ejkapy pøni pøn mets. Ka'axi me mbøkmyøødi, Dios jaa'yxi mets.

25 Xjats ja Jesús møk twingugajpxiyi'ñ ja miku', jøts ja tnimaay:

—¿Amøñi, kidi nugo mgajpxy, tsojk majtstu'ut yø jaa'y!

26 Xjats ja miku' møk'ampy tyikmibejpijky ja jaa'y, jøts ja møk chabaay, winets ja pyidsiimy. 27 Xjats ja mayjaa'y janchniigyumaap tjawidøø, jøts ja xem yam ñadyi'byikyidi køøm, yide'en ja ñawya'añidi:

—¿Ti wenk ixpøjkin ya'at? ¿Ti tunk yø jade'en tyumpy? ¿Janch møk kutujk tmøødi, mimadojip paat ja miku' yø' ku yø t'ane'emy!

28 Xjats ja jaa'y ja tnimadoogøxti pøni niwine'en ja jam wyinaty chøøniidi Galile'it etjotp. Niduki'iyi ja tnija'wigyøjxtøø ku ja Jesús jade'en t'ødyuñ ja jaa'y.

Ku ja Jesús tyikmøkpjky ja Simón Pedro tyaakmø'jt

29 Xjats ku ja Jesús pyidsiimy jam tsaptøjkjotp, winets ja tmøøtnijkxy ja Jacobo møøt ja Juan jam Simón tyøjkwindum, mā ja wyinaty tmøøtsøøni ja y'uch Andrés. 30 Jamts pamaa'y ja wyinaty tmøødididi, tyaakmø'jt ja Simón wyinaty pøjkip, mowa'añ jømba'am ja yjanchpiky; jøts ja Jesús ja ttukmadowdi ku ja jade'en pyiky. 31 Xjats ja Jesús twingume'enyi'ñ ja pamaa'y, jøts ja ojts twejtji'iky; ja'ayi ja jade'en ttuñ, winets ja pya'am jaty ñiwaajtsøø; kuts ja jade'en yjajty, xjats ja tø'øxyøjk ja yikaajyidi nayjaty ku ja chøøjky.

Ku ja Jesús tyikmøkpjky ja maabyamaa'y

32 Waani y'ijty ku ja xøøw yjejxy jøts ku kyoodsiñaa, winet ja Jesús yiktanimiñ ja mayjaa'y pøn wyinaty pøjkidip, jøts ja jaa'y pøn wyinaty tmøøt'ajttip ja miku'; 33 niduki'iyi ja kajp jaa'y myendøø tøk'agøøm mā ja Jesús jam wyinaty. 34 Xjats ja may tyiktsøøjky ja pamaa'y pøn wyinaty tigati pøjkidip, ojts ja tyiktsokixy jøts ja miku' ja tyikpidsømgijxy midi ja jaa'y wyinaty myøøt'ajttip; jøts ka'ap ja miku' ja tyikajpxy, kumi ñija'wip ja' paty ja jade'en ttuñ jøts ja kyadamigajpxiyit jøts ku ja Dios U'ngi.

Ku ja Jesús kya'amaay

35 Xjats ku yjøpkyoots'ajty, jaakmøñim ja et wyinaty, winets ja Jesús myaabidi'jky jøts ja chøøñ jam kajpjotp, Dios Teety ja wyinaty y'ajot'atwampy, paty ja ñijkxy abak etjotp.

³⁶ Xjats ja Simón choo'ndøø ɪxaabyi møøt ja myigu'uk, jøts ja tpaatwa'andi ja Jesús, ³⁷ xjats ku ja tpaattøø winets ja tnimaadyøø:

—Mdum'ixaajyip jaa'y ɪxyam.

³⁸ Winets ja ñimaajyidøø:

—Wan tjaa'myindi abikyajp midi wingon tandip, jøts øts jam nayide'en nniga'ama'aty ja øgyajpxy ja ømyadya'aky; kumi ja' ø tø nnimiñ jøts øts jade'en ndu'unt.

³⁹ Xjats ja Jesús jade'en t'ayø'øy ja kajp midi jam wyinaty Galile'it etjotp, jøts ja kya'amay jam tsaptøjkjotp, jøts ja nayide'en tyikpidsimy ja miku' midi ja jaa'y wyinaty winaagin myøøt'ajttip.

Ku ja Jesús tyiktsøøjky ja jaa'y pyu'uts

⁴⁰ Xjats Jesús ja jaa'y tu'uk ñimejnøø pøn wyinaty axøø'kpim putsp, jøts ja wyinguxanaajyi, yide'en ja wyaañ:

—Møøt'ajtpy mets ja møk'ajtin jøts ø xyiktsø'okt, yiktsokts øts mdsojk'ajtingøjxp.

⁴¹ Xjats ja Jesús ja y'ayo'ejxi, jøts ja tñixajyiñ, yide'en ja tnimaay:

—Ndsøky'ajtpy øts jøts mdso'okt, tsokni.

⁴² Ja'ayi ja jade'en wyaañ, xjats ja jaa'y ja pyu'uts jaty ñiwaajtsiyøø jøts ja myøkpiky, møk møjaaaw ja ñayja'wiyøø. ⁴³ Winets ja Jesús ja pyagajxøø, yikxon ja y'ukyik'ane'emy, yide'en ja tnimaay:

⁴⁴ —Madow, kidi jaa'y xukmadøy, ka'ap pøn sa xnøjmit, nøjkx jam teety wyindum jøts ja xuk'ext ku tø mdsø'øky, jøts nay jam idø'øn mdamiyoxp ja Dios ja jiyujk sa Moisés jekyip tyikutuky, jade'en ja jaa'y tñijawidit jøts ku me tø mjanchø'øky.

⁴⁵ Xjats ja jaa'y ñijkxy, jøts ja tuki'iyi ttamimadyakijxy ja mayjaa'y sudso pu'uts ja wyinaty tø ñiwa'achiyi. Paty ja Jesús øy ma kya'ukajptøjkini, jagam ja wyidity ma ja et janch abak; jamts ja øy magama pøn ñidsøøñi jøts ja yikniijkxy.

2

Ku ja Jesús tyikpidi'jky ja køxujxpi pakxujxpi

¹ Ku wyinaty kawinaak xøøw tø ñajxni, xjats Jesús jadigojk kyajptøjkiyiñ jam Capernaum; jøts jaa'y ja tñija'widøø ku ja wyinaty tø yja'aty jam tøjktotp. ² Xjats ja mayjaa'y jaty ñamyukidøø, yikxon ja tøj yjanch'ujch, ka'ap ja y'ukniabaajtini; jøts ja Jesús jam tñiga'amay ja øgyajpxy ja ømyadya'aky. ³ Winets ja jaa'y yja'ttøø nimaktaxk pøn tkiyja'ttøø tu'uk ja pamaa'y pøn wyinaty køxujxpi pakxujxpi. ⁴ Xjats ja Jesús ja tjpaatwa'andi, jøts kumi nima kya'awa'adsi kumi tø ja mayjaa'y wyinaty t'awa'kta'tsnidi ja tøjka'aw, winets ja tñitajuttøø ja tøj jøts jut ja tyik'awatstøø. Japts pamaa'y ja tyikwinajktøø møøt ja myaabajt jap Jesús wyindujpy. ⁵ Xjats ku ja Jesús ojts t'ixy ja jaa'y pøn tyikmendøø ja pamaa'y jøts ku ja amuum yjanchjawiyi, winets ja pamaa'y ja tnimaay:

—Nbojkipimee'kxpy mets u'nk.

⁶ Jamts wyinaty ja kajpxwejpitøjk chøønidi pøn wyinaty ttuk'ixpøjktip ja Moisés kyutujk jam tsaptøjkjotp, ja'ats yide'en winmaadyøø: ⁷ “¿Ti yø jaa'y jade'en kyuwā'anip, sa yjaty? ¿Tiku yø jade'en wya'añ? ¡Ka'ap idø'øn jade'en y'øyi! ¿Pøn ja pøky ya t'ukmaa'kxp, kidi Diosip tu'ugyi tmaa'kxp ja pøky?” ⁸ Xjats ja Jesús ñija'wip ja wa'ats ku ja jaa'y jade'en wyinaty wyinmaydi, winets ja tnimaay:

—¿Tiku jade'en nichøky mwinmaydi? ⁹ ¿Ja ti ne'egi jawaani jajtñi, kuts yø pa'amjaa'y nnøjmit: “Mee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nøjkxni mdigam?” ¹⁰ ɪxyamnim meets inet x'uk'ext mabaat øts idø'øn ja møk'ajtin nmøøt'aty ya naxwiiñ jøts ø nmaa'kxt ja pøky.

Xjats ja tnimaay ja køxujxpi pakxujxpi:

¹¹ —Pidøkni, wa'kukiñi, wejtsjø'øk yø mmaabajt jøts mnøjknit mdigam.

¹² Xjats ja pamaa'y jatyi pyidi'jky; ojts ja myaabajt ja twejtsji'iky, jøts ja jam cho'oni mayjaa'yjotp. Paty ja jaa'y niduki'iyi ñigyumaap tja'widøø ku ja pamaa'y jade'en myøkpjky, xjats ja Dios ja ttamøja'widøø, jøts ja wyandøø:

—Nimā niwindinim jade'en nga'ijxyindi.

Ku ja Jesús tpawaay ja Leví

¹³ Waani y'ijty, winets jadigojk chøø'ñ ja Jesús jøts ja ñijkxy jam mejy'agø'øm; jamts jaa'y ja yikxon yjanchniñi, jøts ja jam tyik'ixpiky. ¹⁴ Xjats ku dø'øn ja ojts ñijkxy, winets ja t'ejxpaajty ja Leví, ja Alfeo y'u'nk, jam ja wyinaty chøøni mā ja ttukugubety ja jaa'y ja pyikta'aky, xjats ja Jesús wyaañ jøts ja Leví yikniimaay:

—Wan tjaa'myim jøts øts n'ixpøjkin xpabøjkit.

Winets ja Leví jatyi tyanaagyukiyi'ñ, jøts ja Jesús ja tpanijkxy.

¹⁵ Xjats ja Jesús yikwaay migaabyi Leví tyøjkwindum, winets ja yikugubajtpi yja'tmidøø, møøt jadukpi jaa'y pøn kyabadundip ja myigu'uk chinaa'yin, jøts ja tu'ugyi twinguwa'jtsidøø ja kaabyajt møøt ja Jesús jøts ja pyabøjkpitøjk; janch namay ja jaa'y jam wyinaty pøn ja Jesús pawidejtyip. ¹⁶ Xjats ku ja kajpxwejpitøjk jøts ja fariseotøjk jade'en t'ejxtøø jøts ku ja Jesús jam wyinaty tmøøtkay tum ja ka'øyyaa'dyi, winets ja tnimaadyøø ja pyabøjkpidi:

—¿Jadits ku yø mwindsøn tmøøtkay yø yikugubajtpidi jøts yø ka'øyyaa'dyi?

¹⁷ Xjats ku Jesús ja jade'en tmadøø, winets ja wyaañ:

—Ka'ap øts nyiktaniguexy jøts nbudøkit pøni pøn janch wa'ats ñayja'winiyip, ja'agøjxp ku ja pyøky kapøkyjawi. Ja'ayi ja nbudøkip pøni pøn ñadyapøkyja'wiyidip ja pyøky. Nayide'en øts idø'øn njaty sam ja tsøyibi kyanijkxy mā ja pamaa'y kya'ity. Jami ja ja'ayi ñijkxy mā ja pa'amjaa'y jam.

Ku ja Jesús yiktibyiky tigøjxp ku ja kya'ayuu'atti

¹⁸ Tuk'ojk idø'øn yjajty, ixam idø'øn Juan Bautista pyabøjkpitøjk wyinaty y'amaay'atti møøt ja fariseotøjk, ayuu'ajttip ja jam wyinaty, Dios idø'øn ja jade'en wyindsø'jkidip, winets ja jaa'y winaagin tnmendøø ja Jesús mā ja wyinaty jøts ja ttiibyøkti, yide'en ja tnimaadyøø:

—¿Jadits ku Juan pyabøjkpitøjk y'amaay'atti jøts ja fariseotøjk nayide'endi, ka'axi ja kyaydi, jøts sudso mets yø mbabøjkpitøjk nayide'en kya'amaay'atti, sudso meets yjawi amgujuk jotkujuk mgaydi? Ka'ap meets yjawi ti xkumay.

¹⁹ Jade'en ja wyandøø, xjats ja Jesús yide'en y'adsøøy:

—¿Winaak ojkimts meets jade'en tø x'uktani'ixy, winaak ojk meets jade'en tø x'uknijawi ku tø'øxñigaabyi tø'øxñi'ukpi tø y'uk'ayuu'atti ku ja jemyaa'y jam tø yja'tni? Ka'axi jade'en pøn y'ayuu'aty, ka'ap jade'en pøn tø t'amaay'aty. ²⁰ Jaanim idø'øn tiy yjanch'amaay'atti pøni ku ja wyinaty tø yiktawinwaadutnidi ja jemyaa'y, jam ja jade'en kyaydi amgujuk jotkujuk jøts ja jemyaa'y ja myidsep ja o'jkin jaty tyuk'anøjkxyi. ¿Pønts jade'en kidi yjotmay'øøky? ¿Sudso dø'øn jotkujuk ngaa'yint n'uujkint? Pø nayide'enxi øts idø'øn yø nbabøjkpitøjk yam xjawidi ku njaakyam'aty.

²¹ 'Ka'axi pøn wyetpach tta'agiyi jemwyet midi tyimyjemñim; ku ja jade'en yiktu'unt, jøts kumi mujkpi ja jemwyet, jøts ja tjaaktyimgyøø'tsni ja wetpach, jaaktyimyiwenip ja kyøøts'ajtin ja'. ²² Jøts nayide'en ka' y'øyi jøts yikpikta'akt ja vino jap po'dukjotpy midi namii'kxñim; ku ja jade'en ndu'unint, takøø'tsips ja po' jøts jade'en nugo wyindigøø, windigøøpy ja po' jøts nayide'en ja vino. Paty ja vino midi namii'kxñim nda'ada'amyin ja jembyo'ak, jøts jade'en nimidi kyawindigøø'ty.

Ku ja Jesús pyabøjkpitøjk poo'kxin xøøw et y'ariindøjtøø

²³ Tuk'ojk idø'øn yjajty ku poo'kxin xøøw wyinaty tø tpaaty, winet et ja Jesús ja pyabøjkpitøjk tmøøtnajxy jam kamjotp mā ariingam jam wyinaty; jam idø'øn ja wyinaty

ñaxti ku ja pyabøjkpitøjk ttøjp̄inaxwa'ktøø ja ariindøø. ²⁴ Xjats ku ja fariseotøjk ja ojts jade'en y'ijxyidi jøts ku ja jade'en y'adø'øtsti, winet ja Jesús jatyi yiknimaay:

—Ejx yø mbabøjkpitøjk! ¿Tiku yø jade'en y'adø'øtsti, tiku ariin yø ttøjti, kumi ka'ap jade'en kyutukyi jøts yø jade'en y'adø'øtstit ku poo'kxin xøøw?

²⁵ Winets ja Jesús y'adsøø, jøts ja wyaañ:

—Nugo meets mjanchkajpxy. Tø meets ja nøky xja'ixy midi wamp jøts ku ja David yide'en y'adijch møøt ja myigu'uk ku yuu ja pyaajt̄idøø, ku ja wyinaty niti kya'ijxyidi.

²⁶ Winets ja ñøjkxtøø jap tsaptøjkjotpy ma ja Abiatar jap wyinaty tyeetywindsøn'aty, japts ja t'amidøø ja tsapkaaky midi ja Dios yja'ajtpy jap wyinaty. Ja'ats ja ojts tkaydi midi ka'ap kyutukyi jøts nugo jaa'y ja tka'adyit. ¿Jøts tiku dø'øn ja jade'en y'adijch pøni ka'adam ja jade'en kyutukyi? ¿Tiku myigu'uk ja nayide'en ttukaay ja tsapkaaky, pøni jade'endam ja kyutukyi jøts ja ja'ayi tka'adyit pøn teety'ajttip?

²⁷ Nayi waan ja Jesús yide'en:

—Ja'agøjxp ja poo'kxin xøøw yikpiktaajky jøts ja jaa'y yikpudøkit, kidi ja'ajip poo'kxin xøøw yiktanibiktaajkyi'ñ jøts jaa'y niti kyidyimdyu'undit. ²⁸ Ngudanaapy øts ja naxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

3

Ja jaa'y pøn wyinaty ja kyø'jadi'iñi tøøtsnip

¹ Xjats ja Jesús jadigojk tyøjkij'ñ jam tsaptøjkjotpy ma yaa'dyøjk ja tu'uk tpaajty, midi wyinaty tuktamajñ køxujxp. ² Jøts ja Jesús jam a'ejxuky y'ity, ja' ja jaa'y y'ejxwandip pøni y'ukyiktsøky idø'øn ja jaa'y ku poo'kxin xøøw, winets ja jatyi tni'øønidit. ³ Xjats ja Jesús tnimaay ja yaa'dyøjk pøn ja kyø' wyinaty xujxp:

—Pidø'øk jøts ixex nøjkx mdani kuk'ajy.

⁴ Xjats ja Jesús ttiibyijky ja jaa'y pøn ja jam wyinaty a'ejxujkyidip, yide'en ja tnimaay:

—¿Midi'ibi ixyam kutuky, ku jaa'y n'ødyu'unint, uk ku jaa'y nga'ødyu'unint? ¿nyiknitsoojkimp ja jaa'y, uk nyik'oo'kimp ku poo'kxin xøøw, midi'ibi øy?

Xjats ja jaa'y amøni y'etti, nipøn sa kyawa'añ. ⁵ Winets ja Jesús ja twin'ejxji'jky ambøjkin'ampy, jøts ñiyjotmay'oo'kni dø'øn ja Jesús y'ejxji'jky, ja'agøjxp ku ja jaa'y niwine'en tkaja'gyukidi. Jøts ja tnimaay ja jaa'y midi wyinaty køxujxp:

—Xajtøw.

Xjats ja xyajtiy, jøts ja kyø' ja møk tyaañ, ojts ja chø'øky. ⁶ Winets yø'øpyidsømdøø ja fariseotøjkti, jøts tminagyajpxidi ja Herodes myigu'uk, ja' ja kyajpxy'ajttøø sudso t'ukyik'ooktit ja Jesús.

Ja mayjaa'y pøn jam wyinaty mejy'agø'øm

⁷ Xjats ja Jesús chøø'ñ, jøts ja pyabøjkpitøjk ja ojts tmøøtnijkxy jam mejy'agø'øm, winets mayjaa'y ja pyanøjkxidøø pøn jam wyinaty Galilea kugajp'ajttip. ⁸ Xjats ku mayjaa'y ja ojts tñimadowdi jøts ku ja Jesús jade'en tjanch'ødyuñ ja jaa'y, winets jam øy pøn jaa'y myendøø, pømbi tsoo'ndip jam Jude'it etjotpy, pømbi Jerusaléngit kajpjotpy, pømbi Idume'it etjotpy, pømbi tsoo'ndip wingon ma ja møj nøø midi txøøw'ajtp Jordán, pømbi tsoo'ndip jam Tiro etjotpy, jøts pømbi tsoo'ndip jam Sidón etjotpy, jade'en ja mayjaa'y ja jam ñimejniyøø. ⁹ Ja'agøjxp ja Jesús ojts t'ane'emy ja pyabøjkpitøjk jøts ja jam tyik'awejt̄it tu'uk ja barki, jøts mayjaa'y ja kya'adejmukiyit. ¹⁰ Kumi tø ja wyinaty kawinaak tyiktsø'øky ja jaa'y, tum jam ja pamaa'y wyinaty tø ñaxkida'akti ja' ñikøjxp jøts ja cho'okti. ¹¹ Jøts ku ja Jesús maamyiku' y'ejxpaadyiyi midi ja mayjaa'y jam myøøt'ajttip y'am yjotpy, jatyi ja wyinguxaniyi jøts ja ñii'mxyi:

—Dios U'nk mets.

¹² Xjats ja møk tnøjmi jøts ja ka'ap ttukmado'odit ja mayjaa'y jøts ku ja Dios U'ngi.

Ku ja Jesús twiwijch ja jaa'y nimakmajtsk pøn ja wyinaty kyudanaabyi'atwampy

¹³ Xjats ja Jesús pyatøjkiyih'ñ kojpkøjxp, mā ja jāa'y ja twaadsøoy pøni pøn idø'øn ja kø'øm chøjkpy, winets ja jam ñimejniyøø ja jāa'y pøn ja wyinaty tø twaadsøy. ¹⁴ Jøts ja nimakmajtsk twiwijch pøn ja ejtp myøøtwidetwampy, jøts pøn tniga'ama'adyip ja øgyajpxy ja ømyadya'aky; ¹⁵ xjats ja tkutujkmøoy jøts ja tyiktso'oktit ja pamaa'y, jøts ja miku' ja tyikpidsø'ømdit midi ja jāa'y winaagin myøøt'ajttip. Jade'en tyajky ja kutujk. ¹⁶ Nimakmajtsk idø'øn ja jāa'y jam wyinaty: jam ja Simón wyinaty pøn nayide'en yiktejp Pedro; ¹⁷ jøts nay jam ja Jacobo wyinaty: møøt ja y'uch Juan, ja Zebedeo y'unaj'jk midi xøbajtøø Boanerges, ja' idø'øn tyijpy midi møk møk ja jāa'y myigajpxtip ejxim ja anaaw pyijy, ka'ap idø'øn chø'øgidi; ¹⁸ Nay jam ja jāa'y wyinaty: midi txøøw'ajttip Andrés, Felipe, Bartolomé, Mateo, Tomás, Jacobo ja Alfeo y'u'nk, Tadeo, jøts ja Simón midi tsoo'mp canaangit jāa'y y'etjotp, ¹⁹ jøts nay jam ja Judas Iscariote wyinatymi midi tkøyajk ja Jesús.

Ku ja Jesús yiknimaay jøts ku miku' myøk'ajtin ja tyiktuujni

Xjats ku ja Jesús wyimbijty kojpkøjxp, winets pyabøjkpitøjk ja tmøøtøjkiyih'ñ tøjkjøtpy, ²⁰ jøts ja jāa'y yikxon ñamyujkidi jadigojk, nigidibaat ja Jesús y'ukaañidi møøt ja pyabøjkpitøjk. ²¹ Xjats ku ja Jesús myigu'uk ñimadojyøø jøts ku ja jam wyinaty, winets ja ñimejni jøts ja yiktsoonwa'añi kumi jade'en ja wyinaty wyinmaydi jøts ku myø'øty ja Jesús.

²² Nayi tø ja kajpxwejpitøjk wyinaty myeemidi jam pøn tsoo'ndip Jerusalén, xjats ja wya'andi:

—Miku' windsøn yø jāa'y myøøt'ajtpy, ja Beelzebú, ja' yø tyamøj paty yø myayi jøts yø tyikpidsimy myimiku' midi yø jāa'y jadu'uk myøøt'ajttip.

²³ Xjats ja Jesús twaadsøoy ja jāa'y, jøts ja ttukwinjawiwyā'añ tu'uk ja madya'aky, paty ja wya'añ:

—¿Sudso ndejint miku' kø'øm ñankpyidsømiyit aguwānikøjxp? ²⁴ Jøts nayide'en ku tu'uk kajp ñawya'kxyi, jøts ja tsep ttundi agø'ømyi, ka'ap ja kajp jeky y'ity, jatyi ja jāa'y jadi'iñi ñankyixyidi; ²⁵ nayide'en yjaty ku jāa'y ñachiigyidi ni'u'nk ni'unaj'jk, ka'ap ja jeky chøøniidi. ²⁶ Jøts ku miku' kø'øm ñañibidø'øgyit, tø dø'øn ja wyinaty kyawindiy, ñankyudigøjyip idø'øn ja wyinaty kø'øm.

²⁷ 'Nipøn midsep jap jadi'iñi kyatøki jap jotmøk jāa'y tyøkjøtpy, kunim ja tkøwøøndit tprakwøøndit; winetnimts ja tpøkøjxidit ja pyikta'aky. ¿Ti sudso øts yø jāa'y jeexyip ja miku' ndukmajtstu'uty kuk øts ja miku' windsøn jawyeen tø ngamimada'aky?

²⁸ 'Janch meets idø'øn nnøjmi, jøts ku ja jāa'y ja pyøky tuki'iyi yikmee'kxy, tuki'iyi yikmaa'kxkixy ja ka'øñigajpxy ja ka'øñimadya'aky; ²⁹ ja' nijuuni kyayikpojpkimaa'kxp pøni pøn tka'øñigajpxp tka'øñimadyakp ja Espíritu Santo, ejtp ja pyøky ja tmi'ity.

³⁰ Ja'agøjxp ja Jesús jade'en wyaañ ku ja wyinaty jade'en tø yiktijy jøts ku miku' ja tmøødi, jøts Espíritu Santo tkamøøt'aty.

Ja Jesús tyaak jøts ja y'uch

³¹ Waani y'ijty, xjats ja Jesús y'uch yja'ttøø møøt ja tyaak, jøts ja jap tøk'agi'py wya'k'øyidi, japts ja tnānkwyāadsojidøø ja Jesús. ³² Winets Jesús ja jāa'y ñimaajyøø pøn ja jap wyinaty wingon windsinaajyip, yide'en ja wyandøø:

—Ixap ja mdaak y'awijxy tøk'agi'py møøt ja m'uch, mets myik'ixaapy.

³³ Xjats ja tnimaay:

—¿Pøn øts idø'øn xuktaak'ajttip, jøts pøn øts idø'øn xuk'uch'ajttip?

³⁴ Winets ja twin'ejxji'jky ja mayjāa'y, jøts ja tnimaay:

—Yø' øts idø'øn ndaak'ajtpy, jøts yø' øts idø'øn n'uch'ajtpy pøn øts ya wingon xwindsinaadyip. ³⁵ Ja' øts idø'øn n'uchip, jøts ja' øts idø'øn ndaagip pøni pøn tpadundip sa ja Dios chojkin.

4

Ku ja Jesús tmadyakpaaty ja jaa'y midi nøjkx neppi

¹ Xjats ja Jesús jadigojk yik'ixpøjktøjkijyihñ jam mejpya'am ma ja jaa'y ja ojts ñimiñiyi may'ampy, jøts ja jam ñañimukpajtidøø. Ku dø'øn ja jade'en janch namaydi, winets ja Jesús tyøjkijyihñ jam barkijotp midi wyinaty nøøjotp, jamts ja y'ixaajky jøts ja mayjaa'y jam nøø adsajotp tyandøø. ² Jamts ja tyik'ixpijky jade'en, may ja ejxpajtin madya'aky ja jam tnigajpxy, yide'en idø'øn ja tnimaay ja mayjaa'y ku ja jam yik'ixpijky:

³ —Øyim idø'øn xmado'odit: Tu'uk idø'øn jaa'y chøø'ñ ariin wøjpi. ⁴ Jøts ku dø'øn ja ojts twøjwidity ja tyømt, winet ja tømt waani ñaxkidaajky jam tuu'ba'am, ja'ats ja joon jam ñimeen jøts ja wa'ats tpeemujkijxy. ⁵ Nayide'en ja tømt jam waani ñaxkidakmøø tsajotp ma ja naajx øy kya'ity; xjats ja ariindømt jam janch tsojk myujxy, kumi ka'ap ja naajx wyinaty myajpxyi. ⁶ Jøts ku ja xøø'an myiñ, winets ja tyiich, ja'agøjxp idø'øn ja jade'en yjaty ku y'aats ajawi kya'ity. ⁷ Nayi naxkidaajk ja tømt jam kujp agujkp; jamts ja yjanchni'aa'mbejty ku ja kujp yikxon yondøø jøts ja jade'en kyatøømiyihñ. ⁸ Nayi naxkidaajk ja tømt jam øñaxjotp. Ojts ja yikxon yøn, yikxon ja jam yjanchtøømiyihñ midi'ibi ee'pxmajk ja pyajkwimbejt tu'ukpi tømt, midi'ibi tugi'pxy pajkiyihñ, jøts midi'ibi magø'pxy, jade'en ja ariindømt pyajkpejty.

⁹ Xjats ku ja Jesús jade'en myadyakijxy, winets ja tnimaay ja mayjaa'y:

—iPøni pøn ja'gyukiwyampy, wan tja'gyuki!

Tigøjxp idø'øn ja Jesús ejxpajtin madya'akyøjxp ja y'ixpøjkin tyaky

¹⁰ Xjats ku ja mayjaa'y choo'ndi, jøts ja Jesús jam tyaañ, winets ja tyiktøødi ja namakmajtsk pyabøjkpitøjk, jøts nay ja pyabøjkpitøjk pøn ja jam wyinaty myøøt'ajtpy, ja' ja ñijawiwyaandip ti dø'øn ja madya'aky jade'en tyijpy, sudso ja yikja'gyuki. ¹¹ Xjats Jesús ja ñimaajyidøø:

—Meets nugo myiktukmadoop ja' midi ka'ap y'ijty yiknijawi pøni sa ja Dios kyutujk y'ejxi tyiyi midi ja tyanitanaapy ja yjaa'y; jøts pøn øts ngutujk xkababøjkidip ka'ap ja jade'en tiy yiktukmadowdi, ejxpajtin madya'akyøjxp ja yiktukmadowdi; ¹² jøts ja jade'en kyawinmaa'nbyaattit ku ja ti tjaniwinmayidi, ka'ap ja tmadoogukidit pøni sa jaty ja yjayiknøjmidi, paty idø'øn ja jade'en yjatti ku øts ja kø'øm xkajanchjawidi, kø'øm idø'øn ñadyuñidi paty ja pyøky kyayikmaa'kxtit.

Ku ja Jesús tnigajpxy sudso dø'øn yikja'gyukit ku jaa'y neppi ñijky

¹³ Winetnimts ja wyaañ:

—¿Ka'ap xja'gyukidi yø ejxpajtin madya'aky, sudsomts meets ja xjanchja'gyukigyøxt jadu'uk ja ejxpajtin madya'aky? ¹⁴ Pøn ja ariindømt twøjp, jade'en idø'øn ja n'ukpiktaajkint ejxim ja jaa'y midi ja øgyajpxy ja ømyadya'aky tkajpxwa'kxp. ¹⁵ Jøts winaagin jaa'y jade'endi ejxim ja tømt midi naxkidaajk jam tuu'ba'am: y'amidoodujktip ja' ja øgyajpxy ja ømyadya'aky, jøts ku ja jade'en tmadowdi, winets ja miku' ja jaty ñimiñidi jøts ja pyøjkxyidi ja øgyajpxy ja ømyadya'aky midi ja wyinaty tø y'ukjotøkiyidi. ¹⁶ Nayide'en ja jaa'y winaagin n'ukpiktaajkma'ant ejxim ja tømt midi naxkidaajk jam tsajotp: pyatmadoodip ja' ja øgyajpxy ja ømyadya'aky ñixyondakni, jøts kumi ka'ap ja tmimøk'etti, ¹⁷ jade'en ja yjatti ejxim ja ariin y'aats ajawi kya'ityin; ka'ap ja jeky tmi'etti ja'agøjxp ku ja tku'ayo'ombaadidi ja øgyajpxy ja ømyadya'aky, winets ja tmajtstu'utti, ka'ap ja tu'ugyi tpadundi. ¹⁸ Nayide'en jaa'y winaagin yjatti ejxim ja tømt midi jam yikwøj kujp agujkp: yjapatmadoodip ja' ja øgyajpxy ja ømyadya'aky, ¹⁹ jøts ja' ja ne'egi tyajotigøødyip ja pyikta'aktyi ja jujky'ajtindi midi ya naxwiñ, ja' møjtøjkidip jøts ja tyikudigøy ja øgyajpxy ja ømyadya'aky, jøts ja jaa'y tkayikwingaxø'øktit ja Dios kyajpxy. ²⁰ Ja jaa'y nayide'en winaagindi pøn tpatmadoodip ja øgyajpxy ja ømyadya'aky jøts ja yjotøkiyidi, winets ja tyikwingaxø'økti jade'en ejxim ja tømt midi yikwøjp jam øñaxjotp. Winaagin ja jaa'y

jade'endi ejxim ja tømt midi tyøøm tyikwimbejtp may, midi'ibi ee'pxmajk pajkiy#i'ñ, midi'ibi tugi'pxy jøts midi'ibi magø'pxy.

Niti jadi'iñi kyatañ, kuwañim ja tyimyknijawi

²¹ Nayide'en pyabøjkpitøjk ja tnimaay:

—¿Ti ja' ndejint jaj wya'añ jøts ja yiknijupt jap kajuun patki'py, uk jøts ja yikpikta'akt jap maabajt patki'py? Ka'ap ja jade'en pøn tyiktuñ, køjxp ja yikpikta'aky, jamts ja yjajy.

²² Ti yjawi ka'ukyikpatp ku ti yjaju'uch'ity, ti tunk uk ti winmaa'ñ yjawi ka'ukyiknija'wip ku ti yik'amaa'tsk'aty. ²³ Jamxi mdatskti, tamadowdi yikxon.

²⁴ Nayide'en pyabøjkpitøjk ja tnimaay:

—Øyim xpatmado'odit yø ixpøjkin midi myiktukmadoodip. Nayide'en meets ja wijy'ajtin myikmo'ot pøni sa meets ja jaa'y xukniweji ja Dios y'ixpøjkin; jøts mjaaktyimñijawip meets ja jawaani pø xmadooxpi meets yam køøm.

²⁵ Jaaktyimyikmøøpy ja wijy'ajtin ja' pøn ja'gyukip; jøts pøn kaja'gyukip, jaaktyimyikpøkøjxip tuki'iyi ja' ja wyijy'ajtin.

Ku yiknimadyaajky ja tømt midi mujxp jøts midi yomp

²⁶ Nayide'en pyabøjkpitøjk ja tnimaay:

—Jade'en idø'øn ja Dios kyutujk midi ja tyanitanaapy ja yjaa'y, jade'en idø'øn ja n'ukpiktaajkint sa ja jaa'y yjatyin ku tyømt ja twøjy naxjotp; ²⁷ mya'ay ja koots pyidi'iky ja jøpy, najxpts idø'øn ja xøøw tsuu jade'en, mujxp ja tømt jap, yomp idø'øn ja jap, jøts ja jaa'y ka'ap tnijawi tigøjxp idø'øn ja jade'en yjaty. ²⁸ Jøts kumi ja naajx idø'øn ja jade'en ñamyayi køøm nankyøømbidsøjmiyip; ku jawyeen pyidsimy ja ariindeky, jøtsnim ja kyojki, jøtsnim ja tyøømbajtñi; ²⁹ kuts ja myijay, winets ja jaa'y choondi jøts ja twejxwa'andi, kumi tø ja ariin wejxk'aats tpaaty.

Ku ja Jesús tmadyakpaaty ja mortas tømt

³⁰ Nayide'en ja Jesús tnimaay ja pyabøjkpitøjk:

—¿Ti ja Dios kyutujk møøt ndami'ejxi'int midi ja tyanitanaapy ja yjaa'y, ti ixpøjkin ti madya'aky ja ndamimado'owint? ³¹ Jade'en idø'øn ja n'ukpiktaajkint ejxim ja mortas tømt midi yikwøjp jam naxjotp. Ka'ap jadu'uk ujtspajk te ya naxwiiñ midi janch mutsk sa ja møj mortas tøømdin; ³² jøts ku ja yikwijy, janch yikxon ja yøñ, wyinajxkijxpy ja tuki'iyi ja ujts midi yikjagyajp jap kemyjøtpy, yikxon ja janch møj y'awaji y'axeeñi, japts ja joon patki'py y'aptsø'okti.

Tigøjxp ku Jesús xumi jade'en tyik'ixpiky ja jaa'y ejxpajtin madya'akyøjxp

³³ May ja Jesús ja jaa'y jade'en ejxpajtin madya'akyøjxp tyik'ixpijky ku ja tnanky'ixpøjkøø ja øgyajpxy ja ømyadya'aky, jade'eñi paat ja y'ijty tmadya'aky mabaat ja køøm tnajtsjawi ja jaa'y tnimadowdi. ³⁴ Jøts ejtp idø'øn ja Jesús jade'en tyik'ixpijky ja jaa'y ejxpajtin madya'akyøjxp, jøts tyukmadøøpy pyabøjkpitøjk ja wa'ats pøni ti dø'øn ja jade'en tyijpy.

Ku ja Jesús tyiknajxy ja møk poj, jøts ku ja tyik'amøk#iyi'ñ ja mejy

³⁵ Xjats ku kyoodsiyi'ñ ja et nay ja'abi xøøw, winets ja tnimaay pyabøjkpitøjk:

—¡Wan tjaa'myindi jaduktamajñ'ampy jam nøøba'am!

³⁶ Xjats ja jade'en tminawya'kxidøø ja mayjaa'y, jøts ja jap barkijøtpy tyiktsoo'ndøø ja Jesús mayim ja jap wyinaty, ojts abikbyarki ja pyadsøøñidi, ja' ja ojts tmøøtnøjkxti.

³⁷ Xjats ja poj jam janch møk myiñ, jøts ja nøø møk'ampy y'adøtspinaxwa'jky, yikxon ja yjanchtojmji'jky jøts ja kom nøø tyøjkiy#i'ñ jam barkijotp, ujtsnip ja wyinaty. ³⁸ Jamts ja Jesús wyinaty mya'ay barki ix'am, tø ja jam wyinaty ñagyukøyi; winets pyabøjkpitøjk ja ojts yuxyi, jøts ja ojts ñ#mxyi:

—¡Windsøn! ¿Kidi mdsø'øgi ku nnøjøø'kxin uk ku n'oo'kin?

³⁹ Xjats ja Jesús pyidi'jky jøts ja møk twingugajpxiyi'ñ ja poj; jøts yide'en ja mejy tnimaay:

—iMimadook øts et, kidi m'adi'ich!

Winets ja mejy jaty y'amøkiyi'ñ jøts ja tu'ugyi tyaañ.

⁴⁰ Xjats ja tnimaay pyabøjkpitøjk:

—¿Jadits ku mdsø'øgidi, tigøjxp ku ø xkajanchjawidi?

⁴¹ Winets ja yjanchø'jkidøø, yide'en ja kø'øm ñawyajnidøø:

—iPønimts idø'øn ya'at ndejint, sudso poj sudso mejy yø myimadøyi!

5

Ja Gadarit jaa'y pøn wyinaty ja miku' tø tyatøkiyi

¹ Xjats ja ttayø'ñajxtøø ja nøø, jøts ja yja'ttøø jam nøøba'am mā dø'øn ja naajx wyinaty txøøw'aty Gadara. ² Xjats ku ja Jesús yø'øpyidsimy jam barkijotp, winets jaa'y ja tu'uk ñimejnøø midi jam wyinaty tsoo'mp jam kami santijotp mā ja oo'kpi ñaxøkidi, miku' ja wyinaty myøøt'ajtpy. ³ Jam idø'øn ja wyinaty tyimchinaadyakni mā ja oo'kpi ñaxøkidi, jøts ka'ap idø'øn ja pøn pujx kadeen y'uktagixojtsiniyi y'uktabakxojtsiniyi. ⁴ Kumi tø ja wyinaty kawinaak ojk jade'en yjayiktuñ, xjats ja jaty ttapoti, jadi'iñi ja pu'xk tanuki, ejtp idø'øn ja jade'en txumituñ jøts ja jade'en nipøn kyamayi. ⁵ Ejtp idø'øn ja xyumiwidity xinaxy tsunaxy, jam ja kojpkøjxp jam ja kami santijotp muum chabaawidity, jøts tsaa ja jam kø'øm yjanchnadyuktatsaachiyi. ⁶ Xjats ku ja jagamyi t'ejxpajty ja Jesús, winets ja ojts putyi tninijxxy jøts ja twinguxanaay, ⁷ yide'en ja møk'ampy tnimaay:

—¿Jesús, Dios U'nk, ti ø xanimemp, sã ø xunwa'añ? Njanchminuu'kxakpy tun may'ajt Dios køjxpit, kidi ø xyik'ayo'ombaaty.

⁸ Ja' idø'øn ja jade'en kyuwa'aniiyi'ñ kumi yide'en Jesús ja wyinaty tø ñi'mxyi:

—iMiku', majtstu'ut yø jaa'y!

⁹ Xjats ja Jesús wyangojmøø:

—¿Ti me mxøøw?

Winets ja miku' y'adsøøy jam jaa'y y'am yjotp, jøts ja wyaañ:

—Legión øø nxøøw, ja'agøjxp ku øø nnamayi.

¹⁰ Yikxon idø'øn ja tjanchminuu'kxa'jky ja Jesús, jøts idø'øn kyayikajxpidsøømt jam naxjotp mā ja wyinaty chøøni. ¹¹ Jøts kumi jamdam magyuch wyinaty tymyøø'kxwidejtmidi jam kojpk wingon, ¹² xjats ja miku' ñuu'kxaktøø, jøts ja wyandøø:

—Tanigajxk øøts yø kuch; wan øøts jam ttøki.

¹³ Xjats ja Jesús tyajky ja tiy'ajtin, yikjajt idø'øn ja jade'en, winets ja miku' tmajtstuttøø ja jaa'y, jøts kuch ja tnimajtskojmidi, ja' ja tyatøjkidøø. Namajtsk milin idø'øn ja kuch jam wyinaty tyanidi, ja'ats kø'øm ñanktyejmidøø jap jaa' jutjotpy jøts ja nøøjotpy tyimñaxkidaktøø, japt ja ñøøjøø'kxkøxtøø.

¹⁴ Xjats ja jaa'y ojts kyakøxti pøn jam wyinaty kuch'ejxtip, jøts ja t'atsnimadya'akwa'andi jam møj kajpjotp, jøts nayide'en jam kamjotp. Winets ja jaa'y myendøø, jøts ja t'ejxwa'andi tnijawiwya'andi ti dø'øn wyinaty tø tyuñi. ¹⁵ Ja Jesús idø'øn ja ñimendøø, winets ja ojts t'ejxti ja jaa'y pøn wyinaty t'ukmøøt'ajtp ja miku' jøts ku ja jam chinaañi wet xøøw, tø ja yikxon wyejni kyajni; winets ja jaa'y yjanchø'jkidøø. ¹⁶ Pøn ja jaa'y wyinaty tø twin'ejxti, ja'ats ja tnimadyaktøø sã jaty ja wyinaty tø yjaty tø kyubety ja jaa'y pøn tmøøt'ajtp ja miku', jøts maagyuch ja nayide'en tnimadyaktøø ku ja wyinaty tø y'oo'køjxnidi. ¹⁷ Winets ja tminuu'kxakaktøø ja Jesús jøts wan ja jam tyimbyidsimy etjotp midi ja ñax'ajttip.

¹⁸ Xjats ku ja Jesús tyøjkiyi'ñ jam barkijotp, winets ja jaa'y ja ñimaajyøø midi ja miku' wyinaty jekyip t'ukmøøt'ajtp jøts ku ja pyadsoonwa'añiyi. ¹⁹ Xjats Jesús ka'ap tkupijky, yide'en ja tnimaay:

—Nøjkx mdøjkwindum, ninøjkx mmigu'uk jøts xukmado'ot ku Dios tø mjanchpudøkiyi, tamimadya'ak sudso Dios tø m'ayo'ijxyi.

²⁰ Xjats ja jaa'y ojts ñijkxy, jøts ja tñimadyakwidejtøjkii'ñ kajp kajp jam Decápolis etjotp sa Jesús ja wyinaty tø yjanchpudøkiyi; winets jaa'y ja ñigyumaap tjanchja'widøø.

Ja Jairo ñøøx, jøts ja tø'øxyøjk pøn ja nwindson'ajtim Jesús wyet ojts ttojni

²¹ Xjats ku ja Jesús wyimbijty jap barkijøtpy, ku ja ojts ñijkxy jam nøøba'am, winets mayjaa'y ja jam ñimejnøø, jøts ja Jesús jamyi tyaañ. ²² Tø dø'øn ja jam wyinaty tyaañ ku jaa'y jam tu'uk yja'jty midi yik'ixpøjkp jam tsaptøjkjotp. Jairo, ja' ja xyøøw'ajtpy. Xjats ku ja t'ejxpaa'jty ja Jesús, winets ja ñagyuxendyaajkøø jam Jesús wyindum ²³ jøts ja tjanchminuu'kxaa'jky, yide'en ja tñimaay:

—Jotkøjxnip øts n'u'nk xjap; men mgø' xanixajy, jøts myøkpøkt jøts yjujky'att.

²⁴ Xjats ja Jesús ojts tpanijky ja jaa'y; namay ja ñøjkxti, may jaa'y ja janchpadsoo'nøø, yikxon ja yjanchyik'atejmujky. ²⁵ Jamts ja tø'øxyøjk wyinaty tu'uk jam mayjaa'yjotp midi wyinaty pøjkp, myakmajtsk jumøjtíp taxnaxyi ja wyinaty tø pyaajtniyyi, jade'en jumøjt ja wyinaty kujk tmi'ity ja pa'am. ²⁶ Yikxon ja wyinaty tø tku'ayowi ja pya'am ku tsøyibi ja may tjayiktuñ, tø myeeñu'nk ja wyinaty tyik'oo'køjxni pøni wine'en ja jam wyinaty tmøødi, jøts niwine'en ja wyinaty tø tkadamøkpiky, ne'egi ja pa'am yjinax'adøtsni. ²⁷ Xjats ku ja ojts tmadøy jøts ku yiknimadya'aky ja Jesús, winets ja tpamiñ jap mayjaa'yjotp, jøts ja ttojni ja wyet. ²⁸ Kumí yide'en idø'øn ja ñawya'añiyyi: “Ja'ayi øts wyet inet yø ndojnit, tso'okp øts inet jatyi.” ²⁹ Xjats ku dø'øn ja jade'en ttuuñ, winets ja taxnaxyi jatyi y'amøkiyi'ñ; tyimyja'wiyii'ñ ja kø'øm jøts ku ja wyinaty tø chø'øky ku pya'am ja wyinaty tø ñaxy. ³⁰ Xjats ja Jesús tja'wiyii'ñ, jøts kudam ja wyinaty tø tyiktsø'øky tu'uk ja jaa'y ku ja myøk'ajtin ja wyinaty tø tyik'awa'añ; xjats ja t'ejxwimbijty ja mayjaa'y, jøts ja ojts tyiktiiy yide'en:

—¿Pøn øts nwet tø xojni?

³¹ Winets ja pyabøjkpitøjk y'adsoji:

—Jabi kawine'ents ja jaa'y mjanch'atejmuky, jøts mjanch'ukwa'añ: “¿Pøn ø xomp?”

³² Ejxwidejtp idø'øn ja Jesús, ja' ja tyimyejxwampy pøn idø'øn ja wyinaty tø yjatyimy'uktøñi. ³³ Winets ja tø'øxyøjk tsø'øgi yjanchyikmibejpniiyyi, ñija'wipts ja' jøts ku ja wyinaty ja tyaxnaxyi tø ñaxy, xjats ja ojts twinguxanaay'øyi ja Jesús, tyamimadyakøjx ja tuki'iyi pøni sa jaty ja y'ejxi tyiyyi. ³⁴ Winets ja Jesús tñimaay ja tø'øxyøjk:

—Ja'agøjxp u'nk tø mdsø'øky ku ø tø xjanchjawí. Nøjkxni, Dios mgunuu'kxip, jøts kidi pa'am m'ukpaajtniyyi.

³⁵ Examnim ja Jesús jade'en wyinaty wya'añ, ku jaa'y jam yja'ttøø midi wyinaty tso'ondip jam møjaa'y tyøjkwindum, ja møjaa'y midi wyinaty tump jam tsaptøjkjotp, xjats ja yiknimaa'y:

—Tø ja mnøøx y'oo'kni. ¿Tiku yø windsøn nugo xyikjotkøjx'adi'ich?

³⁶ Myadøøpy idø'øn Jesús ja' ku ja møjaa'y jade'en yiknøjmi, xjats ja tñimaay:

—Kidi mdsø'øgi; ja'ayi amumjoojt xjanchjawit.

³⁷ Jøts ja ojts ñøjkxti, ka'ap ja Jesús tkupijky ja mayjaa'y jøts ja myøøtwidetiyyit, Pedro ja nugo myøøt'ajt, møøt ja Jacobo, jøts ja Juan midi ja Jacobo y'uch'ajtpy. ³⁸ Xjats ku ja jam yja'ttøø ma ja jaa'y jam wyinaty chøøni pøn tump tsaptøjkjotp, winets ja ojts t'ixy jøts ku ja jaa'y nugo xem yam y'adøtsnidi, pømbi jap waani yaxp, jøts pømbi jap janch møk yaxp.

³⁹ Xjats ja Jesús tyøjkii'ñ jap tøjkjøtpy, jøts ja tñimaay ja jaa'y:

—¿Tiku jadine'en mna'amdi, jadits ku mya'a'xti? Ka'ap yø kiixyu'nk y'øøky, maap yø'.

⁴⁰ Winets ja jaa'y ja ojts tñixe'ekti. Xjats ja Jesús t'ixkajxpidsømgijxy ja jaa'y, nugo u'nkteety u'nktaak ja ojts tmøødi jøts ja pabøjkpitøjk midi ja jam wyinaty myøøt'ajtpy, xjats ja tyøjkii'ñ ma ja kiixyu'nk jap wyinaty, ⁴¹ jøts ja ojts tñixaji kyø'køjxp, yide'en ja tñimaay:

—Talita, cumi —yide'en idø'øn ja tijy: Mets u'nk idø'øn nnimaapy, pidø'øk.

⁴² Xjats ja kiixyu'nk jatyī tyanaagyukiyīīñ jøts ja yø'øbyijky jadigojk, makmajtsk ja yjumøjt ja wyinaty. Winets ja jaa'y yjanchø'jkityigøødyøø ku ja jade'en t'ejxtøø. ⁴³ Jøts ja Jesús møk'ampy t'ane'emy ja jaa'y, jøts ka'ap pøn ttuknijawidit ku ja kiixy jade'en wyinaty tø yjukpyiky, yide'en ja møjaa'y yiknimaadyøø jøts wan kyaaky tmo'odi ja kiixyu'nk.

6

Ku ja Jesús yja'jty jadigojk Nazaretit kajpjotp

¹ Xjats ja Jesús jam chøø'ñ jøts ja ñøjkxnimøø jadigojk y'etjotp, ja pyabøjkpitøjk ja myøøtnøjkx. ² Xjats ku tpaajty ja poo'kxin xøøw, winets ja yik'ixpøjktøjkijyīīñ jam tsaptøjkjotp. Jøts ja mayjaa'y pøn ja wyinaty patmadojiyīp, ñigyumaap ja tyimyja'widøø ku ja jade'en yik'ixpiky, xjats ja wyandøø:

—¿Ma yø jade'en tø y'ixpiky? ¿Ti wijy'ajtin yø jade'en tø yikmø'øy, jøts sudso yø jade'en ja tunk tjaty midi naxwii'ñit jaa'y ni tu'ugin kyajajtip? ³ ¿Ti kidi ya'at ja tsajtspi, ja Mariyixi yø y'u'nk, ja Jacobo y'ajch, møøt ja José, møøt ja Judas, jøts ja Simón? Pø yø'øxi ja y'ajch'ajttip, jøts nayø' ja kiixyuna'jk y'ay'ajttip pøn ya tsinaadyīp, ¿kidi?

Jade'en ja wyandøø, xjats ja jade'en tkamibøjkidøø ja Jesús y'ixpøjkin. ⁴ Winets Jesús ja ñimaajyidøø:

—Niduki'iyi jaa'y twindsø'øgidi ja Dios kyugajpxy, ja'ayi ja nugo kawindsø'jkijyīp pøn ja myigugajp'ajtpy, pøn ja møøt tyukjaa'y'aty, jøts pøn ja myøøtsinaapy jam tyøjkjotp.

⁵ Xjats ja jam jade'en niti tkatuuñ, nugo ja waani tyiktsøøjky ja pamaa'y ku ja ojts tkønixajy. ⁶ Jøts nugo ja jadi'ñi tkumaa'yiyīīñ tkudajiyīīñ ku jaa'y ja kyajanchja'wiyøø. Xjats ja jade'en kajp kajp wyidijty mā jaty ja kajp jam wyinaty wingon tyañ, jamts ja yik'ixpijky.

Ku ja Jesús tkexy ja pyabøjkpitøjk kajpxwa'kxpi

⁷ Ku dø'øn ja wyinaty jade'en tø yik'ixpiky, winets ja tyaajxiyīīñ ja myakmajtskpi jaa'y, jøts ja tpagejxy namajtsk jaty, ojts ja tkutujkmøøgyixy sudso ja kuwani tyikpidsø'ømdit ja miku'. ⁸ Yikxon ja ojts t'ane'emy jøts ja niti tkako'ondit ñiduu'yø'øyik, nugo tyajk ja ja'ayi kyaptip. Ka'ap ja ti tminøjkxtit, ni pejni, ni tsapkaagyī, ni meeñi, niti tkako'ondit. ⁹ Nugo kyø'øku'nk ja ja'ayi ttuktawa'agidit, jøts nijan tu'ugyi twetstīt, ka'ap majtsk, jade'en ja yik'ana'amdøø. ¹⁰ Xjats ja yjaaktyimyiknimaadyøø:

—Ku muum tøjkjøøjty mdøkidit, tu'ugyi mja'ta'aktit, jam idø'øn mja'attit mdsoondit kunim mdsoondit jam kajpkøjxp, winetnimts mbidsø'ømdit jam. ¹¹ Jøts pøni magajp mgayikupøkt, pøni mā pøn niwine'enin mgapatmadoowa'añidi, jøts ku jam mdsoondit, winets pu'ux xwinaptit mdekyøjxp, jøts jade'eñi xuk'ejxtit jøts ku jade'eñi tø mnañiwa'açhidi. Janch øts idø'øn nwa'añ, janch meets idø'øn nnøjmi, ku Dios mye'ent tu'ukpi xøøw jøts tiidyunwa'ant ja jaa'y, winets ja kajp nøjkx jinaxy yiktiidyuñ pøni mā mgayikupøkti, jøts ne'egi ka'ap ja Sodomit kajp møøt ja Gomorrit kajp jade'en nøjkx yiktiidyundi sa ja nøjkx yiktiidyundi.

¹² Xjats ja pyabøjkpitøjk ojts choondøø, jøts ja ojts yide'en kya'amaawyidetti jøts wan ja jaa'y chinaa'yin tyiktigatsti, wan tja'dyigøøgyøxti tuki'iyi ja kya'øyjaa'y'ajtindi pøni sa ja wyinaty tø chøønididi. ¹³ Jøts may ja nayide'en tyikpidsømdøø ja miku' midi jaa'y jam wyinaty myøøt'ajttip, jøts ja nayide'en tyiktsøktøø may ja pamaa'y ku aceite ja ojts ttajaaxti.

Ku ja Juan Bautista ja o'jkin tpaajty

¹⁴ Xjats ja windsøn Herodes ja tñimadøøy ku ja Jesús øy pøn jaa'y ñija'winiyi jøts ku ja tyikutuky, winets ja Herodes wyaañ:

—Ja Juan midi ja jaa'y ojts tyiknøbety, ja' inet tø pyidsimy jadigojk jap oo'kpi jutjotpy.

15 Xjats jadu'ukpi jaa'y ñomidi:

—Elías ja'.

Jøts pømbi wamip:

—Dios ja' kyugajpxy, nayide'en sam jekyip myemidi ja Dios kyugajpxy.

16 Winets ja Herodes wyaañ ku ja jade'en tmadøoy:

—Ja Juan inet ja' pøn øts ojts nnankyajtspøødyi ja kyubajk, ja' inet yø tø pyidsimy jadigojk jap oo'kpi jutjotpy.

Jade'en ja Herodes wyaañ.

17 Kumi ja' ja wyinaty tø tsumy, ja' ja wyinaty tø tkøwiiñ tpakwiiñ jap puxøjkjotpy ja' agøjxp jøts ja Herodías yjotkujk'att, ja tø'øxyøjk pøn ja Felipe jawyeen y'atsnidø'øxy'ajt, pøn ja Herodes wyinaty tø t'atskap'aty. Ja'ats ja Herodes nugo myøøtsinaapy. 18 Paty ja Juan ja wyinaty yide'en tø ñii'mxyi:

—Ka'ap kyutukyi jøts m'uch ja ñidø'øxy nugo xmøøt'atit.

19 Xjats ja Herodías wyinaty jade'en tø tjanchmi'ambiky ja Juan jøts ja tyimyik'ookwa'añ, xjats ja ka'ap tmiwinmaa'nbyaaty sudso ja t'ukyik'ookt; 20 kumi ñija'wip ja Herodes wyinaty jøts ku ja Juan wyinaty øy tsuj yjaa'y'aty ku pøky tkamøødi, paty ja ttsø'øgi jøts paty ja ñidø'øxy ja sa tkaduktuñ. Pyatmadoojip yikxon ja kyajpxy ku ja Juan janch tsuj myadya'aky, øy ja mabaat tjaganimadøy. 21 Xjats ja tiempi tpaajty ku ja Herodías jotkumoni wyaañ sudso ja tyik'ookt ja Juan. Winet et ja Herodes twaadsøoy ja tyumbitøjk migaabyi mi'ukpi, ja'agøjxp ku syandi xøøw ja wyinaty tyiknaxy. Ja may soldadi windsøn ja wyaadsoow møøt ja riki jaa'y, jøts nayide'en ja mōjaa'dyøjkti pøn ja kutujk jam wyinaty t'adsinaadyip Galilea. 22 Winets ja Herodías ñøøx tyøjkii'iiñ jap ma ja jaa'y jap wyinaty kyaydi y'uukti jøts ja jap y'ejch, xjats ja Herodes ja ojts tjanchuj'ixy ja y'ajtsk, nayide'en ja jaa'myidi pøn ja jap wyinaty myøøtkaapy. Winets ja tnimaay ja kiixy midi jap wyinaty tø y'ech:

—Amidook øts pøni ti mdsøjkpy, nyakp øts inet øy midi.

23 Ojts Dios ja ttuk'ixy jøts ku ja tmo'ot pøni ti ja kiixy kø'øm y'amidøøpy, pikta'aky paat kutujk paat ja kukwa'kxy tyakwa'añ. 24 Xjats ku ja kiixy jade'en tmadøoy winets ja pyidsiimy, jøts tyaak ja t'atsnimaay:

—¿Ti n'amido'op?

Xjats ja ojts ñii'mxyi:

—Ja Juan kyubajk m'amidoojiiyip pøn ja jaa'y tyiknøbajt.

25 Winets ja kiixy jaty tyøjkii'iiñ nay jap ma ja windsøn jap wyinaty, jøts ja tnimaay:

—Ixyamyi ndsøky ja Juan kyubajk pøn jaa'y tyiknøbajt, ja' øts kyubajk xmøøjyip txyjotpy.

26 Winets ja windsøn yjanchjotmay'oo'kpijky ku ja kiixy jade'en wyaañ; jøts kumi tø ja wyinaty Dios ttuk'ejnii jøts ku ja tyakt tuki'iyi pøni ti ja kiixy y'amidøøpy, tø migaabyi mi'ukpi ja wyinaty jade'en tmadowdi, xjats ja jade'en sa tkanimaay, kyupøjk ja' midi idø'øn ja kiixy wyinaty y'amidøøpy. 27 Jaty syoldadi tu'uk tkejxy pøn wyinaty y'ejx'ejtíp, jøts ja t'atsyikwinajkit ja Juan kyubajk, jøts tyikme'ent mōkta'aky'ampy. 28 Xjats ja soldadi chøø'ñ, jøts ja ojts ñijkxy jap puxøjkjotpy, japts Juan kyubajk ja ojts tkajtspo'jtiiy, jøts ja tyikmiiñ txyjotp. Jade'en ja kiixy ja yikømmøoy, jøts ja jade'en tmøoy ja tyaak.

29 Xjats ku ja Juan pyabøjkpitøjk ñija'wiyøø, winets ja yikpøkjø'knøø, ojts pyabøjkpitøjk ja yikpidø'øgyi, ja' ja ojts yiknaxøkiyidi.

Ku ja Jesús tyikaay ja nimagoxk milbi jaa'y

30 Xjats ja Jesús ja kyudanaabyi tminabyaajtøø, jøts ja ojts tyamimadyakixyi ti jaty ja wyinaty tø ttundi, jøts ti ja wyinaty tø ttuk'ixpøkti ja jaa'y. 31 Xjats Jesús ja tnimaay:

—Mendi, wan tjaa'myindi poo'kxpi ma et abak.

Ja'agøjxp idø'øn ja jam jade'en ñøjkxw'a'andi ku ja mayjaa'y ja myiyø'øwyimbityidi myiyø'ø'y'adijyidi, niwine'enin ja yikxon kyakaydi kya'uukti. ³² Winets ja barki ja ttatøjkidøø, jøts ja ñøjkxtøø abak etjotp. ³³ Mayjaa'y ja y'ejxidøø ku ja jade'en choo'ndøø. Yik'ejxkajp ja Jesús; xjats ja choo'ndøø pujtpim, kawinaak kajp ja jaa'y jam ñøjkxtøø jøts ja ojts t'anajxukti ja Jesús, jawyeen ja mayjaa'y jam ne'egi yja'ttøø ma ja wyinaty y'ukja'atwa'andi. ³⁴ Xjats ku ja jam yja'ttøø, ku ja Jesús pyidsiimy jap barkijøtpy, winets ja t'ejxpaajty ja mayjaa'y, jøts ja ojts t'ayo'ixy ku ja jam yik'ayowim tyanidi mabyorreegin midi ñi'ejxpi ka'ejtp; jøts ja tyik'ixpøjktøjkiyiñ, jeky ja tyik'ixpijky. ³⁵ Xjats ku ja et chuu'ñøø, winets ja pyabøjkpitøjk ja wingon ñimejnøø, jøts ja ñimaajyøø:

—Tøts ja et chuu'ñi, pø ka'apts ya pøn chøøni. ³⁶ Kajxni yø jaa'y, wan tñøjkxnidi kamjøøjty, wan tñøjkxnidi ma kajp wingon, jamts tju'udyit ja jii'kxy, kumi janch yu'oo'knidip yø'.

³⁷ Winets ja Jesús y'adsøø y jøts ja wyaañ:

—Ka'ap idø'øn mwa'ant, mo'odi chapkaaky, yikaydi.

Xjats ja pyabøjkpitøjk wyandøø:

—¿Nøjkxp øøts jøts øøts tsapkaaky n'atsju'uty majtsk magø'pxy denario, jøts øøts yø jaa'y nyika'aty?

³⁸ Winets ja Jesús wyaañ:

—¿Ja winaak jap mdsapkaaktyi? Nøjkx x'ats'ejxti.

Xjats ku ja t'ejxtøø, winets ja tñimaadyøø:

—Magoxk ja tsapkaaky jap jøts majtsk ja ajkx.

³⁹ Xjats ja Jesús tyikutujky jøts wan ja jaa'y wanjaty t'ixa'akti jam tsuxk miyotp; ⁴⁰ winets ja jaa'y y'ixaktøø tukpiky jaty, pømbi niwixijxmyajk ixaktøø, jøts pømbi nimagø'pxy. ⁴¹ Xjats ja Jesús magoxk tñixajiyiñ ja tsapkaaky jøts majtsk ja ajkx, winets ja ojts tpat'ixy yø tsajp, jøts ja ojts tkunuu'kxy ja tsapkaaky xjats ja ojts ttukwa'kxy, jøts ja pyabøjkpitøjk ja tmø'ø y jøts ja ttaguma'adyit ja jaa'y jøts ja tyikwa'kxidit. Tuki'iyi ja jaa'y ajkx yiktagumaagyøjxtøø, ojts ja yikmøøgyøxti, ⁴² xjats ja kyaadyøø ku'uxyi; ⁴³ winets ja tsapkaaky windank makmajtsk kach yikpøkmujky møøt ja ajkx windank. ⁴⁴ Janch namay ja jaa'y jam wyinaty yjøø'kxti, ja yaa'dyøjk ja yikmachodøø nimagoxk mil.

Ku ja Jesús yø'ø y jam mejwyingøjxp

⁴⁵ Xjats ja Jesús ja pyabøjkpitøjk tkugajxigyijxy jap barkijøtpy, jøts ja ojts tyiknijkxy jawyeen jam Betsaida, kyajxjawyeeni jaa jøts ja nøø ja ttanaxtit. Xjats ja yjaaktaañ jøts ja jaa'y ja tminawya'kxit. ⁴⁶ Xjats ku ja jade'en tminawya'kxøø ja mayjaa'y, winets ja ñijkxy Dios'ajot'ajtpi kojpkøjxp. ⁴⁷ Jøts ja barki jam ja wyinaty kujk ñaxy mejkyujk'am ku ja et kyoodsiyiñ, jøts ja Jesús jam wyinaty nadyu'uk tø tyañ jam naxkøjxp. ⁴⁸ Xjats ja ojts t'ixy ja pyabøjkpitøjk jøts ku ja ka'ap y'ukmaa'niyidi sudso tkaaptit ja nøø, ja'agøjxp ku ja poj wyinaty yø'ø y wimbet'ampy. Xjats ku yjöpkyoots'ajty winets ja Jesús ojts tñinijkxy wingon ja pyabøjkpitøjk, jadi'ñi ja nøøwingøjxp yø'ø y, jøts tyimy'ukwinaxwampy ja pyabøjkpitøjk ja wyinaty. ⁴⁹ Ku ja ojts y'ejxpaadyi jøts ku ja yø'ø y jam nøøwingøjxp, winets ja pyabøjkpitøjk yjanchabaagaktøø, miku' ja wyinaty tø tyimwyinmaydi; ⁵⁰ kumi tø ja wyinaty niduki'iyi t'ejxti, janch tsø'jkidip ja'. Xjats Jesús ja ojts myigajpxyidi, yide'en ja ojts yiknøjmidi:

—Jotmøkpøkti; øts idø'øn, kidi mdsø'øgidi!

⁵¹ Xjats ja kyøxpejty jam barkijotp ma ja jam wyinaty, jøts ja poj jaty ñajxy; ñigyumaap ja tyimya'widøø, ⁵² kumi ka'anin ja wyinaty tñijawidi yikxon pøni pøn ja Jesús, øy ja tsapkaaky ja' tjayikmayi, janch kujuun idø'øn ja'adi, ka'ap idø'øn ja tja'gyukidi.

Ku ja Jesús tyiktsøøjky ja mayjaa'y jam Genesaret

⁵³ Xjats ja ttanajxtøø ja mejy, jøts ja ojts yja'atti jam Genesaretit jaa'y y'etjotp, jamts byarki ja ojts tñixojtspatti nøøba'am. ⁵⁴ Ja'ayi ja pyidsømdøø jap barkijøtpy, winets ja

Jesús jatyí yik'ejxkajpy. ⁵⁵ Jøts ja jaa'y jatyí ttukmadow'abidsømdøø ja myigu'uk ma jaty ja kajp jam wyinaty jøts ku ja Jesús tø yja'aty, xjats ja jaa'y tkiyja'tpinibøjkidøø maabajtkøjxp ja pamaa'y ma ja jam wyinaty tnijawidi ja Jesús. ⁵⁶ Jøts ku ja Jesús yja'ljty ømyadsowi, ku ja tniyø'øyi ja kajp møj mutsk, uk ku ja yja'aty kamjotp, ejtp idø'øn ja jaa'y tuu'am tpikta'akti ja pamaa'y, jamts ja tminuu'kxa'akti ja Jesús jøts wyetpaa' ja wine'enin tyukpaadidit; jøts pøni pøn ja wet paajtiyip, jatyí ja cho'okti.

7

Ja ka'øwynmaa'ñ ja jaa'y tyikpøkpyajtp

¹ Winets ja Jesús yiknimiñ ma ja jam wyinaty, ja fariseotøjk ja ojts ñimiñi møøt ja kajpxwejpitøjk, pøn jam wyinaty winaa'in tø choondi Jerusalén. ² Ja'ats t'ejxtøø kudam ja Jesús pyabøjkpitøjk kyøbujti ku kyaydi, jøts ka'ap idø'øn ejxim ja møjaa'y chinaa'yin, ja'agøjxp ja ojts wenk tnigajpxti tniadya'akti. ³ (Kumi yide'en ja fariseotøjk kostumbri tmøø'tatti jøts nayide'en ja myigu'uk israelit jaa'y, ja' idø'øn ja pyadundip pøni sa jaty ja møjaa'dyøjk wyinaty tø y'atsøønidi, ka' pøn kyay kunim ja kyagøbujti may ojk, winetnimts ja wa'ats ñayjawiyidi. ⁴ Nayide'en pøni pøn maayjotpy tsoo'mp, jøts pøni ku ja ka'ap kyøbujñim kawinaak ojk, ka'ap ja nayide'en kya'aty. May idø'øn ja kostumbri jade'en midi ja pyadundip, ejtp idø'øn yikpujy uuik'iñ, tsajpts'øøy, møøt texy tas midi tum pujx, jøts maabajt, jade'en ja wa'ats tyik'etti.) ⁵ Paty fariseotøjk møøt ja kajpxwejpitøjk tnimaadyøø ja Jesús:

—¿Tigøjxp ku yø mbabøjkpitøjk jade'en ja kyø' tkapujti ku yø kyaydi sa ja møjaa'y chinaa'yin wya'añ?

⁶ Xjats ja Jesús y'adsøøy jøts ja wyaañ:

—Meets win'øø'mbi, yikxon ja Isaías midi Dios kyugajpxy'ajtpy ojts tja'ay ja Dios kyajpxy ku ja wyaañ:

Nugo yø jaa'y jade'en y'aaw ttakajpxy ku øts yø xwindsø'øgi, jøts niwine'enin øts n'ayuujk yø xkaja'gyukiyi.

⁷ Niti yø kyawa'añ jade'en, øy øts yø mabaat xjawindsø'øgi, ja'agøjxp ku tyikyø'ødyi ja jaa'y ixpøjkin jøts wya'andi kuts ja nja'aji.

⁸ Nayide'en ja Jesús wyami:

—Jøts meets idø'øn jade'en, kumi jade'en meets Dios kyutujk x'ixwejtsi, jøts xpadundi midi jaa'y kyostumbri'ajtpy: ja texpyujk, ja taspujuk, jøts pøni ti jaty meets jade'en mdumpy.

⁹ Jade'en ja tnimaay:

—Janch wijy mee mnayjawiniyi jøts ku mgostumbri jade'en xpadundi, m'ixwijchp meets ja Dios kyutujk. ¹⁰ Øy ja Moisés yide'en yjawaañ: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan ja jatyí t'øøky.” ¹¹ Jøts ku meets, mdanigutujk'ajtpy meets ja jaa'y, ka'ap idø'øn tyimy'aguwanikøjxpi jøts ja tyeety tyaak ja tyimwyindsø'øgit, wan ja tnøjmidi ja tyeety ja tyaak: “Ka'ap inet ixyam nbudøkit, ka' ti nmo'owa'añ, ja'agøjxp ku øts nbikta'aky tmøø'taty Corbán.” (Corbán, ja' tyijpy ayuujk, tø ndamiyøxy ja Dios tuki'iyi nbikta'aky); ¹² jøts ku ja jade'en wya'añ, nijuunits meets ja xka'uktukpudøjkyini ja tyeety ja tyaak. ¹³ Jade'en'ampy meets ja xka'ukyikmøjtøjkiñi ja Dios kyajpxy, ja'agøjxp ku ja mgostumbri xuk'ixpøkti xem yam ja u'nk ja una'jk, jøts nayide'en ja mdsinaa'yin xyikyø'ødyi.

¹⁴ Xjats ja tyajxmujkøjx ja jaa'y jadigojk, jøts ja tnimaay:

—Patmadoodik øts ni'ijtyi, jøts xnimado'odit tu'uk ja ayuujk: ¹⁵ Niti jii'kxy jaa'y kyayikpøkpyetyi ku jaa'y ti tjii'kxy. Ja' jaa'y yikpøkpyajtip midi tsoo'mp jam anmija'winjotp. ¹⁶ Madowdi yikxon, pø jamxi mdatskti, yø'øts mdamado'odip.

¹⁷ Xjats ku ja Jesús tminawya'kxøø ja jaa'y, winets ja tyøjkiyñiñ tøjjøtpy, japts pyabøjkpitøjk ja ojts yiktiyi ti ja'abi madya'aky jade'en tyijpy. ¹⁸ Xjats ja tnimaay:

—¿Ni meets paat yø xkanimadooni? ¿Ka'ap xnijawidi ku jaa'y niti jii'kxy kyayikpøkpyetyi ku jaa'y ti tji'kxy? ¹⁹ Ka'ap jii'kxy tyøki anmija'winjotp, maatsjotp ja jii'kxy tyøki ma ja tinch, jøts pyidsimy ku jaa'y ñijkxy nawyiyø'yibi.

Jade'en idø'on ja ojts tñigajpxy jøts ku jii'kxy tum wə'ats midi yikjøø'kxp, ka' yikpøkpyety. ²⁰ Yide'en ja wyaañ:

—Ja' jaa'y yikpøkpyajtip midi pidsømp y'anmija'winjotp. ²¹ Kumi jam pyidsimy ja ka'øwyinmaa'ñ ku jaa'y kya'øwyinmay, jam pyidsimy ku jaa'y ñiyaa'y ñidø'øxy ñabyøjkxyidi, ku nadyu'uk jaa'y ñamyøøt'atyidi, ku jaa'y yikjaa'y'øøky, ²² ku jaa'y my-eech, ku jaa'y wenk jaa'y pyikta'aky tsojkiyi, ku jaa'y ti tka'ødyuñ, ku jaa'y tyaay'aty, ku jaa'y najts'aaw najtsjoojt yjaa'y'aty, ku jaa'y myigu'uk ti ttami'ama'at'aty, ku jaa'y pyagajpxy, ku jaa'y ñamyikexyi, ku jaa'y niti tkawinmay. ²³ Tum anmija'winjotp yø ka'ødyunk jade'en chøøñ midi jaa'y tyikpøkpyajtp.

Ku ja Tiro tø'øxyøjk tjanchja'wiyi'ñ ja Jesús

²⁴ Xjats ja Jesús jam chøø'ñ jøts ja ñijkxy Tiro jøts Sidón, jade'en ja et jam txøøw'aty ma dø'on ja ñijkxy. Xjats ku tøjka ja jam tpaajty jamts ja tyøjkiyi'ñ, ka'ap ja pøn t'uktuknijawiwya'añ ku ja jam. Ma ka'ap ja jade'en yjajty ojts ja jaty'i yiknijawwi. ²⁵ Jaty'i tø'øxyøjk ja tu'uk ñija'wiyøø pøn ñøøxu'nk jam wyinaty miku' tmøøt'ajtp; ja'ats jam meen jøts ja wyinguxanaajyi. ²⁶ Ojts ja tø'øxyøjk wya'añ jøts ja Jesús tyikpidsøømt ja miku' midi ja kiixyu'nk jam wyinaty myøøt'ajtpy, sirofenicyit jaa'y idø'on ja tø'øxyøjk pøn jam jade'en meen, jøts griego ayuujk ja kyajpxpy. ²⁷ Xjats ja Jesús y'adsøø y jøts ja wyaañ:

—Jawyeen øts ja israelit jaa'y nbudøkit, jøts meets ix'oojknim.

²⁸ Winets ja tø'øxyøjk y'adsøø y jøts ja wyaañ:

—Janch jade'en teety, ka'ap kyajjade'eni. Jade'en øts icyam nnayjawiyi ejxim ja uku'ngin, jøts ja israelit jaa'y ndejint ejxim jaa'y una'jkin kyaydi, jøts ja kyaaky abu'xk tyika'adi jøts ja uku'nk ja jaty'i tkaamyuky. Paty teety nnøjmi jøts mdu'ump may'ajt jøts ø xpudøkit.

²⁹ Xjats ja Jesús tnimaay ja tø'øxyøjk:

—Janch idø'on mwa'añ; nøjkxti. Tø ja m'u'nk ja miku' myajtstuujtñiyi.

³⁰ Xjats ja tø'øxyøjk ojts ñijkxy tyøjkjotp, kuts ja jam yja'aty jøts ja ñøøxu'nk ja tpaajty maabajtkøjxp. Ka'ap miku' ja wyinaty t'ukmøøt'ajtni, tø ja wyinaty myajtstuujtñiyi.

Ku Jesús ja nat jaa'y tyatsk tyik'awajtsiyi

³¹ Xjats ja Jesús jam choo'ngojmøø Tiro, jøts ja ñijkxy Sidón, tyimñajxts ja jam jøts magyajp ja ttanajxy jam Decápolis etjotp, jøts ja yja'jty ma ja mejy txøøw'aty Galilea.

³² Jamts jaa'y jadu'uk yiktaniiiñ pøn wyinaty nat, pøn wyinaty atoojts, ka'ap ja y'øgyajpxy, winets ja yiknimaay jøts ja kyø' ja ttanixajt jøts ja tyiktso'okt. ³³ Xjats Jesús ja ojts abiky tsoo tyikniykxy, ojts ja nadyu'uk tjiway ma ja mayjaa'y jam wyinaty, jøts kyøtsa'jx ja ojts tkudeji jap nat jaa'y tyatskjøtpy, ojts kyø' ja ttsujweey jøts jaa'y tyoojts ja ojts ttaajti. ³⁴ Winets ja Jesús chajp'ixy, jøts ojts myøkkejy, xjats wyaañ:

—¡Efata! —midi ayuujk tyijpy: ¡Awa'ats!

³⁵ Winets ja nat jaa'y jaty'i ja tyatsk y'awaajch, jøts ja tyoojts nayide'en y'øyyi'ñ, xjats ja jade'en kyajpxpijky øy, ojts ja yikxon y'awijy. ³⁶ Winets ja Jesús yikxon ojts t'uk'ane'emy jawyeen ja mayjaa'y jøts ja pøn ka'ap ttukmado'odit; ku ja jade'en tnimaay, ne'egi jinaxy ja ojts tnimadya'akti. ³⁷ Xjats ja jade'en ñigyumaap tjawidi, yide'en ja wyandøø:

—Tyum'ødyumpy øy ti; yikmadøøpy nat jaa'y, jøts yik'awijpy uum jaa'y.

8

Ku ja Jesús tyikaay ja ñimaktaxk milbi jaa'y

¹ Winet ets mayjaa'y jam wyinaty tø ñamyukyidi, jøts ja kyaajyk ja kya'etti. Xjats ja Jesús tyaajxyi'ñ ja pyabøjkpitøjk, jøts ja tnimaay:

² —Njanch'ayo'ijxpy øts yø jaa'y, kumi tyigøøkkxøøwyip øts yø ya xnimenidi, jade'en øts yø ya kujk nmøøtsinaañidi jøts ja kyaaky tø kyøjxnidi. ³ Ku øts inet yø ayuu axøøw njakaxt jam tyøjkjotp, jadi'iñi net yø muum yjotkøjxnidit tuu'ajy, kumi ja winaagin pøn tø choondi jagam et.

⁴ Xjats pyabøjkpitøjk ja ojts y'adsøy, jøts ja ñimaajyøø:

—¿Sudso yø jaa'y ya yjanchka'adyit, pø ka'ats ya pøn chøøni?

⁵ Winets ja Jesús tyiktiiy ja pyabøjkpitøjk, yide'en ja tnimaay:

—¿Winaak tsapkaaky jap xmøødidi?

Winets ja wyandøø:

—Wixujk.

⁶ Xjats Jesús tnimaay ja jaa'y jøts wan t'ixakøxti jam naxkøjxp, winets ja tñixajiyiñ ja tsapkaaky, jøts ja ttamøja'wiyiñ ja Dios. Xjats ja ojts ttukwa'kxy ja tsapkaaky jøts ja tmøøy ja pyabøjkpitøjk, winets ja ttagumaadyøjkidøø ja jaa'y. ⁷ Jamts winaagin ja mutsk ajkxu'nk ja wyinaty tmøøt'ajtmidi, ja'ats ja Jesús ojts tkunuu'kxy, jøts pyabøjkpitøjk ja ttaguwa'aniyiñ jøts wan ja jaa'y ja ttagumaagyøxti. ⁸ Xjats ja jaa'y ni'ijtyi kyaagyøjxtøø, ojts yikpøkmuky wixujk kach. ⁹ Jøts ja jaa'y pøn wyinaty tø kyaydi, nimaktaxk milin ja jam wyinaty ñamay'atti. Xjats ja Jesús ja ojts tminawya'kxniyi, ¹⁰ jøts ja tyøjkinaa jap barkijøtpy møøt ja pyabøjkpitøjk, jøts ja ñøjkxtøø jam Dalmanutit jaa'y y'etjotp.

Ku ja fariseotøjk t'amidoodøø ja Jesús, jøts ja ttuk'ejxtit ja myilagri'ajtin

¹¹ Winets ja fariseotøjk jam myendøø, jøts ja tminagyajpxøjkidøø ja Jesús. Ja' ja ojts t'amidowdi, jøts ja Jesús ja dios'ajtin tyikwingaxø'økt ya naxwiiñ, nugo dø'on jade'en tjot'ejxti. ¹² Xjats Jesús ja tkumøkkajiyiñ, jøts ja wyaañ:

—¿Tigøjxp ku jaa'y ya'atpi xøøw ya'atpi jumøjt t'amidowdi jøts yiktuk'ejxtit ja dios'ajtin? Janch meets idø'on nnøjmi, jøts ku jade'embi jaa'y ni tuk'ojkin kyayiktuk'ejxtit ja dios'ajtin.

¹³ Xjats ja tmajtstuupty, jøts ja tyøjkiyiñ jap byarkijøtpy, jøts ja ñijkxy jaduktamajñ'ampy jam nøøba'am.

Ja fariseit jaa'y y'ixpøjkin

¹⁴ Nika'ap kyaaky ja wyinaty tø tkondi, tø ja wyinaty tja'dyigøydi, tu'ugyi tsapkaaky'nk ja wyinaty jap tkonidi jap barkijøtpy. ¹⁵ Xjats ja Jesús tnimaay ja pyabøjkpitøjk:

—Ejxim Herodes, ejxim fariseotøjk lyevaduri xkupøjkidi, øyim mnay'ejx'etidit.

¹⁶ Winets ja pyabøjkpitøjk jatyi myadyaktøjkidøø, yide'en ja ñawyajnidøø:

—Ja'agøjxp yø jade'en wya'añ ku adøm tsapkaaky tø ngayikmi'iñidi.

¹⁷ Wa'ats Jesús ja tñijawi ti ja wyinaty kyajpxy'ajttip. Ka'ap ja tsapkaaky ja tijy mididi ñimadoodip ja pyabøjkpitøjk, ja Herodes ja fariseotøjk ndejint ja y'ixpøjkin ja y'ayuujk tyijpy. Paty ja Jesús yide'en tyiktiiy:

—¿Tiku mwa'andi ku mdsapkaaky xijy kya'etti? ¿Ka'anim xnimadowdi, jøts nika'ap xnijawidinim, janch juun mgubajk xmøødidi? ¹⁸ ¿Ka'anim mgø'øom ween xawin'ejxti, jøts ni mdatsk xkadamadoodinim, niwine'enin xkaja'myatsti? ¹⁹ Ku øts ojts tsapkaaky magoxk nyikwa'kxy, jøts ojts nmø'øy ja magoxk milbi jaa'y, ¿winaak kach ja kaaky windank ojts xpøkmukti?

Xjats ja wyandøø:

—Makmajtsk kach.

²⁰ —¿Jøts mja'myajtstip nayide'en ku øts ojts ja tsapkaaky wixujk nyikwa'kxy, jøts øts ja myaktaxk milbi jaa'y ojts nmø'øy? ¿Jøts winaak kach ja kaaky windank xpøkmuktøø?

Xjats ja wyandøø:

—Wixujk.

²¹ Winets Jesús ja pyabøjkpitøjk tnimaay:

—Ka'anindam meets idø'øn xja'gyuki. Ja tsapkaaky yø meets ja'ayi mdajot-may'øø'kpy.

Ku ja Jesús tyikwin'ejxwa'kxy tu'uk ja winap jaa'y jam Betsaida

²² Jawaani y'ijty, xjats ja yja'tti jam Betsaida ma ja kajp wyinaty jade'en txøøwi; jamts ja Jesús yiktaniiiñ tu'uk ja winap jaa'y, jøts ja ojts yikminuu'kxa'aky, jøts ja tnixajit jøts ja tyiktso'okt. ²³ Xjats ja jade'en tnixajiyii'ñ kyø'køjxp, jøts ja tyikpidsiimy kajpjotp. Winets tsujy ja ojts ttawenjaaxy jøts ja tnixajiyii'ñ, xjats ja tyiktiy jøts pøni kujk wyinaty wine'enin t'ixy øy ti. ²⁴ Winets ja winap jaa'y wyin'ejxwa'kxy, jøts wyaañ:

—N'ijxpy øts yø jaa'y ku yø'ødyi, ja ku jade'en kyaxø'okti sa kipyin.

²⁵ Winets ja Jesús jadigojk twinguxajiyii'ñ ja winap jaa'y, jøts ja yikxon tyik'ejxmøkiyii'ñ, ojts ja winap jaa'y ja wyeen y'awa'ach, tum wa'ats ja t'ejxni øy tyii'ji.

²⁶ Xjats Jesús ja tkajxni jam tyøjkwindum, yide'en ja tnimaay:

—Kidi mgajptøki, jøts nipøn jam sa xkanøjmit.

Ku ja Pedro wyaañ jøts ku ja Jesús yja'aji yiknitsokp, ja Cristo

²⁷ Tø dø'øn ja jade'en wyinaty y'ukjaty, xjats ja Jesús ja pyabøjkpitøjk tmøøtsøø'ñ jøts ja ñøjkxti jam Cesarea Filipo. Jade'en ja et xyøøw ma dø'øn ja ñøjkxti. Xjats ja Jesús tuu'ajy ja pyabøjkpitøjk tø tnimaay, jøts ja tyiktiy:

—¿Pønik øts, sa jaa'y wya'andi?

²⁸ Winets ja pyabøjkpitøjk y'adsoodøø, jøts ja wyandøø:

—Winaagin jaa'y wya'andi jøts ku mets Juan Bautista, pømbi nømidip jøts ku mets Elías midi jekyibim yiknija'wip, jøts ku mets Dios kyugajpx'ajtpi midi jekyibim yiknigajpxp yiknimadyakp.

²⁹ Xjats ja kø'øm ja Jesús yiktøøjidøø yide'en:

—Jøts meets, ¿sa meets m'ukwa'añ, pøn øts idø'øn?

Winets ja Pedro y'adsøøy jøts ja wyaañ:

—Ja yiknitsokpi mets, ja Cristo.

³⁰ Xjats Jesús ja ñimaajyidøø jøts ka'ap pøn ttukmado'odit jøts ku ja kyiristi.

Ku ja Jesús kø'øm tnigajpxy jøts ku ja y'ookt

³¹ Xjats ja Jesús tyik'ixpøjktøjkii'ñ ja pyabøjkpitøjk, ja' ja tyukmadoow sa ja y'ayo'ombaatt ja Dios, ja naxwii'ñit jaa'y ja myøjkudanaabyi, kø'øm idø'øn ja jade'en ñadyijyi. Yide'en ja Jesús ttukmadøøy jøts ku ja møjaa'dyøjk, ku ja israelit jaa'y ty-eetywindsøn, jøts ku ja kajpxwejpitøjk ja y'ixwetsiyit. Jade'en ja tnimaay ja pyabøjkpitøjk jøts ku ja ja' yik'oogit, tyukmadoow ja' ku ja jade'en y'ookt jøts ku ja kyidigøøk xøøw pyidsø'ømt jap oo'kpi jutjøtpy ku ja yjujkpyøkt. ³² Wa'ats ja ttukmadoogijxy ja pyabøjkpitøjk. Xjats ja Pedro ka'ap t'øyja'wiyii'ñ ku ja wyinaty tø wya'añ kuk ja y'ookt. Ja'agøjxp ja Pedro møk twingugajpxiyii'ñ ja Jesús. ³³ Xjats ja Jesús wya'kjimbijty, jøts ja pyabøjkpitøjk ja ojts twin'ixy, xjats ku Pedro miku'jin wyinaty tø kyajpxy, winets Jesús ja twingugajpxiyii'ñ nayide'en, jawaani møk'ampy ja tnimaay:

—iMets miku', jiwa'ak, majtstutk øts! Ka' mets jade'en mwinmay sam ja Dios Teety wyinmayin, jade'en me mwinmay sam øy pøn naxwii'ñit jaa'y.

³⁴ Winets ja Jesús ja pyabøjkpitøjk tyaa'jxyii'ñ, tuki'iyi ja tyajxmukijxy ja mayjaa'y jøts ja tnimaay:

—Pøni pøn tsojkin tmøøt'ajtp jøts øts ja nja' jade'en xpaduujnit, ka' mibaat kø'øm ñadyunk'atit, ja'ayi ku amumjoojt ñadyamiyoxit ja ayo'on jøts idø'øn jade'en tpadu'unt.

³⁵ Pønts kajade'enduñim nay'ejxip, niwindem tkapaaty ja nitso'ok'ajtin; jøts pøn ø xku'ayo'ombaajtip, ja' idø'øn tpaatp ja nitso'ok'ajtin. ³⁶ ¿Ja ti ja ñiwy'a'ant øy ja jaa'y tjaja'bøjkixy ja naxwii'ñ'ajtin jøts ja y'anmija'win ne'egi wyindigøy? ³⁷ Jabi ka'axi mibaat ja ñitso'ok'ajtin ja tkuju'uty. ³⁸ Jøts pøni pøn ø xatsø'ødyump, pøni pøn øts n'øgyajpxy n'øy'ayujuk xatsø'ødyuujnip ya jaa'y wyinduujy midi jekyip t'ukpadundip ja Dios, ya

pojkipi jaa'y wyinduujy, nayide'ents øts ja tsø'ødyumbi nøjkx ndatsø'ødyuñ ku øts ja Dios Teety kyutujk nmimejnit, ku øts ja ankilis nmøøtme'ent pøn tsinaadyip jap tsajpjøtpty. Øts idø'øn ja naxwii'ñit jaa'y nmøjkudanaabyi'ajtpy.

9

¹ Janch meets idø'øn nnøjmi, ja jaa'y ya winaagin tyanidi pøn ka'ookitip kunim ja t'ejxtit tñijawidit ja Dios kyutujk ku ja tpikta'akt møk'ampy.

Ku ja Jesús adsu'jky tuk'i'iyi'y'atstigajch, amuum chamambøjkijxy

² Tyudujkxøøwip ja Jesús wyinaty jade'en tø wya'añ, xjats ja pyabøjkpitøjk ja nidigøøk t'ukwaay, ja Pedro ja y'ukwaaw møøt ja Jacobo jøts møøt ja Juan, jade'en ja ojts tmøøtnijkxy jam kojpkøjxp mā ja Jesús adsu'jky tyigajch, jamts ja pyabøjkpitøjk wyinaty t'ukmøøtani. ³ Yikxon wyet ja chamambijky janch poop ejxim tsap'øø'pkyin, nipøn jaa'y wyet ya jade'en tkayikwa'ach sa dø'øn wyet ja pyoobiyi'ñ. ⁴ Winets ja pyabøjkpitøjk t'ejxpattøø ja Elías møøt ja Moisés, jøts ku ja tmøøtmadya'akti ja Jesús. ⁵ Xjats ja Pedro tnimaay ja Jesús:

—Windsøn, ityimy'øy'ajtp ku øø nyam'aty! Nyik'øyip øøts ujts'aadyøjk, tu'uk mets mja', tu'uk Moisés yja', jøts Elías yja' tu'uk.

⁶ Tø ja pyabøjkpitøjk wyinaty yjanchø'øgidyøjkinidi, ka'ap ja y'ukwinmaa'nbyatnidi sa ja tnøjmidit ja Jesús paty ja Pedro jade'en nugo y'ukwanaa. ⁷ Winets yoots myiiñ mā ja jam wyinaty, ja'ats ja ojts yik'adigøyidi, jøts jap yikmadøøy ja Dios y'ayuujk midi waan:

—Ya'at n'U'nk øts idø'øn njanchøjkpy, mimadojidi pøni sa wya'añ.

⁸ Xjats ku ja jaty y'ejxjø'ktøø, winets ja nipøn tka'ejxpattøø mā ja Jesús jam wyinaty, ja'ayi jam wyinaty nadyu'uk tanaapy.

⁹ Xjats ku ja choo'nidøø jam kojpkøjxp ku ja kyidaknidi, winets Jesús ja tya'ana'amidøø, jøts ja ka'ap pøn ttamimadya'aktit midi ja wyinaty tø t'ejxti, jaanim ja tmadya'akyø'ødyit kunim ja kø'øm oo'kpi jutjøtpty pyidsø'ømt jadigojk, jaa pøn myøjkudanaabyi'ajtpy ja naxwii'ñit jaa'y. ¹⁰ Xjats ja pyabøjkpitøjk jade'en kø'ømyi t'amaa'tsk'ajttøø, kø'ømyi ja jade'en tkajpxy'atti ti dø'øn ja jade'en tyijpy ku ja pyidsø'ømt jap oo'kpi jutjøtpty jadigojk.

¹¹ Xjats ja tyiktøødøø ja Jesús, yide'en ja tnimaadyøø:

—¿Tigøjxp ku ja kajpxwejpitøjk yide'en wya'andi jøts ku Elías jawyeen mye'ent, jøts ix'oojknim ja yiknitsokpi?

¹² Winets ja Jesús y'adsøøy jøts ja tnimaay:

—Janch me'emp ja Elías jawyeen, ja'ats nøjkx nayide'en tyikjajtp ja øgyostumbri midi Dios ojts tpikta'aky. ¿Jøts sa ja Dios kyajpxy wya'añ, sa øts ja nyiknigajpxy pøn møj kudanaabyi'ajtp, sak njatt? Yide'en ja Dios kyajpxy wya'añ jøts kuk ø n'ayo'ombaatt, ka'abik øts ja jaa'y xtsokt, x'ixwetspik øts ja jaa'y. ¹³ Jøts ndukmadøøpy meets ixyam ku ja Juan Bautista tø y'atsmiñ, jøts tø kyugajpx'aty nayide'en ejxim Elíasin, jøts jaa'y ja ojts yjemduñi tyeduñi pøni sa y'anmija'win ja tyimñeki, jajt idø'øn ja jade'en sa Dios kyajpxy wyinaty wya'añ.

Ku ja Jesús tyikmøkpjiky tu'uk ja mixyu'nk pøn wyinaty ja miku' tø tyatøkiyi

¹⁴ Jawaani y'ijty xjats ja Jesús tmøøtja'aty ja nidigøøk ja myigu'uk mā ja pyabøjkpitøjk jam wyinaty tø yjaaktandi, jøts ja t'ejxpattøø ja mayjaa'y ku ja pyabøjkpitøjk jam wyinaty tø yiknabejkinidi; jøts kajpxwejpitøjk ja jam tmøøtnay'øjyidi. ¹⁵ Xjats ku ja Jesús yik'ejxpaajty, winets ja jaa'y niduki'iyi ñigyumaap yjajtøø, jaty ja tñibujtjø'ktøø ja Jesús, jøts ja ojts tkajpxpoo'kxti. ¹⁶ Xjats Jesús ja yiktøøjidøø, yide'en ja ñimaajyidøø:

—¿Sats yø nbabøjkpitøjk xnøjmidi, ti yø møøt mnadyamigajpxidip?

¹⁷ Winets ja mayjaa'y nidu'ugin y'adsøøy jøts ja wyaañ:

—Windsøn, ixya me tø ndanimiñ tu'uk nmajnku'nk pøn ja miku' tmøøt'ajtp, jøts ja yø kayikajpxip. ¹⁸ Jaty miku' yø myachi ku yø mā ñijkxy, ja'ats yø yiknaxkidajkip, jamts yø

yjanch'a'øøpy jøts yjanchtøtskaaty, jade'en'ampy yø tø yjanchwindigøøñi, ka'ap myøjaaw yø ukteeni. Tø øts yø mbabøjkpitøjk njanøjmidi jøts tyikpidsø'ømdit yø miku' midit øts yø n'u'nk myøøt'ajtpy, jøts ka'ap yø tø myayidi.

¹⁹ Xjats ja Jesús y'adsøøpy jøts ja wyaañ:

—Mee kajanchja'wibidi, yø mbøky nugo myikmajadaktip. ¿Ma windemnim meets ja ngajpxy ja n'ayuujk xpabøjkpit, jøts windemnim meets yø jade'embis xuktatso'okt ku øts yø ejtp njanchjanigajpx'ity?

²⁰ Winets ja tyikmendøø, xjats ku Jesús ja miku' y'ejxpaajti, winets ja mixy yikxidejtyø'jy møk'ampy, ja miku' ja ojts jade'en tyuñi, xjats ja kyidaay, kawinaak ojk ja kyibejp'awidijty jøts ja yjanch'a'øøpy. ²¹ Winets ja Jesús tyiktiiy ja u'nkteety, yide'en ja tnimaay:

—¿Windii yø jade'en pyaadyi, windii yø jade'en yjajt'okwa'añ?

Xjats ja u'nkteety wyaañ:

—Jaayip yø pyaajtniyi ku yø myutsk'ajty, ²² may ojk ja miku' yø jønjøtpy tø yiktøkiyi, may ojk yø tø yiktøkiyi møj nøøjøtpy, jøts yø jade'en yik'ookwa'añi. Ukwani sa xu'unt, ayo'ejxk øøts, pudøjkik øøts.

²³ Xjats ja Jesús wyaañ:

—Pøni mjanchja'wip ja Dios, tum'øy jaa'y pyidsø'ømxiiy øy tyii'ji pøni ku tjanchjawi ja Dios.

²⁴ Winets ja mixy tyeety møk'ampy wyaañ:

—iNjanchja'wip øts ja Dios; jøts pudøjkik øts jøts njaakjanchjawi!

²⁵ Xjats ku ja Jesús ojts t'ixy ja mayjaa'y jøts ku ja ñamyuk'adi'ichidi, winets ja møk'ampy twingugajpxii'ñ ja miku', yide'en ja tnimaay:

—Miku', mets ja jaa'y myik'uu'mpy jøts mets ja jaa'y myiknajtpy, øts nyikutujkpy jøts mbidsø'ømt; majtstu'ut yø mixy, jøts kidi m'uktøjkini jadigojk.

²⁶ Xjats ja miku' møk'ampy chabaaguejky, jøts ja mixy ojts møk'ampy yikxidejtyø'øy, winets miku' ja ojts myajtstu'udyi, jade'en ja yiktaajni ejxim ja jaa'y y'øøky, may ja jaa'y wyanidi jøts ku ja tø y'oo'kni. ²⁷ Xjats Jesús ja ojts twejtsji'iky; jøts ja mixy tyanaagyukiyi'ñ.

²⁸ Winets ja Jesús tyøjkini tøjjøtpy, jøts ja pyabøjkpitøjk ja yiktøøjyøø yide'en:

—¿Tigøjxp ku øøts yø miku' tø ngayikpidsimy?

²⁹ Xjats ja Jesús wyaañ:

—Yø miku' jade'en'ajttip, winet yø pyidsømdit ku ja Dios n'ajot'ajtin jøts ku yø ngu'amaay'ajtin.

Ku ja Jesús tnigajpxy jadigojk jøts ku ja y'ookt

³⁰ Xjats ku ja ojts choondi jam, winets ja ñajxtøø Galilea. Jøts ka'ap Jesús ja pøn ttuknijawiwya'añ ku ja jam wyinatyi, ³¹ kumi yide'en ja pyabøjkpitøjk ja wyinatyi yik'ixpiky, yide'en ja tnøjmi:

—Øts idø'øn nmøjkudanaabyi'ajtpy ja naawii'ñit jaa'y, jøts meets idø'øn nduknijawi sa njatt sa ngubatt ya naawii'ñ. Jade'en øts ja jaa'y xkøyakt, ku øts ja mayjaa'y xmatst jøts ø jatyi xyik'ookt; jøts ku jade'en n'uk'ookt, winets øts kyidigøøx xøøw nbidsø'ømt jap oo'kpi jutjøtpy. ³² Xjats ja pyabøjkpitøjk ja ka'ap tnimadowdi ku ja jade'en yiknøjmidi, jøts tsø'jkidip ja' øyik idø'øn ja tyiktø'ødit ti jade'en tyijpy.

Pøn idø'øn jawaani møj ma Dios ja yjaa'y ja kyutujk ttanitani

³³ Xjats ja Jesús jam tmøøtsøø'ñ ja pyabøjkpitøjk jøts ja yja'tti Capernaum, jade'en ja møj kajp xyøøw ma dø'øn ja ojts yja'tti; jøts ku ja tyøjkidøø tu'ugyi tøjjøtpy, japts ja Jesús pyabøjkpitøjk tyiktiiy, yide'en ja tnimaay:

—¿Ti meets ukwan ja mgajpxy'ajtpy tuu'ajy?

³⁴ Xjats ja pyabøjkpitøjk amøñi y'amidoodukti, ka'ap ja sa wya'andi, kumi ja' ja jam wyinaty tø tnadyamigajpxyidi pøn pyabøjkpitøjk idø'øn ja tyimyjawaani møj pidsømp. ³⁵ Winets ja Jesús y'ixaajky jøts ja tyaaajxyi'ñ ja ñimajmajskep ja' y pøn xpxøjktip, jøts ja tñimaay:

—Pøni pøn namyøjkpikta'akwajnip, wan ja myigu'uk tpudøki, øy ti tunk ttu'unt ejxim ja jaa'y pøn ja ñitanaabyi ka'ejtp.

³⁶ Winets ja tñixajxyi'ñ tu'uk ja mutsku'nk jøts ja tpiktaajky jam agujk'am, jamts ja ojts tsa'anji'iky, jøts ja wyaañ:

³⁷ —Pøni pøn tkupøjkp øy midi unajku'nk øts køjxp, øts ja wyinaty jade'en xkupøjkp, kumi tum øts ja unajk nja'ajtpy; jøts pøni pøn øts idø'øn jade'en wyinaty xkupøjkp, kidi øtsip ja wyinaty nadyu'uk xtyimgyupøkp, nayi kyupøkp ja nøjkx pøn ø xkajx.

Ku ja Jesús wyaañ: Adøm ja' nbudøjkibi pøni ka'ap adøm ja xmidsep'ajtyindi

³⁸ Winets ja Juan tñimaay ja Jesús:

—Windsøn, tø øøts ja jaa'y tu'uk n'ixy pøn tyiktump mets mmøk'ajtin, jøts miku' ja ttukmajtstu'uty ja jaa'y, jøts kumi ka'ap ja yik'ijxyi xjats øøts ja tø ndukmajtstu'uty jøts ja ka'ap jade'en y'uk'adøtsnit.

³⁹ Winets ja Jesús wyaañ:

—Janch øy midi yø jaa'y tyumpy, kidi xukmajtstu'utti; pøni yø' ja jaa'y tyiktsojkp øts køjxp, sudso øts yø jadigojk xmigajpxigøøgyojmit. ⁴⁰ Pøn adøm xkamidsep'ajtimp, xmigu'ukwa'animp adøm ja'. ⁴¹ Jøts ku pøngapøn ja tsuxk nøø mmo'ojidit tuktsemu'ngin, ku ja ttaguyakit øts køjxp, jøts kumi øts meets njaaktyimyjaa'y'ajtnip, wimbejtxiyip tigajtsxiyip ja nøjkx jawaani øy, kumi øts idø'øn meets xkristi'ajtp.

Ja' midi yikpøkyajtp

⁴² 'Øy pøngapøn pøni pøn øts n'unajk nidu'ugin xyikpojktuujniyip, pøni pøn øts n'unajk nidu'ugin xyiktundigøjyiyip pøn jaty ø xjanchja'widip, ne'egi ja øyik y'ijty jøts paandaak yiktayukwøønt ja jaa'y pøni pøn jade'en adøtsip jøts ja mejyotp yikuwibepit.

⁴³ Pøni myikpøkyuujnip yø mgø', ne'egi øy ku xkajtspoott jøts mjaakayikpojktunit; ne'egi øy jade'en ku mgø' tuktamajñ xmidøkit jap tsajpjøtpy, jøts kidi xmidøki ka'pxy jap miku' ku'py mā jøønyow nijuuni kyapi'ich, ⁴⁴ mā tinø'øk nijuuni kya'øøky. ⁴⁵ Pøni myikpojktuujnip yø mdeky, ne'egi øy ku xkajtspoott jøts mjaakayikpojktunit; ne'egi jade'en paktuk mdøkit jap tsajpjøtpy, jøts kidi myikpikta'aky ka'pxy møøt mdeky jap miku' ku'py, ⁴⁶ mā tinø'øk nijuuni kya'øøky jøts mā jøøn nijuuni kyapi'ich. ⁴⁷ Jøts pøni ku yø mween myikpojktuniyi, ne'egi øy jøts mnawyenjuudiyit; ne'egi øy jade'en ku windu'uk mdøkit mā Dios kyutujk tñitani ja jaa'dyi, jøts kidi myikpikta'aky miku' ku'py møøt mween ka'pxy, ⁴⁸ mā nijuuni kya'øøky, mā jøøn ejtp tyøøy.

⁴⁹ 'Niduki'iyi ja Dios yjaa'y nøjkx ayo'ombaaty ya naxwiiñ, jøts ku dø'øn jade'en tpaaty t'ixy winets ja nøjkx jawaani øy pyidsømni. Jade'en idø'øn ndejint n'ukpiktaajkint ejxim ja jiyujk yøxy ku ja kaan ja møøt yiktamiyoxi, jawaani øy ja nøjkx pyidsømni. ⁵⁰ Kaañ amuum tyik'øyigjyøjxp o ti, nayide'en meets idø'øn ndejint m'ødyu'unt ku mmigu'uk xukmado'ot ja Dios yja' sudso y'anmija'win kyawindigø'ødyit. Kuts ka'ap jade'en mdu'undit, tø wyinaty mbidsømdi ejxim ja kaanin midi kawa'ats midi katump. Møøt mnamyayidi o pøngapøn.

10

Ku ja Jesús kyajpxwiy jøts kidi amajtsk jaa'y ñawya'kxyidi

¹ Xjats ja Jesús jam chøø'ñ Capernaum, jøts ja ñijkxy Judea, jøts ku ja jam ñajxy winets ja møj nøø ja ttanajxy midi txøøw'ajtp Jordán. Jøts ja tñiyø'øyi ja kajp midi jam wyinaty tampjaduktamajñ'ampy, jamts ja jaa'y may'ampy ñamyukojmiyidøø mā ja wyinaty, jøts ja ojts tyik'ixpiky jade'eñim sayim ja wyinaty jekyip tø ttuñ. ² Xjats ja fariseotøjk winaagin

tnimendøø ja Jesús jøts ja nugo tkajpxy'ejxwa'andi, yide'en ja tnmadyi pøni øy idø'øn jade'en ku ñiyaa'y ja tmajststutwa'añ ja ñidø'øxy, jade'en ja ojts tyiktøwdi. ³ Xjats ja Jesús y'adsøøxy jøts ja wyaañ:

—¿Sa Moisés yikutujky?

⁴ Winets ja y'adsoodøø jøts ja wyandøø:

—Ojts Moisés tyikutuky jøts ja nøky tu'uk kyojt ku ja yaa'dyøjk tmajststutt ja ñidø'øxy.

⁵ Xjats ja Jesús y'adsøøxy jøts ja wyaañ:

—Ja'agøjxp ja Moisés jade'en tyikutujky ku mee niwine'enin mgamadøø, ku mee niwine'enin mgaja'gyuki. ⁶ Kumi Dios tyiktso'ondakijxy tuki'iyi ku yaa'dyøjk ku tø'øxyøjk tyiknajtskojy'iñ jøts ja jaa'y y'amajtskidi. ⁷ Paty yaa'dyøjk kuwani tmajststutt ja tyeety ja tyaak, jøts ñidø'øxy tu'ugyi tmøøtsøønit nadyu'uk, ⁸ ku jaa'y y'amajtsk'atti ka'ap ja y'uknamajtskinidi, tu'ugyi ja ñamyayi ñabyaajtniyidi. ⁹ Paty ka'ap y'øyi ku jaa'y tyiknawya'kxit midi ja Dios tø tyik'amajtski.

¹⁰ Xjats ku ja tyøjkidøø tøjkjøtpy, winets ja pyabøjkpitøjk tyiktøøddøø jadigojk midi ja Jesús wyinaty tø tmadya'aky. ¹¹ Ñigajpx idø'øn ja Jesús ja', yide'en ja wyaañ:

—Pøni pøn ja ñidø'øxy tmajststutp jøts jadu'uk tmøøt'amajtskiogyomi, ja jawyeen ñidø'øxy idø'øn ja wyinaty kya'ødyumpy jøts ja pyøkyuñ; ¹² jøts ku ja tø'øxyøjk tmajststuty ja ñiyaa'y, jøts ja tmøøt'amajtskimi ja wenk yaa'dyøjk, pøkyump idø'øn ja nayide'en.

Ku ja Jesús tkunuu'kxy ja mutskuna'jk

¹³ Xjats ja jaa'y y'una'jku'nk tyikmendøø, ja' ja tyuknimendøø jøts ja Jesús ja tkønixajt, jøts ja møjaa'y jade'en yja'attøø jam møøt ja mutskuna'jk; winets ja pyabøjkpitøjk ja ojts møk'ampy wyingugajpxiyidi. ¹⁴ Xjats ku ja Jesús ja jade'en ojts t'ixy ja pyabøjkpitøjk, winets ja yjanch'ambijky jøts ja wyaañ:

—Majststut yø una'jk, wan øts yø xnimendi, kidi xnøjmididi kuts yø xkanime'endit, kumi tum jade'embidi jaa'y nøjkx nitanaajyip ja Dios kyutujk. ¹⁵ Janch øts idø'øn nwa'añ, pøni pøn tkagupøjkp ja Dios kyutujk midi ja tyanitanaapy ja yjaa'y, niwindem xøøw ja jaa'y ja nøjkx tkadatøki jadigojk pøni ku ja wyinaty jade'en tø tkagupiky ejxim mutsku'nk yikupikyin.

¹⁶ Winets ja tsa'anji'jky ja mutskuna'jk jøts ja ojts tkunuu'kxy, ojts ja kyø' ja ttanixajkixy.

Ja kumeeñ jaa'y

¹⁷ Xjats ku ja yjaakwidijty, winets ja jaa'y ja tu'uk putyi ñimejnøø jøts ja wyinguxanaajyi, yide'en ja ñimaajyøø:

—Mets øyjaa'y yik'ixpøjkpi, ¿ti ø ndu'ump jøts øts n'anmija'win tpaatt ja nitso'ok'ajtin xemikøjxp?

¹⁸ Xjats ja Jesús wyaañ:

—¿Ti jade'en myikwajnip ku øts jade'en xnøjmi jøts ku øts janchtyimy'øyjaa'y? Ka'ap pøn y'øyjaa'yi, tu'ugyi Dios y'øyi. ¹⁹ Mnija'wipxi dø'øn ja Dios kyutujk midi nømp: “Kidi mmigu'uk ñiyaa'y ñidø'øxy xpøjkxi; kidi myikjaa'y'øøky; kidi mmeech; kidi mmigu'uk xwindaay'aty; windsø'øgi mdeety mdaak.”

²⁰ Xjats ja jaa'y y'adsøøxy jøts ja wyaañ:

—Windsøn, jaayip øts yø tuki'iyi nbadundøjkini ku nmutsk'aty.

²¹ Winets ja Jesús twin'ejxi'jky ja jaa'y amyujy tsaachyujy, jøts ja tñimaay:

—Jap jadu'uk midi mjaakabadumpy: nøjkx, tuki'iyi x'atsto'okixy ti jaty jam mmøøt'ajtpy, jøts ja ayoobi jaa'y xabudøkit, winets ja Dios mjotkujk'ajtin mmo'oijyit jap tsajpøtpy; nøjkx x'atstuñ midi ndijpy, winets ø xpadsoont.

²² Xjats ku ja jaa'y jade'en tmadøøxy, winets ja nugo tkumaa'yiyiñ tkudajyiyiñ, janch ñiyjotmay'oo'kpim ojts ñøjkxni, kumi janch kumeeñ jaa'y idø'øn ja wyinaty.

²³ Xjats ja Jesús twin'ejxjø'kijxy ja jaa'y pøn ja jam wyinaty nidanaajyip, winets pyabøjkpitøjk ja tnimaay:

—iØy yjanchepi sudso ja kumeeñ jaa'y tkupøjkit ja Dios kyutujk midi yjaa'y ja tyanitanaapy!

²⁴ Xjats ja pyabøjkpitøjk jadi'iñi myondi tyukti ku ja Jesús jade'en wya'añ; winets ja Jesús wyaañ jadigojk:

—U'nk unajkti, janch tyimchep sudso ja kumeeñ jaa'y ttatøkidit ja Dios kyutujk, kumi myeeñ ja amuum yikmøjtøjkidip! ²⁵ Ne'egi tsojk ñaxt tu'uk ja møj jiyujk jap xuu'ñ jutjøtpy, jøts nigidi tu'uk ja kumeeñ jaa'y tyøkit jade'en ma Dios kyutujk ttanitani ja yjaa'y.

²⁶ Xjats ku ja jade'en tjaaktyimyadoodøø ku ja Jesús wya'añ, winet ja tyimñigyumaap yjajttøø, jøts ja xem yam ñawyajnidøø:

—¿Jøts pønimts idø'øn nitso'ok'atp?

²⁷ Xjats ja Jesús y'ejxi'jky, jøts ja wyaañ:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint; ti Dios tkatsepjawi.

²⁸ Winets ja Pedro kyajpxøjkijyi'ñ jøts ja wyaañ:

—Tø øø tuki'iyi nmajstutkixy ja nbiktā'aky, jøts ixyam øøts idø'øn jade'en nwidity mets møøt.

²⁹ Xjats ja Jesús y'adsøøy:

—Janch meets idø'øn nnøjmi, pøni pøn tmajstuttip tyøjk, pøn tmajstuttip y'ajch y'uch, jøts chø', ja tyeety ja tyaak, uk ja y'u'nk ñidø'øxy tmajstutu'uty møøt ja naajx ja kam, pøni pøn jade'en tmajstutp ja pyiktā'aky øts køjxp, ja øgyajpxkyøjxp ja ømyadya'akyøjxp, ³⁰ pyaatp ja nøjkx ja tøjx may'ampy, may'ampy ja nøjkx tpaaty y'uch y'ajch, ja tyeety ja tyaak, ja ñaajx ja kyam, øy ja tjaku'ayo'ombaadi øts køjxp; pøni myidanaapy idø'øn ku sa yiktu'unt, winets y'anmija'win ñøjkxt ma Dios. ³¹ Jøts may ja jaa'y Dios nøjkx yik'amutskiyidi, pøn nugo namyøjpiktak'eitp; ja' ne'egi ja Dios kajxa'aky yikpidsø'ømp, pøn yik'ayo'om'eitp.

Ku ja Jesús tnigajpxy jadigojk jøts ku ja y'ookt

³² Jam idø'øn ja wyinaty pyatti ma jam ja tuu' pyety midi nøjkxp Jerusalén, ja Jesús wyinaty jawyeen yø'øpy jøts ja pyabøjkpitøjk ix'oojk yø'ødyi. Xjats ja pyabøjkpitøjk ja ñigyumaap tjawidi ku ja Jesús jade'en ñijxxy, jøts janch tsø'jkidip ja'. Winets Jesús ja yjiwa'widøø nimakmajtsk, jøts ja ojts tyukmadoowinibøjkidi jadigojk sa jaty ja wyinaty yjatwa'añ kyubatwaLgxañ. ³³ Yide'en ja ñimaajyidøø:

—M'ejxtip ku ixyam nbejtyindi jøts nnijxxyindi jam Jerusalén ma øts jaa'y xkøyakt, pøn møj kudanaabyi'ajtpy ja naaxwi'ñit jaa'y, jøts øts ja israelit jaa'y tyeetywindsøn jam xmatst jøts ja kajpxwejpitøjkiti, ja'ats tyikutuktip jøts ø n'ookt, jam øts ja xkøyaktit ma ja wenk jaa'y yikutukti møk'ampy. ³⁴ Yikxon ø nyiktaxe'ekt, yikwop yikoxp øts, xnidsujip øts ja jaa'y, jøts øts ja jaa'y xyik'ookt; jøts ku øts wyinaty jade'en tø n'øøky, kyidigøøk xøøw øts jadigojk nbidsø'ømt jap oo'kpi jutjøtpy.

Ku ja Jacobo møøt ja Juan t'amidooodøø ja may'ajtin

³⁵ Xjats ja Jacobo, møøt ja Juan pøn ja Zebedeo myajnk'ajttip, ja' ojts tnimendi ja Jesús jøts ja tnimaadyi:

—Windsøn, ja' øø ndsøjkpy jøts øø xuujnit ja may'ajt, ja' øø n'amidoowampy.

³⁶ Winets ja Jesús tyiktiy yide'en:

—¿Ti dø'øn mdsojktip, ti ø ndu'ump?

³⁷ Xjats ja wyandøø:

—Xmøøtsøøni øøts ku myikutukt, adsow aduuk øøts xyiktsøønit mgutujktaajkjøtpy, jøts øøts ja jaa'y xwindsø'øgit.

³⁸ Winets ja Jesús wyaañ:

—Ka'ap meets yø xnijawī pø ti mee m'amidøøpy. Ngupøkp øts ja ayo'on jøts pøni sà øts ja jaa'y x'uktu'unt. ¿Jøts meets, mgupøktip meets nayide'en ja ayo'on jøts pøni sà meets ja jaa'y m'uktunit?

³⁹ Xjats ja y'adsoodøø jøts ja wyandøø:

—Ngupøkp øøts, tiku øøts ndejint ngagupøkt.

Winets Jesús ja tnimaay:

—Janch jade'en, mjanchkupøkp meets nayide'en ja ayo'on midi ø ngupøkp, jøts mjanchkupøktip meets nayide'en pøni sà øøts ja jaa'y x'uktu'undit; ⁴⁰ tyimyø' ku meets xmøøtsinaawya'añ adsow aduuk, kidi øtsip meets ja nmo'op, ja Dios Teety ja tyakp jøts ja' ja myo'op pøni pøn ja jade'en tø ttamidsøky.

⁴¹ Xjats ku ja yjadu'ukpi pyabøjkpitøjk tmadoodøø jade'en, winets ja yjanch'ambøjktøø, jøts ja Jacobo yikmi'ambøjktøø møøt ja Juan. ⁴² Winets ja Jesús pyabøjkpitøjk tyajxmujky, jøts ja tnimaay:

—Yide'en'ampy ja jaa'y wyindsøn'aty pøn Dios kyajpxy tkabadundip, ja'ayi nugo ja jaa'y tyiktuñ, jøts ja tu'ugyi tja'abøjkøxni. ⁴³ Jøts ka' mee nøjkx jade'en mjatti. Wenk meets mja'ami, pøni pøn namyøjpikta'akwajnip, ja' idø'on jade'en møjtøkip pøni pøn ja myigu'uk twindsø'jkip; ⁴⁴ jøts pøni pøn tsuj windsøn'atwamp, ja' idø'on windsøndøkip pøni pøn tuki'iyi ja jaa'y jade'en tpudøjkip. ⁴⁵ Ja'agøjxp ø nmiñ jøts ja jaa'y nbudøkit øy ti tunk ndu'unt, kidi ja'ajip øts tø nnimiñ jøts øts jaa'y øy ti tunk xuujnit, ja' ø tø nnimiñ jøts øts pøkyjaa'y ngubajtit ja pyøky ku n'oøkt winets ja mayjaa'y yikpojkmamaa'kxt. Øts idø'on ja' myøjkudanaabyi'ajtpy ja naxwii'ñit jaa'y.

Ku ja Jesús tyikwin'ejxwa'kxy ja winap jaa'y pøn txøøw'ajtp Bartimeo

⁴⁶ Xjats ja yja'ttøø Jericó. Jøts ku ja Jesús pyabøjkpitøjk jam wyinaty tmøøtpidsimy kajpjotp møøt ja mayjaa'y, winets winap jaa'y ja tu'uk tpattøø pøn txøøw'ajtp Bartimeo, ja Timeo y'u'nk, jam ja wyinaty chøøni tuu'am jøts ja tigati tyikmuky. ⁴⁷ Xjats ku ja tnimadøøy jøts ku ja Nazaretit jaa'y jam wyinaty ñaxy midi txøøw'ajtp Jesús, winets ja winap jaa'y møk'ampy kyajpxkejky jøts ja wyaañ:

—iWindsøn'ajtim, rey David y'ap y'u'nk, ayo'ejxk øts!

⁴⁸ Xjats ja mayjaa'y ja møk'ampy wyingugajpxiyøø jøts ja y'amo'ont, ka'ap ja winap jaa'y y'amøn, ne'egi ja tjaakyikjinajx'adi'ich, yide'en ja wyaañ:

—iMets myimajtsk'ap'ajtip ja møj windsøn David, ayo'ejxk øts!

⁴⁹ Xjats ja Jesús wya'k'øyiyi'ñ, jøts ja pyabøjkpitøjk ja tnøjmi:

—Nøjkx x'atswawdi.

Winets ja winap jaa'y y'atsyikwaay, yide'en ja t'atsnimaadyøø:

—Tsojk, pidø'øk, ixam idø'on myikwaadsøy.

⁵⁰ Xjats ja jatyi tñajtswøjyih'ñ ja yukwop, wo'onjø'kp inet ja adsu'jky, jøts ja tninijxxy ja Jesús. ⁵¹ Winets Jesús ja yiktøøjøø:

—¿Ti mdsøjkpy, sà me ndu'unt?

Xjats ja winap jaa'y y'adsøøy jøts ja wyaañ:

—Windsøn, ja win'ejxwamp øts.

⁵² Winets ja Jesús ja tnimaay:

—Nøjkxni; tø me mdsøkni kumi tø me xjanchjawī.

Xjats ja winap jaa'y jatyi wyin'ejxwa'kxy, jøts ja tpanijxxy ja Jesús jam tuu'am.

11

Ku ja Jesús kyajptøjkijih'ñ Jerusalén

¹ Xjats ku ja jam wyinaty yja'atwanidi Jerusalén, winets ja tyandøø jam Betfagé midi ja kajp Betania wyinaty møøt ñamyiwingon'aty, ja kajp midi jam wyinaty tandip kojpk ix'am midi txøøw'ajtp Olivos, jamts ja Jesús pyabøjkpitøjk namajtsk tkajxstøø'ñ, ² jøts ja tnimaay:

—Nøjkxti ixem mā yø kajpu'nk wingon, jøts ku net jam mja'attit, jamts inet buuru'nk tu'uk kuwiiñ xpaattit midi tsotsnim, midi ka'anım pøn ttatsøøni. Nøjkx x'atmigajidi jøts xwejtsme'endit. ³Jøts ku pøn myiktøwidit tiku jade'en m'adø'tsti, jade'en xnøjmidit jøts ku t'anuu'kxwā'añ nwindson'ajtım, jøts ku ja jatyi tyikwimbejtkojmit.

⁴Xjats ja pyabøjkpitøjk ñøjkxti, jøts ja buuru'nk ja ojts tjanchpaatti kuwiiñ jam tøk'agø'øm, jam ja tpaatti tuu'am jøts ja tmigajidøø. ⁵Winets ja jaa'y winaagin tyiktøødøø pøn jam wyinaty, yide'en ja ojts ñii'mxyidi:

—¿Ti mdundip? ¿Tigøjxp ku yø buur xmigajidi?

⁶Xjats ja pyabøjkpitøjk y'adsoodøø jade'en sa Jesús ja wyinaty tø ñii'mxyidi; winets ja ojts yikmajtstu'utti jøts ja jam choo'ndi. ⁷Xjats ja jade'en tyiktso'ondøø ja buur, jøts Jesús ja ojts ttaninøjkxti; winets ja wyet ja ttajiba'andøø ja buur, jøts Jesús ja ttawaa'tspejty ja jiyujk. ⁸May jaa'y ja wyet ojts tya'apti jam tuu'am, jøts may ujts'aay ja ojts ttu'kxti jøts ja jam nayide'en tpiktaktøø, jøts ja Jesús jade'en tpatsowa'andi ejxim møj windsønın. ⁹Xjats ja niduki'iyi møk'ampy kyajpxkaktøø, jøts ja niduknax wyandøø:

—¡Dios Teety tsajpjotpit, kunuu'kx yø windsøn pøn me tø xkexy! ¹⁰¡Kunuu'kx yø windsøn midi mgutujk mimejniyip, wan ja tyeety'ap David tyikmøjtajki ja kyutujk jadigojk! ¡Kuuyi ja Dios Teety jadu'uk yjaak'øyi!

¹¹Xjats ja Jesús jade'en tyøjkii'ñ Jerusalén, jade'en ja yja'jty jam tsaptøjkjotp. Jøts ja ojts t'ejxkixy tuki'iyi ti jatyi jam wyinaty ejtp; jøts ku ja ojts jade'en t'uk'ejxkixy, winets ja ñøjkxni jam Betania møøt nimakmajtsk pyabøjkpitøjk, ja'agøjxp ja ojts ñøjkxnidi ku ja et wyinaty tø chuu'ni.

Ku ja Jesús t'ayo'onmigajpxy ja iigi tsa'amguipy midi ja tyøøm ka'ejtp

¹²Xjats ku ja Jesús kyimjabom choo'ndøø Betania, winet yuu ja pyaajtøø. ¹³Jøts ja jagam t'ejxpaajty tu'uk ja iigi kipy midi jam wyinaty janch'aamyøøt; xjats ja ojts tninijkxy jøts ja t'ats'ejxwā'añ pøni jam idø'on ja tyøøm. Jøts ku ja ojts t'ixy, ni tu'ugin ja tyøøm ja tkapaajti, nugo ja wyinaty janch aay ja ñaxy, kumi ka'anım ja tiempi wyinaty tpaaty ku ja iigi tyøømi. ¹⁴Winets ja Jesús tmigajpxy ja iigi kipy, yide'en ja tnimaay:

—¡Nijuuni mga'uktøømiñit!

Ku ja Jesús jade'en wyaañ, myadowdi ja pyabøjkpitøjk ja'adi.

Ku ja Jesús twojpidsoømgixy ja too'kpitøjk jam tsaptøjkjotp

¹⁵Jawaani y'ijty, xjats ja yja'ttøø jam Jerusalén. Jøts ku ja Jesús tyøjkii'ñ tsaptøjkjotp, winet ja t'ixwojpidsoømgijxy ja jaa'y pøn jap wyinaty too'ktip yajktip, midi jam wyinaty juudyip kajpxtip, tuki'iyi ja t'ixkajpxidsøømgijxy. Nayi yikpidsøøm ja jaa'y ja' pøn jam wyinaty meeñ tkugondip, tuki'iyi myesi ja yiktejsapwajkjøxtøø, jøts nayide'en ja pak too'kpi chinaabyajt yiktejimbejtjøxtøø; ¹⁶jøts ja Jesús ja jaa'y tka'uktuk'anajxni ja tsaptøjk ku ja jam tigati tjatsømnaxwā'andi. ¹⁷Yide'en ja Jesús tnimaay ja jaa'y ku ja yik'ixpijky:

—Yide'en jap nøkyijpxy wya'añ: “Ja' øts ndøjk wya'ant jøts naxwii'ñit jaa'y jap t'ajot'attit ja Dios Teety”; jøts ka'ap meets ja jade'en ti xyiktuñ, maa'tstaajk meets ja' tø xyikwani.

¹⁸Xjats ku ja jade'en tmadoodøø ja israelit jaa'y tyeetywindsøn møøt ja kajpxwejpitøjk, winets ja t'ixaadyøjkidøø ja taay jøts ja ttuku'oogiwya'andi, chø'jkidip idø'on jaa ku ja yjaay yikpøjkøxniyidit, paty ja jade'en tnidaayiwya'andi kumi tyumnija'winiyip ja mayjaa'y ja wyinaty ku ja janchnigyumaap yik'ixpiky. ¹⁹Xjats ku ja et chuu'ña kyoodsiña, winets ja Jesús tmøøtsoo'naa ja pyabøjkpitøjk jam møj kajpjotp, jøts ja jam ñøjkxti mā ja chøøni.

Ku ja iigi tsa'amguipy tyijch

²⁰ Xjats ku kyimjabom'ajty, winets ja jam jøpyi ñajxtøø ma ja iigi kipy jam wyinaty tyani, jøts ja ojts t'ejxti ku ja wyinaty tø tyøjtsj'ø'kni y'aatsj'øtpy. ²¹ Winets ja Pedro ja tja'myejch, jøts ja tnimaay ja Jesús:

—Windsøn, ejx ja iigi kipy tø tyøøtsni midi ojts x'ayo'onmigajxpy.

²² Winets ja Jesús y'adsøø y jøts ja wyaañ:

—Janchjawidi Dios møk'ampy. ²³ Janch meets idø'øn nnøjmi, pøni pøn tnimaapy ya'at kojpk: “Nøjkx mejyotp, jamts mdøkit”, pøni ku amumjoojt jade'en mwinmay ku ka'ap mmay mdajy, jøts ku kø'øm xjanchjawi ja m'ayuujk pøni sa wyinaty tø mwa'añ, jatp idø'øn ja jade'en pøni ku wyinaty jade'en ja janchja'win xmøøt'aty. ²⁴ Paty mee nnøjmi pøni ti jaty m'amidoodip ja Dios, pøni ti mgu'amidoowidip jøts ku xjöp'ejxtit jade'en, jatpts ja jade'en. ²⁵ Jøts ku mdios'ajot'attit, pøni jam ja mmidsepti, maa'kxukti, jøts Dios Teety nayide'en mbojkipimaa'kxidit pøn jap tsajpjøtpy. ²⁶ Pøni ku ka'ap xmaa'kxukti ja mmigu'uk, nayide'en meets ja Dios Teety mgapojkpimaa'kxit pøn jap tsajpjøtpy.

Ja Jesús myøk'ajtin

²⁷ Xjats ja jade'en jadigojk ñøjkxtøø jam Jerusalén. Jøts ku ja Jesús jap wyinaty wyidity jap tsaptøjkjøtpy, winets ja jap ojts ñimiñi ja teetywindsøn, ja kajpxwejpitøjk, jøts ja møjaa'dyøjki pøn ja kutujk jam wyinaty t'adsinaadyip, ²⁸ ja'ats ja ojts yiktiyi, yide'en ja wyandøø:

—¿Pøn jade'en tø mdanigutujk'aty ku jade'en m'adi'ich ya tsaptøjkjøøjty? ¿Pøn mets jade'en mgutujkmø'øyi?

²⁹ Xjats ja Jesús y'adsøø y jøts ja wyaañ:

—Nayide'en mee nyiktøøwami; pøni x'adsoowimbejtíp øts inet, winets inet ndukmado'odit pøn øts yø jade'en tø xanigutujk'aty ku øts jade'en n'adi'ich. ³⁰ Ku ja Juan Bautista ojts yiknøbety, ¿pøn ja ojts tyanigutujk'aty ku ja jade'en y'adijch? ¿Sa mee m'ukwa'añ, Dios ja ojts tyanigutujk'aty jøts ja jade'en y'adø'øtst? Adsoojimbejtík øts.

³¹ Winets ja kø'ømyi ñagyajpxkaajkidøø, yide'en ja ñawya'añidi:

—¿Sa njanch'uknimaa'yint? Ku net yø njanimaayint: “Dios ja ojts kyutujkmø'øyi”, yide'en adøm inet yø x'adso'owint: “¿Jøts tigøjxp ku ka'ap xjanchjawidi pøni jade'endam ja'?” ³² Jøts ja jaa'y inet xmi'ambøjkma'ant ku net njawa'anma'ant jøts ku jaa'y ja ojts kyutujkmø'øyi.

Jade'en ja kø'øm ñawyaajnidøø, jøts kumi ñija'widip ja jaa'y wyinaty may ku ja Juan ja Dios kyugajpxy'aty, paty ja jade'en chø'jkidøø. ³³ Jøts ja yide'en tnimaadyi ja Jesús:

—Ka'ap øøts ja nnijawi.

Xjats ja Jesús tnimaay ja jaa'y:

—Nayide'en meets ja ka'ap ndukmado'ot pøn øts jade'en xanigutujk'ajtp ku øts jade'en n'adi'ich.

12

Ku ja Jesús tmadyakpaajty ja ka'ødyumbi

¹ Winets ja Jesús tmigajpxøjkijñi ja jaa'y ejxpajtin madya'akyøjxp, yide'en ja wyaañ:

—Jaa dø'øn jaa'y wyinaty tu'uk pøn ja uvi ts'a'am ojts tteen kyamjotp; jøts ja yikxon tnagueemy tnabijky, jøts ku ja jade'en t'uktuuñ winets ja tyik'øyiñiñ tu'uk ja uvi kumdaajk ma ja uvi ts'a'am nøø ojts idø'øn ja jade'en tyik'øyi, xjats ja tpøjch tu'uk tøjch janch køjxp jam kyamjotp. Kam ejx'etaajk idø'øn ja yik'øyiñiñ, ojts idø'øn ja jade'en tyik'øyigyxy.

Winets ja tamuky tkøyajknaa ja kyam, tumbi ja ojts ttukmidañ, jøts ja ñøjkxni abiky et. ² Xjats ku ja tiempi tpaajty juuni cha'amy ja uvi ts'a'am, winets ja windsøn tkejxy tu'uk ja tyumbi jam ma ja jaa'y ja ts'a'amgam jam wyinaty tø tmidandi jøts ja jam t'atstuk'amidoowa'añ ja ts'a'am kikujkp midi jam wyinaty ejtp kyamjotp. ³ Xjats ku ja tumbi jam yja'jty, winets ja jaty yikmajch jøts ja kam ejx'etpi ja ojts chiigyiyi, ka'ap ja

ti yikmøø, jadi'iñi ja jam wyimbijty. ⁴ Winets ja kugam tkejxy jadu'uk tyumbi nay jam; ojts ja ñijxxy jøts ja jam nayide'en yiktuuñ, yikxon ja jam ojts tyika'ach, ojts ja chaachi kyubajkiixpy, janchiktsepmigajpx ja jam. ⁵ Xjats ku ja nay jadi'iñi wyimbijty, winets ja kugam tjaakejxy jadu'uk tyumbi pøn ja kam ejx'etpi ojts tyik'ookti. Janch namay ja tumbi tmøøt'aty jøts ja xyumikexy tu'uk jaty ja tsal'am tsømbi; ja'ats jam ojts ja kam ejx'etpi kya'ødyuñidi, pømbi yikwojp yikojx, jøts pømbi winaagin oo'ktøø.

⁶ Jamts ja kugam myajnku'nk wyinaty tø tmøøtañ, tu'ugyi ja t'u'nk'aty, ja'ats ja jam kø'øm myøøtañ, ja'ayi ja yjanchøjkpy; xjats ja ojts ix'oojk tkexñim, yide'en ja wyaañ: "Yikwindsø'ogip yø kumi øts n'u'nk yø." ⁷ Jøts ja tumbitøjk pøn jam wyinaty t'ejx'ejttip ja tsal'amgam, ka'ap ja jade'en wyandøø jøts ja twindsø'ogidit, t'ixwibejpidsøjmidøø ne'egi jinaxy ja ñawya'añidøø: "Ya'at inet ja' pøn kugam'atp; wan tyikpa'ø'jkyimp jøts adøm yø tsal'amgam nja'bøjkna'ant." ⁸ Xjats ja jade'en tmajtstøø, jøts ja tyik'oo'ktøø, ojts ja ñine'kx ja t'ixwibejpidsøjmidøø jam tsal'amgamjotp.

⁹ Jøts, ¿ti tyu'ump ja kugam kø'øm ku ja y'u'nk jade'en y'ø'jky? Kuwani ja kø'øm tnime'ent, winets ja tyikudigøøgyøxt ja kam ejx'etpi, jøts ja abikyjaa'y ja t'ixa'att, ja'ats ja myo'op ja cha'amgam.

¹⁰ ¿Ka'anim ja nøky xkajpxidi ma yide'en wya'añ?

Ja tsaa midi ja pojtspi kya'uk'a'ejxidøø,

Ja'ats ne'egi ixyam tø y'ukyikpiktakni pøch kyubajk jøts ja ttamajtsmujkixy ja pøch.

¹¹ Ja Dios Teety idø'on jade'en tø ttuñ, øy yø nigyumaap njaja'wandi.

Jade'en ja Dios kyajpxy wya'añ.

¹² Winet et ja israelit yeetywindsøn tmajtswandøø ja Jesús, ja'agøjxp ku ja wyinaty tø myigajpxyidi jade'en. Jøts kumi chø'jkidip ja mayjaa'y ja wyinaty, paty ja ojts jadi'iñi tmajtstu'utti, jøts ja jade'en choo'nidøø.

Ku yikajpxy'aty ja kugubajt

¹³ Waani y'ijty, xjats ja Jesús winaagin yiktaniguejxy ja fariseotøjk møøt ja Herodes myigu'uk, jøts ja nugo yjot'ejxwa'añi, ja' ja nugo chojktip jøts ja kyajpxigø'øty, ja'ats ja yiktani'øønip. ¹⁴ Ojts idø'on ja Jesús jam yiknimiñ, jøts ja yiknimaay:

—Windsøn, nnija'wip øøts jøts ku mets tiy janch mgajpxy, ku me ka'ap xmøjpkita'aky pøni sa jaty ja jaa'y wya'andi, jøts kumi ka'ap mets pøn x'ejxkapy xka'ejxkapy, mdum'ejxkajpkixpy mets ja jaa'y, jøts tu'ugyi mets tiy janch xuk'ixpiky ja jaa'y sudso nnøjkxin ma Dios, paty øø nyiktøøwa'añ: ¿Øy ku øøts ja windsøn César nmiyakt nmigubatt, uk ka'ap? ¿Nmo'op øøts ja meñ, uk ka'ap?

¹⁵ Xjats kumi ñija'wip ja Jesús wyinaty jøts ku nugo yjot'ejxwa'añidi, winets ja tnimaay:

—¿Tiku ø xjot'ejxti? Yakti tu'uk meñ, wan ø t'uk'ijxy.

¹⁶ Xjats ja ojts tmo'odi, xjats ku Jesús ja twin'ixy winets ja ojts tyiktty, jøts ja wyaañ:

—¿Pøn ya'at ja wyeen y'aaw, jøts pøn ya'at ja xyøøw ixya kyøjxja'ayi?

Xjats ja y'adsoodøø jøts ja wyandøø:

—César yø' yja'.

¹⁷ Winets Jesús ja tnimaay:

—Mo'odi ja César ja yja' pøni midi ja yja'ajtpy, jøts ja Dios xmo'odit pøni midi ja yja'ajtpy.

Jøts ku ja Jesús jade'en wyaañ, winets jaa'y ja ñigyumaap tja'widøø ku ja jade'en y'adsøø.

Ku ja jaa'y tyiktøwdi pøni janch idø'on ja' ku oo'kpi jadigojk jyujkpyøktit

¹⁸ Xjats ja Jesús ja saduceotøjk ojts ñimiñiyi. Ja' ñimejniyi pøn nømdip jøts ku oo'kpi niyuuni kya'ukpidsømnidit jap oo'kpi jutjotpy; ja'ats ja ojts yiktiyi jøts ja ojts ñi'mxyi:

¹⁹ —Windsøn, yide'en ja Moisés ojts tjaadyañ tu'uk ja kutujk pøni pønuk tku'oo'kp ja ñidø'øxy, jøts ku ja y'u'nk ja ni tu'uk tkayiktañ, winets ja ku'økyø'øxy tmøøt'amajtskit ja ñiyaa'y oo'kpi myigu'uk midi nadyu'uk jøts ja jade'en yika'axiyit. ²⁰ Jøts ja dø'on ja jaa'y

wyinaty niwixujkti, jade'en ja tyukjaa'y'atti. Xjats ja myøjpi jawyeen y'amajtskiy'iñ, jøts ja jaty tku'ø'jky ja ñidø'øxy, ka'aním ja y'u'nk ja wyinaty tpaatiním. ²¹ Ku dø'øn ja jade'en y'ø'jky, winets ja mutskpi midi ja oo'kpi wyinaty myijidsim'y'ajtpy, ja' ojts tmøøt'amajtski ja ku'økyø'øxy, jøts ja nayide'en y'oo'knímøø, ni tu'ugin ja y'u'nk ja tkayiktaañ; nayide'en ja myidigøøkpi yaa'y yjajty. ²² Niduki'iyi ja tø'øxy ja tyiknajxkijxy ja yaa'dyøjk niwixujk yaa'y, jøts nipøn ja y'u'nk ja ojts kyadukpaadyi, nipøn ja y'u'nk tkayiktaañ. Xjats ja tø'øxyøjk nayide'en y'oo'knímøø. ²³ Jøts ku ja jadigojk pyidsø'ømdit jap oo'kpi jutjøtpy, çpømbi ja tø'øxy nøjkx jadigojk tñidø'øxy'aty, kumi tø ja niduki'iyi t'atsnidø'øxy'ajtkøxti?

²⁴ Xjats ja Jesús y'adsøøy jøts ja wyaañ:

—Ka' mee m'øwyinmay, ja'agøjxp ku xkanijawidi ja Dios kyajpxy, ku xkanijawidi ja Dios myø'ajtin. ²⁵ Ku dø'øn ja oo'kpi nøjkx pyidsømdit jadigojk jap oo'kpi jutjøtpy, nipøn nøjkx kya'uk'amajtskiñi, nipøn nøjkx kya'uktø'øxmyiyø'øñi, nipøn y'u'nk tka'ukyik'amajtskiñit. Jade'en ja tsinaa'yin ja nøjkx tyiknaxti ejxim ankilis pøn tsinaadyip jap tsajpjøtpy. ²⁶ ¿Ka'ap meets xnijawi, jøts ku ja Dios kyajpxy wya'añ ku ja oo'kpi pyidsø'ømt jadigojk jap oo'kpi jutjøtpy? ¿Ka'aním ja nøky x'ixpøkti midi ja Moisés ojts tja'ay, ma ja tñigajpxy sudso Dios ja ojts myigajpxyi jam ujts aayjotp? Ku ja ojts ñi'mxyi: “Tum øts xdios'ajttip ja Abraham, ja Isaac jøts ja Jacob.” ²⁷ Kidi oo'kpipts ja ñidios'ajtpy, pø ja'axi ja ñidios'ajtpy jøts ja tyikjuyk'att øy pøn. Jøts mga'øwyinmaapy meets idø'øn ku xkajanchjawidi.

Ja møj kutujk midi ja Dios ñi'ane'empy

²⁸ Xjats winet yja'jty tu'uk ja kajpxwejpitøjk ja myigu'uk midi wyinaty tø tmadøy ku ja Jesús jam jade'en tminagyajpxyi ja saduceotøjkti, jøts kumi ja wyinaty tñijawi ku ja Jesús wyinaty øy tø y'adsøøy, winets ja tyiktiy, yide'en ja tñimaay:

—¿Midi'ibi ja Dios ja kyutujk jawaani møj jøts nmímado'owint?

²⁹ Xjats ja Jesús y'adsøøy jøts ja wyaañ:

—Ja' Dios jawaani møj kyutujk'ajtpy midi wamp yide'en: “Israelit jaa'y, ukmadowdi meets, tu'ugyi ja Dios pøn adøm ndios'ajtindip. ³⁰ Jøts tsokti ja jawaani ejxim ñiti jade'en xkatsokti, amumjoojt ja xwindsø'øgidit, ja' tu'ugyi mjotmay'attip, ja' tu'ugyi møk m'ajot'attip.” Ya'at idø'øn øgyutujk'ajtp. ³¹ Jøts jap jadu'uk midi ñiñayjade'en møj, yide'en ja wya'añ: “Tsok mmigu'uktøjk, windsø'øgi mmigu'uktøjk, jade'en xtsokt jøts jade'en xwindsø'øgit sa kø'øm mnachøkyi, jøts sa kø'øm mnawyindsø'øgiyi.” Ka'ap jadu'uk kutujk te midi jawaani møj sa ya'adindi.

³² Xjats ja kajpxwejpitøjk wyaañ:

—Windsøn, ka' me mgajpxigøy. Tiy janch me mwa'añ jøts ku Dios ja tu'ugyi, ku ka'ap jadu'uk pøn. ³³ Janch me mwa'añ jøts ku Dios amumjoojt ndsojkint, jøts ku ja amumjoojt nwindsø'øjkint, jøts ku ja tu'ugyi møk n'ajot'ajtint, tyimdyigajpxy jade'en ku mmigu'uk ndsojkint jade'en sa kø'øm nnachøkyi'imp. Ne'egi tyimy'øø yø jade'en ne'egi Dios chøjkpy, jøts ka'ap jadine'en yiktsøky ku jiyujk ku ja ti ndawindsø'øjki'int, ku ja ti ndamiyojxin jam altajrkøjxp.

³⁴ Xjats ku ja Jesús ojts t'ixy ja jaa'y ku ja Dios kyajpxy twinmadooji, ku ja yikxon øy tsuj y'adsoøjiyøø, winets ja tñimaay:

—Tyimyjawaani kya'ity jøts mets ja Dios kyutujk xkupøjkit midi yjaa'y ja tyanitanaapy. Jøts jade'en ka'ap pøn y'uknay'a'ejxiniiyi jøts tyiktøø'adø'øtst øy tyii'ji.

¿Janch idø'øn ku ja David t'ap'aty ja Cristo?

³⁵ Jam ja Jesús wyinaty yik'ixpiky tsaptøjkjotp, jamts ja yide'en wyaañ:

—¿Sa dø'øn ja kajpxwejpitøjk wya'andi? ¿Pønik idø'øn tijy pøn ja Dios Teety ya pyiktaajk naaxwiñ jøts wyindsøn'att? ¿Nugo ja møj windsøn David y'ap ja tijy, kidi? ³⁶ Janch jade'en wya'andi, ka'ap idø'øn ja kya'pxyi kumi kø'øm ja David wyaañ ku Espíritu Santo ja ojts y'agajpxiyi, winets ja Dios kyajpxy ja ojts tjaajyi ma wyaañ yide'en:

Yide'en ja Dios Teety tnimaay ja nwindson'ajtim:

“Ixa'ak jøts ø xpudsøønit n'aga'n'ampy,
jøts øts yø mmidsep nmimajadakøxt.”

³⁷ ¿Pøni yø' wyindsøn'ajtim, sudso yø ndejint nugo t'ap'att?

Jade'en ja Jesús wyaañ. Janch namay ja jaa'y jam wyinaty, jøts janch jotkujk ja jam wyinaty pyatmadøyi.

Ku ja Jesús ttamigajpxy sa y'adø'øtsti ja jaa'y midi yik'ixpøjktip jam tsaptøjkjotp

³⁸ Yide'en ja Jesús wyaañ ku ja jam wyinaty yik'ixpiky:

—Øyim mnay'ejx'etidit, ejxim meets kajpxwejpitøjkin, mnay'ejxniiyidi pøn ja wyet yøñjawi tpajidøjttip ku yø'ødyi, pøn muum tuu'ajy nagyajpxpoo'kxi ttsojktip windsø'øgi winjawi, ³⁹ pøn ja øybi tsinaabyajt ttsojktip jap tsaptøjkjotpy, pøn ja tsinaabyajt twi'ejxtip ku kyaawya'andi, ⁴⁰ jøts ja' ja ku'økyø'øxyøjk pyøjkidip ja myeeñ, jøts ja jaty tku'øø'ndi, ñadyijyi ja øy Dios'ajot'atti. Janch møk ja nøjkx tku'ayowidi ku jade'en y'adø'øtsti.

Ku ja ku'økyø'øxy tpiktaajky ja lyimunsi

⁴¹ Tuk'ojk ja Jesús y'ixaajky jap møj tsaptøjkjotpy, jap ja wyinaty chøøni jap kajuun windujpy ma ja jaa'y ja myeeñ tpikta'akti midi ja yojxtip, jap ja t'a'ejxuky ja jaa'y sa jaty jap pøn myeeñ wyinaty tpikta'akti, namay idø'on ja'adi. ⁴² Winets yja'jty tu'uk ja ku'økyø'øxy pøn wyinaty janch ayoop, pøn wyinaty niti ka'ejtxip. Ja'ats pyujxmeeñu'nk majtsk tkugo'oniiyñ jap meeñ abøjk'ii'ñjotpy, tuki'iyi dø'on ja tpiktaajky midi ja wyinaty myøøt'ajtpy. ⁴³ Winets ja Jesús tyaaixiyii'ñ ja pyabøjkpitøjk, jøts ja tnimaay:

—Janch meets idø'on nnøjmi ku yø ku'økyø'øxy janch ne'egi jawi ndejint ja myeeñ tø tyøxy. Nipøn jaa'y ja myeeñ jade'en tø tkayøxy pøn jaty ja myeeñ tø tja'agonidi jap kajuunjotpy; ⁴⁴ kumi ja myeeñ windank yø jap nugo tø tpikta'akti; jøts yø tø'øxyøjk øy idø'on yø ayøy, ne'egi tø yø tpiktakixy ja ñidsinaajyk midi yø jam myøøt'ajtpy.

13

Ku ja Jesús tnigajpxy jøts ku ja tsaptøjk yjett

¹ Xjats ku ja Jesús pyidsimy jam møj tsaptøjkjotp, winet ja pyabøjkpitøjk ja tu'uk ñimaajyøø:

—jWindsøn, ejxik mets, ti tsaa yø jade'en jøts ti tøjkyø jade'en!

² Xjats ja Jesús y'adsøø yøts ja wyaañ:

—¿M'ijxpy yø møj tøjkyø? Ni tu'ugin yø tsaa ya nøjkx kyatañ nikiiyety. Me'endip ja jaa'y jøts ja nøjkx tjaagøxtø tuki'iyi yø tøjkyø.

Ja ejxa'an midi yik'exp ku wyinaty yiktødyunwanidi ja naxwii'ñit jaa'y

³ Xjats ja jade'en ñøjkxtøø jam kojpkøjxp midi txøw'ajtp Olivos, ja kojpk midi jam wyinaty tsaptøjk awemp tãmp. Jamts ja Jesús y'ixaajky, jøts pyabøjkpitøjk ja jam amaa'tsk yiktøjiiyøø, yide'en ja Pedro wyandøø møøt ja Jacobo, møøt ja Juan, jøts møøt ja Andrés:

⁴ —Ja' øø ndsøjkpy jøts øøts xukmado'ot windem idø'on yø tsaptøjk jade'en yjatt. ¿Ti tiy'ajtin øøts jawyeen n'exp jøts ku dø'on ja jade'en wyinaty yjatwa'añ?

⁵ Xjats ja Jesús y'adsøø yøts ja wyaañ:

—Øyim mnay'ejx'etidit, ejxim mee pøn mwini'øø'niyi. ⁶ Kumi may jaa'y nøjkx myendi jøts øts ja x'adunaxtit, jøts ja ñøø'mdit: “Cristo øts”, mayjaa'y ja jade'en wyindaay'attip.

⁷ Jøts ku meets ja tsep øy ma xnimado'ot ku ja tsep wyingoni, kidi mdsø'øgidit kumi jatp idø'on ja jade'en, ka'ap ja ñaxt jøts ka'ap ja' tiidyu'unin xøøwi. ⁸ Kumi ja møj ja mutsk ja kajp nøjkx cheptundi xem yam, windsøndøjk ñañibi'øgidit pøn jaty yikutujktip ya naxwiiñ; maawyeen ja uyx nøjkx ñaxy, me'emp ja yuu, may'ampy ja jaa'y nøjkx ja myigu'uk tmidsepøkti a'ø'y'ampy pøn ja nugo tyikma'attip. Jøts ku dø'on ja jade'en yjatt tso'ondakpnim idø'on ja ayo'on wyinaty jade'en.

⁹ Jòts øyim mnay'ejx'etidit; kumi myikøyakp meets ma kudunktøjk yikutukti, jòts mee nøjkx myiktsiiky myikwøpy jap tsaptøjkjøtpy. Mwinguwa'agip mee nøjkx ja møj windsøndøjk; øts meets jap xkunøjkxip jòts ja windsøndøjk myikmadya'agidit, xjats meets idø'øn ja nja' xnigubojkit. ¹⁰ Namga'anim ja tiidyu'unin xøøw tpaaty ku ja øgyajpxy ku ja ømyadya'aky øy magajp yikajpxwa'kxt. ¹¹ Jòts ku jade'en ja kudunk øy madsoo myiktawinguwawidit, kidi xkumayidi xkudajidi sudso x'adsojimbettit. Jade'en idø'øn mwa'andit pøni sa Espíritu Santo winet myik'ayukpaadyidi; kidi meedsip kø'øm mgajpxp, ja Espíritu Santo meets m'agajpxiyip. ¹² May ja jaa'y ttukmiga'axwa'kxy ñagyøyakidit jòts y'ooktit, may ja u'nkteety ja y'una'jk nøjkx tmidsepøkti jòts ja tkøyaktit, nayide'en ja una'jk nøjkx tmidsepøkti ja tyeety ja tyaak kunim o'jkin ja ttukpaattit kø'øm. ¹³ Jòts mdumidsep'attip meets ja jaa'y ja'agøjxp ku meets øts xjanchjawi; jòts pøni pøn ja ayo'on jade'en tmidanaapy kunim y'ookt, ja' idø'øn nøjkx nitso'ok'ajtp.

¹⁴ Jade'en ja Dios kyugajpxy Daniel tjaay tu'uk ja nøky ma ja ojts tnigajpxy midi ja jaa'y tyikma'atp, jòts ku meets ja jade'en x'ext ku ja ma tø yikpikta'aky ma ja kyapaat'aty —pøni pøn ya'at nøkyajpxpy, wan tja'gyuki—, jòts pøni pøn jam Judea tsinaadyip wan tkaknøjkxti jam kojpkjøtp. ¹⁵ Jòts pøni jam wyinaty tø pyety tyøjkøjxp ja'abi xøøw, jòts ku ja wyinakt ka'ap ja yjaaktyim'y'atstøkit jap tøjkjøtpy jòts ja tjaakyikpidsø'ømt øy ti, ne'egi tø'øp ja' ku ja jadi'iñi yjaaka'akt; ¹⁶ jòts pøni pøn jam wyinaty kyamjøtp, ka'ap ja y'ukwimbejtñit jam tyøjk windum jòts ja wyet ja tjaak'atswetst. ¹⁷ ;Ti yjanch'ayøø ja tø'øxyøjk pøn wyinaty jøtpyti, pøn jam wyinaty myutsku'nk tmøøt'ajttip ja'abi xøøw! ¹⁸ Ajot'att amidowdi ja Dios jòts kidi yja'aty ja tiempi winet et ku ja et wyinaty xyuxy, jòts kidi ja'abi xøøw mga'akti; ¹⁹ kumi ja dø'øn nøjkx ja møk ayo'on tyuñiyi midi ka'anim yik'ixy nijuuni wine'en ñaxy kujk ja tiempi jaayip ku Dios tyiktso'ondaajky yø naxwii'ñit, nika'ap nøjkx jadu'uk ja ayo'on jade'en yik'ixy sa ja'ajin midi idø'øn me'emp. ²⁰ Jòts ku Dios Teety ja jeexyip tø tka'agajpxuky kon ja ayo'on, ti pøn xijy jade'en nitso'ok'atp; jòts ja'agøjxp Dios Teety ja tø tyikøñ ku ja ttsøky ja yjaa'y pøn ja tø twiwich.

²¹ Pøni pøn mdukmadøjidip, pøni pøn mnimaajyidip: “Ejxti, ixya dø'øn ja Cristo”, uk ku myiknøjmidit “Ejxti, ixem ja Cristo tyani”, kidi xmibøkti. ²² Ja' idø'øn nøjkx jade'en wandip pøn ñadyijyi jade'en sa Cristo sa ja Dios kyugajpxy, pøn ja miku' myøk'ajtin nøjkx tyiktuujnidip jòts ja nayide'en ttu'unt sa Diosin, yjawin'øø'mbaatwa'amp ja nøjkx pøn ø tø nwiwich. ²³ Jòts nay'ejx'etidi meets, nayjøp'ejxidi jòts kidi mwindaay'atyidi ja miku'; patki'jyi meets yø yam ndukmadø.

Sa mye'ent ja naxwii'ñit jaa'y myøjkudanaabyi

²⁴ Ku dø'øn ja tiempi ñaxt ma et ja ayo'on tyuniyit, winet ja xøøw y'ookt, winet ja po' y'ookt, jòts ja ka'ap y'uk'anidit, ²⁵ ka'agøjxp yø maadsa' jam tsajpwemp, jòts naxp ja uyx jam tsajpwemp. ²⁶ Xjats t'ejxtit ja naxwii'ñit jaa'y ja myøjkudanaabyi ku ja kyutujk tmime'ent møk'ajtingøjxp yoots agujkp. ²⁷ Winets øts ja n'ankilis ngajxwa'kxt, ja'ats øts ja njaa'y xwaamujkip pøn øts tø nwiwetsti øy madsoo, yikwaamuktip ja' øy ja wyinaty ma tyimyjatsøønidi.

²⁸ Uk patmadøjidik øts ja n'ixpøjkin: Ku ja iigi kipy y'awaj y'u'nk'aty jòts ku ja kujk xyimumbøjkni, jade'en yiknijawi ja et jòts ku y'anda'akwani. ²⁹ Nayide'en idø'øn ja n'ukpiktaajkint sa ja ayo'on nøjkx ñaxy; jòts ku ja jade'en x'ejxtit, jade'ents meets ja xnijawidit jòts ku øts wyinaty nmenwani. ³⁰ Janch meets idø'øn nnøjmi, jatp idø'øn ja jade'en namga'anim jaa'y wyinaty y'ookti. ³¹ Najxp yø naajx yø tsajp y'ity, jòts niwindem øts n'ayuujk kyanaxy.

³² Ka'ap ja et ja xøøw yiknijawi pøni juuni dø'øn ja jade'en yjatt, nipøn ja tkanijawi, ni ankilis ja tkanijawi, jòts ni Dios U'nk ja tkanijawi. Ja Dios Teety ja tu'ugyi tnija'wip.

³³ Jòts nayjøp'ejxidi meets ejtp, ejtp ja Dios x'ajot'attit kumi ka'ap meets ja xnijawi pøni juuni øts wyinaty nwiwbejtkojmit. ³⁴ Jade'en idø'øn ja ndejint n'ukpiktaajkint ejxim ja

jaa'y midi nõjxpx jagam widejtpi, jøts ku ja chøøñ y'uk'ane'empy ja tumbi ja', tu'uk jaty tyumbi ja t'uktunkmø'øy jøts y'ukpiktakpy tøjck adinaabyi ja tu'uk, pøn t'ejx'etp ja tøjck. ³⁵ Jøts ejtp idø'øn mjøp'ejxtit, kumi ka'ap meets ja xnijawī pøni juuni yja'att ja mwindsøn midi kudøjk'ajtp, jotmøñ ja yja'aty ux, uk jotmøñ ja yja'aty tsuu'm, jotmøñ ja yja'aty ku tsapni'aaw y'ayajxnidi, uk jotmøñ ja yja'aty jøpkyoots; ³⁶ ka' ti nnija'wīn pøni juuni ja yja'att, kuts meets ja jotmøñ mmaagubaadiyit yam meets jap wyinaty mmaa'y. ³⁷ Midi mee ndukmadøopy, niduki'iyi øts idø'øn ja jaa'y jade'en nnøjmi jøts tjøp'ejx'ettit.

14

Ku ja Jesús yikajpxy'aty jøts ja yikmatst

¹ Ja majtsk xøøw wyinaty kya'ity jøts ja paski xøøw tpaatt ku ja jaa'y tkaydi ja tsapkaaky jadi'iñi midi ja levaduri tkamøøt'ajtp. Winet et idø'øn ja teetywindsøn møøt ja kajpxwejpitøjck t'ixa'adi ja taay ja winmaa'ñ sudso ja tjadyimy'ukmatsttit ja Jesús awin'øøni'ampy, jøts ja tyik'ooktit. ² Xjats ja yide'en kø'øm ñawyajnidøø:

—Ka'ap ja jade'en y'øyl'att ku ja nmajtsint xøjøøjty, tsojk ja jaa'y jade'en xem yam pyidø'øktit jøts adøm ja sagasa xu'unindit.

Ku ja Jesús yiktagutajmji'iky ja pa'akxuu'kpi

³ Jam ja Jesús wyinaty ma ja kajp txøøw'aty Betania, jam ja wyinaty tyøk'ayø'øy Simón wyindum, ja jaa'y pøn wyinaty axøø'kpiim putsp; jam ja Jesús wyinaty twindsøøni ja mesi ku tø'øxyøjk tu'uk tmija'jty ja poop tsaadu'jts midi wyinaty tmøøt'ajtp ja aceite midi janch pa'akxuu'kp, jøts midi janch tsowi to'jkīp. Ja'ats ja tø'øxyøjk ojts tkupu'udu'uty, jøts ja Jesús kyubajk ja ojts ttanitajmīyi. ⁴ Winets ja jaa'y y'ambøjktøø pøn jam wyinaty winaagindi, yide'en ja ojts ñawya'añidi:

—¿Tigøjxp ku yø pa'akxuu'kpi jade'en nugo tø wyindigøy? ⁵ Tø yø jeexyip ne'egi yiktøøky tigøøck magø'pxy denarios, jøts ayoobi jaa'y ja jeexyip ja meeñ yiktabudøki.

Jøts ja tjanchmyi'ambøjktøø ja tø'øxyøjk.

⁶ Winets Jesús ja ojts ñi'i'mxyidi:

—Majtstu'utti; ¿ti yø mdamigajpxtip? Øts yø jade'en tø x'ødyuñ. ⁷ Kumi ejtp meets ayoobi jaa'y xpaatt x'ext, jøts ødyundi meets ja' pøni juuni meets ja kø'øm xmay'atwa'añ; jøts kidi xjøp'ejxti jøts øts meets ejtp xpaatt x'ext. ⁸ Tø øts idø'øn yø tø'øxyøjk jade'en xuñ pøni sa øts idø'øn yø xamidsøkyin; tø øts ja pa'akxuu'kpi yø xanitemy kumi x'ookjøp'ejxnip øts idø'øn ja', paty idø'øn xyik'øø'yīñi xyikpaajtiñi kumi wingonip øts ja n'o'jkin. ⁹ Janch meets idø'øn nnøjmi, ku øy madsoo yikajpxwa'kxt ja øgyajpxy ja ømyadya'aky ya naxwīñ, nayide'en yø øy madsoo yiknimadya'akt ku øts yø tø'øxyøjk jade'en tø xmay'aty, yikja'myatsp yø øy juuni ku yiknimadya'akt.

Ku ja Judas ñay'awajniyi jøts ja tkøyakt ja Jesús

¹⁰ Winets ja Judas Iscariote chøø'ñ pøn ja Jesús pyabøjkipitøjck wyinaty møøt ñimajtsk'aty, jøts ja ojts tninijxxy ja teetywindsøn, ja'ats ja møøt tkajpxy'ajty jøts ku ja tkøyakt ja Jesús. ¹¹ Xjats ku ja jade'en tmadoodøø, winets ja jyanchxondaktøø, jøts ja Judas ja meeñ jaty yiktami'awa'aniyi'ñ. Ja'agøjxpts ja Judas t'ixaay ja taay ja winmaa'ñ juuni et ja t'ukøyakt ja wyindsøn.

Ku ja nwindsøn'ajtim yjaak'a'ux'ajtni møøt ja pyabøjkipitøjck

¹² Xjats ku ja xøøw tpaajty midi ja israelit jaa'y yjanch'amaay'ajttip, ku chapkaaky ja jadi'iñi tkaydi midi levaduri tkamøøt'ajtp, ja'abi xøøw idø'øn wyinaty tø tpaaty jøts ku ja xøøw midukxøøw tyuñi, ja' ja tyejtip paski, ja'abi xøøw idø'øn ja tyukni'o'jkidip ja borreegi maxu'unk, paty ja pabøjkipitøjck winet et tyiktøødøø ja Jesús jøts ja tnimaadyøø:

—¿Ma øøts ja paski a'ux nyik'awext jøts ni'amuki n'a'ux'ajtidit?

¹³ Xjats ja Jesús ja pyabøjkipitøjck namajtsk tkajxtsøø'ñ, yide'en ja t'uknimaaay:

—Nøjkxti jam møj kajpjotp, jamts inet jaa'y tu'uk x'ejxpaattit pøn jam wyinaty tsiy tyanigo'onip, ja'ats mbanøjkxtip, ¹⁴ jøts pøni mā ja yja'aty, japts ja kudøjk xnøjmidit: “Yide'en ja windsøn wya'añ: ¿Mak idø'on ja tøjkjoojt, mak idø'on ja pyabøjkpitøjk ja tmøøtk'a'aty tmøøt'uukt, mak idø'on paski a'ux ja tka'adyit?” ¹⁵ Winets meets inet ja myiktuk'ext tu'uk ja tøjkjoojt jap nipat tøjkiixpy midi jap a'ejxi abaadi ejtnip; japts meets ja jii'kxy xyik'øyidit midi njøø'kxindip.

¹⁶ Xjats ja pyabøjkpitøjk namajtsk ñøjkxtøø jøts ja ojts yja'atti jam møj kajpjotp, jamts ja jade'en tjanchpaattøø sa Jesús ja wyinaty tø tyukmadøyidi, jøts ja jam tyik'øyidøø ja paski a'ux, winets ja wyimbejtøø mā choo'ndøø.

¹⁷ Xjats ku ja et kyoodsiyii'ñ, winets ja Jesús ja pyabøjkpitøjk nimakmajtsk jam tmøøtja'jty. ¹⁸ Jøts ku ja twinguwa'atsidøø ja kyaabyajt, kuts ja jam wyinaty kyaañidi, winets ja Jesús ja pyabøjkpitøjk tnimaay:

—Janch meets idø'on nnøjmi jøts ku ja ixyam nidu'ugin nmøøtkay pøn øts inet amaa'tsk'ampy xkøyakp.

¹⁹ Xjats ja pyabøjkpitøjk yjanchjotmay'oo'kpøjktøø, jøts ja nidu'uk jaty tyiktøødøø:

—¿Wan ja ndejint y'øtsi?

Nayide'en jadu'uk wyamøø:

—¿Øts ndejint jade'en adø'øtsp?

²⁰ Winets ja Jesús y'adsøøy jøts ja wyaañ:

—Tu'ugyi ja' pøn øts idø'on jade'en xu'ump, jøts ka'ap ja yjagami, ixya adøm idø'on ja nmøøt'a'ux'ajtindi, nidu'ugin meets jade'en xunwa'añ. ²¹ Jade'ents idø'on yjatt ja naxwii'ñit jaa'y myøjkudanaabyi sam ja Dios kyajpxy wya'añin; jøts iti ja jaa'y yjanch'ayøøy pøn øts jade'en xkøyakp amaa'tsk! Tø ja jeexyip ne'egi tyiy ku jeexyip kyidyimgye'exy.

²² Ku dø'on ja jade'en ixam wyinaty kyaydi, winets ja Jesús tnixajiyii'ñ tu'uk ja tsapkaaky, jøts ja ttamøja'wiyii'ñ ja Dios Teety, xjats ku ja t'adujkpajky, winets ja tmøøy ja pyabøjkpitøjk, yide'en ja wyaañ:

—Kaydi, ya'at øts idø'on ñamyayi nne'kx'ajtpy.

²³ Xjats ja nayide'en t'adam'ujch tu'uk ja uujk'ii'ñ, jøts ku ttamøja'wiyii'ñ ja Dios Teety, winets ja ttuk'uk'abidsiimy ja pyabøjkpitøjk midi ja wyinaty tø t'adami jap uujk'ii'ñjotpy, niduki'iyi ja t'uktamujktøø. ²⁴ Yide'en Jesús ja ojts ñii'mxyidi:

—Yø øts idø'on ñamyayi nni'jpy'ajtpy midi widsu'ump widaxp øts nnikøjxp øts ngubajkp ku nyikpikta'akt jam kruskøjxp. Ja'ats may jaa'y y'ajot'attip jøts ja ñitso'ok'attit. Jade'en'ampy idø'on ja Dios Teety tyik'adukwa'añ ja wyanda'aky sam idø'on ja ttami'awa'anii'ñ ja nitso'ok'ajtin. ²⁵ Janch meets idø'on nnøjmi, jøts ku ka'ap n'uk'uknit yø vino, jaanim øts yø nøjkx n'uuky jadigojk ku Dios kyutujk yja'att, ku kyutujk ja ttanitanit ja yjaa'y.

Ku ja Jesús kø'øm tnigajpxy jøts ku Pedro ja kyu'øønyit

²⁶ Xjats ku ja t'øøgjxtøø ja Dios kyajpxy, winets ja ñøjkxtøø jam kojpkøjxp midi txøøw'ajtp Olivos. ²⁷ Jøts ja Jesús pyabøjkpitøjk tnimaay:

—Niduki'iyi meets inet xatsø'ødyu'unt ixyamgoots; kumi yide'en Dios kyajpxy wya'añ: “Yikøyakp ja borreegi ejxpi jøts ja y'oookt, jøts ja borreegi jadi'iñi kyaakwa'kxnidit.” ²⁸ Jøts ku ø nbidsø'ømt jadigojk jap oo'kpi jutjotpy, winets ø nnøjkxjawyenit jam Galilea, jamts mee xpaatt.

²⁹ Xjats ja Pedro tnimaay ja Jesús:

—Øy mets mbabøjkpitøjk niduki'iyi mjadatsø'ødyuñiyi, nijuuni me ngadatsø'ødyuñ.

³⁰ Winets Jesús ja ñimaajyøø:

—Janch mets idø'on nnøjmi jøts ku yamgoots inet mnø'ømt ku me ka'ap x'ijxy'aty, ka'anim tsapni'aaw wyinaty myajtsk'aya'axy ku mets inet tigøøk ojk mwa'ant jade'en jøts ku me ka'ap xnijawi.

³¹ Xjats ja Pedro møk'ampy tyimwyindani ja Jesús, yide'en ja tnimaay:
—Nja'øøky me møøt, nijuuni øts jade'en ngawa'ant.
Tum jade'en ja yjadu'ukpi pabøjkpitøjk wyandøø sam ja Pedro wyaañ.

Ku ja Jesús t'ajot'ajty ja Dios Teety jam Getsemaní

³² Xjats ja yja'ttøø mā ja et txøøw'aty Getsemaní, jamts ja Jesús pyabøjkpitøjk tnimaay:
—Ya tsøøniidi, wan ø t'ats'ajot'aty ja Dios Teety.

³³ Winets ja t'ukwaay ja Pedro, ja Jacobo, jøts ja Juan, jøts ja ojts tmøøtnijkxy, xjats ja Jesús yjantyimchø'jkijii'ñ, ka'ap ja y'ukwinmaa'nbyatni, ja'agøjxp ku ja y'ayo'on wyingøñ. ³⁴ Jøts pyabøjkpitøjk ja tnimaay:

—Janch tyimyjotmay'oo'kp øts, øy øts yø yjaw ijadi'iñi ngu'oogit. Awejxti ya ejxim mma'oo'knidi, wijy m'ettit.

³⁵ Xjats ja Jesús jawaani yjaaknajtsyø'øyiyii'ñ, japts ja ojts ñagyuxendya'agiyi, jøts Dios Teety ja ojts t'amidøy jøts ja jade'en kidi tyimy'ayo'ombaaty sa dø'øn ja wyinaty yjatwa'añ ja'abi xøøw. ³⁶ Yide'en ja wyaañ ku dø'øn ja ojts dios'ajot'aty:

—Mets Teety, øyik jade'en xjanchkayikjatt, jøts øts kidi jadine'en ayo'on ndyimbyaaty; øy idø'øn kyidyimjade'eni sam ø ndyimyjatsøkyin, jade'en øts idø'øn ngupøkt pøni sa me xamidsøky.

³⁷ Ku ja jade'en wyaañ, xjats pyabøjkpitøjk ja tnimiiñ, maadip ja jap wyinaty ku ja ojts tpaaty; winets ja tnimaay ja Pedro:

—Simón, ¿tø me ma'oo'kni? ¿Niwine'en me waani tø mgawijy'ity?

³⁸ Wejti kajti jøts ja Dios x'ajot'attit, nay'ejx'etidi jøts kidi mmimajada'agidi ja ayo'on midi wingomp. Janch øts idø'øn nwa'añ ku ja winmaa'ñ janchja'ødyunwa'añ, ja ne'kxsts jaayi ja ka'øybi tumbi amutsk'ejxiyip.

³⁹ Xjats ja ñøjkxkojømøø Dios Teety ajot'ajtpi, nayide'en ja ojts wyangojmi sa ja wyinaty jawyeen tø wya'añ. ⁴⁰ Winets ja myengojømøø mā pyabøjkpitøjk ja jam, maagojmidip ja wyinaty ku ja tpaajty, kumi janchmaa'y'oo'ktip ja'. ⁴¹ Jøts ku ja tigøøk ojk ojts t'ixy ja pyabøjkpitøjk, jaanimts ja tnimaay:

—Tøts inet, maanidi poo'kxnidi. Wan jade'en tjaty, tø dø'øn tyimbyaaty jøts yikøyakt ja naxwii'ñit jaa'y myøjkudanaabyi. ⁴² Pidø'økti, niwejti, wan tjaa'myindi; ixa ja ixyam wyingøñ pøn øts inet xkøyakp.

Ku ja Jesús yikmajch

⁴³ Nay jamnim ja Jesús wyinaty jade'en wya'añ ku ja Judas yja'jty, pøn ja pyabøjkpitøjk wyinaty møøt ñimakmajtsk'atti, ja'ats ja mayjaa'y jam tmøøtja'jt tsujx møøt jøts kipkyapidi. Ja teetywindsøn idø'øn ja wyinaty tø kyexyidi, møøt ja kajpxwejpitøjk, jøts møøt ja møjaa'dyøjkti. ⁴⁴ Yide'en idø'øn ja Judas wyinaty tø wya'añ jøts ja tu'uk tpikta'akt ja ejxa'anin midi ja y'ejxtip ku ja tkøyakt ja Jesús, yide'en ja wyinaty tø wya'añ:

—Pøni pøn øts inet ndsu'kxpy, ja' idø'øn ja wyinaty; ja'ats idø'øn mmatstip, jøts ja xyiknøjkxtit ta'tspiky'ampy.

⁴⁵ Xjats ku dø'øn ja jam jade'en yja'jty, winets ja twinguwa'jkijii'ñ ja Jesús, yide'en ja tnimaay:

—Øts, windsøn, memp.

Jøts ja ojts jade'en ttsu'kxy. ⁴⁶ Xjats ja Jesús yiknixajiyii'ñ, jøts ja jade'en yikmajch.

⁴⁷ Jøts ja jaa'y pøn ja Jesús jam wyinaty myøøt'ajtpy, ja' tsujx tu'uk tnixajiyii'ñ jøts ja ttaxikja'tstuupty ja teetywindsøn tyumbi, ojts ja tyatsk ja tyikwinajki. ⁴⁸ Winets ja Jesús tnimaay ja jaa'y pøn ja wyinaty tø myachi.

—¿Ti mee x'ejxni ku xanimenidi ja kipy jøts ja tsujx? ¿Ti mee x'ejxni, maa'tspi, ku meets jade'en xmatswa'añ? ⁴⁹ Jabom jabom meets jam y'ijty nyik'ixpiky tsaptøjkjotp, ¿ti kuts meets jam xkamajch? Paty idø'øn ya'at ixyam jade'en yjaty kumi Dios kyajpxy jade'en wamp, ¿sudso'ampy idø'øn ja kyatø't?

⁵⁰ Winets ja pyabøjkpitøjk tmajtstuttøø nadyu'uk ja wyindsøn Jesús, jøts ja ojts jadi'iñi y'agakpajknidi.

Ja unajk jaa'y pøn jadi'iñi kaktigøø

⁵¹ Jamts ja Jesús wyinaty pyayø'øyi tu'uk ja unajk jaa'y pøn ja poop wet wyinaty tyukwop'ajtp, ja'ats ja yikmach; ⁵² winets ja wyet ja tmajtstuupty, jøts ja jadi'iñi niwaw'ats kyejky.

Ku ja Jesús yikwaanijkxy jam kutujktaajkjotp

⁵³ Xjats ja Jesús yiknajtswa'awiyiiñ jam møj windsøn wyindum pøn ja teety wyindsøn'ajtp, jam idø'øn ja windsøndøjk ñamyujkøjxidøø møøt ja møjaa'dyøjkti. ⁵⁴ Jagam idø'øn ja Pedro tpayø'øyi ja wyindsøn ku ja yiknajtswa'awiyiiñ jam windsøn kyutu-jktaajk agø'øm, jade'en ja tpaja'jty, jamts ja Pedro tmøøt'ixaajky ja tajk, ja' ja jam myøøtjo'kxpjky mā ja jøøn jam wyinaty tø myøji.

⁵⁵ Jøts ja teetywindsøndøjk møøt tuki'iyi ja kutujk adsinaabyidi t'ixaadyøø tu'uk ja pøky, jade'en ja t'ixaadyøø ja pøky jøts ja tuku'oogiyaw'andi ja Jesús; xjats ja niti tkapattøø.

⁵⁶ Kumi øy ja tigati ttaniwambatti jøts ja jade'en xem yam kyanabyaadyidi ja y'ayuujk.

⁵⁷ Winaagin pyidø'økti møk'ampy jøts ja nugo tni'øønidi øy ja yjagajade'eni, yide'en winaagin wyandøø:

⁵⁸ —Tø øøts yø nmadøy ku yø yide'en wya'añ: “Nyikida'ap øts yø tsaptøjk midi yø jaa'y tø tyik'øyidi, jøts øts kyidigøøk xøøw jadu'uk nyikwa'kukit midi ja jaa'y kyayik'øyip.”

⁵⁹ Jøts ni jade'embaat ja kø'øm kyanagyupikyidi ku ja øy sa yjawa'andi.

⁶⁰ Winets ja teetywindsøn tyanaagyukyiiñ jam mayjaa'yjotp, jøts ja tyiktiy ja Jesús, yide'en ja tnimaay:

—¿Ka' idø'øn m'adsø? ¿Ti dø'øn jade'en myiktani'øø'nip?

⁶¹ Xjats ja Jesús amøñi tyik'ity, jeky ja niwine'enin kyidyimy'adsøø. Winets ja teetywindsøn ja ojts jadigojk tyii'byikyiyi, yide'en ja ojts ñii'mxyiyi:

—¿Mets idø'øn ja' pøn Dios Teety pyiktaajky jøts mets mwindsøn'att? ¿Mets idø'øn ja Dios Teety m'U'nk'ajtp?

⁶² Xjats ja Jesús y'adsøø yøts ja wyaañ:

—Øts idø'øn ja'. Øts idø'øn ja naxwii'ñit jaa'y nmøjkudanaabyi'ajtpy, jøts x'ejxtip meets ku n'ixa'akt aga'ñ'ampy mā Dios Teety, jøts ku nayide'en ø nme'ent yoots agujkpy jap tsajpjøtpy.

⁶³ Winets ja teetywindsøn ja wyet kø'øm ttakø'jtsiyiiñ ku ja y'oj'abajtyiiñ, ja' idø'øn tyijpy ku tø ja jaabaat y'oj'amø'øty, xjats ja wyaañ:

—¿Ti ejxpi ti nija'wibi jaaktsojkiyiy? ⁶⁴ Tøxi xmadowdi sa tø wya'añ ku ja Dios Teety yø tø twingajpxnaxy; ¿sa dø'øn xjawidi ku jade'en wya'añ?

Winets ja niduki'iyi ttanikajpxtøø ja o'jkin.

⁶⁵ Jøts winaagin jatyi tniidsujidøø, jatyi twinmajtstøø jøts ja ttsee'ktøø, yide'en ja wyaan'adø'øtsti ku ja jade'en ttundi:

—¡Najtsjawi pøn tø mgøxyi!

Jøts ja tajk ja twingoxti tjøpkoxti awa'an'ampy.

Ku ja Pedro tku'iiñ jøts ku ja ka' t'ijxy'aty ja Jesús

⁶⁶ Jap ja Pedro wyinaty tøk'agi'py ku yja'jty tu'uk ja tø'øxyøjk pøn ja teetywindsøn tyumbi'ajtpy; ⁶⁷ ja'ats ja ojts y'ijxyiyi ku ja jap wyinaty jøn'ajpy yjo'kxpiky, tøyim ja wyinaty wyin'ejniiy xjats ja yide'en ñimaajyøø:

—Nayide'en mets y'ijty xpawidity ja Jesús ja Nazaretit jaa'y, ¿kidi?

⁶⁸ Xjats ja Pedro ja ka'ap tni'gajpxy, yide'en ja wya'añ:

—Ka'ap øts ja n'ijxy'aty pø pøn ja', jøts nguidyimñija'wip øts pø ti me mgajpxpy.

Xjats ja jade'en yø'øpyidsiimy jam tajyjøp'am. Winets ja tsapni'aaw y'ayajxi'jky. ⁶⁹ Jøts ja tø'øxyøjk ojts twin'ixy jadigojk ja Pedro, xjats ja ttukmadoobinaxwa'jky ja jaa'y pøn jam wyinaty, yide'en ja wya'añ:

—Ya'at jaa'y tmøøtwidejtp yø Jesús.

⁷⁰ Winets ja Pedro ja ka'ap tkupijky jadigojk. Waani y'ijty, xjats Pedro ja jaa'y ñimaajyøø jadigojk pøn jam wyinaty:

—Mets inet mdyimyøøtwidijtpy yø Jesús; kumi Galile'it jaa'y mets, jøts jade'en me mgajpxy sa yø kyajpxti.

⁷¹ Winets ja Pedro kø'øm kyanay'ømyigajpxiyøø møk'ampy ja jaa'y yide'en:

—Tyimy'ijxpy ja Dios jøts ku nguidyimñijawi pøni pøn jaa'y meets jade'en mdijpy.

⁷² Xjats ja tsapni'aaw myajtsk'ayajxy. Winets ja Pedro tjä'myejch ja Jesús y'ayuujk sa ja wyinaty tø ñii'mxyi: “Ka'anim wyinaty ja tsapni'aaw myajtsk'aya'axy ku mets inet wyinaty tigøøk ojk tø mwani ku me xka'ijxy'aty.” Jøts ja tkuyajxiy'ñ ku ja jade'en tjä'myejch jøts ku ja wyinaty jade'en nichøky tø wya'añ.

15

Ku ja Jesús twinguwa'jkii'ñ ja Pilato

¹ Xjats ku xyijndyaa'ky, winets ja teetywindsøn ñamyujkidøø møøt ja møjaa'dyøjkti, møøt ja kajpxwejpitøjkti, tuki'iyi wine'en ja t'adsøønidi ja kutujk jam tsaptøjkjotp. Jøts ja ojts tyiknøjkxti ja Jesús køwiiñ jam Pilato wyindum, jamts ja tkøyakti. ² Xjats ja Pilato tñimaay ja Jesús:

—¿Janch mets idø'øn windsøn'ajtp ya israelit jaa'y y'etjøøjty?

Winets ja Jesús y'adsøøy jøts ja wya'añ:

—Øts ja'.

³ Xjats ja teetywindsøn janch may ja øø'nin tpiktaktøø, yikxon ja Jesús yikni'øø'niiy'ñ.

⁴ Winets ja Pilato tyiktiy jadigojk, yide'en ja tñimaay ja Jesús:

—¿Ka'ap idø'øn m'adsøy? ¡Ejx! Yikxon mjanchyikni'øøni. ¡Ejx! Ja pøky kawinakjøøjp myiktani'øøni.

⁵ Jøts kyidyimy'adsoop ja Jesús ku Pilato ja jade'en ñii'mxyi; jøts ñigyumaap idø'øn ja Pilato ja kø'øm tjawi ku ja jade'en kyidyimy'adsøy.

Ku ja nwindsøn'ajtim Jesús ñidujkiy'ñ jøts ja y'ookt

⁶ Yide'en idø'øn ja Pilato wyinaty ja kostumbri tmøøt'aty ku ja paski xøøw tpaaty, winets ja tyik'awa'atspidsimy nidu'ugin ja tsumyjaa'y, pøni pøn ja mayjaa'y yik'awa'atspidsømwandip. ⁷ Jamts wyinaty tu'uk ja pøkyjaa'y tsumy pøn txøøw'ajtp Barrabás, ja' ja jap møøt chum'ity pøn ja wyinaty møøt tø yikjaa'y'øøky ku tsep ja wyinaty tø ttundi møøt ja kudunktøjk. ⁸ Xjats ja mayjaa'y jam jade'en myendøø, jøts ja t'amidoobinaxwa'aktøø ja Pilato jøts tsumyjaa'y ja tyik'awa'atspidsøømt nidu'ugin sa kyostumbri ja wyinaty tmøøt'aty. ⁹ Winets ja Pilato y'adsøøy jøts ja tñimaay:

—¿Sa mee m'ukwa'añ, wan yø israelit windsøn tyikmajtstu'uty?

¹⁰ Jade'en ja wya'añ kumi tø dø'øn ja wyinaty tjä'gyuki jøts ku ja teetywindsøn wyinaty nugo tø tkøyakti ja Jesús tanejkingøjxp. ¹¹ Xjats ja teetywindsøn tkajpxwejkøjxtøø ja mayjaa'y. Ojts ja t'agajpxidi, jøts ja wya'andit jøts wan ja Barrabás t'awa'atspidsimy jøts ka'ap ja Jesús. ¹² Xjats ja Pilato tyiktiy ja mayjaa'y, yide'en ja tñimaay:

—¿Jøtsimts yø israelit windsøn, sa yø yiktu'unt?

¹³ Winets ja y'adsoodøø jøts ja wyandøø møkta'aky:

—¡Yikruspat!

¹⁴ Xjats ja Pilato tñimaay ja mayjaa'y:

—¿Ti tundigøø'yin yø tø ttuñ, ti yø kyubatp?

Winets ja tjäaktyimykjinajxtøø, møk'ampy ja yjaaktyimwyandøø:

—jYikruspat!

¹⁵ Jøts kumi yikjotkukiwyampy ja Pilato wyinaty ja mayjaa'y, xjats ja tyik'awa'atspidsiimy ja Barrabás; jøts ku ja t'uknankwyojpoø ja Jesús, winet ja ojts tkøyaky jøts ja kyiruspatt.

¹⁶ Xjats ja soldaditøjk tyiknøjkxtøø ja Jesús jap kutujktaajk'agui'py ma ja ttejti Pretorio, ma ja masyoldadi jap wyinaty chøønidi, japts ja myisoldadi ja twaamukøxti. ¹⁷ Winets ja tsuu'nk wet ja ttuktatøjkidøø ja Jesús midi ja windsøndøjk nugo myiwindsøn'ajttip, jøts ja kujp awiity ttukoroni'atti. ¹⁸ Jøts ku ja jade'en t'uktundøø, winets ja wyambinaxwa'ktøø møk'ampy, yide'en ja tkajpxpoo'kxtøø:

—jMay xøøwim may jumøjtım mdsøønit mdanit mets israelit jaa'y wyindsøn!

¹⁹ Jøts ja kipy ja ttaxikwojpoø'ktøø, ojts ja tniðsujidi jøts ja ñadyijyi twinguxanidi, ñadyijyi ja twindsø'øgidi. ²⁰ Xjats ku dø'øn ja jade'en t'uktaxe'ktøø, winets ja tsuu'nk wet ja ojts tjainidi jøts ja ttuktatøjkidøø ja wyet midi ja wyinaty wyet'ajtpy. Xjats ja jaty twaabidsømdøø jøts ja kyiruspatt.

Ku ja nwindson'ajtim Jesús kyiruspejty

²¹ Xjats ku ja Cirenit jaa'y jam wyinaty ñaxy pøn txøøw'ajtp Simón, kyamjotp ja wyinaty chøøn; ja'ats ojts yiktaguwani jøts Jesús kyirus ja tpadsøjmit, ja' idø'øn jade'en jajtp pøn ja Alejandro møøt ja Rufo tyeety'ajttip.

²² Xjats ja mayjaa'y tyiknøjkxtøø ja Jesús jam Gólgota, ma ja et jade'en txøøw'aty midi jade'en tyijpy ayuujk Oo'kpi Kyubajk Pajk. ²³ Jamts ja tmøødyøø ja vino midi wyinaty tø yik'adamuky møøt ja tsøøy midi yiktejp mirra, ja' ja ojts tmo'odi ja Jesús, jøts ja ka'ap tkupijky, ka'ap ja t'uujky. ²⁴ Winets ja tyikruspajttøø; jøts ja soldaditøjk tyikwa'kxtøø ja Jesús wyet, ojts ja tñiguyatti, jøts pøni pøn majada'kp ja'ats ja wet twejtstøø.

²⁵ Jaa dø'øn ja xøøwu'nk wyinaty waani pyety ku dø'øn ja jade'en tyikruspajttøø. ²⁶ Jøts letri ja jam tkøxjaadyi; yide'en ja tyikwa'andi: “Israelit jaa'y ya'at ja wyindsøn.” Ja' dø'øn ja ojts ttagubatti kidi tii'jip. ²⁷ Namajtsk ja maa'tspi ja tyikruspajttøø nay jam møøt ja Jesús, tu'uk aga'ñ'ampy jøts tu'uk anajy'ampy. ²⁸ Janch jajt idø'øn ja jade'en sa jap nøkyixpy wya'añ, ku yide'en wya'añ: “Møøt ja yiktamimacho'owiyi'ñ ja møj ka'øy jaa'y.”

²⁹ Xjats ku dø'øn ja jaa'y jam ñaxti kruswemp, ka'ap ja tjanch'ømyigajpxti, wyibejptip ja kyubajk ja jam, jøts ja tnøjmidi:

—jJøj! Metsxi xijy tsaptøjk myikidaapy, jøts mets ja xijy jaty kyidigøøk xøøw xyik-tanaagyukigyojmi, ³⁰ nankñitso'ok'atits me kø'øm jøts mwina'kt jam kruskøjxp.

³¹ Jade'en ja jaa'y wya'andi, nayide'en ja teetywindsøn wyamidi møøt ja kajpxwejpitøjkti, yide'en ja kø'ømyi ñawya'añidi:

—May abiky jaa'y tø tyiknitso'ok'aty, jøts ka'ap kø'øm tjaty sudso ñankñitso'ok'atiyit.

³² Pøni ku net njanch'ejxint yø Israelit jaa'y wyindsøn wyina'kt jam kruswemp, winet inet njanchja'win jøts ku yø yjanchja'aji ja Cristo.

Ja jaa'ybaat ja kya'ømyigajpxøø pøn ja jam wyinaty møøt tø yjakruspety.

Ku ja nwindson'ajtim Jesús y'ø'jky

³³ Xjats ku kyujkxøøw'ajty, winets kyoodsiyi'ñ ja na'xwii'ñit, jaanim ojts yjajta'aky møj winakxyøøw. ³⁴ Jøts ja Jesús møk'ampy wya'añ:

—Eloi, Eloi, ¿lama sabactani? —midi tyijpy: Dios Teety, Dios Teety, ¿jadits ku ø tø xnanktyuñi?

³⁵ Winaagin ja jaa'y jade'en tmadoodøø pøn jam wyinaty jøts ja wyandøø:

—Madowdi, ja Elías yø wyaadsøøpy.

³⁶ Xjats tu'uk myiñ janch pujtpim pøn tñaxajiyi'ñ ja tanøxe'jts midi jade'en t'ejxp ejxim ja xa'akjoptsin, ja'ats ja ojts tyikxøøky jap vino ta'amjotpy jøts ja tpi'ktaajky jam kipy jøp'am, winets ja jade'en tta'adejyiyi'ñ ja Jesús jøts ja ttukwimuukwa'añ, yide'en ja wya'añ:

—Majtstu'utti; wan t'uk'ijxyim pøni janch'ukyikwinajkip inet idø'øn ja Elías jam kruskøjxp ku inet ja mye'ent.

³⁷ Winets ja Jesús møk'ampy yaajxy, jøtsnim ja y'ø'jky. ³⁸ Jøts nay jatyi ja wet kujkwa'kxy y'akø'øtspajky midi ja tsaptøjk jam wyinaty y'awejtstuk'ajtpy, kubajk'ampy ja kyø'øtstøjkijy'ñ jøts ja kyø'øtskidaajky ok'am'ampy. ³⁹ Jøts ku ja soldadi windsøn jade'en ojts t'ixy pøn ja Jesús jam wyinaty twindanaapy, winets ja wyaañ ku ja Jesús wyinaty jade'en møk'ampy tø ya'axy, jøts ku ja wyinaty tø y'øøky, yide'en ja wyaañ:

—Janch tiy tam idø'øn Dios tam ya'at y'ity y'U'nk.

⁴⁰ Jam ja tø'øxyøjk wyinaty tyanaamyidi pøn jam jagam a'ejxujktip; ja Salomé, jøts ja María Magdalena jam wyinaty møøt jadu'uk ja María midi ja Jacobo tyaak'ajttip møøt ja José. ⁴¹ Ja tø'øxyøjk idø'øn wyinaty tø tpawidetti ja Jesús, jøts ja' ja wyinaty tø t'ejx'etti ku ja Jesús jam Galilea wyidijty. Jøts jam ja tø'øxyøjk wyinaty y'a'ejxujkmidi pøn ja Jesús jam wyinaty tø pyanijxyi Jerusalén, møøt ja jam wyinaty tø yja'atti.

Ku ja nwindson'ajtim Jesús ñe'kx yikpiktaajky jap oo'kpi tsaa jutjotpy

⁴² Xjats ku chuu'wiyi'ñ ku ja poo'kxin xøøw wyinaty kyimjabom tpaatwani, ⁴³ winet ja José myiñ, ja Arimate'it jaa'y pøn wyinaty ja kutujk t'adsinaadyip. Ja'ats idø'øn tjøp'ejxp jøts ja ttatøkiwya'añ ja Dios kyutujk midi ja yjaa'y ja tyantanaapy, jøts ja ojts amumjoojt myiñ ma dø'øn ja Pilato jam wyinaty, jøts ja t'amidooji ja Jesús ñe'kx ku ja wyinaty tø y'øøky. ⁴⁴ Xjats ja Pilato ñigyumaap yajty ku dø'øn ja wyinaty tø y'oo'kni, winets ja tyaajxyi'ñ ja soldadi windsøn jøts ja tyiktiy pøni janch ku dø'øn ja wyinaty tø y'øøky. ⁴⁵ Xjats ku ja soldadi windsøn ja ojts tñigajpxy jøts ku ja janch jade'en, winets ja Pilato tkøyajky ja oo'kpi jøts José ja yikmøøy. ⁴⁶ Xjats ja tjuuy tu'uk ja poop wet midi øy midi majpxy, jøts ku ja tyikwinajky ja oo'kpi, ja'ats ja tya'amojts, jøts ja tpiktaajky jutjotpy midi ja wyinaty tø tyikjuty jam tsaaajotp. Jøts ku dø'øn ja jade'en tpiktaajky, winets ja møj tsaa ja tta'agiiy. ⁴⁷ Ojts idø'øn ja María Magdalena møøt jadu'uk ja María, pøn ja José tyaak'ajtpy, t'ejxtøø ma ja Jesús wyinaty tø yikpikta'aky.

16

Ku ja nwindson'ajtim Jesús yujukpyiky jadigojk

¹ Xjats ku ja poo'kxin xøøw ñajxy, winet ja María Magdalena t'atsjuudyøø ja pa'akxuu'kpi møøt Jacobo tyaak, møøt ja Salomé, jade'en ja ojts t'atsjuudyi jøts Jesús ja t'atspikta'akwajnididi ku ja wyinaty tø y'oo'kni. ² Xjats ja ojts ttaninøjkxti jøpyi ku ja samaan wyinaty tø y'abety, xøbidsimyu'nk ja yja'ttøø jam møj tsaa agujkp ma ja Jesús jam wyinaty tø yikpikta'aky. ³ Yide'en ja kø'øm ñawyajnidøø:

—¿Pøn inet ja tsaa tjanch'agii'dyu'ut jøts ndøjki'int?

⁴ Xjats ku ja yja'ttøø, winets ja t'ejxtøø ku ja møj tsaa ka'ap ja jap wyinaty ukteeni jap jut'agui'py, tø ja wyinaty yikiyø'øñi. ⁵ Jøts ku ja tyøjkidøø jap mutsk tøjkjotpy, winets ja t'ejxpattøø tu'uk ja ankilis midi ja wyinaty pya'ajpy tsinaapy, jøts midi wyinaty nayide'en ja poop wet myøøt'ajtpy. Xjats ku ja t'ejxpattøø waajtyøjk ja tijy, jøts ja ojts jantymchø'jkidi. ⁶ Jøts ja ankilis ja ojts ñii'mxyidi:

—Kidi mdsø'øgidi; nnija'wip øts ku meets ja Jesús ja ñe'kx x'ixaajiyidi. Tø ja jadigojk yujukpyiky, øy xtyimyejxtit ma ja yikpiktaajky. ⁷ Nøjkx ja pyabøjkpitøjk xukmadojidi møøt ja Pedro, jøts ñøjkxtit jam Galilea; jamts meets ja x'ejxtit jadigojk, jamts meets ja xminabyaadiyit jade'en sa ja kø'øm mnimaajyidøø.

⁸ Xjats ja choo'ndøø jam møj tsaa agujkp ma Jesús ja wyinaty tø yikpikta'aky, jøts ja ñøjkxtøø. Jadi'iñi tsø'øgi ja yjantyyikmibejpniiyidi jøts nipøn ja sa tkanøjmidi, kumi jantymchø'jkidip ja wyinaty.

Ku ja Jesús ñanky'ejxøø jadigojk ma ja María Magdalena jam wyinaty

⁹ Ku ja Jesús domingi jøpy wyinaty tø pyidsimy jadigojk jap oo'kpi jutjøtpy, ja María Magdalena ja ojts jawyeen y'ijxyiyi, pøn ja wyinaty tø tyikpidsøjmi niwixujk ja miku'.
¹⁰ Ja'ats ojts ñijkxy jøts ja ojts t'atstukmadøy pøn jaty ja Jesús wyinaty tø tmøøtwidetti, pøn jam wyinaty jiidyip yaxtip, maadyip tajtip. ¹¹ Jøts ku ja jade'en tñimadoodøø ku ja Jesús yjuky'aty, ku ja tø'øxyøjk ja wyinaty tø t'ixy, ka'ap ja tjanchja'widøø.

Ku ja Jesús ñanky'ejxøø jadigojk ma wyinaty ja namajtsk pyabøjkpitøjk

¹² Xjats ku dø'øn ja jade'en y'uknajxy, winets ja Jesús ñanky'ejxkojmüyøø abiky tsoo ku wyinaty ja pyabøjkpitøjk namajtsk yø'ødyi jam tuu'am. Ka'ap idø'øn ja pyabøjkpitøjk y'ejxkapyidi kumi wenk idø'øn ja kyaxi'jky. ¹³ Jawaani y'ijty, jøts ku ja t'ejxkajptøø winets ja jatyi jam wyimbejtøø kyamjotp, jøts ja ñøjkxtøø Jerusalén ma ja myigu'uk ja t'atstukmadoowa'andi. Kuts ja jam yja'ttøø, winets ja myigu'uk ttukmadoodøø jøts ja nika' yjanchja'wiyi.

Ku ja Jesús ttaguwa'anüy#ñ ja tunk ja pyabøjkpitøjk

¹⁴ Waani et xøøw ñajxy, xjats ja Jesús ñanky'ejxkojmüyøø ku pyabøjkpitøjk ja jam wyinaty nimaktu'uk twindsøønidi ja kaabyajt; jamts ja møk'ampy twingugajpxiy#ñ ja'agøjxp ku ja ñiti janchja'win tkamøø'tatti ku ja jadine'en kyujuunidi, kumi ka'ap ja wyinaty tø tjanchjawidi ku ja yiktukmadoodøø jøts ku ja Jesús wyinaty tø yik'ixy, ku ja wyinaty tø jadigojk yjukpyiky. ¹⁵ Yide'en ja yiknimaadyøø:

—Niyø'øygyøxti naxwii'ñit, jøts ja øgyajpxy jøts ja ømyadya'aky xkajpxwa'kxtit ma jaty ja jaa'y yjuky'atti. ¹⁶ Pøni pøn øts xjanchja'wip jøts pøni pøn nøbajtp, ja' nøjkx nitso'ok'ajtp ja y'anmija'win; jøts pøni pøn øts xkajanchja'wip, ja' yiktagubatp ja pyøky. ¹⁷ Ja jaa'y pøn øts xjanchja'widip, yide'en idø'øn ttu'undit øts køjxp: Yikpidsø'ømdip ja' ja miku'; kyajpxtip ja wenk ayuujk ja'; ¹⁸ pøni ayo'ombattip ja', pøni tsu'utsidip ja' ja tsaa'ñ adsu'jky, jøts pøni y'uuktip ja veneni ja', ka'ap idø'øn ja sa yjattit; jøts nayide'en ku pamaa'y ja ja'ayi tkønixajtit, jaty ja tyiktso'oktit.

Ku ja Jesús chajpejty

¹⁹ Xjats ku ja pyabøjkpitøjk ja jade'en t'uknimaay, winets ja chajpejty, ojts Dios Teety ja tsajpjøtpy yikpatøkiyi, jøts ja tpuwa'jtsiy#ñ aga'ngyø'ampy. ²⁰ Xjats ja pyabøjkpitøjk choo'ndøø, jøts ja ojts tkajpxwa'kxti ja øgyajpxy ja ømyadya'aky øy madsoo. Ja nwindson'ajtim Jesucristo ja kø'øm pudøjküyidip, jøts nay ja Jesús ja tmøøy ja myøk'ajtin jøts ja ttu'undit jade'en midi ñipøn jaa'y ya naxwiiñ kyajajtpy, paty ja mayjaa'y ja tjanchja'widi dø'øn ja pyabøjkpitøjk ja kyajpxy. Jade'en idø'øn ja y'ejxi.

JA ØGYAJPXY JA ØMYADYA'AKY MIDI JA LUCAS YJAA_Y

Ja Teófilo ya'at yiktanija'ayi

¹⁻⁴ Migu'uk Teófilo, may ja jaa'y tø tjajaadyanwa'andi tyimyjade'en ja madya'aky sam øøts ja nmigu'uk tø t'ejxti pøn ja Jesús kyudanaadyip. Nayide'en sam øøts ja tø nyiktuk'ejxyin, sam øøts ja tø n'ixpikyin, jade'ents ja tjaja'wa'andi pøn jaty t'ejxtøø tniija'widøø sa jaty cho'ondaajky. Ja'ats tø pyudøkiyidi jøts ja øgyajpxy ømyadya'aky ja tkajpxwa'kxtit. Nay tøts øts ja nbemuky ngonmuky ti jaty tuujnøø ku ya'at øgyajpxy ømyadya'aky cho'ondaajky. Ixyamts mets ja jade'en ndyimdyanijayi, jøts wa'ats xnijawit ja t'iy'ajtin, sa jaty tø myiknøjmi ku ja tø myiktukmadøy yø'øbi ixpøjkin.

Ku ja ankilis tniigajpxy jøts ku ja Juan Bautista kyaxø'økwa'añ

⁵ Ixyam idø'øn cho'onda'aky ja madya'aky. Ku dø'øn ja Herodes wyinaty rey'aty jam Judea, jamts ja teety wyinaty tu'uk chøøni pøn txøøw'ajtp Zacarías, ja' y'ijty møøt tyuñ tukpiky ja teetyøjkti pøn yiktejp Abías. Elisabet ja ñidø'øxy xyøøw, teety Aarón ja teety'ap'ajtmip. ⁶ Janch øy jaa'y idø'øn ja amajtskti, pyaduujnidip idø'øn Dios kyutujk ja' pøni ti ja yikta'ana'amdip. Jade'ents ja ka'ap pøn sa ñii'mxyidi, jade'en ja ka'ap pøn pyøky'ijxyidi. ⁷ Ka'ats ja y'u'nk ja teedi, ni ja Elisabet ka'ap ja y'u'nkpaaty, tyimyajaa'ñidi ja namajtsk wyinaty.

⁸ Xjats tuk'ojk ja Zacarías yjaa'y tyaja'jtidøø jøts ja ttuujnidit ja windsø'jkin ja Dios. ⁹ Jade'en idø'øn ja tkostumbri'atti ku ja teetyøjk ja jade'en tyaja'adyidi, winets ja tniwøjti pøn jap uktøkip jap mā ja Dios yikwindsø'øgi, mā poom tyøy. Xjats Zacarías ja ojts tyimdyaja'adyi, ja' ja poom ojts tyiktøy. ¹⁰ Ixam ja poom wyinaty jade'en tyøy, jøts niduki'iyi ja mayjaa'y ixap yjanchapkaajpxmidi jap tsaptøjkwimpy. ¹¹ Winets ja Zacarías t'ejxpaajty tu'uk ja Dios y'ankilis jøts ku ja jap aga'ñ'ampy tyani mā ja poom yikpikta'aky. ¹² Ku Zacarías ja ojts jade'en t'ejxpaaty, ni sudso'ampy ja kya'ukwinmaa'nbyatni, tsø'øgi ja janchyik'o'jkniiyip. ¹³ Xjats ja ankilis ja ñimaajyøø:

—Zacarías, kidi mdsø'øgi, tø Dios mgajpxaajkin mmado'oxiyi jøts pyaätp mnidø'øxy Elisabet tu'uk ja mutsku'nk. Mbaätip m'u'nk tu'uk, Juan ja mduksøøw'attip. ¹⁴ Mdaxonda'akp ja' mdajotkujk'atp ja', jøts may ja jaa'y ja nayide'en ttajotkujk'attit ku ja kyaxø'økt. ¹⁵ Ja'ats møk nøjkx ja kunuu'kxin tmøøt'aty jam Dios wyingujpk. Niwine'enin ja nøø ja tkatunk'att, ka'ap ja y'amu'ukyjaa'y'att. Jaayip ja Espíritu Santo tyuktatøjkniyi ja wyinmaa'ñ yam ja ka'aním myiñ naxwiiñ. ¹⁶ Ja'ats ja Israelit jaa'y tyukja'myatsp tyukja'byaätp ja Dios Teety jadigojk. ¹⁷ Jawyeen ja Juan mye'ent, jaanimts ja nwindson'ajtim mye'ent. Nayide'en winmaa'ñ nayide'en kutujk ja tmime'ent sam ja Dios kyugajpxy in, ja Elias'ajtpi. Jade'ents ja u'nkteety u'nktaak ja tyikjotimbett, jøts ka' ti tsep niti aki møøt chøønidit y'u'nkti y'una'jkti, jøts ñayikmado'op ja' pøn kidyimyadoodip. Jade'ents ja tyiktøøjit tyiktuudaajkit ja jaa'y wyinmaa'ñ jøts ja tjøp'ejxtit ja nwindson'ajtim.

¹⁸ Jade'en ja Zacarías yikniimaay, xjats ja ankilis ja t'amidøøy:

—¿Sudso'ampy øts ya'at ndajotkujk'att jøts ku yø t'iy janch, pø tum møjaa'ñits øøts amajtsk?

¹⁹ Xjats ankilis ja y'adsojøø:

—Gabriel'ajtp øts, jøts Dios ø nmidumpy; ja' øts idø'øn tø xkexy jøts mets ya'at aaw ayuujk ndukmado'ot. ²⁰ Jabi ka'apxi jaty tø xmibiky sa me tø nnøjmi, tants inet uum, jaanim me mgajpxt ku ja m'u'nk kya'aaxt. Jatp kubatp idø'øn ya'at jade'en sa ø tø nwa'añ.

²¹ Ixap idø'øn mayjaa'y t'awejxti ja Zacarías, maadyip tajtip ja jap ku ja jadine'en tya'ñini jeky jap tsaptøjkjøtpy. ²² Xjats ku ja pyidsiimy, ka'ap y'aaw y'ayuujk ja

t'ukyajkni, jøts ja tyimyjatyi tja'gyukidøø kudamik ja wyinaty tø y'ejxjøøxy y'ejxma'aty jap tsaptøjkjøtpy. Nugo ja ja'ayi tñidoni, tøyi ja wyinaty y'uu'mni.

²³ Kuts xyøøw ja ojts tyika'pxy winaak xøøw ja wyinaty tø yiktaguwani t'adsøønit ja tsaptøjk, winets ja ñøjkxni tyigam. ²⁴ Jøts ja ñidøøxy Elisabet ja nay jatyi yjōtpy'ajtni ku ja et ja xøøw jade'en y'uknajxy, magoxk po' ja y'ijty jap tyøkjōtpy jadine'en ja kya'ukpidsømni. Yide'en ja wyinmay jøts ja wya'añ: ²⁵ "Ja'agøjxp Dios tø ttuñ ja may'ajt jøts øts ja jaa'y xka'ukmi'ajkniiyt."

Ku ja ankilis tñigajpxy jøts ku ja Jesús kyaxø'økwa'añ

²⁶ Xjats ja Dios kidudujk po' tkejxy ja y'ankilis Gabriel jam Galileit naxjotp ma ja kajp txøøw'aty Nazaret, ²⁷ jøts ja t'ats'ext ja tø'øxyøjk pøn txøøw'ajtp María, øy yikxon ja yjaa'y'aty. Niwa'añ ja wyinaty y'ejtni jøts ja tmøøt'amajtskit tu'uk ja yaa'dyøjk midi txøøw'ajtp José, ja rey David y'aptatsk. ²⁸ Xjats idø'on ankilis ja jam tñidøjkii'ñ ma ja jam wyinaty chøøni jøts ja tñimaay:

—Dios køjxp ngajpxpøø'kxy, tø ja mmay'atyiyi! Ixa mets ja nwindson'ajtim møøt m'ejtni; tø ja Dios njantymgyunuu'kxyi ku nadyu'uk tø myik'a'ejxi wine'enin mdø'øxyøjk'atti naxwiiñ.

²⁹ Kuts ja twin'ejxpejty ja ankilis jøts ku ja jade'en myigajpxyi, ñigyumaap ja tyimya'wyiyi'ñ, jade'en ja kø'øm ñawynmaa'nxyiyi ti ja jade'en ttakajpxpoo'kxyiyip. ³⁰ Jøts ja ankilis ñimaajyøø:

—María, kidi mdsø'øgi, tø Dios m'øy'ijxyiyi, mjanchtajotkujk'ajtip ja'. ³¹ Mjōtpyiyip mets, mbaatp tu'uk mmajnku'nk, JESÚS ja mduxøøw'atp. ³² Møk winmaa'ñ møk kutujk ja myøøt'atp; Dios U'nk ja yiktejt, yikutujkpi Dios Teety ja pyikta'agiyit sam ja y'apteety'amøj David, ³³ jøts ja wyindsøn'att jam Israelit y'etjotp xemikøjxp; niwindem ja kyutujk ja kyakøxt kyanaxt.

³⁴ Xjats ja María tyiktiy ja ankilis:

—¿Ti sudso dø'on ja ndejin jade'en yjatt? Pø ka'anims øts nniyaa'y nbaaty.

³⁵ Winets ja ankilis y'adsøøy jøts ja wya'añ:

—Ja Espiritu Santo mnimeniyip, jøts ja Dios Teety tsajpjōtpyit ja' myøk'ajtin jade'en mduniyip. Jøts paty ja niwine'enin tkayikpøkyu'unt, wa'ats ja y'ett midi idø'on myika'axp. Tø ja jade'en ttanibiktaagi jøts ja Dios U'nk yiktejt. ³⁶ Ñayi pyaatp ja mmigu'uk Elisabet myajnku'nk tu'uk, øy idø'on ja yjamøjaa'yñi. Ixam ja tudujk po' kujk ttsøm'ity ja y'u'nk yam ja ka' tyimy'ukyikjøp'ijxy jøts y'u'nk ja tpaatt. ³⁷ Ka' Dios ti kyamayiyi.

³⁸ Xjats ja María wya'añ:

—Ane'emy øts ja Dios xyik'ity; wan øts ja jade'en xuñ sam ja tø wya'añin.

Winets ja ankilis jatyi choo'naa.

Ku ja María ñijkxy jøts t'ats'ijxy ja Elisabet jam tyøjkwindum

³⁹ Jøts ja María nayi winet et anøø adsu'jky ojts ñijkxy jam kojpkjotp ma ja kajp wyinaty tu'uk jam Judeit ñaxjotp, ⁴⁰ jøts ja ojts tyøki Zacarías tyøjkjotp, jamts ja ojts tkajpxpøø'kxy ja Elisabet. ⁴¹ Kuts Elisabet ja jade'en tmadøøy ku María ja jade'en kyajpxpøø'kxyi, jatyi ja tyimya'wyiyi'ñ yjotp ku ja mutsk y'adiijch, winets ja Espiritu Santo ja amuum tyatøjkiyøø. ⁴² Jøts ja yide'en møk yjantymgyunuu'kxyi:

—Tø Dios mjantymgyunuu'kxyi ku tø myik'a'ejxi wine'enin ndø'øxyøjk'ajtindi naxwiiñ, jøts yø m'u'nk nayide'en tø yikunuu'kxy. ⁴³ ¡Tyimdyi øts tyimbyøn øts ku øts nwindson'ajtim tyaagu'nk xkugajpxi! ⁴⁴ Ja'ayi ja mgajpxpoo'kxin tø ndyimyadøy, jatyi øts n'u'nk ja xonda'agyi tø yjantymgyunuu'adi'ichiyi. ⁴⁵ Nekim xøñim mets ku ja tø xjanchjawi xkunuu'kxyjawi, jatp kubatp idø'on yø jade'en sa yø Dios tø tyikutuky.

⁴⁶ Xjats ja María wya'añ:

Øy tsuj ngunuu'kxyjawi ja nwindson'ajtim,

⁴⁷ myinijkxpy øts n'aaw njoojt ja nDios Teety Yiknitsokpi.

48 Tønim ja Dios tñijawi jøts tø t'ejxjimbity ja y'u'nk ja myaay, yamnim øts inet ejtp ejtni xoni nyiktejt wine'enin ja naẖwii'ñit jaa'y yja'atti ya naẖwiiñ.

49 Janch møj ja Dios myøk'ajtin ku øts ja jade'en tø xuñ; pø wyandijpyts idø'øn yjanchwa'adsı yjanchkapøkmyøødi.

50 Ejtp ja tpa'ayo'ot pøn jaty ja windsø'jkıyıp.

51 Tø tyikwingaxi'iky ja myøk'ajtin ku ja tø tmımajadaajki ja namyıkaxi jaa'dyi wyinmaa'ñ.

52 Tø tyik'amutski pøn jaty kamaabyım yikutujktıp, jøts ja tø tyikjot'amøkpiky ja ayooııdı pøn jaty aay pısta'ak yik'ejxtıp.

53 Pøn jaty ayoodıp winmaadyıp, tøts ja tmø'øy ja jotkujk'ajtin, jøts ja kumeeñ jaa'y jadi'iñi wa'ats wiwøpy tø yikpagajxnıdı.

54 Tø ja tpudøki ja Israelit kajp ejxim ja y'u'nk t'ejxkapyın; ka'ap ja tja'dyigøpy paty ja tø t'ayo'ixy,

55 sam ja ojts yiktukmadowdın ja n'oktaakti ja n'apteetyı, møøt ja Abraham, ku ja y'u'nk y'una'jk jade'en kyakøxt kyanaxt.

56 Xjats ja María jam tmøøtaa'niyiñ tigøøk po' ja Elisabet; ku jade'en ñajxy, jaanımts ja ñøjkxnaa tyøjkwindum.

Ku ja Juan Bautista kyaxi'iky

57 Xjats ja xøøw ja po' tpaajty juuni et ja Elisabet kya'axt. Jade'ents idø'øn yikaxi'iky tu'uk ja myajnk'u'nk. 58 Jatyı ja myıgu'uktøjkti myıgujøøndı myıgudøjkti ñimejnıdı. Janch yikajxakp ja' ku ja tñija'widøø jøts ku ja Dios wyınaty ja kunuu'kxin møj tø myø'øyyıı.

59 Jøts ja kiduktujk xøøw tyıknøjkxtøø ja maxu'nk jøts ja ejxa'an yikmo'ot ñe'kxkøjxp, jamts ja tpıktā'akwajnıdı ja xyøøw sam ja tyeety xyøøw'atyın Zacarías. 60 Jøts ja tyaak, ka'ap ja tkupiky, yide'en ja wyaañ:

—Ka', ka'ap yø jade'en txøøw'att. Juan yø xyøøw'atp.

61 Xjats ja yıknımaay:

—¿Tıku yø jade'en yiktejt? Pø ka'ats ja mmıgu'uktøjk jade'en pøn txøøw'aty.

62 Winets ja tyıktøøddøø ja u'nkteety ti tyukxøøw'atp ja y'u'nk, nugo ja ttanıdonıdı.

63 Jøts ja ojts t'amıdøy tu'uk pedası ja puu'yu'nk ma ja tkøxjajyt ja xyøøw, xjats tpıktāajky: “Juan yø xyøøw.” Jøts ja jaa'y ñıgyumaap yjanchjajttøø ku ja t'ejxtøø jade'en. 64 Jøts ja Zacarías nay jatyı ojts y'awıjy jadıgojk, jatyı Dios ja tkajpxpøø'kxy, møk ja ttukmøjawi.

65 Ja'agøjxp ja ñıgyumaap tja'widøø ja tøk'ayø'øbyıdı, jatyı ja ojts tkajpxyø'øgyojtı sa wyınaty tø yjaty kyubety, jøts ja yıknıja'wiyiñ wine'enin ja Judeit jaa'y jam chøøndı y'etjotp. 66 Pøn jaty ja jade'en tımıdoodıp, nugo ja tkumayıdı tkudajıdı jøts ja xem yam ñayıktıyıdı ñay'amıdøyıdı:

—¿Ti yø tyu'ump, ti yø pyaap yø mutsku'nk ku yø yaakt?

Jabi janchmøøjyıpts ja Dios kyunuu'kxin yø'.

Ku ja Zacarías ja Dios yıkejpxøø

67 Xjats ja Zacarías ja Dios tyukajpxøø ja ayuujk ku ja wyınaty tø tyatøkiyi ja Espıritu Santo, jøts ja wyaañ:

68 Janch møj ja Dios ja kyunuu'kxin tmø'øy ja Israelit kajp, ku tø tñımiñ tñija'aty ja y'u'nk y'una'jk wine'enin adøm ja xja'ajtındı, tøts nitsoojkin ja xukpaajtyım.

69 Tø ja tu'uk tkexy ja yikutujkpi pøn xuknitso'ok'ajtındıp ja nbøky, nay ja David y'ap y'ok pøn y'ıjty ja Dios tımıdump.

70 Jade'en sa ja Dios Teety jawyeenıp ojts ttuknıgajpxy ja kyugajpxy,

71 jøts ku ja xanıguwandujtıın ja nmıdsep ja nmı'ajkıbı jøts nıduki'ıyi pøn x'øy'ejxim xka'øy'ejxim,

72 jøts ku ja ndeety'ap yik'ayo'ejxtıt ku ja ka'ap tja'dyigøpy ja y'ayuujk.

73 Ku ja wyinaty tɔ twanda'aky, jade'en ja ndeety'amɔj Abraham yiktamiwandaagi
 74 jɔts ku ja xukmimadaajkin ja nmidsep,
 jɔts ja jotkujk nmidu'unin, nisudso ngatsɔ'jka'ant,
 75 ɔy tsuj tiy janch ndsinaa'yindit, jade'en ja nwindso'jka'andit ejtp.
 76 Jɔts mets u'nk, mets ja Dios tsajpjɔtɔpyit mgugajpxy'atɔyɔp,
 kumi mets ja jaa'y wyinmaa'n ja myiktɔɔjɔp myiktuudaajkip jɔts ja nwindson'ajtim
 yikjɔp'ext,
 77 jade'ents ja jaa'y tnijawidit jɔts ku ja mye'ent yiknitsokpi jɔts ku ja pyojkpimaa'kxt.
 78 Jadine'en ja Dios xtsɔjkyim xpa'ayɔ'ɔyindi jɔts ja xanikejxyim ja y'u'nk ja yiknitsokpi,
 79 ja'ats xyikwejim xyikajim, kujaj kudɔ'kx xyiktsinaa'yindit. Ja' xukmajstujtɔmp ja
 nga'ɔdyu'unin ja ngugoots'ajtin,
 jɔts ja xuk'ejxint xuknija'wa'ant ja tsinaa'yin midi ɔy midi tsuj, jotkujk'atyim Dios
 wyingujkp.
 80 Jade'ents ja mutsku'nk ye'jky, mɔk mɔjaaw, wijy quejy, jɔts ɔy tsuj ja winmaa'n
 tjagyepy. Jɔts ja y'atsinaay jawyeen jam abak etjotp ma niti kya'ity, winetnimts ja
 nanky'ejxi ma ja Israelit jaa'y jamdi.

2

Ku ja Jesús kyaxi'iky

1 Xjats ja mɔj windsɔn Augusto winet et ojts tni'ane'emy mɔk'ampy jɔts ja naxwii'nit
 jaa'y niduki'iyi yikjaamyuktit. 2 Ja Cirenio jam wyinaty Siria kudunk'ajtp ku dɔ'on ja
 jade'en miduk'ojk tjaamyuk'okwandɔɔ ja jaa'xyɔɔw jɔts ja jumɔjt. 3 Xjats ja jaa'y jade'en
 nɔjkxti kyɔ'ɔmgajpkɔjxpti, jɔts ja xyɔɔw jɔts ja yjumɔjt tkɔyaktit jam. 4 Jade'en'ampyts
 ja José jam Galilea chɔ'ɔ'n ma ja kajp txɔɔwi Nazaret, jɔts ja nɔjkxtɔɔ Belén jam Judeit
 y'etjotp ma ja David wyinaty tɔ kyaxi'iky, kumi ja' ja José tyeety'ap'ajtpy. 5 Patyts ja
 jam tmɔɔtnijkxy ja María jɔts ja tkɔyaktit ja xyɔɔw ja yjumɔjt, tɔts wyinaty ja kajpxy
 ttunidi jɔts y'amajtskidit. Jɔtpynim ja wyinaty. 6 Winets ja y'u'nk ja nay jam pyaajtɔɔ,
 jam ja ojts pyo'ga'pxy. 7 Jɔts ja tpaajty ja yjagyoo'u'nk, ojts t'abity jɔts ja ojts tkɔ'ɔky jam
 jiyujkjɔɔ'kx'i'njotp. Ka'ap ja ja'taajk jam wyinaty tɔ nibaadi, patyts ja jami tyandɔɔ.

Ku ja borreek'ejxpi ja ankilis pyaadyidi

8 Jamts wyinaty jiyujk'ejxpidi tsigi'ejxpidi wingon ma ja kajp txɔɔwi Belén, ja'ats
 t'ejx'ejttip tsunaxy'ampy ja byorreegidi. 9 Xjats ja jam jotmɔn t'ejxpattɔɔ ja Dios
 y'ankilis. Jade'eñi ja jam tyimykajtaajky ma ja wyinaty, jɔts ja yjantyimchɔ'jkidɔɔ.
 10 Nimaajyidibik ja ankilis inet ja'adi:

—Kidi mdsɔ'ɔgidi, ɔgyajpxy ɔy'ayuujk ɔ nmimimpy. Ja' mee ndukmadoowampy,
 ni'ijtyi ja jaa'y ja tjantajotkujk'attit: 11 tɔ ɔxyam kye'exy ja CRISTO, ja nwindson'ajtim, ja
 yiknitsokpi ma ja David jam kyugajp'ajty, ja' kyajpkɔjxp. 12 Ja' idɔ'on ja wyinaty ku inet
 xpaattit tu'uk ja maxu'nk mots'abidity kyɔ'ɔgyi jam jiyujkjɔɔ'kx'i'njotp.

13 Jaaktyimgyaxɔ'ktip inet ja may ankilis jam ma ja tyu'ukpi wyinaty, jɔts ja Dios ja mɔk
 ttukmɔjawidi ttukunuu'kxyjawidi, yide'en ja wya'andi:

14 jKunuu'kxy mets Dios Teety tsajpjotpit

ku ɔy'ajtin tsuj'ajtin tyaky ya naxwii'n naxkijxy, jɔts ja jaa'y yikmo'odi pɔn
 tmijotkujk'atwandip ja Dios!

15 Xjats ku ja ankilis wyimbejtnidɔɔ ku ja nɔjknidɔɔ jap tsajpjɔtɔpy, winets ja
 jiyujk'ejxpidi nixem niyam nawayambinaxwa'jkidɔɔ:

—Wants idɔ'on tja'myindi Belén, jamts ja t'ats'ijxyindi midi Dios tɔ xuknija'windi.

16 Xjats idɔ'on putyi nɔjkxtɔɔ, jɔts ja María jam ojts tjanchpaatti mɔɔt ja José, janch
 jamdamik ja mutsku'nk tɔ yikɔ'ɔky jiyujkjɔɔ'kx'i'njotp. 17 Kuts ja jade'en t'ejxtɔɔ, winets
 ja tnmadyaktɔjkidɔɔ sa ja ankilis ja wyinaty tɔ tyamimadya'agyidi ja maxu'nk, 18 jɔts ja

ñigyumaap yjanchjajttø pøn jaty jam wyinaty. ¹⁹ Jøts ja María ja'myech ja tyik'ity sa ja wyinaty tø yiknøjmi, ja' ja wyinmaa'ñ'ajtnip. ²⁰ Xjats ja jiyujk'ejxpi wyimbejtnidøø. Møk ja Dios ja ttukmøjawidi ttukunuu'kxyjawidi ja'agøjxp ku ja wyinaty jade'en tø t'ejxti tñijawidi jøts ku ja jade'en tø yjantymjyaty.

Ku ja maxu'nk Jesús y'atsyiktuk'ijxy ja Dios Teety tsaptøjkjotp

²¹ Kiduktujk xøøw ja mutsk ojts yikpiktaajki ja ejxa'an ñe'kxkøjxp jøts ja yikxøømøøy JESÚS. Nay ja' ttukxøøw'ajty midi ja María ja ankilis wyinaty tø tyukmadøyi ku ja wyinaty ka'aním tjøtpy'aty.

²² Xjats ku ja tiempi tpaajty wine'en ja wyinaty tø t'a'ejxidi wya'atsti sam ja Moisés kyutujk wya'añin, winetnimts ja maxu'nk ja jam Jerusalén ttaninøjkxtøø ja Dios. ²³ Jade'en'ampy idø'on ja jade'en ttundøø kumi yide'en ja Dios kyutujk yja'ayi: "Tum Dios ja mixyuna'jk yiktamiyoxtip pøn jagyoobi'ajtp." ²⁴ Xjats idø'on ja jade'en t'atswindsø'jkidøø sam ja Dios Teety tø tyikutukyin: namajtsk naxpak, pøni ka'ats ja te winets ja tsapak nayide'en namajtsk yiktawindsø'øgit.

²⁵ Jamts wyinaty ja jaa'y tu'uk chøøni Jerusalén pøn txøøw'ajtp Simeón. Janch øy jaa'y idø'on ja'. Yjanchja'myejchp idø'on Dios ja'. Ja'ats idø'on tjøp'ejx'ejtp ja Israelit kajp juunim idø'on ja yjadyimy'uknitso'ok'att. Jam ja Espíritu Santo ja wyinaty tmøødi, ²⁶ jøts tø ja wyinaty twanda'aky jøts kunim ja jawyeen t'uk'ext ja Cristo pøn ja Dios Teety kyaxp, winetnimts ja y'ookt. ²⁷ Xjats ja winet ñijkxy tsaptøjkjotp, ja Espíritu Santo ja yiknøjkxi; kuts ja maxu'nk Jesús jam wyinaty ja tyeety tyaak tø yiknijkxyi jøts ja jade'en tpadundi ja kutujk, ²⁸ jøts Simeón ja jam tñixajiyi'ñ kyø'køjxp jøts ja tsaa'ñ'ijty, jøts Dios ja ojts ttukmøjawi ttukunuu'kxyjawi, yide'en ja wyaañ:

²⁹ Dios Teety, tøts inet, wan øts inet jotkujk t'oo'kni.

Tø xpaduñ ja m'ayuujk sa ø xnimaay.

³⁰ Tønim ø nwemp'ixy ja yiknitsokpi

³¹ midi tø xanibiktaagi ja naxwii'ñit jaa'y.

³² Yø' idø'on tu'ump ja may'ajtin jøts ja jaa'y mja'myatstit mja'byaadit pøn ka' y'Israelitjaa'yidi.

Yø'ogøjxp idø'on yik'ejxkaptit ja Israelit kajp midi tø xwi'ixy.

³³ Xjats ja José janchñigyumaap yjajttø møøt ja ñidø'øxy ku Simeón ja mutsk jade'en tñigajpxy. ³⁴ Winets Simeón ja kyunuu'kxmyigajpxidøø. Yikajxaktip ja' jøts ja María yiknimaay, ja Jesús tyaak:

—Ejx madow, ja' yø mixyu'nk tø yiktanibiktaagi jøts Dios Teety y'øy'ajtin ttukpaajtit may ja Israelit jaa'y. Nay mayts ja tkapaattit ku jaa'y yø may kyagupøkit. ³⁵ Jade'ents idø'on ja yiknijawit sa pønjabøn wyinmay y'am yjotp. Mdyimchaachkuwinmayip mets ja øy, tyimchaachjawip mets m'anmija'win ja'.

³⁶ Jamts wyinaty tu'uk Dios kyugajpxymi, Ana ja tø'øxyøjk xyøøw, ja Fanuel ñøøx, ja Aser ja y'laadsidip kyugojidip. Møjaa'tyigøynits idø'on ja'. Tyimy'una'jkyi ja y'amajtskiyi'ñ jøts ja ja'ayi wixujk jumøjtyi tmøøtsinaay ja ñiyaa'y. ³⁷ Makta'pxy myaktaxk jumøjts ja wyinaty, jøts ejtpts idø'on ja jap tsaptøjkjotpy tmiduñ ja Dios xinaxy tsunaxy, y'amaay'ajtpy idø'on ja', ka'ap ja tkugayi tku'uugi, ejtp Dios ja t'ajot'aty. ³⁸ Ja Ana dø'on jap ojts myiñ winet, jøts ku Dios ja ojts ja t'uktukmøjawi t'uktukunuu'kxyjawi, winets ja tñigajpxøjkiyi'ñ ja mixy Jesús. Ja' ja tyukmadøøpy pøn jaty wyinaty tjøp'ejxtip jøts ku ja Jerusaléngit jaa'y ñitso'ok'attit.

Ku ja wyimbettø yja'ttøø jadigojk Nazaret

³⁹ Xjats ja wyimbejtnidøø ñøjknidi jam kyajpkøjxp Nazaret, jam Galileit y'etjotp, ku ja jade'en wyinaty tø tpadungøjxidi ja Dios kyutujk. ⁴⁰ Jøts idø'on ja mixyu'nk jam jade'en yeeky, møj møjaaaw, wijy kejy. Dios ja amuum jantymkyunuu'kxyip.

Ku ja mixy Jesús yikpaaty jam tsaptøjkjotp

⁴¹ Xumi nøjkxtipts idø'øn ja tyeety tyaak jam Jerusalén winjumøjt ku ja paski xøøw jam tpaaty. ⁴² Jøts ku ja Jesús yjumøjt wyinaty makmajtskni, winets ja ojts ñøjkxti niduki'iyi Jerusalén, jøts ja xøøw ja t'anøjkxidi kumi jade'en ja kostumbri. ⁴³ Xjats ku ja wyimbejtnidøø xøøguixy, winets ja mixy Jesús jamyi tyaanaa Jerusalén, ka'ap ja José ja tkumaydi. ⁴⁴ Jade'en ja wyinmaydi, jam ja tijy pyamiñidi mayjaa'y agujkp, jøts ja jade'en yø'øxyinajxtøø; jøts ja tja'ixaadyøø tjayiktøødøø tjayik'amidoodøø ja myigu'uktøjkti pøn jaty ja møøt ñay'ijxy'atyidi, ⁴⁵ nima ja tkapattøø. Xjats ja tniwimbejttøø jadigojk Jerusalén jøts ja jam t'ixaadyøjkidøø.

⁴⁶ Kidigøøk xøønim ja tpattøø, jamdamik ja wyinaty tsaptøjkjotp chøøni jam may kyajpxwejpj y'agujkp, jamik ja pyatmadøy jøts ja jam t'amidøy tyiktiy tyiktu'ugi. ⁴⁷ Jøts ku ja jaa'y ja jade'en tmadoodøø, ñigyumaap ja tyimya'widøø ku ja amwijy tsaachwijy, jøts ku ja tyy janch y'adsøy. ⁴⁸ Xjats ku ja tyeety tyaak ojts y'ijxyi, ñigyumaap ja tyimya'widøø jøts ja tyaak ojts ñi'mxyi:

—¿Ti, u'nk, jade'en myik'adøøjstip? ¿Ti øøts jade'en xjantyatump? Møk øø tø xjanty-imyikjotmadyøki wine'enin øøts ixa njawidity, mjayik'ixa'ay.

⁴⁹ Xjats ja Jesús y'adsøøy jøts ja wyaañ:

—¿Tiku ø x'ixa'adi? ¿Ti kidi xnijawidi ku øts nDeety yja' nduujniyit?

⁵⁰ Niwine'enin ja tkaja'gyukidøø ku ja jade'en ñimaajyidøø.

⁵¹ Xjanims ja tmøødidøø Nazaret, etpts idø'øn ja myimadøyidi jøts ja tyaak nugo tja'myats'ijty sa yajty. ⁵² Yaak'adøtspts ja Jesús, wej'adøtsps kaj'adøtsps ja'. Jade'ents Dios ja tyajotkujk'aty ku ja jade'en y'ijxyi, jøts myigu'uk nayide'en yjotkujk'atti.

3

Ku ja Juan Bautista kyajpxwa'kxy abak etjotp

¹ Makmojkx jumøjt wyinaty kujk yikutuky ja møj windsøn Tiberio ku ja Poncio Pilato wyinaty wyindsøn'aty jam Judea, jøts ja Herodes jam Galilea, jøts ja myiga'ax Felipe jam Iturea jam Traconite, jøts ja Lisantias jam Abilinia wyindsøn'aty. ² Ja Anás møøt ja Caifás ja idø'øn wyinaty møjteetywindsøn'ajttip ku ja Juan, ja Zacarías myajnk, ja Dios tyukmadoji ja y'øgyajpxy ja y'øy'ayuujk jam abak etjotp. ³ Xjats ja ojts t'ayø'ø'y'abidsimy ja et jam møj nøøba'am midi txøøw'ajtp Jordán, jøts ja jaa'y ttukmadøy jøts ku ja ñøbattit, jøts ja tyiktøødit tyiktuuda'aktit ja wyinmaa'ñ, wan tyiktigatsti ja chinaa'yindi winets ja yikpojkmama'kxtit. ⁴ Xjats ja jade'en yjanchtuuñøø yjanchjajttøø sa ja Dios kyugajpxy Isaias wyinaty tø tjaadyañ ja ayuujk ku ja wya'añ:

Paty ja kugajpxy ñøjkxt jawyeen jam abak etjotp jøts ja myigu'uk ja tnøjmit møk'ampy: “Awejxidi ja Dios y'ixpøjkin, yiktøwdi yiktuuda'akti ja mwinmaa'ñ yikxon.

⁵ Pønts ja kya'ukupøkp wan ja tyimyaapøni, ni'ijtyi ja tum jade'en tkupøkt.

Yik'øyip yiktuuda'akp ja' winmaa'ñ ku wyinaty pønjabøn tø wyinmaamy'aaty.

⁶ Jade'ents ja naaxwii'ñit jaa'y ni'ijtyi t'ejxtit sa dø'øn ja Dios tyaky ja nitso'ok'ajtin.”

⁷ Xjats ku ja Juan ja mayjaa'y jam ñimejniyøø jøts ja tyiknøbatt, jøts ja tniimaay:

—¡Mee miku! ¿Pøn mee tø mni'mxyi jøts ku jade'en mgayiktabayø'ødyit ja mbøky, jøts ku yø'øyi chøkyi ku meets ya nøbajtpi tø mmiñ? ⁸ Yikxon idø'øn mjaa'y'attit, wan idø'øn tyik'ijxy jøts ku ja mdsinaa'yin tø xyiktigatsti. Kidi mee kø'ømyi mnawya'añiyi: “Tixi ka'ap ti chøkyi, kumi ja Abraham adøm n'apteety'amøj'ajtyindip”; jøts ka'ats yjade'eni, ti Dios kamaajyip, øy ja pøn ttukmigu'uk'att ja Abraham pøni pøn ja kø'øm y'a'ejxip. ⁹ Jøts tsojk ja nøjkx yiktiidyuñ pøn jaty tkami'øy'ajtip ja Dios.

¹⁰ Xjats ja mayjaa'y ja yiktøøjøø y'amidoojøø:

—¿Ti øø ndu'ump? ¿Sudso'ampy øø nwinmaa'nbyaatt?

¹¹ Jøts ja Juan y'adsojimbijty:

—Pøni pøn ja pyikta'aky, pøni pøn ja yjujky'ajtin may'ampy tjagyajtpi, wants ja tmo'odi kujkwa'kxy pøn niti kidyimy'ejtxidip; pønts ja kyaajyik yjøø'kxik jam, wan ja nayide'en møøt tjøø'kxwa'kxtit pøn ja kyaajyik y'uujkik kidyimy'ejtxidip.

¹² Winets ja yikugubajtpidi myemidi jam nøbajtpi, jøts ja Juan yik'amidøøy:

—Windsøn, jøts øøts, ¿ti øø ndu'ump?

¹³ Jøts ja Juan ja y'adsoojidøø:

—Kidi kugujuu'ñ ne'egi ne'egi x'amidowdi, ja'ayi dø'øn mbadu'undip sa kyutuky.

¹⁴ Jøts ja tseptumbidi winaagin tyiktøømidøø:

—¿Jøtsimts øøts, ti øø ndumip?

Xjats ja t'adsøøy:

—Kidi pøn o ti xpøjkxidi aguwanikøjxp, kidi pøn o ti xanitaayibyatti; tajotkuk'atti ja mmijuu'ndyi.

¹⁵ Ixjam idø'øn ja mayjaa'y wyinaty y'awejxti, ja' ja tyajotkukiwyandip, yide'en idø'øn ja wyinmaydi jøts ku ja Juan ja' idø'øn Cristo. ¹⁶ Jøts ja Juan ojts tnigajpxy, ttukmadøøy ja mayjaa'y:

—Tiy janch ixyam ndyimdyukmadowdi jøts ku øts yø'øyi tø nnimiñ jøts meets ja nøø nduktanøbattit; jats ø tu'uk ix'oojk xpamiñ pøn meets ja Espiritu Santo mduktatøkiyip, jøts ja' tmime'ent ja tiidyu'unin. Møk'ampy kutujk ja tmimiñ, nija'baat ø xkapaat'aty jøts øts ja nugo nwinaxt. ¹⁷ Jade'en ja ttu'unt ja naxwii'ñit jaa'y sam ariin yikwigumy. Abiky ja tpiktaajkit ja y'ak jøts ja tnitø'øty ja jøøn midi nijuuni kape'tsp, jøts ja ariinbajk abiky yikpøkjø'økt, jade'ents idø'øn ja jaa'y yiktu'undit sam pønjabøn tmi'ø'y'aty tkami'ø'y'aty ja Dios.

¹⁸ Jade'en idø'øn ja Juan ja t'ana'amin'aty, jade'ents ja ttukmadøøy ja mayjaa'y ja øgyajpxy ja øy'ayuujk. ¹⁹ Nayi wyingugajpxiyi'ñ ja møk ja windsøn Herodes ku ja tniðø'øxy'aty ja Herodías, ja myiga'axy Felipe ja ñidø'øxy, jøts ñayi tyamigajpx ja' sa jaty ja jam wyinaty tyundigøy; ²⁰ xjats ja Herodes ka'ap ja tmøjpikta'aky, jaaktyimdyundigøøy ja', ojts Juan ja tyikpuxøktøki.

Ku ja Jesús ñøbety

²¹ Ku ja Juan wyinaty ka'anim yiktsumy, ku ja jam tyiknøbejty ja mayjaa'y, winets ja Jesús jam ñøbajtmøø; ixjam ja wyinaty Dios'ajot'aty ku ja tsajp y'awaajch ²² jøts ja Espiritu Santo ja jade'en ñigida'agyí ejxim tsapak, wa'ats ja yik'ijxy, winets ja Dios Teety y'ayuujk yikmadøøy, yide'en ja jap tsajpjøtpy wy'a'añ:

—Øts me n'U'nk'ajtpy; ndsøky'ajtpy mets jøts njantyajotkujk'ajtpy mets.

Ja jaa'dyi pøn jaty ja Jesús tyety'apip

²³ Ee'pxmajkin ja Jesús wyinaty ja yjumøjt ku ja tyunk ja tjøpwa'jkijy'ñ. Nømdip idø'øn jøts ku ja teedyi ja José. Jøts ja José tteety'aty ja Elí, ²⁴ jøts ja' ja Matat, jøts ja Matat ja Leví. Jade'en ñabyayø'øyi Leví ja Melqui, Melqui ja Jana, Jana ja José, ²⁵ José ja Matatías, Matatías ja Amós, Amós ja Nahum, Nahum ja Esli, Esli ja Nagai, ²⁶ Nagai ja Maat, Maat ja Matatías, Matatías ja Semei, Semei ja José, José ja Judá, ²⁷ Judá ja Joana, Joana ja Resa, Resa ja Zorobabel, Zorobabel ja Salatiel, Salatiel ja Neri, ²⁸ Neri ja Melqui, Melqui ja Adi, Adi ja Cosam, Cosam ja Elmodam, Elmodam ja Er, ²⁹ Er ja Josué, Josué ja Eliezer, Eliezer ja Jorim, Jorim ja Matat, ³⁰ Matat ja Leví, Leví ja Simeón, Simeón ja Judá, Judá ja José, José ja Jonán, Jonán ja Eliaquim, ³¹ Eliaquim ja Melea, Melea ja Mainán, Mainán ja Matata, Matata ja Natán, ³² Natán ja David, David ja Isaí, Isaí ja Obed, Obed ja Booz, Booz ja Salmón, Salmón ja Naasón, ³³ Naasón ja Aminadab, Aminadab ja Aram, Aram ja Esrom, Esrom ja Fares, Fares ja Judá, ³⁴ Judá ja Jacob, Jacob ja Isaac, Isaac ja Abraham, Abraham ja Taré, Taré ja Nacor, ³⁵ Nacor ja Serug, Serug ja Ragau, Ragau ja Peleg, Peleg ja Heber, Heber ja Sala, ³⁶ Sala ja Cainán, Cainán ja Arfaxad, Arfaxad ja Sem, Sem ja Noé, Noé ja Lamec, ³⁷ Lamec ja Matusalén, Matusalén ja Enoc, Enoc ja Jared, Jared ja

Mahalaleel, Mahalaleel ja Cainán, ³⁸ Cainán ja Enós, Enós ja Set, jøts Set tteedyi ja Adán, jøts ja Adán ja Dios Teety.

4

Ku ja Jesús ja miku' tyaguwaníyí jøts ja yikpøktyunwá'añi

¹ Xjats ja Jesús wyimbijty jam Jordángit nõø agø'øm. Tø ja Espíritu Santo ja tyatøjkiniyi jøts ja jam yiknøjkxøø tø'øts etjotp ma niti kya'ity. ² Jamts ja ojts chøøni wixijxxyøøw jøts ja miku' ja jam yjot'ejxwá'añi. Niti ja tkajii'kxy jadine'en jøtsnim ja pyaajtøø ja yuu.

³ Winets ja miku' ja ñimaajyøø:

—Pøni janch ku me mjanchDios U'ngi yik'øyi yø tsaa tsapkaaky.

⁴ Jøts ja Jesús t'adsojimbijty:

—Yide'en jap nõkyijxpy wya'añ: “Kuuyi Dios kyajpxy møj, kidi ja'ayip ja naæwii'ñit jaa'y nugo tyajujky'ajttip ti jaty yikjøø'kxp.”

⁵ Xjats ja miku' ja ojts wyaanijkxyi jam møj kojpkøjxp, jøts ja jam tyuk'ejxøø wine'enin ja kajp naæwiiñ. ⁶ Yide'en ja miku' ñimaajyøø:

—Nmøøgyøxp mets ya'at tuki'iyi wine'en øts yø kajp nnitani ja møj ja mutsk. Jade'en øts yø tø nyikmø'øy, øyts øts yø pøn ndyimyø'ot pøni pøn øts yø nmo'owampy. ⁷ Pøni xwinguxanaapy øts jøts ø xwindsø'øgit, winets mets yø tuki'iyi xja'ajtkøxt.

⁸ Xjats ja Jesús t'adsøøy:

—Miku' jiwa'ak. Kidi øts ya xwin'ixy, pø yide'ents ja Dios kyajpxy wya'añ: “Ja Dios Teety tu'ugyi mwindsø'øgit, ja' tu'ugyi mduujnip ja yja' pøni sa ja wya'añ.”

⁹ Xjats ja miku' ja wyaanøjkxkojmíyøø jam Jerusaléngit kajpkøjxp jøts ja tsaptøjkøjxp yikpajtiyøø, jøts ja ñimaajyøø:

—Pøni janch Dios U'nk mets, katswoon ya; ¹⁰ pø nõmpxi Dios kyajpxy jøts ku ja tnøjmit ja y'ankilis jøts me myik'ejx'ett, jøts ku me ka'ap ti mjatit. ¹¹ Mets ja mdsa'anjø'øgit jøts mdeky ja tsaa kyakumit kyayo'odsit.

¹² Xjats ja Jesús t'adsøøy:

—Janch nayide'ents ja Dios kyajpxy wya'añ: “Kidi mDios xjot'ixy.”

¹³ Jade'ents ja miku' nisudso'ampy kya'ukwinmaa'nbyatnaa sa ja tjaakjot'ejxkojt ja Jesús, jøtsnim ja jade'en ñimyajstuujtøø.

Ku ja Jesús tjøptøki ja tyunk Galileit etjotp

¹⁴ Jøts ja Jesús ñøjkxnaa Galilea, møk'ampy ja Espíritu Santo ja wyinaty tø tyatøkiyi, jade'en ja tmøø'aty, tum ja' idø'on ja jaa'y wyinaty y'aawidip y'ayuujkidip o madsoo.

¹⁵ Yats ja yik'ixpiky ma jaty ja tsaptøjk jam, jade'ents ja o pøn kyajxa'agiyi.

Ku ja Jesús yja'jty jadigojk Nazaretit kajpjotp

¹⁶ Jøts ja ojts ñijkxy Nazaret, jam kojpkøjxp ma ja wyinaty tø myutsk'aty. Poo'kxin xøøw wyinaty ku ja tyøjkíyí'ñ jam tsaptøjkjotp, jade'en idø'on ja tkostumbri'aty, xjats ja tmiwa'kukíyí'ñ ja Dios kyajpxy jøts ja tkajpxy. ¹⁷ Ja nõky ja wyinaty tø yikø'ø'øy midi ja Dios kyugajpxy Isaías yjaay; jøts ku ja ojts t'agii'byaky, ja' ja jap pyaajt ma jap wyinaty yide'en kyøxja'ayi:

¹⁸ Dios Teety øts ja y'Espíritu Santo xpudøjkp,

ja' ø xmøøpy, ja' ø xpiktakp jøts øts ja ayoobi jaa'y ndukmado'odit ja øgyajpxy ja øy'ayuujk; ja' ø tø xkexy jøts øts ja ngajpxjot'amøkidit pøn amjotmay'oo'ktip tsaachjotmay'oo'ktip, jøts øts ja nyik'awa'atspidsø'ømdit pøn jade'en ejtnidip sam tsumy jaa'yindi, jøts øts ja nyikwin'ejxwá'kxtit pøn wimbeets kugoots ejttip; jøts øts ja nyik'awa'atspidsø'ømdit pøn øy sagasa yiktundip;

¹⁹ jøts øts ja Dios Teety ja yiknitso'ok'ajtin nnigajpxiyit.

²⁰ Winets ja Jesús t'agii'myujky ja nõky, jøts ja ojts tkø'ø'øy ja tumbi, jøts ja y'ixaajky, jøts ja mayjaa'y ka'ap ja y'ukni'ejxujtníyí. ²¹ Xjats ja kyajpxøjkíyí'ñ jøts ja wyaañ:

—Ixamts idø'øn yø jade'en tø yjaty tø kyubety mee mwingujky sa ja Dios kyajpxy wya'añin.

²² Jøts ja ni'ijtyi t'ødyejtøø ja Jesús, ñigyumaapts idø'øn ja tjawidi ku myadya'aky ja amdsuj tsaachuj pøni sa jaty ja ñii'mxyidi, jøts ja xem yam ñayiktiyidi:

—¿Kidi ja Joséjip idø'øn ya'at ja y'u'nk?

²³ Jøts ja Jesús wyaañ:

—Tiigyajpxy yide'en meets inet mdyimwya'añ: “Tsøoyibi, nachøoyi kø'øm”; mnayinømdipts inet: “Jade'en sa øø tø nnimadøy m'adi'ich jam Capernaum, tu'unts inet ya nayide'en mgø'ømnaxkijxy mgø'ømkajpxkijxy.”

²⁴ Jøts ja yjaakwaañ:

—Tiy janch meets idø'øn nnøjmi jøts ku ni tu'ugin Dios kyugajpxy kyayikupiky kyø'ømnaxkijxy kyø'ømgajpkijxy. ²⁵ Tyimñømp øts, kawinaak ja ku'øktyø'øxy ja wyinaty ya Israelit etjøjty ku ja Dios kyugajpxy Elías y'atsinaay, ku et kyatuuy tigøøk jumøjt jagujkp winets ja yuu yjanch'ijty o magajp; ²⁶ ni tu'ukts ja kyayiktanigajxtøø ja Elías ya Israel, ne'egi ja' Dios ja tyanigajx pøn jam wyinaty tsinaapy Sarepta, jam Sidón kajp wingon. ²⁷ Nay jats jaa'y wyinatymidi ya Israel pøn putstip ku ja Dios kyugajpxy Eliseo yjaa'ajty, jøts ja ni tu'ugin kyataadyøø ja pyu'uts. Pøn txøøw'ajtp Naamán, ja' ojts ne'egi ja yja' tyay pøn jam Siria kunaajx'ajtp kugajp'ajtp.

²⁸ Xjats ku ja jade'en tmadoodøø jøts ja yjantyimy'ambøjktøø pøn jaty jam wyinaty tsaptøjkjotp. ²⁹ Ojts ja tnibidø'økti ja Jesús, jøts ja tkajxpidsømdi jam kajpjotp, jøts ja tyiknøjkxtøø jam kojpkubajkp ma jam tu'uk ja kats'aaw, jamts ja tkutejnaxwa'andi.

³⁰ Jøts ja Jesús jadi'iñi jam mayjaa'y agujkp ñajxy jøts ja jade'eñi chøø'ñ.

Tu'uk ja yaa'dyøjk pøn ja miku' tø tyatøkiyi

³¹ Jøts ja ojts ñijkxy Capernaumit kajpkøjxp midi jam Galileit etjotp tãmp, jamts ja tyik'ixpiky ja jaa'y ku poo'kxin xøøw. ³² Ñigyumaap ja tjawidi ku ja jade'en yik'ixpikyidi, kumi tum ja' ja kyajpxy midi kutujk møøt.

³³ Jamts tsaptøjkjotp wyinaty tu'uk ja jaa'y pøn ja miku' wyinaty tø tyatøkiyi, ja'ats ja møk yikwajnøø:

³⁴ —Majstutk øøts; ¿ti øø xanibøjkip, mets Jesús Nazaretit jaa'y? ¿Ja' me tø xnimeni jøts øø xyikudigø'øty? Wa'ats me n'ejxkapy mbøn mets, pø Diosxi me m'u'nk'ajtip.

³⁵ Xjats Jesús ja miku' t'adsøoy, yide'en ja tnimaay:

—¿Amøñi et, kidi mgajpxy, jøts majtstu'ut yø jaa'y!

Winets ja miku' tyiknaxkidaajky ja jaa'y jøts ja ttawaajch ja jaa'y, nika'ap ja sa ttuuñ.

³⁶ Ni'ijtyi ja jaa'y yjantyimchø'jkidøø jøts ja xem yam ñawyajnidøø:

—¿Ti kajpxy ti ayuujk yø jade'en kyajpxy? ¿Møjta'aky yø t'ane'emy yø miku' jøts yø jaty chø'øgi!

³⁷ Ja Jesús idø'øn yik'aawip yik'ayuuujkip øy madsoo.

Ku ja Jesús tyikmøkpiky ja Simón Pedro tyaaqmø'jt

³⁸ Xjats ja pyidsimy jam tsaptøjkjotp jøts ja ojts ñijkxy jam Simón tyigam, jamts ja tyøjkiyi'ñ. Pøjkip tamik ja Simón jam wyinaty ja tyaaqmø'jt, jantyimyjøn'oo'kp ja wyinaty. Winets ja Jesús yiknimaay jøts ja ttu'unt ja may'ajt jøts ja t'ext. ³⁹ Jøts ja ojts t'ixy, ojts ja ñaxkøy ma ja pamaa'y jam wyinaty, jøts ja møk twingugajpxiyi'ñ ja jøømba'am, jøts ja jaty wyinaajky, jøts ja jaa'y nay jaty tyanaagyukiyi'ñ, jøts ja kø'øm t'ejxpinaaxwa'aky ja kaaky ja jii'kxy.

Ku ja Jesús tyikmøkpiky ja maabyamaa'y

⁴⁰ Kuts ja xøøw yjaxnaa, winets ja Jesús ojts yiktaninijkxy ja maabyamaa'y pønity jam sagasa jajtp; jøts ja ojts tu'uk tu'uk tkønixajy, jøts ja jade'en tyiktsokijxy. ⁴¹ Nay jamts ja winaaginmidi pøn ja miku' ttawajtsidøø nayide'en, jøts ja yjanchnømdi møk:

—Dios U'nkxi mets.

Jøts Jesús ja møk twingugajpxiyi'ñ, ka'ap ja tyikjaty jøts ja kyajpxtit, pø ñijaa'widipxi ja' jøts ku ja' Cristo.

Ku ja Jesús kyajpxwa'kxy jam Galilea

⁴² Xjats ku xyi'ndyaajky, jøts ja Jesús chøø'ñ kajpjotp jøts ja ñijkxy jam mā pøn kya'ity. Jøts ja mayjaa'y ja yjanch'ixa'ayi jøtsnim ja yikpaa'jty mā ja jam wyinaty. Yikta'aniwyandip idø'øn ja', ka'ap ja tmajtstu'utwa'andi jøts ja choont, ⁴³ yide'ents Jesús ja ñimaajyidøø:

—Nayi nnigajpxwampy øts ja Dios y'øgyajpxy y'ømyadya'aky o magajp, pø ja'agøjpxxi ø tø nyikexy.

⁴⁴ Jøts ja Jesús jam jade'en kyajpxwa'kxy mā jaty ja tsaptøjk jam Galilea.

5

Ku ja ajkx may'ampy yikma'aky Jesús myilagri'ajtingøjxp

¹ Tuk'o'jk idø'øn ja Jesús jam yikpaa'jty mejy agø'øm mā txøøwi Genesaret; jamts ja mayjaa'y ja ñimejniyøø jøts ja t'amidodukwa'andi ja Dios y'øgyajpxy y'ømyadya'aky. Janch yik'atejmujknipts idø'øn ja Jesús jam wyinaty ² ku ja t'e'jxpaa'jty majtsk ja barki tawa'ats jam nøø adsay agø'øm, tø ja ajkxmakpi jam wyinaty pyidsømgøxti, jam tya'ajkxmaa'jk ja wyinaty tpujti. ³ Winets ja Jesús tu'uk ja barki ttatøjkijyi'ñ midi ja Simón yja'ajtpy jøts ja tnimaay wan tniyikjiwa'aky waani jøts jam wingon kidyimdya'ant møøt ja tsayjoojt. Jøts ja jam jade'en y'ixaajky, jøts ja jam tyik'ixpøjktøjkijyi'ñ ja mayjaa'y. ⁴ Xjats ku ja kyajpx'abajtiyi'ñ jøts ja tnimaay ja Simón:

—Yiknøjkx yø barki jam mā yø nøø køjnkjawi, jamts xniwejtspattit yø mda'ajkxmaa'jk.

⁵ Jøts ja Simón t'adsøøy:

—Windsøn, tuktsunaxy øø tø njanchjatuñ, ni tu'ukts øøts n'ajkx tø ngapaaty; nøøwejtspatp øts inet yø nda'ajkxmaa'jk jadigojk, pø tøxi me mwa'añ møk'ampy.

⁶ Jøts ku ja jade'en ttundøø, may ja ajkx ja ojts tmatsti, janch køøtswambim ja tya'ajkxmaa'jk ja'adi. ⁷ Winets ja tmiyamdøø ja myigu'ukti pøn jam wyinaty jade'ukpi barkijotp jøts ja pyudøkiyidit. Nøjkxti dø'øn ja jam, ojts ja barki ja majtsk tyik'ujtskøxti øy ja yjawi yjanchkøjntøjkinidit. ⁸ Xjats ku ja Simón Pedro ja ojts jade'en t'ixy, winets ja twinguxanaay ja Jesús jøts ja tnimaay:

—Windsøn'ajtim, majtstutk øts, ka'ap øts yø xpaat'aty jade'en, pojkpitumbi jaa'y øts.

⁹ Janch tsø'jkiñip idø'øn ja Simón wyinaty jøts nayide'en ja myigu'ukti, ja'agøjxp ku ja ajkx ja wyinaty jadine'en tø tma'akti. ¹⁰ Nayi tsø'jkijpts idø'øn ja Jacobo møøt ja Juan, ja Zebedeo y'una'jkti pøn ja Simón møøt ñamyigu'uk'atyiyi. Jøts ja Jesús tnimaay ja Simón:

—Kidi mdsø'øgi, ixyamyi nduknijawidit sudso jaa'y ja nitso'ok'ajtin tpaatt.

¹¹ Jøts ja byarki ja jam nøøba'am tyikja'attøø, jøts ja jami tnikakøjxtøø tuki'iyi, jøts ja tmøødidøø ja Jesús.

Ku ja Jesús tyiktsø'øky ja jaa'y pøn jadi'iñi putsniip

¹² Kuts ja Jesús jam wyinaty tu'ukpi kajpjotp, winets yja'jty tu'uk ja jaa'y, møj pu'uts pa'am ja pøjkip, jøts ku ja Jesús yik'e'jxpaa'jty jøts ja twinguxanaay. Jami ja ñamyujtstaajkøø jøts ja tminuu'kxaa'jkxy, yide'en ja tnimaay:

—Teety, mmøøt'ajtpy mets ja møk'ajtin jøts ø xyiktso'okt, yiktsokts øts mdsojk'ajtingøjxp.

¹³ Jøts ja Jesús ja ojts tkønixajy, yide'en ja tnimaay:

—Ndsøky'ajtpy øts jøts mdso'okt, tsokni.

Ja'ayi ja jade'en wyaañ, jaty ja pu'uts wyinajky. ¹⁴ Xjats ja Jesús møk'ampy tnimaay ja jaa'y jøts kidi ja pøn ttukmadøy. Yide'en ja tnimaay:

—Jamyi dø'øñ mnøjkxt jam teety wyindum, jamts xpikta'akt ja myojxin midi ja Moisés ñi'ana'am, ja'agøjxp ku tø wya'ach ja mbu'uts. Jade'ents ja jaa'y ja t'ejxtit tnijawidit jøts ku tø mdsø'øky.

¹⁵ Yikmøjpiktak'adøtsp idø'øñ ja Jesús, may ja jaa'y ja ñimen'adi'ichiyi, namay ja ñamyukyidi jøts ja pyatmadøyi, jøts ja tnankyiktso'okwa'añidi ja pya'am. ¹⁶ Ja Jesús jam ja ñijxy mā abak et mā niti kya'ity, jamts ja Dios Teety t'ajot'ajty.

Ku ja Jesús tyiktsøøjky ja køxujxpi pakxujxpi

¹⁷ Tuk'oijk idø'øñ, jam ja Jesús wyinaty yik'ixpiky, jamts idø'øñ ja fariseotøjk møøt ja kajpxwejpitøjk wyinaty chøøñidi wine'enin ja wyinaty tø choondi o magajp, pømbi mendip Galileit etjotp, Judeit etjotp, jøts Jerusaléngit etjotp; ku ja Jesús tnankyjay'ijxyi ja Dios Teety myøk'ajtin ku ja pamaa'y ja tyiktsø'øky. ¹⁸ Winets ja jaa'y tkiiyja'jttøø tu'uk ja pamaa'y pøn køxujxp pakxujxp, jøts ja jap tøjktøpy tyiktøk'iwya'andi jøts ja ttawingugiiyidit ja Jesús. ¹⁹ Nimats kya'awa'adsis mā ja tyøkidit kumi janch mayjaa'y jam wyinaty. Xjats ja tøjkiixpy pyajttøø, jøts ja ojts tnikidyu'utti ja tøjktø, japtis ja tyikwinajktøø ja pamaa'y jøts ja ttawingugii'yidøø ja Jesús jap mayjaa'y agujkpy. ²⁰ Kuts ja Jesús ja ojts jade'en t'ixy kudam ja amumdu'uk ja yjanchja'win tjagyapti, jøts ja pamaa'y ja tnimaay:

—U'nk, nbøkmyee'kxpy mets.

²¹ Winets ja wyinmaadyøjkidøø ja kajpxwejpitøjkti møøt ja fariseotøjkti, yide'en ja wyinmaydi: “¿Pøn yø jaa'y jade'en, tigøjxp ku Dios yø jade'en twingajpxnaxy? ¿Pøn ja pøky ya t'ukmaa'kxp, kidi tu'ugyip Dios pyojkpi'mee'kxy?”

²² Wa'aats ja Jesús ja tnijawi sa ja wyinaty wyinmaydi, jøts ja tnimaay:

—¿Tigøjxp ku jade'en mwinmaydi? ²³ ¿Ja ti ne'egi jawaani jajtñi, kuts yø pa'amjaa'y nnøjmit, “Mee'kxpy øts yø mbøky”, uk ku nnøjmit: “Wa'kuki, pøkmukni yø mmaabajt jøts nøjkxni mdigam?” ²⁴ Ixyamnim meets inet x'uk'ext mabaat øts idø'øñ ja møk'ajtin nmøøt'aty ya naxwiiñ jøts ø nmaa'kxt ja pøky.

Xjats ja tnimaay ja køxujxpi pakxujxpi:

—Pidøkni, wa'kukiñi, wejtsjø'øk yø mmaabajt jøts mnøjkxnit mdigam.

²⁵ Jatyi ja køxujxpi pakxujxpi pyidi'jky, jøts ja tyanaagyukiyiiñ jam mayjaa'y agujkpy. Wyejtsmujk ja myaabajt ja' mā ja jam wyinaty kyo'kni, jøts ja ñøjkxnaa tyøjkwindum, møk ja Dios ja ttamøjawi. ²⁶ Jøts ja ñigyumaap tja'widøø ni'ijtyi, ojts Dios ja ttukmøjawiidi ttukunuu'kxyjawiidi, yide'en ja wya'andi ja ñichø'øgi adøtsni:

—Ixyamnim inet ja tø n'ijxyindi midi niwindi kayak'ejxpnim.

Ku ja Jesús tpawaay ja Leví

²⁷ Ku ja jade'en y'ukjajty, xjats ja Jesús jam pyidsii'my, ojts chøøñ jøts ja t'ejxpaajty tu'uk ja yikugubajtpi, jam ja wyinaty chøøni mā ja ttukugubety ja jaa'y øy tyii'ji, jøts ja tnimaay:

—Møødik øts, møøt widejtk øts.

²⁸ Winets ja jatyi tyanaagyukiyiiñ, jøts ja tuki'iyi tum jam tnikakijxy, jøts Jesús ja tmøødiyiiñ.

²⁹ Jøts ja Leví xøøw ttuun jam tyøjkwindum jøts ja twindsø'jkiiñ ja Jesús, mayts ja yikugubajtpi jam wyinaty møøt jadu'ukpi jaa'dyi. Jade'en ja jam møøt twindsøøñidi ja kaabyajt. ³⁰ Xjats ja fariseotøjkti møøt ja kajpxwejpitøjkti tpagajpxnibøjkidøø ja Jesús pyabøjkpi, jøts ja tnimaadyøø:

—¿Tiku meets yø xmøøtkay yø yikugubajtpitøjkti møøt yø ka'øyjaa'dyi?

³¹ Winets ja Jesús y'adsøø yø jøts ja tnimaay:

—Pøn tkaja'widip ja pya'am, ti tsøøyibi ja t'ukyikwa'andit. Ja' ja tyik'amaadyaktip pøn pamaa'dyi, pøn pya'am tja'wiy'ejttip.

³² Kidi ja'ajiptis ø tø nnimiñ pøn niwine'en kanabyøkyja'wiyidip. Ja' ø tø nnimiñ pøn tja'widip ja pyøky jøts ku ja pyøkmøødidi, jøts tyiktigatstít ja chinaa'yindi.

Ku ja Jesús yiktii'byijky tigøjxp ku ja kya'ayuu'atti

³³ Xjats ja tiibyøjktøø ja Jesús jøts ja tnimaadyøø:

—¿Tiku yø mbabøjkpitøjk janch nekim kyaydi tyojkxti, jøts yø Juan yja' yjanch'amaay'atti møøt yø fariseotøjk? Ni kyakaydi kyajøø'kxti, janch tsapkaajpx'ejttip yø'.

³⁴ Winets ja Jesús t'adsøø:

—¿Ma meets jade'en tø x'uknijawi jøts ku tøøxy ñigaabyi tøøxy ñi'ukpi winet y'amaay'atti winet kyakaydi kya'uukti ku ja jemyaa'y jamni? ³⁵ Abikñimts ja tiempi tyimyja'tmit ku ja jemyaa'y wyinaty kya'uk'ejtni ku ja jam wyinaty tø cho'oni; jaanimts idø'on tiy pøn kya'ukaañit kya'uk'uknit, jaanim idø'on ja y'amaay'attit.

³⁶ Jøts ja nay ja'agøjxp ya'at ttanimadyaktøjkiy'i'ñ:

—Ka'axi pøn wyetpach tta'agiyi jemwyet midi tyimjemñim, ku ja jade'en yiktu'unt jøts kumi mujkpi ja jemwyet jøts ja tjaaktyimgyøø'tsni ja wetpach, jaaktyimyiwenip ja kyøøts'ajtin ja'. ³⁷ Jøts ka'ap pøn vino tta'adami po'duk midi namii'kxñim, ku ja jade'en ndu'unint jaty ja tyikmigøødsi ja po'duk, windigøøpyts tuki'iyi, windigøøpy ja vino, windigøømyipts ja po'ak. ³⁸ Paty ja vino midi ñamii'kxñim nda'ada'amyin ja jembyo'ak jøts jade'en nimidi kyawindigøø'ty. ³⁹ Nayide'ents ka' pøn t'uukwa'añ ja vino midi namii'kxñim. Pøn tø t'uukyujni ja vino midi jekyip mii'kxñi, xumi ja' ja chøjkpy, kumi nømp ja tukajpxyi: “Yø jekyip mii'kxyip tyimy'ø, ka'ap yø midi tmi'abaaty.”

6

Ku ja Jesús ttøjtøø ja ariin yam poo'kxin xøøw

¹ Poo'kxin xøøw idø'on, winets ja Jesús jam wyinaty ñaxy jam kamjotp møøt ja pyabøjkpitøjk, ja'ats jam wyinaty ttøjttip ja ariin tøøm; jøts ja twixatsti ja ariinbajk jøts ja tjøø'kxti. ² Jøts ja fariseotøjk winaagin yiktøøjidøø, yide'en ja yiknimaadyøø:

—¿Tiku jade'en m'adøø'tsti midi ka'ap pyaat'aty yiktu'unt poo'kxin xøøw?

³ Xjats ja Jesús y'adsøø:

—¿Ka'anim meets ja Dios kyajpxy x'ijxy midi tnigajpxp sa ja David tuk'ojk tmøøt'adijch ja myigu'uk ku ja wyinaty yjantyimyu'uookti? ⁴ Pø tsaptøjkjotpyimxi ja tyøjkiy'i'ñ, japts ja tnixajiyi'ñ ja kunuu'kxy tsapkaaky, jøts ja tkaadyøø møøt ja myigu'uk pøn jaty ja jam wyinaty myøøt. Yam ja ka'ap yjapaat'atyidi jøts ja tka'adyit ja'abi tsapkaaky, ja teetyøjkti ja paat'ajtidip kya'adyip.

⁵ Nayide'ents ja wyaañ:

—Ngudanaapy øts ja naxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y pøn ja kyø' jadi'iñi tøtsnip

⁶ Jadu'ukpi poo'kxin xøøwts idø'on ja'agøjmyi ku ja Jesús tyøjkiy'i'ñ jam tsaptøjkjotp, jamts ja yik'ixpøjktøjkiy'i'ñ. Japts wyinaty tu'uk jaa'y midi y'aga'ngyø' xujxp; ⁷ jøts ja kajpxwejpitøjk jam tpa'ejxti tpagowdi ja Jesús, ja' ja y'ejxwandip pøni y'ukyiktsøkpy idø'on ja pamaa'y ja' ku poo'kxin xøøw, jade'ents ja tni'øøniwya'andi. ⁸ Ti wa'ats ja tnijawi sa jaty ja wyinaty wyinmaydi jøts ja jaa'y ja tnimaay midi wyinaty kyø' xujxp:

—Tani, jøts ixem nøjkx mdani kujk'am.

Jaty ja jaa'y tyanaagyukiyi'ñ jøts ja jam ñijxy tanaabyi. ⁹ Winets ja Jesús tnimaay ja mayjaa'y:

—Nyiktøø'dip nyik'amido'odip inet yam: ¿Midi'ibi ndu'unimp ku poo'kxin xøøw, midi'ibi kutuky ku n'ødyu'unint u ku nga'ødyu'unint? ¿ku nyiktsoojkint u ku nyik'o'jkint?

¹⁰ Jøts ja twin'ejxkijxy pøn jaty ja jam wyinaty ttamujkiyip, jøts ja tnimaay ja pamaa'y:

—Xajtøw.

Tsoojk ja' jøts ja xyajtiy. ¹¹ Jøts ja yjadu'ukpi jaa'y yjanch'ambøjktøø, jøts ja xem yam ñawyajnidøø, agøømyi sudso'ampy ja tjadyimyu'ukyikpøky'a'adit ja Jesús.

Ku ja Jesús twiwijch nimakmajtsk pøn wyinaty kyudanaabyi'atwampy

¹² Winet ets ja Jesús ñijkxy Dios'ajot'ajtpi jam kojpkøjxp, jam ja Dios Teety ja tmigajpxy tuktsunaxy. ¹³ Jøts ku xyijndyaaajky, jøts ja twaadsogijxy pøn jaty ja pabøjkip, jøts ja twiwijch nimakmajtsk pøn ja tyejtíp kudanaabyitøjkti. ¹⁴ Ja'ats idø'øn ja'adi ja Simón midi ja xyødejtigajts jøts ja tpiaktaajky Pedro; møøt y'uch Andrés ja', møøt ja Jacobo, møøt ja Juan, møøt ja Felipe, jøts møøt ja Bartolomé. ¹⁵ Jam ja Mateo, Tomás, Jacobo pøn ja Alfeo myajnk'ajtpy; jøts ja Simón ja cananista; ¹⁶ jam ja Judas ja Jacobo y'uch; jøts ja Judas Iscariote, pøn wyinaty tkøyakwamp ja Jesús.

Ku ja Jesús tyik'xpijky ja mayjaa'y

¹⁷ Xjats ja Jesús tmøøtkidaajky ja kyudanaabyitøjk, jøts ja tmøøtja'jty jap jøyjøtpy niduki'iyi møøt ja pyabøjkpitøjk; nay jam wyinaty øy pøndi pøn jaty tso'ondip jam Judea, jam Jerusalén, jøts jam mejy agø'øm jam Tiro jam Sidón. Ja' ja jam wyinaty tø tñimendi jøts ja tpatmado'odit ja Jesús, jøts ja pyamaa'y ja tñankyiktso'okwa'añidi. ¹⁸ Winaagin jam pøn ja miku' tø tyatøkiyidi, tsokøxtits ja'. ¹⁹ Jøts ja jaa'y ni'ijtyi tñixajiwya'andi ja Jesús. Pyaatwandip ja' ku ja ttuktatsø'øky ja myøk'ajtin ja pamaa'y.

Ja xondaajkin jøts ja ayo'owin

²⁰ Winets ja Jesús y'ejxji'jky mā ja pyabøjkpitøjk jam wyinaty jøts ja tñimaay: —Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaattip ja Dios kyutujk midi ja tyanitanaapy ja yjaa'y.

²¹ 'Nay Dios ja tkunuu'kxp pøn yu'oo'ktip xø'oo'ktip, ja' ja tyiknajxkøjxp.

'Jøts pøn yaxtip jiidyip, kunuu'kxy Dios ja nayide'en yik'ityidi, ja'ats ja ttukpaadidip ja xondaajkin.

²² 'Mgunuu'kxip meets Dios øy meets ja jaa'y mjamidsep'atyidi øts køjxp, øy ja mjabawøpyidi, øy ja mjaga'ømyigajpxyidi, øy mjagayiktsokti, øy mxøøw mguya'axy kamadøyim yjayikjawidi ja'agøjxp ku ø xpabøkti. ²³ Kidits mjotmay'ookti, kidi x'ayoojidi, japnim ja tsajpjøtpy mwingaxø'økxiyidi; pøn jade'en mduujnidip, yø jade'embj jaa'y tyeety'ap tka'ødyundøø nayide'en ja Dios kyugajpxtyi.

²⁴ 'Jøts mjanch'ayøøy mee kumeeñ jaa'y, yaayi meets iij jotkujk mdsinaagyotji.

²⁵ 'Mjanch'ayøøy meets pøn tum jaa o ti tmøøt'ajttip, mjanch'ayuu'ajttip mjanch'axøøw'ajttip meets nøjkk.

'M'ayøøy meets pøn yam agujk jotkujk yiknajxtip, mdaya'axtipts meets ja mwinmaa'ñ jadigojk.

²⁶ 'M'ayøøy meets ku mee myik'ødyijy myik'øñøjmi, pø nayide'ents ojts yiktejtj yik'ødyejti pøn ojts nugo ñadyijy ja Dios kyugajpxy.

Paat'ajtip jøts ja mmidsep yikmijotjimbett

²⁷ 'Ni'ijtyi madowdi wine'enin mja'atti: Tsokti miyujy'atti ja mmidseptøjki, pudøkidi ja' pøn mjagatsojkidip, ²⁸ amidowdi ja Dios jøts tkunuu'kxt ja mmidsep pøn o sagasa mnimaajyidip, ku'amidowi pøni pøn mmi'ambøjkidip pøni pøn sagasa mdunwajnidip.

²⁹ Pøni mgojxip mdse'ekip, ja' øy ku xmaa'kxuktit; jøts ku pøn mbøjkxidit ja yukwop, jaa'kyimyo'odipts ja mnijan. ³⁰ Kidi kanajtsjawim xjawidi ku tigati myik'amidowdi; jøts kidi jaty o pøn xamatsti ku pøn o ti tø tñixaji. ³¹ Kidi meets ja jawyeen jade'en xjøp'ixy pøni sa mee xjatsøky, meets idø'øn mbaat'ajtip jawyeen mnajststunip sa dø'øn ja yjawi tsoktin jøts meets ja jade'en xu'unt.

³² 'Øy meets ja'ayi møøt mjanamyaawya'añiyidi pøn mee møøt mnachøkyiyi, ¿ti øy'ajtints meets jade'en mdumpy? ¿Ti ja' ja ka'øy jaa'y kyajajtip? Pø tyundipxi ja nayide'en. ³³ ¿Ti øy'ajtin meets jade'en mdumpy øy meets ja'ayi xjamay'aty pøn mee nayide'en mdunxixiyip? Pø tyundipxi ja ka'øy jaa'y ja nayide'en. ³⁴ Uk ja'ats meets o tigati mdunxixiyip pøn mee m'a'ejxip tyikwimbetp jawaani mayjawwi, ¿ti øy'ajtints

meets jade'en mdumpy? ¿Ti ja ka'øy jaa'y ja jade'en tka'anuu'kxyajktip o tigati ja yja' jøts ja myiga'øy jaa'y ja nayide'en ttukubatti jawaani may? ³⁵ Ka'ats meets idø'øn xmidsepøkt ja mmidsep, tsokti xmiyujy'attit, mduujnip meets ja may'ajt ja'. Øy meets ja tigati xuk'anuu'kxt jadi'iñi, kidits meets ja xjøp'ijxy'aty jøts ja mmigubajtxidit jawaani møj jawaani may. Møjts meets ja myikwimbejtxiyidit, ja Dios Teety tsajpjøtptyit jade'en meets ja m'u'nktejyit; ti sa ja Dios Teety tmi'øy'aty nayide'en ja ka'øy jaa'dyi ja namyikaxi jaa'dyi. ³⁶ Mja'myatstip meets jøts mba'ayo'odip o pøn nayide'en sam ja Dios Teedyin ja tpa'ayøyin.

Kidi pøn o ti xawindsø'ødyi

³⁷ 'Kidi pøn nugo o ti xapøky'ejxti, jøts Dios ja nayide'en mgapøky'ejxidit. Maa'kxukti, jøts ja Dios nayide'en mmaa'kxukidit. ³⁸ Mo'odi o ti pøn, winets o ti nayide'en mmo'ojidit ja Dios. Nayide'en meets ja mmo'ojit mgamo'ojit pøni sa meets ti xyaky xkayaky møj may o ti. Nayide'en meets ja Dios mdunit pøni sa meets mmigu'uk xuñ. Nay ja'ats ja yik'awetsp.

³⁹ Xjats ja Jesús ttanimadyaktøjkijy'iñi jadu'uk ja madya'aky, yide'en ja wyaañ:

—¿Ma ja winap jaa'y tø t'uktuu'naway ja myiwinap jaa'y? Pø namajtskxi dø'øn ja tyimgyunaxtit ku et'aaw ja ma tpaattit. ⁴⁰ Uk kuts pøn, pøn tni'ixpøjkimyidip o ti tunk, ka'axi mibaat twinaxtit ja yik'ixpøjkpidi; pø wan idø'øn jaanim wyinaty.

⁴¹ 'Jøts meetsmi, ¿sudso dø'øn ja mmigu'uk pyøky x'ejxpajtyi jøts ja mja' ne'egi xka'ixy kudam ja jawaani møj? ⁴² Jøts, ¿sudsots mets idø'øn namyikajxibim xkajpx'øyiwyaañ yam mets ja mdsinaa'yin øy xkayikyø'y? ¡Meets win'øø'mbi ataadyi! Yik'øyidi jawyeen ja mga'øchinaa'yindi, winetnimts ja mmigu'uk chinaa'yin xkajpx'øyiyidit.

Pøni sa wyimbidsimy øy ti, ja'ats tyikwingaxø'kp pøni sa ti y'øyi kya'øyi

⁴³ 'Ma meets øcha'amguipy tø x'uk'ixy jøts ku ja tyiktøømi ja ka'øcha'am; uk ja ka'øcha'amguipy tyiktøømi ja øcha'am, nima. ⁴⁴ Ja tyøømi ja kipy yikta'ejxkajp pøni sa ja tyøømi øy ka'øy: ka'axi ja iigi tsaa'am yikwiduky kujp kipkyøjxp, ni jam ja uvi tsaa'am kyawinaky jam kujp aatskøjxp. ⁴⁵ Jade'ents idø'øn ja øyjaa'y pøn øyjaa'y, ka'ap ja t'aawi tjoojti ja ka'øybi winmaa'iñi, ka'ap ja yjemwa'añ tyewa'añ kumi øyjaa'y ja'; pønts ka'øyjaa'y'ajtp ja ka'øybits ja y'aawip yjoojtíp, yjemwa'andi tyewa'andi kumi jam idø'øn ja tyimyøødidi ja kya'øy'ajtindi y'am yjotp. Tum jam ja pyidsømguixy jøts ja tkajpxnaxti jade'en.

Majtsk jøøjp ja pøch kyojpk

⁴⁶ 'Niti øy'ajtin meets jade'en xkatuñ ku mee xjanøjmi, “Nwindsøn'ajtim, nwindsøn'ajtim”, jøts ka'ats xpadundi pøni sa njawa'añ. ⁴⁷ Ya net ndukmado'odit pønin ja kyaxø'økti ja jaa'y pøn ø xnimemp jøts øts n'ayuujk ja xpatmadoojidi, jøts ja jade'en tpadundi sa nwa'añ: ⁴⁸ jade'enin idø'øn ja nbiktaajkin sam ja jaa'y tyøjkøjyin, jawyeen ja køjnk øy øy tniðajiyi'iñi ja tyøjk, jøts ja tsaa ja amuum ttukpøchkojpk'ajty. Xjats ku ja møj nøøgom jam wyinajky, aguwani ja tyimyikjø'tjø'økwa'añ ja tøjk, jøts ja niwine'enin nisa tkatuuñ, kumi tsaa ja wyinaty tyeky'ajtpy. ⁴⁹ Pønts ø xjapatmadoojidip ja n'ayuujk jøts ka'ap jade'en tpadundi sa nwa'añ, ja'ats idø'øn jade'endi sam ja jaa'y midi tyøjk tkoj xixñaaxkijxy. Niti ja tkadukpøchkojpk'ajty, jøts ku ja møj nøøgom jam wyinaajky jaty ja tmimajadaajky, ojt ja tyikiday jøts ja tyimyikudigøø.

7

Ku ja Jesús tyiktsø'øky ja romanit soldadi ja tyumbi

¹ Xjats ku ja Jesús jade'en tnimaagyijxy ja jaa'y, winets ja ñijkxy Capernaum. ² Jamts wyinaty chøøni ja soldadi windsøn, romanit jaa'y ja'. Jamts tyumbi ja tu'uk midi ja janchkamajststu'udyim yja'wip, mowa'añ ja yjanchpiky, ookwanip ja wyinaty. ³ Ku ja soldadi windsøn tnimadøøy ja Jesús, winets ja ttaniguejxy winaagin ja israelit

møjaa'dyøjk̄ti, jøts ja t'atstuk'amidoowa'añ ja may'ajt, wan tmiñ ja Jesús jøts cho'okt ja tyumbi. ⁴ Xjats idø'on ja tninøjkxtøø ja Jesús jøts ja ojts t'amidowdi ja may'ajt møk'ampy, yide'en ja tnimaadyøø:

—Paat'ajtip xpudøkit yø soldadi windsøn; ⁵ kumi chøjkpy yø' adøm ngajp, nayø'øts tø tni'ane'emy jøts ja tsaptøjk tø kyøjy.

⁶ Winets Jesús ja tmøðiyii'ñ. Jøts ku ja jam wyinaty yja'atwanidi ma ja tøj̄k jam, jøts ja soldadi windsøn ttukjøpkubajtiyii'ñ pøn jaty ja minamyaajyip, jøts ja ttuknimaay ja Jesús:

—Mets teety, kidi xka'øyjawi, ka'ap ø xpaat'aty jøts mets ya mdøkit ndøjkjøøjt̄y; ⁷ paty ø kø'øm tø nganay'a'ejxiyi jøts mets jeexyip kø'øm tø n'ats'ixa'ay. Ana'am ja'ayi, jøts øts ja ndumbi cho'okt. ⁸ Ane'emy ø nayide'en nwindson xyik'ity, nay ja øts ndumbitøjk̄m̄idi pøn ø n'ana'amidip. Ku pøn nnøjmi: “Nøjkx”, nøjkxpts ja'. Uk nnøjm̄its øts yø ndumbi o ti, jatyiys yø jade'en tpaduñ.

⁹ Ja'ayi Jesús ja jade'en tmadøoy ñigyumaap ja tja'wiyii'ñ ku ja jaa'y jade'en, jøts ja tniwa'akjimbijty pøn jaty ja jam wyinaty payø'øyiip, jøts ja tnimaay:

—Tyimyjanch, ni Israelit jaa'y øts ya ma jade'en ngapaadynim sam ya'at jaa'y tmøødin ja janchja'win møk'ampy.

¹⁰ Jøts ku ja waabi yja'ttøø møøt ja jøpkuyø'øyibidi jam tøj̄k̄jotp ma ja pamaa'y jam wyinaty, tødamik ja wyinaty myøkpøjkni ja pamaa'y.

Ku ja Jesús tyikjupkyiky ja ku'økyø'øxy myaj̄nku'nk jam Naín

¹¹ Ukjajts ja jade'en, xjats ja Jesús ñij̄kxy jam ma kajp txøøwi Naín, mayjaa'yts idø'on ja jam wyinaty pawidejtip, may ja pyabøjkpitøjk ja jam tmøødi. ¹² Kuts ja yja'jty jam kajpwingon, jøts ja ojts t'ejxpaaty tu'uk ja oo'kpi yikpagi'iy jøts ja y'atsnaxøkit, tu'umchi dø'on ja tø'øxyøjk ja t'u'nk'aty, jøts ku'økyø'øxy ja'. Mayts ja yik'oo'kpi pidø'kpi jamdi. ¹³ Jøts ku ja nwindson'ajtim ojts t'ixy ja ku'oogi, yik'ayo'ijxyim, jøts ja tnimaay:

—Amon, kidi mya'axy.

¹⁴ Winets ja Jesús twingunøjkxiyi'ñ ja oo'kpi, jøts ja kajuun ja tnixajiyii'ñ, jøts ja oo'kpi kiībyi ja tkiīdyaktøø, jøts ja Jesús tnimaay ja oo'kpi:

—Mets u'nk idø'on nnimaapy: ¡Pidø'øk!

¹⁵ Xjats ja kyu'xkukiyii'ñ pøn idø'on wyinaty tø y'øøky jøts ja kyajpxpinibøjk̄iyii'ñ, xjats ja u'nktaak ja yiktagidøjk̄iyii'ñ ja y'u'nk, ja Jesús ja kømøøjyiyip. ¹⁶ Jøts ku ja jade'en niduki'iyi t'ejxtøø, jøts ja yjanchø'jkidøø, jøts ja ttukmija'widøø ttukunuu'kxyja'widøø ja Dios, nømdip ja':

—Ya Dios ja myøjkugajpxy tø kyaxi'iky adøm njaa'yjøøjt̄y.

Nayide'en ja wya'andi:

—Dios tø tnimiñ ja kyajp jøts tpudøkit.

¹⁷ Yiknija'wigyøjx ja jam wine'enin ja jaa'y jam chøønidi jam Judeit etjotp, ku wyinaty ja Jesús tø tyikjupkyiky ja oo'kpi.

Ku ja Juan Bautista tkexy ja kyugajpxy

¹⁸ Xjats ja Juan Bautista ja tnija'wiyii'ñ, nayide'en ja pyabøjkpi ja wyinaty tø tyamimadya'agiyi, winets ja tyaaixiyii'ñ namajtsk ja pyabøjkpi, ¹⁹ jøts ja ojts ttaniguexy ja Jesús, jøts ja t'atsyiktøødit pøni ja' idø'on janch Cristo pøn wyinaty menwamp yiknitsokpi. Uk kidi ka'ats, winets ja abikpyi ja tjøp'ejxtit. ²⁰ Jøts ja wingon twingunøjk̄xidøø ja Jesús pøn ja Juan wyinaty tø tyaniguexyidi, jøts ja tnimaadyøø:

—Ja Juan Bautista øø tø xkexy jidsik øø nyiktø'øt pøni janch ja Cristik mets idø'on midi yiknigajpxp menwamp yiknitsokpi. Pøni ka'ats, winets øøts jadu'ukpi njøp'ext.

²¹ Ku ja wyinaty tø yja'atti, winets ja Jesús nay jaty tyiktsøøjky may ja jaa'y pømbi pa'am pøjkidip, pømbi o ti ja'ambi tmøøt'ajtip, pømbi ja miku' tmøøt'ajtip, ñayikwin'ejxwa'kxmip ja' ja may winap jaa'y. ²² Jøtsnim ja y'adsojimbijty jøts ja wyaañ:

—Nøjkxti jøts xukmado'odit ja Juan ti jaty ya tø x'ejxti xmadowdi. Tamimadya'akti jade'en sa yø winap jaa'y wyin'ejxwa'kxti, sa yø pakpamaa'y yø'ødyi, sa yø putspi cho'okti, sa jaty yø nat jaa'y myadowdi, sa oo'kpi yjukpyøkti, jøts sa ayooobi jaa'y yiktukmadowdi ja øgyajpxy ja ømyadya'aky midi yiknitsokp. ²³ Ejtne xoni ja'adi pøn ø xmibøjktip, ka'ap twinmayimbettit twinmay'adøjtisats ø xjanchjawidi.

²⁴ Xjats ku ja wyimbejtnidøø midi ja Juan wyinaty tø tkexy, jaats ja Jesús ttamimadyaktøjkiyih'ñ ja mayjaa'y, ja Juan yiknimadyakp, yide'en ja wyaañ:

—¿Ti meets ojts x'ats'ixy jam abak etjotp? ¿Tu'uk ja jaa'y midi jade'en ejxim kapy midi poj yik'ø'yimbejtijp yik'ø'y'adøjijp? Ka'axi ja yjade'eni, pø tu'ukyixi tmi'ity ja wyinmaa'ñ.

²⁵ ¿Tits idø'øn ojts x'ats'ejxti? ¿Tu'uk ja jaa'y pøn janch øybi wet tø ñadyaxoxiyi? Pø wa'atsxi mee xnijawidi pøn tsuj wet nadyaxojxidip, pøn nekim taxondip pyikta'aky, jamts ja ñachojk'ityidi jam windsøn tyøjkjotpti. ²⁶ ¿Tits idø'øn mjanch'ats'ejxtøø? ¿Tu'uk Dios kyugajpxy? Janch ja', ja' midi jawaani møj, nika'ap yjade'eni sam yjadu'ukpidi. ²⁷ Yø Juan idø'øn yiktejp ku Dios kyajpxy yide'en wyaañ:

Íxya ngajxjawyeni tu'uk ja nngugajpxy,

pøn tyiktøøjijp tyiktuudaajkip ja jaa'y wyinmaa'ndyi jøts myikupøkt ku ixpøjkin xminøjkxt.

²⁸ Ndukmadoodip íxyam jøts ku ni madsoo ka'ap pøn jade'en pyidsimñim ja Dios kyugajpxy sam yø Juan Bautista; pøni pønts øts nja' xpaduujnip jøts ku tyøki ma øts ngutujk ndanitanit ja njaa'y, ja'ats ne'egi møj yikpiktakp jøts nika'ap ja Juan Bautista.

²⁹ Jøts ku ja jaa'y ni'ijtyi jade'en tmadoodøø pøn jaty wyinaty tø yiknøbetyidi ja Juan, nayide'en ja yikugubajtpidi, jøts ja tjanchmibøjktøø ja Dios jøts kudam ja ka'ap jade'en mibaat wyinmaamya'aty; ³⁰ ka'ats ja tmøjpiktaktøø ja fariseotøjkti jøts ja kajpxwejpitøjkti sa Dios ja wyinaty tø tyamidsøkyidi, jøts ja ka'ap tkupøjktøø jøts Juan ja yiknøbatidit.

³¹ Jøts ja nwindson'ajtim wyaañ:

—¿Pønxi øts jade'en meets n'uktami'ejxip? ³² Jade'en meets ndami'ejxi sam mutsk unajk'indi muum y'adø'øtsti jap maayjotpy ku myi'unajk' tkagupøjkiyidi ja kyuyajtin midi yjatsøjkpy yjaguyatwampy, jade'ents ja ñawya'añidi: “Tø øø yikxon njaxu'uxy jøts ni mga'atsti; tø øø jotmay'øøgyim nja'øømi, nijade'ents mgajotmay'oo'kmidi.” ³³ Kuts ja Juan Bautista tø myiñ jøts ja kyakay kya'uuky ku ja ka'ap vino t'uuky, jøts meets mnimy jøts ku miku' ja myøøt'ajtpy. ³⁴ Jøts ku ø tø njamemi jøts ku ø ngaamyi n'ukmi, jøts mnømidi jøts ku øts janch kaxim ngay n'uuky, jøts ku øts ja møøt namyigu'uk'atyiyi ja yikugubajtpidi møøt ja ka'øyjaa'dyi. ³⁵ Pøni pønts ja Dios yja' tkupøjkip, ja'ats tja'gyukip sam ja Dios yja' ttsøkyin.

Ku ja Jesús jam fariseo tyøjkjotp wyinaty pøn txøøw'ajtp Simón

³⁶ Xjats ja fariseit nidu'uk tnimaay ja Jesús jøts ja tmøødit kaabyi tyøjkwindum. Jøts idø'øn ja ojts tmøødi, ojts ñijkxy, tyøjkiyih'ñ jam fariseit tyøjkjotp, ja kaabyajt twinguwa'jtsiyih'ñ. ³⁷ Winets ja tø'øxyøjk tu'uk pøn ka'øyjaa'y'ajtp midi jam tsinaapy jam kajpjotp, ku ja tnija'wiyih'ñ jøts ku ja Jesús wyinaty tø ñijkxy kaabyi jam fariseit tyøjkjotp, jamts ja ojts tmi'ity ja pa'akxuu'kpi, tsagueegi tu'jtsjotpy. ³⁸ Ñiyaxpim ja twingugu'xiyih'ñ ja Jesús tyeky, jøts ja wyeenøø ja ttuktaxø'jky. Jøts ja nay jaty ja wyaay ttawibø'øty jøts ja ojts ttsu'kxy, ojts ja ttabakja'axy ja pa'akxuu'kpi. ³⁹ Jøts ku ja fariseo ja ojts jade'en t'ixy pøn ja Jesús wyinaty tø wyayi migaabyi, yide'en ja wyinmaa'ñ ja jap tyikyø'øy: “Pøni janch Dios kyugajpxy yø jaa'y jeexyip, tø yø jeexyip tja'wyini pøn yø ixa tojnip majtsip, pøni pøn tø'øxyøjk yø', pø ejtpts yø yjantyimpøkyun'ity yø tø'øxyøjk.”

⁴⁰ Winets ja Jesús tnimaay ja fariseo:

—Simón, nmigajpxwampy.

Jøts ja fariseo y'adsøøy:

—Yinet Windsøn.

⁴¹ Xjats ja Jesús wyaañ:

—Namajtsk idø'øn ja jaa'dyi pøn tmiyoj'ajttip tu'uk ja meeñ'anuu'kxyajkpi. Tu'uk tmiyoj'aty magoxk magø'pxy denario jøts jadu'uk wixijxmyajk; ⁴² jøts kumi ka' idø'øn ja tkubatti nipøn tkagubety ja yoj, jøts ja meeñ'anuu'xyajkpi ka'ap ja sa tijy øy ja tkagubattit, ojts ja ttamee'kxy ja myiyoj. Nigajpxts inet, çpømbi ja jawaani tsojkip, pømbi ja jawaani takajxajkip?

⁴³ Jøts ja Simón y'adsøøy:

—Ja' yjawi pøn ja yoj kajaa tmøøt'ajtp.

Jøts ja Jesús wyaañ:

—Janch tiy idø'øn mwa'añ.

⁴⁴ Xjats ku ja Jesús ojts t'ixy ja tø'øxyøjk jøts ja tnimaay ja Simón:

—M'ijxpxyi yø tø'øxyøjk, ku tø ndøki ya mdøjkjøjty ka' mets ja nøø tø xmø'øy ja ndekpyujik; tøts øts yø tø'øxyøjk ne'egi xapakpujy ja wyeenøø jøts ja wyaay yø tø ttuktati'ich. ⁴⁵ Ka'ats mets ndeky tø xtsu'kxi, jøts ku yø tø'øxyøjk, jaayip ku tø ndøki ixa øts ndeky yø jade'en xtsu'kxi. ⁴⁶ Ka' mets ngubajk aceite tø xpiktaajkxiyi, tøts øts yø tø'øxyøjk ja pa'akxuu'kpi ndeky xpiktaajkxiyi. ⁴⁷ Paty mets idø'øn nnøjmi, pøni pøn ja tsojkin waani tmøøt'ajtp nayide'ents ja waani yikpojkipimaa'kxt; jøts yø tø'øxyøjk møj ja tsojkin yø tmøøt'aty paty pyaat'aty jøts ja pøky yikmaa'kxkøxt.

⁴⁸ Jøts ja tnimaay ja tø'øxyøjk:

—Nmee'kxpy øts, u'nk, yø mbøky.

⁴⁹ Winets ja migaabyidi pøn jaty ja jam wyinaty møøtsinaajyip yjanch-nawyambinaxwa'jkidøø:

—çPøn jaa'y ya'at ndejint, sudso pøky paat yø tme'e'kxy?

⁵⁰ Jøts ja Jesús yide'en ja tnimaay ja tø'øxyøjk:

—Ja'agøjxp mets ja mbøky tø nmaa'kxi ku me tø xjanchjawi, nøjxniits jotkujk.

8

Ja tø'øxyøjk pøn jaty ja Jesús pyudøjkidip

¹ Tøts ja wyinaty y'uknaxy jade'en, jøts ja Jesús t'ayø'øgyijxy ja kajp ja møj ja mutsk møøt ja pyabøjkpitøjk namakmajtsk, jøts ja tkajpxwa'kxy ja øgyajpxy ja øy'ayuujk midi yjaa'y ja tyanitanaapy. ² Nay jam idø'øn ja yjamyøøt'ajtmiyidi ja tø'øxyøjkmidi pøn ja wyinaty tø tyiktsø'øky, jøts pøn ja wyinaty tø tkajpxpidsøjmi ja miku' jøts ja ttukmajtstu'uty. Ja María dø'øn jam wyinaty pøn yiktejp Magdalena, pøn ja miku' wyinaty niwixujk tø myajtstu'udyiyi; ³ nay jam ja Juana wyinatymi, ja Chuza ñidø'øxy, ja' ñidø'øxy pøn ja Herodes tumbi'ajtip, pøn tuki'iyi t'ejxp tnija'wip ti jam ejtp ka'ejtp mā ja Herodes jam wyindsøn'aty; jam ja Susana wyinatymi jøts may abikpyi jaa'dyi pøn jaty ja tigati tabudøjkidyidip.

Ku ja Jesús tmadyakpaaty ja jaa'y pøn nøjcx neppi

⁴ May jaa'y ja Jesús jam ojts ñimiñiyi pøn jaty tsoo'ndip o mā abikyajp jøts ja Jesús yik'ejxwa'añ; jøts ku ja jaa'y may'ampy myujkpejty, jøts ja ttamimadyaktøjkxiyi'ñ tu'uk ja ejxpajtin madya'aky. Jøts ja wyaañ:

⁵ —Tu'uk idø'øn ja jaa'y chøø'ñ tømtwøjpi. Jøts ku ja twijy, øy ja tømt o mā ñaxkidaajky. Midi'ibi ñajtswøjjiyi'ñ jam tuu'am, ja'ats yiktaa'nbu'uxkigyøjx jøts ja joon ja wa'ats tpeemujkijxy. ⁶ Midi'ibits ñajtswøjjiyi'ñ jam tsaa agujkp, ojts ja jam yjamuxy jøts ja jaty tyøtsjø'knaa ja'agøjxp ku ja naajx jam kyaneki. ⁷ Midi'ibits ñajtswøjjiyi'ñ mā ja magyujp jam wyinaty myuxwa'añ, ja'ats ja ojts ñi'aa'mbajtiniiyi. Ku ja myujxmi winet jøts ja niwine'en kyayikyonmøjkijyøø. ⁸ Midi'ibits ñajtswøjjiyi'ñ jam pu'uty ñaxkøjxp, jøts ku ja yøøñ jøts ja ojts yikxon yjantyimdyøømi, magø'pxy magø'pxy ja pyajkpejty ja tu'ukpi tømt.

Ku ja Jesús jade'en myadyak'abajtiyi'ñ, jøts ja møkta'aky wyaañ:

—Pøni pøn ja'gyukiwyamp, wan tja'gyuki.

Tigøjxp idø'øn ja Jesús ejxpajtín madya'akyøjxp ja y'ixpøjkin tyaky

⁹ Winets ja pyabøjkpitøj k ja yiktøøjyøø ti dø'øn jade'en tyijpy, sudso yikja'gyukit ja'abi madya'aky. ¹⁰ Xjats ja t'adsøøy jøts ja tnimaay:

—Meets yø Dios mduknija'wiyip ja y'ayu'uch winmaa'ñ sa ja' kyutujk midi ja tyanitanaapy ja yjaa'y, jade'ents meets ja mdyimyiktukmadøy; ka'ats ja abiky jaa'y nayide'en madya'akyøjxp tñijawidit, ejxpajtín madya'akyøjxp øts yø ja'ayi ndamimadya'aktit jøts kø'øm tñimado'odit tkanimado'odit nayide'en pøni sa ø xpabøkti xkapabøkti.

Ku ja Jesús tñigajpxy sudso dø'øn yikja'gyukit ku jaa'y neppi ñijky

¹¹ Yide'en idø'øn yø madya'aky tijy: Jade'en ja tømt yikpikta'aky sam ja Dios kyajpxy y'ayuujkin; ¹² jøts midi yiknajtswøjyññ jam tuu'am jade'en ja yikpikta'aky sam ja jaa'y pøn ja tpatmadoodip ja Dios kyajpxy, jøts ku ja t'ukja'gyukidi xjats ja miku' ja jatyi pyøjkiyidi jøts ja ka'ap tmibøktit, jøts ja nisudso'ampy kyanitso'ok'attit. ¹³ Jøts ja tømt jade'en yikpikta'aky midi yiknajtswøjyññ jam tsaa agujkp sam ja jaa'yindi pøn tmadoodip ja øgyajpxy ja øy'ayuujk, jøts ja ejtni xoni t'ukpabøjkojti y'ukjanchja'widip ja'; kuts ja yiin waan sa tkujatidi jøts ja jatyi tmajststu'utti, jatyi ja ñajybikpyikta'agyidi ja'agøjxp ku ja jade'endi sam ja ujts kya'aa'tsmiweninim. ¹⁴ Jøts ja tømt midi ñajtswøjyññ jam kujp agujkp, jade'en ja yikpikta'aky sam ja jaa'dyi pøn tjamadoodip ja øgyajpxy ja øy'ayuujk, yjajanchja'widip jøts nika'ap t'ukpadunidi, ja' ja ne'egi yikmajadaktip ja pyikta'aky, ja myeeñ, ja yjingaap, ja yjotkujk'ajtindi. Jade'ents ja tka'ukyikmøjtøjkinidi ja øgyajpxy ja øy'ayuujk jøts ja niti tkayikwingaxø'økti Dios wyindum. ¹⁵ Jøts ja tømt midi ñajtswøjyññ jam pu'uty ñaxkøjxp, jade'en ja'am sam ja jaa'dyi pøn amumjoojt nadyamiyojxidip ja Dios, jøts ja jade'en tpatmadojidi ja y'øgyajpxy y'ø'y'ayuujk. Møk ja yjanchja'win ja tpikta'akti, ka'ap ja juuni ttamajststu'utti, ja'ats idø'øn tyikwingaxø'ktip ja øgyajpxy ja øy'ayuujk.

Niti jadi'iñi kyatañ, kuwañim ja tyimyiknijawi

¹⁶ Kidi ja'ajip ja jaj yiktaguno'kp jøts ja yikumutst uk jøts ja yikpikta'akt jap maabajt patki'py; ja' ja wya'añ jøts ja yikpikta'akt jam køjxp ma yjajt tyøø'kxt, jøts ku jam pøn tyøkit ka'ap ja jam kube'ets kugoots yja'attit. ¹⁷ Ti ka'ukyikpatp ku ti yjaju'uch'ity. Øy kajpxy ayuujk yjagayiknigajpxwa'añ, kuwanits ja yiknijawi pøni sa ja y'ejxi tyiyi.

¹⁸ Jade'ents idø'øn øy xmado'odit; pøn tpabøjktip jøts tmadogukiwya'andi øy øy, jaakyikpudøkipts ja yikxondi jøts ja tja'gyukidit. Pønts ka', jaaktyimyikpøjxkidip ja' ja wyijy'ajtindi midi ja jaakjanadyaja'wiyidip jøts ja nisudso'ampy tkidyimya'gyukidit.

Ja Jesús tyaak jøts y'uch

¹⁹ Winets ja Jesús y'uch yja'ttøø møøt ja tyaak ma ja jam wyinaty, nika'ap idø'øn ja tpaatti wingon kumi janch mayjaa'y jam wyinatyi. ²⁰ Xjats ja Jesús yiktukmadøøy jøts ja yiknimaay:

—Ja mdaak møøt ja m'uchti ja' mmigajpxwajnip, ixap ja tøjkwimptyi.

²¹ Jøts ja t'adsøøy:

—Ja' øts idø'øn ndaagip, ja' øts idø'øn n'uchidip nmigu'ugidip, pøn tmadoodip ja Dios y'øgyajpxy y'ø'y'ayuujk jøts ja jade'en tpadundi pøni sa nwa'añ.

Ku ja Jesús tyiknajxy ja møk poj jøts ku ja tyik'amøkyññ ja mejy

²² Winets ja nay ja'abi xøøw tyøjkiyññ barkijøtpty møøt ja pyabøjkpitøj k, jøts ja tnimaay:

—Wan tjaa'myindi jam jaduktamajñ.

Jøts ja ñøjxktøø, ²³ jam ja wyinaty mejkyujk'amdi ku ja Jesus mya'oo'knaa. Jøts ja møk poj ja jam jotmøñ pyaajtidøø, yikxon ja nøø jam barkijøtp yjanchtøjkyini øy ja tyiknitigøøñit. ²⁴ Jøts ja tyujxtøø ja Jesús jøts ja tnimaadyøø:

—iWindsøn! iWindsøn! iNøøjøø'kxwaa'nindip!

Winets ja Jesús pyidi'jky jøts ja møk'ampy twingugajpxiyi'ñ ja møk poj ku ja nøø ja tyiktojmji'iky adsø'jkibim; jøts ja poj jaty yjanch'amø'jty, jadi'iñi ja myøøñ. ²⁵ Jøts ja tnimaay ja pyabøjkpitøjk:

—¿Ma dø'øn ja mjanchja'windi xyiktunwa'andi?

Tø ja yjanchnichø'jkidyigøøñidi, ñigyumaap ja tyimyja'widøø jøts ja xem yam ñawyajnidøø:

—¿Ti pønims ya'at jade'en, pø mimadojpts ja poj yø', pø mimadojpts ja nøø yø' ku yø t'ane'emy?

Ja Gadarit jaa'y pøn wyinaty ja miku' tø tyatøkiyi

²⁶ Jøtsnim ja yja'ttøø jam Gadarit etjotp mididi idø'øn ja jaduktamajñ tamp Galileit et wingon. ²⁷ Jøts ku ja Jesús jam wyinaajky, yø'øpyidsiimy, jøts ja ñimejnøø tu'uk ja kugajp pøn ja miku' wyinaty jekyip tø tyatøjkniyi. Niwa'ats ixwa'ats ja wyidejtni, ka'ap ja tyøjkjotp y'uktsinaañi, jam ja chinaadyakni ma ja oo'kpi ñaxøkidi. ²⁸ Jøts ku ja t'ejxpaajty ja Jesús jøts ja jaty twinguxanaay, yide'en ja tjantyimñøjmi møkta'aky:

—Jesús, Dios U'nk tsajpjøtpyt, ¿ti ø xanibøjkp? Tun may'ajt kidi xjantyimy'ayo'onduñ.

²⁹ Ja' idø'øn ja jade'en tyikwamp ku ja Jesús ja miku' møk'ampy t'ane'emy jøts ja jam pyidsø'ømt ja jaa'y y'am yjotp. Ejtp idø'øn ja miku' ja xyumimi'adi'ichiyi ku ja yjayiktagiwiiñ yjayiktapakwiiñ pujx kadeen; jaty ja ttapojtuiguixy yam ja jaa'y ja jade'en tø yja'uktajotkujk'ajtmiiyi jøts ja nima kyanøjkxt, jøts idø'øn ja miku' ja yikakwidityi o ma jam abak etjotp. ³⁰ Jøts ja Jesús yide'en tyiktiyi:

—¿Ti mxøøw?

Jøts ja y'adsøøy:

—Legión ø nxøøw.

Ja'agøjxp ja jade'en ñaxyøømmø'øyi kumi janch may miku' ja wyinaty tø tyatøkiyi.

³¹ Ja'axi dø'øn jade'en kø'øm wandip jøts ja tnimaadyøø ja Jesús jøts ja ka'ap kyaxidit jap ma miku' y'ayo'ombaatti. ³² Jamts wyinaty ja kuch yjøø'kxwidejtmidi jam kojpkøjxp ku ja miku' ñuu'kxaktøø jøts ja ttatøkidit ja kuch; yikjajt idø'øn ja Jesús ja jade'en.

³³ Xjats ja miku' tmajtstuttøø ja jaa'y jøts ja kuch ja ttatøjkidøø, winets ja jiyujk niduki'iyi yjanchepekkuwo'ongøjxtøø jøts ja nøøjøtpy ñaxkidakøjxtøø, japts ja ojts ñøøjøø'kxkøxti.

³⁴ Jøts ja jaa'y pøn wyinaty kuch'ejxtip ku ja jade'en t'ejxtøø yjatti kyubatti ja kyuch, jøts ja yjantyimchø'jkidøø, jøts ja kyaknøjkxtøø jam ma jaty pøngapøn chøøni kamjotp jøts nayide'en jam kajpjotp, jamts ja tuki'iyi ttamimadyakøjxtøø. ³⁵ Jøts ja jaa'y ja tnidso'ongøjxtøø jøts ja t'ejxwa'andi pøni janch idø'øn jade'en. Jøts ku ja yja'ttøø jam ma ja Jesús jam wyinaty, xjats ja t'ejxpattøø ja jaa'y pøn ja maamyiku' wyinaty tø myajtstu'udyiyi jøts ku ja jam chøøni wijy kejy, xøxy piky ja jam ma ja Jesús wyinaty tyani, jøts ja yjantyimchø'jkidøø. ³⁶ Jøts ja jaa'dyi pøn wyinaty kø'øm tø tyimy'ejxti, ja'ats ja tmadyaktøø sudso'ampy ja ja jaa'y wyinaty ja maamyiku' tø myajtstu'udyiyi.

³⁷ Ja'agøjxpts ja jaa'y ni'ijtyi ñuu'kxaktøø pøn jaty jam wyinaty tsinaadyip Gadara jøts ja Jesús jam pyidsø'ømt etjotp, pø jantyimchø'jkidipxi dø'øn ja'adi. Jade'ents ja Jesús ttatøjkii'ñ ja byarki jøts ja chø'jñ. ³⁸ Jøts ja jaa'y pøn wyinaty tø myajtstu'udyi ja maamyiku', ja'ats møk'ampy nuu'kxakmaa jøts ja yikmøødit jøts Jesús ja tmøøtnøjkxt, jøts ja ojts t'ane'emy jøts ku ja ne'egi tya'ant, yide'en ja tnimaay:

³⁹ —Nøjkx mdøjkwindum, jamts xnigajpxt xnimadya'akt sa Dios tø m'ødyuñiyi.

Nøjkx idø'øn ja jaa'y jøts ja ttamimadyaktøjkii'ñ amuum ja mayjaa'y sa Jesús ja wyinaty tø yikmøkpikiyi yik'øy'atyiyi.

Ja Jairo ñøøx, jøts ja tø'øxyøjk pøn ja Jesús wyet ojts ttojni

⁴⁰ Jøts ku ja Jesús wyimbejtña ñøjkxnimaa jam jaduktamajñ, pøkpaat may jaa'y ja jam yjanchnja'wiyøø, pø tum awejxipxi ja jaa'y ja wyinaty. ⁴¹ Xjats tu'uk yaa'dyøjk

yja'jty pøn txøw'ajtp Jairo, ja' idø'n jam wyinaty tniwindsøn'ajtp ja tsaptøjk. Jøts ja ñagyuxendyaajkøø jam Jesús tyekyjø'øm jøts ja tniṃaay, ojts ja ñuu'kxa'a'aky jøts ja myøøtnøjkxyit jam tyøjkwindum. ⁴² Jam ja tyu'ukpi nøøxu'nk, makmajtskin ja' yjumøjt ja wyinaty, ja'ats jam wyinaty oo'kp ka'oo'kp. Jøts ku ja Jesús ojts ñijkxy, janch may jaa'y ja pyadso'onøø, janch yikxon ja yik'atejmuky.

⁴³ Jamts tu'uk tø'øxyøjk pamaa'y, myakmajtsk jumøjtyip ja tajxnaxyi ja pyaajtniyi. Tø ja tniḍya'ayodøjkini ku tsøøyibi ja jadine'en tjamijuy jøts ja nipøn yjanchkayiktsø'øgyiyi. ⁴⁴ Xjats ja ojts wingon tjiguyø'øyi ja Jesús, jøts ja wyet pa' ja ojts tjøjxi, jøts ja tyajxnaxyi ja nay jatyi y'adujky.

⁴⁵ Jøts ja Jesús yide'en tyiktiiy:

—¿Pøn ø tø xøn?

Kuts nipøn tkanigajpxy, jøts ja Pedro møøt ja myigu'uk wyandøø:

—Windsøn, pø mjanchyik'atejmujkpts, nugots mjanchyiktejniñ mjanchyiktejxipy, jøts mnimy: “¿Pøn ø tø xøn?”

⁴⁶ Jøts ja Jesús wyaañ:

—Tø ø nyiktøn, tø njawi jøts ku øts nmøk'ajtin tø nduktamøkpiky tu'ugin ja jaa'y.

⁴⁷ Xjats ja tø'øxyøjk, pø ja'axi tam idø'n yiktejp, jøts ja ojts ñimyiibejpnì ñichiyuunì ñagyuxendya'agyi jam Jesús tyekyjø'øm, jøts ja ojts ttukmadøy jam mayjaa'y agujkp tigøjxp ku ja wyinaty tø ttøn jøts ku ja nay jatyi myøkpiky. ⁴⁸ Winets ja Jesús ja ñimaajyøø:

—Ja'agøjxp u'nk tø mmøkpiky ku ø tø xjanchjawi. Nøjkxni amgujk jotkujk.

⁴⁹ Exam ja Jesús wyinaty jade'en wya'añim, ku yja'jty tu'uk ja jaa'y pøn tsoo'mp jam tsaptøjk windsøn tyøjkwindum, ja Jairo. Jøts ja Jairo yikniṃaay:

—Tøts ja mnøøx y'anuu'kxiñi, kidi yø windsøn nugo x'adsejp'adi'ich.

⁵⁰ Jøts ku Jesús ja jade'en tmadøøy, jøts ja tniṃaay:

—Kidi mdsø'øgi, møk m'aaw mjoojt xpikta'akt, tu'ugyi ø xjanchjawit, jujkpyøkp ja m'u'nk inet.

⁵¹ Jøts ku ja jam tøjkwindum yja'ttøø, ka'ap ja jap tøjkjøtpy pøn tyiktøjkxyiñ, ja Pedro ja ja'ayi myøøtøjkxyiñ møøt ja Jacobo møøt ja Juan jøts ja u'nkteety u'nktaak jade'eñi. ⁵² Janchyaxtip ja wyinaty, ja y'u'nk ja tymchaachpa'ayoodip. Jøts ja Jesús ja ñimaajyidøø:

—Kidi mya'axti; ka'ap yø kiixy y'øøky, maapts yø ja'ayi.

⁵³ Jøts ja yjanchyiknixijky, pø ñija'widipxi ja' jøts ku ja wyinaty tø y'oo'kni. ⁵⁴ Xjats ja Jesús ja tmajch kyøjøp'am, jøts ja møk'ampy tniṃaay:

—Pidø'øk, u'nk.

⁵⁵ Jøts ja yjujkpyijky, nay jatyi ja pyidi'jky; jøts ja Jesús ja ojts tni'ane'emy jøts ku ja tyika'adyit. ⁵⁶ Ñigyumaap ja møjaa'y ja tyimya'widøø jøts ja Jesús ja tniṃaay jøts ka' pøn ttukmado'odit ku dø'n ja wyinaty jade'en tø tyuñi yjatyi.

9

Ku ja ñimakmajtskpi pabøjkpitøjk yiktanipøkti ja tunk jøts ja yikajxtsoondi

¹ Xjats ja Jesús tñankñamyujkøø ñimakmajtsk ja pyabøjkpitøjk jøts ja myøk'ajtin ja tmøøy, ojts ja tkutujkmøøy jøts ja tyikpidsøjmidit ja jaa'y ja miku', jøts ja tyikmøkpøktit ja pamaa'y. ² Ojts ja tkexy jøts ja Dios y'øgyajpxy y'øy'ayuujk ja tkajpxwa'kxidit midit ja tyanitanaapy ja yjaa'y jøts ja tyiktso'oktit ja pamaa'y. ³ Jøts ja tniṃaay:

—Ka' mniyø'øyik xko'ondit, niti xkako'ondit, ni tajk, ni pejñ, ni tsapkaaky, ni meeñ. Tu'ugyi mwet xminøjkxtit midit ixja mwet'ajttip. ⁴ Jøts ku mdøjk'amido'odit o mā pøni mā mja'atti, tu'ugyits jam mja'ta'aktit kunim jam mdsoonditnim. ⁵ Jøts ku mā pøn mgagupøkidit, tanaxtit ja kajp, ja'ayi ja pu'ux x'ukwinaptit jøts jade'eñi xuk'ejxtit jøts ku jade'eñi tø mñañiwa'achidi.

⁶ Jøts idø'øn ja yø'øwya'kxtøø, ñøjkxtøø o magajp, jøts ja jam tkajpxwa'kxti ja øgyajpxy ja øy'ayuujk jøts ja pamaa'y ja tyiktso'okti o maḁsoo.

Ku ja Juan Bautista ja o'jkin tpaajty

⁷ Xjats ja windsøn Herodes ku ja tnija'wiyii'ñ sa jaty ja Jesús wyinaty y'adi'ich, jøts ja ka'ap ti tabyajtin tpaajty pømbi ja nimaajyip jøts ku ja Juan wyinaty tø yjujkpyiky, ja' wyinaty tø pyidsimy jadigojk jap oo'kpi jutjotpy. ⁸ Pømbits wāndip jøts ku ja yja'aji ja Dios kyugajpxy Elías, jøts ku ja' wyinaty tø kyaxi'iky; pømbits nømidip jøts ku ja yja'aji ja Dios kyugajpxy pøn wyinaty windi'ixyip tø y'atsmendi, ja' nidu'ugin tø pyidsimy jadigojk.

⁹ Jøts ja Herodes wyaañ:

—Pø øtsimpts ja Juan kyubajk kø'øm nanikyikwinajkøø. ¿Pønts idø'øn ndejin yø' ixa njamado'ity yiknimadya'aky janch ñigyumaap?

Jøts idø'øn Herodes ja tjadyimwyin'ejxwaañ.

Ku ja Jesús yikaay ja nimagoxk milbi jaa'y

¹⁰ Xjats ku ja Jesús kyudanaabyi wyimbejttøø, ojts ja tyamimadyakixyi ti jaty ja wyinaty tø ttundi. Winets ja ojts twaādsøøñ jøts ja tmøøtnijkxy mā nipøn kya'ity jam Betsaida kajp wingon. ¹¹ Kuts ja jaa'y ja tnija'widøø, jøts ja ojts tpanøjkxti; kyupøjkts ja Jesús ja' jøts ja ojts ttamimadya'aky sa ja y'ejxi tyiyi ja Dios kyutujk midi ja tyanitanaapy ja yjaa'y, jøts ja tyiktsøøjkxy may ja pamaa'y.

¹² Jøts ku ja et chuu'ñaa, xjats ja ñimakmajtskpi kudanaabyi ja ñimejnøø jøts ja ñimaajyøø:

—Kajxni yø mayjaa'y, jøts nøjkx pyoo'kxnidi jøts nøjkx t'ixaañidi ja kyaajyik yjøø'kxik o magajp midi ya wingon tamp, nitits ya kya'ity mā adøm yaadi.

¹³ Jøts ja Jesús ja ñimaajyidøø:

—Yikaydi meets.

Jøts ja tnimaadyøø:

—Ja'ayits tsapkaaky jap jamagoxkyi jøts ajkx majtskyi, pø winet inet idø'øn pøni nda'ajuu'yigyøjxp øøts inet yø jaa'y ja kaaky ja jii'kxy.

¹⁴ Nimagoxk milin ja jaa'y jam wyinaty. Xjats ja Jesús tnimaay ja pyabøjkpitøjk:

—Yik'ixa'akti tukpik jaty niwixijkxmyajk jaty.

¹⁵ Jøts idø'øn ja jade'en tpadundøø, ojts ja jaa'y y'ixakøxti. ¹⁶ Winets ja Jesús tnixajiyii'ñ magoxk ja tsapkaaky jøts majtsk ja ajkx. Ojts chajp'ixy jøts ja ttamøja'wiyii'ñ ja Dios Teety. Jøts ku ja t'adujkpaiky, jøts ja ojts ttagødøki ja pyabøjkpitøjk jøts ja mayjaa'y ja ttaguma'adyit. ¹⁷ Ojts idø'øn ja niduki'iyi kyay'abidsømdi, niduki'iyi ja kyujxidøø; jøts ja kaaky wyindank ja makmajtsk kach ujts ujts yikpøkmujky.

Ku ja Pedro wyaañ jøts ku ja Jesús yja'aji pøn yiknitsokp

¹⁸ Tuk'ojk idø'øn ku ja Jesús jam wyinaty ja Dios Teety t'ajot'aty nadyu'uk, jamts idø'øn pyabøjkpitøjk ja pyawidityiyi jøts ja tyiktiiy:

—¿Sa jaa'y wya'andi kyajpxti, pønik øts idø'øn?

¹⁹ Xjats ja y'adsoodøø:

—Pømbi wāndip jøts ku mets Juan Bautista; pømbits wāmidip jøts ku mets m'Elías, nømidipts jadu'uk jøts ku me mja'aji ja Dios kyugajpxy pøn mendøø jekyip jøts ja' nidu'ugin tø wyimbity jadigojk.

²⁰ Jøts ja tjaakyiktiiy:

—Jøts meets, ¿sa mee mwa'añ, pøn øts yjaw?

Jøts ja Pedro wyaañ:

—Cristoxi mets, ja yiknitsokpi, ja Dios U'nk.

Ku ja Jesús tnigajpxy ja y'o'jkin

²¹ Winets Jesús ja ojts møkta'aky t'ane'emy jøts ja ka'ap tmadyakyø'odyit. ²² Yide'en ja yiknimaadyøø:

—Møk øts ja ayo'on nbaatt, ka' øts ja møjaa'dyøjk xkupøktit, ka' øts ja teetywindsøndøjk xkupøktit, ni ja kajpxwejpitøjk ø xkagupøktit. Xyik'ooktip øts ja', ja kidigøøk xøøwts ø nbidsø'ømt jadigojk oo'kpi jutjøtpy.

²³ Jøts ku ja jade'en wyaañ, winets ja tnimaay niduki'iyi pøn jam wyinatyi:

—Pøni pøn ø xpabøkwamp, jawyeen ja kø'øm kyanabya'ayowit, jabom jabom øts ja xku'ayowit, ja'ats øts idø'on xpabøjkp. ²⁴ Pønts kø'øm nabya'ayojip, pøn kasaduñim nay'ejxip, windigøøpyts y'anmija'win ja y'ity; pønts ø xku'o'jkp xkudigø'oyip, ja'ats ja yja' nøjkx nitso'ok'ajtp. ²⁵ ¿Ja ti ja ñiwy'a'ant øy ja jaa'y tjaja'bøjkixy ja naxwiiñ'ajtin jøts ja y'anmija'win ne'egi wyindigøy? ²⁶ Jøts pøni pøn ø xatsø'odyump, pøni pøn øts n'øgyajpxy n'øy'ayuujk xatsø'odyuujnip, nayide'ents øts ja tsø'odyumbi nøjkx ndatsø'odyuñ, ku ø nme'ent yikutujkpi, ku øts ja ndeety kyunuu'kxy'ajtin nmimejnit møøt ja ankilistøjk yja'adi. Øts idø'on ja naxwii'ñit jaa'y nmøjkudanaabyi'ajtpy. ²⁷ Tiy janch mee nnøjmi jøts ku jaa ja jaa'y ya winaagin tyanidi, pøn ka'ooktip kunim ja tyimy'uk'ejxtit sa Dios kyutujk tmime'ent midi ja tyanitanip yjaa'y.

Ku ja Jesús adsu'jky y'atstigajch amuum chamambøjkixy

²⁸ Tø dø'on ja wyinaty tyuktujkxøøwip jade'en y'ukjaty, jøts ja Jesús pyatøjkii'ñ jam kojpkøjxp Dios'ajot'ajtpi, myøødiyii'ñ ja Pedro ja', møøt ja Jacobo jøts ja Juan. ²⁹ Kuts ja Jesús jam wyinaty Dios'ajot'aty, xjats ja wyeen y'aaw ja tyigajch, jøts ja wyet ja ñaamy ja pyoobiyii'ñ tøø'kxpim tsamambim. ³⁰ Winets jam kyaxøktøø namajtsk ja jaa'y, ja'ats ja jam møøt myadya'aky, ja Moisés idø'on ja' møøt ja Elías, ³¹ nabejk'ampyaju'uk ja ñi'awidityidi jøts ja tkajpxy'atti ja o'jkin midi ja Jesús wyinaty pyaawwampy jam Jerusalén. ³² Øy ja Pedro møøt ja myigu'uk yjamaa'y'ookti, wijy'ejttip idø'on ja'. Jøts ja ojts t'ejxidi ja Jesús y'aju'uk møøt ja ñamajtskpi yja' nayide'endi pøn ja jam wyinaty møøt tyani. ³³ Jøts ku ja jaa'y jam wyinaty jagamnidi, jøts ja Pedro tnimaay ja Jesús:

—Windsøn, ityimy'øy'ajtp ku øø nyam'aty! Nyik'øyip øø tigøøk ja ujts'aadyøjk; tu'uk mets mja', tu'uk Moisés yja', jøts tu'uk Elías yja'.

Ka'ap idø'on ja Pedro y'aaw tjawi pø ti dø'on ja kyajpxy. ³⁴ Exam ja jade'en wya'añ ku yoots jam ñaxkidaajky, jøts ja yjanchø'jkidøø ku ja jap yoots agujkpy ñay'ejxpajtidøø. ³⁵ Winets ja tmadoodøø ku jap yoots agujkpy kyajpxy ku jap ñimy:

—Øts idø'on ya'at n'u'nk njanchøjkpy; mimadojidip pøni sa wya'añ.

³⁶ Ku ja wyinaty jade'en tø tmadowdiwya'añ, xjats ja t'ejxpattøø ja Jesús jøts ku ja jam nadyu'uk. Amøñi ja y'ejttøø, ka'ap ja pøn ttukmadowdi ku ja wyinaty jade'en tø t'ejxti.

Ku ja Jesús tyikmøkpjky tu'uk ja mixyu'nk pøn wyinaty ja miku tø tyatøkiyi

³⁷ Jøts ku kyimjabom'ajty, ku ja ojts kyidaknidi jam kojpkøjxp, jøts mayjaa'y ja Jesús yjöpku bajtiyøø. ³⁸ Jøts ja jam nidu'ugin møk'ampy ñimaajyøø:

—Windsøn, tun may'ajt, win'ejxik øts n'u'nk, yø'øyi ø tu'ugyi n'u'nk'ajtpy; ³⁹ miku' idø'on yø xumitatøjkiiyip, jøts yø yjanchxumiyiktsabaayi, yikmo'jtniyip yø', jøts janchyik'a'oo'pniiyip tñankwyinwøpyi tñankjyøpwøpyi. Nijade'ents kyamajtsu'udyi, am'ijxyim tsaach'ijxyim yjaty. ⁴⁰ Tø øts yø mbabøjkpi njanøjmidi jøts jeexyip yø miku' tyikpidsømdi, nika'ats yø tø myayidi.

⁴¹ Xjats ja Jesús wyaañ:

—iMee kajanchja'wibidi, yø mbøky nugo myikmajadaktip! ¿Ma windemnim meets ngajpxy n'ayuujk xpabøjkit? ¿Windemnim meets yø yjade'embii xuktatso'okt ku øts yø ejtp njanchjanigajpx'ity? Mets, yikmen yø m'u'nk.

⁴² Xjats ku ja mixy wingon myiiñ, jøts ja miku' ja ojts yiknaxkida'agyiyi jøts ja tyukpatkojmiiyi ja mø'ødyi; winets ja Jesús ja miku' twingugajpxiyii'ñ jøts ja tyikømøøy

møk møjaaaw. ⁴³ Ñigyumaap ja jaa'y ja ni'ijtyi tja'widøø ku ja Dios ja myøk'ajtin jade'en tyikwingaxi'iky.

Ku ja Jesús tnigajpxy jadigojk jøts ku ja y'ookt

Exam idø'øn ja jade'en wyinatyi ku ja Jesús tnimaay ja pyabøjkpitøjk:

⁴⁴ —Madowdi ya'at, jøts kidi xja'dyigøydi nijuuni; øts, yikøyakp øts jøts øts ja mayjaa'y nyiktagøddøkit.

⁴⁵ Jøts ja pyabøjkpitøjk ka'ap ja tja'gyukidi ku ja jade'en wyaañ, jøts nika'ap idø'øn ja ttuknimadøy; tsø'jkimidipts ja' jøts ja tyiktøødit ti dø'øn ja jade'en tyijpy.

Pøn idø'øn jawaani møj ma Dios ja yjaa'y ja kyutujk ttanitani

⁴⁶ Xjats ja tkajpxy'ajtpinibøjkidøø pømbi jadyimy'ukmøjtøkip, ⁴⁷ wa'ats ja Jesús ja tnijawi sa ja wyinaty wyinmaydi. Winets ja ojts ttsa'anji'iky tu'uk ja mutsku'nk jøts ja ñadyawingudsaa'niyøø, ⁴⁸ jøts ja wyaañ:

—Pøni pøn øts ya'at mutsku'nk xkupøjkxip, øts idø'øn ja wyinaty xkupøjkp; pøni pønts øts jade'en xkupøjkp, ja'ats idø'øn ja wyinaty kyupijky pøn ø xkajxp. Pønts kanamyøjpiktaajkip wine'enin meets ixaadi, ja'ats idø'øn nøjkx møjtøjkp.

Ku ja Jesús wyaañ: Adøm ja' nbudøjkibi pøni ka'ap adøm ja xmidsep'ajtyindi

⁴⁹ Xjats ja Juan tnimaay ja Jesús:

—Windsøn, tø øø n'ixy tu'uk ja jaa'y tyikpidsimy ja miku' mets mmøk'ajtingøjxp; tøts øøts ja ndukmajtstu'uty kumi ka'ap adøm ja xmøøtwidijtyim.

⁵⁰ Jøts ja Jesús ja ñimaajyøø:

—Kidi xuktamajtstu'utti; adøm ja' nbudøjkibi pøn ka'ap adøm ja xmidsep'ajtyindi.

Ka'ap ja Jesús tyikajty sa wya'andi ja Jacobo møøt ja Juan

⁵¹ Jøts ku ja et ja xøøw tpaajty ku ja Jesús wyinaty ñøjkxwani tsajpjøtpy, xjats ja jotmøk'ampy chøø'ñ jøts ja ñijky jam Jerusalén. ⁵² Ojts ja tkajxjawyeni kyugajpxy, jøts ja ñøjkxtøø jam Samariit etjotp jøts ja jam t'ixaa'yidit ja yja'taajk; ⁵³ ka'ats ja Samariit jaa'y ja tkupøjktøø ja'agøjxp ku ja tnija'widøø jøts ku ja ñijky jam Jerusalén. ⁵⁴ Kuts ja Juan ja jade'en t'ejxtøø møøt ja Jacobo midi ja pyabøjkpi'ajtpy, jøts ja ojts ñii'mxyi:

—Windsøn'ajtim, ¿tuñ øø nayide'en sam ja kugajpxy Elias y'adijch, n'amido'op øøts ja jøøn tsajpjøtpy, wan yø jaa'y tkudigøøgyøxti?

⁵⁵ Jøts Jesús ja nugo twin'ijxy jøts ja møk'ampy twingugajpxiyi'ñ, yide'en ja tnimaay:

—Ka' meets yjawi xja'gyukidi pøn meets myøk'ajtin mmøøt'ajtxiyip.

⁵⁶ Nmøjkudanaabyi'ajtpy øts ja naaxwii'ñit jaa'y, kaja'ajip ø tø nnimiñ jøts øts ja jaa'y nyik'ookt nyiktigøøty, ja' ø tø nnimiñ jøts øts ja jaa'y nyiknitso'ok'att.

Xjats ja choo'ndøø jøts ja ñøjkxtøø abikyajp.

Ja jaa'y pøn tpawidetwandip ja Jesús

⁵⁷ Jøts ku ja wyinaty jam tyuu'yø'ødyi, jøts ja Jesús ja jaa'y tu'uk ñimaajyøø:

—Windsøn, tsoomp øts, nbanøjkxp mets o maðsoo pøni ma me mniikxy.

⁵⁸ Jøts ja Jesús y'adsøøy:

—Ne'egi jaa ja waajx ja yjut, ne'egi jaa ja joon ja pya'an; jøts øts niti ø xka'ejtxi øyik øts idø'øn ma n'ønø'ønt.

⁵⁹ Xjats ja Jesús jadu'ukpi jaa'y tnimaay:

—Møødik øts.

Jøts ja wyaañ:

—Windsøn'ajtim, wan øts ndeety jawyeen t'atsyiknaaxøki.

⁶⁰ Jøts ja Jesús y'adsøøy:

—Majtstu'ut, wan ja tyikpidøøkti ja myi'oo'kpi pøn y'anmija'win jajujkyi tø tyik'oo'knidi; jøts mets, nøjkx mets ja Dios y'øgyajpxy y'øy'ayuujk xkajpxwa'kxi.

⁶¹ Jøts ja jade'en ñimaajyøø:

—Windsøn'ajtim, nmøødiwyampy mets, nijkxy øts nmigu'uk t'atstukmadøy, nijkxy øts t'atsnagyaajpxpidsimyí jawyeen jap ndøjkjøtpy.

⁶² Jøts ja Jesús ja tnimaay:

—Ku jaa'y yu'uy, ja' ja y'ijxpy ja tyunk; pønts ejxjimbejt'adøtsp, tits ja nyikwa'anint. Jade'ents idø'on ja Dios wyingujkp ma ja ttanitani kyutujk ja yjaa'y; pøn ja tu'ugyi amumjoojt kamiduujniyip, tits ja jam ñiwya'ant.

10

Ku ja Jesús tkajxwa'kxy ja ñidugui'pxmyajkpi jaa'y

¹ Jøts ku ja jade'en y'ukjajt, jøts ja nwindson'ajtim twiwijch ja nidugui'pxmyajk ja yjaa'y, jøts ja tpaguejxy namajtsk jaty. Jade'en ja ojts tyiknijkxy o magajp ma dø'on ja kø'øm wyinaty ñøjkxwa'añ, ² jøts ja tnimaay:

—Janch may pikta'aky pyidø'økwa'añ, ka'ats ja tumbi myayidi. Paty mee x'amido'ot ja kubikta'aky jøts tjaakaxt ja tyumbi jøts pyidø'økt ja pyikta'aky. ³ Nøjkxtits meets; jade'enxi mee mnøjkxt sam borreek ñijkxy ma may miy'uk jamdi. ⁴ Ni mbejn xkawetstit, ni mmeeñ'abøjk'i'ñ, ni mgø'øk, niti xkako'ondit; jøts kidi pøn xmi'øømayidi xmigajpxmayidi ku pøn xkajpxpoo'kxtit tuu'ajy. ⁵ Jøts ku ma mja'taajk x'amidowa'andit yide'en jawyeen mgajpxpoo'kxtit: “Ma meets, Dios mjagyepyidi.” ⁶ Pøni jamts pøn jotøjkiiyip ja Dios, ja'ats idø'on Dios janchjagyapip; pøni ka'ats pøn m'adsojimbejtxiyidi ja mgajpxpoo'kxindi, anaxtits ja tøjk. ⁷ Jøts jam mda'andit ja' tyøjkjøtpi pøn Dios jotøjkiiyidip, mga'adyip mjøø'kxtip idø'on pøni ti ja mmøøjyidip, mbaat'ajttip ku jade'en myikmo'odit. Kidits tøjkp tøjkp nugo mwidetti. ⁸ Ku o magajp mja'attit, pøni ma myikupøkti mga'adyipts mjøø'kxtipts ja' pøni ti myikmøødyip; ⁹ myikmøkpøktip ja pamaa'y jam, jøts ja jaa'y xnøjmidit: “Jaani Dios kyutujk ya midi ja tyanitanaapy yjaa'y, ja adøm ja nmøøt'ajtna'andi.” ¹⁰ Kuts ma ja kajp xpaattit ma mgayikupøktit, yø'øpyidsømdits jam jøts tuu'am mnø'ømdit: ¹¹ “Pu'uxpaat øø ndekyijxy tø ty'a'tspøjkni midi ya kajpjøøjty, ixyamts øøts nyikwa'ach meets køjxp, ejxti sa x'ejxti, nañiwaajtsip øøts jade'en. Ja ti winets xkanijawidit, jaa Dios kyutujk wyingøñ midi ja tyanitanaapy ja yjaa'y.” ¹² Ixyamts mee ndukmadøy jøts ku nøjkx ja tiidyu'unin ñaxy, ne'egi kajaa yø yjade'embii jaa'y ja ayo'on tyimbyaattit, jøts nigidi jade'en y'ayo'ombaattit ne'egi ja kawindiy jaa'dyi pøn jam Sodoma kugajp'ajttø.

Ja ayo'on midi tyanaxtip ja ka'øgyajp

¹³ 'iCorazingit jaa'dyi, Betsaidit jaa'dyi, mjanch'ayøøy meets, ti jade'en mnadyatu-ujnidip! Ku jeexyip jam kajpjotp jam Sidón jam Tiro ne'egi yiktuñ ja milagri'ajtin midi meets ya tø myiktu'unxi, windi'ixyip ja jeexyip ja chinaa'yin tyiktigajtsnidi, ku ja pyøky jeexyip tyimchaachjawidi. ¹⁴ Kuts nøjkx ja tiidyu'unin ñaxy, mgu'ayowipts meets ja jinaxy, nika'ap ja ne'egi jadine'en y'ayo'odit ja jaa'dyi pøn tsinaadyip jam Tiro jøts jam Sidón, ¹⁵ jøts meets Capernaumit jaa'dyi, ¿ma mee xijy tø mdyimyjaa'ty, tsajpjøtpy? Pø japxi meets ayodaajkjøtpy mnøjkxtit.

¹⁶ Jøts ja Jesús ja pyabøjkpitøjk ja tnimaay:

—Pøni pøn mbatmadojidip, øts idø'on ja wyinaty xpatmadoodip; pønts mgagupøjkidip, øts idø'on ja wyinaty xkagupøjktip; pønts øts jade'en xkagupøjkp, ja'ats idø'on ja wyinaty kyagupøjktip pøn ø xkajxp.

Ku wyimbejttø ja ñidugui'pxmyajkpi jaa'y

¹⁷ Xjats ja ñidugui'pxmyajkpi jaa'y ejtni xoni yjanchwimbejtnidøø, jøts ja wyandøø:

—Windsøn'ajtim, tøbaat øøts ja miku' xmimadøy ku øøts ja tø ngajpxpidsimy mets mmøk'ajtingøjxp.

¹⁸ Jøts ja Jesús ja tnimaay:

—Janch jade'en, ojtsts øts ja miku' n'ixy ku ja kya'ukmajadakni ja myøk'ajtin ja'agøjxp ku ja pyidsiimy jap tsajpjøtpty. ¹⁹ Øtsts meets ja nmøk'ajtin tø nmø'øy jøts ka' sa mjattit. Øy meets ja tsaa'ñ øy meets ja kajpy xjadawa'kpety, øy meets ja miku' ja myøk'ajtin sa mjadatunwa'añidi, mimajadaajkip meets yja' ja' jøts meets ja ka' sa mdunit. ²⁰ Kidits yø'øyi tu'ugyi xajotkujk'atti ku yø miku' mmimadøyiidi, ja' mdajotkujk'attip ku ja Dios m'ejxkapyidi xemikøjxp jap tsajpjøtpty.

Ku ja Jesús xyonda'aky

²¹ Winets ja Jesús tjantyaxondaajky ja Espíritu Santo, jøts ja wyaañ:

—Dios Teety tsajpjøtpti, yikjujky'ajtpi ya naxwiñ, nmøja'wip ngunuu'kxyja'wip ja'agøjxp ku tø xamidsøky o pøn ja mnitsoojkin, jøts yø wijyaa'y ja tøkaja'gyukidi kø'øm, ne'egi tøts ja xuk'ixy xuknijawi pøn idø'øn ka'ejxiyimdi. Jade'ents Teety tø xuñ sa kø'øm xamidsøky o pøn.

²² Tum ja' øts nDeety xuktump midi ja kø'øm tyunwampy. Ka'ap øts pøn wa'ats xnijawi sam øts nDeety kø'øm xnijawin, nika'ats øts nDeety pøn wa'ats ñijawiyi sam øts ja kø'øm nnijawin. Jøts pøni pøn øts ja nduknijawiwampy, ja'ats tnijawidip ja Dios Teety.

²³ Winets ja pyabøjkpitøjk ja twin'ejxij'jky jøts ja yide'en ja'ayi yiknimaadyøø:

—Janch nekim meets ku meets ja kø'øm xtyimy'ijxy xtyimñijawi midi meets ixa kø'øm mdyimy'ijxpy mdyimbyatpy; ²⁴ may Dios kyugajpxy, may windsøndøjk yø kø'øm tja'ejxwändøø tjanijawiwya'andi midi meets ixyam kø'øm m'ijxpy mnija'wip, nika'ats ja t'ejxtøø; ojts ja tjamadowa'andi midi meets ixyam kø'øm mmadøøpy, nika'ats ja tmadoodøø.

Ku ja samariit jaa'y yjotwa'añ

²⁵ Xjats tu'uk wyaa'kukiyi'ñ ja kajpxwejpidi jøts ja nugo kajpxy'ejxwa'añ ja Jesús, yide'en ja tyiktiy:

—Windsøn, ¿sudso ø ndu'unt jøts øts n'anmija'win ñitso'ok'att xemikøjxp?

²⁶ Jøts ja Jesús ja y'adsojimbejtøø:

—¿Kidimts jap tø x'ixy nøkyjøtpty midi ja Moisés kyutujk myøøt'ajtpy, sa ja xja'gyuki?

²⁷ Jøts ja kajpxwejpi y'adsøøy jøts ja wyaañ:

—“Amumjoojt x'ajot'att ja Dios, ma'in m'anmija'win ma'in mwinmaa'ñ myajada'aky jade'en ja xwindsø'øgit; jøts nayide'en ja mmigu'uk xpa'ayo'ot sam kø'øm mnabya'ayøyin.”

²⁸ Winets ja Jesús ja ñimaajyøø:

—Tiy janch idø'øn mjanchwa'añ. Pøni mbadumpy yø jade'en, nitso'ok'atpts ja m'anmija'win.

²⁹ Jøts ja kajpxwejpi ka'ap ja ttajotkuki ku ja jade'en yik'adsøy, jøts ja tnimaay ja Jesús:

—¿Pøndsik øts idø'øn ndsaachmigu'uk'ajtpy?

³⁰ Jøts ja Jesús y'adsøøy jøts ja tnimaay:

—Tu'uk idø'øn ja jaa'y, jam ja wyinaty kyida'aky ma ja Jerusaléngit tuu' jøts ja ñijkxy Jericó, xjats maa'tspi ja pyajttøø jøts ja wa'ats yikwimaa'tskijxy, wyet ñaamy yikpøjkijxy; øy øy yikwinwøjpy yikjøpwøjpy jøtsnim ja yiknikejky, jawaani ja tkayik'oo'knidi. ³¹ Xjats jam jotmøñ wyinaajky nay jam tu'uk ja israelit teety; øy ja tja'ijxy, wyininaajki ja'.

³² Jøts jadu'uk kyidakmøø ja Leví yjaa'y jøts ja nayide'en twininaajkmaa, øy ja tja'ijxy.

³³ Winets jadu'uk ja tuu'yø'øbyi kyidaajky Samariit jaa'y, jøts ku ja ojts jade'en t'ixy xjats ja wyinmaa'ñ ja tyimchaachmiñ ku ja jade'en yik'ayowim. ³⁴ Jøts ja wingon twingunøjkxiy'ñ ja tsaachi, xjats chaachi ja tsøøyiyi, ojts ja tpiktaajki ja aceite møøt ja vino jøts ja t'adsujmi ja chaachi. Winets ja ojts tyikpety kyø'øm jiyujkøjxp jøts ja ojts tyikja'aty ja'taajkjøt, jamts ja tpa'am'ejx tsunajxy. ³⁵ Jøts ku kyimjabom'ajty ku ja samariit jaa'y wyinaty choonwani, jøts ja tju'jty majtsk ja myeeñu'nk jøts ja tkømøøy ja

kudøjk, yide'en ja tnimaay: “Ejx'et yø jaa'y, mo' pøni ti ka'ejtxip, jøts pøni ka' yø meen tpaaty ixa nmø'oy, yiktunts mgø'ømeeñu'nk, ja øts ja ngubatt ku nwimbett jadigojk.”

³⁶ Xjats ja Jesús tyiktiy:

—¿Pønts me m'a'ejxip migu'uk'ajtip ja jaa'y pøn ja maa'tspi yiktsaachidyøø?

³⁷ Jøts ja kajpxwejpi wyaañ:

—Ja' ja migu'uk'ajtip pøn ja ojts y'ayo'ijxyi.

Jøts ja Jesús ja ñimaajyøø:

—Nøjkxts jøts nayide'en xu'unt, jøts nayide'en mjaa'y'att sam ja jaa'yin pøn ja myigu'uk ojts t'ayo'ixy.

Ku ja Jesús yja'aty jam Marta jøts María tyøjkwindum

³⁸ Xjats ja Jesús jade'en wyidity jøts ja yja'lty ma kajp wyinaty tu'uk, jamts ja tø'øxyøjk ja tu'uk wyadsoojøø jøts ja ojts wyayi tyøjkjøtpy, Marta dø'øn ja xyøøw. ³⁹ Jamts myiga'ax ja tu'uk, María'ajtp ja', ja'ats twingu'ixajkiyñ ja Jesús jøts ja tpatmadøy pøni sa ja wya'añ. ⁴⁰ Jøts ja Marta, ja' ja jam kyami'awatsip ja tyøjktunk, jøts ja tnimiñ ja Jesús jøts ja tnimaay:

—Windsøn'ajtim, ¿kidi sa mwā'añ ku øts yø nmigu'uk nadyu'uk xuktunwanguixy yø tunk? Nøjmi waani jøts ø xpudøkit.

⁴¹ Jøts ja Jesús y'adsøøy:

—Marta, Marta, yø' me nugo mdajotkijxpy mdajotmay'øø'kpy yø mdunk. ⁴² Ka' mets yø ne'egi x'øyjawi yø øybi winmaa'ñ midi xemikøjxp tamp, ja'ats yø María tø tjā'gyuki midi paat'ajtip. Ti pønts yø xijy ukpøjkxiniyip jadigojk.

11

Ku ja Jesús tnanky'ixpiky ja Dios'ajot'ajtin

¹ Xjats idø'øn ja Jesús jam ja wyinaty ja Dios Teety t'ajot'aty, jøts ku ja y'abajtiyñ, winets ja pyabøjkpitøjk ja nidu'ugin ñimaajyøø:

—Windsøn'ajtim, tukjajtk øøts ja Dios'ajot'ajtk, ti sa ja Juan ttukjajty ja Dios'ajot'ajtk ja pyabøjkpitøjk.

² Jøts ja Jesús y'adsøøy jøts ja wyaañ:

—Ku mdsapkajpxtit, yide'en mwā'andit:

Dios Teety tsajpjotpit,

kuuyi mets jadu'uk øy wā'ats.

Øyts ku xmimiñ ja mgutujk midi mdanitanaapy ja mjaa'y.

Yikjatts ya naxwiñ nayide'en kø'ømdsojkingøjxp pøni sa xamidsøky nayide'en sam jap xuñin tsajpjøtpy.

³ Møøkyts øøts ixyam ja ngaajyik n'uujkik midi øøts xka'ejtxip.

⁴ Maa'kxik øøts nbøky, kumi tø øøts nayide'en nmaa'kxuky pøn øøts xjemdump xedump. Agidyujk øøts axajtujk øøts, kidi øøts xmajtstu'uty, jøts kidi myajada'aky ja miku' yja'.

⁵ Jøts ja yjaakwaañ:

—Jade'enin n'ukpiktaajkin jøts ku o pøn ja myigu'uk jam tu'uk, jøts ja tnidsøøñ møjtsuu'm jøts ja t'atsnøjmi: “Migu'uku'nk, tun may'ajt t'uk'anuu'kxk øts tigøøk ja mdsapkaaky, ngubatp øts. ⁶ Nmigu'uk øts idø'øn tø yja'aty ndøjkjøtpy, ja'ats øts idø'øn njadukaawyampy, ka'ap øts nja' tyimñiti.” ⁷ Jøts ja yjadu'ukpi yide'en n'ukpiktaajkmant y'adsøy japyi tyøjkjøtpy: “Kidi øts jadine'en nugo xjanchn'e'my; aduky yø tøj jøts ixyp øts n'una'jk nmøøtma'ay maabajtkijxpy; ka'ap øts yap nbidø'økwa'añ, jade'ents øts inet ka' ti nyakt.” ⁸ Yide'ents øts ja ndyimy'a'ejxi pø myigu'ukxi ja', øy ja yjabidø'økwa'añ jøts ja t'atsmo'ot midi ja myigu'uk ja amidojyip, kuwanits ja tjanchjatu'unt jade'en, y'atsmøøgyøxp idø'øn ja' pøni ti jaty ja chøjkpy jøts ja jade'en ka'ap y'ukna'amniyit, pø naña'amixi ja kyatsøjkpy. ⁹ Paty mee yikxon ndukmadøy: Jøts x'amido'odit xpøktso'odit ja Dios, mmo'ojipts meets ja'; mdukpaadip meets ja' pøni ti meets mga'ejtxidip;

myik'awaajtsxiyidip meets tøjka'aw ja' ku øy ma mgugajpxidit. ¹⁰ Paty ku pøn o ti t'amidøy, yikmøøpyts ja'; ku pøn o ti t'ixa'ay, pyatpyts ja'; ku pøn tøjka'agaj twingøxy, yik'awaajtsxiyipts ja o pøn.

¹¹ ¿Ku mee wyinaty m'uk'u'nkteety'aty jøts ku m'u'nk m'amidowidit ja tsapkaaky, wan meets m'aaw mjoojt ndejin myajada'akt jøts meets tsaa ja xkøjyit? ¿uk xmo'odit ja tsaa'n yam meets ja ajkx ja mja'amidøyyi? ¹² ¿uk xmo'odit ja kajpy yam meets ja tutu'uty ja tøj mja'amidøyyi? ¹³ Øyts mee mabaat mjagatyimy'øyjaa'y'atti, mjaajttipts ku xmo'odit ja m'u'nk m'una'jk midi øy tsuj pidsømp, itits ja Dios tyungip, pø tsajpjøtpyxi ja', myo'opts ja' ja Espiritu Santo pøni pøn ja amido'oxiyip!

Ku ja Jesús yiknimaay jøts ku ja miku' myøk'ajtin ja tyiktuujni

¹⁴ Xjats idø'n jade'en ngøjmyi, jam ja Jesús wyinaty tyikpidsimy ja miku' midi jam wyinaty tyik'ejtnip uum tu'uk ja jaa'y; jøts ku ja miku' pyidsimy jøts ja jaa'y jaty kyajpxpijky. Jøts ja mayjaa'y janch ñigyumaap ja tyimyja'widøø ku ja jade'en, ¹⁵ jøts ja winaagin ñømdøø:

—Ja møj miku' yø jaa'y ja myøk'ajtin yiktuujnip, ja' yø tyuktapidsimpy yø myimiku' midi yø jaa'y myøøt'ajtp, yø' wyindsøn myøk'ajtindi yiktuujnip.

¹⁶ Pømbits nugo ttatundip jøts ja tjøt'ejxwa'andi, ja milagri'ajtin ja y'amidoodip jøts ja tyimdyuk'ejxidit midi kidakp tsajpjøtpy. ¹⁷ Wa'ats ja tnijawi sa jaty ja wyinaty wyinmaydi, jøts ja tnimaay:

—O pøn windsøn, ku kyutujk ja chepta'aky jøts yjaa'y ja ñawya'kxyi kawinakpiky jøts ja xem yam cheptundi agø'ømyidi, ñankyøjxidipts ja jade'eñi jøts ni ja kutujk niti kya'ukwani, uk kuts tu'uk migu'uk agø'ømyi cheptundi jøts ja ñawya'kxniyidi, agø'ømyits ja xem yam ñankyudigøyyidi. ¹⁸ Nayide'ents miku'mi pøni nawyanwa'kxip ja kø'ømyi jøts ja agø'ømyi ñanky'ayo'ombaadyi, ¿windemts ja jeky y'ejtnit ja myøk'ajtin, kidi ja jaty kyudigøøñit? Yø' øts idø'n jade'en xyikwamp ku meets mwa'añ jøts ku øts ja miku' myøk'ajtin nyiktuujniyi ku øts yø jaa'y ja miku' ngajpxpidsøjmiyi; ¹⁹ pøni ja'ats øts ja myøk'ajtin njanchyiktuujnip, ¿pønts meets mmigu'uk yja' yiktuujnidip ku ja tkajpxpidsømdi ja miku'? Pø yø'øxi mee kø'øm mni'øø'niyip jøts ku mee nugo mgajpxigøy. ²⁰ Diosts øts ja myøk'ajtin nduktapidsøjmip yø miku'di, yide'en idø'n xja'gyukidit jøts ku ja Dios tøj tyikmeni ja kyutujk midi ja tyanitanaapy yjaa'y.

²¹ 'Ku tu'uk jotmøkjaa'y t'ejx'lity tøj, janch yikxon ja ta'tspiky tøj tsøøjmjø'kixy ja ta'o'jk, pønts ja mayip jade'en, jade'ents pyikta'aky ja jap tøjjøtpy jotkujk tyik'ity, ka'ap ja ti tkumay. ²² Jøts kuts jam jadu'uk jawaani jotmøk yja'aty jøts ja myimajada'agiyi, tuki'iyi tya'o'jk ja pyøjkxiyi midi ja y'uktamøj, jøts pyikta'aky ja yikja'abøkøjxni ti jaty ja jam yjagyejpy.

²³ 'Pøn ø xkabudøjkip, ja' øts idø'n xmidsepwamp; jøts ku øts pøn ti møøt njapøkmukwa'añ jøts ja jinaxy tpøkwa'kxy.

Ku ja miku' jadigojk t'awimbeti ja chinaadyaajk

²⁴ 'Ku ja miku' tmajtstu'uty ja jaa'y, jøts ja nugo wyidity o ma tøjøts etjøøjty, tja'ixa'ay ja pyoo'kxaaajk; jøts ku ja nima tkapaaty, jøts ja wyinmay: “Tiku øts ndøj k jadigojk nga'awimbeti ma tøj ndsøøñ.” ²⁵ Jøts ku ja wyimbity, jade'ents ja jaa'y ja tpaaty sam tu'uk ja tøj tawa'ats, pe'ety jaaxy ja jap. ²⁶ Winets ja chøøñ jadigojk jøts ja janiwixujk tjaaktyimy'atsway ja myimiku' jawaani ka'øydi sam ja kyamajada'agyin, jøts ja jadine'en ttatøkidi ja jaa'y, tsinaadyaajk ja tyikwa'andi, jøts ja jaa'y jade'en jinaxy myøwa'añ, nigidi ja y'ijty jade'en øyim idø'n wyinaty ja miku' ja jam tjamøøt'aty tu'umchi.

Pøn ja xemikøjxpit xondaajkin myøøt'ajtpy

²⁷ Exam idø'n ja Jesús wyinaty jade'en wya'añ ku tu'uk tøjøxyøjk jam jaa'y agujkp møk'ampy wya'añ:

—Janch kawinmaaŋi tmøøt'aty ja xondaajkin pøn tø myike'exyi jøts pøn ja che'tsk tø mduktayeegy!

²⁸ Xjats yide'en ja Jesús y'adsøoy:

—Janch nekim ja'adi pøn tpatmadoodip ja Dios kyajpxy jøts ja jade'en tpadundi!

Ku ja ka'øyyaa'y ttamidowdi jøts yiktuk'ejxtit ja milagri

²⁹ Namyuk'adøjtsidip ja jaa'y jam wyinaty ma ja Jesús, jøts ja tnimaabyinaxwa'jky:

—Niwine'en ja yambi jaa'y kya'øyidi, ñadyiyi tnijawiwya'andi pøni janch ku nDios U'ngi, paty t'amidowdi jøts yiktuk'ejxtit ja milagri'ajtin; niwine'ents kya'ukyiktuk'ejxnidit, wan ja'ayi midi ja kugajpxy Jonás ojts tyuk'ijxyidi. ³⁰ Nayide'ents sa ja Jonás ojts t'ejxpajt'aty ja Nínive jaa'dyi, nayide'ents øts ya'atpi jaa'y x'ejxpajt'att.

³¹ Ku wyinaty kyutuky ja et ja xøøw, ku ya'atpi jaa'y nøjkx yiktiidyundi, jøts ja windsøndø'øxy yø ñidanaagyukiyidit jøts ja ñi'øøniyidit pøn tnidso'on jagam et ja Salomón, jøts ja t'ejxøø tnija'wiyøø ja wyiy'ajtin; icyats jadu'uk tø kyaxi'iky jawaani wijy midi tjinajxp ja Salomón, nayide'ents meets ja xkagupiky. ³² Nay jats ja Nínive jaa'y wya'kukidit ku ja tiidyu'unin ñaxt ku yiktiidyu'undit ya'atpi jaa'dyi, jøts yikni'øønidit; ja'agøjxp ku ja Nínive jaa'y ne'egi tyiktigajstøø ja chinaa'yindi ku ja Jonás ja ojts tyukmadøyidi ja Dios kyajpxy ja Dios y'ayuujk; icyats jadu'uk tø kyaxi'iky pøn tyimñija'wip wa'ats, nigidi ja Jonás y'ijty jade'en tnijawi, nayide'ents meets ja yam xkagupiky.

Ja øy jaj midi jaa'y tyikja'gyukip

³³ 'Ka'axi pøn jaj ttuknidøøbyøki jøts ja yikyu'utst o ma, uk jøts ja yikujupt ka-juun patki'py, ja'agøjxp ja tyøøbyiky jøts ja yikpikta'akt ma yjajt, kuts jam pøn tyøkit tyuk'ejxpaatpts ja o ti. ³⁴ Jade'en idø'øn yø mween n'ukpiktaajkin sam jajin, yø'øts tyikujajtaajkip tyikudøø'kxaajkip amuum ja mne'kx ja mgojpk; kuts ja mween y'ø'y'aty nayide'ents ja amuum tjagyejpy ja ne'kx ja kojpk, ka'ap ja ttuktuñ kya'øybi. ³⁵ Øyimts x'ejxtit jøts kidi xyik'ookti ja jaj midi wa'ats jajp, jøts kidim jade'en mjatti sam jaj kya'ityin, sam ja jajin midi kawa'atsjajp jøts yik'ayowin kube'ets kugoots. ³⁶ Pøni mwinmaa'nbyattipts øy yikxon, ja jajts idø'øn ndejint mgayik'oo'ktip jøts ka' jade'en m'etti sam o pøn kugootstujpy chøønin niti winmaa'ñ, o nugo chaachjawin'ejx'ookti. Kuts meets, wa'ats meets ja mduk'ejxpaadyidi pøni ti dø'øn m'ejxwandip, ka' ti jadu'uk chøkyi, jade'en ja myikujajtaagiyidi myikudøø'kxaagiyidi sam jaj wa'ats mduk'ejxpaadyidi o ti.

Ku ja Jesús ttamigajpxy sa y'adø'øtsti ja fariseotøjkti møøt ja kajpxwejpitøjkti

³⁷ Kuts ja Jesús jade'en kyajpx'abajtiyi'ñ, xjats fariseo ja tu'uk wyaajøø tyigam kaabyi. Kuts ja jam tyøjkiyi'ñ jøts ja y'ixaajky, kaabyajt twinguwa'atsiyi'ñ. ³⁸ Jøts ja fariseo janch ñigyumaap tyimyja'wiyi'ñ ku ja t'ijxy ja Jesús kyagøbujy yam ja kyaawya'andi, jade'en idø'øn ja tsinaa'yin'atti ka'ap ja nugo kyøbujti, yide'en ja tyikajpxti jøts ja' ja tyaniwa'ats'ajttip ku ja kyøbujti, jøts ja kyapøkpyatti. ³⁹ Yide'ents nwindson'ajtim ja tnimaay ku ja jade'en t'ijxy wyinmay:

—Jade'en mee fariseotøjk mjaa'y'aty, ja'ayi mee mjanchkamijotkup sudso ja texy ja tas nikijxyi nadyiyi wa'ats y'ett, jøts ka'ap ja xunk'atti pøni sadam ja yjøtpy. Ni xkaja'gyukidi kudam m'amp mjotp tum ja axøøkpi yigaappi xjamøøt'atti ku jaa'y nugo xwin'øøndi xwimaatsti. ⁴⁰ 'Nugo mee mdyimyø'øty! ¿Ka' xnijawidi ku tu'ugyi ja kojpi tø tyik'øyi ja m'anmija'windi jøts ja pikta'aky? ⁴¹ Jade'eñi Dios mgupøkiyidit ku amumjoojt mdsojkingøjxp xunk'attit ja pudøjkin. Jade'en ja m'anmija'win ja wa'ats'ajtin tpaattit.

⁴² 'Mjanch'ayøøy me fariseotøjkti! Køx kida'ak meets xjanchkugubatkiy jøts ka'ap ne'egi xpadu'unxidi midi ja Dios kyutujk jawaani ne'egi yjan'ane'empy, ku ja ttsøky ja øy tiidyu'unin, ja pa'ayo'ejxk, jøts ja janchja'win. Ya'atpi meets idø'øn ne'egi jawaani mjapaat'ajtip mbadu'ump.

⁴³ 'iMjanch'ayøøy mee fariseotøjk!i, ku mee tum jam mnachøkyidi mdsinaawya'andi tsaptøjk'okp windsønin. Jøts ku tuu'ajy, øy paat meets ja nagyajpxpoo'kxi xtsokti, myikwindsø'ogip myikwinjawip meets, ejxim meets jadi'iñi myikwinajxni.

⁴⁴ 'iMeets tsaach'ataayjaa'dyi, jøts m'ayøøy mee kajpxwejpitøjkmidi! Jade'en mee mnankyaxji'igyi sam ja oo'kpi kajuunin øy nikøjx kyaxji'iky jøts ka' nadyijyi tyikaxji'iky pøni sadam ja yjøtpy.

⁴⁵ Xjats ja kajpxwejpitøjk nidu'uk y'adsøøy jøts ja wyaañ:

—Windsøn, ku jade'en mwa'añ xuk'ayojip øøts yø nayide'en.

⁴⁶ Jøts ja Jesús yide'en y'adsøøy:

—iMjanch'ayøøy mee kajpxwejpitøjk nayide'endi!, ku ja kutujk xyik'øyidi kamaabyim, ka' meets ja kø'øm x'uktuni, ja pujx ja kajp meets ja mdukmidanaapy, kamadøym meets ja x'ukja'wiñi.

⁴⁷ 'iMjanch'ayøøy meets!, ku yam xjanch'ukyik'øyidi xyikpaadidi ja oo'kpi nipots pøn ja m'apteety yik'ooktøø, ja Dios kyugajpxy. ⁴⁸ Jade'en yø yikja'gyukiñi sam o ti pøn kajpxy'aty tyik'ity, kajpxy meets ja yjaw i xyik'ejtni møøt ja mdeety'apti ku ja tyik'oo'ktøø ja Dios kyugajpxy, jøts meets ixyam xyik'øyimi xyikpajtimyi ma ja ñaxøjkidøø. Md-saachpa'ayøøpy meets ja xijy jade'en.

⁴⁹ 'Paty tam idø'øn ja Dios kyajpxy wya'añ yide'en: “Ndanigaxp meets ngugajpxy møøt ngudanaabyidi, myik'ookpts meets ja winaagin; jøts pønts jaakjata'andip, myik'ayo'ombaattipts meets ja'.” ⁵⁰ Meets Dios ja mdagubatidip wine'enin ixa mnaxwii'ñitjaa'y'atti ku ja m'apteetyi tø tyik'ookti ja Dios kyugajpxy. Tuki'iyi ja tpayø'øgyøxt, jaayip ja tpayø'øbyinaxwa'akt kuuyip ja naxwii'ñit cho'ondaajky, ⁵¹ kuuyip ja Abel t'oo'k'awiyii'ñ jabaat ku ja Zacarías y'o'jky, ku jaa'y ja yik'o'jkøø jap tsaptøjkjøtpy ma ja altajr jap. Paty me ndukmadøy jøts ku Dios ja ttabayø'øty ja yamit naxwii'ñit jaa'y.

⁵² 'iMjanch'ayøøy mee kajpxwejpitøjk!i, ku x'ama'at'ajtidi ja Dios kyutujk; kø'ømyi meets ja mnadyamidsøkyi, ni xkabadumidits ja', jøts ni xkadukni ja'wimidits ja abikpyidi pøn ja tjanijawiwandip.

⁵³ Ku ja Jesús jade'en wyaañ, jøts ja kajpxwejpitøjk møøt ja fariseotøjk yjantym'ambøjktøø. Jantymyikmi'ambøjk ja Jesús jøts ja tanejkin'ampy tjantymyiktøwdi ñadyijyi tigati. ⁵⁴ Øyik idø'øn ja ti t'ukmado'odit, y'amaa'tsk'ejxwandipxi ja' jøts ja jatyi ttani'øønidit pøni ti ja kya'uk'ømyadoodip.

12

Ku ja Jesús tnigajpxi ja fariseotøjk kya'øwyyinmaa'ñ jøts yikjøpjawit

¹ Yikxon ja jaa'y yjantymñañimujkpajtidøø mil'ampy, nugo yjanch'adøtsnidi, xem yam yjanchnadyateeni. Jøts ja Jesús ja pyabøjkpitøjk tnimaabyinaxwa'jky:

—Øyim mnay'ejx'etidit ejxim yø fariseotøjk kya'øwyyinmaa'ñ mdawin'iñidi ti sa yø iiy wyani, jabi wa'atsts yø iiy ñadyijyi. ² Wants uk jade'en, ka'axi ma ti yu'uch'ity, kuwanixi ja øy juuni yjadyimyikpaaty; uk kuts o ti yjayik'amaa'tsk'aty, kuwanits ja yiknijawi. ³ Jade'en'ampy ja wa'ats nøjkx yiknijawi ti jaty mee mdumpy amaa'tsk, ti jaty mee mgayiknigaxji'kpy, adsu'jkyts ja y'uknigaxjø'knit sam o ti xinaxy wa'ats kyaxji'iky. O me ti amaa'tsk xjakajpxy, øy meets ja pøn xjagadukmadøy, wa'ats ja nøjkx yikajpxnaxy ejxim ti tøjxøjx yikajpxwa'kxyin jøts yiknijawit.

Ku ja Jesús tnigajpxy jøts ku ja tu'ugyi pøn yiktsø'ogip

⁴ Mee migu'uktøjkti pøn jaty ø xpabøjkp, meets idø'øn nnimaapy jøts kidi xtsø'ogidi ja yikjaa'y'oo'kpidi, pø ka'axi anmija'win ja tjadyimyik'ookti øy ja wyinaty tøjayik'øøky ja ñine'kx. ⁵ Ja'ats mee ndukmadoowampy jøts ku ja' xtsø'ogidit ja Dios pøn tyikutujkp jøts mnøjkxtit ayodaajkjøtpy yam meets ja o'jkin tøjxajixy. Ja'ats idø'øn mdsø'ogidip.

⁶ 'Ka' meets Dios m'ejxigøyi, ¿ti sa ja nimagoxkpi joon chobaaty jøts ja yiktagujuy majtsk ja puxmeeñ? ⁷ Machøbybaat meets mwaay ja myik'ejtniyi. Paty ka' mdsø'ogidit, ti sa ja mutsk jonuna'jk ja tkaja'dyigøy; mats meets ja ndejint mja'dyigøø'ñiyit.

Pøn jaty t'øñigajpxp t'øñimadyakp ja nwindson'ajtim Jesucristo jam mayjaa'y agujkp

⁸ Yikxon mee x'ukmado'ot, pøn ø xpukajpxip, pøn wamp mayjaa'yjøøjty jøts ku øts ja xpabiky, nayide'ents øts ja møk nnitanit jam Dios wyingujkp mā myay'ankilis ja jam møøt; ⁹ pønts ø xkabukajpxip, pøn wamp mayjaa'yjøøjty jøts ku øts ja ka' xpabiky, nayide'ents øts ja niwine'enin nga'ejxkapt, niwine'enin nganitanit jam Dios wyingujkp mā may'ankilis ja jam møøt.

¹⁰ 'Jaakyikmaa'kxtip ja ne'egi pøn ø tø xkaguidyimy'ødyejti, ja'ats nima niwindem ja kyayikmaa'kxtit pøni pøn tka'ømyigajpxtip ja Espiritu Santo.

¹¹ 'Kuts pøn myiknøjkxidit jam tsaptøjkjotp uk myikwaanøjkxtit mā kutujktaajk mā kudunk mā tiidyumbi, kidits meets ja xajotmay'oo'kni, kidi meets ja xkumayjawī sa d'ø'n jap mwa'andit, sa d'ø'n jap m'adso'odit, ¹² pø ja Espiritu Santoxi meets ja mda'awa'anīyip pøni sa d'ø'n jap mwa'andit, ja' meets jap myikajpxiyip ku tpaatt ja et ja xøøw juuni mgajpxtit.

Sa ja kumeeñ'ajtin xyikwinmaa'nmya'jtint

¹³ Xjats jam tu'uk wyaañ jam mayjaa'y agujkp jøts ja tnimaay ja Jesús:

—Windsøn, nimaajyk øts yø nmigu'uk jøts wan ø xmø'øya ja nmaay.

¹⁴ Jøts ja Jesús wyaañ:

—Yikxon me waani m'ukjaa'y'att. Ka'axi ø pøn tø xpikta'aky jøts meets ja mbikta'aky nyikwa'kxiyit, uk jøts øts jade'en ndu'unt samī kudungin.

¹⁵ Nayide'en ja wyaañ:

—Øyim x'ejxtit, nay'ejx'etidim jøts kidi o ti kayakyim x'ejxti, kaja'ajip jaa'y ja y'anmija'win tyajuky'ajtpy xemikøjxp ku pyikta'aky ja may'ampy tmøøt'aty.

¹⁶ Jøts ja yide'en tmadyakpaajty tu'uk ja ejxpajtin madya'aky midi ja kø'øm ñajtsja'wip jøts ja yiktamija'gyukit midi ja ñimadya'akwampy, jøts ja wyaañ:

—Jaa d'ø'n wyinaty tu'uk kumeeñ jaa'y jøts jantyimy'ejtp id'ø'n pyikta'aky ja jam kyamjotp. ¹⁷ Winets ja tniwinmaa'yiyi'ñ jøts ja wyaañ: “¿Ti sudso ndabyaatt, sudso øts yø nbikta'aky ndu'unt? Ka'ats øts n'abøjk'i'ñ mā øts yø nbøkjø'økt.” ¹⁸ Jøts ja yjaakwaañ: “Tø nniwinmayi sudso øts yø ndu'unt. Yø ndsa'jx tam ø nyikida'ap jøts ø nyik'øyt jawaani møjpi, japts øts ja nbikta'aky nbøkjø'køxt ti jaty øts ja nmøøt'ajtpy. ¹⁹ Winets ø kø'øm nnañ'ømxiyit: Ja tidsik winmaa'ñu'nk xijy mjadyimyjadsøjkpy jabi ixyats may pikta'aky midi kawinaak jumøjt m'ajot'atp; poo'kx pøk mets, kay uuk mets jotkujk xoni.”

²⁰ Yam ja wyinaty jade'en wyaañ jøts Dios ja ñimaajyøø: “Jaa'gyumo'tpi, ixyam koots inet m'ooknit; jøts midi jap tø xpøkj'i'iky, ¿pøn yø tja'atp?” ²¹ Jade'en id'ø'n jaa'y yjaty pøn ja pyikta'aky nugo tniøkpajtp jøts ja ya jotkujk ttuktanaxy ja et ja xøøw, ayoopts ja y'anmija'win ja yjaty jam Dios wyingujkp ja'agøjxp ku pyikta'aky ja ya kø'ømyi tø t'ajot'aty.

Ku ja Dios t'ejx'ity pøn jaty ja y'u'ngip y'una'jkip

²² Xjats ja Jesús oojknim tnimaay ja pyabøjkpitøjk:

—Yikxon ndukmadowdi: Kidi nugo xpamaydi xpadajti ja mgaajyk m'uujkikti, ti mnidsøønidip, ni ja mwet ni ja mnaamy mee xkaguma'aty ti mwet'attip. ²³ ¿Ti jade'en ja juky'ajtin yikpaaty sam ja kaaky jii'kxyin? Pø ka'axi. ¿Jøts ja wet ja naamy mibaat ja t'uk'amibaat nayide'en pøni sa d'ø'n ja ne'kx ja kojpk yikmøøt'aty? ²⁴ Ejxti yø jøøky, ka'axi yø ñe'epti kyojti, ka'axi pyikta'aky yi tyikpidø'økti, ka'axi pyikta'aky yø tpøkjø'økti jøts tpikta'aktit jap tsa'jxjotpy; øy yø jade'en yjagatundi, ja Diosts yø yikjujky'ajtidip. ¿Tits mee mdsow sa ja jiyujk jade'en ja yja' yikmo'odi! ²⁵ ¿Pøn kø'ømdsøky tyimy'uknankyojnip

jagujkp metrín øy ja mabaat jade'en tjadyimyjatsøky? ²⁶ Pøni ka'ats tam ja jade'en yjaty, ¿tigøjxpts ja yikmijotmay'ookt?

²⁷ Uk'ejxtim sa o ti pijy yøñ, ¿ti pee'tip kojtip yø'? Jøts tiy janch meets idø'øn nnøjmi jøts ku ja windsøn Salomón nijade'en kyanaxyojxøø sam yø pijyín, øy ja mabaat tjabiktakijxy ja xyox. ²⁸ Sats idø'øn ja Dios jade'en txøxy ja pijy midi jaty icyam o madsøo yondip øy ja jabom yjayiknitsaañit; kuts meets, ¿tiku meets idø'øn ja mgaxoxit? ¿Sudso meets ja xpamay xpadajy ti jaty mga'ejtxiyidip? ²⁹ Paty wingujk jotkujk mwidettit, kidi meets ja xkumayja'wiñi ma xpøktit ti mga'adyip m'uuktip. ³⁰ Jade'en naxwii'ñit jaa'y icyamdi pøn ja Dios yja' tkaja'gyukidip, ja' pyawidejtip tpamaydi tpadajti ja pikta'aky ti jaty chojktip; kuts meets, wa'ats meets Dios Teety mnijawiyidi ti jaty mga'ejtxidip. ³¹ Ne'egi kupøjkidits ja Dios chinaa'yin ja kyutujk midi ja tyanitanaapy yjaa'y, jade'ents meets ja mmo'ojidit ti jaty mga'ejtxidip.

Ja kunuu'kxy jujky'ajtin midi jap tsajpjøtpty

³² Kidits mdsø'øgidi, jade'en me n'ejx'ity sam pøn ja byorreegu'nk t'ixy; o meets idø'øn mganamayí, mdanitaniipts meets Dios Teety ja kyutujk, jade'en meets ja mdamidsoyki. ³³ Tookti pøni ti jaty jam mmøøt'ajttip jøts ja Dios jade'en'ampy xamiyoxtit ku xmo'odit pøn jam ti ka'ejtxidip pøn ayoodip; jade'en y'øpyidsø'ømt ku xpaattit ja jujky'ajtin midi jap tsajpjøtpty, midi ka'ap mwindigø'xyidip. ³⁴ Pøni ma xnajtsjawidi xpaatwa'andi ja jujky'ajtin, nay japtts meets ja mwinmaa'ñ y'ity.

Ku ja Jesús wyaañ ku jøp'ejx'ity n'ejtindit

³⁵ A'ejxi abaadi mnanky'etidit. ³⁶ Jade'en sam tumbi tjøp'ixy ja wyindsøn ku ja ñijkxy tø'øxñi'ukpi, jøts kuts ja wyimbett jøts ja jaty tyik'awaajtsit ja tøjkaaw ja'ayi ja yja'att, ja'ayi ja kyugajpxit. ³⁷ Nekim ja tumbidi pøn kajxa'aky pidsømdip ku ja wyindsøn ja pyaadyidi wijy kejy, ku ja kyama'adi kya'etti yam ja yja'aty; jøts tiy janch meets idø'øn nnøjmi, wan ja tka'uknagymayí kø'øm jøts ja tyik'ixa'akt ja tyumbitøj jøts ja ttukwinguwaadsit ja kaabyajt, wan ja tka'uktawindsø'øgi ja kaaky ja tojkk. ³⁸ Øy ja juuni yjaja'aty, yjaja'aty ja tsuu'm yjaja'aty ja jøpkyoos, kuts ja kyayikmaa'gyubaadidi ja'abi tumbits idø'øn nekim t'ejxtip. ³⁹ Ku o pøn pyikta'aky t'ejx'ity tyøjkjøtpty, ejtp ja tjøpja'wigyunaxy ja maa'tspi, ka'ap ja ñagyumaadigøyi pøni juuni dø'øn ja y'ukja'att. ⁴⁰ Nayide'ents meets idø'øn mjøp'ext ejtp; ku øts jade'en jotmøñ nme'ent yam ø ngayikumay, pøn ja naxwii'ñit jaa'y ja myøjkudanaabyi'ajtpy.

Ja tumbi pøn øy ejx'ejtp

⁴¹ Winets ja Pedro wyaañ jøts ja tyiktiiy:

—Windsøn'ajtim, ¿øøts yø dø'øn yø jade'en xamimadyakp, uk niduki'iyi dø'øn xnøjmi?

⁴² Jøts ja windsøn'ajtim wyaañ:

—Ja tumbi pøn yiktump ku ja myadøy ku ja yja'gyuki, ja'ats ja wyindsøn tanipøjkip pøn jaty ja jap tyøjkjøtpty jøts ja tyika'aty sa pyaat'atyin. ⁴³ Nekimts ja'adi pøn jade'en tpadundip ti jaty ja wyindsøn ja tø tyanipikyidi. Øy ja juuni yja'aty, ixapts ja jade'en ttayø'øbyety, ixap ja jade'en tyundi. ⁴⁴ Ndyimñajtsja'wip øts jøts ku ja wyindsøn ja pyikta'agit jøts ja tyuk'ejx'etit tuki'iyi pøni ti jaty ja jam yjagyejpy. ⁴⁵ Pønts tkajøp'ejxp ja wyindsøn, pøn jade'en winmaapy, jekñim ja tijy yja'att, ku ja yiktaminikaagi ja myøøtumbi jøts ja jaty øy sagasa ttuñ ja myøøtumbi, ja yaa'y ja tø'øxy, ja'ayi ja chøøñ ja wyindsøn nekim ja winet kyay y'uuky, jøts ja myuktigøøñi, ⁴⁶ kuts ja wyindsøn wyimbity øy juuni yam ja ka' tjøp'ixy yam ja niwine'enin tkagumay; ixjadam ja yja'aty jøts ja tyagubetyi ja agøjxp ku kya'øy'aty, ¿ma dø'øn ja yiktumbi jade'en?

⁴⁷ Pønts wa'ats tjanija'wip sa dø'øn ja wyindsøn tjatsøky jøts ja nika' tjøp'ixy jøts ja nika' tmimadøy pøni sa ja yjawa'añ, yikxonts ja nøjkk yiktagubety, yikxon ja yjantyimyikwojpmatst. ⁴⁸ Pønts tkidyimñija'wip pøni sa tam idø'øn ja wyindsøn ja tjatsøky, jøts ja ka'ap tjøp'ixy jøts ja ka'ap tmimadøy, ñiwyaanits ja ne'egi yiktagubatt, ka'ap ja ne'egi

jadine'en yikwopt. Ti sa o ti jade'en pøn o ti may yikmøøpy, nayide'ents ja yik'amido'oxit may'ampy; pønsts o ti yiktami'ajot'ajtíp, jinaxyts ja yikxon yiktabayø'ty.

Jesús køjxp jaa'y ñawya'kxyidi

⁴⁹ Ja tidiyu'unin øts ya tø nmimiñ naxwiiñ; janch tyimjyawamp øts idø'on jøts ja jeexyíp yam nyiktunkpatni! ⁵⁰ Nnija'wíp øts ku ndanaxt ja møj ayo'on, indajot-may'oo'kunaxp øts ja jaanim kunim øts ja wyinaty tø ndanaxy! ⁵¹ Sa mee m'ukwinmay, ¿øy'ajtín xondaajkin ti øts yjawi tø ndanimiñ naxwii'ñit jaa'y? Nømp øts jøts ku ka', nanñawya'kxíp øts jaa'dyi. ⁵² Yamnim inet tø cho'onda'aky, nøjkxp naxpts idø'on jade'en tukmigu'uk xyiktseptá'aktit øy ja tu'ugy; yjatsøñidi, nideety nidaakti, ni'u'nk ni'una'jkti. Pøn nimagoxkti, nawya'kxidipts ja', jøts ja ñayjibøkidit jagam ixkø'øm namajtsk jaty nidigøøk jaty. ⁵³ Øts køjxp ja kawin'ijxyim ñayjawiyidit ja u'nkteety ja u'nktaakti møøt ja y'u'nk y'una'jkti, ja yaa'y ja tø'øxy, tum jade'en y'adø'øtstit ja tsu' ja xa'kxy, ja u'nk ja mø'jt.

Ja ejxa'an sudso yiknijawit jøts ku wyinaty tø tmibaat'aty jøts kyøxt ja naxwii'ñit

⁵⁴ Ñayi ñimaamyøø ja Jesús ja mayjaa'y:

—Ku x'ejxti ja yaak pyidi'iky ma xøøw yjexy winets mnømdi, tu'up tam inet, janchjajpts idø'on ja jade'en. ⁵⁵ O kuts ja poj wimbet'ampy yø'øy ku kyaxuxpyøjy, jats mnømdi, janch'anwamp tam, janch tøødipts idø'on ja m'ayuujk, janchjajtpxi dø'on ja jade'en. ⁵⁶ ¡Mee win'øø'mbidi! Pøni mnija'widip tam sa kyaxi'iky ja et ja tsajp ku ti tyunwa'añi, ¿tikuts nayide'en xkanijawidi pøni ti dø'on tunwajnip ya'atpi xøøw ya'atpi jumøjt ku ja møk'ajtín wyingaxi'iky jøts ja øy sagasa mjayiktuk'ejxti?

Kajpx'øyidi jøts mnamyijotjimbetidit møøt ja mmidsep

⁵⁷ ¿Tiku yikxon xkawinmagyukidi pøni sa dø'on chøkyi, pøni sa dø'on pyaat'aty? ⁵⁸ Ku pøn mni'øøniwya'añidi jøts ja myiknøjkxwa'añidi jam kudunk wyindum, namga'anin jam myiknijkxyidi tiku yikxon xkakajpx'øyidi jøts ja møøt mnamyijotjimbetit jadigojk, jøts kidi myiknijkxyidi jam tidiyumbi wyindum; ¿ja ti nø'ømp ja windsøn jam? Pø mgøyakidipxi ja jam jøts mee myikøyakt ma ja tajk ma ja mayojr jamdi, ja'ats mee myikpuxøktøkiyip jøts mee myiktsu'umt. ⁵⁹ Øts idø'on wamp jøts ku jaanim mbidsø'ømdit ku wyinaty tø ja multa xkubatkoxti.

13

Yajkpy øy'ajtín ja' ku ja tsinaa'yin tyigach

¹ Nayi winet et idø'on ja Jesús jam ñimejnøø wingaagin ja jaa'dyi jøts ja ojs tyamimadya'agyí ku ja Pilato wyinaty tø tyik'øøky ja Galileit jaa'y, jøts ku ja jaa'ñi'jpy ja ttukmiyø'øyiyi'ñ ja jiyujkni'jpy midi ja wyinaty kø'øm tø t'ukyik'ookti midi ja wyinaty kø'øm tø tyoxti. ² Jøts ja Jesús wyaañ:

—Jade'en mee mwinmay jøts ja' ja Galileit jaa'y kyujajtidip jade'en ku ja yjantyim-byøkyundi sam jam jade'en ka' pøn jam y'etjotpti kyajpjotpti. ³ Øts wamp jøts ku ka'; ti pøn idø'on ka'ookp, nayide'en mee m'ookt pøni ka' mdsinaa'yin xyiktigatsti. ⁴ Jade'en meets yjawi mwinmaañi, ja jaa'y pøn oo'ktøø nimaktuktujk ku ja pøch ja pyajtidøø midi wyinaty janch køjxp tanaapy midi yiktejp Siloé, jade'ents meets yjawi mwinmay jøts ja' ja kyubajtip ku ja jawaani pøky tyaja'adyidi sam ka' pøn pøn jaty jam Jerusalén tsinaadyip. ⁵ Nømpsts øts ku ka'; nayide'en mee m'oo'køxt sam ja'ajindi pøni ka' mdsinaa'yindi xyiktigatsti.

Ku ja Jesús tmadyakpaaty ja iigi kipy midi' katøømip

⁶ Xjats ja Jesús ttamadyakpaajty tu'uk ja ejxpajtin madya'aky jøts ja wyaañ:

—Tu'uk idø'on jaa'y, jamts ja y'iigi tsa'am kam ja', ja'ats ja y'ats'ijxpy pøni tø dø'on ja wyinaty tyøømi, jøts ja ni tu'ugin tkapaajtøø ja tyøøm. ⁷ Jamts idø'on tyumbi tu'uk pøn

ja kam t'ejx'ejtp jøts ja tnimaay: “Ukmadowim, tigøøk jumøjt øts icyam kujk njamiyø'øy jøts øts ja iigi tsa'am njatukwa'añ, nijuunits ø ni tu'uk ngapaatynim. Yikidaagøjxnits yø ñiguipy; nugots ja naajx yø yjawi tyikwindujkni.” ⁸ Jøts ja kam ejx'ejtpi y'adsøøy jøts ja wyaañ: “Wanimts, windsøn, tjaak'uk'ity jadukjumøjt; n'ukuyu'up øts, n'uktajyuu'ngip øts yø naajx jøts øts ja pu'uty nbiktaajkit. ⁹ Kidi wan jade'en tyøømi; pøni ka'ats, winets yikpo'jtjø'økt.”

Ku ja Jesús tyikmøpkiky tu'uk ja tø'øxyøjk poo'kxin xøøw et

¹⁰ Jøts idø'øn ngøjmyi, poo'kxin xøøw wyinaty, jøts ja Jesús yik'ixpiky jam tsaptøjkjotp. ¹¹ Jamts idø'øn tu'uk tø'øxyøjk myaktuktujk jumøjtíp pa'am ja wyinaty tø pyaajtniyi. Jøts ja jadine'en kyatsø'øky, tø ja yjigujkidyigøøñi, miku' idø'øn ja wyinaty jade'en tø tyuñi jøts ja niwine'enin kya'ukoogukini. ¹² Ku Jesús ja y'ejxi, winets ja yaajxiyi, xjats ja ñimaajyøø:

—Tø mba'am mniwaajtsniyi, møk møjaawni mets.

¹³ Jøts ja ojts tkønixajy, jøts ja tø'øxyøjk nay jaty kyoogukiyi'ñ jøts ja tiy tyaañ jadigojk, winets ja ttukmija'wiyi'ñ ttukunuu'kxyja'wiyi'ñ ja Dios. ¹⁴ Jøts ja møjaa'y midi tnigubajk'ajtp ja tsaptøjk tjantyami'ambijky ja Jesús, tigøjxp ku ja yiktsø'øky poo'kxin xøøw, jøts myigu'uk ja tnimaay:

—Paty tu'unin xøøw jaa tudujk xøøw tø yikpikta'aky jøts jaa ndu'unindit; mendits øy juuni nugo ku kyapoo'kxinxøøwi, jade'en mme'endit pøn jaty ja nancho'ogi ttsojktíp.

¹⁵ Jøts nwindson'ajtim yide'en t'adsøøy:

—Mee win'øø'mbidi, ¿m'ukyik'ijtpy meets mjiyujk mdsakaa miwø'ømbety, jøts adøødsi xyik'etti ku pyoo'kxinxøøwi? ¿Ti kidi meets ja xyikwinaky jøts meets nøø ja xaniwøpy?

¹⁶ Tits ya'at tø'øxyøjk kyubatp ku yø kyatso'økt ku poo'kxin xøøw, pø Abrahamts yø tyeety'apip jøts ja miku' yø myaktuktujk jumøjtíp yikpa'ambajtniyi, ¿sudso'ampyts yø kyamøkpøkt øy yjapoo'kxinxøøwi?

¹⁷ Ku ja Jesús jade'en wyaañ, jøts ja myidsep chø'dyunbattøø; jøts ja mayjaa'y tyax-ondaktíp ja' ku ja t'ejxti jade'en ja Jesús myøk'ajtin tyikwingaxi'iky.

Ku ja Jesús tmadyakpaaty ja mortas tømt

¹⁸ Yide'ents ja wyaañ:

—¿Tixik ja y'ukyiktami'ejxip ja Dios Teety kyutujk midi ja tyanitanaapy yjaa'y? ¿Tixik jade'en? ¹⁹ Jade'en idø'øn n'ukpiktaajkin ja' sa møj mortas tømt midi ja jaa'y wyøjpy kyamjøtpy, kuts ja myuxy jøts ja jade'en yøñ sam o ti møj kipy yøñ paxax paxax, jamts ja joon kyøxke'eky jøts tyik'øyiibaat pya'an ja jam ma jaty y'awaj y'axeeñ ja jam.

Ku ja Jesús tmadyakpaaty ja levaduri

²⁰ Nayinøøm ja Jesús:

—Tixik øts jadu'uk n'uktami'ejxip ja Dios kyutujk midi ja tyanitanaapy yjaa'y. ²¹ Jade'en idø'øn ndejint sa ja levaduri midi yiktamimøø'kxip ja ariin way jøts ja amuum tyakaagiyit, jøts ja jich yaakt.

Ja mutsk tøjk'aaw

²² Xjats ja Jesús ñajxy jøts ja jam ojts ñijkxy Jerusalén, yik'ixpøjkp yik'ixpøjkp idø'øn ja', pøni ma jaty kajp ja tpaaty ja møj ja mutsk. ²³ Winets ja jaa'y ja tu'uk yiktøøjøø:

—Windsøn'ajtim, ¿janch niwaani dø'øn ja jaa'y ñitso'ok'att?

Jøts ja Jesús ja t'adsøøy:

²⁴ —Janch jade'en jaa ku jap ka' pøn nugo ajawi ñaxti, øyimts x'ejxtit ma mdøkidit, jade'en ja n'ukpiktaajkin sam jaa'y ttaxy mutsk tøjk'aaw; øy jap pøn yja'uktøkiwyanidi, ka'ats ja y'uknajxnidit. ²⁵ Kuts ø ndanaagyukit, jade'en ø ndanaagyukit sam kudøjk tyanaagyukin jøts tyøjk'aaw ja t'atsyik'aduky. Pøni tøts meets jap wyinaty mdandi tøjkwimpy, mjagugajpxidi mjatøjkwingoxti meets jap, uk mjanømdi

meets jap: “Windsøn'ajtim, yiktøjkik øøts.” Jade'ents mee nnøjmit sa ja kudøjk wya'añin: “Ka' mee nnijawī pø mbøn meets, pø mā mee mdsøñ.”²⁶ Jats mee mwīnambīnaxwā'akt: “Tiku me ndejint øøts xka'ijxyi, jabi tøts adøm ngaamyujkin n'uukmujkin, jabi mets ojts o madsoo myik'ixpiky.”²⁷ Yide'ents mee n'adso'ot: “Tø nwa'añ jøts ku mee ka' nnijawī pøni mbøn meets. Jiwa'akti ya, kidi øts ya xwīn'ejxti, ¿pønxik ø x'abajxtip, kidi meedsip?”²⁸ Japts mjø'ødit mya'axtit, m'amdøtskaattit mdaachtøtskaattit ku x'ejxtit ja Abraham, ja Isaac, ja Jacob jøts ku ja jap ne'egi møøt niduki'iyi ja Dios kyugajpxy y'etti, mā Dios kyutujktaajk mā yjā'y ja ttanitani kyutujk. Ka'ats meets jap jade'en mdøkit.²⁹ Yø'omyujkøxtip naxwīi'ñit jaa'dyi, o madsoo choondit, jøts ja tpaajtidit ja Dios myøjkunuu'kxin midi nīpøn kyapatpynim, midi ja tya'awijxpy ja yjā'y.³⁰ Pøn yam yik'ejxtip ka'ejxiyimdi, pyadundipts ja ne'egi sa nwa'añ, ja'ats idø'n ne'egi nøjkx yikmøjpiktaktip, pønts ñadyijyi ixyam møj nija'wībīndi jøts ja ka' tpadundi sa nwa'añ, ja'ats idø'n yik'ayowim jattip.

Ku ja Jesús t'ayo'ijxy ja Jerusaléngit kajp

³¹ Jøts ja fariseotøjk nay ja'abi xøøw yjajtøø mā dø'n ja jam wyīnaty jøts ja ñīmaajyøø: —Jade'en ne'egi tyim'yoy'att ku mnøjkxnit, myik'ookwajnipts ja Herodes.

³² Jøts ja t'adsøøy:

—Nøjkx x'atsnøjmidi ja tsaach wyax'atøøy jøts ku yamyi jabomyi wixøjkpyi njaakajpxpidsimy ja miku', njaakyiktsø'øky ja jaa'y jøtsnim ø n'abaadit.³³ Nøjkxpimts øts jam Jerusalén, tuu'døjkip ø tsojk, ti mā Dios kyugajpxy abikyajp y'uk'øøky.

³⁴ 'iMets Jerusaléngit kajp, meets Jerusaléngit jaa'y, pø meetsxi myik'øø'kpy Dios kyugajpxy, meetsxi mnankya'jtsip pøn Dios kajpxy y'ayuujk tyikyø'øyip ku Dios ja ya mjadaniguexyidi! iTø njapeemukwā'añ njakonmukwā'añ ja m'u'nk ja m'una'jk sam tsikuna'jk tyaak ñīmu'uxyī tu'ugyi, ka'ats jade'en tø xkupiky!³⁵ Ejxtits inet ja mdsaptøjk abak tyandi; øts idø'n wamp jøts ku meets xka'uk'ejxnit tsojk jøts ku meets jaanim x'ext pøni juuni ja xøøw ja jumøjt wyīnaty yja'aty ku mnø'ømdit: “Ejxik Dios kyunuu'kx u'nk ñadyaguguexyi midi mmimejnīp ja kyutujk.”

14

Ku ja Jesús tyikmøkpiky ja jaa'y pøn wyīnaty kexp

¹ Xjats idø'n yide'en yjajty ku poo'kxin xøøw tpaajty, ojts ja Jesús kaabyi ñījkxy jam windsøn tyøjkwīndum pøn ja fariseotøjk wyīndsøn'ajtip. Jamts idø'n ja'adi ja ti mā ja y'etti, jam ja tpa'ejxti tpagowdi.² Jamts wyīnaty tu'uk jaa'myi pøn ke'expa'am pøjkīp.

³ Jøts ja Jesús tnīmaay ja kajpxwejpitøjkti møøt ja fariseotøjkti, yide'en ja tyiktiyi:

—¿Kutuky jøts ja pamaay cho'okt poo'kxin xøøw u ka'?

⁴ Jøts ka'ap ja y'adsowdi, amøñi ja y'etti. Winets ja tnixajiyiñ ja pamaay jøts ja tyiktsøøjky, yide'en ja tnīmaay jøts ku ja ñøjkxnit.⁵ Winets ja tnīmaay ja fariseotøjkti:

—¿Pøn yjiyujk chakaa jatyī tka'ukyikpīdsømp ku ja ja'jōtpty kyunaxy øy yjapoo'kxinxøøwi?

⁶ Nika' idø'n y'adsojimbetti, nisā ja kyawā'andi.

Ja tø'øxñigaabyi tø'øxñi'ukpidi

⁷ Jamts idø'n ja Jesús t'ijxy ja mīgaabyīdi jøts ku ja twī'ejxti ja chīnaabyajti ku ja twīnguwaadsīdi ja kaabyajt jam, jam ja y'ixa'akti mā dø'n ja myøjtøkidit jøts ja ojts t'ane'emy:

⁸ —Ku pøn mwawīdit tø'øxñigaabyi tø'øxñi'ukpi, kidi jam jatyī m'ixa'akti mā ja tsīnaabyajt jam ja windsøn tø yiktanībiktaagi, jaa ku ja wyīnaty yja'aty yam meets jam tø m'ixajkni;⁹ jøts ja kujøøn kudøjk mnøø'mxiyīdit pøn wyīnaty tø mwayīdi: “Tani me waani, wan ya'at jam tsøøni.” Xjats kuwani mjanchjajīwā'aktit tsø'ødyumbim jøts jam m'ixa'aktit mā o pøn y'ixa'akti.¹⁰ Ku pøn jade'en mwawīdit, ne'egi øyts ku m'ixa'aktit

ma o pøn y'ixa'akti; kò'òmnimts ja kujøøn kudøjk ja mdukmadowidit ku ja jam wingon mye'ent, jøts ja mnøø'mxidit: “Ya, migu'uk, nax mdsøønididi ma jam yik'ayowim tø mdyimy'ixaknididi.” Jade'ents meets ja xajotkujk'attit ne'egi ku jade'en kò'øm myiktukmado'odit, yam ja jam chøønididi pøn jaty ja kaabyajt tø twinguwaadsidi. ¹¹ Pøn kò'øm namyøjpiktaajkip, yik'amutskpiktakpts ja nøjkx, pønts kanamyøjpiktaajkidip pøn ka'ejxiyimdi, ja'ats ne'egi møjtøkidip, ja' yikmøjpikta'aktip.

¹² Ñayi ñimaay ja jaa'y ja' pøn ja wyinaty kaabyi tø wyayi:

—Ku pøn xyikaawya'ant, kidi ja'ayi nugo xway pøn jaty møøt mnamyayiyi, ni ja mmigu'uktøjk xkawa'at, ni ja kumeeñ jaa'y xkawa'at pøn jaty jam mmigujøøn'ajtpy mmigudøjk'ajtpy. Ka'ap ja'ayi xwa'at pøn jaty myiwimbejtxiyip pøni ti jaty mets myajkpy. ¹³ Ja ne'egi mwa'ap ja ayoobi jaa'y, ku ti xøøw xu'unt, waw ja' pøn kati'ejtxidip, pøn kyø' tyeky ma'atti, uk y'ejxidi sagasa, pømbi tyeky ka'ejtp, pømbi jam winap. ¹⁴ Ne'egi nekimts jade'en mnayjawiyit, pø ka'axi ja mdunwimbejtxiyi nayide'en pøni ti mets ja tø xmø'øy, jaanimts ja xwin'ext sa ja mwingaxøjkxiyit ku jadigojk jujky'ajtpi pyidsø'ømdit pøn jaty tø tpadundi pøni sa jaty pyaat'aty.

Ku ja Jesús tmadyakpaajty ja møj a'ux

¹⁵ Xjats nidu'ugin ja fariseotøjk wyaañ pøn jam wyinaty tø twinguwaadsidi ja kaabyajt, jøts ja tnimaay ja Jesús:

—Nekim xøñim ja'adi pøn ka'adyip jade'en ku Dios ja kyutujk ttanitanit ja yjaa'y.

¹⁶ Ja'ats ja Jesús tnimaay:

—Tu'uk idø'øn jaa'y t'a'ejxiyiiñ ja a'ux møj'ampy, tøts ja wyinaty ttukmadøy ja mayjaa'y pøn jaty idø'øn ja wyaawampy. ¹⁷ Kuts ja a'ux'laats tpaajty, xjats ja tkejxy tyumbi jøts ja t'atstukmadoowa'añ pøn jaty idø'øn ja wyaawampy jøts ja t'atsnøjmit: “Jamstik, jamik tuki'iyi a'ejxi abaadi y'ejtni.” ¹⁸ Jøts ja tum jade'en ñañikajpxu'udyidi jøts ku ja ka' ñøjkxtit, yide'en ja yjawyeembi wyaañ: “Naajx ø tø njuy, ja'ats ø n'ats'ejxwampy, mee mjanch'ukmaa'kxp.” ¹⁹ Jøts jadu'uk yide'en wyaamaa: “Ndsakaa ø magoxk yuundi tø njuy, ja'ats ø n'ejxmatswampy pøni yuup idø'øn uk ka'; mjanch'ukmaa'kxp inet idø'øn, ka' øts inet ndsoont.” ²⁰ Jøts jadu'uk wyamøø: “Tyimyjemy'amajtskipnim øts, patyts øts inet ka' nmajada'akt jøts øts inet ka' nnøjkxt.” ²¹ Kuts ja tumbi wyimbijty jøts ja ttukmadøøy ja wyindsøn sa jaty ja wyinaty tø yiknøjmi. Jøts ja windsøn yjanty-imy'ambijky jøts ja tnimaay ja tyumbi: “Tsojk nøjkx nøø'ajy tuu'ajy wine'en yø kajpjojt, jøts xwaame'ent ja ayoobi jaa'dyi møøt ja'adi pøn sagasa ejxidip, pøn kyø' tyeky ma'atti, pøn winapti.” ²² Jøts ja tumbi yjatso'ongojmi jøts ku wyimbijty jøts tnimaay ja wyindsøn: “Tø øts windsøn idø'øn jade'en nduñ sa tø mwa'añin, jaakwindamppts ja tsinaadyaajk ja poo'kxaajk.” ²³ Winets ja windsøn ja tyumbi tnimaay: “Nøjkx tuu' xkuyø'øy ma jaty paduu' ma jaty ti, jøts pøn jaty mbatpy møk'ampyts ja xwaame'ent jøts ya xkuwawit, ujts øts yø ndøjkjoojt n'ejxwa'añ. ²⁴ Tyimñømp øts ixyam, kawindem xøøw øts ja xja'gyajpidi ja n'a'ux pøn jaty øts ja jawyeen tø njadanaway.”

Tuki'iyi nnadyamiyoxant ku Cristo nbadu'unint

²⁵ May jaa'y ja Jesús o madsoo padso'onip jøts ja pyawidityiyi; jøts ja tuk'ojk tniwa'k'awidijty jøts ja tnimaay:

²⁶ —Pøn jaty øts ya xpawidejtip, pøni jaa pøngapøn, pøn tpa'ayoodip tyety tyaak, y'u'nk ñidø'øxy, chø' y'uch, myigu'uktøjk, uk kò'øm paat ñabya'ayøyi, ka'ats øts ja mibaat nbabøjkpi'att. ²⁷ Kaja'ajip ø nbabøjkpi'ajtpy pøn ja ayo'on tkamidanaadyip pøn ø xk-abaduujnidip ja nja', xjapawidetwandipts øts, ka'ats øts yjade'embi jaa'y nbabøjkpi'aty. ²⁸ Ti ka' meets ja jawyeen xanipaaty, ku pøn pøch køjxp t'ukyikpidø'økwa'añ pøni ti jaty idø'øn tsojkip jøts ja y'abaadit pøni wine'enin ja chøkyi ja gasti, jawyeents ja yiktanipatkixy. ²⁹ Kuts nugo ja pøchkøjkpyidø'økixy jøts ja nika' y'abaadi, janch nigajpxy nimadya'akts ja yjaty ku ja jade'en pøn t'ixy, ³⁰ jøts ja wya'andi: “Tø yø jaa'y y'ukpojtsøøñ

jøts yø nika' tø t'ukyik'abajtiñi.” ³¹ Uk kuts o pøn windsøn tsep t'uktunwa'añ møøt jadu'uk ja myiwindsøn midi ja syoldadi ja tyikmemp ni'ee'px mil, ¿ti kidits ja jawyeen ttanibiktaagit pøni sudso dø'øn ja ttukwa'ktso'ot pøni ja'ayi tam ja syoldadi tmøøt'aty nimajk mil? ³² Pøni ka'ats ñay'a'ejxiyi, jøts ku jagamnim ja myidsep myiñ, kyaxpts ja tu'uk ja kyugajpxy jøts ja t'amido'ot jøts ka' cheptu'undit. ³³ Nayide'ents meets pøni ka'ap jawyeen xpawinmaadyi pøni ti jaty idø'øn m'ixmatstip øts køjxp, ka'ap meets jade'en mibaat nbabøjkpi'att.

Sa kaan amuum tyik'øyigyjxy

³⁴ 'Kaan amuum tyik'øyigyjxy o ti, nayide'en meets idø'øn ndejint m'ødyu'unt ku mmigu'uk xukmado'ot ja Dios yja' sudso y'anmija'win kyawindigø'ødyit. Kuts ka'ap jade'en mdu'undit, tø wyinaty mbidsømdi ejxim ja kaanin midi kawa'ats midi katump. ³⁵ Nima ja jade'en kyatu'unt ok naajx ok ti tyiktu'unt, ja ti nøø'mimp ok idø'øn ja nda'abu'jta'ant, pø nugoxi ja jadi'iñi ñiyik'ixkø'øy. Ja'gyukidi pøni mja'gyukiwyandip.

15

Ku ja Jesús tmadyakpaajty tu'uk ja borreegi midi' tigøøpy

¹ Nimejnip idø'øn ja Jesús jam ja yikugubajtpitøjkti, ja jaa'dyi pøn amuum tyimyiktejtíp pøkyumbi jaa'dyi, jøts ja jam myendi amidodujkpi, ² patyts ja fariseotøjkti møøt ja kajpxwejpitøjkti tjanchpagajpxti ja Jesús, jøts ja wya'andi:

—Tum ka'øy jaa'y yø kyupijkpy jøts yø jotkujk tmøøtkay tmøøt'uuky.

³ Ja'agøjxpts ja Jesús ttamadyakpaajty tu'uk ja ejxpajtin madya'aky midi yide'en wamp:

⁴ —Ku meets wyinaty x'ukyiktigøy tu'ugin ja mborreek midi nimagø'pxy, ¿ti kidi meets ja ñimakta'pxy myaktaxujkpi borreek jam xyikta'ant jam pejyotp, jøts ja tyu'ukpi x'ats'ixa'adit kunim meets ja xpaatt? ⁵ ¿Jøts kidi meets ja xaxonda'akt ku meets ja xpaatt? ¿Ti kidi meets ja xkøxkapt mguejnkyøjxp? ¿Pøn kidi jade'en xyonda'aky ku ja nbaajtin jadigojk midi tø y'uk'atstigøy? ⁶ Kuts jam mdøjkjotp mja'atti, ti kidi meets ja mmigu'uktøjk, ti kidi meets ja mgudøjk ja xukmadøy, jøts ti kidi meets ja xnøjmi: “Xonda'akti meets, tøts øts ja nborreek nbaaty midi tø y'atstigøy.” ⁷ Janch øts idø'øn nwa'añ jøts ku nayide'en yiktaxonda'aky jap tsajpjøtpy ja pojkpitumbi jaa'y ku ja tyiktigach ja chinaa'yin, jøts ja' ne'egi yiktaxonda'kp midi tu'uk jøts nigidi ja myakta'pxy myaktaxujkpi jaa'dyi pøn chinaa'yin tø tyiktigatsnidi, ñadyijyi øy ñayjawiyidi.

Ku ja Jesús tmadyakpaajty ja meen midi' tigøøpy

⁸ ¿Uk pøn tøøxyøjkts myeen tka'uk'ixaapy ku ja tyiktigøy tu'ugin yam ja majk t'ukmøøt'aty? Kuwanits ja tyiktøøbyiky ja yjaj jøts ja pyøknaxy yja'axnaxy jap tyøjkjøtpy, yikxonts ja tyimy'ixaadyøki jøts kunim ja tyimbyaatt. ⁹ Kuts ja tpaaty, jøts myigujøøn myigudøjk jøts myigu'uktøjk ja ttukmadøy, yide'en ja tnøjmi: “Tø øts ja nmeen nbaaty midi tø y'atstigøy.” ¹⁰ Janch øts idø'øn nwa'añ jøts ku Dios møøt y'ankilis ttaxonda'aktit ja pojkpitumbi jaa'y pøn tyiktigajtsp ja chinaa'yin.

Ku ja Jesús tmadyakpaajty ja jaa'y y'u'nk pøn tyik'o'jkøjxp ja tyeety myeen

¹¹ Nayide'en ja Jesús wyaañ:

—Tu'uk idø'øn jaa'y, namajtsk myajnkun'k, ¹² jøts ja mutskpi ja ñimaajyøø: “Teety, møøñik øts ja pikta'aky midi øts idø'øn nmaay'atp.” Winets ja u'nkteety ja ojts tyikwa'kxy ja pyikta'aky jøts ja ttagumaay ja y'una'jk. ¹³ Ñiñamnim idø'øn ja wyinaty jade'en yjaty ku ja myutskmajnk tpoøkmujkni t'ejxmujkni ja pyikta'aky tuki'iyi jøts ja ojts ttoo'kni, jøts ja ojts abikyajp abikñaajx tminijkxy jam jagam, jamts ja ojts tyik'o'jkixy ja myeen kyawindiy'ajtingøjxp. ¹⁴ Kuts ja wyinaty tuki'iyi tø tyikøjxni, jøts ja yuu jam winet et yjantyimdyøjkijyiñ mā dø'øn ja naajx ja kajp jam, jøts ja y'ayodøjkiñaa. ¹⁵ Winets ja

t'ixaay tunk mā ja kugajp jaa'y jam, jøts ja ojts kyexyi kyamjōtpy kuch'ejxpi. ¹⁶ Janch tsojk jøø'kxkixyim ja t'eixi ja kuch yji'kxy, kumi niti ja kyayikmø'ø. ¹⁷ Jøts jotmay ja ty-atøjkijøø, yide'en ja ojts ñawynmaa'nxiyi: “Janch ku'uxyi ndeety tyumbi net jam kyaydi yjøø'kxti, yikwindandip paat ja o ti, jøts øts ya yuu njanch'oo'kni! ¹⁸ Tiku øts ndeety nga'awimbeti mā ja jam chøøni, jøts øts ja jam nnøjmit: Tø teety Dios nmidundigø; jøts mets, tø me nayide'en nmidundigø; ¹⁹ ka'u'nk'atym ø tø njantyimyjaty; yiktunkts ø nayide'en sam o pøn tumbi xyiktuñin.” ²⁰ Jøts idø'on ja yjanchtuu'døjkijyñ jøts ja wyimbijty jam tyeety wyindum.

Jøts kuts tyeety ja jagamyi y'ejxpajttøø, xjats ja ojts y'am'ijxyi chaach'ijxyi. Jøts ja ñibujtj'jkøø jøts ja ojts pyatsøyi, jigøxy jibi'kxy ja yja'jty. ²¹ Winets ja tnimaay ja tyeety: “Teety, tø øts Dios nmidundigøy møk'ampy, jøts nayide'en me tø nmidundigø; ka'u'nk'atym ø nnayjawiyi.” ²² Jøts ja u'nkteety tnimaay ja tyumbitøjk: “Tsojk nøjkx xjuutti ja øybi wet jøts xuktatøkidit, piktaajkidi kyøjeets, tuktawa'agidi kyø'øk. ²³ Nøjkx x'atswetsti ja tsakaa midi yaa'kpidsømpnim jøts xyik'ookit. jWan txøduu'ñindi, wan tkaa'yint t'uujkyindi! ²⁴ Tø øts yø n'u'nk ndijy tyimy'oo'kni, ixyats jujky xwindanaa'yindi; tø jeky y'atstigø'yity, ixyats jadigojk tø nbaajtyindi.” Jøts ja xyødundøjkidøø.

²⁵ Jøts ja myøjmajnk jam wyinaty wyidity kamjotp; kuts ja wyimbijty, yja'jty wingon mā ja tøjck jam, jøts ja tmadøø ja iy ja ech. ²⁶ Winets ja tu'uk tyaaixiyñ ja tumbi jøts ja ttiibyijky ti dø'on jam jade'en tuujnip. ²⁷ Jøts ja tyukmadoojøø, yide'en ja ñimaajyøø: “Tøts ja m'uch yja'aty; tøts mdeety ja tsakaa tñankyik'øgyiyi midi y'ity yaa'kpety, ja'agøjxp ku møk mōjaaw tø yja'aty ja m'uch.” ²⁸ Jøts ja myøjpi yjantyimy'ambijky, jøts ka'ap ja twa'añ jøts ja jap tyøkit, tyeetynim ja ojts kø'øm ñibidsimyi jøts ja møk ñimaajyøø jøts tyøkit tøjckjotpy. ²⁹ Xjats tyeety ja tnimaay: “Mñija'wipxi teety winaak jumøjt me tø nmiduñ, jøts juuni me nga'uknimadø, nijade'ents me tu'ugin xkamø'ø yøik chivi'u'nk øyik ti, jøts øts nmigu'uk jeexyip nmøøtxøduñ. ³⁰ Aa kudamts yø m'u'nk tø yja'aty, mduknio'jkip tam meets yø' mdsakaa winet midi yikxon tø yaa'kpety, ku mmeeñ yø tø myik'o'jkxiyi kawine'en møøt kawindiy tø'øxyøjk.” ³¹ Winets ja u'nkteety wyaañ: “Ti sa u'nk mjaty, pø yaayimpts me nmøødi, ti jaty øts ixa nmøøt'ajtpy tum mets yø' mja'. ³² Kuwanits pyaat'aty, çti ja ti nguidyimdyu'uñin? çti jadam yø nguidyimdyax-ondaajkyim? Patyts ixyam nxødu'uñindi ku yø m'uch tø yja'aty, pø nøø'mimpts adøm jøts ku yø tø y'oo'kni, ixyats jujky xwin'ijxyim, jeky tø y'atstigø'yity, tøts inet nbaajtyim jadigojk.”

16

Ku ja Jesús tmadyakpaajty ja ka'ødyumbi'ejx'ejtpi

¹ Ñayiñimaay ja Jesús ja pyabøjkpitøjk:

—Ja dø'on wyinaty tu'uk kumeeñ jaa'y midi yiktump, jøts jats idø'on ja' tyumbi tu'uk wyinaty midi t'eix'ejtp ja myøøtumbi, jøts ja windsøn yiknimaay jøts ku pyikta'aky ja nugo yikwindigø'øxyiyi ja tyumbi. ² Winets ja windsøn tñajtswa'wiyñ ja tyumbi jøts ja tnimaay: “Janch idø'on ku dø'on jade'en myiknimadya'aky ti øts jade'en nnimadøøpy? Køyajkjxni mdunk, ka' me n'ukyiktumbi'ejx'ejtnit.” ³ Jøts ja tumbi'ejx'ejtpi yjanchmaañi yjanchtajni, yide'en ja kø'øm ñawya'añi: “çTits ø ndu'ump, ejx øts yide'en nwindson xka'ukyiktunwani? Ka'ats ø n'ukmajadakni øyik øts idø'on nyu'ut ndu'unt, tsø'ødyumipts øts ku øts inet njayiklimunsimujkmit.” ⁴ Xjats ja tyabyaajty jøts ja wyaañ: “Tø ø nnijawi sudso ø ndabyaatt, sudso øts pøngapøn xkupøkt tyøjkjotpy ku øts yø ndunk wyinaty tø yikpøjkni.” ⁵ Winets ja tu'uk jaty tñajtswa'wiyñ pøn jaty ja wiyindsøn wyinaty miyoj'ajtip. Jøts ja yjawyeembi ja tyiktiiy: “çWine'en øts nwindson xmiyoj'ajti?” ⁶ Jøts ja y'adsøø jøts ja wyaañ: “Magø'pxy tambi øts aceite ja ndamiyoj'aty.” Winets ja

tumbi'ejx'ejtpi wyaañ: “Ixya ja ñinøky; pe'tpy ixa'ak jøts xjaadyigatst, wixijkxmyajk tãmbi ja'ayi xpikta'akt.” ⁷ Jøts yjadu'ukpi ja tnimaay: “Jøts mets, ζwine'en mets ja xmiyoj'aty?” Jøts ja ñimaajyøø: “Magø'pxy kyunchi ariin.” Xjats ja tnimaay: “Ixya ja ñinøky midi ojts xja'ay; wants tkajtswijchim jøts makta'pxy kyunchi nbiktaajkin.” ⁸ Jøts idø'øn ja windsøn tjanchnija'wiyi'ñ jøts kudam ja tyumbi'ejx'ejtpi yikxon o ti tniwinmayi ku dø'øn o ti ttuñ. Jade'eñimts yiknijawidi pøn jaty Dios yja' tkababøjkidip, yikxon ja ne'egi tyimyikyaty ja tyaa yam nigidi jade'en wyinmaa'nbyaatti pøn Dios ja'ajtidip.

⁹ Kajpxwejin øts idø'øn nyajkpy jøts kidi mbikta'aky nugo x'annipøjkpatti xtsaañipøjkpatti; pøni jam mbikta'aktyi, yikxon xyiktunkpaattit, øy yø' ka' kya'øyi. Ku yaayi, xabudøkidit o pøn, nugo ku xnijawidi tigøjxp idø'øn ja jade'en xundi. Øy ja yjakixy, wa'atsts meets ja xnijawi jøts ku meets m'anmija'win yikupøkt jap tsajpjøtpy.

¹⁰ Pøn øyjaa'y'ajtp, øyjaa'y'ajtpimpts ja øy ma, wan o ti tmayi tkamayi nayide'ents ja øy yikxon tyiktunkpaaty; pønts kidyim'øyjaa'y'ajtpim, jade'eñimts ja øy ma, nayide'en ja ka'ap tyikødyunkpaaty ja pyikta'aky øy ja wine'en myayi kyamayi. ¹¹ Pøni ka'ats yikxon xyiktunkpaatti ja mmeen ja mbikta'aktyi sa pyaat'aty, ζti sudsots meets Dios yja' mjaakmo'ojiyit midi ja yakwampy? ¹² Pøni ka' meets mmigu'uk yja' xwingudsø'jkiyi, ζpønts meets ja mja' jade'en xijy tsø'øgyip, pøn meets ja xijy mmo'owajnip o meets ja xjakø'ømja'aji?

¹³ 'Ka' pøn tumbi namajtsk wyindsøn tmiduñ; ku ja jade'en ttu'unt, tu'ukts ja pyidsø'ømt pøn ja wyinjawip jøts ja yjadu'ukpi tkawinjawit, tu'uk t'ømyidu'unt jøts jadu'uk tka'ømyidu'unt. Jade'ents ka' y'øyi ku Dios yikmiduñ, ixypatmts meen nayide'en myøjtøjkyimi. Paty ka' y'øyi adsow aduuk, tu'ugyi Dios n'ajot'ajtin.

¹⁴ Tyimyjade'ents idø'øn ja fariseotøjk yjaa'y'atti, ja meen ja yjanchmøjmigu'uk'ajttip, ixamts idø'øn ja wyinaty jade'en pyatmadowdi jøts ja jam tjanchpagajpxti ja Jesús. ¹⁵ Winets ja Jesús wyaañ jøts ja tnimaay:

—Meets idø'øn jade'en mjaa'y'ajttip, ñadyijyi mjanch'uknawya'atspikta'agyidi, ka' meets yjawi mbøkyuñ, jade'en ja mayjaa'y xwin'øøndi, wa'atsts ja Dios mnijawiyidi sa jaty mwa'andi mgajpxti m'am mjotp; yø' idø'øn Dios kyatsøjkpy, ka' Dios jade'en tkupiky jøts ku jaa'y jade'en kø'øm ñamyøjpikta'agyidi.

Ja Moisés kyutujk jøts ja' midi Dios tyanitanaapy yjaa'y

¹⁶ 'Ku ja Juan Bautista ya myiñ, jaayip ja kugajpxtyøjk ja y'aaw y'ayuujk y'adujktøø. Nay jaabaat ja Moisés kyutujk kya'pxy sa Dios ja wyinaty tø myø'øyi. Jøts nay jaty cho'onda'aky ja Dios y'øgyajpxy y'ø'y'ayuujk, yikni'gajpxy yiknimadya'aky ja kyutujk midi ja tyanitanaapy yjaa'y, xjats jade'en kuwani o pøn tjanchjadatøkiwya'añ ja'abi kutujk.

¹⁷ 'Kuwani dø'øn jade'en yjatt kyubatt sa Dios kyutujk wya'añ, niyuuni ja jade'eñi kyakixy kyanaxy pø ne'egi køjxp najxp naajx tsajp jøts niwine'enin kyagudigøy ja kyutujk.

Ku ja Jesús kyajpxwijy sa amajtsk'ajtin ñaxy

¹⁸ 'Ku pøn tmajtsu'uty ñidø'øxy uk ja tø'øxy tmajtsu'uty ñiyaa'y, ja'ats idø'øn møj pøky; uk kuts pøn yaa'dyøjk tmøøt'amajtski ja tø'øxy midi tø yikmajtsu'uty, møj pøkyts ja nayide'en.

Ja kumeeñ jaa'y jøts ja Lázaro

¹⁹ 'Tu'uk idø'øn ja jaa'y janch kumeeñ, janch xøxy piky idø'øn ja', tum ja y'øybi ja yikpejtpy jøts idø'øn ja xyumixøduñ jabom jabom, pijy xuugyin tpikta'aky ja xyox. ²⁰ Jamts idø'øn jaa'y jadu'ukmi pøn txøøw'ajtp Lázaro, janch ayoop janch pøktsoop ja' jøts janch amuum pu'uts ja', ka'ap ja myøjki jøts idø'øn ja jam xyumi'ixa'aky jam kumeeñ jaa'y tyøk'agø'øm, jam ja kyu'uxnay'ity. ²¹ Tsojk kaagyixyim ja tja'ijxy ja kaaky abu'xk midi jam kumeeñ jaa'y kyaabyajt patkø'øm najtska'jip; jøts idø'øn uk ja jam yjanchniñiyi

jøts ja twiweedyi ja pyu'uts. ²² Jøtsnim idø'øñ ja ayoobi y'ø'jky, winets ja ojts yiknijkxyi tsajpjøtpty ja ankilistøjk mā ja Abraham jap. Jøts ja kumeeñ jaa'y nayide'en y'oo'knimaa, ojts ja ñaxøki. ²³ Kuts idø'øñ ja jap ayodaajkjøtpty tja'ejxni jøts kudam ja Abraham jam jagam møøt ja Lázaro. ²⁴ Winets ja møk'ampy wyaañ: “Teety Abraham, ayø'ejxk øts, kax yø Lázaro, wan tmiñ, wan yø kyø' tyikxøøky jøts øts yø ndoojts xuktaxujxit; janch møk øts yap jønjøtpty n'ayøy.” ²⁵ Jøts ja Abraham ja ñimaajyøø: “Ja' u'nk mja'myatsp, tøxi me xaxøñ ku me tø m'atsøøni m'atstani, ka' mets jade'en mjaty sã yø Lázaro tø y'ats'ayøyin, wants yø taxoni jøts me m'uk'ayoomit. ²⁶ Jøts ti tits nnidyu'unim, abikyxi meets jami, abikyts øøts yami; mā pøn y'uknaxt øy yam pøn yjamenwa'añ nidu'ugin, uk øyts jam pøn yjanøjkxwami, nisudso'ampyts pøn kyamajada'aky.” ²⁷ Winets ja kumeeñ jaa'y wyaañ: “Tixi teety Abraham, pøni jade'en tunts may'ajt jøts yø Lázaro xkaxt jam ndeety tyøjkwindum, ²⁸ jaak jam øts nmigu'uk ja nimagoxk, jøts t'atstukmado'ot jøts kidi yã nayide'en myendi ayoobi yã ayodaajkjøøjty.” ²⁹ Jøts ja Abraham wyaañ, yide'en ja tnimaay: “Jøts timts ja wya'ant midi ja Moisés yjaay midi ja Dios kyugajpxtyøjk tø tñigajpxti. iTi wan ja jam tñijawidi pøni myøjpiktaktip!” ³⁰ Jøts ja kumeeñ jaa'y y'adsøøy: “Janch ja jade'en teety Abraham ja', yjayiktigatstibik chinaayin ja y'ijtyi ku ja pøn jam jujky ñinøjkxidit pøn tø y'oo'knidi.” ³¹ Jøts ja Abraham ñiimy: “Tixi pøni ka' ja tkupøjkti midi ja Moisés yjaay jøts sã jaty ja Dios kyugajpxy wyandøø, ¿ti ja'ats ja yjaakjanchjawidip øy oo'kpø ja jujky yjaninijkxyidi?”

17

Ja' midi yikpøkpyajtp

¹ Yide'en ja Jesús tnimaay ja pyabøjkpitøjk:

—Juuni øy ti kya'ukyikpøktyuñ, køøm tsøkyts ja'. Pønts myigu'uk tyikwinmaa'nmya'atp jøts ja tyikpøktyuñ, ipø tinim sanim ja yjanchjatt y'anmija'win!

² Ne'egi tyimyjapaat'ajtip jøts ja mejyjotp yikniwibejpatt ku møj paandaak ja y'ukyiktayukxøtsit, jøts øts n'u'nk n'unaj'k ja kidi mibaat xyikpøktyuujni. ³ Øyimts mnay'ejx'etidit jøts kidi nayide'en m'adø'øtsti sam o pøn y'adi'ichin.

Pøni m'ejxtip ku ja mmigu'uk mmidundigøyidi, tukmadowdits jøts kidi jade'en y'adø'øtsti, uk pøni nagyumaajyidipts, maa'kxuktits ja'. ⁴ Øy ja wixujk ojkjn tjayiknpati, øy ja jade'en mjamidundigøyidi, pøni nadyagumaajyidipts ja nayide'en wixujk ojk pøni mnimaajyidip ja': “Ka' øts jade'en n'uktunit”, maa'kxpts meets ja'.

Ja møj janchja'win

⁵ Xjats ja nwindson'ajtim ja kyudanaabyitøjk ñimaajyøø:

—Møøky øøts janchja'win møj.

⁶ Winets ja tnimaay:

—Kuk meets jeexyip wine'enin xmøøt'aty ja janchja'win sam tu'uk mortas pajkin, tøts meets ya'at kipy jeexyip xnimaañidi: “Pidø'øk yã jøts mejyjotp mnøjkxt, jamts myo'ont”, nay jatyits meets ja jeexyip tø mmimadøyi.

Ja tumbi tyunkjøøjp

⁷ Ku pøn ja tumbi t'ukyiktuñ kyamjotp, tyikyu'uy tyiktuñ uk tyiktsakaa'ixy ja jam, kuts ja wyimbity jam nwindson tyøjkjotp, ku ja jam yja'aty, ¿ti jaty ja jam tyimyknojmi: “Ya tyimñax jøts mga'aty”? ⁸ Pø ka'axi ja jade'en yiknojmi, pø yiknimaapyxi ja jam: “Yik'øyk øts n'a'ux jøts ø xwindsø'øgit, wan øts jawyeen tkay t'uuky jøtsnim me mga'aty m'uukt.” ⁹ Kuts ja tumbi ja jade'en tø tja'uktumi pøni sã dø'øñ ja tø yik'ane'emy, ¿ja ti winets ja yiktakajxa'aky? Pø ka'axi. ¹⁰ Nayide'ents meets idø'øñ Dios xmidu'unt, ku ti xun'abaadidit pøni ti ja mduktuujnidip jøts meets ja xnøjmit: “Ti tumbi øøts idø'øñ, ja'ayi øøts iiy tø nduñ, midi paat'ajtip øø ndu'ump.”

Ku ja Jesús tyiktsøøjky nimajk ja jaa'y pøn jadi'iñi putsnidip

¹¹ Kuts idø'øn ja Jesús tyuu'døjkigyojmi jøts ja ñijkxy jam Jerusalén, najx idø'øn ja Samariit etjotp jøts nayide'en jam Galilea. ¹² Jøts kuts ja yja'ljty jam ma tpaajty tu'uk ja kajp, jamts ja pyajtøø nimajk ja jaa'dyi pøn pu'uts pa'am wyinaty pøjkidip, jøts ja jagamyi wya'k'øydøø, ¹³ jamts ja møk'ampy ñimaajyøø:

— ¡Windsøn Jesús, ayo'ejxk øøts, ejx øøts yide'en njaty!

¹⁴ Kuts ja t'ejxpaajty jøts ja tnimaay:

— Nøjkx x'ats'ejxti ja teetyøjkti.

Xjats ja jaty ñøjkxtøø, jamnim ja wyinaty ñaxti ku ja tsø'øky ñayja'winiyidi. ¹⁵ Winets nayjaty tu'uk t'ejxpaajty ja pyu'uts jøts kudam ja tø tyaagyøjxni, jøts ja jaty wyimbijty, møk ja Dios ja ttukmøja'wiyii'ñ ttukunuu'kxyja'wiyii'ñ, ñiyaxni niyjojkni ja wyimbijty.

¹⁶ Jøts ja twinguxanay'øiyii'ñ ja Jesús jøts ja jamyi ñamyujtstaajkøø, ttukmøja'wiyii'ñ ttukunuu'kxyja'wiyii'ñ ku ja wyinaty jade'en tø yiktsø'øgyi. Samariit jaa'y idø'øn jade'en tump. ¹⁷ Xjats ja Jesús wyaañ:

— ¿Ti kidimts meets nimajk tø mdsokixy? ¿Ma net ja yjanidaxujkpidi? ¹⁸ Jabyøø'kxyik øts ya ne'egi xnimemp nadyu'uk, yø'øjik øts ya ne'egi x'atskajxajkp.

¹⁹ Jøts ja tnimaay ja jaa'y:

— Wa'kuki jøts mnøjkxni; ja'agøjxp tø tyay yø mbu'uts ku ø tø xjanchjawi.

Sa ja Dios ja kyutujk tyikme'ent midi ja tyanitanaapy ja yjaa'y

²⁰ Xjats idi'ingøjmyi, ja fariseotøjk tyiktøødøø ja Jesús juunin idø'øn ja yja'att ja Dios kyutujk midi ja tyanitanaapy ja yjaa'y, jøts ja t'adsøøy:

— Ka'ap ja ti ejxin pøni sa Dios ja kyutujk tyikja'aty. ²¹ Kidi xjøp'ijxy'atti jøts pøn wya'ant: “Ixya ja”, uk ñø'ømdit “Ixem ja”; ka'ats, pø jaanixi meets ja ya xjamøøt'ajtni.

²² Jøts ja tnimaay ja pyabøjkpitøjk:

— Ja'atp ja xøøw ja jumøjt ku mee tsojk ejxpaadyim xja'ejxwa'ant ja naxwii'ñit jaa'y ja myøjkudanaabyi, ka'ats meets ja jaty x'ext. ²³ Mjadyimyjayiknøjmidi meets: “Ixya ja”, uk møkknøjmidi meets “Ixem ja”. Kidits xmibøkti. ²⁴ Ku ø nme'ent, wa'ats x'ejxtit xnijawidit jade'en sam ja et wyidsukyin xem yam tyikjajta'aky, jats idø'øn wyinaty tmibaat'aty.

²⁵ Jawyeents ø n'uk'ayo'ot øy øy, ka' øts ja jaa'y xkupøktit pøn jaty ja ixyam juky'ajttip.

²⁶ Nayide'en ø njatt sam ja Noé yjajtyin ku ja ya y'atsinaay, nayide'en øy pøngapøn y'adø'tst. ²⁷ Kya'adyit y'uuktit sam ja y'adø'tstøø, y'amajtskidi ja jotkujk, ja y'u'nk ja ñøøx ja tyik'amajtskidi tyimyjaakja'abi xøøw ku ja Noé tyøjkii'ñ jam barkijotp, kuts ja møk tuu myiiñ xjats ja ojts ñi'ijtyi y'oo'køxti. ²⁸ Nayide'ents yjajty ku y'atsja'ajty ja Lot: jotkujk kyaydi y'uukti, yjuydi kyajpxti, yakti tyookti, ñe'epti kyojti, ña'adi pyotsti, ja tyøjk tyik'øyidi jotkujk; ²⁹ kuts ja Lot jam Sodoma kajpjotp ja'ayi pyidsiimy, jøts ja jøønduu jaty myiiñ jøkmøøt, jøts ja niduki'iyi tyiknax'o'jkijxy ja jaa'y. ³⁰ Nayide'ents idø'øn winet et yjatt ku ø x'ejxpaattit jotmøñ.

³¹ Pøni jam wyinaty øy pøn jam tøjxøjxp tø pyety, ka'ats ja t'uk'atsnidøjkinit pøni ti jaty ja jap tyøjkjøtpy myøøt'ajtpy jøts ja tøkpidisømwä'ant; pøni pønts jam wyinaty widejtp kamjotp, ne'egi tø'øpts ku ja ne'egi kya'ukwimbejtnit tyøjkwindum. ³² Ja'myajtsidi ja Lot ñidø'øxy sa ja yjajty. ³³ Pøn kagu'øøgyim pyikta'aky t'ejxp, windigø'øpyts y'anmija'win ja Dios wyingujkp; pønts tkayikmøjtøjkp øy ti, pøn ø ne'egi tu'ugyi xnadyamiyojxip, ja'ats idø'øn y'anmija'win nøjkx nitso'ok'ajtp.

³⁴ 'Øts idø'øn wamp jøts ku jam wyinaty o pøn namajtsk ttamaamukti tu'ugyi ja maabajt, tu'ukts ja ja'ayi yikpøkjø'økt jøts ja yjadu'ukpi wyindigø'øty. ³⁵ Pøni jam tø'øxyøjk wyinaty namajtsk yjøjtsmukti, tu'ukts ja nayide'en yikpøkjø'økt ja y'anmija'win jøts ja yjadu'ukpi nayide'en wyindigø'øty. ³⁶ Nayide'en ja yaa'dyøjkmidi, pøni jam ja namajtsk wyinaty jam kamjotp, tu'ukts ja yikpøkjø'økt jøts ja yjadu'ukpi ka'.

³⁷ Kuts idø'øn ja jade'en tmadoodøø jøts ja ojts tyiktøwdi:

—¿Ma windsøn'ajtim idø'øn ja jade'en yjatt?

Jøts ja y'adsøøy:

—Kidi mwā'andi ku ja kyayiknijawit, jabi niduki'iyi meets ja xnijawit ku ø nme'ent.

18

Ku ja Jesús tmadyakpaajty ja ku'økyø'øxy jøts ja kudunk tiddyumbi

¹ Xjats Jesús ja ttamadyakpaajty tu'uk ja ejxpajtin madya'aky. Ja' idø'øn ja tyuk-madogukiwyampy jøts ja Dios'ajot'aj'tettit jøts nijuuni kya'amutsk'attit. ² Jøts idø'øn ja tnimaay:

—Jam idø'øn kudunk tiddyumbi wyinaty tu'uk jam kajpjotp, niwine'enints idø'øn Dios ja tkidyimwyindsø'øgi, nipøn ja tkamøjl'ixy øy yjapøni. ³ Nayjamts idø'øn ku'økyø'øxy tu'uk chinaamyi, ja'ats ja kudunk tiddyumbi jam tmiyø'øy'ejtp, ejtp ja yja'øø'ngunaxy, jøts idø'øn ja tja'amidøy ja tiddyunin, ja myidsep tjani'øøni jøts ja yikpayø'øty. ⁴ Jeky idø'øn kudunk tiddyumbi ja tkamøjpikta'aky jøts ja ka'ap tpayø'øy, xjanimts ja wyinmaay: “Øy øts idø'øn Dios ngawindsø'øgi, øy øts idø'øn nipøn ngatunk'aty, ⁵ kuwanits øts idø'øn jade'en ndu'unt, pø ejtpts øts yø xjanchmiyø'øy'ity, janch møk ø xyikjotkixy, tikuts øts yø nganitani jøts jade'en kya'ukmenit jøts øts yø xka'ukyikjotmā'tnit.”

⁶ Jøts ja nwindsøn'ajtim yide'en yjaakwaañ:

—Ja ka'øy kudunk tiddyumbi dø'øn jade'en wamp. ⁷ Kuts idø'øn Dios, ¿ti jaa ja tkidyimñitanit ja yja' pøn ja xinaxy tsunaxy ja'myajts'ejttip? ¿Ti kidi ja jaty tpuðøjkiñit? ⁸ Øts idø'øn wamp jøts ku ja jaty tñitanit ku ja jaty tnikajpxu'utt. Kuts ø nme'ent, ¿windem øts naxwii'ñit jaa'y n'ukpaaty tum jade'en tu'ugyi ja yjanchja'win?

Ku ja Jesús tmadyakpaajty ja fariseotøjk jøts ja yikugubajtpi

⁹ Jøts ja Jesús ttanimadyaktøjkiyññ jadu'uk ja madya'aky, jøts ja ttukmadøy pøn namyikaxi jaa'y'ajttip, kø'ømyi ñay'ødyiyidi ñay'øbyikta'agyidi jøts ja myigu'uk ja kawin'ijxyim tjawidi. Ja'ats idø'øn ja ñimaay:

¹⁰ —Namajtsk idø'øn ja jaa'y ñøjkxtøø Dios ajot'ajtpi jam tsaptøjkjotp: tu'uk fariseo, jøts ja yjadu'ukpi yikugubajtpi jaa'y. ¹¹ Tanaapy ja fariseo jøts ja yide'en tmigajpxy: “Dios Teety, ndukmøja'wip ndukunuu'kxyja'wip mets ku ø ka' nayide'en nduñ sam o pøn myaatsti kyawindiyyaa'y'atti, sam øy pøn axøøk pyøkyundi; ni ngajade'eni paat øts sam yø yikugubajtpi ixa tyani. ¹² Majtsk ojk me n'amaay'aty tuksamaan, ngagugayi ngagu'uugi mets, jøts ndamiyøjpxy mets nbikta'aky wan jaty ti jaty ø nbatpy n'ijxpy.”

¹³ Jøts idø'øn ja yikugubajtpi jagam ja ne'egi wya'k'øyyiññ, ka'ap ja jadine'en y'aaw yjoajt myajada'aky jøts ja wine'enin y'ejxjø'økt jøts ja wine'enin chajp'ext, jøts ja ne'egi ñagyachkoxi, yide'en ja wya'añ: “iDios Teety, ayo'ejxk øts, janch pojkpitumbijaa'y øts!” ¹⁴ Xjats ja Jesús yide'en wyaañ: “Øts nømp jøts ku ja yikugubajtpi ojts ne'egi yikmee'kxy, jøts ja ojts wyimbejtñi ñøjkxni tyøjkwindum, tø ja yiktamee'kxy ja pyøky. Jøts ja fariseo nigidi yikmee'kxy pøn namyikaxi jaa'y'ajtip, pøn kø'ømyi nay'ødyejidip nawya'atspiktaajkidip, ka'ats ja mibaat tminaxti ja wyinmaa'ñ jam Dios wyindum. Pønts tøkja'widip ja pyøky, pøn yik'ayowim tminuu'kxaktip ja Dios, ja'ats idø'øn ne'egi møjtøjkidip jam Dios wyingujkp.”

Ku ja Jesús ojts tkunuu'kxy ja mutsk unajjk

¹⁵ Nayi yiktanimemp idø'øn ja Jesús ja mutsk unajjk jøts ja tkønixajt; jøts kuts ja pabøjkpitøjk jade'en t'ejxtøø, winets ja ojts møk twingugajpxidi pøn jaty ja mutsk unajjk tyikmendip. ¹⁶ Winets ja Jesús ja mutsk unajjk tyaa'xmiiñ, jøts ja pyabøjkpitøjk ojts tñøjmi:

—Wan yø mutsk unajjk tmendi, kidi meets yø xkadukniñ; ja yjade'emb; jaa'y idø'øn Dios kyutujk nitanaajydip. ¹⁷ Janch meets idø'øn nnøjmi, pøn tkagupøjkp ja Dios kyutujk

midi ja tyanitanaapy yjaa'y sam ja mutsk una'jk ja tkupikyin, niwindemts ja tkapaaty tka'ixy ja Dios nitso'ok'ajtin pøni ka'ap ja tkupøkti.

Ja kumeeñ jaa'y

¹⁸ Jøts idø'øn ja Jesús tu'uk ja kumeeñ jaa'y ñimaajyøø:

—Mets øyjaa'y yik'ixpøjkpi, ¿ti ø ndu'ump jøts øts ja n'anmija'win tpaatt ja nitso'ok'ajtin xemikøjxp?

¹⁹ Jøts ja Jesús wyaañ yide'en:

—¿Ti jade'en myikwajnip jøts ku øts øy? Ka'ap ma pøn tu'ugin y'øyi sam Dios.

²⁰ Mnija'wipts ja Dios kyutujk sa ja wya'añ: “Kidi mmigu'uk ñiyaa'y ñidø'øxy xpøjkxi; kidi myikjaa'y'øøky; kidi mmeech; kidi mmigu'uk xwin'iiñ; windsø'øgi mdeety mdaak.”

²¹ Jøts ja jaa'y wyaañ:

—Jaayim øts yø jade'en nbaduñ ku nmutsk'aty.

²² Kuts ja Jesús ja jade'en tmadøøy, xjats ja tnimaay:

—Jap jadu'uk midi mgabadumpñim: too'køx ti jaty jam mmøøt'ajtpy jøts ayoobi jaa'y ja xabudøkit, jøts ja jap tsajpjøtpy nøjkx mwingaxø'jkxi ja juky'ajtin; winets mdsoont jøts øts xmøødit.

²³ Kuts ja jade'en tmadøøy jøts ja jaty yjanchjotmadyøjkii'ñ kumi janch kumeeñ idø'øn ja', ka'ap ja tmajtstu'utwa'añ ja pyikta'aky. ²⁴ Kuts ja Jesús t'ijxy jøts ku ja jaa'y jade'en yjotmay'øøky, jøts ja wyaañ:

—Windemnim ja kumeeñ jaa'y jade'en tpaajtniyidi ja Dios kyutujk midi ja tyanitanaapy yjaa'y! ²⁵ Ne'egi tsojk ñaxt tu'uk møj jiyujk jap xuu'ñ jutjøtpy, jøts nigidi tu'uk kumeeñ jaa'y tyøkit jade'en ma Dios kyutujk tnitani tuki'iyi.

²⁶ Pøn jaty ja jade'en tmadoodip, ja'ats wændøø:

—¿Pømbits idø'øn nitso'ok'atp?

²⁷ Winet Jesús ja ñimaajyidøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint, niti Dios tkatsepjawi.

²⁸ Jøts ja Pedro wyaañ:

—Windsøn'ajtim, tøts øøts nbikta'aky tuki'iyi nmajtstutkixy ti jaty øøts y'ijty nmøøt'ajtpy, ixys øøts jade'en nwidity møøt mets.

²⁹ Jøts ja t'adsøøy:

—Janch øts idø'øn nwa'añ, pøn yjøøn tyøjk tkaba'ayoop, pøn tyeety tyaaak, y'uch myigu'uk, y'u'nk ñidø'øxy tkajotmay'ajtp, ja'agøjxp ku ja ne'egi tyikmøjjiyi ja Dios kyutujk midi yjaa'y ja tyanitanaapy; ³⁰ pøni wine'enin ja ya naxwiiñ yjaaktsøøni, pyaajtipts Dios kyunuu'kxin ja' jøts nitso'ok'atp y'anmija'win ja xemikøjxp ku ja Dios jadu'ukpi tsinaa'yin ja myo'ojiyit.

Ku ja Jesús jadigojk tnigajpxy jøts ku ja y'ookt

³¹ Xjats ja Jesús abiky tyaaixiyii'ñ ja nimakmajtskpi pabøjkpitøjk, jøts ja tnimaay:

—Yamnimts inet jam Jerusalén nnøjkxindit, ma jade'en yjatt sa jaty ja kugajpxtyøjk tjaadyandøø jøts ja tnigajpxti ti ø ndu'ump, ti nbaatp. ³² Yikmatsp øts jøts ø nyikøyakt nyiktagødøkit pøn ø ngamigugajp, nyikniexe'ekt nyiktaxe'ekt øts, nyikwidsujt nyikjøptsujt, kawine'en nyikjemnøjmit nyiktenøjmit. ³³ Ku øts jawyeen n'ukyikwinwopt n'ukyikjøpwopt, jøtsnim øts ja xyik'ooktit; pidsø'ømpst øts jap oo'kpi jutjøtpy kidigøøk xøøw.

³⁴ Jøts ja ka'ap tja'gyukidi nisudso'ampy, pø ti ja jade'en yiktamimadyaktip, nisudso'ampy ja tkaja'gyukidi.

Ku ja Jesús tyikwin'ejxwa'kxy ja winap jaa'y

³⁵ Kuts ja Jesús jam wyinaty Jericó yja'atwani, jøts jam tuu'pa'am tu'uk chøøni ja winap jaa'y, jam ja yiklimunsimuky. ³⁶ Kuts ja tmadøøy jøts ku ja mayjaa'y jam yjanchnaxti, jøts

ja ojts tyiktiy ti dø'øn tuujnɪp jajtip. ³⁷ Jøts ja yiktukmadøø y jøts ku ja Jesús jam wyinaty ñaxy pøn jam Nazaret tsoo'mp. ³⁸ Winets ja møk'ampy wyaañ:

—jJesús, mets m'aats'ajtpy mgugoj'ajtpy ja David, ayo'ejxk øts!

³⁹ Pønts jam wyinaty jawyeen yø'ødyip, ja'ats ja møk'ampy ñimaajyøø jøts y'amo'ont, jøts yjaaktyimykjinajxpy ja', ka'ap ja y'amøñ, jinaxy ja wyan'adi'ich:

—jJesús, ayo'ejxk øts!

⁴⁰ Winets ja Jesús wya'k'øyyii'ñ jøts ja wyaañ jøts y'atsyikwa'at ja winap jaa'y. Kuts ja wyingume'eniyøø wingon, xjats ja tyiktiy jøts ja tñimaay:

⁴¹ —¿Ti dø'øn mdsøjkpy, ti øts idø'øn xuktunwamp?

Jøts ja winap jaa'y y'adsøøy:

—Windsøn'ajtim, win'ejxwamp øts.

⁴² Jøts ja Jesús ja ñimaajyøø:

—jWin'ejxts inet! Ja'agøjxp yø mween tø y'øyi ku ø tø xjanchjawi.

⁴³ Jøts idø'øn ja winap jaa'y jade'en wyin'ejxpijky, jøts ja tpadsø'jñ ja Jesús, møk ja ttukmøjawi ttukunuu'kxyjawi ja Dios. Jøts ja nayide'en wyamididi pøn jaty jam ja jade'en t'ejxtøø.

19

Ja Jesús jøts ja Zaqueo

¹ Xjats ja Jesús yja'jty jam Jericó, kyajptøjkiyii'ñ, ² jamts kumeeñ jaa'y wyinaty tu'uk, Zaqueo ja xyøøw midi ja yikugubajtpitøjk wyindsøn'ajtip. ³ Ja'ats idø'øn tyimyjawin'ejxwamp ja Jesús jøts ja t'ejxkapt. Janch mayjaa'yts jam wyinaty nisudso'ampy ja tka'ext, jaa ku ja kon yjaaktyimtyanaañimi. ⁴ Xjats ja ojts jawyeen putyi t'anøjkxi ma dø'øn ja Jesús jam wyinaty ñaxwa'añ, jøts ja jam kipkyøjxp kyøjxpejty. ⁵ Kuts ja Jesús jam ñajxy, ixam ja Zaqueo kipkyøjxp, jøts ja Jesús pyat'ejxøø, yide'en ja ñimaajyøø:

—Zaqueo, putyi winak, jap øts ixyam mets mdøjkjøtpy nja'da'akwa'añ.

⁶ Jøts ja Zaqueo jaty wyinaajky, janch ejtni xoni dø'øn ja tyikja'jty ja Jesús jam tyøjkjøtp.

⁷ Pøn jatyts ja jade'en t'ejxtøø, jøts ja pyagajpxpinaxwa'ktøø, ja' ja kyajpxtip jøts kuk ja Jesús jam wyinaty tø ñijkxy ma ja ka'øyjaa'y tyøjk jam. ⁸ Jøts ja Zaqueo wya'kukiyii'ñ jøts ja nwindson'ajtim yiknimaay:

—Windsøn'ajtim, ndamay'atp øts ayoobi jaa'y kujkwa'kxy ti jaty øts ixja nmøøt'ajtpy; pøni tøts øts o pøngapøn o tigati nbøjkxi awin'øøni'ampy, nyik'u'nkipts øts ja' jøts øts ja jawaani may nyikwimbejtxit, maktaxk øjk tukjadine'en jaty y'u'nk'att pøni sa ja kyøjpk.

⁹ Xjats ja Jesús wyaañ jøts ja tñimaay:

—Ixyam ja nitso'ok'ajtin tø yja'aty ya tøjkjøøjty, kumi nay Abraham meets m'aadsip mgugojip. ¹⁰ Pø ja'abixi ø tø nnimendi jøts øts ja ndukpaattit nduk'ejxtit ja nitso'ok'ajtin pøn ja y'anmija'win y'ijty tigøy'ejtnidip.

Ku ja Jesús tmadyakpaajty ja meeñ kyøjpk

¹¹ Exam ja mayjaa'y ja pyatmadøyyi ku ja jade'en wya'añ, jøts ja ttanimadyaktøjkiyii'ñ tu'uk ja ejxpajtin madya'aky, ku ja jam wyinaty kujk wyingoni jam Jerusalén. Nømpxi dø'øn ja jaa'y wyinmaydi, ja'ayi ja jam y'ukja'att jøts ja jaty wyindsøndøkit, jøts Dios kyutujk ja tyiktuujnit midi ja tyanitanaapy yjaa'y. ¹² Jøts idø'øn ja tñimaay:

—Jaa dø'øn jaa'y y'ijty tu'uk, jotkujk jaa'y. Ja'ats ojts abikyajp t'anøjkxi jøts ja jam y'atswindsøndøkit. Ku ja wyimbett, møjwindsøn ja wyinatyni. ¹³ Jøts idø'øn tyumbi ja nimajk twaadsøøy ku ja wyinaty choonwa'añ, jøts ja nidu'uk jaty ttagødøjkiyii'ñ tu'uk møj mukmyeeñ, jøts ja tñimaay: “Mda'aju'udyip mda'agajpxtip idø'øn yø mmeeñ, wan tmayi kunim ø nwimbett.” ¹⁴ Mi'ajkiyipts idø'øn ja jaa'y ja' pøn jaty jam tsinaadyip, jøts ku ja chø'jñ jøts kexy yø'øbyi ja yiktabaguejxy jøts ja jam yide'en y'atswa'andit: “Ka' øts ya'at jaa'y ndsøky jøts øøts yø nwindson'att.” ¹⁵ Jøts yikpiktaajkim idø'øn ja' jøts ja

wyindsøn'att, winets ja wyimbijty jam ma ñaajx kyajp. Ku ja jam yja'jty jøts ja twaadsøoy ja tyumbi pøn jaty ja wyinaty tø tkømø'oy ja meeñ, ja' ja ñijawiwypy wine'en jaty ja wyinaty tø tyik'u'ngidi. ¹⁶ Jøts ja yjawyeembi myiñ jøts ja tyukmadoojøø: “Windsøn, majk ojk øts ja jadukjadine'en jaty tø nyik'u'nk'aty ja mmeeñ.” ¹⁷ Xjats ja wyindsøn y'adsøoy: “Øy'ajtp, øyxi dø'øn jade'en mduñ, mjotwampxi dø'øn jade'en; ti sa metsxi yjadini'iñibi meeñ jade'en tø xyikmayi, ja'agøjxpts mets ndukwindsøn'atwa'añ majk ja kajp.” ¹⁸ Jøts jadu'uk myiñ, ja'ats waan: “Windsøn, magoxk ojk øts jadukjadine'en jaty tø nyik'u'nk'aty ja mmeeñ.” ¹⁹ Jøts ja nayide'en yik'adsoomøø: “Windsøn'atp mets ja magoxkpi kajp.” ²⁰ Winets jam jadu'uk myiñ jøts ja wyaañ: “Windsøn, ixyaani ja mmeeñ. Konji'iky øts yø nbaayjotpy tø nyik'ity; ²¹ kumi nnija'wip øts jøts ku mets ka' ti jadi'iñi xnaajtsjawi, ja'agøjxpts øts ndsø'øgi, ja'abaat me xpayø'oy øy mets ja xjagaja'aji, myikpidø'økwambyaat mets ja pikta'aky øy me mjagani'ipy.” ²² Winets windsøn ja ñimaajyøø: “Mets ka'ømyidumbi, kø'øm yø m'aaw mnadyani'øøniyi, yø' me kø'øm mdiidyujnip. Pøni mnija'wip tam ku øts jade'en njaa'y'aty ku øts ja nbøkmuky midi ø ngabiktakpy, ku øts ja xijy nyikpidi'ikpyaat midi njaganipy, ²³ jøts, ¿ti kuts øts ja mmeeñ tø xka'anuu'kxyaky, jøts øts ja meengyojpk jeexyip tø nbaaty møøt ja meeñu'nk?” ²⁴ Jøts ja tnimaay pøn jaty jam wyinaty: “Pøjxidi yø meeñ, jøts ja xmo'odit pøn øts ja nmeengyojpk majk ojk tø xyik'u'nk'ajtyi.” ²⁵ Jøts ja wyandøø: “Pø jamimts windsøn ja' myeeñ, pø majkts meeñ muky ja jam tmøødi.” ²⁶ Jøts ja windsøn y'adsøoy: “Øtsts idø'øn wamp, jøts ku ja yjaaktyimyikpudøkit pøn tyikmøjtakp ku ja o ti yiin waan yikmø'oy; pønts kø'øm o ti tkidyimyikmøjtakp ku ja o ti yiin waan yjayikmø'oy, jaaktyimyikpøjkøjxpts ja ne'egi tuki'iyi. ²⁷ Jøts ja' pøn ø xmi'ajkidip pøn ø xkatsojktip jøts ø nwindson'att, nøjkxts ja x'atswawdi jøts ya xyikme'endit jøts ya xtyimyikpa'ookit øts nwingujky.”

Ku ja Jesús kyajtpøjktyi'ñ jam Jerusalén

²⁸ Kuts ja Jesús jade'en myadyak'abajtyi'ñ, jøts ja ñajxy, jamxi ja Jerusalén ñijxxy. ²⁹ Jawaani ja jam wyinaty kyidyimya'atti jam Betfagé jøts jam Betania, jade'en ja kajpxøow jam, ku ja tkejxy namajtsk pyabøjkpi ku ja jam wyinaty wingondi ma ja kojpku'nk jam txøøwi Olivos, ³⁰ jamts ja tnimaay:

—Nøjkxti ixem kajpjotp, ixewingon. Kuts inet jam mja'attit, jam inet buur tu'uk kuwiñ xpaattit midi ka'anim pøn ttatsøøni. Ja'ats m'atmigajidip jøts xyikme'endit. ³¹ Pøni pønts myiktøjidip tigøjxp ku xmigajidi, nøjmidits jøts ku ø ndsøky.

³² Jøts idø'øn ja pyabøjkpi namajtsk ñøjkxtøø tpattøø jade'en sa Jesús ja wyinaty tø ñi'mxyidi. ³³ Jam ja wyinaty tyimigajidi ja kujiyujk ku ja jiyujk ja ñimaajyidøø jøts ja yiktøjidøø:

—¿Tigøjxp ku yø jiyujk xmigajidi?

³⁴ Jøts ja t'adsoodøø:

—Kumi ja nwindson'ajtim yø ttsojpk.

³⁵ Jøts ja twejtsnøjkxtøø ma ja Jesús jam wyinaty y'awijxy, jamts wyet ja ttajiba'andøø jøts Jesús ja ttawa'atspejty. ³⁶ Kuts idø'øn ja Jesús wyingon'adøtsni, xjats wet ja nøø' tuu' yiktatya'abi. ³⁷ Ku ja wyinaty wyingoni ja kajp, ku ja jam kyida'aky Olivos kojpkwemp, winets pyabøjkpitøjk ja ejtni xoni yjanchpaya'axyi yjanchpajøkyi, jøts ja møk'ampy ttukmøjawidi ttukunuu'kxyjawidi ja Dios ku milagri'ajtin ja wyinaty jade'en tø tyuk'ijxyidi. ³⁸ Yide'en ja wya'andi:

—¿Øy'ajtp ku Dios xukni'iñim kyunuu'kxy wyindsøn! jJotkujk'atyim idø'øn jap tsajpjotpy! jKuuyi Dios jadu'uk yjaak'øyi!

³⁹ Winets ja fariseotøjk winaagin tnimaadyøø ja Jesús pøn jam wyinaty jaa'y agujkpti:

—Windsøn, tiku waani sa xkanøjmi yø mbabøjkpitøjk.

⁴⁰ Jøts ja y'adsojøø ja Jesús:

—Øts idø'øn wamp jøts ku øts inet yø njayik'amo'ondit, wenkpits inet kajpxkojmidip møk'ampy, nijuuni yø kya'amondi øy yø pøn yjayik'amonwa'añidi.

⁴¹ Kuts ja t'ejxpaajty ja Jerusaléngit kajp ku ja jam wyinaty jawaani kyaja'atni, jøts Jesús ja tkudsaachwinma'ayiyii'ñ jøts ja yaajxy, ⁴² yide'en ja wyaañ:

—¡Kuk jeexyip iiy wine'enin xja'gyuki jøts ku ja mxøøw ja mjumøjt tø mjataja'adyi, jøts jeexyip ni'ijtyi ja mjaa'y tpaatti ja Dios kyunuu'kxyin! Tøts ja tiempi ñaxy, iti jaa ja xijy, jatyi myiktami'awa'anigyojmit! ⁴³ Ja'atp ja xøøw ja jumøjt ku tiempi kya'øyt, ku mmidsep mdamukit, amuum myikna'awidejtkøxt, nima awa'ats mgata'ant, ja xem ja yam myiknidøkit, ⁴⁴ naxjøtpy myikjaagida'akt jøts ja mjaa'y may'ampy kyudigø'ødyit. Niwine'en niti kyata'ant; ja'agøjxp ku tø xkagupiky ja Dios ku ja kø'øm tø mjanimiñi.

Ku ja Jesús twojpidšomguixy ja too'kpitøjk jam tsaptøjk agø'øm

⁴⁵ Xjats ja Jesús chaptøjktøjkii'ñ jøts ya tuki'iyi tyikpidsømbinaxwa'jky pøn jaty jam wyinaty yajktip too'ktip, juudyip kajpxtip, ⁴⁶ yide'en ja tnimaay:

—Yide'ents Dios kyajpxy jap kyøjxa'ayi: “Ja' øts ndsaptøjk wya'añ jøts øts njaa'y jap Dios'ajot'attit”; ma meets yø ya jade'en xyiktuni sa maa'tspi chinaadyaajkindi.

⁴⁷ Jabom jabom idø'øn ja Jesús jam tsaptøjkjotp yik'ixpijky; yam idø'øn ja teetywindsøndøjkti, møøt ja kajpxwejpitøjkti møøt ja møjaa'dyøjkti midi tnigubajk'ajttip ja kajp, tnwinmayidi sudso ja yjadyimy'uk'ooktnim. ⁴⁸ Jøts ja nisudso tkamidabyaatti ti sa ja ttu'undit, pø amuumts ja jaa'y ja jam pyatmadøyiyi, ti pøn ja jam kabatmadojyip.

20

Ja Jesús kyutujk

¹ Xjats idø'øn yide'en tuk'ojk yjajty ku ja Jesús jam wyinaty tsaptøjkjotp tyik'ixpiky ja mayjaa'y, ja øgyajpxy ja øy'ayuujk ja jam wyinaty kyajpxwa'kxpy sudso nnitso'ok'ajtin, ku ja teetywindsøndøjk jam yja'jttøø, møøt ja kajpxwejpitøjkti, møøt ja møjaa'dyøjkti pøn tnigugajp'ajttip ja kajp, ² ja'ats idø'øn jam yide'en wandøø:

—Yø' mnigajpxp pøn jade'en tø mdagutujk'aty jøts jade'en m'adø'øtst. ¿Pøn yø kutujk jade'en tø mmø'øyi?

³ Winets Jesús ja t'adsojimbijty jøts ja tnimaay:

—Nayide'en mee nyiktøøwami, jøts m'adso'odip idø'øn: ⁴ ¿pøn ja Juan ojts tya'ane'emyi jøts ja yiknøbatt? ¿Dios ja ojts jade'en tyanigutujk'ajtxyi, uk ja naxwii'ñit jaa'y?

⁵ Winets ja agø'ømyi tkajpxy'ajttøø, yide'en ja ñawya'añidi:

—¿Sa nnima'ayin? Ku net yø njanima'ayin jøts ku Dios ja tyanigutujk'ajttøø, yide'ents inet yø x'adso'owin: “Jøts ¿tigøjxp ku ja xkajanchja'widøø pøni jade'en tam?” ⁶ Jøts kuts inet yø njanima'amya'andit jøts ku ja yaayi jade'en yiktanigutujk'aty, tsojk inet yø jaa'y xjanchkat'pspa'o'jkindit, kumi wa'ats yø tnijawidi jøts ku ja Juan ja Dios kyexyi.

⁷ Xjats ja t'adsoodøø jøts ku ja ka' tnijawidi pøni pøn ja Juan jade'en wyinaty tø tyanigutujk'aty jøts ja jade'en yiknøbatt. ⁸ Jøts Jesús ja ñimaajyidøø:

—Pøni jade'en tam, ni øtsts meets ja ngadukmado'ot pøni pøn øts jade'en tø xanigutujk'aty ku øts jade'en n'adi'ich.

Ku Jesús tmadyakpaajty ja ka'ødyumbidi

⁹ Winets ja Jesús tnimaabyinaxwa'jky ja mayjaa'y, yide'en ja ejxpajtin madya'aky ja tu'uk tnimadyaktøjkii'ñ:

—Ja dø'øn jaa'y y'ijty tu'uk pøn jam kyamjotp tnejp ja uvi tsa'am, jøts ja ttukmidaañ ja tyumbi winaagin ku jeky'ampy widejtpi ñijxxy. ¹⁰ Kuts tpaajty ja uvi tsa'am tujk'aats, jats ja tkejxy tu'uk tyumbi jøts ja t'atstuk'amidowa'añ pøn ja kam jam wyinaty tø tmidandi jøts ja tyaktit ja nidsa'am ni'ipy, midi ja paat'ajtip jøts ja yikmo'ot. “¿Maa?” “Ka'ap.” Ja tumbi ñømdøø. Yikxon ja jam ojts yjantyimyikwøpy, jøts ja yikajxjimbijty wa'ats jadi'iñi.

¹¹ Xjats ja kugam tkejxy jadu'uk tyumbi; nayide'en ja ojts yikjømnojmi yiktenøjmi, yikxon

ja jam yjanchyikipwyøjpy jøts ja nayi wa'ats jadi'iñi yikajxjimbijty, niti ja kyayikmøøy.
¹² Jøts idø'on ja ka' tmimøñ, ojts tyumbi ja jadu'uk tkajkxkojmi jøts ja jam nayide'en ttundøø, tyikwindsaachidi tyikjøptsaaachidøø jøts ja tyikaktøø.

¹³ Jøts yide'en ja kugam wyaañ: “¿Sudsom tsøky ndu'unt? Nmajnku'ngin n'ukaxp, ja ku yø t'ejxpaattit, ¿ja kidi yø ttsø'øgidit?” ¹⁴ Ja'ayi ja tumbitøjk ja ojts y'ejxpaadyiyi jøts ja xem yam ñawyajnidøø: “Ya'at yø kam tmidanwamp; wan tyikpa'o'jkyim jøts adøm yø kam nmida'anindit.” ¹⁵ Winets ja tjidøjtpidsømdøø jam kamjotp jøts ja ojts tyik'ookti.

—¿Sats idø'on kugam ja yjaw i tyunidit? ¹⁶ Me'emp ja kø'øm jøts ja tyikugøxit ja yjade'emb i tumbidi pøn jadyimyjade'en'ajttip, jøts ja ne'egi tmo'ot ja kyam ja abiky tumbidi.

Ku ja nidaay'ajtib i ja jade'en tmadoodøø, jøts ja wyandøø:

—iPø katsojknim ja Dios!

¹⁷ Tiy Jesús ja wyin'ijxyidi, jøts ja yiknimaadyøø:

—¿Tits idø'on yø Dios kyajpxy ñigajpxy ku yø jap yide'en yja'ayi? ¿Nugo yø jap jade'en wya'añ?

Ja tsaa midi ja pojtspi kya'ejxidøø,

ja'ats yam ne'egi tø y'uknøjkxni jam pøch kyubajkp jøts ja t'amajtsmujkøjxp yø pøch.

¹⁸ Ku ja y'ukyiktanaxkidakpatt ku jam o pøn y'uknaxkida'akt, pø ma ja nay'ejxpaadit; u kuts o pøn tyanaxkidakpattit ja tsaa, pu'uxints ja yiktawayit.

Ku yikajpxy'aty ja kugubajt

¹⁹ Xjats ja teetywindsøndøjk møøt ja kajpxwejpitøjk ja tjadyimy'ukmatswandøø ja Jesús, wa'ats ja tyimyjaja'gyukidi jøts ku ja ja'agøjxp ja madya'aky yikmadyakpaajty; yjadyimy'ukmatswandip ja' ja Jesús, ja jaa'yts ja chø'jkidip paty ja jade'en tkatundøø.

²⁰ Winets ja tpiktaktøø myigu'uk pøn tpa'ejxtip tpa'go'odip jøts ja ñadyiji nugo jade'en ñanky'ijxyidi sam øy jaa'y, ja'ats ja chojktip jøts ja tkajpxy'ejxtit kuuyi ja y'ukajpxigø'øty, ja'ats ja jaty tyani'øønidip jøts ja jam tkøyaktit ma wyindsøn ja jamdi. ²¹ Paty ja yide'en tyiktøødøø:

—Windsøn, nnija'wip øøts jøts ku myik'ixpiky øy tsuj, tiy janch tuki'iyi xnigajpxy jøts ka' me pøn xkupiky xkagupiky ti sa me mwa'añ, ne'egi yikxon mets ja ne'egi xnankñi'ixpøkiyi tiy janch ja Dios tyiy'ajtin sudso ja yiknijawit. ²² Tukmadookts øøts: ¿Nmo'op øøts kugubajt ja møj windsøn midi jam abiky'ampy nichøky tø myiñ yikutujkpi, uk ka'?

²³ Yja'wiyiñ Jesús ja jaty jøts ku ja kya'ødyunwa'añi, jøts ja tnimaay:

—¿Tiku øts jade'en xkajpxy'ejxti, tigøjxp ku øts jade'en xniwambatwa'andi?

²⁴ Uktuk'ejxtik øts tu'uk meeñ. ¿Pøn ja wyeen y'aaw yø jam myøøt'ajttip, jøts pøn ja xyøøw jam køxja'ay?

Jøts ja wyandøø:

—Ja møj windsøn imts yø' yja'.

²⁵ Xjats ja tnimaay:

—Ja'ats meets ja mmo'op midi ja yja'ajtpy, jøts ja Dios ja' xmo'odit midi ja paat'ajtmiyip.

²⁶ Jøts ja nisudso'ampy tkakajpxy'ejxti øyik idø'on ja ttaniwambattit sa jaty ja jam wyinaty wya'añ jam mayjaa'yjotp; jinaxy ja ñigyumaap yjajtøø ku ja jade'en yik'adsoodøø, jøts ja ne'egi y'aaw amøñi t'ukyik'ejtnidi.

Ku ja jaa'y tyiktøwdi pøni janch idø'on ja ku oo'kpi jadigojk yjukpyøktit

²⁷ Jøts idø'on ja saduceotøjk jam winaagin yja'tmidøø jøts Jesús ja t'ejxwa'andi. Ka'ap idø'on ja saduceotøjk ja tkupøkti jøts ku oo'kpi y'anmija'win jadigojk pyidsimy juky'ajtp: xemikøjxp møøt ñine'kx; paty ja tnimaadyøø ja Jesús:

28 —Windsøn, yide'en ja Moisés tjaadyaañ, pønük ñidø'øxy ku'øøky tyiktamp yam ja ka'aním y'u'nk tpaati, pøniamts ja' y'uch y'ajch, ja'adsik tmøøt'amajtskip ja ku'økyø'øxy jøts ja ttukpaatt y'u'nk, jøts ja jade'en tkayikudigø'øty ja myigu'uk. 29 Jats idø'øn jaa'y y'ijtyi, niwixujk ja tyukyaa'dyøjk'atti jøts ja yjagyooði jawyeen y'amajtskiyii'ñ jøts ja tku'ø'jky ja ñidø'øxy, nitu'uk y'u'nk ja ojts tkapaatti. 30 Xjats ja mutskpi ja tmøøt'amajtskiyii'ñ ja ku'økyø'øxy jøts ja nayide'en tku'ø'jky, ka'ap ja tyik'u'nkpaajty. 31 Jøts ja midigøøkpí ja twaay ja ku'økyø'øxy jøts ja nayide'en tku'ø'jky. Tum jade'en yjajtkøjxti niwixujk, ni tu'ugin pøn y'u'nk tkayiktaañ. 32 Jøts ja tø'øxyøjk nayide'en y'o'jknímaa. 33 Kuts idø'øn ja nøjx jadigojk yjujkyøkti, ¿pømbits idø'øn ja nøjx tñidø'øxy'aty jadigojk, pø niwixujkxi ja tø t'atsnidø'øxy'atti?

34 Xjats ja Jesús ja ñímaaajyidøø:

—Yaayi dø'øn yø jade'en yjaty, yaayi naxwiiñ jade'en y'amajtskidi ja yaa'y ja tø'øxy. 35 Pøn paat'ajtidip jøts ja ñøjkxtit jam mā Dios ja tø t'a'ejxi, ku ja yjujkyøktit jadigojk ka'ap jam pøn t'ukjotmay'ajtnit ja amajtsk'ajtin, ni tka'ukyik'amajtskyinidit y'u'nk y'una'jk jam pøn, 36 ka'ap pøn y'uk'oo'knit y'uktigøøñit. Tum jade'en ja jam chinaañidit sam ankilistøjkti. Tum Dios ja amuum u'nk'ajtidip una'jk'ajtidip, ja'agøjxp ku dø'øn ja jemchinaa'yin tø tpaatti ku ja jadigojk tø yjujkyøkti jap oo'kpi agujkpy ja nwindson'ajtimgøjxp. 37 Kø'øm paatxi Moisés ja xuknija'wíndi jøts ku oo'kpi yjujkyøkti jadigojk ku ja jam ojts t'ixy ja ximum ñitøøwyidity. Pø yide'enxi ja jam tmadøøy jøts ku ja Abraham, jøts ku ja Isaac, jøts ku ja Jacob ja tdios'atti ja Dios Teety. 38 Kidi oo'kpipts ja ñidios'ajtpy, pø ja'axi ja ñidios'ajtpy jøts ja tyikjujky'att øy pøn.

39 Winets ja kajpxwejpitøjk winaagin ñømdøø:

—Janch tiigyajpxy, windsøn.

40 Jøts ja ka' y'uknay'a'ejxiníyidi jøts ja tyiktøø'adøøtstit, ne'egi ja y'amondøø.

¿Janch idø'øn ku ja David t'ap'aty ja Cristo?

41 Xjats Jesús ja tnímaaay:

—¿Jøts sudso jade'en mwá'andi jøts ku David ja Cristo t'ap'aty? 42 Pø yide'ents ja David tyikwá'añ ja nøky ku ja tjaay ja Salmos:

Yide'en ja nwindson'ajtim ja Dios Teety ñímaaajyøø:

“Putsinaaky øts n'aga'ñ'ampy,

43 kunim øts yø nmimajadaøkøxt pøn jaty mmidsep'ajtip.”

44 ¿Sudso'ampyts ja David t'ap'aty ja Cristo, pø wyindsøn'ajtpyts ja køømbaat?

Ku ja Jesús tnigajpxi ja kajpxwejpitøjk ja kya'øwyinmaa'ndyi

45 May jaa'y idø'øn íxam amidodujktip ku ja Jesús tnímaaay ja pyabøjkpitøjk:

46 —Øyim mnay'ejx'etidit, ejxim yø kajpxwejpitøjk mdawin'iiñidi kya'øwyinmaa'ñ, jade'en yø ñachøkyidi jøts wyet yø tyeky'ok'am paat tpajidøttit, jøts ja' yø chojktip ja nawyindsø'øgi jøts yø yikajpxpoo'kxtit jam mayjaa'y agujkp, jøts ku yø tsaptøjkjøtpy tyøkidi tum ja tsinaabyajt yø tyatsinaawyandip midi jam tsaptøjk'okp, jøts ku kyaamyidi tum jam yø ñaxti tsinaabyi mā dø'øn yø myøjtøkidit. 47 Nayø'øxi ku'økyø'øxy ja pyikta'aky tpøjkxidip jøts ñadyijyi ñadyagubøjkyidi ja Dios'ajot'ajtin. Ja ti pøn ja', ja ti pøn ñadyijyi jeky'ampy tsapkajpxtip, nayø'øxi ja'adi pøn ka' ti tyiknigaxø'økti, ñadyijyi øy jaa'y'atti. Yø yjade'embi jaa'yts idø'øn Dios møj yik'ayo'op.

21

Ku ja ku'økyø'øxy tpiktaajky lyimunsi

1 Xjats idø'øn ja Jesús ojts t'ixy jap tsaptøjkjøtpy ku ja kumeeñ jaa'y jam wyinaty tku-gonidi ja lyimunsi jam meeñ'abøjk'ii'ñjotp. 2 Jøts ku'økyø'øxy majtsk ja pyujxmeeñu'nk jam tkugo'onímøø; 3 winets ja Jesús ja pyabøjkpitøjk tnímaaay jøts ja wyaañ:

—Janch meets idø'øn nnøjmi, jøts ku yø ku'øktyø'øxy ayoobi ne'egi myinajxpy lyimunsi yø jam Dios wyingujkp øy idø'øn yø kyamaabaadi sam o pøn yja' tpikta'akti. ⁴ Ja' yø iij yojxtip midi yø winda'anxixidip yam yø ku'øktyø'øxy ayoobi ne'egi tpikta'aky ja yiktuujnik ja ñidsinaajyk.

Ku ja Jesús tñigajpxy jøts ku ja tsaptøjkyjett

⁵ Jøts idø'øn niwinaagin jam wyinaty tñimadya'akti ja tsaptøjky, ku ja janch tsuj kyaxi'iky, ku tsaa ja jade'en janch tsuj tmøøt'aty, jøts ja nayide'en chujkaxi'iky midi jam wyinaty pøngapøn tø tyoxti. Xjats ja Jesús wyaañ:

⁶ —Ja'atp ja tiempì ku ya'at kyuja'wigyøxt ixa jade'en x'ejxti, ku yø tsaa ni tu'ugin kyata'ant nikiibyety.

Ku ejxa'an jawyeen yikpikta'akt ku wyinaty ja tñidyu'unin xøøw wyingøñ

⁷ Winets ja tyiktøødøø jøts ja tñimaadyøø:

—¿Juuni windsøn idø'øn ja jade'en yjatt? ¿Ti dø'øn ja yiktanijawip jøts ku dø'øn ja wyinaty jade'en yjatwa'añ?

⁸ Jøts ja Jesús wyaañ:

—Øyim mnay'ejx'etidit, jøts kidi mee tø mniyjajtni ñiwyindaay'ajtk. Kumi may ja mye'endit pøn øts nxøøw nugo nadyanikajpxidip ku ja ñø'ømdit: “Cristo øts”; “Tø kya'pxy ja tiempì.” Kidits mets ja xpanijkxy jatyi. ⁹ Jøts ku xnimado'attit ja tsep, uk tyiktigatsti ja kyutujk adsepkojxp, kidits me mdsø'øgi; pø jawyeenxi dø'øn ya'at jade'en ñajxkøxt, ka'anims idø'øn wyinaty kya'pxy jøts kyugøxit ja naxwii'ñit.

¹⁰ Winets ja tjaaknimaay:

—Ja møj ja mutsk kajp nøjkx ñañibidi'igyidi, jøts ja windsøndøjky cheptu'undit ja xem ja yam pøn jaty ja naajx ja kajp tñitanaadyip ya naxwiiñ. ¹¹ Møk'ampy ujx ñaxt, yuu pa'am ñaxkida'akt øy maðsoo, adsø'jkyibim ja tuki'iyi myiktuk'ejxtit ku ja Dios ejxa'an møk tpikta'akt jam tsajpwemp.

¹² Jawyeents mee myikmajtsmukøxwa'ant, myik'ixa'adit o maðsoo. Kuts myikpaattit jøts myikwanøjkytiti jam tsaptøjkyjotp ma myikti'idyu'undit, myikti'idyit myiktsu'umdit puxøjkyjotpy, ja møj windsøndøjky myiktawinguwawidit pøn jaty yikutujktip, ja'ats idø'øn ja mdukpøky'atidip ku øts nja' xpabøjkyidi. ¹³ Jats meets idø'øn ja nja' xñigubojkit.

¹⁴ Kidits meets ja xwandiijy pøni sa mee mnagyubokit ku mee mnagyu'adsowiyit.

¹⁵ Øts meets ja wijy'ajtin nmo'op, øts meets nyik'ayukpaatp sa mee mwa'ant jøts ja mmidsep nisudso'ampy kya'adsojimbettit, jadi'iñi ja tmi'amo'ondit. ¹⁶ Mdeety paat mdaak paat mee nga'ødyuniyit. Tits ja chow ja mmigu'uktøjkyti jøts ja'adi pøn mminamyaaajyidip, myik'oogidip winaagin meets ja'.

¹⁷ Tum midsep meets o pøn m'ejxit ja'agøjxp ku mee xjanchjawi. ¹⁸ Ka'ats meets jadi'iñi myik'ejxigø'øty, ni tu'ugin meets mwaay kyawindigø'øty. ¹⁹ Pøni mmidanaadyip tu'ugyi amumjoojt, mbaatpts meets ja nitso'ok'ajtin jøts meets m'anmija'win yjujky'att xemikøjxp.

²⁰ 'Ku x'ejxtit yø Jerusaléngit kajp jøts ku amuum tseptumbitøjky tø ñi'awidejtniyi, jade'ents meets ja xñijawit jøts ku yø kajp wyinaty tsojk kyudigøøwya'añ. ²¹ Pøni pønts jam Judeit naxjotp wyinaty, wants ja tkaknøjkytiti jam kojpkøjxp; pøn jaty jam Jerusaléngit kajpjotp, wan ja jam tkakpidsømdi, jøts pøn jaty jam o muum awa'ats etjotp widejttip, kidi ja winet et wyimbetti jøts ja ñøjkytiti jam kajpjotp. ²² Ja'abi xøøw idø'øn ja ayo'on mye'ent, jaa dø'øn ja jade'en yjatt kyubatt sa jaty Dios kyajpxy wya'añ. ²³ ¿Ayo'ijxyim ja tø'øxyøjky yjattit pøn jaty ja myutsk jam wyinaty tñikøjxp'ajttip, pøn jaty ja myaxu'nk jam wyinaty tø kyaxø'økti! Pø j'i'yim ya'axyimxi dø'øn ya naxwiiñ yjatt, møk ja jaa'y ayo'on tpaattit t'ejxtit. ²⁴ Pømbi ookit jam tseptundaajkyjotp, pømbits yikmatstip jøts ja yiktsu'umdit o magajp, øy yø Jerusaléngit kajp øy sa yiktu'unt, øy ja ja'at jaa'y yø sa tyuniyit, kunim ja y'ayo'on yø ttanajxkøxt winetnims yø yikmajtsu'utt.

Sa mye'ent ja naxwii'ñit jaa'y myøjkudanaabyi

²⁵ Wenk yø xøøw yø po' yjatt, yø maadsa' nayide'en; jøts naajx kajp jadi'iñi tya'andit, niti tabyajtin tkapaattit, øy ja tsø'øgi yik'o'jknijidit ku tmado'odit ja mejy tyojmjø'økt øy madsoo. ²⁶ Yik'oo'kjimbetidip jaa'y tsø'øgi ku ja tnmado'odit jøts ku jade'en naxwiiñ yjatwa'añ; jøts ku ja'abaat jade'en yjatt ti jaty jam tsajpwemp ejtp. ²⁷ Jaanimts ø x'ejxtit, ja naxwii'ñit jaa'dyi myøjkudanaabyi, ku nmime'ent yootsjøtpy ja nmøk'ajtin, jajpim tsamambim ja n'aju'uk nyikaxø'økt. ²⁸ Ku dø'øn ja jade'en yjajt'ukwa'ant, møk mnabyikta'agidit jøts xjøp'ejxtit jøts ku tsojk mye'ent pøn myiknitso'ok'atidip.

²⁹ Nayi tyamimadyakpajtiyii'ñ ja' jadu'uk ejxpajtin madya'aky jøts ja wyaañ:

—Ku x'ejxti ja iigi kipy uk øy ti kipy kya'adigach ja y'aay. ³⁰ Ku kujk xyimumni, jats ja wa'ats xnijawidi jøts ku poot wyingøn ku ja nøø ja tuu myenwani. ³¹ Nayide'ents idø'øn ja' ku x'ejxtit jade'en ja ayo'on, jade'ents ja xnijawidit jøts ku wyingøn ja Dios kyutujk midi ja tyanitanaapy yjaa'y.

³² Janch øts idø'øn nwa'añ jøts ku dø'øn ja jaa yjatt namga'anin y'oo'kixy pøn jaty ja ixyam juky'ajttip. ³³ Najxp y'ity ja naajx ja tsajp, øy yø juuni kyudigø'øty, jøts øts n'ayuujk ni juuni yø kyakixy kyanaxy.

³⁴ Øyim mjaa'y'attit, kidi m'aaw mjoojt xamiyoxti midi yiktundigøøpy, kidi ja nøø ja mu'uk xunk'atti, kidi meets ja ne'egi xajotigøydi ti jaty ja ejtp naxwiiñ jøts jade'en adsu'jky mgayikubaadidit ³⁵ sam naky myukyin, jade'en ja yiknime'endit pøn jaty juky'ajttip øy madsoo ya naxwiiñ. ³⁶ Jøp'ejxtits meets, ajot'at'etti ja Dios jøts mniwa'adsidit ja ayo'on midi tunip jatip, jøts ø xwinguwa'agidit amgujk jotkujk, ja naxwii'ñit jaa'y myøjkudanaabyi.

³⁷ Xinaxy idø'øn ja Jesús jam yik'ixpiky tsaptøjkjotp, jøts ja koots ñijkxy jam kojpkøjxp midi yiktejp Olivos. ³⁸ Jøts ja mayjaa'y jam tsaptøjkjotp ejtp xyuminøjkxti jøpyi jøts ja jam pyatmadøyiyi.

22

Ku ja Jesús yikajpxy'aty jøts ja yikmatst

¹ Ja paski xøøw idø'øn wyinaty pyatpy ku ja tsapkaaky yikay jadi'iñi midi kalevaduri møøt. ² Jøts ja teetywindsøndøjkti jøts ja kajpxwejpitøjkti tjanch'ixa'adi ja taay sudsonim ja t'ukyik'ooktit ja Jesús, ja mayjaa'yts ja chø'jkidip.

³ Xjats ja Judas Iscariote ja miku' tyatøjkiyøø, ja' idø'øn ja pabøjkpitøjk møøt kya'pxti nimakmajtsk. ⁴ Jøts ja ojts tñinijkxy ja teetywindsøndøjkti møøt ja tajk mayut, jøts ja ojts tminagyajpxyi, ojts ja tkajpxy'atti sudso ja tkøyakt ja Jesús jøts ja tmatstit. ⁵ Jøts ja jade'en yjotkujk'atti, ojts ttami'awanidi meñ ja Judas, jøts ja ttamiju'udyit ku ja tkøyakt ja Jesús; ⁶ kyupøjk ja jade'en jøts ja t'ixaadyøjkiyii'ñ ja taay, jøts ja winet tkøyakt ku ja mayjaa'y jam kya'ettit.

Ku ja nwindson'ajtim yjaak'uk'a'ux'ajtni ja pyabøjkpitøjk

⁷ Xjats ja xøøw tpaajty ku ja tsapkaaky kyayikay levaduri møøt, xjats idø'øn ja borreegi maxu'nk wyinaty y'ookwa'añ, jøts ja' idø'øn yikyøxy'ajtp ku ja paski xøøw ñaxy. ⁸ Winets ja Jesús tkejxy ja Pedro møøt ja Juan, yide'en ja tñimaay:

—Nøjkxti jøts ja paski a'ux xyik'awejxtit.

⁹ Jøts ja tyiktøødøø yide'en:

—¿Mamts øøts ja xuk'a'ejxiwya'añ?

¹⁰ Jøts ja Jesús ja y'adsoojidøø:

—Ku net jam mgajptøkidit, jam inet tu'uk xpaattit jaa'y pøn jam wyinaty nøø twejtsp tsiijøtpy. Ja'ats mbanøjkxtip jam tyøjkjotp, pøni ma yja'aty jamts mja'attit, ¹¹ jøts ja kudøjk xnøjmidit: “Yide'en ja windsøn wya'añ: ¿Mak idø'øn ja tøjkojtt ma ja tmøøt'a'ux'att ja pyabøjkpitøjk, mak idø'øn ja tka'adyit ja paski a'ux?” ¹² Winets meets inet ja tøjkojtt myiktuk'ejxtit jap nipatøjkijxpy a'ejxi abaadi; japtys xyik'awejxtit ja a'ux.

¹³ Xjats idø'øn ja ojts ñøkxti jøts ja jam jade'en tjanchpattøø sà Jesús ja wyinaty tø ñi'mxyidi, jøts ja jam t'a'ejxidøø ja paski a'ux.

¹⁴ Kuts ja a'ux'ajtk tpaajty, xjats ja Jesús møøt ja kyudanaabyitøjk twinguwa'adsiyi'ñ ja kaabyajt. ¹⁵ Jøts ja tnimaay:

—ixyamnim meets inet ja paski a'ux jade'en nmøøtkaamyuky sam ø ndyimchøkyin namga'aním ø n'øøky! ¹⁶ Janch øts idø'øn nwa'añ jøts ku meets icyamyi jade'eñi njaakmøøtkay jaanim jadigojk ku mye'ent ja Dios kyutujk midi ja tyanitanaapy yjaa'y.

¹⁷ Winets ja tnixajiyi'ñ tu'uk uuji'ñ, jøts ja jawyeen ttukmøjaj'wiyi'ñ ttukunuu'kxyja'wiyi'ñ ja Dios Teety, jøtsnim ja wyaañ:

—Axajidi ya'at jøts x'ukwa'kxtit; ¹⁸ øts kø'øm wamp jøts ku ø ka'ap tsojk n'uk'uknit yø uvi tsa'am nøø'u'nk, jaanim jadigojk ku Dios ja kyutujk tyikme'ent midi ja tyanitanaapy yjaa'y.

¹⁹ Jøts ja tnixajiyi'ñ tsapkaaky, ojts nayide'en ttukmøjaj'wiyi'ñ ja Dios Teety, jøts ja t'adujkpajkxi ja kyudanaabyitøjk jøts ja tmø'øy, yide'en ja tnimaay:

—Kaydi ya'at, yø' øts idø'øn ñamyayi nne'kx'ajtpy midi meets mnitsoojkingøjxp inet mniyoxp. Mdu'undip ya'at jade'en øts nja'myajtsingøjxp.

²⁰ Nayide'en ja uuji'ñ ja ttuñ ku ja y'a'ux'ajtkøjxtøø, jøts ja wyaañ:

—Ya'at tsapnøø'uuji'ñ idø'øn icyam tamp ejxpajtin ku ja Dios Teety ja wyanda'aky tyik'aduky samdam ja ttami'awa'anii'ñ ja naxwi'ñit jaa'y ja nitso'ok'ajtin. Ixyamts idø'øn ja cho'onda'aky ku øts ja nni'jpy inet wyidsu'unt wyidaxt.

²¹ Pønts ø xkøyakp, pøn ø xka'ødyunwamp, icya øts ja møøt ngay, kidi majip ja'. ²² Ja' ø nbadumpy midi ø tø nyiktanipiky; ija' ayo'ijxyim jajtp pøn ø xkøyakwamp!

²³ Jøts ja ñayiktøønaxwaj'kidøø agø'ømyi, pøn idø'øn jade'en ka'øy'adø'øtswamp.

Ku ja Jesús kyudanaabyitøjk tkajpxy'atti pøn idø'øn jawaani møj pidsø'ømp

²⁴ Xjats ja xem yam tkajpxy'ajtpinibøjkidøø pømbi dø'øn jadyimy'ukmøjtøkip. ²⁵ Jøts Jesús ja ñimaajyidøø:

—Jade'en møj windsøn t'ana'amdi ja naajx ja kajp pøni sà ja ttsokti; jøts pøn jaty tñigubajk'ajttip o ti, ja'ats yiktejtjip jøts ku ja t'ødyundi øy pøn. ²⁶ Ka'ats meets idø'øn jade'en mjaa'y'attit; pøni pøn møjtøjkip, pøni pøn ana'amp, kidi ja jawyeen namyiduni ttsøky; ja' idø'øn paat'ajtip ja myigu'uk tpudøkip. ²⁷ ¿Pømbi dø'øn møjtøjkip? ¿Ja' pøn yikwindsø'jkip, uk ja' pøn windsø'jkip mā ja kaadyaajk jam? ¿Kidi ja'ajip møjtøjkip pøn jam tø twinguwaadsi ja kaabyajt jøts ja yikwindsø'øgi? Ixyats meets jade'en nmøøtwidity sam ja' pøn ja myigu'uk wyindsø'jkip.

²⁸ Tøts meets xmøøt'ayo'ombaaty, tø nayide'en xmidanidi wine'enin øts icyam xmøøtwidetti. ²⁹ Paty meets mbaat'atyi nmo'ot ja Dios Teety kyutujk midi ja tyanitanaapy yjaa'y, nayide'en sam øts ja tø xmø'øyin, ³⁰ jøts mga'adyit m'uuktit øts ngaabyajtkøjxp ku øts ja njaa'y ja kutujk ndanitanit, jøts m'ixa'aktit mā ø nyikutukt jøts xiidyu'undit ja Israelit jaa'y niduki'iyi.

Ku ja Jesús kø'øm tñigajpxy jøts ku ja Pedro ja kyu'øønyit

³¹ Nayide'en ja nwindson'ajtim wyaañ:

—Simón, Simón, tyimdyø jøts miku' yja' myøjtøkit. Tø ja t'amidøy ja Dios Teety ja tiy'ajtin jøts meets ja øy øy myik'ayo'ombaadit, yikxon meets ja mduktani'ejxwa'añi; ³² tøts me nni'amidowi jøts kidi yikmimajada'aky ja mjanchja'win ku jade'en m'ukjatt m'ukubatt. Kuts ja m'ajot'ajtin jadigojk tu'ugyi xyik'ett, kajpxjot'amøjkits ja mmigu'uk pøn jaty ø nja'ajtpy.

³³ Jøts ja Simón wyaañ:

—Windsøn'ajtim, ku me m'ukyiktsu'umt, nayide'ents øts nyiktsu'umt, ¿ti ti ø nnida'amp? Mjadyimya'øøky mets, nmøøt'ookpts mets.

³⁴ Winets Jesús ja ñimaajyøø:

—Øts Pedro dø'øn wamp jøts ku tsapni'aaw wyinaty ka'anim y'ayajxji'ikñim, ku mets wyinaty tigøøk ojk tø xku'øø'ni jøts ku me xka'ijxy'aty.

Ku Jesús tnimaay kyudanaabyitøjk jøts ku ja tyagøda'akwa'añidi ja ayo'on

³⁵ Xjats Jesús ja yiktøøjidøø:

—Ku meets ojts nguexy jadi'iñi, ku ja pejn ngadukwejtstøø, ku ja meeñ abøjk'i'iñ ngadukondøø, ku ja mgø'øk paat xkakondøø, ¿sats meets ojts mdyimyjaty? ¿Ti ojts mguidyim'ijtxyidi o dø'øn ja jade'en xkakondøø?

Jøts ja yjanchwandøø:

—Janch ka'ap øøts ojts ti xka'ejtxi.

³⁶ Winets ja ñimaajyidøø:

—Yamnims inet ja pejn xwetstit pøni pøn yja' jam, nayide'en ja meeñ abøjk'i'iñ; pøni pøn ja chujx ka'ejtxip, wan ja ñijan ttøøky jøts ja ttaju'uty. ³⁷ Øts wamp, wan idø'øn jade'en tjaty, jabi kuwanyimxi jade'en yjatt sa Dios kyajpxy wya'añ: “Møøt ka'øy jaa'y ja yik'amachomujky.” Jade'ents øts idø'øn nyiktu'unt sa øts jap tø nyiknigajpxy. Ka'pxy idø'øn ja jade'en yjatt kyubatt.

³⁸ Jøts ja wyandøø:

—Windsøn'ajtim, pø icyats majtsk tsujx.

Jøts ja y'adsøøy:

—Amøñidi.

Ku ja Jesús t'ajot'aty ja Dios Teety jam Getsemani

³⁹ Xjats ja Jesús chø'jñ, jøts ja ñijkxy jam kojpkøjxp midi yiktejp Olivos ma dø'øn ja jam xyumiyø'øy'ity; jøts pyabøjkpitøjk ja pyadso'onøø. ⁴⁰ Kuts ja jam yja'jty, jøts ja ñimaajyidøø:

—Ajot'atti Dios Teety, jøts kidi myikmajada'akti.

⁴¹ Jøts ja ojts yjyø'øy nadyu'uk, ñajtsyø'øyii'iñ nijagam. Jamts ja ñagyuxendyaajkøø, jøts ja jam Dios Teety t'ajot'ajty ⁴² yide'en:

—Dios Teety, pøni mdsøjkpy, jøts ø ka' jadine'en n'ayo'ombaatt; kidi øtsipts nja' kø'øm nyiktumpy, ja ø nbadumpy pøni sa me xamidsøky.

⁴³ Winets ankilis ja tu'uk ñimejnøø midi tsajpjøtpy tso'omp, jøts ja myøjaawmøøjyøø.

⁴⁴ Tyimchaachja'wipts ja møk ku dø'øn ja jade'n yjatwa'añ, jøts ja ojts tjaaktyimyøktuñ tjaaktyimy'ajot'ajty ja Dios Teety amumjoojt. Janch yikxon ja yja'anuu'kxiñi, jade'en y'anuu'kxi ja wyixe'kxy sam ni'jpy kom kom wyixe'kxyin.

⁴⁵ Kuts ja Dios'ajot'ajt'abajtyii'iñ, jøts ja ojts tnimiñ ja pyabøjkpitøjk ma ja jam wyinaty. Maadip ja jam ku ja tpaajty, ja jotmay ja jadi'iñi yikjotkøjxidip. ⁴⁶ Winets ja tnimaay:

—¿Tigøjxp ku mma'adi? Pidø'økti, jøts ja Dios Teety x'ajot'attit jøts kidi mibaat miku' yja' mmimajada'agyidi.

Ku ja Jesús yikmajch

⁴⁷ Nayixam ja Jesús wyinaty jade'en kyajpxy ku yja'jty may jaa'y. Ja Judás ja twinyø'øpy pøn ja pabøjkpitøjk wyinaty nimakmajtsk møøt tø y'uka'pxti, jøts ja twingume'eniyii'iñ ja Jesús jøts ja ojts ttsu'kxy. ⁴⁸ Winets nwindson'ajtim ja tnimaay:

—Judás, ¿jade'eñi øts idø'øn xkøyaky ku ø xtsu'kxy?

⁴⁹ Jøts pøn ja Jesús jam wyinaty møøtwidejtjip, ku ja jade'en t'ejxtøø, winets ja yiktøøjyøø:

—Windsøn'ajtim, ¿nadyagubojkim yø tsujx?

⁵⁰ Jøts ja nidu'uk tyiktsaachiyii'iñ ja teetywindsøn tyumbi, ojts y'aga'ndyatsk ja tkajt-spo'jtjy. ⁵¹ Ka'ap Jesús ñimyy, yide'en ja wyaañ:

—Majtsu'utti; wan jade'eñigøjy.

Jøts ja tkønixajøø ja soldadi tyatsk jøts ja tyiktsøøjky. ⁵² Xjats ja tnimaay ja teetywindsøndøjkti, ja kajpxwejpitøjkti, ja møjaa'dyøjkti wine'enin ja jam winaty tø myendø jøts ja yiktsoonwa'añi:

—Ja tsujx, ja kipy meets yam xanimemp. ¿Ti øts yjawí tø nduni? ¿Tø øts yjawí nmaa'tsni? ⁵³ Ku meets jam y'ijty nxumiminabyaadyi jabom jabom jam tsaptøjkjotp, niwine'enints meets y'ijty sa xkatuñ xkanøjmi; yamts meets winet tø mnaxwa'aky ku ja et tø chuu'ji kyoodsi jøts miku' yja' jade'en myajada'aky.

Ku ja Pedro tku'ñ jøts ku ja ka' t'ijxy'aty ja Jesús

⁵⁴ Winets ja tmajtstøø ja Jesús, jøts ja tyiknøjkxtøø jam teetywindsøn tyøjkwindum; jøts Pedro ja ojts tpanijxxy ix'oojk, jagam ja tpayø'ø. ⁵⁵ Jøts jøøn ja jam tajkyujk'am tyikmøjidøø, jamts ja tnidsinay'awidejttøø jøts ja Pedro nay jam y'ixakmøø. ⁵⁶ Winets tø'øxyøjk ja tu'uk y'ejxøø pøn jam wyinaty tump, jøts ku jøøn ja jam twindsøøni, winets ja tiyim wyin'ejxøø jøts ja wyaañ:

—Yø'øts ja Jesús y'ijty tmøøtwidejtp.

⁵⁷ Ka'ats Pedro ja tkupiky, yide'en ja wyaañ:

—Ka' ø migu'uk ja n'ijxy'aty.

⁵⁸ Jøts jawaandøki y'ijty, xjats jadu'uk y'ejxpajtøø, jøts ja wyaañ:

—Mets yø y'ijty møøtwidijtpy, ¿kidi?

Ka'ats ja Pedro ñiimy, yide'en ja wyaañ:

—Mixy, ka'ap ja y'øtsi, ka' øts ja nmøøtwidity.

⁵⁹ Tø wyinaty tukoori ñaxy ku ja jadu'uk møkta'aky wyaañ:

—Janch yø' tam yø y'ijty myøøtwidijtpy, pø nayi Galileit jaa'yts yø'.

⁶⁰ Xjats ja Pedro wyaañ:

—Migu'uk, nguidyimñija'wip øts pø ti mets jade'en mmadya'kpy.

Jøts nay jatyi nay ixamni ja jade'en kyakajpx'abaadi ku ja tsapni'aaw tu'uk y'ayajxy. ⁶¹ Jøts ja nwindson'ajtim t'ejxjimbijty ja Pedro, winets ja Pedro tja'myejch ku nwindson'ajtim ja wyinaty tø ñi'mxyi: “Ku tsapni'aaw inet y'aya'axt, tø mets wyinaty tigøøk ojk xku'øø'ni jøts ku me ka' x'ijxy'aty, jøts ku me ka' xnijawi.” ⁶² Xjats ja Pedro yø'øpyidsiimy janchniyaxni.

Ku ja Jesús yiktaxi'iky yiktaguyaty

⁶³ Jøts ja jaa'dyi pøn ja Jesús wyinaty tkøjø'øm'ajttip, ojts ja ttaxe'ekti ttaya'axti, jøts kawine'en twinwopti tjøpwopti. ⁶⁴ Ojts ja twindsumdi jøts ja twingoxti tjøpkoxti, yide'en ja tnøjmidi:

—¿Uknajtsjawi pøn yjawí tø mgøxyi!

⁶⁵ Kawine'enin ja tjemnimaadyøø ttenimaadyøø.

Ku ja Jesús yikwaanijkxy jam kutujktaajkjotp

⁶⁶ Xjats ku xyiijndyajky jøts ja jamit møjaa'dyøjk ñamyujkidøø møøt ja teetywindsøndøjkti, møøt ja kajpxwejpitøjkti, jøts ja tyiknøjkxtøø ja Jesús ma ja myøjkutujktaajk ja jamdi. Jøts ja jam tyiktøøddøø yide'en:

⁶⁷ —Tukmadook øøts, ¿janch mets idø'øn myiktejp Cristo midi yiknitsokp?

Jøts ja y'adsoojidøø:

—Ku net njanøjmidit jøts ku ja y'øtsi, ka'ats meets inet xmibøkt. ⁶⁸ Kuts meets inet nyiktø'øtt, ka'ats meets inet x'adsojimbett, nijade'en meets inet xkamajtstu'utt. ⁶⁹ Nay ixyamyits øts inet ja Dios Teety nbu'ixaagit kyutujktaajk jøp'am, pøn ja myøk'ajtin kamaabyim.

⁷⁰ Winets ja niduki'iyi wyandøø, niduki'iyi ojts yiktiyi:

—¿Janch mets idø'øn Dios U'nk?

Jøts Jesús y'adsøøy, yide'en ja tnimaay:

—Øts idø'øn ja', nagyø'øm meets ixa jade'en tø mwa'añ.

⁷¹ Jøts ja wyandøø:

—¿Ti ejxpi ti nija'wibi jaaktsojkiyip? Tøxi adøm yø yam kø'øm ndyimyadø'øyin sa yø kø'øm wya'añ.

23

Ku ja Jesús twinguwa'jkíyí'ñ ja Pilato

¹ Winets ja tyanagyukigyójtøø, jøts tyiknøjkxtøø ja Jesús jam Pilato wyingujkp. ² Jøts ja jam tni'øø'ninaxwá'aktø yide'en:

—Tø øøts yø jaa'y ngubaadi, yø' tkajpxma'tp adøm ja nmigu'uk. Yide'en yø wya'añ jøts øøts ja yjadu'ukpi windsøn ngamigubatt midi ya'at naajx kajp tnitanaapy. Nayide'en øøts yø xnimaamyi jøts ku yø' Cristo, tyimy ja møj windsøn midi yiknitsokp.

³ Xjats Pilato ja tyiktiy:

—¿Janch mets idø'on israelit jaa'y mniwindsøn'ajtpy?

Winets ja Jesús y'adsøø yøts ja wyaañ:

—Janch øts ja', ka' me nugo mwá'añ.

⁴ Jøts ja Pilato tnimaay ja teetywindsøndøjkti møøt ja mayjaa'y:

—Niti pøky yø jaa'y, niti tundigø'øyin yø tkatuñ.

⁵ Tiii møkta'aky ja tyimñømdi:

—Yø', Judeit jaa'y nugo tkajpxma'tp ku kyø'øm wyinma'añ yø ttuk'ixpiky. Jam yø ojts Galilea jade'en y'adøtspinaxwá'aky, jøts yø icyabaat jade'en tpamiñ, icyabaat jade'en tkamajstutu.

Ku ja Jesús twinguwa'jkíyí'ñ ja Herodes

⁶ Kuts Pilato ja jade'en tmadøø, xjats ja tyiktiy pøni janch Galleit jaa'y idø'on ja'.

⁷ Kuts ja ñømdøø jøts ku jade'en, winets ja ojts ttaninijkxy ja Herodes pøn wyinaty møj kudunk'ajtp jam Galilea, tyimbyøn ja wyinatymi jam Jerusalén ja'abi xøøw. ⁸ Kuts ja Herodes twingu'ejxyí'ñ ja Jesús, jøts ja yjantyimxyondaajky; jekyip idø'on ja wyinaty tyimyjawin'ejxwá'añ jøts ja jadine'en ka' twin'ijxñim, tø ja wyinaty yiktamimadya'aky jøts ja jade'en tnijawi, yjöp'ijxpyts ja t'ejxit øy juuni ja myilagri'ajtin. ⁹ Kawine'en ja ttiibyijky, jøts ja Jesús kyidyimy'adsoop ja'. ¹⁰ Exam idø'on ja teetywindsøndøjk wyinaty møøt ja kajpxwejpitøjkti, ja'ats jam møk'ampy jantyimy'øø'ndip. ¹¹ Xjats ja Herodes møøt ja tyumbitøjk ta'ajkin'ampy tjemdundi ttedundi ja Jesús, jøts ja tnixe'ekti ttaxe'ekti, ojts wet ja ttuktatøkidi sam møj windsøn wyetin, jøts ja Herodes ja ttaniguejxy ja Pilato jadigojk. ¹² Winets ja ñamyigu'ukpøjkidøø jadigojk ja Pilato møøt ja Herodes, namyidsep'ajtidip idø'on ja wyinaty.

Ku ja Jesús ñidujkyí'ñ jøts ja y'ookt

¹³ Jøts ja Pilato twaamujky ja teetywindsøndøjkti, ja kudunktøjkti, møøt ja mayjaa'y, ¹⁴ jøts ja tnimaay:

—Meets yø jaa'y ya tø xanimiñ jøts mnømdi jøts ku yø' tkajpxma'aty ja jaa'y; tøts xmadowdi ku tø njatiibyiky, jøts niti tundigø'øyin øts yø ngadapøky'ijxy, øy meets yø jade'en xjani'øøni. ¹⁵ Nayide'en Herodes yø niti tundigø'øyin tkapaajtxi, icyats ja tø tkajxjimbejtnimi jadigojk. Ixats idø'on x'ejxti jøts ku ka' pyaat'aty jøts yø y'ookt. ¹⁶ Nyik'ayo'opts øts inet yø' jøtsnim øts inet yø nyik'awa'atspidsøømt.

¹⁷ Xumijade'ents idø'on ja ttundi ku ja xøøw tpaaty, kuwani dø'on ja Pilato tu'uk ja pøkyjaa'y tjadyimyik'awa'atspidsimy. ¹⁸ Jøts ja ni'ijtyi møk'ampy wyambinaxwá'aktøø:

—¡Yikjawa'ak yø', jøts yø Barrabás ne'egi xyik'awa'atspidsøømt!

¹⁹ Tsep'ejxp idø'on ja Barrabás jam wyinaty jam kajpjojp jøts ja tø yikjaa'y'øøky, ja'ats ja kyubuxøjktøjkíyí'ñ, ja' ja wyinaty tø yiktagudsumi. ²⁰ Yik'awa'atspidsømwampy Pilato ja Jesús, jøts ja ojts tmigajpxy jadigojk ja mayjaa'y; ²¹ ¿maa?, jawaani møk'ampy ja wyandøø:

—¡Yikruspat! ¡Yikruspat!

²² Xjats ja Pilato midigøøk ojk wyaañ:

—¿Timts yø tyimgyubatp? ¿Ti tundigø'øyin adøm yø tø xtyimdyu'unxim? Ka øts yø nbøky'ixy ti yø tyimgyu'oogip. Ja'ayi øts yø nyik'ayo'ot jøts øts yø nyik'awa'atspidsøømt.

²³ Jøts ti dø'øn ja tjantyimdyejti, møk ja tyimdyanidi jøts ja tnøjmidi wan tyikruspety; yjanchka'uk'amonidi ja', jøts idø'øn ja teetywindsøndøjk ja jade'en tnanktyuujnidøø sam idø'øn ja wyinaty tyimyjotkida'akti. ²⁴ Winets ja Pilato ja tkupijky sa ja wyinaty tø wya'andi, ²⁵ jøts ja jade'en tyik'awa'atspidsiimy ja jaa'y pøn ja wyinaty tø t'a'ejxidi. Jøts ja pyidsø'omt ja' pøn jam wyinaty tsumy'ejtp puxøjkjotp, pøn jam wyinaty jade'en tø tkubety ja tyundigø'øyin ku ja wyinaty tø tnankchep'ijxyi ja kajpjaa'y jøts ku ja yikjaa'y'øøky. Xjats idø'øn ja Jesús yikøyajky jøts ja yiktagøddøjkijy'ñ ja mayjaa'y, wan ja ttundi pøni sa ja ttundi chojkingøjxp.

Ku ja nwindson'ajtim Jesús kyiruspejty

²⁶ Kuts ja wyinaty jam tyiknøjkxti ma ja tyikruspattit, winets ja tu'uk tmajtstøø ja jaa'y pøn kugajp'ajtp Cirene, Simón'ajtp ja'. Kyamjotp ja wyinaty chøøñ jøts ja ttaguwa'anidøø jøts Jesús kyirus ja tpagøjyit jøts ja ix'oojk ttabayø'øty.

²⁷ Janch may jaa'y idø'øn ja jam wyinaty payø'øyiyip, may ja tø'øxyøjk yjanchya'axti ku ja jotmay ja tyatøkiyidi, ku ja jade'en tyimykтуñ. ²⁸ Jøts Jesús ja ojts y'ijxyidi jøts ja ñimaajyidøø:

—Meets Jerusaléngit tø'øxyøjkti, kidi ø xkuyaaxidi, kø'ømyi mee mnabyaya'axit jøts ja' m'ejxtip ja m'u'nk m'una'jk, ja' mbaya'axtip. ²⁹ Ja'atp ja et ja xøøw ku pøn wya'ant: “Nekim yø t'ejxti pøn ka'u'nkpattip, pøn nijuuni kayikwidse'etstip, pøn nijuuni y'u'nk tkatsimylejttip.” ³⁰ Jøts ja jaa'y wyambinaxwa'aktit: “Ok øts yø tun yø kojpk ne'egi xnijaanit.” ³¹ Jade'en sam øts ixyam n'ayo'ombaaty niti pøkyøjxp, isats ja tyim'yayo'onbaattit ja Jerusaléngit jaa'y!

³² Namajtsk pøkyjaa'y ja pyaa'yø'øyi ja Jesús jøts ja t'atmøøt'ookt. ³³ Kuts ja jam yja'jttøø ma ja et jam txøøw'aty Calavera, jamts ja tyikruspajttøø ja Jesús møøt ja yjanamajtskpi pøkyjaa'y, tu'uk jaty ja adsow aduuk kyiruspajttøø. ³⁴ Kuts ja ixam wyinaty jade'en yikruspatti, xjats ja Jesús wyaañ:

—Dios Teety, maa'kxuk, ka' yø tnijawidi pøni ti yø tyundip.

Jøts ja soldaditøjk ja wet tniguyajttøø midi ja Jesús y'ijty wyet'ajtpy, jøts ja jamyi agø'ømyi twejtswa'kxtøø. ³⁵ Ixam idø'øn ja mayjaa'y y'a'ejxukti jøts kudunktøjk paat ja ñixi'igyi tyaxi'igyi, yide'en ja wya'andi:

—Tøxi wyenkpi tyiktsø'øky, wants inet yø kø'øm tnankchø'øgyi, pøni janch ja Cristo tam idø'øn yø' pøn ja Dios tø y'a'ejxyi yiknitsokpi.

³⁶ Nayide'en soldaditøjk ja ñixejkmiyøø tyaxejkmiyøø, jam ja wingon wyingunøjkxyi jøts ja ttuk'uukwa'andi ja vino ta'am, ³⁷ yide'en tnøjmidi:

—Pøni mets tam idø'øn mjanchwindsøn'ajtp ya israelit jaa'y ñaxjøøjty kyajpjøøjty, nankñitso'ogits mets jøts mga'ookt.

³⁸ Jøts letri ja jam y'agubajkp yikøxjaay kawinaak jøøjp ja ayuujk, jade'en griego, jade'en latin, jøts hebreo, yide'en ja wya'añ: “Ya'at idø'øn tnwindson'ajtp israelit jaa'y.”

³⁹ Jøts ja pøkyjaa'dyi pøn jam wyinaty kudydi, ja'ats ja nidu'uk migajpxigøøyøø, yide'en ja ñimaajyøø:

—Pøni mCristo tam mets, ¿ti kuts mganankwyinakyi jøts øøts nayide'en xyikwinakt?

⁴⁰ Jøts ja yjadu'ukpi ojts twi'øjy ja myigu'uk, yide'en ja tnimaay:

—¿Ka' mets ja Dios x'uktsø'jkiñi? Jabi nayide'ents jam yjawi mja'ayo'ombaatmi. ⁴¹ Jøts xpaat'ajtim adøm jade'en jøts adøm jade'en ngu'ayo'owant ja nga'øy'ajtin ti jaty adøm tøndu'uñin, mats ya'at niti yø tkatuñ ti dø'øn yø jade'en kyubejtpy.

⁴² Jøts ja yjaakwaañ:

—Jesús, xja'myatspim øts ku mja'att jam mgutujktaajk jøp'am.

⁴³ Jøts Jesús ja y'adsoøjøø:

—Janch øts idø'øn nwa'añ jøts ku øts inet nayamyi xmøøtnøjkxt jap tsajpjøtpy.

Ku ja nwindson'ajtim Jesús y'ø'jky

44 Ja dø'øn ja xøøw wyinaty kyuki ku jotmøñ kyoodsiyii'ñ, jøts ja et kugoots tyaañ, jaanim xiiñi jadigojk tigøøk yaxp. 45 Kuts ja xøøw wyingoodsiyii'ñ, jats ja tsaptøjk awejtstuk kujkwa'kxy, winet tyakø'jtsiyii'ñ. 46 Jøts ja Jesús møk'ampy wyaañ:

—Dios Teety, pøjkjø'øgik øts n'anmija'win.

Ja'ayi ja jade'en yjaakwaañ jøts ja y'ø'jky.

47 Xjats kuts ja romit soldadi mayut ja tuki'iyi jade'en ojts t'ixy sa jaty idø'øn yjajty kyubejty, jøts ja tmøja'wiyii'ñ tkunuu'kxyja'wiyii'ñ ja Dios, yide'en ja wyaañ:

—Janch øy jaa'y tam idø'øn yø', ka'ap yø pyøkyjaa'dyi.

48 Pøn jaty jam wyinaty, pøn jaty ja jade'en t'ejxtøø tnija'widøø, niyaxni ja jam cho'onidøø. 49 Jøts pøn jaty ja Jesús ijxy'ajtip, jøts ja tø'øxyøjkti pøn ja jam Galilea wyinaty tø pyadsøøñiyi, ja'ats idø'øn jam jagam ojts t'a'ejxukti ti jaty tuujnøø jajtøø, wa'ats ja t'ejxkøjxtøø.

Ku ja Jesús ñine'kxy yikpiktaajky jap oo'kpi tsaa jutjøtpy

50 Jamts wyinaty tu'uk ja jaa'y midi janch øy jaa'y'ajtp, ka'ap ja pøn tmidundigøy, José ja xyøøw'ajtpy, jam ja Arimatea kyugajpi, nayjam idø'øn ja kajp tyañ Judeit etjotp. Nay jamts idø'øn ja tyuñ jam kutujktaajkjotp ma ja israelit jaa'y kyutujk'adsøønidi.

51 Y'awixpyts idø'øn ja José ja' ja Dios kyutujk midi ja tyanitanaapy yjaa'y, jade'ents ja ka' tkupiky sa ja møøtkutujk'adsinaabyi wyinaty tø y'adø'øtsti. 52 Ja'ats ojts tninijky ja Pilato jøts ja t'ats'ijxy jøts ja t'amidoojøø ja Jesús ñine'kx. 53 Kuts ja tyikruswinajky, winets ja tpoopwet'amøjch jøts ja tpiktaajky ma oo'kpi jut ja wyinaty yikxon tø tyik'øyi, tøjku'ngin ja wyinaty tø tpejkxjuty ja tsaa, nipøn oo'kpits jap kyayikpikta'akñim, tyimñay'amaay ja y'ity. 54 Ja'abi xøøwts ja øy ti tjaaktyimdyungøxti jøts t'amaay'atti kyimjabom ja poo'kxin xøøw.

55 Jøts ja tø'øxyøjk ñøjkxtøø pøn wyinaty tø tpadsoondi ja Jesús jam Galilea, jøts ja t'ats'ejxtøø ja oo'kpi jut, ojts ja t'ejxti ku ja oo'kpi jap yikpiktaajky. 56 Kuts ja wyimbejtnidøø, ñøjkxnidi jam tyøjkjotp jøts ja ojts t'a'ejxidi ja pa'akxuu'kpi møøt ja aceite, jødsyim ja t'amaay'atti ja poo'kxin xøøw sam wya'añ ja Dios kyutujk.

24

Ku ja nwindson'ajtim Jesús yjukpyijky jadigojk

1 Kuts ja yjadu'ukpi samaan tyøjkii'ñ, ku myidukxøøw'ajty, winets ja tø'øxyøjk wyimbejttøø jøts ja ñøjkxtøø jøpyi jøpyi ma ja oo'kpi jut jam, jøts ja ojts tyiknøjkxti ja pa'akxuu'kpi midi ja wyinaty tø tyik'øyidi; ojts ja yjadu'ukpi tø'øxyøjk ja tmøødidi.

2 Kuts ja jam yja'jttøø, jøts ja oo'kpi jut ja tpattøø jøts kudam y'agø' ja kya'uknayjamini;

3 tøjkidøø dø'øn ja jam jøts ja ka'ap t'ukpaajtniyidøø ja nwindson'ajtim ñine'kx. 4 Jøts ja yjanchø'jkidøø, nisudso'ampy ja kya'ukwinmaa'nbyatnidi pø ti dø'øn tyu'undip jøts ku ja tjaaktyimy'ejxpattøø namajtsk ja jaa'y jap wingon wyindaniyidi, janch jajp tsamamp ja wyet tmigaxø'økti. 5 Kumi janch tsø'jkidip ja wyinaty jøts ja nugo ñaxkoodøø, yide'en ja ñimaajyidøø:

—¿Jadits ya x'ixa'adi oo'kpi agujky midi tø yjukpyøkni? 6 Ka'ap ja ya pøn, tø ja yjukpyiky. Ja'myatsti sa ja mnimaajyidøø jam Galilea ku ja jaak nay jam wyinaty, 7 ku ja wyaañ jøts ku ka'øy jaa'y ja yiktagidøkit, ku ja kyiruspatt, jøts ku ja kidigøøk xøøw yjukpyøkt.

8 Jøts idø'øn ja tjanchja'myajtstøø ja Jesús y'ayuujk sa ja wyinaty tø wya'añ, 9 jøts ja jam cho'ondøø ma ja oo'kpi jut jam jøts ja wyimbejtnidøø, ka'pxy ttamimadyakøjxtøø ja yjanimaktu'ukpi kudanaabyidi jøts pøn jaty jam wyinaty. 10 Ja María Magdalena, jøts ja Juana, jøts ja yjadu'ukpi María midi ja Jacobo tyaak'ajtpy, jøts jadu'uk ja tø'øxyøjkti, ja' dø'øn jade'en ojts yjatti jøts ja ttamimadyakøjxtøø ja kudanaabyitøjkti. 11 Jøts ja kudanaabyitøjkti ka'ap ja tmibøkti ku ja tø'øxyøjk ja jade'en tyamimadya'agyidi pø sa ja tijy yjatti.

¹² Xjats ja Pedro chøø'ñ jøts ja ojts pyujtnijkxy ma ja oo'kpi jut jam. Kuts ja kyu'ejxyi'ñ jøts ja t'ejxpaajty ja poop wet jøts ku ja jagam wyøjnaañi. Kuts ja wyimbijty tyøjkjotp jøts ja janch ñigyumaap tja'wiyi'ñ ku døø'n ja wyinaty jade'en tø yjaty.

Ku ja nwindson'ajtim Jesús ñanky'ijxyi jam Emaús tuu'am

¹³ Winets ja pabøjkpitøjk namajtsk nay ja'abi xøøw ñøjkxti jam ma kajp txøøw'aty Emaús, tuk'ajopyø'øyu'ngin idø'øn ja tyø'ødyi ku choondi jam Jerusalén jøts ja jam ñøjkxti. ¹⁴ Ja' ja jam wyinaty ñigajpxtip ñimadyaktip sa døø'n jade'en wyinaty tø yjaty; ¹⁵ ixam idø'øn ja kyajpxti myadya'akti wyinaty, ja' ja jam kyajpxy'ajttip ku Jesús ja ñimejnidøø wingon jøts ja myøøtyø'øydøø. ¹⁶ Yja'ejxtip ja wa'ats, jadi'iñits ja yikmøñidi yiktukyidi pø pøn ja jade'en. ¹⁷ Xjats Jesús ja yiktøjidøø:

—¿Ti døø'n ja jaa mgajpxy'ajttip ku ixa jade'en mduu'yø'ødyi? ¿Ti mdajotmay'oo'ktip, sa mjatti?

¹⁸ Xjats ja nidu'ugin y'adsoodøø, ja Cleofas idø'øn waan:

—Tyumnija'widip ja jaa'y ixyam ti tø tyuñi yjatyi jam Jerusalén. ¿Kidi mets mjam'ajty, pø mets inet idø'øn ja nadyu'uk mganija'wip?

¹⁹ Jøts ja ñimaajyidøø:

—¿Timts jam ti yjatyi?

Jøts ja tnimaadyøø:

—Ja Jesús øøts idø'øn ndijpy, ja Nazaretit jaa'y, midi Dios Teety yikmøjkugajpxy'ajtip ku ja tkajpxwa'kxy ja y'ixpøjkin u ku ja ti ttuñ. ¿Ti ja kya'ukjajtpy? Myinajxpts ja jam Dios wyingujkp, jøts nayide'en ma naaxwii'ñit jaa'dyi. ²⁰ Ja teetywindsøndøjk ja tø tkøyakti møøt ja nwindsoøndøjkti jøts ja yiktaguwanit ja o'jkin jøts kyiruspatt. ²¹ Ja' øøts ja jaa ndyimy'ukjøp'ijxpy jøts ja jekyip tnigubøky yø Israelit naajx yø Israelit kajp. Ixyamts ja tyigøøkxøøwip jade'en yjajtni. ²² Øy øøts ja tø'øxyøjk winaagin tø xjanøjmi adsø'jkibim, ku ja tø y'ats'otsti ixyam jøpy ma ja oo'kpi jut jam, ²³ ka'abik ja tø tpaatti ja Jesús ñine'kx, jøts øøts ja tø xninijkxy, tuki'iyi tø xamimadyakixy jøts ku ja tø t'ejxti namajtsk ja ankilis jødsik ja tø ñii'mxyidi jøts ku ja Jesús yujky'aty. ²⁴ Winets øøts ja nmigu'uk winaagin jatyi tø yjanøjkxti ma ja oo'kpi jut jam, jødsik ja jam jade'en tø tjanchpaatti sa ja tø'øxyøjk tø tnigajpxti, ka'adsik ja ma tø t'ejxti ja Jesús.

²⁵ Xjanimts Jesús ja ñimaajyidøø:

—Niwine'enin mjanchkaja'gyukidi, meets tsaachkujuunjaa'dyi, jeky meets ja xøøw ja jumøjt ja xukminaxy jøtsnim meets ja xjanchwawit sa jaty ja Dios kyugajpxy wyandøø! ²⁶ Jabi kuwañimxi tyimbyaat'aty ja Cristo jøts ja jawyeen y'ayo'ombaatt jøtsnim ja tpaatt ja windsø'jkin winja'win o madsoo.

²⁷ Xjats ja Jesús tyukmadoobinaxwa'jkidøø sa ja Dios kyajpxy wya'añ ma jaty ja jap yiknigajpxy tøøyip, ja' ja ñigajpxøjkxyi'ñ sa wya'añ midi ja Moisés ja Dios tukjajyøø jøts ja tnigajpxkijxy sa jaty ja yjadu'ukpi kugajpxy wyinaty ja Dios tø tyukjaadyañidi.

²⁸ Kuts ja jam kyajptøjkidøø ma døø'n ja jam wyinaty yja'atwa'andi jøts ja Jesús yjaaktyimñøjkxwa'añ, tyimñaxwamp ja jam. ²⁹ Jøts kuwani tyiktandøø, yide'en ja tnimaadyøø:

—Møøt tank øøts ya, pø tøts chuu'jini, koodsiwyanipts.

Xjats ja Jesús ja jam jade'eñi myøøtaajnidøø. ³⁰ Kuts ja tmøøt'ixaktøø, tø wyinaty twinguwaadsidi ja kaabyajt, ixam ja chinaañidi ku ja tnixajyiyi'ñ ja tsapkaaky, jøts ja ojts tkunuu'kxy, jøts ja t'adujkpajky, jøts ja tyagiko'oniyidøø. ³¹ Winets wyeen ja nay jatyi wyatstøø, jøts ja t'ejxkajptøø jøts kudam ja' Cristo; jøts ja nay jatyi ñanky'ejxigø'øñiyi.

³² Jøts ja ñawaajnidøø:

—Kidi janchjotkujk adøm yø tø xyikajtyim ku tuu'ajy tø xamimadyaajkyim ja Dios kyajpxy.

³³ Xjats ja niwine'enin kyata'anidøø kya'amøjkidøø, jatyi ja jadigojk tyuu'døjkidøø jøts ja wyimbejttøø jam Jerusalén, jamts ja tpatøø ja ñimaktu'ukpi kudanaabyidi, tø ja jam wyinaty ñamyukyidi møøt ja myigu'uktøjkti. ³⁴ Jøts ja ñimaajyidøø:

—Janch tøts ja nwindson'ajtim yjujkpyiky, yø Simón tø tyimy'ixy.

³⁵ Jøts yja' ja tñimadyakmidøø sa ja wyinaty tø yjatti kyubatti jam tuu'am, jøts sudso ja wyinaty tø t'ejxkapti ja Jesús ku ja t'adujkpajky ja tsapkaaky.

Ku ja nwindson'ajtim Jesús ñanky'ijxyi ma ja pyabøjkpitøjk jam

³⁶ Examni dø'on ja wyinaty jade'en ñawya'añidi ku ja Jesús jam ñanky'ejxøø jadigojk ja' y'agujk'amdi ma ja jam wyinaty, jøts ja ojts kyajpxpoo'kxidi, yide'en ja ñimaajyidøø:

—Dios mjagyepyidi.

³⁷ Jadi'iñi ja myondi tyukti, tsø'øgi ja jadi'iñi yikmajadaktip, jade'en ja wyinmaydi pø nugo ja tijy y'ejxjoosti. ³⁸ Yide'en ja Jesús ja ñimaajyidøø:

—¿Tigøjxp ku mdsø'øgidi, ti mdsø'jkidip? ¿Tiku xkajanchjawidi? ³⁹ Ejxidik øts ngø' ndeky. Pø øtsts idø'on kø'øm. Tondik øts, ejxtik øts; pø ka'ats ejxma'jtin ñine'kx møødi, ni pyajk niti ja jade'en kya'ejtxi, sam meets ixyam x'ijxy tuki'iyi nmøøt'aty.

⁴⁰ Kuts ja jade'en tyukmadøjidøø jøts kyø' tyeky ja tñanky'ejxøø. ⁴¹ Kumi nika'anims ja wyinaty yikxon ttajotkukidi jøts ja tjanchjawidit, jade'en ja xyonda'akti, jade'en ñigyumaap tja'wi'adø'øtsti, xjats Jesús ja ñimaajyidøø:

—¿Ka'ap ja ti jii'kxy xmøødidi?

⁴² Jøts ja tmøødyøø tukpidasi ja ajkxtsa'ayu'nk møøt ja jømbya'aku'nk, ⁴³ jøts ja t'axajyii'ñ jøts ja ojts jamyi tji'kxy ja' wyindumdi. ⁴⁴ Winets ja ñimaajyidøø:

—Jade'en øts idø'on tø njaty sa meets ojts ndukmadøyin ku meets ja y'ijty njaakmøøtwidity, jøts ku øts jade'en wyinaty njatwa'añ sa øts jap nyiknigajpxy ma ja kutujk Moisés Dios tyukjajyøø, jøts nayide'en jap nøkyjøtpy midi ja yjadu'ukpi kugajpxy yjaadyandøø, jøts nayide'en sa ja nøky tñigajpxy jap Salmosjøtpy.

⁴⁵ Xjats ja Dios kyajpxy ja tyukja'gyukyidøø, ⁴⁶ yide'en ja ñimaajyidøø:

—Jade'en jap yja'ayi jøts ku ja Cristo y'oøkt, kyidigøøk xøøwts ja yjujkpyøkt ku o'jkin ja tja'uk'ext; ⁴⁷ jøts ja yiknigajpxwa'kxt o manaajx o magajp, ku ja ya Jerusalén cho'onda'akt jawyeen, jøts ku ja'agøjxp yiknøjmidit o pøn, wan ja chinaa'yin tyiktigatsti jøts yikpojkipimaa'kxtit. ⁴⁸ Meets, wa'ats mdyimy'ijxpy mdyimñija'wip sa jaty tuki'iyi tyuñi yjaty. ⁴⁹ Madowdits, ndanigaxp meets ja' midi øts ja Dios Teety tø xamiwandaagi; yaayits meets m'awext ya Jerusaléngit kajpjøøjty kunim ja mbaadidit ja møk'ajtin midi jap tsajpjøtpy kidakp.

Ku nwindson'ajtim Jesús chajpejty

⁵⁰ Xjats idø'on Jesús ja jam kajpjøtp wyaabidsøøjmidøø, jøts ja yiknøjkxidøø jam Beta- nia, ojts kyø' ja tyanixajyidi jøts ja kyunuu'kxidøø. ⁵¹ Kuts ja jade'en kyunuu'kxidøø, jøts ja myajtstujtidøø, jøts ja chajpejty. ⁵² Jøts ku ja wyinaty tø t'ukwindsø'øgidi t'ukwinjawidi, xjats ja ojts wyimbejtnidi ñøjkxnidi jotkujk'atyim jam Jerusalén, ⁵³ xumijam'ajttip idø'on ja' jam tsapøjkjøtp jøts ja jam tmøjawidi tkunuu'kxyjawidi ja Dios. Jade'en ja y'ejxi tyiyi.

JA ØGYAJPX̄Y JA ØMYADYA'AKY MIDI JA JUAN YJAAY

Ja' p̄on xuk'ejx̄imp xuknija'wimp ja Dios Teety

¹ Jaayim ja wyinatyni p̄on xuknija'wimp ja Dios ku tuki'iyi cho'ondakijx̄nim; Dios ja m̄oet tyimy'ity j̄ots nayi Dios ja k̄o'm. ² Tso'onda'agyip ja m̄oet y'ity. ³ J̄ots ja' ja Dios Teety tukyik'ø'yiyi ja tsajp j̄ots ja naajx j̄ots tuki'iyi; p̄o ka'axi ja nāxwii'ñit jeexyip cho'ondaajky ku jeexyip kya'ity ja'. ⁴ Ja' tyikts'o'ndaajk ja tsinaa'yin j̄ots ja jujky'ajtin, j̄ots nayide'en xuknija'windi ja tyiiby ja yjanchpi, midi tyik'øyip midi tyikwinaa'nbyatp ja nāxwii'ñit jaa'y. ⁵ M̄ok ja tyikmajada'aky ja mȳok'ajtin ku xyikudøø'kxaajka'am ma p̄on wimbeets kugoots, j̄ots ka'ap ja miku' yja' myajada'aky.

⁶ Jats id̄o'øn jaa'y tu'ukmi p̄on Dios ojts kyexyi, Juan ja xyøøw, ⁷ midi testigi'ajtpi meen j̄ots ja t̄nigajp̄xt j̄ots ja t̄nimadya'akt p̄on xyikujajtaajkimp xyikudøø'kxaajkimp, j̄ots ja øy p̄on t̄tiyjawit t̄janchjawit p̄oni sa jaty ja wya'añ. ⁸ Kidi ja Juanipxi ja' p̄on xyikujajtaajkimp xyikudøø'kxaajkimp; nugo testigi'ajtpi ja ja'ayi yikexy j̄ots ja' t̄nigajp̄xt. ⁹ Tyimy ja' id̄o'øn wyinaty memp ja'tp ya nāxwiiñ p̄on tyik'øyip tyikpaadip, p̄on tyikwinmaa'nbyatp ja nāxwii'ñit jaa'y.

¹⁰ Ixa ja wyinaty t̄o yja'tni ya nāxwiiñ j̄ots ja ojts n̄ip̄on kyagupikyiyi p̄on jaty jaadi, øy ja wyinaty k̄o'm t̄o yjadukyik'øyiyi ja nāxwii'ñit. ¹¹ Kyøøm ja' ja yjanimimpy j̄ots kyøømiguluktøjk paat ja ka'ap kyupøjk̄iyøø. ¹² Jats winaagin p̄on ja kupøjk̄iyøø j̄ots p̄on ja janchja'wiyøø; ja'ats ja t̄iy'ajtin ja ojts tm̄o'øy j̄ots Dios Teety ja y'u'nk'at̄idit. ¹³ T̄iy'ajtingøjxp ja jade'en Dios y'u'nk'atyidi, ka'ap ja jade'en sa jaa'y y'u'nk y'una'jk t̄paatti.

¹⁴ J̄ots ja' p̄on xuknija'wa'am ja Dios, ojts ja jaa'yin y'atsøøni y'atstani, j̄ots ja ojts ñiyjegy xm̄oet'ijtyindi xm̄oetsinaa'yindi. T̄o ad̄om mȳok'ajtin ja nja'ijxyindi midi ja kyøøm̄ok'ajtin'ajtpy ja Dios U'nk. Tu'ugyi Dios Teety ja yjanchjaakjagyepyi, janch pa'ayoop, j̄ots tum ja t̄iy'ajtin janch'ajtin yajkpy. ¹⁵ Ja'ats ja Juan ojts t̄nigajpxy j̄ots ja yide'en wyaañ:

—Yøøxi øts id̄o'øn ndijpy ku ø nwa'añ: “Ja' p̄on oojknim me'emp, ja' id̄o'øn m̄oj j̄ots ka'ap øts. J̄ots kumi jaayim yø' wyinatyni, kidinim øts.”

¹⁶ Kajaa ad̄om Dios kyunuu'kxin xm̄oet'ijtyindi ni'ijtyi. Juuni ja tkayaky. ¹⁷ Tøts ja Moisés kyutujk xuknija'wa'am sa ja Dios kyutujk; ixyats ja nwindsin'ajtim Jesucristo p̄on xuknija'wa'am ja Dios pya'ayo'owin j̄ots ja tyiy'ajtin yjanch'ajtin. ¹⁸ Nijuuni p̄on tka'ijx̄nim ja Dios; yøøts midi jam m̄oet y'ity, yø Dios U'nk, yø xuknija'wa'am sa ja Dios Teety.

Ku ja Juan Bautista t̄nigajpxy ku ja nwindson'ajtim Jesucristo myeenwa'añ

¹⁹ Winets ja israelit jaa'dyi midi jam kugajp'ajttip jam Jerusalén, ojts tkaxti ja teetyøjk m̄oet ja levijit jaa'dyi midi t'ejx'ejttip ja tsaptøjk, j̄ots ja t'atst̄iibyøktit ja Juan p̄on id̄o'øn ja'; ²⁰ j̄ots ja ojts wa'ats t̄nigajpxy, yide'en ja wyaañ:

—Ka øtsip ja' midi yiktejp Cristo.

²¹ Xjats ja t̄jaaktyimdyiibyøjktøø:

—¿Pønts mets id̄o'øni? ¿Mets id̄o'øn Dios kyugajpxy midi yiktejp Elías?

J̄ots ja Juan wyaañ:

—Ka'ap ja y'øtsi.

J̄ots ja t̄jaaktyimdyiibyøjk'ad̄o'øtsti:

—J̄ots, ¿metsimts id̄o'øn ja' midi d̄o'øn menwamp midi ja Dios kyugajpxy'ajtpy?

J̄ots ja y'adsøøy:

—Ka'.

²² Winets ja yiknimaay:

—¿Pønimts mets? Kuwanixi øøts ja nnijawit jøts øøts ja ndukmado'ot pøn øø tø xkexy. ¿Sa me m'ukwa'añ ku mga'uknañigajpxy?

²³ Jøts ja Juan ja t'adsøøy:

—Øts ja' midi yikmadoop y'ayuujk jam abak etjotp, ma niti kya'ity: “Yiktøwdi yik-tuda'akti ja mwinmaa'ñ jøts xkupøktit ja nwindson'ajtim” —nayide'en sam ja Isaías wyaañ, ja Dios kyugajpxy.

²⁴ Ja fariseotøjk ja wyinaty tø kyexyidi midi idø'øn ja Juan jam jade'en møøt ñagyajpxy.

²⁵ Xjats idø'øn ja Juan yiktiibyijky jøts ja yiknimaay:

—Pøni ka'adam me mCristo, ni mga'Elías, jøts ni Dios me mgagugajpxy'aty, ¿tits ku myiknøbety?

²⁶ Jøts ja Juan tnimaay:

—Nøø øts iiy nduktanøbejtpy; jats ya tu'uk midi ka' x'ejxkaptinim; ²⁷ oojknim ja mye'ent, ja' tu'uk møj, nugo øts jawyeen nyiktuu'awa'ach. Nijuuni øts ja møøt nganamyibaat'atiyit.

²⁸ Jam idø'øn ja jade'en yjajty ma ja et jam txøøwi Betábara, midi tãmp xøbidsimy jam nøø agø'øm midi txøøw'ajtp Jordán, ma ja Juan jam ojts yiknøbety.

Ja Jesucristo yiktamiyoxp ja Dios Teety adømgøjxp

²⁹ Xjats ku kyimjabom'ajty winets ja Juan ojts t'ixy ja nwindson'ajtim Jesús ku ja jam wyinaty ñimiñiyi, jøts ja Juan wyaañ:

—Ejxti, yø' idø'øn jade'en jatwãmp kubatwãmp sam ja borreek u'nk yikyøxyin adøm nbojkpi køjxp, jøts yø' naxwii'ñit jaa'y tyikpøkwyat'asp. ³⁰ Yø' øts idø'øn ndijpy ku ø nwa'añ: “Ja tu'uk jaa'y myiñ, ja' idø'øn møj jøts kidi øts, jøts jaayim ja'ani.” ³¹ Nika'ap øts yø' y'ity nnijawit pøni pøn yø'. Tøts ø nmiñ jøts øts Israelit jaa'y nøø nduktanøbatt jøts nduknijawidit pøn ja'.

³² Nayide'en ja Juan wyaañ:

—Tø øts ja Espíritu Santo n'ixy jøts ku kyida'aky jam tsajpwemp sam tsapakin, jøts ja tø kyøxke'eky yø' kyubajkp. ³³ Ni nganijawit øts yø' pøni pøn yø'; jøts øts idø'øn ja Dios Teety ojts xnøjmi midi øts nøø xukyiktump ku nyiknøbety, yide'en øts ja xnimaay: “Ku x'ext ja Espíritu Santo kyida'akt jøts y'ixa'akt jam tu'uk jaa'y kyubajkp, ja'ats idø'øn ja wyinaty midi ja Espíritu Santo xmø'øyimp ku ja yiknøbatt.” ³⁴ Tøts ø n'ixy, jøts øts testigi jøts ku yø' Dios U'ngi.

Ja jaa'y pøn ojts jawyeen tpabøkti ja Jesús yja'

³⁵ Xjats ku kyimjabom'ajty, ixam ja Juan wyinaty køjmyi møøt namajtsk pyabøjkpi. ³⁶ Jøts ku ja Juan ojts t'ixy jøts ku jam wyinaty ñaxy ja nwindson'ajtim Jesús, winets ja wyaañ:

—Ejxti, yø' idø'øn jade'en jatwãmp kubatwãmp sa borreek u'nk yikyøxyin adøm nbojkpi køjxp.

³⁷ Ku ja' tmadoodøø midi ja Juan pyabøjkpi'ajtpy, midi jam wyinaty namajtskti ku ja Juan jade'en wyaañ, xjats ja ojts tpanøjkxti ja nwindson'ajtim Jesús. ³⁸ Winets ja nwindson'ajtim Jesús y'ejxjimbijty, jøts ojts t'ixy jøts ku jam yikpayø'øy, jøts ja ojts tnøjmi:

—¿Ti m'ixaadyip?

Jøts ja ojts t'adsowdi:

—Windsøn, ¿ma me ndsøøni?

³⁹ Jøts ja nwindson'ajtim Jesús y'adsojimbijty:

—Men x'ejxti.

Xjats ja ojts ñøjkxti jøts ja ojts t'ejxti ma chøøni, jøts ja jam ojts tmøøtkudsuu'idi. Ja dø'øn ja xøøw wyinaty jawaani kyagidakni.

⁴⁰ Ja Andrés idø'øn ja', ja Simón Pedro y'uch, midi idø'øn ja jade'en tmadoodip namajtsk ku ja Juan jade'en wya'añ. Jøts nay ja' idø'øn jade'en tpanøjkxtip ja nwindson'ajtim Jesús.

⁴¹ Jøts ja Andrés tyimñayjatyi ja ojts t'ats'ixa'ay ja y'ajch Simón, jøts ja ojts t'atsnøjmi:

—Tø øøts ja Mesías nbaaty midi Dios kyejxpy, midi Cristo yiktejp.

⁴² Xjats ja Andrés ojts twaanijkxy ja Simón mā ja nwindson'ajtim Jesús jam wyinaty, jøts ku ja ojts y'ijxyi jøts ja ojts ñii'mxyi:

—Mets Simón, ja wa'axi me m'u'nk'ajtip ja Jonás. Cefas inet ixyam mxøøw'atp.

Jade'en ja ñii'mxyi ja nwindson'ajtim. Cefas jade'en tyijpy Pedro sam ja t'ayuujk'atti.

Ku ja Jesús twaadsøoy ja Felipe jøts ja Natanael

⁴³ Jøts ku kyimjabom'ajty, jam ja nwindson'ajtim Jesús wyinaty ñøjkxw'añ Galilea etjotp, ku ja tminabyaajti ja Felipe jøts ja tnimaay:

—Møødik øts.

⁴⁴ Jam Betsaida ja Felipe kyugajp'aty nay jam mā ja Andrés kyugajpi møøt ja Pedro.

⁴⁵ Winets ja Felipe ojts ñijkxy jøts ja ojts t'ats'ixa'ay ja Natanael, jøts ja ojts t'atsnøjmi:

—Tø øøts ja jaa'y n'ixy midi ja Moisés ñigajpxpy jap nøkyjøtpy ku ja kutujk ja ojts tja'ay, jøts nayide'en midi ñigajpxtip ja Dios kyugajpxtyøjkti, ku ja ojts tjaadyandi. Ja Jesús ja' midi ja José y'u'nk'ajtpy, midi jam kugajp'ajtp Nazaret.

⁴⁶ Xjats ja Natanael wyaañ:

—¿Wan ndejin y'øybi jam y'ukpidsømni Nazaret?

Jøts ja Felipe y'adsøoy:

—Men xtyimy'ixy.

⁴⁷ Kuts ja nwindson'ajtim Jesús ojts t'ixy jøts ku ja Natanael jam ñimiñiyi, winets ja wyaañ:

—Ixya net myiñ tu'uk nmigu'uk israelit jaa'y midi øyjaa'y'ajtp, midi ka' tyaayi.

⁴⁸ Winets ja Natanael ja ojts yiktiyiyi:

—¿Sudso'ampy me x'ijxy'aty?

Jøts nwindson'ajtim Jesús ja ojts ñii'mxyi:

—Tøyimxi me wyinaty n'ejxni ku mets yø Felipe ka'anim wyinaty m'atswayinim, ku mets ixajp iigi patki'py.

⁴⁹ Winets ja Natanael wyaañ:

—Windsøn, mets idø'øn Dios U'nk, jøts mets idø'øn mniwindsøn'ajtpy israelit jaa'y.

⁵⁰ Jøts nwindson'ajtim Jesús ja ojts yide'en y'adsøyi:

—¿Jaty me xtyimyjanchjawi ja'agøjxp ku me tø nnøjmi jøts ku me tø n'ixy jap iigi patki'py? M'ejxpnim mets ja myøjpi y'øybi midi ø ndu'ump midi ka'ap yjade'eni sam ya'adin ku me tø n'ixy.

⁵¹ Jøts ja nwindson'ajtim Jesús yjaaktyimwyaañ:

—Meets yam ndyimñimaapy, jøts ku x'ejxtit ja tsajp y'awa'ats, jøts ku Dios y'ankilis pyattit wyinaktit jøts øts ja xnigida'aktit, ja' kuxi øts ja naxwii'ñit jaa'y ngudani Dios Teety wyingujkp.

2

Naxyøduujnidip ja jaa'y jam Galileit etjotp

¹ Kyimdigoøk xøøw wyinaty tø y'ity ku jaa'y y'amajtskidi mā ja kajp txøøwi Caná, jam Galileit etjotp. Ixam idø'øn ja nwindson'ajtim Jesús wyinaty tyaak. ² Jøts nayide'en ja nwindson'ajtim Jesús wyinaty tø yikwaamidi migaabyi mi'ukpi møøt ja pyabøjkpitøjk jøts ja nay jam ñøjkxtit. ³ Xjats ja vino tyimgyijxy, winets ja nwindson'ajtim Jesús ja tyaak ñimaajyøø:

—Tø tyimgyugøxidi, ka'ap vino ukteeni.

⁴ Jøts ja nwindson'ajtim Jesús y'adsøoy:

—¿Ti øtsimts taak yø xpatp? ¿Tiku øts yø xukmadøy? Pø ka'anixi øts nja' xpaaty midi ø ndu'ump.

⁵ Jøts ja tyaak wyaañ, yide'en ja tnimaay ja jaa'y pøn jaty jam wyinaty windsø'jkidip:
—Mdu'undip idø'øn jade'en tuki'iyi pøni sa wya'añ.

⁶ Jamts wyinaty tudujk ja tsaadu'jts midi ja israelit jaa'y yiktundip ku Dios ja twindsø'øgidi jøts ja pyøkwyatsttit. Makta'pxy uk magø'pxy enteerin ja y'uch tu'uk tu'uk, jade'en nøø ja yikta'adami. ⁷ Xjats ja nwindson'ajtim Jesús tnimaay ja jaa'y pøn jaty jam wyinaty windsø'jkidip:

—Yik'utskøxti yø tu'jts. Adamidi nøø.

Jøts ja ojts yikxon tyimyik'utsti, ⁸ winets nwindson'ajtim Jesús tnimaay ja jaa'dyi:

—Aja'aptu'uttits inet waani, jøts xaninøjkxtit midi yø xøøw tø tniwaamuki.

Jøts ja ojts jade'en ttundi. ⁹ Ojts ja tjā'gyapy midi ja xøøw tniwaamujkip jøts ja tsujk nøø tø ja vino yjajtni, nika'ap ja tnijawi pø mā ja chøøñ; ja'ayi ja nugo tnija'widip pøn windsø'jkidip, pø ja'axi ja nøø wyinaty tø tjaahti. Xjats ja twaadsøøy ja jemyaa'y ¹⁰ jøts ja tnimaay:

—Tum jawyeen øy pøn t'uuky yø vino y'øybi, jøts ku ja mi'ukpi ja kom tø t'uknidi winets ja yu'nkpi yikyakñim. Jøts mets, tø mets ja møk vino ne'egi xjaakyik'awixy, jøts mets yø yamnim ne'egi xyaky oojknim.

¹¹ Yø'øbi milagri'ajtin idø'øn ja nwindson'ajtim Jesús tyimiyjawyeen nanky'ejxøø jam Caná, jam Galileit etjotp, midi yiknigaxø'jk ja myøk'ajtin, winets ja pyabøjkpitøjk ja ojts yjaakjanchjawiyi.

¹² Xjats ku ja jade'en y'ukjajty, winets ja ojts ñijkxy mā ja kajp jam txøøwi Capernaum, møøt ja tyaak, møøt ja myigu'uktøjk, jøts møøt ja pyabøjkpitøjk. Jøts ja jam tyaan'idøø ñigyawinaak xøøw.

Ku ja Jesús tpawojpkijxy ja too'kpitøjki jam tsaptøjk agø'øm

¹³ Ja paski xøøwts wyinaty tyimbyatnip midi ja israelit jaa'y tyundip, winets ja nwindson'ajtim Jesús ojts ñijkxy jam Jerusalén. ¹⁴ Jøts ja jam tsaptøjk'agi'py tkubajtiyññ ja jaa'dyi pøn too'ktip ja tsakaa, pøn too'ktip ja borreek, pøn too'ktip ja pak, jøts nayide'en pøn ja myigu'uk myeeñ tyikwa'kxidip, ja' jam wyinaty tsinaadyip mayim ja jam tunk'atti.

¹⁵ Ku ja nwindson'ajtim Jesús ja ojts jade'en t'ixy, xjats ja tyik'øyiyññ tu'uk pawojp, jøts ja jam tpawojpkijxy niduki'iyi ja jaa'y jam tsaptøjk agø'øm, møøt ja byorreek møøt ja chakaa. Jøts ja meñ yikwa'kxpidi ojts ja myeeñ ja yik'ixko'odi, jøts ja myesi ja ojts yiktejimbeti. ¹⁶ Jøts ja tnimaay ja jaa'y midi paktoo'ktip:

—¡Yikjawa'akti yø ya! ¡Kidi nDeety tyøjk maadyøjk xyikwa'andi!

¹⁷ Winets ja pyabøjkpitøjk nay jatyi tjā'myaajtsidøø ja nøky mā ja David yide'en wyaañ: “Møk øts nba'ayøy ja mdøjk.”

¹⁸ Xjats ja israelit jaa'y ttiibyøjktøø ja nwindson'ajtim, jøts ja tnimaadyøø:

—¿Ti tiy'ajtin øøts xuk'ejxp jøts ku xjagyepy ja kutujk ku jade'en m'adi'ich?

¹⁹ Jøts nwindson'ajtim Jesús ja ojts t'adsøy:

—Yikidawdi yø tsaptøjk, kidigøøk xøøw øts yø jadigojk nyikwa'kukit.

²⁰ Winets ja israelit jaa'y wyandøø, jøts ja ojts ñi'mxyiyi:

—Wixijkxyudujk jumøjt yø tø yiktunk'aty yø tsaptøjk jøts yø tø y'øyi; ¿jøts me mwa'añ jøts ku mets yø kidigøøk xøøw xyikwa'køyt jadigojk?

²¹ Ku ja Jesús ja tsaptøjk tkajpxy, pø kyø'ømne'kx ja jade'en tyijpy. ²² Pø patyxi ku ja nwindson'ajtim Jesús ojts yujukpyijky jadigojk jap oo'kpi jutjøtpy, yø'øts ja pyabøjkpitøjk yja'myatstøø ku ja wyinaty jade'en tø wya'añ. Xjats ja tjantyimyjanchja'widøø ja Dios kyajpxy, jøts nayide'en tmibøjkidøø ja nwindson'ajtim y'ayuujk sa jaty ja wyinaty jade'en tø wya'añ.

Wa'ats ja Jesús tnijawi sa jaty jadu'uk jadu'uk wyinmay

²³ Kuts ja nwindson'ajtim Jesús jam wyinaty tyiknaxy ja paski xøow jam Jerusalén, jøts may ja jaa'y ja jam yjanchja'wiyøø tyijja'wiyøø ku ja t'ejxti ja myilagri'ajtin midi ja tyumpy. ²⁴ Jøts ja nwindson'ajtim Jesús ka'ap ja nugo tyimñagiyakyi, kumi wa'ats ja t'ejxkapy ja niduki'iyi sa pønjabøn. ²⁵ Ka'ap ja chøkyiyi jøts ja pøn tyukmadowit sa jaty jaa'y jadu'uk jadu'uk yjaa'y'aty. Wa'ats ja kø'øm tyimñijawi sa pøngapøn y'am yjotp wyinmay.

3

Ja Jesús jøts ja Nicodemo

¹ Jamts idø'on tu'uk fariseit jaa'y pøn txøow'ajtp Nicodemo, jøts ja' idø'on ja israelit jaa'y wyindsøn'ajtip. ² Ja'ats ojts koots y'atstøk'ayø'øy ma ja nwindson'ajtim Jesús jam wyinaty, jøts ja ojts t'atsnøjmi:

—Windsøn, nnija'wip øøts jøts ku Dios tø mguexyi jøts øøts xyik'ixpøkt. Ka'ap me jeexyip jade'en xyiktuñ ja Dios myøk'ajtin milagri'ajtingøjxp sam icyam xyiktuñ, ku jeexyip møøt mga'ity ja Dios.

³ Xjats ja nwindson'ajtim Jesús ja tnimaay:

—Janch øts idø'on nwa'añ, jøts ku ka' pøn tpaatt ja Dios kyutujk midi yjaa'y ja tyanitanaapy pøni ka'ap pøn nayide'en kyaxi'iky jadigojk sam tø kye'exyin.

⁴ Winets ja Nicodemo tyiktiiy jøts ja tnimaay ja nwindson'ajtim Jesús:

—¿Sudsøts ja møj jaa'y nayide'en jadigojk kyaxø'økt sam ja tø kye'exyin? ¿Pø sudso'ampy jadigojk tyøkit tyaak yjotp jøts kya'axkojmit?

⁵ Jøts ja nwindson'ajtim Jesús ja yide'en t'adsøøy:

—Janch øts idø'on nwa'añ, pøni ka'ap pøn jade'en kye'exy ejxim ja jaa'y kye'exyin, jøts nika'ats ja Dios myøk'ajtin myø'øyi, ka'ats pøn mibaat tyøkit ma Dios ja kyutujk ttanitani ja yjaa'y. ⁶ Ku ndeety ndaak xyikaxø'jkyim, nugo yø' xmø'øyim ja jaa'y'ajtin; jøts ku ja Dios x'u'nk'ajtyim, ja'ats ja myøk'ajtin ja y'Espíritu Santo xmø'øyim. ⁷ Kidi nigyumaap xjaw i jøts ku jade'en nnøjmi: “Niduki'iyi jaa'y pyaat'atyidi ja chinaa'yin tyiktigatstít, ka'axigajstipts ja ñamyayi jade'en.” ⁸ Pojp øy madsoo pyøjy; wa'ats nmadøø'yim sa wyina'añ ja poj, ka'ats nnija'wa'an pøni ma chøøn jøts pøni ma ñijkxy. Nayide'ents idø'on ñamyayi ja'adi pøn ja Dios myøk'ajtin yikaxø'jkiyidip.

⁹ Winets ja Nicodemo tjaaktiibyijky:

—¿Sudso yø ndejin jade'en?

¹⁰ Xjats ja y'adsoji ja nwindson'ajtim Jesús:

—¿Pø møj maestrimts mets ya israelit kajpkijxy, jøts mets yø yjade'emb i xkanimadøy?

¹¹ Janch øts idø'on nwa'añ, jøts ku øøts ja' nnigajpxy midi øø nnija'wip, jøts nay ja' øøts nidestigi'ajtpy midi øø tø n'ixy; jøts meets ja xkajanchjaw i sa øø njawa'añ.

¹² Nika' xjanchjawidi ku øts ja'abaat ndyimyjanigajpxy ti jaty ya naxwiiñ, ¿ti ja'ats mee mjaakjanchjawip ja tsajpjøtpyt yja' ku meets njadukmado'ot?

¹³ 'Ka'axi jap pøn y'ats'øch jap tsajpjøtpy, øts idø'on jap tsoo'mp kumi øts jap'ajtp jap tsajpjøtpy; jøts øts ja naxwii'ñit jaa'y ngudanaapy. ¹⁴ Jøts nayide'en ø nyiktu'unt sam ja Moisés ojts ttuñin ja tsaa'ñ jam abak etjotp ku ja ojts køjxp tyyji'iky, ¹⁵ jøts ja kyawindigø'ødyit pøni pøn ø xjanchja'widip, xemikøjxp ja tpaattit ja kunuu'kxy jujky'ajtin ja kunuu'kxy chinaa'yin.

Pya'ayøøpy ja Dios ja naxwii'ñit jaa'y

¹⁶ 'Janch møk ja Dios tsojkin tjagyepy, jøts tpikta'aky ja pya'ayo'owin ya naxwiiñ ku ja y'U'nk tkexy midi tu'umchi, jøts ja kyawindigø'ødyit pøni pøn ja tjanchja'widip, jøts ja xemikøjxp ja kunuu'kxy chinaa'yin ja kunuu'kxy jujky'ajtin tpaattit. ¹⁷ Kidi ja'ajip ja Dios y'U'nk tyanigüe'jpxy ya naxwiiñ jøts ayo'on ja ttukpaatt ja naxwii'ñit jaa'y, jade'en'ampy ja tkexy jøts ja tyiknitso'ok'att ja naxwii'ñit jaa'y.

18 'Pøni pøn tjanchja'wip ja Dios U'nk, ka'ap ayo'on ja yiktaguwani; pønts tka-janchja'wip, ja' y'ayo'on kutujkp xemikøjxp ja'agøjxp ku tkajanchja'wiyidi ja Dios y'U'nk midi tu'ugyi. 19 Pøni pøn tyimyjade'en'ajttip, tø y'ayo'on ja kyutujknidi, ku ja myiñ ya naxwiiñ midi ja jaa'y øy tsuj tyikwinmaa'nbyatp, ka'ap ja yikupijky. Ne'egi ja kube'ets'ajtin kugoots'ajtin ja ne'egi chojktip, ja'agøjxp ku ja tyumjaka'øbyi ttunwa'andi. 20 Niduki'iyi pøn ja tyumjaka'øbyi ttundip, kawin'ijxyim ja tjawidi ja yik'øwyinmaa'nbyatpi. Niwine'enin ja tkamijotwa'andi ja'agøjxp jøts kyanigaxø'øktit ja kya'ødyu'unindi. 21 Pønts ttsinaadyip ja tyiiby i janchpi, ja'ats tmijotwandip midi øy tsuj tyikwinmaa'nbyatp ja jaa'y, jøts ja tyiknigaxø'øktit ja Dios yja' ti jaty ja tyundip.

Ku ja Juan Bautista jadigojk tkajpxaaty ja Jesús yja'

22 Kuts idø'on ja jade'en y'ukjajty, xjats ja nwindson'ajtim Jesús ojts tmøødi ja pyabøjkpitøjk jam Judeit naxjotp. Ñiyjeki ja jam tyaa'nidøø jøts ja jam møøt yiknøbajttøø. 23 Jøts ja Juan nay ixam ja wyinaty yiknøbatmi ixam Enón midi ja Salim it kajp myiwingon'ajtpy, ja'agøjxp ja jam yiknøbety ku ja nøø jam janch kom; jamts ja jaa'y myendi jøts ja jam y'atsnøbatti. 24 Jawyeenip idø'on ja jade'en yjaty, ka'anim ja Juan wyinaty yikpikta'aky puxøjkjotpy.

25 Jøts nay winet ja Juan pyabøjkpi winaagin tnadyamigajpxyidi møøt ja myigu'uk israelit jaa'dyi, ja' ja tnadyamigajpxyidip sa ja pøky wya'ach. 26 Nay winets ja Juan y'atsyiknimaay:

—Windsøn, ixam ja ixyam yiknøbety pøn mets jam wyinaty møøt xøbidsimy ma ja Jordángit nøø, ja' pøn mets ojts xnigajpxy jøts niduki'iyi jaa'y ja yjanchpabikyiyi.

27 Xjats ja Juan ja tnimaay:

—Ka' pøn ti tniyjaty pøni ka'ap Dios myø'øyi. 28 Meetsxi ojts wa'ats kø'øm xtyimydøy ku ø nwa'añ jøts ku øts ka' nCristo, jøts ku ø nja'aji pøn jawyeen yikajxp nugo. 29 Janch tsuj øts, janch xondakp øts, jade'en ejxim ja tø'øxmyiyø'øbyi tyik'amajtski myigu'uk; jade'en øts nnayjawi y kuts nmadøy ja Jesús y'ayuujk. 30 Yø' møjtøkipnim jøts øts kuwani n'amutskit, kuwani n'ixnøjkxt.

Ja' pøn tsoo'mp jap tsajpjotpy

31 Ja' pøn tsoo'mp jap tsajpjotpy, tum ja' tuki'iyi tnitanaapy. Jøts pøn ya naxwiiñ'ajtp, ja naxwiiñiits ja ja'ajtip, jøts tum ja'ayi ja ñigajpxpy ti jaty ja ejtp. Pønts tsoo'mp jap tsajpjotpy, ja' tuki'iyi tnitanaagyøjxp, 32 jøts tum ja' ja ñigajpxpy midi ja tø t'ixy, midi ja tø tmadøy; jøts ka'ap ja pøn tjanchjawi midi ja ñigajpxpy. 33 Kuts øy pøn tjanchjawi, ja'ats wa'ats tyikniga'axp jøts ku Dios tkajpxy ja tyiiby i janchpi; 34 Dios kyajpxy Dios y'ayuujk ja kyajpxip pøn ja Dios kajxip, kumi amuum y'Espíritu Santo ja myø'øyi. 35 Chøjkpy ja Dios Teety ja y'U'nk, jøts tuki'iyi tø ttagidøjkigyixy ti jaty ejtp ka'ejtp. 36 Pøni pøn ja Dios U'nk tjanchja'wip, xemikøjxp ja nøjkx tpaaty ja kunuu'kxy jujky'ajtin ja kunuu'kxy tsinaa'yin; pønts tkajanchja'wip, kawindem xøøw ja nøjkx tpaaty ja yjade'embi jujky'ajtin, ja Dios myøk'ayo'on ja nøjkx kyupøjkip.

4

Ja Jesús jøts ja Samariit tø'øxy

1 Xjats ja fariseotøjk tnija'widøø jøts ku ja nwindson'ajtim Jesús may pyabøjkpitøjkni, jøts may jawaani ja jaa'y tyiknøbety jøts nigidi ja Juan jade'en; 2 øy idø'on nwindson'ajtim Jesús ja kø'øm tkidyimyiknøbety, ja pyabøjkpitøjkts ja tyiknøbajttip. 3 Xjats ku ja tnmadøøy jøts ku ja fariseotøjk tø ñijawiyi, winets ja chøøñ jam Judeit naxjotp, jøts ja ojts ñijkxy jam jadigojk Galileit etjotp.

4 Ja Samariit et ja tyanaxp ku dø'on ja jam ñijkxy. 5 Xjats ja yja'jty ma ja kajp jam tu'uk Samariit etjotp midi txøøw'ajtp Sicar, jam wingon ma ja Jacob ja y'u'nk José wyinaty tø tmø'øy ja ñaajx. 6 Jamts idø'on tu'uk ja nømu'ut midi yiktejp Jacob nømu'ut. Jøts

kumi jotkøjxp ja nwindson'ajtim Jesús wyinaty ku ja yø'ø, xjats ja y'ixaajky jam nømu'ut agø'øm. Ja dø'øn wyinaty ja xøøw kujky. ⁷⁻⁸ Winets yja'jty tu'uk ja tø'øxyøjk jam nømu'ut agø'øm pøn ku'etip kugajpip jam Samaria, jøts ja nøø ja tjuutwa'añ, xjats nwindson'ajtim Jesús ja ojts ñii'mxyi:

—Møøky øts nøø.

Jøts ja pyabøjkpitøjk, jam ja wyinaty tø ñøjkxti jam kajpjotp, jøts ja t'atsju'udyit ja kaaky ja jii'kxy.

⁹ Xjats idø'øn ja samariit tø'øxy tñimaay ja nwindson'ajtim Jesús:

—¿Sudso mets nøø x'amidø y jøts m'israelitjaa'yits mets jøts øts samariit jaa'y?

(Kumi ka'ap ja israelit jaa'y tminamyayidi ja samariit jaa'y.) ¹⁰ Winets ja yide'en y'adsojøø ja nwindson'ajtim:

—Kuk xjanchñijawit midi ja Dios yajkpy, uk xnijawit pøn nøø ixa m'amidojyiyip, ¿ja ti jajik me xka'amidø y jøts me nmo'ot ja øybi nøø ja wa'atspi?

¹¹ Jøts ja tø'øxyøjk ja ñimaajyøø:

—Ni mdanøja'ap paat mets kya'ity, jøts køjnk yø nømu'ut. ¿Mats idø'øn xpøkwa'añ ja nøø midi mdiypy øy wa'ats? ¹² Ja ndeety'ap Jacob øøts yø nømu'ut xukmidaan ma jaa ja y'ijty kø'øm y'uuky, jøts y'u'nk y'una'jk, jøts yjyujk chakaa nayide'en. ¿Ti mjaaktyimbyønts me ndejin?

¹³ Jøts ja nwindson'ajtim Jesús ja t'adsøøy:

—Pøn jaty ya'at nøø t'uktip, tøødsidip ja jadigojk; ¹⁴ pønts t'ukp ja øybi ja wa'ats nøø midi ø nyajkpy, ka'ap tøødsi nijuuni y'ukpaajtniyit. Kumi jade'en ja nøø pyidsø'ømt jam y'anmija'wingøjxp midi øts ja nmøøpy, sam kom nøø pyidsimyin. Ja'ats ja xemikøjxp tukpaadiyip ja jujky'ajtin jøts ja øy'ajtin.

¹⁵ Winets ja tø'øxyøjk ja ñimaajyøø:

—Yø'øbi nøø øts teety xmo'op, jøts ø nga'uktøøjtsiñit nijuuni, jøts ø nga'ukmenit nøgombi ya nømu'utjøøjty.

¹⁶ Jøts ja nwindson'ajtim Jesús tñimaay:

—Nøjkx mniyaa'y x'atsway jøts ya mme'ent.

¹⁷ Xjats ja tø'øxyøjk y'adsojøø:

—Ka' øts nniyaa'y.

Jøts ja nwindson'ajtim Jesús tñimaay:

—Janch tiigyajpxy idø'øn mwa'añ jøts ku ka'ap mniyaa'y pøn; ¹⁸ kumi nimagoxk tø xyiknaxy ja yaa'dyøjk, jøts pøn ixyam møøt, ka'ats ja xniyaa'y. Jøts ku jade'en tø mwa'añ, janch tiigyajpxy idø'øn yø'.

¹⁹ Kuts ja tø'øxyøjk jade'en tmadøøy, jøts ja wyaañ:

—Mets teety, wa' mets idø'øn yjawi Dios mets idø'øn kyugajpxy. ²⁰ Wine'enin øø nsamariitjaa'y'aty, ya øøts ja n'aptøjk twindsø'øgidi ja Dios ixya kojpkijxy, meetsts wine'enin mee m'israelitjaa'y'aty, jade'en mee mwa'añ jøts øøts ja jam nwindso'øgit Jerusalén.

²¹ Jøts t'adsøøy ja nwindson'ajtim Jesús, jøts ja tø'øxyøjk yiknøjmi:

—Øy xkamibøkt, wingomp idø'øn jøts meets xwindsø'øgidit øy madsoo ja Dios. Ka' pyaat'aty jøts kuwani mdyimye'endit ya kojpkijxy uk mnøjkxtit jam Jerusalén. ²² Meets samariit jaa'y, ka' mee xnijawi pøni ti mee mwindsø'jkip; øøts, nnija'wipts øøts midi øø nwindso'jkip; jabi israelit jaa'yts ñikøjxp myiñ ja nitso'ok'ajtin. ²³ Ixyamts ja xøøw ja jumøjt tø yja'aty, jøts ku nayi Dios myøk'ajtingøjxp nay ja' tyiy'ajtingøjxp yikwindsø'øgit ja Dios Teety, pøni pøn tjantyimwyindsø'jkidip ja Dios. Jade'en ja tsøky jøts ja jade'en ttu'undit pøni pøn ja windsø'jkiiyip. ²⁴ Tu'ugyi tum jade'en Dios jøts myøk'ajtin; jøts pøn ja windsø'jkiiyip, nay ja møk'ajtints ja yiktu'undip møøt ja tyiiby yjanchpi.

²⁵ Xjats ja tø'øxyøjk wyaañ, jøts yiknimaay ja nwindson'ajtim:

—Nnija'wip øts jøts ku mye'ent ja Mesías —midi tyijpy Cristo, midi memp yiknitsokpi—; jøts ku ja mye'ent, ja'ats tuki'iyi xukmadoogøjxim.

²⁶ Jøts nwindson'ajtim Jesús ja tnimaay:

—Øts ja', øtsxi dø'on, ejx idø'on ixya nmigajpxy.

²⁷ Winets ja nwindson'ajtim pyabøjkpitøjk yja'ttøø, jøts ja ñigyumaap tja'widi ku tø'øxyøjk ja møøt myadya'aky. Ka'ats pøn ñay'a'ejxiyi jøts ja tyiktø't ti chøjkpy uk ti ja tø'øxyøjk møøt ñadyamigajpxyi. ²⁸ Xjats ja tø'øxyøjk jamyi tnikejky ja chiyy, jøts ja ojts ñijkxy jam kajpjotp. Jamts ja jaa'y ja ojts t'atsnøjmi:

²⁹ —Mendi jøts jaa'y tu'uk x'ats'ejxtit pøn ø tø xukmadø y tuki'iyi sa jaty ø tø n'adi'ich. ¿Kidi ja Cristip idø'on ja ndejin, midi ja Dios tkajxp?

³⁰ Winets ja jaa'y choo'ndøø jam kajpjotp, jøts ja ojts tninøjkxti ja nwindson'ajtim Jesús ma ja jam wyinaty. ³¹ Jøts idø'on pyabøjkpitøjk ja exam ñii'mxyiyi møk'ampy:

—Windsøn, øy iyy wine'enin mga'aty.

³² Yide'ents ja ojts ñii'mxyidi:

—Ja øts ngaaky ñii'kxy midi øts inet nga'apy njøø'kxp, ka' meets ja xnijawi.

³³ Xjats ja pabøjkpitøjk agø'omyi ñayiktøøbinaxwa'jkidøø, jøts ja ñawyaajnidøø:

—¿Wan ndejin pøngapøn ja kyaaky tø tyanimiñi?

³⁴ Yide'ents ja nwindson'ajtim Jesús ja tnimaay:

—Ja' øts idø'on ngaaky'ajtpy ñii'kxy'ajtpy ku øts ja nbaduujnit ja y'ana'amín pøn tø kxexy jøts øts tyunk ja nyik'abajtiyit. ³⁵ Pø yide'enxi mee mwa'añ: “Ja maktaxk po' kya'ity jøts pikta'aky pyidø'økt”; øts wamp jøts mee nnøjmi: Ejxti yø kam midi ni'ipy, tø pikta'aky myøjaagøjxni jøts pyidø'øknit. ³⁶ Yikmijuupy ja' pøn ttunk'ajtp ja pikta'aky jøts ja tyikpidi'iky; jøts ja pikta'aky midi yikpidi'kpy, ja' ja wya'añ jøts ja xemikøjxp tyu'unt. Jøts ja jade'en ni'amuki ttajotkujk'attit pøn neptip jøts pøn tyikpidø'ktip ja pikta'aky. ³⁷ Pø janch tamxi dø'on ja' ku ayuujk wya'añ: “Wenkpi ja pikta'aky tnepp, jøts wenkpi ja tyikpidø'økp.” ³⁸ Jamts meets idø'on nguexy jøts ja pikta'aky xyikpidø'øktit ma ka'ap tø mne'epti; jabi wenkpi tø yjatundi yjapøkti jøts meets tyunk ja xaxojniyi.

³⁹ Mayts idø'on ja jamit jaa'y tjanchja'widøø ja nwindson'ajtim Jesús pøn idø'on jam kugajp'ajttip ja'abi kajp midi jam Samaria, ku ja tø'øxyøjk ja wyinaty tø tyimñii'mxyidi tiy janch, ku ja wyinaty yide'en tø wya'añ: “Tø øts ja tuki'iyi xukmadooguixy sa jaty ø tø n'adi'ich, sa jaty njaa'y'aty.” ⁴⁰ Xjats ku dø'on ja samariit jaa'y jam myendøø, jøts ja møk tnimaadyøø ja nwindson'ajtim Jesús jøts ja jam myøøtaa'niyidit. Winets ja nwindson'ajtim Jesús jam tyaa'niyiñ majtsk xøøw. ⁴¹ Jøts ja jaa'y may tjaaktyimyanchja'widøø ku ja tyimyadowdi sa jaty ja kø'øm ñii'mxyidi. ⁴² Jøts ja tnimaadyøø ja tø'øxyøjk:

—Ndyimyjanchja'wipnim øøts inet. Kidi ja'ajip øøts nugo njanchja'wip sa jaty mee tø mwa'añ ku øø tø xukmadø. Pø tøxi øøts yø yam kø'øm njaaktyimyadø yø wya'añ. Tøts øøts nnijawi jøts ku yø janch Cristo, pøn naxwii'ñit jaa'y tyiknitsokp.

Ku ja Jesús tyiktsøjky tu'uk ja windsøn y'u'nk

⁴³ Xjats ku kyimajtskxøøw'ajty, jøts ja nwindson'ajtim Jesús chøø'ñ jam Samariit etjotp, jøts ja ojts yjaaktyimñijkxy jam Galileit etjotp. ⁴⁴ Jøts idø'on ja jade'en yjajty sam ja nwindson'ajtim Jesús wyinaty kø'øm tø wya'añin, jøts ku ja Dios kyugajpxy ne'egi ka'ap yikupiky jam kyø'ømgajpkøjxp. ⁴⁵ Kuts ja nwindson'ajtim yja'jty jam Galileit etjotp, jøts ja jamit jaa'y, chojktip ja' ku ja jam yja'jty, kumi tø ja wyinaty y'atsxøbaatnidi Jerusalén ku ja paski xøøw jam wyinaty tø ñaxy. Tøts ja wyinaty tuki'iyi t'ejkøxti ti jaty jam wyinaty tø ttuñ ja nwindson'ajtim Jesús ku ja xøøw jam ñajxy.

⁴⁶ Xjats ja nwindson'ajtim Jesús ojts ñijkxy jadigojk jam Caná midi nay jam Galileit etjotp, ma ja wyinaty ja tsujkx nøø tø t'ukyikvinojaty. Jøts jamts idø'on tu'uk møj windsøn tyumbimi midi nayide'en windsøn, ja'ats idø'on y'u'nk jam wyinaty pøjkip

Capernaum. ⁴⁷ Xjats ku ja tñimadøø y jøts ku ja nwindson'ajtim Jesús jam wyinaty tø yja'aty Galilea, jøts ku ja chøøñ Judeit etjotp, winets ja ojts t'ats'ixy jøts ja møk t'atsnøjmi jøts ja tmøødit jam tyøkwindum, jøts y'u'nk ja yikts'o'ogiyit pøn wyinaty tyimy'ooki'imni.

⁴⁸ Jøts nwindson'ajtim Jesús tñimaay ja jaa'y:

—Ka' meets janchja'win xjagyepy. Yø'øyi meets ja'ayi m'ijxpy yø milagri'ajtin.

⁴⁹ Yide'ents ja ñimaajyøø ja jaa'y pøn ja windsøn tyumbi'ajtpy:

—Men teety tsojk, namga'anim øts n'u'nk y'øøky.

⁵⁰ Winets ja nwindson'ajtim tñimaay ja jaa'y:

—Wimbejtñi, nøjkxni jam mdøjkwindum. Jujky'ajtp inet ja m'u'nk.

Xjats ja tjanchja'wiyi'ñ ku nwindson'ajtim Jesús ja jade'en ñimaajyøø, jøts idø'on yjanchnijxxy. ⁵¹ Jøts ku ja wyinaty yja'atwani jam tyøjkwindum, winets ja tyumbitøjk ja ojts pyatsøyiyi, jøts ja ojts ñii'mxyiyi:

—Jujky'ajtp m'u'nk.

⁵² Jøts ja tyiktiy ti hori dø'on ja y'u'nk wyinaty kujk tø myøkpøjk'okwa'añ, jøts ja tñimaadyøø:

—Uxø'øyip ja'ani, ja dø'on ja xøøw wyinaty waani yjopta'aky ku ja jøøn wyinajkijxy.

⁵³ Xjats ja u'nkteety ojts tjā'myech jøts ku nay ja'abi hori ja nwindson'ajtim Jesús wyinaty tø ñii'mxyi: “Jujky'ajtp ja m'u'nk”; jøts niduki'iyi wine'enin y'u'nk ñidø'øxy y'u'nk y'una'jk ja jam møøt, jadine'en ja ojts tjanchjawidi ja nwindson'ajtim Jesús.

⁵⁴ Jøts idø'on jade'en mimajtsk ja milagri'ajtin kujk ttuñ ja nwindson'ajtim Jesús jam Galilea. Tø ja wyinaty chøøñ Judea.

5

Ku ja Jesús tyiktsøøjky tu'uk køxujxpi pakxujxpi

¹ Xjats ku dø'on jade'en y'ukjajty, jamts idø'on israelit jaa'y wyinaty ttumidi xøøw, winets ja nwindson'ajtim Jesús wyimbijty, jøts ja ñijkxy jadigojk jam Jerusalén. ² Jam tøjka'aw tu'uk ja'abi kajp midi yiktejp Borreek Tyøjk'aaw, jøts nay jam wingon tu'uk ja pili midi hebreit ayuujk yiktejp Betesda, magoxk ja tøjka'aw ja tmøødi. ³ Jamts ja maabyamaay kyo'knidi; pøn winapti, pøn pakma'atti, pøn køxujxtip pakxujxtip. Jøts ja jam t'awejxti ja nøø kunim ja y'adø'øtst. ⁴ Atskidakpts idø'on ja ankilis jam tu'uk pili agø'øm, jøts ja t'atsyik'adi'ich ja nøø. Kuts pøn pamaay jawyeen ñidøki, najxpts idø'on pya'am ja', øy ja ti pa'am yjadyimyjapiky. ⁵ Jøts pamaay jam wyinaty tu'uk pøn wyinaty ee'pxmajktuktujk jumøjtíp ja pa'am pyaadyi. ⁶ Xjats ku nwindson'ajtim Jesús ja ojts t'eixpaaty jøts ku ja jam kyo'kni, jøts ja t'eixkajpy jøts ku pa'am ja wyinaty jadine'en jeky tñi'ejtñi, jøts ja ojts tñøjmi:

—¿Mdsøjkpy tsoojkin?

⁷ Jøts ja pamaay ja ojts yide'en y'adsøyi:

—Me teety, tyimñipøn øts pøn ø xnøyiktøkip jap nøøjtøpy ku yø nøø yja'ats'adi'ich. Yam ø njatøkiwyami jøts jatyi wenkpi ñødøki.

⁸ Jøts ja nwindson'ajtim Jesús tñimaay:

—Pidø'øk, wejtsjø'øk yø mmaabajt jøts mnøjkxnit.

⁹ Jøts nay jatyi chøøjky ja jaa'y, ojts tyikpidi'iky midi ja jam tyamaapy jøts ja ojts yø'øcho'oni. Jøts kumi poo'kxin xøøwts wyinaty, ¹⁰ winets ja israelit jaa'y tñimaadyøø ja jaa'y pøn wyinaty tø myøkpiky:

—Poo'kxin xøøwxi yam; jøts ka'ap pyaat'atyi xtsømwidett yø mmaabajt.

¹¹ Xjats ja t'adsøøy:

—Ja' ø tø xnøjmi pøn ø tø xyiktsø'øky: “Yikpidø'øk yø mmaabajt jøts mnøjkxnit.”

¹² Jøts ja yiknimaay:

—¿Pøn idø'on tø mnii'mxyi: “Yikpidø'øk yø mmaabajt jøts mnøjkxnit”?

¹³ Jøts ja jaa'y pøn idø'øn wyinaty tø chø'øky, ka'ap ja tnijawi pøni pøn idø'øn ja wyinaty tø yiktsø'øgyi. Jøts janch may jaa'yts jam, jøts ja nwindson'ajtim Jesús tøyim ja jam wyinaty cho'oni. ¹⁴ Jøts ja nwindson'ajtim Jesús jadigojk tpaajty ja jaa'y jap tsaptøjkjotpy midi ja wyinaty tø tyiktsø'øky, jøts ja tnimaay:

—Øyim yikxon xmado'ot, ejx idø'øn ixa tø mdsø'øky, kidi m'ukpøkyuni jøts kidi ti mjaty ku jawaani ka'øy mdyimy'ukjajtnit.

¹⁵ Winets ja ñijkxy pøn tø chø'øky, jøts ja ojts ttukmadøy ja israelit jaa'y, jøts kudam idø'øn ja yja'aji ja Jesús, pøn ja wyinaty tø yiktsø'øgyi. ¹⁶ Ja'agøjxp idø'øn ja israelit jaa'y y'ijty tpawidetti ja nwindson'ajtim Jesús, jøts ja ttuku'oogiwyā'andi ku dø'øn ja jade'en y'adi'ich poo'kxin xøøw. ¹⁷ Yide'ents nwindson'ajtim Jesús ja ñimaajyidøø:

—Yam paat øts idø'øn ndeety tyuñ, paty øts idø'øn nayide'en nduñ.

¹⁸ Yø'øts idø'øn ja israelit jaa'y masi tyuku'oogiwyandip ja nwindson'ajtim Jesús. Kidi nugo ja kutujkipxi ja kyamøj'ijxpy ku ja poo'kxin xøøw, pø nayide'enxi ja ñabyikta'agyi sam ja Dios, ku ja wyā'añ jøts ku Dios ja tyimdyeedyi.

Jade'en ja Dios Teety ja kyutujk tmø'øy ja Dios U'nk

¹⁹ Winets ja nwindson'ajtim Jesús ja ñimaajyidøø:

—Janch øts idø'øn nwa'añ jøts ku Dios U'nk ka' ti ttu'unt kyø'øm kutujkøjxp. Ja tyeety ja pyaduujnip yja' pøni sa ja kø'øm tnajstuni. Tuki'iyi pøni ti tyumpy ja Dios Teety, nay ja'ats tyumpy ja Dios U'nk. ²⁰ Pø yjantyimchøjkpyxi ja Dios Teety ja y'U'nk, jøts ja tuki'iyi ttuk'ixy pøni ti jaty ja kø'øm tyumpy. Jøts yjaaktyimdyuk'ejx'adø'øtspnim ja' ja myøjpi ja y'øybi, midi meets ñigyumaap mjawidip. ²¹ Kumi nayide'en sam ja Dios Teety tyikjuykpyiky ja oo'kpi jadigojk, nayide'ents ja Dios U'nk tyaky ja jujky'ajtin pøni pøn ja tyamidsøjkpy. ²² Jøts ka'ap Dios Teety tpayø'øy pøn, ja Dios U'nk ja tø ttaguwan jøts ja' ja tø tmø'øy ja møk'ajtin jøts ja pyayø'øty, ²³ ja'agøjxp nayide'en ja windsø'jkin yikmo'ot sam ja Dios Teedyin. Pøn tkamøjpiktakp ja Dios U'nk, nay ja Dios Teety ja kyamøjpiktakpy pøn tkajxp ja Dios U'nk.

²⁴ Tyi'byi yjanchpi øts idø'øn nwa'añ: Pøni pøn øts ngajpxy n'ayuujk xyikmøjyiyip sa jaty ø nwa'añ, jøts ku ja tjanchjawi pøn ø xkajxp, pyaatp ja xemikøjxp ja kunuu'kxy'ajtin; jøts ka'ap ja yiktaguwanit jøts ja y'ayo'ot, tø ja ttanaxy ja o'jkin jøts ja tpaaty ja kunuu'kxy jujky'ajtin ja kunuu'kxy tsinaa'yin. ²⁵ Janch øts idø'øn nwa'añ, jøts ku ixyam y'horipaaty ku ja jaa'y tmadojedit ja Dios U'nk kyajpxy pøn jaty tkajanchja'widipnim; jøts kuts tmimado'odit, pyaattips ja kunuu'kxy jujky'ajtin ja'adi. ²⁶ Ja ku Dios Teety tjagyepy ja møk'ajtin jøts ja kø'øm tyaky ja'abi jujky'ajtin, jøts nayi tøts møk'ajtin ja tmø'øy ja y'U'nk jøts ja tyakt nay ja'abi jujky'ajtin. ²⁷ Jøts tø ja tkutujkmø'øy jøts tiidyu'unin jøts payø'øyin ja ttu'unt, ja'agøjxp ku ja naxwii'ñit jaa'dyi tkudani. ²⁸ Kidits ya'at ñigyumaap xjawidi, pø ja'atpxi dø'øn ja xøøw ja jumøjt ku ja jaa'y tmadojedit Dios U'nk y'ayuujk pøn windigøy ejtnidip, ²⁹ jøts ja pyidsø'ømdit jap oo'kpi jutjotpy. Pøn øy tø y'atsnaxwiiñ'aty, pidso'ømdipts ja' jøts ja tpaattit ja kunuu'kxy jujky'ajtin; pønts tø kyanaxwiiñ'aty øy, jujkpyøktipts ja nayide'en jøts ayo'on ja yiktaguwanidit.

Y'ejxi tyiyi sa Jesús kyutujk tjagyepy

³⁰ Niti nguidyimdyuñ ngø'ømwinmaa'ngyøjxp. Jade'en ø nduñ pøni sa nyik'ane'emy, jøts nima kyadigøy øts ja ndiidyu'unin, øts ja nbayø'øyin. Jøts niti nguidyimdyuñ ngø'ømdsojkingøjxp, ja' øts idø'øn ndumpy pøni sa ttsøky ja Dios Teety midi ø xkajxp. ³¹ Kuts ø kø'øm nnañitestigi'atit jøts ø kø'øm nnankmyøj'wya'aniiyit pøni sa ø njawa'añ, ka'ap yø ti tiy'ajtin tjagyepy. ³² Jaaxi ja' pøn ø xnitestigi'ajtp, jøts øts ja xpudøki; jøts pøni sa ja wyā'añ, nnija'wipts øts ja' jøts ku tiy janch ja wyā'añ. ³³ Meetsxi ojts xiibyiky ja Juan, jøts tiy janch ja' sa ja wyā'añ ku ja y'adsøøy. ³⁴ Kidits ja'ajip ø nmøk'ajtpy øy pøn jaa'y ja tiy'ajtin tjaky; jade'en'ampy øts idø'øn jade'en nwa'añ jøts mnitso'ok'ajtin xpaattit. ³⁵ Jade'en idø'øn ja Juan y'ijty sam jaj yjajyin, jøts meets yjaj ja waani

tø x'uktaxondakojiyi. ³⁶ Njagyejpyts øts tiy'ajtin jawani ka'pxy sam øts ja Juan ojts xkanigajpxyin. Tuki'iyi ti jaty ø ndumpy, nay ja' idø'on yø' midi øts Dios Teety tø xa'ane'emy jøts øts ja ndu'unt, yø'øts tyanigaxø'kp jøts ku tyiyi yjanchi ku øts Dios Teety tø xkexy. ³⁷ Ñayi yajkpy ja Dios Teety tiy'ajtin nayide'en jøts ku øts ja xkexy, øy meets ja nijuuni xka'ijxñim, øy meets ja nijuuni xkamadøynim. ³⁸ Jade'ents ja y'øgyajpxy ja y'øy'ayuujk ka' xja'gyukidinim, ja'agøjxp ku ja ka' xjanchjawidi pøn ja Dios Teety tø tkexy. ³⁹ Janch ni'ejxi nibaadi meets Dios kyajpxy x'ixpøjkiyi, kumi jap meets ja xtyimyjapaatwa'añ ja kunuu'kxy jujky'ajtin midi xemikøjxp; jøts øts Dios kyajpxy jap xnimadya'aky, ⁴⁰ jøts meets ka' xpabøkwə'añ ku njadukpaatwa'andi yø'øbi jujky'ajtin.

⁴¹ 'Ka' øts naxwii'ñit jaa'y y'agujkwindsø'jkin ngupøjkiyi. ⁴² Jøts njaaktyimñija'winip meets jøts ku meets Dios ka' xtsøky. ⁴³ Ja Dios Teety ø ngudanaapy ku ø nmiñ, jøts meets xkagupiky; kuts mye'ent jadu'uk kyø'ømdsojkingøjxp, mgupøkpts meets ja ne'egi. ⁴⁴ ¿Ma meets ja janchja'win xmøøt'ajtnit, kumi mnagyupøjxip meets ja windsø'jkin xem yam, jøts ka'ap ja tu'ukpi Dios yja' y'ixajyidi jøts ja xyiktu'undit? ⁴⁵ Jøts kidi mwa'andi jøts ku mee nni'øønit jam Dios Teety wyingujk; ja Moisés ja' mee kø'øm mni'øø'niyip, pøn mee møk mjøp'ijxpy. ⁴⁶ Kuk meets ja jeexyip xjanchjawidi sa wya'añ ja Moisés, nayi tøts meets jeexyip nayide'en xjanchjawidi, pø ja'axi ja Moisés ojts tja'ay jøts øts ja xnigajpxy. ⁴⁷ Pøni ka'ats ja xjanchjawidi midi ja yjaay, ¿mats meets ja xjanchja'winidit midi mee ndukmadøøpy?

6

Ku ja Jesús tyikaay ja nimagoxk milbi jaa'y

¹ Xjats ku dø'on ja wyinaty jade'en tø yjaty, winets ja nwindson'ajtim Jesús ojts ñijkxy jam Galileit mejy pya'am, jam jaduktamajñ. Nay yø'øbi mejy idø'on yiktejp Tiberias. ² Jøts may jaa'y ja jam ojts myøødiy, kumi tø ja wyinaty yik'ixy ja myilagri'ajtin ku ja tyiktsø'øky ja pa'amjaa'y. ³ Jøts ja nwindson'ajtim Jesús pyatøjkiyiñ ma kojpk jam, jøts ja jam tmøøt'ixaajky ja pyabøjkpitøjk. ⁴ Pyaatwanipts wyinaty ja paski xøøw midi ja israelit jaa'y xyø'ajttip. (Ja' xøøw yja'myajtstip sam ojts y'awa'atspidsømdi jam Egipto y'etjotp.) ⁵ Jøts ku nwindson'ajtim Jesús ojts t'ixy jøts ku may jaa'y ja pyamiñiyi, winets ja tnimaay ja pyabøjkpi Felipe:

—¿Mamts inet jadine'en njuu'yindit ja kaaky ja jii'kxy jøts yø jaa'y niduki'iyi kya'adyit?

⁶ Jade'en'ampy ja jade'en wya'añ jøts ja t'uk'ijxy sa ja Felipe yjatyimy'ukwa'ant; jøts kumi Jesús, ñija'wipts ja kø'øm pøni sa dø'on ja ttu'unt. ⁷ Xjats ja Felipe ja y'adsoojøø:

—Ku tsapkaaky majtsk magø'pxy denario juyin, niwine'en ja kyidyimñibaadit øyik pøn wine'enin yiin waan tyaja'adiyit.

⁸ Winets ja pyabøjkpi jadu'uk wyaañ pøn Andrés'ajtp, ja Simón Pedro y'uch:

⁹ —Ixyadam tu'uk mutsk mixyu'nk, magoxk cebadi tsapkaaky tmøødi jøts ajkxu'nk majtsk. ¿Ti windem yø mayjaa'y yø ndapaajtnam?

¹⁰ Xjats ja nwindson'ajtim Jesús wyaañ:

—Nøjmidi niduki'iyi yø jaa'y jøts wan t'ixa'akti.

Janch miyjoojt idø'on jam ja et, jøts ja yaa'dyøjk nimagoxk milin y'ixaktøø. Nika'ap ja tøøxyøjk yikmachøy møøt ja y'u'nk y'una'jk. ¹¹ Winets ja nwindson'ajtim Jesús tnixajiyiñ ja tsapkaaky, jøts ku ja ojts jawyeen ttukmøjawi ttukunuu'kxyjawi ja Dios Teety, jøts ja ojts tmø'øñim ja pyabøjkpitøjk. Ja'ats ja ojts tyikwa'kxti, jøts ja ojts tmo'odi niduki'iyi ja jaa'y pøn jam wyinaty tø y'ixa'akti. Nayide'en ja ojts tyikwa'kxti ja ajkx, jøts ja ojts tmøøgyøxti wine'enin ja kø'øm ttsokti. ¹² Jøts ku y'abajtidøø kyujxidøø, jøts ja nwindson'ajtim Jesús tnimaay ja pyabøjkpitøjk:

—Pøkmukti tuki'iyi yø abu'xk midi jaty tø wyindañ, jøts kidi nugo ti wyindigøy.

¹³ Winets ja tpøkmuktøø, jøts ja makmajtsk kach ujts t'abøjkidyøø ja kaaky abu'xkuna'jk, midi wyinaty tø wyindañ ja magoxkpit cebadi tsapkaaky. ¹⁴ Xjats ja jaa'y wyandøø ku ja t'ejxtøø jøts ku ja nwindson'ajtim Jesús jade'en wyinaty tø ttuñ ja milagri'ajtin:

—Janch yø' tam idø'on Dios kyugajpxy'ajtpy pøn yiktejp me'emp ya naxwiiñ.

¹⁵ Jøts kumi yja'wiyii'ñts ja nwindson'ajtim Jesús, jøts ku ja jaa'y ja wyinaty aguwani yiknøjkxwa'añi, jøts ja yiktøkiwya'añi møj windsøn, winets ja ojts nadyu'uk yjiwa'aky jøts ja ojts ñijkxy jam kojpkøjxp.

Ku ja Jesús ojts yø'ø y jam mejwyingøjxp

¹⁶ Xjats ku ja et wyinaty tø kyoodsini, winets ja nwindson'ajtim Jesús pyabøjkpitøjk kyidaktøø jam mejy agø'øm. ¹⁷ Jamts ja ojts tyøkidi barkijotp, jøts ja ojts ttanaxwa'andi ja mejy, jam idø'on ja nyøjkxti Capernaum. Jøts janch xaachkootsni dø'on, jøts ka'anims wyinaty ja nwindson'ajtim Jesús wyimbejtini. ¹⁸ Winets janch møk pyojpinaxwa'knøø, janch jadi'iñi ja nøø pyidø'kni. ¹⁹ Jøts ku dø'on ja jam wyinaty ñaxti, magoxk uk tudujk mil xajkin tø yø'øñidi, winets ja t'ejxpattøø ja nwindson'ajtim Jesús jøts ku jam wingon ja barki tñimiñ. Yø'øpy ja nøø wingøjxp, jøts ja yjantyimchø'jkidøø. ²⁰ Yide'ents ja ñimaajyidøø:

—Jøts idø'on, kidi mdsø'øgidi!

²¹ Xjats ja yjotkukidøø, jøts ja ejtni xoni tyiktøjkidøø jap barkijøtpy, jøts ja pojñ ojts yja'atti mā dø'on ja wyinaty ñøjkxti.

Ku ja Jesús ja mayjaa'y ojts y'ixa'ay

²² Jøts ku kyimjabom'ajty, jøts ja jaa'y pøn jam wyinaty tø tyandi jam mejy'am, jøts ja ojts tñijawidi jøts kudam ja nwindson'ajtim pyabøjkpitøjk wyinaty tø cho'onidi, jøts ku ja barki ja wyinaty tø ttanøjkxti midi jam wyinaty tu'ugyi, jøts ku nwindson'ajtim Jesús ja nika'ap tmøødidyøø. ²³ Jøtsnim ojts yja'atti wenkpi barki midi jam tso'ondip ma ja kajp jam txøøwi Tiberias, jam wingon mā ja jaa'y jam wyinaty ja tsapkaaky tø yikmo'odi, ku ja nwindson'ajtim wyinaty jawyeen tø ttukmøjawi tø ttukunuu'kxyjawi ja Dios Teety. ²⁴ Xjats ku ja jaa'y t'ejxtøø jøts ku ja nwindson'ajtim Jesús jam ka'ap pøn, jøts ni ja pyabøjkpitøjk jam kya'etti, winets ja ttatøjkidøø ja barki midi jam wyinaty tø yja'atti, jøts ja ojts ñøjkxti jøts ja t'ats'ixa'awa'andi jam Capernaum.

Ja Jesús amuum xyikjujky'ajtimp

²⁵ Jøts ku ja ojts yja'atti jam mejy agø'øm, jøts ja ojts tpaatti ja nwindson'ajtim Jesús, jøts ttiibyøjktøø:

—Windsøn, ¿windii mja'aty ya?

²⁶ Jøts nwindson'ajtim Jesús ja ñimaajyidøø:

—Janch øts idø'on nwa'añ, jøts ku meets ja'agøjxp x'ixa'ay ku mee ku'uxyi ojts mgay, jøts nigidi meets xja'gyukidi tigøjxp øts ojts ja milagri'ajtin nduñ. ²⁷ Køjxp najxp kaaky jii'kxy y'ity, jøts kidi ja'abi xnidundi. Ja' ne'egi mñidu'undip midi xemikøjxp jajkp midi mmo'ojidip ja kunuu'kxy jujky'ajtin. Yø'øbi kaaky yø'øbi jii'kxy øts idø'on nyajkpy, pø øtsxi ja naxwii'ñit jaa'dyi ngudanaapy.

²⁸ Winets ja jaa'y tyiktøøddøø jøts ja tñimaadyøø ja nwindson'ajtim:

—¿Tits øøts idø'on ndu'ump jøts ja yiktu'unt pøni midi dø'on ja Dios chøjkpy jøts øøts ja ndu'unt?

²⁹ Jøts nwindson'ajtim Jesús ja y'adsoojidøø:

—Midi mdu'undip, ja' Dios chøjkpy jøts ja xjanchjawidit pøn ja tø tkexy.

³⁰ Jøts ja tjaaktyimdyiibyøjktøø, yide'en tñimaadyøø ja nwindson'ajtim Jesús:

—¿Ti ejxa'ants mbikta'akp midi øø n'ejxp jøts myikjanchjawit? ¿Ti dø'on mdu'ump? ¿Ti dø'on myik'øyip? ³¹ Ojtsxi adøm ja n'aptøjk tjøø'kxti ja jii'kxy jam abak etjotp sam

ja Dios kyajpxy wya'añin ku ja ñimy: “Ojts Dios ja tsapkaaky ja tyukayidi midi tso'omp tsajpjøtpty.”

³² Winets ja nwindson'ajtim Jesús ja ojts yide'en y'adsøyidi:

—Janch øts idø'øn nwa'añ ku mee nnøjmi: Jøts kidi ja Moisésip ja', kidi ja'ajip ja ojts myø'øyidi ja tsapkaaky midi tso'omp jap tsajpjøtpty, pø ja Dios Teetyxi ja' pøn tyajkp tyimyja'abi tsapkaaky midi tso'omp tsajpjøtpty. ³³ Ja tsapkaaky midi Dios yajkpy, ja' idø'øn tø kyida'aky jap tsajpjøtpty. Ja'ats yajkpy ja kunuu'kxy jujky'ajtin pøn jaty ya naxwiiñ'ajttip, pøn ya yjanchja'widip.

³⁴ Winets ja tnimaadyøø ja nwindson'ajtim:

—Teety, møøy'ejtik øøts yø'øbi tsapkaaky.

³⁵ Jøts nwindson'ajtim Jesús ja ojts ñii'mxyidi:

—Øts idø'øn ja' sam ja tsapkaaky midi tmøøpy ja jaa'y ja kunuu'kxy jujky'ajtin. Pøni pøn ø xnimemp, pøn ø xpabøkp, nijuuni yuuj xøøw ja tka'ext; pøni pøn ø xjanchja'wip, nijuuni tøødsi ja tkagupøkt. ³⁶ Jade'ents sam tø nnøjmidi, ka' mee xjanchjawi øy mee tø xja'ixy. ³⁷ Niduki'iyi øts ja xnimendi pøn øts ja Dios Teety xagøðjøkip; jøts ja'adi pøn øts idø'øn jade'en xnimendip, ka' øts ja mibaat ngajxpidsimy. ³⁸ Kaja'ajip øts jap tsajpjøtpty tø nnidsøøn jøts øts ja ngø'ømwinmaa'ñ nyiktu'unt, pø ja' Dios Teetyxi øts ja yja' nduujnip pøn ø xkajxp. ³⁹ Jøts ja' idø'øn ja chøjkpy jøts ø ni tu'ugin nga'ejxigø'øty pøn jaty øts ja tø xagøðøki, jøts øts ja nyikjujkpyøktit ku wyinaty ja naxwiiñit kyøjxnit. ⁴⁰ Jøts nay ja' ja chøjkpy jøts niduki'iyi tpaattit ja jujky'ajtin midi xemikøjxp pøni pøn t'ejxtip tnija'widip, pønts tpaabøktip ja Dios U'nk, jøts øts ja ñiyikjujkpyøktit ku naxwiiñit kyøxt.

⁴¹ Winets ja israelit jaa'y tyabagajpxpinaxwa'akti ja nwindson'ajtim Jesús ku dø'øn ja wya'añ: “Øts idø'øn ja', ja tsapkaaky midi kidakp jap tsajpjøtpty.” ⁴² Jøts wyandøø:

—¿Kidi ja Jesúsip yø' pøn José myajnk'ajtpy? Pø nnija'wimts adøm tyeety tyaak yø'. ¿Sudso yø jade'en wya'añ jøts ku yø tsajpjøtpty kyida'aky?

⁴³ Xjats ja nwindson'ajtim Jesús ja tnimaay:

—Majstutu'utti yø pagajpxk. ⁴⁴ Ka'ap øts pøn nugo ajawi xtyimñimiñ pøni ka'ap øts Dios Teety ja kø'øm xagøðøki pøn ø xkajxp; jøts øts ja jaa'y nyikjujkpyøkt ku wyinaty ja naxwiiñit kyixy. ⁴⁵ Yide'en ja Dios kyugajpxy ñøky wya'andi: “Dios ja niduki'iyi yik'ixpøkidip.” Jade'ents øts ja xnimendi pøn jaty ja Dios Teety y'ixpøjkin tmadojødip, pøn jaty ja tnija'widip.

⁴⁶ Ka'axi pøn t'ixy ja Dios Teety; pø ja'ayixi ja nadyu'ugyi t'ejxp pøn nay jam tso'omp ma Dios. ⁴⁷ Jøts tyii'byi øts idø'øn nwa'añ jøts mee nnøjmi, pøni pøn ø xjanchja'wip, ja'ats idø'øn tpatp ja tsinaa'yin midi xemikøjxp. ⁴⁸ Øts idø'øn ja' sam ja tsapkaaky. Øts nyajkpy ja kunuu'kxy tsinaa'yin ja kunuu'kxy jujky'ajtin. ⁴⁹ Ojtsxi ja m'aptøjk tkaydi ja tsapkaaky jam abak etjotp, jøts ja jade'enbaat y'o'ljøkøjxtøø niduki'iyi; ⁵⁰ ja tsapkaakys midi ø ndijpy ja tsajpjøtpty kidakp, jøts ku ja pøn tka'adyit, ka'ats ja y'anmija'win wyindigø'ødyit. ⁵¹ Øts idø'øn ja kø'øm yø'øbi tsapkaaky midi tø kyida'aky jap tsajpjøtpty; jøts ku pøn tka'aty yø'øbi tsapkaaky, xemikøjxp ja yujky'att. Ja'abi tsapkaaky øts idø'øn ñamyayi nyakp, ku øts ja nne'kx ku øts ja nni'jpy ndagømøøyt ja naxwiiñit jaa'y jøts tpaattit ja nitso'ok'ajtin.

⁵² Winets ja israelit jaa'y agø'ømyi tkajpxy'ajtpinibøjkidyøø, jøts ja ñawya'añidi:

—¿Sudso ñe'kx sudso ñi'jpy yø xmøøwya'añin jøts ja nga'ayin njøø'kxin tsapkaagyin?

⁵³ Winets ja nwindson'ajtim Jesús ja ojts ñii'mxyidi:

—Øts idø'øn wamp, pøni ka' øts nne'kx xjøø'kxidi nni'jpy x'uukti, ka'ats ja nitsoojkin xpaattit. ⁵⁴ Pøni pøn nne'kx xjøø'kxip nni'jpy x'uukip, ja'ats ja kunuu'kx jujky'ajtin tpaattit; øts nyikjujkpyøktit ja' ku naxwiiñit kyøxt. ⁵⁵ Kumi jade'en'ampy ja møk'ajtin xjagyaptit øts nne'kxkøjxp nni'jpkjøjxp. ⁵⁶ Pøni pøn øts nne'kx xjøø'kxip nni'jpy x'uukip, xemikøjxp øts nmøøtt n'ett. ⁵⁷ Ja Dios Teety pøn ø xkajxp, ja' tmøøt'ajtp ja jujky'ajtin, ja'agøjxp øts njujky'aty; jøts nayide'en pøn øts nne'kx nni'jpy xjøø'kxip, nay øts køjxpxi y'etti. ⁵⁸ Ja'abi tsapkaaky øts idø'øn nnigajpxpy midi kidakp jap tsajpjøtpty. Ka'ap yø

ñayide'eni sam ja tsapkaaky midi meets ja m'aptøjk ojts tkaydi, jødsyim ja ojts niduki'iyi yjadyimy'ookti; pønts tkaapy yø'øbi tsapkaaky midi ø ndijpy, pyaatpts ja jujky'ajtin ja' xemikøjxp.

⁵⁹ Jam idø'øni ja nwindson'ajtim Jesús yø yjade'embii xpxøjkin tyajky ma ja jaa'y ñamyukyidi tsaptøjkjotp, jam Capernaumit kajpkøjxp.

Ya'at ayuujk xuknija'wimp ja øchinaa'yin midi xemikøjxp

⁶⁰ Kuts ja pyabøjkpitøjk jade'en tmdowdi ja xpxøjkin pøn jam wyinaty tpawidejttip ja nwindson'ajtim Jesús, jøts ja wyandøø:

—Ku yø jade'en wya'añ, janch tsep yø' jøts yø yikupøkt; ¿pøn yø jade'en tijy ukmøjkpikta'akip?

⁶¹ Xjats ja nwindson'ajtim Jesús tjä'wiyii'ñ, jøts ku ja jade'en tjanch'ayoji ku ja wyinaty jade'en tø wya'añ, winets ja tyiktiy:

—¿Yø' m'ayoojidip? ⁶² ¿Sa mdejtitt winets jøts ku ø nbatøjkinit nay jap ma øts jap ijty ndsøøni? ⁶³ Ja anmija'win ja' idø'øni jujky'ajtp; ¿ti yø ne'kx?, ka'ap yø ti wya'añ. Jøts ti jaty ø tø ngajpxy, yø' idø'øni ja Dios tyiy'ajtin'ajtpy, jøts yø' idø'øni yikjujky'ajtp xemikøjxp.

⁶⁴ Jøts ja meets ixa winaagin pøn yø tkajanchja'wip.

Tø dø'øni ja nwindson'ajtim Jesús ja wyinaty tnija'wiñi pøn jaty ja'adi pøn tka-janchja'widip, jøts ja' pøn ja køyakiyip. ⁶⁵ Jøts ja yide'en yjaakwaañ:

—Ja'agøjxp meets jade'en nnøjmi jøts ku ø ka'ap pøn nugo ajawi xniimiñ, pøni ka'ap Dios Teety ja kø'øm xagidøki.

⁶⁶ Winets may jaa'y myajtstuujtiniyi ja nwindson'ajtim Jesús, ka'ap ja t'ukmøøtwidejtnidi. ⁶⁷ Xjats ja nwindson'ajtim Jesús ojts tyiktiy jøts ojts tnøjmi ja ñimakmajtskpi jaa'y pøn ja pyabøjkpi'ajtpy:

—¿Mnøjkxwamip meets nayide'en?

⁶⁸ Jøts ja Simón Pedro ja ojts yide'en y'adsøyi:

—¿Pønimts øø teety njaaktyimñinøjkxp? Tum ja'ats me mgajpxpy midi xemikøjxp yikjujky'ajtp. ⁶⁹ Tøts øøts yø njanchja'wiñi jøts nnija'wip øøts jøts ku me Cristo, ja Dios U'nk, midi jujky midi kunuu'kxy.

⁷⁰ Winets ja nwindson'ajtim Jesús t'adsøoy:

—¿Ti kidi mee tø nwi'ixy nimakmajtsk? Ixats mee nidu'ugin miku'aty.

⁷¹ Ku dø'øni ja jade'en wyaañ ja nwindson'ajtim Jesús, ja Judas Iscariote dø'øni ja jade'en tyijpy pøn ja Simón myajnkpi, pø ja Judasxi ja wyinaty køyakwajnip, øy idø'øni ja nimakmajtsk møøt yjaka'pxy ja pyabøjkpitøjk.

7

Ka'ap ja Jesús ja myigu'uk yjanchjawiyi

¹ Xjats ku dø'øni ja jade'en wyinaty tø y'ukjaty, jøts ja nwindson'ajtim Jesús jam ja wyinaty wyidity Galileit etjotp. Judeit etjotp idø'øni kyawidetwa'añ ku ja ja'it jaa'y jam wyinaty yik'ookwa'añiyi. ² Jøts kumi ja xøøwts wyinaty tyimbyatpy midi ja israelit jaa'y tyundip ku ja tyik'øiyidi ja waxnaky, nayide'en sam ojts y'etti y'apteety jam abak etjotp, ³ winets idø'øni ja nwindson'ajtim Jesús ja myigu'uktøjk ñimaajiyøø:

—Ka'ap ya mda'ant; jam mnøjkxt Judea, jøts ja mbabøjkpitøjk nayide'en jam m'ejxmiyit sa jaty mduñ. ⁴ Ku pøn ttsøky jøts yiknijawit, ka'ap ja ti amaa'tsk ttuñ. Ejx mets yø jade'en xuñ. Tunts mets yø jade'en øy madsoo, jøts mets yø øy pøn xuk'ext.

⁵ Niwine'eninxii dø'øni ja myigu'ukti ja kyajanchjawiyi. ⁶ Xjats ja nwindson'ajtim Jesús ja tnimaay:

—Ka'anin øts ndiempi tpaaty jøts ø nnøjkxt; jøts meets, øy meets øy juuni mnøjkxt.

⁷ Ka' meets ya pøn mmi'ekiyi; øts, yikmi'ajkip øts ja'agøjxp ku øts ja tuki'iyi nnigajpxy

sa jaty kya'øyjaa'y'atti. ⁸ Nøjkxts mee m'atsxøbaaty; ka'ap ø nnøjkxt, kumi ka'aním øts njuky'ajtin pyaat'atynim.

⁹ Kuts ja jade'en wyaañ, jøts ja jamyí Galilea tyaañ.

Ku ja Jesús ojts ñijkxy xø'ajtpi

¹⁰ Xjats ku ja myigu'uk wyinaty tø choondi, jøts ja nwindson'ajtim Jesús nayide'en ñijkxy ma wyinaty jam ja xøøw, øy idø'on ja ka'ap yjadyimñanky'ijxyi jam mayjaa'yjotp. Yu'uch idø'on ja wyidity. ¹¹ Jøts idø'on ja israelit jaa'y ja yjadyimy'ixa'ayi ku ja xøøw tyuñi, yide'en idø'on ja wya'andi:

—¿Ma net ja jaa'y midi Jesús nadyejip?

¹² Jøts jam mayjaa'yjotp jam ja may pøn ja nimadyajkiyip. Pømbi jam nømp: “Øy jaa'yxi ja”; jøts jadu'uk wyamidi: “Ka'ap ja y'øyjaa'yi, nugo jaa'y ja twin'ññ.”

¹³ Jøts ka'ap pøn nugo ajawi møk tñimadya'akti ja'agøjxp ku ja israelit jaa'y wyindsøn jamdi, ja' ja chø'jkidip.

¹⁴ Kujkwa'kxnip ja xøøw wyinaty ku ja nwindson'ajtim Jesús tyøjkiyññ jam tsaptøjkjotp, jøts ja jam yik'ixpøjk'okwaañ. ¹⁵ Jøts idø'on ja israelit jaa'y ja ñigyumaap tyimyjawidi, yide'en ja wya'andi:

—¿Sudso yø jadine'en tjaty, jøts ka'ats y'ixpikyí?

¹⁶ Xjats ja nwindson'ajtim Jesús t'adsøøy:

—Yø ixpøjkin ka' øts yø nja'aji, ja' yø' yja' pøn ø xkajxp. ¹⁷ Pøni jam pøngapøn, pøn jade'en ja tsojkin tjagyajp jøts tpadunwa'añ sa Dios ttsøkyin, ñijawipts ja' pøni kidi jamip øts n'ixpøjkin chøññ ma Dios, uk kidi ngø'øm ja' øts jade'en ngajpxpy. ¹⁸ Pøn kyø'øm ja' nugo tkajpxp, jade'en'ampy ja jade'en ttuñ jøts ja jaa'y ja yikmøjtøkiyit; pøni pøn ttsojkp jøts tyikmøjtøkit ja Dios Teety yja' midi ja tø tkexy, tiy janch ja wya'añ, ka'ap ja tyaa'yi.

¹⁹ '¿Ti kidi ja yjanchi jøts ku meets ja Moisés ojts mmø'øyi ja kutujk? Jøts ka'ats niwine'enin xpadundi ja kutujk. ¿Tigøjxp ku xyik'ookwa'andi øts?

²⁰ Jøts ja mayjaa'y ja y'adsoojiyi:

—Pø tø mets miku' mdatøkiyi; ¿pøn idø'on myik'ookwajnip?

²¹ Jøts ja nwindson'ajtim Jesús ja tñimaay:

—Tyimyja' idø'on ku tuk'ojkyi ojts jade'en n'adi'ich yam yjapoo'kxinxøøwi, ja'ats mee mga'øyja'wip. ²² Ojts meets ja Moisés mdanigutujk'atyí jøts meets mutsk unaj'jk ja chuu-jku'nk xjøptsuktuujtít midi yiktejp circuncisión (øy ja tyeety'aptøjk ja tjayiktso'onda'aky, pø nigidi ja'ajipxi ja kø'øm tyiktso'ondakp), ¿tigøjxp meets ja mutsk mixyuna'jk xuujni ja circuncisión wan tjapoo'kxinxøøwi? ²³ Jabi mduujnipts meets ja mutsk mixyuna'jk ja circuncisión øy ja poo'kxinxøøwi, ¿ti kuts øts ja xami'ambiky ku øts ja jaa'y amuum tø nyiktsø'øky ku poo'kxin xøøw? ²⁴ Kidi meets øy sagasa mbayø'øyi pøni sa øy tigati x'ejxti. Ku mbayø'øwya'andit, yikxon xu'undit tiy'ajtingøjxp.

Ku ja Jesús tñigajpxy pøn ja kajxip

²⁵ Xjats winaagin pøn wyinaty tø choondi jam Jerusalén, jøts ñay'amidoojiñaxwa'jkidøø:

—¿Kidi ja'ajip yø' midi yik'ixaapy, midi yik'ookwandip? ²⁶ Ixats yø kyajpxy mayjaa'y agujky, mats yø pøn sa kyanima'añiyi. ¿Wan ndejin kudunktøjk tjantyimyjanchjawidi yø'øbi jaa'y jøts ku yø Cristo? ²⁷ Jabi wa'atsxi adøm yø nnija'wam ma yø chøøñ; kuts ja Cristo mye'ent, ka'ats ja yiknijawit pøni ma ja choont.

²⁸ Ja'ayi ja nwindson'ajtim Jesús ja jade'en ojts tñadøy, pø ixamxi ja wyinaty tsaptøjkjotp yik'ixpiky, xjats ja møk wyaañ:

—¡Aaa wa'ats tam meets x'ijxy'aty, jøts mnija'wip tam meets yø' pøni ma ø ndsøøñ! Kidits ngø'ømwinmaa'ngyøjxpipxi ø nmiñ, ja' ø xkajxp jøts øts ja ngudanit midi dø'on tyimyjanch'ajtp, midi mee mga'ijxy'ajtpy. ²⁹ Wa'ats øts ja n'ijxy'aty kumi jam ø ndsøøñ, ja'ats ø xkajxp.

³⁰ Winets ja ojts tjadyimyja'ukmatswa'andi jøts ja ttsu'umdit; nika'apts ja ojts pøn ñixajiyi kumi ka'anım ja wyınaty xyøga'pxy. ³¹ Jamts ja maydi pøn ja janchja'wiyøø, pøn wandıp:

—Ku ja mye'ent ja Cristo, ¿ti mılagrı'ajtın ja jawaanı yjaaktyimdyu'unt, ti ti yø jaa'y yam kyatumpy?

Ku ja fariseotøjk t'ana'amdi ja chaptøjk jøts ja Jesús yikmatst

³² Xjats ja fariseotøjk tmadowdi sa jaty ja nwindsøn'ajtm Jesús ja jaa'y ñimadya'agyiyi; winets ja t'ana'amdøø ja tsaptajk pøn tump jap tsaptøjkjøtpy, jøts tyimyikmatst ja nwindsøn'ajtm. Ja teetywindsøn idøøn ja jade'en møøt y'adøøtsti. ³³ Winets ja nwindsøn'ajtm Jesús wyaañ:

—Tyimyjawaanı meets yam njaakwindsøøni, jøts øts ja n'awimbejtyınit pøn ø tø xkexy.

³⁴ Xjadyimyja'ixa'ap meets, ka'ats mee ma xpaatt. ¿Ja ti ja meets jap mnøjkxt mats jap n'ett?

³⁵ Xjats ja israelit jaa'y agøømyi ñayiktøøbinaxwa'jkidøø:

—¿Ma døøn yø ñøjkxwa'añ, sudso døøn yø wya'añ jøts ku adøm yø nga'ukpaajtına'ant nıma? ¿Wan yø ndejın jam tnınøjkxwa'añ ja israelit jaa'y pøn jadi'iñi tø yø'øwya'kxnıdi, møøt tø ñamyıdøjkniyidi ja griegit jaa'y? ¿Ja' ndejın yik'ixpøkwampy? ³⁶ ¿Ti døøn yø jade'en tyıjpy ku yø jade'en tø xnıma'ayın ku wya'añ: “Xjadyimyja'ixa'ap meets, ka'ats mee ma xpaatt, ja ti ja meets jap mnøjkxt mats jap n'ett”?

Ja kunuu'kxy jujky'ajtın midı ja Jesús yajkpy

³⁷ Ja yjadu'ukpi xøøw midı ja xøøw tyamıgugøjxinıp, ja' idøøn ja tyimy'ukmøjnajxnıp, winets ja nwindsøn'ajtm Jesús wya'kukıyıñ, jøts ja møk'ampy wyaañ:

—Pøni pøn ja kunuu'kxy jujky'ajtın ttsojpk jade'en sam ndøøjtsant, wants ø xnımiñ jøts ø nmo'ot. ³⁸ Pøni pøn ø xjanchja'widıp, jade'ents ja yjattıt sam wya'añ ja nøky jøts ku ja jam y'anmıja'winjotp jade'en myu'ut ja nøø midı yıkjıjky'ajtp xemıjøjxp.

³⁹ Jade'en idøøn ja nwindsøn'ajtm Jesús tjatıjy, pøni pøn ja janchja'wıyıp, ja'ats ja Espıritu Santo pyaattıp; ka'anım idøøn ja Espıritu Santo wyınaty myıñ, kumi ka'anım ja nwindsøn'ajtm Jesús wyınaty tmımadakıxy ja ayo'on jøts chajpatt.

Ku ja jaa'y ojts ñawyınwa'kxnıyidi ja nwindsøn'ajtm Jesús køjxp

⁴⁰ Xjats jam mayjaa'y agıjpk wınaagın wyandøø, ku ja jade'en ojts tmadowdi:

—Tyımyjanchja'adam idøøn yø jaa'y ja Dios kyugajpxy midı idøøn yik'awejxp.

⁴¹ Jøts jadu'uk wyamıdi:

—Ja Cristo yø'.

Jøts wyenkpi wyamıdi:

—¿Sudso ndejın ja Cristo jam kyaxø'økt Galılea? ⁴² Yıde'ents jap nøkyıjpxy jaabyety wya'añ jøts ku ja rey David ja' y'apjaa'y Cristo'atp, jøts ku ja jam choont Belén, nay jam ma ja David y'ıjty kyugajpi.

⁴³ Xjats idøøn ja jaa'y jade'en ñawyınwa'kxnıyidi ja nwindsøn'ajtm Jesús køjxp. ⁴⁴ Jam wınaagın pøn ja tjadyımy'ukmatswandøø, nika'apts jade'en pøn y'adıjch.

Ku ja windsøndøjk ojts tkajanchjawıdi ja Jesús y'ayıujk

⁴⁵ Jøts ja tsaptajktøjk ojts wyımbejtnıdi ñøjkxnıdi ma ja fariseotøjk jam wyınatyı møøt ja teetywindsøndøjkti, ja'ats ja ojts ñıi'mxyıdi:

—¿Tıgøjxp ku tø xkayıkmendi?

⁴⁶ Jøts ja tsaptajktøjk y'adsowdi:

—ıKa'anım ma pøn jade'en kyajpxy sam yø jaa'y kyajpxyın!

⁴⁷ Winets ja fariseotøjk ja ñımaajyıdøø:

—¿Meebaat nayide'en tɔ myikwin'ɔɔ'nidi? ⁴⁸ ¿Ti tɔ adɔm winaagin ja nwindson t'ukjanchjawidi, uk tɔ ja yjawit tu'ugin ja fariseit t'ukpabɔkti? ⁴⁹ Yɔ mayjaa'dyi pɔn tkamɔja'widip ja kutujkin, yɔ' kawindiy'ajttip ku ja tpabɔkti.

⁵⁰ Ja Nicodemo pɔn ja nwindson'ajtim Jesús ojts koots ñiniikxyi, nay ja fariseit ja', ja'ats ja myigu'uk ojts tnɔjmi:

⁵¹ —Jade'en sam adɔm ja ngutujk tyikutujkyim, ka' pyaat'aty jɔts adɔm jaa'y ja ayo'on ndyimdyanigajpxkojin ku ja ka'anin nmadɔ'oyindi jawyeen pɔni ti dɔ'on ja tyumpy.

⁵² Jɔts ja ojts yide'en yik'adsɔy:

—¿Nayi Galileit jaa'y mets? Ixpɔk waani ja Dios kyajpxy jɔts xnijawit jɔts ku ni tu'uknim ja Dios kyugajpxy jam kyayiknijawinim Galilea.

Ja ka'odyɔ'ɔxy

⁵³ Jɔts ojts ñɔjknidi ma jaty pɔn tyɔjk.

8

¹ Jɔts ja nwindson'ajtim Jesús jam ja ojts ñiikxy Olivos kojpkɔjxp, ² xjats ku yjajtaajky kyimjabom, winets ja ojts ñiikxy jam tsaptɔjkjotp. Jɔts ja jam ɔy pɔn ñimejniyɔɔ, winets ja y'ixaajky jɔts ja yik'ixpɔjktɔjkiyii'ñ. ³ Jɔts ja kajpxwejpɔjkti mɔɔt ja fariseotɔjkti, ja' ojts twaamendi tu'uk ja tɔ'ɔxyɔjk pɔn ja myigu'uk ñiyaa'y myɔɔt'ajtip. Jɔts idɔ'on ja jam ojts yikpikta'aky mayjaa'y agujkp pɔn jaty jam wyinatyi, ⁴ jɔts ja tnimaadyi ja nwindson'ajtim Jesús:

—Windsɔn, jap ya'at tɔ'ɔxyɔjk tɔ tyimykubaadi ku ja myigu'uk ñiyaa'y tmɔɔt'ajti. ⁵ Yikutujkpy ja Moisés kyutujk jɔts adɔm yɔ'ɔbi tɔ'ɔxyɔjk nga'tspa'oo'kint. ¿Sá me m'ukwa'añ?

⁶ Jade'en'ampy idɔ'on ja ojts jade'en wya'andi jɔts ja tkajpxy'ejxwa'andi, jɔts ja jade'en tigati ttukpɔky'atwa'andi. Winets ja nwindson'ajtim Jesús wyindaajky, jɔts ja ojts ja kyɔtsa'jx ttajaabyinaxwa'jky ja naajx. ⁷ Jɔts kumi yiktiibyɔjk'adɔtsp ja', winets ja kyookukiyii'ñ jɔts ja tnimaay:

—Pɔni jam pɔn kapɔkmyɔɔt, wan ja jawyeen tkonji'iky ja tsaa jɔts ttaka'atst yɔ tɔ'ɔxyɔjk.

⁸ Jɔts ja nayide'eñim ñaxkoogojmi, ja naajx ja yjay'adichpy. ⁹ Jɔts ku ja ojts jade'en tmadowdi, jɔts ja yjanchnabyɔkyjawiyidɔɔ, jɔts ja ojts wya'kpidsomnidi nidu'uk jaty. Ja mɔjaa'dyɔjk jawyeen pidsomnidɔɔ; xjats ku ja wyinatyi tɔ pyidsomgɔxti, jɔts ja nwindson'ajtim Jesús nadyu'uk tyaañ mɔɔt ja tɔ'ɔxyɔjk. ¹⁰ Winets ja nwindson'ajtim Jesús kyookukiyii'ñ jɔts ojts t'ixy ku ka' pɔn, ja tɔ'ɔxyɔjkyi jap wyinatyi, jɔts ja tnimaay:

—¿Ma net ja'adi pɔn mni'ɔɔ'niyidip? ¿Ka' pɔn sá tɔ mduniyi?

¹¹ Jɔts ja ñimaajyɔɔ:

—Ka' windsɔn'ajtim pɔn.

Jɔts nwindson'ajtim Jesús ja tnimaay:

—Ni ɔts mets sá ngatu'unt. Nɔjknii, kidi m'ukpojkituni.

Ja Jesús xyikujajimp xyikudɔɔ'kximp

¹² Xjats ja nwindson'ajtim Jesús ojts jadigojk tmigajpxy ja mayjaa'y, jɔts ja tnimaay:

—ɔts tu'uk tu'uk ja naxwii'ñit jaa'y nyikujajtaajkip nyikudɔɔ'kxaaajkip; pɔni pɔnts ɔ xjotmay'ajtp, pɔni pɔn ɔts ja nja' xpabɔjkip, ja'ats idɔ'on yikmo'op ja wejin ja kajin jɔts ja tyukpaadit ja kunuu'kxy jujky'ajtin, nijuuni ja wimbeets kugoots kyajattit.

¹³ Winets ja fariseotɔjk ja ñimaajyɔɔ:

—Kɔ'ɔm mets jam ɔy mnanktyiidyɔkiyi, ka'ap yɔ ma tyuñ.

¹⁴ Jɔts ja nwindson'ajtim Jesús ja t'adsɔy:

—Jade'en sá ɔ nwa'añ, tump yɔ' ɔy ɔ kɔ'ɔm nnanktyiidyɔkiyi. ɔts ja nnija'wip ma ɔ ndsɔɔñ jɔts ma ɔ nnɔjkxt. Meets, ka' xnijawidi pɔni ma ɔ ndsɔɔñ uk pɔni ma ɔ

nnøjkxt. ¹⁵ Jade'en meets øy ti xpayø'øý sam ja naxwiiñ'ajtin ja kyutujkin. Ka'ap øts øy pøn ti ndabayø'øý; ¹⁶ jøts kuts nbayø'øty øts, tiy øts ja ndiidyu'unin nbikta'akt, kumi ka' ø nadyu'uk ndiidyu'unt, nayide'en øts ja møøt ndiidyu'unt ja nDeety pøn ø xkajxp. ¹⁷ Jade'en jap kyøxja'ayi jap nøkyjøtpy midi mee mgutujk'ajtpy, ku ja testigi'ajtpi namajtsk tum jade'en wya'andi, ja'ats idø'øn yja' yikjanchjawidip. ¹⁸ Jade'ents øts yam kø'øm nañidestigi'ajtip, jøts jadu'uk ja nDeety pøn ø xkajxp, ja' ø xnidestigi'ajtp.

¹⁹ Winets ja nwindson'ajtim yiktiibyijky:

—¿Ma dø'øn ja mDeety?

Jøts ja nwindson'ajtim Jesús t'adsøøý:

—Meets, ka' mee xnijawi, jøts ni ja nDeety mee xkanija'wiyi; ku øts jeexyip xnijawidi, mnayinija'widipts meets jeexyip ja nDeety.

²⁰ Jade'en idø'øn ja nwindson'ajtim Jesús wyaañ ku ja ixam wyinaty yik'ixpiky jam tsaptøjkjotp, ma ja limunsi meefi wyinaty ja ñigajuun. Nika'apts ja ojts pøn myachi, kumi ka'anin ja wyinaty xyøga'pxy.

Nømp ja Jesús: “Ka'ap meets jap mibaat mnijkxy pøni ma ø nnijkxy”

²¹ Jøts idø'øn ja nwindson'ajtim Jesús tnimaagyojmi ja mayjaa'y:

—Nøjkxnipt øts, øy mee xja'ixa'at mi'ookpts meets yø mbøky; jap ma ø nnijkxy, ka'ap meets jap mibaat mnøjkxt.

²² Winets ja israelit jaa'y wyandøø:

—¿Wan yø ndejin ñankpya'ookwa'anayi, patyts yø wya'añ ku adøm jap nganøjkxin ma yø ñijkxy?

²³ Jøts nwindson'ajtim Jesús ja ñimaajydøø:

—Meets, ya mee mdsøøñ, ya mee mgaxi'iky; øts, jam ø køjxp ndsøøñ. Ya mee mnaxwiiñ'aty, øts ka'. ²⁴ Paty meets idø'øn nnøjmi jøts ku mbøky xmi'ooktit; ku ka' xjanchjawidi pøni pøn øts, mmi'ooktipyimts idø'øn ja mbøky jade'en.

²⁵ Winets ja nwindson'ajtim Jesús yiktiibyijky:

—¿Pøn mets idø'øn?

Jøts nwindson'ajtim Jesús t'adsøøý:

—Jaayim øts yø nnigajpxy ity ku nyik'ixpøjktøjkiyiñ. ²⁶ May øts ja winmaa'ñ njagyepy midi ø ngajpxwampy, jøts mee nbayø'øwya'añ nayide'en. Tiy'ajtingøjxp ja kyajpxpy pøn ø xkajxp, jøts pøni sa ø nnøjmi ja naxwii'ñit jaa'y, jade'en øts idø'øn ja tømadoy jøts ku ja jade'en wya'añ.

²⁷ Ka'apts ja tja'gyukidi jøts kudam ja ja' yiknigajpxy ja Dios Teety. ²⁸ Ja'agøjxp ja ojts ñii'mxyidi:

—Ku meets jam kruskøjxp xpikta'akt, jaanimts meets x'ejxkapt jøts ku øts idø'øn ja wyinaty sa tømwa'añ, jøts ku ka' ja ngø'ømwinmaa'ñ nyiktuñ; ja'ayi øts idø'øn ngajpxpy midi øts ja nDeety tøm xuknijawi. ²⁹ Pøn øts xkajxp, møøt øts ja n'ity; ka' øts ja nDeety nadyu'uk xmajtstu'uty, pøm tum ja'axi ø ndumpy midi ja tyajotkujk'ajtpy.

³⁰ Ku ja nwindson'ajtim Jesús jade'en ojts wya'añ, winets may jaa'y ja ojts yjanchjawiyi.

Ka' nduknaxa'amp, jaa ja Dios yja' jøts ja miku' yja'

³¹ Xjats ja nwindson'ajtim Jesús tnimaay ja israelit jaa'y pøn ja wyinaty tøm yjanchjawiyi:

—Pøni mnadyamiyojxidip tu'ugyi sa ixa nnøjmidi, meetspits idø'øn tiy xjantyim-byabøjkpi'atp; ³² winets ja tyiibyij yjanchpi xnijawidit, jøts ja myik'awa'atspidsømidip.

³³ Jøts ja ojts yide'en t'adsowdi:

—Ja Abrahamxi øøts ndeety'amøjip, jøts ka'anims øy pøn windi xyiktuñ nugo ajawi. ¿Sudsots me mnimy jøts ku øø n'awa'atspidsøømt?

³⁴ Jøts ja nwindson'ajtim Jesús ja tnimaay:

—Janch øts idø'øn nwa'añ ku mee nnøjmi, niduki'iyi pøni pøn pøkyundip, ja pøky ja ñamyayi yja'bøjknip. Pøkpyatki'py ja ñamyayi y'ejtnidi. ³⁵ Tu'uk ja tumbi pøn

yikøj'ømit'ajtnip, ka'ap ja nayide'en ja kutujk tjagyepy sam ja jaa'y ja y'u'nk y'una'jk tjagyepyin. ³⁶ Jade'ents øts ja Dios Teety x'U'nk'aty jøts ku mee nyik'awa'atspidsø'ømt, xemikøjxpts ja jade'en. ³⁷ Øy meets ja Abraham xja'aadsj xjakojkki, xyik'ookwampts meets nayide'en winaagin, ja'agøjxp ku meets ø n'ayuujk xkagupøjki pøni sa njawa'añ. ³⁸ Pø ja'ats ø ngajpxy midi øts nDeety tø xukjaty; jøts ku meets, pø ja'axi mee nayide'en mbadumpy midi meets mdeety mdani'ana'amip.

³⁹ Jøts ja ojts yik'adsøy:

—Ja Abraham øø ndeety'amøjip.

Yide'ents ja nwindson'ajtim Jesús ja ojts ñii'mxyidi:

—Ku meets jeexyip ja Abraham mjanch'u'nk'atyiyi mjanch'una'jk'atyiyi, nayide'en meets jeexyip mjaa'y'aty sam ja ojts yjaa'y'atyin. ⁴⁰ Ni jade'ents, o meets ja tyii'byi yjanchpi tø njadukmadøy sam øts Dios Teety ja tø xjaduknijawin, ne'egi xyik'ookwamp meets. ¡Ni ja Abraham ojts jade'en kya'adi'ich sam meedsin! ⁴¹ Nayide'en mee m'adi'ich sam ja mdeety y'adi'ichin.

Winets ja wyandøø, jøts ja nwindson'ajtim Jesús yiknimaay:

—Ka'ats øøts jadi'iñi ngaxi'iky; ja Dios øø tu'ugyi nDios Teety'ajtpy.

⁴² Winets ja nwindson'ajtim Jesús ja tnimaay:

—Ku jeexyip ja Dios Teety xDios Teetyjawi, xtsojpk meets jeexyip, pø jamxi ø ndsøøn ma ja Dios jam ku øts ixyam nya'a'aty. Kidi ngø'ømwinmaa'ñipxi ø nmimimpy, pø ja Diosxi ø xkajxp. ⁴³ ¿Tiku wine'enin mguidyimyja'gyukidi sa ø njawa'añ? Ka' xtyimyadoowajni ja ngajpxy ja n'ayuujk. ⁴⁴ Ja miku' ja' mee mdeety'ajtpy; ja' mee mgøj'ømit'ajtip jøts ja' mdunwandip ti jaty ja ñanktyunwajnip. Tso'onda'agyip ja miku' yikjaa'y'oo'knibøjkini. Nijuuni ja tkayiktuñ ja tyii'byi ja yjanchpi, jøts nijuuni tiy janch kyakajpxy. Ku ja tyaa'y'aty, jade'eñi ja kyajpxy sayim idø'on ja myiku'atyin, ja'agøjxp ku yjantyimdyayyi, jøts ja' idø'on tnwindson'ajtp ja taay'ajtk ja win'øø'nk. ⁴⁵ Kuts øts yam tiy janch njawa'añ, ka'ats meets ø xmibiky. ⁴⁶ ¿Pøn jam winaagin ukwa'anwamp jøts ku øts pøky nmøødi? Kuts tiy janch nwa'añ, ¿tigøjxp ku ø ka' xjanchjawi? ⁴⁷ Pøn Dios ja'ajtip, myadoowajnip ja' ja Dios y'ayuujk; jøts kumi ka'ats meets Dios mja'aty, patyts meets ja ka' xpatmadoowajni ja y'ayuujk.

Jaayim ja Cristo ku ja Abraham yja'ajty

⁴⁸ Xjats ja israelit jaa'y ja ojts ñii'mxyiyi:

—Tyimdyiyimxi øøts idø'on njadyimyjawa'añ ku øø nnimy jøts ku me msamariitjaa'yi, jøts ku ja miku' tø mdatøkiyi.

⁴⁹ Jøts ja nwindson'ajtim Jesús ja ojts yide'en t'adsøy:

—Niwine'enin øts miku' xkadatøki. Ja' øts ja'ayi ndumpy jøts øts Dios Teety nwindso'øgi, ja' mee xkadamøj'ejxp. ⁵⁰ Ka'øtsip ngø'ømja' n'ixaapy, øyi ja yjajaa'aji pøn øts nja' x'ixaajyip. Ja'ats tpayø'øpy pøn ødyump ka'ødyump. ⁵¹ Jøts janch øts idø'on nwa'añ, pøni pøn tmøjpiktakp sa ø nwa'añ, nijuuni ja kya'oøktit kyawindigø'ødyit.

⁵² Winets ja israelit jaa'y ja y'adsoojiyøø:

—Tønims øøts inet yam ndyimyjanchjawinim jøts ku ja miku' tø mjanchtatøkiyi. Sa ja Abraham tø y'øøky møøt niduki'iyi ja Dios kyugajpxtyi, jøts me mwa'añ: “Pøni pøn tmøjpiktakp sa ø nwa'añ, nijuuni ja kya'oøktit kyawindigø'ødyit.” ⁵³ ¿Ti me ndejin mjaaktyimdyajinajpxy jøts ku ka' myajada'aky øøts ja ndeety'amøj Abraham? Sa ja y'ø'jky jøts sa nayide'en y'oo'ktøø ja Dios kyugajpxy, ¿pønts mets idø'on mdsaañadyijyi?

⁵⁴ Jøts ja nwindson'ajtim Jesús ja t'adsøøy:

—Ku ø kø'øm nnankmyøjtøkiwya'anit, ka' ma tyuñ øts ja ngø'ømja'. Ja Dios Teetyts ja' ø xyikmøjtøjkip midi mdejtip jøts ku ja' xDiosidi. ⁵⁵ Meets, ka' meets ja xnijawidi. Øts, wa'ats øts ja nnijawi, jøts ku ø nwa'ant jøts ku øts ja ka'ap nnijawi, janchtyimdyay øts idø'on wyinaty nayide'en sam meedsin. Njanchtyimñija'wipts øts ja' jøts nmimadøøpy

øts ja' pøni sa ja wya'añ. ⁵⁶ Jøts ja Abraham, pøn meets idø'øn m'aadsidip mgugojidip, xaxondaajk øts ja' ku tnijaw'aty kuts nmenwa'añ ya naxwiiñ; x'ejx øts ja' jøts janch øy tsuj ja ñayjawiyi.

⁵⁷ Winets ja israelit jaa'y tnimaadyøø ja nwindson'ajtim Jesús:

—Ni kyaja'atynim ja mjumøjt wixijxmyajk, ¿jøts mjanch'uknimy jøts ku ja Abraham tø x'ixy?

⁵⁸ Xjats ja nwindson'ajtim Jesús t'adsøøy:

—Tiy janch idø'øn nwa'añ, jøts ku øts jaayim wyinatyni ku ja Abraham kyaxi'jky.

⁵⁹ Winets ja tniyajidi ja tsaa jøts ja ttaka'atswa'andi ja nwindson'ajtim Jesús; nayu'jtsi ja', jøts ja ojts pyidsømnim jam tsaptøjkjotp, jam ja mayjaa'y ja ttanajxy, jøts ja ojts jade'en cho'oni.

9

Ku ja Jesús ojts tyikwin'ejxwa'kxy ja winap jaa'y

¹ Xjats ku ja nwindson'ajtim Jesús jam wyinatyni ñaxy, winets ja ojts t'ixy tu'uk ja yaa'dyøjk pøn wyinatyni winap, jade'en ja tyimgye'exy. ² Jøts ja nwindson'ajtim Jesús ja pyabøjkpitøjk ñimaajiyiøø:

—Windsøn, ¿sudso yø jaa'y jade'en winap tø kye'exy? ¿Jade'en idø'øn n'ukwa'anint, ja tyeety idø'øn ndejin jantymbyøkmyøøtti, uk kyø'ømbøky idø'øn yø jade'en tuujnip?

³ Winets ja nwindson'ajtim Jesús ja ñimaajyidøø:

—Kidi kyø'ømbøkyip yø jade'en kyuwanjajtip, jøts nigidi ka'ap tyeety yø tpøkyi; jade'en'ampy idø'øn yø jade'en yjaty, jøts yø' ñikøjxp yiktuk'ejxtit øy pøn midi ja Dios tyu'ump. ⁴ Wants øts ja tyunk tjaaktyimdyuujni jaaktsojknim; jotmøn ø n'ukugoodsiñit kuts ja wyinatyni ja tyunk ngatungøjxi pøn ø xkajxp. ⁵ Pøni wine'enin ø njaaktsøøni ya naxwiiñ, njaaktyimdyu'umbyimts øts jade'en sam ja jaj kyujajy kyudii'kxy. Jade'en øts ja naxwii'ñit jaa'y ñamyayi nyikujajtaagidit nyikudøø'kxaagidit.

⁶ Kuts idø'øn ja jade'en wyan'abajtiyii'ñ ja nwindson'ajtim Jesús, jøts ja ojts chujy tyiknaxkida'aky jam naxkøjxp, jøts ja naajx ja yii'nim ojts ttamimo'otsyø'øyi ja chujy. Mo'ontsu'nk tyik'øyi'ii'ñ, ja'ats ja ojts yiktawinjaaxy ja winap jaa'y. ⁷ Jøts ja tnimaay:

—Nøjkx m'atsnawyimbujyi jam nømu'utjotp midi yiktejp Siloé —jade'en idø'øn ja Siloé y'ayukpidsimy: ja' pøn tø yikexy.

Xjats ja winap jaa'y jam ojts ñijky jøts ja ojts ñawyimbujyi, jøts ku dø'øn ja ojts wyimbijty, win'ejxniip ja'. ⁸ Winets ja jaa'dyi pøn ja jam myigujøøniip myigudøjkp, jøts ja'adi pøn jaty ja wyinatyni tø y'ijxyiyi jøts ku ja wyinapi, ja'ats idø'øn wandøø:

—¿Kidi ja'ajip yø' pøn ja y'ijty xumi'ixakp, pøn ja y'ijty xumilimunsi'amidoop?

⁹ Jam winaagin wyandi:

—Janch ja' yø'.

Winaagin ja wyamidi:

—Ka'ap ja yø'øji, jantymñayide'en tam tyimy'ixy.

Kø'ømts ja jaa'y yide'en wyaañ pøn wyinatyni tø wyin'ejxwa'kxy:

—Pø øtsimpts ja'.

¹⁰ Winets ja yiktiibyijky:

—¿Sudsomts yø mween tø yjaty, pø mw'in'ejxnipst yjawwi?

¹¹ Jøts ja t'adsøøy:

—Yø jaa'y midi Jesús txøøw'ajtp, yø' mo'onts tø tyik'øyi jøts øts ja tø xawinjaaxy, yide'en ø xnimaay: “Nøjkx m'atsnawyimbujyi jam nøø'agø'øm midi yiktejp Siloé.” Xjats ø tø njanchnijky jøts kuts ø tø nnawyimbujyi, jøts øts yø nween tø y'ejxwa'kxy.

¹² Jøts ja ojts tjaaktyiktøwdi:

—¿Ma net ja jaa'y?

Jøts ja tnimaay:

—Ka' nnijawi.

Ku ja fariseotøjk tyiktøwdi ja winap jaa'y sudso wyin'ejxwa'kxy

¹³ Winets ja ojts twaanøjkxti mā ja fariseotøjk jamdi. ¹⁴ Tyimbyoo'kxin xøøwts idø'øn wyinaty ku ja nwindson'ajtim Jesús tyik'ø'yiyiñ ja mo'onts midi wyinaty tø ttuktatsø'øky ja winap jaa'y, ¹⁵ paty ja fariseotøjk jam ttiibyøjkojmidi ja jaa'y sudso'ampy idø'øn ja wyeen ja wa'ats y'ejxni. Jøts ja y'adsojimbijty ja':

—Mo'onts øts ja tø xawinjaaxy, xjats ø tø nwimbuju, paty øts ixyam wa'ats n'ejxni.

¹⁶ Winets winaagin ja fariseotøjk wyandøø:

—Ja jaa'y pøn jade'en tø y'adi'ich, ka' inet Dios ja tja'aji, kumi ka'ap ja twindsø'øgi ja poo'kxin xøøw.

Jøts winaagin wyaamidi:

—¿Sudso milagri'ajtin ja ndejin jade'en ttu'unt, pøni janch pojkpitumbi jaa'y tam ja wyinaty?

Jøts agø'ømyi jade'en ñawyanwa'kxniyidi ku kyanagyupikyidi, ¹⁷ jøts ja jadigojk tyiktøgojmidi ja jaa'y pøn wyinaty winap uk'ejt:

—¿Jøts mets, sa mets idø'øn mwa'añ, pøn idø'øn yjawi ja jaa'y midi tø myikwin'ejxwa'kxyiyi?

Jøts ja wyaañ:

—Øts wamp, Dios ja' kyugajpxy.

¹⁸ Jøts ja israelit jaa'dyi ka'ap idø'øn ja tjanchjawiwya'andi ku dø'øn ja jaa'y y'ijty wyinapi, jøts ku ja tø wyin'ejxwa'kxni. Yiknajtswaa'wiyibaat ja tyeety ja tyaak, ¹⁹ jøts ja ojts tnøjmidi:

—¿Meets idø'øn ya'at mmajnk? Janch winap idø'øn yø tø kyaxi'iky, pø mnømdipxi. ¿Sudso'ampyts yø wa'ats wyin'ejxni?

²⁰ Winets ja u'nkteety y'adsoodøø:

—Sudsomts øøts yø n'u'nk nganijawit, pø winapxi dø'øn yjanchke'exy. ²¹ Ni øø nganijawi sudso'ampy yø tø wyin'ejxwa'kxy, jøts nija' øø nganijawi pøni pøn yø tø yiktsojkyiyi yø wyeen. Yiktøwdi jade'en kø'øm; pø møjaa'ñixi yø', wan kø'øm mdukmadøyidi.

²² Jade'en'ampy idø'øn ja tyeety tyaak ojts jade'en wya'andi, tsø'jkidip ja', pø tøxi ja israelit jaa'y wyindsøndi wyinaty tkajpxy'ajtnidi, ku ja abiky yikpikta'aktit pøni pøn wamp jøts ku ja nwindson'ajtim Jesús Cristo'aty, midi ja Dios tkajxp. ²³ Paty ja møjaa'y wyandøø: “Yiktøwdi kø'øm, pø møjaa'ñixi yø', wan kø'øm tnigajpxy.”

²⁴ Winets ja israelit jaa'y twaadsowdi jadigojk ja jaa'y pøn idø'øn y'ijty winap, jøts ja ojts tnøjmidi:

—Tukmadook øøts tiy janch sam Dios t'ijxyin; jade'en øøts yø nnijawi jøts ku yø pyojkpitumbijaa'yi pøn tø myiktsø'øgyi.

²⁵ Jøts ja t'adsøøy:

—Ka'ap øts yø nnijawi pøni pøn yø', pøni pojkpitumbi jaa'y uk kapojkpitumbi jaa'y yø'. Yø'øyi øts nnija'wip jøts ku øts y'ijty nwinapi, ixyam wa'ats ixyam nwin'ejxni.

²⁶ Jøts ja tyiktøgojmidi:

—¿Sa ja tø mduñi? ¿Sa ja tø ttuñ jøts ku ja tø myikwin'ejxwa'kxyiyi?

²⁷ Jøts ja yide'en t'adsøøy:

—Tø meets ja njadukmadøy jøts meets ja ka' xmøjppikta'aky; ¿winaak ojk nnigajpxt? ¿Uk ja' mdsojktip jøts ja yja' xpabøkwajni?

²⁸ Winets ja y'amyiknimaay chaachyiknimaay, yide'en ja wya'andi:

—Yø jaa'y me mbabijkpy, øøts ja Moisés øøts yja' nbabøjkip. ²⁹ Nnija'wipxi øøts ja' ku ja Moisés ojts myigajpxyi ja Dios; yø jaa'y, nguidyimñija'wip øøts yø' pøni mā yø chøøñ.

³⁰ Jøts ja t'adsøøy, yide'en ja tnimaay:

—¿Yø' idø'øn tiy janch nima'at yikja'wip, ku meets yø xkanijawi pøni mā yø chøøñ, jøts tøts øts yø xyikwin'ejxwa'kxy! ³¹ Wa'atsxi yiknijawi jøts ku Dios ka' ja' tmadøy

pøn pojkpıtumbijaa'y'ajttip; ja'ayi ja myadoojip yja' pøn ja windsø'jkiyip, pøn ja padu'unxiyip ja yja'. ³² Ka'axi yjawı ma pøn nmadøynim ku tu'uk ja winap jaa'y ja jaa'y tyikwin'ejxwa'kxy midi winap tyimgya'jx. ³³ Ku yø jeexyip Dios tkaja'aji, niti yø jeexyip tkatuñ.

³⁴ Xjats ja yiknimaay:

—Jøts mets, ku mets pøkyjøtpy tø mgue'exy, ¿jøts mets idø'øn jade'en xyik'ixpøkwa'añ?
Jøts ja jap ojts yik'ixkajxpidsimy.

Pøn tkanija'widip ja Dios yja'

³⁵ Jøts ja nwindson'ajtim Jesús tñimadøoy jøts ku ja winap jaa'y jap wyinaty jade'en tø yikajxpidsimy; jøts ja ojts tñinabyaadyi, winets ja ojts tñøjmi:

—¿Mmøja'wip mjanchja'wip Dios U'nk?

³⁶ Jøts ja ojts ñii'mxyi:

—Windsøn'ajtim, tukmadook øts pøn ja', wan ø tmøjawı tjanchjawı.

³⁷ Jøts ja nwindson'ajtim Jesús ja t'adsøoy:

—Tø mets ja x'ejxni; pø øtsxi dø'øn ja', ixya kø'øm møøt mmadya'aky.

³⁸ Winets ja jaa'y ñagyuxendyaajkøø, jøts ja twinguxanaay ja nwindson'ajtim Jesús, jøts ja tñimaay:

—Windsøn'ajtim, nmøja'wip njanchja'wip mets.

³⁹ Jøts ja nwindson'ajtim Jesús wyaañ:

—Ja' øts ya naxwiiñ tø nnimiñ jøts ja payø'øyin tyunit tiy'ajtingøjxp; pøni pønts wimbeets kugoots, win'ejxwa'kxtipts ja' jøts ja t'ejxtit tñijawidit; pønts tja'ejxtip tjanija'widip jøts tkamibøkti, ja'ats tandip wimbeets kugoots ejxim winap jaa'yin.

⁴⁰ Winets winaagin ja fariseotøjkti pøn jaty jam wyinaty, ku ja jade'en tmadowdi, winets ja ojts tñøjmidı ja nwindson'ajtim Jesús:

—¿Uk wan øøts idø'øn nayide'en nwimbeedsı?

⁴¹ Jøts ja nwindson'ajtim Jesús t'adsøoy:

—Ku meets jeexyip mwimbeedsı kugoodsı, ka' meets jeexyip myiktapøky'ejxti ja mbøky. Kumi mnømdip jøts ku x'ejxti xnijawidi, mdaja'atidipts meets ja mbøky.

10

Jade'en ja Jesús n'ukpiktaajkint ejxim tu'uk ja øybi kurajt n'ejxint

¹ Janch øts idø'øn nwa'añ, pøn jap katøjkıp ma ja borreek ja kyemy'aaw, pøn abiky'ampy tøjkip, ja maa'tspi dø'øn ja'. ² Jøts ja jiyujk'ejxpi, ja' jap najxp ma ja kemy'aaw jap. ³ Ja yiktøjk'awatspi, ja' ja yik'awajtsxiyip ja tøjkaaw jøts ja tyøki, jøts wa'ats ja byorreek ja yukmadøyi. Xyømøøpy ja tu'uk jaty jøts ja tyikpidsimy jap kemyjøtpy. ⁴ Kuts ja tø tyikpidsømguixy tuki'iyi ja yiyujk jøts ja jawyeen twinway, payø'øyip ja' kumi wa'ats ja yukmadøyi. ⁵ Ka'apts ja nugo ajawi tpanøjkxti ja wyenkpi; ne'egi yjaaktyimkyajkidip ja', kumi ka'ap ja tyukmadowdi ja wenkjaa'y.

⁶ Ja'agøjxp ja nwindson'ajtim Jesús ojts jade'en tñimadya'aky ja jaa'y, jøts ja ttuk-tamimadowiwya'añ sa ja yja' yjaa'y'atti, ka'apts ja ojts tmadoodowdi pøni ti dø'øn ja jade'en yjatijpy ku ja jade'en ñii'mxyidi.

Jade'en ja Jesús n'ukpiktaajkint ejxim tu'uk øybi borreek'ejxpi

⁷ Winets ja nwindson'ajtim Jesús jadigojk tñimaagyojmi ja jaa'y:

—Janch øts idø'øn nwa'añ: Jøts ku øts idø'øn jade'en ñamyayi nnabyikta'agyi sam tøjkaawın, ma ñaxtit øts ja nja', sam ja borreek ja tyøjk'aaw t'ayø'øyidi. ⁸ Jøts ja win'øø'mbi pøn tø y'atsmendi jøts wya'andi ku Dios tø kyexyi, jade'en idø'øn yjamendi ejxim ja maa'tspın; øts njaa'y, ka'ap ja ñagyiyajkidi nugo ajawi. ⁹ Øts idø'øn jade'en sam ja tøjkaaw; pøni pønts jap tøjkidip, ja'ats idø'øn nitso'ok'attip. Jøts øts ja ndanitanit ja nja', ejxim ja borreek u'nk yiknitani jap kyemyjøtpy.

10 'Ja'ayi ja maa'tspi ñimimpy jøts ja myeech, jøts ja yikjaa'y'øøky jøts ja yikudigø; øts, ja' ø nnimimpy jøts meets øy yikxon xpaattit ja kunuu'kxin ja jujky'ajtin. 11 Jade'en øts idø'on sam ja jaa'y pøn øy borreek'ejxp. Ku dø'on ja øy t'ixy ja byorreek, øy sa tmiwanjaty ja kø'øm, nugo ku byorreek ja kya'øøky. 12 Pøni pøn mijuy tump, ja'ayi ku ja t'ixy jøts ku ja myiñ ja awa'añ miy'uk, jøts ja japyi tnike'eky ja byorreek jøts kyakni, kumi ka'ap ja tyimyja'aji midi ja jiyujk ñi'ejxpi'ajtpy, jøts nika'ats ja tkø'ømja'aji. Xjats ja miy'uk tmajtsni ja borreek, jøts ja jadi'iñi tyik'ayø'øbyaky. 13 Jade'en'ampy ja'abi jaa'y kye'eky kumi mijuy ja tyuñ, patyts ja ka'ap tkwentí ja borreek.

14-15 'Øts idø'on øy jiyujk'ejxpi'ajtp. Sam øts ja Dios Teety xnijawin jøts wa'ats øts ja nnijawi; nayide'ents øts idø'on ja njaa'y wa'ats nnijawi, jøts øts ja nayide'en wa'ats xnija'wimiyidi. Øts yø nguwanjatip. 16 Jøts jap øts ja borreek abiky njaakmøødi midi kajap'ajtp ya kemyjøøjty; nyikme'empts øts jaa ja nayide'en. Jøts xmimado'odip øts ja', jøts tu'ugyi ja ñi'ejxpi yjagyajpniyit.

17 'Ja'agøjxp øts ja Dios Teety xtsøky kuts ngu'oogidit yø'ødi, jujkpyøkpts øts jadigojk. 18 Nipøn ø mibaat xkayik'øøky, kø'øm øts ja nnajtsjawit jøts ø nnagyøyakit ngø'ømndsojkingøjxp. Tiy'ajtingøjxpts øts nnagyøyakiyit, jøts nay tiy'ajtingøjxpts øts njujkpyøkt jadigojk. Tøxi øts ja Dios Teety jade'en x'ane'emy.

19 Xjats ku ja israelit jaa'y jade'en ojts tmadowdi ja kajpxy ja ayuujk, jøts kø'ømyi ñawyanwa'kxkojmiyidi. 20 May ja jamdi pøn wandip:

—¿Tiku yø xtsaamyøjpikta'akti, pø miku'ts yø tø tyatøkiyi, pø loki jajtpts yø'?

21 Jøts wyenkpi wyamidi:

—Ka'ap jeexyip pøn jade'en kyajpxy, ku jeexyip pøn ja miku' tø tyatøkiyi. ¿Ti ma ja miku' tø t'ukyikwin'ejxwa'kxy ja winap jaa'y?

Ku ja israelit jaa'y ojts twindsowdi ja Jesús

22 Yu'aats nep'aats idø'on wyinaty pyatpy, jamts idø'on Jerusalén ja xøøw wyinaty tyuñi, ku ja yikja'myech yikxøduñ ja tsaptøjk. 23 Jøts idø'on ja nwindson'ajtim Jesús jap wyinaty wyidity tsaptøjkjøtpy, ma ja tøjka'aw jap midi yiktejp Salomón ja Tyøjkwimbo'kx. 24 Jøts ja israelit jaa'y ja ojts ñawya'k'awidityiyi, jøts ja yiknimaay:

—¿Ejtp øøts idø'on jade'en xyik'etwa'añ maapy tajp? Pøni mets tam idø'on janch Cristo midi Dios tkajxp, ixyamyits øøts xtyimdyukmado'ot.

25 Jøts ja nwindson'ajtim Jesús ja t'adsøøy:

—Tø mee njadukmadø, jøts meets ja ka' xmibiky. Tuki'iyi ti jaty ø ndumpy, ti jaty ø xanigutujk'ajtp ja Dios Teety, yø'øts ja wa'ats tyimyjayiknigaxø'kp; 26 meets, ka' meets xjanchjawi, kumi ka' mee mnayja'aji midi ø nja'ajtpy, sam aamyi tø nnøjmidi. 27 Jade'en øts ja nja' xyukmadøy sam ja borreek ja ñi'ejxpi tyukmadøyin, jøts wa'ats øts ja nnijawidi. Xpaduujnidipts øts nja' ja'adi. 28 Øts ja nmøødyip ja kunuu'kxy jujky'ajtin midi xemikøjxp, jøts nijuuni nøjkx kyawindigøydi, jøts nipøn øts ja xkapøjkxit ku øts ja ngøjø'ømit'atti. 29 Ja Dios Teety øts ja xagødøjkip, ja' tu'uk møj, ka' pøn jade'en, pønts ja mibaat uk kønaxip jøts ja yikpøjkxit. 30 Øts møøt Dios Teety tu'ugyi øøts.

31 Winets ja israelit jaa'y jadigojk tkonjø'øktøø ja tsaa, jøts ja ttaka'atswa'andi. 32 Xjats ja nwindson'ajtim Jesús ja tnimaay:

—Tø mee kawinaak ojk ja mwingujky nduujni ja ødyu'unin Dios Teety myøk'ajtingøjxp. ¿Ja'ats meets yam xagubatwamp ku meets yam xka'atswa'añ?

33 Winets ja israelit jaa'y y'adsoodøø, jøts ja nwindson'ajtim yiknimaay:

—Kidi ja'ajip mets yam myiktaguga'adsiwyamp, ku mets ja ødyu'unin tø xjadyimy-jabikta'aky, pø ja'axi yam myiktagubatwamp ku ja Dios kajaa xtyimyigajpxigøy. Pø nugo jaa'yxi mets, jøts jade'en mnabyikta'agyi sam Dios.

34 Jøts ja nwindson'ajtim Jesús tnimaay:

—Jade'en meets ja mgutujk jap yja'ayi jøts ku Dios yide'en wyaañ: “mDios meets.”
³⁵ Janch yiknija'wip jøts ku Dios kyajpxy jap yide'en wya'añ, ka'ap ja pøn tkagupiky; ja' ja Dios ojts diostij ja jaa'y pøn ja ojts tyiknaxy ja kyajpxy ja myadya'aky. ³⁶ Jøts kuts øts Dios tø xwiwich abiky, jøts øts ja ya tø xkexy naxwiiñ, ¿sudsots meets jade'en mwa'añ jøts ku øts ja tø nmigajpxigøy, ku tø nwa'añ jøts ku ø nDios U'ngi? ³⁷ Pøni ka' øts ja' nduñ midi ja Dios Teety tyumpy, kidits mee xjanchjawí. ³⁸ Kuts øts ja nduñ, øy mee xjagajanchjawí janchja'widik øts ja ndunk, jøts jade'en xnijawídit jøts ku øts ja Dios Teety xmøøt'ity, jøts øts ja nayide'en nmøøt'ejtmi.

³⁹ Winets ja jadigojk tjadyimyjatsumwandøø, kajkts ja nwindson'ajtim Jesús.

⁴⁰ Jøts ja ojts wyimbejtnimi ñojkximi jam xøøbidsimy'ampy, ma ja møy nøø midi yiktejp Jordán, jøts ja jam tyaañ ma ja Juan y'ijty yiknøbety. ⁴¹ Janch namay ja jaa'y ja ojts t'ats'ejxti jam, jøts ja wya'andi:

—Tyimdyiy tyimyjanch tam idø'øn, øy idø'øn ja Juan Bautista ojts tkatuñ ja milagri'ajtin, ka'pxts ja y'ayuujk pyidsimy sa tñimadyaajky ya'atpi jaa'y.

⁴² Jøts ja'abi etjotp janch namay ja jaa'y ojts tmibøkti ja nwindson'ajtim Jesús.

11

Ku ja Lázaro y'ø'jky

¹ Ja dø'øn tu'uk ja jaa'y, yaa'dyøjk, midi pøjkíp. Lázaro ja xyøøw, jam ja Betania kyugajpi, nay jam ma ja María jøts ja y'uch Marta jam kyugajpidi. ² Yø María dø'øn ja' pøn yø Lázaro chø'øjip, ja pamaa'y, ja'ats idø'øn ojts ja aceite pa'akxuu'kpi tpiktaajkxiyi ja nwindson'ajtim Jesús tyeky, jøts ja wyaay ja ojts ttuktati'ich jadigojk. ³ Ja'ats idø'øn møøt ja y'uch tkajpxy ñigajxidøø ja nwindson'ajtim Jesús:

—Windsøn'ajtim, janch pøjkíp ja mmigu'uk.

⁴ Xjats ku ja nwindson'ajtim Jesús ja jade'en tmadøøy, winets ja wyaañ:

—Ka'ap yø pa'am myajada'akt jøts ja tyimyik'ookt; jade'en'ampy idø'øn ja jade'en yjaty jøts ja Dios myøk'ajtin wyingaxø'økt, jøts yø'øbi pa'amgøjxp yiktuk'ejxtit ja jaa'y jøts ku ja Dios U'nk nayide'en tmøøt'aty ja møk'ajtin.

⁵ Øy ja nwindson'ajtim Jesús tjanchjaba'ayøy ja jaa'dyi, ja Marta, ja María, jøts ja Lázaro, ⁶ ku ja yiktukmadøøy jøts ku ja Lázaro pøjkniyi, jøts ja jam majtsk xøøw yjaaktyimdy'a'aniyiñ ma dø'øn ja jam wyinaty. ⁷ Winetnimts ja tñimaay ja pyabøjkpitøjk:

—Wan jam tjaa'myindi jadigojk jam Judeit naxjotp.

⁸ Jøts ja pyabøjkpitøjk ja ñimaajiyøø:

—Windsøn, pø jamts ja israelit jaa'y jawaani mgaka'ats'o'jkøø; ¿jøts nay jam mnøjkxwa'añ jadigojk?

⁹ Jøts ja nwindson'ajtim Jesús wyaañ:

—Ka' pøn sa xu'unt ku ka' kya'pxñim. Niti tsø'øgi ngamøøt'aty sam nwidejtin xinaxy, awa'ats ja nøø' ja tuu' ja' ku tyuk'ejxpaaty ja ya'it naxwiiñit jaj; ¹⁰ kuts ja koots'ajtin yja'aty, janchjøptsø'øgi jøpjawí nwidejtint, pø ja jajxi xka'ejtxa'am.

¹¹ Jøts ja nwindson'ajtim Jesús wyaañ:

—Maanip ja nmigu'uk Lázaro; n'atsyuxpts øts inet ja'.

¹² Winets ja pyabøjkpitøjk ja ñimaajiyøø:

—Windsøn'ajtim, pøni tø tam idø'øn ja mya'oo'kni, pø møk'pøkwani idø'øn ja'.

¹³ Jade'en'ampyts ja nwindson'ajtim Jesús ja tijy, jøts ku ja Lázaro wyinaty tø y'oo'kni, jøts ja pyabøjkpitøjk jade'en ja wya'andi, jade'en ja tijy wya'añ jøts ku ja nugo mya'ay.

¹⁴ Xjats ja ojts wa'ats tyukmadøyidi ja nwindson'ajtim Jesús:

—Tø ja Lázaro y'oo'kni. ¹⁵ Ne'egi xondakp øts jade'en jøts ku ø tø ngajam'aty, tyim'yø'ajtp ne'egi jade'en jøts mee xjanchjawit. Wants tjaa'myindi jøts n'ats'ejxint.

¹⁶ Winets ja Tomás, pøn yiktejp xeeñ'u'nk, ja'ats tñimaay ja myibabøjkpitøjk:

—Wan adøm nayide'en tjaa'myindi, jøts yø nmøøt'oo'kint.

Ja Jesús tyuk'awimbejtíp ja jaa'y ja juky'ajtin jøts ja' juky'ajtin'ajtp kò'òm

¹⁷ Jøts ku ja nwindson'ajtim Jesús jam yja'jty, jøts ja tpaajty ja Lázaro, jøts ku ja wyinaty myaktaxk xøowip tø ñajxøjkiñi. ¹⁸ Wíngon ja Betaniit kajp tyañ ma ja Jerusalén jam, majtsk kilometro jagujkpín ja yjagami. ¹⁹ Jøts namay ja israelit jaa'y jam wyinaty tø y'atstøjk'ayø'ødyi ma ja Marta jam møøt ja María, jøts ja tkajpxjot'amøjkidi ja'agøjxp ku ja myigu'uk ja wyinaty tø y'lookni. ²⁰ Xjats ku ja Marta tñimadøøy jøts ku ja nwindson'ajtim Jesús jam wyinaty yja'atwa'añ, winets ja chø'jñ jøts ja tjøpkubajtiyih'ñ; jøts ja María jap ja tyøjkjøtpy tyaañ. ²¹ Jøts ja Marta tñimaay ja nwindson'ajtim Jesús:

—Windsøn'ajtim, kuk jeexyíp tø mya'aty, ka'abik øts jeexyíp ja nmigu'uk tø y'øøky.

²² Jade'ents ø nnijawí jøts ku mets ja Dios Teety mmo'ojit pøni ti mets ja m'amidøøpy.

²³ Winets ja nwindson'ajtim Jesús ja ojts ñih'mxyi:

—Juky'atp ja mmigu'uk jadigojk.

²⁴ Xjats ja Marta wyaañ, jøts ja tñimaay:

—Janch jade'en, nnija'wíp øts jøts ku ja jadigojk t'awimbetit ja juky'ajtin, ku ja pyidsø'ømt jadigojk ma oo'kpi, jaanimts ja'abi xøownim ku Dios tyika'pxt.

²⁵ Winets ja nwindson'ajtim Jesús ja tñimaay:

—Øts idø'on ja' pøn ttuk'awimbejtíp ja jaa'y ja juky'ajtin, jøts øts juky'ajtin'ajtp kò'òm. Pøni pøn ø xjanchja'wíp, øy ja yja'øøky, juky'ajt kunaxpts ja ejtp. ²⁶ Jøts pøni pøn ja jaakjuky'ajtip jøts pøni xjanchja'widíp øts, ka'ats ja y'anmija'win nøjkx wyindigøy. ¿Mjanchja'widíp?

²⁷ Jøts ja tñimaay:

—Windsøn'ajtim, njanchja'wíp øts. Ndyimyjanchja'wíp øts ku me mCristo, ja Dios U'nk, midiyip idø'on y'ity ya ñaxwiñ menwamp.

Ku ja Jesús ojts twinya'axy ja Lázaro ku tø y'øøky

²⁸ Xjats ku ja Marta jade'en y'ukwaañ, winets ja ojts t'atsyaxi ja chø' María, jøts ja ojts amaa'tsk tñøjmi:

—Ixa ja windsøn ya, jøts ixap mwaadsøyi.

²⁹ Ja'ayi ja jade'en tñadøøy, jøts ja María jatyi pyidi'jky jøts ja ojts t'ats'ixy ja nwindson'ajtim Jesús. ³⁰ Ka'aním ja nwindson'ajtim Jesús wyinaty kyajptøki; nay ixjamnim ja wyinaty ma ja Marta ja møøt tø ñabyaadyi. ³¹ Jøts ku ja t'ejxtøø ku ja María pyidi'jky ku ja wyinaty putyi tø pyidsimy, jøts ja israelit jaa'dyi midi jam wyinaty tøjktotp tkajpxjot'amøkidíp ja ku'oogi, xjats ja tpadso'ondøø, jade'en ja wyinmaydi jam ja tijy yaxpi ñijkxy ma ja oo'kpi jam wyinaty tø ñaxøki.

³² Winets ja María, ku ja yja'jty ma ja nwindson'ajtim Jesús jam wyinaty, jøts ja ojts ñagyuxendya'agyi nwindson'ajtim tyekyjø'm, jøts ja tñimaay:

—Windsøn'ajtim, kuk jeexyíp tø mya'aty ka' øts jeexyíp ja nmigu'uk tø y'øøky.

³³ Xjats ku ja nwindson'ajtim Jesús ojts t'ixy jøts ku ya'axy ja María jøts ja israelit jaa'y nayide'endi midi ja María jam wyinaty tø pyadsøøñiyi, winets ja nwindson'ajtim ja jotmay ojts pyaadyiyi jøts ja ojts tymchaachjawí. ³⁴ Winets ja tyiktiy:

—¿Ma tø xyiknaxøkidi?

Jøts ja yiknimaay:

—Windsøn'ajtim, men x'ats'ixy.

³⁵ Xjats ja nwindson'ajtim Jesús yjanchyaxxy. ³⁶ Jøts ja israelit jaa'y winet wyandøø:

—Ejxti yjantymchøjkpy tam yø tø y'ity.

³⁷ Jøts ja jade'en winaagin wyandøø:

—Pø yø'øxi ja winap jaa'y tø tyikwin'ejxwa'kxy, ¿sudso yø niwine'enin sa tø tkatuñ ja Lázaro jøts ja jeexyíp tø kya'øøky?

Ku ja Lázaro yjukpyiky jadigojk

³⁸ Jøts ja nwindson'ajtim Jesús ojts ja jotmay jadigojk tyatøkiyi, jøts ja ñijkxy ma ja oo'kpi jam wyinaty tø ñaxøki. Tøjk'aawin ja tsaa jam, jøts nayi tsaa ja tø yjaaktyimyikta'agi'iy. ³⁹ Jøts ja nwindson'ajtim Jesús wyaañ:

—Jigø'ødi yø tsaa.

Winets ja Marta, midi ja oo'kpi y'uchip, ja'ats ja ojts ñii'mxyi:

—Windsøn'ajtim, pø janchxuu'knip inet yø', pø myaktaxk xøøwipts yø y'oo'kni.

⁴⁰ Jøts ja nwindson'ajtim Jesús ñimaajyøø:

—¿Ti kidi ø tø nnigajpxy jøts pøni ku xjanchjawwi, winets x'ejxit ja Dios myøk'ajtin?

⁴¹ Winets ja tjigiidyi ja tsaa. Jøts ja nwindson'ajtim Jesús jam tsajpwemp ojts pyat'ixy, jøts ja wyaañ:

—Dios Teety, dioskujuyip ku øts ja n'ayuujk tø xmadojiyi. ⁴² Nnija'wip øts jøts ku mets ejtp ja nja' xmadojiyi, jøts ja' øts jade'en xyikwamp jøts yø jaa'y ja øy'ajtin tpaattit pøn jaty ixaadi, jøts tjanchjawidit jøts ku mets xkexy.

⁴³ Xjats ku ja jade'en wyān'abajtiyi'ñ, jøts ja møk wyaañ:

—¡Lázaro, pidsøm jap!

⁴⁴ Jøts ja oo'kpi pyidsiimy køpity pakpity, jøts ja wyeen y'aaw twinwets'aty ja wet. Winets ja nwindson'ajtim tnimaay ja jaa'dyi:

—Køkajti pakajti jøts xmajtstu'uttit, wan tñijkxy.

Ku ja jaa'y tkajpxy'ajttøø jøts yikmatst ja Jesús

⁴⁵ Ja'agøjxpts ja israelit jaa'y namay tjanchja'widøø ja nwindson'ajtim Jesús midi ja María jam wyinaty myøøt, jøts ja' ojts t'ejxti ku ja nwindson'ajtim Jesús jade'en ttuuñ.

⁴⁶ Winaagin tñinøjkxtøø jøts ja ojts t'ats'ejxti ja fariseotøjk, jøts ja ojts ttamimadya'akti sa ja nwindson'ajtim Jesús wyinaty tø y'adi'ich. ⁴⁷ Winets ja fariseotøjk jøts ja teetywindsøndøjk møøt ñamyujkidi ja kutujk adsinaabyidi, jøts ja ojts ñømdi:

—¿Sudso ndaabyajtindit? Janch kawine'en yø jaa'y milagri'ajtin tjantyuni jøts ja ejxa'an tpikta'aky. ⁴⁸ Ku yø jade'eñi n'ixmajtsindit, janch niduki'iyi jaa'y yø yjanchja'winiyit, jøts ja romit kudunktøjk myenidit, jøts ja tyikudigøøñidit adøm yø ndsaptøjk jøts adøm yø ngajp.

⁴⁹ Nay ja'abi jaa'y txøøw'ajtp Caifás, pøn wyinaty teetywindsøn'ajtp ja'abi jumøjt, ja'ats ja ojts ñii'mxyidi:

—Mguidyimñija'wip mee ti, ⁵⁰ ni xkanijawidi kudam adøm njayik'ødyunwa'añindi ku tu'ugyi ja jaa'y tku'oogit ja ñaajx ja kyajp, jøts kidi tuki'iyi kyudigøøgyøxt wine'en ja naajx ja kajp.

⁵¹ Kidi kyø'ømwinmaa'ñipts ja Caifás yiktumpy ku ja jade'en wya'añ: jade'en'ampy idø'on ja', kumi ja' wyinaty teetywindsøn'ajtp ja'abi jumøjt, xjats ja Dios ja ojts yikwa'añi jøts ku ja nwindson'ajtim Jesús y'ookt tkudanit ja israelit kajp ja israelit naajx; ⁵² jøts kidi tyimy ja kajp tyimy ja naajx, ja'ayip nayide'en jøts ja niduki'iyi ja Dios y'u'nk y'unajk tyikyø'omyukwangøjxi pøn wyinaty tø yø'øwya'kxnidi. ⁵³ Winet ets ja israelit kudunktøjk tñiwinmaa'yidøø jøts ja nwindson'ajtim Jesús tyimy'ookt.

⁵⁴ Ja'agøjxp ja nwindson'ajtim y'ijty ka' nugo ajawi y'ukwidejtni jam may israelit jaa'yjotp, ojts ja jam cho'oni Judeit etjotp, jøts ja ojts ñijkxy ma jam wingon ja abak et midi nugo tsayjoojt. Jam ja ñijkxy ma ja kajp txøøwi Efraim, jamts ja ojts tmøøtsøøni ja pyabøjkpitøjk.

⁵⁵ Tyimdyøts jøts tpatnit ja paski xøøw midi ja israelit jaa'y tyundip, jøts idø'on ja mayjaa'y yjantymñøjkxti Jerusalén, jøts ja jam ttunwa'andi tpadunwa'andi ja kostrumbri, jøts pyøky ja wya'atstit ku ka'anim ja paski xøøw tpaaty. ⁵⁶ Jøts ja nwindson'ajtim Jesús jam yjanchyik'ixa'ay ku ja jap tsaptøjkjotptyi, jøts ja xem yam ñawya'añidi:

—¿Sa mee m'ukwa'añ? ¿Me'emp ja yjawi xøbatpi uk ka'?

⁵⁷ Jøts ja fariseotøjk, jøts ja teetywindsøndøjk, tø ja wyinaty tni'ana'amdi jøts ku pøn t'ext tni jawit ja nwindson'ajtim Jesús jøts ja jaty tni gajpxt, winets ja nwindson'ajtim Jesús yikmatst jøts ja yiktsu'umt.

12

Ku ja Jesús ojts yiktagujaaxy ja pa'akxuu'kpi

¹ Xjats ku wyinaty ja paski xøøw tkapaatynim jadudujk xøøw, winets ja nwindson'ajtim Jesús ojts ñijkxy jam Betania ma kyugajpi ja Lázaro, pøn ja wyinaty tø tyikjukpyiky jadigojk. ² Jamts ja a'ux y'oyiyiñ jøts ja nwindson'ajtim Jesús ja yiktawindsøøgi; ja Marta ja jam ojts wyingi'iyi, jøts ja Lázaro ja tmøøtkay møøt pøn jaty jamdi. ³ Winets ja María tyikmiiñ kujkwa'kxy lyitrin ja aceite midi pa'akxuu'kp, jøts janch tsowi ja', ja'ats ja ojts ttaja'jxiyi ja nwindson'ajtim Jesús tyeky, jøts ja ñayjawaayyi ttuktatijch. Amuum ja tøjkojt pya'akxuu'kpøjkijxy. ⁴ Jøts ja Judas Iscariote, midi ja Simón myajnkyp, midi ja nwindson'ajtim Jesús pyabøjkpi'ajtpy, jøts midi ja wyinaty køykwajnip, ja'ats jade'en waan:

⁵ —¿Tiku yø pa'akxuu'kpi ne'egi tø kyayiktøøky? Tigøøk magøpxy denariin jeexyip tsow'aty, jøts ayoobi jaa'y ja jeexyip yiktabudøki.

⁶ Kaja'agøjxpi ja Judas jade'en wya'añ ku ja tpa'ayø ja ayoobi jaa'y, pø ja meeñxi ja ne'egi pya'ayøøpy. Ja winmaa'ñ ja yikyøøpy ku ja myeech, jøts kumi jam ja wyinaty tkjøøøm'aty ja meeñ'abøjk'i'ñ midi'ibi ja myibabøjkpitøjk myøøt'ajttip, jøts ja amaa'tsk tyukpiky tyukøñ ja meeñ midi yik'ejttip. ⁷ Jøts ja nwindson'ajtim Jesús tni maay:

—Majtstu'ut, ja' yø ixa tø tpikta'aky midi tump ku ø nnaøøjkiñit. ⁸ Ja'atpyim ayoobi jaa'y, øy juuni jaty xmay'attit xpudøkidit; jøts øts, ka' meets ja xumiwin'ejxkunaxt.

Ku ja Lázaro yikajpxy'aty ku tyik'ookwa'andi

⁹ Jøts ja israelit jaa'y may tni madowdi ku ja nwindson'ajtim Jesús jam wyinaty Betania, jøts ja ojts tni nøkxti, kidi ja nwindson'ajtim Jesús nadyu'uk yik'ejxwamp, nayide'en ja t'ejxwa'andi ja Lázaro pøn ja nwindson'ajtim Jesús wyinaty tø tyikjukpyiky. ¹⁰ Winets ja teetywindsøndøjk tkajpxy'ajtti jøts ja nayide'en tyimyik'ooktit ja Lázaro, ¹¹ kumi ja' ñamyayi ja pøky tjagyajp ku ja israelit jaa'y ñawa'kxyidi, jøts ja may pyuwajtsniyiidi jøts ja tjanchja'wiñidi ja nwindson'ajtim Jesús.

Ku ja Jesús kyajptøjkii'ñ jam Jerusalén

¹² Xjats idøøn ja jaa'dyi may ja jam wyinaty tø yja'atti Jerusalén, jøts ja xyøbaatwa'andi ku ja paski xøøw; jøts ku kyimjabom'ajty, jats ja ojts tni jawidi jøts ku ja nwindson'ajtim Jesús jam wyinaty yja'atwa'añ ja'abi kajpkøjx. ¹³ Winets ja tiixy ja ojts tpootti, jøts ja ojts ttaatsowdi ja nwindson'ajtim Jesús, yide'en ja wyandøø:

—iMøj Dios kyunuu'kxin! iØy wa'ats yø' midi ixyam Dios Teety kyejxpy, midi israelit jaa'y wyindsønip!

¹⁴ Jøts ja nwindson'ajtim Jesús tpaajty tu'uk ja buur jøts ja ojts ttawa'atspety, tyimbyatpy idøøn jade'en sam jap jaabyety nøkyijxpy:

¹⁵ Meets Siøn kajpjotpit, kidi mjotmay'ookti;

ejx, pø ixats myiñ ja mwindsøn,
yikxon buuru'nk ttaku'xni.

¹⁶ Ka'ap ja pyabøjkpitøjk ja jaty tja'gyukidøø yøøbi winmaa'ñ, østi jaanim ku ja nwindson'ajtim Jesús wyinaty tø chajpajtni. Jaanimts yø tja'myajtstøø jøts kudam yø tni gajpxy ja nwindson'ajtim ku ja jap jade'en yja'ayi, jøts tyimyjade'ents ja wyinaty tø yjaty kyubety.

¹⁷ Jøts ja jaa'dyi midi ja nwindson'ajtim Jesús jam wyinaty møøt, ku ja tyaxpidsiimy ja Lázaro jap oo'kpi jutjøtpy, ku ja wyinaty tø tyikjukpyiky jadigojk, ja'ats idøøn jam tni madyaktip sa jaty ti jaty ja wyinaty tø t'ejxti. ¹⁸ Patyts idøøn ja jaa'y ojts

tpatsowdi ja nwindson'ajtim Jesús, kumi tɔ ja wyinaty tnijawidi ja milagri'ajtin midi ja nwindson'ajtim wyinaty tɔ ttuñ. ¹⁹ Xjats ja fariseotɔjk agɔ'omyi ñawyajnidɔɔ:

—Tɔxi ɪxa xja'ejxti sɔ yɔ yjawɪ ñityu'unint. Ejxti, ejx niduki'iyi jaa'y pyanijkxyiyi.

Ku ja griegit jaa'y t'ejxwa'andi ja Jesús

²⁰ Jɔts ja jaa'dyi midi jam wyinaty tɔ ñɔjkxti xɔbatpi Jerusalén, jam ja winaagindi pɔn griegit jaa'dyi. ²¹ Ja'ats jam tnimendi ja Felipe pɔn kugajpip Betsaida jam Galileit etjotp, jɔts ja ojts tnɔjmidi mɔktə'aky:

—Ja Jesús ɔɔ teety n'ejxwampy.

²² Xjats ja Felipe ojts tninijkxy ja Andrés jɔts ja ttukmadɔɔy; winets ja namajtsk tninɔjkxti ja nwindson'ajtim Jesús, jɔts ja ojts ttukmadowdi. ²³ Jɔts ja nwindson'ajtim Jesús ja ojts ñii'mxyidi:

—Tɔ tpaaty ku nxɔga'pxy ma ɔts yikxon nyikwinjawit nyikwindsɔ'ogit, pɔ Dios Teety ɔ xkajx jɔts ja naxwii'ñit jaa'dyi ngudanaapy. ²⁴ Tiy janch ɔ nwa'añ ku mee nnɔjmi, jɔts ku tu'uk ja ariinbajk kyaka'ay naxjɔtpy jadi'iñi ja ñaxy; pɔni midi'its ka'ap naxjɔtpy, ne'egi may ja wyimbijty ku ja wyindigoy. ²⁵ Nayide'en idɔ'on meetsmi. Pɔn kasajatyim nay'ejxip, pɔn nabya'ayojip, ka'ap ja mibaat ja nitso'ok'ajtin tpaaty; pɔnts kanabya'ayojip, wan tjaty sɔ yjaty ɔts kɔjxp, ja'ats idɔ'on tpaatp ja nitso'ok'ajtin. ²⁶ Pɔni pɔn ɔts xpabɔjkpi'atwamp, wan ya tmiñ jɔts ɔ xmɔɔtwidettit xmɔɔtsɔɔnidit. Yikajxa'akpts idɔ'on ja' jam Dios wyingujkp.

Ku ja Jesús tnigajpxy ja y'o'jkin

²⁷ 'Janch tɔ ɔts ɪxyam ndyimyjotmaadyɔki; ¿jɔts ti sɔ ɔ nwa'ant? ¿Ja ti ja ɔ nwa'ant: “Dios Teety, ka' ɔts jade'en xyikjatt xyikubatt sɔ ɔts ɪxyam njatwa'añ ngubatwa'añ”? Pɔ ka'axi ɔts ja' tɔ nnimiñ jɔts ɔts jade'en ngajatt. ²⁸ Metsts Dios Teety tu'ugyi ja mja' majada'akp.

Winets yikmadɔɔy ja ayuujk jɔts ku jap yjawɪ tsajpjɔtpy wya'añ:

—Tɔ ɔts ja jade'en nduñ, jɔts ndunwampy ɔts ja jade'en jadigojk.

²⁹ Jɔts ja jaa'y midi jam wyinaty amidoodujktip, yide'en ja wya'andi jɔts ku ja y'anaawi midi jade'en wyinaty tɔ wyina'añ, jɔts pɔmbi wamidip:

—Ja ankilis yɔ tɔ myigajpxyi.

³⁰ Winets ja ñimaajyidi ja nwindson'ajtim Jesús:

—Ka' ɔts kɔjxpip yɔ ayuujk jade'en tɔ yikmadɔy, meets kɔjxp yɔ jade'en wya'añ.

³¹ ɪxyats idɔ'on tɔ tyimyja'aty ja xɔɔw ja jumɔjt ku ya'atpi naxwii'ñit jaa'y yiktidyu'undit, jɔts ku nayide'en yikpawopt ja miku' midi ya naxwiiñ tnigubajk'ajtp ja kya'ɔybi. ³² Jɔts ku ɔts jam nɔjkx nyikpikta'aky jam kruskɔjxp, ñijawidip ja ɔy pɔn jɔts ɔts xjanchjawidit.

³³ Ja'ats idɔ'on ja jade'en yjatijpy sudso ja wyinaty y'ookwa'añ. ³⁴ Xjats ja mayjaa'y ja yide'en y'adsoojɔɔ:

—Tɔ ɔɔ nnimadɔy ku pɔngapɔn tkajpxy ɔɔts ja ngutujk, jɔts ku ja Cristo yujky'att xemikɔjxp. ¿Sudsots me mwa'añ jɔts ku mets myikpikta'akt jam kruskɔjxp? ¿Pɔn idɔ'on ja' midi tsoo'mp tsajpjɔtpy, midi ja naxwii'ñit jaa'y tkudanaapy?

³⁵ Winets ja nwindson'ajtim Jesús ja tnimaay:

—Mjaakujajidip mjaakudɔ'kxidip meets ja jaj, tyimdyɔts jɔts ja kya'uk'ejtnit. Jaakyiktundits ejx yjaakja'atynim, jɔts kidi kube'ets kugoots mjatt; ja jaa'y pɔn jade'en jajttip, ka'ap ja tnijawidi pɔ sɔ ja yjattit kyubattit. ³⁶ Janchja'widik ɔts nja', pɔ ɔtsxi dɔ'on ñamyayi jade'en sam ja jaj, jɔts jaaktyimñayamnims ɔts x'ejxti xnijawidi jɔts mee njaakja'bɔkt.

Ja'ayi ku ja nwindson'ajtim Jesús ojts jade'en y'ukwani, jɔts ja cho'ona jɔts ja jadi'iñi yɔ'odyigɔñi.

Ya'at tnigajpxp tigɔjxp ja israelit jaa'y ojts tkajanchjawidi ja Jesús

³⁷ Øy idø'øn ja nwindson'ajtim Jesús wyinaty kawine'en tø tjatuñ ja milagri'ajtin jam mayjaa'y wyingujkp, jøts ni jade'en ja kyayikjanchjawi. ³⁸ Ja ti jats ja jade'en kyajatt sa wyinaty tø wya'añ ja Dios kyugajpxy Isaías, ku ja yide'en tjaadyaañ:

Dios Teety, ¿pøn adøm ja ngajpxy ja n'ayuujk tø x'ukupøjkya'am?

Øy ja Dios Teety ja myøk'ajtin tø tnanky'ijxyi, ka'ap ja pøn tmøjpikta'aky.

³⁹ Jøts idø'øn ja jade'en ka'ap tjanchjawi, nayide'ents ja Isaías wyinaty tjaadyaami:

⁴⁰ Dios ja jade'en tuujnidip, jøts ja jade'en wimbeets kugoots yik'ityidi, jøts ja ka' tkupøkti, jøts ja wyeen ja tkada'ejxtit øy ja wa'ats tyimyja'ejxti,

jøts ja nika' ja ja'gyukin tjagyaptit,

jøts ja nika' ñabyøkjawiyidit øy øts ja wine'en njayikpøkwy'a'atswa'andi.

⁴¹ Jade'en'ampy ja Isaías jade'en wyaañ, kumi tø ja wyinaty jekyip Dios Teety tyuk'ijxyi jøts ku jade'en ja Jesús ja y'øy'ajtin xuk'eixint, jøts ja ojts jade'en patki'jyi tñigajpxy.

⁴² Jøts øy idø'øn ja yjadade'eni, may ja israelit jaa'y tjanchja'widøø ja nwindson'ajtim Jesús, østi windsøndøjk paat winaagin tjanchja'widøø; ja'ayi ku ja pøn ka' ttukmadowdi, ja'agøjxp ku ja ttsø'øgidi ja fariseotøjk jøts ja ka'ap tyukmajtstu'udit ja tyunk. ⁴³ Ja jaa'y yja' ja ne'egi yikmøjtøjkidip, jøts ka'ap Dios yja'.

Ja Jesús y'ayuujk payø'øyiyip ja jaa'y pyøky

⁴⁴ Jøts ja nwindson'ajtim Jesús møk wyaañ:

—Ja' pøn ø xjanchja'wip, kidi øtsip ja tu'ugyi xjanchja'wip, nayide'en ja ñamyayi tjanchjawi ja Dios Teety midi ø xkajxp. ⁴⁵ Jøts pøn øts ixa x'ejxp xnija'wip, nayide'ents ja t'ixy tñijawi pøn ø xkajxp. ⁴⁶ Jøts ku øts ñamyayi jade'en sam ja jaj, ja' ø tø nnimiñ ya naxwiiñ pøni pøn ø xjanchja'widip, jøts kidi øts ja wimbeets kugoots nyiktandi.

⁴⁷ Pøni pøn ø xmadojip ja n'ayuujk jøts ka' tmøjpikta'aky, kidi øtsip ja ndabayø'øpy ja pyøky; kaja'ajip ø tø nnimiñ jøts øts ja naxwii'ñit jaa'y ndabayø'øyt ja pyøky, pø ja'axi ø nnimimpy jøts øts ja nyiknitso'ok'attit. ⁴⁸ Pøni pønts øts nja' xkatsojkip jøts ka' tmøjpikta'aky sa ø nwa'añ, jats ja' pøn ja ttabayø'øyip ja pyøky, nayø'øyi ja nøjkx kø'øm ni'øøniyip sa jaty ø tø nwa'añ, ku kyøxt ja naxwii'ñit. ⁴⁹ Kidi ja'ajip ø ngajpxy sa ø kø'øm nwinmay; ja' midi ø xkajxp, ja Dios Teety, ja' øts yø xanigutujk'ajtp jøts øts jade'en ngajpxt, jøts øts jade'en nyik'ixpøkt. ⁵⁰ Jøts wa'ats ø nnijawi, jøts ku ja' wya'añ ja Dios Teety y'ana'amin sudso yikpaatt ja jujky'ajtin xemikøjxp. Jade'ents idø'øn, pøni sa jaty ø tø nwa'añ, jade'en øts idø'øn ja tø ngajpxnaxy sam øts ja Dios Teety ja tø xanigutujk'aty.

13

Ku ja Jesús pakpujy ja pyabøjkpitøjk

¹ Tyimdyø jøts ja paski xøøw tpatnit, jøts ja nwindson'ajtim Jesús wa'ats ja tñija'wiñi jøts ku tø kya'pxy ja hori jøts ku ja tmajtstu'utt ja naxwiiñ'ajtin, jøts ja Dios Teety ja tñinøjkxnit. Ejtp ja tpa'ayøøy ja pyabøjkpitøjk, xjats ja jade'en tpikta'aky møk ja ejxa'an, jøts ja tnanky'ijxyi mabaat ja pa'ayo'owin ja tjagyepy.

²⁻⁴ Jøts ja Simón myajnk, ja Judas Iscariote, tø ja miku' ja wyinaty tyatøkiyi, jøts ja tyukwinmaa'ñ'atyi sudso ja tka'ødyu'unt ja nwindson'ajtim Jesús. Wa'ats ja tñijawi ja nwindson'ajtim Jesús jøts ku ja nay jam ñijkxy ma ja Dios Teety ja tø yiktsøøni, jøts ku ja amuum tø kyutujkmø'øyi. Xjats ku dø'øn ja jam wyinaty y'a'ux'atti, winets ja tyanaagyukyih'ñ jam kyaadyaajk jøp'am, jøts ja twejtstaajky ja wyet, jøts poop wet ja ojts ñadyatenwø'niyi. ⁵ Xjats ja nøø t'ada'amiyih'ñ jam købuj'ih'ñjotp, jøts ja pyabøjkpitøjk ja ttpakpujpinaxwa'jky, jøts ja nay jaty ttuktati'ich ja poop wet midi ja jam wyinaty tyenwøøn'ajtpy.

⁶ Jøts ku ja wyinaty tpakpujwa'añ ja Simón Pedro, winets ja ojts ñih'mxyi:

—Windsøn'ajtim, ¿mets ne'egi ndeky xpujip?

⁷ Jøts ja nwindson'ajtim Jesús ja t'adsøøy:

—Ka' mets yø ɪxyam xja'gyuki, mja'gyukipnimts mets yø nøjkx.

⁸ Jøts yide'en ja ñii'mxyi ja Pedro:

—Ka' me mibaat ndeky xpujit.

Winets ja nwindøn'ajtim Jesús ja tnimaay:

—Pøni ka' øts yø mdeky nbujy, ka'ats me n'ukmigu'ukwanit.

⁹ Winets ja Simón Pedro wyaañ, jøts ja nwindson'ajtim Jesús yiknøjmi:

—Winets ø wwindson'ajtim amuum xpujiyit ja ngø' ngubajki; jøts ka' nugo ja ndeky.

¹⁰ Jøts ja nwindson'ajtim Jesús ja tnimaay:

—Øy ku ja'ayi tyeky tpujt pøn tse'abajtipnim, kumi wə'ats ja amuum. Nayide'ents meets m'anmija'win wya'adsɪ øy kidyimñiduki'iyi.

¹¹ Jade'en'ampy ja wyaañ ku ja ñimy: “Øy ka' niduki'iyi mdyimwya'adsidi”, ja'agøjxp ku ja wə'ats tnijawi pøn ja wyinaty køyakwajnip.

¹² Xjats ku ja jade'en y'abajtiyiñ tpujkøjxiyi ja pyabøjkpitøjk tyeky, winets ja ñadyanijajni ja wyet jadigojk, jøts nay jam y'ixaajky mā ja mesi jøts ja tnimaay ja pyabøjkpitøjk:

—¿Mnija'widip tigøjxp jade'en tø ndundi? ¹³ Meets, xmaestri'ajtp meets, xwindson'ajtin'ajtp meets, janch tūgyajpxy kumi janch jade'en. ¹⁴ Pøni øts tamts maestri, jøts pøni øts tamts wwindson'ajtim, tøts ja mdeky nbujidi, nayide'ents meets idø'øn xuumit xem yam. ¹⁵ Tø nduk'ejxti jawyeen, jøts nayide'en xu'undit sam ø tø ndunjøpi. ¹⁶ Jøts janch øts idø'øn nwa'añ, jøts ku ka' pøn tumbi tjinaxy ja wyindson; uk ja jaa'y pøn kexy yø'øpy, ka'ap ja tjinaxy pøn ja kajxip. ¹⁷ Jøts pøni mja'gyukidip yø'øbi winmaa'ñ jøts jade'en xu'undit, jotkujkts x'ejxtit.

¹⁸ Jøts kidi niduki'iyip meets jade'en ndijy; nnija'wip øts ja' pøn jaty ø tø nwi'ixy. Kuwanits jade'en yjatt sam jap jaabyety nøkyijxpy: “Jats ja tu'uk tø x'ukmidsepøjkni pøn ø møøt ngay n'uuky.” ¹⁹ Patki'iyi øts ya'at yam nnigajpxy jøts ku jade'en nøjkx yjaty, jøts xi'jawidit xjanchjawidit jøts pøni pøn øts. ²⁰ Janch øts idø'øn nwa'añ, jøts ku øts ja xkupiky pøni pøn ø xkupøjkp ja ngudanaabyi; jøts pøni pønts øts jade'en xkupøjkp, ñayi kyupijkypts ja nayide'en pøn ø xkajxp.

Ku ja Jesús tnigajpxy sa ja Judas kyøyakiyit

²¹ Xjats ku ja wyinaty jade'en tø wya'añ, jøts ja tyimchaachjotmaadyøjkiyiñ, jøts ja ojts yikxon wə'ats tnigajpxy:

—Tiy janch mee nnøjmi, jøts ku meets ja nidu'ugin pøn ø xka'ødyunwamp.

²² Winets ja pabøjkpitøjk xem yam ñawyin'ejxjø'jkidøø, jadi'iñi tkamidaabyaatti pøni pøn idø'øn yiktejp. ²³ Winets ja tu'uk, midi ja nwindson'ajtim Jesús janchminamyajyip, jam ja wyinaty pyukø'øm tmøøt'a'ux'aty. ²⁴ Ja'ats ja Simón Pedro amaa'tsk ñimaay jøts tyiktø'øt pøn idø'øn yiktejp. ²⁵ Winets ja wingon tpuwa'adsiyiñ ja nwindson'ajtim Jesús, jøts ja tnimaay:

—Windsøn'ajtim, ¿pøn idø'øn mdijpy?

²⁶ Jøts ja nwindson'ajtim Jesús ja ojts yide'en y'adsøyi:

—Wan øts tsapkaaky tukpidasi t'uknimuji, jøts pøni pøn øts inet ja nmøøpy, ja'ats idø'øn ja wyinaty.

Xjats ja ojts jade'en tnimuji ja tsapkaaky, jøts ja ojts tmø'øy ja Judas Iscariote midi ja Simón myajkip. ²⁷ Jøts ku ja Judas ja'ayi t'axajiyiñ ja tsapkaaky, jøts ja miku' ja ojts tyatøkiyi. Winets ja nwindson'ajtim Jesús ja tnimaay:

—Jatyidø'øn xungojt midi mdunwampy.

²⁸ Jøts nipøn ja tkamadooguki tigøjxp idø'øn ja nwindson'ajtim Jesús jade'en tnimaay ja Judas. ²⁹ Ja Judasts idø'øn wyinaty tkøjø'ømit'ajtp ja meñ abøjk'iñ, jøts winaagin jade'en wyinmaydi pø ja'ajik idø'øn tijy ja nwindson'ajtim Jesús tyijpy, jøts ja Judas t'atsju'uty ti

jaty tsojkip ti jaty tunwamp ku ja xøøw, uk tmo'ot tigati ja ayoobi jaa'y. ³⁰ Xjats ku ja Judas wyinaty tø tkaagyixy ja chapkaaky, jøts ja ojts chøøñ. Koodsni wyinaty.

Ja jemy ana'amin

³¹ Xjats ku ja Judas wyinaty jade'en tø chøøñ, winets ja nwindson'ajtim Jesús wyaañ: —Yamnims inet tiy yik'ext yiknijawit ja nmøk'ajtin, jøts nay ja Dios Teetyts myøk'ajtin nanky'ejxip. ³² Jøts kumi nanky'ejxip øts ja Dios Teety myøk'ajtin, nayide'ents ja tnanky'ejxmiyit øts ja nmøk'ajtin, jøts tsojk ja jade'en ttu'unt. ³³ Ka' meets u'nk jeky n'ukmøøtsinaañit. Nayide'en meets yam ndukmadoowa'añ sam adøm ja nmigu'uk israelit jaa'y nnimaadyøø, jøts ku ja jap ka'ap ñøjkxtit ma ø nniykxy øy øts wine'en xja'ixa'ay. ³⁴ Ixyamts nmo'odi ja jemy ana'amin: jøts ku xem yam mnamyi'øy'atidit mnamyiyujy'atidit. Nayide'en sam mee njanchøkyin, nayide'ents idø'on mnachokidit xem yam. ³⁵ Pøni mdundip jade'en, tyumnijawidipts jade'en øy pøn jøts ku mee ø xpabøjkpi'aty.

Ku ja Jesús ojts tnigajpxy jøts ku Pedro kyanigajpxiyit

³⁶ Xjats ja Simón Pedro tyiktiy ja nwindson'ajtim Jesús: —Windsøn'ajtim, ¿ma dø'on mnøjkxwa'añ? Jøts nwindson'ajtim Jesús ja y'adsoojøø: —Jap ma ø nniykxy, ka'ap ø mibaat icyam jap xpanøjkxt; xpanøjkxp øts, ja' ku jaanim. ³⁷ Winets ja Pedro wyaañ, jøts ja nwindson'ajtim Jesús yiknøjmi: —¿Tigøjxpipts windsøn'ajtim ku øts ka' icyam ndsoont? Ixyats øts, øy me ngu'oogit. ³⁸ Jøts ja nwindson'ajtim Jesús t'adsøøy: —¿Janch idø'on mwa'añ jøts ku ø xku'oogiwya'añ? Øts wamp, ka'anin wyinaty tsapni'aaw y'aya'axy ku mets wyinaty tigøøk ojk tø xkagupiky ku me x'ijxy'aty.

14

Jesús køjxp ja Dios Teety yikpaatt yik'ext

¹ Kidi mmaydi mdajti, ajot'atti Dios Teety, jøts ajot'ajttik øts nayide'en. ² Ma chøøni ja Dios Teety may tsinaadyaajk ja jap tmøødi; ku jeexyip ka' yjade'eni, tø meets ja jeexyip ndukmadooni. Jøts wants ø tnijkxy jøts øts ja n'a'ejxit ma mdsøønidit. ³ Jøts kuts øts wyinaty tø nniykxy, jøts kuts øts ja wyinaty tø n'a'ejxi ja tsinaadyaajk, winets ø nme'ent jadigojk jøts mee nmøødiñit, jøts nay jap mjuky'attit ma øts idø'on jap ndsinaawya'añ. ⁴ Mnija'widipxi pøni ma ø nniykxy, jøts mnija'widipts ja tuu'.

⁵ Winets ja Tomas tnimaay ja nwindson'ajtim:

—Ka'ap øø windsøn'ajtim ja nnijawi pøni ma me mnøjkxwa'añ; ¿sudso'ampy øøts ja tuu' nnijawit?

⁶ Jøts ja nwindson'ajtim Jesús ja t'adsøøy:

—Tum øts amuum ja tuu', ja tyiiby yjanchpi øts nayide'en, jøts ja kunuu'kxy juky'ajtin nyajkpy. Øts køjxp ja Dios Teety yikpaatt yik'ext. ⁷ Kuk øts jeexyip xnijawidi pøni pøn øts, nayi mnija'wipts meets jeexyip nayide'en ja Dios Teety; jøts tøts idø'on ja xa xjanija'wiñidi, mja'ejxtipts idø'on ja'.

⁸ Winets ja nwindson'ajtim ñimaajyøø ja Felipe:

—Windsøn'ajtim, ja'ayi ku øø xtyimdyuk'ext ja Dios Teety, wan øø t'ijxy.

⁹ Jøts ja nwindson'ajtim Jesús ja yide'en t'adsøøy:

—Windi'ixyip mee Felipe nminabyaajtniyidi, ¿jøts ni jade'embaat me xka'ijxy'ajtni? Pøni pøn ø x'ejxp, ñayi y'ijxpy ja nayide'en ja Dios Teety; jøts, ¿sudso'ampyts me x'amidøy jøts mee nduk'ext ja Dios Teety? ¹⁰ ¿Ka' xmibiky ku øts Dios Teety møøt n'ity, jøts ku øts ja nayide'en xmøøt'ejtmi? Tuki'iyi sa jaty nnøjmidi, kidi ngøømwinnmaa'ñjotpyip øts yø njuuty. Ja Dios Teety midi ø xmøøt'ejtp, ja' køøm tyunk tump. ¹¹ Jøts janchja'wik øts jøts ku øts Dios Teety møøt n'ity, jøts ku øts ja nayide'en xmøøt'ejtmi; uk pøni ka'ats, øyts øts

ja'ayi xajanchjawit, pø m'ijxpyxi ti jaty ø ndumpy. ¹² Jøts tiy janch mee nnøjmi, pøni pøn ø xjanchja'wip, ñayi yjatp ñayi tyu'ump ja nayide'en ti jaty ø njajtpy, ti jaty ø ndumpy, jøts ja tyikne'egidit tyikaja'adit ja'agøjxpts kuts ja Dios Teety nmøøt n'ett. ¹³ Jøts tuki'iyi pøni ti jaty mee m'amidøøpy ku ø xkajpxpaattit, øtsts ja kø'øm jade'en ndu'ump, jøts øts jade'en nyikwingaxø'jkit ja Dios Teety myøk'ajtin y'øy'ajtin. ¹⁴ Ndu'ump øts jade'en pøni ti jaty mee m'amidøøpy jøts ku øts xakajpxtit.

Ku ja Jesús wya'añ jøts ku ja Espiritu Santo tkaxt

¹⁵ Pøni xtsojpk tam meets, paduujnidik meets ja n'ana'amin. ¹⁶⁻¹⁷ Jøts nnøjmi pøts ja Dios Teety jøts ja mdanigaxidit tu'uk pøn mbudøkiyidip, pøn myikjot'amøkøkiyidip, pøn ja tyiiby yjanchpi myøøt'ajtpy. Jøts ja'ats meets møøt m'ett kunaxt. May jaa'y ja kyagupøkit ja'agøjxp ku ka' t'ejxti tnijawidi. Jøts meets, tø meets ja xnijawidi, pø ixaxi ja xmøødidi, jøts ja'ats mee møøt m'ett. ¹⁸ Ka' mee nadyu'uk nyiktañ, nniwimbett meets jadigojk. ¹⁹ Wingtonip ja xøøw ku ø ka' mā n'ukyik'ejxnit; jøts meets, x'ejxp meets; kumi jujky øts, mjujky'atpts meets. ²⁰ Jaanims xja'gyukidit jøts ku øts ja Dios Teety møøt n'ity, jøts meets xmøøt'ejtmi, jøts mee nayide'en nmøøt'ejtmi. ²¹ Pøn tø tnijawidi jøts pøni xpaduujniyip øts ja n'ana'amin, jade'en ja tyiknigue'exy jøts ku øts ja xjanchøky. Jøts ja'ats ja Dios Teety chokp pøni pøn ø xtsojpk, jøts ndsokp øts ja nayide'en, jøts ja'ats ø x'ejxp, ja'ats ø xnijawip ku nnanky'ejxit øts nja'.

²² Winets ja yjadu'ukpi Judas ja ñimaajyøø (nigidi Iscariotibi wamp midi ja Jesús køyakp):

—Windsøn'ajtim, ¿tigøjxp ku øøts ja ja'ayi n'ext ku nnanky'ejxit, jøts nika'ap niduki'iyi ja naxwii'ñit jaa'y?

²³ Jøts nwindson'ajtim Jesús y'adsøøy:

—Pøn ø xtsojpk, pyadumpy ja' sa ø nwa'añ, jøts ja'ats idø'øn tsokip ja Dios Teety; jøts ja'ats ø nnime'emp møøt ja Dios Teety, jøts øøts ja xemikøjxp nmøøt'ett. ²⁴ Jøts pøn ø xkatsojpk, ka'ap ja tmøjpikta'aky sa ø nwa'añ. Yø kajpxy yø ayuujk ixa xmadowdi, ka'øtsip yø' nja'; ja' yø' yja' midi ø xkajxp, ja Dios Teety.

²⁵ 'Ndukmodoogøjxtip yam tuki'iyi, njaaktyimyøøtsinaadyipnim yam; ²⁶ ja Espiritu Santots midi ja Dios Teety mdanigaxiyidip jøts øts ja xkudanit, ja' idø'øn mbudøkiyidip, ja' idø'øn mgajpxjot'amøkiyidip jøts ja mdukjajtkøxidit tuki'iyi, jøts nay ja' mdukja'myajtskøxiyidip tuki'iyi sa jaty mee tø nnøjmi.

²⁷ Jotkujk nnawya'kxa'andit. Nyajkpy øts ja øy'ajtin tsuj'ajtin. Ka'ap øts jade'en nyaky sam øy pøn nugo wya'añ. Kidits mmaydi mdajti, ka' mee mdsø'øgit. ²⁸ Tøxi xmadowdi ku ø nnimy jøts ku ø nnijkxy, jøts ku ø nme'ent jadigojk jøts mee nmøøtsøønit. Kuk meets jeexyip xjanchøky, mjanchxondakp meets jeexyip ku tø xnijawidi jøts ku nninijkxy ja Dios Teety; kumi ja' idø'øn jawaani møj jøts nigidi øts. ²⁹ Patki'jyi ya'at jade'en ndukmadowdi jøts ku wyinaty jade'en yjaty jøts xjanchjawidit.

³⁰ 'Ka' mee møøt jeky n'ukmøøtnagyajpxniyit; ja'agøjxp ku ja wyingøñ ja Satanás pøn yikutujkp ya naxwiiñ. Øy øts nmøk'ajtin ja xjagamimajadaajkiyi, ³¹ jatpts jade'en jøts jade'en tnijawit ja naxwii'ñit jaa'y jøts ku ø ndsøky ja Dios Teety, jøts ku øts ja nbaduñ sa øts ja tø x'ane'emy. Tanidits jøts wan ya ttsøø'ñindi.

15

Ja uvi tsa'am kipy

¹ Jade'en øts idø'øn ñamyayi sam uvi tsa'am ñiguipy, jøts ja Dios Teety jade'en sam ja jaa'y midi ja uvi kipy t'ejx'ejtp. ² Jøts ja tyikwinajki ja y'awaj ja y'axeeñ midi katøømi; jøts midi tøømyip, yikxon ja tyikwa'ach twibøøty twibiky mā ja jam t'ijxy sa yjatwa'añ, jøts ja jawaani may yjaaktyimdyøømit. ³ Nayide'ents meets idø'ønmi; tø mee mwatsni, ja xpøjkin mee tø myikwa'achi midi mee tø nmø'øy. ⁴ Kidi mee xmajstutni, kumi ka'ap

mee nmajststu'uty. Ka'axi kipy awaj tyøømi jadi'iñi ku ja kya'ity ja ñiguipy; nayide'ents meets idø'ønmi, ¿ti mee nadyu'uk mnityu'ump ku mee wyinaty ja nja' tø x'ixmajtsniyi?

⁵ Øts idø'øn jade'en sam ja ujts ñiguipyin, jøts meets jade'en sam ja y'awaj y'axeeñin. Pøni pønts ø xkamajstutp, jøts ku øts ja nayide'en ka' nmajststu'uty, ja'ats idø'øn ja yja' møj wingaxø'økp; jøts ka' mee ti nadyu'uk mayi ku ø nga'ett. ⁶ Pøni pønts ja nja' xkaminamyaaajyiyip, ja'ats jade'en yik'ixjibep sam ja kipy awaj midi ka'øy, jøts kuts ja tyø'tst jøts ja jønjøtpy yikpikta'akt, japt ja tyø'øty.

⁷ Pøni ka' mee xmajststu'uty, pøni ka' meets ja n'ixpøjkin xja'dyigøjyidi, amidowdits pøni ti mdsojktip jøts meets ja myikmo'ot. ⁸ Ku yikxon xpadundi ja Dios Teety yja' sa ttsøkyin, jade'en'ampyts ja y'øy'ajtin myøk'ajtin yikpa'ixy, jøts nayide'en idø'øn yiknijawit ku meets idø'øn xjanhpabøjkpi'aty. ⁹ Jade'en mee ndsøky sam øts Dios Teety xtsøkyin; tun'ejtik meets yø nja' ku meets ja tsojkin ndami'ity. ¹⁰ Pøni xpaduujnidip øts ja n'ana'amin, jade'en'ampyts mee møøt m'ettit øts ja ndsojkin, nayide'en ñamyayi sa øts ja nDeety y'ana'amin nbaduujniyi, jade'ents øts idø'øn ja chojkin nmøøt n'ity.

¹¹ Jade'en'ampy meets jade'en nnøjmi, jøts mjotkujk'attit nayide'en sam øts, jøts ejtni xoni x'ejxtit. ¹² Ya'at øts idø'øn n'ana'amin'ajtpy: øy yikxon xem yam mnamyayidit mnachokidit, nayide'en sam øts ja tsojkin nbikta'aky sa mee ndsøky. ¹³ Jade'en idø'øn ja tsojkin møj yikjagyepy pøn amuum nayojxip, jøts ja myigu'uktøjk tkudani jøts jujky'ajtin ja tpaattit. ¹⁴ Meets idø'øn nmigu'uk'ajtpy pøni mdundip jade'en sa ixa n'ana'amdi. ¹⁵ Ka' mee ndijy jøts ku mee mdumbi, kumi ka'ap ja tumbi tnijawi pøni ti jaty tyumpy ja wyindsøn. Nmigu'uktijpyts meets yam, ja'agøjxp ku tuki'iyi tø nduknija'wigyøxti sa jaty øts ja Dios Teety tø xnøjmi. ¹⁶ Kameedsipxi tø xpikta'aky; pø øtsxi mee kø'øm tø nwi'ixy, jøts mee tø ndanipiky jøts nøjkx ja mdunk yikxon xyikwingaxø'økti, jøts wan tmøji wan tkaja'aji. Jade'ents ja Dios Teety mmo'ojidit pøni ti jaty m'amidoodip ku ø xkajpxpaattit amumjoojt. ¹⁷ Yø' idø'øn nda'ana'amdip, jøts xem yam mnabya'ayowidit jøts ja tsojkin xjagyaptit.

Ku ja ka'øyjaa'dyi tkatsokti ja Jesús møøt ja pyabøjkpitøjk

¹⁸ Pøni mmi'ajkiyidip ja' pøn ya naxwiiñ, mnija'widipxi jøts ku øts ja jawyeen nayide'en tø xuñ. ¹⁹ Ku meets jeexyip nayide'en m'adi'ich sam pøn ya naxwiiñ wyinmaydi, nayide'ents meets ja jeexyip mdsøkyiyi sam ja ttsøkyin pøn nayide'endi sam ja'ajindi. Øts meets ya tø nwi'ixy ya naxwiiñ ma nayide'en chøønidi pøn jade'en winmaadyip, jøts ja'agøjxp myikmi'ekyidi kumi ka'ap ja'abi winmaa'ñ x'ukyikyø'øñidi sam o pøn naxwiiñ. ²⁰ Ja'myatstits sa tø nnøjmidi, jøts ku ka'ap ja tumbi ñamyøjiyit sam ja wyindsønin. Tøbaats ø nyikpawidity ku ngayikupiky, nayide'ents meets idø'øn myiktumit; jøts pøni xpaduujnidipts øts ja n'ixpøjkin, nayide'ents meets ja m'ixpøjkin yikpadumit. ²¹ Øts køjxp idø'øn jade'en myiktu'undit ja'agøjxp ku ka' tnijawidi pøn ø xkajxp.

²² Ka'ap ja jeexyip ti pøkyi, kuk øts jeexyip ngamiñ, kuk øts ja jeexyip ngaduknijawidi. Ixyam ti ñikyajpxtip jøts ja pyøky kyayiktagubatit; ²³ ja' pøn ø xmi'ajkip, ñayi myi'ajkip ja nayide'en øts ja nDeety. ²⁴ Ka'ap yø jeexyip ti pøkyi kuk øts yø jeexyip ka' ti nduk'ejxti midi ø tø nduñ yø' wyingujktyi, sam ka'ap pøn jade'en tø tyuk'ijxyidi; tø yø t'ejxnidi, ja ti ja'ats yø myija'widip, pø xmi'ajkidipxi øts yø', jøts ñayi myi'ajkidip yø nayide'en ja Dios Teety. ²⁵ Ja'agøjxpts ya'at jade'en yjaty kumi ka'pxy jade'en yjatt sa ya'at kajpxy ayuujk wya'añ, midi jap køxja'ay yø' kyutujkøtptyi: “Nadøki øts yø xmi'ekyidi.”

²⁶ Paty øts ja Dios Teety xukaxt ja Espíritu Santo jøts øts ja nja' xkajpxiyit, pøn pudøjkp kajpxjot'amøjkp, pøn nayide'en tmøøt'ajtp ja tyiiby yjanhpi. ²⁷ Jøts mee nayide'en ja nja' xkajpxmiyit, pø tøxi meets ja x'ixy sa jaty y'ejxi tyiyi, sa jaty tø ngajpxwa'kxtso'ondaajkyim østi ixymbaat.

16

1 'Jade'en'ampy jade'en nnøjmidi jøts kidi nugo winmayjimbetti winmay'adøjti. 2 Myikwojpidso'omp myikajxpidsø'omp meets jap tsaptøjkjōtpy, østi yja'at paat ja xøow ku ja jaa'y wya'andit jøts ku Dios yja' ja tpaduujnidi ku meets ja myik'oogiyit. 3 Ja'agøjxp ja jade'en y'adø'øtstit ku ja nijuuni tkanijawidinim pøni pøn ja Dios Teety, jøts pøni pøn øts. 4 Jøts ja'agøjxp ya'at jade'en ndukmadowdi ku wyinaty jade'en yjatwa'añ, jøts xja'myatstit jøts ku yø tø ndukmadoonidi.

Ti dø'øn ja Espíritu Santo tyumpy ya naxwiiñ

'Ka' meets yø jade'en patki'jyi ndukmadøøy, kumi ja'ajt øts kø'øm.

5 Ixyamts ø nnøjkwani tsinaabyi mā ja jap midi ø xkajxp; jøts øts ja nmøøtsinaamyit jøts nipøn tamts mee nidu'ugin tkayiktiy pøni mā øts idø'øn nnijkxy. 6 Jotmay mee ne'egi jinaxy tø mjaaktyimdyatøkiyi, ja'agøjxp ku yø jade'en tø ndukmadowdi. 7 Janch idø'øn nnøjmidi jøts ku ne'egi jade'en m'øy'ajtxidit jøts ku nnøjxxt. Ku ø nganøjxt, nijuunits ja kyamiñ midi mbudøkiyidip midi mgajpxjot'amøjkijidip. Ku nnøjxt, kø'øm øts ja ngaxt. 8 Jøts ku dø'øn ja nøjkx myiñ, ja' ja tyu'ump jøts ja naxwii'ñit jaa'y ja ttukjawit ja pyøky jøts ku yjanchpojkpitumbijaa'yidi, jøts ku ja tu'ugyi ja winmaa'ñ sudso tyø'ødit sudso tyuda'aktit, jøts ku Dios ja pyayø'øyditi. 9 Ja'agøjxp pyojkpitumbijaa'y'atti ku ø ka' xjanchjawidi; 10 ñija'widipts nøjkx sa y'ejxi tyiyi midi'ibi øy midi'ibi paat'ajtidip, kumi jam ø nnijkxy mā Dios Teety, jøts ka' mee x'uk'ejxnit, 11 jaanimts tjā'gyukidit ja Dios pyayø'øyin jøts ku tyiy'ajtingøjxp yikutuky, pø tøxi wyinaty ja tiy'ajtin tyaky, jøts ja miku' yikastigimo'ot midi møj y'ity ya naxwiiñ.

12 Jap øts may ja madya'aky njajagyepy midi ndukmadoowandip, ka' inet xja'gyukidit ixyami. 13 Kunim mye'ent ja Espíritu Santo, ja'ats ja tuki'iyi mduk'ixpøjkøxidip sudso tyiyi yjanchi; ka'axi kyø'øm ja' ja tyiktu'unt pøni sa jaty ja wya'añ, ja' ja kyajpxp pøni sa jaty pøni ti jaty ja myadøøpy, jøts ja mdukmadowidit ti jaty tunwajnipnim. 14 Jade'en'ampyts øts ja winja'win windsø'jkin nbaatt, kuts ja ngajpxy ja n'ayuujk xpadu'undit sa mduknijawiyidi ja Espíritu Santo. Øts ja ngajpxmyo'op. 15 Nayide'ents ja Dios Teety kyajpxy ja y'ayuujk sam øts nja'ajin, paty øts jade'en nwa'añ jøts ku nayide'ents nmo'ot ja ngajpxy ja n'ayuujk, nayide'ents yø mduknijawiyidit.

Xondaajkin ja nøjkx wyimbidsimy ku njotmay'o'jkindit

16 'Ka' y'ukjajknit ku mee ka' x'uk'ejxnit, ku wyinaty waani tø ñaxy ja tiempi jaanimts ø x'ejxtit jadigojk, pø jamxi ø nnijkxy mā jam Dios Teety.

17 Winets ja pyabøjkpitøjk winaagin nixem niyam ñawyajnidøø:

—¿Ti yø jade'en tyijpy ku yø xnimaay'in jøts ku ka' y'ukjajknit, ku yø ka' n'uk'ejxna'ant, jøts ku waani ñaxt winetnimts ja n'ejxindit jadigojk ja'agøjxp ku ñijkxy jam mā ja Dios Teety? 18 ¿Ti dø'øn yø jade'en tyijpy jøts ku "ka' y'ukjajknit"? Ni kyayikja'gyuki niwine'en pøni ti dø'øn yø jade'en tyijpy.

19 Jøts ja nwindson'ajtim Jesús ojts ja t'ixy jøts ku ja pyabøjkpitøjk yjawi tyiibyøkwa'añiyi, jøts ja tnimaay:

—Tøxi nnøjmidi jøts ku ka' y'ukjajknit ku mee ka' x'uk'ejxnit, kuts wyinaty waani tø ñaxy ja tiempi jaanimts ø x'ejxtit jadigojk. ¿Kidi yø'øjip meets ixja mnayiktøøjiyidip? 20 Jøts tiy janch øts idø'øn nwa'añ ku mee nnøjmi, jøts ku nøjkx ja yajxin x'ejxti, ku nøjkx ja jotmay'o'jkin xpaatti yam ja naxwii'ñit jaa'y xyonda'akti. Jøts ka'ats yjade'eni, øy mee mabaat mjantyimyajotmay'øøky, xondaajkin ja nøjkx wyimbidsimy ku jade'en mjotmay'ookti. 21 Jade'en idø'øn ñamyayi yjaty sam ja tø'øxyøjk ku ja kya'axwa'añ, janch winmay jotmay yjaty ku tø tpaaty ja tiempi ku ja y'u'nk pyøjkjø'økni; ku tø tminawya'kxniyi ja maxu'nk nika'ap ja t'ukja'myajtsni jøts ku y'u'nk ja tø pyiky, ja'agøjxp ku ja xyonda'aky ku ja tø tyikaxi'iky tu'uk maxu'nk ya naxwiiñ. 22 Nayide'ents meets

idø'øn mjajtnimi, mjanchjotmay'oo'ktip ixyam; wimbetp øts jøts mee nminabyaādīt jadigojk, winetnims ja xondaajkin xpaattit yikxon, jøts nipøn ja mgapøjkxiyidit.

²³ Jøts ja'abi xøøw ka' ø ti x'ukyiktøønidit. Janch meets idø'øn nnøjmidi, jøts ku ja Dios Teety tuki'iyi mmo'ojidit pøni ti jaty ja m'amidoodip øts køjxp. ²⁴ Østi ixyambaat ka'anīm ti x'amidowdi øts køjxp; amidowdi pøktsowdi, mbaattip ja' jøts jade'en mxonjattit.

Tøts ja Jesucristo tmimajada'aky midi ja naxwii'ñit jaa'y yikwindigøøpy

²⁵ Madya'akyøjxp ya'at yam nugo tø ndukmadowdi jøts xamimadoodowidit; ja'atp ja xøøw ku ka'ap jade'en nøjkx n'ukmigajpxnidi abiky madya'akyøjxp, wa'ats meets ja ndyimdyukmadoonit nøjkx pøni sa ja Dios Teety y'ejxi tyiyi. ²⁶ Jøts ja'abi xøøwts øts køjxp ja Dios Teety x'amido'odit xpøktso'odit ja øy'ajtin; jøts nika'ap øts yam ndyimwya'añ jøts ku øts n'amido'ot ja Dios Teety jøts mee nni'amidowit. Ka'ap chøkyi jøts kø'øm n'amido'ot, ²⁷ pø mdsojkp meets ja Dios Teety. Jade'engøjxpts ja mdsøkyidi kumi xtsojpkp meets nayide'en, jøts tøts xjanchjawidi jøts ku øts Dios Teety xkexy. ²⁸ Jam ø tø ndsøøñ mā Dios Teety jøts øts ya tø nmiñ ya naxwiiñ, ixyamts øts inet nmajtstu'utwangojmi ja naxwii'ñit, jøts ø n'awimbetiwyā'añ jadigojk ja Dios Teety.

²⁹ Xjats ja pyabøjkpitøjk wyandøø:

—Ixyamnim inet tiy janchwa'ats xnigajpxñim, ka' x'ukyiktuni ja abiky myadya'aky midi kayiktamimadodø'wip. ³⁰ Ixyamnimts øøts inet njanch'ixy njanchnijawi jøts ku tuki'iyi xnija'wigyixy, jøts ku ka' chøkyi jøts ku øy pøn kuwani mdyimdyiibyøkiyit. Ja'agøjxp øø njanchjawidi jøts ku jam mdsøøñ mā Dios Teety.

³¹ Jøts nwindson'ajtim Jesús yide'en t'adsøøy:

—Jøts xjanchja'wiñidip øts ixyam? ³² Ja wyingøñ jøts tø yja'aty ja xøøw ja jumøjt, jøts tyimñay'ixyami, ku meets inet m'agakpaktit pø mā pønjabøn ñøjkxt, jøts øts inet nadyu'uk xnika'aktit. Ka'ap ø nadyu'ugi, jats ja Dios Teety xmøø'tity. ³³ Ndukmodoogøjxtip ya'at yam tuki'iyi, jøts ja øy'ajtin jotkujk'ajtin xpaattit ku ø x'ajot'attit. M'ayo'ombaattip ya naxwiiñ; jotmøkts mnabyikta'agidit, tøts øts inet nmimajada'aky midi ya naxwiiñ yikwindigøøpy.

17

Ku ja Jesús tni'amidowi tni'bøktsowi ja pyabøjkpitøjk, jøts ja ttukmadøy ja Dios Teety

¹ Xjats ku ja nwindson'ajtim Jesús jade'en wyan'abajtiyii'ñ, jøts ja ojts jam tsajpwemp pyat'ixy, winets ja wyaañ:

—Dios Teety, tø ja hori kya'pxy. Yikmøjtøjkikts øts, kunuu'kxyja'wikts øts, jøts me nayide'en nyikmøjtøkit, jøts me nayide'en myikunuu'kxyjawit. ² Metsxi tø xmøø'y ja kutujk jøts øts naxwii'ñit jaa'y ja ni'ijtyi nda'ana'amdit, jøts ja tpaattit ja jujky'ajtin xemikøjxp pøn jaty me tø xkø'mø'y. ³ Jøts jade'en'ampy yikpaaty ja jujky'ajtin xemikøjxp ku tu'ugyi mets Dios Teety myikjanchjawidi, sam nayide'en ja Jesucristo, pøn mets ya tø xkexy naxwiiñ.

⁴ Tø øts ja ndunguixy jade'en midi me tø xa'ane'emy, jade'engøjxpts myikmøjawidi myikunuu'kxyjawidi ya naxwiiñ. ⁵ Møøkyts øts jam mwingujky nay ja'abi møk'ajtin midi øts y'ijty nmøøt'ajtpy møøt mets ku ka'anīm wyinaty naxwii'ñit y'øyinim.

⁶ Jøts ja jaa'dyi midi me kø'øm tø xwiwich ya naxwiiñ midi me tø xagødøki, tøts øts ja nduknija'wigyøxti pøni pøn mets. Jøts mets ja y'ijty mjaa'y'ajtpy, jøts mets ja tø xagødøki. Tøts ja tpadundi mets ja m'øgyajpxy mets ja m'øy'ayuujk. ⁷ Nija'winidip ja ixyam wa'ats ti jaty me tø xmøø'y jøts ku mets ja xja'aji. ⁸ Tøts øts ja ndukmadowdi ja øgyajpxy ja ømyadya'aky midi me tø xukmadøy, jøts tøts ja tkupøkti, tøts ja tnijawidi jøts ku ja yjanchi jøts ku øts jam ndsøøñ mā mets jam. Tø ja tjanchjawidi jøts ku me tø xkexy.

⁹ Yø'øts ø nni'amidoo'widip pøn jaty me tø xmø'øy ja'agøjxp ku ja xja'aji; jøts nigidi ja'abi nni'amidoo'wip pøn øts tø xkabadundi. ¹⁰ Midi jaty ø nja'ajtpy, nayi mets mja' ja', jøts nay ja'ats ø nja'ajtmip; jøts nayi øts nmøk'ajtin nay øts ngunuu'kxin ja xyiktuujnidip.

¹¹ 'Øts, ka'ap øts n'ukyaa'ajtnit ya naxwiiñ; yø'øts ja tandip, jøts me nninøjkxnit møøtsinaabyi. Kunuu'kxy Dios Teety, agø'øduk axajtuk mmøk'ajtingøjxp pøn jaty ø tø xagødøki jøts ni'amuki ni'aga'pxi y'ettit, kyanamyajtstu'udidit nayide'en sam adømin.

¹² Ku øts yø ya y'ity nmøøt'etti ya naxwiiñ, n'ejx'ejttip øts yø', ja møk'ajtin ø nyiktumpy midi me tø xmø'øy, ja'ats øts yø nda'agø'ødujktip nda'axajtujktip. Ni tu'ugin yø tø kyawindigøydi, ja'ayim idø'on jade'en tø yjaty midi'iyim y'ijty windigøy'ejtnip, jøts jade'en ka'pxy tpaaty sa ja mgajpxy sa ja m'ayuujk xyiktaañ.

¹³ 'Ixyamts me nninøjkxnit ma mets jam; jøts ku njaaknaya'a'aty ya naxwiiñ, ja'agøjxp øts jade'en nwa'añ jøts ja mja' yotkujk'attit sam ø njotkujk'atyin. ¹⁴ Tø øts ja ndukmadoogøxti ja m'øgyajpxy ja m'øy'ayuujk, ja'ats mmi'ajkiyidip pøn ja ka'øwyinmaa'ñ tjagyajp. Ja' yiktami'ajkidip ku ja yjade'embi winmaa'ñ tka'ukyiktunidi, nayide'ents øts ka' nyiktuñ ja yja'adi. ¹⁵ Kaja'ajipts ø n'amidøøpy jøts xwaabidsø'ømt ya naxwiiñ, ja' n'amidøøpy jøts xkuwa'ant xkubokt, jøts miku' yja' kidi myajada'aky. ¹⁶ Nayide'en ja'adi sam øts, ka' nyiktuñ ja kya'øwyinmaa'ñ. ¹⁷ Pøkjø'økts ejxjø'økts mdiy'ajtingøjxp mjanch'ajtingøjxp; pø tiy janchxi ja mgajpxy ja m'ayuujk. ¹⁸ Nayide'ents sam me tø xaniguexy ja naxwiiñit jaa'y, nayide'ents øts ja yam ndanipøkti ndani'ejxti pøn ya naxwiiñ ja ka'owynmaa'ñ tjagyajtpnim. ¹⁹ Amumjoojt øts njaaktyimñadyamiyoxiyit yø'øgøjxpti, nayide'ents ja ñadyamiyoxiyidit ku ja mgajpxy ja m'ayuujk ttu'undit midi tiy midi janch.

²⁰ 'Kidi ja'ayip ø nugo ndyimñi'amido'owidip, nayide'en ja'amidip pøn ø xjanchjawiwandipnim ku ja myigu'uk ja tmadoojidit ja øgyajpxy ja ømyadya'aky.

²¹ Jøts ja' øts yam n'amidøøpy jøts tu'ugyi ja wyinmaa'ñ tyik'ettit; jøts tu'ugyi y'ettit møøt adøm, nayide'en Dios Teety sam mets xmøøt'ity jøts sam me nmøøt'ity. Jøts wan tu'ugyi ja wyinmaa'ñ tpikta'akti jøts jade'en ttukjanchjawidit ku me tø xkexy, pøn ja ka'øwyinmaa'ñ tjagyajtpip. ²² Tø øts ja nmo'odi nay ja'abi møk'ajtin midi me tø xmø'øy, jøts tu'ugyi wyinma'adyit nayide'en sam adøm nja'. Tu'ugyi nayide'en mets mja', jøts nayide'ents øts nja'ami. ²³ Øts ja møøt nnamyayidit, jøts mets xmøøtnamyaa'ymiyit jøts ja tu'ugyi y'ettit, jøts jade'en ja naxwiiñit jaa'y t'ejxtit tnijawidit jøts ku me tø xkexy, jøts ku mets ja xjanchøky sam me xtsøkyin.

²⁴ 'Dios Teety, metsxi ja tø xagødøki, jøts ja'ats ø ndsøjkpy jøts ja yjap'attit ma øts jap ndsinaawya'añ, jøts t'ejxtit ja møk'ajtin ja øy'ajtin midi me tø xmø'øy; jaayim me xtsøky ku ka'anim wyinaty naxwiiñit y'øyinim. ²⁵ Mets Dios Teety tiy'ajtin janch'ajtin mmøøt, jøts ka'ats ja naxwiiñit jaa'y mnijawiyi; jøts øts, nnija'wip mets; jøts yø pabøjkpitøjk, ñija'winidip yø' jøts ku me tø xjanchkexy. ²⁶ Tø øts ja ndukmadowdi mbøn mets jøts njaaktukmadoowandipnim øts. Jade'ents sa mets xpa'ayøyin, nayide'ents ttaba'ayoomidit ja myigu'uktøjk. Nmøøt'etpyim øts yø' y'agujkpti jade'en.

18

Ku ja Jesús ojts yikmach

¹ Xjats ku ja nwindson'ajtim Jesús jade'en wyinaty tø wya'añ, winets ja tmøøtsøø'ñ ja pyabøjkpitøjk, jøts ja ñøjkxwa'andi jam jaduktamajñ ku ja ttanaxtit ja nøø midi yiktejp Cedron. Jam tu'uk ja kam ma y'ity øy ti tsa'am, jamts ja nwindson'ajtim Jesús tmøøtkuyø'øyyii'ñ ja pyabøjkpitøjk. ² Jøts ja Judas, pøn ja wyinaty ixam ka'ødyunwajnip, wa'ats ja t'ijxy'aty ja'abi et, pø jamxi ja nwindson'ajtim Jesús wyinaty kawinaak ojk tø ñamyukyidi møøt ja pyabøjkpitøjk. ³ Jade'en'ampyts ja Judas jam ojts tmøøtja'aty tukpiky ja soldaditøjk møøt ja jaa'dyi midi t'ejx'ejttip ja tsaptøjk, ja teetywindsøndøjk ja fariseotøjk

ja kajxidip, tumda'o'jk møøt ja jam yja'ttøø kunø'øky. ⁴ Ñija'wiñip ja nwindson'ajtim Jesús ja wyinaty sa jaty ja yjatwa'añ kyubatwa'añ, winets ja twinguwa'jkii'ñ, jøts ja tyiktiiy:

—¿Pøn dø'øn m'ixaadyip?

⁵ Jøts ja ojts yide'en y'adsowdi:

—Ja Jesús øø n'ixaapy, ja Nazaretit jaa'y.

Jøts ja nwindson'ajtim Jesús ja t'adsøøy:

—Øtsimts ja'.

Jøts ja Judas midi ka'øy'adøtsp, ixam ja tmøødi ja mayjaa'y. ⁶ Jøts ku ja nwindson'ajtim Jesús wyaañ: “Øtsimts ja'”, winets ja jadi'iñi y'ixnøjkxtøø jøts ja kya'tsjimbejtøø. ⁷ Winets ja nwindson'ajtim Jesús ja jadigojk tyiibyøjkidøø, jøts ja ñimaajyidøø:

—¿Pøn dø'øn m'ixaadyip?

Jøts ja wyandøø:

—Ja Jesús, ja Nazaretit jaa'y.

⁸ Jøts ja nwindson'ajtim Jesús ja tnimaay:

—Tøxi nnigajpxy jøts ku ja y'øtsi. Pøni øts tam x'ixaadyip, majtstu'uttits øts yø nbabøjkpitøjk.

⁹ Jade'en'ampy ja jade'en yjaty, jøts ja jade'en ka'pxy tyimyjaty ku ja nwindson'ajtim Jesús wyinaty yide'en kø'øm tø wya'añ: “Pøn jaty øts ja Dios Teety tø xagødøki, ni tu'ugin ja tø kyawindigøydi.” ¹⁰ Jøts ja Simón Pedro jam wyinaty tø tnixaji tu'uk ja tsujx, ja'ats ja ojts tjuuty, jøts ja ttaxikpo'otuuity ja jaa'y midi txøøw'ajtp Malco, ojts y'aga'ndyatsk ja tyimgyajtpo'jtiiy, ja teetywindsøndøjk idø'øn ja tyumbi jade'en jajtp. ¹¹ Yide'en ja nwindson'ajtim Jesús tnimaay ja Pedro:

—Pikta'ak yø mdsujx nay jap mā tø xjuuty. ¿Sa me mwinmay, uk ja øts idø'øn xijy ngagupøkt ja ayo'on midi øts ja Dios Teety tø xanibiktaagi?

Ku Jesús yiknajtswaa'wiyi'ñ jam mā teetywindsøn

¹² Xjats ja soldaditøjk, møøt ja' pøn tnigubajk'ajtp jøts møøt ja tsaptajk, ojts tmatsti ja nwindson'ajtim Jesús, jøts ja ojts tkøwøøndi tkøxojtsti. ¹³ Jøts ja tyiknøjkxtøø mā ja Anás jam tyøjk midi ja Caifás tyety myø'jtíp, midi jam wyinaty ja'abi jumøjt teetywindsøn'ajtp. ¹⁴ Nayi Caifás idø'øn wyinaty yide'en tø tnøjmi ja israelit jaa'y, jøts ku ne'egi jade'en tyimy'øy'att jøts tu'ugyi ja jaa'y tku'oogit ja kajp.

Ku ja Pedro tku'iñ jøts ku ja ka' t'ijxy'aty ja Jesús

¹⁵ Jøts ja Simón Pedro møøt jadu'uk ja myibabøjkpi tpanøjkxti ja nwindson'ajtim Jesús. Jøts yik'ijxy'ajtp ja' ja yjadu'ukpi, ijxy'ajtip ja teetywindsøn ja', ja'ats jap tyimyøøtøjkimyyā ja nwindson'ajtim Jesús jap windsøn tyøjk'agui'py; ¹⁶ jøts ja Pedro jap tyaañ mā yiknidøki ja tøj. Ja'ats ja yjadu'ukpi jap ñibidsøøm midi ijxy'ajtp ja teetywindsøn, jøts ja ojts tminagyajpxyi ja tø'øxyøjk midi jap tøj'adinaapy, jøts ja tyiktøjkii'ñ ja Pedro. ¹⁷ Winets ja tø'øxyøjk midi tøj'adinaapy, y'amidoojøø ja Pedro:

—¿Kidi metsip yø jaa'y mbabøjkpi'ajtpy?

Jøts ja Pedro t'adsøøy yide'en:

—Ka', ka'axi ja y'øtsi.

¹⁸ Jøts kumi xujxpts wyinaty, jøts ja tumbitøjk jøts ja tsaptøjktajk jap ja wyinaty tø tyikmøjidi ja jøøn, ja'ats ja jap wyindanaadyip jøts ja jap xyamdi. Jøts ja Pedro ixam idø'øn ja tmøøtxami.

Ku ja teetywindsøn tyiktøøbinaxwa'aky ja Jesús

¹⁹ Xjats ja teetywindsøn tyiktøøbinaxwaajky ja nwindson'ajtim Jesús pøn jaty idø'øn pyabøjkpitøjk'ajtpy, jøts ti dø'øn ja ñanky'ixpøjkip. ²⁰ Jøts ja nwindson'ajtim Jesús ja t'adsøøy:

—Tø ø ngajpxy mayjaa'y'agujky øy madsoo; ejtp ø nyik'ixpiky mā jaty tsaptøjk, jøts nayide'en mā ja møj tsaptøjkmi mā israelit jaa'y ñamyukyidi, jøts ka'ap øts øy ti

n'amaa'tsk'aty ku ø ti nnigajpxy. ²¹ ¿Tigøjxp ku øts ja xyiktiy? Ja' mets ja myiktø'øp pøn jaty ø tø xmadooji, jøts wan ja tnigajpxti pøni sã jaty øts idø'øn ja tø nnøjmidi. Ja' ja tnija'widip pøni sã jaty øts ja tø nnøjmidi.

²² Xjats ku ja nwindson'ajtim Jesús jade'en wyaañ, jøts nidu'ugin ja tsaptajk ja ojts wyingugoxiyi, jøts ja ñii'mxyiyi:

—¿Jade'en yø m'aaw xa'adsøy jøts jade'en xnøjmit yø teetywindsøn?

²³ Jøts ja nwindson'ajtim Jesús ja yide'en t'adsøøy:

—Pøni tødam ø ngajpxigøy, nigajpxts midi'ibi dø'øn mga'ømyadøøpy; jøts pøni øydam jade'en sã ø tø nwa'añ, ¿tits ku øts xkøxy?

²⁴ Winets ja Anás ja ojts kyexyi wiiñ ke'kxy, jøts ja jam ñøjkt ma ja Caifás, midi teetywindsøn'ajtp.

Ku Pedro jadigojk wya'añ ku ja ka'ap t'ejxi ja Jesús

²⁵ Ixajp idø'øn ja Pedro tyani, yjoo'kxpiky jap jøn'ajpy, ku ja yiknimaay:

—¿Kidi metsip yø jaa'y mbabøjkpi'ajtpy?

Jøts ja Pedro ja ka' tkupiky, yide'en ja wyangojmi:

—Ka', ka'axi ja y'øtsi.

²⁶ Winets ja yiktøøji tu'uk ja teetywindsøn tyumbi midi ja jaa'y myigu'uk'ajtpy, midi ja Pedro wyinaty tø txiktsajstutu'uty jøts ja tyatsk tyimyikwinajkiyøø, ja'ats waan:

—¿Kidi metsip jap tø n'ixy jøts ku mets ja jap y'ity xmøødi jap tsa'amgamjøtpy?

²⁷ Jøts ja Pedro ja jadigojk ka' tkupøjkojmi, winets nay jaty y'ayaajxy tu'uk tsapni'aaw.

Ku Jesús twinguwa'jkijii'ñ ja Pilato

²⁸ Jøts ja nwindson'ajtim Jesús ojts yikwaadsøøñ jam Caifás tyøjkjotp, jøts ja yikwaanijkxy ma ja møy windsøn kyutujktaajk jam. Xijñiwyani, jøts ja israelit jaa'y nika'ap tyøjkidøø jap kutujktaajkjøtpy, jøts ja ka'ap tyiktigøøwya'andi ja kyostumbri, pøky idø'øn ja' ku ja jade'en y'adø'østtit, ka'ap ja t'ukaañidit ja paski xøgaaky ja paski xø'uuky ku ja a'ux ja tyiknaxtit. ²⁹ Ja'agøjxp ja møy windsøn Pilato jam ojts pyidsimy jøts ja myigajpxwa'añidi, yide'en ja ojts ñii'mxyidi:

—¿Ti yø jaa'y mdani'øø'nidip?

³⁰ Jøts ja y'adsoodøø:

—Ku yø jeexyip kyapøkyjaa'yi ka' mets yø jeexyip ya tø myiktagødøki.

³¹ Winets ja Pilato ja ñimaajyidøø:

—Møødidi, jøts xiidyu'undit jade'en pøni sã ja mgutujk wya'andi.

Jøts ja israelit jaa'y y'adsoodøø:

—Øøts, ka'ap øøts xpaat'aty jøts øøts øy pøn nyik'ookt.

³² Jade'en ja ojts ka'pxy yjaty sã ja nwindson'ajtim Jesús ja wyinaty tø tnigajpxy jøts ku ja jade'en y'ookt. ³³ Xjats ja Pilato jap jadigojk tyøjkijii'ñ jap kyutujktaajkjøtpy, jøts ja ojts tyajxi ja nwindson'ajtim Jesús, jøts ja t'amidøøy:

—¿Mets idø'øn israelit jaa'y mjanchwindsøn'ajtip?

³⁴ Jøts nwindson'ajtim Jesús ja tnimaay:

—¿Kø'øm mets jade'en mwinmay jøts mets jade'en xyiktiy, uk pøn jade'en tø mdamimadya'agyi jøts ku ø nja'aji?

³⁵ Jøts ja Pilato ja y'adsoojøø:

—¿Ti israelit jaa'yimts øts? Kø'ømxi yø mmigugajp jøts yø teetywindsøndøjk ya myikmiñiyi jøts mets ya nyiktagødøki. ¿Ti dø'øn tø xuñ?

³⁶ Jøts nwindson'ajtim Jesús ja yide'en t'adsøøy:

—Windsøn'ajtp øts, ka' øts nja' yjade'eni sam pøn yja' ya naxwiiñ. Ku jeexyip jade'en, tø øts nbabøjkpitøjk jeexyip xnitseptunidi, jøts øts jeexyip ngayiktagødøki ja israelit jaa'y. Kayaa'ip øts ngutujk.

³⁷ Winets ja Pilato ja ojts ñii'mxyiyi:

—¿Jøts mjanchwindsøn mets idø'øn?

Jøts nwindsøn'ajtim Jesús ja t'adsøøy:

—Ja' øts sa ixa mwā'añ, windsøn øts. Tø ø ngaxi'iky ku øts ya naxwiiñ tø nmiñ jøts ø nnigajpxt ti tiy'ajtin'ajtp, ti janch'ajtin'ajtp. Pøn jaty ja xmimadoodip, xmadoidipts øts nja' ja' sa jaty ø nwa'añ.

³⁸ Jøts ja Pilato ja ojts ñii'mxyi:

—¿Jøts ti dø'øn tiy'ajtin'ajtp janch'ajtin'ajtp?

Ku Jesús ñidujkiyiiñ jøts ja y'ookt

Jøts ku ja Pilato jade'en t'ukyiktiy, jøts ja ojts pyidsimy jøts ja tmīnagyaajpxwā'añ ja israelit jaa'dyi, jøts ja tnimaay:

—Ka' øts yø jaa'y nbøky'ixy. ³⁹ Jade'ents mee xkostumbri'aty jøts øts nidu'ugin nyik'awā'atspidsø'ømt ja pøkyjaa'y, ku meets ja x'amidøy ku paski xøøw: ¿jøts mdsojktip jøts wan øts yø mwindsøn tnajtsmātsi jadi'iñi?

⁴⁰ Winets ja niduki'iyi møk wyandøø:

—¡Ka' yø' xyik'awā'atspidsø'ømt! ¡Yø Barrabás myik'awā'atspidsø'ømp!

Jøts møj maa'tspi dø'øn ja Barrabás.

19

¹ Xjats ja Pilato ojts tnankmyachi ja nwindsøn'ajtim Jesús, jøts ja ojts tnankwyøpyi. ² Jøts ja soldadi ja ojts ttagujandi tu'uk ja windsøn kujan, jøts tum kujp awiity, jøts tsuu'nk wet ja ojts ttaxoxti. ³ Jøts ja ojts wingon twingunøjkxidi, jøts ja ojts tnøjmidi:

—¡Møj mets, pøn ja israelit jaa'y wyindsøn ukmayip!

Jøts ja ojts twingoxti tjøpkoxti wyemp y'am.

⁴ Winets ja Pilato ojts jadigojk pyidsimy, jøts ja ojts ñii'mxyidi:

—Ejxti nijawidi, nyikpidsimpy øts yø ya jøts xnijawidit jøts ku øts yø niti ngadapøky'ixy.

⁵ Jøts ja nwindsøn'ajtim Jesús pyidsimy, iexam tkujan'aty ja kujp awiity jøts ja tsuu'nk wet ja twet'aty. Jøts ja Pilato ja ojts ñimaagyojmiyidi:

—¡ixya dø'øn ja jaa'y!

⁶ Xjats ku ja teetywindsøndøjk ja t'ejxtøø jøts ja tsaptajk, winets ja tjanchtayajxidøø møk'ampy:

—¡Yikruspat! ¡Yikruspat!

Jøts ja Pilato ja tnimaay:

—Wawdi jøts mee xyikruspat, kumi ka'ap øts yø ti pøky ndapøky'ixy.

⁷ Yide'en ja israelit jaa'y ja y'adsoojyøø:

—Jap øøts tu'uk ja kutujk nmøødi, jøts jade'en ja tyikutuky jøts wan t'øøky, ja'agøjxp ku yø tø ñabyikta'agyī Dios U'ngin.

⁸ Xjats ku ja Pilato ja ojts jade'en tmadøy, jøts ja jade'en yjaaktyimyik'adsø'jkii'ñ. ⁹ Jøts ja jap kyutujktaajkjøtpy tyøjkii'ñ jadigojk, jøts ja ttiibyijky ja nwindsøn'ajtim Jesús:

—¿Mets, mā mdsøøñ?

Jøts ja nwindsøn'ajtim Jesús niwine'enin ja tkidyimy'adsøøy.

¹⁰ Winets ja Pilato ja ojts ñii'mxyiyi:

—¿Jøts ø ka'ap x'adsøy? ¿Ti ka' xnijawi jøts ku øts kutujk njagyepy, jøts me nyikruspatt uk jøts me nyik'awā'atspidsø'ømt?

¹¹ Jøts nwindsøn'ajtim Jesús ja t'adsøøy:

—Ti kutujk mets jeexyip mdsaaçhagyejpy ku Dios Teety ja jeexyip jade'en tkayikjaty; paty ja' møj pøky tyimdyaja'adyi pøn øts ya tø xkøyaky jøts me tø nyiktagødøki, waani mets mja' mdaja'adyi.

¹² Winets ja Pilato nay jatyi tja'ixaay ja taay, jøts ja t'ixmatst jadi'iñi ja nwindsøn'ajtim Jesús; xjats ja israelit jaa'y ja møkta'aky ñimaajyiyi:

—¡Pøni myik'awa'atspidsimpy inet, ka' xmigu'ugi wyinaty ja møj windsøn César jam Roma! ¡Pøn jade'en namyøjpiktaajkip, myidsep'atpyts ja César!

¹³ Xjats ku ja Pilato jade'en tmadøø, winets ja ojts tnankyikpidsimyi ja nwindson'ajtim Jesús jøts ja y'ixaajky jam kyutujktaajkjøp'am midi yiktejp Gabata ku hebreit ayuujk, jade'en ja tijy mā tsaba'kxy. ¹⁴ Jaa dø'øn ja xøøw wyinaty kujky ku wyinaty tyimbyatni ja paski. Winets ja Pilato tnimaay ja yjaa'y midi jamdi:

—¡ixyaadi ja mwindsøn!

¹⁵ Yide'en ja møk wyandøø:

—¡Wan tpa'øøky! ¡Wan tpa'øøky! ¡Yikruspat!

Jøts ja Pilato ja tnimaay:

—¿Øts ndejin ja mwindsøn nyikruspatp?

Ja teetywindsøndøjk ja yide'en y'adsooyiøø:

—Ka'ap øts pøn jadu'uk nwindson'ajtpy, ja'ayi tu'ugyi ja møj windsøn César.

¹⁶ Ku ja Pilato jade'eñi yiknimaay, jøts ja ojts tkøyaky ja nwindson'ajtim Jesús jøts ja tyikruspatti, winets ja tyiktso'ondøø.

Ku ja Jesús kyiruspejty

¹⁷ Xjats ja nwindson'ajtim Jesús tyiktso'ondøø, jøts ja ttukapti ja kyirus, jøts ja jam ñijkxy mā ja et yiktijy Oo'kpi Kyubajk Pajk, midi yiktejp hebreit ayuujk Gólgota. ¹⁸ Jamts ja ojts tyikruspatti møøt namajtsk pøkyjaa'y, tu'uk jaty ja yikpiktaktøø adsow aduuk, jøts ja nwindson'ajtim Jesús agujk'ajpy. ¹⁹ Jøts ja Pilato jam ojts tnankpyikta'agyi ja letri kruskøjxp midi nømp: “Jesús, Nazaretit jaa'y, israelit jaa'y wyindsøn.” ²⁰ Jøts may jaa'y ojts t'ejxti ja letri, pø kajpwingonxi ja jam mā ja nwindson'ajtim Jesús ojts kyiruspejty, jøts ja letri jade'en ja kyøxja'ayi hebreit ayuujk, jøts griegit ayuujk, jøts latín. ²¹ Paty ja israelit teetywindsøndøjk tnimaydi ja Pilato:

—Kidi jade'en xja'ay “Israelit jaa'y wyindsøn”; ne'egi jade'en xpikta'akt “Kø'øm ñadyijyiyi jøts ku israelit jaa'y twindsøni.”

²² Yide'en ja Pilato ja ojts y'adsøyidi:

—¡Midi tø nja'ay, jade'en yø tyā'ant!

²³ Xjats ku ja soldaditøjk wyinaty tø tyikruspatti ja nwindson'ajtim Jesús, winets ja ojts twejtsjø'jkidi ja wyet, jøts ja ojts ñadyanipaadyidi jøts ja ñawya'kxit maktaxkpiky, kitu'uk ja soldadi ja tpoøktit. Jøts nayide'en tnixajidyøø ja nijan, jøts kumi ka'ats ja y'axuumyuky, ja'ayi ja amuum tyimdyukojkubetyi, ²⁴ xjats ja soldadi nixem niyam ñawya'jnidøø:

—Ka' yø ndakø'øtsa'ant; ne'egi yø nniguyajtint, jøts n'ejxint pøn jadyimy'uktaja'adip yø wet.

Jøts jade'en ojts ka'pxy yjaty sam jap jaabyety nøkyijxpy: “Tø øts nwet ja xwejtswa'kxidi, tø ja tniguyatti.” Jade'ents idø'øn ja soldaditøjk y'adøtstøø.

²⁵ Jøts mā ja nwindson'ajtim kyirus jam, ixam ja tyaak ja', jøts nayi ixamts ja'ami midi ja tyaak y'uchip, jøts ja Cleofas ñidø'øxy midi María'ajtp, jøts nay jam ja María Magdalenimi. ²⁶ Xjats ku ja nwindson'ajtim Jesús ojts t'ixy ja tyaak, jøts ku ja pyabøjkpi nay jam tyanaamyi midi ja jantyimynamyaajyip, winets ja tnimaay ja tyaak:

—Taaak, ixa ja m'u'nk.

²⁷ Jøts ja pyabøjkpi ja tnimaamyi:

—Ixa ja mdaak.

Jøts nay jatyi ja'abi pabøjkpi ttaakpijky midi ja nwindson'ajtim Jesús tyaagip, jøts ja jade'en yikjagyepy sam kyø'ømdaagin.

Ku ja Jesús y'ø'jky

²⁸ Xjats ku ja jade'en wyinaty tɔ y'ukjaty, jɔts kumi ñija'wɪpts ja nwindson'ajtim Jesús ja wa'ats jɔts ku wyinaty jade'en tuki'iyi tɔ kya'pxy, jɔts idɔ'on ja jade'en tyimyjatt sam jap jaabyety nõkyijxpy, winets ja wyaañ:

—Jantyimdyøjtsip ɔts.

²⁹ Jamts wyinaty tukmøjnajts'øøy ja vino midi jeky tɔ pyu'uch; ja'ats ojts yiktabadsiich ja tanimuu'kpi, jɔts ja yikpiktaajky jam hisopo kipy awaj jɔp'am, jɔts ja yikta'ayøjkxyi ja nwindson'ajtim Jesús. ³⁰ Xjats ja twixi'jch ja tanimuu'kpi jɔts ja vino ka'øbyi jade'en t'uuky, winets ja wyaañ:

—Tɔ tuki'iyi yikpaduñ ka'pxy.

Jɔts ja kyubajk ja jadi'iñi kyuwojtsnajxy, jɔts ja jade'en y'ø'jky.

Ku ja Jesús yikuummy kyachpuki'jy

³¹ Jɔts tyimbyaatwanɪpts ku ja paski xøøw kyujajy, jɔts ja' ja israelit jaa'y kyatsojktip jɔts ja oo'kpi jam y'awejxtit kruskøjxp ku poo'kxin xøøw, jɔts yats idɔ'on ja'abi xøøw jaaktyimyojxøøwni. Ja'agøjxpts ja tñimaydi ja Pilato, jɔts wan ja tñankpyakwojptøjkixyi pøn jaty jam wyinaty tɔ kyiruspatti, jɔts wan ja tñankyikwinajkixyi jam ja oo'kpi ñine'kx.

³² Winets ja soldadi ñøjkxtøø, jɔts ja ojts tjanchpakwojptøjkøxti midi ja nwindson'ajtim Jesús jam wyinaty møøt tɔ kyiruspety. Ojts ja yjawyeembi tyimykpakwojptøjkøjy, jɔts ja yjadu'ukpi nayide'en midi jam jaduktamajñ. ³³ Xjats ku ja twingunøjkxidøø ja nwindson'ajtim Jesús, jɔts ja t'ejxpattøø jɔts kudam ja tɔ y'oo'kni, patyts ja ka' nayide'en t'uktunidøø.

³⁴ ¿Ja ti winets ja ñajxy? Ojts ja soldadi ja nidu'ugin tyakumyi ja takuu'm jɔts ja tyimy'awajch ja kyachpuki'jy, jɔts nay jatyi ja ni'jpy pyidsiimy møøt nøø. ³⁵ Ja'ats midi ixyam njaadyampy, tɔ ɔts idɔ'on jade'en n'ixy nnijawi midi'ibi tiy janch, jɔts mee nayide'en xiyjawit xjanchjawit. ³⁶ Jade'enxi dɔ'on ja yjajty jɔts jade'en ka'pxy tyimyjaty sam jap jaabyety nõkyijxpy: “Ni tu'ugin pyajk ja kyatøjt kyamoott.” ³⁷ Jɔts jap abiky wyami: “Y'ejxtip ja kø'øm ku tyiktsaachidit.”

Ku ja Jesús ñine'kx yikpiktaajky jap møj tsaajutjøtpy

³⁸ Xjats ku dɔ'on ja jade'en wyinaty tɔ yjaty, jɔts ja José midi kugajp'ajtp jam Arimatea, pyabijky ja' nwindson'ajtim Jesús øy idɔ'on ja ka'ap øy pøn tjadyimdyukni'jawi, ja'agøjxp ku ja ttsøøgi ja myi'israelit jaa'y. Ja'ats idɔ'on t'amidoow ja Pilato ja may'ajt, jɔts ja myo'ojyit ja nwindson'ajtim Jesús ñine'kx. Xjats ja Pilato yikjajt ja jade'en, winets ja José ojts ñijkxy jɔts ja ojts tyiktso'oniyi. ³⁹ Jɔts ja Nicodemomi midi wyinaty jekyip tɔ tmøøtmadya'aky ja nwindson'ajtim Jesús koots, ja'ats jam tmija'jt ee'px majk kilin jaabya'ak midi pa'akxuu'kp, majtsk jøøjp ja', ja mirra tɔ t'abøjkmuky møøt ja áloes.

⁴⁰ Jɔts idɔ'on ja José jade'en møøt ja Nicodemo tñixajiyidøø ja nwindson'ajtim Jesús ñine'kx, jɔts ja tta'abejtøø ja wet midi ja wyinaty tɔ tpiktaajkidi ja'abi pa'akxuu'kpi midi jade'en abøjkmuky. Jade'en ja ttundøø sam idɔ'on ja israelit jaa'y kyostumbridi ku ja y'oo'kpi ja tyiknaxøkidi. ⁴¹ Jɔts mā ja nwindson'ajtim Jesús wyinaty tɔ kyiruspety, jam wingon tu'uk ja kam mā y'ity øy ti tsaa'm. Jamts tu'uk oo'kpi jut ja'abi kamjotp midi tyimyjemy'øypnim, ka'anım jap pøn tyimykpikta'aky. ⁴² Japts ja tpiktaktøø ja nwindson'ajtim Jesús ñine'kx, pø wingonxi ja jam tyañ ja oo'kpi jut, jɔts tyimdyøts jɔts ja israelit jaa'y pyoo'kxin xøøw tyimcho'ondaknit.

20

Ku ja Jesús yjujkpyijky jadigojk jap møj tsaa jutjøtpy

¹ Xjats ku midukxøøw cho'onda'akñim ja yjadu'ukpi samaan, winets ja María Magdalena ojts jøpyi ñijkxy jam mā ja oo'kpi jut jam wyinaty, ka'anım yikxon yjajta'aky; jɔts ja ojts t'ixy jɔts ku ja oo'kpi jut jam tka'uk'agø'ajtni ja tsaa midi ja wyinaty tɔ yikta'agi'iy.

² Winets ja ojts putyi ñijkxy ma ja Simón Pedro jam wyinaty mōōt ōts midi yō nōky tjaapy, midi ja nwindson'ajtim Jesús jantyimynamyaajyip, jōts ōōts xnimaay:

—Tōts ja nwindson'ajtim jap yikjidōjtpidsōmni jap jutjōtpy, jōts ka'ap ōō nnijawi pō ma net tō yikpikta'aky.

³ Xjats ōts mōōt ja Pedro nnijkxy ma ja oo'kpi jut jam. ⁴ Jōts ōōts namajtsk janch putyi nnijkxy; jōts ōts jawaani mōk njantyimbyujt jōts ja Pedro nņikejky, jawyeen ōts jam nja'jty ma ja oo'kpi jut. ⁵ Jōts ōts jap ngu'ejxyi'ñ, ja wetyi jap n'ejxpaaajt midi ja nwindson'ajtim wyinaty tō yikta'abity jōts ku ja jap wyōjni, jōts nika'ap ndōjkxyi'ñ.

⁶ Jōtsnim ja Simón Pedro ix'oojknim yja'jty, jōts ja tyōjkxyi'ñ jap oo'kpi jutjōtpy. Jōts ja nayide'en jap ojts t'ixy jōts ku ja abet jap wyōjni; ⁷ jōts ja tjaaktyimy'ejxpaaajty ja wet midi ja nwindson'ajtim Jesús wyinaty tō yiktagupity, jōts nigidi ja jam mōōt ja wet midi ja amuum yikta'abejt, axaach ja jam abiky tō yikpikta'aky. ⁸ Winets ōts ndōjkxyimya ma dō'on ja oo'kpi jut jam, jōts n'ijxy jōts kudam ja wyinaty jade'en tō yjaty, xjats ja njanchja'wiyi'ñ.

⁹ Jōts ka'anims idō'on ōōts wyinaty nja'gyuki midi jap nōkyijxy jaabyety wya'añ, jōts ku ja nwindson'ajtim Jesús yjujkpyōkt jadigojk jap oo'kpi y'agujkp. ¹⁰ Jōts ōōts jade'en namajtsk nwimbejtnaa jōts nnōjkxnaa jam ndōjkwindump.

Ku ja Jesús ñanky'ejxōō jadigojk ma ja María Magdalena jam wyinaty

¹¹ Jōts ja María jamyi jut'agō'ōm tyaañ, ñiyaxni ja jam kyu'ejxyi'ñ ma ja jut, ¹² winets ja ojts t'ixy namajtsk ja ankilis, tum amuum poop ja xyōxyidi, jōts ja jam chōōnidi ma ja nwindson'ajtim Jesús wyinaty tō y'ukyikpikta'aky ja ñine'kx; tu'uk jam chōōni agubajkp, jōts jadu'uk teky'ok'am. ¹³ Jōts ja ankilis ja ñimaajyōō, ja tō'ōxyōjk yiknimaapy:

—¿Ti mjajtīp, tiku mya'axy?

Jōts ja tnimaay:

—Ja'agōjxp ō nya'axy ku ōts ja nwindson'ajtim ya tō yikwejtspidsōmni, jōts ōts ja ka' nnijawi pō ma ja tō yikpikta'aky.

¹⁴ Ja'ayi ja jade'en wyaañ, jōts ku ja y'ejxjimbijty winets ja t'ejxpaaajty jōts kudam ja nwindson'ajtim Jesús jam tyani; jōts ka'ap ja tyimwya'añ jōts ku ja yja'aji. ¹⁵ Winets ja ojts kō'ōm ñi'mxyi, jōts ja tō'ōxyōjk yiktiibyiky:

—¿Tiku mya'axy? ¿Pōn m'ixaapy?

Jōts ja tō'ōxyōjk jade'en ja wyinmay, ja tsā'am kam ejx'ejtpik idō'on ja tijy, jōts ja tnimaay:

—Teety, pōni mets ja tō xyikpidsimy, tukmadookts ōts ma tō xpikta'aky jōts ōts ja n'atsyiktsoont.

¹⁶ Winets ja ñimaajyōō ja nwindson'ajtim Jesús:

—¡María!

Xjats ja y'ejxjimbijty jōts ja tnimaay hebreit ayuujk:

—¡Raboni! —midi tyijpy yik'ixpōjkpi.

¹⁷ Jōts ja nwindson'ajtim Jesús ja ñimaajyōō:

—Kidi ō xōñ, majtstutk ōts, pō ka'animsi ō nnijkxy jam ma ja nDeety jam. Nōjkxts x'atstukmadōy pōn jaty ōts nja' xpabōjkidip, jōts ku ōts jap nnijkxy ma ōts ja nDeety jap, midi mee mDios Teety'ajtpy.

¹⁸ Winets ja María Magdalena ojts ñijkxy, jōts ja ojts t'atstukmadoji ja nwindson'ajtim Jesús pyabōjkpitōjk jōts ku ja wyinaty tō t'ixy ja nwindson'ajtim, jōts ku ja wyinaty jade'en tō ñi'mxyiyi.

Ku ja Jesús ñanky'ejxōō jadigojk ma ja pyabōjkpitōjk jam wyinaty

¹⁹ Jōts nay ja'abi xōōw ku midukxōōw cho'onda'akñim ja yjadu'ukpi samaan, nay ja'abi ux ku ja pabōjkpitōjk jam wyinaty tō ñamyukyidi jōts ja wyinaty tō ñañi'agiibyetyidi, ja israelit jaa'y ja chō'jkidip. Winets ja nwindson'ajtim Jesús tyōjkxyi'ñ jōts ja jam y'agujk'am wya'k'ōyiyi'ñ, jōts ja ojts yide'en kyajpxpōō'kxyidi:

—Øy'atti jotkujk'atti.

²⁰ Xjats ku ja jade'en y'ukwaañ, jøts ja ojts tyuk'ijxyidi ja kyø' jøts nayide'en ja kyachpuki'jyit tsaachi. Jøts ja pabøjkpitøjk yjantyimxyondaktøø ku ja t'ejxtøø ja nwindson'ajtim. ²¹ Jøts ja nwindson'ajtim Jesús ja jadigojk ñimaajyidøø:

—Øy'atti jotkujk'atti. Nayide'en sam øts ja Dios Teety tø xkexyin, jøts nayide'en meets yam nguexy.

²² Xjats ja tnibixuyiyi'ñ ja pyabøjkpitøjk jøts ja tnimaay:

—Wan ja Dios y'Espíritu Santo mdatøkiyidi. ²³ Jøts pøni mgajpxwa'kxtip jøts ku ja yikpojkmimee'kxy pøn nabyøkyja'wiyidip, jøts øts nja' ja xpabøjkijyidit; uk pøni ka'ats, mdukumado'opts meets ja nayide'en jøts ku ja pyøky ja ka'ap mibaat yikmee'kxy, pøni ka'ap ja ñabyøkyjawiyidi niwine'en.

Ku Tomás ojts t'ixy ja Jesús ku tø yjukpyiky

²⁴ Jøts tu'uk ja nwindson'ajtim pyabøjkpi midi Tomás'ajtp, midi yiktejp xeeñu'nk, ja wyinaty ka'ejtp mā ja jamdi ku ja nwindson'ajtim Jesús wyinaty tø ñanky'ijxyi. ²⁵ Xjats ja oojknim ttukmadowdi ja nwindson'ajtim Jesús pyabøjkpitøjk, jøts ja tnimaadyi:

—Tø øøts ja nwindson'ajtim n'ixy.

Ja Tomás yide'en ja ojts ñii'mxyidi:

—Ka' øts ja njanchjawit pøni ka' øts kyø' ja n'ejxi jøts ku ja klabis ja tø yiktsaachiyi; ku øts ngøtsa'jx jap kø'øm ka' ndyimgyudejit mā ja klabis ja tø yiktsaachiyi, pøni ka' øts jap nguxaji mā ja kyachpuki'jy tø chaachi, ka'ats øts ja njanchjawit.

²⁶ Xjats ku kyiduktujkxøøw'ajty, winets ja pabøjkpitøjk ñamyujkidøø jadigojk jam tøjkjotp, jøts ja Tomás ixjam ja wyinaty tmøødidi. Winets jadyimja'aduky ja tøjk wyinaty yikxon ku ja nwindson'ajtim Jesús tyøjkijy'ñ, jøts ja jam agujk'am tyanay'øyiyi'ñ. Jamts ja ojts kyajpxpøø'kxyidi, yide'en ja ñii'mxyidi:

—Øy'atti jotkujk'atti.

²⁷ Jøts ja Tomás nay jaty yiknimaay:

—Kudeji yø mgøtsa'jx yap, jøts øts yø ngø' x'ejxit; jøts yak yø mgø' jøts yap mguxajit øts ngachpuki'jy. Jøts kidi nugo xkuwinmayi, janchjawi dø'øn.

²⁸ Xjats ja Tomás y'adsøø yøts ja wyaañ:

—¡Mets nwindson'ajtpy ndios'ajtpy!

²⁹ Jøts nwindson'ajtim Jesús ñimaajyøø:

—Tomás, ja'agøjxp yam xjanchjawnim ku ø tø xtyimwyempl'ijxñim. Jotkujk'atyim ja'adi pøn tmibøjktip pøn tjanchja'widip jadi'iñi, øy øts ja xjaga'ejxti.

Ya'at nigajpxp ja t'iy'ajtin midi yø nøky myøøt'ajtpy

³⁰ Jøts may ja nwindson'ajtim Jesús ojts tpikta'aky ja ejxpajt, ku ja ojts ttuñ ja milagri jam pyabøjkpitøjk wyingujkp midi ka' kyøxja'ayi ya'at nøkyjotpy. ³¹ Ja'agøjxp ya'at jap jade'en tø yikujayi, jøts xiyjawidit xjanchjawidit jøts ku ja' yiknitsø'øky, jøts ku ja' Cristo ja nwindson'ajtim Jesús, ja Dios U'nk. Jøts ku ja xjanchjawidit, mbaatpts meets ja jujky'ajtin xemikøjxp sam pyaat'atyidi pøn tjanchja'wiyidip.

21

Ku Jesús ñanky'ejxyi niwixujk pyabøjkpi windump

¹ Xjats ku dø'øn ja wyinaty jade'en tø y'ukjaty, winets ja nwindson'ajtim Jesús ñanky'ejxi jadigojk jam mā ja pyabøjkpitøjk, jam mejy'am midi yiktejp Tiberias. Yide'en idø'øn ja y'ejxi tyiyi: ² Ja Simón Pedro jam wyinaty møøt ja Tomás midi yiktejp xeeñu'nk, jøts ja Natanael midi jam kugajp'ajtp Caná midi Galileit etjotp, jøts ja Zebedeo y'una'jk, jøts møøt abiky janamajtsk nay ja nwindson'ajtim Jesús pyabøjkpi. ³ Ja'ats ja Simón Pedro ñimaay:

—Nijkxy øts t'ats'ajkxma'aky.

Jøts ja wyandøø:

—Pø tsoomp øø nayide'en.

Xjats idø'øn ja ñjokxtøø, jøts ja ojts ttatøkidi tu'uk ja barki, ni tu'ugin ja ajkx ja tkamaktøø ja'abi koots. ⁴ Jøts ku wyinaty xyiiñiwyani, winets ja nwindson'ajtim Jesús jam mejy'am wyä'kaxi'jky, ja pyabøjkpitøjk ka'ap ja twinmaydi jøts ku ja yja'aji. ⁵ Jøts ja ñimaajyidøø:

—Mixy, ¿tø dø'øn ja ajkx iiy xmatsti uk tyimgya'aním?

Jøts ja yide'en t'adsoodøø:

—Ni tu'uk.

⁶ Xjats ja nwindson'ajtim Jesús ja ojts ñii'mxyidi:

—Niwøjpatti yø mda'ajkxmajk ıxa barki puki'jy aga'ñ'ampy, jøts ja ajkx inet jap xpaattit.

Jøts ja ojts jade'en ttundi, jaanimts idø'øn ja tıy ka'ap ja tya'ajkxmajk y'ukmaa'yniyidi jøts ja jap nøøjotpy tjuuttit, ja'agøjxp ku ja ajkx jap janch'ujts'abøki. ⁷ Winets øts midi ja nwindson'ajtim Jesús yjanchminamyaa'jyip tñimaay ja Pedro:

—ıja nwindson'ajtimts yø'!

Ja'ayi ja Simón Pedro ja jade'en tñimyadøøy jøts ku ja yja'aji ja nwindson'ajtim, winets ja ñikijxyit nıjan ja ttatøjkıyii'ñ (pø tøxi ja wyinaty tjeñ) jøts ja ñidøjkıyii'ñ. ⁸ Jøts øøts jam mejy'am ja barki nyikja'jty, jøts ja nda'ajkxmajk ja nbajıdity janch ujts abøki ja ajkx, pø jadukmagø'pxy xajkxi dø'øn ja jam wyinaty yjaaka'ity jøts øøts nbaatnit ja naajx. ⁹ Xjats ku øøts jam nwinajky, jøts øøts nbaajty ja jøndsabajk yikxon tø kya'kxy, jøts ja ajkx tu'uk tø yikjıngoni, jøts tsapkaaky abiky. ¹⁰ Winets øøts xnimaay ja nwindson'ajtim Jesús:

—Yikmendi tu'uk majtsk ajkx midi ıxjanım tø xjuutti.

¹¹ Jøts ja Simón Pedro pyejty jam barkıjotp jøts ja tjidøjtpıdsıımy ja ta'ajkxmajk, janch ujts abøki tum ja møjaty ajkx, tukmagø'pxy ja wıxıjkkmyaktıgøøk; jøts nıka'ap ja xuummy yjapøøjty øy idø'øn ja tyımyjadıne'eni. ¹² Jøts ja nwindson'ajtim Jesús wyaañ:

—Men m'ajop'attı.

Jøts ja pabøjkpitøjk ni tu'ugin ja sa kyawa'andi pøni pøn idø'øn ja', pø tøxi ja wyinaty tñıjawıdi jøts ku ja yja'aji ja nwindson'ajtim. ¹³ Winets ja nwindson'ajtim Jesús ja wıngon ñımejnıdøø, jøts ja tñıxajıyii'ñ ja tsapkaaky, jøts ja ojts myø'øyidi møøt ja ajkx.

¹⁴ Ya'at idø'øn møøt myıdıgøøk ojk yjaty ku ja nwindson'ajtim Jesús ñanky'ıjxyı ma ja pyabøjkpitøjk jam, ku ja wyinaty tø yjujkkpyıky jadıgojk.

Ku Jesús møøt ñagyajpxyı ja Simón Pedro

¹⁵ Xjats ku ja y'ajop'ajtabajtıdøø, winets ja nwindson'ajtim Jesús tñimaay ja Simón Pedro midi ja Jonás myajnkıp:

—Simón, ¿xtsojkk øts jawaani sam øts ya'at xtsoktıñ?

Jøts ja Pedro ja t'adsøøy:

—Ndsøjkpy me nwindson'ajtim, wa'ats mets ja xnıjawı jøts ku me ndsøky.

Winets ja nwindson'ajtim Jesús ja ñimaajyøø:

—Winets ø xnøø'møøjyıt xuu'møøjyıt ja nbabøjkpitøjk.

¹⁶ Jøts ja mımajtsk ojk kujk yıktıbyıky ja Jonás myajnk, yide'en ja yıknımaay:

—Simón, ¿xtsojkk øts?

Jøts ja Pedro ja t'adsøøy:

—Ndsøjkpy nwindson'ajtim, wa'ats mets ja xnıjawı.

Jøts ja ojts ñii'mxyı ja nwindson'ajtim Jesús:

—Winets ø xnøø'møøjyıt xuu'møøjyıt ja nja'.

¹⁷ Jøts ja mıdıgøøk ojk yıknımaay ja Jonás myajnk:

—Simón, ¿xtsojkk øts?

Winetnımts ja Pedro yjotmay'oo'kpijky, ku ja mıdıgøøk ojk yide'en yıktøøji ja nwindson'ajtim pøni chøjkpy ja', jøts ja tñimaay:

—Windsøn'ajtim, mets tuki'iyi mnija'wip. Mnija'wipxi wa'ats jøts ku ndsøky.

Jøts ja nwindson'ajtim Jesús wyaañ, jøts ja ñimaajyøø:

—Mets ndanipijkpy amuum, jøts xnøø'møøjyit xuu'møøjyit ja nbabøjkpitøjk. ¹⁸ Janch idø'øn nnøjmi, jøts ku y'ijty mjaak'una'jk'atynim, yikxon y'ijty mjaaknaxyøxyi jøts mnijkxy pøni ma kø'øm xtsøky; kuts ja møjaa'y'ajtin xpatnit, jøts mxajtøønit, wyenkpits mets ja mwet mmo'ojyip jøts ja myiknøjkxit ma me ka'ap mjanøjkxwā'añ.

¹⁹ Ku ja nwindson'ajtim Jesús jade'en wyaañ, ja' idø'øn ja yjatijpy sa ja Pedro ja o'jkin tpaatt ku yikøyakt, jøts ja Dios jade'en yikmøjawit yikunuu'kxyjāwit. Jøts ja ojts ñii'mxyi:

—iPaduujnik øts yø nja', kidi øts xmajstutu!

Ja Jesús pyabøjkpi midi janchminamyaajyip

²⁰ Xjats ku ja Pedro y'ejxjimbijty, jøts ja ojts t'ixy jøts ku øts nbamiñ midi ja nwindson'ajtim Jesús janchminamyaajyip. Øts ja nwindson'ajtim Jesús jam wyinaty nbutsinaapy ku øøts wyinaty xøjøøjty n'a'ux'aty, jøts øts wyinaty nwindson'ajtim n'amidøøy: “Windsøn'ajtim, ¿pøn idø'øn mga'ødyunwajnip?” ²¹ Jøts ku dø'øn ja Pedro ja ojts y'ijxyi, winets ja Pedro tnimaay ja nwindson'ajtim Jesús:

—Windsøn'ajtim, jøts yø', ¿sats yø yjatt?

²² Jøts ja nwindson'ajtim Jesús ja ojts yide'en y'adsøyi:

—¿Ti mets yø xunk'aty, njadyimyjayikjujky'aty øts yø' nay jaa ku ø nme'ent jadigojk? Tujnik øts yø nja' tu'ugyi.

²³ Xjats ja ayuujk yø'øgyøjy, jøts ja jade'en tnimadow'atti pøn jaty ja nwindson'ajtim Jesús yja' pabøjkpi, jøts ku ja'abi pabøjkpi ka' y'ookt. Kajade'enipts ja nwindson'ajtim Jesús wyinaty tø tnøjmi ja Pedro jøts ku ja'abi pabøjkpi ka' y'ookt, pø yide'enxi ja wyaañ jøts ku ka' ttunk'attit pøni sa ja yjatt.

²⁴ Øts idø'øn Juan, midi'its idø'øn ya'at ayuujk njaadyampy, pø tiy janchxi dø'øn yø'. N'ejx nnija'wiyii'ñ øøts ku jade'en yjajty.

²⁵ Jaanim yø may ti jaty ja nwindson'ajtim Jesús tyuun, ku ja jeexyip jade'en tø tyimyikja'ay piy køñ, mayts nøky jeexyip chøkyi jøts yikjaagyøxt sam yjajty kyubejty. Jade'en idø'øn ja yjajty.

SA CHINAADYI JA JESÚS KYUDANAABYI

Ku ja Dios Teety ttamiwandaagi ja naxwii'ñit jaa'y ja Espiritu Santo

¹ Migu'uk Teófilo, ja nõky midi øts ojts nja'ay mijawyeen, ja' øts jap nguja'ayigyøjx ti jaty Jesús tyuun ku ja tpadøjkiy'i'ñ ja tyunk, sa jaty ja tyik'ixpijky ² kunim ja chajpajtni. Ku ja wyinaty ka'aním ñijkxy jap tsajpjøtpy, winets ja jawyeen twiwejtskijxy twigongijxy ja jaa'y pøn idø'on ja wyinaty nadyagugaxwajniyip, ojts ja tkajpxwijy sa jaty idø'on ja y'adø'øtstit ku ja tyu'undit, Espiritu Santo ja ja'gyujkin ja møøjyidi. ³ Xjats ku ja Jesús wyinaty tø yja'oo'kni, ojts ja tpaaty ja kyudanaabyi jadigojk jade'eñim sayim idø'on ja yjaa'y'atyin, wixijkxyøøw ja jam ñanky'eixiyøø, jøts ja jade'en wa'ats ttuk'ixy ja tiy'ajtin ja kyudanaabyi ku ja ejtp yujky'aty; jade'en idø'on ja jam ttukmadoogijxy ja kyudanaabyi sa jaty ja y'eixi tyiyi, ja Dios kyutujk midi ja tyanitanaapy ja yjaa'y.

⁴ Ku dø'on ja jade'en tjaakmøøtsinaay ja kyudanaabyi jøts ja t'ane'ljmy jøts ja ka'ap ñøjkxtit ma ja kajp txøøwi Jerusalén. Yide'en ja tnimaay:

—M'awejxtip idø'on ja' midi øts nDeety tø mdamiwanda'agyidi, midi kawinaak ojk meets tø ndamimadya'aky. ⁵ Janch idø'on ja' ku ja Juan ttuktanøbejty ja nøø, jøts tsojk meets nøjkx nduktatøkidi ja Espiritu Santo.

Ku ja Jesús chajpejty

⁶ Xjats ku ja pyabøjkpitøjk jam wyinaty tø tminabyaadyidi ja wyindsøn, winets ja tyiktøødøø jøts ja tnimaadyøø:

—Windsøn, ¿yamnim inet ja Israelit kajp xmo'ot jøts ja kø'øm jadigojk ñay'ana'amiyidit, jøts ja kø'øm ñankyutujkxiyidit pøni ti ja kø'øm tyunwandip?

⁷ Xjats ja Jesús y'adsøø jøts ja wyaañ:

—Ka' meets ja mbaat'aty jøts meets ja xnijawit pøni juuni ja Dios Teety jade'en y'adø'øtst, pøni ti xøøw pøni ti po' ja jade'en ttunwa'ant. Ja' ja tu'ugyi tnija'wip, jøts ja tu'ugyi tmøøt'ajtp ja møk'ajtin jøts ja jade'en ttu'unt. ⁸ Ku meets ja Espiritu Santo wyinaty tø mnimiñi, winets meets ja nøjkx jaty mmø'øyi ja møk'ajtin jøts øts xniga'ama'adyit jawyeen jam Jerusalén, nayide'enmi tuki'iyi wine'enin jam chøønidi Judeit etjotp, sam nayide'en jam Samariit etjotp, winetnimts øts xniga'ama'adyit ømyadsowi mabaat naxwii'ñit y'øjx y'oojk.

⁹ Tø ja Jesús wyinaty jade'en wya'añ, wa'ats idø'on ja pyabøjkpitøjk ja wyinaty ixjam y'ijxyi ku ja chajpejty; jøts ja jadi'iñi yoots yik'adigø'øñiyøø, jøts ja pyabøjkpitøjk ja jade'en nima kya'uk'eixpajtniyøø. ¹⁰ Ixjam idø'on ja wyinaty øy pyat'ejxti ku ja Jesús jade'en chajpejty, winets yaa'dyøjk namajtsk adsu'jky kyaxø'ktøø ma ja jam wyinaty, ankilis ja'adi, jøts tumboop wet ja wyet'ajttip, ¹¹ xjats ja yide'en ñimaajyidøø:

—Meets Galileit jaa'dyi, ¿tiku yø tsajp jade'en xpat'ejxti? Tøxi x'ejxti ku ja Jesús tø pyatøki jap tsajpjøtpy, ¿kidi? Nayide'en ja nøjkx jadigojk myiñ sa ja tø pyatøki tsajpjøtpy.

Ku ja Matías yikpiktaajky jøts ja tkudanit ja Judas oo'kpi

¹² Xjats ja jam kojpkøjxp choo'ndøø midi txøøw'ajtp Olivos, jøts ja ojts ñøjkxti Jerusalén, jade'enin ja ojts tniyø'øyidi waani sa ja yø'ødyi ku ja poo'kxin xøøw tpaaty. ¹³ Xjats ku dø'on ja jam yja'ttøø kajpjotp, winets ja kyøxpajttøø jap nipatøkijxy ma ja Pedro jam wyinaty tø yja'ta'akti møøt ja Jacobo, møøt ja Juan, møøt ja Andrés, møøt ja Felipe, møøt ja Tomás, møøt ja Bartolomé, møøt ja Mateo, jøts møøt ja yjadu'ukpi Jacobo pøn ja Alfeo y'u'nk'ajtpy, jøts møøt ja Simón zelote, jøts nayide'en møøt ja Jacobo y'uch Judas. ¹⁴ Niduki'iyi dø'on ja jam jade'en xyiminamyukyidi jøts ja Dios'ajot'ajtmukti jøts ja wyinmaa'ñ ja tu'ugyi tyik'etti møøt ja Jesús myigu'ukti, møøt ja María midi ja

tyaak'ajtpy, jøts møøt nayide'en winaagin ja tø'oxyøjkti, jade'en idø'on ja jam wyinaty xyimidios'ajot'ajtmukti.

¹⁵ Xjats idø'on ja Pedro winet'et tyanaagyukiyiñ jam jaa'y agujkp pøn tjanchja'widip ja Jesús, jam idø'on ja jaa'y wyinatyi nimagø'pxy ja ee'pxindi, jøts ja Pedro jade'en kyajpxwa'kxy:

¹⁶ —Meets migu'uktøjkti, tø dø'on ja jade'en yjanchjaty sa ja Dios kyajpxy wya'añ, ku ja Espíritu Santo jap jade'en kø'øm wyaañ, midi ja David kyajpxnajx ku ja ojts tñimadya'aky ja Judas, ja' pøn tuu'waaw ja jaa'y jøts yikmatst ja Jesús. ¹⁷ Øøts idø'on nmigu'uk ja' ja Judas pøn idø'on jade'en adøøjts, nayi ya'atpi tunk ja y'ijty tyumpy midi øø ndumpy. ¹⁸ Xjats ja ñøjkxnaa jøts ja ojts tjuy naajx, ja meñ ja tyagujuuy midi ja ojts yiktamijuy ku ja Jesús ja jade'en tkøyajky; jøts ja nay jam kyidaay, winets ja kø'øm ñañajtskuwojpiyøø, jøts yjoojt ja ky'i'jch jøts ja tyiinch pyidsømgijxy. ¹⁹ Xjats ja jaa'y ja jade'en tñija'widøø pøn jam wyinaty tsinaadyip Jerusalén, winets ja tyikxøbajttøø ja naajx Acéldama, midi tyijpy Ni'jpkym, jade'en ja ttejtti ku kyø'øm ayuujk ja tkajpxti. ²⁰ Jøts ja David yide'en jap ja nøky tyikwa'añ ma ja Salmos jap yikujā'ay:

Wan ja tyøjk abak ttañ,

wan jap pøn tkidyimchøøni.

Wan tmajtstu'uty tyunk jøts jadu'uk ja jaa'y tyøkit tumbi.

²¹ 'Paty øøts ya'at jaa'y nidu'ugin nyiktunwa'añ pøn øøts jeky tø xpawidity, wine'en øøts ja nwindson'ajtim ya tø x'atmsøøtsøøni, ²² jaayip øøts yø jade'en xmøøtwidity ku nwindson'ajtim ja Juan ojts yiknøbetyi, kunim ja tø pyatøki jap tsajpjøtpy. Paty øøts ya'at jaa'y nidu'ugin ndsøky, jøts øøts yø møøt ngajpwa'kxt ku ja nwindson'ajtim tø pyidsimy jadigojk jap oo'kpi jutjøtpy.

²³ Ku ja Pedro jade'en wyaañ, xjats ja twi'ejxtøø namajtsk ja jaa'y pøn ja nidu'ugin pyikta'akwandip: ja José ojts yikwiwich pøn tigøøk ja xyøøw, Barsabás ja yiktijy jøts nayi yiktejp Justo, ja Matías ja ojts møøt yikwiwich. ²⁴ Xjats ja jaa'y yide'en t'ajot'attøø ja Dios U'nk:

—Nwindson'ajtim Jesucristo, mets mnija'wip sa jaty pøn jadu'uk jadu'uk wyinmay, yø jaa'y ixa øøts tø nwiwich namajtsk, tuknija'wik øøts pøni pøn me mdsøjkpy, ²⁵ wan ja tunk ttuñ midi ja Judas tø tmajtstu'uty, ja'agøjxp ku tø pyøkyuñ jøts ja tø ñijkxy jap ma ja pyaāt'aty.

²⁶ Winets ojts nidu'uk yikpikta'aky ja ñamajtskpi jaa'y, ja Matías ojts tyaja'adyiyi ja tunk, winets ja ojts yiktabuwetsi ja ñimaktu'ukpi jaa'dyi pøn ja nwindson'ajtim Jesucristo tkudanaadyip.

2

Ku ja Espíritu Santo myiñ

¹ Ku ja Pentecostés xøøw tpaajty, tyimwyinet'et idø'on ja Jesús kyudanaabyi wyinaty niduki'iyi tø ñamyukyidi jap tøjkjøtpy ² ku adsu'jky tmadoodøø jøts ku y'amuy jade'en sam ku møk pyøjyin, japts tsajpjøtpy chøøñ, jøts ja tøjkm amuum ñojktaajky ma ja jam wyinaty tø ñamyukyidi. ³ Winets ja jade'en t'ejxpatti ejxim ja jøøn yowin, tu'uk tu'uk idø'on ja jade'en tmøøt'atti kyubajkp. Ja tu'ukpi jøøn idø'on wyinaty tø ñawya'kxyi. ⁴ Xjats ja niduki'iyi tyatøjkijyidøø ja Espíritu Santo, jøts wenk ayuujk ja jatyi tkajpxtøø sa jaty ja pøngapøn yik'awijyi ja Espíritu Santo.

⁵ Jamts idø'on wyinet'et ja jaa'y wyinatyøø jam Jerusalén pøn nayi israelit jaa'dyi, ja ku abikyajp chinaañidi, ka'ap ja jam wyinaty y'ukugajp'ajtnidi. ⁶ Ku ja jade'en tmadoodøø y'amuy kyida'aky, winets ja t'anøjkxidøø ma ja tmadoodøø y'amuy, kuts jam yja'ttøø, ka'ap ja jam y'ukwinmaa'nbyatnidi, ja'agøjxp ku ja tmadoodøø ja y'ayuujk yikajpxti, pøni sa jaty ja nidu'uk nidu'uk t'ayuujk'atti. (Jade'en ja kyajpxwa'kxtøø ja jaa'y pøn

tjanchja'widip ja nwindson'ajtim Jesucristo.) ⁷ Xjats ja jadi'iñi myondi y'ookti, jøts ja xem yam nawyajnidøø:

—¿Ti kidi ja Galile'itjaa'yip ya'atti ixa jade'en kyajpxti? ⁸ ¿Sudso yø jade'en tkajpxti yø ayuujk midi adøm nidu'uk jaty ngajpxyindip, sa jaty pøngapøn ja y'ayuujk tø t'aniweji? ⁹ Ixa ja jaa'y ixyamdi pøn kugajp'ajttip jam Partia, jam Media, jam Elam, ma Mesopotamia, jam Judea, jam Capadocia, jam Ponto, jam Asia, ¹⁰ jam Frigia, jam Panfilia, jam Egipto, ma jaty kajp jam Africa, jambaat yø kyugajpidi jam Cirenit kajp ixkø'øm. Nay jats ja romanosti pøn ya tø kya'axti, pønts ya tø yagaka'axti tø ja israelit jaa'y ja chinaa'yin tpadøjkiñidi. ¹¹ Nay jaa ja jaa'y ya tø yja'atti midi tsoo'ndip jam Creta, jam Arabia; niduki'iyi yø jade'en tø nmadøø'yindi ku yø tnigajpxti tñimadya'akti ja Dios myøk'ajtin, jøts jade'en xmigajpxyindi sa adøm n'ayuujk nidu'uk nidu'uk.

¹² Jade'en ja nawyajnidøø, nigyumaap idø'øn tyimyja'widøø, jadi'iñi ja kya'ukwinmaa'nbyatnidi xjats ja xem yam ñañimaajyidøø ti dø'øn tuujnip.

¹³ Jamts ja jaa'y jadu'ukti pøn ttaxektip, yide'en ja ñawyaam'iyidi:

—Mujkidip yø jaa'y, paty yø jade'en y'amu'ugyikajpxti.

Ku ja Pedro ojts kyajpxy jam mayjaa'y agujkp

¹⁴ Ku dø'øn ja jaa'y jade'en ñawyajnidøø, winets ja Pedro wya'kukidøø møøt ja ñimaktu'ukpi myigu'uk, jøts møk'ampy tmigajpxy ja mayjaa'y, jøts tnøjmi:

—Meets Judeit jaa'dyi, jøts nayide'en niduki'iyi pøn jaty ya tsinaadyip Jerusalén, ukja'gyukidi yixxon midi øts ixyam nnigajpxwampy. ¹⁵ Ka'ap øøts nmu'ugyi sa meets nugo mjawinmay, nipøn jøpyi kyamu'ugyi, apeni xøøw ixa pyetynim. ¹⁶ Jajtp idø'øn ixyam jade'en sam ja Dios Teety tñimaay ja kyugajpxy, pøn txøøw'ajt Joel, ku ja jade'en wyaañ:

¹⁷ Ku wyinaty ja naxwii'ñit tyigatswani,

winets øts ja'abi xøøw møk'ampy ja naxwii'ñit jaa'y nduktatøkit ja n'Espíritu Santo ømyagajpi;

nyikugajpxy'atp øts ja mutskuna'jktøjkti,

jøts ndukwinguma'ap øts ja wajtyøjkti kiixyi'idi sa wyinaty yjatwa'añ ya naxwiiñ,

jøts nayi xwinguma'adip øts ja møjaa'dyøjkti.

¹⁸ Xjats øts nay ja'abi xøøw møk'ampy nøjx nduktatøkidi ja n'Espíritu Santo ja'abi dø'øndi, pøn øts nja' wyinaty amumjoojt xpadunwajniyidip,

ja'ats øts n'ayuujk nøjx møk'ampy xkajpxwa'kxiyidip, øy ja yjaya'a'dyøjki øy ja yjatø'øxyøjki.

¹⁹ Nanky'ejaxip øts jam tsajpwemp ja nmilagri'ajtin,

jøts nayide'en ya naxwiiñ nnanky'ejaxit ku ja ni'jpy yø'øty, jøts ja jøøn mye'ent, winets yjojkta'atst.

²⁰ Jøts ja xøøw y'ookt, jøts ja po' ni'jpyin kyaxø'økt,

ku dø'øn jade'en yjatt winets ø nme'ent, pø øtsxi mee xwindson'ajtp,

jøts nyikjatt ja xøøw sam nijuuni xka'ejxtinim.

²¹ Jøts niduki'iyi pøni pøn jaty ø xminuu'kxakp, ja'ats ø nyiknitso'ok'attip.

Jade'en ja Joel ja Dios kyajpxy y'ayuujk tyiknajxøø.

Xjats ja Pedro yide'en tjaaknimaay ja myigu'uk:

²² —Jaak'ukmadowdi meets Israelit jaa'y midi øts njaaknigajpxwampy: Ja Jesús Nazaretit jaa'y, tø ja Dios Teety ja myøk'ajtin myø'øyi, jøts janch tsuj janch møj ja milagri ttuñ, jøts may ja ejxa'añ jade'en mmø'øyidi Dios Teety myøk'ajtingøjxp, paty xnijawidit ku ja Dios Teety møøt y'ity. ²³ Xjats ku meets ojts myikømø'øy, ti nduu'nimp, tø yjaty kyubety tuki'iyi pøni sa ja Dios Teety kø'øm tpiktaajky jekyip, jøts nay ja' meets ojts xmach jøts xtsumdøø xiidyøø, jøts ja ka'øyi jaa'y xukyik'ookti jam kruskøjxp. ²⁴ Xjats ja Dios Teety ojts jadigojk tyikjukpyiky, jøts tyik'awa'atspidsimy jap oo'kpi jutjøtpy; ja'agøjxp

ku ka' pya'at'aty i jøts ja o'jkin xemikøjxp tkupøkt. ²⁵ Yide'en ja rey David ojts ja Dios Teety yikugajpxy'aty sa ja Jesús kyajpxy y'ayuujk:

Mets Teety, ejtp me møøt njujky'aty m'aga'ngyø'ampy; jøts ka'ap øts pøn x'adsø'øgit.

²⁶ Paty øts n'anmija'win janch jotkujk nnayjawiyi, jøts øts ja nxondaajkin jade'en nnigajpxy.

Øy n'oøkt, ka' ti jotmay njagyapt;

²⁷ ja'agøjxp ku mets ka'ap ja n'anmija'win xyikta'ant ma oo'kpi yja' tyandi, jøts nika'ap øts nnine'kx xyikwindigøjyiyit, pø øtsxi me xtsøky'ajtp.

²⁸ Tø øts xuknijawi ku njujkpyøkt jadigojk ku wyinaty tø n'øøky, jøts nayide'en xyikxonjatt ku mets xemikøjxp nmøøt'ett.

Jade'en ja David tyiknaajx ja Jesús kyajpxy.

Xjats ja Pedro tjaaknimaay yide'en ja myigu'uk:

²⁹ —Migu'uktøjkti, wa'ats yiknijawi ku adøm n'apteety'amøj David ojts y'øøky jøts ñaxøkiyiñ, nay ja n'ijxyindi ma ja yjut ma ojts ñaxøki. ³⁰ Ja David, ja' Dios kuga-jpxy'ajtyøø jøts ñija'wip sa wyinaty ja Dios møk wyanda'aky, ku wyinaty tu'uk y'ap yikpikta'aky yiknitsokpi ya naxwiiñ, jøts nayide'en yikutukt sami David kyutujkin.

³¹ Jade'en idø'on ja David jekyip tnijawi, jøts jade'en tnigajpxy ku ja Cristo yjujkpyøkojmit jøts ni ja ñine'kx kyawindigø'øty. ³² Pøn ja David ñigajpx ñimadyaajk, ja Jesús idø'on ja', ja' idø'on ja Dios Teety tø yikjujkpyiky, pø tøxi øøts ja wa'ats n'ixy, pø tøxi øøts ja wa'ats nnijawi. ³³ Jøts ja Dios Teety ja nayide'en yiktsajpajtøø jøts pyiktaajkøø y'aga'ngyø'ampy, jøts jade'en ja møj kutujk myø'øyiyi; jøts ja' tkajxp ja Espiritu Santo ya naxwiiñ midi ja Dios Teety wyinaty kø'øm tø twanda'aky, jøts ja' idø'on ja myøk'ajtin yø' midi ìxa m'ejxtip mmadoodip. ³⁴ Pø kidi ja Davidipxi kø'øm tsajpajt, ja'ayi ku David ojts yide'en wya'añ ku ja nwindson'ajtim Jesús ja Dios Teety yide'en ñimaajyiyi:

“Ëxa'ak, jøts ø xputsøønit n'aga'ñ'ampy,

³⁵ jøts øts yø mmidsep nmimajadakøxt.”

³⁶ Meets Israelit jaa'y kuwani niduki'iyi ka'pxy xnijawidit, jøts ku ja Jesús pøn meets kø'øm mdukyikruspajt ja abiky jaa'y, ja' yø' pøn ja Dios ìxyam tø kø'øm tpikta'aky møj windsøn jøts yiknitsokpi.

³⁷ Ku dø'on jade'en tmadowdi ja Pedro kyajpxy, winets ja jotmay tyatøjkiyidøø, xjats ja Pedro yiknimaay møøt ja ñimaktu'ukpi myigu'uk:

—Migu'uktøjkti, ¿sudso'ampy øø ndu'unt?

³⁸ Xjats ja Pedro t'adsojimbijty jøts tnimaay:

—Yø mbøktyu'unin mmajtstu'uttip, jøts mnøbattit nidu'uk jaty Jesús xyøøgøjxp, jøts jade'en myikpojkipimaa'kxtit; jøts nayide'en ja Dios Teety mduktatøkiyidit ja y'Espiritu Santo. ³⁹ Meets m'øy'ajtin yø', møøt m'u'nk møøt m'una'jkti, jøts nayide'en pøn jaty jagam tsinaadyip; uk niduki'iyits ja'adi pøni pøn jaty ja Dios Teety kø'øm wyiwetswampy.

⁴⁰ Yide'en idø'on ja Pedro ojts tkajpxwijy ja jaa'y, jøts tnimaay:

—Majtstu'utti yø'øbi jaa'y pøn ja nwindson'ajtim Dios yja' tkajanchja'widip.

⁴¹ Xjats ku ja Pedro jade'en tnimaay, winets ja jaa'y ñøjkxtøø nøbajtpi pøn jaty tmibøjktøø ja Pedro y'ayuujk; ja'abi xøøwts ja Jesús yja' ojts ñamayi nidigøøk mil.

⁴² Niduknax idø'on ja t'ixpøkti sa ja Jesús kyudanaabyi y'awa'andi, jotkujk idø'on ja jam tu'ugyi chøøniidi, jøts ku ñamyukyidi dios'ajot'ajtpi, jøts ja tsapkaaky tkaydi Jesús y'oo'kingøjxp.

Sa chinaadyi ja myijawyeembi ja Jesús janchja'wibidi

⁴³ Xjats ja jaa'y ñigyumaap idø'on ja tja'widøø ku ja Jesús kyudanaabyi ja mamylagri tnanky'ijxyidi. ⁴⁴ Tu'ugyi ja wyinmaa'ñ ja tyik'etti pøn jaty ja Jesús yja' tpabøjkiyip jøts ñadyagumayidi ja pyikta'aky; ⁴⁵ jøts ttoøkti pøni ti jaty pøn myøøt'ajtpy, xjats jade'en

ja nimeeñ tyikwa'kxidøø pøni sa jadu'uk jadu'uk yja' kya'ity. ⁴⁶ Jabom jabom idø'øn ja jap ñamyukyidi møj tsaptøjkjotp, jøts nayide'en awingujk tøjkjøtpy, jøts ja chapkaaky jap tyikwa'kxti, jøts jade'en ejtni xoni kyaydi, jøts jade'en nipøn kyanamyøjpikta'agyiyi. ⁴⁷ Jøts ja Dios Teety jade'en tjanchkajxa'akti jøts ja kajp jaa'y jade'en yjanchøkyidi; jabom jabom idø'øn ja nwindson'ajtim Jesús tyikmayi ja yja' pøn jaty yikpojkipimaa'kxtip.

3

Ku ja pakma'at jaa'y choknaa

¹ Tuk'ojk idø'øn ja Pedro ojts tmøøtnijkxy ja Juan jam tsaptøjkjotp, wyinaky xøøw ja ñøjkxtøø wine'enin ja jaa'y jam wyinaty xyuminamyukyidøø dios'ajot'ajtpi. ² Jamts idø'øn wyinaty tu'uk ja jaa'y pøn ja tyeky ma'at. Ejtp idø'øn ja jam xyumiyikwaanijkxy jam tsaptøjk agø'øm ma ja tsaptøjk'aaw jam midi txøøw'ajtp Hermosa. Jamts ja myigu'uk yiktaajniyi, jøts ja jam yiklimunsimuky ku jam pøn tyøki tsaptøjkjotp. ³ Xjats ku ja pakma'at jaa'y ojts t'ejxpaaty ja Pedro møøt ja Juan, ku ja jam wyinaty tyøkiwya'andi tsaptøjkjotp, winets ja t'amidøøy ja limunsi. ⁴ Xjats ja Pedro møøt ja Juan twin'ejxjø'øktøø ja pakma'at jaa'y, jøts ja Pedro wyaañ:

—Win'ejxk øøts.

⁵ Xjats ja jaa'y yjanch'ejxji'jky, yide'en ja wyinmaay, yikmo'op idø'øn ja tijy øy ti yiin waan. ⁶ Winets Pedro ja ñimaajyøø:

—Kidi meeñip øø nmiwidijtpy, ja'abi øø ndumpy midi øø xukmiwidejtp ja nwindson'ajtim Jesús pøn ojts chøøni jam Nazaret, pidø'kni jøts myø'øñit.

⁷ Xjats ja Pedro ja jaa'y tmajch y'aga'ngyø'køjxp jøts ja twejtsji'jky, ja'ayi ja jade'en ttuun winets ja tyeky ja jatyi wya'kmøkiyiñ, jatyi tyekyo'kt ja myøkpiky. ⁸ Xjats ja pakma'at jaa'y jade'en kanimøjaaw yjanchwo'onji'jky, jøts ja tyanaagyukiyiñ, jatyi ja ojts yø'øjji'iky. Xjats ja tmøøtøjkidøø jap tsaptøjkjotpy, ñiyukwo'oni ñichajpwo'oni ja jap t'ajot'aty ja Dios. ⁹ Niduki'iyi jaa'y ja ojts t'ejxti ku ja pakma'at jaa'y jade'en yø'øy, jøts ku ja jade'en tjanchtukmøjawi tjanchtukunuu'kxyjawi ja Dios. ¹⁰ Xjats ja ñigyumaap tyimya'widøø pø ma ja tyimñayja'widøø ku dø'øn jade'en wyinaty tø yjaty. Ja'widip tsø'jkidip idø'øn ja jamdi, kumi ñija'widip ja wyinaty ku ja yja'aji pøn jam wyinaty xumiyikmujkp jam tsaptøjk agø'øm, ma ja tsaptøjk'aaw jam midi txøøw'ajtp Hermosa.

Ku ja Pedro kyajpxwa'kxy jam møj tsaptøjk agø'øm midi yiktejp Salomón Tyøjkweenk

¹¹ Ja pakma'at jaa'y pøn idø'øn wyinaty tø myøkpiky, ka'ap ja t'ukmajtstutni ja Pedro jøts ja Juan, winets ja jaa'y pyujtmendøø ma dø'øn ja jam wyinaty, jadi'iñi ja myondi tyukti paty ja jam myendi tsaptøjk agø'øm midi txøøw'ajtp Salomón Tyøjkweenk. ¹² Xjats ku ja Pedro jade'en ojts t'ixy ja jaa'y, winets ja tnimaay:

—Israelit jaa'dyi, ¿tiku ñigyumaap xjawidi? ¿Tiku øø xwin'ixy, yide'en meets idø'øn yjawi mwani, øøts idø'øn yø xijy kø'øm møk'ajtin tø nduktatsø'øky yø jaa'y ku yø tø yø'øbyiky, uk ja' øøts idø'øn yø xijy tø nduktatsø'øky ku øøts ja Dios janchtsuj n'ajot'aty?

¹³ Ka'ap yjade'eni, ja Dios Teety jade'en tø tmøøy møk'ajtin ja y'U'nk Jesús, ja Dios Teety pøn adøm n'apteety'amøj Abraham Dios'ajtpip, møøt n'apteety'amøj Isaac, jøts nayide'en møøt ja Jacobo. Ja' y'U'nk ja myøk'ajtin jade'en tmøøt'ajtp, ja Jesús pøn ja Dios Teety y'U'nk'ajtpy, ja' pøn meets mgøyajk jam yikutujkpi wyindum. Jøts ku ja Pilato ja wyinaty tjamajtstu'utwa'añ, ka'ats meets ja xnankyikpidsøjmi. ¹⁴ Ja' mee ne'egi myik'awa'atspidsøøm pøn wyinaty tø tyundigøy, jøts meets ja ka'ap xnankmyajtstuujtøø pøn wa'ats, pøn katundigøøpy niwine'enin. ¹⁵ Jade'ents meets ja xyik'ø'jky ja yikju-jky'ajtpi. Jøts tø Dios ja jadigojk yikpidi'igyi jap oo'kpi jutjøtpy, tø øøts idø'øn ja jade'en ndyimybyaaty ndyimy'ixy, øøts idø'øn ñamyayi nøjkxp testigi. ¹⁶ Ja' idø'øn yø jaa'y jade'en tø yikmøkpiky ku yø tø t'ajot'aty, ku yø tø tmøøjpikta'aky ja Jesús. M'ijxy'ajtpip mnija'widip yø pakma'at jaa'y jøts ku tø yikmøkpiky, jøts ixa dø'øn jade'en x'ejxti møk møjaaaw.

¹⁷ Migu'uktøjkti, wa'ats øts ja nnijawi ku meets ja mwindsøn møøt mnabyudøjkiyidøø, jøts meets ja Jesús xyik'oo'ktøø, nugo ja jade'en xundøø, ni xkanijawi meets ja' pø tigøjxp jade'en m'adøtstøø. Ka'ap meets ja xnijawi pø tidam meets idø'on mjatumpy. ¹⁸ Xjats ja Dios tø tjanchyik'aduky ja wyanda'aky ku myagyajpxnaxpi ja tyikwaañ: jøts ku ja yiknitsokpi wyinaty jade'en y'ayo'ombaatwa'añ. ¹⁹ Paty mbøktyu'unin xma-jtstu'uttit xyiktigatstit ja mdsinaa'yin, ja'myatsti ja Dios Teety jøts ja tyakt ja øxyøøw ja øyjumøjt, ²⁰ jøts ja tkaxt ja Jesús pøn ja wyinaty jekyip tø ttanibiktaagi jøts adøm ja xyiknitso'ok'ajtindit. ²¹ Øy idø'on ja Jesús ixyam ndejint tø yjatañ jap tsajpjøtpty, jaanim ku ja Dios Teety ja kø'øm tyik'øyigyøxt pøni ti dø'on ja tyunwampy, jade'en sa ja myagyugajpxy ja kø'øm t'agajpxiyiñ ku ja jade'en wyandøø pøn jaty tsinaadyøø jekyip. ²² Jade'en adøm n'apteety'amøj ojts yiknimaa'yindi ku Moisés ja ojts ñii'mxyidi: "Mdanigaxidip ja Dios Teety tu'uk ja kugajpxy, meets mgø'øm migu'uk nøjkx kø'øm yikpikta'aky jade'en sa ø kø'øm nyikpiktaajky. Mimado'odip idø'on ja' pøni sa jaty ja wyinaty mnii'mxyidi, ²³ pøni pøn ja wyinaty tkamimadoop, ka'ap ja t'ukmøøtsinaañidit ja myigu'uk, kuwani ja jaty wyindigø'ødyit."

²⁴ Jade'en idø'on ja Dios kyugajpxy wyandøø, ja' idø'on ja ñigajpxtøø sa jaty yjatt kyubatt, ti jaty tunip ya'atpi jumøjt, jaayip ja jade'en wyangaktøø ku ja Samuel jade'en jawyeen wyaañ. ²⁵ Tum meets ja Dios kyugajpxy m'u'nk'ajttip, jøts paty ja Dios ojts tpikta'aky tu'uk ja kutujk midi ja aptøjk ojts yikmo'odi, jøts meets kidi xyikwindigøy ja m'anmija'win jam Dios wyindum, yide'en idø'on ja Abraham Dios ojts ñii'mxyi: "Tuki'iyi ja teety ja taak, ja u'nk ja una'jk nøjkx yikunuu'kxkøxti mets m'ap mets m'una'jkøjxp." ²⁶ Ku ja Dios tyikpidsimy jadigojk ja y'U'nk Jesús jap oo'kpi jutjøtpty, jawyeen ja ojts mdaniguxyidi jøts ja mgunuu'kxidit, jøts niduki'iyi xmajtstu'uttit ja mga'ødyu'unindi.

4

Ku ja Pedro møøt ja Juan ojts twingunøjkxidi ja kudunktøjkti

¹ Nay ixam idø'on ja Pedro ja jaa'y wyinaty tmigajpxti møøt ja Juan, ku ja teetyøjk jam myendøø møøt ja tsaptøjk ejx'ejtpi windsøn, jøts møøt ja saduceotøjkti. ² Tø dø'on ja wyinaty yikxon yjanch'ambøkti, ja'agøjxp ku ja Pedro møøt ja Juan tyik'ixpøkti ja jaa'y, ku ja wya'andi jøts ku oo'kpi pyidsø'ømdit jadigojk jap oo'kpi jutjøtpty, kumi tø ja Jesús wyinaty kø'øm pyidsimy jadigojk jap oo'kpi jutjøtpty. ³ Xjats idø'on ja ojts yikmajtsnidi jøts ja yiktsumnidøø, kyimjabomnim ja yiktiidyundøø kumi tsuu'nip wyinaty ku ja yiktsumdøø. ⁴ May jaa'y idø'on wyinaty tø tjanchjawidi ja øgyajpxy ja ømyadya'aky, pøn jaty ja wyinaty tø tpatmadowdi; jawaani kamagoxk mil ja yikmachoopidsimy ja yaa'dyi pøn tjanchja'widi ja nwindsøn'ajtim, ku ja wyinaty tø tmadowdi ja øgyajpxy ja ømyadya'aky.

⁵ Xjats ja'abi xøøw winets ja windsøndøjk ñamyujkidøø jam Jerusalén midi t'ana'amdip ja kajp, nay ojts idø'on ja mayjaa'y jam myendøø, møøt ja kajpxwejpitøjkti midi tundip jam tsaptøjkjotp; ⁶ nay jam idø'on ja Anás wyinatymi pøn ja teetywindsøn'ajtip møøt ja Caifás, møøt ja Juan, jøts møøt ja Alejandro, niduki'iyi ja jam wyinaty niwinø'on ja pyaat'atyidi ja teetywindsøn'ajtk. ⁷ Xjats ja Pedro yiknajtswa'widøø møøt ja Juan, jøts ja ojts yikpikta'akti jam agujk'am, winets ja yiktiibyøjktøø, yide'en ja ojts yiknøjmidi:

—¿Pøn yø jade'en tø mdanigutujk'atyidi jøts jade'en m'adø'øtstit, pøn jade'en tø m'ane'emyidi?

⁸ Xjats ja Pedro y'adsøøy, kumi tø ja Espiritu Santo ja wyinaty amuum tyatøkiyi, jøts ja tnimaay:

—Meets windsøndøjkti, meets møjaa'dyøjkti pøn jaty tsinaadyip ya Israel: ⁹ ku øøts idø'on jade'en tø xyiktiy sa tø chø'øky yø pamaa'y, sa yø tø yik'ødyuñ, ¹⁰ n'adsojimbetp øøts ja m'ayuujk, nnigajpxp øøts ya mayjaa'y agujky, jøts tnijawidit niduki'iyi pøn jaty tsinaadyip ya Israel, jøts yø jaa'y ixa tyani mee mwinduujy møk møjaaaw. Ja

nwindsøn'ajtim Jesucristo ja' yø tø yiktsø'øgyi pøn kugajp'ajtp jam Nazaret, ja' midi meets ojts xyikruspety, jøts ja' Dios Teety tø yikpidsimyi jadigojk jap oo'kpi jutjøtpy. ¹¹ Jade'en idø'øn ja Jesús ñamyayi tø ñøjknxi ejxim ja tsaa midi meets jagam m'ixjibejp, midi mee mgayiktuun jam pøchkyøjxp, jøts ja' ixyam ne'egi tø pyidsimyi jadigojk jawaani øy, midi tmach'etkøjxp tuki'iyi ja pøch'aaw. ¹² Nipøn jadu'uk xkayiknitso'ok'ajttint sa adøm Jesús xyiknitso'ok'ajtyindi, pøn ja Dios tu'ugyi tø ttanibiktaagi ya naxwiiñ.

¹³ Xjats ku ja kudunktøjk t'ejxti ja Pedro møøt ja Juan, ku ja jade'en møk'ampy wyingugajpxiyidi, winets ja t'ejxkajptøø kudam ja kya'ixpikyidi, ku ja ñugojaa'yidi, jøts ja jade'en nugo myaydi tyajti, winets ja t'ejxkajptinim jøts kudam ja yja'adi pøn ja Jesús wyinaty tø tmøøtwidetti. ¹⁴ Jøts ja jaa'y midi wyinaty tø chø'øky, jam idø'øn ja wyinaty tmøøtanidi, paty ja kudunktøjk ka' t'ukmidsepwanidøø. ¹⁵ Xjats ja yikajpxidsømdøø ma ja mayjaa'y jam wyinaty tø ñamyukyidi, jøts ja kudunktøjk ja agø'ømyidi tkajpx'øydøø. ¹⁶ Yide'en ja ñawyajnidøø:

—¿Sa yø jaa'y njanchtuu'nindit? Pø tyumnija'winidipxi yø' pøn jaty ya tsinaadyip Jerusalén jøts ku yø jade'en tø tyiktuujnidi ja Dios myøk'ajtin, ¿ti jats adøm ja ngagupijkyim ku dø'øn ja jade'en tø yjanchjaty? ¹⁷ Wan yø tkajpx'adsø'jka'andi, jøts ja Jesús ka'ap ja yja' y'ukyikajpxyø'øñit jam mayjaa'y agujkp.

¹⁸ Xjats ja twaadsoodøø ja Pedro møøt ja Juan, ja møk'ampy t'ana'amdøø jøts ja kidi jade'en ja jaa'y t'ukyik'ixpøjknidi, ka'ap ja jade'en t'ukajpxwa'kxinidit ja Jesús yja'. ¹⁹ Winets ja Pedro y'adsoodøø møøt ja Juan, jøts ja wyandøø:

—Ukwinmaagyukidim kø'øm pøni tiy tam jade'en, pøni øy tam ja Dios jade'en tjawi ku mee ne'egi myikmimado'ot, jøts ja kyayikmimado'ot. ²⁰ Nijuuni øøts ja ngamajststu'utt midi øøts jaa'y nduk'ixpijkpy, kumi tø øøts ja jade'en kø'øm ndyimyadøy, jøts kumi tø øøts ja jade'en kø'øm ndyimy'ixy.

²¹ Winets ja kudunktøjk ja ojts kyajpx'adsø'øgyidi jøts nigidi'iyam ja ojts tyimykmatsti, yikmajstuttøø ja jadi'iñi. Nigidi ja yikmiwinmaa'nbyajtidøø sudso ja tyik'ayo'ombaattit, kumi tsø'jkidip ja', niduki'iyi ja kajp jaa'y wyinaty tkajxaknidi ja Dios. ²² Jade'en idø'øn ja pakma'at jaa'y chøøjky, jam idø'øn ja jaa'y yjumøjt ja wyinaty wixijkxy myajtskin pøn ja Dios yiktsoojkiyøø.

Ku ja Jesús yjanchja'wibi t'amidoodøø ja møk'ajtin

²³ Xjats ku ja Pedro møøt ja Juan y'awa'atspidsømdøø, winets ja myigu'uk ja tninøjkxtøø ma ja jap wyinaty, jøts ja ojts ttamimadya'akti sa jaty teetywindsøn sa jaty møjaa'dyøjkti ja wyinaty tø ñii'mxyidi. ²⁴ Xjats ku ja myigu'uk ja jade'en tmadoodøø, winets ja niduki'iyi ja Dios t'ajot'ajttøø:

—Kuuyi me Dios Teety jadu'uk møk'ajtin møk xmøødi. Tø xyiknajtskojigyixy tuki'iyi winø'øn ja pikta'aky y'ity naxwiiñ, wan tsajpi, wan tnaajxi, wan tnøøji tmejyi. Tum mets yø mja'ajtpy amuum.

²⁵ Nayi mets ja David ja Espiritu Santo mdukyik'agajpxiyi'ñ ku ja xyikwaañ yide'en: ¿Tigøjxp ku jaa'y kajp kajp nugo jotkøjxpim t'ejxti pøn ya jagagugajp'ajttip, pønts ya kugajp'ajttip,

jøts yø tmidundigøøwyamidi ja nwindsøn'ajtim?

²⁶ Ja windsøndøjkti midi yikutujktip ya naxwiiñ, ja' tø tmidsepøkti ja nwindsøn'ajtim, jøts ja jaa'y midi t'ana'amdip ja kajp, tø ja ñamyukyidi may'ampy, jøts ja tnibidø'kti ja Dios Teety, nayide'en ja tmidsepøkti ja yiknitsokpi midi ja Dios Teety kyejxpy.

²⁷ Jøts janch tø dø'øn yjaty, kumi jade'en ja Herodes møøt ja Poncio Pilato tø tminamyukyidi ja wenk jaa'y jøts nayide'en yø israelit jaa'dyi ya møj kajpjøøjty, ja' idø'øn jade'en tø yikmidsepiky ja m'U'nk Jesús pøn janch tsuj janch wa'ats, pøn me kø'øm tø xanibiktaagi yiknitsokpi. ²⁸ Tø dø'øn ja jaa'y ja jade'en yjanchtuñi sa mets ja wyinaty

kø'øm tø xanibiktaagi jøts ku ja jade'en yjatt, tøts idø'øn ja jade'en yjaty. ²⁹ Dios Teety, ejx ixyam sa tkajpx'adsø'ogidi ja jaa'y, yikjotmøkpøk yø mdumbi jøts kyatsø'ogidit ku tkajpxtit ja mgajpxy ja m'ayuujk. ³⁰ Mo' møk'ajtin, mo' pudøjkin jøts tyiktso'oktit ja pamaa'y jøts tyikwingaxø'oktit ja Jesús myøk'ajtin.

³¹ Xjats ku ja chapkajpx'abajtidøø, winets ja Dios tyikmiiñ ja ujx ma ja jam wyinaty tø ñamyukyidi; xjats ja jade'en ja Espíritu Santo yikjotmøkpøjkidøø, jøts tkajpxwa'kxidøø amumjoojt ja Dios kyajpxy ma jaty ja wyidejttøø.

Ku ja Jesús pyadumbitøjk amuki ja pyikta'aky tja'ajtti

³² Ja mayjaa'y midi wyinaty tø tjanchjawidi ja øgyajpxy ja ømyadya'aky, tu'ugyi ja wyinmaañidi, ka' pøn wenk wyinmay, nitu'ugin nipøn ja pyikta'aky tkaja'adijy, tyumja'ajttip idø'øn ja niduknaax, ka'ap ja pøn tja'aty nadyu'uk. ³³ Jøts ja kudanaabyi jotmøk'ampy ja tñigajpxti tñimadya'akti ja nwindson'ajtim Jesucristo, sa ja pyidsiimy jadigojk jap oo'kpi jutjøtpy. Dios idø'øn ja yikxon pudøjkin møøjyidip. ³⁴ Jøts nipøn niti kya'ijtxyi, kumi tyoo'ktip ja ñaa'jx ja', kumi tyoo'ktip ja tyøjk ja' pøni pøn jaty jam ja pyikta'aky tmøøt'ajtp, jøts ja ñimeeñ ja tyikmenidi, ³⁵ jøts ja ttagødøkidi ja kudanaabyitøjkti. Ja'ats ja tyikwa'kxtip, jøts ja ttagumaydi pøni pøn jam tigati ka'ejtixyip. ³⁶ Jamts idø'øn wyinaty tu'uk ja israelit jaa'y pøn ja Leví y'apteety'amøjip, José dø'øn ja xyøøw, jam ja wyinaty tø kye'exy ma ja naajx jam møj mejyjotp midi txøøw'ajtp Chipre. Ja'abi jaa'y ja kudanaabyitøjk yikxødigatstøø, jøts ttejtøø Bernabé midi tyijpy kajpxjot'amøjkibi; ³⁷ ja'ats idø'øn tto'jk ja ñaa'jx jøts ja tyikmiiñ ja naxtsow, jøts ja ttagødøjkii'ñ ja nwindson'ajtim kyudanaabyi.

5

Ku ja Ananías jøts ja Safira tmidundigøødyøø ja Espíritu Santo

¹ Jamts idø'øn wyinaty jadu'uk ja jaa'y pøn txøøw'ajtp Ananías, jøts ja ñidø'øxy Safira txøøwi, ja'ats idø'øn tto'ktøø ja ñaa'jx tukam. ² Xjats ja kujkwa'kxy tmidanidøø naxtsow, jøts ja ojts kujkwa'kxy ttaninijky ja kudanaabyitøjkti, jade'en ja ttanikajpxy jøts ku ja jam ka'pxy, ka'ap ja jade'en ttukmadøy, wa'ats ñidø'øxy ja møøt tñijawi ku ja jade'en y'adø'tsti. ³ Xjats ja Pedro tñimaay ja yaa'y:

—Ananías, ¿tiku miku' tø mdatøkiyi jøts jade'en xjawin'øønwa'añ ja Espíritu Santo, kidi kujkwa'kxyip tø xyikmiñ? ⁴ ¿Ti kidi ja kam xkø'ømnaajxi? Jøts ku tø xøøky, ¿ti kidi ja meeñ xkø'ømja'aji jøts xkøyakt pøni winø'øn kø'øm xkøyakwa'añ? Dios tø xawin'iiñ, kidi øødsip.

⁵ Ja'ayi Ananías jade'en tmadøøy, winets ja jaty øøky ñaxkidaajky. Ku ja jaa'y ja jade'en niduki'iyi tñimadoodøø jøts ja yjancho'jkidøø. ⁶ Xjats ja unaj'jk jaa'y myendøø, jøts ja t'abejtøø ja oo'kpi jøts ja t'atsyiknaxøjkidøø.

⁷ Tigøøk oorinin idø'øn ja wyinaty jade'en tø yjaty, ku tyøjkii'ñ ja Ananías ñidø'øxy nay jam, ka'ap ja tñijawi pøni tidam idø'øn wyinaty tø tyuñi. ⁸ Xjats ja Pedro ja tyiibyøjkøø, jøts ja ojts ñii'mxyi:

—Nigajpx, ¿jade'en idø'øn ja naajx tø xjanchookti winø'øn tø xanitejti?

Winets ja y'adsøøy jøts ja wyaañ:

—Jade'en øøts ja tø ndøøky.

⁹ Xjats Pedro ja tñimaay:

—¿Tiku jade'en tø xkajpxy'atti ku ja Dios Teety y'Espíritu Santo jade'en xwin'øøndi? Ixa ja jaa'y tøk'agi'jy myendi midi ja mniyaa'y tø y'atsyiknaxøkiyi, jøts mets inet m'atsnajxøjkimiyip.

¹⁰ Winets ja tø'øxy jaty øøky ñaxkidaajky jam Pedro tyekyjø'øm. Xjats ku ja unaj'jk jaa'y tyøjkidøø, øøky ja jap tpattoø ja tø'øxyøjk, winets ja ojts jaty tyikpidsømdi, jøts ja ojts t'atsnidajidi nay jam ñiyaa'y pyukø'øm ma ja jam wyinaty tø yiknidaji. ¹¹ Winets ja Jesús yja' niduki'iyi yjancho'jkidøø, jøts nayide'en pøn jaty ja ojts jade'en tñimadowdi.

Ja mamylagri midi ja Jesús kyudanaabyi ñanky'ejxidøø

¹² Møk idø'øn ja Jesús kyudanaabyi ja milagri ttundi jam mayjaa'y agujkp; jøts niduki'iyi dø'øn ja Jesús yja' jam yø'omyukti møj tsaptøjk agø'øm midi yiktejp Salomón Tyøjkweenk. ¹³ Janch chøky'ajttip idø'øn ja kajp jaa'y ja', ka'apts ja niduki'iyi ja jotmøkwinnmaa'ñ tjagyapti, jøts jap ñøjkxtit ma ja Jesús yja' jap ñamyukyidi. ¹⁴ Namay idø'øn ja Jesús y'ayuujk yikmibijky, jade'en ja yaa'dyøjk jøts nayide'en ja tøøxyøjk. ¹⁵ Ja'agøjxpts ja pamaa'y jap yikiidyaktøø jap ma tuu' ñaxy, nay jap ja yikpikta'akti myaabajtkijxpy jøts tøøkyøjxp, jøts ja cho'oktit ku ja Pedro jap wyinaty ñaxy, øy ja y'aga'ax ja'ayi tyapaadiyidit. ¹⁶ Jøts nayide'en ja wenk kajp midi ja Jerusalén myiwingon'ajtpy, ja'ats tyikmendøø ja pyamaa'y jøts nayide'en pøn jaty wyinaty tø møk'ampy myachiyi ja miku'; xjats jade'en niduki'iyi choktøø.

Ku ja Pedro møøt ja Juan yikjemdundøø yiktedundøø

¹⁷ Winets ja teetywindsøn møøt ja saduceit jaa'y ojts nawyinaxi tjawidi, ¹⁸ winets tmatstøø ja Jesús kyudanaabyidi, jøts jap tsumdøø ma ja kajp jaa'y pyuxøjk jap. ¹⁹ Xjats nwindsøn'ajtm ja puxøjk agaj ojts tyik'awa'ach jøts tyikpidsimy, jøts ojts tnøjmi:

²⁰ —Nøjkxti jam møj tsaptøjkjotpy, tukmadowdi jam ja jaa'y ja øy'ayuujk midi ndaju-jky'ajtindip.

²¹ Xjats ku dø'øn jade'en yiknimaydi, winets jøpyi ñøjkxtøø jam møj tsaptøjkjotpy, jøts ja jaa'y ja jam tyik'ixpøjktøjkidøø.

Yam idø'øn ja teetywindsøn jap wyinaty udyaa'aky twaadsoodinim niduki'iyi ja møjaa'dyøjkti midi ja Israelit jaa'y yikutujk'adsinaadyip, jøts ja Jesús kyudanaabyi nayide'en yikwaadsowa'andi pøn wyinaty tø yiktsumdi. ²² Xjats tkejxy ja teetywindsøn ja tyumbi, jøts ku jam yjaja'ttøø jam puxøjk agø'øm, nitu'uk ja ojts tkapaatti pøn idø'øn jayiktanigaxtip; winets ja jadi'liñi wyimbejtnidøø ²³ jøts ttukmadoodøø ja teetywindsøn, jøts yide'en tnimaadyøø:

—Ku øøts jam tø nja'aty, aduky øøts ja puxøjk jam tø nbaaty, jam idø'øn ja soldadi y'ejx'etti puxøjk agø'øm; xjats ku øø tø nyik'awa'ach, nipøn øøts jap nitu'uk tø ngapaaty.

²⁴ Xjats ku dø'øn jade'en tmadoodøø ja ayuujk ja møj teetywindsøndi, jøts møøt ja tsaptøjk adsinaabyi, winets ñawya'añidi: “¿Sudso'ampy nmidabyaajtindit, sudso'ampy yjòpkøxt yø jade'embì winmaa'ñ?” ²⁵ Jøts winet jaty tu'uk yja'jty ja jaa'y, jøts ja wyaañ:

—¿Kidi xnijawidi? Pø ja'axi yik'ixpøjkti jam møj tsaptøjkjotp midi meets tø x'uktsumy.

²⁶ Winets ja tsaptøjk adsinaabyi tmøødiyii'ñ ja tajkti, jøts ojts twaawidi ja Jesús kyudanaabyi, nisa dø'øn ja tkatundi, tsø'jkidip ku ja kajp jaa'y myi'ambøkiyidit jøts ku jotmøñ chaaga'adsiyidit. ²⁷ Ku dø'øn tyikja'ttøø, winets ttawingugajxidøø ma ja israelit jaa'y kyutujk adsinaabyidi, winets ja teetywindsøn tnimaay ja Jesús kyudanaabyidi:

²⁸ —Tø øøts nnigajpxy jøts ku øøts ojts nyikutuky, jøts ku meets ja Jesús yja' ya niwine'enin xkananky'ixpøkiyidit. ¿Ti dø'øn ixyam jade'en tø xundi? Meets ixyam jinaxy tø xuknija'wiguixy ja m'ixpøjkin ya Jerusalén, jøts øøts xukpøky'atwa'añ nayide'en ja Jesús y'o'jkin.

²⁹ Winets ja Pedro t'adsojimbettøø møøt ja myigu'uk:

—Kuwanì øøts ja Dios yja' nbaduujniyi jøts ka'ap ja jaa'y yja'. ³⁰ Ja Dios Teety pøn adøm n'apteety'amøj Dios'ajttøø, nay ja' kø'øm tø tyikjujkyiky ja Jesús, pøn meets kruskøjxp mmiwopajt kyøjø'øm tyekyjø'øm, jøts jade'en xyik'oøktøø. ³¹ Tø ja Dios ja kø'øm tpikta'aky møj windsøn y'aga'ngyø'ampy jøts yikutukt, jøts nayide'en ya tyiknitso'ok'att ja naxwii'ñit jaa'y, paty Dios jade'en t'ayo'ixy ja Israelit jaa'dyi, jøts jade'en yikpojkipmaa'kxtit ku tmajstuttit ja pyøkyu'unin. ³² Wa'ats øøts idø'øn ja nnijawi ku ja Dios Teety idø'øn jade'en ttuun, jøts y'ijxpy nayide'en ja Espiritu Santo midi ja Dios Teety tyuktatøjkp ja yjaa'y, pøn jaty ja kyajpxy paduujniyip.

³³ Xjats ku dø'øn ja Israelit jaa'y jade'en ja kyutujk adsinaabyi tmadoodøø, jøts ja Jesús kyudanaabyi yikmi'ambøktøø jøts yik'ookwajnidøø. ³⁴ Jamts wyinaty nidu'ukti ja kutujk adsinaabyidi pøn yiktejtíp fariseit jaa'y, ja' xyøøw Gamaliel midi tñanky'ixpøjkiyíp ja Moisés kyutujk, jøts janch tsojkiyíp idø'øn ja kajp jaa'y ja'. Ja'ats ttanaagyukiyiñ, winets tkajxpidsimgijxy ja Jesús kyudanaabyi, jøts ja jap mimøj t'atsyik'awixy abiky tsoo.

³⁵ Xjats yiknimaadyi ja kutujk adsinaabyidi:

—Meets Israelit jaa'y, kidi yø jaa'y nugo ajawi sa xundi. ³⁶ Ja'myatsti ku ojts tu'uk ja jaa'y ñamyøjpikta'agyi windsøn pøn txøøw'ajtp Teudas, jøts ja kyutujk ojts ttawin'iñ ja jaa'y nimaktaxk magø'pxy. Winets ja soldadi ojts yik'øøgyi ja kya'øwyinmaa'ngyøjxp, xjats ja jadi'iñi wyindigøøgyøjxti pøn jaty wyinaty tø tpabøkti. ³⁷ Xjats jadigojk yjajtkojmi nayide'en ku ja gobierni tmachomujky ja yjaa'y, winets nay ja'abi tiempi tu'uk ja Galileit jaa'y ojts kø'øm ñamyøjwindsønbikta'agiyi jøts namay ja jaa'y nayide'en ttukmibijky; winets ja soldadi nayide'en yik'o'jkiyøø, xjats ja jade'en kyutigøøy ja kyutujk. ³⁸ Paty ø nwa'añ jøts xmajtstu'uttit yø'øbi jaa'dyi, ka'ap nugo xatøjkiyidit ja wyinmaa'ñ. Pøni kyø'ømwinmaa'ñ yø'ødi, kudigø'øpyts yø tsojk; ³⁹ pøni Dios yja' yø', nijuunits meets yø xkayikudigø'øty. Øyim mnay'ejx'etiyidit; kidim Dios møøt nugo mdseptundi.

⁴⁰ Xjats ku dø'øn ja Gamaliel jade'en kyajpxy'abajtiyñ, jøts ja kutujk adsinaabyitøjk udyā'aky tmibøjkøjxtøø. Winets twaadsoodøø ja Jesús kyudanaabyitøjk jøts tyik'ayo'ombaattøø, xjats tnimaadyi jøts ka' nugo tjaakajpxwa'kx'adø'øtstit ja Jesús y'ixpøjkin; winets jadi'iñi tmajtstu'ttøø. ⁴¹ Xjats ja Jesús kyudanaabyi jap pyidsømdøø ma ja israelit jaa'y kyutujk adsinaabyi japti, jotkujk idø'øn ja ñajawiyidi kumi tø ja Dios ja wyinaty tyanibikta'agiyidi, jøts ja jade'en y'ayo'odit Jesús køjxp. ⁴² Ejtp idø'øn ja jabom jabom tnigajpxti tkajpxwa'kxidi ja Jesús yja', jøts ja jaa'y jade'en ttuk'ixpøkti jap møj tsaptøjkjøtpy jøts nayide'en awingujky tøjkjøjty, nijuuni dø'øn ja tkamajtstu'ttøø.

6

Ku ja niwixujkpi yaa'dyøjk yikpiktaktøø ejx'ejtpi

¹ Nay ja'abi et, nay ja'abi jumøjt idø'øn ja jaa'y ñamayi'adøtstøø pøn jaty ja Jesús yja' pyaduujnidip. Jøts ja' midi tkajpxtip ja griego ayuujk, ja' idø'øn ojts y'øø'mbinaxwa'akti jøts tni'øøndi ja myigu'uk pøn tkajpxtip ja israelit ayuujk, ja' agøjxp idø'øn ja y'øøndi ku ja kyu'økyø'øxy ja kyayik'ejxti yikxon, ku ja jii'kxy jabom jabom yjawa'kxy. ² Ja' idø'øn ja ñi'øøndip, winets ja nimakmajtskpi jaa'y pøn tkudanaadyip ja nwindson'ajtim Jesucristo, ja' ojts niduki'iyi tñankñamyukyidi ja Dios yjaa'y, jøts ja tnimaadyøø:

—Ka'ap jade'en y'øyi ku øøts ja jii'kxy nyikwa'kxt, jøts øøts ja Dios y'øgyajpxy y'ømyadyā'aky nga'atskajpxwa'kxit, ¿ti juuni øøts ja n'atstuñ? ³ Migu'uktøjkti, paty øøts yikxon ndyimñigajpxy, ixā'adi niwixujk jaa'y, nay jaayi dø'øn kø'øm mnawyie'jxidit, ja' idø'øn m'ixā'adip pøn windsø'øgi'ejtíp, pøn ja'gyukidip, jøts pøn ja Espíritu Santo tmøøt'ajttip, ja'ats yø tunk mdaguwanidip jøts ja jii'kxy ja jade'en tyikwa'kxiti. ⁴ Øøts dios'ajot'ajtwamp øøts, njaaktyimdyuk'ixpøjkwampy øøts jaa'y ja Dios y'øgyajpxy y'ømyadyā'aky.

⁵ Xjats niduki'iyi ñagyajpxkyupøjkidøø, winets ja Esteban yikpiktaajky yikjii'kxwya'kxpi, ja jaa'y pøn idø'øn ja Dios møk tjanch'ajot'ajtp, pøn tmøøt'ajtp ja Espíritu Santo. Ja'ats idø'øn jade'en yikwiwejtstøø møøt ja Felipe, møøt ja Prócoro, møøt ja Nicanor, møøt ja Timón, møøt ja Parmenas, jøts møøt ja Nicolás pøn tsoo'mp jam Antioquía, ja' midi wyinaty jekyip tø t'ukpabiky ja israelit jaa'y chinaa'yindi. ⁶ Xjats ja jam wyinaty tø tyikmendi ma ja nwindson'ajtim kyudanaabyi jamdi, jøts ja tkunuu'kxtøø jøts ja jade'en tkønixajtøø.

⁷ Xjats ja Dios kyajpxy jade'en myøjtak'adijch, mayi'adøtsp idø'øn jade'en ja Dios yjaa'y jam Jerusalén, kø'ømbaat ja teetyøjkti tjanchja'wiñidi, kø'ømbaat ja t'ajot'ajtnidi ja nwindson'ajtim Jesucristo.

Ku ja Esteban yiktsumnaa

⁸ Jamts idø'øn ja jaa'y wyinaty tu'uk midi txøow'ajtp Esteban, ja' idø'øn ja Dios myøk'ajtin amuum myøøt'ajtpy, Dios idø'øn ja kyunuu'kxin nayide'en amuum myøøt'ajtpy, jøts ja jade'en ttuun ja myilagri Dios myøk'ajtingøjxp jam mayjaa'y agujkp.

⁹ Nay jamts idø'øn ja jaa'y wyinatymidi winaagin, pøn xuminøjktip ma tsaptøjk jam yikxødijy Esclavos Libertados. Jam wyinaty ja'adi midi tsoo'ndip Cirenit etjopt, jøts Alejandriit etjopt, jøts Ciliciit etjopt, møøt Asiit etjopt. Ja'ats idø'øn tnibidø'øktøø ja Esteban, jøts ja jade'en xe ya ñadyamigajpxnibøjkidøø; ¹⁰ jøts nigidi dø'øn ja tmidanaadyøø sa ja Esteban ojts wya'añ, kumi wijy'ajtin ja yiktumpy, jøts nayi Espiritu Santo ja pudøjkiyip. ¹¹ Xjats ja mayjaa'y winaagin tmijuudyøø ja myigu'uk, jøts idø'øn ja wya'andit jøts ku ja Esteban wyinaty tø tka'ødyijy ja Moisés jøts ja Dios. ¹² Xjats idø'øn ja jade'en jotkøjxim tuk'ejxpinaxw'a'akti ja myigu'uk, niduki'iyi ja møjaa'dyøjkti møøt ja kajpxwejpitøjkti; jøts ja t'adinaadyujktøø ja Esteban, xjats idø'øn ja jade'en tmajtstøø jøts ja tyiknøjktøø jam møj kutujktaajkjotp. ¹³ Nay ojts idø'øn ja tpiktakmidi ja testigi pøn tnidaay'ajtp ja Esteban, yide'en ja wyandøø:

—Ya'at jaa'y nijuuni yø tkamajtstu'uty ja kya'øy'ajtin, xumi jade'en yø tpagajxpy tpaxi'iky yø tsaptøjk, nayide'en yø ttuun ja Moisés kyutujk. ¹⁴ Ti yø jade'en ñadyijyi, pø tøts øøts yø jade'en kø'øm ndyimyadøy ku yø jade'en wya'añ, jøts ku Jesús (ja Nazaretit jaa'y) tyikudigø'øty yø tsaptøjk møøt yø tsinaa'yin midi ja Moisés yiktaan.

¹⁵ Exam ja jade'en wya'andi, winets ja mayjaa'y pøn jaty jam wyinaty tsinaadyip, ja'ats ojts t'ejxti ja Esteban jøts ku wyeen y'aaw ja jade'en kyaxi'iky sam ankilisin.

7

Ku ja Esteban kø'øm yjanagyugajpxøø

¹ Winets ja teetywindsøn ttiiyijky ja Esteban, yide'en ja tnimaay:

—¿Janch jade'en mets tø m'adi'ich?

² Xjats ja yøñ'ampy t'adsøøy, jøts ja wyaañ:

—Mee migu'uktøjkti winø'øn myikteedyidi myiktaagidi, madowdi waani. Ku adøm n'apteety'amøj Abraham jap chinaay ma et txøow'i Mesopotamia, jøts ka'anin ja wyinaty ñijkxy tsinaabyi jam ma et txøow'ajtmi Harán. Xjats ja Dios Teety pøn janch wa'ats janch møj ojts ñanky'ijxyiyi, ³ jøts ja Abraham yiknimaay: “Majtstu'ut yø mdsinaadyaajk jøts nayide'en ja mmigu'uktøjkti, jøts mnøjkxt jam ma ja tsinaadyaajk n'atstuk'ext.”

⁴ Xjats ja Abraham choo'ndøø jam chinaadyaajkjotpti ma txøow'aty Caldea, jøts ñøjkxtøø tsinaabyi jam Harán. Xjats ja tyeety jam y'oo'knaa, winets ja Dios Teety twaadsøøy ja Abraham ma ixyam ndsinaa'yindi. ⁵ Jøts ku ja jade'en yja'aty niwinø'ønin ja ñaajx ja kyayikmøøy, nugo ja chinaay; jøts nay ja Dios Teety kø'øm tyikutujk jøts yikmo'otnim ja ñaajx ma chøønidit ja y'u'nk ja y'una'jk øy ja Abraham wyinaty yja'øøky; ka'anin ja y'u'nk te ku ja Dios jade'en wyandaajky. ⁶ Jøts nayide'en ja Dios Teety tjaaknimaay ja Abraham, jøts ku ja y'u'nk y'una'jkti, y'apti y'okti ñøjkxtit tsinaabyi abikyajp, jøts jap jaa'y ja yjanchyiktunidit ejxim jiyujkin. Ku ja jap yja'attit, winets ja jaa'y kyayik'ødyunidit maktaxk magø'pxy jumøjt. ⁷ Xjats ja Dios nayide'en wyaañ: “Øts ndiidyu'ump ja jaa'y pøn mga'ødyunidip, pøn myiktunidip jiyujkin, jøts ngajxpidø'ømdit kyø'ømnaxjotpti, jøts ø xwindsø'øgidit nay ya.” ⁸ Jøts nay yø Dios Teety møøt ja Abraham tkajpxy'ajty sa jaty ja ejxpajt ja ejxa'an ku ja yikmo'odit ja naajx. Jøts tpiktaajkøø sa mutsk mixyu'nk yiktu'undit ku kya'axtit. Paty idø'øn ku ja Abraham y'u'nk kyaxi'jky midi txøow'ajt Isaac, winets jade'en ttundi sa tkajpxy'ajttøø jøts ja ejxa'an tpiktaajki ñe'kxkøjxp, kyiduktujk xøow ja jade'en ttuun. Nayide'en ja Isaac ttuun ja y'u'nk midi txøow'ajt Jacob, jøts nayide'en ttuun ja Jacob ja y'u'nk y'una'jkti nimakmajtsk pøn y'apteety'ajttøø ja Israelit jaa'y.

⁹ Ya'at Jacob y'u'nk y'una'jkti midi adøm n'apteety'ajtindøø, myi'ajkidip ja y'uch José ja'adi, paty ja ojts ttoo'knidi jøts tyiknøjkxtøø jam Egiptit jaa'y y'etjotp. Jøts ja José, ka'ap ja Dios myajststu'udyi nijuuni. ¹⁰ Nay yø Dios pudøjkiyip ku y'ayo'ombaaty. Jøts nay ja' ja møøjyip ja wijy'ajtin, ja'agøjxp chojkiyøø ja Faraón midi møj windsøn'ajtp jam Egipto. Nay ja' tpiktaajk ja José gobernador jøts ja yikutukt jap kutujktaajkjøtpy, jøts nayide'en jap Faraón tyøjkjøtpy.

¹¹ Winets ja yuu myiñ jøts janch may ayo'on pyajtidøø jam Egipto etjotp jøts nayide'en jam Canaán, paty adøm n'apteety'amøjti ka'ap tpaattøø ti yjøø'kxtip. ¹² Xjats ku ja Jacob tnija'wøø jøts ku jap Egipto y'ity ariin, winets jap tkejxy ja y'u'nk y'una'jkti pømbi adøm n'apteety'ajtyindip. Jade'en ojts y'otsti mijawyeen. ¹³ Ku myimajtsk ojk ñøjkxtøø, winets ja José kø'øm ñanky'eixiyøø, jøts jade'en ja Faraón tnija'wøø kudam ñamyigu'uk'atyidi. ¹⁴ Xjats ja José twaadsøø ja tyeety jøts niduki'iyi ja myigu'uktøjkti, nidugui'pxy myakmokx niduki'iyi y'ejtøø. ¹⁵ Jade'en ja Jacob yja'jty ku yikwaadsøø tsinaabyi jap Egipto. Jap y'oo'knaa møøt adøm n'apteety'amøjti. ¹⁶ Xjats ku jam y'oo'ktøø, winets jam tyiknøjkxtøø Siquem y'etjotp ma ja Abraham jam wyinaty ja jut tø tjuy, midi ja Hamor y'u'nk tyoøktøø.

¹⁷ Xjats ku ja Israelit jaa'y myayiñidi jam Egipto ñaxjotp, winets ja Dios ja wyanda'aky y'adukwani midi wyandaajk Abraham køjxp. ¹⁸ Winets ja Egiptit jaa'y tpiktaktøø tu'uk ja møj windsøn, pøn tkanija'wip pøni sa ja José wyinaty tø y'atswindsøn'aty. ¹⁹ Ja'ats idø'on twindaay'ajt adøm nmigugajpti jøts tjemduñ tteduñ adøm n'apteety'amøjti, yide'en idø'on ttuñ jøts ku aguwanikøjxp ttukmajststu'uty ja teety ja taakti ja myaxu'nkti jøts y'ooktit. ²⁰ Ja'abi xøøw ja'abi jumøjt idø'on ja maxu'nk kye'jxy midi txøøw'ajt Moisés, jøts janch tsojki ja Dios ja'. Xjats ja Moisés ja tyeety tyaak yikya'jkiyøø tigøøk po'. ²¹ Winets yikmajstutnaa kuwani, xjats nay yø Faraón ñøøx ojts tpaaty, jøts tyikye'jky ejxim ja kyø'øm'u'ngin. ²² Xjats ja Moisés jap wyijy kyejy y'ixpijky, jøts midi ja Egiptit jaa'y yjajtip, nay jap ja Moisés yikta'awaan. Ku ja jade'en y'ixpijky, kajpxwa'kx ja janch øy janch tsuj, jøts yjanchtumpy idø'on ja kø'øm jade'en.

²³ Xjats ku ja Moisés wyinaty ja jyumøjt wixijkxy, winets ja t'atspaatwa'añ ja myigugajp ja israelit jaa'y. ²⁴ Winets jap ojts t'ejxpaaty ja myigu'uk ku ja jap wyinaty ja egiptit jaa'y yjemduñi tyeduñi. Winets ja Moisés ja myigu'uk t'ayo'ijxy jøts tnigubøjky, paty ja tyik'ø'jky ja' egiptit jaa'y. ²⁵ Kumi jade'en ja yjawinmay jøts ku ja myigu'uktøjk tnijawidit, jøts ku ja Dios myo'owa'añidi ja awa'ats'ajtin, jøts nagyø'øm ja twindsøn'attit; jøts ja myigu'uk ka'ap ja tnija'widøø. ²⁶ Xjats kyimjabom'ajty, winets ja Moisés tpaaty ja myigu'uk namajtsk, nache'jkidip tam ja wyinaty, xjats ja Moisés wyinmaay jøts ñamyiyuy'atidit, jøts tnimaay: “¿Tiku jade'en mnayjemduñidi mnadyeduñidi, kidi mdukjaa'yip meets?” ²⁷ Xjats ja' midi ja myigu'uk wyinaty tjemdumpp ttedump jøts ja Moisés yiknajtstejmyaa, jøts ñimaajyøø: “¿Pøn mets tø mbikta'agyi yikutujkpi jøts øø x'ana'amt? ²⁸ ¿Xyik'ookwamp øts nayide'en sam ja xyik'ø'jky ja' egiptit jaa'y uxøø?” ²⁹ Xjats ku ja Moisés jade'en tmadøø ja ayuujk, winets jatyi kyeejky ku yiknimaay jøts ku uxøø wyinaty ja jaa'y tø tyik'øøky, winets ñijkxy jap tsinaabyi ma et jap txøøwi Madián. Japts chinaay sami ja'atjaa'y, winets jap ja y'u'nk tpaajty namajtsk tum mixy.

³⁰ Tø ja wyinaty chinaañi wixijkxy jumøjt, winets ñijkxy widejtpi jam tø'øts etjotp, wingon et ma kojpk jam midi txøøw'ajtp Sinaí, xjats jam t'ejxpaajty tu'uk ja ankilis jam jønjøtp midi ujtsximungøjxp tøøpy. ³¹ Xjats ja Moisés ñigyumaap tja'wiyi'ñ ku ja jøøn t'ejxpaajty, jøts ku tjaakwingunøjkxøø wingon, winets tmadøø ja Dios Teety y'ayuujk ku ja wya'añ: ³² “Øts mets m'apteety'amøj xdios'ajtp nayide'en ja Abraham, ja Isaac, jøts nayide'en ja Jacob.” Xjats ja Moisés chø'øgidyøjkiña, jøts ka' y'uknadya'a'ejxinayøø jøts twin'ext. ³³ Winets ja Dios Teety ñimaajyiyøø: “¿Tiku yø mgø'øk xkajeñ, kumi tø øts yø nwi'ixy ya'at et? ³⁴ Kø'øm øts tø n'ixy ja njaa'y ku jam y'ayo'ombaatti Egipto,

tø øts nayide'en nmadø y sa yjø'ødi sa ya'a_xti, sa yjatti sa kyubatti, ja' tø nnimiñ jøts nyik'awa'atspidsø'ømdit. Mada'ak, jøts jam mnøjkxt Egipto.”

³⁵ 'Øy ja Moisés wyinaty tø yjayiknøjmi jøts ku ja ka' wyindsøn'att, jøts ku ja ka' tyiidyu'unt, Diosts ja kø'øm kajxiyi jøts ja tyik'awa'atspidsø'ømt, jøts nayide'en tniwindsøn'att ja myigu'uktøjk, ja'agøjxp ku ja ankilis jam tyukmadoji ujts ximumgyøjxp jøøn agujkp. ³⁶ Nay yø Moisés idø'øn tyikpidsøøm adøm n'apteety'amøjti jam Egipto, jøts nayide'en yjanchtuun ja milagri jøts ja Dios myøk'ajtin tyiktuujnøø, jade'en ttuun jam Egipto, jøts nayide'en ma ja Tsajpts Mejy, jøts jam tøøts etjotp, winet ku jam jade'en chinaay wixijkxy jumøjt. ³⁷ Nay yø Moisés idø'øn tniimaay ja israelit jaa'y: “Myiktanigaxtip ja Dios Teety ja kyugajpxy tu'uk, nayide'en idø'øn ja mye'ent sam øts ja jawyeen tø xkejxyin, jøts nay adøm idø'øn ja nmigu'uk ja'. Ja'ats idø'øn mbadu'unindip.” ³⁸ Nay yø Moisés idø'øn kyudanaay ja yjaa'y jam tøøts etjotp ma ja kojpk txøøwi Sinaí, ku ja ankilis myøøjyøø ja øgyajpxy ja øy'ayuujk midi ndajujky'ajtindip; jøts adøm ja nayide'en nnija'wint.

³⁹ Xjats adøm n'apteety'amøjti ka' tpadundøø pøni midi ja Moisés yjananktyunwajnip, jam ja ne'egi jadigojk ñøjkxwa'andi nay jam Egipto, jøts ja Moisés jade'en yikmajt-stu'utwa'añ. ⁴⁰ Winets tniimaadyøø ja Aaron: “Yikojik øøts nwenkdiosti jøts øøts ja' xuu'wa'at, kumi ka'ap øøts nnijawi pøni sa ja Moisés yjaty ku øøts nichøky'ampy xyikpidsiimy Egipto.” ⁴¹ Xjats tyik'a'øyiñaxti ja løjch, jøts tyik'oo'kti namay ja jiyujk, ja' idø'øn tyamiyoxtip tyawindsø'jkidip ja løjch awanax, winets ja' ttaxondaktøø midi kø'øm yik'øydøø. ⁴² Xjats ja Dios Teety myajtstuujtidøø jøts ja wyaañ, wan yø wenk dios yja' tpaduujnidi, wan tmaadsa'ji wan ttiil'ji. Yide'en idø'øn ja Dios Teety kyugajpxy jap ñøkyjøtpy tjaadyandi:

Ku meets jam mduu'yø'ø y tøøts etjotp wixijkxy jumøjt,
¿myik'o'jkik meets ja jiyujk may'ampy øts nwindso'jkingøjxp?

⁴³ Pø ka'axi yjade'eni, pø jinaxyi meets ja wenk dios yja' ixyam xpaduujniyi, ku ja dios Moloc møøt ja tyøjk xkiiwyidejtiyidi ja tøøts naxjotp.

Nayide'en jadu'uk ja wenk dios Renfán myaadsa' xpaduujnidi ja yja',
yide'en idø'øn ja kø'øm xyik'øydøø jøts xwindsø'jkidøø.

Ja'agøjxp meets ngajxpidsømwaañidi jøts jam mnøjkxtit Babilonia jixkø'øm, jamts
nayide'en m'ayo'ombaattit.

Ya'at idø'øn ja Dios ja kyugajpxy tyukjaa y, xjats ja Esteban yjaakwaañ:

⁴⁴ 'Nayide'en jam tøøts etjotp ja n'apteety'amøjti tmøøt'ajttøø ja wetøjk tu'uk ma tpøkjø'økti ja kyutujkti, tsaagøjxp idø'øn ja yja'ayi, Dios idø'øn ojts tyuk'ijxyi ja Moisés sudso wetøjk y'øyt. ⁴⁵ Xjats ku ja tiempi ñajxy jeky jumøjt, winets ja møjaa'dyøjkti tkøyajknidøø ja wetøjk møøt ja wyindsøn Josué. Winets ja myidsep tmimajadaktøø pøn jaty ja wyinaty tsinaadyip, kumi kø'øm ja Dios ja kyexyidi jøts ja chinaadyajk ja yikmo'odit. Nay ja wetøjk wyinaty yiktundip ku ja David yikutujky. ⁴⁶ Jøts ja Dios ja ojts y'a'ejxiyi, paty ja tu'uk tkojwa'añ ja tsaptøjk ma ja chøøniti ja Dios Teety pøn ja Jacob ojts Dios'ajtmi; ⁴⁷ jøts ni ka'abyim ja tkøjy ja tsaptøjk; winets ku ja Salomón tyøki windsøn, ja'animts tkoj ja tsaptøjk. ⁴⁸ Jøts øyim ja Dios jap kyidyimchøøni kuwani jap tsaptøjkjøtpy midi ja jaa'y yik'øydip, kumi yide'en ja Dios ja y'ayuujk ttukmiyø'ø y ja kyugajpxy ku ja yide'en wya'añ:

⁴⁹ Tsajpjøtpy ø ndsøøni, jøts nayide'en naxwiiñ.

¿Ti ndøjk meets idø'øn myik'øyip, jøts ti tsinaadyaajk meets idø'øn xmo'owamp?

⁵⁰ ¿Kidi øtsip jade'en tuki'iyi tø nyik'øyi?

⁵¹ Xjats ja Esteban tjaakniimaay yide'en ja myigu'ukti:

—Meetsxi mgamadoop mgaja'gyujkidip, jøts nijuuni meets ja Espíritu Santo xk-agupøjkti. Jade'en mee nugo mjanch'ity sami n'apteety'amøjti. ⁵² Ja'axi tjemdundip ttedundip ja Dios Teety kyugajpxy, jøts tyik'oo'ktøø pømbi yjøjja'widip ku ja myenwa'añ

ja yiknitsokpi, pøn janch øy janch wa'ats. Ixyamts ja yiknitsokpi yjanchmiiñ, pø meetsxi ja mgøyajk jøts ja jaa'y yik'oogiyit. ⁵³ Pø tøxi meets ja ankilis ja Dios kyutujk mjamø'øyi jøts nika'ap ja xpadundi.

Ku ja Esteban y'ø'jky

⁵⁴ Xjats ku jade'en yiknimaadyøø ja windsøndøjkti, winets yikxon tjanchty-imyi'ambøjktøø ja Esteban. ⁵⁵ Kumi ja Espíritu Santo ja Esteban yjanchmøøt'ajtpy, winets ja chajp'ijxy jøts t'ejxpaajty ja tsuj'ajtin ja øy'ajtin mā ja Dios Teety, jøts nayide'en t'ijxy ku ja Jesús jam tyani Dios Teety aga'ngyøj'øm. ⁵⁶ Xjats tnimaay pøn yik'ookwajniyidip: —¡Uk'ejxti! Awa'ats øts yø tsajp ø n'ixy, jøts nayide'en n'ejxpaaty ja Cristo tyani Dios Teety aga'ngyø'ampy.

⁵⁷ Xjats ja jaa'dyi ka'ap ja tmadowdi, y'amætstip ja tyatsk ja', niyaxni niyjokni dø'øn tnibidøktøø jøts tmatstøø. ⁵⁸ Jøts tyikpidsømdøø aguwanikøjxp jap kajpjøtpy; winets ja ni'øø'nibidi jawyeen ja chabixy tjandøø jøts ja ttuk'ejx'etti ja mixy Saulo, xjats idø'øn jatyi twika'tsnibøjkidøø ja Esteban. ⁵⁹ Yika'tsp wyinaty ja Esteban, jøts ja chapkajpxy jøts ja wyaañ:

—Nwindsøn'ajtim Jesús, mets ndagødøjkip ø n'anmija'win.

⁶⁰ Xjats ku jade'en wyaañ winets ñagyuxendyaajkiyøø jøts møk wyaañ:

—Kidi xukpøky'aty nmigu'uktøjkti yø n'o'jkin.

Kuts wyaanguijxy jade'en, winets y'oo'knaa.

8

Ku ja Saulo tjemduuñ tteduuñ ja Jesús yjanchja'wibidi

¹ Jøts ja mixy Saulo yjotkujk'ajty ku ja tyik'oo'ktøø ja Esteban. Xjats nay ja'abi xøøw, winets ja tsep cho'ondaajky møøt ja' pøn ja Jesús yjanchja'widip jam Jerusalén. Paty yide'en niduki'iyi cho'onjoknidøø pøn ja tsep tkawandip, jøts jam ñøjkxti nay Judeit kajp wingon, jøts nayide'en Samaria y'etjotpti. May idø'øn choonidøø, ja'ayi dø'øn tandøø ja Jesús kyudanaabyi pøn nimakmajtskjaa'y'ajttip. ² Xjats winaagin jaa'y pøn ja Dios kyajpxy tpadundip, ja' tyiknajxøjkidøø ja Esteban jøts nayide'en tjanchpaya'axti. ³ Xjats ja Saulo txumika'ødyuñ ja myigu'uk pøn ja Jesús yjanchja'widip, jøts t'ixaañibøjkøø tøjtk tøjtk. Kuts ja tpaajty, jøts ja t'ixjidøjtpidsimy tyøjkjøtpy wan tjayaa'yi wan tjatø'øxyi, jøts ja tyikpuxøjktøki.

Ku ja øgyajpxy ja ømyadya'aky ojts yikajpxwa'kxy jam Samariit etjotp

⁴ Xjats niduki'iyi midi tsoo'nidøø Jerusalén jøts ja ñøjkxtøø omagajp, ja'ats ja Dios kyajpxy tkajpxwa'kxidøø midi anmija'win tyiknitsok'ajtp. ⁵ Xjats ja nidu'ukti, pøn txøøw'ajt Felipe, ja'ats nøjkx abikyajp jam Samariit y'etjotp, winets ja jam tkajpxwa'kxy sa yajty sa kyubejty ja Jesús. ⁶ Winets ja jaa'y yjanchñamyujkidøø namay, jøts ja tjanchpatmadowdi sa wya'añ sa kyajpxy ja Felipe, jøts ku nayide'en milagri ttuuñ. ⁷ Winets tyikpidsiimy ja mamyiku' midi ja jaa'y wyinaty tø tyatøkiyidi, jøts møk idø'øn ja tjanchmiyaaxti ku pyidsømdøø ja miku'; nay ja' tyiktsoojk may ja køxujxpi pakxujxpidi, jøts nayide'en tyiktsøøjky ja pakma'at jaa'dyi. ⁸ Paty idø'øn yjanchjotkujk'ajttøø ja jamit jaa'y.

⁹ Jøts nay jamts idø'øn ja yaa'dyøjk tu'uk y'ijty pøn txøøw'ajtp Simón, ja'ats jam yik'adujkp jøts nayide'en xyimay, ja'agøjxp idø'øn ja tjanchmøjawidi ku ja jade'en ñamyøjpikta'agyi ja Simón. ¹⁰ Xjats ja niduki'iyi ja møj ja mutskti tpatmadowdi pøni sa jatyi ja Simón wyaañ. Winets wyandøø jøts ku tjanchmyøødi ja Dios myøk'ajtin.

¹¹ Jøts tpaduujnidøø ja yja' ku ja xyimay jøts ku ja yik'aduky, may jumøjt idø'øn ja wyin'øø'nidøø. ¹² Xjats ku ja Felipe tnigajpxkijxy ja øgyajpxy ja ømyadya'aky pøni sa yajty kyubejty ja Jesús, jøts ku ja tnigajpxy ja Dios kyutujk midi ja yjaa'y ja tyanitanaapy, winets ja yikpabøjknaa, xjats ja yaa'y ja tø'øxy ñøbajttøø. ¹³ Nayide'en

ja Simón t̄pabøjknimaa, jøts ja ñøbajtmaa, jøts ja t̄jamyøøt'ajty ja Felipe, winets ja ñigyumaap t̄janchja'wøø ku ja Felipe t̄janchpikta'aky ja milagri, jøts ja Dios myøk'ajtin tyikwingaxi'iky.

¹⁴ Xjats ku ja Jesús kyudanaabyi pøn jam jaaktaandøø Jerusalén tnija'widøø, ku ja Samariit jaa'y winaagin tø wyinaty tkupøjkti ja Dios kyajpxy y'ayuujk jøts ku ja t̄padu'undit, winets ja yjaakyikajxtøø ja Pedro møøt ja Juan. ¹⁵ Jøts ku jam yja'ttøø, winets tku'amidowdi ja Samariit jaa'y midi t̄padundip ja Jesús yja' jøts tyatøkiyidit ja Espíritu Santo. ¹⁶ Ka'aním wyinaty ja Espíritu Santo tyatøkiyidi ja Samariit jaa'dyi; ja'ayi wyinaty tø ñøbattøø Jesús xyøøgøjxp. ¹⁷ Xjats ku ja tkønixajtøø ja jamit jaa'dyi, winets ja tyatøkiyidøø ja Espíritu Santo.

¹⁸ Ku ja Simón t̄janch'ijxy ku ja Jesús kyudanaabyi ja Espíritu Santo ttuktatøki ja jaa'dyi, winets ja juy t'amidøø, ¹⁹ jøts tnimaay:

—Tiku meets xkadamidøøky yø Dios myøk'ajtin midi mee mmiwidijtpy, jøts ø nayide'en øy pøn ngønixajt, jøts nayide'en nduktatøkit ja Espíritu Santo.

²⁰ Xjats ja Pedro tnimaay:

—Pøni jap ja meen xmoødi, wan ja møøt mgudigøy, jade'enxi mets yjawi mwinmay jøts yø yiktøøky midi ja Dios yajkpy. ²¹ Ka'ats mets yø mbaat'atyiyi ya'at midi øø nmiwidijtpy, ka' mets mwinmaa'ñ y'øyi pyaadi Dios wyingujky. ²² Majtstu'ut yø mga'øwyinmaa'ñ, minuu'kxa'ak ja Dios pøni maa'kxujkiyip midi tø xwinmay m'am mjotp. ²³ N'ijxpy øts yjawi ku ka'øwyinmaa'ñ xmoødi, yø'øts myikjem'adøøjtsip myikte'adøøjtsip.

²⁴ Xjats ja Simón y'adsøøy:

—Ku'ajot'ajtik meets, jøts øts ja nbøky ngagu'ayo'ombaadit.

²⁵ Xjats ku ja Juan møøt ja Pedro tnigajpxkøxtøø ja Dios kyajpxy y'ayuujk, jøts nay ja' tkajpxwa'kxtip jam magyajpjotp nay ja Samariit y'etjotp, yide'en ja wyandøø sudso'ampy yø anmija'win ñitso'ok'aty, winets wyimbejtnidøø nay jam Jerusalén.

Ku ja Felipe møøt nabaajtyøø ja Etiopiit jaa'y

²⁶ Xjats ku ja jade'en wyimbejtnidøø, jøts ja nwindson'ajtim y'ankilis ojts ja Felipe myigajpxyiyi, jøts ñimaajtyyøø:

—Pidø'øk mets jøts mnøjkxt abatko'øm'ampy, ja tuu' midi naxp Jerusalén jøts nayide'en Gaza.

Jade'en idø'on ja ankilis ñimaajtyyøø ja Felipe. Ja'abi tuu' idø'on naxp tø'øts etjotp ma ka'apøn chøøni. ²⁷ Xjats ja pyidi'jky jøts ja chøø'ñ; winets t̄paajty jam tuu'am tu'uk ja Etiopiit jaa'y, pøn ja Dios Teety jap t'atswindsø'jkp Jerusalén. Ja jaa'y isaabiky ja', jøts møj yikutujkpi ja', jøts nayide'en t'ejx'ejtmiyøø ja myeen ja tø'øxy pøn jam møj windsøn'ajtp Etiopía, Candace ja xyøøw ja tø'øxy. ²⁸ Kyajpkøjxp idø'on ja wyinaty wyimbejtni kyarretijøtpy, jøts jade'en tuktuu' tkajpx'adi'ich ja Isaías ñøky pøn ja Dios kyugajpxy'ajt. ²⁹ Winets ja Espíritu Santo myigajpxiyøø ja Felipe, jøts ja ñimaajtyyøø:

—Wingonjawi puwa'agi yø karreti.

³⁰ Xjats ku ja wingon t̄puwa'jki, jøts t̄madøy ku ja ñøkyajpxy, jøts ja tyiktiy ja Felipe:

—¿Mnimadøøpy idø'on midi ixja mgajpxpy?

³¹ Xjats ja wyaañ ja nøkyajpxpi:

—¿Sudso øts yø' nwinmado'ot, pø ka'ats ø pøn, pøn øts xukwinmado'op?

Winets ja Felipe yikway jøts tyøkit jap karretijøtpy jøts tmøøtsøønit. ³² Midi ja Etiopiit jaa'y wyinaty kyajpxpy, ya'at idø'on ja':

Ku jaa'y yik'o'jkøø kyupiky'ajt ja', jade'en ja y'ijty kidim ja borreegi maxu'nk y'øøky; ka'ap ja sa wya'añ, uum ja' jade'en ejxim borreegi ku yikeepy.

³³ Jade'en idø'on ja jaa'y yik'ayoojtyyøø, jøts nika' kø'øm ñanky'ayowiyit;

ku ja jade'en yiktuñ, ¿pøn ja kugajpxiyip?

Tø dø'on jabaat kyixy ja chinaa'yin ya naxwiñ.

Yide'en idø'on jap yja'ayi midi ja Etiopiit jaa'y kyajpxpy.

³⁴ Xjats ja jaa'y yiktøjøø ja Felipe:

—Tun ja may'ajt, nigajpx waani, ¿pøn idø'øn yø jade'en ñimadyakpy, kø'ømyi yø jade'en ñañimadya'agi, uk wenkpi dø'øn yø ñimadyakpy?

³⁵ Xjats ja Felipe ttuk'ixpøjknibøjkøø sã yjajty sã kyubejty ja Jesús. ³⁶ Xjats ku ja jade'en yø'ødyi, winets ja møj nøø tpaattøø, jøts ja Etiopiit jaa'y wyaañ:

—Ixats ja nøø yjawí, ¿ti kidi ndejint y'øyt ku nnøbatt?

³⁷ Xjats ja Felipe t'adsøøy:

—Pøni mjanchja'wíp ja Jesús tu'uk amumjoojt, o me nyiknøbatt.

Winets ja t'adsojimbijty:

—Njanchja'wíp øts ku ja Jesucristo yjanch'u'nk'atyí ja Dios Teety.

³⁸ Xjats ku ja jade'en wyaañ jøts ja karreti tyikwa'k'øydøø; winets ñøjkxtøø jam møj nøøjotp, jamts ñøbejty ja Etiopiit jaa'y. ³⁹ Kuts jam pyidsømdøø møj nøøjotp, jøts ja Espíritu Santo yiknøjkxøø abiky et ja Felipe, jøts ja Etiopiit jaa'y nika'ap ja t'uk'ejnnaa; jøts ja tyuu' tñøjkxnaa jotkujk. ⁴⁰ Jøts ja Felipe jap yja'aty mā kajp jap txøøwi Azoto. Kajp kajp idø'øn ja tkajpxwa'kxwidity sã dø'øn ja anmija'win ñitso'ok'att. Xjats ojts jap yja'tni mā kajp jap txøøwi Cesarea.

9

Ku ja Saulo tyiktigajch ja chinaa'yin

¹ Xjats ku ja jade'en, jødsyim ja Saulo tkidyimya'dyigøø ja o'jkin, kuwani tyimdyanekwa'añ ja' pøn yjanchja'widíp ja Jesús yja'. Paty ojts tninijkxy ja teetywindsøn, ² jøts t'ats'amido'ot ja nøky ja tiy'ajtin. Ja'ats ja myinøjkxp jøts ja ttuk'ext ja teetyi pøn jam ttundíp tsaptøjkjotp mā txøøwi Damasco, winets ja t'ixa'at pøni pøn ja Jesús yja' pyadu-ujnidíp, jøts jam ja tyiknøjkxt kø'tsumy Jerusalén, wan tjyaa'yí wan tjatø'øxyi. ³ Kuts jam yja'atwaani Damasco, winets ojts jotmøn ja jaj ñawidityi midi kidakp tsajpjøtpy, janch tsamamp ja jaj. ⁴ Winets ja Saulo kyidaay, jøts tmadøøø ja ayuujk ku ja yide'en wya'añ:

—Saulo, Saulo, ¿tiku ø xjemduñ xeduñ?

⁵ Xjats ja Saulo tyiktiy:

—¿Mbønimts me teety idø'øn?

Jøts ja y'adsoojøø:

—Øts idø'øn Jesús, nay yø' midi mjemdumpy mdedumpy. Kø'øm me mnay'ayo'onduñiyi jade'en kidi tsakaa ku ja ti tnepy, jøts ja kø'øm kujp ñadyukyø'ødyiyi.

⁶ Xjats ja Saulo yjanchmibejpøjknaa ku jade'en yiknøjmi, jøts wyaañ:

—¿Timits me teety xamidsokp, ti ø ndu'ump?

Winets ja nwindson'ajtim ñimaajyøø:

—Pidø'øk jøts jam mnøjkxt kajpjotp, jamts myiktukmado'ot pøni ti mdu'ump.

⁷ Xjats ja Saulo yjamyøøt nayide'en yjanchø'jkidøø ku ja Saulo y'ayuujk ja jade'en tmadojidi, jøts ka'ap ja t'ejxtøø pøni pøn ja myigajpxpy. ⁸ Winets jatyi ja Saulo pyidi'jky, jøts ku ja yjawin'eixwa'kxy, ka'ap ja ti t'ejxpaaty. Winets ja myigu'uk y'ukwejtsniyidøø, jøts ja yiknøjkxi Damasco. ⁹ Jamts chinaay tigøøk xøøw jøts niti tka'ijxy, ni kyakay ni kya'uuky, niti tkatuñ.

¹⁰ Jamts idø'øn tu'uk chinaamyi yaa'dyøjk pøn tjanchja'wíp ja Jesús, Ananías, idø'øn ja xyøøw, winets ja nwindson'ajtim ojts tninijkxy ja Ananías, jøts ja tnimaay:

—¡Mets Ananías!

Xjats ja Ananías t'adsøøy:

—¿Ti, teety?

¹¹ Xjats nay jatyi ñimaajyøø:

—Pidø'øk jøts mnøjkxt mā ja tuu' yiktijy Tidyuu', jøts ku jam mja'att Judas tyøjkwindum, jamts xyiknidøøwit ja Tarsit jaa'y midi txøøw'ajt Saulo. Dios'ajot'ajtp

inet ja jam, ¹² jøts tø ja nayide'en tnijawⁱ agumaa'gyøjxp, ku me mnøjkxt jøts ja wyin'ejxwa'kxkojmit wa'ats ku xkønixajt.

¹³ Kuts ja jade'en tmadøøy ja Ananías, jøts ja wyaañ:

—Janch namay, teety, idø'øn ja jaa'y tø xukmadowdi ku yø Saulo tjanchjemduñ tjanchteduñ ja' pøn mets mjanchja'wiyip jam Jerusalén. ¹⁴ Ixyamts ja tømija'aty nay ya ja tiy'ajtin, midi ja teetywindsøn ja ojts t'amidøy jøts ja tyiktsoont midi me mbaduujniyip.

¹⁵ Winets ja nwindson'ajtim wyaañ:

—Nøjkx x'ats'ixy ja Saulo, tø øts ja nwi'ixy, nyiktunwampy øts ja', abikyajp øts ja ngaxwa'añ. Japts øts x'atsnigajpxt x'atsnimadya'akt, jøts ja ttukmado'ot ja jamit jaa'dyi møøt ja' wyindsøndøjkti jøts nayide'en ja ya'at israelit jaa'dyi. ¹⁶ Nduk'exp øts ndukmado'op øts sudso jawyeen tyu'unt, jøts kuwanⁱ nayide'en tmi'ayo'ot øts ngajpxy øts n'ayuujk ku ja jaa'y yjemdunit tyedunit.

¹⁷ Xjats ja Ananías ojts tninijkxy ja Saulo. Kuts ja yja'jty, jøts ja ja'ayi ojts tkønixajy jøts yide'en tnimaay:

—Migu'uk Saulo, øts tø xkexy ja nwindson'ajtim Jesús, nay ja' midi ojts x'ixy jam tuu'am, ja'ats øts tø xkexy jøts me nyikwin'ejxwa'kxt jadigojk, jøts ja Espíritu Santo nayide'en mdatøjkinⁱyit.

¹⁸ Xjats jotmøn kya'ay wyeengøjxp jade'en jajtp ja t'ixy ejximi ajkx jimeeñin, winets wyin'ejxpiky jadigojk. Xjats ja Saulo pyidøknaa, jøts ojts ñøbety. ¹⁹ Jøts ja jadigojk kyaabyiky, winetnimts ja myøjaaw tpijky, jøts jap yjaaktsinaay ja majtsk xøøw ja tigøøk xøøw møøt ja' pøn tjanchja'widip ja Jesús jam Damasco.

Ku kyajpxwa'kxy ja Saulo jam Damasco

²⁰ Xjats ja Saulo tkajpxwa'kxnibøjkøø jam tsaptøjkjotp, yide'en ja wyaañ ku ja Jesús y'U'nk'atyⁱ ja Dios Teety. ²¹ Xjats ja ñigyumaap tjanchja'widøø pøn jaty ja jam patmadojyøø, jøts ja xem yam ñagyajpxidøø, jøts yide'en ñawya'añidøø:

—¿Kidi nay ja jaa'yip yø' midi jam Jerusalén y'ijty tkamaa'kxp ja myigu'uk ku ja tpabøkti ja Jesús? ¿Kidi ja'ajip yø tø t'uknimiñ jøts tmajtsmukøxt ja Jesús yjanchja'wibidi, jøts ttawinguwaawit ja møj tiidyumbidi?

²² Xjats ja Saulo jinaxy yjaaktyimkyajpxwa'kxy, jøts ja yikxon tyimñigajpxy jøts ku ja Jesús ya tø yjanchyikexy yiknitsokpi, jøts ja israelit jaa'y jadi'iñi myondi y'ookti pøn jaty jam wyinaty tsinaadyip Damasco, niti kajpxy niti ayuujk ja'adi.

Ku ja Saulo ayu'uch kyeejky

²³ Xjats kyimjekñim ja israelit jaa'y tkajpxy'ajtnidøø jøts ja tyik'ooktit ja Saulo; ²⁴ jatyⁱ Saulo ja tnija'wiyiñ. Winxøøw windsuu ja myidsep y'awejx'ityi ma pidsømdaajk jam, jamts ja tyimyik'oogiyit. ²⁵ Winets ja Saulo ja myigu'uktøjkti pyiktaajkiyøø kachjotpy jøts ttanikiñaxti ja pøch midi nawidity tukajpaa', jøts nika'ap jam ja pyidsimy ma ja myidsep y'awijxyi, paty idø'øn ja kya'ø'jky.

Ku ja Saulo jam yja'jty Jerusalén

²⁶ Xjats ku ja Saulo jam yja'jty Jerusalén, jøts ja tminamyukwa'añi pøn ja Jesús tjanchja'widip. Janchtsø'jkidipts ja', kumi ka'ap ja tjanchjawidi jøts kudam ja Saulo nayide'en tjanchjawi ja Jesús. ²⁷ Paty idø'øn ja Bernabé wyajiyøø, jøts ttukwinguwa'jkøø ja Jesús kyudanaabyidi. Jøts nay ja' ttukmadoow sudso wyinaty tø t'ixy ja Jesús jam tuu'am, jøts nayide'en sa ja myigajpxiyøø, jøts nayide'en ja ttukmadøøy sa ja ojts jam jotmøk tkajpxwa'kxy ja y'ayuujk Jesús køjxp. ²⁸ Xjats ja Saulo jam jade'en tyaañ Jerusalén, jøts ja møøt wyidejtni pøn jaty ja Jesús yja' pyadundip. ²⁹ Jøts ja ka' ti tku-mayjawi, jotkujk ja tkajpxwa'kxi ja nwindson'ajtim yja', jøts ja ttamimadya'aky ja israelit jaa'dyi pøn ja griegit ayuujk tkajpxtip; yikxon ja ñadyawingugajpxiyidi ku ja ja xe ja ya tum jade'en kyanagyupijkyiyidi ja wyinmaa'ñ, ja'ats ja israelit jaa'y ñiwinma'ayidip jøts ja tyik'ooktit. ³⁰ Xjats ku ja myigu'uk jade'en tnija'widøø, winets ja yikwaanaa jøts

yiknøjkxiyøø jam Cesareit kajpjotp, jøts yikejxñim jøts ja ñøjkxt kyajpkijxpy midi txøøwip Tarso.

³¹ Xjats ja janchja'wibi pøn jaty tsinaadyip jam etjotp midi yiktejp Judea, Galilea, jøts Samaria, nekim ja jam chinaañidi, jøts ñija'wi'adøjtsidip ja Jesús yja' ja'adi. Jøts juuni ja tka'ukwindsø'ogidi, ejtp ja twindsø'ogidi jøts namayi'adøtstip ja nayide'en, ja Espíritu Santo ja amuum pudøjkijidip.

Ku ja Eneas chøøjky

³² Xjats ku ja Pedro wyinaty t'ayø'øy mā jaty ja janchja'wibi chøønidi, nayide'en ojts t'ixy ja janchja'wibi pøn jam tsinaadyip mā ja kajp txøøwi Lida. ³³ Jamts tu'uk tpaajty ja yaa'dyøjk midi txøøw'ajt Eneas, tyuktujk jumøjtíp ja pa'am ja wyinaty tø pyajtniyi, kyidyimpyidi'iky jøts køxuxyi pakxuxyi pa'am idø'øn ja myøøt. ³⁴ Xjats ja Pedro ja tnimaay:

—Eneas, Jesús myiktsojkip. Pidø'øk, wejtsjø'øk yø mmaabajt.

Xjats ja Eneas pyidi'iky jaty, ³⁵ xjats niduki'iyi ja jaa'dyi pøn jaty kugajp'ajttíp jam Lida jøts jam Sarón kuuyi ja tnija'widøø, winets ja tyikutigøødyi ja møjaa'chinaa'yin midi ja wyinaty chinaadyip, jøts ja nwindsøn'ajtim yja' tpabøjknijidøø.

Ku ja Dorcas yjujkpyiky jadigojk

³⁶ Nay ja'abi xøøw nay ja'abi jumøjt idø'øn chinaay tu'uk ja tø'øxyøjk jam Jopit kajpjotp, Tabita dø'øn ja xyøøw, yide'en yiktijy griegit ayuujk, Dorcas. Jøts nayi Jesús idø'øn ja yjanchja'wimyip paty ja tjanchpudøki pøn ayoop pøn winmaapy. ³⁷ Winetsik idø'øn ja pa'am pyaajtniyaa jøts ja tyimyik'o'jkijyøø; jøts ku yikpujnaa, jøts ojts yikpikta'aky myiduknipatøjkixpy. ³⁸ Xjats kumi wingonts ja kajp midi txøøw'ajtp Lida, mā jap wyinaty ja Pedro t'ayø'øy ja myigu'uktøjkti, jøts kumi tø ja wyinaty ja Dorcas myigu'uk tnijawidi ku ja jam wyidity, winets ja ñagyaxidøø namajtsk jøts ja t'atstukmado'odit ja Pedro jøts mye'ent putyi.

³⁹ Xjats ja Pedro jaty tmøødi ja kugajpxtyi. Ku jam yja'ttøø, jøts jap tyimwyaanøjkxiyøø mā ja oo'kpi jap, winets ja Pedro ja ku'øktyø'øxyi ñawa'kwidejtiyøø, jøts ja tyuk'ijxyi ja wet midi wyinaty ja Dorcas tø tyik'øyi. ⁴⁰ Winets ja Pedro tkajxpidømguixy ja jaa'dyi, jøts ja ñagyuxendyaajkøø, jøts kuts ja twindsapkaajpxkijxy ja oo'kpi, xjats ja tnimaay:

—Tabita, pidø'øk.

Winets ja oo'kpi wyin'ejxwa'kxy jøts ja Pedro yikwin'ixy, winets chinaagyukøø. ⁴¹ Jøts ja kyø' ja tmajtstøø jøts ja jade'en pyidi'jky; winetnømts ja twaadsøø ja Pedro ja myigu'ukti midi ja kyajxpidøøm jøts nayide'en ja ku'øktyø'øxyi, xjats ja twin'ejxtøø, tødam yjujkpyiky ja oo'kpi wyinaty. ⁴² Ñija'wigyøxtøø niduki'iyi ja Jopit kajp jaa'y, xjats namay tjanchja'widøø ja Jesús. ⁴³ Nay jam idø'øn ja Pedro tyaa'ni kawinaak xøøw jam po'ogoo'tspi tyøjkwindump, ja' idø'øn ja xyøøw Simón.

10

Ku ja Pedro tmigajpxy ja soldadi windsøn pøn yiktejp Cornelio

¹ Jam idø'øn tu'uk y'ijty ja yaa'dyøjk mā kajp jam txøøwi Cesarea, Cornelio dø'øn ja xyøøw, ja'ats idø'øn ja soldadidi tukpiky tnwindsøn'ajtp pøn yikxøømmøødyøø Italiáni.

² Xjats ja Cornelio møøt ja y'u'nk møøt ja ñidø'øxy, yjanchja'myatstíp idø'øn ja Dios Teety ja', jøts nayide'en twindsø'ogidi. Ajot'ajttíp idø'øn ja Dios jabom jabom, jøts nayide'en tjanchtabudøjkidøø ja myeeñ ja ayoobi jaa'y. ³ Tu'uk idø'øn ja xøøw sa yjajty sa kyubejty ja Cornelio, ku ojts wa'ats t'ixy awinmaa'ngyøjxp ja Dios Teety y'ankilis, tigøøk yaxpin idø'øn wyinaty ku ojts ñidøkiyi mā ja jap wyinaty, winets ja xøøw ja tyamigajpxiyøø:

—¡Mets Cornelio!

⁴ Winets ja Cornelio tsø'ogijawi twin'ixy, jøts t'adsøøy:

—¿Ti, teety?

Xjats ja ankilis ojts ñii'mxyiyi:

—Tø ja Dios Teety ja m'ajot'ajtin mgupøjkxyi, jøts ku tø xpudøki nayide'en ja ayoobi jaa'dyi. ⁵ Kax mgugajpxy jøts jam ñøjkxtit Jope, wan ja Simón t'atswawdi pøn nayide'en yiktejp Pedro. ⁶ Jam ja myidsøøni po'ogoo'tspi wyindump pøn yiktejmip nayi Simón, pøn jam tsinaapy mejy wingon. Ja'ats mdukumadoowiyip pøni ti mdu'ump.

⁷ Xjats ku ja ankilis ñøjkxnaa, winets ja Cornelio twaadsøøy ja tyumbi namajtsk. Wyaadsoow nayide'en ja soldadi tu'uk pøn ja møøt ñamyayi, jøts pøn nayide'en twindsø'jkip ja Dios Teety. ⁸ Xjats ja ttukumadoogijxy ja kyugajpxtyi sa jaty ja ankilis ja wyinaty tø ñii'mxyiyi, winetnimts tkejxy.

⁹ Xjats ku kyimjabom'ajty, jawaani jam kyaja'tnidi kajpjotp ma ja yikaxtøø kugajpxy'ajtpi, winets ja Pedro pyejty jam tøjköjxp dios'ajot'ajtpi, kujk xøøw et idø'øn wyinaty. ¹⁰ Janch yu'oo'knip idø'øn ja wyinaty jøts ja kyaawya'añ; japnimts ja kaaky wyinaty y'øyi, ku jotmøn t'ejxpaajty jade'en kidi jaa'y kyumaa'y, ¹¹ ku ja tsajp y'awa'ach jøts t'ixy ñaxkida'aky, jade'en ja t'ixy kidim ja møj manti, jøts tum wendi maktaxk iskiin. ¹² Jøts jam mantikøjxp mayjøøjp ja jiyujk t'ixy, jam ja tsaa'ñ, jam ja joon, jøts jam nayide'en ja maktaxkpi tekpyi jiyujk. ¹³ Winets tmadøøy ja ayuujk midi tsoo'mp tsajpjøtpy, jøts ja yide'en ñii'mxyi:

—Pidø'øk Pedro, yik'ook inet yø jiyujk tu'uk jøts xtsu'tutst.

¹⁴ Xjats ja Pedro t'adsøøy:

—Ka' teety jade'en; niwindii øts jade'en ngatsu'uch ja kya'øysi kyawa'atspi, midi kapaat'ajtiyip yiktsu'tutst sam ja Moisés kyutujk.

¹⁵ Xjats jadigojk tmadøøy ja kajpxy ja ayuujk, jøts wya'añ:

—Kidi jade'en xka'ødyijy, tum mbaat'ajtip yø jiyujk tsu'uch midi Dios Teety tø ttanibiktaagi.

¹⁶ Tigøøk ojk idø'øn ja manti wyimbijty y'adijy, jøts pyatøjkiñaa nay jap tsajpjøtpy.

¹⁷ Ixjam ja Pedro jade'en wyinaty myay tyajy, ti dø'øn ja tyijpy jade'en midi wyinaty tø t'ixy ku ja Cornelio kyugajpxy yja'ttøø, tø ja wyinaty tyiknidøøwidi ja Simón tyøjk. ¹⁸ Kuts ja jam yja'ttøø tøk'agip'y, winets møk tkugajpxidøø pøni jap ja Simón midi nayide'en yiktejp Pedro. ¹⁹ Kumi ja' wyinaty ja Pedro myimaapy myidajpñim midi wyinaty tø t'ixy, winets ja Espiritu Santo ñimaajyøø:

—Nidigøøk ixyam ja jaa'y m'ixa'ayiyi. ²⁰ Pidø'øk, winak jøts xmøødit yø jaa'y, kidi ti xpawinmay, nay øts yø' ngugajpxy.

²¹ Xjats ja Pedro tníwinajky ma wyinaty ja Cornelio kyugajpxy y'awejxti, jøts ja tnimaay:

—Øts meets idø'øn x'ixaapy. ¿Ti dø'øn mnimendip?

²² Xjats ja kugajpxy t'adsoodøø:

—Ja Cornelio øø xyikugajpxy'ajtp, janch øy jaa'y ja' jøts nayi wyindsø'jkip ja Dios ja', xjats nayide'en janch tsojkip ja' ja israelit jaa'dyi. Nay ja Dios Teety idø'øn y'ankilis ja tnimaajyøø jøts me myikwa'at, jøts jam njaa'mint ma ja chøøni ja Cornelio, jamts mets x'atstukmado'ot pøni ti jaty me mnija'wip, jøts ti jaty mmadya'akwampy.

²³ Xjats ja Pedro tkuwaa'wiña tyøjkjøtpy, jøts jamyi myaadøø. Xjats ja kyimjabomnim choo'ndøø, winets ja Pedro twaay ja myijanchja'wibi winaagin midi jam Jope tsinaadyip.

²⁴ Jøtsnim kyimjabom yja'ttøø jam Cesarea, ma ja Cornelio y'awijxyiyi niduki'iyi møøt ja myigu'uktøjkti, midi wyinaty tø twaadsowdi jøts ja tpatmado'odit ja Pedro kyajpxy y'ayuujk. ²⁵ Kuts ja jam tyimyjat'tøø ja Pedro, xjats ja Cornelio y'adsoojyøø jøts ja pyidsimy tyøjkjøtpy, xjats ja jaty ñagyuxendyaajki ja Pedro wyingujky, jøts ja jade'en yikwindsø'øgi ejxim ja diosin. ²⁶ Winets ja Pedro jaty twejtsji'iky, yide'en ja wyaañ:

—¿Tiku ø xwinguxaani? Pidø'øk, pø nay jaa'yts øts nayide'en sa mets.

²⁷ Jøts nay madyaktipnim idø'øn ja wyinaty, ku jap tyøjkidøø tøjkötpy ma wyinaty ja jaa'y jap yjanch'awejxti namay. ²⁸ Xjats ja Pedro tnimaay yide'en:

—Meets migu'uktøjkti, mnija'wip meets jøts ku øøts wenk n'israelitjaa'y'aty, ka'ap øøts n'øyjawi jøts øøts nmigu'uk tmøøtnabyaattit ja wenk jaa'dyi uk tyøkidit ja' tyøjkjotpti, ka'ap øøts ja n'ødyijy, ka'ap øøts ja nwa'atstijy. Tøts øts Dios xuknijawi, jøts ku ka'ap jade'en y'øyi jøts øts jade'en nwinma'aty. ²⁹ Ja'agøjxp ø nmiñ jatyi ku mee xwaadsøø. Jøts nnijawiwyp øts ixyam ti meets idø'on xamigajpxwamp ku meets xwaadsøø.

³⁰ Xjats ja Cornelio t'adsøø, yide'en ja tnimaay:

—Ixyam myimaktaxk xøøwiñi ku øts yide'en njajty, ya øts wyinaty ndøjkjøjty n'ayuu'aty, jøts ja Dios wyinaty n'ajot'aty winakxyøøw, ku øts jotmøñ n'ejxpaajty tu'uk ja yaa'dyøjk, jøts janch tsamamp ja wyet amuum kyaxi'iky. ³¹ Winets øts yide'en xnimaay: “Mets Cornelio, tø ja Dios Teety ja mdios'ajot'ajtin mgupijkyiyi, jøts ku tø xpudøki nayide'en ja ayoobi jaa'dyi. ³² Kax mgugajpxy jøts jam ñøjkxt Jope, wan ja Simón t'atsway pøn nayide'en yiktejp Pedro. Jam ja myidsøøni ja po'ogoo'tspi wyindump midi jam tsinaapy mejy wingon. Ja'ats mdukmadowiyip pøni ti mdu'ump.” Jade'en øts idø'on ja ankilis xnimaay. ³³ Paty øts ngugajpxy jatyi nguejxy jøts me m'atsyikwa'at, pø janch øy ku tø xpaduñ ku tø mmiñ ya. Wa'ats ja Dios Teety x'ijxyim xnija'wa'am ku adøm ixyaadi, ku øø nbatmadoowa'añ ja nwindson'ajtim kyajpxy y'ayuujk midi ja tø mdamigaxiyi, jøts mets ja ya jade'en xnigajpxt.

Ku ja Pedro kyajpxwa'kxy jam Cornelio tyøjkwindump

³⁴ Winets ja Pedro kyajpxnibøjkøø, jøts ja yide'en wyaañ:

—Ixyam njanch'ixy njanchnijawi ku ja Dios Teety chøjkpy ja' øpyønjaa'yi, ka'ap ja' tka'øyjawi, ³⁵ kyupijky ja' pøni pøn windsø'jkijy, jøts y'øyjaa'y'attit nayide'en. ³⁶ Dios Teety idø'on jade'en ojts ttukmadø ja Israelit jaa'y, ku xmi'øy'atwa'añindi jadigojk ja Jesucristo køjxp pøn nwindson'ajtyindip niduki'iyi.

³⁷ Pø mnija'wipxi meets niduki'iyi sa yjajty sa kyubejty jam israelit jaa'y y'etjotpti, jam idø'on cho'ondaajky ma et txøøwi Galilea, tø wyinaty ja Juan Bautista jawyeen kyajpxwa'kxy, xjats ja jaa'y ja nayide'en namay tyiknøbejty. ³⁸ Ja pø mnija'wipxi meets nayide'en ku ja Dios Teety ja Jesús ttuktatøjkøø ja Espíritu Santo møøt ja myøk'ajtin, jøts nayide'en sa jaty ja wyidity ku ja t'ødyuñ ja jaa'y, jøts ku ja tyiktsø'øky pøni pøn ja miku' møøt y'itynim. Ja'agøjxp ja jade'en ttuuñ ku ja Dios Teety ja ejtp tmøøt'ity. ³⁹ Øøts idø'on tø n'ixy, øøts idø'on tø nnijawi, sa jaty ja Jesús ttuuñ jam Israelit kyamwemp kyamjotpti, jøts nayide'en jam Jerusaléngit jaa'y myøjkajpjotpti. Jøts nay tø øøts ja n'ixy sa jaty ja yjajty ku yik'o'jkijyøø ja jaa'y, jøts sa yikmitsumbejty jam kruskøjxp. ⁴⁰ Winets ja Dios Teety ojts kyidigøøk xøøw tyikpidsiimy jap oo'kpi jutjotpy ma ñajxøjkøø ja Jesús, xjats øøts ja xukyikwingaxi'jky. ⁴¹ Ka'ap ja yiktuk'ejxtøø ja mayjaa'dyi, øøts yide'en yø xukyikwingaxi'jky, kumi tø øøts ja wyinaty jawyeen xwi'ixy, jøts øøts ja n'ext, jøts øøts ja nnijawit. Xjats ku ja jade'en jadigojk yjujkpyijky, jøts øøts ja ngaay jøts øøts ja n'uuky møøt. ⁴² Xjats øøts ja xani'ane'emy ja kajpxwa'kxk, jøts øøts ja jaa'y ndukmado'ot nduknijawit ku ja Dios Teety ja kø'øm tpiktaajky ja Jesús, jøts ja jujkpyi ja øøkpyi ttiidyu'unt. ⁴³ Nayide'en idø'on wyinaty jekyip ja Dios Teety kyugajpxy tø tkajpxti tø tmadya'akti ja Jesús, jøts pøni pøn tjanchja'wip ja Jesús, winets yikmaa'kxuktit ja pyøky. Jade'en ja Pedro ja tnimaay ja jaa'y.

Ku ja Espíritu Santo ttatøjkøø pøn ka'israelit jaa'yidi

⁴⁴ Ñagyajpx'adøtsp wyinaty ja Pedro, ku ja Espíritu Santo tyatøjkijyidøø niduki'iyi ja jaa'y pøn jaty jam wyinaty patmadojyip ja Pedro. ⁴⁵ Xjats ja israelit jaa'y pøn ja Pedro tpadsoo'niyidøø ku ojts ja kugajpxy jam wyayidi, winets ja ñigyumaap tjanchja'widøø ku ja Dios tyuktatøjkijyidøø ja Espíritu Santo øpyønjaa'yi, pøn ka'ap israelitjaa'yidi. ⁴⁶ Ja'agøjxp idø'on ja ojts yiknijawi ku ja adsu'jky ojts tjanchkajpxti tum ja wenk ayuujk, jøts ku ja nayide'en tjanch'øyja'widøø ja Dios. ⁴⁷ Xjats ja Pedro tnimaay ja myigu'uk midi myøøtwidijty:

—¿Ti pøn mibaat xkadukyiknøbajtimp yø jaa'y, pø tøxi Espíritu Santo tyatøkiyidi jade'en sam adøm?

⁴⁸ Xjats ja Pedro tni'ane'jmy jøts ja ñøbattit ja nwindson'ajtim Jesucristo myøk'ajtingøjxp. Jøts ja Pedro møkta'aky yiknimaay, jøts ja jam yjaakta'anit ja winaak xøøwin.

11

Ku ja Pedro ttamimadyaajky ya'atpi ayuujk pøn tjanchja'widip ja Jesús jam Jerusalén

¹ Xjats ja tni'awidøø ja Jesús kyudanaabyidi pøn jam tandi Judeit y'etjotp, jøts ku ja wenk jaa'y wyinaty tø tkupiky ja Dios kyajpxy y'ayuujk pøn ka'ap y'israelitjaa'yidi.

² Xjats ku ja Pedro jadigojk wyimbijty jam Jerusalén, winets ja twindsø'ødyøø ja Pedro:

³ —¿Tiku ja tø x'ats'ixy ja wenk jaa'y pøn ka' y'israelitjaa'yidi, tiku møøt tø m'atskay m'atsjikxy?

⁴ Xjats ja Pedro tnmadyajktøjkøø sa ja yjajty sa ja kyubejty ku ja ojts yikway yikwich, jøts ja wyaañ:

⁵ —Jam ø wyinaty Jopit jaa'y kyajpjotp, jøts Dios'ajot'ajtpi wyinaty, jøts jade'en nja'wøø kidi ja jaa'y kyuma'ay, jade'en n'ejxpaajty ejxim ja møj manti, ku n'ijxy kyida'aky tsajpwemp tum wendi maktaxk iskiini, jøts wyingøøñ mā øts jap wyinaty. ⁶ Xjats nwin'ijxy yikxon ti dø'øn jap mantijøtpy, winets jap n'ejxpaajty janch mayjøøjp ja jiyujk, jap wyinaty tsaa'ñ, jap wyinaty joon, jøts nayide'en ja jiyujk midi maktaxk ja tyeky, jøts nayide'en midi janch'awa'andi. ⁷ Winets nmadøøy ja ayuujk ku ø xnimaay: “Pidø'øk, Pedro; yik'ook inet yø jiyujk tu'uk jøts xtsu'utst.” ⁸ Jøts ø n'adsøøy: “Ka' teety jade'en. Niwindii øts jade'en ngatsu'uch ja kya'øybi kyawa'atspi, midi kapaat'ajtiyip yiktsu'utst sam ja Moisés kyutujkin.” ⁹ Winets øts jadigojk xmigajpxy jøts øts xnimaay: “Midi ja Dios tø tyikwa'ach kidi xka'ødyijy.” ¹⁰ Tigøøk øjk idø'øn ja manti wyimbijty y'adijy, jøts pyatøjkiñaa nay jap tsajpjøtpy. ¹¹ Xjats ku øts jade'en njajty, winets nay jatyi yja'ttøø nidigøøk ja yaa'dyøjktøø mā øts ja wyinaty, Cesarea dø'øn ja choondi jøts jam ñøjkxti mā øts ja xpaattøø. ¹² Winets øts ja Espíritu Santo xnimaay jødsik øts ja kugajpxy nmøødidit, jøts ku nayide'en ka'ap ti nbawinma'aty. Winets ø xpadso'ondi nidudujk ja Jopit jaa'dyi pøn tjanchja'widip ja Jesús. Xjats ku øøts jam nja'jty Cesarea, winets øø niduki'iyi ndøjkøø Cornelio tyøjkjotp pøn ø xnigajxøø. ¹³ Winets øøts ja xukmadøøy sa ja yjajty sa ja kyubejty jam tyøjkjotp, ku ja ankilis tu'uk t'ejxpaajty, jøts ku ja ñimaajyøø: “Kax mgugajpxy jøts jam ñøjkxt Jope, wan ja Simón t'atsway midi nayide'en yiktejp Pedro. ¹⁴ Ja'ats mdukmadowiyidip sudso m'anmija'win y'awa'atspidsø'ømdit møøt mmigu'uktøjkti.” Jade'en ojts ñi'mxyi. ¹⁵ Xjats ku ojts nmigajpxnibøki niduki'iyi, winets ja Espíritu Santo tyatøkiyidøø, nayide'en sam adøm xatøjka'andøø ku ojts myiduk'ojk tyimyñ. ¹⁶ Xjats ku øts jade'en n'ijxy, winets øts jatyi nja'myejch ja nwindson'ajtim y'ayuujk sa ja wyaañ ku ja Juan Bautista mayjaa'y nøø ttuktanøbejty, jøts ku ja wyaañ: “Wenk mee mjatt, jade'en ku Espíritu Santo mdatøkiyidit.” ¹⁷ Pøni tyuktatøkiwyampy ja Dios Teety ja y'Espíritu Santo ja wenk jaa'dyi jade'en sam adøm xuktatøjka'andøø, kumi adøm njanchja'windip ja Jesús, ¿ti øts ja jade'en ngaduktunip? Tsaachtyi øts idø'øn, pø køømxí ja jade'en ttunwa'añ.

¹⁸ Ku ja jade'en tmadoodøø ja Pedro y'ayuujk, winets y'amongøjxtøø jøts jotkujk'ajttøø, jøts ja Dios Teety tmøjpiktaajktøø, jøts yide'en wyaandøø:

—¡Tø ja Dios Teety ttanibiktaagi jøts nayide'en yikunuu'kxtit øpyønjaa'yi ku ja tmajst-
stu'uttit ja kya'ødyunk, winets ja tsinaa'yin xemikøjxp tpaattit!

Ku ja jaa'y ja Jesús tjanchja'wi'okwa'añ jam Antioquía

¹⁹ Ku ja Esteban t'ukyik'oo'ktøø, winets t'ixaañibøjkidøø pøn ja Jesús tjanchja'widip, xjats ja winaagin kyaknøjkxtøø Fenicia, Chipre, jøts nayide'en Antioquía. Japts ja tkajpxwa'kxtøø ja øgyajpxy ja ømyadya'aky. Ka'ap ja nugo ajawi tndyukmadowdi o

pøn, agø'ømyi ja tnadyamimadya'agyidi tuk'israelit jaa'dyi. ²⁰ Xjats winaagin ja'adi midi jam tsoo'ndip Chipre jøts nayide'en Cirene, ku ja nay jam yja'ttøø Antioquía winets ja nayide'en tkajpxwa'kxtøø ja øgyajpxy ja ømyadya'aky, midi anmija'win tyiknitso'ok'ajtp, ja'ayi tyukmadooip pøn ka'israelit jaa'dyi. ²¹ Janchkunuukxidi ja Dios ja' ku ja kyajpxwa'kxti, winets ja japit jaa'y tjanchyiktigatstøø chinaa'yindi, jøts ja nwindson'ajtim yja' tpabøjkiñidøø.

²² Xjats ku ja jade'en tnija'widøø ja Jesús yjanchja'wibidi pøn jam tsinaadyip Jerusalén, winets ja tkaxti nay ja' myigu'ukti pøn txøøw'ajt Bernabé, jøts jam ja ñijkxy Antioquía. ²³ Xjats ku jam yja'ljty, jøts ja t'ijxy jøts ja tnija'wøø sa ja Dios Teety wyinaty tø tkunuu'kxy ja Antioquiit jaa'y ku ja chinaa'yin wyinaty tø tyiktigatsti, winets ja janch yotkujk'ajty yjanchxondaajky. Xjats ja tkajpxjot'amøkøø jøts amumjoojt ja nwindson'ajtim yja' tpaduujnidit, jøts nijuuni tkamajstuttit. ²⁴ Janch yujy idø'øn ja Bernabé, yjanch-møøt'ajtpy ja Espíritu Santo, jøts nayide'en ja Dios t'ajot'ajty. Xjats jade'en ja namay jaa'y tpabøjkidøø ja nwindson'ajtim yja'.

²⁵ Xjats ku ja jade'en yjajty kyubejty ja Bernabé, winets ja ñøjkxkojmaa ma txøøwi Tarso jøts ja t'ats'ixa'at ja Saulo. Kuts ja jam tpaajty, winets ja twaanijkxy ma ja wyinaty tø tnidsøøn jam Antioquía. ²⁶ Japts chinaadyøø tu'uk jumøjt ka'pxy møøt ja janchja'wibidi jøts ja tyik'ixpøktøø. Nay jam idø'øn Antioquía ma ojts ja Jesús yjanchja'wibi yiktejtí mijawyeen cristianos.

²⁷ Nay ja'abi xøøw nay ja'abi jumøjt ku ja Dios Teety kyugajpxy ojts ñijkxy nay jam Antioquía, pøn jam tsoo'ndip Jerusalén. ²⁸ Xjats ku yja'ttøø, jøts tu'uk txøøwi Agabo, ja' idø'øn jam ojts tyanaay'øyi mayjaa'y agujkp, jamts ja kyajpxwa'kxy Espíritu Santo myøk'ajtingøjxp, jøts wyaañ jøts ku ja yuu møk'ampy myeenwa'añ ya naxwiiñ. Janch tñy yide'en, janch jajt idø'øn ja jade'en winet ku Claudio wyinaty myøjwindsøn'aty. ²⁹ Xjats ku ja jade'en ja janchja'wibi tmadoodøø ku ja yuu myenwa'añ, winets ja tkajpxy'ajttøø jøts pudøjkin ttanigaxtit ja myigu'uk pøn jam tsinaadyip Judea, jade'en pøni sa kø'øm tmo'owa'andi nidu'uk nidu'uk. ³⁰ Jade'en ja tundøø, jøts ja ttamigajxidøø ja Bernabé møøt ja Saulo, jøts jam tkømo'odit ja jamit møjaa'dyøjkti.

12

Ku ja Herodes tnankyik'o'jkøø ja Jacobo jøts ja Pedro ja'ayi yiktsuumy

¹ Xjats nay ja'abi xøøw nay ja'abi jumøjt ja møj windsøn Herodes tjemdunibøjki ttedunibøjki winaagin ja Jesús yjanchja'wibidi. ² Jøts ja ttukta'ø'jky ja yøñchujx ja Jacobo, ja Juan y'ajch, ³ jøts ja t'ijxy ku ja israelit jaa'y ja yjawí jade'en ttaxonda'akti ku ja jade'en y'adi'ich. Xjats ja Pedro yjaaktyimyikmajch paski xøøjøøjty, winet ku ja tsapkaaky jadi'iñi yikay midi kalevadurimøøt. ⁴ Xjats ku jade'en ja Pedro yikmajch, winets ja windsøn Herodes ja pyiktaajkiyøø puxøjkjøtpy, japts soldadi ja y'ejx'ityiyi maktaxk piky jøts maktaxk soldadi tukpiky jaty. Jade'en ja Herodes yjawinmaay jøts ja tyikpidsø'ømt ja Pedro paski xøøguixy, jøts ja mayjaa'y ttuk'ejxwa'añ ttuknijawiwya'añ. ⁵ Jap wyinaty ja Pedro tsumy, jøts nayide'en ejtp idø'øn ja y'ejx'ityiyi ja soldadi, winets ja Jesús yjanchja'wibi tni'amidowidi tnibøktsowidi ja Pedro amumjoojt, jøts ja ttukmadooø ja Dios.

Ku ja Dios Teety y'ankilis ojts tyik'awa'atspidsimy ja Pedro jap puxøjkjøtpy

⁶ Nay ja'abi tsuu ku wyinaty tyimbyaatwaani ja kajpx'aats ku ja yikpidsømiyit jøts ja kajp jaa'y y'ejxit ñijawiyit, jøts jaakmaap jap wyinaty ja Pedro. Jap wyinaty adsow aduuk ja soldadi ñama'ayiyi, puxkadeen køxøch wyinaty ja Pedro, jøts nayide'en ja soldadi t'ejx'etti ja tøjk'aaw. ⁷ Winets jaty ñimejniyøø ja nwindson'ajtim y'ankilis, jøts jap puxøjkjøtpy yjapjøjkijxy. Xjats ja Pedro yikjijxy jøts ku tyikniwijy, winets tnimaay yide'en: —Pidø'øk putyi.

Kuts ja pyidi'iky jøts ja kadeen jade'eñi kò'òm kyajnaa, ⁸ xjats ja ankilis ñimaajyiyøø yide'en:

—Nachumjøniiyikxon, jøts tawa'agi yø mgø'øk.

Xjats ku ja Pedro jade'en tpaduñ, jøts ja ankilis yjaaknimaajyøø:

—Tatøki yø mxox jøts øts ix'oojk xpayø'øty.

⁹ Xjats ja Pedro ix'oojk tpadsoø'ñ ja ankilis, ni tkanijawi pø janch kajanch ku ja yik'awa'atspidsømwā'añiyi. Jade'en jajtp ja tjawi ja Pedro kidi jaa'y kyuma'ay. ¹⁰ Xjats ku ja jade'en yiktsoo'niyøø ja ankilis, jøts jam ñaxti mā myidukpiky ja ejx'ejtpidi, jøts nayide'en twinaxti mā ja myimajtsk pikpyi ejx'ejtpidi, jøts jam yja'ttøø mā pux'agaj jam tuu' pa'am, winets ja pux'agaj kò'òm y'awaajch jøts pyidsømdøø. Xjats ku jade'en y'awa'atspidsømdøø, jøts yjaagyø'ødyi jadu'ukpi tuu', japnimts ja Pedro ojts yikmajtstu'uty nadyu'uk. ¹¹ Xjats ja tjanchja'wøø ku y'awa'atspidsiimy, jøts yide'en wyaañ:

—Pø janch jade'endamxi dø'on ku ja nwindson'ajtim tø tjanchkexy ja y'ankilis jøts øts ja xyik'awa'atspidsø'ømt jap puxøjkjøtpy, jøts ja israelit jaa'y møøt ja wyindsøn Herodes jade'en tøkamimajada'akti pøni sã øts ja' xtyimya'uktunwā'andi.

¹² Jade'en ja Pedro wyinmay, xjats ja ñijkxy jam María tyøkwindum midi ja Juan tyaagip, ja Juan midi nayi yikxøømoøpy Marcos. Ja' idø'on ja tyaak tyøkwindum ñijkxy ja Pedro mā ja mayjaa'y jam wyinaty tø ñamyukyidi, jøts idø'on ja jam Dios'ajot'atti. ¹³ Kuts ja Pedro twingøjxy ja tøk'agi'pyit agaj, winets ja kiixy Rode pyidsiimy tyøjkjøtpy, jøts ja ojts tpatmadøy pøni pøn ja'. ¹⁴ Xjats ku ja ojts tyukmadøy kudam ja Pedro kyajpxy, nika'ap ja tøjkyik'awaajch, janch jotkujk ja wyimbijty yukwøøñ chapwøøñ, jøts ja myigu'uk ja t'atstukmado'ot ku ja Pedro jap kyajpxy. ¹⁵ Xjats ja myigu'uk ñimaajyiyøø:

—iPø mguma'aymadyakp mets!

Jøts ja kiixy ja tyimyjanimaay ku ja tyimdyiy tyimyjanchi. Xjats ja ka'ap tyimyibøkti tyimwyandip ja':

—iKa'ap inet yø yja'aji; pø ja y'ankilis yø' midi nitanaajyiyip!

¹⁶ Ixap ja Pedro jøp'ijxy tyøkwingøxy. Jøts ku ja tyik'awatstøø ja tøjkaaw, jøts pø mā ja tyimyja'jttøø ku ja twingu'ejxidøø jøts kudam ja yjanchja'aji. ¹⁷ Ja'ayi ja Pedro ja kyø' tñanky'ejxøø jøts ja tukween y'ettit amøñi, winets ja tñimadyajknibøjkøø sã ja yjajty sã ja kyubejty ku ja nwindson'ajtim ojts yjuudyi jap puxøjkjøtpy; xjats ja nayide'en t'uknimaañaa jøts ja ttukmado'odit ja Jacobo, nayide'en ja Jesús yjanchja'wibidi, jøts ja tñijawidit.

Xjats ku jade'en t'uknigajpxkøjxnaa, winets ja choo'naa jøts ja ñijkxy abikyajp.

¹⁸ Xjats ku kyimjabom'ajty ku xyijñøø, winets ja soldadi ñigyumaap ñayja'wiyidøø ku ka'ap ja Pedro jap ukpøni. ¹⁹ Xjats ja Herodes møk pyagajxyidøø jøts ja t'ats'ixa'adit, ka'ats ja mā t'ukpaatnidøø. Xjats ja Herodes wyaadsojyidøø niduki'iyi jøts ja tyuknigajpxwā'añidi sudso'ampy ja Pedro pyidsiimy, winets ja Herodes ja yik'oo'kiñidøø. Xjats ku ja jade'en y'adijch, winets jam choo'naa Judeit y'etjotp, jøts ñøjkxnaa tsinaabyi jam Cesarea.

Ku ja Herodes y'ø'jky

²⁰ Xjats ja møj windsøn Herodes janch mi'ajkip ja jaa'y ja' pøn jam tsinaadyip Tiro jøts nayide'en Sidón. Xjats ja Tiro jaa'y møøt ja Sidóngit jaa'y tkajpxy'ajtnidøø sudso ttu'undit sudso tyaabyaattit. Winets ja kyugajpxy tkajxtøø jøts ojts tpaatti ja Herodes kyudsinaabyi pøn txøøw'ajt Blasto, ja'ats ojts tñøjmidi jøts tñøjmit ja wyindsøn Herodes, jøts ka'ap cheptu'undit jøts jotkujk chøønidit, ja'agøjxp ja jade'en tñimaadyøø ku ja yji'kxy jam tjuydi tkajpxti mā Herodes yikutuky. ²¹ Xjats ja Herodes twaadsøø ja namayjaa'y, jøts jap mye'endit mā kya'amaadyaajk, xjats ku ja jade'en myengøjxtøø ja jaa'y, winets ja ttatøjki ja xyox midi amuum tsamamp, winets kyajpxwā'kxñibøjkøø jam mayjaa'y wyingujkp. ²² Xjats ja mayjaa'y jade'en ñigyumaap tjanchja'widi ku ja jade'en kyajpxwā'kxy, jøts ja xem yam møk yjanchnøømdi:

—Yø' ixja kyajpxwa'kxy ka'ap yø yjaa'yí, dios yø'.

²³ Xjats ku jap wyinaty kyajpxwa'kxy, winets ojts jatyí ja nwindson'ajtim y'ankilis yikpa'ambaadyiyí, ja'agøjxp jade'en yjaty ku kø'øm ñamyøjpikta'agyiyí, jøts ku ja Dios ne'egi tkamøjpikta'aky. Ku ja jade'en pyikyí, tinø'øk idø'on jam y'am yjotp tøjkiña, ja'ats jadi'ñi tsu'tskøjxniyøø.

²⁴ Winets ja nwindson'ajtim y'ayuujk myøjtak'adøtsnaa, yikajpxwa'kx ja omagajp.

²⁵ Xjats ku ja jade'en tyungøjxtøø ja Bernabé møøt ja Saulo, ku ja tminaxti tmidøkidi ja pudøjkin, winets ja jap choonidøø jøts ñøjkxnidøø Jerusalén møøt ja Juan midi nayide'en yiktejp Marcos.

13

Ku ja Bernabé møøt ja Saulo myiduk'ojk choo'ndøø kajpxwa'kxpi

¹ Jam Antioquía wyinaty namay ja Jesús yjanchja'wibidi, jam ja kyugajpxy'ajtpi jøts nay jam ja yik'ixpøjkipidi. Ya'at idø'on jade'en yiktejtíp Bernabé, jøts ja Simón (midi nayide'en yiktejp Negro), nayide'en ja Lucio ja Cirenit jaa'y, jam ja Manaén (midi yaakti tuknax møøt ja Herodes midi windsøn'ajt jam Galilea) jøts jam nayide'en ja Saulo. ² Tu'ukpi xøøw idø'on ya'at jaa'y jade'en ñamyujkidøø jøts ja nwindson'ajtim twindsø'jkidøø, ayuu'ajttíp idø'on wyinaty ku ja Espíritu Santo wyaañ:

—Jigaxti yø Bernabé møøt yø Saulo, jøts ttu'undit midi øts yø tø ndaniwaadsowidi.

³ Xjats ku jade'en Dios'ajot'ajt'abajtidøø ayuu, xjats ja myigu'uk t'ukønixajkøjxnidøø, winets ja yikajxtsoo'nidøø.

Ku ja Jesús kyudanaabyi kyajpxwa'kxtøø jam Chipre

⁴ Xjats ku jade'en ja Saulo møøt ja Bernabé yiktsoo'niñidøø ja Espíritu Santo, winets ñøjkxtøø mā jam txøøwi Seleucia. Jamts ja barki ttatøjkidøø jøts ñøjkxtøø jam Chipre.

⁵ Xjats ku jam yja'ttøø mā ja barki wya'k'øyoø mā jam txøøwi Salamina, winets ja tkajpxwa'kxnibøjkidøø ja Dios kyajpxy jam tsaptøjkjotp. Jøts nay jap ja Juan tmøødidi, ja'ats ja pudøjkiyidøø.

⁶ Xjats ja jade'en ja Chiprit naajx ttayø'øñaxtøø, jøts jam yja'ttøø mejy wingon mā txøøwi Pafos. Jamts tpaattøø tu'uk ja israelit jaa'y pøn txøøw'ajt Barjesús, yik'adujkp ja' jøts nayide'en xyimay. Dios idø'on kyugajpxy ja ñadyiyí jøts ja jaa'y tjanchwin'ñi.

⁷ Jam idø'on ja tyuñ møj windsøn wyindump pøn txøøw'ajt Sergio Paulo, janch wijy janch kejy idø'on ja windsøn. Winets ja tnigajxøø ja Bernabé møøt ja Saulo, yjanchmadoowampy idø'on ja' ja Dios kyajpxy y'ayuujk jøts ja tyukmadowiyit.

⁸ Xjats ja yik'adujkpi midi nayide'en yiktejp Elimas t'agajpxøø ja møj windsøn, ku ka'ap tkupøkt pøni sa wya'andi ja Bernabé møøt ja Saulo. ⁹ Xjats ja Saulo pøn nayide'en yiktejp Pablo, yjanchmøøt'ajtpy ja Espíritu Santo ja', paty ja tjanchwin'ijxy tiiyim ja yik'adujkpi,

¹⁰ jøts ja yide'en tnimaay:

—iMets windaayibi jaa'y, kawindiy jaa'y mets, miku' mdeedyip, mi'ajkip mets ja' pøn øy tsinaadyip! ¿Tiku xyikutigøøwya'añ ja nwindson'ajtim kyajpxy y'ayuujk? ¹¹ Ixyam idø'on ja nwindson'ajtim myik'ayo'ombaadyit; kunim me mda'ant winjoox jøts may xøøw idø'on jade'en xkawin'ext ja xøøw.

Xjats tyimyjatyí tyaañ jade'en kugoots, winets t'ixaay pøni pøn tuu'wetsiyip. ¹² Xjats ku ja jade'en t'ijxy ja møj windsøn sa ja yjajty sa ja kyubejty ja yik'adujkpi, winets ja jatyí tjanchja'wøø pøni sa jaty ja tyukmadooyiyøø ja Saulo møøt ja Bernabé. Janch tyimñigumaap idø'on ja tja'wiyi'ñ ku ja yik'adujkpi jade'en yjajtnaa ja nwindson'ajtin Jesús myøk'ajtingøjxp.

Sa yjajttøø sa kyubajttøø ja Pablo møøt ja Bernabé jam Antioquía midi tamp Pisidiit y'etjotp

¹³ Xjats ja Pablo møøt ja yjamyøøt jam tyøjkidøø Pafos barkijotp, jøts jam ja ñøjkxti mā txøøwi Perge, nay jam Panfilia y'etjotpti; jøts ja Juan jamyí ja tminawya'kxidøø Pafos jøts

ja ñøjkxnaa Jerusalén. ¹⁴ Xjats ku jam ja jade'en yja'ttøø Perge, winet jam choo'ngojmíðøø jøts yja'ttøø Antioquía, nay Pisidia y'etjotpti. Xjats poo'kxin xøøw winets tyøjkíðøø jam tsaptøjkjotp, japts y'ixaktøø. ¹⁵ Xjats ku ja jade'en yikajpxkijxy ja nøky midi ja Dios kyutujk myøøt, jøts nayíde'en sa wyandøø ja Dios kyugajpxtyi, winets ja tsaptøjk windsøn ojts ñímaajyídi ja Pablo møøt ja yjamyøøt:

—Meets migu'uktøjkti, kidi wan meets jap xmímiñ xmíja'aty ja kajpxwejin, kidi wan meets xukmadowandíp yø jaa'y, tukmadowdítis.

¹⁶ Winets ja Pablo tyanaagyukøø jøts ja kyø' ja'ayi tnanky'ijxyi, ja' tyijpy jøts ja jaa'y y'amo'ondít jøts tpatmado'odít, xjats ja yíde'en wyaañ:

—Ukpatmadowdi meets Israelit jaa'y pøni pøn jaty ja Dios twindsø'jkíðíp: ¹⁷ Meets Israelit jaa'y níduki'iyi pøn adøm ndios'ajtyíndíp, ja' ojts twi'ixy adøm n'apteety'amøjti jøts ja tpíktakti adøm ndsinaadyaajkti janch møj, winet ja yjajty ku wyínaty nay jam chøønídi Egiptit jaa'y y'etjotpti jade'en ejxim ja ja'at jaa'y; xjats ja møk'ampy jadigojk kø'øm ja Dios tyimyikpídsøøjmíyíðøø nay jam, ¹⁸ jøts ja tyíknaxtít jam tø'øts etjotp wíxíjky jumøjt, kuwañim ja Dios ja yíkjuyk'ajtidí øy ja tpadundi tkabadundi ja Dios y'ayuujk. ¹⁹ Jøts ja nayíde'en tyíkuðígøø wíxújk ja møj kajp midi jam wyínaty ejttíp ma txøøwi Canaán, jøts ja n'apteety'amøj yíkmo'odít ja ñaajx. ²⁰ Xjats jade'en maktaxk magø'pxy jagujkp jumøjts ñítanaajyíðøø kunim ja kugajpxy kyaxi'iky midi txøøw'ajít Samuel. ²¹ Xjats ja kø'øm t'amídooníðøø tu'uk ja windsøn pøn ja nítaníyíðíp, winets ja Dios tu'uk myøøjyíðøø pøn txøøw'ajít Saúl, ja Cis y'u'nk, nay ja Benjamín y'ap, ja'ats wíxíjky jumøjt ttuñ. ²² Winets ja Dios jadigojk pyøjkiyøø ja windsøn'ajtk, jøts ja nagyø'øm tpíktaajk ja David, xjats ja Dios wyaañ: “Tø øts nbaaty ja David, midi ja Isaí y'u'nk'ajtpy, yø' janch yuyj janch tudá'aky, xpaduujníp øts yø' nja' pøni sa ø ndsøky.” ²³ Xjats ja Dios nayíde'en tñajtskajxøø ja Jesús midi adøm n'Israelit jaa'y tyíknítso'ok'atp, yø' íðø'n ja David myígu'uk'ajtpy, kuts ja Jesús myíiñ pø kø'ømxi wyínaty ja Dios tø wyanda'aky. ²⁴ Xjats ja Jesús namga'aním wyínaty tyundøki, winets ja Juan Bautista jawyeen tkajpxwa'kxy jøts ja Israelit jaa'y ttukmadøø, jøts pyøkyu'unín tmajtstu'uttít jøts ñøbatkøxtít. ²⁵ Xjats ku ja Juan Bautista y'oo'knaa, tø ja wyínaty tnøjmi ja Israelit jaa'y, jøts ku ja ka'ap yja'aji pøni sa ja wyínaty tníjawídi ku ja yíkñitsokpi myíiñ, jøts ja tnímaay: “Íx'oojkním ja mye'ent pøn øts níjuuni møøt nganamyíbaat'atíyít.”

²⁶ Xjats ja Pablo yjaakajpxwa'kxy, yíde'en ja wyaañ:

—Meets migu'uktøjkti, pøni pøn jaty ja Abraham myígu'uk'ajtpy, jøts nayíde'en pøni pøn ja Dios twindsø'jkíðíp, yø kajpxy yø ayuujk yø' adøm ndanítsok'ajtíndíp midi øts íxyam nnígajpxwampy. ²⁷ Ukmadooda'am, ja' pøn jaty jam tsinaadyøø Jerusalén nayíde'en pøn ja wyíndsøn'ajttøø, ka'ap ja tníja'wíðøø ku ja Jesús wyínaty tø kyexyi ja Dios Teety, jøts kyídyimwyínmadoodøø dø'n ja kajpxy ja ayuujk midi ja Dios kyugajpxy wyínaty tø tjaadyañ, ja' íðø'n xyumíkajpxtíp etjíp ku ja poo'kxin xøøw jam kyø'øm tsaptøjkjotpti; winets íðø'n ja kø'øm ttamí'ambøjktøø ja Jesús, jøts ja jade'en ttuundøø sa ja Dios kyugajpxy tyíktaañ ja ayuujk. ²⁸ Xjats ku ja kø'øm tkamíwínmáa'nbyaattøø tí ja tyukpøky'ajttíp jøts tyík'ooktít, winets ja tnímaadyøø ja Pilato jøts ja Jesús tnankyík'oogíyít. ²⁹ Xjats ku ja jade'en ttundi tuki'iyi sa ja Dios kyugajpxy tjaadyaañ jap nøkyjøtpy, winets tyíkwínejktøø jam kruskøjxp jøts tyíknaxøjkíðøø. ³⁰ Ja Dios Teetyts ojts kø'øm tyíkjuykpyiky jadigojk jap oo'kpi jutjøtpy. ³¹ Xjats ku pyíðsímy, winets ojts jeky ñanky'ijxyiyi jam jaa'y wyíndump midi myøøtwíðejt ku choo'ndøø Galilea jøts ñøjkxtøø Jerusalén. Ja' íðø'n íxyamdí pøn tkajpxtíp tmadyaktíp ja Jesús jøts ttukmado'odít ja jaa'y.

³² Jøts øøts nayíde'en íxyam nnígajpxy nnímadya'aky, jøts meets ndukmado'ot ja øy ayuujk sa ja Dios Teety tpíktaajky ja wyandaajkin adøm n'apteety'amøjkøjxpti.

³³ Ja'agøjxp ku adøm ja n'apteety'amøj'ajtyíndi, paty ja tø tpaduñ ja Dios Teety ja wyanda'aky jøts ku ja tø tyíkpidsímy jadigojk ja Jesús jap oo'kpi jutjøtpy, jade'en sam jap wya'añ myímajtsk salmojøtpy ku yíde'en wyaañ: “Øts me n'u'nk'ajtpy, jøts tø mets

mjujky'ajtin ixyam nmø'øy.” ³⁴ Xjats ja Dios jade'en wyinaty tø ttanibiktaagi jøts ku ja tyikpidsø'omt ja Jesús jap oo'kpi jutjøtpty, jøts nayide'en ku ka'ap ja ñine'kx wyindigø'øty, jade'en idø'øn jap wya'añ ja Dios kyajpxy jap nøkyjøtpty: “Nayide'en meets ngunuu'kxt sa øts ja David tø nnøjmi.” ³⁵ Paty nayide'en jadu'ukpi salmo wya'añ: “Ka'ats me Dios Teety ja xyikjatt jade'en jøts øts nnine'kx wyindigø'øty, pø xtsøky'ajtpxi mets.” ³⁶ Janch tiy idø'øn ja' ku ja David ja yjaa'y ojts tpudøki sa ja Dios ja wyinmaa'ñ myøøjyøø, xjats y'oo'knaa jøts nay jam ñajxøjkiyi'ñ ma ja y'apteety'amøj wyinaty tø ñajxøkidi, jøts ja ñine'kx nayide'en wyindigøøy. ³⁷ Pønts ja Dios Teety kø'øm tø tyikjujkyiky jadigojk, ka'ap ja ñajxnine'kx ja jade'en tø wyindigøy. ³⁸ Meets migu'uktøjkti, kuwani xnijawidit ku ja Jesús ja' tu'ugyi xpojkipimaa'kxindip pøn meets ixyam myiktukmadoop. ³⁹ Ja'ayi dø'øn tu'umchi niduki'iyi tpojkipimaa'kxp pøni pøn ja janchja'wiyip ja y'ayuujk, jøts ni ja Moisés kyutujk jade'en kyapojkipimee'kxy pøni pøn ja tpadump. ⁴⁰ Øyim mnay'ejx'etidit jøts ka'ap jade'en mjattit sa ja Dios kyugajpxy tjaadyandøø, ku ja yide'en wyandøø:

⁴¹ Meets nixekpi taxekpidi, pø nigyumaap mee xjawit sa n'adø'øtst;

pø ka' xjanchjawidit øy ja pøn kugajpxy mjadukmadøøyidi,

pø jade'en ne'egi jøts mdyimgyudigø'ødyit.

⁴² Xjats ja Pablo jade'en ttukmadoogijxy ja israelit jaa'y sa ja Dios kyajpxy wya'añ, winets ja myigu'uk jap tmøøtpidsømnaa jam tsaptøjkjotp. Xjats ku jap pyidsømdøø, winets ja Pablo ñimaajyøø pøn ka'israelit jaa'dyi, jøts nayide'en tnigajpxt nay ja'abi ayuujk jadu'ukpi poo'kxin xøøw. ⁴³ Xjats idø'øn jade'en ñawya'kxidøø jam tsaptøjkjotp, jamts wyinaty namay ja israelit jaa'y, jøts namay ja abikpyi jaa'y midi nayide'en tpadundip ja israelit chinaa'yin, ja'ats niduki'iyi tpanøjkxtøø ja Pablo ja Bernabé, winets ja ojts yikajpxwejt jøts yikniimaadyøø: “Ejtp idø'øn ja Dios kø'øm xtsøky'ajtyim paty ja Dios amumjoojt ja y'øgyajpxy xpaduujniyidit, jøts nijuuni xkamajtstu'uttit.”

⁴⁴ Xjats ku ja tpaatkojmaa jadu'ukpi poo'kxin xøøw, ku ja tjanchpatmadowa'andi ja Dios kyajpxy, winets jawaani kyameengijxy niduki'iyi ja kajp. ⁴⁵ Xjats ku dø'øn ja israelit jaa'y jade'en t'ejxtøø, winets ja Pablo yiktami'ama'at'ajttøø ja namay jaa'y jøts yikmi'ambøktøø, xjats yikniimaadyøø ku ja jaa'y nugo twindaay'atti. ⁴⁶ Xjats ja Pablo ja Bernabé møk'ampy ojts tmigajpxti, jøts tnimaadyøø:

—Meets israelit jaa'y, jade'en mjapaat'atyidi jøts meets jawyeen myiktukmado'ot ja Dios kyajpxy; ka'ats meets ja xkupøkwa'andi, jade'en nugo mwa'andi jøts ka' pyaat'atyidi jøts ja Dios y'øy'ajtin xkupøjkiyidit, jam øøts ne'egi nøjkx ngajpxwa'kxy ma jaty ja jaa'y kya'israelitjaa'yidi. ⁴⁷ Kumi jade'en øøts ja nwindson'ajtim tø x'ane'emy ku yide'en wya'añ:

Tø me nbikta'aky jøts øts n'øgyajpxy n'øy'ayuujk xukmado'ojit tuki'iyi ja naxwii'ñit jaa'y, jøts xnijawidit sudso'ampy ñitso'ok'attit.

⁴⁸ Xjats ku dø'øn jade'en tmadoodøø pøn ka'israelit jaa'dyi, winets ja yjanchxondaktøø jøts ñawya'añidi kudam ja Dios kyajpxy janch'øy; jøts niduki'iyi ja' tmibøjkøxtøø pøn wyinaty ja Dios kø'øm tø tpikta'aky, jøts nijuuni xøøw ja y'anmija'win kyawindigø'ødyit. ⁴⁹ Jade'en idø'øn jam ojts yikajpxwa'kxy ja Dios kyajpxy ma jaty ja kajp jam. ⁵⁰ Xjats ja israelit jaa'dyi ojts møøt tkajpx'øyidi winaagin ja yaa'dyøjk midi ja kajp tnitanaadyip, jøts møøt nayide'en ja tø'øxyøjkti midi ja kajp jaa'y windsø'jkiyidip jøts midi ja israelit jaa'y tpaduujnidip ja yja', ja'ats ja kajp jaa'y yik'ambøjktøø, xjats ja Pablo ja Bernabé ojts yikjemandi yiktedundi kunim ja tyikpidsømdøø ja'abi etjotp. ⁵¹ Winets ja Pablo møøt ja Bernabé twinaptøø ja pu'ux jam tyekyøjxp, jøts jade'en ttuk'ejxtit ku jade'embii jaa'y ja tka'øyjawidi, winets jam ñøjkxnidi ma ja kajp txøøwi Iconio. ⁵² Xjats ja Jesús yjanchja'wibi pøn jap Antioquía tyandøø, janch ejtni xoni ja ñayjawiyidi ku wyinaty tø tyatøkiyidi ja Espiritu Santo.

14

Sa yjajttøø sa kyubajttøø ja Pablo ja Bernabé jam Iconio

¹ Ku ja Pablo ja Bernabé jap yja'ttøø Iconio jøts jam tyøjkidøø tsaptøjkjotp, winets ojts kyajpxwa'kxti møk'ampy jøts may tpabøjktøø, nayide'en ja israelit jaa'y jøts may pøn jaty jam wyinaty midi' ka' y'israelitjaa'yidi. ² Xjats ja israelit jaa'y pøn tkababøjktip ja Dios kyajpxy, ja'ats t'agajpxidøø pøn ka'israelit jaa'dyi jøts ja tyikwinmaamya'tni ja jaa'y pøn ja Jesús tjanchja'widip. ³ Paty ja ojts tyaa'nidi jeky'ampy ja Pablo møøt ja Bernabé, jøts ku ojts møk tkajpxwa'kxti sa ja Dios Teety ttamidsøjky ja naxwii'ñit jaa'y, winets nay ja' myøk'ajtin møøjyidip jøts milagri'ajtin ttu'undit jøts nayide'en ja ejxpajt tpikta'aktit, paty ja'agøjxp ojts yiknijawi kudam ja yjanchi midi ja kyajpxwa'kxtip, jøts kudam ja Dios Teety xjanchøjkyindi. ⁴ Jøts ja kajp jaa'y ka'ap ja wyinaty tu'ugyi ja wyinmaa'ndyi, jam wyinaty ja israelit jaa'y yja' jøts ja Jesús yja'ami. Majtsk jøøjp jap wyinaty ja wyinmaa'ndyi. ⁵ Jøts ja israelit jaa'y kajpxy tundøø møøt pøn ka'ap y'israelitjaa'yidi jøts ñøjkxtøø ma ja kudunktøjk, jamts tkajpx'øydøø møøt ja kudunk jøts tmi'ambøjktøø tpağa'atswidetwa'andøø ja Pablo møøt ja Bernabé. ⁶ Kuts ja Pablo ja jade'en tnija'widøø møøt ja Bernabé, xjats ja kyaknøjkxtøø jam Listra jam Derbe, jade'en ja kajp xyøøw midi jam Licaonia etjotp tandip, jøts wine'enin ja abikyajp jam ni'awidity midi jam abiky etjopti, ⁷ jamts ja tkajpxwa'kxti ja Dios y'øgyajpxy y'ø'yayuujk midi xyiknitso'ok'ajtindip.

Ku ja Pablo jam Listra yika'jch

⁸ Nay jam ma ja kajp txøøwi Listra, jamts wyinaty chøøni tu'uk ja yaa'dyøjk pakma'at midi wyinaty niwine'enin kyidyimyø'øpy, tyimyjade'en idø'øn ja kye'jxy. ⁹ Jøts ja pakma'at jaa'y myadøøpy ja' tuki'iyi pøni sa ja Pablo tyikwa'añ, winets ja Pablo twin'ijxy ku yjawi t'ajot'aty ja pakma'at jaa'y ja Dios ku cho'okwa'añ. ¹⁰ Winets ojts møk tjanchmigajpxy jøts tnimaay:

—Tatani yø mdeky tiy.

Jøts ja yaa'dyøjk wya'kukøø tukwo'onji'igy xjats jade'eñi yø'øbyijky. ¹¹ Jøts ja mayjaa'y t'ejxtøø ku ja Pablo jade'en tyiktsøjky, winets ja jaa'y yjanchwangaktøø jøts wyandøø:

—iTø namajtsk ja Dios xjanchnigidaajkyindi nayide'en ejxim adøm njaa'y'ajtyim!

Tum ja Licaoniit ayuujk kyajpxtip.

¹² Xjats wyandaktøø ku Bernabé ja' Dios Júpiter, jøts ja Pablo Dios Mercurio, ja'agøjxp ku ja kya'amay. ¹³ Xjats ja teety midi jam tump Júpiter chaptøjkjotp kajp'am, ja'ats ojts tyiknijxxy ja tsakaā namajtsk janch xøxy janch pijyi ma ja Pablo møøt ja Bernabé jam wyinaty; yjanchtawindsø'øgiwyandip ja tsakaā, tyamiyoxwandip ja tsakaā kitu'uk. ¹⁴ Ku tnija'widøø ja Jesús kyudanaabyi ja Bernabé ja Pablo jøts yjotmay'oo'kpøknidøø, jøts ja wyet tkøø'tstøø waani ja'agøjxp ku jade'en yikwindsø'øgidi ejxim ja Diosin, winets tyøjkidøø mayjaa'y agujkp jøts møk yide'en wyandøø:

¹⁵ —iMigu'uktøjkti! ¿Tiku jade'en m'adø'øtsti? Pø nay jaa'yts øøts ejxim meedsin, yø' øø nnimimpy jøts mee ndukmado'ot jøts xmajtstu'uttit yø'øbi tunk, ka' yø tyuñ. Pabøjkidi Dios yja' pøn jujky'ajtp, pøn tuki'iyi tyik'øyyi'ñ ja tsajp jits ja naajx jøts ja mejy, tuki'iyi midi ya naxwii'ñ ejtp. ¹⁶ Kuwani Dios Teety yujy'aty ku ja naxwii'ñit jaa'y ojts y'ø'y'adø'øtsti kya'ø'y'adø'øtsti. ¹⁷ Ejtp idø'øn ja Dios Teety ja ejxpajt tjayaky, jøts jade'en yiknijawit pøni pøn idø'øn ja' ku ja janch'øy. Ja'agøjxp idø'øn ja tuu tkejxy, jøts pyidsimy ja moojk ja xøjk midi adøm ndajujky'ajtyim, jøts ejtni xoni nnayja'wandit.

¹⁸ Øy idø'øn ja mayjaa'y møk yjayiknimaadyi, ka' pøn tmadøøy, kuwani tyimyik'ookwa'andi ja tsakaā jøts ja Pablo møøt ja Bernabé jade'en yik-tawindsø'øgiwya'andi ejxim ja Diosin.

¹⁹ Winets ja israelit jaa'y winaagin jam choo'ndøø Antioquía jøts Iconio, jøts jap yja'ttøø Listra ma ja Pablo møøt ja Bernabé wyinaty. Ja'ats idø'øn ja kajp jaa'y t'agajpxidøø, winets ja kajp jaa'y y'ambøjktøø, jøts ja Pablo yikxon tsaagatstøø. Tyimwyandip idø'øn

ja jaa'y jøts ku dø'øn ja wyinaty tø ttyimyik'ookti, winets ja t'ukpawejtsnidøø, jøts ja kajp pa'am tyiknøjkxtøø. ²⁰ Winets ja jam ñamyujkidøø Pablo wyindump pøn tjanchja'widip ja Jesús, xjats ja Pablo pyidi'jky jøts wyimbijty jadigojk nay jam kajpjotp; winets kyimjabom choo'ndøø møøt ja Bernabé, jøts ñøjkxtøø ma kajp txøøwi Derbe.

²¹ Winets jam ojts tkajpxwa'kxti sudso'ampy ja Jesús xyiknitso'ok'ajtindit, ma ojts ñamayidi pøn ja Jesús yja' tmibøjktip, jøts ja Pablo ja Bernabé wyimbejttøø ma kajp txøøwi Listra, Iconio jøts nayide'en Antioquia. ²² Ku ja Pablo møøt ja Bernabé jam yja'jty tu'uk tu'uk ja'abi kajp, winets tkajpxjot'amøjkidøø pøn jaty ja Jesús yjanchja'widip, jøts ku Jesús yja' tu'ugyi tpaduujnidit, nayide'en yiknimaadyøø kuwani ja ayo'on yikpaaty ku jap ndøkiwya'anint ma Dios kyutujk, midi ja naxwii'ñit jaa'y ja tyanitanaapy. ²³ Jøts ja Pablo møøt ja Bernabé nayide'en tpiktaktøø ja møjaa'dyøjk ma jaty ja tsaptøjk wyinaty, jøts ku ja wyinaty tø Dios'ajot'atti tø y'ayuu'atti, winets ja Dios ja ttagødøjkidøø jøts kyunuu'kxidit, pø tøxi ja wyinaty tjanchjawidi.

Ku ja Pablo møøt ja Bernabé yja'jty jadigojk Antioquia jam Siria etjotp

²⁴ Xjats ku ja ñajxtøø jam Pisidia etjotp, jøts ja yja'jttøø jam Panfilia etjotp. ²⁵ Ojts ja tkajpxwa'kxti ja Dios kyajpxy jam Perge kajpkøjxp, jødsnim ja ñøjkxtøø jam Atalia. ²⁶ Jamts ja ttatøjkidøø barki jøts ja ñøjkxti Antioquia, jam kajpkøjxp ma ja wyinaty tø yikugajpxaagidi tø yikunuu'kxaagidi, jøts Dios ja kyunuu'kxidit ku ja wyinaty jade'en ja tyunk tyiktso'onda'akti midi ıxyam wyinaty tø tyik'abajtiñidi. ²⁷ Jøts kuts ja jam Antioquia kajpkøjxp yja'jttøø, winets ja jam tnankñamyujkidøø pøn jaty ja Jesús tjanchja'widip jøts ja ttamimadyakøjxtøø sa jaty Dios ja wyinaty tø yikjatyidi yikubetyidi ku ja kyunuu'kxyidi, jøts ja nayide'en ttamimadyaktøø sa Dios wyinaty tø yik'awajtsxyiyidi nøø' tuu' pøn ka'israelit jaa'dyi, jøts ja nayide'en ñitso'ok'attit ku ja tjanchjawidit ja nwindson'ajtim. ²⁸ Xjats ja Pablo jøts ja Bernabé jam jeky tyaa'nidøø, jeky tmøøtaa'nidøø ja jamit jaa'dyi pøn tjanchja'widip ja Jesús.

15

Ku Jerusalén ñamyujkidøø ja møjaa'dyøjk

¹ Nay ja'abi tiempi winaagin ja jaa'y choo'ndøø jam Judeit naxjotp jøts ñøjkxtøø ma ja kajp txøøwi Antioquia, jam tta'awanibøjkidøø ja jaa'y pøn wyinaty ja Jesús tjanchja'widip, jøts tnimaadyi ku ja yaa'dyøjk kuwani yikmo'odit ja ejxpajt ñe'kxkøjxp sami Moisés jekyip tyikyø'ø y ja y'ana'amin, winets ja jade'en yiknitso'ok'atidit ja Dios. ² Winets ja Pablo møøt ja Bernabé møk'ampy ojts møøt ñagyajpxyidi ja jaa'y, jøts ku ka' jade'en y'øyi yø'øbi winmaa'ñ. Winets ja Pablo ja Bernabé yikpiktaktøø møøt winaagin ja jaa'y jøts jam ñøjkxtit Jerusalén, jamts tjaak'atskajpx'øyidit ja'abi winmaa'ñ møøt ja'adi pøn jaty ja Jesús kyudanaabyi'ajtpy, jøts møøt ja møjaa'dyøjkti pøn jaty jam møjaa'y'ajttip tsaptøjkjotp.

³ Xjats kyajxtsoo'niyidøø ja janchja'wibidi jam Antioquia, xjats choo'ndøø jøts jam ñaxti ma ja et txøøwi Fenicia jøts Samaria. Jamts tnigajpxtøø tnimadyaktøø, jøts ku namay ja jaa'y wyinaty tø tmajstutnidi ja møjaa'chinaa'yin pøn jaty ka'israelit jaa'dyi, jøts tpabøjktøø tu'ugyi ja Dios yja'. Xjats ja yjanchxondaktøø ja myigu'uktøjk ku ja jade'en tnija'widøø ja'abi ayuujk.

⁴ Kuts yja'ttøø ja Pablo møøt ja Bernabé jam Jerusalén, winets ojts kyajpxpøø'kxyidi ja mayjaa'y jøts ja Jesús kyudanaabyi møøt ja møjaa'dyøjkti. Xjats ja tnigajpxti tnimadyakti sa ojts ja Dios møk tyukpudøkiyidi pøn ka'israelit jaa'dyi. ⁵ Xjats winaagin ja fariseit jaa'y pøn wyinaty ja Jesús yja' tpaduujnidip, wya'kukidøø jøts wyandøø:

—Kuwani yø tpaduujnidit Moisés kyutujk pøn ka'israelit jaa'dyi øy yø Jesús yja' yjayikpaduñ, jøts kuwani ejxpajt yikmo'odit ñe'kxkøjxp.

⁶ Winets jadigojk ñamyujkidøø ja Jesús kyudanaabyi jøts ja møjaa'dyøjkti sudso'ampy yikajpxwimbett yik'adsojimbett. ⁷ Tø wyinaty jeky tkajpx'øyi, jøts ja Pedro tyanaagyukiyi'ñ jøts tnimaay:

—Meets migu'uktøjkti, mee mnija'wip jøts ku øts ja Dios jekyip xwiwich, jøts øts ndukmado'ot ja jaa'y pøn ka'israelit jaa'dyi, sudso'ampy ja nwindson'ajtim xpo-jkpimaa'kxindit jøts ja tmibøktit. ⁸ Wa'ats ja Dios t'ixy sa jadu'uk jadu'uk nwinmaa'yindi, jøts yide'en'ampy yiknijawi ku Dios ja tø kyupikyidi ja'abi jaa'y, ku tø tyuktatøkiyidi ja y'Espíritu Santo nayide'en ejxim adøm ojts xmø'øyim ja kunuu'kxin. ⁹ Ka'ap ja Dios pøn ttsøky tkatsøky, tyumkupijky ja' wan tpøni, ka'ap ja t'ixy wan pøn t'israelitjaa'y uk wan pøn tka'israelitjaa'y, patyts ja nayide'en tø yikpojkpimaa'kxti pøn ka'israelit jaa'dyi ku ja tø tjanchjawi. ¹⁰ Migu'uktøjkti, tiku xmimaydi xmidajti pøni sa ja Dios tø tpikta'aky, jøts ja' xapaatti pøn ja Jesús tjanchja'widip? tTiku kawinaak winmaa'ñ xaguwaanidi? Nika'ats adøm ja ka'pxy n'ukpaduu'na'andi, ni ja n'apteety'amøj adøm ja ka'pxy tø tka'ukpaduunidi. ¹¹ Pø ka'axi jade'en y'øyi, njanchja'wa'amp adøm ja' ku ja Jesús xyiknitso'ok'ajtyindi kyø'ømdsøky, nayide'en sam ja' pøn ka' y'israelitjaa'y.

¹² Xjats niduki'iyi y'amongøxtøø, jøts tpatmadoodøø ku ja Pablo jøts ja Bernabé tnimadya'akti sa ja Dios møk pyudøjkiydøø, ku ja myilagritundi jøts ja Dios y'ejxpajt tpaduujnidøø ja' y'etjotpti pøn ka'israelit jaa'dyi. ¹³ Ku ja Pablo jøts ja Bernabé kyajpx'abaajttøø, jøts ja myigu'uk midi Jacobo txøøw'ajtmip, ja'ats waan:

—Meets migu'ukti, ukmadowdi waani: ¹⁴ Tø ja Simón Pedro tjanigajpxy sudso'ampy ja Dios tø tmø'øy ja may'ajt myiduk'oik pøn ka' y'israelitjaa'yidi, jøts ku ja Dios ja nayide'en t'u'nk'aty t'una'jk'aty ja'abi jaa'dyi. ¹⁵ Kuwani ixyam jade'en yjaty kumi jade'en ja Dios kyugajpxy ojts tjaadyañ, ku ja Dios yide'en wyaañ:

¹⁶ Wimbejtkojmip øts jadigojk, jøts nbikta'akt nayide'en sam y'ijty ja David tjagyepy ja kutujk;

jøts øts nja' niduki'iyi xpaduujnidit pøn ka'israelit jaa'dyi,

¹⁷ jøts niduki'iyi ja naxwii'ñit jaa'dyi pøn jaty ø nja'ajtpy.

¹⁸ Jade'en idø'on wyaañ ja nwindson'ajtim Dios, pøn tyuknija'wiyi'ñ yø'øbi winmaa'ñ jekyip.

¹⁹ Xjats ja Jacobo tjaaknøjmi ja jaa'y jøts wyaañ:

—Ka' nugo xmigajpxtit pøn ka'ap y'israelitjaa'yidi, pøn ja Jesús yja' tu'ugyi tpadunwajnidip, pøn tø tmajtstutnidi ja myøjaa'chinaa'yin. ²⁰ Øy'ajtp ja nøky ngajxindit, jøts ja'ayi ndukmadoo'indit jøts kidi ja ttsu'utsti midi ja tsamaxan yiktawindsø'jkip, jøts nayide'en ka'ap ja ñiyaa'y ñidø'øxy ñabyøjkxidit, jøts nayide'en ka'ap ja jiyujk tsu'uch ttsu'utstit midi ka' tyaxy, jøts midi yuktsummy'oo'kp, jøts nayide'en ka'ap ja ni'jpy tjøø'kxtit. ²¹ Wan yø'øyi, pø jaayimts ja Moisés kyutujk xyumiyikajpxwa'kxy, ti magajp ja kya'ukyiknigajpxy ma jaty ja tsaptøjk jam, ejtpts ja yiknigajpx'ity wimboo'kxin xøøw.

²² Winets ja Jesús kyudanaabyi møøt ja møjaa'dyøjkti jøts niduki'iyi pøn jaty tjanchja'widip ja Jesús, jats ñawywejtsidi namajtsk ja jaa'y pøn tmøødidøø ja Pablo jøts ja Bernabé jam Antioquía. Ja'abi jaa'y midi yikwindsø'jkiy'ejtptip, tu'uk txøøwi Judas Barsabas jøts jadu'uk txøøwi Silas, ²³ ja'ats tminøjkxtøø ja nøky jøts yide'en ja nøky wyaañ:

“Øøts idø'on ja' pøn jaty ja Jesús kyudanaabyi'ajtpy, møøt ja møjaa'dyøjkti jøts niduki'iyi ja nmøøtjanchja'wibidi, øøts idø'on ja kajpxpoo'kxin nguejxpy, ngajpxpøø'kxpy øøts niduki'iyi ja nmøøtjanchja'wibidi pøn ka' y'israelitjaa'yidi, pøn jam tsinaadyip Antioquía, jøts jam Siria, jøts nayide'en Cilicia. ²⁴ Tø øøts nnijawi ku winaagin ya'it jaa'y ojts ñøjkxti ma meets jam, jøts ojts nugo myikwinmaamyaa'dyidi, ku jade'en mni'mxyidi jøts ku kuwani ja mixyuna'jk yikmo'odit ja ejxa'an ñe'kxkøjxp, jøts ku kuwani ja Moisés kyutujk xpaduujnidit. Migu'uktøjk, kidi øødsipts ja jade'en ngajpxmyøøpy.

²⁵ Paty øøts yikxon ngajpx'øyi, jøts øø nbikta'aky namajtsk ja kugajpxy midi mee

m'ats'ejxiyip, ja'ats myøødidip ja Pablo jøts ja Bernabé pøn øøts ndsøky'ajtpy, ²⁶ jøts pøn tø tyimñadyamiyoxiyi amumjoojt ja nwindson'ajtim Jesús. ²⁷ Ya'at øø nguejxpy midi txøøw'ajttip Judas jøts Silas, jøts møøt m'ukmadya'aktit jøts mdukmadowiyidit ya'at tuki'iyi. ²⁸ Tø ja Espíritu Santo t'øyjawi, nayide'ents øøts, jøts ka'ap meets mayjøøjp ja winmaa'ñ nmø'øy, øy ku ya'at xpadu'undit: ²⁹ ka' xtsu'utstit midi ja tsamaxan tø yiktawindsø'øgi; jøts nayide'en ka'ap ja ni'jpy xjøø'kxtit, ka' xtsu'utstit nayide'en o ti jiyujk midi yiktsumy'oo'kp, nayide'en ka'ap ja mniyaa'y mnidø'øxy mnabyøjkxidit. Pøni mbadundip yø'øbi winmaa'ñ, tsuj mduu'baattit meets jade'en. Yø'øbi ana'amin øø nguejxpy, Dios mgunuu'kxidip.”

³⁰ Xjats choo'ndøø ja kunøky jøts ñøjkxtøø jam Antioquía. Winets ñamyujkidøø ja jaa'y pøn ja nøky yiktanigaxtip jøts yikømøødyøø. ³¹ Ku ja tpa'ejxtøø, jøts yjanchxondaktøø ku jade'en ja winmaa'ñ yikmo'odi. ³² Kumi yjajttip wyinaty nayide'en ja Judas ja Silas sudso tkajpxwa'kxidit ja Dios kyajpxy. Xjats ttukja'gyukidøø, jøts ja janchja'wibidi yjanchxondaktøø ku ja jade'en kyajpxjot'amøjkidyidi. ³³ Ku jap waani y'uktaa'ñidøø, winets ojts tja'ukminawya'kxyidi ja myigu'uk, ojts ja y'ukmø'øñiyidi ja kajpxpoo'kxin jøts ja Dios kyunuu'kxidit, jøts nay jam wyimbejti ma jam choo'ndøø. ³⁴ Xjats ja Silas wyinmaa'y, winets ja jam tyaañ. ³⁵ Nayide'en ja Pablo jøts ja Bernabé jap tyaa'ndøø Antioquía, namay ja myigu'uktø møøt, yik'ixpøjktøø tkajpxwa'kxtøø ja Dios kyajpxy.

Ku ja Pablo myimajtsk ojk chøø'ñ kajpxwa'kxpi

³⁶ Tø wyinaty ja tiempi waani ñaxkojmi ku ja Pablo tnimaa'y ja Bernabé, jøts wyaañ:
—Wan tjaa'myim jadigojk jam magyajp ma jaty ja Dios kyajpxy tø nmiwidijtyim, jamts nmigu'uktøjk n'ats'ejxint sa jam yjatti kyubatti.

³⁷ Xjats ja Bernabé twaawa'añ tu'uk ja jaa'y pøn txøøw'ajt Juan Marcos; ³⁸ ka'ats ja Pablo ja twinjawi jøts ja' tmøødit, kumi tø ja jam wyinaty t'ukyiktañ ma et txøøwi Panfilia, ka'ap ja wyinaty tyikyø'øy ja Jesús kyajpxy. ³⁹ Xjats ñagyajpxidi jeky ja Pablo møøt ja Bernabé, ka' ja wyinmaa'ñ y'uknabyajtniyidi jøts jade'eñi ñawya'kxinidyidøø; winets ja Bernabé tmøødiyii'ñ ja Marcos, jøts tyøjkidøø barkijøtpy jøts ñøjkxti ma et txøøwi Chipre, ⁴⁰ xjats ja Pablo ojts twaaji'iky ja Silas. Jøts ja janchja'wibidi ñimaa'yiyøø: “Nøjkx møøt ja Dios, Dios mgunuu'kxidip.” ⁴¹ Xjats ja choo'ndøø, jøts ñajxtøø ma et txøøwi Siria jøts Cilicia. Jamts tkajpxjot'amøjkidøø ma jaty ja tsaptøjk jam wyinaty.

16

Ku ja Timoteo tjamyøøt'ajty ja Pablo møøt ja Silas

¹ Xjats jam yja'ttøø ma kajp txøøwi Derbe jøts Listra. Jamts tpaattøø tu'uk ja janchja'wibi, Timoteo ja xyøøw. Ja tyaa'k, israelit jaa'y ja' jøts yjanchja'wip ja Jesús ja'; jøts ja tyeety, griegit jaa'y ja'. ² Ja mixy Timoteo janchtsojkip ja janchja'wibidi pøn jap wyinaty tsinaadyip Listra jøts Iconio. ³ Xjats ja Pablo tmøødiwya'añ ja Timoteo jøts pyudøkiyit, jøts ja Pablo wyinmaa'y jøts ku kuwani jawyeen yikmo'ot ja ejxpajt ñe'kxkøjpx, jøts kidi y'ejxma'adyidi ja israelit jaa'y ku jam yja'attit ja' y'etjotpti, wa'ats ja wyinaty tnijawidi ku ja Timoteo tyeety ka' y'israelitjaa'yi. ⁴ Xjats choo'ndøø ñajxtøø ma jaty wyinaty ja kajp jam. Jamts tni'gajpxti tni'adya'akti ja janchja'wibidi, jøts t'uktukmadoodøø ti jaty wyinaty tø tkajpx'øyidi ja Jesús kyudanaabyi møøt ja møjaa'dyøjkti jam Jerusalén, jøts sudso'ampy ja jaa'y øy tsuj yjaa'y'attit pøn ka' y'israelitjaa'yidi. ⁵ Xjats tu'ugyi ja wyinmaa'ñ tpiktaknidøø amumjoojt ja janchja'wibidi, mayi'adøstip ja jabom jabom.

Ku ja Pablo ojts t'ixy agumaa'yjøtpy tu'uk ja Macedoniit jaa'y

⁶ Xjats ja Pablo møøt ja Silas jøts ja Timoteo choo'ngojmidoø, jøts kumi ka'ap ja Espíritu Santo ojts tyikutuky jøts jam ñøjkxtit kajpxwa'kxpi ma et jam txøøwi Asia, winets jam ñajxtøø ma et txøøwi Frigia jøts Galacia, ⁷ jøts jam yja'ttøø tsawa'an'am

ma et jadu'uk txøøwi Misia, jam wyinaty yjatøkiwya'andi ma et jadu'uk txøøwi Bitinia, nika' ja Espiritu wyaañ jøts jam tyøkidit. ⁸ Winets ttayø'øñaxti yøñ'ampy ja Misia y'et ñaajx, jøts jam kyidaktøø jam mejy'am ma tu'uk ja kajp txøøwi Troas. ⁹ Jamts ja Pablo koots twingumaay tu'uk ja Macedoniit jaa'y, windanaajyip tam ja jaa'y jøts yjanchminuu'kxa'agiyi, jøts ñi'mxiyi: "Tun ja may'ajt, nax jam ma ja Macedonia et, pudøjkik øøts." ¹⁰ Xjats ku ja Pablo jade'en kyumaay, winets øø nnay'a'ejxiyøø jøts øø ndsøø'ñ. Øts idø'øn Lucas pøn ya'at nøky tjaapy, øts idø'øn ja nayide'en nmøøtsøø'n, jøts øøts ojts nniykxy jam Macedoniit etjotp. Nja'gyujkip øøts wyinaty ku øøts ja Dios xwaadsøy, jøts øøts jam nøjkx ngajpxwa'kxy ja øgyajpxy ja ømyadya'aky midi xyiknitso'ok'ajtindip.

Sa yjajttøø sa kyubajttøø ja Pablo møøt ja Silas jam Filipos

¹¹ Winets øø ndøjkxyi'ñ barkijøtpy, jøts øø tiy nniykxy jam mejy agujkp ma ja naajx lii'nim txøøwi Samotracia, jøts kyimjabomnim øøts ja mejy ndanajxy jøts øøts jam nja'jty Neápolis. ¹² Jam øø ndsøø'ñ tekyjøm, jøts øø nniykxy ma kajp txøøwi jadu'uk Filipos, ja' midi ja romanit jaa'y kø'øm pyiktaktøø. Møj kajp idø'øn ja', nima ja kajp jam jade'en wingon kyamøji. Jam øøts kawinaak xøøw n'uktaa'niyi'ñ. ¹³ Jamts øø ngajpidsømnaa poo'kxin xøøw et, jøts øøts jam nniykxy møj nøø windump ma ja jaa'y kuwani ejtp ñøjkxti Dios'ajot'ajtpi. Jamts øø n'ixaajky, xjats øø ndukmadøøy ja Jesús kyajpxy ja tø'øxyøjkti pøn jam wyinaty tø ñamyukyidi. ¹⁴ Jamts ja tø'øxyøjk pøn txøøw'ajtp Lidia, pøn tsoo'mp jam Tiatira kajpjotp; wetoo'kk ja tyunk'ajtpy, tum ja øybi tsuu'nk wet idø'øn ja tyøø'kpy. Ja'ats idø'øn ja Dios tjanch'ajot'ajtp, jøts nwindson'ajtim ja yikwinmaa'nbyaajtiyøø jøts tjanchjawit sa jaty ja Pablo wyaañ. ¹⁵ Xjats ojts ñøbety møøt ja myigu'uk, winets øø xminuu'kxaajky jøts wyaañ:

—Tundi may'ajt jaa'mindip øts ndøjkjøtpy, jap m'atsja'ada'aktit pøni mjanchwamp meets jøts ku øts nwindson'ajtim kyajpxy tø njanchpaduujniyi.

Xjats øø kuwani xyiktaa'ñ.

¹⁶ Winets yide'en yjajty ku øø wyinaty nniykxy ma jaa'y jam Dios'ajot'atti, xjats øø nmbynajtiyi tu'uk ja kiixy midi wyinaty ximaapy, ja miku' wyinaty myøøt'ijtpy, ane'emy idø'øn ja y'ity. Ku ja jade'en myiximay janchnimeenbyøjkijyip ja wyindsøn ja' pøn ja y'ijty ana'amiyip. ¹⁷ Ja'abi kiixy øø xpawidejtøjkiñaa, xjats ojts møk yjanchwa'añ jam mayjaa'y agujkp:

—Ya'atpi jaa'y møk tjanchmidundip ja Dios midi jap tsajpjøtpy, yø' tkajpxwa'kxtip ja Dios kyajpxy sa ja xyiknitso'ok'ajtindit.

¹⁸ Ku jade'en pyawidejtiyidøø kawinaak xøøw, xjats ja Pablo møk y'adsipyiyi jøts t'ejximbijty, jøts tnimaay ja miku' midi ja kiixy wyinaty myøøt'ajtpy:

—Jesús myøk'ajtingøjxp mets miku' majtstu'ut yø kiixy. ¡Pidsøm!

Xjats ja miku' tmajtstuujty nay jaty.

¹⁹ Ku ja kiixy ja wyindsøn tja'ejxnidi ku tø ja wyinmaa'ñ tyigatsni, ku ka'ap ja kiixy y'ukmeenbyøjkni, winets ja Pablo jøts ja Silas yikmatstøø, jøts yiknøjkxidøø kudunk wyindump jam møj maayjotp. ²⁰ Ku jam yikja'jtidøø tiidyumbi wyindump jøts ja tnimaadyøø:

—Ya'at jaa'dyi, israelit jaa'y yø'ødi, møk øøts xjanch'adsipy ya kajpjøøjty, ²¹ ku ja kyø'ømsinaa'yin øøts kuwani xukpadunwa'añ midi øø ka' njanchjagupøkw'añ, jøts ja'abi tsinaa'yin ka'ap øøts ja nnijawi. Abiky øøts, romanit jaa'y øøts.

²² Xjats ja mayjaa'y yjanchpidø'køjxtøø, jøts ja tiidyumbidøjk t'ana'amdi ja jaa'y jøts wan tyiknijandi tyik'ixjandi, jøts wan ja nawyopi t'ukupøkti namajtsk ja Pablo møøt ja Silas. ²³ Xjats ku yikwojp'abaajtidøø, winets ja tyiknøjkxtøø puxøjkjotp, jøts ja t'ana'amdi ja puxøjk adsinaabyi jøts tnimaadyi jøts waani ttyimjaty'ejx'etit. ²⁴ Ku ja puxøjk adsinaabyi jade'en ojts yik'ane'emy, winets tyiktøjkijy'ñ jøts kawinaak puxøjk'aaw ojts tyiknaxy, jødsnim ojts yikni'agii'byatti jam okp. Ku jade'en jam yikpiktaktøø, winets ojts ja kipy yiktanaxkø'ødi ja tyeky kadeni møøt.

²⁵ Xjats ja Dios'ajot'ajttø jøts t'øødøø ja Dios kyajpxy jap puxøjkjøtpy, møk ja Dios ja tja'myajtstøø. Tsuu'miwyamp wyinaty ku ja Dios jade'en t'ajot'ajttøø, jøts ku ja myibuxøjk jaa'y ja nugo pyatmadøyi. ²⁶ Xjats ku chuu'miyiñ, winets ja ujx møk yjanchmiiñ, winets ja puxøjk møk yjantyimy'adijch. Jøts ja puxøjk'aaw tuki'iyi y'axetutkøjxnaa, jøts ja puxøjk jaa'y pyaktsum nayide'en wyinakøjxtøø. ²⁷ Xjats ja puxøjk adsinaabyi ojts ñiwijy, jøts ja t'ejxpaajty ja pyuxøjk'aaw jøts kudam ja wyinaty tø y'awatskøxni, xjats ja jade'en wyinmay tø ja puxøjk jaa'y tijy pyidsømgøxnidi, winets ja yønchujx ja tju'jty jøts ja kø'øm ñanky'lookwa'añiyi. ²⁸ Xjats ja Pablo ojts t'ejxpaaty ja puxøjk ejx'ejtpi ku ja wyinaty jade'en ñadyunwa'añiyi, xjats tnimaay:

—Kidi jade'en mnadyuñiyi, ka'ap øø ngue'eky, tum ixyp øøts niduki'iyi.

²⁹ Xjats ja puxøjk ejx'ejtpi t'amidøøy ja jaj jøts ja ojts pujtp tyøki jap puxøjkjøtpy. Xjats ja yjanchmibejpnj jøts ja ojts ñagyuxendya'agy jam Pablo tyekyjø'øm jøts ja Silas. ³⁰ Xjats ja tyikpidsimy jøts tyiktiy, yide'en ja tnimaay:

—Migu'ukti, ¿ti ø ndu'ump, sudso'ampy ø nnitso'ok'att?

³¹ Xjats ja Pablo møøt ja Silas ojts t'adsojimbetti, xjats tnimaadyøø:

—Møjawi amumjoojt ja nwindson'ajtim Jesucristo, jøts myiknitso'ok'atiyidit niduki'iyi møøt ja m'u'nk møøt ja mnidø'øxy.

³² Xjats ja Pablo jøts ja Silas ttukmadoodøø ja Dios kyajpxy ja puxøjk adsinaabyi møøt niduki'iyi pøn jaty ja jam wyinaty tyøjkjøtp myøøtsinaapy. ³³ Nay jatyits ja puxøjk adsinaabyi tyikwajtsøø ja Pablo jøts ja Silas chaachi, winets ñøjkxtøø nøbajtpi niduki'iyi møøt ja y'u'nk jøts ja ñidø'øxy. ³⁴ Winets ja puxøjk adsinaabyi twaay kaabyi jap tyøjkjøtpy, janch øy janch tsuj wyinaty ñayja'wiñidi niduki'iyi møøt ja y'u'nk ja ñidø'øxy, kumi tø ja wyinaty ja Dios tjanchjawidi.

³⁵ Xjats kyimjabom'ajty, winets ja tiidyumbidi ttaniguejxy ja kyugajpxy ja puxøjk adsinaabyi, jøts ku ja' tyikutuky jøts tyik'awa'atspidsømnit ja Pablo jøts ja Silas. ³⁶ Xjats ja puxøjk ejx'ejtpi tnimaay ja Pablo:

—Tø n'atsyik'ane'emy, ja tiidyumbitøjk kø'øm ja kyajpxy tkajxtip jødsik meets jadi'iñi nyikpidsømnit; nøjkxnidits jotkujk, tø mee m'awa'atspidsømni.

³⁷ Xjats ja Pablo ka' tkupiky, winets tnimaay ja kugajpxy:

—Nayi romanit jaa'y øøts, tiku øøts jade'en nyiktuñ jøts ku øøts jade'en mayjaa'y agujkp nyikwøpy, nika'ap øø nyiktiidyuñ jøts jaty øø nugo nyikpikta'aky puxøjkjøtpy; ¿sudso'ampy øøts ndejint ayu'uch jadi'iñi nyikmajtstu'utwani? ¡Ka' y'øyi! Wan ja kø'øm tmendi ja tiidyumbidi jøts øøts xyikpidsø'ømt.

³⁸ Jøts ja kugajpxy wyimbejtnidøø, jøts ttukmadoodøø ja tiidyumbi sa ja Pablo ja kajpxy t'adsojimbijty, winets ja tiidyumbi yjanchø'økiñidi ku tnija'widøø jøts kudam ja Pablo jøts ja Silas nayide'en romanit jaa'yidi. ³⁹ Winets ja kudunktøjk tninøjkxtøø t'atminuukxaktøø ja Pablo møøt ja Silas. Xjats tyikpidsømdøø jap puxøjkjøtpy, jøts møk tnimaadyøø:

—Tun may'ajt pidsømdi ya waani kajpjøøjty.

⁴⁰ Xjats ja pyidsømdøø puxøjkjøtpy, jøts ñøjkxti ma ja Lidia tyøjk, jamts ja tminabyajtidøø ja myøøtjanchja'wibidi, kuts ja tkajpxjot'amøjkidøø, winets ja choo'nidøø.

17

Ku ja Tesalonikit jaa'y yjanch'ambøjktøø

¹ Xjats ku jam choo'ndøø, jøts ñaxtøø ma kajp txøøwi Anfípolis jøts nayide'en Apolonia, majtsk ja kajp ttanaxtøø jøts jam yja'ttøø møj kajpjotp midi txøøw'ajtp Tesalónica, jam wyinaty ja tsaptøjk. ² Winets ja Pablo tyøjkidøø kajpxwa'kxp jam tsaptøjkjøtp, sayim ja ttuñ øy madsoo ma jaty ja wyidity, tigøøk samani jam tyik'ixpijky ja jaa'y wimboo'kxin xøøw. ³ Yide'en ja ojts ttuk'ixpiky pøni sa ja Dios Teety kyajpxy ojts yikjaadyañ, jøts

kuwani mye'ent ja yiknitsokpi, jøts kuwani y'ayo'ombaatt jøts y'oo'kimbaatt, jøts kuwani yujkpyøkt jadigojk. Yide'en idø'on ja wya'añ:

—Jade'en ja Jesús yjajty midi mee ndukmadøøpy, nay ja' ja Dios Teety kyejxpy yiknitsokpi.

⁴ Ku ja Pablo ja ixpøjkin jam jade'en t'ukyiktandøø, winets ja israelit jaa'y winaagin tmibøjktøø, jøts ja møøt ñabyøjknidyidøø ja Pablo jøts ja Silas, jøts nayide'en namay ja griegit jaa'y pøn ja Dios Teety twindsø'jkidip. Nayide'en namay ja griegit tøøxyøjk tmibøjkti pøn jam windsø'øgi'ejttip. ⁵ Winets ja israelit jaa'y niduki'iyi y'ambøjktøø pøn jaty ja Pablo kyajpxy y'ayuujk tkagupøjksidip, ja'ats twaamuktøø ja ka'øyi jaa'y pøn jap nugo widejttip kajpjøtpy. Xjats nugo wyidejtnibøjksidøø jøts ja jaa'y tu'uk tu'uk tyik'ambøjktøø. Winets yja'ttøø tu'uk ja jaa'y tyøjkjøtpy pøn txøøw'ajtp Jasón, xjats awa'an'ampy tyøjkidøø tøjktøpy tajpi kaa'pi. Ja Pablo jøts ja Silas ja' idø'on jade'en yik'ixaadyip jøts tyikpidsømwā'andi jøts ja tyiknøjkxtit mayjaa'y agujkp. ⁶ Kumi ka'ap ja tpaatti jap tøjktøpy, winets ja tmatstøø ja kudøjk møøt ja myøøtjanchja'wibidi, xjats tpawetstøø tpakoo'tstøø, kudunk wyindump tyiknøjkxtøø, xjats ja Pablo jøts ja Silas yikxiguyaxtøø, jøts jade'en wyandøø:

—Ja'abi jaa'y pøn widejttip jøts tuki'iyi ja naxwii'ñit jaa'y tyikwinmaa'nmyatkøxti, tønim ja ya nayide'en yja'tmidi, ⁷ jøts ya'at Jasón ja tø tyikja'ada'aky tyøjkjøtpy. Yø'øbi jaa'y tuki'iyi y'ixwetswängøjxtip ja møj windsøn César kyutujk midi adøm ngajp xnitanajjyamp. Jade'enxi wya'andi ku ja ja møj windsøn jadu'uk pøn txøøw'ajtp Jesús.

⁸ Ku ja tmadoodøø ja jaa'y møøt ja kudunktøjk, winets niduki'iyi yjanch'ambøjktøø. ⁹ Xjats ja Jasón kuwani tmøøy ja meñ ja kudunk jøts ja yikmajtstu'uttit; jøts yiknimaadyøø ku kuwani tyimbyidsø'ømdit ja Pablo møøt ja Silas jam kajpjøtp jawy-
een, jaanimts ja myeeñ ja jadigojk wyimbett. Winets jade'en yikmajtstuttøø møøt ja myigu'uk.

Sa yjajttøø sa kyubajttøø ja Pablo møøt ja Silas jam Berea

¹⁰ Xjats nay jatyi koots ja Pablo møøt ja Silas ja myøøtjanchja'wibi kyajxtsoo'nidøø jøts jam ñøjkxti mā kajp txøøwi Berea. Ku jam yja'ttøø winets nay jatyi ñøjkxti jam tsaptøjkjøtp. ¹¹ Yujyts ja ne'egi yjaa'y'atti ja'abi israelit jaa'dyi, ka'ap ja tyimyjade'enidi sam ja'adi pøn jam tsinaadyip Tesalónica. Chojktip ja øy wine'en tmado'odit ja Jesús y'øgyajpxy y'ømyadya'aky, jøts ja ejtp winjabom txumi'ejxti ja nøky mā ja Dios kyajpxy jap yja'ayi, pøni tiy janch idø'on ja' sa ja Pablo ja ñi'mxyidi. ¹² Xjats ja namay tjaa'gyukidøø jøts tmibøjktøø, jøts nayide'en namay ja griegit jaa'y tpabøjktøø pøn ana'amdip, ja yaa'y ja tø'øxy. ¹³ Xjats ku ja israelit jaa'y pøn jam tsinaadyip Tesalónica tnija'widøø ku wyinaty ja Pablo tkajpxwa'kxy nayide'en ja Dios kyajpxy jam Berea, winets ñøjkxti ja israelit jaa'y jam Berea, jøts jamts jaa'y nugo tyikjot'ambøjktøø. ¹⁴ Jøts ja Pablo ja janchja'wibidi jatyi kyajxtsoo'niyøø jøts ja ñijkxy jam mejy'am, xjats ja myigu'uk japyi t'ukyiktaanaa midi txøøw'ajttip Silas jøts Timoteo. ¹⁵ Xjats ja Pablo yikjamyøøt'ajty jøts tmøødidøø jagambaat mā kajp txøøwi Atenas. Xjats ja Pablo tkajxjimbity ja ayuujk jøts ñøjkxtit ja Silas møøt ja Timoteo pojyi'iky, jøts ja jam tminabyaadidit mā ja wyinaty.

Sa yjajty sa kyubejty ja Pablo jam Atenas

¹⁶ Exam idø'on ja Pablo wyinaty t'awixy ja Timoteo jøts ja Silas, jøts ja ka'ap yjanchjotkuki ku jap kajpjøtpy t'ixy janchmay ja awanax ja tsamaxan midi'ibi ja dios'ajttip. ¹⁷ Kumi ka' yjotkuki, winets jam ñijkxy tsaptøjkjøtp, jamts møøt kyajpxy myadyaajky ja israelit jaa'y, jøts ja' møøt pøn jaty Dios Teety t'ajot'ajttip, jøts nayide'en jabom jabom ja ñijkxy maajjøtpy, japts nayide'en møøt kyajpxy myadyaajky pøni pøn jaty jap pyajtpy. ¹⁸ Jamts wyinaty ja ixpiky jaa'dyi winaagin midi y'ixpøjktip ja epicureo y'ixpøjkin, jøts jam nayide'en jadu'uk midi y'ixpøjkmidip ja estoico y'ixpøjkin, ja'ats ojts tpatmadowdi ja Pablo ku ja tkajpxwa'kxy pøni pøn idø'on ja Jesús'ajtp, jøts ku kuwani ja

naxwii'ñit jaa'y wyimbettit jadigojk pøn jaty tø y'øøky. Winets ja ixpiky jaa'y winaagin yide'en nawyajnidøø jøts wyandøø:

—¿Ti dø'øn yø chaachnigajpxy yø yaa'dyøjk, yikmibøjkp idø'øn yø tijy ku jadinø'øn yjanchkajpxy?

Jøts jadu'uk t'adsojimbity:

—Wa' yø yjawī kyajpxyø'øpy ja wenkpi dios y'ayuujk.

¹⁹ Xjats ja Pablo yikwetsøø'ñ, jøts jam yiknøjkxøø mā ja tjagyapti junti tundaajk. Ja' ja et xyøøw Areópago, jamts tyiktøøddøø jøts tnimaadyøø:

—Ja' øøts nnijawīwyampy yø wenkixpøjkin midi mmimimpy. ²⁰ Wenkts yjawī xkajpxy, nnijawīwyampy øøts ti jade'en tyijpy ku jade'en mwā'añ.

²¹ Paty ja Pablo yik'amidøøy jade'en, kumi jade'en tuki'iyi ja Atenas jaa'y yjujky'atti, jøts nayide'en pøn jaty jam ja'atjaa'y'ajttip, ja' nugo ejtp chøky'ajttip jøts ñanktyuknigajpxidit sa ja kø'øm wyinmaydi, winets ja jemy ixpøjkin tpaatti jade'en.

²² Winets ja Pablo wya'kukiyi'ñ jam mayjaa'y agujkp mā jam yjuntitundi, jøts ja wyaañ:

—Meets Atenas jaa'y ukmadowdi, wa'ats øts n'ixy ku meets xjanchwindsø'øgi ja mdiosti midi mdios'ajttip. ²³ Kuts øts jam wyinaty n'et'ixy mā meets mdios xwindsø'øgi, jamts ø ndayø'øbyejty tu'uk ja altajr midi jap wyinaty ja letri tmøøt'ajtp midi yide'en wamp: “Ja Dios ya'at y'altajr midi kayiknija'wip.” Øy'ajtp, ja'abi dios midi mee mwindsø'øjkp jøts ka' xnijawīdi pøni pøn ja', ja'ats meets idø'øn yam ndukmadøøpy pøni pøn ja'.

²⁴ 'Ja'abi Dios tø tyik'øyi tuki'iyi tuktsajp'agida'aky, jøts nay ja' tuki'iyi tniwindsøn'ajtkøjxp wa'n ttsajpi wa'n tnaajxi. Jøts ka'ap ja Dios kuwani tu'ugyi chøøni tsaptøjkjøtpy midi jaa'y yik'ø'yip, ²⁵ jøts ka' Dios ti tyigøy'ajtxi midi'ibi ja naxwii'ñit jaa'y ja mo'owajniyip, pø ja'axi tuki'iyi xmøø'yindip ja nmøk'ajtin, jøts pøni ti jaty ndajujky'ajtyindip.

²⁶ 'Tu'uk ja Dios Teety tpiktaajky adøm n'apteety'amøj midi niduki'iyi ja naxwii'ñit jaa'y y'apteety'amøj'ajttip. Tø ja ttanibiktaagi nayide'en juuni ja kya'axtit, nayide'en ja chinaadyaajk tmo'ot mā jaty ja chøønidit. ²⁷ Ja'agøjxp ja Dios ttuñ jøts ja adøm nwinmaa'nmyee'nindit pøni pøn ja'. Øy udyā'aky nbaajtindit, ka' yjagami Dios, wingon ja møøt n'ijtyindi. ²⁸ Pø Diosxi xyikujky'ajtyindip ku nnajxindi ndøjkindi; pø nayide'enxi meets mmigu'uk wya'añ winaagin pøn wijtyi, ku yide'en wya'andi ku ja Dios x'u'nk'ajtyindi. ²⁹ Pøni janch jade'ents jaa ku ja Dios x'u'nk'ajtyindi, ka'apts ja Dios jade'en nnajtsja'wandit jøts ku ja y'oori ne'egi, uk pyuxplati ne'egi, uk chaadsechi sa jaty ja jaa'y ja kø'øm wyinmaa'ñjōtpy tyikpidsømdi. ³⁰ Dios ka' ja y'ijty ttunk'aty ja jaa'y kya'øwyinmaa'ñ pøn tø ñaxti, jøts ixyam tuki'iyi t'ane'emy ja ñaxwii'ñit jaa'y øy yjamadsowi jøts wan tmajtstu'utti ja kya'ødyunk. ³¹ Kumi tø ja Dios Teety ttanibiktaagi ti xøøw ti et ja nøjkx ttiidyuñ ja naxwii'ñit jaa'y; jøts tø ja tpikta'aky ja ejxa'an ku ja ojts tyikjujky'ajtyindip jadigojk ja nwinndsøn'ajtim Jesús, jøts ja naxwii'ñit jaa'y jade'en ttuknijawī jøts ku dø'øn ja yja'aji pøn idø'øn me'emp.

³² Xjats ku ja Pablo jade'en ja ayuujk tyiknaxjy ku jaa'y yjujky'ajtyindip jadigojk oo'kpi jutjøtpy, winets ja Atenas jaa'y winaagin yjanchtaxeknibøjkidøø, jøts jadu'uk winaagin ñømdøø:

—Wan jade'eñi, ja wyinaty jadu'ukpi xøøw xjaaknigajpxy.

³³ Xjats ja Pablo jade'eñi tmajtstuujty. ³⁴ Jamts ja jaa'y wyinaty winaagin pøn tja'gyukidøø ja ayuujk, jøts ojts tpaduujnidi ja Jesús yja'. Ja'abi jaa'y nidu'ugin txøøw'ajit Dionisio pøn jam windsøn'ajtp mā ja junti tundaajk txøøw'aty Areópago. Jøts jam nayide'en tu'uk txøøw'aty ja tø'øxyøjk Dámaris, jøts jam ja niwinaagin ja myigu'uk.

18

Sa yjajty sa kyubejty ja Pablo jam Corinto

¹ Xjats ja Pablo chøø'ñ jam Atenas jøts ñijkxy ma kajp txøøwi Corinto. ² Jamts tu'uk tminabyajttøø ja israelit jaa'y pøn txøøw'ajtp Aquila midi jam kugajp'ajtp ma et txøøwi Ponto. Ja'ats wyinaty namdso'ondipnim jam Italia møøt ja ñidø'øxy pøn txøøw'ajtp Priscila, jøts ñamja'atinim Corinto. Claudio dø'on ja wyinaty jade'en tø tyuñidi pøn ja italiit jaa'y wyindsøn'ajttip, ja'ats tyikutuky jøts yikajxpidsømgøjxnidøø niduki'iyi ja israelit jaa'y pøn jaty jam wyinaty tsinaadyip Roma. Xjats ja Pablo ojts t'atmigajpxy ja Aquila jøts ja Priscila, ³ jøts ja jam tmøøtaañ tmøøtsinaay, ojts tmøøtuñ kumi nay ja'abi tunk ja tyunk'ajtpy ja wetøjkxuuky. ⁴ Jøts ja Pablo wimboo'kxin xøøw ñijkxy tsaptøjkjotp ma ja jam tñigajpxy tñimadya'aky ja Jesús yja', jøts jade'en ttukmibiky øy pøn jaa'y, wan ja t'israelitjaa'yidi tka'israelitjaa'yidi.

⁵ Xjats ku ja Silas jøts ja Timoteo ñamdsoondøø jap Macedonia, jøts ñamja'tti Corinto ma Pablo jam wyinaty, winets ja Pablo tu'ugyi tpadøjkijii'ñ ja kajpxwa'kxin, jøts ka'pxy ttukmadøø ja israelit jaa'y jøts ku ja Jesús yiknitsokpi'aty pøn ja yjajøp'ejx'ejttip. ⁶ Ku ja Pablo jade'en wya'añ, winets yikmi'ambiky jøts ja ojts yikmidsepiky, ojts yiktsepkaipxy. Winets ja Pablo ja wyet twixijty, ja ejxa'an jade'en tmøøø jøts ku jade'en jaayibaat tmajststu'utt, winets wyaañ:

—Mgøømbøky meets wyinaty ku m'anmija'win wyindigø'odyit; øts ka' mee n'uktunk'ajtni. Ejxti sa x'ejxti, ixyam øts jam ne'egi nnøjkxt kajpxwa'kxpi ma pøn kya'israelitjaa'yidi. Tø net jaabaat nmajststu'utti.

⁷ Winets jam chøø'ñ tsaptøjkjotp, jøts ñijkxy kajpxwa'kxpi ma tu'uk ja jaa'y chøøni pøn txøøw'ajtp Justo, pøn jam tsinaapy tsaptøjk pa'am. Yjanch'ajot'ajtpy ja Dios ja nayide'en. ⁸ Jøts ja Pablo jade'en kyajpxwa'kxy Justo tyøjkjotp, winets ja jaa'y tu'uk tmibøjktøø ja Dios kyajpxy møøt ja y'u'nk ja ñidø'øxy, pøn ja tsaptøjk niwindsøn'ajtp, ja' xyøøw Crispo. Xjats nayide'en namay ja Corintit jaa'y tmibøjktøø ja Dios kyajpxy, winets ñøbajtkøxti. ⁹ Xjats ja Pablo tu'ukpi koots ja nwindson'ajtim ñimaajyøø, jøts ja jade'en tja'wiyii'ñ kidi jaa'y kyuma'ay ku ja ñii'mxyi:

—Kidi mdsø'øgi; jaakajpxwa'kx, kidi m'amøñ. ¹⁰ Ka'ap pøn sa mduñi, ixya me møø n'ity. Ja øts ja jaa'y ya may kajpøøjty njagyepy pøn øts n'ayuujk xmibøjkwajniyip.

¹¹ Winets ja Pablo jam tyaañ Corinto tukjumøjt jagujkp, jøts ja jaa'y ttuk'ixpiky ja Dios kyajpxy.

¹² Xjats tu'ukpi xøøw yjajty ku ja Galión wyinaty myøjwindsøn'aty jam Acaya, winets ja israelit jaa'y tm'ambøjkti ja Pablo, jøts tyiknøjkxti ma ja kutujktaajk jam, ¹³ jøts ttukmadoodøø ja møj windsøn yide'en:

—Ya'at jaa'y ttukmibøjkp ja jaa'y jøts ku ja jade'en t'ajot'attit ja Dios sam ka' tyim'yukpaat'ajtniyi. Ka'ats adøm ngutujk jade'en t'ukupøjkni.

¹⁴ Xjats ku ja Pablo wyinaty tyimgyajpxwa'añ, winets ja Galión tñimaay ja israelit jaa'y:

—Ku jeexyip ja kajaa winmaa'ñ, uk ja møk ayo'on jee tø tyuñi, øts ja jeexyip nyikwingukip meets israelit jaa'y; ¹⁵ kumi ka'ats yjade'eni, jabi nugo ayuujkxi yø' jøts mgøømgutujk meets yø', ka'ap øts yø x'ukpaat'ajtni, yikwingukidi yø pøni sa xyikwingukidi. Ka'ap øts yø'øbi ndiidyunwa'añ.

¹⁶ Xjats ja israelit jaa'y yikajxpidsømgøjxtøø ja' kutujktaajkjotpy. ¹⁷ Winets ja griegit jaa'y tmajstøø ja Sóstenes, pøn windsøn'ajtp jam tsaptøjkjotp, jøts jamyi tñaxmiwojpidøø jam yikutujkpi tøj'agøøm, jøts ja møj windsøn Galión ka' tyimdyunk'aty niwinø'ønin.

Ku ja Pablo jadigojk yja'jty jam Antioquía, winets ja myidigøøk ojk chøø'ñ kajpxwa'kxpi

¹⁸ Xjats ja Pablo yjaaktaa'niyii'ñ jeky. Winets ja myigu'uk tjaak'ukajpxpoo'kxkøjxnaa niduki'iyi ku ñøjkxwa'andi barkijotp jam Siria, møøt ja myigu'uk Aquila jøts ja Priscila. Xjats yja'ttøø tekyjøøm jam mejy'am ma txøøwi Cencrea, winets ja Pablo

kø'øm ñabyiktaajkxiyi ja ejxa'an, jøts ja wyaay tke'jpy ku wyinaty tø tuki'iyi tpaduñ midi wyanda'aky'ajtpy. Winets barkijøtpy tyøkinidøø. ¹⁹ Jøts yja'ttøø ma kajp jam txøøwi Efeso, jamts ja Pablo ja myigu'uk t'ukyiktaañ jøts jam ñijkxy tsaptøjkjotp ma ja ojts tminagyajpxyi ja israelit jaa'y pøn jam namyujkidip. ²⁰ Winets ja Pablo øy yjayikminuu'kxaaiky jøts jap waani tyaa'nit, ka'ats ja tkupijky. ²¹ Xjats ja møøt y'uknagajpxpoo'kxiniyøø, xjats tnimaay:

—Ja'agøjxp øts yam nnijkxy ku øts jam Jerusalén nyiknaawa'añ ja xøøw midi wingomp; kuwani øts jadigojk nme'ent jøts mee n'ats'ext ku Dios wya'ant.

Xjats jadigojk tyøjkii'ñ barkijøtpy, jøts chøø'ñ jam Efeso. ²² Xjats ku ja yja'jty ma kajp txøøwi Cesarea, winets jam choo'ngojmāa tekyjø'øm jøts ja ñijkxy Jerusalén, jam ja t'atskajpxpøø'kxy ja myøøtjanchja'wibi, winets yjøptaajky ma kajp txøøwi Antioquía. ²³ Jamts ojts kawinaak xøøwin tyaa'ni Antioquía, winets chøø'ñ jadigojk jøts t'ayø'øgyixy jadigojk ma wyinaty tø wyidity ma et txøøwi Galacia jøts Frigia, jøts ja myøøtjanchja'wibi tkajpxjot'amøki.

Ku ja Apolos ojts kyajpxwa'kxy jam Efeso

²⁴ Winet'lets ojts nay ja'abi tiemp i yja'aty jam Efeso tu'uk ja israelit jaa'y pøn txøøw'ajtp Apolos, jøts pøn kugajp'ajtp Alejandría. Ja'abi jaa'y janch tsuj janch øy ja kyajpxwa'kxy, janch ñija'wip idø'on wa'ats ja Dios kyajpxy. ²⁵ Tø ja wyinaty t'ixpiky ja Dios kyajpxy ma wya'añ jøts ku ja nwindson'ajtim tsojk myeenwa'añ ya naawiiñ. Ja'ayi ixpøjkin ja ñigajpxpy sa Juan Bautista ojts yik'ixpiky, jøts tigøjxp ku jaa'y ja tyiknøbejty. ²⁶ Xjats ja Apolos møk kyajpxøjkii'ñ jam tsaptøjkjotp; kuts ja Priscila jøts ja Aquila ja jade'en tmadowdi, winets ja abiky tjiwaawdøø, jøts ojts ka'pxy ttukmadowdi ku ja Jesús tø wyinaty y'atsmeni, jøts ti jaty ja ojts ttuñ. ²⁷ Xjats ku ja Apolos jam wyinaty ñaxwa'añ ma et txøøwi Acaya, winets ja janchja'wibi pøn jam Efeso ja nøky tyik'øydøø, jøts ja janchja'wibi tkajpxñigajxidøø pøn jam Acaya, jøts øy tsuj jam tyikja'attit ja Apolos. Kuts ja jam yja'jty Acaya, winets møk tjaakpudøjkii'ñ pøn jaty ja Dios tø wyinaty y'ayo'ejxngøjxp tyukjanchjawi ja nwindson'ajtim Jesús, ²⁸ jøts ja jam kyajpxwa'kxy mayjaa'y agujkp, jøts wa'ats ttukmadoogijxy midi ka' mibaat pøn tkajpxyo'ont. Tyukmadoow tuki'iyi ku ja israelit jaa'y kyatiwiyinmaydi, jøts pøni sa ja Dios kyajpxy jap yjaadyaani ku ja Jesús yiknitsokpi'aty, pøn ja israelit jaa'y yjajøp'ejx'ejttip.

19

Sa yjajty sa kyubejty ja Pablo jam Efeso

¹ Ku ja Apolos jap wyinaty Corinto jøts ja Pablo jam ñajxy kojpkjotp, jøts yja'jty jam Efeso ma tpaajty namay ja myigu'uk pøn jaty ja Dios tja'myajtstip. ² Winets ja Pablo jam tyiktiiy jøts tnimaay:

—¿Tø meets ja Espíritu Santo mdatøkiyi ku ojts xjanchjawidi ja Jesús?

Jøts ja t'adsojimbettøø:

—Omik øøts idø'on ja nnijawit jøts kudam ja Espíritu Santo jaa.

³ Winets ja Pablo jadigojk tyiktiiy:

—¿Sudso'ampyts ojts mnøbatti?

Xjats ja t'adsojimbettøø:

—Jade'en øø nnøbejty sami Juan Bautista ja jaa'y tyiknøbejty.

⁴ Xjats ja Pablo wyaañ:

—Nugo ejxa'an idø'on ja Juan Bautista myøøy ja jaa'y ku ja yiknøbety, jade'en'ampy ja jade'en ttuñ jøts ja jaa'y jade'en yiknijawidit jøts ku ja tjanchyiktigatsti ja chinaa'yin. Nayide'en ja tnimaay jøts ja amumjoojt t'ajot'attit pøn wyinaty menwampnim, ja Jesús idø'on yiktejp wyinaty menwamp yiknitsokpi.

⁵ Xjats ku jade'en tmadoodøø ku ja Pablo jade'en tnigajpxy, winets ojts ñøbatti ja nwindson'ajtim Jesús køjxp; ⁶ ku ja Pablo jade'en kyønixajidøø, jøts ja Espíritu Santo ñimejnidi, winets ja abikpyi ayuujk ojts tkajpxti, jøts tkajpxwa'kxti ja Dios y'ayuujk pøni sa ja Dios wyinmaa'nmyø'øyi. ⁷ Nimakmajtsk ja wyinaty yjaa'y'atti.

⁸ Tigøøk po' ja Pablo jap yø'øy'ijty jam tsaptøjkjotp ma jam møk'ampy kyajpxwa'kxy, jøts ttukmibiky jade'en ja jaa'y sudso'ampy ja Dios ja nitanaa'yin tpikta'aky. ⁹ Jamts winaagin pøn tkamibøjktip, ja'ats møk ja wyinmaa'ñ tpiktaktøø jøts jam mayjaa'y agujkp tjanchtaxe'ekti ja Dios kyajpxy. Xjats ja Pablo ja møøt ñamyatstuujtniyøø pøn ja ka'øy ayuujk tjagyaptip, winets ja tmøødiña ja myøøtjanchja'wibi jøts tmøødiy'ñ ma jaa'y tu'uk txøøwi Tiranno pøn ja xpøjktaajk wyinaty tjagyepy, jamts ja Pablo jabom jabom ja myigu'uk ttuk'ixpiky ja Dios kyajpxy. ¹⁰ Jade'en idø'on ja jam tyuun majtsk jumøjt, ja'agøjxp idø'on ja jaa'y ojts tnija'wigyøxti jagambaat ja Jesús kyajpxy, jade'en ja israelit jaa'y jøts nayide'en pøn ka'israelit jaa'dyi, pøn tsinaadyip Asia etjotp. ¹¹ Jøts ja Dios møk tmø'øy ja myøk'ajtin ja Pablo jøts ja milagri ja ttuun, ¹² jøts ja Pablo yjanchyiktapaaty ja paay jøts ja wet, jøts ja tminøjkxti ma pamaa'y jaa'y jap, winets ja pamaa'y jaa'y ja'ayi ttatsøktøø, jøts ja miku' jade'eñi myajtstuujtidøø.

¹³ Jam wyinaty niwinaagin ja israelit jaa'y pøn nugo widejttip kajp kajp. Ja' ja tyunk'ajttip ja miximaaky ja mimuu'kk, jøts jade'en ja miku' ttukmajtsu'utti ja jaa'y, nay ja Jesús myøk'ajtin yiktunwajnip, jøts tnøjmi ja miku':

—Øts wamp, majtsu'ut yø jaa'y Jesús myøk'ajtingøjxp midi kyajpxyø'øpy ja Pablo.

¹⁴ Tu'uk ja israelit jaa'y pøn txøøw'ajtp Esceva, pøn ja teety niwindsøn'ajtp, ja'ats idø'on ja y'una'jk jade'en adøstip, niwixujk wyinaty yjaa'y'atti. ¹⁵ Xjats ku ja jade'en ttundi, winets ja miku' y'adsojimbejtijidøø, jøts yiknimaadyøø:

—Ja' ø n'ejxkapy pøn txøøw'ajtp Jesús, jøts nayide'en ja' pøn txøøw'ajtp Pablo; jøts meets ka' mee n'ejxkapy pøn ja mbøn meets.

¹⁶ Winets ja jaa'y pøn wyinaty ja miku' møøt'ajtp, jøts møøt ñamyajtsiyøø ja niwixujkpi jaa'y, jøts ja jade'en myimajada'agyidi ja miku', jøts niduki'iyi yikakøjxidøø janchwindsaachi jøptsaaçi, niwa'ats ixwa'ats idø'on ja yjanchpidsømnidøø jap tøjkjøtpy. ¹⁷ Ku dø'on ja jade'en yjajty jam Efeso, winets niduki'iyi tnija'widøø ja kajp jaa'y pøn jaty israelit jaa'y, jøts nayide'en pøn ka' y'israelitjaa'yidi. Ku tnija'widøø jade'en ja ayuujk, winets niduki'iyi ja jotmay yjanchpaajtidøø, jøts tu'ugyi ja nwindson'ajtim yja' tmøjpiktajktøø.

¹⁸ Xjats nayide'en namay pøn jaty tmibøjktøø ja Jesús yja' winets ja pyøky tuki'iyi tkajpxnaxkøjxtøø, sa y'ijty kya'øy'adø'øtsti. ¹⁹ Jøts nayide'en may pøn jaty y'ijty tyundip ja miku' tunk winets ja kya'øñky tuki'iyi tniøøgyøxnidøø jam mayjaa'y y'agujkp. Xjats ku tpayø'ødyøø ja nøky ja chow, wixijxmyajk mil idø'on tpayø'ødyi tum ja plati meen. ²⁰ Jade'en idø'on ja nwindson'ajtim Jesús ja myøk'ajtin møj tnanky'ijxyiyi.

²¹ Xjats ku dø'on jade'en yjajty, winets ja Pablo jade'en wyinmay jøts jam t'ats'ejxwa'añ ja myøøtjanchja'wibi jam Macedonia y'etjotp, jøts nayide'en Acaya y'etjotp, winets jam yja'atwa'añ jadigojk Jerusalén. Jøts nayide'en wya'añ, ku jam y'uknaxt Jerusalén jøts nayide'en ñøjkxt Roma. ²² Xjats ku jade'en wyinmaay ja Pablo, winets ja pyudøjkibi tkejxy namajtsk jam Macedonia. Timoteo ja xyøøw ja pyudøjkibi jøts jadu'uk Erasto, jøts ja Pablo jam jawaani yjaaktaa'nijy'ñ Asia.

Ku ja Efesit jaa'y yjanch'ambøjktøø

²³ Winet'et ja Efesit jaa'y tyiktseptā'akwa'andi ja Jesús yja'. ²⁴ Tu'ugyi dø'on ja' pøn jade'en tyiktso'ondaajk ja ayuujk, Demetrio ja xyøøw. Ja'abi tunk idø'on ja yjagyepy, tum ja plati dø'on yiksandi'øyip, jøts nayide'en ja mutsk tsaptøjkuna'jk tyik'a'øyiñaxy nayide'en sami dios Diana chaptøjk t'ixy. Janch nimeenbyøjktip idø'on ja tyunk ja' pøn

jaty jap mōōt tyuñ. ²⁵ Xjats ja Demetrio twaadsōōy niduki'iyi pōn jaty nay yō'ōbi tunk tmōōt'ajttip, xjats ja tnimaay:

—Migu'uktōjkti, mnija'widipxi ku yō'ōbi tunk nduktanajxindi janch ōy janch tsuj ku ya njanchmeembyijkyindi; ²⁶ kumi m'ijxpy meets, mmadōōpy meets ku ja Pablo jade'en tkajpxyō'ōy jōts wya'añ ku ka' yō' Diosi midi jaa'y yik'ō'yip sa adōmin; jade'en ja Pablo ja jaa'y namay tō ttukmibiky, kidi yayip nugo yjaty, niduki'iyi dō'on ja Asiit jaa'y ja tnija'winidi. ²⁷ Ka' yjanch'ōyi, janch tsō'ōgi mōōt yō', tsojk adōm ndunk jade'en wyindigō'ōyindit, jōts nayide'en yō dios Diana chaptōjk tsojk yō nayide'en kya'ukyikmōjpiaktaknit pōn yō twindsō'ōgidi pōn jaty ya Asia tsinaadyip, jōts pōn jaty tsoo'ndip o manaajx o magajp.

²⁸ Ku ja mayjaa'y jade'en tmadoodōō ja Demetrio y'ayuujk, winets ja yjanch'ambōjktōō jōts niduki'iyi wyandōō:

—janch mōj adōm ndios Diana jōts ka' kyudigō'ōty!

²⁹ Xjats ja kajp jaa'y xem yam yjanch'adōtsnibōkidōō, jōts ja Macedoniit jaa'y namajtsk yikmajstōō pōn txōōw'ajttip Gayo jōts Aristarco midi ja Pablo myōōtwidijtpy. Xjats yikpawejtōō yikpakōō'tstōō, xjats yiknōjxkidōō jap mōj tōjkjōtpy mā ja kajp ja yjuntī tundaajk jap tjagyapti. ³⁰ Jamts ja Pablo nayide'en tyōkiwya'añ jōts ja myigu'uk t'atskugajpxwā'añ pōn wyinaty tō yikmatsti, xjats ja nay ja myōōtjanchja'wibi pōn mōōt wyidity ka'ap ja myajstuujtidoō. ³¹ Winets ja Pablo myiwin'ijxy nayide'en tkajxtōō ja y'ayuujk pōn jam windsōn'ajttip Asia, jōts ku ka' jam tpadōkit ja myigu'uk. ³² Xjats ja jaa'y jam junti tundaajkjōtpy nugo yjanchkajpxjō'ōkti, ōy sa tu'uk jadu'uk yjanchwā'andi kumi tō ja jaa'y wyinaty namay yjanchyō'ōmyukti, jōts ni tkanijawidi namay pōni tigōjxp idō'on yō'ōmyukti. ³³ Xjats tu'uk ja israelit jaa'y ja myigu'uk tyukmadoojōō pōni ti ayuujk idō'on jap ñiyō'ōmyuktīp, ja' xyōōw Alejandro, ja'ats ja myigu'uk ojts kuwāni ñajtswetsiyi jōts jam kyajpxt mayjaa'y agō'ōm. Winets ja Alejandro xyaji'jky, ja' tyijpy ku chajpxajy jōts ja niduki'iyi y'amo'ondit, ja' kyugajpxwampy ja myigu'uk midi tō yikmatsti namajtsk. ³⁴ Ku ja Alejandro yik'ejxkajpy kudam ja y'israelitjaa'y, winets ojts jinaxy yjanchjaakajpxjō'ōkti. Kajpxti ja majtsk hora'an, xjats wya'andi:

—janch mōj adōm ndios Diana jōts ka' kyudigō'ōty!

³⁵ Xjats ja eskribaān ojts kō'ōm tyik'amōñ ja mayjaa'y, jōts tnimaay:

—Meets Efesit jaa'y, ukmadowdi. Ñija'widip niduki'iyi ja naḡwii'ñit jaa'y ku yō Efesit jaa'y t'ejx'etti adōm nmōjdios Diana chaptōjk, jōts nayide'en yiknijawi ku n'ejx'ijtyim ja y'awanax midi kidaajk tsajpjōtpy. ³⁶ Kumi janch idō'on ja yajty, kidits nugo mdsō'ōgidi, ka' pōn ti ttuñ, tukween meets et, tsuj mjaa'y'attit ³⁷ kumi ya'at jaa'y midi meets ya tō xyikmiñ ka' yō ti ttundi, jōts nika'ap yō tjemdejti ttedejti adōm ndios Diana. ³⁸ Jōts Demetrio mōōt ja tyumbi, pōni jaa'adi pōn mōōt ñañi'ōōniwya'andi, mibaat yikpayō'ōdyit jam kudunk wyindump, jōts tnigajpxtīt kija' ja pyōky sudso'ampy ñañi'ōōniyidi. ³⁹ Pōni wenk winmaa'ñ yō' midi meets ixyam m'amidōōpy, mibaat myō'ōmyuktīt jōts yikxon ngajpx'ōyi'indit mōōt ja kudunktōjk; ⁴⁰ tō ja wyinaty kya'ōyi ku jotmōñ jam nyikni'ōō'na'andit jam mōj windsōn wyindump, jōts ku ja jotmōñ wya'ant ku adōm ja mōōt ñachep'ijxya'am. Niti winmaa'ñts adōm sudso'ampy n'adsojimbejtindit, ku jotmōñ t'amido'ot tigōjxp ya jade'en n'adijchindi ngajotkujkindi.

⁴¹ Xjats ku ja eskribaān jade'en kyajpx'abajtyiñ jōts yō'ōwya'kxnidoō niduki'iyi ja jaa'y.

20

Ku ja Pablo wyidijty Macedoniit etjotp jōts nayide'en Greciit etjotp

¹ Xjats ku ja mayjaa'y jade'en ñiyjotkukidoō, winets ja Pablo ja myigu'uk twaadsoogijxy jōts ja ojts tjaak'ukajpxwejni, ojts ttukmadōy midi ja wyinmaa'ñ'ajtpy; winet mōōt y'uknagajpxpoo'kxiniyi jōts jam ñijkxy mā et txōōwi Macedonia. ² Winets

jam ojts tkajpxpoo'kxkixy tjot'amøkajpxkixy niduki'iyi ja myigu'uk mā jaty jawyeen wyinaty tō ñaxy, winets jam choo'ngoymaa jōts jam yja'jty mā ja Grecia et. ³ Jamts y'uktaa'niiyih'ñ tigōōk po', xjats ku jam choonwani barkijōtpty jōts ñōjkxwa'añ Siria, winets nay jami tnija'wiyih'ñ kudam ja israelit jaa'y ñiwinmayiyi jōts yikmatst jap barkijōtpty. Winets wyinmaay jōts ne'egi ñōjkxt tekyjō'ōm, paty jadigojk nay jam wyimbijty Macedoniit etjotp. ⁴ Ja' ja wyinaty yjamyōōt'ajtpy niwixujk ja myigu'uk pōn txōōw'ajttip Sōpater pōn kugajp'ajtp Berea, jōts ja Aristarco, jōts jadu'uk Segundo pōn kugajpidip Tesalōnica, jōts ja Gayo pōn kugajpip Derbe, jōts jadu'uk txōōwidi Timoteo, jōts ja Tiquico, jōts jadu'uk Trōfimo pōn jam kugajp'ajttip Asia. ⁵ Ku jam yja'tti Filipos, jamts ōts wyinaty n'awixy, ōts Lucas nxōōw midi ya'at nōky tjaapy. Xjats ja niwixujkpi jaa'y cho'onjawyeenidōō, jōts ōōts jam ndaañ mōōt ja Pablo, jōts ōōts jamnim x'awixy jadigojk mā kajp txōōwi Troas. ⁶ Nay jami ōōts ja xōōw njaaktyimy'ukyiknajxy jam Filipos, ja'abi xōōw ku tsapkaaky yikay midi kalevaduri mōōt. Xjats ōōts jam ndsōō'ñ xōguixy jōts ōōts ja barki jam ndatōjkiñaa, jōdsnim ōōts kyimagoxk xōōw nja'jty jam Troas mā ōōts ja nmigu'uk nnajtspajtiyih'ñ, jamts ōōts ojts ndaa'ni wixujk xōōw.

Ku ja Pablo ja myigu'uk ojts tmigajpxy jam Troas

⁷ Ku dyomingixōōw'ajty jōts ja Jesús yja' yō'ōmyukti, jōts ja tsapkaaky tyikwa'kxwa'andi sa ja nwindson'ajtim ojts tñajstuni jōts tñankyayi, xjats ja Pablo jap nayide'en kyajpxwa'añ. Kumi kyimjabom ja wyinaty choonwani paty idō'ōn ojts jeky'ampy kyajpxy kunim myōjtsuu'miyih'ñ. ⁸ Jap ojts ñamyukyidi tigōōk nipatōjkijxpy mā jap wyinaty lampiri may yjajy; ⁹ jōts tu'uk ja mixy jam wyinaty chōōni wentani'am pōn txōōw'ajtp Eutico. Kumi jeky ja Pablo kya'amaay, winets ja mixy jami mya'uu'yjōknaa jōts tu'ugyi ojts tyimyaanijkxy, winets jam ojts kyunaxy jam nipatōjkōjxp jōts ñaxkidaajky najxkōjxp, jam ōōky yikwejtsji'jky. ¹⁰ Jōts ja Pablo tniwinajky jōts jam ñagyōxmujtsōō oo'kpi ñikōjxp jōts tkōbatxajiyih'ñ, jōts tñimaay ja myigu'uk:

—Kidi mdsō'ōgidi; jujky yō'.

¹¹ Winets ja Pablo jadigojk pyatōjkigyojmi jap nipatōjkijxpy; japts ja tsapkaaky ttukwa'kxy, jōts kyaadyōō; winets yjaaka'amaay kunim xiijñiyih'ñ, jōts ñōjkxnaa. ¹² Xjats ja jaa'y tjanchtaxondaktōō ku ja mixy ja ōy tsō'ōky tyiknōjkxnidi.

Ku ja Pablo chōō'ñ jam Troas jōts ñijkxy Mileto

¹³ Winets ōō ndsoonjawyeeniyih'ñ barkijōtpty, jōts ōōts jap n'aweixwa'añ ja Pablo mā kajp txōōwi Asón, tekyjō'ōm ja yō'ōwya'añ ku ja jam ñōjkxwa'añ. ¹⁴ Ku ōōts ja nmīnabyajtiyōō jam Asón, winets ōōts ja mōōt barkijōtpty ndōjkiyih'ñ, jōts ōō nmōōtnijkxy mejñinaxy mā kajp txōōwi Mitilene. ¹⁵ Jōts ōōts jam ndsōō'ñ jadigojk, jōts ōōts kyimjabom jam nnajxy ja' y'awemp mā et jam txōōwi Quío, winets ōōts nja'jty jadu'ukpi xōōw mā kajp txōōwi Samos. Jōts ōōts nnijkxy poo'kxpi mā kajp txōōwi Trogilio, jōts nay kyimjabomgōjmyi ōō njatkojmi mā kajp jam txōōwi Mileto. ¹⁶ Jade'en idō'ōn yjajty kumi ka'ap ja Pablo jeky tyiknaxwa'añ ja xōōw jam Asia etjotp, paty kyanijkxy Efeso; kumi ja' ku tsojk yja'atwa'añ Jerusalén jōts jam tyiknaxwa'añ ja Pentecostés xōōw.

Ku ja Pablo ttukmadōōy ja Efesit mōjaa'dyōjk ya'atpi ayuujk

¹⁷ Ku ōō njam'ajty Mileto, winets ja Pablo twaadsōōy pōn jaty jam mōjaa'dyōjk'ajttip mā tsaptōjk jam Efeso, ¹⁸ xjats ku ja yja'ttōō jōts tñimaay:

—Meets mnija'wip sa ōts ya Asiit etjōōjty n'ōyjaa'y'ajty ku ōts ya miduk'ojk ojts nmiñ, jōts ixymbaat jade'eñim njaa'y'aty. ¹⁹ Mnija'widip sa ōts ejtp nbaduñ ja nwindson'ajtim Jesús y'ayuujk jōts ka'ap ōts nnamyikexyiyi, njanchkuyaajxip ōts ku ja jaa'y tkatsokti ja Jesús yja'. Jōts nayi mnija'wip meets sa ōts ya ojts n'ayo'ombaaty ku ōts ja nmigu'uk israelit jaa'y xjemdundi xedundi. ²⁰ Ka'ats meets ndamajstutu ja ōgyajpxy midi meets kō'ōm myiktu'ump, ku ō nnigajpxy nayide'en mayjaa'y agujkp jōts adōjkjōōjty nayide'en. ²¹ Niduki'iyi ōts ndukmadoogixy jade'en ja israelit jaa'y jōts

nayide'en pøn ka'israelit jaa'dyi, jøts ku tmajtstu'uttit ja kya'odyunk amumjoojt møøt ja Dios, jøts tmøjawidit tjanchjāwidit ja nwindson'ajtim Jesucristo. ²² Ixyam øts kuwani nnijkxy Jerusalén ja'agøjxp ku ja Espiritu Santo møk xwaadsøy, ka'ap nnijawi pøni sa øts jam nøjkx njaty. ²³ Jade'eñi nnijawi pøni magajp nnijkxy nja'aty, jade'en øts ja Espiritu Santo xuknijawi jøts ku kuwani nyiktsu'umt jøts jam møk n'ayo'ombaatt. ²⁴ Ka'ats øts yø nmøjpkta'aky; wan ø t'øøky, ka'ap ø nnabya'ayøyi ja'agøjxp jøts øts øy jotkujk kuwani nyikyø'øwya'añ yø ndunk, kunim yjòpkøxt midi øts nwindson'ajtim Jesús tø xmø'øy, jøts øts ja jaa'y øy tsuj ndukmado'ot ku ja Dios kø'øm tpa'ayøy ja ñaxwii'ñit jaa'y.

²⁵ Tø øts ya ngajpxwa'kxy ja Dios myøk'ajtin sa ttanitanì ja yjaa'y, ixyam inet najt-sja'wip øts jøts ku meets ka' n'ukniwimbejtnit. ²⁶ Paty meets ixyam ndukmadowa'añ jøts ku nipøn nganadyapøkyjāwiyit pøni jaa winaagin tyuu'tigøødyi. ²⁷ Kumi tø øts nnigajpxy tuki'iyi pøni sa ja Dios ja wyinmaa'ñ tpiktaajky, ka'ap øts midi n'ayu'uch'aty. ²⁸ Jøts nayide'en meets kø'øm mnay'eix'etidit, jøts niduki'iyi nayide'en ja migu'uktøjk x'eix'ettit, kumi tø meets ja Espiritu Santo mbikta'agiyi jøts mdaandi ejx'ejtpi pøni pøn jaty ja Jesús yja' tpaduujnidip, pøn ja nwindson'ajtim Jesús kø'øm kyu'o'jkimbaajtip. ²⁹ Nija'wipts øts ku øts ya ndsoont jøts mye'endit wenkpi jaa'y, jøts myikwinmaa'nmya'atwa'anidit, jøts tyikutigøøwya'ant ja Jesús yja'. Jade'en idø'øn y'adø'øtswa'andit kakeey miy'uk tyikutigøøy ja borreegi'u'nk. ³⁰ Jøts nayide'en meets winaagin nøjkx xwin'øøndi ja mmøøtjanchja'wibi, jøts ja xukmibøktit midi ka' tyiyi yjanchi. ³¹ Paty øyim mnay'eix'etidit; ja'myatsta'am ku meets tigøøk jumøjt xinaxy tsunaxy ngadamajtstu'uty ja kajpxwejin ayo'eixingøjxp.

³² Meets migu'uktøjkti, Dios møk mbudøkiydip, jøts nayide'en myikti'wyinmayiyidit y'øy'ayuujkøjxp midi xamidsojkindip sa ja x'ayo'ijxyindi, jøts nayide'en myikmo'odit ja øy'ajtin ja tsuj'ajtin møøt ja'adi niduki'iyi pøn jaty ja Dios wyinaty tø tyikpøkwyā'ach.

³³ Ka' meets ya ti n'amidøøy, ni meeñ, ni wet, niti. ³⁴ Wa'ats xnijawidi ku øts kø'øm ojtts nnay'amiduniyi, jøts øts kø'øm nbaajty pøni ti jaty øts xka'ejtxøø, ndukpaajt øts nayide'en ja nmigu'ukti ja yja' pøn jaty ø møøt nwidijty. ³⁵ Ejtp øts ja nnigajpxy jøts ku jade'en mnamyidunidit, jøts xpudøkidit ja mmigu'uk pøn ja yja' ka'ejtxip, ja'myatsti ja nwindson'ajtim Jesús y'ayuujk sa ja wya'añ yide'en: "Ne'egi møj ja xondaajkin ja wyimbidsø'ømxiyi pøn windsø'jkip, jøts ka'ap ja' pøn yikwindsø'jkip."

³⁶ Xjats ku ja Pablo jade'en kyajpx'abajtiyii'ñ, winets møøt ñagyuxendyaajkøø ja myigu'uktøjk jøts ja Dios t'ajot'ajttøø. ³⁷ Winets niduki'iyi ja myigu'uk wyinmaa'ñ yjanchmendøø jøts yjanchyaxtøø, xjats ja Pablo yikyukxajnajx jøts yiktsu'kxy. ³⁸ Janchjotmay'oo'knidip idø'øn ja wyinaty ku ja Pablo jade'en wya'añ jøts ku ka' nijuuni xøøw y'ukyikniwimbejtnidit. Winets tmøøtnøjkxtøø ma wyinaty ja barki jam.

21

Ku ja Pablo ñijkxy jam Jerusalén

¹ Xjats ku øø nmajtstuupty ja nmigu'uk jam, winets øøts barkijøtpty ndøjkiñaa, jøts øø tiiy ndyimñijkxy ma ja et txøøwi Cos jam mejkyujk'am, jøts øø kyimjabom nja'aty ma txøøwi Rodas, jamts øøts jadigojk ndsøø'ñ jøts øø nja'aty mejy'am ma txøøwi Pátara. ² Jamts øø nbaajty jadu'ukpi barki midi wyinaty nøjkxp ma et txøøwi Fenicia, winets øøts jap ndøjkiyii'ñ. ³ Jøts øøts jam nyø'øy mejyjotp, winets øøts n'ixy anajy'ampy tu'uk ja et midi jam mejkyujk'am, ja' xyøøw Chipre, jøts øø nja'lty Siria ñaxjotp. Ja ku ja barki wyinaty tyiktanwa'añ ja tsimy ma kajp txøøwi Tiro, xjats øøts jam n'uk'awidijty. ⁴ Nay jam øø nminabyaajtiyøø ja nmøøtjanchja'wibidi, xjats øøts jam nmøøtaañ wixujk xøøw; winets ja nmigu'uktøjkti tnimaadyi ja Pablo jøts ku ka' ñøjkxt jam Jerusalén, kumi tø ja wyinaty ja Espiritu Santo tyuknijawiyidi ku jam sa yjatt. ⁵ Ku øøts wixujk xøøw n'uktsinaay winets øø ndsoonwani. Xjats øø niduki'iyi ja nmigu'uktøjk møøt ja ñidø'øxyi jøts møøt ja y'unajkti øø xpadsøø'ñ, xjats øøts ojtts xnajtskaxi jam mejy'am, winets øøts ja møøt n'ukuxanaañaa, jøts øøts møøt ndios'ajot'ajty. ⁶ Winets øøts jam ja

møøt n'uknagya'jpxpoo'kxiniyøø, xjats øø ndøjkii'ñ barkijøtpy, jøts ja wyimbejtndøø tyøjkwindump.

⁷ Xjats øø ndsøø'ñ jam Tiro, jøts øø nja'jty mā kajp txøøwi Tolemaida, jamnim øøts nminawya'kxiyøø ja barki jøts øøts ja nmigu'uk n'ukmigajpxy, xjats øøts ja møøt n'uktaa'nii'ñ tukxøøw. ⁸ Winets øø kyimjabom ndso'ongojmaa møøt ja Pablo pøn jaty øø møø nwidity, jøts øø nja'jty jam mā kajp txøøwi Cesarea. Winets øøts nniykxy jam tu'uk jaa'y tyøjkjotp pøn txøøw'ajtp Felipe, jøts pøn ja øy'ayuujk tmiwidejtp, jøts nayide'en y'ijty tunk'aty tyikwa'kxy ja jii'kxy, ja'ats øøts jam møøt ndaañ. ⁹ Ja Felipe jam ja wyinaty ja nimaktaxk ja ñøøx pøn ka'aninim y'amatskidi, ja'ats tkajpxnaxtip ja Dios y'øgyajpxy pøn ti jaty ja ttukajpxnaxwajniyidip. ¹⁰ Tø øøts jam wyinaty ndaa'ni jeky ku tu'uk ja Dios kyugajpxy yja'jty pøn txøøw'ajtp Agabo, jøts pøn tsoo'mp jam mā et txøøwi Judea. ¹¹ Ja'ats øøts ojts xmigajpxy, jøts ojts ja Pablo chum yiknixaji winets ñadyabaktsujmiyøø jøts nayide'en ñadyakøtsujmiyøø, jøts jade'en ja ejxa'an ja Pablo yikmøøy, jøts yiknøjmi:

—Ja Espíritu Santo dø'øn wamp jøts ku ja israelit jaa'y jam jade'en nøjkx mduñiyi Jerusalén, jøts myikøyakt mā ja yikmøjkutujkpi pøn ka'israelit jaa'dyi.

¹² Xjats ku øøts jade'en nnimadøøy møøt nmigu'uk pøn kugajp'ajtp Cesarea, winets øøts ja Pablo møk njanchjanimaay jøts ka' ñøjkxt jam Jerusalén. ¹³ Xjats ja Pablo y'adsojimbijty:

—¿Tiku mya'axti jøts øts nugo xyikjotmay'ookti? Wan twanjaty, ngupøkp øts wan øts tyikøtsumy tyikpaktsumy. Jøts pøni xyik'ookwandip øts jam Jerusalén, ngupøkp øts ja nayide'en nwindson'ajtim Jesús wyinmaa'ngyøjxp.

¹⁴ Xjats kumi ka'ap øøts ja Pablo xkajpxkyupiky, winets øøts jade'eñi n'amøøñ, xjats øø nwaañ:

—Wan tjaty pøni sa Dios kø'øm tyamidsøkyi.

¹⁵ Ku dø'øn jade'en y'uknajxy ja kajpxy, winets øøts ndsimy nyik'øyi'ñ, jøts øøts jam nnøjkxwa'añ Jerusalén. ¹⁶ Winets øøts ja nmigu'uk winaagin xjamyøøt'ajty midi tsinaadyip Cesarea, jøts tu'uk midi kugajp'ajtp Chipre, ja' xyøøw Mnasón midi wyinaty jekyip ja Dios kyajpxy tø tpabøjkniiyi, ja'ats øøts xyikja'ada'akwamp jam Jerusalén mā wyinaty ja tyøjk tjagyepy.

Ku ja Pablo ojts tmigajpxy ja Jacobo

¹⁷ Xjats ku øøts jam nja'jty Jerusalén, jøts ja nmøøtjanchja'wibidi janch ejtni xoni øø xyikja'jty. ¹⁸ Winets øøts kyimjabom nmøøtniikxy ja Pablo jam Jacobo tyøjkwindump mā wyinaty ja møjaa'dyøjkti niduki'iyi. ¹⁹ Xjats ja Pablo tkajpxpøø'kxy niduki'iyi pøn jaty jam wyinaty, jøts jatyi ttamimadyakniøjkøø tuki'iyi sa jaty yjajty ku ja Dios ja myøk'ajtin jade'en tnanky'ijxyiyi jam mā jaty ja jamdi pøn ka'israelit jaa'dyi. ²⁰ Xjats ku dø'øn jade'en tmadoojidøø ja Pablo kyajpxy, winets yjanchxonjajtøø ja myigu'uk jøts tmøjpiktaktøø ja nwindson'ajtim Dios, xjats tnimaadyøø:

—Øy'ajtp migu'uk, tø xnijawi ku ja israelit jaa'y mil'ampy tø tmibøkti ja Jesús yja', jøts nay ja' niduki'iyi wandip jøts ku kuwani ja Moisés kyutujk yikpadu'unt. ²¹ Jøts wandip ja' ku mets ja israelit jaa'y jade'en xukmadøy midi jagamgajp tsinaadyip, jøts ku ka' ttunk'attit midi Moisés kyutujk'ajt jøts ku ka' ja mutsk mixy'una'jk ja ejxa'añ yikmo'ot ñe'kxkøjxp, ni ngatu'unindit ja ngø'ømdsinaa'yin. ²² ¿Sudso'ampy yø ndu'unindit? Janchnamyukidip inet ja nmigu'uktøjkti ku tnijawidit ku ya tø mja'aty.

²³ Øy'ajtp ne'egi jade'en xpadu'unt: Ja ya nimaktaxk nmigu'ukti pøn ja wyanda'aky jap tjagyaptip tsaptøjkjotpy. ²⁴ Møødi jøts ja wa'ats'ajtin xpaattit, jøts xkujuuyit ja wyanda'aktyi jøts nayide'en jap xnankyaabiyit, jøts yiknijawit ku ja wyanda'aky tø tyik'adukti, jøts tnijawidit pøni ka'adam meets ja Moisés kyutujk xjanchpaduujniyi. ²⁵ Jap øøts ayuujk jadu'uk njaakjagyepy, kumi tø øøts ja nøky jade'en nguexy mā jaty ja Jesús yja' pøn ka' y'israelitjaa'yi, jøts øø ndukmadøy jøts ka'ap nugo tmijotmay'ooktit

ja israelit jaa'y chinaa'yin. Ja'ayi øø ndukmadø yøts ku ka'ap ja tsu'uch ttsu'utstit midi ja tsamaxan yiktawindsø'jkp. Nayide'en ka'ap ja ni'jpy tjøø'kxtit, jøts nayide'en ka'ap ja jiyujk tsu'uch ttsu'utstit midi ka'ø'y'oo'kp, jøts nayide'en kidi ja ñiyaa'y ja ñidø'øxy ñabyøjkxiyidit.

Ku ja Pablo yikmajch møj tsaptøjkjøtpy

²⁶ Xjats ja Pablo tmøødiyii'ñ ja nimaktaxkpi jaa'y, jøts kyimjabom ojts tyiktso'onda'akti sudso tpaattit ja wa'ats'ajtin. Xjats møøt tyøjkii'ñ jap møj tsaptøjkjøtpy jøts ttukmadoowa'andi ja teety juuni yjøpkøxt ja'abi jotmay. Yø' tyijpy ku dø'øn ja yjøpkøxtit winets nidu'uk nidu'uk tyikme'endit ja yojxin.

²⁷ Xjats ku wyinaty wixujk xøøw tyika'pxwanidi ja yjotmay sudso tpaattit ja wa'ats'ajtin, winets ja Pablo ja israelit jaa'y jap y'ejxpaa'jtiyøø jap tsaptøjkjøtpy pøn tso'ondip Asia. Ku ja Pablo jade'en yiknija'wiyii'ñ, winets ja jaa'y ñanky'ambøjkøxidøø ja xem ja yam, winets tmajtswa'andi ja Pablo, ²⁸ jøts tjanchtaya'axti tjanchtajokti jøts wya'andi:

—iMeets Israelit jaa'y, pudøjkik øøts! Wan tmajchindi ya'atpi yaa'dyøjk pøn kajp kajp widejtp, jøts ja jaa'y jade'en ttuk'ixpiky jøts ku ka'ap adøm ndsinaa'yin y'øyiindi, jøts ja Moisés kyutujk nayide'en t'abaaxi jøts nayide'en adøm ndsaptøjk; jøts jinaxy ixyam tyimyaak'adi'ich ku ja griegit jaa'y ya tjaaktyimgyuwaa'wi, jøts jade'en tyikma'aty adøm ngunuu'kxchaptøjk.

²⁹ Jade'en ja israelit jaa'y wya'andi ku ja Pablo jade'en tø yik'a'ejxnaxy jap kajpjøtpy, ku jap tmøøtwidity tu'uk ja griegit jaa'y pøn kugajp'ajtp Efeso, ja' xyøøw Tróximo. Jøts jawandipyim idø'øn ja jade'en tø net ja Pablo tmøøtnijkxy ja griegit jaa'y jap tsaptøjkjøtpy.

³⁰ Xjats ja kajp jaa'y yjanch'ambøjknibøjkidøø, winets ja Pablo yikjidøjtpidsiimy jap tsaptøjkjøtpy, jøts ja tsaptøjk jaty tyik'adujktøø. ³¹ Tyimyk'ookwandip ja wyinaty, ku ja soldadi ñiwindsøn tnija'wiyii'ñ ku ja kajp wyinaty nugo yjanch'adøtsnidi. ³² Winets ja myiwindsøn ja ttuknija'wigyixy jøts ja pujtp yjanchja'ttøø jap ma ja mayjaa'y jap wyinaty. Kuts ja yik'ejxpaa'ttøø møøt ja masyoldadi, winets ja Pablo jade'eñi yikmajstuupty jøts ka' y'ukyikwojpnaa. ³³ Xjats ja windsøn twinguyø'øyi'ñ ja Pablo, winets ja Pablo yikmajch, xjats ja windsøn tyikutujky winets ja Pablo adsow aduuk yiktagøtsuumy ja puxkadeen, xjats ja windsøn tyiktiy pøn jaa'y ja', ti tundigø'øyin ja wyinaty tø ttuñ. ³⁴ Xjats ja jaa'y ja xem ja yam nugo yjanchkajpxjø'ktøø, ni sudso'ampy ja windsøn tjanchkamadooguki, winets tyikutujky jøts jap tñankyiknijkxyi ma ja soldadi kyutujktaajk japti. ³⁵ Ku jap wingon tyikja'tti ma eskaleri jap, winets ja jaa'y tjanchjaakwojpw'a'andi ja Pablo ambøjkingøjxp, paty ja soldadi ojts køjxp tsapkø'ødi ja Pablo; ³⁶ janch mayjaa'y idø'øn ja wyinaty pameejnip, jøts tjanchtaya'axti tjanchtajokti:

—iWan tpa'øøky!

Ku ja Pablo yjanagyugajpxøø mayjaa'y wyingujkpy

³⁷ Ku wyinaty ja Pablo jap tyøkwyani soldadi kyutujktaajkjøtpy, winets ja Pablo tjanøjmi ja windsøn:

—iKidi y'ø'y'att ku nmigajpxt?

Xjats ja windsøn t'adsojimbijty yide'en:

—Øy'ajtp pøni mja'jtpy griegit ayuujk. ³⁸ iKidi ja egiptitjaa'yip mets, pøn ja tsep namnim jawaani tkayiktso'ondakp, pøn ja yikjaa'y'oo'kpi jam ojts tmøøtsøøni nimaktaxk mil jam tø'øts'etjotp?

³⁹ Xjats ja Pablo t'adsøø yøts tnimaay:

—Israelit jaa'y øts. Jam ø ngue'jxy Tarso midi jam møj kajp'ajtp Ciliciit etjotp; tun ja may'ajt jøts øts yø jaa'y nmigajpxt.

⁴⁰ Xjats ja windsøn tyikutujky jøts jaa'y tmigajpxt, winets ja Pablo jap eskalerikijxpy wya'k'øyiyi'ñ, jøts ja'ayi xaji'iky jøts ja jaa'y y'amo'ondit. Xjats ku ja jaa'y y'amongøxtøø, winets ja hebreit ayuujk ja tkajpxøjkijyi'ñ:

22

¹ —Meets migu'uktøjkti jøts møjaa'dyøjkti, ukmadoojidik øts n'ayuujk midi ngajpxwampy.

² Xjats ku ja jaa'y tmadowdi jøts ku ja Pablo tkajpxy ja hebreit ayuujk, winets niduki'iyi y'amondøø, jøts ja Pablo tnimaay:

³ —Israelit jaa'y øts, jam ø ngue'jxy Ciliciit etjotp mā kajp txøøwi Tarso, jøts øts ya tø nyeeky Jerusalén, jøts øts ja' xyik'ixpijky midi txøøw'ajtp Gamaliel, wā'ats øts ja xuknijawi adøm ndsinaa'yin pøni sã ja møjaa'chinaa'yin. Ojts øts idø'øn ja Dios yja' ka'pxy nbaduñ amumjoojt jade'en sã meets ixyam xuñin. ⁴ Øts y'ijty nmøjmidsep'ajtpy pøn jaty ja Jesús yja' tpaduujnidip, nyik'ooktibaat øts ja y'ijty, jøts nyiknijxxy ja yaa'y ja tø'øxy jap puxøjkjøtpy. ⁵ Wā'ats ja teetywindsøn tnijawidi møøt ja møjaa'dyøjk, kumi kø'øm øts ja xmo'odi ja kutujk jøts øts ja jam nmijnijxxy Damasco mā wyinaty adøm nmi'israelit jaa'dyi. Jøts øts ja jam n'ixa'ay pøn jaty wyinaty tpaduujnidip ja Jesús yja', jøts øts ya nyikmeenwā'añ aguwanikøjxp jøts nyik'ayo'ombaāt wā'añ.

Ku ja Pablo tnimadyaajky ja chinaa'yin ku ja tyiktigajch

⁶ Xjats ku øts ojts nmijnijxxy ja'abi winmaa'ñ, jam wyinaty wingon nja'atwani Damasco kujkxøøw et, winets øts ojts jotmøñ ja jaj xnawidity midi janch møk tsamamp, jøts n'ijxy ku kyidaajk tsajpjøtpy. ⁷ Winets øts jami nnaaxkidaajky, jøts øts nmadøøy ja ayuujk ku øts yide'en xnimaay: “Saulo, Saulo, ¿tiku ø xjemdunwā'añ xedunwā'añ?” ⁸ Xjats øts nyiktiiy jøts nnimaay: “¿Windsøn, pøn mets?” Jøts ø x'adsøøy: “Øts Jesús Nazaretit jaa'y, ja' pøn mjemdumpy mdedumpy.” ⁹ Xjats øts njamyøøt janchø'jkidøø ku ja jaj t'ejxpaattøø, ja' ka'ap ja tmadoodøø ku øts nyikmigajpxy. ¹⁰ Xjats ku øts idø'øn jade'en nyikmigajpxy, winets ø nnimaay: “¿Ti windsøn ndu'ump, sudso'ampy ndaabyaatt?” Winets nwindsøn'ajtim xnimaay: “Pidø'øk jøts mnøjkxt jam Damasco, jamts tuki'iyi myiktukmado'ot pøni ti jaty mdu'ump.” ¹¹ Kumi tø øts wyinaty ja jaj xyikwinjøøxy xyikwinapy, winets ja nmigu'uk jam x'ukwejtsnidøø, jøts øts xyikja'ttøø jam Damasco.

¹² Jam wyinaty tu'uk ja jaa'y pøn txøøw'ajtp Ananías, ja' idø'øn tiiy tjanchpadump ka'pxy ja Moisés kyutujk. Xjats niduki'iyi ja israelit jaa'y pøn jaty jam tsinaadyip Damasco, yjanchojktip idø'øn ja' ja Ananías. ¹³ Xjats øts ja Ananías ojts x'ixy, jøts øts xnimaay: “Migu'uk Saulo, tawin'eix yikxon yø mween jadigojk.” Jøts øts jaty ojts nw'in'ejxpiky, xjats nmigu'uk n'ejxpaajty. ¹⁴ Jøts ø xnimaay ja Ananías: “Ja Dios Teety pøn adøm n'apteety'amøj pyadundip jekyip, ja' kø'øm tø mdsøkyi jøts me mduknijawiyit ja y'øwyinmaa'ñ, jøts ñanky'ijxyiyi ja nwindsøn'ajtim Jesús pøn tum tsuj ja winmaa'ñ tmøøt'ajtp, ja'ats kø'øm ja y'ayuujk mdukmadooliyip. ¹⁵ Ja'agøjxp ja Dios jade'en ttuñ, jøts mets nøjkx xkajpxwa'kxy ja kyajpxy y'ayuujk, jøts xuknijawit tuki'iyi ja naxwii'ñit jaa'y sã tø x'ixy jøts sã tø xmadøy. ¹⁶ Jøts ixyam, ¿tiku nugo mgo'kni? Pidø'øk jøts mnøbatt, janchjawi amumjoojt ja nwindsøn'ajtim Dios yja' jøts myikpøkwyā'adsiyit.”

Ku ja Pablo tnimadyaajky sudso'ampy ojts yikexy jam mā jaa'y ka' y'israelitjaa'yidi

¹⁷⁻¹⁸ 'Ku øts idø'øn jade'en njajty, winets øts jadigojk nwimbijty yā Jerusalén, jøts øts jap nnijxxy tsaptøjkjøtpy Dios'ajot'ajtpi. Japts øts ja nwindsøn'ajtim xmigajpxy, jade'en øts ja n'ixy kidim ja jaa'y kyuma'ay, jøts ø xnimaay: “Putyi ya tsoon Jerusalén, ka'ap inet ja tmøjpikta'aktit sã øts inet n'ayuujk xjakajpxiyit.” ¹⁹ Xjats ø nnimaay: “Mets teety, ñija'widip ja' ku øts jam y'ijty nnijxxy mā jaty ja tsaptøjk, jøts øts jam nmach pøn jaty tpadundip mets mja', jøts øts ja ndagubety, yikxon njanchwiwøpy jøts nyiknijxxy puxøjkjøtpy. ²⁰ Ñija'widip ja nayide'en ku øts jam wyinaty ku ja Esteban jam

y'ø'jky midi mets m'ayuujk ojts tkajpxwa'kxy, jam øts wyinaty nayide'en ndani, jøts øts nwaañ nayide'en jøts tyik'ookit. N'ejx'ejtidøø øts ja yik'oo'kpi ja wyet.” ²¹ Xjats øts ja nwindson'ajtim xnimaay: “Putyi, jagam me ngajxwa'añ kajpxwa'kxpi ma jaty pøn ka' y'israelitjaa'yidi.”

Ku ja Pablo ja soldadi windsøn yikpuxøjktøjkiyøø

²² Xjats ku ja Pablo jade'en yjakajpxy, winets ja mayjaa'y møk'ampy yjanchkajpxjø'ktøø, xjats wyandøø:

—¡Wan tpa'øøky yø'øbi jaa'y! ¡Ka'ap y'ukpaat'ajtiñi jøts yjaaktsøønit!

²³ Xjats ja mayjaa'y tjanchtayax'adø'øtsti jøts ja wyet tjanchajpwøjti, jøts ja pu'ux nayide'en tjanchwøjø'økti, ²⁴ paty ja windsøn nayide'en tyikutujky jøts ja Pablo jap yikpøkjø'økt jap windsøn kyutujktaajkjøtpy. Xjats ja windsøn tyikutujky jadigojk jøts yikwopt, jøts kuwani ttuknigajpxwa'añ tigøjxp ku ja mayjaa'y jade'en myidsep'atyiyi. ²⁵ Xjats ku ja Pablo tø wyinaty yikøtsumni yikpaktsumni jøts yikwopwa'añ, winets ja Pablo tnimaay ja soldadi pøn jap wyinaty:

—¿Mbaat'ajttip meets jøts meets ja romanit jaa'y xwopt midi ka'aním yiktiidyuñ?

²⁶ Ku jade'en tmadøøy pøn ja soldadi t'ana'amp, winets ja jaty t'ninijkxy ja wyindsøn, jøts tnimaay:

—Ejxim ku jade'en m'adø'øtst, ¿kidi xnijawi ku yø' romanitjaa'y?

²⁷ Winets ja windsøn twingunøjkxyiñ ja Pablo jøts tyiktiy:

—¿Mjanchromanit jaa'y mets?

Xjats ja Pablo t'adsojimbijty jøts tnimaay:

—Paty ja' øts.

²⁸ Xjats ja windsøn tnimaay ja Pablo:

—Janch kajaa øts nmeen tø nyiktuñ ku øts ya nromanitjaa'y'atwa'añ.

Xjats ja Pablo tnimaay:

—Ka'ap øts ya ti jade'en tø ngujuy, ja' ku øts ya tø ndyimgye'exy.

²⁹ Xjats ku dø'on jade'en yajty, winets ja soldadi jadi'iñi yjiyø'øgyøxnidøø pøn ja Pablo t'ukwopwandip. Xjats ja windsøn ojts nayide'en chø'øgi kudam ja' ryomanitjaa'y pøn wyinaty tø tkøwøøndi t'pakwøøndi.

Ku ja Pablo yiktanay'øyiyøø ja israelit jaa'y myøjktujk adsinaabyi wyingujky

³⁰ Xjats ja windsøn kuwani tnijawiwya'añ tigøjxp ku ja Pablo ja israelit jaa'y ñi'øøniyi. Xjats kyimjabom tñankwyinajkiyøø ja puxkadeen, jøts tñankwyaamujkiyøø ja teetywindsøn jøts nayide'en ja israelit jaa'y kyutujk adsinaabyidi, winets ja Pablo jap yikwaanijkxy jøts tyikajpxwa'añ jap windsøn y'agui'ptyi.

23

¹ Xjats ja Pablo twinguwa'jkxyiñ pøn jaty jap wyinaty møj windsøn'ajttip, jøts tnimaay: —Migu'uktøjkti, wa'ats Dios t'ixy ku øts ka'ap ja Dios nmidundigøy, ejtp øts jotkujk nnayjawi.

² Winets ja møjteetywindsøn tyikutujky midi txøow'ajtp Ananías, jøts tnimaay pøn ja Pablo jap wyinaty wingon møøt tyani, jøts ja Pablo yik'akøjxjø'økt. ³ Xjats ja Pablo t'adsøøy ja møjteetywindsøn:

—¡Ti windsøn mets idø'on jade'en, nayide'en ja Dios mduniyit! Pøni mgutujk'adsinaapy tam mets, ¿sudsøts øts jade'en xnankyoxwa'añiyi pøni jap tam ja kutujk xmøødi?

⁴ Xjats ja y'adsoodøø pøn jaty ja Pablo jap wyinaty møøt wingon y'ity, jøts ja Pablo yiknimaay:

—¿Jade'endam idø'on xmigajpxigøy ja møjteetywindsøn?

⁵ Xjats ja Pablo y'adsøøy:

—Migu'ukti, ka' øts yø nnijawi kudam yø myøjteetywindsøni; janch jade'en ja Dios kyajpxy wya'añ ku wya'añ: “Kidi xmiğajpxigø y pøn jam yikutujktip mgajpkøjxp.”

⁶ Winets ja Pablo jam t'ejxkajpy ku majtsk piky ja windsøndøjk jamdi. Jam wyinaty pøn ja tpadundip ja saduceit ixpøjkin, jøts nay jam ja'amidi pøn tpadundip ja fariseit ixpøjkin, paty ja Pablo møk ojts kyajpxwa'kxy, jøts wyaañ:

—Meets migu'uktøjkti, fariseit jaa'y øts jøts fariseit jaa'y øts ndeety. Ja' meets ixyam xatiidyump ku øts n'awijxy'aty jøts ku ja oo'kpi jadigojk yjujkpyiky jap oo'kpi jutjøtpy.

⁷ Xjats ku ja Pablo jade'en wyaañ, winets ja' pøn ja fariseit ixpøjkin tjagyaptip jøts nayide'en pøn ja saduceit ixpøjkin tmøøt'ajttip, ja'ats ojts møk ñadyamigajpxyidi kunim majtsk piky ja wyinmaa'ñ yjajttø. ⁸ Ja saduceit jaa'y wamp jøts ku ka'ap ja oo'kpi yjujkpyiky jadigojk jap oo'kpi jutjøtpy, jøts ku nayide'en ka'ap ja ankilis ma, jøts ni anmija'win jøts ni miku' niti kya'ity. Jade'en idøøn ja saduceit y'ixpøjkin; xjats ja fariseit y'ixpøjkin tuki'iyi ja tjanchjawidi. ⁹ Xjats niduki'iyi kyajpxjø'ktøø; winets winaagin ja kajpxwejpji wya'kukiyi'ñ pøn tnija'widip ja Moisés kyutujk, jøts pøn ttsojktip ja fariseit y'ixpøjkin, ja'ats ojts wya'andi:

—Ya'at jaa'y ka' ti tundigø'øyin tjagyepy, jotmøn ku yø tø myigajpxyi tu'uk ja ankilis uk øy ti, ka' y'øyi ku ja Dios yja' nugo ndatøjka'andit.

¹⁰ Xjats kumi janch møk idøøn ja jeky ñagyajpxidøø, winets ja soldadi windsøn tjøpjawi ku ja Pablo jotmøn ja mayjaa'y y'uknujkwakxniyt. Winets ja soldadi ja twaadsøø, jøts ja Pablo jam yikwejtspidsiimy mayjaa'y agujkp, jøts jap jadigojk tyikniykxy soldadi kyutujktaajk agui'py.

¹¹ Xjats ku kyoots'ajty, winets ja Pablo t'ixy kuma'ayjøtpy ja nwindsøn'ajtim Jesús, jøts ñii'mxyiyi:

—Pablo, jotmøk nabyikta'agi, nayide'en jam nøjkx mgajpxwa'kxy ma ja møj kutujktaajk jam Roma, nayide'en sam øts n'ayuujk tø xkajpxwa'kxiyi ya Jerusalén.

Ku ja Pablo yiktanibiktaajkøø jøts ja y'amaa'tsk'ookt

¹² Xjats ku jade'en ja Pablo kyumaay, winets ja israelit jaa'y winaagin tkajpxy'ajttø ja Pablo jøts tyik'ooktit, møk'ampy idøøn tyimñawyajnidøø, ka'ap ja tkugayidit tku'uugidit kunim ja Pablo tyimyik'ejxnaxt, kunim ja tyimyik'ooktit. ¹³ Wixijkxy ñaxy idøøn ja jaa'dyi pøn idøøn ja Pablo jade'en tkajpxy'ajttø. ¹⁴ Winets ja ñiwixijkxpyi jaa'y jap ñøjkxtøø ma ja teetywindsøn jap wyin'aty; møøt ja møjaa'dyøjkti, jøts tnimaadyøø:

—Tø øøts idøøn ndyimñagyajpxyi, ka'ap øøts ngugaayiwya'añ ngu'uugiwyaa'ñ, kunim øøts ja Pablo ndyimy'ejxtnim øøky. ¹⁵ Meets niduki'iyi pøn jaty ya kutujk adsinaadyip, amidowdi ja soldadi windsøn jøts jabom ya ja Pablo tyikme'ent mee mwindujy, jade'en xwindaayidit ja windsøn jøts ku ka'pxy yikpayø'øwya'añ ja pøky, jamts øøts wyinaty tuu'am n'awejx'ity, jøts jam yø y'ookt.

¹⁶ Xjats ja Pablo pyøøpy tnija'wiyi'ñ ja ayuujk ku ja yjamy ja jaa'y yik'ookwa'añi, winets ja yjamy ja ojts ttukmadøø ma ja soldadi kyutujktaajk jap. ¹⁷ Xjats ja Pablo twaadsøø y tu'uk ja soldadi, jøts tnimaay:

—Møøt nøjkx ya'at mixy jap windsøn wyindujpy, jap ayuujk yø tu'uk tkajpxwa'añ.

¹⁸ Winets ja soldadi tmøødiyii'ñ ja mixy jøts ttukmadøø ja wyindsøn, jøts tnimaay:

—Tø øts ja Pablo xyaajxi midi jap tsumy, jøts øts tø xnøjmi jøts øts ya'at mixy nyikme'ent, jap ayuujk tu'uk tkajpxwa'añ.

¹⁹ Winets ja mixy kyøjø'øø ja windsøn y'ukwejtsoø, yikniykxyi abiky jøts yiktøøji:

—¿Ti øts idøøn xamigajpxwamp?

²⁰ Xjats ja mixy t'adsøøy:

—Jade'en ja israelit jaa'y ayuujk tø tpikta'akti jøts tø tkajpxy'atti, jøts mets myik'amido'ot ja Pablo jøts jabom xyiknøjkxt jap yikutujkpidi y'agui'py, ja'agøjxp tijy ku ka'pxy tpayø'øwya'andi ja pyøky. ²¹ Taayidip ja', kidi xmibiky, jap ja jaa'y yu'uch y'awejxwa'andi ñiwixijkxy ñaxy jap tuu'agui'py. Tø døøn ja møk tyimñawya'añidi jøts

ka' tkugaayiwyā'andi tku'uugiwyā'andi kunim ja Pablo tyimyik'ookit; jam inet idø'øn ja y'awejxti, ja'ayi mets ja nugo x'uk'adsojimbett.

²² Winets ja mixy ja windsøn y'ana'amiyøø jøts ku ka'ap pøn ttukmado'ot, xjats jade'eñi møøt ñawya'kxøø.

Ku ja Pablo yiktanikejxy ja møj windsøn Félix

²³ Xjats ja møj soldadi windsøn tyaaajxyii'ñ nimajtsk ja syoldadi jøts t'ane'emy, jøts ja syoldadi nimajtsk magø'pxy ñayjöp'ejxidit pøn tekyjø'øm yø'ødyip, jøts ja nidugui'pxy myajk ja kawaagyøjxpidi, jøts nayide'en nimajtsk magø'pxy ja takuu'møøtpidi. Ja'ats jam nøjkxtip Cesarea jøts choondit koots taxujk yaxp. ²⁴ Xjats ja windsøn nayide'en t'ane'emy jøts ja Pablo kyawaay nayide'en yikmo'ot, jøts nayide'en t'ane'emy jøts ja Pablo yik'ejx'ett, jøts møk møjaaaw yikøyakt mā ja møj yikutujkpi Félix jam. ²⁵ Xjats ja windsøn ja nøky tyik'øyyii'ñ jøts ja soldadi ja yiktamigajxyii'ñ, yide'en ja nøky wyā'añ:

²⁶ “Øts nxøøw Claudio Lisias midi møj soldadi windsøn, øts mets ja kajpxpoo'kxin ndaniguejxy mets møj yikutujkpi Félix. Tu'uk øts ja ayuujk nguexy. ²⁷ Jade'en ja israelit jaa'y tø y'adø'øtsti, tu'uk ya'at jaa'y tsumdøø midi mets ixyam ndagødøjkp. Yø' wyinaty yik'ookwandip, xjats ku øts ojts nnijawi kudam yø' ryomanitjaa'yi, winets ø nninijkxy møøt ja soldadi, ja'agøjxp ja jaa'y kyayik'o'jkøø. ²⁸ Xjats kumi nnijawiwypy øts tiku yikni'øøni, jøts nyiknijkxy jam mā ja israelit jaa'y myøjkutujk'adsinaabyidi, ²⁹ ja'agøjxp yjawi ojts yikni'øøni ku ja ojts tkamimadøy ja israelit jaa'y kyø'ømgutujkti, ka'ats pyaat'aty jøts ku tyik'ookit, jøts ni kyapaat'aty jøts puxøjkjotp y'ett. ³⁰ Tø nyiktuknijawi ku ja israelit jaa'y ñiwinmayiyi jøts yik'oogiyit, paty øts ixya nnajtskajxi, paty øts nayide'en tø ndukmadøy pøn tni'øø'nidip yø Pablo, wan jam tyikwingukidi jam mets mwindump. Yø'øyi kajpxy me ndaniguejxy. Dioskujuyip.”

³¹ Ku dø'øn jade'en ja soldadi ja kutujk yikmøødyøø, winets koots tmøøtso'ondøø ja Pablo jøts jam tmøøtja'ttøø mā kajp txøøwi Antipatris. ³² Winets ja soldadi jam kyimjabom wyimbejtnidøø midi tekyjø'øm yø'ødyip, jøts ja kawaachinaabyidi tjaakmøøtnøjkxtøø ja Pablo ³³ jam Cesarea, jøts jam tkøyaktøø ja nøky mā ja møj yikutujkpi jam jøts nayide'en ja Pablo yikøyajky. ³⁴ Xjats ja møj yikutujkpi tpa'ijxy ja nøky, winets tyiknidøøjøø pønit jaa'y ja Pablo, xjats t'adsoodøø ku ja Cyiliciitjaa'yi, ³⁵ xjats ja Pablo yiknimaay:

—Jaanim øts nmado'ot ja mgajxpy ja m'ayuujk kunim ja mye'endit pøn mni'øø'niyip.

Winets tyikutujky jøts ja Pablo yikpøkjø'økt mā Herodes ja møj kyutujktaajk jam, jøts jam tnank'y'ejx'ityiyi.

24

Ku ja Pablo yjanagyugajpxiyøø møj windsøn Félix wyingujkp

¹ Xjats kyimagoxkxøøw'ajty, winets ja møj teetywindsøn Ananías yja'ttøø jam Cesarea møøt ja møjaa'dyøjk, jøts tu'uk ja kajpx'øyibi pøn txøøw'ajtp Tértulo. Jade'en ja møj yikutujkpi jam twinguwā'jkidøø, jøts ja Pablo tni'øøniwyā'andi. ² Xjats ja Pablo jap nayide'en tyikmendøø, winets ja Tértulo ttami'iiñ ja møj yikutujkpi Félix sa Pablo kya'øy'adi'ich, jøts wyaañ:

—Mets møj yikutujkpi, dioskujuyip. Tsuj jotkujk xjagyepy ja mgajp, ka' mā ti tsep tyuñi mets mwijy'ajtingøjxp. ³ Ejtp øøts jotkujk xmø'øy jøts øøts jotkujk nnaxy ndøki ømyadsowi, janchkunu'u'kxy øø njawi mets møj yikutujkpi. ⁴ Mets m'ukmaa'kxp, jøts ka'ap øts mdiempī nugo nyikwindigø'øty. Jøts njanchminuu'kxakpy jøts ja tsojkin xjagyapt, jøts øøts n'ayuujk waani xmadoojit. ⁵ Tø øøts wa'ats nnijawi ku ya'atpi jaa'y tu'uk nugo y'ayo'onduñ, jøts tnankñawya'kxyi ja israelit jaa'y wyinmaa'ñ mā jaty yø wyidity, jøts yø' tñigubajk'ajtp pøn tpadundip tu'uk ja nazaretit jaa'y y'ixpøjkin. ⁶ Nayide'en ya'at jaa'y tkuwaawi ja griegit jaa'y jøts øøts ndsaptøjk jade'en nugo

xyikma'jtiiyi; paty øøts idø'øn yø tø nmach jøts øø njatiidyunwa'añ sa øøts ngutujk wya'añ; ⁷ ja soldadi windsøn Lisias øøts jade'en nugo xump jøts ttatøki øøts nwinmaa'ñ, jøts aguwanikøjxp yikpiky yø Pablo, ⁸ jøts øøts xnøjmi pøni pøn nañi'øø'niyip wan ya tmendi me mwindujy, jøts me xpayø'øty jøts xnijawit tuki'iyi sa øøts ja øø'nin nbikta'aky.

⁹ Xjats ku ja Tértulo jade'en kyajpxkijxy, xjats ja myigu'uk israelit jaa'dyi pøn jaty jap wyinaty nayide'en tø wya'andi jøts ku ja janch wya'añ ja Tértulo, ka'ap ja tyaayi. ¹⁰ Winets ja gobernador Félix ja Pablo tyikajpxy, xjats ja Pablo yide'en wya'añ:

—Mets møj yikutujkpi, nay ø ndsøjkpy øts jøts nwindanit ja nbøky mets mwindujy, kumi nnija'wip øts ku mets ya jeky yjumøjtyip tø myikutujktsøoni. ¹¹ Mets kø'øm m'ukyiktiidyøkip øts n'ayuujk pøni ka' xjanchjawi, ku øts jam wyinaty myakmajtsk xøøwipnim tø nja'aty jam Jerusalén Dios'ajot'ajtpi. ¹² Ka'ap øts jam wyinaty pøn møøt nnachepkajpxyi, nisa øts ja jaa'y ngayik'adi'ich jam møj tsaptøjkjotp, ni jam ma jaty ja chaptøjk ja'adi, ni jam møj kajpjotp. ¹³ Ya'atpi jaa'dyi niti tkananky'ejxidit midi øts yø xani'øø'nidip. ¹⁴ Yø'øyi øts wa'ats nnigajpxpy jøts ku nbaduñ ja Dios midi øøts ejtp nbadumpy. Ka'ats øts yø nmigu'uk israelit jaa'dyi t'øyjawidi sa nbaduñ. ¹⁵ Njanchja'wip øts ja Dios nayide'en sam yø tjanchjawidi ku øø njøp'ixy ku ja Dios ja oo'kpi jadigojk tyikujkpyiky, øy ja oo'kpi y'øyi kya'øyi pøni sa ja y'atsøøni. ¹⁶ Ja' ndsøjkpy jøts øts ja Dios ejtp nmi'øy'ajtnit jøts nayide'en ja naxwii'ñit jaa'dyi.

¹⁷ Tø øts mawyeen n'atswidity kawinaak jumøjt, jøts øts jadigojk tø nwimbity Jerusalén, jøts øts nmigu'uk nmay'atwa'añ n'ayo'ejxwa'añ, jøts ja Dios nayide'en nwindso'øgiwya'añ. ¹⁸ Ja'ats øts jap wyinaty ndumpy tsaptøjkjotpy sudso ø nbaatt nwa'ats'ajtin, ku øts ja israelit jaa'y jap xpaajtøø midi tsoo'ndip Asia, ka'ap øts ja mayjaa'y wyinaty nmøødi, ka'ap pøn ti ttuñ. ¹⁹ Ja'abi dø'øn ya mibaat me'endip pøn øts jap ojts xpaatti jøts øts ya xni'øø'nidit, pøni ñija'widip ja' ku øts jap ndundigøy tsaptøjkjotpy. ²⁰ Uk ku ka' mye'endit sa øts idø'øn nwa'añ, wan ya'at tnigajpxti pøn jaty ixyaadi, pøni ojts øts ja nbøky nyiktapaaty ku øts ojts nyiktiidyuñ jap kutujk adsinaabyi wyindujpy. ²¹ Uk jotmønts øts jade'en xukpøky'atti ku øts ojts møk nmigajpxjø'økti, jøts øts yide'en nnimaay: “Meets ixyam xiidyump ja'agøjxp ku øts njøp'ixy jøts ku ja oo'kpi jadigojk yjukpyiky jap oo'kpi jutjotpy.” Jade'en øts nnimaay.

²² Xjats ku ja møj yikutujkpi Félix ja Pablo y'ayuujk tmadooji, winets jaayi tkajpxuky ja payø'øyin ja'agøjxp ku nayide'en tnijawi sa ja Jesús yjanchja'wibi yjaa'y'atti, paty jade'en tnimaay:

—Wan t'uk'awijxñim jade'en kunim ja mye'ent ja møj soldadi windsøn Lisias, ja'ats øts xjaaktukmado'opnim ka'pxy yø'øbi winmaa'ñ.

²³ Winets ja møj yikutujkpi t'ane'emy ja soldadi jøts ja Pablo chumy'ettnim, jøts tnøjmi nayide'en jøts ja Pablo ja myigu'uk kuwani y'atmigajpxit, pøni pøn jaty mendip kidi ja tkayiknajxnidi.

²⁴ Xjats ja Pablo jap tyaañ winaak xøøwin, winets ja møj yikutujkpi tmøøtja'aty jadigojk ja ñidø'øxy Drusila, pøn nayide'en israelit jaa'y, winets ja Pablo yikyaxtsøøy jøts tnigajpxt sudso'ampy ja Jesús yja' yikjanchjawi. ²⁵ Xjats ja Pablo yikxon jade'en tnigajpxy sudso n'øyjaa'y'ajtindit sam ja Dios ttsøkyin, jøts kø'øm nayide'en nnay'ejx'ejti'indit, jøts ku Dios ja naxwii'ñit jaa'y nøjx ttidyuñ. Winets ja møj yikutujkpi ojts ja' tkudsø'øgi jøts ja Pablo yiknimaay:

—Nøjxni ixyam, kunim ø n'awatsit jøts jadigojk nwaadso'ot.

²⁶ Xjats ja møj yikutujkpi may ojk ja Pablo twaadsøøy, jade'en ja yjawinmay jøts ja myeenmyo'ojit ayu'uch, winetnimts ja tmajtstu'utt. ²⁷ Majtsk jumøjt idø'øn jade'en ñajxy, nugo tjaximiwaadsow'ity ja Pablo. Winets ja møj yikutujkpi tyigajtsnaa, jøts jadu'uk tyøjkii'ñ pøn txøøw'ajtp Porcio Festo. Jøts kumi ka'ap ja møj yikutujkpi Félix tmidsep'atwa'añ ja israelit jaa'y, ja'agøjxp idø'øn ja Pablo jap tyaañ tsumy.

25

Ku ja Pablo twingunøjkxøø ja møy yikutujkpi Festo

¹ Xjats ja Festo tyøjkiyih'ñ møy yikutujkpi jam Cesarea, jøts kyidigøøk xøøw chøø'ñ jøts jam pyatøjkiyih'ñ Jerusalén. ² Jamts ja teetywindsøndi møøt ja israelit møjaa'dyøjkti twinguwa'jkidøø ja møy yikutujkpi Festo jøts ja Pablo yikni'øøni. ³ Xjats ja møy yikutujkpi yik'amidøøy ja may'ajt, jøts ja Pablo tnigaxit jøts jam tyikme'ent Jerusalén. Jade'en ja israelit jaa'y wyinaty tø tjaniwinmayidi jøts ja Pablo y'ookt tuu'ajy. ⁴ Xjats ja møy yikutujkpi Festo t'adsojimbijty jøts ku ja kø'øm tsojk wyimbetwa'añ jadigojk jam Cesarea, kumi ixjam ja Pablo tsumy y'ity. ⁵ Winets tnøjmi ja israelit jaa'y møøt ja teetywindsøndi:

—Wa'n tjaa'myindi ne'egi niduknax pøn jaty ku'aaw'attip, jamts xni'øønidit pøni tødam ja'abi jaa'y tyundigøy.

⁶ Xjats ja Festo waani tyaa'niyih'ñ Jerusalén tuktuk xøøwin uk majk xøøwin, winets wyimbijty jadigojk. Xjats kyimjabom ttawa'jtsiyih'ñ ja kyutujktaajk, winets tnankñajtswaa'wiyøø ja Pablo. ⁷ Xjats ku ja Pablo twinguwa'jkidøø ja møy yikutujkpi, winets ja israelit jaa'y nayide'en twinguwa'jkidøø pøn jam wyinaty tø choondi Jerusalén. Xjats ja Pablo mayjøøjp møk yjanchyiktani'øøni ja tyundigø'øyin, niti tiy'ajtin tkananky'ijxyidi. ⁸ Xjats ja Pablo kø'øm ñagyugajpxyiyi jøts tnimaay ja møy yikutujkpi:

—Nipøn niti ngadamidundigøy, ni ja israelit jaa'y kyutujk jøts ni ja chaptøjk, jøts ni ja romanit jaa'y myøjyikutujkpi ngamidundigøy.

⁹ Xjats ja Festo, kumi tyunwajnip ja may'ajt ja israelit jaa'y jøts y'øyjawiyidit, xjats ja Pablo tyiktiy jøts yiknimaay:

—¿Mnøjkxwamp jam Jerusalén? Jamnim øts nbayø'øty ja mbøky.

¹⁰ Winets ja Pablo t'adsojimbijty jøts tnimaay:

—Paat'ajtp øts yaayi nyiktiidyu'unt, kumi ja møy windsøn César ya kø'øm tø tpikta'aky yø kutujktaajk. Wa'atsxi me xnijawí ku øts ka' yø israelit jaa'y ti ndamidundigøy pøn jap wamp jøts øts ja nbøky ngu'oogit, ¹¹ ka'ap ø nwa'añ jøts øts ngagupøkt ja o'jkin; jøts pøni ka'adam yjanchi midi øts yø' xani'øø'nidip, nipøn kyapaat'atyiyi jøts øts xkøyaktit ma israelit jaa'y. Wamp øts jøts ja møy windsøn César øts kø'øm xiidyu'unt.

¹² Xjats ku ja Pablo jade'en kyajpxkijxy, winets ja møy yikutujkpi møøt tkajpx'øyiyih'ñ ja pyutanaabyi, winets yiknimaay ja Pablo:

—Tø kø'øm mwa'añ ku ja møy windsøn César mdiidyuniyit. Ja'ats idø'on mninøjkxp.

Ku ja Pablo twingunøjkxøø ja rey Agripa

¹³ Xjats ku ja Pablo jade'en yiknimaay kuts tu'uk majtskin ja xøøw ñajxy, winets ja rey Agripa ojts ñinijxyiyi møøt ja Berenice, ja'ats t'atskajpxpoo'kxtip ja Festo. ¹⁴ Winets jam ojts kawinaak xøøw tyaa'nidi, xjats ja Festo ttamimadyaajky ja rey sa ja Pablo pyøky jap, jøts tnimaay:

—Ja ya tu'uk ja jaa'y midi ja møy yikutujkpi pasadi puxøjkjotpy yiktaañ. ¹⁵ Ja'ats møk pyayø'ødyip ja teetywindsøndi møøt ja israelit møjaa'dyøjkti. Xjats ku øts ojts n'øch Jerusalén, winets øts jam ojts xwinguwa'agidi, jøts øts møk'ampy xnimaadyi jøts øts nnankyik'oogit yø Pablo. ¹⁶ Xjats øts nnøjmi jøts ku ka'ap jade'en ja romanit kyutujk wya'añ, ka'ap pøn ayu'uch nugo ñanky'oogidit, kuwani ja payø'øyin tyunit jøts kø'øm ñawyindaniyidit pøni ti pønjabøn ñi'ih'mpy. ¹⁷ Ku ya yja'ttøø ja israelit jaa'y, ka'ap øts tiempí nugo nyikwindigøøy, jaty kyimjabom ja ngutujktaajk ndawa'jtsiyih'ñ jøts ja Pablo nnankyikmejni. ¹⁸ Ku ja myendøø pøn jaty øø'ndip, ni tu'uk ja tka'uktapaatnidi ja pyøky midi'ibi øts idø'on n'ukjøp'ijxpy. ¹⁹ Ja'ayi nugo yiktani'øø'nip ja chinaa'yin, jøts nayide'en pøn txøøw'ajtp Jesús, pøn ojts y'øøky jøts ja Pablo wya'añ ku ja yujky'aty. ²⁰ Jøts øts ka' nmidaabyaaty sudso'ampy øts kø'øm nyikjøpkøxt yø'øbi winmaa'ñ, paty øts yø Pablo n'amidøøy pøni nøjkxwamp Jerusalén jøts jam yiktiidyu'unt. ²¹ Kumi yø' kø'øm waan jøts

jam yiktiidyu'unt ma ja møj windsøn César Augusto, paty øts jap nyiktsummy'ity kunim øts jam ngaxt møj windsøn windump.

²² Xjats ja rey tñimaay ja Festo jøts ku ja nayide'en tpatmadoowa'añ ja Pablo kyajpxy. Xjats ja møj yikutujkpi t'adsojimbijty, jøts tñimaay:

—Jabom ja x'ukmado'ot.

²³ Xjats kyimjabom'ajty, winets ja rey Agripa yja'ttøø møøt ja ñidø'øxy Berenice, xjats ojts yjanchyikmøjpikta'akti jøts jap tyøjkidøø møj tøjkjøtpy møøt ja soldadi windsøndi, jøts nayide'en ja møjaa'dyøjkti pøn jaty jam kugajp'ajttip. Winets ja Festo twaadsøøy ja Pablo, ²⁴ jøts ttukmadøøy niduki'iyi ja windsøndøjkti, jøts tñimaay:

—Mets rey Agripa, jøts tuki'iyi pøn jaty ya tø myendi, ixya dø'on ja jaa'y midi ixyam mbatmadoowajnidip y'ayuujk. Tø øts idø'on ja israelit jaa'y namay øy xmi'øøndi ya'at køjxp jade'en ya jøts nayide'en jam Jerusalén, ejtp ø xnøjmidi jøts mibaat ku yø tyimy'oookt. ²⁵ Ka'ats yjawi ti møj tundigøø'yin tjagyepy jøts ja' tku'oogit; kø'øm yø t'amidøøy jøts jam nøjkx yiktiidyuñ ma ja møj windsøn Augusto jam, paty øts nayide'en jam ndyimgyajxwa'añ. ²⁶ Meets migu'ukti, ka'ap øts nmidaabyaaty ti pøky øts ndapaatp ya'atpi jaa'y, sudso'ampy øts nøky nyik'øyt jøts tñijawit ja nmøjwindsøn, jøts paty øts ixyam nyikmiñ mee mwindujy, jøts me rey Agripa x'ukpatmado'ot jøts øts xuknijawit midi'ibi ayuujk øts idø'on ngaxp. ²⁷ Janchnigyumaap ø njaty ku øts ja pøkyjaa'y nugo njanch'ukaxt, jøts ni ngatukmado'ot øts nmøjwindsøn pøni ti pøky yiktani'øø'nip.

26

Ku ja Pablo tñigajpxy ja chinaa'yin jam rey Agripa wyindump

¹ Winets ja rey Agripa tñimaay ja Pablo:

—Mbaat'ajtip jøts me kø'øm mgajpxt.

Xjats ja Pablo ja kyø' tyikpidi'jky, jøts yide'en kyajpxøjkii'ñ:

² —Njanchtaxondakpy øts ku øts xyikajpxwa'añ ya mets mwindujy, jøts øts kø'øm nwindanit tuki'iyi pøni sa jaty øts ja israelit jaa'y xka'ødyejti. ³ Øy'ajtp nayide'en kumi mets mnija'wip tuki'iyi øøts ndsinaa'yin sa øø n'israelitjaa'y'aty, jøts ti jaty øøts ejtp nnadyamigajpxiyip. Paty mets n'amidøy jøts waani x'ukmado'ot øts ngajpxy.

Sa ja Pablo chinaay myijawyeen ku ka'anim tyiktigach ja chinaa'yin

⁴ Ñija'widip nmigu'uk israelit jaa'y niduki'iyi sa øts njaa'y'ajty jam ndigam ku nmutsk'ajty, jøts nayide'en sa øts njaa'y'aty jam Jerusalén ixyambaadyim. ⁵ Pøni ñigajpxwandip wan tñigajpxti, kumi ñija'widip yø' nayide'en ku øts mutskyi ja fariseit ixpøjkin nbadøjkii'ñ midi ka'pxy tpadundip ja Moisés kyutujk. ⁶ Ja'agøjxp øts nyikni'øøni ku øts njøp'ixy ku ja Dios Teety ja oo'kpi jadigojk tyikjujkpyiky jap oo'kpi jutjøtpy, kumi jade'en ja Dios Teety kø'øm ja wyandaajkin tmø'øy øøts n'apteety'amøj jøts jade'en ttu'unt. ⁷ Jøts niduki'iyi makmajtsk kajp ja israelit jaa'y tjøp'ejxtit jøts ku ja Dios ja wyandaajkin tyikjøpkøxt, paty ejtp t'ajot'attit ja Dios jøts tja'myatsti jøpy ux. Mets rey Agripa, nay yø'øbi winmaa'ñ øts idø'on yø nmigu'uk israelit jaa'y xkada'øyja'widip, jøts øts xani'øønididi. ⁸ ¿Ka' mee nayide'en xjanchjawi jøts ku ja Dios ja oo'kpi tyikjujkpyiky jadigojk?

Sa ja Pablo jawyeen tjemduuñ tteduuñ ja Jesús yjanchja'wibidi

⁹ 'Øts kø'øm ojts nwinmaa'mbyaaty jøts øts ja Jesús Nazaretit yjanchja'wibidi ojts o sa nduujniyi, jøts ø møk nyik'ayo'ombaattøø. ¹⁰ Jade'ents øts idø'on jam n'adijch Jerusalén ku øts ja teetywindsøn xmo'odi ja tiy'ajtin jøts øts ja Jesús yjaa'y namay ndsujmiyt; jøts nayi waan øts idø'on jøts y'oooktit. ¹¹ Kawinaak ojk øts idø'on kø'øm ja møk nyik'ayo'ombaattøø, jøts kuwani ndukmajtstu'utti ja yjanchja'win. Jade'en øts idø'on n'adijch ma jaty ja chaptøjk, janch awa'an'ampy øts idø'on nbawidijty jagamgajp paat.

Ku ja Pablo jadigojk tñimadyaajky sa ja chinaa'yin tyiktigajch

¹² 'Nay yø'øbi winmaa'ñ øts wyinaty nminijxpy jam Damasco sa øts ja teetywindsøn wyinaty ja kutujk tø xmø'øy. ¹³ Winets ø kujkxøøw et jam tuu'am ojts n'ejxpaaty tu'uk ja jaj midi tsajpjøtpy kyidaajky, janch møk idø'øn ja yjajy nika'ap ja xøøw jade'en yjajy, jøts øøts ja jaj ojts tuki'iyi xnawidity pøn jaty øts jam wyinaty nmøøt. ¹⁴ Winets øøts niduki'iyi nnaxkidaajky, jøts øts nmadøøy tu'uk ja hebreit ayuujk ku ø xnimaay: “Saulo, Saulo, ¿tiku ø xjemdunwa'añ xedunwa'añ? Kø'øm mnay'ayo'onduniyi jade'en kidi tsakaa ku ja ti tnepy jøts ja kø'øm kujp ñadyukyø'ødyiyi.” ¹⁵ Winets nnimaay: “¿Windsøn, pøn mets?” Winets øts jaty n'windsøn'ajtim xnimaay: “Øts Jesús Nazaretit jaa'y, nay ja' pøn mjemdumpy mdedumpy. ¹⁶ Pidø'øk wa'kuki, ja'agøjxp øts ixyam kø'øm nnanky'ijxyi jøts øts xmidu'unt, jøts mgugajpxy'att pøni ti jaty ixyam nduk'ijxpy, jøts pøni ti jaty me njaaktuk'exp. ¹⁷ Øts mets nnøø'mo'op nduu'mo'op jam israelit jaa'y etjotp, jøts nayide'en ma ja jaa'y kya'israelitjaa'yidi ma mets ixyam ngajxwa'añ. ¹⁸ Yide'en idø'øn jam nøjkkx mduñ, jøts ja jaa'y xkajpxwejt jøts ja ka'øy winmaa'ñ tmajtstu'uttit, jøts ja tsuj winmaa'ñ tpabøktit. Kidi ja miku' y'ana'amin t'ukupøjkiniyidi, ja Dios yja' tu'ugyi pyaduuñidip; jade'en xukmado'ot jøts ku øts nja' xjanchja'widit, jade'en'ampy yikpojkipmaa'kxtit, jøts nayide'en yikmo'odit ja øy'ajtin ja tsuj'ajtin møøt ja'adi niduki'iyi pøn jaty ja Dios tø wyinaty tyikpøkwya'ach.”

Ku ja Pablo tpaduuñ ja ayuujk midi tsoo'mp tsajpjøtpy

¹⁹ 'Mets rey Agripa, nbaduujni øts idø'øn tuki'iyi sa jaty øts ja Jesús xnimaay ku øts ja y'ayuujk nmadoojoø midi jap tsoo'mp tsajpjøtpy. ²⁰ Winets øts jam n'uktukmadowdi jawyeen pøn jaty jam wyinaty Damasco jøts nayide'en Jerusalén, jøts jam nayide'en tuki'iyi pøn jaty Judea etjotp, winets øts n'uktukmadowdi pøn ka'israelit jaa'dyi, jade'en øts jam n'uktukmadøøy jøts ja pyøkyu'unin tmajtstu'uttit jøts ja Dios yja' tu'ugyi tpaduuñiyidit, nayide'en tsuj yjaa'y'attit jøts jade'en tnanky'ejxidit ku ja chinaa'yin tø tyiktigatsti. ²¹ Ku øts ja jaa'y jade'en ngajpxwejt ja'agøjxp øts ja israelit jaa'y jap xmajtstøø tsaptøjkjøtpy jøts øts ja' xuku'oogiwyaa'andi. ²² Møj øts ja Dios ja pudøjkin xmø'øy ku øts ixymbaat ja kyajpxy y'ayuujk ngajpxwa'kxiyi, jøts ø ndukmadøøy niduki'iyi pøn jaty ixpiky pøn jaty ka'ixpiky. Nijuuni øts ja jaa'y ja wenkpi ayuujk ngadukmadøøy, yø'øyi ngajpxy nayide'en sa ja Dios kyugajpxy jøts sa ja Moisés ojts wya'andi, ²³ ku ja yiknitsokpi kuwani y'ayo'ombaatt jøts ku ja wyinaty tø y'øøky, ja'ats myijawyeen tunjøpip ku ja yjujkyøkt jadigojk jap oo'kpi jutjøtpy, jøts jade'en øøts njaa'y ttuknijawit ja wa'ats'ajtin møøt tuki'iyi ja naxwii'ñit jaa'y.

Ku ja Pablo tjadukmibøkwaañ ja rey Agripa jøts tpadu'unt ja Jesús yja'

²⁴ Xjats ku dø'øn ja Pablo jade'en ñagyugajpxiyi, winets ja møj yikutujkpi Festo møk'ampy yjanchkajpxy, jøts ja Pablo yiknimaay:

—¡Mjanchmo'tp me Pablo! Yø m'ixpiky'ajtin me nugo myikmo'jtip.

²⁵ Xjats ja Pablo t'adsojimbijty jøts tñimaay:

—Mets øy møj yikutujkpi, ka'ap øts nmø'øty; tiy øts idø'øn nwa'añ midi øts ngajpxpy.

²⁶ Ixya dø'øn ja rey Agripa pøn yø'øbi winmaa'ñ wa'ats tnija'wip, paty øts ya jotmøk ngajpxy yø' wyinduujy; wamp øts idø'øn ku yø' tnijawi tuki'iyi, kumi ka'ap ja jam ayu'uch yjajty midi øts idø'øn nnigajpxpy. ²⁷ ¿Mjanchja'wip mets rey idø'øn sa ja Dios kyugajpxy wya'andi? N'ijxpy øts ku yjawi xjanchjawi.

²⁸ Xjats ja rey wyaañ:

—Kuk øts jeexyip jawaani xjaaktukmadøøy, tøk øts yø jeexyip ngupiky.

²⁹ Xjats ja Pablo y'adsøøy:

—Øyi ja waani uk øyts ja yjamayi ya'atpi ayuujk, ka'ayi mets ja'ayi nadyu'uk xjanchjawit, wa'ambim ja Dios niduki'iyi tjanchjawidit pøn jaty øts n'ayuujk ya tø xmadooji.

³⁰ Ku dø'øn ja Pablo jade'en kyajpxkijxy, winets ja rey niduki'iyi wya'kukidøø møøt ja møy yikutujkpi, jøts møøt ja ñidø'øxy jøts pøn jaty jap wyinaty, ³¹ winets abiky ñøjkxti jøts jap tkajpx'øyidi ja Pablo pyøky, jøts yide'en ñawyajnidøø:

—Ka'ap yø'øbi jaa'y yjaw i ti ttuñ jøts yø' tku'oogit, jøts ni nayide'en kyapaat'aty jøts jap puxøjkjøtpy y'ett.

³² Winets ja rey Agripa tnimaay ja møy yikutujkpi Festo:

—Tø yø jeexy yikmajtstu'uty ku yø jeexy kø'øm tka'amidøy jøts ku ja møy windsøn César tyidyuniyit.

27

Ku ja Pablo yikejxy Roma ma ja møy kutujktaajk

¹ Xjats ja møy yikutujkpi twinmaadyøø, winets ja Pablo yikajxwa'andi jam Italia møøt ja myibuxøjk jaa'y pøn jaty jap wyinaty tsumdyi, jøts nayide'en øts nmøødi pøn ya'at nøky tjaapy. Winets ja soldadi pyøkjø'jkidøø midi txøøw'ajtp Julio jøts midi tnigubajk'ajtp tukpiky ja soldadi, ja' xyøøw ja soldadi tukpiky Augusto. ² Jam wyinaty nayide'en tu'uk ja Macedoniit jaa'y midi kugajp'ajtp Tesalónica, ja' xyøøw Aristarco. Winets øø tuknax ndøjkijy'ñ møøt ja Pablo jap barkijøtpy, jam ja barki wyinaty tø chøøñ Adramitio, jøts ñøjkxwa'añ ma jaty ja kajp jam Asiit etjotp. ³ Xjats øøts jam ndsøø'ñ Cesarea, jøts øø kyimjabom nja'aty ma kajp txøøwi Sidón, jamts ja soldadi Julio t'ayo'ixy ja Pablo, jøts ja myigu'uktøjk t'atstukmigajpxy jøts ja myigu'uktøjk yikpoo'kxiyi. ⁴ Xjats øøts jadigojk ndsøø'ñ Sidón, winets øøts ja poj møk'ampy xjøpkuyø'øyiyi'ñ, paty øø kuwani nnayø'øy aga'ñ'ampy ja et midi txøøw'ajtp Chipre, ma ja poj tuda'aky yø'øy. ⁵ Xjats øøts ja mejy ndanajxy jam Cilicia y'et'amidiy jøts nayide'en Panfilia y'et'amidiy, winets øøts nja'jty ma kajp txøøwi Mira jam Licia y'etjotp.

⁶ Jamts ja soldadi tu'uk t'ixaay ja barki, jøts ojts t'ejxpaaty tu'uk midi tø wyinaty chøøñ Alejandría jøts jam ñijkxy Italia, jøts øøts jadigojk xyiktøjkijy'ñ xjats øø ndsøø'ñ. ⁷ Kawinaak xøøw øøts idø'øn jade'en udy'a'gyi n'awidijty, jøts øøts awisa jam njanchja'jty jam Gnido kajp y'amidiy, kumi ka'aním wyinaty ja møk poj y'amøki winets øøts jade'en'ampy jadigojk n'awidity Salmón kajp y'amidiy. Xjats øø nnayø'øy ma ja mutsk naajx jam mejy kujk'am midi txøøw'ajtp Creta. ⁸ Xjats øøts jade'en awisa njanchjanayø'øy ja naajx mejyotp, xjats øøts awisa nja'jty ma kajp txøøwi Buenos Puertos jam Laseit kajp wingon.

⁹ Tø øøts wyinaty jeky ndaa'niñi mejyotp, janch tsø'øgi møøt wyinatyni, jade'en'ampy ku wyinaty ja xuxpyoj myenwani paty ja Pablo tjanimaay ja yikbarkiyø'øbyi, ¹⁰ jøts wyaañ:

—Meets migu'uktøjkti, ka' yjaw i y'øyt ku ndso'ongojmi'indit, nnajtsja'wip øts ku yjaw i mayjøøjp n'ayo'ombaajtindit, windigø'øpy yø barki møøt ja pyikta'aky, nayi kø'ombaaj yjaw i adøm nwindigø'øyindit.

¹¹ Ka'ats ja soldadi ja Pablo y'ayuujk tmibøjkøø, ja' ne'egi pyabøjk ja barki wyindsøn jøts ja yikyø'øbyi. ¹² Janch møk idø'øn xyuxy jøts yjanchpøjy jam Buenos Puertos, paty namay yjanchwandøø jøts øy'ajtp øøts jam ne'egi ndsoont, jøts pøni majadakp øøts jøts nja'att Fenice midi nay jam tãmp Creta y'etjotp, jamts øø nyiknaxt ja xuxtyuu ja'agøjxp ku ja poj ka'ap jam jadine'en tyøki.

Ku ja poj yik'adøtsni bøkijñaa ja mejy

¹³ Xjats ku ojts waani y'amøki ja poj, winets pyojkeejky jaduktamajñ jøts ja jaa'y wyandøø øy'ajtp jøts yjaakyø'ødyit. Xjats øø ndsøø'ñ, jøts øø nyø'øy mejpya'am et, jøts øø nnajxy Creta wingon. ¹⁴ Kuts waani y'ijty, winets ja poj møk'ampy yjanchmiiñ midi yiktejp Nordeste. ¹⁵ Ja'ats ja barki møk tjøpkuwojppøø jøts nugo wyejtsma'jtiiyøø, jøts ni sudso'ampy ja kya'ukyikmajadaajkniyi ja poj, xjats øøts ja ndyimy'ukmajtstutni,

wan tyiknijky pøni ma tyiknijky. ¹⁶ Xjats øøts jam nnajxy ja' yjøkø'øm ma ja naajx lii'nim mejkyuk'am midi txøøw'ajtp Clauda, ma jam ka'ap jadine'en møk pyøjy. Jamts ja mutsk barki midi yikpajidøjtp, ja'ats øøts awisā njanchyiktøjkiyi'ñ jap møj barkijøtpy. ¹⁷ Kuts øøts jade'en nyikpatkijxy ja mutsk barki, winets ja møj barki ja møj tejpky yikta'awøø'nmuiky. Xjats kumi tsø'øgidip ja jaa'y ku ja barki jam tyøkit pul'jotp midi txøøw'ajtp Sirte, winets ja majpxy møj wet twejtstøødøø midi ja poj møøt tminamyajtsip, ¹⁸ jøts øøts ja tsimy jamyi tuki'iyi nguwojnaxkijxy mejyotp; ¹⁹ jøts kyimdigoøk xøøw ixanimts øøts ndyimy'ukuwojnaxkøjxni tuki'iyi ti jaty ja barki jap wyinaty myøøt'ajtpy. ²⁰ Kawinaak xøøw øøts jade'en nugo agubajkpy njanchyø'øy, niti øø nga'ijxy ni xøøwi ni maadsa', ja'agøjxp ku møk yjanchtuuyøøch. Ka'ap øø n'ukjøp'ejxni jøts øøts jam juky nbidsø'ømt mejyotp.

²¹ Xjats øøts jade'en kawinaak xøøw n'ayuu'ijty, winets ja Pablo ojts wya'kuki jam jaa'y agujkp jøts wyaañ:

—Migu'uktøjkti, øy'ajtpik jeexy kuk øts n'ayuujk xmadøjidøø, winetsik ngatso'oñindøø jam Creta jøts ya'atpi ayo'on jeexy jane'en ngapaajtyindi. ²² Kidi mjotmay'ookti, øy yø barki wyinaty yjawindigoøy, nipønts kya'ookt. ²³ Mnija'wip meets ku øts ja Dios Teety nmøøt n'lity, jøts ku øts ja y'ayuujk nbaduujniyi, ixyamgoots øts nwindson'ajtim tu'uk tø xaniguexy ankilis ²⁴ midi øts tø x'atsnøjmi: “Ni mgatsø'øgit Pablo, kuwani jam Roma xwinguwa'agit ja møj windsøn César, ja'agøjxp ja Dios myiknitso'ok'atidit niduki'iyi, jøts nipøn tu'ugin kya'ookt ya barkijøøjty.” ²⁵ Paty migu'uk ixyam nnigajpxy, møkpihta'akti mwinmaa'ñ, njanchja'wip øts ja Dios jøts nnijawi ku kuwani jade'en tyikjatt sa øts ja ankilis tø xnøjmi. ²⁶ Ja' ku kuwani ja møk poj jam nøjkx xnajtsjibejpi'indi ma ja naajx jam mejyotp.

Jade'en idø'øn ja Pablo tnimaay ja myigu'uk.

²⁷ Majtsk samani øøts idø'øn wyinaty tø nwidity barkijøtpy, winets øøts jam ojts koots nja'aty ma møj mejy txøøwi Adria, møk idø'øn ja poj ja barki jam tjanchyik'adi'ich. Xjats ku chuu'm'ajty, winets ja yikbarkiyø'øbyi tñajtsja'widøø ku ja barki ja naajx yjawi tpaatwani. ²⁸ Winets tkejpxti ja nøø kyøjnk'ajtin, xjats t'ejxti ku ja ee'pxmaktujt metri kyøjnki; xjats jawaani yjaakyø'ødyøø jøts jadigojk tkejpxkojmidi, xjats t'ejxti ku ja ee'pntaxujk metri kyøjnki. ²⁹ Winets chø'jkidøø ja yikbarkiyø'øbyi ku jotmøn ja barki jam wyinguwopit møj tsaagøjxp, winets ja yikbarkiyø'øbyi ja møj pux'ajo'jk twendidøø maktaxk, xjats ja tniwøjidøø kunim ja jap nøøbatki'py muum y'ajø'øky, xjats ja barki jade'en wya'k'amøkiyi'ñ. Janch tsø'øgijawi dø'øn ja jam tyiknaxti ku pojin yjanchkaxijñi. ³⁰ Jøts wyinmaydi ja yikbarkiyø'øbyi jøts kya'akwa'andi jam møj barkijotp, winets jam ñøjkxti barkijøp'am, jade'en ñadyijyi ttunwa'andi jøts ja pux'ajo'jk tjaakpikta'akwa'andi jap mejy'ok'ajpy, ja'agøjxp ojts tyikpidsømwā'andi ja mutsk barki jøts jade'en kya'akwa'andi. ³¹ Xjats ja Pablo t'ejxpaaajty, jøts jade'en ttukmadøøy ja soldadi jøts nayide'en ja myisoldadi, jøts tnimaay:

—Ku yø yikbarkiyø'øbyi ya kyata'andit, ni sudso'ampy adøm ya ngapidsøø'mindit.

³² Winets ja soldadi tmidsujkidøø ja mutsk barki jøts nøøjotp tyiknaxkidaktøø, ja'agøjxp jøts nipøn kyaka'akt.

³³ Xjats ku xiijndyaaajky, winets ja Pablo tnimaay ja myigu'uk jøts o winø'ønin kya'adyit, jøts tnimaay:

—Tø yjawi myajtsk syamaniñi ku jade'en mgama'adi jøts ni mgakaydi. ³⁴ Øts wamp jøts winø'ønin mga'adyit jøts ja møjaaaw xpøktit, pø ixyam inet nipøn inet tu'ugin kyawindigoø'øty.

³⁵ Xjats ku ja Pablo jade'en tkajpxwijy ja myigu'uk, winets tñaxajyi'ñ tu'uk tsapkaaky jøts ja Dios ttamøja'wiyi'ñ jam myigu'uk wyingujkp, jøts ja kø'øm kyaay. ³⁶ Xjats ku ja myigu'uk t'ejxtøø, winets ja yjotkujkidøø jøts kyaadyøø nayide'en. ³⁷ Majtsk magø'pxy ja tugui'pxmyaktujt øøts jap wyinaty njaa'y'aty barkijøtpy. ³⁸ Xjats ku kyaagyøxtøø, jøts

ja ariimbajk kunchi'am tuki'iyi jamyi t'ukniwibejpatkøxnidøø mejyjotp, jøts jade'en ja barki tyiktøø'tskyidøø.

Ku ja barki mya'jty jam mejy'am

³⁹ Xjats ku dø'øn xiijndyaajky, winets ja yikbarkiyø'øbyi ni tka'ejxkapti ja naxwii'ñit pø ma dø'øn jam wyinaty tø tyaandi, ja'ayi ku t'ejxpaatti ja mejpyaa' ma ja nøø ja poj jam møk kayik'adi'ichiyi, winets wyinmaydi jøts ja barki nugo tyikyø'øpyidsømwa'andi ma ja nøø jam t'ejxti ja pyaa'. ⁴⁰ Xjats tmidsujkidøø ja pux'ajo'jk midi ja barki tmach'ejtp, jøts ja japyi tyiktaandøø mejy'ok'ajpy. Winets ja jøpmiweenguipy tkajo'ongøxtøø midi ja barki twejtsyø'øpy, jøts ja majpxwyet nayide'en jam tkudiidyøø barki jøp'am. Xjats ku ja poj ja tmajch, winets ja barki jam udy'a'aky y'ukyø'øpyidsømwa'añ jam mejpya'am. ⁴¹ Xjats jam ojts adsu'jky tyøki ma ja nøø jam ñawyinaxyiyi, winets ja barki yjøøjp jam ojts møk'ampy kyutopi pu'jotp, ma ja nøø jam wyinaty yø'øy'awidity. Jamts niwinø'ønin kya'ukyuu'kxni, xjats ja mejy møk'ampy ojts pyetyiyi jam y'ix'am'ampy, jøts ja barki'øjx jade'eñi ja nøø tyakø'jtsigyøjxiyøø. ⁴² Xjats ja soldadi wyinmaydi jøts tyik'ookwa'andi ja pøkyjaa'y, ja'agøjxp ku jotmøñ kya'aktit jam mejyjotp. ⁴³ Ka'ats ja soldadi wyindsøn ja Pablo tñankyik'ookwa'añ paty ka' tyikjajty, ja'ayi t'ane'emy pøni pøn t'ajtp ja nøøyumk wan ja jawyeen tñødøkidi jøts myejpyidsø'ømdit. ⁴⁴ Jøts nayide'en t'ane'emy pøn jaty tkajajtp ja nøøyumk, wan ja pu'gyøjxp tyø'ødyi, uk øy'ajtp nayide'en barki pidasikøjxp. Xjats idø'øn jade'en niduki'iyi jujky myejpyidsømdøø.

28

Sa yjajty sa kyubejty ja Pablo jam ma naajx txøøwi Malta jam mejyjotp

¹ Ku øøts idø'øn jade'en tum jujky jam nbidsiimy mejyjotp, xjats øø nni ja wiyii'ñ kudam ja et jam txøøwi Malta midi jam mejkyuk'am. ² Winets øøts ja Malta jaa'y jam janch tsuj xwindsø'jkii'ñ, jøts ja jøøn tyikmøjidøø janch møj, ja'agøjxp ku yjanchxuxy ja et jøts ja tuu nayide'en. Winets øøts nyikyaajxiyii'ñ niduki'iyi, jøts øø nnay'ajo'kxiyit. ³ Winets ja Pablo nayide'en t'atskajpmuky ja tø'øts ja'axy, ja'ats wyinaty yjøn'o'jxip winets ja awa'andsaa'ñ jam tu'uk pyidsiimy ja'ax agujkp ku ja jøøn y'ikyiyi. Xjats ja Pablo yiktsu'jch kyøjø'øm. ⁴ Xjats ku ja kugajp t'ejxpaatti ku ja jiyujk jam tyii'ñi Pablo kyøjø'øm, winets ñawyajnidøø:
—Yikjaa'y'oo'kpi ya'at yjawi, øy jap mejyjotpy yjabidsimy jujky, ixyamts kø'øm ja Dios ja tiidyu'unin tø myø'øyi jøts y'ookt.

⁵ Xjats ja Pablo tjønwejtsiyii'ñ ja tsaa'ñ jøts jade'en myatstuujtiyøø, nisa dø'øn ja Pablo kyø' kyajajty. ⁶ Tum jade'en idø'øn ja jaa'y ja tjøp'ejxti juuni ja kyø' kyexpøkt, uk juunits yik'oogiyit. Ku dø'øn ja jade'en tjajøp'ejxtøø, xjats t'ejxti ku ja Pablo niti kyajatyiyi, winets ja wyinmaa'ñ jaty tyiktigatstøø jøts ñawyajnidøø ku ja Pablo Dios ja'.

⁷ Xjats ku dø'øn jam jade'en yjajty, jamts wyinaty tu'uk wingon chøøni ja jaa'y pøn ja kajp jaa'y tñiwindsøn'ajtp, ja' xyøøw Publio, ja'ats øøts jam xwaaw tyøjkjotp, jøts øøts jam tigøøk xøøw janch tsuj xyikja'adaajky. ⁸ Jamdam wyinaty Publio tyeety pyiky jøømba'am, jøts nayide'en ja ni'jpya'am tmøødi, winets ja Pablo ojts tñinijxy jøts t'atmigajpxy. Ja'ats ojts tkudsapkaajpxy jøts ja pamaa'y jaa'y myøkpiky ku ja ojts tkønixajy. ⁹ Winets ja Pablo niduki'iyi ja pamaa'y jaa'y ñimejniyøø pøn jaty jap wyinaty kugajp'ajtp jøts jade'en choktøø. ¹⁰ Winets øøts may ja may'ajt jadi'iñi nyikmøø'y, xjats ku øøts jap barkijotpy ndsoonwaani, xjats øøts tuki'iyi xmøøy pøni ti jaty øøts xka'ejtxip.

Ku ja Pablo yja'jty jam Roma

¹¹ Tø øøts jam wyinaty tigøøk po' ndsinaañi jam Malta, jøts øøts ja tu'uk ndatøjkiyii'ñ ja barki midi jam nayide'en tyiknajx ja xuxpyoj. Jamts ja'abi barki majtsk ja dios awanax txox'aty midi tyejtíp dios Castor jøts ja dios Pólux; ja'abi barki dø'øn ja wyindsøn kugajp'ajtp Alejandría. ¹² Xjats øøts jade'en ndsøø'ñ, winets øø nja'jty ma kajp Siracusa,

ma øøts ndaañ tigøøk xøøw. ¹³ Jamts øøts ndsøø'ñ jadigojk jøts øø nnijkxy Regio. Jøts øø kyimjabom ndsøø'ñ, winets ja wimbatpoj myiñ, ja'ats øø møk xpadej jøts øøts jam nja'jty kyimajtsk xøøw ma kajp txøøwi Puteoli. ¹⁴ Jamts øø nbaajty winaagin nmigu'uktøjk pøn ja Jesús yja' tpaduujnidip, ja'ats wandøø jøts øøts ja jam nmøøtaa'ñit tu'uk samani, winets øøts jam tekyjø'øm ndsoo'naa jøts øøts nnijkxy Roma. ¹⁵ Tø øøts ja wyinaty xnijawi ja nmøøtjanchja'wibidi, ja'ats jam tsoo'ndøø Roma jøts øøts x'atspatsøy tu'am ma kajp txøøwi Foro de Apio, jøts nayide'en øøts jam ojts ja winaagin xpatsoy ma ja'taajk txøøwi Tres Tabernas. Xjats ku ja Pablo ja myigu'uk twin'ijxy, winets ja ttamøja'wiyiñ ja Dios jøts jotkujk ja ñayja'wiyøø. ¹⁶ Xjats ku øøts jam nja'jty Roma, jøts ja soldadi windsøn tkøyajky ja pøkyjaa'y jam ma ja puxøjk adsinaabyi windsøn. Winets ja Pablo yiknimaay jøts ja tyøjk abiky t'ixa'at, ja'ayi ku nugo tu'uk ja soldadi y'eix'ityiyi.

Ku ja Pablo kyajpxwa'kxy jam Roma

¹⁷ Xjats ku dø'øn jam jade'en ja Pablo chinaay tigøøk xøøw jam tyøjkjotp, winets twaadsøøy ja israelit jaa'y ja myøjaa'dyøjkti, xjats ja ñamyukidøø, jøts ja Pablo tnimaay:

—Migu'uktøjkti, niti øts ngadamidundigøy ja nmigu'uk israelit jaa'dyi, jøts nika'ap øts nayide'en nmidundigøy ja møjaa'chinaa'yin, kuwanits adøm nmigu'uk israelit jaa'y xmajch jam Jerusalén, jøts øts ojts xkøyaky puxøjkjotp ma romanit jaa'y kyutujk jam.

¹⁸ Ku øts nyiktiidyuuñ, winets øts jadi'iñi xmajtstu'utwandi ja'agøjxp ku øts nbøky ni tu'uk xkapaajtidi mid'iibi øts xuku'oogiwyandip. ¹⁹ Ka'ats ja israelit jaa'y tyikjatwa'andi jøts jadi'iñi nyikmajtstu'utt, ja'agøjxp øts kuwani n'amidøøy jøts øts ya xiidyu'unt ja romanit møj windsøn. Ka'ap øts ja' ya nnimiñ jøts øts nmigu'uk israelit jaa'y ja' ndani'øønit. ²⁰ Yø' meets ixyam ndaniwaadsøøpy, jøts meets ka'pxy ndukmado'ot tigøjxp ku øts jade'en puxkadeen køwiñ n'ity; ja'agøjxp ku adøm niduki'iyi israelit jaa'y njøp'ijxyindi ku ja Dios ja oo'kpi jadigojk tyikjujkpyiky jap oo'kpi jutjøtpy.

²¹ Xjats ja møjaa'dyøjk t'adsojimbettøø, jøts wyandøø:

—Ni tu'uk øøts ja israelit jaa'y ñøky ya xkapaaty mets køjxp, jøts ni tu'uk adøm nmigu'uk israelit jaa'y nisa kyawa'añ. Ka'ap pøn mga'ødyjyiyi pøn jam tsoo'mp jøts ya tø yja'aty.

²² Nija'wip øøts ku yø' o madsoo yikpagajpxy pøn yø jemy ixpøjkin tjanchja'widip, paty øøts ndsøky'aty jøts øø xukmado'ot.

²³ Winets tkajpxy'ajttøø ti xøøw jadigojk ñamyukidit, xjats ku tpaajty ja tiempi winets ja jaa'y may ñamyukidøø ma Pablo jap wyinaty tø yja'ada'aky. Winets ja Pablo jøpyi kyajpxøjkiyñ kunim chuul'iyiñ ja xøøw. Jøts jade'en ttukmadøøy sa nwindsøn'ajtim Dios ja ñaxwii'ñit jaa'y ttanitani ja kyutujk. Ja'ats tyukmadøøpy sa ja Moisés kyutujk, jøts nayide'en sa ja Dios kyugajpxy ojts ttukjaadyañ, jade'en idø'øn ja udy'a'aky tjadukja'gyukiwyaañ ku ja Jesús ja yiknitsokpi pøn ja israelit jaa'y yjøp'ejxtip. ²⁴ Xjats winaagin tja'gyukidøø, jøts niwinaagin ka' tmibøjktøø sa ja Pablo tjanigajpxy; ²⁵ xjats kumi ka'ap ja niduknax tmibøjktøø, winets ja choonwanidøø, jøts ja Pablo jadigojk tnimaagyojmi:

—Janch tydam idø'øn ja Espiritu Santo wyaañ midi ja Dios kyugajpxy Isaías tyukmadoow ja n'apteety'amøjti, ku ja yide'en wyaañ:

²⁶ Nøjkx x'atsnøjmi yø'øbi jaa'y:

Wa'ats meets xjamado'ot, jøts ka' xmøjpkta'aktit, nayide'ents wa'ats xja'ejxtit, jøts ka' x'ejxkaptit;

²⁷ jabi yø'øbi jaa'y kawine'enxi kyujuunidi,

janch wenk myadowdi,

jøts wimbeets ñabyikta'agyidi;

paty ka'ti tmøjpkta'akti,

jøts ni tkadamadowdi ja tyatsk,

niwinø'ønin ja kyubajk kyaja'gyukidi,

jøts ni tkadyimiyikwimbetti yø wyinmaa'ñ ok nbojkipimaa'kxt.

²⁸ Nijawⁱ meets ku ja Dios ja yiknitso'ok'ajtin øøts ixyam ngajpxwa'kxtsoo'ni ma jaa'y kya'israelitjaa'yidi, ja'ats ne'egi tja'gyukidip.

²⁹ Xjats ku ja Pablo jade'en wyaañ, winets ja israelit jaa'y choo'nidøø, ja'ats møk'ampy ja xem ja yam nugo nadyakajpxidøø ja'abi ayuujk.

³⁰ Majtsk jumøjt ja Pablo jam ka'pxy tyaa'nii'ñ ma ja tyøjk jam t'ajuudyuky, tya-jotkujk'ajtpy ja Pablo pøn jaty jam atsmigajpxiyip. ³¹ Jotkujk idøø'n ja tkajpxwa'kxy ka' ti jotmay, tyuk'ixpijkpy ja jaa'y sa ja Dios Teety ja kyutujk ttanitani ja yjaa'y, jøts nayide'en ttukmadøy sa yjajty kyubejty ja nwindson'ajtim Jesús, xjats jade'en nipøn kya'adsejpiyøø.

JA NØKY MIDI JA PABLO TYANĠGAJX JA ROMĪT JAA'Y

Ku ja Pablo tñijayi pøn tjanchja'widip ja Jesucristo jam Roma

¹ Pablo'ajtp øts, jøts øts ja nwindson'ajtim Jesucristo nmidumpy. Øts ja Dios tø xwi'ixy jøts øts yide'en ngudanaabyi'att. Yide'en idø'on wə'ats kajpxy nbiktaajkin, ja' øts idø'on tø xanibiktaagi jøts øts ja ngajpxwə'kxit ja kyajpxy ja y'ayuujk midi nitso'ok'ajtin xukpaajtimp.

² Pø mā windi'ixyip Dios Teety yø tñigajpxni, jøts ja kyugajpxy ttukyiknaxy yø'øbi winmaa'ñ yø'øbi ixpøjkin jap mā y'ity ja kyajpxy ja y'ayuujk, ³ jøts tñigajpxy ja Dios U'nk pøn nwindson'ajtim Jesucristo'ajtp. Ku ja tñigajpxi ja yjaa'y'ajtin ja ñaxwiiñ'ajtin, ja rey David idø'on ja y'apteety'ajtpy; ⁴ kuts ja dios'ajtin, jats ja tyiknigaxi'jky ku xemikøjxp jadigojk yjujkpyijky jøts kyutujky møk'ampy, jøts ku dø'on ja Dios U'ngi. ⁵ Ja nwindson'ajtim Jesucristo køjxp øøts ja Dios Teety tø xmø'øy ja kunuu'kxin jøts øøts ja ngudanit, jøts ya naxwiiñ yja'attit pøn tjanchjəwidip pøn tpaduujnidip ja Dios yja' o mā'et o magajp. ⁶ Jøts meets idø'on nayide'en mjaa'y'ajtmi, nayi tøxi ja Dios mwii'ijxyidi jøts meets ja Jesucristo mja'atidit.

⁷ Meets idø'on nnija'ayidip niwine'enin jam mdsøøniidi mdanidi Romit kajpkøjxp, niwine'enin ja Dios mdaba'ayøyidi ja chojkin, jøts ja mdamidsøkyidi jøts ja amuum mnadyamiyoxidit. Mbattipts ja kunuu'kxin jøts ja øy'ajtin midi ja Dios Teety yajkpy møøt ja nwindson'ajtim Jesucristo.

Ku ja Pablo Roma y'ats'otswə'añ

⁸ Jawyeen øts ja Dios Teety ndukmøjəwi ndukunuu'kxyjəwi ja nwindson'ajtim Jesucristo køjxp, ku mee ni'ijtyi myiknigajpxti myiknimadya'akti øy madsøø sa ja janchja'win xjagyapti. ⁹ Diosts testigi'ajtp pøn øts ja y'U'nk ja kyajpxy ja y'ayuujk ngajpxwə'kxiip amumjoojt, ku meets ejtp nja'myech ku øts ja Dios nmidsəpkajpxy. ¹⁰ Ejtp øts ja Dios n'amidøy nbøktsøy jøts tyik'amøjatt jøts mee n'ats'ext, ja' kø'øm kyunuu'kxingøjxp. ¹¹ Ja ku nbaatwə'andi n'ejxwə'andi jøts nmo'owə'andi yiin waan ja pudøjkin sa Dios ttsøky, jøts yjaakmøjit yjaakmayit ja m'ajot'ajtindi. ¹² Jade'en'ampy øts idø'on ndijy jøts nixem niyam nnagyajpxjot'amøjka'andit nyiknigaxø'jkindit, jade'engøjxp sa jadu'uk jadu'uk njagyejpyindi ja janchja'win.

¹³ Uknimadowdi migu'uktøjkti, kawinaak ojk øts jam tø njanchjanøjkxwə'añ jøts mee n'ats'ext, ni ixymbaatnim ø nganijky. Jade'en'ampy øts jam njanøjkxwə'añ jøts meets ndukmadowə'añ ja Dios yja', jøts ø n'ext sa wyingaxi'iky øts ja ndunkjøøjp, sam ø tø n'ixy abikyajp mā jaty ø tø nwidity. ¹⁴ Xpaat'ajtpxi øts niduki'iyi pøn ka'israelit jaa'dyi, wan ja t'ixpikyidi tka'ixpikyidi; ¹⁵ jøp'ijxy ø nnanky'ityi jøts mee nayide'en ndukmado'ot ja Dios y'øgyajpxy ja Dios y'ømyadyə'aky, pøn jaty jam Roma tsinaadyip.

Sə ja møk'ajtin tjagyepy ja Dios y'øgyajpxy ja Dios y'ømyadyə'aky

¹⁶ Ka' øts ja Dios y'øgyajpxy y'ømyadyə'aky ndatsø'ødyuujniyi, pø ja'axi ja' myøk'ajtin ja'axi ja yiktumpy, jøts ja nitso'ok'atti pøn tjanchja'widip ja nwindson'ajtim, ja israelit jaa'y tyimyjapaajtidip, nayide'ents pøn ka'israelitjaa'yimidi. ¹⁷ Yø'øbi øgyajpxy ømyadyə'aky tñigajpxp jøts ku janchja'wingøjxp ja Dios xkupijkyindi, janchja'wingøjxp ja'ayi sam ja Dios kyajpxy y'ayuujk tyiktaañ ku wyaañ yide'en: "Pøn kupøjkip ja Dios, ja yjanchja'win ja ttukpaatip ja xemikøjxpit tsinaa'yin."

Ja naxwii'ñit jaa'y pyøky

¹⁸ Jap tsajpjøtpy ja Dios tyiktsøøñ ja møj ayo'on, jøts ja ttuktagida'aky ja kawindiyjaa'dyi ja ka'øyjaa'dyi, pøn kya'øy'ajtingøjxp kyanankñijəwiwyajnidip ja Dios

yja'. ¹⁹ Yjanija'widip wa'ats jøts tigøjxp pyaat'atyi ku ja Dios yiknijawit, pø tøxi ja kø'øm tyuk'ijxyidi ²⁰ sa ja myøk'ajtin y'ejxi tyiyi øy ja yjagagaxi'iky. Jade'en'ampyts ja yik'ixy yiknijawi ku yik'ixy sa ja tø tyik'øyi ja naxwii'ñit, jøts ku ja' tu'ugyi Dios'aty ku ja myøk'ajtin xemikøjxp myajada'aky; paty ja ka'ap pyaat'atyidi ja'abi jaa'y jøts ja yiktamaa'kxtit jøts ku dø'øn ja Dios ja tkanijawidi. ²¹ Øy ja tjanijawidi ja Dios jade'en, ka'apts ja twindsø'øgidi, ka'ap ja tmøjawidi tkunuu'kxyjawidi sam ja Dios pyaat'atyin. Ne'egi wimbet'ampy ja ne'egi wyinmaydi, ja' tyajotkøjxtip midi niti kawamp jøts ja wyinmaa'ñ kya'øyi, wimbeets kugoots y'ejtnidi. ²² Øy ja yjawa'andi jøts ku ja wyijyaa'yidi, jade'ents ja yjatti pøn niti tkajajtip; ²³ tøts ja t'ixwejtsidi ja Dios kyunuu'kxin, midi nijuuni kawindigøøpy, jøts ja tyikmøjtøkidi ja jaa'y yja' ja awanax midi windigøøpy ejtp, joon paat y'awanax, tsaa'ñ paat y'awanax, uk nayide'en øy midi jiyujk midi maktaxk ja tyeky.

²⁴ Yø'øgjxpts idø'øn Dios ja tø myajtstu'udyidi, jøts ja tø tpanøjkxti ja kyø'øm tsojkin ja kya'øwyinmaa'ñ (midi'iyim ja y'ijty y'ukjagyajptip), jøts jade'en tsø'ødyumbim y'adø'øtsti nixem niyam; ²⁵ ja ku ka'ap tjanchja'widi ja Dios tyiy'ajtin. Ja' ne'egi myibøjktip ja tum ja taay, jøts ja ja' tø twindsø'øgidi ja pikta'aky midi ja Dios tø t'ødyuñ, jøts ni ja Dios ne'egi kø'øm kyayikwindsø'øgi, pøn paat'ajtip amuum ja windsø'jkin. Jade'en idø'øn ja y'ejxi tyiyi.

²⁶ Patyts idø'øn Dios ja tø y'ixmachidi jøts ja jade'en y'am'adø'øtsti chaach'adø'øtsti; ja tø'øxyøjk paat ja tyiktigajtsnidi ja tyø'øxyøjk'ajtin, tum wimbet ttundi sam ka'ap pyaat'atyidi jøts ja jade'en y'adø'øtstit. ²⁷ Jøts yaa'dyøjk nayide'enmidi; ka' t'uknitanaañidi ja yaa'dyøjk'ajtin ku ja tø'øxyøjk møøt, kø'ømyi ja tukyaa'dyøjk ñay'ejxkiyidi nixem niyam. Tukyaa'dyøjk ja axøøk y'adø'øtsti, ja ayo'onts idø'øn ttagidajkidip jøts jade'en tyuktuñidi ku tkamøjpikta'akti ja Dios.

²⁸ Kumi ka'ap ja Dios tnijawiwya'andi, patyts ja tø myajtstu'udyidi jøts ja y'axøøkwinmaa'ñ tyikmajada'akti, jøts jade'en y'adø'øtstit sam ka'ap pyaat'atyidi. ²⁹ Tum ja ka'øyi winmaa'ñ yjagyajptip, ja kawindiy'ajtin ja axøøk'ajtin, y'ama'at'ajtkøjxtip o ti, ja ka'øy'ajtin y'amidip yjotpidip, windii'ñjaa'y'ajttip, yikjaa'y'o'ktip, kudsep yjaa'y'ajttip, win'øø'ndip jøts tum wenk øy pøn tnmadyaagidi.

³⁰ Ja pagajpxk ja' tyunk'ajttip, ka'ap ja Dios ttsokti, yjemjaa'yidi tyejaa'yidi, namyikaxi yjaa'y'atti. Tum ja ka'øyi wyinmaa'ñ'ajttip, ka'ap tyeety tyaak tmimadowdi, ³¹ ka'ap yja'gyukidi, ka'ap y'ayuujk tpadundi, ka'ap yujy'ajtin tjagyapti, ka'ap tjatti jøts myaa'kxuktit jøts ka'ap pøn t'ayo'ejxti. ³² Yjanija'widip wa'ats sa Dios tyikutuky; wa'ats tjanijawidi pøn jade'en adøtstip jøts ku ja kyudigø'ødyit xemikøjxp. Jøts nijade'en tkadamajstu'utti, tyun'adøtstip jade'en jinaxy. Tyaxondaktip ku t'ejxti nayide'en y'adøtsmidi jadu'uk jadu'uk.

2

Tiy'ajtingøjxp ja Dios tyiidyuñ

¹ Ja'agøjxp ka' mbaat'atyidi jøts ja myiktamaa'kxt øy sa mjawa'añ, metsxi mbayø'øpy jadu'uk øy pøn, mdyimyjapøni mets. Ku jade'en m'adi'ich kø'øm mnadyanipiky ja ayo'on, mbayø'øpy jadu'uk jøts m'adøtspts jade'en kø'øm. ² Nnija'windipts adøm jøts ku Dios tiy'ajtingøjxp tyiidyuñ ku ja ttukniduki ja ayo'on pøn jade'en adøtstip. ³ Jade'en mets yjawi mwani mduknawa'adsip mets ja Dios xijy ja ayo'on, metsxi mdanipijppy ja mmigu'uk ja ayo'on pøn jade'en adøtstip, mja'adøtstip meets jade'en kø'øm. ⁴ Uk ka' idø'øn xtsojki ja Dios y'øy'ajtin ja Dios tyuda'aky'ajtin, ni xkamøjpikta'aky jøts ku ja'abi øy'ajtin tyuñ jøts xmijotjimbett ja Dios jøts tyigatst ja mdsinaa'yin. ⁵ Møk ja mwinnmaa'ñ xjagyepy jøts ka'anim xmijotjimbity ja Dios jøts xyiktigatst ja mdsinaa'yin. Kø'ømyi ja m'ayo'on xyikmaweni xyikajaji, midi nøjkk yikpatp yik'ejxp ku ja Dios ja tyiidyu'unin tiy'ajtingøjxp tyikme'ent, ⁶ ku ja ttagubatt tu'uk tu'uk sa jaty pønjabøn

tø y'adi'ich. ⁷ Pøn tpaatwandip ja kunuu'kxin ja øy'ajtin xondaajkin midi xemikøjxp, jade'en'ampy ku ejtp øy yikxon yjaa'y'atti, ja'ats idø'øn Dios mo'ojidip ja jujky'ajtin midi xemikøjxp; ⁸ pønts nay'ama'at'ajtiyip jøts ka' tpadundi ja tyiiby yjanchpi, tum ja ka'øyi tyundip, ja'ats ambøjkin'ampy Dios tiidyunidip. ⁹ Møk y'ayo'odit niduki'iyi, y'amjattit chaachjattit pøn ka'øy'adøtstip, ja israelit jaa'dyi jøts nayide'en pøn ka'israelit jaa'dyi. ¹⁰ Pønts øyjaa'y'ajttip wan t'israelitjaa'yidi uk tka'israelitjaa'yidi, ja'ats ja Dios mo'ojidip ja kunuu'kxin ja øy'ajtin jøts ja windsø'jk'ajtin.

¹¹ Kumi ka' Dios pøn t'øy'ixy tka'øy'ixy wan ja tpøni; ¹² pøni pøn tkanija'widip ja kutujk midi ja Moisés ja Dios Teety møøjyi piri pøkyundip, nayide'en ja nøjx wyindigøydi, ni ja kutujk kyatsokit; pønts tjanija'widip ja Moisés kyutujk jøts pyøkyun'adø'øtsti, nay ja'abi kutujk ja jaayi nøjx yiktatiidyundip. ¹³ Ka'ap ja Dios tkupiky pøn nugo tmadoodip ja kutujk jøts ka' tpadundi. ¹⁴ Ku abiky jaa'dyi, pøn ja Moisés kyutujk tkanija'widip, tyundipts ja øybi midi ja Moisés kyutujk y'ane'emy øy ja ja'abi kutujk tjagajagyapti, kyø'ømgutujk ñamyayi yiktundip, ¹⁵ jabi yikwingaxø'ktipxi ja' sa jaty ja yjaa'y'atti jøts ku ja kutujk tjagyapti. Ja kyø'ømwinmaa'ñ ni'øøniyidip sa y'øy'adø'øtsti kya'øy'adø'øtsti. ¹⁶ Ja'abi xøøw yiknijawit ku ja Dios Teety tpikta'akt ja Jesucristo jøts ttiidyu'unt niduki'iyi ja jaa'y ti jaty pønnapøn tø ttuñ ayu'uch, sam ø tø nnigajpxi ja yiknitsokpi ayuujk.

Sa ja israelit jaa'y ja Moisés kyutujk ñadyamøjyidi

¹⁷ Mets wamp jøts ku me israelitjaa'yi, jøts ku xpaduujni ja Moisés kyutujk jøts mnadyamikajxip ja mDios. ¹⁸ Wa'ats xnijawi sa Dios ttsøky, jøts wa'ats mduknijawiyi ja kutujk midi'ibi øy midi'ibi tsuj. ¹⁹ Mnay'aja'wiyip jøts ku xjaty xnø'mo'ot xuu'mo'ot ja jaa'y pøn wimbeets kugoots ejttip. ²⁰ Mnay'aja'wiyip jøts ku xjaty sa xyik'ixpøkt pøn tkanija'widip pøn tkaja'gyukidip, pø japxi kutujkjøtpy xkajts'ixy ja wejin kajin, ja tyiiby yjanchpi. ²¹ Myik'ixpijkpy ja mmigu'uk, ¿ti kuts kø'øm xkatunjøpi sa ja m'ixpøjkin xyikyø'øy? Ku mgajpxwa'kxy, jade'en mwa'añ ku ka'ap y'øyi ja maa'tsk, maa'tspts mets kø'øm, ¿tigøjxp ku kø'øm mmeech? ²² Mets mwamp jøts ku ka'ap pyaat'aty jaa'y ñiyaa'y ñidø'øxy ñabyøjkiyidit, jøts ¿ti'ajtp ku jawyeen jade'en kø'øm m'adi'ich? Ni mets kø'ømbaat xkatsøky ja awanax, mwimaa'tsidipts ja chaptøjk ti jaty ja yjagyeypy. ²³ Mnadyamikajxip mets ja kutujk, mmidundigøøpyts ja Dios ku ka'ap jade'en xui sa ja kutujk wya'añ. ²⁴ Paty idø'øn ja Dios kyajpxy wya'añ: “Pøn ka'israelit jaa'dyi, ja' tka'ødeytip ja Dios ku meets tum jiwimbet xunguixy.”

²⁵ Pø wan wine'enin xjanchyiktuñ ja Dios y'ejxpajt mne'kxkøjxp ku xpaduñ ja Moisés ja kyutujk, kuts ja ka'ap xpaduñ, jade'en ja tpaaty ejxim ja ejxpajt jeexyip xkamøøt'aty. ²⁶ Pønts ja ejxpajt kyamøøt jøts pyadumpy sa ja kutujk wya'añ, jade'en ja tpaaty jøts ku ja ejxpajt ja jeexyip tmøødi, øy ja windii ja ejxpajt yjagayiktu'unxinim. ²⁷ Pønts ja ejxpajt ka'ejtxip jøts pyadumpy ja kutujk øy ja kø'øm tka'ixpiky, mdabayø'øyip mets ja' ku xkabaduñ ja kutujk, øy mets ja jap xja'ixy jøts ku ja jap kyøxja'ayi jøts øy mets ja ejxpajt xjamøøt'aty. ²⁸ Ka'apts ja jade'en tijy jøts ku ja y'israelitjaa'yi pøn jade'en nugo nikijxy nan'ky'ejxip, jøts ni ja' ka' yik'ejxpajtijy midi nikijxy ja'ayi yiktump. ²⁹ Ja' idø'øn israelit jaa'y pøn amuum tpadump, jøts ja' ejxpajtin'ajtp midi yikwinmaapy am jotp, jam anmija'wingøjxp, midi ka'ap ma kyøxja'ayi, midi ka'ap ma kyaxi'iky. Pøn jade'en tpadump, kupiky ja y'ity jam Dios wyingujkp, kidi jaa'y wyingujkyip.

3

¹ ¿Tiku yikajpxy ja israelit jaa'y? ¿Ti wya'añ ja ne'kxkøjxpit ejxpajt? ² Janch møk yjapaat'atyidi ja'agøjxp ku ja' ja Dios kyajpxy y'ayuujk tyami'ajot'ajtidi jøts ja tpadu'undit. ³ ¿Tits idø'øn ja'adi? Øy ja tkabadundi jade'en, ¿winets ja Dios tmajtstu'utt ja y'øy'ajtin? ⁴ ¡Niwindem! Jinxxy ja Dios tyiktuñ ja tyiiby yjanchpi, øy ja jaa'y niduki'iyi yjataayidi; jabi yide'enxi ja Dios Teety kyugajpxy tñimadyaajky ja Dios Teety: Ja mgø'øm'ayuujk me Dios Teety myika'pxytiidyumbipidsøøjmip,

ku wyinaty nugo mwinmaa'ñ'ijxyidi ja'adi pøn mgamøjpiktaajkiyip.

⁵ Sam winaagin wya'andi yide'en: ku adømbøkyøjxp tijy ja Dios ja y'øy'ajtin tyiknigaxi'iky, ¿sats adøm idø'øn ja'abi ayuujk nja'gyukandit? ¿Ka' idø'øn ja Dios y'øyi ku ja nyikjotmajtyindi, jøts ja ayo'on xjaniguejxyindi? ⁶ ¡Nijuuni ka' yjade'eni! Ku Dios jeexyip kya'øyi, ¿sudsots ja jeexyip ttiidyuñ ja naxwii'ñit jaa'y?

⁷ Jøts kuts øts nbøky jeexyip yjanchtuñ jøts ja Dios tyiy'ajtin tyikwingaxø'økt, ¿sudsots ø nyikpøky'ixy jøts ku øts nbojkitumbijaa'yi? ⁸ ¿Winets ja tum øy wyimbejtxit ku pøn ttuñ tum ja ka'øybi? Jade'en ja jaa'y winaagin kya'øwyinmaydi jøts wya'andi, jøts ku ja'abi øøts jade'en ndukni'ixpøki. Yø'øbi jaa'y paat'ajtidip ja ayo'on.

Niduki'iyi ja pøky xaja'jtyindi

⁹ ¿Tits adøm idø'øn? ¿Ku adøm n'israelitjaa'yindi, paty adøm jawaani njaaktyimy'øyindi, jøts nika' pøn jade'endi? ¡Ka'ap yjade'eni! Pø tøxi nnigajpxy jøts ku tum ja pøky yik'adsøni, wan t'israelitjaa'yidi uk wan tka'israelitjaa'yidi. ¹⁰ Ja'agøjpxxi jap nøkyijpxy yide'en wya'añ:

Ka' pøn y'øyi, nitu'ugin kya'ity pøn øy;

¹¹ nipøn kyaja'gyuki,

nipøn tkanijawiwya'añ ja Dios.

¹² Tum ja wenk tuu' tø tpøjknidi, windigøy ni'ijtyi yjatti.

Ka' pøn tjotmay'aty ja øwyinmaa'ñ, ok idø'øn tu'ugin ja'abi twinmaa'ñ'att.

¹³ Tum ja axøøk kajpxy pidsømp y'aawjøtpty yukjøtpty;

ja win'øø'nk ja'ayi majyip.

Wingajpxnajpxim kyajpxy;

¹⁴ tum ja ka'øybi kyajpxpidsømdip, kixy kyubety wya'andi.

¹⁵ Jøts ja'ayi majyidip ku tnibutti tniga'akti ja yikjaa'y'oo'k;

¹⁶ ja' tyunk'ajttip ku yikudigø'ødyit ku y'ayo'ondu'undit,

¹⁷ jøts ka' tnijawidi ja øy'ajtin ja tuda'aky'ajtin.

¹⁸ Niwine'enin tkawinmaydi jøts twindsø'øgidit ja Dios.

¹⁹ Jøts yiknija'wip sa jaty ja Moisés kyutujk wya'añ, ja'ats ja yikta'ana'amdip ja israelit jaa'dyi pøn ja tø yiktanibiktaagidi, ja'agøjpxts ne'egi amøñi tyimy'ettit, jøts jade'en niduki'iyi ja naxwii'ñit jaa'y tpaattit ja Dios tyiidyu'unin; ²⁰ nipøn ja Dios tka'øy'ext øy ja tø tjabaduñ midi ja kutujk ñi'ane'empy, jøts ja'ayi ja ñigajpxpy ku adøm nbojkitumbijaa'yindi.

Janchja'wingøjxp ja nitso'ok'ajtin yikpaaty

²¹ Jats jadu'uk ja winmaa'ñ sa Dios xkupøjkin. Yjadyimyjanigajpxpy ja Moisés ja kyutujk ja kø'øm, jøts nayi tø ja Dios kyugajpxy ja nayide'en tnigajpxti. ²² Ja' idø'øn ja Dios Teety kyupijjpy pøn tjanchja'widip, pøn t'ajot'ajttip ja nwindson'ajtim Jesucristo; kyupijjpy ja øy pøn, ka'ap ja pøn jadu'uk jadu'uk twenk'ixy, ²³ niduki'iyixi jaa'y pyøkyundi, jøts ka'ap pøn tminaxy ja pyøky jam Dios wyingujkp. Jagam jixkø'øm ndsinaa'yindi, ni sudso'ampy ja ñitso'ok'ajtin ja ngapaajta'am. ²⁴ Ejxim ja Dios Teety y'øyi ku ja jaa'y tyiknitso'ok'aty nwindson'ajtim Jesucristo køjxp, jøts jade'en tmay'aty ku tkupiky. ²⁵ Ja Cristo ja Dios Teety pyiktaajk jøts ja tkudanaajyit ja naxwii'ñit jaa'y pyøky ku ja tku'oogit. Winets wyingaxi'ikñim adøm ja nitso'ok'ajtin ku ja njanchja'win, jøts ja Dios Teety jade'en xuknija'win ja y'øy'ajtin ja tyuda'aky'ajtin, jøts ku ja tkadagubety ja pøky midi tø yiktuñ jawyeen ku ja nwindson'ajtim tkagu'ooginim ja pøky. ²⁶ Ja'agøjxp jade'en yjaty jøts nnija'win jøts ku Dios Teety y'øy'ajtin tyiy'ajtin tyik'awa'añ, jøts ejtp jade'en øy juuni tkupiky pøn tjanchja'widip ja nwindson'ajtim Jesús.

²⁷ ¿Mats ja namyikaxi tyuñ? Pø ka'axi ja tyuñ ku ja janchja'win njagyajpin, ku njanchja'wyin ja nwindson'ajtim. Ja' ja tyiktundip pøn tta'ødyøkiwyandip ja tunk ma Dios, ku ja kutujk nadyijyi tpadundi pøn ja janchja'win tkajagyajptip. ²⁸ Jade'ents

yik'ixy yiknijawī jōts ku janchja'wingōjxp ja jaa'y yikupiky jam Dios wyingujkp. Ka'ap ja yikpayō'oy pōni sa ja tō tpaduñ tkabaduñ ja kutujk sa ja y'ane'emy.

²⁹ ¿Ti ja israelit jaa'y nugo ja Dios Teety y'eix'ijtpy, jōts ja ka'ap t'eix'ity pōn ka'israelit jaa'dyi? Ka'ap yjade'eni, pō tum ja'axi amuum tja'ajtp. ³⁰ Tu'ugyi Dios, ka'ap ja Dios kyawinaagi; jōts pōni pōn tmōōt'ajtp ja janchja'win, ja'ats ja Dios kyupijky, wan tmōōt'aty uk tkamōōt'aty ja ejxpajt ñe'kxkōjxp sam ja israelit jaa'dyi. ³¹ ¿Ja'agōjxp adōm ja kutujk nga'ukpadu'unindit ku ja janchja'win nmōōt'ajtyindi? Ka'ap yjade'eni, jabi jade'eni ne'egi ka'pxy ja kutujk yikpaduñ ku ja Cristo njanchja'wint.

4

Sa ttunjōpi ja Abraham

¹ ¿Ti adōm n'apteety'amōj Abraham tyuun jōts Dios ja ojts kyupiky? ² Ku jeexyip ja Abraham ja'agōjxp ja Dios kyupiky ku ja wyinaty tō ttuñ tigati, nadyamōjyipts ja jeexyip. ³ Yide'ents jap nōkyijxpy wya'añ: “Ojts ja Abraham tjanchjawī ja Dios, ja'ats ja Dios y'ōyja'wiyi'ñ jōts ja ojts tkupiky.” ⁴ Ku pōn ōy ti tunk ttuñ jōts ku ja yikmijuy, ja tyunkts ja yiknimiju'uyip, ka'ap ja niñamyay'atī tpaaty, ja' ja kyudōjkip ku ja tō tyuñ. ⁵ Pōnts ja tunk tkada'ōdyōjkip mā Dios, ōy ja ti tjagatuñ, jōts ku ja ja'ayi tjanchjawī ja Dios ku ja pojkpītumbi jaa'y ja tpojkpimee'kxy, ja'ayi ja Dios tyajotkujk'ajtpy ku ja tjagyepy ja janchja'win, jōts ja tmay'aty jade'en ku ja tkupiky. ⁶ Nayide'en ja David ojts wya'añ ku ja ojts tnigajpxy sa ja jaa'y xyonda'aky pōn ja Dios kyupijky, jōts ja ka' tmōjpkta'aky pōni sa ja jaa'y tō y'adi'ich. ⁷ Yide'en ja wya'añ:

Nekim ja jaa'dyi pōn ja Dios ttamaa'kxidip ja tyundigō'ōyin, jōts ja ka'ap myōjpktaajkxiyidi ja pyōky.

⁸ Nekim ja' pōn ja nwindson'ajtim pyojkpimee'kxpy.

⁹ ¿Ja'ayi dō'ōn nugo jade'en nekim t'ejxtip pōn ttundip ja ejxpajt ñe'kxkōjxp, uk nayide'en idō'ōn ja'amidi pōn tkatundip ja ejxpajt? Nnija'windipts jōts ku ja Abraham ja'agōjxp ja Dios ojts kyupiky ku ja ja'ayi tjanchja'wi. ¹⁰ ¿Juunits idō'ōn ja jade'en yikupijky? ¿Tō wyinaty ja Abraham jawyeen ja ejxpajt yikpktaajki, uk ka'anīm? Ka'anīmts ja wyinaty ttuñ ja ejxpajt. ¹¹ Oojknim ja Abraham ojts yikpktaajki ja ejxpajt ku ja ojts yiktsuky ja ñe'kx, ejxa'an ja wya'añ jōts ja yiknijawī ku Dios ja tō kyupiky yjanchja'wingōjxp. Jade'ents ja Abraham ttunjōpiyi'ñ, jōts ja nayide'en niduki'iyi janchja'wingōjxp yikupōkti ōy ja tmōōt'atti tkamōōt'atti ja ejxpajt ñe'kxkōjxp. ¹² Janch jade'en ku ja Abraham idō'ōn kyudanaabyi'ajtp pōn ja ejxpajt tmōōt'ajttip, kidi ja'agōjxpip ja ja'ayi ku ja tō yiktu'unxidi ja ejxpajt. Jade'en'ampy ja tijy jōts ku ja tpa'ejxti, jōts ja nayide'en tjagyapti ja janchja'win sa ja Abraham, ku ja wyinaty ka'anīm ja ejxpajt yiktu'unxi.

Jaa ja Dios y'aduky ja kyajpxy ku ja yikjanchjawī

¹³ Jade'en ja Dios wyanda'aky, jōts ja Abraham mōōt niduki'iyi wine'enin ñajtska'axidi yikmo'odit amuum ja naajx kajp wine'en y'ity naxwiñ; kaja'agōjxpīpts ja wanda'aky ojts yikpkta'aky jade'en ku ja kutujk ja wyinaty ka'pxy tō tpaduñ ja Abraham, pō jade'en'ampyxi ja jade'en ku Dios ja tjanchja'wi, jōts ja' ja wyinaty tō tyagupiky. ¹⁴ Jōts ku jeexyip ja'ayi yikupōkti pōn tpadundip ja Moisés kyutujk, jōts ja'ayi jeexyip yikmo'odi ja Dios y'ōy'ajtin, ka'ats jeexyip tyuñ ja janchja'win, jōts ni ja Dios jeexyip ja wyanda'aky niti kyawa'añ. ¹⁵ Pō tīdyumpxi ja kutujk; mats ja kutujk kya'ity, ka'ap jam ti yikmidundigōy, jabi niti ana'amixi jam.

¹⁶ Jade'en'ampyts idō'ōn Dios ja twandaajky ja'agōjxp ku ja janchja'win ojts t'ixy, jōts ja tmay'att niduki'iyi pōn nayide'en ja janchja'win tjagyajp sa ja Abraham. Kidi ja'ap ja Dios tyamiwandaajki ja y'ōy'ajtin pōn tpadundip tkabadundip ja kutujk, pō ja'axi tyamiwandaajki pōn tjanchja'widip ja Dios sam ja Abraham ttunjōpiyi'ñ. Jade'ents

idø'øn ja tpaaty, ja' ñamyayi tñigubajk'ajtp ku ja jade'en ojts tjanchja'wi ja Dios, jøts ja' adøm ñamyayi ndeety'ajtyindip ¹⁷ jam Dios wyingujkp, pø nayi Diosxi ja yjanchja'wiyii'ñ ku wya'añ ja Dios kyajpxy: "Tø me nbikta'aky møjaa'y'ajtpi o ma'et o magajp." Janch møj ja Dios, øy ja tyikjujkyøkt pøn tø y'oo'kni tyigøøñi, jøts nayide'en tñanky'ijxyi o ti pikta'aky midi ka'ejtpnim.

¹⁸ Øy ka'ap ti jøp'ejxin, ka'ap ti winmaa'ñ, ojtsts ja Abraham ja tjanchjawi jøts yjöp'ijxy ja', xjats idø'øn ja jade'en may jaa'y ñamyayi tñigubajk'aty sa u'nkteety y'u'nk y'una'jk tñideety'aty, jade'en sa dø'øn Dios ja wyinaty tø ñii'mxyi ku ja wya'añ: "Janch may ja m'u'nk m'una'jk xpaatt." ¹⁹ Magø'pxy ja Abraham wyinaty ja yjumøjt jøts ka'ap ja sa tijy, amuum ja t'ajot'aty øy ja ñidø'øxy Sara ja møøt tø yjamøjaa'yinidi, ka'ap ja y'u'nk y'una'jk t'ukpatnidit. ²⁰ Ka'ap ja sa tijy, ka'ap ja tka'øyja'wiyi ja Dios wyanda'aky, ne'egi ja amumjoojt tpiktaajky ja yjanchja'win jøts ja tmøjawi tkunuu'kxyjawi ja Dios, ²¹ jøts ja tu'ugyi tjöp'ijxy jade'en jøts ku Dios tjagyepy møk'ajtin, jøts ja ttu'unt jade'en sa ja wya'añ. ²² Jade'en'ampy ja Dios ja ojts kyupiky ku y'ijxyi jøts ku myajada'aky ja yjanchja'win.

²³ Jøts ku dø'øn Dios ja jade'en tkupijky ja yjanchja'win, kidi ja Abrahamip ja ja'ayi kyupøjkp jøts ja jade'en yikjaadyañ; ²⁴ pø nayide'enxi adøm ja xkupijkyim ku adøm ja Dios Teety njanchja'want. Pø ja'axi tø tyikjujkyiky jadigojk xemikøjxp ja nwindson'ajtim Jesucristo, ²⁵ pøn ojts yikøyaky jøts y'oøkt adøm nbøkyøjxp, jøts jade'engøjxp ojts xemikøjxp yjukpyiky jadigojk jøts adøm nyikupøjkint jam Dios wyingujkp.

5

Øwyimbidsimy ku xkupøjkint ja Dios

¹ Kuts ja Dios Teety xkupøjka'an ja njanchja'win, jøts jade'en ja nmiduda'aky'ajtin ja nwindson'ajtim Jesucristo køjxp. ² Ja'agøjxp adøm ja Dios Teety møøt n'ijtyindi ku ja nwindson'ajtim njanchja'windi, paty adøm ja xkunuu'kxyindi. Ja' adøm xyik'ejtindip tu'ugyi ja nwinmaa'ñ jøts ja xondaajkin xmø'øyindi, jöp'ijxy nyik'ijtyindi jøts ku ja nbaajta'andit amuum ja y'øy'ajtin. ³ Jøts nayide'en adøm ja ka'ap nwandijyindi ja ayo'on, øy adøm ja ngu'ayo'owa'andi jotkujk; pø nnija'wandipxi adøm ku n'ayo'owan winets ja tuda'aky'ajtin nbaajtindit, ⁴ jøts ja tuda'aky'ajtin ja' øy xyikwingaxø'jkindip, ja' xukjøp'ijxy'ajtindip midi ja Dios tø xanibiktaajkandi. ⁵ Jøts ka'ap majtsk'aaw majtskjoojt n'ejtindit, pø tøxi ja Dios amuum xmø'øyim ja y'øy'ajtin ja pya'ayo'owin ku ja tø suktatøjka'am ja y'Espíritu Santo.

⁶ Ku adøm wimbeets kugoots nmijajtyim ja nbøky, niti nitso'ok'ajtin køøm ngapaajtyim, xjats ja Cristo tø myiñ winet, jøts ja tø tkudani ja ka'øyjaa'y pyøky ku ja tø y'øøky. ⁷ Ka'ap pøn nugo tñigyuoogi jadu'uk, ni jade'enbaat øy pøn mabaat yjadyimyja'øyjaa'y; pø wants winaagin pøn ñay'a'ejxyit jøts ja tku'oogit. ⁸ Xjanchojkimpts adøm ja Dios ku adømgøjxp y'øøky ja nwindson'ajtim Jesucristo, øy adøm njapøjkpitumbijaa'yandi. ⁹ Jøts tøts ja Dios xkupijkyim ja nwindson'ajtim Jesucristo pya'ayo'owingøjxp ku ja tø xku'o'jka'andi, jøts ne'egi jinaxy ja nøjkk xuknitso'ok'ajtyindi ja møk ayo'on, jøts ja ka'ap xuku'o'jka'andit ja nbøky, ja'ayi nwindson'ajtim Jesucristo køjxp. ¹⁰ Njagami'øy'ajtyindip adøm ja Dios, jøts adøm ja jade'en xjaaktuu'mø'øyindi sudso ja jadigojk nmijotjimbejtindit, ja'agøjxp y'ø'jky ja y'U'nk adøm nbojkkpøjxp. Mats ku ja ixyam yjuky'aty xemikøjxp, jøts ku adøm ja tø nmijotjimbijtyindi ja Dios, ¿ti jats adøm ndejint ja winet xka'ukyiknitso'ok'ajtna'ant? ¹¹ Xon'ejtandip adøm ixyam ja'agøjxp ku ja nwindson'ajtim Jesucristo tø xukmigu'ukwa'añim jadigojk ja Dios Teety.

Ja Adán jøts ja Cristo

¹² Jøts tu'ugyi ja jaa'y pøn pøkyun'okwaan ya naxwiiñ, jøts ja o'jkin tigøø'yin jade'en'ampy ñaxkidaajky, niduki'iyi øy pøn pyaadyi ja'agøjxp ku ni'ijtyi nayide'en tø pyojkpitunidi. ¹³ Ku ja kutujk wyinaty kya'itynim, jaayim ja pøky wyinatyni ya naxwiiñ; jaa ku ja Dios ka' tpayø'ñim, pø ka'anixi ja kutujk wyinaty te. ¹⁴ Ku ja et ja xøøw ñajxy midi tso'ondaajk Adán ñikøjxp jøts yjöpkiy Moisés ñikøjxp, jøts wine'en pøn pyøkyundøø, ja' idø'on ja o'jkin tigøø'yin mimajadaajkidøø, øy ja tjagajagyapti ja'abi pøky midi ja Adán tyuun ku ja tkamimadøøy ja Dios; sa ja Adán tyiktso'ondaajky ja pøky, nayide'ents ja tu'ugyi myenwami wyinaty pøn ja øy'ajtin nitso'ok'ajtin xukpaajtmandip, xjats tø myiñ ja nwindson'ajtim Jesucristo.

¹⁵ Windemts ja møøt n'uk'ejxkijpxyin ja Adán tyundigøø'yin møøt ja Dios y'ø'y'ajtin midi ja xmøø'yindip. Tu'ugyits ja jaa'y pøn ja pyøky tø xukno'jka'andi niduki'iyi jøts windigøø n'ejtna'andi; jøts tu'ugyi ja nayide'en ja nwindson'ajtim Jesucristo pøn ja Dios xuknitso'ok'ajtindip ja nbøky, jøts ka'ap ja pøn tmi'abaaty, namay adøm nyiktamay'ajtyindi ja nitso'ok'ajtin jøts adøm ja xmøø'yindi. ¹⁶ Ti'in ja ndami'a'ejxin ja tu'ukpi jaa'y pyøky møøt ja Dios ñitso'ok'ajtin. Tu'ugyi ja tundigøø'yin ja'ats yikpayøøpy jøts tø nbøkyajtkijxyindi; kuts ja Dios xmøø'yindi ja nitso'ok'ajtin, tyamay'ajtpy ja jaa'y ja ñamyayi jøts ja xkupijkyin, øy wine'en tø njapojkpitu'uñindi. ¹⁷ Ku ja tu'ukpi jaa'y tø pyojkpituñ, ja'agøjxpts ja o'jkin myajada'aky jøts ja yikudigøøy, møjts ja Dios jøts ja ttuñ ja may'ajtin, jøts ja tyaky ja myøk'ajtin midi yikjujky'ajtp xemikøjxp ku tu'ugyi njanchja'want ja nwindson'ajtim Jesucristo.

¹⁸ Jade'en sam ja Adán pyøkyøjxp ja jaa'y ttukpaatkijxy ja kudigøø'yin, nayide'en ja nwindson'ajtim Jesucristo y'ødyu'uningøjxp ttukpaajty niduki'iyi ja naxwiiñit jaa'y ja nitso'ok'ajtin, jøts ka'ap ja møk tiidyu'unin tpaattit pøn jaty tjanchja'widip. ¹⁹ Tu'ukts ja jaa'y pøn kamadoow, jøts ja'agøjxp ja pøky xaja'atkijxyindi; nayide'ents ja tu'ukmi pøn tuki'iyi tmimadoow ja Dios Teety, jøts ja'agøjxp adøm nyikupijkyindi jam Dios wyingujxp.

²⁰ Jøts ku ja kutujk yikpiktaajky, ja' ja yiktanibiktaajkiyiñ jøts ja pøky wa'ats yik'ejxkapt; jøts ja pøky møjta'adøtsp ja', jinaxyts ja Dios y'ø'y'ajtin myøk'ajtin tyikmøji'adi'ich nayide'en. ²¹ Sam ja pøky myajada'aky ku ja tyiknaxkida'aky ja o'jkin tigøø'yin, xjats ja Dios ja y'ø'y'ajtin nayide'en tyikmajada'aky sudso ja xkupøjkin, jøts ja nwindson'ajtim Jesucristo køjxp xmøø'yindi ja jujky'ajtin xemikøjxp.

6

Ka'ap ja pøky myajada'aky ku ja Cristo yjujky'ajtin nmøøt'ajtyindi

¹ ¿Tits njaaktu'unindip? ¿Jaaktyimbyøkyun'adøjtsindip adøm idø'on ja'agøjxp ku tø nnija'windi jøts ku ja Dios xu'unxim ja may'ajt ku ja xpojkpimee'kxyindi? ² ¿Ka'ap jade'en pyaadyi! Pø tøxi adøm nmajtstuujujtyindi ja pøkyun'unin; ¿jøts sudso adøm jade'en nbøkyun'adøjtsin? ³ ¿Ti ka'ap xnijawidi ja nnøbajtin, ti ja tyijpy? Pø ja'agøjxpxi adøm tø nnøbajtyindi jøts nmøøt'ejtindit ja nwindson'ajtim Jesucristo, jøts yiknijawit jøts ku adøm ja nbøky ja tø xmi'o'jka'andi. ⁴ Møøt adøm ja Cristo ñamyayi nnaaxøjka'andi jøts ja møøt n'øøky'ijtyindi, jøts ku ja yjujkyijky xemikøjxp jøts adøm nayide'en nbajtma'an ja jemchinaa'yin midi ixyam jøts midi xemikøjxp, sam ja Dios Teety ja tyukmimadaajkøø ja o'jkin, jøts ja myøk'ajtin myøøyi, jøts ja yjujkyijky xemikøjxp. Nay ja'ats idø'on yiktump ku ja nøbajtin yikpaaty.

⁵ Pøni tødamts adøm ja Cristo nmøøt'ø'jkyim nayide'en sam ja o'jkin ja tø tpaaty, nmøøt'ijtyindipts adøm ja', jøts ku ja yjujkyijky xemikøjxp jøts nayide'ents adøm ja nmøøtjujkyøjkma'andi. ⁶ Nnija'windipts adøm sa jaty tø njaa'y'ajtyindi, jøts ja' ja Cristo myi'o'jk jam kruskøjxp, jøts adøm ja nbøky xniwaajchim jade'engøjxp ku ja y'ø'jky, jøts ja ka'ap x'ukmimadaajkna'am, jøts ja ka'ap jade'en n'ukmidu'una'ant sa jaa'y ja wyindsøn tmiduñ, jade'en ja pøky ñamyayi yikmiduñ. ⁷ Pønts tø y'øøky, tøts ja pøky ja ñiwaajtsniyi. ⁸ Pøni nmøøt'ijtyindip ja Cristo øy ja møøt nja'ø'jkyim, njøp'ijxy'ajtyindipts

ja' jøts ku ja møøt njujky'ajtindit xemikøjxp, ⁹ pø nnija'windipxi jøts ku ja Cristo tø yjukpyiky xemikøjxp, nijuuni kya'uk'oo'knit, nijuuni kya'ukmimadaajknijit ja o'jkin. ¹⁰ Tuk'ojkyi ja ja'ayi ttuku'o'jkiyiñ amuum ja pøky; jøts ja icyam xemikøjxp yjuky'aty amuum ja Dios Teety tmøøt'ity. ¹¹ Jøts nayide'ents meets idø'ønmidi, øøky tigøy ndejint mnabyikta'agiyidit jøts ja pøky jade'en xkayikmøj'attit, wijy kejy meets ne'egi mnabyikta'agiyidit ku ja Dios yja' xpaduujnidit, ja'agøjxp ku ja nwindson'ajtim Jesucristo xmøøt'atti.

¹² Paty ka'ap mbaat'atyidi jøts nugo xyikmajada'aktit ja mbøky ja mga'øwynmaa'ñ, øy sa mduktunwa'añidi pøni sa ja ttsøky. ¹³ Kidi mnagyøkykyidi ma pøky, jøts ja kidi mduktuñidi ja ka'øy'ajtin. Ne'egi amuum mnayoxidit ma Dios, jøts ja mduktunidit tum ja øy'ajtin. Ka'ap meets ja pøky xukmijuky'ajtnit, jabi tøxi meets ndejint tø m'ats'øøky, jøts tø mjukpyøkti jadigojk, jøts ja juky'ajtin tø xpaatti midi xemikøjxp. ¹⁴ Jøts ja pøky ka'ap meets ja m'ukmimajadaajknijit, pø kidi ja Moisés kyutujkipxi meets mnitanaajyip, ja Diosxi meets ja kyunuu'kxin mdanitanaajyip.

Ja ejxpajt madya'aky ku ja jaa'y ja wyindsøn aguwanì tmiduñ

¹⁵ ¿Sudsots adøm? ¿Jaaktyimbyøkyun'adøjtsindip adøm ja'agøjxp ku ja Dios xanitanaa'yindi ja y'øy'ajtin, ku adøm ja kutujk ka'ap xiidyu'uñidi? ¹⁶ Jøts mnija'widipts wa'ats ku tu'uk ja windsøn x'ukmidundøkidit, tu'ugyits ja xwindsøn'attit jøts ja' kuwani mmimado'odip, pø ja'axi wyinaty mdumbi'ajtidip. Nayide'ents idø'øn tpaaty ndejint ku ja pøky xmimado'odit, ja' meets idø'øn ndejint windsønbøjknip øy ja yjayik'øøky yjatyiktigøy, uk nayide'ents ku tu'ugyi ja Dios xmimado'odit jøts jade'en xu'undit sa ja ttsøky. ¹⁷ Janch møy ja Dios ku ja y'ixpøjkin xpaduujnidi midi tø myiktagidøkidi, jøts ja pøkytunk tø xmajtstu'utti midi y'ijty niwa'añ myik'ejtniyidip. ¹⁸ Tøts ja pøky mniwa'achidi ku ja ka'ap m'uknimajadaajknijidi, jøts tø xpatwa'jkidi ja øy'ajtin midi ja Dios yja'ajtpy. ¹⁹ Jade'en ndukmadowdi sa ø najtsjawì xmadodø'ødit, jøts nayide'en xnadyamiyoxidit ja Dios. Sam y'ijty mnagyøkykyidi amuum jøts xundi ja ka'øy'ajtin ja axøøk'ajtin, nayide'ents idø'øn amuum ja Dios xnadyamiyoxidit, jøts xuujnidit ja y'øy'ajtin jøts amuum xmøøt'ettit ja Dios, tu'ugyi xagødøkidit ja mdsinaa'yin.

²⁰ Ku meets ja pøky y'ijty mganiwa'achinim, ka' meets y'ijty xuujni ja Dios yja', ja tiy'ajtin øy'ajtin; ²¹ jøts ¿ti jade'en tø xpøkti? Mdatsø'ødyundip ja icyam jadigojk, pø ja'ayixi ja yajkpy ja o'jkin tigø'øyin. ²² Kuts tø mniwa'achidi ja pøky jøts ja Dios y'øy'ajtin tyiy'ajtin tø xpadøjkiyidi, yø' tiy myiktu'undip, yø' mmo'ojidip sudso xmøøt'ettit sudso xmidu'undit amuum ja Dios, jøts xpaattit x'ejxtit ja juky'ajtin xemikøjxp. ²³ Ja o'jkin tigø'øyin, ja' ja pøky ja'ayi yajkpy. Kuts ja Dios møøt, ja juky'ajtin ja Dios xamay'ajtimp midi xemikøjxp yikpatp, ku møøt n'ejtin ja nwindson'ajtim Jesucristo.

7

Amajtsk'ajtingøjxp tu'uk ja ejxpajt madya'aky pyidsimy

¹ Mee migu'uktøjkti, meets mnija'wip sa ja kutujk wya'añ, jøts mnija'wip jøts ku ja ya ja kutujk tmøøt'aty ja møk'ajtin ku jaa'y jaagya yjuky'attinim. ² Ku n'ukpiktaajkint, ku tu'uk ja tø'øxyøjk y'amajtsk'aty, kutujkøjxpts ja tmøøt'amajtsk'aty ja ñiyaa'y pøni jaakjuky'ajtpnim ja'; kuts ja y'øøky ja ñiyaa'y jøts ja nayide'en ja kutujk niwa'achi, ku y'øøky pøn ja y'ity møøt y'amajtsk'aty. ³ Kuts ja tø'øxy jadu'uk yaa'dyøjk t'adsøy jam ja ñiyaa'y yjajuky'atynim, pøkyts ja tyumpy; kuts ja kyu'øøgyi, niwaajtsip ja kutujk ja', øy ja møøt jadu'uk ja yaa'dyøjk y'amajtskit, jøts ka'ap ja pyøkyi.

⁴ Jade'ents mee migu'uktøjk idø'ønmidi pøni niwine'en ja Cristo mja'atyidi, myikniwa'ats'ajtniyip meets ja Moisés kyutujk, tøxi mee ñamyayi ku'øøky mdañ ku ja pøky tø wyindigøy jøts ja wenkpi xpadøkidi. Ja Cristo meets icyam mja'ajtniyidip pøn jukpyøjk xemikøjxp, ja'agøjxp ja yjajty jøts jade'en'ampy nmidu'unindit ja

Dios. ⁵ Ku adøm y'ijty pøky y'agujkp ndsinaa'yimnimdi, jøts ja kutujk ja' ja wya'añ jøts ja tyikjinaxy adøm ja nga'øwysinmaa'ñ, ku ja ngabadu'uñindi jøts ja niti nitso'ok'ajtin xkadukjöp'ijxyindi. ⁶ Ixyamts tø xniwaajchim ja'abi kutujk, tø ja ñamyayi ngu'ø'jkyim jøts ja tø xuk'ixmajchim ja myøk'ajtin; jøts adøm tø n'awa'atspidsø'omyindi, tu'ugyits nmidu'unint ja Dios jøts ja y'Espíritu Santo ja jemy juky'ajtin xukmi'ejtint midi xemikøjxp, jøts ka'ap ja'abi møjaa'gyutujkin x'uk'ana'amnandit midi y'ijty nbadu'uñindip.

Ja pøky midi xmi'ejtp

⁷ ¿Wa'aním jøts ku ja kutujk pyøkyi? ¡Ka'ap! Ku jeexyip ja kutujk kya'ity, ka' øts jeexyip nnijawí ti pøky'ajtp, ku ja jeexyip tkanigajpxy kudam ja pyøkyi ku ja nmigu'uk pyikta'aky njanchpøkwa'anxant. ⁸ Ja'agøjxpts ja pøky tø myøjtøki jøts ja myøj'aty. Pøni sã ja kutujk yja'ane'emy jade'ents øts ja nnijawí midi'ibi ka'øý, jøts øts ja jinaxy nduñ sam øts y'ijty nga'adi'ich ku øts ja kutujk nganijawinim. Ku ja kutujk kya'ity, ka'ats ø nnijawí midi pøky. ⁹ Tø øts jade'en njaty ku ja kutujk ka' nnijawinim, tøp ø njawí n'adi'ich, ka' njawí ja pøky. Kuts ø tø nnijawí sã kutujk y'ane'emy, jøts øts ja nbøky njawí yjaaktyimyajadak'adi'ich, jøts øts ja kawindem paadyim xuk'ijxy ja øy'ajtin ja kunuu'kxin. ¹⁰ Wimbet øts ja nduñ sã ja yja'ane'emy, midi'ibik øts idø'on xukpaatp ja øy'ajtin, tø øts ja ne'egi xyikpøkpyety. ¹¹ Ja pøky ne'egi nankmyøjtøjkiyip pøni sã ja kutujk y'ane'emy jøts øts ja win'øø'nin tø xmø'øý. Nay ja kutujk øts jadigojk xanikajpxp ja o'jkin tigø'øýin.

¹² Ja kutujk, øy ja', jøts øy wa'ats yikutuky nayide'en, øy'ajtingøjxp tiy'ajtingøjxp yikutuky. ¹³ Jøts pøni øy tam ja kutujk, ¿sudsots øts ja xpayø'øý, jøts øts ja ñamyayi xuk'ejnini ja o'jkin tigø'øýin? Jøts øy ja kutujk, ja pøky øts jade'en xyik'ejtnip øøky tigøý, ka' ti jøp'ejxin, jøts øts ja jade'en xuknijawí jøts ku ja' pyøkyi; tamibøki midi øy, jøts øts ja kutujk jade'en xuknijawí jøts ku ja pøky ni sudso'ampy kya'øýi.

¹⁴ Jøts nnija'windip adøm jøts ku ja kutujk Dios tja'aji. Jøts pojkpítumbijaa'y'ajtp øts, jade'en'ampy øts ja pøky xmimajada'aky. ¹⁵ Ka' øts nja'gyuki pø ti ø xjajtp, tum jiwimbejts ø nduñ, kuts ja njatunwa'añ midi øy, ja kya'øýbi øts ne'egi xmimajada'akp midi njagatunwampy. ¹⁶ Kuts øts ja nduñ ja ka'øýbi midi njagawampy, jade'engøjxp nnijawí ku ja kutujk y'øýi, ja'abi kutujk ka'axi tyikutuky jøts ja'abi ndu'unint. ¹⁷ Kidi øtsip ja kø'øm ñamyayi jade'en ndyimyjatumpy, ja pøky jade'en adøtsp midi ø nnikøjxp'ajtpy. ¹⁸ Nnija'wip øts sã jaa'y'ajtin yikjagyepy, niwine'en ja ka'øý'ajtin kyayikmøødi; njatsøky'ajtpy øts jøts ja øybi ndu'unt, ni ka'apts øts ja nduñ. ¹⁹ Ka' øts ja øybi tsujpi nduñ midi njatsøjkpy, tum ja ka'øýbi ø ndun'adichpy midi njagatunwampy. ²⁰ Kuts øts idø'on ja nduñ jade'en midi ø ngatsøjkpy, ka'ap øts ja kø'øm ndsøkyøjxp nduñ, pø ja pøkxyi øts ja jade'en xuktump midi ø nnikøjxp'ajtpy.

²¹ Jade'en njaty ngubety, ku øts ja njatunwa'añ midi øy midi tsuj jøts tum ja ka'øýbi ø ndumpy. ²² Wamp øts n'am njotp jøts ku øts ndsojki ja Dios kyutujk; ²³ kuts ø kø'øm nnay'ijxyi, jøts ø njawí jøts ku ja jaa'y'ajtin ka'ap jade'en ttsøky sam ø njawinmay, ja pøkyts idø'on xuktump midi ø nnikøjxp'ajtpy, jøts ja' ø xkamajstutp jøts ja øybi ndu'unt.

²⁴⁻²⁵ Ja Dios øts ndagødøjkp ja nwinmaa'yin jøts øts nbaduujnit ja kyutujk, jøts øts ja njaa'y'ajtin ja' ja y'adsinaapy ja pøkyu'unin, ja' ja mimajadaajkip. ¡Ti ø njanch'ayøøý! ¿Pøn øts ja pøky xuknitso'ok'atp midi øts jam nikøjxp'ajtpy, midi øts xyik'ookwamp xyiktigøøwyamp? Kuuyi Dios amuum, nwindson'ajtim Jesucristo køjxp yikpaaty ja nitso'ok'ajtin ja'ayi. ¡Janch møj ja Dios!

8

Ja juky'ajtin midi Dios xmøø'yimp

¹ Pøn tmøø'ejtíp ja Jesucristo ka'ap Dios Teety ja mibaat tyaguwaníyidit jøts ja y'ayo'odit, kumi ka'ap ja t'ukyikmøj t'ukyikmøjtøjkiñidi ja pøky. ² Ja Espíritu Santo

midi tyajkp ja jujky'ajtin xemikøjxp ku nmøøt'ejtint ja nwindson'ajtim Jesucristo, ja' øts ja pøky tø xukniwā'ach midi øts øøky tigøy tø y'ity xyik'ejtnip. ³ Jade'en'ampy ja kutujk y'ijty kyamajada'aky ku adøm n'ambojkpitu'uñim nadsaachpøjkpitu'uñim. Tøts ja Dios Teety tkexy ja y'U'nk, jøts ja nayide'en tnanky'ijxyi sam ja jaa'yin, jøts ja tku'o'jki ja pøky. Xjats ja tømimajada'aky jade'en'ampy ja pøky, jøts adøm ja ka'ap x'ukmimajadaajkna'am. ⁴ Ja'agøjxp ja jade'en tøm ttuñ jøts adøm ja kyutujk ja wā'ats nbaduujna'am, pø ja'ayixi adøm ja Espíritu Santo yja' nbawinmaaajyam, jøts kidi kø'øm winmaa'ñip adøm nyikmajadaajkyim.

⁵ Pøn kanīwaaajtsipnim ja pøky, ja' yjotmay'ajttip sa kø'øm wyinmaydi; pønts tpaduujnidip ja Espíritu Santo yja', nay Diosts chøky'ajtin ja ja'ayi pyaduujnidip. ⁶ Jøts ku jade'en njotmay'ajtin sa kø'øm nwinmaa'yin, yø yjade'embi dø'øn yikwindigøøpy; kuts njotmay'ajtin ja Dios yja', ja'ats xukpaajtimp ja jujky'ajtin xemikøjxp, jøts ja øy'ajtin midi Dios yajkpy. ⁷ Pøn ja kø'øm winmaa'ñ tyiktundip sa kø'øm wyinmaydi, ja Dios ja jade'en myidsepøjktip kumi ka'ap Dios kyutujk ja ttsojkidi, jøts nika'ats tjajtmidi sa tpadu'undit. ⁸ Paty idø'øn pøn ja'ayi ttundip ja kyø'ømwinmaa'ñ midi pøkmyøøt, ka'ap Dios ja mibaat jade'en twindsø'øgidit.

⁹ Jøts meets, kumi ka'ap meets x'ukyiktuni ja mgø'ømwinmaa'ñ, ja Diosts meets ja y'Espíritu Santo mjagyajpip, ja' mee myikjujky'ajtniyidi, pø ixamxi ja xnikøjxp'ajtnidi. Pønts tkayiktuujnip ja Espíritu Santo, ka'ap Cristo ja yja'atyi nayide'en. ¹⁰ Pøni mmøøt'ejtidipts meets ja Cristo, øøky windigøyts ja pøky ñamyayi ñøjkxni møøt ja mnine'kxti, jøts ja anmija'win ne'egi yjujky'aty ja'agøjxp ku ja Dios tøm mgupikyidi. ¹¹ Pøni mjanchmøøt'ajtidip ja Dios Espíritu Santo, midi ja nwindson'ajtim Jesucristo ojs jadigojk xemikøjxp yikjujkyiky, nay ja Diosts meets ja mnine'kx kø'øm yikjujkyøkip, jøts jadigojk xemikøjxp mjujky'attit.

¹² Jøts xpaat'ajtindip adøm, migu'uktøjk, jøts ka'ap njujky'ajtindit pøky agujkpy midi ttuktump ja kø'øm winmaa'ñ. ¹³ Pøni mdunwandip ja jade'en sa ja pøkytu'unin, øøky mee m'ejtni, kudigøy mee m'ejtni; pøni m'ajot'ajtidip ja Dios Espíritu Santo jøts ja xukmimajada'akti ja mbøky, mjujky'atpts meets jade'en xemikøjxp.

¹⁴ Ja' ja Dios Teety y'u'nk'ajtpy pøn ja Espíritu Santo ja tyukpudøjkp jøts ja wyinmaa'ñ ja tyiktøji tyiktudaajki. ¹⁵ Ku myikmo'odi ja Espíritu Santo, kidi ja'ajip ja myiktanimøø'yidip jøts meets tsø'øgi jawi myik'etidit, pø ja Espíritu Santoxi meets ja Dios mmøøjyidip jøts m'u'nk'atidit ja Dios, jøts ja' idø'øn xyikwā'anindip amgujk jotkujk ku adøm ja ndeety'ajtyim. ¹⁶ Ja'abi Espíritu Santo majadaakp, jøts adøm ja tu'uk amumjoojt xukjanchja'want jøts ku adøm ja Dios x'u'nk'ajtyindi. ¹⁷ Ja' adøm xja'ajtindip, paty adøm nayide'en ja Dios xmø'øyindit ja jujky'ajtin midi ja tøm twanda'aky, midi ja xmøøpwyā'anindip. Midi ja Cristo yikmøøpy, nay ja'ats adøm yikmø'øyindip. Pøni ngupøjkyindip adøm ja ayo'on sa ja tøm y'ayøy, winets adøm ja nay ja'abi øy'ajtin xukpaajtint midi ja yikmøøy.

¹⁸ Kidi nayide'enip ja' sa adøm ixyam ja ayo'on nbaajtyindi, ka'ap ja jade'en tmi'abaaty midi dø'øn Dios kyunuu'kxin'ajtpy, midi dø'øn jaanim nbaajtindip n'ejxindip. ¹⁹ Tuki'iyi midi ja Dios tøm tyikøjy, yjanchja'awejnip ja nayide'en juuninim yja'att ja et ja xøøw ku ja Dios tyiknigaxø'økt pøn jaty ja y'u'ngip, pøn jaty ja yja'ajtpy. ²⁰ Nayide'en amuum ja naxwii'ñit tøm y'ayo'ombaaty Adán pyøkyøjxp, kidi kyø'ømsojkingøjxp ja naxwii'ñit ja jade'en yjaty, ja Dios ja jade'en tøm tyanibiktaagiyi; yikmøøpyts ja jøp'ijxy'ajtin jøts ja øy juuni ja øy'ajtin jadigojk tpaatt, ²¹ jøts ja Dios ja yiktigajtsmiyit amuum, nay ja'abi øy'ajtin tpaatt midi ja jaa'y yikmo'odip pøn jaty ja Dios u'nk'ajtidip, jøts ja ñiwa'adsit nayide'en ku ja tøm pyøkyety, ku ja tøm wyindigøy. ²² Jade'en ixyam yjaty ja naxwii'ñit midi ja Dios tøm tyik'øyi, sam tu'uk ja tøm øxyøjk y'amnipiky chaachnipiky ja y'u'nk ku kye'exy, amuum tmigii'pxy tmibø'øty. ²³ Jøts kidi ja naxwii'ñip jade'en ja'ayi tyimyjajtp, nayide'en adøm njajtma'an ku adøm tøm ayo'on nbaajtyim, øy adøm ja Dios ja y'Espíritu Santo tøm

xmø'øyim ejxpajt'ajtin, ja'agøjxp ku xjaaktukpaatwa'añimnindi midi paat'ajtyidip pøn jaty ja Dios u'nk'ajtidip. Njantyimyjöp'ijxy'ajtyindip adøm, jøts ku øy juuni yja'att ja xøøw ku adøm ja Dios amuum xja'ajtindit ejxim tu'uk ja u'nkteedyin, jøts ja xyiktigajtsa'ant ja nne'kx. ²⁴ Janchja'wingøjxp ja'abi nitsoojkin yikpaaty; kuts ja janchja'win yikmøøt'aty, ja' idø'øn tyijpy ku adøm n'awijxyindinim midi ngapaajtyindipnim. Jaa ku ja jeexyip yikmøøt'ajtni, ¿tits idø'øn jaakyik'awexp? ²⁵ Kuts adøm idø'øn jade'en njöp'ijxyindi midi kayikmøø'yindipnim, yiktudakpy ja tsinaa'yin jøts ja winmaa'ñ ja'.

²⁶ Jøts nay ja Dios Espíritu Santo adøm xpudøjkamp ma nayja'wiyam nduu'dujkyim, ku niti winmaa'ñ, niti aaw, niti ayuujk ngajagyejpyindi, jøts ka' ja winmaa'ñ nbaajtyindi sudso nmøøtmadyaajkind ja Diosu'nk. Nay Espíritu Santots kø'øm ja Dios Teety t'amidoop ja pudøjkin sa nduu'baajtint nduu'ejxint, ja'agøjxp ku tjaty sudso øy ja Dios Teety tminuu'kxa'akt. ²⁷ Jøts wa'ats ja Dios Teety xnija'wa'am sa jaty pønjabøn wyinmay, jøts ja ñimadøyi Espíritu Santo sa jaty ja wya'añ ku ja xku'amido'owam sam ja Dios Teety kø'øm ttamidsøky pøn jaty ja yja'ajtpy.

Cristo køjxp nmajadaajkyindi

²⁸ Nnija'windipts ku ndsojkindit ja Dios, yajkpts ja pudøjkin ja' pøni ma jaty sagasa njajtyindi, jøts jade'en tyik'øpyidsimy pøn jaty ja tøm'ixy, sa ja jawyeen tøm'ixy tøm'ixy tøm'ixy kø'øm. ²⁹ Tøm ja Dios Teety twi'ixy patki'jyi ja yjaa'y jøts ja tøm'ixy. Tøm'ixy tøm'ixy tøm'ixy jøts yjaa'y'attit nayide'en sa ja Dios U'nk yjaa'y'aty, pøn tøm'ixy'ajtp ja jaa'y pøn jaty ja Dios Teety ja'ajtidip, tum uch tum migu'uk ja tjawi niduki'iyi. ³⁰ Pøn ja Dios tøm'ixy tøm'ixy jade'en patki'jyi, jøts ja tøm'ixy; kuts ja tøm'ixy, jøts ja tøm'ixy, winets ja nayide'en tøm'ixy'adsøwi ja øy'ajtin amuum.

³¹ ¿Sats adøm ja nwa'anin ndejint? Pø amuumxi adøm ja Dios møøt n'ijtyindi, ¿pønts adøm xnimyimajadaajkind jade'en? ³² Ka'ap ja Dios t'ama'at'ajty ja y'U'nk, kyøyajk ja' jøts ja y'ookt adøm nbøkyøjxp; ¿sudso døm'øn ja ndejint adøm xkamøøgyøjxint tuki'iyi midi myøøt'ajtpy, pøni tødam ja kyø'øm U'nk jawyeen tøm'ixy xanigøjxyim? ¿Tiku døm'øn ja ndejint tkayakt? ³³ Øy pøn tjan'øøniwya'añ ja jaa'y pøn ja Dios tøm'ixy'ajtyidi, pø Diosxi ja kø'øm tøm'ixy'ajtyidi, ³⁴ ¿pønts ja mibaat nidyanigutujk'atidip jøts ja tøm'ixy'ajtyidi ja ayo'on? Pø ja Cristoxi ja tøm'ixy'ajtyidi, jøts nay ja'ats tøm'ixy'ajtyidi xemikøjxp, Dios Teetyts ja amuum møøt y'ity, jøts ja' adøm jam xni'amido'owamp pøni sa ndyimyajtyindi ndyimgyubejtyindi. ³⁵ Ku xpa'ayø'øyim ja Cristo, ¿pøn adøm ja xnyidukmajtstuujtimp ja pya'ayo'owin? Nipøn adøm ja xkadukmajtstuujtint, wan tjati'ayo'oni, øy njajotmay'ø'jkyim, øy njayikjemdu'uñindi njayiktedu'uñindi, wan yuu tja'ity, uk ku wet naamy xka'ejtxindi, uk ku tsep, uk o'jkin tøm'ixy'ajtyidi yjayikpaaty. ³⁶ Pø yide'enxi jap nøkyijxpy wya'añ:

Ejtp øøts ja jaa'y xyik'ookwa'añ ja'agøjxp ku øø nbaduujni ja mja';
jade'en øøts nyiktuñ sa jiyujk sa borreek y'ookwa'añ.

³⁷ Øy adøm jade'en njajajtyindi, ne'egits adøm ja jinaxy ndyimyimajadaajkyindi ja' myøk'ajtingøjxp pøn ja pya'ayo'owin tøm'ixy'ajtyidi. ³⁸ Jade'ents ø nwa'añ jøts ku niti nipøn xkadukmajtstuujtint mibaat ja Dios pya'ayo'owin, nja'ø'jkyindi njadigø'øyindi, uk njadyimyajtyidi. Ni ja ankilis ja xkadukmajtstuujtint uk yjayikutujk'ajtyidi, yjadyimyajtyidi pøn jap tsajpjøtpy uk yjamajidi. Ni ja xøøw ni ja jumøjt midi ixyam yø'øpy, uk midi memp kidakpnim, nija' adøm ja xkadukmajtstuujtint. ³⁹ Wan ti tkøjxpi, uk wan ti tkøjki, wine'en Dios tøm'ixy'ajtyidi niti kyamay yjade'embj jøts adøm nmajtstuujtint ja Dios pya'ayo'owin, midi ja tøm'ixy'ajtyidi nwindson'ajtim Jesucristo køjxp.

9

Dios ja Israelit jaa'y tøm'ixy'ajtyidi

¹ Tiy janch ø ngajpxy, pø ja Cristoxi øts njanchja'wip, ka'ap ø ndaabyaaty; ja Dios øts y'Espíritu Santo wa'ats xuknija'wip jøts ku øts tiy'ajtingøjxp ngajpxy. ² Janch jotmay'oo'kp øts, ndyimchaachkyuwinnma'ayip øts kajaa, ³ jøts wamp øts, øy meets ayo'on patki'py ndyimgyu'ettit jøts ja Cristo ngamøøt'etnit pøni tsojkip jade'en, nugo ku øts nmigu'uktøjk n'ødyuñ jøts xpaattit ja Dios, wine'en ndukojpk'ajtyindi. ⁴ Ja Israelxi ja tyee'ty'apidip, jøts ja' Dios tø y'a'ejxiyidi jøts yjagyepyidi. Jøts ojts ja kø'øm ja Dios kyunuu'kxin t'ejxiyidi tnija'wiyidi, jøts ja' ja møøjyidøø ja tiy'ajtin sudso ja jadigojk ñitaniyidit ja Dios. Jøts nay ja' ja ttagødøjkiyidøø ja Moisés kyutujk, jøts ja windsø'jkin midi ja tyu'undip jam ma ja chaptøjkti. Jøts nay ja' ja Dios ttukmidajnidøø ja wyanda'aky jøts ku ja y'ødyunidit. ⁵ Tu'ugyi aats kugoj ja'adi pøn jaty israelit jaa'dyi; jøts nay ja' ja tyee'ty'apidip pøn adøm ndeety'ap'ajtyindip, nayide'ents ja Cristo, pø adømxi ja' ñamyayi njaa'y, jøts køjy ja'ani ku ja amuum tñitanit ti jaty ejtp naxwiiñ, pø Diosxi ja', windsø'øgi winjawi ja y'ity xemikøjxp. Jade'en idø'on ja y'ejxi. ⁶⁻⁷ Kidits nwa'añim jøts ku ja Dios tkayik'adukñim ja wyanda'aky midi ja møjaa'y Israel yiktaniwandaajkøø wine'en y'ap y'ok ja tø ñajtska'axidi. Ka'ap ja Dios ja'ayi tø twi'ixy ja'ayi pøn ja Abraham y'apteety'ajtip; pø yide'enxi Dios ja wyinaty tø ñii'mxyi: “Nayi mets mnigojpk'ajtpy ja Isaac y'u'nk y'una'jkti pøni wine'en ja ñajtska'axidi.” ⁸ Jade'ents adøm nnija'wa'am jøts ku Dios ka'ap t'u'nk'aty pøni ma pøn jadu'uk jadu'uk kyugajpi, wan t'israelit jaa'yidi wan tka'israelit jaa'yidi. Ja' dø'on Dios y'u'nk'ajtpy pøn tjøp'ejxtip ja wyandaajkin. ⁹ Pø yide'enxi ja Abraham ja Dios ñimaajyøø ku ja Dios wyandaajky: “Tiempì køjxp ø nme'ent, u'nkpaatp yø mnidø'øxy Sara.”

¹⁰ Jøts kidi ja'ayipts nadyu'ugyi yiktaniwandaajki ku ja y'u'nk ja tpaatt. Jabi nayide'enxi ja Rebeca ja y'una'jk tpaatmaa pøn ja Isaac tyee'ty'ajti, adøm ja ndeety'amøj. ¹¹⁻¹³ Jøts ka'anim ja wyinaty yjaja'atinim, kidyimkya'axtipnim ja wyinaty, ka'anim ja wyinaty yiknijawi sa ja y'adø'øtstit øy ka'øy, jøts ja Rebeca ja Dios ojts ñii'mxyiyi: “Ja myøjpi tmidu'ump ja myutskpi.” Nayide'ents ja møøt tuknax tijy ku wya'añ ja Dios kyajpxy: “Nwinja'wip øts ja Jacob, jøts Esau' ka'.” Xjats ja Dios jade'en xuknija'wa'am jøts ku ja kø'øm twi'ixy kyø'ømdsojkingøjxp pøni pøn ja y'a'ejxip. Ka' tmøjpiktaajkiyi ja y'ødyu'unin kya'ødyu'unin.

¹⁴ ¿Tits adøm ñikyajpximp? ¿Ti ja adøm nwa'anint jøts ku Dios ka' tyiy'adi'ich? ;Pø ka'axi! ¹⁵ Pø yide'enxi ja Moisés yiknimaay: “N'ayo'ejxp øts ja' pøni pøn ø kø'øm n'ayo'ejxwampy, pøni pøn ø kø'øm nba'ayoowampy.” ¹⁶ Jade'en'ampyts ka' chøkyi jøts adøm ngø'ømwinmaa'ñ ndamajadaajkint, pø ja Diosxi kø'øm x'ayo'ejxindipnim. ¹⁷ Pø patyxi ja Dios kyajpxy wya'añ ku Dios tnøjmi ja jaa'y pøn windsøn'ajtp jam Egipto: “Ja'agøjxp møj windsøn tø nyikjaty jøts øts ja nmøk'ajtin nyikwingaxi'iky ku mets nmimajada'aky, jøts øts nxøøw o madsoo yiknijawit.” ¹⁸ Xjats idø'on jade'en ja Dios t'ayo'ixy pøni pøn ja y'ayo'ejxwampy, jøts ja twinmaa'mbyiky pøni pøn ja kyayik-madogukiwyampy.

¹⁹ Winets meets idø'on x'adsojimbett: “Pøni janch ku yjade'eni, ¿tigøjxp Dios tpøky'ixy ja jaa'y? Jøts ¿pønts mibaat t'ukwindso'op ja Dios?” ²⁰ Jøts jaa'yts adøm, jøts ¿jaaktymbyøn meets ku meets Dios yja' xkagupøjkit? ¿Ti ja ja tu'lts tñimaañit ja ñijaa'y pøn ja tø yik'øyyi: “¿Tiku øts jade'en tø xyik'øyi?” ²¹ Pø ja tu'ltsna'abixi kø'øm pajtip pøni sa ja kø'øm tyik'øyiwyaa'ñ ja na'aknaajx; øy ja tyik'øyit ja tu'lts tu'uk midi øy midi tsuj jøts ja tu'ugyi ttanibiktaagi ti ja wya'ant, uk øyts ja nay ja'abi naajx tna'at jøts ja tyik'øyit jadu'uk ja tu'lts midi øy ti ñiwyaa'ant.

²² Ku ja Dios tmidani jøts tmiduda'aky'aty ja jaa'y pøn ja tø yikjotma'adyi, pøn tyimyjapaajtniyidip jøts y'ayo'odit uk jøts ja tyimgyudigø'ødyit, ti ja kamaa'niyip, ixè ja ayo'on ja ttuktagida'aky jøts ja myøk'ajtin ja jade'en tñanky'ejxit. ²³ Ots ja Dios jade'en ttuun, ka'ats adøm ja jade'en tø xuu'ñim, ja'agøjxp ku adøm ja xpa'ayø'øyindi jøts tñanky'ijxy; jade'en mabaat ja tjagyepy ja myøk'ajtin, jøts ja t'ayo'ijxy pøn ja patki'jyip tø

twi'ixy jøts ja ttukpaatwa'añ ja y'øy'ajtin. ²⁴ Tø ja Dios kø'øm xwi'ijxyindi, ku ja winaagin twi'ijxy ja israelit jaa'y, jøts nayide'en winaagin pøn ka'israelit jaa'dyi. ²⁵ Sam ja Dios ja kyajpxy ttamigaxiyi'ñ ja kyugajpxy Oseas, ku ja wyaañ yide'en:

Pøn øts y'ity ngaja'ajtpy, ja' øts nja'bøkp,
pøn øts y'ity ngatsojktip, ja'ats ø ndsojktip.

²⁶ Nay jam et ja xemijukpyi Dios ja kø'øm yja'bøkidit ma ja yiknimaadyøø: “Meets, ka' mee nja'aty.”

²⁷ Kuts ja israelit jaa'dyi, pø yide'enxi ja kugajpxy Isaías wyaañ: “Øy ja Israel mabaat ja y'u'nk y'una'jk yjamøjidi yjamayidi sam nøø'abu' myayin, niwinaagints ja'adi pøn nitso'ok'attip, ²⁸ jabi ka'pxy ja Dios ja y'ayuujk tpadu'unt sa ja tø wya'añ, ku ja tyiknaxkida'akt adsu'jky ja tïdyu'unin ya naxwiiñ.” ²⁹ Sam ja Isaías wyinaty jekyip tø wya'añ:

Ku ja Dios jeexyip tø tkayiknitso'ok'aty winaagin ja aats ja kugoj midi yikojpk'ajtp, tø adøm jeexyip jade'en njajtna'am sa Sodomit kajp sa Gomorrit kajp ku ja tø kyudigøøgyøjxti.

Sa israelit jaa'y tka'øyjawidi ja øgyajpxy ja ømyadya'aky

³⁰ ¿Tits adøm ngajpxindip? Yjanchja'wingøjpxxi Dios ja tø kyupikyidi pøn ka'israelit jaa'dyi, yam ja y'ity tkajotmay'atti sa Dios ja kyupøkidit jøts ja ne'egi tø kyupikyidi. ³¹ Jøts ja israelit jaa'y, pøn ja kutujk tpadundip jøts ja jeexyip ja' ja Dios tyagupikyidi, ka'ap ja ne'egi yikupøkti ja'agøjxp ku ja kutujk ka'pxy tkabadundi. ³² Ka'ap ja twinmaydi jøts ku Dios ja tyagupøkidit ja janchja'win, ja' Dios ja tijy tagupøkidip ti jaty ja tyundip. Ja'ayi ja tyamøjti, ja'agøjxpts winguwopi jøpkuwopi tmijatti ku ja nwindson'ajtim tø myiñ.

³³ Jade'en yjatti sam yiknigajpxy ma jap nøkyixpy wya'añ yide'en:

Nyikaxø'økp øts jam Jerusalén tu'uk midi ja jaa'y nay'adsepi yjawip jøts ka'ap ja pøn myayit;

pøni pøn ja tjanchja'wip, ka'ap ja windigøy yjatt.

10

¹ Møk øts, migu'uktøjk, ja tsojkin njagyepy jøts øts ja Dios n'ajot'aty, jøts ø n'amidøy nbøktsøy jøts ja israelit jaa'y nitso'ok'attit. ² Jade'en ø nwa'añ jøts ku ja tjatsojkti ja Dios, jade'en'ampy ku ka'ap tjatti. ³ Ka' tñijawidi sudso Dios tkupiky jaa'y; kyø'ømgutujk ja' yiktundip, ja' ja tijy tagupøkidip ja Dios, ni tkamøjpikta'akti ja' midi Dios ja tagupøkidip. ⁴ Pø ja'agøjpxxi ja Moisés kyutujk kya'uktuni, pø ixaanixi ja Cristo jøts tum ja'ats ja Dios kyupijky pøn ja tjanchja'wip.

⁵ Jøts ku Dios ja kutujk xagupøjkint, pø yide'enxi ja Moisés ja tjaay: “Pøni pøn tpadunwamp ja kutujk, ka'pxy tpadu'unt winets yikjujky'attit ma Dios.” ⁶ Jøts ku Dios xkupøjkin janchja'wingøjxp, yide'enxi ja wya'añ: “Kidi mwa'andi: ¿Pøndam nøjkxp tsajpjøtpy? —jøts ja Cristo mye'ent—; ⁷ jøts ni mgawa'andit: ¿Pøn jap nøjkxp ma ja o'jkin?” —jøts yjujkyøkt ja Cristo xemikøjxp. ⁸ Pø ka'axi yjade'eni, pø yide'enxi ja wya'añ: “Ka'ap yjagami ja nitso'ok'ajtin, ixa ja xmøødidi wingon”, ku xjanchjawidit sa ja øgyajpxy ømyadya'aky mduknijawiyidi midi øø ngajpxwa'kxpy. ⁹ Ku mwa'andit jøts ku ja Jesús ja' nwindson'ajtin'ajtyindip, jøts xjanchjawidit amumjoojt jøts ku Dios Teety ja tø yikjujkyiky xemikøjxp jadigojk jap oo'kpi y'agujky, winets xpaattit ja nitso'ok'ajtin. ¹⁰ Ja' ja Dios xagupøjkimp ku ja amuum njanchja'want, jøts ku n'am njotp pyidsø'ømint ja ayuujk, jøts nwa'anint jøts ku ja Jesucristo ja' nwindson'ajtim'ajtyindip, ja' xyiknitso'ok'ajtindip. ¹¹ Pø yide'enxi jap nøkyixpy wya'añ: “Pøni pøn ja tjanchja'wip, ka'ap ja windigøy yjatt.” ¹² Tu'ugyi nwindson'ajtim ja tñitani, wan t'israelitjaa'yidi uk wan ja tka'israelitjaa'yidi; ka'ap ja pøn t'ejxma'aty, myøøpy kyejpxy ja kyunuu'kxin pøni pøn ja t'ajot'ajtp, may'ampy ja tmø'øy. ¹³ Jabi yide'enxi wya'añ ja kyajpxy y'ayuujk: “Pøni pøn amumjoojt ja nitso'ok'ajtin t'amidoop nwindson'ajtingøjxp, ja'ats nitso'ok'attip.”

14 Kuts ja pøn tkajanchjāwidinim, ¿sudots ja t'amidojīdit ja kyunuu'kxin? ¿Sudso ja tniyjanchjāwidit ku ja jeexyīp kyayiktukmadowdinim pōni pøn ja', ku jeexyīp kya'ity pøn ja nidyukmadowidip ja øgyajpxy ja ømyadya'aky? 15 Pønts tkajpxwā'kxp ja øgyajpxy ja ømyadya'aky, ¿sudso ja jeexyīp tni kyajpxwā'kxti ja øgyajpxy ja ømyadya'aky ku Dios ja jeexyīp kyakexyīdi? Pø patyxi jap nøkyijxpy wyā'añ: “iNdaxondaajkimp ja jaa'y pøn tkajpxwā'kxp ja Dios y'øgyajpxy y'ømyadya'aky midi xukmado'owimp ja øy'ajtin ja tuda'aky'ajtin!”

16 Ka'apts jaa'y niduki'iyi tmøjpikta'akti ja øgyajpxy ja ømyadya'aky. Jade'en ja ttundi sa ja kugajpxy Isaías tni gajpxy ku ja wyā'añ: “Dios Teety, ¿pøn ja m'øgyajpxy ja m'ømyadya'aky yjawi tø t'ukjanchjāwi?” 17 Winet ja janchjā'win yikjagyepy ku ja tø nmadø'øyim jawyeen ja øgyajpxy ja ømyadya'aky midi ja Cristo nigajpxip.

18 Ti kuts ø nyiktø'øt, jøts ø nwa'ant: ¿Wan ndejint tø xkamadowdi ja øgyajpxy ja ømyadya'aky? iPø tøxi xjamadowdi! Jabi ja'agøjpxxi jap nøkyijxpy yide'en wyā'añ:

Tø ja øy madsoo yikmadowdi pøn ja tø tkajpxwā'kxti, tø ja øgyajpxy ja ømyadya'aky øy madsoo yjā'aty yā naxwiiiñ.

19 Uk nwa'ants øts inet: ¿Wan Israelit kajp ndejint ti tkanijawidi? Jøts tøts ja Moisés ja Dios tyuknigajpxyi ku ja wyā'añ:

Mdami'ama'at'atp meets ja wenk jaa'y ja nitso'ok'ajtin pøn kanayide'endi sa meets, pøn tkanija'widip, ja'agøjxp meets ja xami'ambøkt.

20 Jøts ja Isaías ja Dios yjaaktyimykwa'animyī yide'en:

Pøn øts y'ijty xka'ixaadyip, tøts øts ja ne'egi ixyam xpaatti; tø øts ne'egi nnanky'ijxyi pøn øts y'ijty xkanija'widip.

21 Jøts ja Isaías ja Dios yjaakyikwa'añi ku ja tni gajpxy ja israelit jaa'y: “Tø øts kawine'en njawaadsøy ja jaa'dyi pøn kawindiy'oo'ktip, pøn niwine'enin kamadoodip.”

11

Ja Israelit jaa'y pøn winaagin tpattip ja nitso'ok'ajtin

1 Jøts ø nyiktidyøki: ¿Tø ja Dios tyimyajtstu'uty ja Israelit kajp, ka'ap ja t'ukupøjkni? iPø ka'axi! Israelit jaa'yxi øts kø'øm, tu'ugyi ja Abraham yik'aadsi yikojpxi, ja Benjamín ø ndeety'apip. 2 Jekyīp ja Dios yø tja'biky yø israelit jaa'y; jøts ixyambaat tkamajtstu'uty. ¿Ti ka'ap meets ja Dios kyajpxy y'ayuujk xnija'wiyi, ku yiknimadya'aky ja Elías, pøn ja Dios kyugajpxyīp, ku ja ojts Dios t'ajot'aty jøts Dios ja ojts ttukmadøy sa Israelit jaa'y y'adø'øtsti? Ku ja wyā'añ yide'en: 3 “Dios Teety, tø mgugajpxy yik'oo'kixyīdi, tø yikjeitkixy ma jaty myikwindsø'øgi, nadyu'uk øts njaaktañ, jøts xyik'ookwandip øts nayide'en.” 4 Jøts Dios ja ojts yide'en y'adsøyi: “Tø øts abiky niwixujk mil ja jaa'y nwi'ejxti, pøn tkawinguxanaadyipnim ja awanax midi Baal yiktejp.” 5 Nayide'ents idø'on ixyam yjajtkojmi, ja winaagin pøn ja Dios tø wyi'ijxyīdi, pøn ja kø'øm tø ttanibiktaagi y'øy'ajtingøjxp. 6 Ti tundaajk ja jaa'y øy ti pøn tjatuñ jøts tpaattit ja nitso'ok'ajtin, pø ja Diosxi tanibiktaajkip kø'øm jøts ja tyik'awa'añ ja myøk'ajtin y'øy'ajtin. Ku jeexyīp jade'en kø'øm ja' yiktamajada'aky, jade'ents ja jeexyīp tpaaty jøts ka'ap ja Dios y'øy'ajtin ti niwya'añ.

7 Xjats ja israelit jaa'y jade'en winaagin tkapaatti sa y'ity yjawinmaydi, tømte ja tpaatti ja øy'ajtin pøn ja Dios kø'øm tø wyi'ijxyīdi, jøts jaayi jadu'uk wimbeets kugoots tmijatti, ni tkaja'gyukyīdi ja Dios yja'. 8 Jøts idø'on ja jade'en yjaty sa jap nøkyijxpy wyā'añ: “Dios ja kø'øm tuujnidip jøts ja kyadukjāwiyīdi sa y'adø'øtsti; ja win'ejxtip jøts ka' t'ejxpaatti, jamadoodip jøts ka' yja'gyukidi jøts jade'en ixyambaat yjatti.” 9 Jøts nayide'en ja David ja Dios yikwa'anmiyi:

Wan ja'ayi ttajotkøxti ja xødu'unin ja miga'ayin mi'uujkin, jøts nay ja'ayi tyapøkyattip jadigojk jøts ja yiktagubattit.

10 Wan t'etti wimbeets kugoots jøts kyaja'gyukidit,

jøts ja xemikøjxp yiktagubattip.

Sa nitso'ok'ajtin tpaatti pøn ka'israelit jaa'dyi

¹¹ ¿Ku dø'øn ja israelit jaa'y jade'en ja Dios tø tyuñidi, tø ja tyimwyindigøøgyøxti? ;Pø ka'axi! Øy idø'øn ja tø kyamadowdi, tøts ja yjadu'ukpi tpaatti ja nitso'ok'ajtin pøn ka'israelit jaa'dyi, jøts ja tpa'ejxtit, jøts ja nayide'en ja janchja'win tjagyaptit sa pøn ka'israelit jaa'dyi. ¹² Ku ja israelit jaa'y jawyeen kø'øm tø tkagupøkti ja Dios y'øy'ajtin ja'agøjxpts ja tø yikmo'odi pøn ka'israelit jaa'dyi, jøts ja jade'en'ampy pyaat'atyidi ja Dios yja'. Kuts ja israelit jaa'y jadigojk tmijotjimbejtkøxtit ja Dios, ¿ja ti ka'ats ja naxwii'ñit jaa'y ja kunuu'kxin nayide'en jawaani møj tpaattit?

¹³ Nyiknaxwampy øts nayide'en aaw ayuujk, jøts ø ndukmadoowa'andi meetsti pøn ka'israelit jaa'dyi. Pø meetsxi tø nyiktaniguexy ku øts ja Dios tø xkexy, jøts xnijawidit jøts ku øts ja ngajpxwa'kxin ka' ñiñugoji. ¹⁴ Kidi wanik jade'en winaagin ñitso'ok'atti ja nmi'israelit jaa'dyi ku mba'ejxidit nayide'en sa mee xpaaty ja nitso'ok'ajtin. ¹⁵ Jabi jade'enxi ja naxwii'ñit jaa'y tø tpaatti ja nøø' ja tuu' sudso ja Dios myaa'kxujkin tpaajtidit, ku ja Dios tø t'ats'ejxma'aty ja israelit jaa'y. ¿Tits idø'øn tyimyikpatp ku ja israelit jaa'y ja Dios jadigojk t'awimbetidit? Ja nitsoojkin idø'øn ja jadigojk pyatp pøn windiy'ejtnidip. ¹⁶ Ku ti t'ukja'biky ja Dios, amuumts ja tja'ajtkixy. Pøni myi'ijtpy ja ujts'aats ja ujtskojpk ja', nayide'ents inet ja tmi'ett amuum tuki'iyi møøt y'awaj y'axeeñ.

¹⁷ Jade'ents idø'øn ngajpxin ja israelit jaa'dyi sa ja kipy awaj midi ja olivo kipy y'awaj'ajtpy, jøts meets jade'en pøn ka'israelit jaa'dyi sa jadu'uk pa'olivo kipy y'awaj midi ñiñugo øy ma ujtsjøøjty ejtp. Kuts ja yikajtspøøty midi ja israelit jaa'y kipy'ajttip ndejint, jøts meets ja mja' ne'egi jam yikøx'øøch ma dø'øn jam ja jadu'ukpi awaj tø wyinaky. Jøts meets ja jade'en xpaat'aty ja juky'ajtin midi xemikøjxp, tu'ugyi ja m'aats mgojpk ñamyayi y'etti. ¹⁸ Ka'ats mnadyamikaxidit, kidi xuktamøjidi xuktamutskidi ja israelit jaa'y pøn ñamyayi ixwejtsidip ja Dios. Pøni m'adø'øtswandip jade'en, jawidi jøts ku nayi israelit jaa'y ñikøjxp idø'øn ja nitso'ok'ajtin tø mnimiñidi, kidi mgø'ømnikøjxpipti.

¹⁹ Mjawa'añ meets: “Janch jade'enimts, tøts ja yjiwa'akti jøts øøts ja ixyam ngudanaañip.” ²⁰ Jade'en'ampyts ja yik'ixwetsti ku tkajanchjawidi ja Dios, jøts meets myikupiky jade'engøjxp ku ja xjanchjawidi. Kidits mnamyikexyidi, øyim yikxonim tuda'aky mnabyikta'agit. ²¹ Pø m'ejtxipxi mnija'widipxi ku Dios ja israelit jaa'y ja tkadamee'kxy, jøts nayide'ents meets ja mgadamaa'kxmiyit ku jade'en m'adø'øtstit. ²² Jøts m'ejxtip mnija'widip jøts ku Dios janch øy, jøts tum ja tiy'ajtin yiktumpy. Møk ja ttiidyuñ pøn ja midundigøjyip. Mmi'øy'ajtipts meets ja', jøts tu'ugyi xpayø'øyidit ja y'øy'ajtin; pøni ka'ap jade'en xpadundi, nayide'ents nøjkx mjatti sa ja israelit jaa'dyi. ²³ Kuts ja israelit jaa'y jadigojk tmijotjimbettit ja Dios jøts tjanchjawidit amumjoojt, kupøkidip ja jadigojk jøts ja juky'ajtin myo'ojidit midi xemikøjxp; tyu'ump ja Dios jade'en, ti ja ka'ukmajyip. ²⁴ Sa meets ja tø mgupiky, jøts ka'ats meets mja'israelitjaa'yi, jøts tøts meets ja mmø'øyi ja nitso'ok'ajtin, iti kuts ja israelit jaa'y kyayikupøktit, pø ja'axi ja y'ity tyimyjapaat'ajtidip!

Ku Israelit jaa'y ñitso'ok'attit xemikøjxp

²⁵ Meets migu'uktøjkti, ndukmadoowandip ixyam jøts xnijawidit sa Dios ja wyinmaa'ñ tmøøt'aty, jøts ka' nugo mnay'agajpxidit jøts ku meets wijy'ajtin amuum xmøøt'ajtkixy: tø Israelit jaa'y ñamyayi y'amutski. Ejtpnim ja jade'en kunim ja yikupøktit namay pøn ka'Israelit jaa'dyi. ²⁶ Ku nøjkx jade'en tø y'ukjaty, winetnimts ja Israelit jaa'y ni'ijtyi ñitso'ok'attit, pø patyxi jap nøkyijxpy yide'en wya'añ:

Kaxø'økp tu'uk ja Israelit jaa'y, ja yiknitsokpi, jøts ja' ttukniwa'ats'atp ja jaa'y ja ka'øbyi pøn jaty ja Jacob t'aadsidip tkojpkidip.

²⁷ Jøts ngajpxy n'ayuujk øts wyinaty jade'en nyik'adujkpy, ku øts ja nyikpøkwyaa'tatit.

²⁸ Pøn israelit jaa'dyi, pøn tkagupøjktip ja øgyajpxy ja ømyadya'aky sudso ja nitso'ok'ajtin yikpaaty, ejxma'jtñiyidip ja Dios ja ñamyayi jøts meets ja mgunuu'kxyi; ka'apts ja Dios ja tyimy'ixmachidi, tsojkidip ja' ja'agøjxp ku ja Dios kø'øm tø twi'ixy ja møjaa'dyøjk. ²⁹ Pø ka'axi Dios ja jadigojk tpiky pøni ti ja yajkpy; pøni tø ja twi'ixy ja jaa'y, ¿sudsots ja nugoyi t'ixmatst jadigojk? ³⁰ Meetsxi ja Dios y'ijty mga'ukmimadøøpy, kuts ja israelit jaa'y ja tø tkamimadowdi, xjats meets ja Dios tø m'ayo'ijxyi. ³¹ Jøts ja nayide'en yjatti sa meets y'ijty xkamimadøyin ja Dios, ja'agøjxp ja jade'en ttuñ jøts ja jadigojk t'ayo'ext nayide'en sa mee tø myik'ayo'ijxyin. ³² Ja Dios jade'en kø'øm tø ttanibiktaagi jøts ja niduknax kyayikmimado'ot, ja'agøjxp ja jade'en ttuñ jøts o pøngapøn tuknax ja ttuk'ext ja pya'ayo'ajtin.

³³ ¡Ka'ap jade'en ti tmi'abaaty sa ja Dios ja øy'ajtin tjagyepy, sa ja wijy'ajtin, sa ja ja'gyukin tmøødi! Ka'ap pøn tmiwinmaa'nbyaaty pøni sa wyinmay, pøni midi tyunwampy, ma ñøjkxwa'añ yja'atwa'añ. ³⁴ “¿Pøn tniñija'wip sa ja Dios wyinmaa'ñ? ¿Uk pøn ja tyukjaty jøts ja jade'en ttu'unt? ³⁵ ¿Uk pøn ja Dios jawyeen ti tø tmø'øy, jøts ja ja' ttaguyaki midi ja xmø'øyimp?” ³⁶ Tum ja Dios amuum tja'ajtkøjxp jøts ja' tyik'øyigyøjxp, jøts ja tyiktunwa'añ pøni ti jaty ja tø tyik'øyi. ¡Kunuu'kxy etpyim ja Dios xemikøjxp! Jade'en idø'on y'ejxi tyiyi.

12

Midi chøjkpy ja Dios ku ja nnadyagødøjkant

¹ Kø'øm mee migu'uktøjk ja Dios amuum mnadyamiyoxit. Øy'ajtp jøts jade'en xu'undit midi ja y'øyja'wip kyunuu'kxyja'wip, ja' ñamyayi mdawindsø'øgidip ja Dios. Ku ja x'ayo'ijxyindi, jade'en mee nminuu'kxa'aky jøts jade'en xu'undit. ² Kidi jade'en mdsinay'adø'tsti sa xuktu'uñin ja kø'ømgutujk, ja kø'ømwinmaa'ñ. Mijotjimbetti ja Dios jøts ja mwinmaa'ñ nayide'en tyigatstit, winets ja juky'ajtin xpaattit midi amuum myiktigatsidip jøts jade'en xnijawidit midi ja Dios chøjkpy, ja øybi ja tsujpi midi ja Dios mda'øyja'wiyidip, midi øy wa'ats pidsømp.

³ Yide'en øts ja Dios xanigutujk'aty y'øy'ajtingøjxp, jøts ja' mee ndukmadøøpy, kidi nugo mnadyamøjpikta'agyidi pøni ti jam jadu'uk jadu'uk yajtpy. Pøni mabaat ja Dios kø'øm tø mdukjatyidi, ja' mja'gyukidip. ⁴ Ka' nduknax'ajtyindi, nayide'en sam ja nine'kx yikjagyepy may jøøjp yikmøødi, jøts ka' tum ja' wya'añ pøni ti tu'uk wya'añ, ⁵ nayide'ents adøm idø'onmidi, øy adøm mabaat njamaya'am, tu'ugyits adøm ja Cristo xja'ajtyindi, jøts nixem niyam ni'amuki n'ijtyindi sa kø' teky tkamajstut'uty ja nine'kx.

⁶ Kija' ja Dios xyikwinmaa'nbyaajtyindi pøni sa ja kø'øm ttamidsøky nidu'uk jaty. Wants tyiktunkpaajtyindi øy yikxon. Pøni tø Dios xmø'øyim ja wejin kajin jøts ngajpxnajxa'ant ja y'ayuujk midi ja tø xmø'øyim, ndu'unindipts ja jade'en pøni mabaat ja janchja'win xukjagyeyjyindi; ⁷ jøts pøni tøts ja xmø'øyim ja wejin kajin jøts ja nmigu'uk nduujna'ant ja y'øybi, mbadu'unindipts idø'on ja jade'en. Jøts pøni pøn ja Dios tø myø'øyi jøts yik'ixpøkt, ja'ats idø'on ja tyu'ump; ⁸ jøts pøni jamts pøn tø yikmø'øy jøts tkajpxjot'amøjkit ja myigu'uk, ja'ats idø'on ja tyu'ump. Pøni jamts pøn øy ti tyajkwa'añ, ka'ap kyø'ømwinmaa'ñ tyikyø'ty jøts ja ja' ttaguyakit øy ti. Pøni jamts pøn yikmøøpy jøts ja tnøø'mo'ot ttuu'mo'ot ja myigu'uk, yikxonimts t'ext tuda'aky'ampy; jøts pøni pøn tpudøjkidip ja ayoobi jaa'y pøn ti ka'ejtxidip, ejtni xoni dø'on tpudøkidit.

Sa pyaat'aty ttu'undit pøn ja Cristo yjanchja'widip

⁹ Nabya'ayowidi nixem niyam. Yikjiwa'akti ja ka'øybi, jøts tundi ja' midi øy midi tsuj, midi ja Dios kyupiky'ajtpy. ¹⁰ Yik'awa'andi ja amigu'uk'ajtin jøts nixem niyam mnamyayidit wine'en Dios mja'atyidi, nawyindsø'øgyidi nixem niyam, kidi pøn xkamøj'ejxti.

¹¹ Jotmay'atti ja Dios, kidi mnuuxidi, amumjoojt xmidu'undit ja Dios.

¹² Taxonda'akti jøts ku ja myikmo'odit midi mjøp'ejxtip; jøts kidi nugo x'ayojidi wine'en mjemjätti mdejätti, jøts kidi x'ixmatsti ja Dios'ajot'ajtin nijuuni.

¹³ Pøni jam ti kya'ijtyxidi pøn ja Dios yjanchja'widip, pudøkidits; øyim yikxon xyikja'attit xyiktsoondit pøni pøn mbaajtidip m'ejxidip mjønnotp mdøjkjotp.

¹⁴ Pøni pøn mga'ødyuujnidip, tagødøkidi ja Dios. Jøts amidowdi wan tyikunuu'kxti jøts kidi meets ja jawyeen xka'ødyijy.

¹⁵ Xonda'akti nayide'en pøni xonda'aktip ja mmigu'uk, tsaachjawidits nayide'en pøni jiidyip yaxtip.

¹⁶ Namyayidi nixem niyam, yikxon mdsøonidit mdanidit. Kidi mnamyikexyidi, møøt'etti pøn ayoobi jaa'y'ajttip. Kidi mwā'andi jøts ku meets nadyu'uk tuki'iyi xjaty.

¹⁷ Pøni tø pøn mga'ødyuñidi, kidits meets ja nayide'en xunwimbejtmidi. Ejtp xu'undit ja y'øybi øy madsoo. ¹⁸ Yik'amijatti mabaat mmajada'akti, jøts yikxon xmøøtsøonidit xmøøtanidit ja mmigu'uktøjk, amuum ja tuda'aky'ajtin xyiktu'undit. ¹⁹ Kidi mee migu'uk kø'øm xagubety ja mmidsep pøni sa ja mduñidi, ja Diosxi kø'øm yik'ayo'ombaa'iditnim; jabi yide'enxi jap nøkyijxpy wya'añ: "Øts xpaat'ajtp jøts øts ja ndiidyu'undit; øts ja ndagubattip, nømpxi Dios." ²⁰ Jøts nayide'en ja wya'añ, jøts ku tijy x'ødyu'undit pøn mmijotma'jtidip, wan ja tka'uknagyumayidi. ²¹ Kidi ja ka'øybi mmimajada'agyi, jaa ja xmimajada'akt ku tum ja øybi xu'unt.

13

¹ Mimadowdi ja windsøndøjk. Pø Diosxi kø'øm tø tyikutuky jøts ja kudunktøjk yja'attit.

² Pøni pønts ja tkamimadoowampy, ja' idø'øn ja wyinaty kyamimadøøpy pøn ja tø tyikutuky jøts ku ja yja'attit. Pønts jade'en adø'øtswamp, pøky ja taja'adidip jøts ja nøjkx yiktiidyundi. ³ Jøts kidi ja'ajip ja kudunktøjk ñija'ajttip jøts ja t'adsø'øgidit pøn øyjaa'y'ajttip, pø ja'axi ja ñija'ajttip jøts ja tiidyu'undit pøn tundigøødyip. Pøni ka'ats tsø'øgi jawi mnachøkyi jøts jade'en xwingunøjkxit ja kudunktøjk, jaa'y'ats yikxon jøts ja kudunktøjk niti mgadamatsit, ⁴ pø ja'axi Dios ja tø tyanibiktaagiyidi jøts ja øybi xu'unt. Kuts kø'øm mga'øyjaa'y'att, pøkyjawits mets ja mbøky; pø kidi nugøjpxi ja kudunktøjk ja møk'ajtin tjagyapti ku ja tyiidyundi, pø ja'axi Dios ja tø tyanibiktaagiyidi ku ja tø tyikutuky, jøts ja tiidyu'undit tiy'ajtingøjxp pøn tundigøødyip. ⁵ Ja'agøjxp pyaat'aty xiimado'odit ja kudunktøjk pø mwimmaadyipxi, kidi ja'agøjxpip ja nugo xundi jøts ja mgatiidyunidi. ⁶ Nay ja'axi ja Dios tyikutujkp jøts ja kuguju'uyin xmo'odit ja kudunktøjk; pø nay ja Diosxi ja tø tyanibiktaagiyidi jøts ja jade'en ja tyajujky'ajtin tpaattit, jøts jade'en mjaaknigudunk'atiyidit.

⁷ Migubajtkøxtits pøni pøn jaty jam mmijoj'ajttip. Pøni jam pøn kyayakñim kyagubetynim, wants ja tyakti; uk jamts pøn ti tkagujuynim tkagubetynim, wants ja tkugujuy tkugubety; pøni pøn jam ja windsø'jkin tyiktigøøpy, wan ja windsø'jkin tjagyepy; jøts pøni pøn jam ja amigu'uk'ajtin tyiktigøøpy, wan t'amigu'uk'aty ja myigu'uk. ⁸ Ka' ti pøn xamiyøj'attit, ja tsojkin ja pa'ayo'owin ja' idø'øn tiy xem yam mjagyaptip; ku jade'en xu'undit, ja kutujkts meets idø'øn wyinaty jade'en tø ximadøy. ⁹ Pø nømpxi ja Dios y'ana'amim: "Kidi mniðø'øxy kidi mniyaa'y mnabyøjkxiyidi, kidi myikjaa'y'øøky, kidi mmeech, kidi mdaay'aty, kidi xami'ama'at'aty ja mmigu'uk pyikta'aky"; jøts tuki'iyi ja Dios y'ana'amim tu'ugyi ja yide'en y'ayuujkpidsimy: "Mba'ayo'op ja mmigu'uk nayide'en ejximdam kø'øm mnabya'ayøyin." ¹⁰ Pøn ja tsojkin, pøn ja pa'ayo'owin tjagyajp, ka'ap ja tmidundigøy ja myigu'uk; jade'en'ampy ja Dios tkupik'atkixy ku ja tsojkin nyiktu'unint, jøts jade'en niwine'en ja kutujk kyayikmidundigøy.

¹¹ Jøts tø tyimbyaaty ja et ja xøøw, tajotigøjyidi ja Dios yja'. Tyimwyingomp ja ayo'on winets xpaattit amuum ja nitso'ok'ajtin. Nax'adøtsp ja et ja xøøw, ka'ap y'ity jaakjade'en ku njanchja'wiy'okwa'añindi miduk'oik ja Dios y'øgyajpxy ja y'ømyadya'aky.

¹² Ka'pxnip ja et ja xøøw, tyimdyukmibaat'ajtpy ja Dios; wants tmajtstuujtyindi ja

ka'ødyu'unin ja pøktyu'unin, jøts jøp'ijxy nnanky'ejtna'andit, tum ja øybi wa'atspi nyiktu'unindip midi kapøkmyøøt. ¹³ Wan tuda'aky tjaa'y'ajtna'andi sam pyaat'atyi pøn tnija'widip ja Dios. Jøts kidi ja' ndunk'ajtyindi ja nøø ja mu'uk, uk ja pøjp ja tsa'pxp, nmiga'ayin nmi'uujkin, uk nnamyøøt'atwa'añindi øy pøn møøt, uk ja tsep ja' njotmay'ajtyimp, uk ndami'ama'at'ajtyindip ja nmigu'uk øy ti. ¹⁴ Kidi jade'en m'adø'øtsti, tu'ugyi nwindsøn'ajtim Jesucristo xpadu'undit sa ja ya chinaay, jøts kyamøjtøkidit ja mbøktyu'unindi.

14

Kidi mmigu'uk xpagajpxy

¹ Pøni jam pøn myajada'aky kyamajada'aky yjanchja'wingøjxp, kupøktits, kidi sa xejti, øy ja wyinmaa'ñ yjaganayide'endi sam meets ja mja'ajin. ² Ja may pøn tjøø'kxtip øy ñityi, jøts nayide'en pøn amaay'ejttip, pøn nugo u'nkjii'kxy tsujxkjii'kxy ttojxtip, jøts wya'andi jøts ku ja' chøkyi Dios wyingujkp. ³ Pønts tjøø'kxp øy ti, ka'ap ja tka'øyjawit pøn amaay pøn wi'ijxy øy ti tjøø'kxp; jøts nayide'en ja'ami, ka'ap ja pyagajpxmit, ka'ap ja sa ttejmit pøn øy ti tjøø'kxp, pø tøxi Dios ja kø'øm kyupikyiyi, ⁴ jøts ja'ats midundip. ¿Mjaaktyimbyønts meets ku meets ja xpagajpxt, yamts ja Dios ja tmiduñ? Wan ja t'øyi uk tka'øyi, ja wyindsønts ja paajtip pøni sa ja kø'øm tyuñi. Jøts yik'øyip ja', ¿ti Dios ka'ukmajyip ku ja tka'ukyik'øyit myøk'ajtingøjxp?

⁵ Jøts jaa jadu'ukmidi pøn wandip tu'ugin ja xøøw yik'amaay'att, jøts jadu'uk wyamidi ku ka' pyaat'atyi ni midi xøøw kyayik'amaay'att, tum jade'en ja xøøw tu'ugyi. Kija'ats tñitanidit ja wyinmaa'ñ tigøjxp ku jade'en wyinmaydi. ⁶ Pøn t'amaay'ajtp tu'uk ja xøøw, ja Diosts ja tyawindsø'jkip; jøts pøn tka'amaay'ajtp, nay ja Diosts ja jade'en wyindsø'jkinmo'op. Jøts pøn tjøø'kxp øy ti, nay ja Diosts ja tyukmøja'wip tyukunuu'kxyja'wip; jøts pøn amaay'ajtmidip, ka' ti tñiyjii'kxy, nay ja Diosts ja tyawindsø'jkip ku ja jade'en ttuñ, jøts ja ttukmøjawi ttukunuu'kxyjawi amuum.

⁷ Ka'ap pøn nugo ñiyujky'aty, ka'ap pøn nugo ñiy'øøky. ⁸ Ku njujky'ajtyindi, Dios xyikjuyk'ajtindip, jøts pøni o'jkindipts, nay ja'ats xkwenti'ajtindip. Jøts jade'en yiknija'wip jøts ku ja amuum xja'ajtyindi øy adøm njajuyk'ajtyim, uk nja'ø'jkyim njadigø'øyim adøm. ⁹ Pø ja'agøjpxi ja Cristo yujkpyiky xemikøjxp ku ja tmimajadaajky ja o'jkin, jøts ja tu'ugyi ixyam tñitanaagyixy øy midi'ibi.

¹⁰ ¿Tigøjxpts ku mee kø'øm ja mmigu'uk xabayø'øy sa y'adø'øtsti? Jøts ni xkatsokti paat meets ja'. ¿Pønts xijy ta'amp, pøn kanaxp jam Cristo wyingujkp? Pø ja'axi xabayø'øyindip ja nbøky, ja' xiidyu'unindip. ¹¹ Pø yide'enxi jap nøkyijxpy wya'añ:

Øyi madsoo n'ity, jøts øts nwingujky niduki'iyi jaa'y kuwani ñagyuxendyakøxidit.

Jøts wya'andit ku øts ja'ayi tu'ugyi ndios'aty.

¹² Jade'ents idø'øn, kija' idø'øn ngøyajkint jam Dios wyingujkp pøni sa nidu'uk jadu'uk tø njaa'y'ajtyindi ya naxwiiñ.

Ka'ap ja nmigu'uk nyikwinmaamya'jtindit

¹³ Paty ka'ap nnabyagajpxandit nixem niyam. Ne'egi ja' njotmay'ajtindip sudso ja nmigu'uk ngayikpøkpyajtindit. ¹⁴ Tumwa'ats nwindsøn'ajtim Jesús tø ttanibiktaagi, ka' ti nugo kø'øm tyimyikpøkpyety; kyø'ømwinmaa'ñ ja' pøn nømdip jøts ku øy ti kya'øyi kyawa'adsi. ¹⁵ Jøts ku ja jii'kxy midi kayik'ødyejp kayikwa'atstejp nnadyabagajpxandit nugo, ¿ti pya'ayo'owints jade'en njagyejpyindip? Paty ka'ap pyaat'atyi jøts ja nyikmøjindit pøni ti ja nmigu'uk yjii'kxyindip, jøts jade'en ngaduk'ayoojindit ja nmigu'uk, jøts ka'ap ja yjanchja'win kyudigø'øty. ¹⁶ Kidi ja' xuñ midi yjawi ja mdsinaa'yin ja mjanchja'win yiktabagajpxp. ¹⁷ Kidi ja kaagyip jii'kxyip xagupøjkindip ja Dios ma ja kyutujk amuum ttanitani ja yja', pø ja øchinaa'yinxi ja chøjky ja tuda'aky'ajtin ja

xondaajkin midi ja Espíritu Santo xmø'øyindip. ¹⁸ Pøn jade'en tmidump ja Cristo, ja' Dios chøjkpy jøts øyja'wiyip ja jaa'y ja'.

¹⁹ Wants tjaaknija'wa'andi sudso nbaajtindit ja tuda'aky'ajtin midi nyiktu'unindip jøts ja nnadyabudøjkandit nixem niyam, jøts jade'en myøktaajkindit ja njanchja'win. ²⁰ Kidi ja ngø'øm ja' adøm nugo nyikmajadaajkindip, jøts adøm ja Dios yja' ngayikmøjtøjka'andit. Øy ni midi jii'kxy yjagayikpøkpyety, jade'en ne'egi pyaat'atyi jøts ja' xkajøø'kxtit midi ja mmigu'uk kya'øyja'wip jøts ja jade'en xkayikpøkyat. ²¹ Ne'egi øy'atpts ku ja tsu'uch ka' xtsu'utstit, uk xka'uuktit ja vino, uk xkatu'undit o ti, nugo ku ja mmigu'uk xkayikwinmaa'nmya'atti, nugo ku kyapøkpyatti jade'en'ampy jøts kyatuu'tigø'ødyit. ²² Dios ja ja'ayi mduknija'wip pøni sa mets ja mwinmaa'n xyikyø'øy. Jotkujk ja jaa'y pøn kyabadumpy midi ja pyøkyja'wip! ²³ Pønts tjøø'kxp øy ti majtsk aaw majtsk joojt, kø'ømts ja ñankpyøkpyetyi ku ja tjii'kxy, kumi ka'ap jotkujk tjii'kxy; jøts ti jaty kayiktump jotkujk'atym, pøky ja'.

15

Ja' mdu'ump midi ja mmigu'uk tya'ødyøkip

¹ Pøn jaty møk tjagyajtip ja janchja'win, xpaat'ajtindip adøm jøts nbudøjka'andit pøn ja yjanchja'win tu'ugyi tkamøøt'ajtipnim, jøts kidi adømyi kø'øm nnabya'ayø'øyindi. ² Nidu'uk jaty adøm xpaat'ajtyindi jøts ja ndabudøjka'am midi ja ødyunidip jøts ja yjanchja'win myøjtä'aktit. ³ Pø ni ja Cristoxi ojts kø'øm kyanabya'ayøyi, ne'egi ja yjaaktyimyajty jade'en sa jap nøkyijxpy yide'en wya'añ: "Tum øts ja tø xaja'atkixy sa jaty ti jaty mgayikta'ødyundip mgayikta'øñimaadyip." ⁴ Pø ja'agøjpxxi ja Dios ja kyajpxy tnankyjajyøø jøts adøm ja nnija'wa'an ti jaty ja ñigajpxpy ja y'ixpøjkin, ja'ats adøm ja xmø'øyimp ja kajpxjot'amøki jøts tuda'aky ngupøjkindit o ti ayo'on, jøts tu'ugyi ja awejx'ajtin yikmøøt'att ku yikpaatt ja xemikøjxpit jujky'ajtin. ⁵ Ja Dios Teetyts adøm xyikmajadaajkimp o ti ayo'on jøts ja xkajpxjot'amøjka'an. Wants ja mbudøkiyidi jøts mdsøønidit mdanidit yikxon nixem niyam, sam nwindson'ajtim Jesucristo tnajtsu'uni, ⁶ jøts tu'ugyi ni'amuki xja'byaattit xkajpxpaattit ja Dios Teety pøn ja nwindson'ajtim Jesucristo tyety'ajtpy.

Ku ja Dios y'øgyajpxy y'ømyadya'aky yikajpxwa'kxy ma jaa'y kya'israelit jaa'yidi

⁷ Nagyupøkidits nixem niyam, kidi sa mnadyijyidi mnawya'añidi, nagyupøkidi nayide'en sam adøm nwindson'ajtim Jesucristo tø xkupijkyindi Dios Teety wyindsøjkin wyinja'wingøjxp. ⁸ Pø israelit jaa'lyxi ja Cristo ñimimpy jøts ja tpudøkit, jøts jade'en ja Dios Teety ja wyandaajkin tyik'adujkit midi ja møjaa'dyøjk wyinaty tø yiktamiwanda'agidi. ⁹ Jøts nayi ñimeen ja' pøn ka'israelit jaa'dyi, jøts ja tja'byaattit tkajpxpaattit ja Dios ku ja pya'ayøyidi jadine'en, pø yide'enxi jap Salmos nøkyjøtpy wya'añ:

Nja'byaattp mets ngajpxpaattp mets øy ma naajx øy magajp, ma jaty ja jaa'y chøøni pøn ka'israelit jaa'dyi,

jøts n'øø't jøts nxu'uxt mets windsø'jkingøjxp.

¹⁰ Jøts nayide'en wyami ja Dios kyugajpxy:

Mxonda'aktit tuknax pøn ka'israelit jaa'dyi møøt ja israelit jaa'y pøn ja Dios ja'ajtiyidip.

¹¹ Jøts jap abiky ma jap wyami:

Møjja'wimyidi kunuu'kxyja'wimyidi ja Dios ni'ijtyi pøn ka'israelit jaa'dyi,

kajpxwa'kximyidi ja myøk'ajtin o magajp.

¹² Jøts yide'en Isaías tyukjadya'anmiyøø ja Dios:

Ja Isaí ñikøjxp pyidsø'ømt pøn ñiwindsøn'ajtmip pøn ka'israelit jaa'dyi;

ja' ja tu'ugyi tyamiguy'ejxtip ja ñitso'ok'ajtin.

¹³ Wan ja Dios mmø'øyidi ja xondaajkin ja tuda'aky'ajtin, midi xukjøp'ijxy'ajtindip ja kyunuu'kxin ku ja njanchja'wint, jøts jade'en ja ajot'ajtin tu'ugyi mdukmi'etidit Espíritu Santo myøk'ajtingøjxp.

¹⁴ Migu'uktøjkti, jade'en ø nwa'añ jøts ku meets amuum xjagyepy ja nadyamiyoxi'ajtin jøts ja nijawi'ajtin. Wa'ats ja xnijawidi, jøts n'a'ejxip øts jøts ku xjatti jøts nixem niyam mnagyajpxwejidit. ¹⁵ Ja'agøjxp mee ndanijayi ya'at nøky, jøts ndukja'myatstit tu'uk majtsk ja møy winmaa'ñ midi paat'ajtiyidip ja yikxon ja'gyukin. Tø øts ja Dios xanipiky y'øy'ajtingøjxp jøts øts jade'en ngajpxwejt. ¹⁶ Ja' øts ndamidumpy ja nwindson'ajtim Jesucristo ku øts ngajpxwa'kxi ja y'øgyajpxy ja y'ømyadya'aky ma ja jaa'y kya'israelitjaa'yidi jøts ja tpaattit ja nitso'ok'ajtin. Ja'ats øts ndagødøjkip ja Dios, wan ttajotkujk'atyidi jøts kyupøkidit ku yikpøkwyā'adsidit ja Espíritu Santo.

¹⁷ Ku øts jade'en nmiduñ ja Dios Teety, xondaqp øts jøts øts ja møk ndukmøjawi ndukunuu'kxyjawi, ku øts njanchjawi ja nwindson'ajtim Jesucristo. ¹⁸ Ka'ap øts ti nugo ñikyajpxy midi øts ja Cristo kø'øm xkaduktump xkadukpatp jam jaa'y agujkp pøn ka'israelit jaa'dyi, jøts tmimado'odit ja Dios. Tø dø'øn jade'en tyimyjaty, tø dø'øn jade'en tyimykmadøy sa ø nnigajpxy, ¹⁹ ku tnank'ijxyi ja myøk'ajtin, tyikaxi'iky ja ejxa'an, tyikaxi'iky ja milagri'ajtin, jøts jade'en yik'ixy yiknijawi ja Espíritu Santo myøk'ajtin. Jade'ents øts nnigajpxkixy øy madsoo ku ø ngajpxwa'kxi ja Cristo y'øgyajpxy y'ømyadya'aky midi nitso'ok'ajtin xukpaajtin, nwidity ø Jerusalén uk nja'aty øts jambaat Ilírico etjotp. ²⁰ Ja' øts ndajotigøøpy jøts øts jade'en ja øgyajpxy ja ømyadya'aky tø ngajpxwa'kxy, midi tnigajpxp ja nitso'ok'ajtin, ma niwindii kyayiknimadøynim ja Cristo xyøøw, jøts ka'ap øts nay ja'abi kajp tø n'anøjkxi ma jadu'uk ja jaa'y jawyeen tø tyik-tso'onda'aky ja Cristo y'ixpøjkin. ²¹ Jade'en øts tø nduñ sa ja Dios kyajpxy y'ayuujk wyā'añ:

Ja' ja ne'egi ejxiyip nijawiyip pøn ja niwindii kamadobaajtipnim, jøts yja'gyukidip ja ne'egi pøn ja niwindii kanimadooljidiipnim.

Ku ja Pablo ttanibiktaagi jøts ñøjkxt Roma

²² Ku øts ja ngajpxwa'kxk ngayiktsojk'abaadi, ja'agøjxp meets tø nga'ajts'ixy, tø øts kawinaak ojk nja'ukniwinmayi jøts ø nnøjkxt ma meets jam. ²³ Tøts øts ja ndunk y'abaadi yam ya'at etjotp ma øts yam, jøts jekyip øts njaniwinma'ayañi jøts mee nninøjkxt. ²⁴ Yamnimts øts inet jam n'uknaxt ku ø nnøjkxt jam España jøts mee n'uk'ext, jadya'ts øts jam wyinaty xpudøkidi, jøts øts jam nja'att ma øts idø'øn nnøjkxwa'añ. ²⁵ Jerusalén øts ixyam nnijkxy, pudøjkin øts nyiknijkxpy jøts øts ja ngømo'owa'andi pøn jaty jam Dios ja'ajtidip, adøm ja nmøøtjanchja'wibidi. ²⁶ Ja' tø tyikmukti meei pøn tsinaadyip jam Macedonia jam Acaya, jøts ja ttanigaxti ja ayoobi jaa'y pøn tsinaadyip jam Jerusalén, adøm ja nmigu'uktøjkti pøn ja Dios ja'ajtidip. ²⁷ Tø twinmaydi jøts ku jade'en y'øyi jøts ja jade'en ttu'undit, pø tøxi ja israelit jaa'y ja ñamyayi y'ayo'ijxyidi ku ja tyukpaat'atyidi ja Dios; xjats ja nayide'en pyaat'ajtmiyidi, jøts ja ttabudøkidit ja israelit jaa'y ti jaty ja iiy yjagyajtip. ²⁸ Kuts øts yø n'uktun'abaadit ku øts ja wyinaty tø ndagødøkidi ja pudøjkin, winets ø ndsoont jøts ø nnøjkxt jam España, uk naxpts øts jam ma meets jam. ²⁹ Jøts wa'ats ø nnijawi jøts ku øts ja Dios amuum ja kyunuu'kxin xabudøki, jøts øts ja Cristo ngajpxwa'kxit ja y'øgyajpxy ja y'ømyadya'aky ku øts jam nøjkx nja'aty.

³⁰ Tundits migu'uktøjk ja may'ajt nwindson'ajtim Jesucristo køjxp jøts Espíritu Santo pøn xukja'wimp ja tsojkin ja pa'ayo'owin, jøts meets nayide'en mnadyamiyoxidit øts ndunkjøjpp, ku meets ja Dios x'amido'ot ja may'ajt jøts ø xpudøkit. ³¹ Amidowdi ja Dios wan øts x'agø'duky x'axajtuky, jøts kidi myajada'akti ja jaa'y pøn tkagupøjkti ja nwindson'ajtim yja' jam Judea, jøts nayide'en x'amido'odit jøts ejtni xoni tkupøktit ja pudøjkin pøn tsinaadyip jam Jerusalén, pøn ja Dios ja'ajtidip, midi øts yam ndaninøjkxwāndip, ³² jøts pøni yikjajtpy Dios jøts øts øy jotkujk nja'att ma meets jam, jøts

øts jam n'ukpoo'kxt. ³³ Diosts mjagyap'idip pøn amuum ja øy'ajtin xondaajkin tyajkp. Jade'en idø'øn ja yjatt.

16

Ku ja Pablo tkajxpoo'kxy ja myigu'uk pøn jam Roma

¹ Mjaty'ejxtip ja Febe, adøm ja nmøøtjanchja'wibi pøn tump jam tsaptøjkjotp jam Cencreat kajpjotp. ² Kupøkti ja' yikxon, tundi may'ajt Dios køjxpit sam pyaat'aty, pø tu'ugyixi ja Dios yikjanchjawi. Pudøkidits jøts xmo'odit ti jaty jam ka'ejtxip, tø ja may'ampy xjanchpudøjkandi, øts paat ja kø'øm tø xpudøki.

³ Kajjxpoo'kxti nayide'en ja Priscila møøt ja Aquila, pøn tø nmøøtundi jøts øøts ja Jesucristo yja' nyikyø'øyyi. ⁴ Ja'agøjxpti øts ixyam njujky'aty ku ja kyø'ømjujky'ajtin ja o'jkin jøp'am tpiktaktø, nugo ku øts ja'ayi jade'en xyiknitso'okti; xemikøjxp øts ja Dios ja ndamøjawit, jøts nayide'en ja ttamøja'wimyidi niduki'iyi ja nmigu'uktøjk, pøn tjanchja'widip ja Jesús ma jaa'y kya'israelit jaa'yidi. ⁵ Kajjxpoo'kxti nayide'en ja migu'uktøjkti pøn namyujkidip jam Priscila jam Aquila tyøjkjotpti. Kajjxpoo'kxidik øts ja nmigu'uk Epeneto, pøn midu'uk tjanchja'wiy'okwaan ja nwindson'ajtim Jesucristo jam Acaya etjotp. ⁶ Kajjxpoo'kxti ja María midi jadine'en tmidump ja Dios ma meets jam. ⁷ Kajjxpoo'kxidik øts ja nmigugajp ja Andrónico jøts ja Junias, pøn øts møøt tø nbuxøjktsøonidi; janch'øyjawi ja y'etti sam nayide'en ja Cristo kyudanaabyitøjkti, jøts jawyeen ja ne'egi tjanchja'widi ja Cristo, oojknim øts.

⁸ Nayi mgajjxpoo'kxtip ja Amplias, pøn øts øy møøt namyayi Cristo køjxp. ⁹ Jøts nayi kajjxpoo'kxti ja Urbano, pøn øøts ojts nmøøtuñ ku øøts ja nwindson'ajtim yja' nduujni, jøts kajjxpoo'kxti nayide'en øts ja nmigu'uk Estaquis, ¹⁰ jøts nayide'en ja Apeles pøn kawinaak ojk tø ttamajada'aky ja yjanchja'win Cristo køjxp, øy ja wine'en ja ayo'on yjayiktanipiky. Jøts kajjxpoo'kxti nayide'en ja Aristobulo møøt ja y'u'nk ñidø'øxy. ¹¹ Kajjxpoo'kxidik øts ja nmigugajp pøn txøow'ajtp Herodiön, jøts nayide'en ja Narciso, jøts pøn jaty jam tsinaadyip ja' tyøjkjotp, pøn ja nwindson'ajtim tø tjanchjawidi. ¹² Jøts nayide'en xkajjxpoo'kxtit ja Trifena møøt ja Trifosa, pøn amuum tmidundip ja nwindson'ajtim, jøts nayide'en ja Pérsida, adøm ja nmigu'uk pøn kawine'en kujk tmiduñ ja Dios. ¹³ Jøts nayide'en xkajjxpoo'kxtit ja Rufo, pøn amumjoojt tjantyimyjanchja'wip ja nwindson'ajtim, jøts kajjxpoo'kxidi ja tyaak nayide'en, jade'en øts ja njawi sam øts ngø'ømdaagin. ¹⁴ Kajjxpoo'kxti ja Asíncrito, ja Flegonte, ja Hermas, ja Patrobas, ja Hermes, jøts møøt niduki'iyi ja migu'uktøjkti pøn ja Dios yjanchja'widip, pøn jaty ja jam møøtti. ¹⁵ Nayi kajjxpoo'kxti ja Filólogo møøt ja Julia, jøts ja Nereo møøt ja myiga'axkiixy, jøts ja Olimpás nayide'en xkajjxpoo'kxtit møøt niduki'iyi pøn jaty ja jam møøt, pøn ja Dios yjanchja'widip.

¹⁶ Nadyuknijawiyidi ja kajjxpoo'kxin nixem niyam sa Dios ttsøky. Mdanigajxidip ja kajjxpoo'kxin pøn jaty ja nwindson'ajtim Jesucristo yjanchja'widip øy madsoo.

¹⁷ Migu'uktøjkti, mjatyimy'ejxtibim pøn yiktseptøjkidip pøn yiktundigøødyip. Ja tsep ja nugo yiknaxkida'akwandip jøts mee mnawya'kxit, pø ja'axi ja yikma'atwandip midi meets tø myiktukmadø, pø ka'axi ja yjade'eni midi mee tø xjaty midi mee tø xnijawi, jade'en ne'egi tyimbyaat'aty ku xpuwa'atstip. ¹⁸ Ka' yø'øbi jaa'y tmidundip ja nwindson'ajtim Jesucristo, kø'øm yø ñayjotmay'atyidi ti yø ejtxidip ka'ejtxidip, jøts twin'øøndi ja jaa'y pøn tkanija'widipnim, øy ja Dios yja' nadyijyi amyuyj tsaachyuyj tmigajpxti. ¹⁹ Jøts ñija'wip øy pøn sa meets xpaduujni ja Dios yja'; ja'agøjxp mee ndajotkujk'aty. Ja' øts ja'ayi ndsøjkpy jøts xwinmaa'ñ'attit sa xu'undit ja tum ja øybi, jøts kidi ja ne'egi mjaakmayidi ja ka'øybi. ²⁰ Jøts ja Dios pøn ja øy'ajtin xondaajkin amuum tjagyajp, tsojk ja nøjkx ja miku' myøk'ajtin tyikwindigøjyi, jøts ja niti majadaajkin tka'ukpatnit meets mwingujky. Paatti ja nwindson'ajtim Jesucristo ja kyunuu'kxin.

²¹ Nayi mdanigajxidipts ja Timoteo ja kajpxpoo'kxin pøn øts møøt nduñ, jøts nayide'en Lucio, møøt ja Jasón, møøt ja Sosípater, øts nmigugajp nmigunaajxti.

²² Nayi mgajpxpoo'kxmíðip ja Tercio nwindsøn'ajtimgøjxp, pøn øts ya'at nøky nduk-jaapy.

²³ Jøts nayide'en mgajpxpøø'kxyidi ja Gayo. Ja' tyøjkjotp øts yam ndsøøni, jøts nay ja' t'anuu'kxyajkp ja tyøjk mā ñamyukyidi pøn jaty ja Dios yjanchja'widip. Jøts nayide'en mdanigajxidip ja kajpxpoo'kxin ja Cuarto jøts ja Erasto, pøn ja ya'at kajpmeeñ mya-chomujkpy.

²⁴ Mo'ojidip ja nwidsøn'ajtim Jesucristo ja kyunuu'kxin mee niduki'iyi. Jade'ents øts idø'øn ndsøky'aty.

Ku ja Dios y'ukyik'ajot'ajtni

²⁵ Tmøja'windits tkunuu'kxyja'windits ja Dios, wan mbudøkiyidi jøts ja mjanchja'win tu'ugyi amumjoojt xyik'ettit sam mduknijawiyidi ja øgyajpxy ja ømyadya'aky, sa ja nitso'ok'ajtin yikpaaty midi øts ngajpxwa'kxpy, ja Jesucristo y'ixpøjkin. Jøts ja' yø' midi ja Dios jekñim tø tnigajpxy, midi ja jeky tø xkaduknijawa'am jøts ku ja jayimni jødsnim ja naaxwii'ñit cho'onda'aky. ²⁶ Ixyamts ja tø yiknijawinim ku ja kyajpxy y'ayuujk tø ttukjaadyañ ja kyugajpxtyøjk, sa kø'øm tyikutuky ja Dios Teety xemikøjxpit. Jøts ja tuki'iyi yiktuknijawidi ja kajp ja naajx jøts tjanchjawidit jøts tpaduujnidit ja yja'.

²⁷ ¡Tu'ugyi Dios Teety møj jøts ja' tu'ugyi tnija'widyaapy, wants xemikøjxp ja tkupiky'aty tmadøy'aty adøm ja nwindsø'jkin ku ja nja'byaajtindi ngajpxpaajtindi amuum nwindsøn'ajtim Jesucristo køjxp! Jade'ents idø'øn ja y'ejxi tyiyi.

JA MYËDU'UKPI NØKY MIDI JA PABLO TYANĠGAJX JA CORINTĠ JAA'Y

Ku ja Pablo tnijayi ja janchja'wibi jaa'dyi pøn jam Corinti tsinaadyip

¹ Øts idø'øn Pablo'ajtp. Tø øts ja Dios Teety xamidsøky jøts øts tø xwaadsøy jøts øts ja Jesucristo ngudanaabyi'att. Møøt ja Sóstenes, pøn nayide'en tjanchja'wip ja Jesucristo, ² ixyam ø nnijayi ja Corinti jaa'y pøn jaty ja Dios Teety tø tnijawidi jøts tø tkupøkti ja chojkin ja pya'ayo'owin møøt ja y'ana'amin Cristo Jesús køjxp. Pø ja Dios Teetyxi meets tø mwi'ijxyidi jøts ja amuum xamiyoxtit ja mdsinaa'yindi møøt nayide'en pøn jaty ja tjanchja'wymidip, pøn jaty tkajpaxpatmidip ja nwindson'ajtim Jesucristo, pø tum ja'axi amuki nwindson'ajtyindip nixem niyam. ³ Pajtidi kupøjkidi ja Dios Teety y'øy'ajtin kyunuu'kxin møøt nayide'en ja nwindson'ajtim Jesucristo yja'.

Sa ja kunuu'kxin yikpaaty Cristo køjxp

⁴ Ejtp øts ja Dios Teety ndamøjawwi ndakunuu'kxyjawwi ku meets ja kunuu'kx'ajtin tø xpaaty Cristo Jesús køjxp. ⁵ Paty meets ja Dios Teety ja møy øy'ajtin janch kajaa tø mmø'øyi jøts øy tsuj xjajtidi uk xnimadyajkidi ja y'øy'ajtin ja kyunuu'kxin ja'agøjxp ku ja Cristo yja' tø xpabøjkidi. ⁶ Tø meets idø'øn ja xjanchyikwindiy sa jaty ja Cristo tø yiknimadya'aky. ⁷ Ku meets jade'en mdsøønit mmo'ojidipts ja Dios pøni ti dø'øn ja ttamidsojpk, ixa mee x'awijxy ja xøøw ja jumøjt ku ja nwindson'ajtim Jesucristo ñanky'ejxpaadiyit jadigojk. ⁸ Ja Diosts ja møk'ajtin mmo'ojidip jøts tu'ugyi mdsinaa'yin xyik'ettit, jøts wyinaty niti mgayiktanawanbatti ku ja nwindson'ajtim Jesucristo jya'att. ⁹ Pyadumpy ja Dios ejtp ja y'ayuujk. Ja'ats tø mwaadsøyidi jøts ja y'U'nk xmøøtsinaajyidit, ja nwindson'ajtim Jesucristo.

Ja' ñi'ane'empy jøts tu'ugyi chøønidit

¹⁰ Migu'uktøjkti, nwindson'ajtim Jesucristo køjxp meets idø'øn n'amidøy jøts ka'pxy xu'undit jøts tu'ugyi mdsinaa'yin xpikta'aktit xyik'ettit. Kidi ki'abiky mdsøøniidi, tu'ugyi winmaa'ñ xmøøt'attit jøts tu'ugyi xmøøt'attit midi mdajotigø'ødyip. ¹¹ ¿Ti ø migu'uktøjk idø'øn jade'en xyikwamp? Ja'agøjxp øts idø'øn jade'en nwa'añ kuts ja Cloé myigu'uk yø xukmadowdi ku meets jam mnamyijotma'adyidi. ¹² Yide'en øts idø'øn tø nyiktukmadøy ku mee tumdigach ja m'ayuujk; nømbik mum wya'andi: “Øts ja Pablo møøt”, jødsik ñømidi: “Øts ja Apolos møøt”; uk nømidiptsik: “Øts ja Pedro møøt”; jødsik jam ñømidi: “Øts ja Cristo møøt.” ¹³ ¿Sudsots idø'øn, uk tø dø'øn ja Cristo may ñawya'kxyi? ¿Ti tø meets ja Pablo mgu'oogiyi kruskøjxp? ¿Uk Pablo køjxp meets idø'øn tø mnøbety? ¹⁴ Ngajxajkpy øts ja Dios kuts ja'ayi tø nyiknøbety ja Crispo jøts ja Gayo, meets ja mjaa'y; ¹⁵ jøts jade'en mgawa'andit ku mee tø mnøbety øts køjxp. ¹⁶ Ixa njaakja'myech jadu'uk jøøn jadu'uk tøjk kuts ja Estéfanas nayide'en tø nyiknøbety, jøts jade'eñi nipønxi øts jyawi tø njaga'ukyiknøbajtni. ¹⁷ Ja'agøjxp øts idø'øn jade'en tø n'adi'ich ku øts ja Cristo tø xkakexy yiknøbatpi, ja'axi øts ja xaniguexy jøts øts ja jaa'y ndukmado'ot ja nitsoojkin ayuujk, ka'ats øts ja janchkajajtni nnigajpxy sam ja ixpiky jaa'y myadya'akti, jøts ja Cristo ja y'o'jkin jam kruskøjxp ejtp yikmøjpikta'akt.

Cristo, Dios Teety myøk'ajtin wyijy'ajtin ja'

¹⁸ Ku yjayiknimadya'aky ja Cristo y'o'jkin jam kruskøjxp, løki o'jkin ja jaa'y ja ttejti pøn tø yiktanibiktaagidi jøts ja øy'ajtin tkapaattit; pønts ja Dios tø tkupøjkidi ja ñitsoojkin ja pya'ayo'owin ka'ap ja jade'en wya'andi, nømp ja wya'andi jøts ku Dios myøk'ajtin jade'en tyiknigaxi'iky. ¹⁹ Pø yide'enxi ja nøky wya'añ midi jap jaabyety ejtp: Ka' øts ja y'ixpiky'ajtin ja wijy jaa'y nmøjpiktaajkit,

jits ka'ap ø ngupøjkit ja ñimado'owin ku øts ja nimadoobi jaa'y xjamigajpxmit.

²⁰ ¿Mats idø'on ja xpiiky jaa'y tyundi, jøts ja yik'ixpøjkpidi, jøts ja jaa'y pøn tnigajpxtip tñimadya'aktip ti jaty ya tuujnip naxwiiñ? Kawejin kakajinxi ja Dios ja tø tyikwimbijty midi ya naxkijxy yiktejp wejin kajin. ²¹ Wa'ats Dios tnijawi jøts ku ka'ap pøn myi'abaadyiyi ja wyijy'ajtin sam ja wijy jaa'y yjawinmaadya'an pøn tkagupøjktip ja'abi winmaa'ñ. Ja' ja ne'egi tyukpaatp tyuk'ejxp ja nitsoojkin pøn ja kupøjkxyip ja kyajpxy ja y'ayuujk tu'ugyi amumjoojt, øy ja yjadu'ukpi wine'en tja'abaxti ja'abi kajpxy ja'abi madya'aky.

²² Tum ja ijxyimbi ka'ijxyimbi ja israelit jaa'y chojktip, jøts ja griegit jaa'y t'amidomidi ja wejin ja kajin; ²³ ja Cristots øø nnigajpxpy ku ja kruskøjxp tø y'øøky. Nachø'ødyu'uni ja israelit jaa'y ja ttejt, jøts ja griegit jaa'y ñømidi ku ja kyawej'ajtin kyakaj'ajtin. ²⁴ Ots ja jade'en yjawa'andi, tøts ja Dios twi'ixy ja israelit jaa'y jøts ja griegit jaa'y pøn ja amuum tyamay'ajtpy ja møk'ajtin ja wijy'ajtin Cristo køjxp. ²⁵ Midi ja jaa'y yjanch'uktejtíp Dios ja kyawejin kyakajin, ja' idø'on ne'egi kamaabyim pidsømp; midits tyejtíp kajotmøk'ajtin ja'ats kidi mibaat pøn myayiyi, yjaaktyimyjinajpxy ja jawaani øy wine'en xpiikyjaa'y yjanamyukyidi. ²⁶ Migu'uktøjkti, ejxti nijawidi ku Dios tø mw'i'ijxyidi, o meets jam waani pøn janch'ixpiktyi sam idø'on ya naxwiiñ yiktsøky, jøts nayide'en niwaani pøn yikmøjpiktaktip, uk jam tigati yikta'ejxkapti yjønnotp tyøjkjotp. ²⁷ Tigach ja Dios wyinmaa'ñ, tum ja' ja tø twi'ixy pøn kajotmøjkti jits ja tsø'ødyumbim jyattit pøn jotmøk nayja'widip ya. ²⁸ Ja' ja Dios tø twi'ixy pøn ya naxwiiñ niti kayiktamøjpiktaktip jøts jade'en tyikugøxit pøn jaty møjpiktaajkidip ja jaa'y ya naxwiiñ, ²⁹ jøts niti nipøn kyanadyamikaxiyit Dios Teety wyingujkp. ³⁰ Ja Dios Teety idø'on kø'øm tø ja Jesucristo mdukpadyidi jøts muki møøt m'ettit; jits nay ja' tø ttuñ jøts adøm ja Cristo ndawejint ndakajint, jøts nay Cristo køjxpts ja Dios Teety xkupijkyindi jøts ja amumjoojt xukmøøt'ijtyindi, jøts ja nitsoojkin xmø'øyint. ³¹ Jabi yide'enxi ja Dios kyajpxy wya'añ: "Pøni pøn nay'agajpxwajnip wan ja nwindson'ajtim tnadya'agajpxyiyi."

2

Ja Cristo kyajpxy y'ayuujk pøn tø y'øøky kruskøjxp

¹ Migu'uktøjkti, ku mee nninijxy jøts ja Dios kyajpxy ndukmadooji, ka'ap øts ja'abi ayuujk nyiktuuñ midi kanimadooni. ² Tu'ugyi øts ojt ja xipøjkin nbikta'aky ku øts ja Jesucristo ja'ayi nnijawi, jøts jade'en øts ja nnigajpxy ku ja kruskøjxp tø y'øøky. ³ Janch yik'ayo'owim ngaxi'iky jøts tsø'øgi øts yjawi xjanchyik'oo'knip ku meets jam nninijxy; ⁴ kuts mee tø ndamimadya'aky jøts tø nduknijawidi ja Dios kyajpxy y'ayuujk, ka'ap øts wi'ijxpyi ayuujk uk kanimadooni ayuujk nyiktuñ sa ja møj nija'wibidi. ⁵ Ja Dios Espiritu Santo meets ja tø mduknimadøyidi jøts ja Dios tø mbudøkiyidi, jøts meets idø'on xmibøkt kidi ja wijy jaa'y y'ayuujkøjxpip, pø ja Diosxi myøk'ajtingøjxp.

Dios Espiritu Santo køjxp idø'on ja Dios Teety ñankñijawiyi

⁶ Tiy idø'on, janch møj nija'wibim øø ngajpxy ku øøts ja jaa'y nmigajpxy pøn jaty jawaani tø tnija'wiñi ja nwindson'ajtim y'ana'amin. Kidi meets jade'en xja'gyuki ku øøts ja ya'at kajin nyiktuñ sam møj yikutujkpi ya naxwiiñ ttundi, midi tsojk kudigøøñidip. Jabi Diosxi øøts idø'on kø'øm jade'en xyikajpxp. ⁷ Ja Dios wyejin ja kyajin øøts n'ayuujk'ajtpy midi yu'uch yik'ijtpñim, jøts ja' øøts idø'on nnigajpxpy ja nitsoojkin midi xemikøjxp ejtp, midi ja Dios yu'uch tø tyik'ity ku wyinaty niti tkayikøjñim. ⁸ Ni tu'ugin ja møj yikutujkpi yø tø tkanimadøy; ka'ap ja nwindson'ajtim Jesucristo ja jeexyip tø tyikruspatti kuk ja tja'gyukidyøø. ⁹ Jade'ents idø'on ja tø yjatti sa jap nøkyijxy jaabyety: Nipønim ja tka'ixy, nipønim ja tkamadøy, jøts nipønim ja tkawinmay pøni ti ja Dios tø ttanibiktaagi jøts ja tmo'ot pøn jaty ja chøjkpy.

¹⁰ Adømts idø'øn ja tø xukniĵa'wa'am pøni ti dø'øn ja tyijpy ku ja Dios Espíritu Santo tø xukniĵa'wa'am, jaa kuxi ja tniĵa'wiguixy tuki'iyi, jøts niĵa'wiyip ja Dios Teety ja wyinmaa'ñ nayide'en pøni sa jaty ja wyinmay.

¹¹ ¿Pøni idø'øn ja t'ukniĵa'wip pøni ti jam y'am yjotp tu'uk jadu'uk ja jaa'y myøøt'ajtpy? Jabi wyinmaa'ñxi ja kø'øm ejxiyip midi ja ñikøjxp'ajtpy. Ja Dios Espíritu Santo nayide'en nadyu'uk tniĵa'wimyip pøni ti jaty ja Dios Teety wyinmaa'ñ'ajtpy. ¹² Kidi ja naxwii'ñit winmaa'yints adøm tø nyikmø'øyim pø ja Diosxi adøm ja y'Espíritu Santo tø nyikmø'øyim jøts ja xukĵa'gyuka'am ja Dios myøjmay'ajtin ja Dios myøjkunuu'kxin. ¹³ Ja Dios Espíritu Santots øø tø xukyikyujy pøni ti jaty øø nnimadyajkpy, ka'ap øøts ja ngø'øm ixpiky'ajtin nyiktuñ, paty øøts ja Dios tyiy'ajtin ndukmadøya ja jaa'y pøn ja'abi ayuujk ja'abi winmaa'ñ tñimadoojip.

¹⁴ Pøni pøn ja Dios tyiy'ajtin tñanimadoojip, ka'ap ja tkupøkti pøni ti ja Dios Espíritu Santo yjanigajpxy, nugo ja tijy kawej'ajtin. Ka'ap tñimadøya, kumi ka'ap ja tniĵawi sudso ja tĵa'gyukit, ja' kuxi ja Dios y'Espíritu Santo tkamøøt'ajtidi. ¹⁵ Pønts ja Dios Espíritu Santo myøøt'ajtpy øy ja tigati tĵa'gyukit jøts nipøn ja sa kyanø'ømxit. ¹⁶ Pø nømpxi ja kajpxy jap nøkyijpxy: “¿Pøni idø'øn tø t'uknimadøya ja Dios wyinmaa'ñ? Nipøn kyamayĵi jøts ja Dios tkajpxwejt.” Øy ja yjade'en'aty, ja Cristo adøm ja wyinmaa'ñ nmøøt'ajtyimp.

3

Tu'ugyi øøts ja ndunk ku øøts ja Dios nmiduñ

¹ Kuts mee migu'uk ja Cristo y'ayuujk tø ndukmadowdi, ka' meets jade'en nmigajpxy sam idi'in yikmigajpxti pøn ja Dios Espíritu Santo yja' tø ñadyamiyoxkøjxniiyidi, jade'en mee tø nmigajpxy sam ja jaa'y pøn tkajanchĵa'widipnim, jøts sam yiktukmadowdi ja mutsk una'jk, ja Cristo yja'. ² Tum ja' mee tø ndukyikyujy midi jajtni, jade'en mee tø nduñ sami maxu'nk ja'ayi tsejtsk nøø yikmø'øy jøts ka'ap kaaky tojxk; ja'agøjxp ku mee mgamayinim midi tsep sam ja maxu'nk tkagupøkti ja tø'øts kaaky ja tø'øts jii'kxy; nayide'ents meets ixyam ook tigøy m'ity, ka'anim mee mmayi ja tseppi, ³ ja'agøjxp ku nayide'en x'ejxtinim sam ja jaa'y pøn ja Dios y'ayuujk tñaniĵa'widipnim, ku mee mnadyami'ekyi tigati; ku mnamyijotma'adyidi jøts mga'uknamyigajpxwa'aniiyidi jøts nayide'en mga'uknawyin'ejxwa'aniiyidi, nayide'en mee xuni sami nugo jaa'y pøn ja nwindson'ajtim Jesucristo tñaniĵa'widipnim. ⁴ Pø kuxi mee mnimy: “Øtsi Pablo møøt”, jøts jadu'uk ñømi: “Øtsi Apolos møøt”, nayide'en mee m'adi'ich sam idø'øn ja jaa'y pøn ni tu'uk ja Dios kyajpxy tñaniĵa'wip.

⁵ ¿Tyimbyøn ja Pablo? jits ¿Tyimbyøn ja Apolos? Pø ja Diosxi øøts ja'ayi xumbi'ajtp, nay ja'ats øø tø xyiktunkpaaty jøts meets yja' ja tø xmibøjki. Ja ndunk øø tø nduñ midi øøts ja Dios tø xaguwani. ⁶ Jade'en ja tpaaty, øts idø'øn ndejint tø nni'ipy ja tømt, jøts ja Apolos ja tø tnøguway jøts tø t'ejx'ity. Jøts ja Dios, ja'ayits tø tyikmuxy tø tyikyøñ ja tømt. ⁷ Ja Dios idø'øn tu'ugyi møj, jøts ja' idø'øn tuki'iyi tungøjxp, pø ja'axi ja tømt tø tyiktsø'øky jøts niti ja'adi pøn ja tø tjani'ipy uk pøn ja tø tjanøguway. ⁸ Nipønts kyamøji kyamutski øy ja tø yjani'ipy uk øyts ja tø yjanøway, pø ja Diosxi kø'øm ttanipatp ja mijuu'ñ pøni sa ja tyunk ja ya tyikyø'øy naxwiiñ. ⁹ Tum tumbi jaa'y øøts idø'øn namajtsk. Ja Dios øøts idø'øn xumbi'ajtp, jøts meets idø'øn mgam'ajtp midi ja Dios yja'ajtpy.

Uk nayide'ents n'ukpiktaajkint, meets idø'øn mdøjk'ajtp midi ja Dios kyøjpy. ¹⁰ Øts idø'øn ja Dios tø xpikta'aky pojtspi ana'ambi, jøts øts idø'øn ja tøj k tø nbots'okwa'añ, jøts ja wenkpi pojtspi tĵaakyikyø'øy ja tunk. Tum a'ejxits ja tsøky sa pønjabøn pyøch.

¹¹ Nipønxi kyapaat'atyiyi jøts ja pøch ja abiky tyiktso'onda'akt, pø tøxi ja tu'ugyi tyañ midi ja Jesucristo pyøchkojpk'ajtpy. ¹² Kuts ja tøj jyaakjayikpøch, øts ja oori yjaakpat, uk ja platits, uk tum tsuj tsaq, uk øyts nayide'en ja pu'uy, uk ja miiyts, uk øyts ja waxkipy, ¹³ ku wyinaty ja tidiyu'unin tyaaty jamnimts ñigaxø'økt pøni sa pøngapøn tø tyuñ; pø tum jøønxi jam wyinaty tump, ja'ats tyiknigaxø'økp pøni ti ja tøj tø yiktakøjy.

¹⁴ Pøni pøn wyinaty tø tyiktuñ midi ja jøøn kamayip, yikmo'opts ja' myijuu'ñ; ¹⁵ kuts ja wyinaty tyø, windigø'øpyts ja tuki'iyi midi ja wyinaty tø tjaøch øy wyinaty awisa yjanch'awa'atspidsimy pøn idø'øn jade'en tø pyøch.

¹⁶ ¿Ka' mee xnijawí ku meets ja Dios Teety mdsaptøjk'atyidi jøts ku ja Dios Espíritu Santo jam chøøni? ¹⁷ Pøni pønts tjejtíp ja Dios ja chaptøjk, yikudigøyip ja Dios ja', ja'agøjxp ku kyunuu'kxyi Dios chaptøjk, meets ja Dios mdsaptøjk'ajttíp.

¹⁸ Kidi kø'øm mnadyuñidi. Pøni jam tu'ugin ixpiky jaa'y ñayjawíyi, wan nayide'en nabyikta'agiyi ejxim ja jaa'y midi niti tkajajtp, jøts jade'en tpaatt ja wejin ja kajin midi kanaxp. ¹⁹ Pø janch jawaani kajaaxi ja Dios wyejin jøts nika' jade'en ja jaa'y y'ixpiky'ajtin. Yide'enxi ja Dios kyajpxy wya'añ: "Ja kyø'øm ixpiky'ajtin ja jaa'y tabakjo'opidíp ja Dios, jøts ja kø'øm tyuktagidawíyidit." ²⁰ Nayide'ents wyami: "Ñija'wip ja Dios ja' ku nima kyatuñ ja ixpiky jaa'y wyinmaa'ñ." ²¹ Paty meets mganadya'agajpxiyidit nipøn; pø meetsxi mja'ajtpy jøts øy xyiktunkpaattit tuki'iyi: ²² ixa Pablo, Apolos, Pedro, et naxwii'ñit, jujky'ajtin, o'jkin, ixyam'ajtin, jøts midi memp midi ja'tp; ²³ ja Cristots mee mja'ajtidíp, jøts ja Dios Teety ja Cristo tja'atmi.

4

Ja nwindson'ajtim kyudanaabyi tyunkjøøjp

¹ Paty meets jade'en xja'gyukit jøts ku øøts ja'ayi ja Cristo nbudøki, ja'ats øø ndunk'ajtpy jøts øø nnigajpxt ja Dios y'ayu'uch winmaa'ñ. ² Pøni pøn ti tø yiktaguwani, yiknigaxø'økp idø'øn ja' ku ja tpadu'unt. ³ Ka' øts ja nmøjpikta'aky pøni sa meets xnigajpxy xnimadya'aky, uk pøni sats øts ja xejtí xwa'andi pøn jaty ya naxwiiñ ja jaa'y tiidyundíp. Ni øts paat nganadyunk'atyí kø'øm pøni sa ø njaa'y'aty. ⁴ Nitits nganadyapøkyjawíyi, nnija'wip øts wa'ats ku øts ka' axøøk njaa'y'aty, ka'ats ja njøp'ejxin ku øts ja nbøky kya'ity, ja nwindson'ajtimts ø kø'øm xiidyu'ump. ⁵ Paty kidi x'øyjawídi xka'øyjawídi ixyam tigati; awejxtinim wan ja nwindson'ajtim tyiknigaxø'kixy pøni ti jaty kayik'ejxpatp, jøts nay ja Dios tyiknigaxø'økp pøni sa t'ixy tu'uk tu'uk ja anmija'win, jats ja Dios ja t'øyjawit uk tka'øyjawit.

⁶ Migu'uktøjkti, meets m'ø'y'ajtingøjxp øts jade'en nwa'añ jøts xni'ejxu'uttit ja Apolos uk xni'ejxu'uttit øts. Paty øts idø'øn jade'en nwa'añ jøts nayide'en mjaa'y'attit sam øøts. Ka' nugo xu'undit agubajkpy yam ja Dios kyajpxy jade'en kyawa'añ jøts kidi nugo pøn xnadyamikexyidi uk xmi'ambøjkmidi pøn. ⁷ ¿Uk jaa' dø'øn tu'uk jaa'y pøn jawaani myikwejidíp? ¿Ti kø'øm tø xpaatti midi ja Dios tø mga'ukmø'øyi? Pøni tum ja Diosts tø mmø'øyi, jadits ku mnadyamikexyí pøni ti jaty mmøøt'ajtpy, jade'enxi me mwani ku mets ja kø'øm tø xpaaty pøni ti jam mmøøt'ajtpy.

⁸ Kumeeñ jaa'yin meets yjawí mnayjawíyi pøn niti tka'ukta'ayoonidíp. Windsønín yjawí mnayjawíyidi, jøts øø xka'ukja'myatsni. ¿Ogidø'øn tyimyjanch mjanchwindsøn'atti jeexyip, jøts øø nayide'en ja ngutujk xmo'ot! ⁹ Jade'enxi øts yjawí nja'gyuki, pø tø øøts idø'øn ja Dios tyimy'ixoojk xyiktañ; jøts øøts idø'øn yjawí tø nyiktanibiktaagi jøts øø n'oock; jøts øøts jade'en ja tsajp ja naajx x'ext xjawit, nayide'en ja Dios y'ankilis møøt ja naxwii'ñit jaa'y. ¹⁰ Maap mo'tp øø nyiktijy ku øøts ja Cristo yja' nbaduujni yam mee mnadyijyiyi møj nija'wibi pøn tnmadoogøjxidíp ja Cristo yja'. Ka'ap øø njotmøjki yam meets yikxon myikwindsø'øgi. ¹¹ Ixyambaat øøts yuu ndani'ixy møøt tøødsi, jøts ka'ap øøts nwet nnaamy te; øy øøts jaa'y sagasa xuñ, ka'ap øøts ndøjk te ma øø nboo'kxt, ¹² jøts nmijotkijxpy øøts ndunk nbøjk. Xjamigajpxigøøpy øøts jaa'y, ja øy tsuj ayuujk øøts ja nda'adsojimbijtpy. Ngupijkpy øøts pøni xpawojp øøts jaa'y. ¹³ Xjanchjabagajpxp øøts jaa'y, tuda'akts øøts ja n'ane'emy. Pista'agin øø nyiktuñ uk jade'ents øø nyikjawí ejxim jaa'dyi'ñ jaa'dya'ach.

¹⁴ Ka' mee nnijayi jøts xatsø'ødyu'undit ku jade'en mdsøønidí, n'ana'amwampy meets idø'øn ja'agøjxp ku mee n'u'nk n'una'jkin njawí pøn ø ndsojktíp. ¹⁵ O meets jeexyip

xjamøøt'aty namay ja yik'ixpøjkpi, ka' meets jadine'en ñamayi mdeety jabi øtsyixi meets ja'ayi tu'umpchi xeety'atp ja'agøjxp ku ja Cristo ñitsoojkin tø ndukmadowdi jøts ja janchja'win tø xpaatti. ¹⁶ Ixyamts mee n'amidø y jøts ø xpa'ejxtit.

¹⁷ Paty meets ixyam ndaniguexy ja Timoteo pøn ø n'u'nkja'wip nwindson'ajtimgøjxp, jøts pøn ø nayide'en xkamajstutp. Yø' mdukja'myatsidip sudso ø ndsøøni kuts ja Cristo nmibøjki ja yja' sa o magama ndukyikyujti pøn jaty ja Cristo tjanchja'widip. ¹⁸ Jam meets ja mmigu'uk pøn janchnamyikajxniyidip, nømp ja wya'andi kuk mee nga'ats'ext ja'agøjxp ku øts ja' ndsø'øgidi. ¹⁹ Pøni yikutujkpyts ja Dios, nninøjkxtipts pojin. Jamnimts ø n'uk'ext pøni janchtundip idø'øn pøn namyikajxidip uk nugo dø'øn kyajpxti. ²⁰ Ka'axi dø'øn nugo nmadyajkint ku ja Dios yja' nbaduujñindi, pø jatyixi dø'øn ja yikpadungojt. ²¹ ¿Sudsøts uk mdsojktip jøts øts awa'an nnøjkxt jøts n'atskastigimo'odit, uk ja yujy'ajtin jøts ja tsojkin ø nminøjkxp ku wyinaty n'ats'ejxti?

5

Ja'yiknigajpxp ku ja kya'øyi ku pøngapøn ñamyøøt'atyidi nugo

¹ Jade'en ja kajpxy yø'ø y, jamik ja mmigu'uk tu'uk ja kyudaak tmøøt'aty. Janch møj ka'ø y jaa'y'ajtin idø'øn jade'emb i tsinaa'yin, ni jambaat yø kyayikupiky ma ja jaa'y ja Dios tkanijawidi. ² ¿Jøts niti meets idø'øn xkidyimbyøkyjawi ku ja mmigu'uk jade'en y'adi'ich? ¿Meetspik idø'øn jeexyip mjotmay'oo'ktøjkp ku mmigu'uk jade'en y'adi'ich! Pøn yaa'dyøjk idø'øn jade'en tø y'adi'ich ka'ap ja y'ukpaat'ajtniyi jøts ja jam xmøøtsøønidit, pawøpy ja pyaat'aty. ³ O meets idø'øn njagamøøtsøøni jamts øts ja nwinmaa'ñ nyik'ity; tøts ja ndiidyuni winmaa'ñjotp pøn jade'en tø y'adi'ich ejxindam øts jam jeexyip ndyimchøøni. ⁴ Namyukidi nwindson'ajtimgøjxp, jam ø wyinaty ja nwinmaa'ñ meets møøt, jøts ja nwindson'ajtim Jesucristo myøk'ajtin mbudøkiyidit. ⁵ Jøts xyikjawa'aktit ja jaa'y, wan ya ja miku' yik'ayo'ombaadyiyi kunim ja nwindson'ajtim Jesucristo wyinaty myiñ tiidyumbi, janimts ja nøjkx yiknitso'ok'ajtxiyi ja y'anmija'win.

⁶ Paty kidi mnadyamikexyidi pøni ti jaty jam mdundip. ¿Ja ka' mee xnijawi ku ja ka'ødyumbi ja yja' nugo tyikmiweni? ⁷ Paty kidi xmaa'kxti ja ka'ødyumbi midi tø wyindigøøni, midi jam nugo myikma'jtidip. Jøts ø y wa'ats m'ettit. Pø tøxi kø'øm ja Cristo xku'o'ka'am kruskøjxp, jøts ja tø wyindsø'jkin'aty adømgøjxp Dios Teety wyingujkp. ⁸ Ja tiy'ajtin ja øy'ajtin adøm idø'øn ja Dios ndawindsø'jkiy'ejtimp, jøts ka'ap nijuuni nyikmøj'ajtant ja y'axøøkpi midi ja anmija'win nugo tyikwindigøøpy.

⁹ Nnimaa'y meets ku ja nøky ojs tu'uk ndanigaxti, jøts xkamøøtsøønidit pøn jaty ja y'axøøkpi yigaappi pyawinmaadyip jøts tum ja' tyunk'ajttip. ¹⁰ Ka'ap meets idø'øn ja yide'en xja'gyukit jøts ku meets abiky mdyimñabyiktaajkmiyidit, jøts ja ka'ø y jaa'y, jøts ja meengyax jaa'y, jøts ja maa'tspi jaa'y, uk jøts ja tsamaxan windsø'jkp jaa'y xkadyim'yukwin'ejxnidit; jabi kuwañimxi ja ya x'ejxtit ja'abi jaa'y o madsoo. ¹¹ Yide'en øts idø'øn ja ndiijy jøts ku meets mganamyukit møøt ja' pøn nañikajpxiyip Cristo padumbi, yam ja kya'øyjaa'yi, uk myeengyaxi, uk tsamaxan windsø'jkibi, uk yja'aji pøn tuki'iyi tkajpxyø'øgyojp, uk pøn ja nøø ja mu'uk ttunk'ajtp, uk myeech. Ja jade'emb i jaa'dyi ni xkamøøtka'aty meets idø'øn ja'. ¹²⁻¹³ Ka'ap ø xpaat'aty jøts ø ndiidyu'unt ja wenk jaa'y midi abiktyi, ja Dios ja paa't'ajtyip. Meetsts idø'øn mbaat'ajtidip jøts xiidyu'undit ja mmigu'uk. Paty xyikjawa'aktit ja pøkyumbi midi jam møøt tsinaadyip.

6

Ku ja kajanchja'wibi juez ja janchja'wibi jaa'y tmi'øøndi

¹ Ku meets mmigu'uk xni'øøniwya'añ, ¿tigøjxp meets idø'øn ja xaninijkxy ja juez pøn tkajanchja'wip ja nwindson'ajtim Jesucristo, jøts nika' ja xaninøjkxti pøn ja janchja'win nayide'en tmøøt'ajttip? ² ¿Uk ka' meets idø'øn xnijawi ku ja' ttidyu'undit ja naxwii'ñit jaa'y pøn ja Dios yja' tpaduujnidip? Pøni meetsts mdiidyumpy wyinaty ja naxwii'ñit jaa'y,

¿ka'ats meets idø'øn xjaty sudso xu'undit jøts xiidyu'undit pøni ti jam tuujnip jajtíp? ³ ¿Ka' xnijawidi ku ja ankilis paat ndiidyu'unindit? ¡Pøni jade'ents ja wyinaty, nija'wa'ampts adøm idø'øn sudso ya ndiidyu'unindit naxwiiñ! ⁴ ¿Sudso dø'øn ja xaninøjkxti ja wenk jaa'y pøni ti dø'øn ya naxwiiñ mdsep'ajttip m'ayo'on'ajttip? Ja' meets ja mdaninijkxpy pøn kajanchja'widip. ⁵ Ya'atpi dø'øn ti mjanchtatsø'ødyu'undip. ¿Ni tu'ugin meets ja jam xkamøøt'aty pøn tjajtp ja tiidyu'unin? ⁶ ¿Tsaach'øy idø'øn ja' jøts namajtsk ja janchja'wibi ñañi'øøniyidi ma ja jaa'y jam kyajanchjawidi?

⁷ Tsø'ødyumbimxi mee mjagaxø'kni ku meets jam tukjanchja'wibi jaa'y mnamyidsep'atyidi. Ku ne'egi amøñi xkamidanidi pøni sa myiktundi. Nisa ne'egi mgawa'andit øy mjayikwimaa'tsti. ⁸ Janch tum wimbet'ampy mee ne'egi xuñ, øy meets ja mgø'øm mmigu'uk sa xuñ midi jagati pøky, uk wime'chpts meets ja' ne'egi.

⁹⁻¹⁰ ¿Uk ka' idø'øn xnijawidi ku ja Dios ja kyutujk wyinaty tkadanitani pøn jaty ja tiy'ajtin tkatundip? Nay'eix'etidi, eixim myikwin'øøndi, ka'axi wyinaty ja Dios ttanitani ja kyutujk pøn jaty namyøøt'ajtidip øy ja jyaga'amajtskidinim, ni ja' pøn jaty ja maxandsaa windsø'jkidip, ni ja' pøn jaty ja wenk tø'øxyøjk uk wenk yaa'dyøjk tmøøt'ajttip, ni ja yaa'dyøjkti pøn ja myiyaa'dyøjk tmøøt'ajttip, ni ja' pøn jaty maa'tstip, ni ja meengyaxti, ni ja' pøn tuki'iyi tjanchkajpxyø'øgyøxtip jaty, uk pøn jaty ja win'øø'nk ttunk'ajttip. ¹¹ Jam mee muuma pøn jade'en y'ijty tsinaadyip; ka'ats ja ixyam jade'en y'uktsinaañidi pø tøxi ja nwindsøn'ajtim Jesucristo køjxp pyøkwyatsnidi, jøts ja Dios Teety tø yiktagidøkidi, jøts y'Espíritu Santo køjxp ja tø xkupijkyindi.

Sudso ja nne'kx ndawindsø'jka'ant ja Dios

¹² Jade'en ja ayuujk yø'øy ku o tigati nduu'nint, nipøn ja xkadabayø'øyint. Øy idø'øn ja jade'en yjawa'añ ka'ats tuki'iyi y'ødyuñ pøni ti yiktump; jabi ka'axi pyaat'atyiyi jøts ja tu'ugyi nugo ndyimyikmajadaajkin. ¹³ Janch idø'øn ku ja kaaky ja tojcx ya tø yikpikta'aky jøts ja maatsjotp ñøjkxt, ka'ats ja ne'kx ja' wya'añ jøts ja nugo yiktapøkyu'unt sam ja winaagin ja'ayi ttunk'atti. Kudigøøpy y'ity ja kaaky ja tojcx jøts ja maats nayide'en, ne'egi tampts xemikøjxp ku adøm nne'kx ja Dios Teety ndawinja'wa'ant ndawindsø'jka'ant jøts ja nayide'en amuum xmøøt'ejtint. ¹⁴ Nayi myøk'ajtin ja yik'awa'amp jøts ja xyikjujcpyøjkin jadigojk sam ja nwindsøn'ajtim Jesucristo ja ojts tyikjujcpyiky.

¹⁵ ¿Ka' mee xnijawi ku meets yø mne'kx Cristo tne'kx'aty nayide'en? ¿Øy idø'øn jøts ja Cristo ñe'kx nnixajiyit jøts øts ja nmo'ot ja ka'ødyø'øxyøjk midi ttunk'ajttip ja yaa'dyøjk? ¡Nima yø jade'en kyatyi! ¹⁶ ¿Uk ka'anin idø'øn xnijawidi ku ja ka'ødyø'øxyøjk yikmøøt'aty jøts tu'ugyi ja ne'kx namyayi wyimbejtini? Pø nømpxi ja nøky wya'añ: “Tu'ugyi ja nøjcx wyimbetti.” ¹⁷ Kuts tu'uk ja jaa'y ja nwindsøn'ajtim Jesucristo tminamyayi, tu'ugyits ja nayide'en wyimbejtnidi.

¹⁸ Paty kidi nugo mnamyøøt'atyidi, wingaktu'utti yø'øbi pøky. Øy idø'øn pøky yjaji, yiktump øy midi'ibi jadu'uk pøky, ka'ats ja jade'en tyimbyaaty sam ja jade'embi pøky, pø ja kø'øm ne'kxi pøkyumbajt tyimwyamp kø'ømts ñamyayi ja namyidundigøyi. ¹⁹ ¿Ka' xnijawidi ku meets ja Dios Espíritu Santo mdsaptøjk'atyidi? ¿Jøts ku ja Dios Espíritu Santo jam chøøni mne'kxkøjxp? Pø ni yø mne'kxi mee xkaja'aty, ²⁰ pø janch tsowixi ja Dios tø mjuyidi ku ja y'u'nk tø xku'ayo'ombaaajta'am. Paty meets idø'øn ja Dios ja mne'kx jøts ja m'anmija'win amuum xawindsø'øgit, jabi tum Diosxi yø' yja'.

7

Sudso ja amajtsk jaa'y'ajtin ñaxt

¹ Ixym øts ja nøky n'adsojimbijty midi mee tø xaniguexy. Ja øy ja' ku jaa'y kya'amajtskidit; ² jade'ents ne'egi pyaat'aty jøts ja yaa'dyøjk kija' tmøøt'attit ja ñidø'øxy, jøts ja tø'øxyøjk kija' nayide'en tmøøt'attit ja ñiyaa'y, ja'agøjxp ku ja pyøkyi ku jaa'y

nugo ñamyøøt'atyidi. ³ Myimado'op idø'øn ja yaa'dyøjk ja ñidø'øxy nayide'en sam ja tø'øxyøjk tmimadoomit ja ñiyaa'y, jøts jade'en nixem niyam ñadyajotkujk'atyyidit. ⁴ Ka'ap ja tø'øxyøjk nadyu'uk tja'aty ja ñe'kx, ja ñiyaa'y ja paat'ajtiyip; jøts nayide'enmi ja yaa'dyøjk, ka'ap ja nadyu'uk tja'aty ja ñe'kx, ja ñidø'øxy ja paat'ajtmiiyip. ⁵ Nagyupøkidip idø'øn ja namajtsk jøts ñamyøøt'atidit; pøni tyundipts ja kajpxy jøts ñay'amaay'atidit ku ja Dios wyinaty t'ajot'atwa'andi, ots ja jade'en ttu'undit. Kuts ja jotmay tyikugøxidit, nayide'ents ja chinaa'yin tyikyø'øgyojmidit, ja' ka'uk'øyni ku kya'uknagyupøjkniyidi jøts ja miku' winøø'mbi tyuktunidit ja pøky abiky.

⁶ Ka' mee ndaguwani jøts mga'amajtskidit, amajtski meets pøni jade'en xtsojkti. ⁷ Jade'en ø njatsøjky jøts mee mga'amajtskit sam øts; ka'ats adøm ja Dios ja winmaa'ñ jøts ja kunuu'kxin tum jade'en tø xmø'øyim, tigach ja tø tyikwa'kxy.

⁸ Pøn jaty ka'amajtskidipnim, uk pøn tø kyu'o'okiñidi, ja' øts idø'øn n'ana'amdip ku yjawi yja'øyi jøts kya'amajtskidit sam øts. ⁹ Pøni ka'ats tmimajada'akti jade'embi tsinaa'yin, wan ne'egi t'amajtskidi pø ka'axi y'uk'øyiñi ku ja wyinaty o pøngapøn t'ukmøøt'ajtni.

¹⁰ Pøn jaty amajtsk jaa'y, ja'ats ø n'ana'amdip jøts ja tø'øxyøjk niyuuni xøøw tkamajtstu'utt ja ñiyaa'y. Kidi øtsip idø'øn jade'en wamp, ja nwindson'ajtim idø'øn jade'en køøm ana'amp. ¹¹ Pøni myajtstutpyts ja tø'øxyøjk ja ñiyaa'y, ka'ap ja y'amajtskit, uk myøøtnagyajpxipts ja ñiyaa'y jøts jadigojk y'amatskjaa'y'attit. Nayide'ents idø'øn ja yaa'dyøjk pyaat'atyiyi ttu'unt.

¹² Yide'ents ø nwami, øy ja nwindson'ajtim jade'en yjagawa'añ, pøni pøn yaa'dyøjk tø tmøøt'amatski tu'uk ja tø'øxyøjk pøn ja janchja'win tkamøøt'ajtp yam ja yaa'y ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja yaa'dyøjk ja tmajtstu'utt. ¹³ Pøni jamts ja tø'øxyøjk tniyaa'y'aty tu'uk ja yaa'dyøjk pøn ja janchja'win tkamøøt'ajtp yam ja tø'øxy ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja tø'øxyøjk ja tmajtstu'utt. ¹⁴ Pø tøxi ja yaa'dyøjk kunuu'kxy tyañ øy ja janchja'win ja tjagamøøt'aty ku ja tø tpiky tu'uk ja tø'øxyøjk pøn ja janchja'win tmøøt'ajtp. Jøts nayide'en kunuu'kxy tø tyañ ja tø'øxyøjk øy ja janchja'win ja tjagamøøt'aty, ku ja tø tpiky tu'uk ja yaa'dyøjk pøn ja janchja'win tmøøt'ajtp. Ku ja kyajade'enit, tum kajanchja'wip u'nkts meets ja m'u'nk m'una'jk wyimbidsømni; ka'ats, pø tøxi Dios ja y'øyjaa'y'ijxyidi Jesucristo køjxp. ¹⁵ Pøni y'amidøøpyts nidu'ugin ja yaa'dyøjk uk ja tø'øxyøjk pøn dø'øn ja janchja'win tkamøøt'ajttip jøts ñawya'kxidit, wants tnawya'kxyidi. Niti ayuujkts tka'ukmidanidit ja yaa'dyøjk uk ja tø'øxyøjk pøn dø'øn ja Dios tjanchja'widip, pø ja'axi ja Dios xamidsojkimp jøts ka' ja tsep uk ja ayo'on nmidsinaa'yindit. ¹⁶ ¿Ja ti me tø'øxyøjk mdanija'wip pøni myiknitso'okp mets ja mniyaa'y ku ja janchja'win ja tkamøøt'aty? uk ¿ti me yaa'dyøjk mdanija'wip pøni myiknitso'okp mets ja mniðø'øxy ku ja janchja'win ja tkamøøt'aty?

¹⁷ Ots jyasa'ji, tum jade'en idø'øn ndsinaa'yint sa ja nwindson'ajtim ttsøky, jøts pøni sa adøm ja juky'ajtin ja tø xmø'øyim nay jade'en sam wyinaty nujky'ajtyim ku ja Dios ojts xwaadsø'yindi. Jade'en øts idø'øn n'ane'empy ma jaty ja janchja'wibitøjkti. ¹⁸ Pøni wyaadsøøpy ja Dios ja jaa'y pøn ja ejxpajt ñe'kxkijxpy myøøt'ajttip sam ja israelit kostumbri, ka'ap ja ttatsø'ødyu'unt, wan ja jade'en ttañ; pøni wyaadsøøpyts pøn ja ejxpajt ñe'kxkijxpy tkamøøt'ajtp, ka'ap ja kuwanikøjxp yikpiktaajkit ja ejxpajt ñe'kxkijxpy. ¹⁹ Wan ja tmøøt'aty uk tkamøøt'aty ja ejxpajt jap ñe'kxkijxpy nugo ku ja Dios ja tpaduujni ja kyutujk. ²⁰ Jade'en idø'øn jaa'y tya'ant sam ja y'ijty t'ixy ku ja Dios y'ejxkajpiyi. ²¹ Pøni nugots øy pøn windsøn mdyimyiktuñiyi sam jaa'y jiyujk tsakaa tjagyepy winet ku ja Dios ojts mwaadsøyi, ka'ats mets ja xkumayjawit ku wine'enin xpaatt ja awa'ats'ajtin. Jatyits idø'øn ja xkupøkt, ka'ap ja jeky xpawinma'aty. ²² Pøn idø'øn wyinaty juy ja jaa'y yik'ejttip ku ja yiktamidsøky jøts ja nwindson'ajtim ja tjanchjawit, ja nwindson'ajtimts ja ixyam myidunip kø'ømdsøky, ka' juy, jøts ja jaa'y pøn jaty jade'en tkayiknajxtip nayide'en ja ixyam ja nwindson'ajtim kø'ømdsøky tmidunidi, ja Cristo ja' tyumbidi. ²³ Janch

tsowi meets ja Dios Teety ja y'U'nk mdagujuyi, paty kidi nugo mnay'ixmachidi jøts ja ka'øchinaa'yin xpadøjkiñidit. ²⁴ Jade'ents migu'uktøjkti, jøts jade'eña'am xyikyø'ødyit ja mjuky'ajtin sam ja Dios tø mbaadyidi ku tø mwaadsøyidi.

²⁵ Tits ø nda'ana'amdip pøn ka'amajtsk jaa'dyi, ka' ja nwindson'ajtim ja sa tnigajpxy; øts idø'øn ixyam ngajpxnaxwampy tu'uk ja nwinmaa'ñ sudso dø'øn yjawi tyuu'baatt tyuu'wetst ja tsinaa'yin. ²⁶ Jade'en ø njawa'añ jøts ja yaa'dyøjk jadi'iñi tya'ant ja'agøjxp ku ixyam ja tsinaa'yin janch tsep janch aduky. ²⁷ Pøni m'amajtskjaa'yits, kidits x'ixa'ay sudso ja mnidø'øxy møøt mnamyajtstu'udit; pøni ka'ats m'amajtskjaa'yi, kidits ja amajtsk'ajtin xpawinmay. ²⁸ Pøni m'amajtskipts ka' me mbøkyuñ; pøni amajtskipts tu'uk kiixe' ka'ats ja nayide'en pyøkyumi. Pøni amajtskidip tsep ja chinaa'yin ja tpaattit; ja'ats øts idø'øn njatsøjkpy ku øts idø'øn jade'en njawa'añ, jøts ja ayo'on xkapaattit.

²⁹ Meets migu'uktøjkti, ja'agøjxp øts idø'øn jade'en nwa'añ ku ja nwindson'ajtim wyingoni. Paty ixyam mdsinaañidit yide'en: Pøn jaty ja ñidø'øxy jam, ja Dios idø'øn ja yja' ja ne'egi tyajotmay'o'jkip jøts ja yjuky'ajtin tyiknaxt ejximdam ja jeexyip nadyu'uk'aty. ³⁰ Pønts yaxtip jidyip, jade'en ja chøønidit sam ja' pøn kayaxtip kajidyip; pøn jotkujk'ajttip xondaktip, jade'en ja chøønidit sam ja' pøn kajotkujk'ajttip kaxondaktip; pønts juudyip kajpxtip, jade'en ja yjuy kyajpxy ja tjawidit ejximdam ja jeexyip tkamøøt'atti. ³¹ Pøn jaty ttaxondip yø naxwii'ñit tsinaa'yin, jade'en ja ñayjawi'yidit sam ja' pøn jaty ja tkadaxondip; jabi kugøxi jøp'amxi yø naxwii'ñit tsinaa'yin y'ity.

³² Ja' meets idø'øn njadamidsøjkpy jøts ka' øy ti nugo xtyimdyajotigø'ødyit ya naxwiiñ. Ku dø'øn ja yaa'dyøjk kya'amajtskjaa'yi, ja nwindson'ajtim ja ja'ayi pyawinmaapy sudso ja tyikjotkujk'att; ³³ kuts ja y'amajtskjaa'yi, ja'ats ja pyawinmaapy sudso ja yjuky'ajtin tpaatt jøts ja ñidø'øxy tyikjotkujk'att. ³⁴ Tigach ja tø'øxyøjk tsinaa'yin tyiknaxy midi ka'amajtsk jøts nayide'en ja' midi amajtsk. Midi ka' y'amajtski ja nwindson'ajtim yja' ja tyajotigøøjyip jøts ja amuum ttamiyøxy ja ñe'kx møøt y'anmija'win; pønts jam ja ñiyaa'y, ja' myijotigøøpy jøts sudso ja ñiyaa'y tyikjotkujk'att.

³⁵ Ka'ap øts ya'at nnigajpxy jøts mee niti xkadyimy'uktunk'atnit, paty øts idø'øn yø nnigajpxy jøts yikxon mdsøønidit sam idø'øn yjapaat'atyiyi jøts ja nwindson'ajtim yja' xmijotigø'ødyit.

³⁶ Pøni jamts ja u'nkteety pøn t'øjya'wip jøts ku yjawi y'øyi jøts ja ñøøx ne'egi y'amajtskit ja'agøjxp ku ja yjawi ja yjumøjt ñaxni jøts ja wyinmaa'ñ tyigatsni, wants jade'en ttuñ pøni øy tjawi, pø ka'axi ja pyøkyi. ³⁷ Pøni jamts jadu'uk ja u'nkteety pøn idø'øn yikxon tpawinmaapy øy tsuj jøts ja ñøøx ne'egi kya'amajtskit, øyts idø'øn ja y'adi'ich jade'en. ³⁸ Paty idø'øn jade'en pøn ja ñøøx tyik'amajtskip, øy adøtsp idø'øn ja wyinaty; pønts ja ñøøx tkayik'amajtskip, jaaktyimwyindøøpts idø'øn ja wyinaty jawaani ku ja jade'en wyinmay.

³⁹ Kutujkøjxp ja tø'øxyøjk tmøøtsøøni ja ñiyaa'y pøni juky'ajtp ja'; pøni o'kp kudigøøpyts ja', øyts ja pøn tmøøt'amatskiñit, nugo ku nayide'en ja yaa'dyøjk ja janchja'win tmøøt'aty. ⁴⁰ Ne'egi jotkujk ja chøønit pøni ka' y'uk'amajtskiñi. Jade'en øts idø'øn ja ngø'ømgajpxwejin nyaky, jøts nmøøt'ajtpy øts idø'øn ndiij ja Dios Espiritu Santo.

8

Sudso ttu'undit ku ja windsø'jk'ñiñ yiktaniwq'adit midi yiktawindsø'jkip ja maxandsaa uk øy ti jadu'uk awanax

¹ Ixyamts ø nnigajpxwa'añ sudso xu'undit ja kaaky tojcx midi tø yiktawindsø'øgi ja maxandsaa. Wa'ats ja njanija'wa'andi sa ja ndu'unindit; ja'ayi ja nugo nnadyamiguejxyindi ku adøm møj nija'wibim, ka'ap ja nmøjpiktaajkyin ku ja tsojkin ja pa'ayo'owin tyikmøji tyikmayi ja winmaa'ñ. ² Pøni jam ja jaa'y pøn nadya'agajpxip ku ja ti yiin wan tnijawi ja'agøjxp ja jade'en wya'añ ku ja kyawijyi kyakejyi. ³ Jabi y'ejxkajpyts ja Dios ja' pøn ja tsojkip.

⁴ Sudsots idø'øn xu'undit, ¿mga'adyip mjøø'kxtip idø'øn ja' midi ja maxandsaa tø yiktawindsø'øgi? Nnija'wa'amp ndøm ku ja maxandsaa kyaDiosi, pø tu'ugyixi ja Dios. ⁵ Jaa dø'øn ja jaa'y pøn wandip ku dios ja janch namaydi ya naxwiiñ jøts jam tsajpjotp, ja'agøjxp idø'øn may ja dios ja jaa'y twindsø'øgidi ku jade'en tja'gyukidi, ⁶ tu'ugyits adøm ja nDios, ja Dios Teety. Ja Dios Teety idø'øn tuki'iyi tø tyik'øyi, jøts ja' adøm idø'øn nnijuky'ajtyindip jøts ja ndamiyojxin ja ndsinaa'yin. Jats tu'ugyi nayide'en ja windsøn, ja nwindsøn'ajtim Jesucristo, ja'agøjxp idø'øn tuki'iyi tø y'øyi, jøts ja'agøjxp adøm idø'øn nayide'en tø xyikøjyim ja Dios.

⁷ Jats may ja janchja'wibi jaa'y pøn tkaja'gyukidip ja yjade'embis tsinaa'yin. Pøn jaty y'ijty ttawindsø'jkidip ja kyaaky ja tyojkx ja maxandsaa ku ja icyam ja'abi tkaydi ttojxkti jade'eñim ja wyinmaydi ku ja nay ja'abi dios yja' jadigojk ttawindsø'øgidi; kuts ja tpawinmaadyøkidi jøts ja tpøkyjawidi ja'agøjxp ku ja tkaja'gyukidinim. ⁸ Kidi ja' adøm inet jawaani øy nwibejtint pøni kaa'yimp jøø'kximp, nayi ka'ats adøm inet jawaani ka'øy nwibejtint pøni ka' adøm ngaa'yim. ⁹ A'ejxits mee m'adø'øtst, o meets ja xka'aty xojkxt jøts ka'ap ja mmigu'uk ja xukpøkyjawidit, pøni pyøkyjawidipnim ja tuki'iyi ja'agøjxp ku ja yjanchja'win ja ka' yikxon tyuu'døkidinim. ¹⁰ Ku n'ukpiktaajkint, yam mets ja mjanchja'win tø myøji myayi jøts m'a'ejxnaxit tu'uk ja mmigu'uk pøn okwa'añ ja yjanchja'win tyiktso'ondakpnim, ku mets jam mdsøøni agujk jotkujk jøts xji'kxy ja kaaky ja tojkx midi tø yiktawindsø'øgi ja maxandsaa uk øy ti jadu'uk awanax, ¿ka'ats idø'øn ndejin mbaduu'miyit nayide'en ja mmigu'uk pøn m'a'ejxnaxiyip? ¹¹ Jøts jade'en xyiktuu'tigø'øty ja mmigu'uk ja'agøjxp ku kyatiynim kyaduda'akñim ja yjanchja'win, yam ja Cristo ja tø yjagu'oogiyi. ¹² Jade'ents idø'øn, ku ja pøky jade'en xu'undit jøts ja mmigu'uk yjanchja'win xyik'amutskiyidit, ja Cristo meets idø'øn kø'øm jade'en mmidundigøøpy. ¹³ Pøni ndukpaajtyimpts tam adøm jade'en ja nmigu'uk ja tyuu'tigøø'yin ku yikjii'kxy ja maxan wyindsø'jk'i'ñ, paat'ajtyiyps ne'egi jøts ja ka'ap jade'en n'uktu'una'ant jøts ja nmigu'uk jade'en ja pøky ngadani'ejxa'ant.

9

Ti dø'øn paat'ajtyip ja nwindsøn'ajtim kyudanaabyi

¹ Tø øts idø'øn ja Dios xaguwan jøts øts ja ngudanit jøts ja kyajpxy y'ayuujk ja nnigajpxiyit, nipøn jaa'yts ø xkapaat'aty jøts øts ja ndukmado'ot pøni ti jaty ø ndumpy; pø tøxi øts ja nwindsøn'atim Jesucristo n'ixy, meetsts idø'øn ndunkjøøjp'ajtpy ku øts ja nwindsøn'ajtim tyunk nbadøjkiiyi. ² Jaa abiky ja jaa'y pøn ø xka'ejxkaptip jøts ku øts ja Dios xkudanaabyi'aty; meetspits mbaat'ajttip jøts øts jade'en x'ejxkaptit, pø øtsxi meets ja nwindsøn'ajtim tø ndukmibiky, kuts meets jade'en tø ndukmadøy ja janchja'win jade'ents idø'øn wyingaxi'iky jøts ku øts ja Dios njanchkudani.

³ Yide'en øts idø'øn n'adsøy pøn jaty ø xpagajpxtip: ⁴ Xpaat'ajtp ø nyikmo'ot ja kaaky ja uujuin, ⁵ jøts xpaat'ajtp ø nayide'en jøts ja nnidø'øxy midi tjanchja'wip ja Dios nbawaamit sam ja jadu'ukpi kudanaabyitøjk ttundi, møøt ja nwindsøn'ajtim y'ajch y'uch jøts nayide'en sam kø'øm ttuñ ja Pedro. ⁶ ¿Ja ti øts yø møøt ja Bernabé xpaat'aty jøts øøts ja ngaaky ndojkx nnidu'unt? ⁷ ¿Ma dø'øn ja soldadi kø'øm y'uknay'ijxyiyi? ¿Ma dø'øn ja jaa'y tka'ukjii'kxy pøni ti tø tni'ipy jøts pøni ti tø tyikpidi'iky? ¿Pøn idø'øn nugo ukuborreegi'ajtp jøts niti kyagida'anxyiyi? ⁸ Kidits mwinnmaydi ku øts jade'en kø'øm n'awijy, nayide'enxi ja Moisés kyutujk wya'añ. ⁹ Pø yide'enxi jap jaabyety y'ity nøky kyutujkijxpy: “Kidi ja mdsakaa ajeñ xyik'okti ku ja xyiktunwa'andit.” Kidi ja'agøjxp ja Dios jade'en wyaañ ku ja tsakaa ja ja'ayi tjomay'aty, ¹⁰ pø adømgøjpxxi dø'øn ja ejxpajtin ja jade'en tpikta'aky. Paty ja kutujk jade'en yikjaay ku adøm ja y'øy'ajtin ja pya'ayo'owin ja xuktanitsoojkim; pø nayide'enxi ja jii'kxy ja pyaat'atyiyi pøn yuup tump sam ja' pøn yikpidi'jkpy ja pikta'aky. ¹¹ Tøts øøts ja Dios kyajpxy y'ayuujk namyayi nni'ipy ma meets

jam, ¿ka'ats idø'øn y'øyi jøts mee n'amido'ot ja pudøjkin? ¿Ti øø ndajujky'atp ya? ¹² Pøni m'amidooyip mee tigati ja wenk jaa'y jøts meets ja xmø'øy, jawaani kajats øø xpaat'aty.

Øyts øøts ja jade'en xjapaat'aty, ka'ats øøts ja nbayø'øy kuwani; nmidanaapy øøts ja' pøni ti øøts xjajtp pøni ti øøts xka'ejtxip jøts øøts jade'en ngayiktuu'duky ja Cristo y'ixpøjkin ja Cristo y'ana'amin. ¹³ Mnija'wip meets ku ja jaa'y pøn tsaptøjkjotp ttundip, tum ja' ja tyajujky'ajttip pøni ti jam tøjkip. Pøn ja altajr jam t'ejx'ejttip ma ja jiyujk jam y'øøky midi windsø'jkin'ajtp, ja'abi tsu'uchts ja yikmøødyip. ¹⁴ Nayide'en ja nwindson'ajtim Jesucristo tø yjanimy jøts ja tyunk ja ttajujky'attit pøn ja nitsoojkin ayuujk tnigajpxtip. ¹⁵ Nijuuni ja'abi winmaa'ñ nugo ngadamajada'aky, ni ja'agøjxp mee nganjayi jøts mee xmo'ot o tigati. ¡Wan øts jade'en ne'egi t'øøky, pø ndajotkujk'ajtpyxi øts ku øts jade'en ndsøøni!

¹⁶ Kuts idø'øn ja Dios y'øy'ayuujk y'øwynmaa'ñ njanigajpxy, ka'ats øts ja nnadyamøjpikta'agyiyi, pø kø'ømxi øts ja tø ngupiky ku øts ja tø nyiktaguwani. ¡N'ayøø øts ku øts nganigajpxt! ¹⁷ Pøni kø'øm tsojkingøjxpts øts nduñ, n'awijxpyts øts ja n'øy'ajtin. Ka'ap øts jade'en ja ndunk, jabi kø'ømxi ja Dios xwi'ixy ku øts ja øybi tunkjøjxp xmø'øy jøts jatyi ngupøjkøjy. ¹⁸ Ja' øts idø'øn ndajotkujk'ajtpy ku øts ja nitsoojkin ayuujk nnigajpxy jøts ø niti mijuu'ñ nga'amidøy, øy ja jade'en xjapaat'aty jøts øts ja' ndajujky'att.

¹⁹ Ots ø nipøn njagamiduñ, tøts ø kø'øm nadyamidsøkyi jøts mee nmidu'unt, jøts ja Cristo jade'en ndukpaattit. ²⁰ Kuts ja israelit jaa'y nmøøtsøøniidi nayide'ents ø ndsøøni sam ja chøøniidi jøts øts ja Cristo jade'en ndukpaattit; ja Moisésxi øts idø'øn ja kyutujk n'atskupøjkyp øy øts ja'abi kutujk xjagapaat'aty. ²¹ Kuts øts abiky nnøjkxmi ma ja Moisés kyutujk tkayiktuujniidi, nayide'ents ø ndsøøni sam ja chøøniidi, øy øts idø'øn ja Dios kyutujk ja'ayi nyikmøjtøjkiyi, pø ja Cristoxi øts ja y'ana'amin nbaduujnip. ²² Kuts ø nmøøtsinaamyidi pøn ja yjanchja'win tyiktuu'døjkyidipnim, ka'ap øts ja nugo nyik'amutskidi, ni ja namyikaxi'ajtin ngayiktuñ, nayide'en ø tø nnabyikta'agy sam ja'adi jøts øts ja jade'en nyikjotkujk'atti. Tøts idø'øn tu'uk tu'uk nja'gyuki pøni sa ja chøøniidi, jøts øts ja jade'en ndukpaattit ja Cristo. ²³ Ja'agøjxp øts jade'en nduñ ku øts ja nitsoojkin ayuujk nnigajpxwa'añ, jøts ø wyinaty nayide'en nbaaty ja kunuu'kxin ja øy'ajtin møøt ja'adi pøn jaty tjanchja'widip ya'atpi ayuujk.

²⁴ Mnija'wip meets ku jaa'y pyujtkejpxti, namay ja yjaputti tu'ugyits ja pujtkejpxpi myajada'aky jøts ja tpiky ja ñibuty. Paty idø'øn nayide'en mbuttit jøts ja øy'ajtin xpaattit. ²⁵ Pøn jaty tuki'iyi t'a'ejxigyøjxp ku kyuyatwa'añ jøts kyuyajta'aky yikxon, ka'ats ja sa jyaty ku tyimgyuyajtni. Ja'agøjxpts ja jade'en kyuyata'akti jøts ja tpøktit ñiguyaty midi idø'øn ja kuyajtpi pyøjktip ku ja myajada'akti, jøts ka'ap ja xemikøjxp y'ity; ja xemikøjxp pikta'aky adøm ya naxwiiñ nbatnajxyim midi wyinaty yikmøø'yimp xemikøjxp. ²⁶ Nnija'wip øts wa'ats midi'ampy ø nnijkxpy ka' øts nugo nbuty wimbeets kugoots; nbaatp øts idø'øn ja' midi ø nbaatwampy, ka' øts nugo n'adi'ich. Ka' øts jade'en nugo ngojxwidity jøts øts nika' ti ndukpety. ²⁷ Jawyeen øts yikxon nnay'a'ejxiyi jøts øts nne'kx ndukmibiky pøni sa øts idø'øn ja ndsøky pøni ti øts idø'øn ndunwampy, jøts øts kidi nøjkx jawyeen tsø'ødyumbim njaty Dios wyingujkp yam øts ja jaa'y tø ndukmadowdi sudso'ampy ja nitsoojkin ja pa'ayo'owin ja tpaattit, jaa ku øts ne'egi nga'ukpøjknit ja niduñ.

10

Ja'yikni'ana'amp jøts ja maxandsaa uk øy ti jadu'uk awanax kyayikdiosjawit

¹ Mnijawidip migu'uktøjk idø'øn ku ja møjaa'dyøjk niduki'iyi ja Dios ja yoots tyaduu'wajidøø, jøts nayide'en niduki'iyi ja Dios øy tyuktanajxidøø ja Tsajpts Mejy. ² Jade'en idø'øn ja ndejint niduki'iyi tpattøø ja nøbajtin jøts ja tmøø'tetti Moisés. ³ Niduki'iyits nayide'en tjøø'kxtøø ja tsajpjotpit jii'kxy, ⁴ jøts nayide'en niduki'iyi t'uktøø ja tsajpjotpit nøø. Pø ja'abi nøøjxi ja y'uktip midi jam mu'tp tsagøjxp midi payø'oyidip. Ja

Cristots idø'øn ja myøk'ajtin ñanky'ejxip jam tsagøjxp. ⁵ Namayts ja'adi pøn ja Dios Teety tkamimadoodøø jøts ja jamyi abak etjotp y'oo'knidøø.

⁶ Ejxpajtin adøm idø'øn ya xmø'øyindip paty idø'øn ja jade'en yjatti jøts adøm ja ka'øybi tsinaa'yin ngatsojkint sam ja ttundi. ⁷ Paty kidi meets ja maxandsaa xwindsø'jkyinidi sam ja ttundøø niwinaagin, jøts sam idø'øn ja yiknigajpxy nøkyjotpy: “Winets ja jaa'y kaabyi ukpi y'ixakti jøts twinxødundi ja maxandsaa.” ⁸ Ka'ap adøm idø'øn xem yam nugo nnamyøøt'ajta'ant kija' uk tu'ugyi ja amajtsk jaa'y tyik'ettit ja ñiyaa'y uk ja ñidø'øxy, sam ja jaa'y tkamøjpiktaktøø winaagin ja y'amajtsk'ajtindi, jøts ja'ayi tukxøøwyi tku'oo'kyidi ja pyøky ni'ee'pxigøøk mil. ⁹ Ka' mibaat ja Dios tyuda'aky'ajtin ndana'ejxin uk nugo nwinmaa'ñ'ejxwa'anin sam ja jaa'y winaagin y'adøtstøø midi ja tsaa'ñ ojts yikxon chu'tstigøyidi. ¹⁰ Jøts nisa xkatejtiti ja Dios pøni sa ja mduñidi. Ka'ap jade'en m'adø'øtstit sam winaagin y'adøtstøø ku ja tka'ødyejti ja Dios, ja' midi ojts tyagida'agyidi ja ayo'on ku Dios ja tyumbi tkejxy midi ja o'jkin ojts tyukpaadyidi.

¹¹ Adømgøjxp idø'øn jade'en ja møjaa'dyøjk yjajttøø kyubattøø, jøts nay adømgøjxp ojts jaabyety jade'en tyañ jøts yø n'ejxpajt'ajtint jøts jade'en ngadsinaa'yint sam ja chinaadyøø ixa ja nwindson'ajtim Jesucristo wyingoni ja tyiidyu'unin xøøw. ¹² Pøn jaty yjaw i nisa kajattip, pøn dø'øn yjaw øy tsinaadyip, wants ja tnay'ejx'ityidi jøts ja kyawinmaa'nmya'attit. ¹³ Nay ja ayo'on midi ixyam mdanajxtip ku yik'ejxmatsti ja mjanchja'windi pøni mjanchpadundip idø'øn uk ka'; nayja'abi ayo'on idø'øn øy pøn tø tpaaty tø t'ixy. Øyts meets ja Dios x'ajot'att jøts ja m'agø'dukidit m'axajtukidit jøts niyjøjxk xanaxtit ja ayo'on midi kamidanaañi. Kuts wyinaty ja ayo'on tyimyjawani møk mbaadyidi, ja Diosts mmo'ojidip ja wyinmaa'ñ sudso ja xmimada'aktit.

¹⁴ Paty migu'uktøjk idø'øn ja maxandsaa uk jadu'uk øy ti awanax xka'ukwindsø'jkiñidit, ixmatsti yø yjade'emb i tsinaa'yindi. ¹⁵ Wa'atsxi xnimadowdi sa mee nnøjmi wijy kejy ti sa m'ejxidi. Køømts yikxon x'ukpayø'ødyit pøni janch kidi yjade'eni sa ø nwa'añ. ¹⁶ Ku adøm ja tsapnøø kunuu'kxy n'uujkyindi ja Dios adøm idø'øn jade'en nwindso'øjka'am, ja Cristo dø'øn ja ñi'jpy namyayi n'uujkyindip; kuts adøm ja tsapkaaky nyikwa'kxyindi ja Cristots adøm ja ñe'kx namyayi nji'kxyindip midi ja y'ø'y'ajtin xukpaajtimp ku ja ojts xku'o'jka'am jam kruskøjxp. ¹⁷ Øy adøm njanamaya'am tu'ugyi adøm ja tsapkaaky ndamujkyindi, patyts adøm jade'en amuum tu'ugyi ni'ijtyindi Dios wyingujkp pøn jaty tjanchja'widip ja Cristo.

¹⁸ Ejxtits ja Israelit kajp ma ja jaa'y tkaydi tjøø'kxti ja windsø'jk'i'ñ; ja'ats idø'øn ja ñamyayi tu'ugyi yik'ejtidi, tu'ugyi ja tumjade'en wyinmaydi nixem niyam. ¹⁹ Ka'ap øts idø'øn nnimy ku ja maxandsaa uk jadu'uk øy ti awanax yjujkyidi, jøts ka'ap ø nnømi ku ja tsu'uch jawaani øy midi ja yiktawindsø'jkidip. ²⁰ Yide'enxi øts idø'øn ja njatijy, pøn jaty ja Dios tkanija'widip jøts ja windsø'jkin ja tpikta'akti tsamaxan uk øy ti jadu'uk awanax wyindum y'agø'øm, ja miku' dø'øn ja wyindsø'jkidip jøts ka'ap ja Dios; ja'ats meets idø'øn ngadamidsøjkpy jøts ja miku' yja' xkupøjkidit. ²¹ Ka'ap ja mbaat'atyidi jøts mee majtsk jøøjp mdsøønit yam meets ja nwindson'ajtim ñi'jpy xja'uujkyi, jøts nayide'en x'uujkmiyidi ja miku' ñøø; yamts meets ja nwindson'ajtim ñe'kx xjøø'kxiyi jøts ja miku' yji'kxy xjøø'kxmiyidi. ²² ¿Ja ti adøm tø ndøjkiñam? ¿Nugo taguyajtpi jøts jade'en ja nwindson'ajtim nugo nyik'ambøjkint? ¿Ja tyimyabaat adøm nmø'ajtin jøts adøm ja ne'egi nyik'amutska'ant?

Ka'ap ja ngø'øm ja n'ixa'ayint, ja tsojkin ja pa'ayo'owin ne'egi ndamiyojxin ja nmigu'uk

²³ Janch ja jade'en idø'øn sam ja ayuujk wya'añ ku o tigati nduu'nint, nipøn ja xkadabayø'øyint; øy dø'øn ja jade'en yjawa'añ, ka'ats tuki'iyi y'ødyuñ pøni ti yiktump; jabi ka'axi ja Dios yjanchja'win jade'en tuki'iyi xatøjka'ant. ²⁴ Ja nmigu'uk adøm idø'øn ja y'ø'y'ajtin n'ixaajya'amp jøts ka'ap ja ngø'øm ja' nugo ndunk'ajtint ja'ayi.

²⁵ O mee tigati xjөө'kxt pөni ti jaty mjuudyip maayjotp, ka' xyiknidөwidit ma ja tyiktsoondi, ku nugo mnadyagumayidit; ²⁶ jabi nwindson'ajtimxi ñaxwii'ñit yө' jөts tuki'yiyi pөni ti jaty ya ejtp naxkijxy.

²⁷ Pөni mwaajidipts ja jaa'y kaabyi pөn ja janchja'win tkamөөt'ajtp, kupөkti panөjkxti jөts kaydi jөө'kxti pөni ti myikmөөdyip jөts ka'ap ja xyiktө'өdit pөni ti pөni pөn yik-tawindsө'өgi, jөts niti xkagumayjawidit. ²⁸ Kuts jam tu'ugin ja jaa'y jotmөñ wya'ant ku ja'abi tsu'uch ja maxandsaa тө yiktawindsө'өgi, ka'ats meets ja xjөө'kxt, jөts ja mmigu'uk xkanankñagyumayiyidit ku ja nugo ñabyөkyjawiyidit ja'agөjxp ku ja janchja'win ja okwa'añ tyiktөwdinim tyiktuda'aktinim. ²⁹ Ja mmigu'uk өts idө'өн ja wyinmaa'ñ nnigajpxip, ka' mets mja'.

Jamts pөngapөn tyiktө'өdit jөts wya'andit: “¿Sudsots ja wenk jaa'y nyikmөjtөjkiyit ne'egi ja wyinmaa'ñ jөts өts nja' nika'?” ³⁰ Jabi n'ajot'ajtpyxi өts ja Dios ku ngay nji'kxy, ¿tits өts idө'өн xabagajpxtip kuts ja'abi kaaky ngupөkt?” ³¹ Ots ja yjade'eni, pөni mgaadyip m'uktup uk pөni ti jatyts mdundip, tum ja Dios көjxp ja xu'undit jөts ja jade'en xyikmөjtөkidit. ³² Kidi mee xuñ midi ja mmigu'uk tyadigө'өdyip: ni ja israelit jaa'y jade'en xkatu'undit, ni ja' pөn ka'israelit jaa'y'ajttip, ni ja' pөn ja Dios Teety тө myө'өyidi ja janchja'win jөts ja nwindson'ajtim tmibөjktit. ³³ Kuts өts, ja' ө n'ixaapy sudso өts ja nmigu'uk nyikjotkujk'att; ka' өts ngө'өm өy'ajtin n'ixa'ay, jөts өts nmigu'uk yikxon chөөnidit jөts wyinaty ja nitsoojkin yikmo'odi.

11

¹ Tundi nayide'en pөni sa ө nnajtstuni, pө nay ja Cristoxi ө nni'ejxuujtip ja chinaa'yin.

Sa yjaa'y'attit ja тө'өxyөjk ma ñamyukyidi ja janchja'wibidi

² Migu'uktөjkti njanchtakajxakpy meets ku ө xja'myatsti, jөts ku nayide'en xpadundi ti jaty тө ndukmadowdi. ³ Ja'ats ndsөjkpy jөts xja'gyukidit ku tu'uk tu'uk ja yaa'dyөjk ja Cristo ñigubajk'aty, jөts ku ja yaa'dyөjk ja ñidө'өxy tnigubajk'ajtmi jade'en sam ja Dios Teety tnigubajk'aty ja Cristo. ⁴ Pөni ka' ja yaa'dyөjk ñagyujuptu'udyi ku Dios t'ajot'aty uk kuts ja Dios yja' tjanigajpxi, kyamөjpiktakpy idө'өн ja Cristo ja' pөn nigubajk'ajtiyip. ⁵ Pөni ka'ats ja тө'өxyөjk ñagyujuuxyi ku ja Dios t'ajot'ajtpi tyөki, uk kuts ja Dios yja' tjanigajpxi, kyamөjpiktakpyts idө'өн ja ñiyaa'y ja', nayide'enxi ja tpatni kidi ja jeexyip тө ñagyukaa'ptu'udyi. ⁶ Pөni ka'ap ja тө'өxyөjk ñagyujuuxyi, wants ne'egi tnagyuka'aptutkixyi. Pөni tyatsө'өdyumpts jade'en ja kyubajk keepy, wants ne'egi tpiktä'aky ja kyujuux. ⁷ Nagyujuptu'udip idө'өн ja yaa'dyөjk pө ja Diosxi ja myөj'ajtin ja chuj'ajtin ja yiknigaxө'jkip ku ja nayide'en тө yik'ө'yiyi sam ja Dios t'ixy. Jөts ja тө'өxyөjk ja ñiyaa'y myөk'ajtin ja yiknigaxө'jkidip. ⁸ Kuxi ja Dios tyik'өyiyi'ñ pө ja yaa'dyөjkxi ñikөjxp ja Dios tju'jty ja тө'өxyөjk. ⁹ Yaa'dyөjkөjxpxi ja тө'өxyөjk y'өyiyi'ñ, jөts ka' тө'өxyөjkөjxp ja yaa'dyөjk y'өyiyi'ñ. ¹⁰ Patyts idө'өн ja тө'өxyөjk ñagyujuuxit jөts ja jade'en tyiknigaxө'өkt ku ja yaa'dyөjk ja y'ane'emyi, jөts ja Dios y'ankilis nayide'en yjotkujk'attit. ¹¹ Nnija'wa'ampts adөm, ku ja janchja'win nmөөt'ajtyindi, ku ja yaa'dyөjk jөts ja тө'өxyөjk kuwani tu'ugyi y'etti. ¹² Janch tiyxi dө'өн ja' ku dө'өн ja тө'өxyөjk y'өyiyi'ñ, ja yaa'dyөjkts ja Dios yiktuun, nayide'en yjanchi ku тө'өxyөjk ñikөjxp kye'exy yaa'dyөjk ya naxwiiñ; ja Diosts jade'en wamp.

¹³ Kө'өm mee x'uknigajpxt pөni өyide'en ku ja тө'өxyөjk ja Dios t'ajot'att kuwa'ats, jabi ka'axi ja y'өyi. ¹⁴ Tsө'өdyumbim ja yaa'dyөjk pyidsimy ku ja wyaay ja tyikyon'anaxy, ka'ap adөm jade'en ngostumbri yө'өyindi. ¹⁵ Yiktakajxakpts ja тө'өxyөjk ku ja wyaay ja yөñ, pө төxi ja yiktanibiktaagi jөts ja wyaay ja kyubajk ttanipett. ¹⁶ Pөni pөnts tkaja'gyukiwyamp sa өts idө'өн тө njawa'añ, ñijawip idө'өн ja' ku өөts ka'ap ja wenkpi winmaa'ñ nyiktuñ jөts ni ja' jade'en kyawinmaamyidi pөn jaty ja Dios тө wyaamukyidi wyejtsmukyidi өy madsoo, ja'agөjxp ku ja тө tjanchjawidi ja Dios.

Ku kya'ukyikmøjpiktakni ja nwindson'ajtim kyaajyk y'uujkik midi ja ñajstunip ku ja y'a'ux'ajty

¹⁷ Ku meets yam nnijayi kidi ngajxa'akwampyip meets, ku yjawi mjanamyukyidi niwine'en ja mga'opyidsø'ømxiyidi jøts ni mga'ødyuñidi ja yjawi. ¹⁸ Jade'en øts ja jaa'y xumdamimadya'akti kuk mee mjanamyukyidi mnawya'kxibik meets jam jøts mganamyee'kxyidi; nmibjkpy øts idø'on, pø jade'en idø'on jam yjanchjaty. ¹⁹ Kuwanidsik idø'on mnawya'kxidit jøts idø'on ñigaxø'øktit pøn idø'on Cristo yja' yjanchpaduujnidip, jøts pøn idø'on nugo nadyejidip jøts ku Cristo ja tpadundi. ²⁰ Kuts meets idø'on jade'en mganamyee'kxyi, nika'ats meets ja nwindson'ajtim Jesucristo y'a'ux x'ukja'gyukiniyi, ni xkanijawidi pøni sudso yiktuñ. ²¹ Anaxukpimxi meets jam kø'øm a'ux xninijkxy ku ja ka'ayin tpaaty, jamts muum kyaku'uxyidi jøts muum nugo tyimy'ukmuktigøøñidi. ²² ¿Ti ka' meets mdøjk te ma mga'adyit? Mgamø'ejxtipxi dø'on ja janchja'wip jaa'dyi ku jade'en m'adø'østi, jøts namyikaxi mwinbidsømdi ku ja mmigu'uk pøn ayoodip jam xwingayidi, jøts ja nugo xuk'ayoojidi. ¿Sats meets idø'on nnøjmit? ¿Ndsachkajxa'akp meets idø'on ku jade'en m'adø'øtsti? ¡Nijuuni xøøw meets ya'atpi ngadakajxa'akt!

Ku ja nwindson'ajtim yjaak'uk'a'ux'ajtni møøt ja pyabøjkpøtøjk

²³ Pø ja nwindson'ajtimxi ø kø'øm tø xmø'øy midi mee tø ndukyikyujy. Ku dø'on ja nwindson'ajtim Jesús wyinaty yikøyakwani ux, nay ja'abi uxts idø'on ja tnixajiyiñ tu'uk ja tsapkaaky, ²⁴ kuts ja Dios Teety t'ajot'ajty jøts tkajxajky, winets ja t'adujkpajky ja tsapkaaky jøts wyaañ yide'en: “Kaydi, øts idø'on ya'at nne'kx midi meets mnitsoojkingøjxp inet yikøyakp. Mdu'undip idø'on ya'at jade'en jøts øts xja'myajtspaj'tattit.” ²⁵ Kuts idø'on ja wyinaty tø y'a'ux'atti ixjats ja uujk'iñ tu'uk tnixajiyiñ jøts yide'en wyaañ: “Ya'at tsapnøø'uujkin idø'on icyam tãmp ejxpajt ku ja Dios Teety ja wyanda'aky tyik'aduky sam ja ttami'awa'aniiñ ja naqxwii'ñit jaa'y ja nitso'ok'ajtin. Ixyamts idø'on ja cho'onda'aky ku øts nni'jpy inet wyidsu'unt wyidaxt. Kuts ya'at tsapnøø'uujkin xumitu'undit, øts nja'myajtsingøjxp yø x'adunidit.” ²⁶ Jade'ents migu'uktøjk idø'on, ja nwindson'ajtim mee mja'myejchp ku meets ja tø mgu'oogiyi ku jade'en ja tsapkaaky xka'adyit midi namyayi ñe'kx'ajtpy, jøts ku ja tsapnøø jade'en x'ukunaxit midi ja namyayi ñi'jpy'ajtpy kunim ja mye'ent jadigojk.

Sudso ja nwindson'ajtim kyaajyk y'uujkik yikupøkt midi ja ñajstunip ku ja y'a'ux'ajty

²⁷ Ja nwindson'ajtim Jesucristo yjamidundigøøpy pøn idø'on yikxon tkajøø'kxp tka'uukp ja nwindson'ajtim ñe'kx jøts ja ñi'jpy. ²⁸ Patyts idø'on yikxon jawyeen xpawinma'adyit sa ja mdsinaa'yin xyikyø'ødyi, namga'anim wyinajty xni'awidi ja nwindson'ajtim ñe'kx jøts ja ñi'jpy. ²⁹ Ja kyø'øm ayo'onxi ja y'ixaapy pøn nugo tni'a'wip ja nwindson'ajtim chapnøø'uujkin. ³⁰ Ja'agøjpxxi dø'on may ja mmigu'uk pa'amøøtti jøts kajotmøjkti, jøts muum tø y'ookti. ³¹ Kuts adøm kø'øm a'ejxi ndu'unint, ka'ats ja nwindson'ajtim jade'en xidyu'unint. ³² Kuts adøm ja nwindson'ajtim xidyu'uñim ja'agøjxp ja ttuñ jøts ja xukja'gyukant jøts ngamøøtkudigø'øyindit ja pojkpõtumbi jaa'dyi midi tkajanchja'widip ja Dios.

³³ Paty migu'uktøjk idø'on, ku mnamyukidit jøts ja nwindson'ajtim ja chapnøø'uujkin x'atsja'myatsidit, nay'awexidi jøts tu'ugyi mdsapnøø'uuktit. ³⁴ Pøni jam pøn yu'øøky, wan jami ne'egi kyø'øm tøjkiotp t'ukay, jøts ja Dios wyinaty kyadukuwanjatiyi ku ja tsapnøø'uujkin ja nugo tyikwa'ant nanktyamu'ugi nanktyaku'uxi. Midi'ibi jaty myik-tøødip jaanim øts ja wyinaty nnigajpxy ku mee n'ats'ext.

12

Ja wijy'ajtin midi ja Dios Espiritu Santo yajkpy

¹ Migu'uktøjkti, jaa ja ayuujk midi ø ndsøjkpy jøts meets ja xnijawit ku Dios Espiritu Santo tyaky ja winmaa'ñ ja wijy'atin jøts ja tmø'øy ja jaa'y kija'.

² Mnija'wip mee ne'egi wa'ats ku mee wyinaty xkamibikñim ja nwindson'ajtim Jesucristo, ja maxandsaajimts meets tu'uk tu'uk y'ijty ja'ayi mwindsø'jkidip. ³ Paty meets yam ndukmadøy jøts xnijawidit ku pøn wya'ant: “iMiku' yø Jesús!” kidi ja Diosip y'Espiritu Santo ja wyinaty jade'en yikwaajniyip. Uk jadu'uk pøn nugo wyamit: “iJa Jesús idø'on møy windsøn!” tiyts ja wyinaty yjanchwa'añ pøni Dios y'Espiritu Santo ja wyinaty jade'en yikwaajniyip pøni ka'ats myigajpxigøøpy Dios ja wyinaty.

⁴ Mayjøøjp idø'on ja jaa sa pøn øy tigati tjaty, jøts kija' ja yikmøøt'aty pøni sa pønjabøn ja wijy'ajtin tø yikmø'øy, tum Espiritu Santo wyingujkpts ja chøøñ. ⁵ May tunkjøøjp yikmøøt'aty, tu'ugyits ja nwindson'ajtim Jesucristo yiktamiduñ. ⁶ Kawinaak jøøjp ja ødyunk nmøøt'ajtyindi, tu'ugyits ja Dios ja xmø'øyindi. ⁷ Ja Dios idø'on ja ejxpajtin tu'uk tu'uk tmøøpy ja jaa'y, jøts idø'on ja tyiknigaxø'økt ku ja Dios Espiritu Santo ja tmøøt'aty, jøts ja niduki'iyi yikta'øy'att. ⁸ Dios Espiritu Santo køjxp idø'on ja Dios Teety ja jaa'y tmø'øy ja wijy'ajtin jøts ja tiy kyajpxwejtít, jøts nayide'en ja jaa'y tmøømyi ja xpiiky'ajtin jøts ja øy yik'ixpøjktit. ⁹ Jamts ja jaa'y pøn ja Dios Espiritu Santo janch møy jøts janch møk ja janchja'win myø'øyidi, jamts pøn yikmøødyip ja øybi møk'ajtin jøts ja pamaa'y tyiktso'oktit. ¹⁰ Jam pøngapøn tmø'øy jøts ijxyimbi ka'ijxyimbi ja ttu'unt, jøts jam pøn myøøpy jøts ja Dios kyajpxy Dios y'ayuujk ja tnigajpxidit; jamts ja' pøn ja Dios tø tyamidsøjkyidi jøts ja t'ejxkaptit pøn jaty ja ka'øybi winmaa'ñ tyiktundip jøts pøn ja øybi winmaa'ñ tmøøt'ajttip; jamts nayide'en pøn tø yiktamidsokti jøts kawinaak ja ayuujk tkajpxtit midi ja myigu'uk kyakajpxtit; jamts ja'adi pøn tnimadoodip wa'ats ja ja'abi ayuujk jøts ja tnigajpxti ti dø'on ja tyijpy. ¹¹ Tu'ugyits idø'on jade'en y'adi'ich ja Dios Espiritu Santo, jøts idø'on ja tyikwa'kxy ja wijy'ajtin pøni ti dø'on ja pønjabøn tyukjatwampy kø'øm ja tø ttanibiktaagi.

Ja nwindson'ajtim tnigubajk'ajtp niduki'iyi ja jaa'y pøn tjanchja'widip ja Dios

¹² Jade'en idø'on ja Cristo n'ukpiktaajkint sam tu'uk jaa'y ñe'kx midi janch may tanibiktaagi tum tigach; øts idø'on ja kø' ja teky kija' ja tunk tø yiktanibiktaagi, tu'ugyi ja ñe'kx ja y'ity. ¹³ Nayide'ents adøm idø'on øy yjapøni, yja'israelit jaa'yi uk yjaga'israelit jaa'yi, yjagreciit jaa'yi, yjamidumbi jaa'yi uk yjanitøøky jaa'yi, ku adøm idø'on tø nnøbejtyim tu'ugyi adøm idø'on ja ne'kx namyayi nyik'øya'am Dios Espiritu Santo køjxp; jøts adøm jade'en ja tu'uk tu'uk tø xatøjka'am.

¹⁴ Ka'ap ja ne'kx tukjøøjpyi tmøøt'aty midi jaty ja yiktumpy, pø may jøøjpxi ja tmøøt'aty. Jade'ents ja y'amuum'aty ku ja ka'pxy tmøøt'aty ijxyim ka'ijxyim. ¹⁵ Øy yø teky yjawa'añ: “Ka'ap ø nduñ nayide'en sam ja kø' paty ø nipøn xkatunk'att”, kidi ja'agøjxpts ja kya'ukpaat'ajtniyit ja ne'kx. ¹⁶ Uk y'ukwamit inet ja tatsk: “Ka'ap øts ja ween tyunk ndujni paty ø nipøn xkatunk'att”, nigidi ja'agøjxppts ja ne'kx ja myajtstuujtneyit. ¹⁷ Ku jeexyip tum ween nne'kx'ajtyim, ¿sudsots jeexyip nmadø'øyim? Uk kuts jeexyip tum tatsk nne'kx'ajtyim, ¿sudsots jeexyip nxuu'ka'am? ¹⁸ Tø dø'on ja Dios ttanibiktaajkiyijxy ti jaty jadu'uk jadu'uk ja ne'kx tyu'undip sam ja kø'øm tø ttsøky. ¹⁹ Ku jeexyip tukjøøjpyi y'amuum'aty, ¿mats jeexyip ja maybi tyøkidi midi tyika'pxtip tuk'amuum ja ne'kx? ²⁰ Jabi nnija'wimpts adøm ku mayjøøjp chøkyi winets njaa'gyaxø'jkidit, pø tu'ugyixi ja ne'kx.

²¹ Ka'axi dø'on ja ween tnøjmit ja kø': “Ka' me nyiktunwa'añ”; ni ja kubajk tkanimaamyit ja teky: “Ka' me n'ajot'aty.” ²² Jøts midi idø'on yjawi ka'a'ejxin kaxø'kp ja' idø'on ne'egi yikxon yik'ajot'ajtp, ja idø'on xyikjujky'ajtindip. ²³ Jøts midits yjawi kayiktsojqp ja'ats ne'egi n'ejx'ijtyindip jøts ja nnixøjxyim nnipijkyim; midits adøm ngananky'ejxwa'añimp ja'ats adøm janch'amaay ndø'øñim nyu'uchimp. ²⁴ Jade'en idø'on ja Dios tø xanibiktaajka'am jøts adøm ja ne'egi nmijotigø'øyint midi yik'ejxp ka' tyuñ, ²⁵ jøts kidi ki'abikyip nugo øy pøn tyuñ øy sa, pø nabyudøjkiyidipxi dø'on ja'adi

nixem niyam wan ja sa t'ijxyidi, jøts ja amuum tyikjujky'ettit tuki'iyi ja ne'kx. ²⁶ Pøni tsaachip o magama tukween ja ne'kx, amuumts ja pøjkpi ambi yikja'wigyixy øy madsoo; kuts øy madsoo tukween yikxon yik'ejxy'ejtmì kunim ja yikxon chøøky, tyimñejkpts nayide'en tuki'iyi øy madsoo ja ne'kx.

²⁷ Meetsts idø'øn ñamyayi ja Cristo mne'kx'ajttip jøts jade'en meets ja mbikta'agyi sam ja kò' teky, ween aaw tyuñ, uk jadu'uk øy ti midi møøt kya'pxy ja ne'kx. ²⁸ Tøts idø'øn ja Dios Teety ttanibiktaagi ti tyu'undip nidu'uk jaty ja jaa'y pøn ja Dios tmibøjktip: midu'uk, ja nwindson'ajtim kyudanaabyitøjkti; mimajtsk, pøn tnigajpxidip ja Dios kyajpxy ja Dios y'ayuujk; midigøøk, pøn yik'ixpøjktip pøn kajpxwejtíp; jøts nayide'en pøn ijxyimbi ka'ijxyimbi ttundip, møøt nayide'en pøn ja pamaa'y tyiktsoktip tyikmøkpøjktip, møøt ja pudøjkibitøjkti, jøts nayide'en ja ana'ambitøjkti, møøt ja'adi pøn tkajpxtip ja wenk aaw ja wenk ayuujk pøni sa Dios ja køøm yikajpxwa'añidi. ²⁹ ¿Pønts idø'øn janchja'wibi'ajttip? ¿Niduki'iyi ja nwindson'ajtim tkudanidi? ¿Tum ja' tnigajpxidip ja Dios kyajpxy y'ayuujk? ¿Tum ja' yik'ixpøjktip? ¿Uk tyumdundip idø'øn ja ijxyimbi ka'ijxyimbi? Ka' yjade'eni. ³⁰ ¿Tyumøøt'ajttip idø'øn ja møk'ajtin jøts ja pamaa'y tyiktsoktip? ¿Uk kyajpxtip idø'øn niduki'iyi kawinaak ja kanimadooni ayuujk? ¿Uk ñimadoogøxtip idø'øn pøni sa dø'øn ja wenk ayuujk wya'añ? Pø ka'axi. ³¹ Tajotigøyts sudso xpaattit yø'øbi øy'ajtin sudso ja Dios mgunuu'kxidit jøts myikwejidit myikajidit. Ixyamts mee nduknijawiwya'añ ja jawaani øybi tuu' sa øy tsuj njaa'y'ajtindit.

13

Ja tsojkin ja pa'ayo'owin

¹ Ku njakajpxt kawinaak ja wenk aaw kawinaak ja wenk ayuujk øy yjatsajpjotpit ayuujk uk øyts yjanaxwii'ñit ayuujki, pøni ka'ats øts ja tsojkin pøni ka'ats øts ja pa'ayo'owin nmøøt'aty, nayide'ents ja tpatni sam tu'uk ja tambur tawa'ats midi nugo jagojpk, uk sam ja platiy midi nugo na'amp. ² Øy øts jeexyip ja Dios kyajpxy ja Dios y'ayuujk tuki'iyi njanigajpxi, uk njanija'wigyixyts øts tuki'iyi ti jaty memp ti jaty kidakp midi ka' pøn t'ijxñim midi ka' pøn tnijawinim, uk njamøøt'atyts øts tuki'iyi ja ixpiky'ajtin ja wijy'ajtin, uk nja'ajot'atyts øts ja Dios kawine'en ku øts ja ijxyimbi ka'ijxyimbi njatuñ jøts øts ja kojpk ngiidyigach, pøni ka'ats øts ja tsojkin pøni ka'ats øts ja pa'ayo'owin nmøøt'aty nitits øts mibaat ngawa'añ, tyimñugo øts iiy. ³ Uk njadagumaagyixpyts øts ja ayooobi jaa'y tuki'iyi ja nbikta'aky, uk njanagyøyakyts øts jøts øts ja jaa'y xyiknitøty Dios køjxp, niwine'enin øts ja ngadamajada'akt, pøni ka'ap øts ja tsojkin, pøni ka'ap øts ja pa'ayo'owin nmøøt'aty.

⁴ Pøn tsojpk pøn pa'ayoop, tuda'aky ja yjaa'y'aty; jøts øy jaa'y ja', ka'ap myigu'uk ja øy ti tami'ekyi uk niti tkamo'owa'añ; jøts ka'ap ja ñamyikexyi, ni kyanadya'agajpxiyi ja' pøni ti ja tyumpy. ⁵ Ka'ap ja ka'øy'ayuujk ja ka'øwyinmaa'ñ uk ja ka'øchinaa'yin ja ttunk'aty; jøts nika' ñadyamidsojkijxyi tuki'iyi yam ja myigu'uk y'ayøy wyinmay; ka'ap ja tuki'iyi tta'ambiky jøts nika'ap ja ejtp y'ekyi. ⁶ Ja y'øchinaa'yin ja myigu'uk ja tyadaxondakpy, kidi kya'øchinaa'yin ja ojts ttadaxonda'aky. ⁷ Pøn tmidanaapy tuki'iyi pøni sa yiktuñ jøts pøni sa yiknøjmi, jøts jyøp'ijxpy ja' ku kuwani ja tsojkin ja pa'ayo'owin myøjtøki, jøts ka'ap ja tigati tta'amutski, ejtp ja tyuda'aky'ajtin ja ttamajada'aky.

⁸ Nijuuni ja tsojkin ja pa'ayo'owin kyagudigøy. Ja'tp ja et ja xøøw ku wyinaty ja kajpxy ja ayuujk kya'ukyiknigajpxnit midi ja Dios yajkpy, jøts wyinaty nayide'en kawinaak ja wenk aaw ja wenk ayuujk kya'ukyikajpxni, jøts wyinaty ja ixpiky'ajtin kya'uktuni.

⁹ Ka'ap adøm tuki'iyi ka'pxy nnija'wa'am, jøts nika' ka'pxy yiknigajpxy ja Dios chojkin ja Dios pya'ayo'owin midi adøm ja xjadukmado'owimp. ¹⁰ Kudigø'øpyts ya'atpi nija'win ku wyinaty tuki'iyi n'ijxyim nnija'wa'am pøni sa dø'øn tyiyi kya'pxyi tuki'iyi.

¹¹ Kuts y'ijty nmutsk'aty, mutsku'ngin øts y'ijty ngajpxy nmadya'aky, mutsku'ngin øts y'ijty nwinmay, jøts mutsku'ngin øts y'ijty nayide'en nja'gyuki. Kuts ø nyaa'knaa

n'ixmatskøjxni øts ja mutsk'ajtin. ¹² Nayide'ents adøm ka' ka'pxy ja Dios yja' nnija'wa'am, winjo'ximp adøm yjaw i ku ja nja'ejxpaatwa'añim; jaanim idø'øn ja wyinaty øy wa'ats n'ijxyim. Ka'ap øts ixyam tuki'iyi nnijawi, jaanim øts ja nøjkx wa'ats yikxon nnijawinim tuki'iyi sam øts ja Dios ixyam wa'ats x'ixy wa'ats xnijawa'an. ¹³ Jade'ents idø'øn ku n'ajot'ajtin ja Dios, ku njøp'ejxin ja nitso'ok'ajtin, uk ku nmøøt'ajtin ja tsojkin ja pa'ayo'owin, nimidi mibaat kyagudigøy, ettip yø xemikøjxp; tigajstipts idø'øn nidu'ukjaty, yø tsojkin yø pa'ayo'owin yø ne'egi tyimyjawaani møj, nigidi yø yjadu'ukpi jade'en myajada'akti.

14

Ja kawinaak ayuujk kanimadooni

¹ Kajaats idø'øn xmøøt'attit ja tsojkin ja pa'ayo'owin, amidowdi pøktsowdi jøts ja Dios myikwejidit myikajidit, ja'ats jawaani m'amido'odip sudso ja Dios kyajpxy y'ayuujk xnigajpxidit. ² Pø ja Diosxi ja ja'ayi myigajpxy pøn ja wenk aaw wenk ayuujk tkajpxp, ka'axi ja myigu'uk ja ñimadøyi. Ja Dios Espiritu Santo ja jayik'awejmijip, ka'apts ja yiknimadøy ti ja kyajpxy, jøts ti ja jade'en tyijpy. ³ Abikyts ja'amidi pøn ja Dios kyajpxy pøn ja Dios y'ayuujk tu'ugyi tyimdyunk'ajtmijidip jøts ja ttukmadowdi ja jaa'y pøn tpabøjktip ja Dios jøts ja yjanchja'win ja myøkt'a'aktit ku ja yikajpxjot'amøjkidi. ⁴ Nadyu'uk ja yjanchja'win ja tyikmøji tyikaja'aji pøn ja myigu'uk kanimadoojip ku ja tjakajpxy ja wenk aaw wenk ayuujk; pønts tnigajpxidip ja Dios kyajpxy ja Dios y'ayuujk jøts ja ttukmadowdi ja jaa'y pøn tpabøjktip ja Dios jøts ja jade'en tyikmøjiyidi tyikajaajiyidi ja yjanchja'windi.

⁵ Njadamidsøjkpy meets jøts kawinaak ja wenk aaw wenk ayuujk xkajpxtit; jawaani kajaats mee ndamidsøky jøts ja Dios kyajpxy y'ayuujk xnigajpxtit, ja'axi ne'egi jawaani møj tump; ja tump jeexyip nayide'en pøni yiknimadoop jeexyip pøni ti dø'øn yikajpxp yiknimadyakp wenk aaw wenk ayuujk, jøts ku jeexyip yikxon yiknigajpxy tu'uk tu'uk ti jade'en tyijpy, winetimts ja tiy myøjiyidit mya'ayxiyidit ja yjanchja'win pøn jaty tpabøjktip ja Dios. ⁶ Pøni n'ats'ijxy meets jøts meets ja wenk aaw wenk ayuujk ndamigajpxt, ka' meets ti pudøjkin jade'en nmo'ot. Kuts øts ja nnigajpxt midi ja Dios xuknija'wa'amp, uk ja' midi tiy midi øy, uk ja Dios kyajpxy y'ayuujk mee ndukmadøøpy jøts nda'awa'andit, ja'ats idø'øn ti mjanchpudøkiyidip.

⁷ Wan ja ejxpajt t'ukpiktaajkyim. M'ijxy'ajttipxi xuujx sam ja kapxyuujx uk ja kow; pøni ka'ap nyiksuunipaajtyim, sudso ja jaa'y ja tja'gyukit pøni ti yikooop, pøni ti yikxuxp. ⁸ Kuts ja jaa'y cheptumidi ku ja puxuujx wa'ats kyawinaa'ñ, ka'ats ja tsep pøn t'a'ejxi. ⁹ Nayide'ents meets idø'øn mjaty; pøni ka' meets ja ayuujk xkajpxy midi yiknimadoop, ¿sudso dø'øn yiknijawit pøni ti dø'øn mgajpxtip? ¡Ja poj mee nugo mmigajpxy! ¹⁰ Janch jaa dø'øn may ya naxwiiñ ja ayuujk tigach, jøts tyumnimadoodip ja' pøn ja'abi ayuujk tkajpxtip. ¹¹ Pøni ka'ats ø nnimadøy ja jaa'y pøn ja wenk ayuujk tkajpxp, wenk kugajp jaa'yts øts ja xejt, jøts nayide'en øts ja ndejmit. ¹² Pøni mjanchtajotigøødyip idø'øn jøts ja kunuu'kxwejin jøts ja kunuu'kxkyajin xpaattit x'ejxtit, ja' dø'øn mmijotigø'ødyip midi mdabudøkidip ja mmigu'uk jøts ja yjanchja'win ja myøjidit kyajaajidit.

¹³ Paty idø'øn ja jaa'y t'amido'ot ja Dios jøts yikwejit yikajit sudso ttuknimado'ot ja jaa'y pøni ti dø'øn ja kanimadooni ayuujk tyijpy. ¹⁴ Kuts ja wenk ayuujk njadakajpxa'akt, ka'ap øts ja nnimadøy pøni ti ngajpxy øy øts ja ngajpxaajkin yjatiyi. ¹⁵ ¿Tits øts idø'øn njaaktu'ump? Njayiktuñ øts ja wenk aaw ja wenk ayuujk ku ø n'ajot'att uk ku øts nwin'øøt ja Dios, ja' ja'ayi tsojkip jøts ku øts nmøøt'att ja ja'gyukin ja madogukin. ¹⁶ Sudso meets ja mmigu'uk mnimadowiyit pøn ja wenk ayuujk tkajajttip pøni wenk ayuujk tam meets ja Dios mda'ajot'ajtpy. Kuts ja ka'ap tnimadowdi sa jaty mee mwaa'ñ øy meets ja amuki møøt xja'ajot'aty ja Dios, ka'ats ja tja'gyukidi sa meets ja Dios xnøjmi. ¹⁷ Øy meets ja mdsapkajpxy mabaat yja'øyi, kuts ja ka' yiknimadøy jade'ents ja tpaaty

ku meets ka' ti pudøjkin xmø'øy ja mmigu'uk pøn tkanimadoodip ja'abi ayuujk, jøts ja jade'eñi y'etti, ka'ap ja yjanchja'win myøwenidi kyajaajidi. ¹⁸ Ngajxajkpy øts ja Dios ku øts ja kawinaak xukajpxy ja wenk aaw wenk ayuujk midi mee ka' xkajpxy. ¹⁹ Kuts ø ngajpxy jøts ø n'awa'añ ja jaa'y pøn jaty Dios tjā'myajtstip, magoxk aaw øts ja'ayi ne'egi ngajpxy ja ayuujk midi yiknimadoop jøts ka' kawinaak mil ja ayuujk midi kyayiknimadoop.

²⁰ Migu'uktøjkti, ku ja ka'øyi ku ja pøky xpaattit, jade'en mnabyikta'agidit kidi mutskuna'jk ti kyamayidinim. Kuts mwinma'adyit, jade'en mwinma'adyit sam mōjaa'dyøjk yikxon wyinmaadya'an. ²¹ Yide'en jap wya'añ nøky ja kutujk: “Wenk aaw wenk ayuujk øts nyiktunkpaatp ku øts ja naxwii'ñit jaa'y øy madsoo nmigajpxt, uk ndanigaxtit øts ja' ja wenk jaa'y midi wenk pujx wenk kajp tso'ondip jøts øts ngajpxy jøts øts n'ayuujk ja xyiknajxidit, nijade'ents øts ja naxwii'ñit jaa'y nøjkx xkamibøkti, jade'en wya'añ ja nwindson'ajtim.” ²² Ejxpajtxi dø'on jayikmøødyip pøn jaty tkamibøjktip ja Dios ku dø'on ja wenk aaw wenk ayuujk xkajpxti jøts ja Dios ja tmibøjktit, kidi ja'ajip ja jade'en kyujajttip pøn tø tmibøjknidi ja Dios. Abiky yja' ja'amidi ku Dios nayide'en myø'oyidi ja ejxpajt ku ja yikxon tyukjatyidi sudso ja tnigajpxidit ja kyajpxy ja y'ayuujk, kidi ja'ajipts ja jade'en tyanibiktaajkip pøn tkamibøjktip ja Dios. ²³ Kuts mee niduki'iyi mnamyukit jøts mjamadya'aktit jøts tum tigach ja m'aaw m'ayuujkti, jøts nipøn kyanañimadowidit, kuts ja jaa'y pøn ja Dios tkanija'widipnim jam tyøkidit ma mee mnamyukyidi jøts ja niti nayide'en tkanimadoodidit, ¿ka' meets idø'on ja mo'tpi jaa'y mdejit? ²⁴ Pøni mgubajtiyipts meets ja jaa'y jøts ja tmadøy ku meets ja Dios kyajpxy y'ayuujk xnimadyaajki, pyawinmagyøjxpts ja chinaa'yin ja' jøts pyøky ja tjawit ku ja tmado'ot jøts kudam ja yikpøky'ixy. ²⁵ Jade'ents ja Dios ja tjanchjawit jøts ja tyiknigaxø'køxt pøni sa jaty ja tø chøøni, jøts ja Dios tmøjpikta'akt kuxani, jøts meets ja mnø'ømxit jøts ku meets ja Dios jam xmøøtsøøni.

Tundi tuki'iyi tsuj, jøts tum tanibiktaagi sam pyaat'aty

²⁶ Yide'en me migu'uktøjk idø'on yjawī xuñ ku mnamyukyidi. Jam niwinaagin pøn ttunk'ajttip ja øøk, jøts niwinaagin y'awa'andi, uk ja'ats ja ñigajpxtip pøni sa ja Dios kyajpxy y'ayuujk wya'añ; jamts niwinaagin kya'amaamyidi, wenk aaw wenk ayuujk ja yiktundip, jamts pøn tkajpxnajxtip ja wenk aaw ja wenk ayuujk. Øy'ajtp ku jade'en xundi, nugo ku xja'myatsti jøts ku nayide'en ja mjanchja'win xyikmøjidit. ²⁷ Ku ja wenk aaw wenk ayuujk xkajpxtit midi kanimadooni, namajtsk nidigøøk ja'ayi mgajpxtit jøts nidu'ukjaty; jøts kuwani tu'uk tkajpxnaxt ja ayuujk. ²⁸ Pøni ka'ats jam pøn, pøn ja ayuujk tkajpxnaxp, ka'ats ne'egi ja wenk aaw wenk ayuujk xkajpxtit, kinadyu'uk ne'egi ja Dios xmøøtmadya'aktit. ²⁹ Nayide'ents xu'undit pøni nmigajpxwandip ja Dios kyajpxy ja Dios y'ayuujk, nayide'ents namajtsk nidigøøk ja'ayi mgajpxkojtit, jøts nayide'en nidu'ukjaty, pønts kakajpxtip wants ja ja'ayi tpatmadowdi jøts t'ejxti pøni tøøp uk ka' tyiy. ³⁰ Pøni wyinmaa'nmyøøpyts ja Dios tu'uk ja jaa'y midi jam patmadoop, wants ja tkajpxmi jøts ja y'amo'ont pøn ukajpxp. ³¹ Jade'ents mee mgajpxt niduki'iyi pøni winmaa'nmyøøjyidip ja Dios, jøts jade'en xem yam mnanky'ixpøkidit jøts mnagyajpxjot'amøkiyidit. ³² Tuda'aky idø'on, tsuj idø'on ja kyajpxtit pøn ja Dios kyajpxy y'ayuujk tnigajpxidip, ³³ jabi ja øy'ajtinxi ja jotkujk'ajtinxi ja Dios chøjkpy, ka'ap ja tsep, ka'ap ja nugo o pøngapøn ttatøkit ja madyaajkin.

Nayide'en meets idø'on xu'unt sam niduki'iyi ma jaty ñamyukyidi ja janchja'wibi jaa'dyi midi adøm nmigu'uk'ajtyindip. ³⁴ Ka'ap idø'on ja tø'øxyøjk xyikajpxtit ku mnamyukidit, pø ka'axi jade'en kyutukyi. Mbadu'undip idø'on ja kuwani sa ja Dios kyutujk wya'añ. ³⁵ Pøni yiktøøwandip tigati, jam tyøjkjotp tyiktøødit ja ñiyaa'y; ka'axi y'øgyaxi'iky ku tø'øxyøjk kyajpxy ma mnamyukyidi ku Dios x'ajot'atti.

³⁶ Ja'myatsti migu'uktøjk ku meets jawyeen ka' y'ijty xnijawi ja Dios kyajpxy, jøts ku mee ka' nadyu'ugyi xnijawi ya'atpi ayuujk. ³⁷ Pøni jam tu'ugin tjawi ku

tnijawi sudso ja Dios kyajpxy y'ayuujk tñigajpxit, uk tø tjawi ku ja Dios Espiritu Santo tø wyinmaa'nmyø'øyi, paat'ajtip jøts tjā'gyukit ya'atpi ayuujk midi meets ixyam ndaniguejpxy jøts ku nwindson'ajtim yø tkutujki. ³⁸ Pøni ka'ats ja tkutujkjawī, ka'ats ja nayide'en ja ejxkajpin pyaat'atyi. ³⁹ Jade'en migu'uktøjkti, jotmay'atti sudso ja Dios kyajpxy y'ayuujk xnigajpxidit, jøts kidi xpayø'ødyi pøni kyajpxtip ja jaa'y ja kanimadooni ayuujk; ⁴⁰ tum øy tsujts idø'on ja xu'undit, ka'ap anaxukpim.

15

Ku ja Cristo yjukpyiky jadigojk

¹ Ja' migu'uktøjk ixyam ndukja'myatswandip midi tø njanigajpxmi, ja Dios ñitsoojkin ayuujk. Ya'at kajpxy ya'at ayuujk meets idø'on tø xkupiky, jøts nay yø' meets idø'on ixyam mdsinaa'yin'ajtpy. ² Ja'agøjxp meets idø'on nayide'en ja Dios myiknitsø'øgyidi, pøni mbadundip idø'on midi tø ndukmadowdi, jøts pøni tu'ugyi dø'on ja mjanchja'win yikyø'ødyi.

³ Ja' meets idø'on tø ndukmadøy midi ø nayide'en tø nyiktukmadøy. Tø mee nda'awa'añ ku adøm ja Cristo tø xku'o'jka'am, ku adøm nbojkpitumbijaa'y'ajtyindi sam jap nøkyijpxy yjaabyetyi jøts jade'en ja wya'añ; ⁴ jøts nayide'en tø ndukmadowdi ku tyikjutøjkidi, jøts ku ja kyimidigøøk xøøw yjukpyiky sam nayide'en ja nøky tñigajpxmi; ⁵ jøts ku ja ojts jadigojk ñanky'ijxyiyi yam ja tø yja'oo'kni jam Pedro wyindum, ja' ja ojts t'ixy jøts jadigojkøjmyi mā ja kyudanaabyitøjk jam wyinatyi. ⁶ Jøts nimagoxk magø'pxñaxy ojts y'ejxmiyi ja janchja'wibi jaa'y tuktøni, may nay jaa yjuky'attinim winaagin tø y'ooknidi. ⁷ Jøts ojts y'ejxmiyi ja Jacobo midi Santiago yiktejp, jøtsnim niduki'iyi ja kyudanaabyi ojts y'ejxkøjxmiyi.

⁸ Jøtsnim ø tyimy'ix'oojk nayide'en tø n'ejxmi, øy øts idø'on øy tsuj tø njagatso'onda'aky n'uktejint sam ja'adi. ⁹ Ja'agøjxp øts idø'on øy ngamøji ngakøjxpi, pø øtsxi dø'on ñamyayi jawaani mutsk wimbidsømp, ka'ap øts nayide'en sam ja nwindson'ajtim kyudanaabyidi, jøts ni xjagapaat'aty øts jøts ø nwindson'ajtim kyudanaabyi nyiktejt, jabi ka'axi øts y'ijty nmaa'kxti pøn jaty tjanchja'widip ja nwindson'ajtim. ¹⁰ Tøts øts ja Dios xjanchmi'øy'aty, ja'agøjxpts øts ixyam jade'en njaa'y'aty pøni sa øts ja tø xamidsøky, tøts ja chojkin ja ngupøjki, ka'ap øts ja nugo tø xanaxy. Tø ne'egi jawaani kajaa nduñ sam ja tø tkatundi ja nmigudanaabyitøjkti; kidi øtsipts kø'øm tø ndyimyajada'aky, ja Dios øts idø'on ja myøk'ajtin jade'en tø xuktuñ y'øy'ajtingøjxp. ¹¹ Ka'ats ja ndunk'ajtint pøni øts jawaani tø nduñ, uk tøts ja yjadu'ukpi nwindson'ajtim kyudanaabyi jawaani tyundi; nugo ku øøts tum ja' tø nñigajpxy ja Dios y'øgyajpxy ja Dios y'øy'ayuujk midi mee tø xjanchjawi.

Ku ja oo'kpi jadigojk yjukpyøkti

¹² Pø njanigajpxyts øøts ku ja Cristo tø yjukpyiky jadigojk, ¿sudso dø'on jam muum wya'andi ku ja oo'kpi kyajukpyiky? ¹³ Pøni ka'ats ja oo'kpi jadigojk yjukpyøkti, ka'ats ja Cristo nayide'en tø yjukpyiky jadigojk; ¹⁴ pøni ka'ats ja Cristo jadigojk tø yjukpyiky, ka'ats øøts ja ngajpxy tyuñ midi øø ndijpy Dios kyajpxy Dios y'ayuujk, jøts ni kyatumi meets ja mjanchja'win midi mjadsinaadyip. ¹⁵ Kuts idø'on ja wyinatyi janch jade'en, Dios tystigi ataayts øø nwimbidsømni, pø tøxi øø nnimy ku ja Dios Teety jadigojk tyikjujkyiky ja Cristo; pøni tiyts ku ja oo'kpi jadigojk kyajukpyøkti, ka'ats ja yjanchi ku ja Dios Teety ja Cristo tø jadigojk tyikjujkyiky. ¹⁶ Pøni ka'ap ja oo'kpi jadigojk yjukpyøkti, ni ja Cristots kø'ømbaat jadigojk tø kyajukpyiky. ¹⁷ Pøni ka'ats ja Cristo jadigojk tø yjukpyiky, nitits meets ja mjanchja'win kyawa'añ; nayi mbøkyjotp m'ayo'onjotp mee mdsøøni. ¹⁸ Pøni jade'ents ja', tøts inet idø'on tyimy'oo'kti pøn jaty ja Cristo tø tjanchjawidi ku tø yjuky'atti. ¹⁹ Pøni yayi adøm njøp'ijxy'ajtyim ja Cristo ñitsoojkin jøts ja nayi yayi ndajuky'ajtint naxwiñ, ti adøm n'ayøøy, adøm ne'egi yikxon ayo'ijxyim jajtim, nigidi pøn jade'en ku adøm jade'en n'adøjtsin.

²⁰ Ka'ats ja yjade'eni, tɔ dɔ'ɔn ja Cristo tyimyjanch jadigojk yujukpyiky; ja' idɔ'ɔn kɔ'ɔm midu'uk tɔ ttunjɔpi, jɔts idɔ'ɔn wyinaty nayide'en yujukpyɔkti ja abiky oo'kpidi. ²¹ Pɔ tu'ukxi ojts ja jaa'y ja o'jkin tyiktso'onda'aky ya naxwiiñ, nayi tu'ukts ja' pɔn ojts tyiktso'ondakmi jɔts ja oo'kpi jadigojk yujukpyɔkt. ²² Jade'en sam niduki'iyi ja o'jkin yikpaaty Adán pyøkyøjxp, nayide'ents wyinaty niduki'iyi ja juky'ajtin xemikøjxp yikmo'odi pɔn ja Cristo tjanchja'widip. ²³ Tanibiktaagits idɔ'ɔn ja wyinaty ja xemikøjxpit tsinaa'yin nyikmø'oyindi. Ja Cristo jawyeen pɔ ja'axi jawyeen tɔ yujukpyiky; kuts ja Cristo mye'entnim jaanimts wyinaty yikmo'odi ja tsinaa'yin xemikøjxp pɔn jaty ja tɔ yjanchjawiyi. ²⁴ Jats idɔ'ɔn wyinaty tuki'iyi kyixy, ku ja Cristo wyinaty tyikudigøøgyixy niduki'iyi pɔn jaty jaa windsøn'ajttip naxwiiñ, jɔts pɔn wyinaty yikutujktip, ana'amdip, pɔn tmidsep'ajttip ja Dios; jɔts idɔ'ɔn ja Cristo wyinaty ja Dios Teety ttagidøjkigyixy tuki'iyi wine'enin ja tja'aty. ²⁵ Pɔ jaanimts idɔ'ɔn ja Cristo wyinaty kuwani yikutuky kunim ja myidsep ttekpya'an'ajtkøxt, ku ja Dios Teety ja jade'en wyinaty tɔ tyamidsøkyi jɔts ja myidsep ja tmimajada'akt, ²⁶ jɔts ix'oojknim ja o'jkin ja Cristo t'ukmimajadaknit ku ja jujukpyøjkin tyiknaxkida'akt. ²⁷ Pɔ tɔxi ja Dios Teety ttsøky jɔts ja Cristo tuki'iyi tyikutukt. Kuts idɔ'ɔn ja nøky jade'en yjawa'añ, ka'ap idɔ'ɔn ja Dios Teety tyagida'agiyi jɔts ja Cristo ja yikutukiyit, pɔ ja'axi tɔ ttsøky jɔts ja Cristo tuki'iyi tyikutukt. ²⁸ Kuts idɔ'ɔn ja Cristo wyinaty tuki'iyi tɔ tmimajadakixy, winets ja wyinaty ja Dios Teety kyutujk tkupøjkti, pɔ ja kuxi ja Dios U'ngi. Jɔts idɔ'ɔn jade'en ja Dios Teety myøjkutujk o madsøo wyingaxø'økt pɔn ja Dios U'nk tɔ ttamidsøky jɔts ja myidsep ja niduki'iyi tmimajada'akt.

²⁹ Jam yjawi pøngapɔn ja oo'kpi tkunøbatti. ¿Tigøjxpts ku jade'en m'adø'øtsti? Pɔ nømdipxi ku ja oo'kpi kyajujukpyøktit jadigojk, ¿sudsots ja xkunøbatidi?

³⁰ ¿Ti øøts jeexyip ndamidanaapy ja ayo'on ku øøts njemjaty ndejaty, pɔni ka'adam ja yjanchi ku jadigojk njujukpyøjkint? ³¹ Janch ø migu'uktøjk idɔ'ɔn nwa'añ, wingon øts ja o'jkin jabom jabom n'ixy; ka'ats øts ja nwandijy, ja'ayi øts nugo ndyimdyajotkujk'ajtpy ku meets ja nwindsøn'ajtim Jesucristo tɔ xjanchjawidi. ³² Pɔni kajpxwamp øts, nø'ømp øts inet ku øts ja jaa'y jawaani xkayikpa'oøkti jam Efeso. Tøts øts ja nmimajada'akti, ¿tits øts idɔ'ɔn jade'en nbijkpy? Pɔni janch tiy idɔ'ɔn ku ja oo'kpi jadigojk kyajujukpyøkti, jade'ents ne'egi ndu'unindit sam wya'andi: "Wants yikxon tjaaktyimkyaa'yindi tjaaktyimy'uujkyindi ixyam jabi o'jkindipts jabom."

³³ Nay'ejx'etidim jɔts mgayikwin'øøndit. Sam ja kajpxy wya'añ: "Ja kɔ'ɔm ka'ømyigu'uk idɔ'ɔn kayu'kxtip pɔn tyikma'ttip ja myigu'uk chinaa'yindi." ³⁴ Yiktso'onda'akti jadigojk tiy tsuj ja mdsinaa'yindi, kidi pøky x'uktunk'ajtnidi, pɔ ka'axi xumnijawidi ja Dios. Paty øts yide'en nwa'añ jɔts xtsø'ødyunjawidit ja mga'øwyinmaa'ñ.

Sa dɔ'ɔn ja oo'kpi jadigojk yujukpyøktit

³⁵ Jamts inet muum ma tyiktø'ødit: "¿Sudso dɔ'ɔn jadigojk ja oo'kpi yujukpyøktit? ¿Sa dɔ'ɔn ja ne'kx wyinaty t'ixy?" ³⁶ ¡Xøjknat! ¿Ku me tigati x'ukni'ipy, nay ja tɔmt idɔ'ɔn pidsømp ku ja myuxy? Kuwanixi ja kyudigøy jɔts ja ujts myuxy. ³⁷ Ka'axi ja tɔmt pajk tyimñayide'en t'ixy sam ja ujts midi muxp, øy yja'ariindømt pajki, uk yjamidi tɔmdi. ³⁸ Ja Diosts ttanibiktaajkip jɔts ja tɔmt pajk myuxt pɔni sa ja ttsøky, jɔts pɔni sa dɔ'ɔn pyaat'atyi ja tɔmt midi yiknejp. ³⁹ Tumdigachxi tuki'iyi t'ixy tigati; wenk ja jaa'y ñe'kx t'ixy jɔts wenkts ja jiyujk ñe'kx t'ixy, wenk nayide'enmi midi ja kyajnk jamdi, jɔts wenk ja ajkx ñe'kx. ⁴⁰ Jats ja ne'kx midi tsajpjøtpyt'ajttip jɔts nayjaa ja'amidi midi naxwiiñ'ajtmidip; midits idɔ'ɔn tsajpjøtpyt'ajttip, wenk idɔ'ɔn ja chujidi, ka'ap ja nayide'en kyaxø'økti sam ja'adi midi ya tsuj naxwiiñ'ajttip. ⁴¹ Wenk yø xøøw tyii'kxy, wenkts yø po' chamami; jɔts nayi wenk yø maadsa' tyøø'kxmidi, jɔts tigajstip yø maadsa', wenk yø tyøø'kxti tu'uk tu'uk. ⁴² Nayide'ents idɔ'ɔn yjaty ku oo'kpi jadigojk yujukpyøkti. Putsnip ja' midi ñe'kx yiknitajp, jɔts midi ñe'kx jadigojk jujukpyøkp nijuunits idɔ'ɔn ja kya'uk'oo'knit. ⁴³ Ja' yiknitajp midi yiktatsø'ødyump, jɔts yujukpyiky midi janchtaxonda'akym xemikøjxp.

Ja' yiknitajp midi' kamøk, midi kamajadap, jøts yjujkpyøkt jadigojk midi janch møk møjaa'w. ⁴⁴ Ja ñe'kx yiknitajp midi yikwin'ejxp jøts midi yiktomp yikmajtsp; jøts ja ne'kx yjujkpyøkt jadigojk midi kayik'ejxp, kayiktomp, kayikmajtsp. Pøni jats ja ne'kx midi yik'ejxp jøts y'øøky tyigøy, nay jats ja ne'kx midi kayik'ejxp midi ka'oo'kp kadigøøpy.

⁴⁵ Jabi yide'enxi ja Dios kyajpxy wya'añ: "Ja'ukyikmøøyxí ja mijawyeen jaa'y ja jujky'ajtin, pøn idø'øn Adán'ajt"; ka'ats ja nwindson'ajtim Jesucristo yjade'eni sam ja Adán y'ijty, tyimyikjujky'ajtpi ja ja'ayi myiñ. ⁴⁶ Jawyeents adøm ja ne'kx tøm nyikmø'øyim midi ya nmøøt'ajtyindip naxwiiñ; jøtsnim wyinaty ja ne'kx nyikmø'øyindi sam ja nwindson'ajtim ñe'kx t'ijxy ku ja yjujkpyijky jadigojk. ⁴⁷ Naxne'eyxi ja Adán ñe'kx'ajt naxwii'ñit jaa'yin; tsajpjotpts ja myiñ ja nwindson'ajtim Jesucristo ñe'kx paty ja jawaani øy. ⁴⁸ Tum jade'ents adøm nne'kx ya naxwiiñ t'ijxyim sam ja jawyeen jaa'y ñe'kx t'ijxy, midits idø'øn wyinaty yikmø'øyimp jade'ents ja t'ext sam ja nwindson'ajtim ñe'kx. ⁴⁹ Nayide'en sam adøm ya naxwiiñ tøm n'agojnaxxyim ja midu'ukpi jaa'y, kuts jam tsajpjotp nayide'ents adøm nøjkx nwimbijtyim sam ja nwindson'ajtim t'ixy.

⁵⁰ Yide'en ø migu'uk idø'øn njatijy ku yøm ne'kx midi nmøøt'ajtyindip midi xixmyøøt midi ni'jpmyøøt, kidi yøøjip wyinaty twinguwa'jkip ja Dios ma ja amuum ja kyutujk ttanitanit ja jaa'y; midi kataa'nip, midi oo'kp tigøøpy, ka'ap ja pyaat'aty jøts ja xemikøjxpit jujky'ajtin yikmo'ot. ⁵¹ Ja'ats meets ndukmadoowampy jøts yikxon xnijawidit midi yu'uch, midi amaa'tsk ejtp, midi ka' pøn nugo ajawi tñjawi: Ka'ap adøm niduki'iyi ja o'jkin nbaajtindit; ja'ayi ku tyumdigatst ja ne'kx ku nøjkx ja nwindson'ajtim xnimi'iñim, ⁵² widsukin idø'øn ja tyunit, ku ja puxuujx jadigojkyi yjaak'ukyikmadoonit. Winets idø'øn ja oo'kpi yjujkpyøktit jadigojk møøt ja ñe'kx midi xemikøjxp myijujky'attip; pønts wyinaty jujky'ajttipnim ja'ats ja ñe'kx tigatstip. ⁵³ Kuwanixi dø'øn tyigatst yøm ne'kx midi adøm ya naxwiiñ nmøøt'ajtyindip, midi amøjip, midi køjxp, midi anuu'kxip; jøts ja nyikmø'øyint midi xemikøjxp etp ja'agøjxp ku ja kyakixy ni kya'amøji. Jøts adøm wyinaty nmajtstuuptyim ja ne'kx midi oo'kp midi tigøøpy, jøts ja nyikmø'øyint midi nijuuni ka'oo'kp midi xemikøjxp ejtp. ⁵⁴ Kuts adøm idø'øn wyinaty tøm nmajtstuuptyim ja ne'kx midi kajajkp, jøts wyinaty ja ne'kx tøm nyikmø'øña'am midi jajkp, jøts ku dø'øn wyinaty ja ne'kx tøm nmajtstuuptyim midi oo'kp jøts wyinaty tøm nyikmø'øyim midi xemikøjxp jujky'atp, jaanims idø'øn ja Dios kyajpxy tyøøt midi jap jaabyety nøkyijxpy ejtp: "Tøm ja o'jkin yikmimajada'aky. ⁵⁵ O'jkin, ¿ma dø'øn ja mdukta'o'jk? ¿Ma dø'øn ja møk'ajtin tøm xyikwingaxi'iky?" ⁵⁶ Ja pøky idø'øn ja o'jkin xukta'oo'kimp, jøts ja møjaa'gyutujk idø'øn ja tyamøj'ajtpy midi ka'uktunip. ⁵⁷ Ndamøja'wampts ja Dios Teety ku ja tøm xyikmajadaajkyindi nwindson'ajtim Jesucristo pyudøjkingøjxp.

⁵⁸ Jade'ents migu'uktøjk idø'øn, møk jøts tu'ugyi ja mwinmaa'ñ xjaakpiktakojtit jøts ja nwindson'ajtim tyunk xjaakyikyø'øgyojtit; pøm mnija'widipxi ku ka' nugo wyindigøydi ja mdunk midi ja nwindson'ajtim mduktuujnidip.

16

Sa ja pudøjkin myukt

¹ Ku xyikmuktit ja pikta'aky midi mdabudøkidip ja abiky kugajp ja migu'uk midi tjanchja'widip ja Dios, yide'en xu'undit sam ø nayide'en tøm ndukmadowdi pøn jaty jam Galacia etjotp namyujkidip. ² Kija' idø'øn windomingi xpukondu'uttit ja mijuu'ñ pøni wine'en tøm mmajada'akti, jøts ja xpøkjø'øktit a'ejxi, jøts wyinaty abaadi xyik'awejnidi ku ø nnøjkxt. ³ Kuts øts jam wyinaty nniijkxy winets ø wyinaty nguexy ja jaa'y jam Jerusalén pøni pøn mee mw'i'ijxpy, jøts øts ja nøky ja nmo'odit jøts ja møøt tyiknøjkxtit ja pudøjkin. ⁴ Pøni paat'ajtiyip jøts ø nnøjkxt, øyts øts ja wyinaty xmøøtnøjkxti.

Ku Pablo tñgajpxy ma jaty ja wyidetwa'añ

⁵ Kuts jam wyinaty nniikxy ma meets jam, jawyeen ø nnaxwa'añ jam Macedonia etjotp, jøtsnim øts jam Corinto wyinaty nja'aty. ⁶ Ni kyajaa øts jam yjawi ndaa'nit ma meets jam, jotmøn øts jam nyiknaxy ja xuxpyoj jøts mee nayide'en wyinaty x'atskexy ma ø wyinaty nniikxy. ⁷ Ka' meets idø'on nugo pojin n'ukninaxwa'añ, nmøotaa'niwyampy meets idø'on niyjeky pøni yikutujkpy ja Dios. ⁸ Yam øts Efeso kajpkøjxp njaaktaa'niwya'añ kunim Espiritu Santo xøøw tpaatt. ⁹ Øy øts idø'on may ja jaa'y xjami'ekyidi ya Efeso kajpkijxy, jats ja jaa'y nayide'en pøn ø xmadowandip jøts øts ja ndukmado'odit ndukyikyujtit ja nwindson'ajtim Jesucristo yja'.

¹⁰ Pøni ja'tp ja Timoteo jam, m'ejxtibim jøts jotkujk jam ñayjawiyit jøts niti tkadajot-may'ookt, pø nayi nwindson'ajtimxi yja' ja tyunk'ajtip sam øts. ¹¹ Paty idø'on ja tum jade'en xkupøktit, jøts jade'en xpudøkidit jøts øts øy tsuj yam xpaatt, pø n'awijxpyxi øts ja yam møøt ja myigu'uk pøn møøt wyidity.

¹² Tøts øts Apolos njanchjamineuu'kxa'aky adøm ja nmigu'uk jøts ja jeexyip tmøøtniikxy ja migu'ukti pøn jaty meets m'ats'ejxwajnip, ka'ats ja ixyam inet myajada'akt; jaanim ja ñøjkxt ku y'awatsit.

Ku ja Pablo t'ukyajkni ja kajxpoo'kxin

¹³ Wijyim mnabyikta'agidit jøts ejtp møk ja mjanchja'win xyik'ettit. Yaa'dyøjkin tuki'iyi xmidanidit jøts jotmøk mnabyikta'agidit. ¹⁴ Pøni ti jaty mdundip, tsojkingøjxp pa'ayo'owingøjxp ja xu'undit.

¹⁵ Mnija'widip migu'uktøjk ku dø'on ja Estéfanos møøt ja myigudøjk jawyeen tjanchja'widy ja Dios kyajpxy y'ayuujk jam Acaya etjotp. Tøts ja ñadyamiyøxyidi jøts ja tpudøkidit ja jaa'y pøn ja janchja'win tmøøt'ajttip nayide'en. ¹⁶ Pøni jade'ents ja tyundi, nayide'ents mee mbaat'aty mdu'unt, jade'ents ø ndsøky jøts meets ja xmimado'ot jøts ja nayide'en xpudøkidit, nayide'en xu'undit ja jaa'y pøn jaty tundip pøn jaty pudøjkidip. ¹⁷ Tøts idø'on njanchtajotkujk'atti ja Estéfanos, ja Fortunato jøts ja Acaico ku ja ya tø y'atsmendi jøts ø tø x'atspaatti, ja'ats øts ojts ja pudøjkin xmo'odi jøts meets jade'en myikudanaay. ¹⁸ Tøts idø'on ja xjanchyikjot'amøkpøkti sam ja jam nayide'en myikjot'amøkpøjkidøø. Ngajxajkimp idø'on ja yjade'embj jaa'dyi.

¹⁹ Mdanigajxidip ja kajxpoo'kxin ja janchja'wibi jaa'dyi pøn kugajp'ajttip Asia etjotp. Mjanchkajxpoo'kxidip ja Aquila jøts ja Priscila, jøts nayide'en niduki'iyi ja jaa'dyi midi xuminamyujkidip ja' tyøjkjotpti, pøn nayide'en tø tjanchjawidi ja Dios sam meets. ²⁰ Nayide'ents mgajpxpøø'kxyidi pøn jaty yam tø tjanchjawidi ja Dios. Nagyajxpoo'kxidi niduki'iyi xem yam sam ja Dios ttsøky'aty.

²¹ Pøn idø'on Pablo'ajtp, øts idø'on køøm njaapy ya'at nøky jøts ndanigaxidi ya'atpi kajxpoo'kxin.

²² Pøni ka' pøn tkupiky jøts tkatsøky ja nwindson'ajtim Jesucristo, wan wyinaty køøm ttani'ixy. ¡Wingonip ja nwindson'ajtim!

²³ Mmo'ojidip ja nwindson'ajtim ja kyunuu'kxin. ²⁴ Meets niduki'iyi ndanigajxtip ja tsojkin ja pa'ayo'owin Cristo Jesús køjxp. Jade'en idø'on ja yjatt.

JA MYĪMAJTSKPĪ NØKY MIDI JA PABLO TYANĪGAJX JA CORINTĪ JAA'Y

Ku ja Pablo tnijayi ja janchja'wibi pøn jam Corinto

¹ Øts idø'øn Pablo'ajtp. Tø øts ja Dios Teety xamidsøky jøts ø ngudanit ja Jesucristo. Jøts nayide'en ja Timoteo midi øts møøt ya'at nøky nja'ay jøts øøts ndanigaxi pøn jaty ja Dios Teety ja'ajtidip jam Corinti, jøts nayide'en pøn jaty jam Acaya etjotp tsinaadyip. ² Paatti kupøjkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Sa Pablo y'ayo'ombaajty

³ Tkajxajkyindi ja Dios midi tyeety'ajtpy ja nwindson'ajtim Jesucristo, jabi jade'enxi dø'øn ja tyeety'ajtin tyiknigaxi'iky ku adøm x'ayo'ijxyindi, nijuuni xka'ixmajchindi, ejtp xkajpxjot'amøjkandi Dios'ajtingøjxp. ⁴ Ja'agøjxp ja Dios xkajpxjot'amøjkandi pøni sa jaty nidu'uk nidu'uk n'ayo'ombaajtyindi jøts jade'en nnija'wandit sudso dø'øn ja nmigu'uk nayide'en ngajpxjot'amøjkimyandit sam ja Dios tø xpudøjkandi. ⁵ Nayide'en sam adøm kajaa ngu'ayo'ombaajta'andi ja Cristo yja', kajats ja nayide'en ja jot'amøkpøjkin xmø'øyim. ⁶ Ixyamts øøts nyikjemduñ ja'agøjxp ku meets ndukmadøy ja nitsoojkin ayuujk jøts ku meets nayide'en ngajpxjot'amøjkidi. Ku øøts yø'øbi ayo'on ndanaxy, ja Dios øts tø xkajpxjot'amøjki. Nayi meets m'øy'ajtingøjxp øøts idø'øn jade'en tø njaty jøts meets nduknijawit sam nayide'en ja Dios mbudøkiyidit ku nay yø'øbi ayo'on wyinaty xpaatti. ⁷ Njantyimyjøp'ijxy'ajtpy øøts idø'øn jøts meets nayide'en ja Dios myikjotkujk'atiyidit sam øøts, øy idø'øn nayide'en mja'ayo'ombaatti.

⁸ Meets migu'uktøjkti, jade'en øøts ndsøky jøts meets waani x'ext xnijawit sa øøts idø'øn jam ja ayo'on nyiknajxy Asia. Yikxon øøts møk ja ayo'on jam n'ijxy, niti awejxin niti jøp'ejxin øø wyinaty nga'ukmøøt'ajtni, niti majadaajkints øøts, ja o'jkin yjøp'am øøts wyinatyni. ⁹ Jade'ents øøts idø'øn ojts jam nnayjawiwi sam ja jaa'dyi pøn ja xyøøw tø yiktanimacho'owiñi jøts ja o'jkin tpaattit. Øyts idø'øn ja ne'egi ku jade'en yjajty, jabi jaanimxi øts ja Dios idø'øn tuki'iyi nmibøkøjxi jøts ku oo'kpibaat ja tyikjuykpyiky. Jøts øøts jade'en nja'gyujkiyiñ ku adøm niti kø'øm xkama'ayim. ¹⁰ Ja' øøts idø'øn x'axajtjuk x'agø'ødujk jøts øøts jade'en ja o'jkin xkadukpaajty, jøts nayide'en xyiknitso'ok'ejtint ku ja o'jkin wyinaty xmimajada'akwa'añim. ¹¹ Nayide'en meets idø'øn ja mdsapkaaky tyumi ja'agøjxpts adøm idø'øn ni'amuki ngajxajkindit ja Dios jøts øøts ja pudøjkin xmøy'ett.

Tigøjxp idø'øn ja Pablo ojts kyanijkxy Corinto

¹² Ja'agøjxp øøts n'aaw njoojt yjotkujk'aty ku øøts nnijawi ku øøts o madsoo øy tsuj tø nyiknaxy ja ndsinaa'yin, niti taay. Tu'ugyi øøts ja Dios ja y'øy'ajtin tø xabudøki, ka'ap øøts ja ngø'øm wijy'ajtin tø myajada'aky. Meets windumxi dø'øn øøts ja ndsinaa'yin øy tø nyiknaxy. ¹³ Jøts nayide'en ja nøky midi meets tø ndanigaxi, niti taay ja tkamøøt'aty, mibøkøxti ja'. ¹⁴ N'awijxy'ajtpy øøts ku meets ja njaa'y'ajtin xkupøjkit tuki'iyi sam ixja waani tø xkupøk'okwa'andi, jøts jade'en nnadyajotkujk'ajtandit nixem niyam ku wyinaty myeni jadigojk ja nwindson'ajtim Jesucristo.

¹⁵ Ja'ayi ndamøj'ajtpy ku meets idø'øn tø xkupøjkni, jøts ø nwa'añ ku meets majtsk ojk n'ats'ejxwa'añ jøts jade'en n'atsyikjotkujk'attit. ¹⁶ Ja'agøjxpts ndanibiktaajkiyiñ jøts ku øts ya nmiñ Macedonia, myijawyeen meets n'uk'ext jøts jadigojk ku nwimbejtnit. Wanik meets xpudøkit jøts øøts nja'tt jam Judea. ¹⁷ ¿Ka'ap øts idø'øn ja ndejint yikxon ndyimdyanibiktaajkiyiñ ku øts øjts jam nga'uknøjknxi? ¿Sa tø mwa'andi, jade'en øts idø'øn xijy sam muum ja jaa'y ja yja' nugo tyikmajada'aky ku ja nugo t'ukupiky jøts ja ka' t'ukpaduni? ¹⁸ Pø ka'axi. Wa'ats ja Dios tnijawi ku ka'ap øts jade'en nugo

ndaay'aty. ¹⁹ Jabi ka'axi ja Dios U'nk Jesucristo tyaay'aty midi øøts ja yja' ngajpxwa'kxøø møøt Silvano jøts Timoteo, mā meets jam. Pyadunguijxpy ja y'ayuujk ja', ²⁰ jøts ja' tuki'iyi tmidanaagyøjxp pøni ti jaty ja Dios Teety ñi'adso'owip. Ja'agøjxpxi ja xyøøw ja yikajpxpaaty ku adøm Dios Teety nmøja'wa'am ngunuu'kxyja'wa'am ja myøj'ajtin jøts nwa'añim janch tigyajpxy idø'øn yø', nwindson'ajtim Jesucristo køjxp. ²¹ Nayi Dios Teetyxi adøm idø'øn xukmøøt'ejtindip ja Cristo jøts øøts ja tø xjibiky jøts øøts ja jade'en ngajpxwa'kxit ja yja'. ²² Tø nayide'en ja Espíritu Santo xmø'øyim midi ejxpajt'ajtp ku adøm ja xja'ajtyim, jøts jade'en nnija'windit ku xmøy'ukwa'añindi ja juky'ajtin midi xemikøjxp'etp.

²³ Ñija'widyaapy ja Dios ku meets nga'ukninøjkxni jade'engøjxp ku meets ka' nyikjotmay'ooktøkiwya'añ ku møk nwindso'ødyit. Pøni ka'ats yjanchjade'eni, pø jats øts idø'øn ja Dios kø'øm xiidyu'unt. ²⁴ Ku meets wyinaty nninijkxy, ja xondaajkin ja øy'ajtin meets ndaninøjkxwampy. Ka'ap meets nda'aguwaniwya'añ ja janchja'win pø møkxi meets ja xmøøt'ajtni.

2

¹ Jabi ja'agøjxpxi meets idø'øn tø nga'ukninøjkxni ku meets nugo n'atsyikjotmay'ooktøkit. ² Ja ku meets n'atsyikjotmadyøkit, ¿pønts øts idø'øn ndajotkujk'atp? ¿Kidi meedsip? Yamts meets wyinaty kø'øm tø nyikjotmadyøki. ³ Patyxi meets tø nnijayi jawyeen jøts jam tuki'iyi xyik'øyidit xyikpaadidit ku øts jam wyinaty nja'aty jøts meets xaxonda'akt. Jabi jade'enxi nwa'añ ku mee mxondaakmit ku meets x'ext jøts ku øts jotkujk. ⁴ Ku meets ja'abi nøky ndanija'yiyii'ñ, janchjotmay'oo'kp øts wyinaty, ja ya'axyi ja jii'iyi øts idø'øn wyinaty xmimajadakp ku meets yjaw'i ja jaa'y myikwinmaa'nmya'atwa'añidi jøts ø xkagupøktit. Ka' meets nayide'en nyikjotmay'ookwa'añ, ja'axi øts idø'øn nan'ky'ejxwajni p mabaat meets idø'øn ndsøky nba'ayø, patyxi meets idø'øn ngajpxwiyj.

Jade'en pyaat'aty jøts yikmaa'kxukt pøn tø tyundigø

⁵ Ja jaa'yu'nk pøn øts idø'øn tø x'ukyikjotmadyøki ka'ap øts ja nadyu'uk tø xyik'ayø jabi nixem niyamxi meets idø'øn ndejint winaagin tø mbaajtmiyidi nayja'abi jotmay. Ka'ap ø nwa'añ ku nijum. ⁶ Ka'ap øts ja møk n'ukwindsø'øwyañi pøn idø'øn tø tyundigø. Jabi tøxi meets ja nijum ne'egi kø'øm xkastigimøøñi. ⁷ Jade'en idø'øn ne'egi pyaat'aty jøts meets ja xmaa'kxujknit, kajpxjot'amøkidi, ja kuts ja jotmay myimajadakniyit jøts jade'en ja chinaa'yin tyikwindigøøñit. ⁸ Paty meets ixyam ja may'ajt n'amidø jøts jadigojk ja tsojkin ja pa'ayo'owin xmo'odit. ⁹ Tø meets ya'atpi kajpxy ya'atpi ayuujk jawyeen ndanijayi ja'agøjxp jøts ø n'ext nnijawit pøni xjanch'ukpaduujnidip øts idø'øn ja ngutuujk. ¹⁰ Paty xnijawidit, pøni pøn meets mmee'kxpy, nayide'ents øts ja maa'kxin ja nmøømyi. Pøni tø øts idø'øn tigati nmee'kxy, ja'agøjxpts øts jade'en tø nduñ ku mee n'ayo'ixy, y'ijxpy ñija'wip ja Cristo. ¹¹ Jøts jade'en o tigati tkadamøj'att ja miku'windsøn Satanás, jabi nnija'wampxi adøm wa'ats ku ja o tigati tamibøki tami'ejxi.

Ku ja Pablo ttajotmay'øøky ja Tito jam Troas

¹² Ku nja'jty jam Troas jam kajpjotp, nugo øts ndunk jam tyimy'ity øy madsoo jøts øts ja Cristo yja' ngajpxwa'kxit. ¹³ Yamts øts wyinaty tø nja'uktundsoo'mi, kumi ka'ats øts øy njotkujk'aty ja'agøjxp ku øts ja Tito jam ngapaajty, adøm ja nmigu'uk, patyts øts jam øjts ndso'ongojmi jøts øts øjts nnøjxni jam Macedonia.

Ku ja Cristo møøt nmajadak'ijtyindi

¹⁴ Nmøja'wimp ngunuu'kxyja'wimp ja Dios Teety ku ja ejtp xyikmajadaajkyi tu'ugyi møøt ja Cristo, jøts ja kyajpxy jøts ja y'ayuujk ja xukajpxwa'kxyim øy magama. ¹⁵ Y'øyja'wip chuja'wip ja Dios Teety pøn ja Cristo møøt y'ity jøts ja yja' tkajpxwa'kxi.

16 Øy ja magama ja y'ixpøjkin wyidity jam muum tkamibøkti, o'jkin tigø'øyin ja yik-tatiidyu'undip. Jøts muum tjanchjawidi, ja'ats ja tyajuky'attip xemikøjxp. ¿Pønts idø'on yø'øbi tunk nugo niyjøjxk tyimy'ukniyajjtp? 17 Jabi ka'axi øøts ja nugo ndameemyiky ku øøts ja Dios kyajpxy ngajpxwa'kxi sam muum y'adø'øtsti, uk ka'baat ka'pxy tnigajpxti tum wimbet ja tnmadya'akti. Ka'ats øøts jade'en n'adi'ich, tiy janch øøts ja nnigajpxy pø tøxi øøts Dios kø'øm xkexy jøts øøts kyajpxy ja ngajpxwa'kxit Cristo pyudøjkingøjxp øy madsoo jam Dios wyingujkp.

3

Ku ja Dios ja chojkin ja pya'ayo'owin jadigojk tyiktso'ondaajky Jesucristo køjxp

1 ¿Sa meets idø'on yø xja'gyuki ku øøts jade'en nwa'añ? ¿Kø'øm øøts idø'on xijy nnagyajxa'akwa'añi sam ja muum ma ttundi pøn ja ixpøjkin wenk tyajktip? ¿Ja ejxpajtin øts idø'on kuwani ndyimyøøt'atp jøts meets yø n'ixpøjkin xmibøkit? 2 Ka' yjade'eni, jabi meetsxi myiknigaxi'kpy pøni sa øts idø'on ja ndunkjøøjp y'øyi. Jade'en ja ñigaxi'iky ku meets ja Dios yja' tø xmibøjki jøts øy ja pøn t'ext tnijawit sa dø'on ja mdsinaa'yin tø tyigatsti. 3 Kø'ømxixi ja Cristo jade'en tø mdanibiktaagiyidi jøts m'ejxpajt'attit jøts øts ja ndunk jade'en wyingaxi'iky. Jabi Diosxi dø'on kø'øm ja y'Espíritu Santo tø tyaky jøts ja y'ejxpajt'att ja'agøjxpts ja' kyakudigøy. Jawaani møj ja', midi anmija'winjotp ja Dios pyiktakpy jøts ka'ap ne'egi ja jawyeembi kutujk midi Moisés kyøxjaay tsaagøjxp.

4 Sa jaty øø nwa'añ tiy yø' janch yø', wa'ats øøts nnijawi jøts ku øøts ja Dios Teety pyudøjkin amuum xmø'øy Cristo køjxp. 5 Ka'ap øøts kø'øm nnankmyajada'agiyi, ja Dios wyingujkpxi dø'on chøøñ ja møk'ajtin jøts øøts ja øybi ndu'unt. 6 Jaa ku øøts ja jeexyip tø xkamø'øy ja møk'ajtin sudsots øøts idø'on jeexyip nnigajpxy sa ja Dios chojkin ja pya'ayo'owin jadigojk tnanky'ijxyi sa ja naxwii'ñit jaa'y ñitso'ok'attit. Ka'ap ja tsinaa'yin yikpaaty ku nbadungøjxint tuki'iyi ja Moisés kyutujk, ja Espíritu Santoxi dø'on tnanky'ejxip ja øgyajpxy ja ømyadya'aky sudso yikpaaty ja juky'ajtin xemikøjxp. Ja o'jkin tigø'øyin pyatpy ja anmija'win ku ja Moisés kyutujk ngabadungøjxint yam ja Espíritu Santo yja' tyumyikjuky'aty.

7 Jade'en idø'on ja Moisés kyutujk ja myøj'ajtin kyaxi'iky midi tsaagøjxp yikjaay ku jaaju'uk agujkp yikmøøy, janch tøø'kxp tsamamp idø'on ja wyeen y'aaw. Jøts janch win'oo'ktip idø'on ja myigugajp israelit jaa'y ku ja yjayik'ejxwa'añ. Waani dø'on ja y'aju'uk møj y'atskaxi'iky, pojin ja ñaxkojmi. Sats idø'on ja janchtyimyøj y'atsmiñ ja'abi kutujk midi anmija'win ja o'jkin tyukupiky'ajtpy. 8 Kuts ja øgyajpxy ja ømyadya'aky ka'ap ja tmi'abaaty, pø ka'axi ja winmaa'ñ myajada'aky mabaat ja yja'aty ja myøj'ajtin ja y'øy'ajtin midi ja Espíritu Santo xuk'ejximp xuknija'wimp. 9 Sats idø'on ja kutujk janch møj, yam ja tjayikudigøy ja anmija'win, jsudsots idø'on ja Dios y'øgyajpxy y'ømyadya'aky jawaani kyidyimy'ukmøjit midi adøm ja xagupøjkimp! 10 Jabi ka'axi ja Moisés kyutujk møøt ñabyaadyi ja Dios y'øgyajpxy. 11 Øyi dø'on ja kutujk møj tø yjamiñ ka'ap ja Dios y'øgyajpxy ja twinajxi midi ejtp xemikøjxp.

12 Ja'agøjxp øøts ja njøp'ijxy'aty, paty øøts agujk jotkujk ja Dios yja' nnigajpxiyi, 13 jøts ka'ap y'ukpaat'ajtniyi jøts øøts ndu'unt nayide'en sam ja Moisés ttuñ ku ja y'ijty ñawynjuuxyiyi jøts jade'en ja myigugajp tka'ejxtit ku ja y'aju'uk tuda'aky tyigøøñi. 14 Ja israelit jaa'y ka'ap ja tjä'gyukidi tigøjxp idø'on ja Dios ttanibiktaagi ja kutujk midi ja Moisés yikmøøy. Ni ixymbaat ja tkaja'gyukidinim ku ja Dios ñøky tkajpxidi. Jaanim ja ja'gyukin ja tpaattit ku ja Cristo yja' tkupøjkidit. 15 Yjaakajakajpxidibimts ja Moisés kyutujk ja'adi, jade'en ja tjøp'ejxti jøts ja ñitso'ok'attit ku ja tpadungøxtit. 16 Kuuyidsik øy pøngapøn tkupøktit ja nwindson'ajtim Jesucristo jatyits ja pyøky ja ñiwa'adsidit jøts ja wa'ats tuki'iyi tjä'gyukigyøxtit. 17 Ja nwindson'ajtimxi tmøøt'ajtp ja juky'ajtin jøts ja ja'gyukin, pønts ja nwindson'ajtim tjanchja'widip ka'ap ja Moisés kyutujk ja y'ukmimajadakniyidit, ni kya'ukjuky'ajtnidit ja pøky agujkpy. 18 Paty adøm ja

ja'gyukin nmøøt'ajtna'andi ku ja nwindson'ajtim yikmibiky. Kuts ja ejtp njotmay'ajtindit ja y'ø'y'ajtin ja myøj'ajtin, nay ja'ats nanky'eixamp xjats adøm jade'en njajtnant sam ja nwindson'ajtim. Yjujky'ajtingøjxp idø'on ja jade'en xpudøjka'am.

4

¹ Paty øøts idø'on nijuuni ngadawindsuun ja ndunkjøøjp midi øøts ja Dios y'ø'y'ajtingøjxp tø xanibiktaagi. ² Jagam jixkø'øm øøts idø'on nbikta'aky midi amaa'tsk midi tsø'ødyuñim yiktump. Ka'ap øøts n'ijxy ngøy jøts o pøngapøn nwindaa'y'att. Ni ja Dios øøts ja y'ayuujk ngakajpxma'jti. Ja tyiiby ja yjanchpi øøts idø'on ja'ayi nnigajpxpy, jøts jade'en nipøn jaa'y kyawa'ant jam Dios wyingujkp ku øøts n'ayuujk kyatiyi. ³ Ku jaa winaagindi pøn tkaja'gyukidip ja nitsoojkin ayuujk midi øø ngajpxwa'kxpy, ja kyudigø'øyin idø'on ja kø'øm y'ixaawyandip. ⁴ Ku ja wyinaty kø'øm tkajanchjawidi, ja miku'windsønts idø'on ja tøyikwinajpniyidi pøn ja'ayi ya naxwiiñ ne'egi diosja'widip, jøts jade'en tkapaattit ja kudøø'kxaagi ja kujajtaagi midi yajkpy ja øgyajpxy ja ømyadya'aky ku ja Cristo y'ø'y'ajtin myøj'ajtin yiknimadya'aky. Ja Cristots tñanky'eixip ja Dios Teety pøn y'agojnax'ajtpy. ⁵ Ku øøts ngajpxwa'kxy ka'ap øøts ngø'øm ja' nnigajpxy, ja Jesucristoxi øøts ja wyindsøn'ajtin ngajpxwa'kxip, jøts øøts jade'en nyikwimbejtñit ja y'ø'y'ajtin midi tøyaky, ku meets nbudøki ja' chojkingøjxp. ⁶ Jabi nay ja'abi Dios Teetyxi dø'on midi ja jaj ja tøø'kx tyiktso'ondaajk, nay ja' adøm tøyxmø'øyindi ja kujajtaagi ja kudøø'kxaagi jøts n'eixindit nnija'windit sa dø'on ja y'ø'y'ajtin myøji midi ja Jesucristo ñanky'eixip.

Janchja'wingøjxp ja tsinaa'yin nyiknajxyim

⁷ Dios wyingujkp ja chøøñ ja'abi kujaj'ajtin kudøø'kx'ajtin midi niwindem xøøw tkamøøt'ajtp ja kudigø'øyin, ja' øøts nmøøt'ajtpy njujky'ajtingøjxp. Ka'ap øøts ngø'øm møk'ajtin nyiktuñ, ja Diosxi myøk'ajtin idø'on jade'en tyiknigaxø'jkp. ⁸ Øy øøts tsep agujkp aki agujkp ja njujky'ajtin yjanaxy, niwindem xøøw øøts ja nnøø' ja nduu' kya'aduky; øy øø njamay njatajy sudso øø nyiknaxt, nbatpy øøts ja winmaa'ñ sudso tyuu'baat tyuu'wetst. ⁹ Øy øø njayikjemduñ njayikteduñ, ka'ap øøts ja Dios x'ixmach; øy øøts ja nmidsep xjatekpya'an'atwa'añ, ka'ap øøts ja tu'ugyi xmimajada'aky. ¹⁰ Winjaa windsojk øøts ja jaa'y ja o'jkin xjadukpaatwa'añ sam ja Jesús yjajty. Nay ja'ayi øø kø'øm xpudøjkp jøts jade'en tyiknigaxi'iky ku ja ya xemikøjxp yjujky'aty. ¹¹ Pøn jaty øøts møøt nbaduñ ja Jesús yja', nay ja'agøjxp øøts ja o'jkin jabom jabom x'ijxy xkøy, ja'agøjxp øøts ja xka'ixmach jøts jade'en tyiknigaxø'økt ja yjujky'ajtin øøts nnikøjxp. ¹² Øy øøts ja o'jkin xumijapaatwan'ity xumijamimajada'akwan'ity, ja xemikøjxpit jujky'ajtin meets ne'egi mbaajtip m'eixip.

¹³ Njanchja'wip øøts nayide'en ku yide'en wya'añ ja Salmos nøky: "Paty ø nnigajpxy ku njanchjawi." ¹⁴ Nnija'wip øøts ku ja Dios Teety tyikjujkyjky ja Jesús, nayide'ents adøm ja møøt xyikjujkyjkynt, jøts jam nnøjkxint niduki'iyi ja' wyingujkp. ¹⁵ Midi øø tøyngu'ayowi ja'agøjxp øøts idø'on ja ngupiky jøts meets ja øy'ajtin xpaatt, mayts ja jaa'y Cristo køjxp tpaattit ja Dios kyunuu'kxin ja Dios y'ø'y'ajtin jøts may nayide'en pøn ttukmøjawidip pøn ttukunuu'kxyjawidip ja Dios ja'agøjxp ku ja tkajxa'akti.

¹⁶ Ja'agøjxp øøts idø'on ngadawindsuun. Øy øøts ja nne'kx yjaga'ukmajada'kni, møwenip kajaajip øøts ja njanchja'win jabom jabom. ¹⁷ Yø ya'it ayo'on waani yø ñaxkøjy, ka'ap yø jeky tyaa'ni; jøts yø' øy'ajtin xemikøjxp ne'egi xukpaajtimp ma ja Dios. ¹⁸ Jabi ka'axi yik'ixa'ay midi ya naxwiiñ yik'eixp, ja Dios y'ø'y'ajtin ne'egi yik'ixaapy midi kagaxø'kp. Ja pikta'aky midi kaxø'kp myøøt'ajtpy ja' ja kudigø'øyin. Ja øy'ajtin midi kayik'eixp ka'ap ja ya'ats ja kyøjpk ja kyudigøy.

5

¹ Nnija'windip adøm ku ja nne'kx kyudigø'øyim midi kajajkp sam tu'uk ja tøyk kyudigøy naxwiiñ, jap adøm ja Dios tøyxadanibiktaajkindi tu'uk ja tsinaadyaajk tsajppøtpy. Etp

ja xemikøjxp, jabi kidi naxwii'ñit jaa'yipxi ja tø tyik'øyi. ² Janch jade'en idø'on yjaty ku adøm nne'kx ja yjujky'ajtin tyiknaxy ya, ka'ap adøm n'øjja'wam, winjaa windsojk adøm nnøjkwaa'añim ma ja tsinaadyaajk ja Dios tø xadanibiktaajka'am, ³ ma adøm n'anmija'win yiknitanaa'yim. ⁴ Yø ne'kx midi nmijujky'ajtyindip ya naxwiiñ ka'ap yø øy ti xuk'øjja'wam, jøts yiktsojqp ja tsinaadyaajk midi ja Dios tø xanibiktaajkindi, yjagayikwa'añ ja o'jkin. Yø naxwii'ñit tsinaa'yin adøm idø'on njadayiktigatswa'añimp ja jemchinaa'yin. ⁵ Ja Dios idø'on kø'øm tø xanibiktaajkindi jøts tø xuktatøjkindi ja Espíritu Santo midi ejxpajt'ajtp ku adøm ja nyikmø'øyindit midi ja yik'awijxpy.

⁶ Jade'ents adøm idø'on ndajotkujky'ajtint, jøts nnija'windip ku ya yø nne'kx nmijujky'ajtyindinim ka'ap adøm ja tsinaadyaajk nbaajtyindinim. Ka'anim adøm idø'on ndyimyja'atyim ma dø'on ja nwindson'ajtim jam. ⁷ Janchja'wingøjxp adøm idø'on nmøøt'ajtindit ja jøp'ejxin øy ja njaga'ijxyindi. ⁸ Ka'ap ja o'jkin tigø'øyin ndsø'jkandit. Jotkujk idø'on adøm njøp'ejxindit ja o'jkin ku wyinaty xpaat'ajtyindi jøts nnøjxindit jap ma ja nwindson'ajtim møøt n'ejtint. ⁹ Paty adøm idø'on øy maðsoo nwindsoj'jka'ant ja nwindson'ajtim wan ne'kxkøjxp wan anmija'wingøjxp. ¹⁰ Jabi kuwanixi ja Cristo tyidyu'unt jøts jade'en nyikmø'øyindit midi xpaat'ajtyindip nidu'uk nidu'uk pøni sa wyinaty ja njujky'ajtin ya tø nyiknajxyindi.

Ja kajpxy ja madya'aky midi ñigajpxy sa jadigojk møøt nnamyajyint ja Dios

¹¹ Ja'agøjxp ku øø nnijawi sa ja nwindson'ajtim yikmøjawit yikunuu'kxyjawit y'øy'ajtingøjxp paty øøts ja jaa'y ndukja'gyukiwyanguixy ku øøts tiy janch ja kyajpxy ja y'ayuujk nnigajpxiyi. Ñija'wip ja Dios sa øøts ja njaa'y'aty, njøp'ijxpy øøts jøts meets nayide'en xja'gyukit. ¹² Ka'ap øø kø'øm nnay'agajpxiyi, ja ja'gyukinxi meets idø'on ndukmøøt'atwampy jøts jotkuk mnayjawiyidit ku meets ngawindaayi. Jøts jade'en agujk jotkujk x'adsojimbettit ja jaa'y pøn y'anmija'win yjamøøt'ajtpy. ¹³ Pøni nugo øøts ndyimgyajpxy pøni nugo øøts ndyimy'adi'ich, Dios ja tu'ugyi tnija'wip; pøni øyts, pøni tiyts, pøni ka'px øø nnigajpxy ja yja', meets ja mda'øy'atp. ¹⁴ Ja Cristo chojkingøjxp pya'ayo'owingøjxp øøts idø'on ja ndunk ngamajstutu'uty jaa ku øøts ndyimyjanchjawi ku niduki'iyi tø xku'o'jkindi jøts ka' n'uknijujky'ajtna'ant ja pøky. ¹⁵ Paty ja Cristo tø xku'o'jkindi jøts pøn jujky'ajttip ka'ap ja kø'øm t'ukøj'ømit'ajtni ja chinaa'yin, ja Cristo ja ñijujky'ajtnidip pøn ja ojts kyujukpyøkiyidi jadigojk. ¹⁶ Paty øøts jade'en nga'uk'abaxni pøni sa nidu'uk nidu'uk ja chinaa'yin tyiknaxy; Cristo paat øøts y'ijty n'abexy midi øø nga'øyja'wip ja yja', ixyam ka'ap øøts ja'abi winmaa'ñ n'ukyiktuni. ¹⁷ Jade'ents idø'on, pøn ja Cristo møøt y'ity, jemyjaa'y ja'; ja tigøy winmaa'ñ midi y'ijty nmøøt'ajtyindip ka'ap ja y'uktuni, tum ja yjembyi dø'on tø nbabøjknandi. ¹⁸ Kyø'ømdunkjøøjp ja Dios Teety jade'en tyumpy Cristo køjxp jøts ja møøt nnamyajya'ant. Jøts øøts ja ndunk tø xmø'øy ku niduki'iyi ja jaa'y ja Dios møøt ñamyaa'ñiyit. ¹⁹ Yide'en idø'on nbiktaajkint, ja Cristo køjxp idø'on ja Dios Teety niduki'iyi ja naxwii'ñit jaa'y møøt ñamyaawa'aniiyi. Ka'ap ja pøky tmøjpikta'aky. Jøts øøts xanipijky ya'atpi øy'ajtin. ²⁰ Paty meets xnijawit ku øøts ja Cristo xyikugajpxy'aty, sam idø'on ja Dios Teety kø'øm jeexyip meets mminuu'kxa'agiyi. Paty øøts idø'on yide'en n'ane'emy ku meets idø'on ja Dios ja mdsojkin xmøøgyøxt. ²¹ Niti pøky idø'on ja Cristo tkamøøt'ajty xjats ja Dios Teety tyimñayide'en ja ttuuñ sam ja møj pøkyjaa'y yiktuñim, jøts nyikupøjkindit sam ja Dios Teety ttsøky ku ja Cristo møøt n'ejtint.

6

¹ Jade'ents migu'uktøjk idø'onni, niduki'iyi niwine'en adøm ndunk'ajtyindi ja Dios yja', n'amidøøpy meets jøts kidi nugo ja Dios y'øy'ajtin xyikwindigøjyidi midi ja tø mduk'ijxyidi midi ja tø mduknijawiyidi. ² Jabi jade'enxi ja køøm wya'añ ñøkyijxpy: Ku ja xøøw ja jumøjt tpaajty nmadoow øts ja mji'iyin ja myajxin; jøts ku ja yiknitso'ok'ajtin tpaajty winets me nbudøjkiy'ñ. Ixyam idø'on ja mxøøw ja mjumøjt tø yja'tni jøts ja myiknitso'ok'ajtin tø tpatni.

³ Øy øøts idø'øn ja ndsinaa'yin nyiknaxy jøts øøts jade'en ja ndunkjøøjp nípøn xkada'abaxt. ⁴ Jade'enxi øøts idø'øn ne'egi nyiknigaxø'økwa'añ ku øøts ja Dios nmiduñ, tuda'aky øøts ngupiky'aty tuki'iyi ja ayo'on; ⁵ tø øø nyiktsumy nyikwøpy; tø øøts ja jaa'y namay xamuky, møk øøts ja ndunk nyiknaxy kunim øøts ngø' ndeky kya'ukmajada'kni; kawinaak tsuu øøts tø ngamaa'y tø nga'ity, ayuu øøts kawinaak xøøw tø nyiknaxy. ⁶ Njujky'ajtingøjxp øøts nyiknigaxi'iky ku øøts ja Dios nmiduñ. Jøts jade'en kyaxi'iky ku øøts ja Dios y'ixpøjkin ka'pxy nnija'wiyi jøts øøts nduda'akyjaa'y'aty. Tø øøts n'øyjaa'y'aty jøts tø øøts ja Espíritu Santo yja' nyiknigaxø'kmi jøts nayide'en øøts ja tsojkin ja pa'ayo'owin øy pøngapøn tø nmø'øy. ⁷ Ja tiy'ajtin ja janch'ajtin øøts tø nmøøt'aty, jøts ejtp øøts ja Dios ja myøk'ajtin xa'agø'duky xa'axajtuky. Ja ødyu'unin ja tiidyu'unin øøts tø nyiktuñ ku øøts ja Dios yja' tø nyikyø'øyi jøts ku øøts ja y'ayuujk nnitanaa'miyi. ⁸ Juunjaty øø nyikajxa'aky jøts nay jaayi øøts nyikpagajpxy. Øy øøts jaayi n'ukyiknimadya'aky jøts nay jaayi øøts wenk n'ukyiknimadyaknimi. Ja øøts juunjaty nyiknøjmi ku øøts nugo ndaayi jøts nay jaayi wyangojmidi kuk øøts ja y'øybi tyiiby nnigajpxy. ⁹ Juunjaty øøts ngayik'ejxkapy jøts nay jaayi øøts nyik'ejxkapi; ja øøts ja jaa'y juunjaty ja o'jkin xukpaatwa'añ, jajujky'ajtp øøts idø'øn jade'en. Yikastigimøøpy øøts, ka'ap øø n'øøky. ¹⁰ Øy øøts njamay njatajy, xondakp øø nnayjawi; ayooi jaa'y øøts, ja øy'ajtints øøts nyajkpy; øy øøts niiti njagamøødi, jade'en øø nnayjawi; ejxmdam øøts jeexyip tuki'iyi ndyimyøøt'ajtkøjxni.

¹¹ Meets migu'uktøjkti, tiy'ajtingøjxp meets tø ndamigajpxy; tuki'iyi meets ja ndsojkin ja nba'ayo'owin tø ndamay'aty. ¹² Øyimik idø'øn wine'enin ngondukt nbøktukt øts ja ndsojkin øts ja nba'ayo'owin. Meets idø'øn jade'en yjawi ne'egi mdumpy. ¹³ Sam ja u'nkteety ja myajnk tmigajpxy nayide'en meets nmigajpxwami ku ja mdsojkin ku ja mba'ayo'owin niwine'en xka'ama'at'attit. Tundi nayide'en waani sam øts tø nnajtstuni.

Adøm nikøjxp ja Dios yjujky'ajtyim

¹⁴ Kidi mjujky'ajtin xyiknaxti møøt pøn tkajanchja'widip ja Dios, jabi nijuunixi kyanamyayidit ja tiidyu'unin møøt ja tundigø'øyin, sam ja kudøø'kx'ajtin møøt ja kugoots'ajtin. ¹⁵ ¿Sudso dø'øn ja Cristo yja' møøt ñamyayidit ja miku' yja'? ¿Uk sudso ja janchja'wibi jaa'y møøt ñamyigu'ukwa'aniiyt pøn midsepwajniyip? ¹⁶ Ka'ap ja yjujky'ajtin tyiknaxti tu'ugyi ja Dios Teety møøt ja dios midi kø'øm yiktsajstip. Ka'ap adøm njade'enindi jabi kø'ømxi Dios wyinaañ yide'en:

Pøni ma ja chøønidi jam øts ja nmøøtjujky'attit,
jøts pøni midi ja ñøjkxtip ejtp øts ja njamyøøt'attit;
øts ja xdios'attip,

jøts øts njaa'y ja'adi.

¹⁷ Paty ja yide'en yjaakwaañ:

Nanky'abikyidi,

kidi ja kya'øybi xyiktundi;

jøts jade'en ngupøktit,

¹⁸ øts meets xteety'atp, jøts øts meets n'u'nk'atp,

jade'en idø'øn wyaa'añ ja Dios Teety.

7

¹ Jade'ents meets migu'uktøjk idø'øn xnijawidit ku ya'at øy'ajtin ja Dios tø tyiktañ. Ja'agøjxp adøm idø'øn øy tsuj njujky'ajtint, ka'ap ja nne'kx ka'ap ja n'anmija'win nyik'ejtint pøky agujkp. Dios chø'jkingøjxp adøm idø'øn ja Dios ndamiyojxint ja njujky'ajtin.

Sa ja Corinti jaa'y tyiktigatsti ja wyinmaa'ñ

² ¡Ja'gyukidik øts ndsojkin nba'ayo'owin! Jabi ka'axi meets niti windigø'øyin tø xkapaatti øøts køjxp. Nipøn øø ngawindaay'aty, nipøn øø ngana'ixy. ³ Kidi meets ya'at xja'gyuki ku meets nugo nbøkñipiky, jabi jade'enxi tø nwa'añ jawyeen ku meets ja ndsojkin ja nba'ayo'owin tø ndamiyøxy, jade'en ja tpatni møøt mee ñamyayi njujky'aty jøts møøt mee ñamyayi n'ookt. ⁴ Njøp'ijxy'ajtpy meets jøts amuum mee ndajotkujk'aty. Øy øøts idø'øn n'ayo'ombaaty janch jotkujk ø nnayjawiyi.

⁵ Ja'ayip øø nja'ljty ya Macedonia, ka'ap øøts ja poo'kxin nmøøt'aty, øy øøts magama jaa'y xmidsepwa'añ jøts øøts ja tsø'øgi nyikmajada'akwa'añ. ⁶ Yikjotjimbijtpy ja Dios ja yjaa'y, tøts øøts ja xyikjotjimbity ku ja Tiro tø yja'aty. ⁷ Kidi ja'ayip øø nugo ndyimdyajotkujk'ajtpy ku ja yam tø yja'aty, jabi ja'axi øø nayide'en ndajotkujk'ajtpy ku meets ja nekim mnimadya'akyiyi mjantyaxondajkip meets ja'. Jade'en øøts ja xamimadya'aky ku meets xjapaatwa'añ xja'ejxwa'añ jøts nayide'en tnigajpxmi ku meets xajotmay'øøky. Jotkujk øts idø'øn nnayjawiyi ku meets xja'myech.

⁸ Øy ja nøky tø mja'atsyikjotmaadyøkiyidi midi meets øjts ndaniguexy, ka' øts ja ixyam sa n'ukja'wiñi. Njanch'ayojyii'ñimts øts idø'øn ja jawyeen, ku øts n'ijxy ku øts nnijawi ku meets ja nøky yikxon ja jotmay tø mduktatøkiyidi tøts idø'øn ja jade'en y'ukjajtkøjy sa n'ukjatka'am. ⁹ Jotkujk øts ixyam nnayjawiyi jøts kidi ja'ajip øts ndajotkujk'ajtpy ku meets ja jotmay møk'ampy tø m'atspaadyiyi, jabi ja'axi ø ndajotkujk'ajtpy ku meets ja mdsinaa'yin tø xyiktigach sam idø'øn pyaat'aty. Tøxi dø'øn xmidanidi ja jotmay'øøgyi sa ja Dios ttsøky sa Dios tkupiky. Jøts ku øøts ja nøky jade'en tø nguexy kidi ka'øy adøtspip øøts, kidi ayo'onip meets ja mdukpaatwajniyip. ¹⁰ Ja ayo'on midi tuda'aky yikupøjkp sam ja Dios ttsøky'aty, yiktigachp ja tsinaa'yin ja' jøts jade'en yikpaaty ja yiknitso'ok'ajtin. Pøn tkajanchja'widip ja Dios wenk ja tjawidi ja ayo'on jøts ja y'anmija'win tyikudigøydi. ¹¹ Øy meets ja ngajpxy tø m'atsyikjotmaadyøkiyidi, tuda'aky meets ja tø xkupiky sam ja Dios ttsøky'aty. ¡Ejxtits inet ku ja mdsinaa'yin ne'egi tø tyigatsti! Tø meets ja ngajpxy ne'egi myikwinmaa'mbyaadyiyi jøts jatyi tø xnigajpxti ti dø'øn tø xundi; tø m'atsyikjotma'adyidi, tøts nayide'en xtsaachjawidi. Winets meets jatyi xjadyimyigajpxwa'añ jøts nayide'en xiidyunwamidi pøni pøn idø'øn tø mmidundigøydi. Ja' meets idø'øn myiknigaxi'kpy ku meets tø mgatundigøy. ¹² Ja'agøjxp meets jade'en tø nnijayi ku meets ejtp nja'myech jøts kidi ja'agøjxpip øts ja nøky tø nguexy ku øts ja'ayi ngajpxwejwa'añ pøn tø tyundigøy uk pøn tø yikmidundigøy. Pø ja'agøjpxxi mee nnijayi jøts ja Dios xuknijawidit mabaat ja mba'ayo'owin myajada'akti ku øø xpa'ayøy. ¹³ Paty øøts jotkujk nnayjawiyi.

Jawaani jotkujk øø nnayja'wiyi ku ja Tito ya tø yja'aty jøts ku meets ja tø xpudøki jøts ja jotkujk tyiknaxt. ¹⁴ Ka'ap ø nugo tø nwindaa'y ja Tito ku meets øy tø mjaa'y'aty samdam øts ja jawyeen ndamimadyaajky. Ka'ap øts ja n'ayuujk nugo tø xyiktsø'ødyuñ, tiy ja tø pyidsimy. ¹⁵ Jabi mdsojkipxi meets ja ne'egi ixyam jawaani møj ku meets ja tuki'iyi tø xpadunguixy pøni ti jam mda'ana'amiyidip, jøts ku meets ja øy tuda'aky tø xwindsø'øgi. ¹⁶ Ka' xnijawidi mabaat øts nxondaajkin yja'aty ku mee nnijawi ku adøm øy tsuj nnayja'gyukiyindi.

8

Ku ja Pablo pudøjkin t'amidøy jøts yiktabudøkidit ja ayoobi jaa'dyi

¹ Ixyam meets migu'uktøjk nduknijawiwya'andi mabaat idø'øn ja Dios y'øy'ajtin tø pyudøkiyidi ja Macedoniit janchja'wibidi. ² Øy ja sagasa tjamøjatti øyi myeeñ øyi pyikta'aky yjaga'etti may, jotkujk ja tø tyakoiti ja pudøjkin jade'en samdam ja møj kumeeñ jaa'dyi. ³ Tø ndyimy'ixy tø ndyimñijawi mabaat idø'øn tø tyakti ja pudøjkin øy ja niti yjaga'uktaa'nxiniiyidi. ⁴ Møk øøts ja tø x'amidøy, tyimdyanuu'kxaktip idø'øn jøts pyudøjkin ja yikupøktit midi yiktabudøkiwyandip ja jaa'y midi nayide'en tjanchja'widip ja Dios. ⁵ Jinaxy idø'øn ja ne'egi tø ttundi yam øts ja jade'en ngajp'ijxy'aty, jabi jawyeenxi

ja Dios ñadyamiyojxiyidi jøtsnim øøts ja xpaduñ samdam idø'øn ja Dios ttanibiktaagi. ⁶ Ja'agøjxp øøts idø'øn ja Tito ndaguwanì jøts pudøjkin ja jam tjaakyikmukojt midi mee kø'øm mdsojkingøjxp myakwampy midi ja jam tø t'ukyikmuktsøøñ. ⁷ Agajpxy mee mbidsimy øy yjadyimysudso'ambyi: møk meets ja ajot'ajtin xmøødi møøt ja winmaa'ñ sudso yikxon xyaktit ja Dios y'ixpøjkin, jøts mwijy meets, wa'ats xjatti wa'ats xnijawidi, jøts møk mee xtsøky møk mee xpa'ayøy niwine'en øø nyam'aty. Patyxi øø nwa'añ ku meets agajpxy mbidsømit nayide'en ku ja pudøjkin xyaktit.

⁸ Ka' meets ya'at ndyimdyaguwanì, ja' øøts idø'øn ñanky'eixwajnip sa dø'øn ja Macedoniit jaa'y ja chojkindi pya'ayo'owindi jøts yiknijawit nayide'en jøts ku meets ja mdsojkin ja mba'ayo'owin tyiyi yjanchi. ⁹ Mnija'widipxi jøts ku ja nwindson'ajtim Jesucristo ja y'øy'ajtin jadine'en tyikmajada'aky, jøts møk ja tsojkin møk ja pa'ayo'owin tmøøt'aty ku ja mguwanjatiyidi ja'agøjxp ku ja mdsøkyidi mba'ayøyidi, jabi jotkujkxi ja y'ijty tyiknaxy møøt ja Dios Teety. Adømgøjxp ñanky'ayodøjkiyi jøts ja øy'ajtin jade'en nbaajtint Cristo køjxp.

¹⁰ Meets m'øy'ajtingøjxp øts idø'øn yide'en nwa'añ ku meets junkti'jyip ja pudøjkin xyikmuk'okwa'añ janch pe'tpy janch yijy. ¹¹ Nayide'ents idø'øn ixyam xu'undit sam tø xyiktso'onda'akti. Tuki'iyi ja m'aaw ja mjoojt xpikta'aktit kunim ja xyik'abaadidit, pøni mabaat nidu'uk nidu'uk myajada'akti. ¹² Jabi ka'axi ja Dios tuki'iyi t'amidooguixy, ja'axi ja y'ijxpy mabaat idø'øn nidu'uk nidu'uk chojkingøjxp tyaky.

¹³ Ka'ap jade'en xja'gyukidit ku meets ja mmigu'uk nduku'ayowidyøkiwya'andi; ¹⁴ jabi nixem niyamxi dø'øn tuknax nmøøt'ajtindit ja pikta'aky. Ixam meets xmøøt'aty midi yø ka'ejtxidip, ja'atp ja xøøw ja jumøjt jøts ku meets yø wyinaty mga'ejtximiyidi winets yø mmø'ømyiyidit. Jøts jade'en ñi'awich'att, ¹⁵ sam ja Dios kyajpxy wya'añ: "Pøn tyumøøt'ajtkijxpy ka'ap ja tø wyinda'anxiyi; jøts pønts waani tmøøt'ajtp, tuki'iyi ja tø tpatkixy."

Tito jøts ja myigu'uktøjkti

¹⁶ Ja' øts Dios ndamøja'wip ku meets ja Tito nayide'en mba'ayøyi sam øts. ¹⁷ Tø ja tjanch'øyjawi ku meets ja ndanigaxwa'añ, tøyim ja jeexyip ttuñ kø'ømdsojkingøjxp jabi mjanch'eixwajnipxi meets ja'.

¹⁸ Ixyamts ja Tito møøt nguexy tu'uk adøm nmigu'ukti midi øy yiknimadyakp ma jaty ja janchja'wibi jaa'y ñamyukyidi, jade'en ja yiknijawi ku ja øy tiy tñigajpxy ja nitsoojkin ayuujk pøni ma jaty ja tø wyidity. ¹⁹ Kø'ømyi ja Macedoniit jaa'y tø twi'ejxti jøts øøts yø møøt ndu'unt jøts øøts yø møøt njaakyikmukojt ja pudøjkin. Ja'agøjxp øøts yø'øbi tunk nduñ jøts ja nwindson'ajtim jade'en yiktawindsø'ogit jøts jade'en meets xyiknigaxø'økt ja mdsojkin ja mba'ayo'owin. ²⁰ Ja nabyagajpxi dø'øn kayiktsojpk ku øøts ya'at pudøjkin nyikmuky. ²¹ Paty øøts niti taay ngayiktuñ øy øøts yø nminaxt Dios wyingujkp jøts jaa'y wyindump.

²² Nayide'en øøts ixyam ndamigaxi jadu'uk adøm nmigu'uk midi ja Dios yja' øy tsuj pyaduujnip jøts ku meets ja nayide'en mdajotkujk'ajtmiyi. ²³ Ku pøn jam tyiknidøøwit ti dø'øn ja Tito tyumpy, jade'en x'adsojimbettit jøts ku øts yø nmigu'ugi, øts nmøøtumbi yø', øøts idø'øn ndumpy ja pudøjkin pøni pøn tsojpk ja Dios. Jøts pøni yiknidøø'jimyidip ti yø tyundip yø jadu'ukpi migu'ukti, jade'en x'adsojimbettit ku janchja'wibitøjk yø tø kyexyidi jøts ku ja Cristo yø jade'en twindsø'ogidi. ²⁴ Paty ø nwa'añ ku jam mbaadiyidit yikxon xuk'ejxtit xuknijawidit sa meets ja tsojkin sa meets ja pa'ayo'owin xmøøt'aty jøts ñigaxø'økt jade'en jadits meets ndajotkujk'aty.

9

Ku ja Pablo tñigajpxy sudso ja pudøjkin yjaakmukt

¹ Ka' pyaat'atyiyi ku meets ya'atpi winmaa'n̄n jeexyip ndanijayi, ² jabi nnija'wiñipxi øts ku meets ja pudøjkin jatyi xyakøjy. Jotkujk øts idø'on ja Macedoniit jaa'y n̄nimay'etti ku meets junkti'jyip ja pudøjkin xyakwani jøts jade'en namay ttunwamidi sa me tø xunjøpi. ³ Ja'agøjxp øts ya'at migu'uktøjk ngaxti jøts mdukja'myatsidit ku ja pudøjkin xyik'awejxtit. Jøts øts jade'en ja n'ayuujk tyø'øt sam øts yø tø ndamimadya'akti jawyeen. ⁴ Ja kuts jotmøñ ja Macedoniit jaa'y nmøøtnøjkxt jøts ja jam m'atspaadidit yam meets jam wyinaty niti xka'awixy. Tsø'ødyuñimts ja tya'ant ku wyinaty jade'en yjaty yam meets øy tø n'uknimadya'aky. ¿Jaa kidi meets ja tsø'ødyu'unin jawaani møj mbaadiyit? ⁵ Yide'ents øts yjawi ne'egi ndanibiktaagi jawyeen ya'at jaa'y m'ats'ejxidit jøts jade'en mjaakpudøjkigyoyidit jøts kya'pxt ja pudøjkin midi meets tø xni'adsowi. Jøts jade'en wyinaty jam mgø'ømdsojkin xyiknigaxø'økti jøts ka' mwa'andit ku øøts nugo ndyimya-jada'aky.

⁶ Ejtp ya'at xja'myats'ettit: Pøn waani nepp, nayi waani ja tpiky ja pyikta'aky; jøts pøn may nepp, nayi may ja pyikta'aky ja wyimbijty. ⁷ Kø'ømdsøky'ampy idø'on ja pudøjkin xyaktit. Kidi adsep'amip ja xu'undit jabi tsojkipxi Dios ja' pøn xondaajkingøjxp tyajkp ja pyudøjkin. ⁸ Maajyip ja Dios jøts tkaxt køx kida'ak ja kunuu'kxin jøts jade'en xmøøt'at'ettit pøni ti tsojkip, jøts nayide'en ja mmigu'uk xjaaktanipaattit tuki'iyi ja pudøjkin. ⁹ Pø yide'enxi ja Dios kyajpxy wya'añ:

Pøn ttabajaa'ñaxp ja ayo'on,
pyudøjkip ja ayoobi jaa'y ja', jøts ja y'øyyaa'y'ajtk niwindem ja kyagugøxi.

¹⁰ Abaadi ja Dios tyaky ja juky'ajtin jøts adøm jade'en tuki'iyi nmøøt'ajtkøjxint jøts ja nmigu'uk nayide'en ja pudøjkin ndanipaajtint. ¹¹ Jøts meets nayide'en køx kida'ak xmøøt'attit ja øy'ajtin jøts øy pøngapøn xmo'odit. Ja pudøjkin midi meets xanigaxip, ja Dios ja tyamøjawidip tyagunuu'kxjawidip ku ja wyinaty yiktanipaatti. ¹² Kidi ja'ayip adøm ja nugo ndabudøkiwya'añindip midi ja ka'ejtxidip, jabi ja'axi nayide'en yiktump jøts ja Dios ja tkajxak'ettit. ¹³ Ja'agøjxp ja Dios ja ttamøjawidit ku meets tiy ka'pxy xmimadowdi ja Cristo y'øgyajpxy y'ømyadya'aky sam nayide'en ttamøjawidit ttagunuu'kxjawidit pøn jaty wyinaty paajtmiyidip ja pudøjkin. ¹⁴ Jøts meets ja nay jaayi mgugajpxajkmiyidit jabi tøxi meets ja Dios ja myø'øy'ajtin wyinaty xyiknigaxø'økti. ¹⁵ ¡Janch møj ja Dios ku ja møj kunuu'kxin tø xmø'øyim! ¡Ka'ap aaw ayuujk yikpaaty sudso ja n̄nimadyajkin!

10

Sa ja Pablo yikutuky ku ja n̄windsøn'ajtim tkudani

¹ Tyimgyø'øm øts idø'on n̄nuu'kxa'aky nayide'en sam ja Cristo jeexyip kø'øm ttuñ. Jade'en ja kajpxy yø'øy kuk meets nnijayi, tyimy'ap meets ja nøky ndanigaxi, jøts ka'ap øts nayide'en n̄jaa'y'aty ku øts ja jaa'y møøt nnabyaadyi, ja tsø'øgik øts nyikmajadakpy. ² Paty nwa'añ, ku mee wyinaty n'ats'ixy jøts ø xkayik'ambøktit ku øts ja jamyi n'uknibidø'knit pøn ja ya'aw ttakajpxtip ku øts ngø'ømwinmaa'n̄n nyiktuñ sam øy pøn jaa'yin. Ka'ap ø pøn ndsø'øgi pøni jade'en ja ttsokti. ³ Janch tiy idø'on ku øts nbojkipitumbijaa'yi, ka'apts øts mibaat ja pøky x'ana'amt. Ja Diosxi øts ja yja' xuu'møyejtp. ⁴ Ja nmøk'ajtin øøts, ka'ap ja pøky agujkpy pyidsimy, Dios wyingujkp ja chøøñ midi tyikudigøøpy pøn ja Jesucristo møøt kyanamyayi. ⁵ Jade'ents idø'on, nyikudigøøpy øøts ja katiiby'i kajpxy midi nugo nankmyøjtøjkiyip ku ja Dios ja yja'tkananky'ejxwajniyi. Jawyeen øøts ja Cristo nduknijawi sa pønjabøn wyinmay jøts ja tu'ugyi ja yja'tpaduujnidit pøni yikutujkpy ja jade'en. ⁶ Ndiidyu'ump øøts pøn ka'pxy tkabadu'undip ya'atpi ana'amin ku meets wyinaty tø xpadunguixy jawyeen.

⁷ Ku mee x'ijxy ku ndsø'øgi ka' xnijawidi sam ndyimya'at'aty. Pønjabøn wya'andi ku ja Cristo yja'atyidi, nayide'en idø'on tnijawidit ku øøts ja Cristo xja'ajtmi. ⁸ Wan meets jam winaagin mwa'añ ku øts ja n̄windsøn'ajtim kyutujk nugo ndyimdyamajada'aky,

niti ngapøkyjawi jabi kø'ømxi ja nwindson'ajtim tyajky ja kyutujk jøts meets jade'en ja mjanchja'win myøjit, jøts ka'ap meets ja mgudigø'øyin n'ixajyi jade'engøjxp. ⁹ Kidi xja'gyukidi ku meets yø nøky nugo nda'adsø'øgiwya'añ. ¹⁰ Jade'en ja kajpxy yø'øy ku tyimy'ap ja n'ayuujk nguexy jøts ja jaayi kø'øm nga'uknitanaañi, ka'abik øts øy tsuj ja madyajkin nmøødi. ¹¹ Pøn idø'øn yide'en ja ayuujk tyikyø'øpy nayide'en idø'øn ja tnijawidit ku øøts nayide'en ndyimyjaa'y'att meets windump sam øøts n'ayuujk nguexy jagam.

¹² Ka'ap øø nnay'a'ejxiyi jøts øø kø'øm nnay'agajpxiyit sam jam muum winaagin ttundi. Ja kaja'gyukin ja yikmajadajktip ku ja nixem niyam kø'øm yjanch'uknay'agajpxyidi. ¹³ Nijuuni øøts ja kutujk ngayiktuñ midi øø ngamøøt'ajtpy. Ja Dios øøts idø'øn xuknija'wip mabaat idø'øn ja tunkjøøjp yja'aty, jøts nay ja' øøts tø xuumø'øy kø'øm ku meets jam tø n'atsnija'aty Corinto. ¹⁴ Ku øø nwa'añ ku øøts ja kutujk nmøøt'aty jøts meets n'ana'amt, ka'ap øøts ngø'øm ja' nyiktuñ, pø jade'en ja jeexyip yjaty kuk øøts jam jawyeen jeexyip tø nga'ats'øch. Jabi meetsxi jawyeen ndanija'jt ja øgyajpxy ja ømyadya'aky sa ja Cristo y'ø'y'ajtin xukpaajtint. ¹⁵ Ka'ap øø ndsøky jøts øøts nugo nnadya'agajpxit ja wenk jaa'y tyunk ja kajpxwejin midi tø myikmo'odi. N'awixy'ajtpy øøts ku meets ja mjanchja'win winjaa windsojk myøjit myayit mabaat idø'øn pyaat'aty jøts mabaat øøts nayide'en nmajada'aky ku øøts jam ndu'unt ma meets jam. ¹⁶ Xjats øøts jade'en ngajpxwa'kxt ja nitsoojkin ayuujk abiky'et abikyajp meets mjixkø'øm, jøts nijuuni øøts nganadya'agajpxit ja wenk jaa'y y'ixpøjkin.

¹⁷ Pøni jaa pøn ñay'agajpxwa'añi kø'øm, ka'ap jade'en pyaat'atyiyi, ja Dios idø'øn ja y'ø'y'ajtin ja ne'egi ja'ayi y'agajpxip. ¹⁸ Ka'ap y'øbyidsimy ja jaa'y pøn kø'øm nay'agajpxiyip, ja'ats ne'egi øbyidsømp pøn ja nwindson'ajtim t'øyja'wip jøts ja t'agajpxy.

11

Pablo jøts pøn ñadyijyi nañikajpxidip Jesús kyudanaabyi

¹ Meets migu'uktøjkti, wan meets mwā'ant ku nugo mo'tpin nmadya'aky, ja'gyuki meets waani wan øts ngajpxy t'ukyiknaxy midi n'am njotp nmøøt'ajtpy. ² Øy mee n'ama'at'aty ja Dios øts idø'øn jade'en kø'øm xyik'adøtsp; jabi tøxi ja Cristo yja' tu'ugyi ndukpabøjkidi jøts ku meets ja ndawinguwawiwya'añ. Wā'ats meets jam nyiknøjkxwa'añ, sam pøn ja pøky tkidyimy'ijxy'ajtipnim. ³ Jade'en sam ja Eva ja tsaa'ñ wyindaayiyøø, wan meets yjawi nayide'en myikwindaay'atwa'añ jøts mwinmaa'ñ tyigatstit jøts jade'en mga'uknadyamiyojxnayidit ja Cristo. ⁴ Jam pøn ja Cristo y'ixpøjkin wenk tnigajpxip, ka'ap nayide'en sam øøts nnigajpxy; jøts meets ja Espíritu Santo yja' nayide'en wenk xnija'wiyi, tigach meets ja yiknitsokpi ayuujk xnijawidi, ka'ap nayide'en sam øø nnigajpxy. ⁵ Pøn jade'en myikwinmaa'nmya'jtidip ka'ap øts ja mabaat xyik'amutskidi øy ja nugo ñadyijyi yjanañikajpxyidi ja Jesús myøjkudanaabyi. ⁶ Øy øts n'aaw n'ayuujk øy tsuj ngamøøt'aty, ka'ap øts nwinmaa'ñ ñayide'eni. Tø øøts yø nyiknigaxø'kni ku meets o tigati tø ndabudøki.

⁷ ¿Tø øts idø'øn ndundigøy ndejint ku meets jadi'iñi tø ndukmadøy ja nitsoojkin ayuujk ku ni tu'uk centabi tø nganibiky, jøts øts jade'en ayo'ijxyim njaty nugo ku mee xpiky ja øy'ajtin? ⁸ Wenkpi janchja'wibitøjk øts ja myeeñ tø ngupøjkidi ku meets janch nduknija'wiywa'añ ja øy'ajtin. ⁹ Jøts ku øts jam n'uknajxy ma meets jam, ka'ap øts jam ojts pøn nyik'ayøy pøni ti jaty ø xka'ejtixip; jabi ja nmigu'ukxi øts ojts xujnidi ja may'ajit pøn tso'ondip jam Macedonia. Jade'ents mee ka' nyikjotkixy, jøts ka'ayim meets nugo nyikjotkøxwa'añ, jade'eñim ø nyiknaxt sayim ø nyiknaxy. ¹⁰ Nayide'en sam øts ja Cristo tyiy'ajtin njanchja'wiyi nayide'en ø njawi ku meets nnøjmi, ku jam Acayi y'etjotp ni tu'uk ja jaa'y jam, pøn ø xuk'ixmatsp ja'abi xondaajkin ku øts Dios yja' nnigajpxiyi. ¹¹ ¿Jadits øts n'ayuujk jade'en nyikwa'añ? ¿Ja'agøjxp idø'øn ndejint ku meets nga'uktsojki? Wā'ats ja Dios tnijawi mabaat øts ndsojkin yja'aty meets køjxp.

¹² Jade'eñim øts yø ndunk nyikyø'ø'y'ett jøts ja kyamøj'attit pøn ñadyijyi nañikajpxidip ku ja nayide'en tyumidi sam øøts. ¹³ Yø'øbi jaa'dyi nugo yø tyaay'atti ku ja Cristo tkudanidi. ¹⁴ Ka'ap yø kumaap nja'wa'ant, jabi kø'ømbaatxi ja miku'windsøn Satanás ñanky'ijxyiyi ejximdani ja Dios y'ankilis kunuu'kxy. ¹⁵ Paty nayide'en yø tyumbi ñanky'ejxmiyi samdam ja øybi tumbi jaa'y. Ja chinaa'yin ja yiktatidyu'undip jade'en sam ja pyaat'atyidi.

Sa ja Pablo y'ayo'ombaaty ku ja Jesús tkudani

¹⁶ Ixyam mee nnimaagyojmi jøts kidi nugo mwinmaydi jøts ku nmø'øty. Pøni jade'ents xja'gyukidi, wants øts jade'en tmadya'aky jøts øts nadyijyi namyikajxibim nnayjawiyi. ¹⁷ Kidi mee mwa'añ ku øts ja nwindson'ajtim jade'en xyikmadya'aky, jabi nugo mo'tpixi øts idø'øn, ku njanch'uknay'agajpxiyi. ¹⁸ Jaaxi jaa'y pøn nadyamikajxidip ja ñaxwii'ñit tsinaa'yin, wants ø nayide'en nduknamyikajxmiyi. ¹⁹ Jabi møj ja'gyukipxi meets mjaa'y'aty, patyts meets sa xkatijy pøn mo'tpa'an madyakp. ²⁰ Ja' mee ne'egi m'øjya'wip pøn jiyujkin myiktuujnidip, pøn mwindaay'ajtidip, pøn mnijuu'yniyidip, pøn mdekpya'an'ajtidip. Mgupiky'ajttip ja' øy sagasa myiktunidit. ²¹ Øy øts ixyam nnabyøkyjawi yi ku øts jade'en tø ngajaa'y'aty kudani meets yø' ne'egi jade'en x'øjyawi!

Pøni jaa pøn ap tyimñayjawi yi, xmaapy øts ja', øy øts nayide'en njaa'y'att. ²² ¿Ja hebreo ayuujk nadya'agajpxidip? Nnija'wip øts ja nayide'en. ¿Israelit jaa'y ja'adi? Nayide'en øts. ¿Y'apteety'amøj'ajttip ja Abraham ja'? Nayide'en øts ja n'apteety'amøj'ajtmi. ²³ ¿Jade'en ja wya'andi ku Cristo tmidundi? Jawaani øy øts ja ne'egi nmiduñ, øy øts jade'en ja tsojkin njagamøøt'aty jøts ø nnay'agajpxit kø'øm. Jawaani møk øts ndunk ne'egi tø nyiknigaxi'iky yam yja' ja ka' ne'egi ñigaxø'økti. Tø øts ngu'ayo'ombaadi ja ndunkjøøjp, ne'egi ka'ap ja'adi. Ne'egi jawaani may ojk øts idø'øn ja tø nyiktagudsumi, jøts kawinaak ojk øts ja o'jkin tø n'ixy jaayi wingon xwindani. ²⁴ Magoxk ojk øts ja ayo'on tø ngupiky midi øts nmigugajp israelit jaa'y tø xmø'øy sam ja kyutujk wya'andi ku ee'pxmajk taxujk ojk nyikwøpy. ²⁵ Tigøøk ojk ø tø nyikipwyøpy, jøts tu'uk ojk tø nyiktsaaga'ach. Tigøøk ojk øts ja nbarki tø mye'jy'okida'aky. Tu'uk ja xøøw tu'uk ja koots nyiknajxy jam mejkyujk'am, ja kipy pyidasi, ja puu' pyidasi øts iiy xjaakyiknøøwinganamp. ²⁶ Jagambaat øts kawinaak ojk tø nwidity jøts jam muum ja møj nøgom xyikjø'øtwa'añ, jøts ja jaa'y muum xwimaatswami. Ngø'øm migugajp paat øts xni'adani xuu'adani sam nayide'en y'adøtsmidi ja wenkajp jaa'dyi. Nbatpy ø nayide'en ja ayo'on møj kajpjotp samdam abak etjotp uk jam mejjotp. Nayide'en øts ja xka'ødyumidi pøn ñadyijyi Jesu-cristo janchja'wibidi nañikajpxidip. ²⁷ Tø nduñ mabaat øts ja ngø' ja ndeky myajada'aky, øy øts ayo'on ja xadukpaaty; kawinaak ojk ø ngamaa'y nga'ity; ayuu adøøtsi tø nyiknaxy kawinaak ojk; tø ndanaxy ja tep ja xux, ni ja nwet ni ja nnaamy tka'ukpatni.

²⁸ Øy øts idø'øn jade'en ya'atpi ayo'on njapaaty uk midi jatyts njayiknaxpy, møjip mayip øts ja njotmay ku øts ja njotmay'ati jabom jabom pøn jaty tjanchja'widip ja nwindson'ajtim. ²⁹ Pøni jaa pøn ja yjanchja'win kamøj, janch pamaa'yin ø nnayjawiyi. Pøni jaa pøn wenkpi winmaa'ñ tpanøjknidip, møk øts ja n'ayooji, møk øts ja ngudsø'ødyuni jøts øts ja nugo njantya'ambiky. ³⁰ Pøni janchpaat'ajtipts idø'øn ja nay'agajpxi ja ngamø'ajtints ø ne'egi nadya'agajpxip. ³¹ Ja Dios Teety midi ja nwindson'ajtim Jesucristo tyeety'ajtpy midi paat'ajtiyip xemikøjxp yikmøjawit yikunuu'kxyjawit, wa'ats ja tñijawi ku øts ejtp ja tyiiby i ja yjanchpi nnigajpxy. ³² Jøts ku øts nnajxy jam Damasco kajpjotp, jam dø'øn tu'uk ja windsøn midi tmidump ja yjadu'ukpi møj windsøn Aretas, ja Damaskit windsønts idø'øn ojs t'ane'emy ja tyumbitøjk jøts ja tyimyik'adujkøxtit ja tuu' ma jaty ja kajp yiknidøki jøts øts ja xmatstit jøts ø ndyimyiktsu'umt. ³³ Ti mats ja Dios xuk'ixmajtsint, jabi jamxi nguejky, ma ja møj pøch jam, midi ja kajp nawidejtip. Øts nmigu'uk xkatstidyøø mutsk ventani agø'øm kachjotpy. Jade'en øts idø'øn ja xkapøktø.

12

Sa ja nwindson'ajtim tnanky'ijxyiyi ja yja' Pablo kyumaq'yjotpy

¹ Nnija'wip ots ku niwine'en kyajami ku nnay'agajpxa'ant k'om. Meets ukja'gyuki, kuwani ots id'on nnigajpxt sudso nwindson'ajtim ja yja' t' tnanky'ijxyiyi ku k'om nnay'ijxyiyi kumaq'yjotpy. ²⁻³ Ndyimy'ijxy'ajtpy tam ots tu'uk ja jaa'y midi tjanchja'wip ja nwindson'ajtim Jesucristo midik myakmajkts jumotip ojts yikwaanijxy jap tsajpjotpy. P' sudso id'on ja yikwaanijxy, p' m'ot ne'kx uk nugo y'anmija'wints id'on ja n'jxpx Dios tu'ugyi tyimy'uknija'wip. Ja'ayi o' nnija'wip ⁴ ku ojts yikwaanijxy jap tsajpjotpy ma ojts t'ad'oy ja kajpxy ja madya'aky midi ka' p'on nugo niyiktukmad'oy. ⁵ Ti kanadyamiguexyim id'on ja yjawi ku ots jade'en sam ja jaa'y, ka'ats ots nnamyikexyiyi p' wanims ots ja ngamok'ajtin nnadyamikexyiyi. ⁶ Oyims ots k'om njanchjana'igajpxwa'a'niyi, p' ka'axi ja n'ugo kajpxyi, p' tiy'ajtinxi ots wyinaty nnigajpxy; ka'ats ots jade'en ndu' j'ots kidi p'on nugo wyinmay j'ots ku ots ngamaabyi j'ots ku ots ka' njade'eni sam p'on yamts ots id'on ja jade'en ngatu' sam ja wyinmaydi.

⁷ Kawinmaani'ixi d'on ja chuji midi ots ja nwindson'ajtim xuk'e'jx ngumaq'yjotpy; j'ots ots ja nganadyamikaxiyit, winets nja'wigyeyky adsu'jky nik'jxpx yjajkeky samdam ja kujp xkuu'mint. Ja miku'winds' Satan'as ja tyunk'j' jade'en n'anky'e'jxip. ⁸ Tig'ok ojk ots ja nwindson'ajtim ojts njanch'amid'oy j'ots tyiknaxt ja jajin ja t'oyin; ⁹ j'ots ots ja nwindson'ajtim yide'en ja'ayi x'ads'oy: "Ja ndsojkin ja nba'ayo'owin mets ja'ayi mbud'kiyip; jabi jade'enxi ots nmok'ajtin ne'egi ni'gaxi'iky ku nbud'ki p'on ja ky'om mok'ajtin ka'e'jtxip." Jade'en ja wya'a'n. Patyxi ots ja ngamok'ajtin ndajotkujk'aty, j'ots jade'en ja Cristo yja' kyax'okt. ¹⁰ N'oyja'wip ots ja kamajadajkin, n'oyja'wip ots ku nyikjemn'ojmi nyikten'ojmi uk ku tigati xka'e'jtxi, uk ku ots Cristo k'jxpx nyikmi'ambiky ngu'ayo'ombaadi. Ku nnayjawi ni' nmok'ajtin kya'ity jats id'on nwindson'ajtim ja myok'ajtin tyik'awa'a'n j'ots ots ja xuk'ajot'aty.

Ku ja Pablo tpamay t'adajy ja Corinti'it janchja'wibidi

¹¹ Janch mo'tpin o' t' nmadya'aky ku k'om t' nnay'agajpxyiyi, k'om meets t' xyikjaty jabi meetsxi id'on jeexyip oy t' xnimadya'aky j'ots ots jade'en jeexyip k'om t' nganay'agajpxyiyi. ¿Tyimyabaat ja ndejint yja'atti ja wyejin ja kyajin p'on niadyiyi my'okudanaabyi'ajtpy ja nwindson'ajtim? Oy ots id'on mabaat nguidyimyjaty ka'ap ots ja mabaat xwinaxtit. ¹² Ku ots ja ndunk t' nyiky'oy ma meets jam ejtp ots nnanky'ijxyiyi ku ots id'on ndyimgyudanaabyi'aty ja nwindson'ajtim. Ejxpajting'jxpx milagrik'jxpx ots id'on ja n'odyunk t' x'e'jxidi t' xnija'wiyidi. ¹³ P'ni mwandipts ku meets ka' tuknax myik'odyu' sa ots ja jadu'ukpi n'odyundi ma jaty o' nwidity ma jaty o' nbaatti n'e'jxti ja jadu'ukpi janchja'wibidi, janch id'on mwa'andi. Xm'oyimsik meets jam ja kaaky ja maadaajk kuk ots jam n'ats'ojch. ¡Maa'kxti, kidi xka'oyjawi ku ots yide'en nwa'a'n!

¹⁴ Ix'am nnay'a'e'xyiyi nnay'abaadiyi ja' ku meets myidig'ok ojk n'ats'e'jxwa'a'n. Ka'ap meets jam nugo n'atsyik'adujkti'wya'a'n. Jabi ka'axi meets ja mbikta'aky n'ixaajyi, meetsxi d'on ja m'oy'ajtin ja'ayi n'ixaajyip. Yiknija'wipxi ku ja u'nkteety t'ixa'adi ja meeñ ja jingaap midi ja y'u'nk ni'dsina'adyip j'ots ka'ap ja y'u'nk ne'egi ja tyeety ja yujky'ajtin t'otmay'attit. ¹⁵ Xondaajkin o' nbaatp ku mee ndamiyoxk'ot ja n'aaw ja njoojt mjanchja'wing'jxpx; oy meets yjawi xjagats'oky samdam meets nds'oky.

¹⁶ Oy winaagin tjaja'gyukidi ku meets jam nugo ngayik'adujkti, jade'en ja wya'andi ku mee nugo t' win'iñ. ¹⁷ ¿T' meets ndejint ndawindaay'aty ja nmigu'uk p'on jaty meets jam t' ndaniguexy? ¹⁸ K'om ots ja Tito n'ane'emy j'ots m'ats'e'jxidit j'ots ots ndamigajxyi'iñ jadu'uk ad'om nmigu'uk. ¿Tits, mwindaay'ajtidi ja Tito? ¿Ti ka' x'e'jxti ku o'ots tu'ugyi nwinmaa'iñ nyiky'oy j'ots tum jade'en o'ots n'oyjaa'y'aty?

¹⁹ Wan meets jade'en mwinmay ku o' nugo nnagyub'kiyi. Ka'ap yjade'eni. Wa'ats ja Dios tnijawi ku o'ots Cristo k'jxpx ja ndunk t' nyiky'oy, j'ots meets jade'en ja

mjanchja'win myøjit. ²⁰ Ku øts jam wyinaty n'ats'øch jade'en ø njøpjawi ku meets yjawi øy ngapaatt samdam øts ja ndsojkin njadyimyjamsøøt'aty. Jøts mee nayide'en xka'øyja'wyimit ja njaa'y'ajtin samdam meets xjadyimyjatsøky'aty, ku meets xka'øyjawit ja kajpxwejin midi wyinaty nyajkpy. Jabi jade'enxi nnajtsjawi ku meets wyinaty mga'uknamyaa'niiyidi nixem niyam, jøts xyikmøjtøjkiñidi ja windii'n'ajtk, ja aki, ja tami'ama'at'ajtk, ja nabyagajpxi, sam nayide'en ja namyikajxan jøts nixem niyam mga'uknamyimado'oniiyidi. ²¹ Wan øts ja Dios yjawi nmidsø'ødyu'unt ku meets jade'en mjaa'y'ajtni. Wan meets ngujiyit nguyaaaxit ku meets wyinaty ne'egi tø xpadøjkiñi ja mga'øchinaa'yin midi ixyambaat mgamajstutu'utwandip. Tum ja axøø'kpi tum ja yigaappi m'amp mjotp mmimajadajkidip.

13

Jxats ja nøky y'abaadi jøts ja kajpxwejin ja kajpxpoo'kxin y'ukyikyajkni

¹ Ixyam mee myidigøøk ojk n'ats'ejxwalañ, jøts ku øts ja tundigø'øyin jam nyiktii dyøkit pøni pøn jam nugo tyimdyunk'ajtnidip ja pøkyunk, tsokip ja a'ejxnajxpi namajtsk uk nidigøøk pøn ja wa'ats tnmadyakøxtip sa y'ejxi tyiyi. ² Ku myimajtsk ojk n'ats'øjch n'ana'amdi øts ja' pøn jam yjawi wyinaty pøky agujkpy tyimchinaañidip. Xyants nwa'añ ku nnøjkxt jadigojk ku nayide'en nbatkojmidiit nay ja' pøn ø tø n'ana'amdi, niwine'en øts ja ayo'ejxin ngamøøt'att. Pøni jamidits pøn ja chinaa'yin tyik'ejtnidip pøky agujkpy nayide'en ja pyaat'atyidi jøts tiidyu'unin tyagida'agidit. ³ Jade'ents meets idø'øn xajotkujk'att ku øts ja Cristo xyikmadya'aky jøts meets jade'en mgawa'ant ku ja' kyajotmøjki; jabi ñanky'ejxipts ja myøk'ajtin ma meets jam. ⁴ Ja kyamøk'ajtin kyu'o'jki kruskøjxp, xemikøjxpts ixyam yjujky'aty Dios Teety myøk'ajtingøjxp. Nayide'en adøm idø'øn ja kajotmøk'ajtin njagyeypyim sam ja yjajty. Ku ja xemikøjxp nmøøtjujky'ajtin ja nwindson'ajtim jade'ents ja Dios Teety tyaky ja møk'ajtin midi meets ndabudøjkip.

⁵ Yikxon meets kø'øm nabyawinmayi, ¿mjanchpadundip idø'øn ja mjanchja'windi? ¿Ja ka' xja'myatsti ku ja Cristo xmøøt'atti? Uk nugo meets idø'øn mnañikajpxyiyi Cristo janchja'wibi. ⁶ Jade'ents øø nwa'añ jøts meets xnijawit ku mee ka' nugo nwindaa'yi ku øøts ja Cristo yja' nbaduujni. ⁷ N'amidøøpy øøts ja Dios jøts meets øy mjaa'y'att. Kidi ja'agøjxpi jøts øøts jade'en ja n'ana'amin myøjtøkit. Ja m'øy'ajtinxi øøts ja'ayi n'ixaapy. Padun meets ja', øy øøts agajpxy njagabidsimy. ⁸ Ka'ap øøts ja møk'ajtin nmøøt'aty jøts øøts nwindson'ajtim ja tyiy'ajtin ngajpxwe'jtii, ja' øøts ndunkjøøjp'ajtpy jøts ja yiknigajpxt tiy ka'pxy. ⁹ Ndaxonda'akp øøts ku meets ja møk'ajtin xmøøt'att øy øts ja ngutujk njagayiktuñ. Ejtp øøts ja Dios n'amidoo'ett jøts meets ja mjanchja'win jøts meets ja mjujky'ajtin yikxon y'øyt yikxon tyuda'akt. ¹⁰ Namga'anim ø ndsøøñ ku meets ya'at nøky ndanigaxi jøts ku meets wyinaty n'ats'ixy ka'ap xjawidit møk ja tiidyu'unin midi ø tø xaguwani ja nwindson'ajtim. Ja'agøjxp øts ja kutujk tø xmø'øyt jøts meets ja mjanchja'win myøjit jøts kidi ja'agøjxpi øts ja nmøødi jøts meets ja kudigø'øyin xpaatti.

¹¹ Meets migu'uktøjkti, øy meets. Yikxon meets ndamidsøky xyiknaxtit ja mdsinaa'yin, ixa'adi ja øy'ajtin ja tuda'aky'ajtin, nanjyotkujk'atidi nixem niyam, yikxon mnamyigu'ukwaa'andit yikxon mnamyayidit, jøts jotkujk x'ejxtit. Winets meets ja Dios xemikøjxp mmøøt'etidit midi tyajkp ja jotkujk'ajtin midi tyajkp ja tsojkin ja pa'ayo'owin. ¹² Nagyajpxpoo'kxiidi nixem niyam sadam ja Dios ttsøk'aty. ¹³ Niiduki'iyi ja janchja'wibidi midi øøts ixyam møøt, nayide'en ja tkaxmidi ja kyajpxpoo'kxin.

¹⁴ Paatti kupøkti ja nwindson'ajtim Jesucristo kyunuu'kxin, nayide'en ja Dios Teety chojkin ja pya'ayo'owin jøts nayide'en ja Espiritu Santo nima mgamajstutu'udidit. Tiigyajpxy idø'øn, jade'en idø'øn yjatt.

JA NØKY MIDI JA PABLO TYANĠGAJX JA GALACIHT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Galacia

¹ Øts idø'øn Pablo'ajtp, nwindson'ajtim ngudanaapy, nipøn jaa'y ø tø xkakexy, ja Jesucristoxi ø kø'øm tø xpikta'aky møøt ja Dios Teety pøn ja nwindson'ajtim kø'øm tø yikjujkyikyiyi jap oo'kpi y'agujkpy. ² Ixyamts øts møøt niduki'iyi ja nmigu'uk janchja'wibitøjkti, meets ndanijayi ya'at nøky ma jaty xpadumidi ja nwindson'ajtim yja' jam Galacia etjotp. ³ Paat meets ja øy'ajtin ja kunuu'kxin midi ja Dios Teety yajkpy møøt ja nwindson'ajtim Jesucristo, ⁴ pøn nagyiyajkiyøø jøts adøm nbøky ja xku'o'jkandi jøts kidi ja axøøkpi tsinaa'yin mibaat xmimadaajkyindi midi yikpatp ya naxwiiñ, tøxi ja Dios Teety jade'en kø'øm ttanibiktaagi. ⁵ Tu'ugyi ja Dios myøj'ajtin ndamiguy'ejxint xemikøjxp! Jade'ents idø'øn ja yjatt.

Ka'ap ja jadu'uk abiky midi tnigajpxp ja yiknitsoojkin

⁶ Tyimñigyumaap ø nnayjawiyi ku meets pojin xmajstutkojmi ja Dios, pøn meets kø'øm tø mwaamiñidi tø mwaadsøyidi ku ja Cristo xpa'ayonajxyindi, jøts meets ja janchpi nitsoojkin xijy xpabiky, ja wenkpidam ja'. ⁷ Ka'ap idø'øn ja wenkpi nitsoojkin ya jadu'uk y'ity. Yide'en idø'øn yjaty, jaa dø'øn jaa'y pøn meets nugo mjanchjaa'midip, ja Cristoxi dø'øn ja ñitsoojkin yjayiktigatswandip. ⁸ Tøxi meets tu'ugyi ndukmadøy ja janchja'win, kuts wyinaty pøn nidu'ugin tyiktigatswa'añ midi øøts jawyeen tø n'uknigajpxy, møkts idø'øn ja Dios tya'ambøkit, jøts møj ayo'on tyukpaadit wan tjapøni ku ttu'undit jade'en, o njadyimya'øtsi uk yjadyimdioskugajpxy'ajtpi, ku wyinaty ja wenkpi janchja'win tpikta'akwamidi sam muum ixyam yjawi ttunwa'andi. ⁹ Ixyam meets ndukja'myatskojmidi: Pøni jaa pøn ja wenkpi ixpøjkin mdawindaayiywajnidip, paat'ajtiyip ja' ñigida'agiyit ja Dios myøj'ayo'on.

¹⁰ Ti øts idø'øn jade'en xijy xyikwamp ku øts idø'øn jade'en nwa'añ. ¿Ja' øts idø'øn xijy ndsøjkpy jøts øts ja jaa'y kuwani xtyimgyupøkt jøts øts ja kuwani xtyimdyakajxa'aktit uk kuwani øy nayide'en xtyimgyupøkt ja Dios? Pø ka'axi, ku øts ja jeexyip ja'ayi nugo nda'ødyøki ya naxwiiñit jaa'y wyingujky, ka'ats øts ja Cristo jeexyip x'uktumbi'ajtni pø ja'axi ø tu'ugyi tø nnadyamiyøxyiyi.

Sudso ja Pablo tyøjkiy#ñ kudanaabyi jøts ja tkudanit ja nwindson'ajtim

¹¹ Nijawi meets ya'at, migu'uktøjkti, ku yø nitso'ok'ajtin midi ø nnigajpxy, ka'ap jaa'y yø twinmaa'ñi. ¹² Kø'øm øts idø'øn ja Jesucristo yø tø xuknijawi. Kidi mee mwa'añ ku øts yø øy pøngapøn jaa'y tø xuk'ixpiky.

¹³ Tø meets idø'øn ja kajpxy ja madya'aky xnijawidi sa øts y'ijty njaa'y'aty ku øts ja chinaa'yin nbaduujnidi ja israelitøjkti. Mnija'wip meetsmi sa øts idø'øn y'ijty awa'an'ampy njemduñ ndeduñ pøn ja Dios tjanchja'widip jøts ø nyikudigøøwya'andi. ¹⁴ Øts idø'øn y'ijty ja israelit jaa'y chinaa'yin jawaani ka'pxy nbadumpy nika'ap øts ja nmiyaaktøjk ni tu'uk pøn jade'en kyamajada'aky sam øts. Jabi ja'ats øts idø'øn y'ijty n'amip njootpip ja møjaa'dyøjk chinaa'yin. ¹⁵ Tigajts øts ndsinaa'yin. Ka'anin øts wyinaty ya naxwiiñ ngaxi'iky ku øts ja Dios wyinajty tø xwi'ejxni xwigi, pya'ayo'owingøjxp øts idø'øn tø xwaadsøy. Ku ja xøøw ja jumøjt tpaajty sam ttanibiktaajkiy#ñ, ¹⁶ xjats øts idø'øn xuk'ijxy xuknijawiyi#ñ ja y'U'nk, jøts ngajpxyø'oyit ja nitsoojkin madya'aky ma pøn kya'israelitjaa'yidi, pøn tkanija'widipnim ja nwindson'ajtim Jesucristo. Kuts idø'øn ya'at jade'en yjajty, nipøn øts idø'øn nga'ats'ixy nga'ats'amidøy, ¹⁷ ni nganijky øts

jam Jerusalén ma jam pøn ja kudanaa'yin jawyeen tpadøjkidyøø. Tiy øts idø'øn ne'egi ndyimñøjkxkøjy jam Arabia etjotp, jamts ø nwimbijty jøts ø nja'jty jam Damasco.

¹⁸ Kyidigøøk jumøjtñim ø nniikxy jam Jerusalén; winets øts ja Pedro ojts nminabyadyiyi jade'en'ampyts øts ja n'ijxy'aty, makmojkx xøøw øts ja jam nmøøtsinaay. ¹⁹ Ni tu'uk øts ja nga'ejxtøø jadu'ukpi kudanaabyidi, ja Jacobo øts ja'ayi nbaajt, ja nwindson'ajtim y'uch myigu'uk. ²⁰ Y'ijxy ñija'wip ja Dios ku ya'at tyiyi yjanchi midi meets ndanija'ayip. Ka'ap ø nugo ndaabyaaty.

²¹ Kuts idø'øm jade'en y'uknajxy, jamts ø ndsøø'ñ jøts ø nniikxy jam Siria etjotp jøts jam Cilicia nayide'en. ²² Ka'ap øts y'ijty x'ijxyidi adøm nmigu'uktøjkti midi tjanchja'wimyidip ja Cristo jam Judeit etjotp. ²³ Ja'ayi dø'øn ja y'ijty tmadowdi ja kajpxy, ku ñømidi: "Ja' pøn y'ijty tkamaa'kxp ja janchja'wibitøjkti ja Cristo yjaa'y, ja' ixyam kø'øm tnigajpxnip øy tsuj ja Dios kyajpxy ja Dios myadya'aky yam ja y'ijty t'ukyikudigøøwya'añ." ²⁴ Tyamigunuu'kxyja'widip idø'øn ja Dios ja' ku øts ja ndsinaa'yin tø nyiktigach.

2

Ku ja Jesús kyudanaabyi tkupøkti ja Pablo jøts ja nayide'en tyu'unt

¹ Kyimakmajkts jumøjt øts jadigojk nniikxy jam Jerusalén møøt ja Bernabé, jøts ø nayide'en nbawaay ja Tito. ² Paty øts jam nniikxy ku øts ja Dios xuk'ijxy jøts øts jam nnøjkxy. Jøts øts jam møøt amaa'tsk ngajpxy nmadya'aky pøn idø'øn jam tnigubajk'ajttip ja kudanaabyitøjkti Jerusalén. Jøts nduk'ejxtøø nduknija'widyøø sa øts idø'øn ja nwindson'ajtim y'ixpøjkin nnanky'ijxyi pøn tkanija'widip pøn ka'israelit jaa'dyi. Njöpja'wip øts ja' ku øts ja jotmøñ xkagupøktit paty øts ja jade'en nnigajpxy jøts øts ja ndunk nugo kyanaxt midi øts jam wyinaty ndumpy. ³ Xpudøjkidits øts ja'. Niti nisa ja Tito kyayiktuuñ, ka'ap ja ejxpajt ñe'kxkøjxp yikpiktaajky sam ja israelit jaa'y ttsøonidi. ⁴ Ka'ap øts ya'at jeexyip ngajpxpaaty sa ja Tito yjajty kuk idø'øn kyanøjkxti ja ejxpi ja kowbi jøts tmadya'akwidettit mabaat adøm idø'øn nga'ukpadu'unindi ja møjaa'byi kutujk midi ja Jesucristo tø xukniwaajchim ku møøt n'ijtyim. Ja' idø'øn ja chojktip jøts adøm nbaduujna'andit ja myajaa'byi kyutujk sam ja israelit jaa'dyi. ⁵ Nijuuni øøts ja ngayikmøjtøki jøts ka' meets xwinma'aty ku ja'ayi ejxpajtingøjxp yikpiky ja yiknitsoojkin. Jaa ku øø ndsøky jøts meets tiy xmøøt'ajt'ettitñim ja winmaa'ñ sa ja yiknitsoojkin nbaajtyim.

⁶ Niti nisa øts ja xkanimaadyi pøn jam tnigubajk'ajttip ja kudanaabyitøjkti pøni sa øts ndunkjøøjp nyikyø'øy; øy ja yjamøjwindsønidi tuknax øts ja møøt nnayja'wiyidi, jabi tum jade'enxi adømdi Dios wyingujkp. ⁷ Ka'ap øts ja wenk ana'amín ja x'ukmøøñidi, jabi yja'gyukidixi ja' ku øts ja Dios kø'øm tø xanipiky jøts øts ja nitsoojkin ayuujk ngajpxyø'øty ma pøn kya'israelitjaa'yidi, sam ja Pedro yiktanipøjkmi nayide'en jøts nay ja'abi ayuujk tkajpxyø'øty jam israelit jaa'yjotp. ⁸ Nayide'en øts ja Dios myøk'ajtin kudanaabyi tø xpiktajkmi jøts øts ngajpxwa'kxit ja y'ayuujk pøn ka'israelit jaa'dyi sam ja Pedro tø yikpiktajkmi kudanaabyi jam israelit jaa'yjotp.

⁹ Patyxi dø'øn ja Jacobo, ja Pedro jøts ja Juan pøn tnigubajk'ajttip ja kudanaabyitøjkti tjagyukidi ku øts ja Dios tø xmø'øy ja øy'ajtin jøts ja yja' tñanky'ejxit. Ojts øøts n'ukyikøpatni møøt ja Bernabé, jade'en'ampy ja jade'en ttundi jøts ku øøts ja xmigu'ukwa'añ jøts ku ja t'øyjawidi jøts øøts ndunk øy nyiknaxt jam ka'israelit jaa'yjotp, yam ja nayide'en ja tyunk tyikyø'ømyidi jam israelit jaa'yjotp. ¹⁰ Ja'ayi øøts idø'øn x'amidowdi ku øøts nximija'myajts'ett ja israelit ayoobitøjkti. Ya'ats øts idø'øn ne'egi nbadun'ijtpy, ka'ap øts yø'øbi winmaa'ñ n'ixmach.

Ku ja Pablo twindsø'øy ja Pedro jam Antioquia

11 Ku øts jam møøt nnabyaajti ja Pedro jam Antioquít kajpjotp, jam øts ojts ndawindsø'øy midi jam wyinaty tyumpy, ku ja ka'ap y'øgyaxi'iky. 12 Ku ja møøt øy tyimy'ukaagyøjy pøn ka'israelit jaa'y jøts ja jaayi tmajstutkojmi, ja'ayi ku winaagin ja israelitøjk yja'atti pøn wyinaty tø tkexy ja ja'abi jaa'y midi tpadundipnim ja møjaa'byi kutujk ja møjaa'byi tsinaa'yin sam ja y'ijty nayide'en tpadumi. 13 Nayide'en ttumidi sam ja Pedro pøn jaty jam wyinaty ka'israelit jaa'dyi, nayide'en idø'øn ja Bernabé paat ttumi. 14 Kuts øts idø'øn ja n'ijxy jade'en ku tkabadundi sam ja øgyajpxy ømyadya'aky ttanibiktaagi, yide'en øts idø'øn ja Pedro nnimaay jøts niduki'iyi tmadoodidøø ja janchja'wibitøjkti: “¿Tigøjxp mets ya'at jaa'y xukpadunwa'añ ja israelit jaa'y chinaa'yin? Pø tøts mets ja kø'øm x'ixmatsni jekyip o mets jam mjadyimyjagugajpi.”

Janchja'wingøjxp ñitso'okti ja israelit jaa'y sam o pøn jaa'dyi

15 Israelit jaa'y adømdi ja' ku jade'en tø ngue'exyindi, ka'ap adøm ja pøky nayide'en ndyimyikmajadaajkyindi sam ja' pøn ka'israelit jaa'dyi. 16 Tøts nnija'windi ku ka'ap adøm ja Dios xkupøjkindit ja' wyingujkp ku ja'ayi nbadu'undit ja Moisés kyutujk. Ja Jesucristoxi dø'øn ja yja' njanchja'wimp patyxi dø'øn adøm ja Dios Teety tø xkupijkyindi, kidi ja'agøjxp ku ja Moisés kyutujk nbaduujñindi. Jabi nipønxi kyayikupøkt Dios wyingujkp ku ja Moisés kyutujk ja'ayi tpaduujnit.

17 Ku dø'øn ja Dios tø x'ukupijkyindi Cristo køjxp, jøts adøm ja Moisés kyutujk tø n'awimbejtigyojmandi, ¿ja Cristo adøm idø'øn kø'øm xyiktuu'tigøø'yimp? ¡Ka' yjade'eni! 18 Ku øts ndungojmit midi tø n'uk'ixmach, ngø'ømbøky øts ja'. 19 Ka'ap øts ja Moisés kyutujk n'ukyiktuni ja'agøjxp ku øts ja Dios y'øy'ajtin jade'en'ampy ngapaaty; tø nja'gyuki jøts ku ja Dios yja' yikpaaty ku njanchja'want ja Cristo. 20 Ka'ap øts nugo n'uktsinaañi, tø øts ja Cristo xku'oogi kruskøjxp; ja' øts idø'øn ndu'ump midi ja Cristo y'øyja'wip jaa ku øts ja chinaa'yin ndajuky'ajti. Janchja'wingøjxp øts ya'at jujky'ajtin nyiknaxy ya naxwiñ ku ja Dios U'nk tø xjanchøky xjanchpa'ayøj jøts nayide'en tø xku'oogi. 21 Ka'ap øts ja Cristo y'o'jkin nugo nyiknaxwa'añ; kuts Dios ja jeexyip xagupijkyindi ku ja Moisés kyutujk nbadu'unint, niti jeexyip kyawa'añ ja Cristo y'o'jkin, ka'ap ja jeexyip ma tyuñ.

3

Midi nyikmajadaajkip: ja Moisés kyutujk uk ja nwindson'ajtim yjanchja'win

1 ¡Meets gálatas jaa'dyi! ¿Tiku tø mwinnmaa'nmya'atti? ¿Jadits ku xka'ukpadunidi ja y'øybi ja tyiibi, pøn tø myikwinmaa'ndyigøyidi? Jabi tøxi meets ka'pxy ndukmadooguxy jøts tø xja'gyukidi ku ja Jesucristo tø xku'o'jkindi kruskøjxp. 2 Uk'adsojimbetti meets idø'øn ya'at: ¿Sudso'ampy meets idø'øn ja Dios Teety ja y'Espíritu Santo tø mmø'øyidi, ku ja Moisés kyutujk xpaduujnidi, uk ku ja tø xmibøjkti ja yiknitsokpi ayuujk midi øøts tø nnigajpxy? 3 ¿Tiku xkaja'gyukidi? ¿Sa tø mwa'andi, jade'en idø'øn xijy jawaani mjanchja'win myøjidit ku xpadunwa'andi ja Moisés kyutujk? 4 ¿Ti nugo meets jadi'iñi xyiknaxwa'añ ja m'ayo'ondi ku myikjemdundi myiktedundi ku ja mjanchja'win x'ukyiktso'ondajktøø? ¡Ka'ap jade'en pya'at'aty, myiktunkpatpy meets ja ndijy ku kawine'en tø m'ayowdi! 5 Kuts ja Dios Teety ja y'Espíritu Santo tø mmø'øyidi jøts ja x'ejxiyidi ja myøk'ajtin ku ja tnanky'ijxyiyi ja ijxyimbi ka'ijxyimbi, ¿tigøjxpts ja jade'en ttuñ? ¿Ja'agøjxp ja ttuñ ku meets ja Moisés kyutujk xujni? Pø ka'axi, pø ja'agøjxpxi ja ttuñ ku tø xjanchjawidi sa øøts tø nnigajpxy.

6 Ejxpajtingøjxp idø'øn ja n'apteety'amøj Abraham ku ja tjanchja'wiyi'iñ ja Dios, ja'ayits Dios ja tagupøjkiyøø. Ka'ap ja ja'agøjxp yikupijky pøni ti ødyunk ja tyuun. 7 Paty meets idø'øn xja'gyukidit jøts ku ja Abraham ñamyayi ja' t'apø t'oki pøn ja janchja'win nayid'en tmøøt'ajttip sam ja ojts tmibiky ja Dios. 8 Windi'ixyip idø'øn ja Dios ttukmadowni ja Abraham sa yikjaadyaañ jap nøkyijpxy jøts ku yide'en wyaañ: “Tuki'iyi ja naajx ja kajp ja kunuu'kxy'ajtin tpa'attit ku øts xjanchjawidit sa mets tø xunjøpi.” Paty ja Dios jade'en

wya'añ ku ja janchja'wingøjxp tkupøkt pøn ka'israelit jaa'dyi. ⁹ Jade'ents idø'on pøn ja Cristo tjanchja'widip, nayide'en ja kunuu'kxin ja tpaatti sam ja Abraham ja kunuu'kxin yikmøøy ku ja Dios ja tjanchja'wiyii'ñ.

¹⁰ Pøn tyimyjabadunwandip ja Moisés kyutujk jøts ja jade'en ñitso'oktit, tø Dios ja ttanibiktaajkiñi jøts ja yik'ayo'onmo'odit. Jabi yide'enxi dø'on ja Dios kyutujk wya'añ jap nøkyjøtpy: “Pøni pøn tuki'iyi tkabadungøjxp ya'at kutujk midi yap tø yikjaadyañ, paajtidip ja møy ayo'on ja' midi øts tø ndanibiktaagi.” ¹¹ Ja'gyukits idø'on tyañ ku ja Dios ka'ap tkupiky pøn wyinaty ja'ayi tø tpaduñ ja Moisés kyutujk, jabi yide'enxi ja Dios ñøky wya'añ: “Pønts ja Dios wyinaty kyupijky janchja'wingøjxp, jujky'ajttipts ja' xemikøjxp.” ¹² Ka'ap ja Moisés kyutujk yiknitsø'øky janchja'wingøjxp, yide'enxi ja wya'añ: “Pøni pøn tuki'iyi tpadungøjxp ya'at kutujk, ja'ayi nitso'ok'ajtp.”

¹³ Tøts ja Cristo xukniwajchim ja ayo'on sam ja Moisés kyutujk ttanibiktaagi pøn ka'pxy tkabadundip. Yide'en'ampy tsoo ku ja Cristo møy pøkyumbi yiktijy jøts jade'en kø'ømdsøky tpatwa'jkii'ñ ja møy ayo'on midi adøm xjapaat'ajtindip, jabi yide'enxi ja Dios ñøky wya'añ: “Pøn jam yikudiipy kipkyøjxp, møy pøkyumbi ja'.” ¹⁴ Paty idø'on ja Jesucristo y'ø'jky kruskøjxp jøts ja kunuu'kxin tpaattit pøn ka'israelit jaa'dyi nayide'en sam ja Abraham ja Dios ojts ñii'mxyiyi; jøts jade'en adøm niduknax nbaajtindit janchja'wingøjxp ja Espiritu Santo midi ja Dios Teety tø tni'adsowi.

Ka'ap ja Moisés kyutujk tyik'amutski ja may'ajtin midi ja Dios ñi'adso'owi

¹⁵ Meets migu'uktøjk, ku dø'on n'ukpiktaajkint ku tigati n'ukajpx'ø'yint n'ukajpxpaajtant, kuts ja yikjaadyañ, kuwani dø'on ja yikpadu'unt, sa tø wyinguki ka'ap ja pøn tyiktigatst. ¹⁶ Kuts ja Dios Teety ja may'ajtin tmøøwya'añ ja Abraham, nayide'en ja tmøøwyami jadu'uk ja jaa'y midi ja y'apip y'okip pøni wine'en ja tø ñajtska'axyini. Sam ja Dios ñøky wya'añ: “Tu'ukpi jaa'y ja', ka'ap ja ñamayidi.” Ja'ats idø'on Cristo'ajtp. ¹⁷ Yide'en øts idø'on ja ja'gyukin nyakwa'añ: Ja may'ajtin midi ja Dios ja Abraham ojts tyami'awaniyi, ka'ap ja mibaat niwine'enin tyiktigajch ja Moisés kyutujk midi meen ix'oojk maktaxk magø'pxy ja ee'pxmajk jumøjtñim. ¹⁸ Kuts ja Dios ja myay'ajtin jeexyip kuwani xukpadunwa'añin ja Moisés kyutujk, ¿ti may'ajtin idø'on ja jade'en? Yide'en'ampyts idø'on ja y'øyi ku ja Dios ja jadi'iñi ttamay'atwa'añ ja Abraham.

¹⁹ ¿Tigøjxpts idø'on ja Moisés kyutujk nyikmø'øyim? Paty idø'on ja ix'oojknim yikpiktaajky tø wyinaty tni'adso'owiñi ja may'ajt jøts ja jaa'y niduki'iyi tñijawidit midi idø'on pøky'ajtp. Jaayi tyuñ kunim yja'aty ja Abraham y'apu'nk pøn nayide'en ja may'ajtin yiktami'awa'anii'ñ. Ku ja Dios ja kyutujk tyajky, ja ankilistøjk ja tyamigaxiyii'ñ jøts ja Moisés ja ttagidøkidit, jøts ja ttuk'ext ttuknijawit ja jaa'y. ²⁰ Ku ja Dios ja may'ajtin tmøøwya'añ ja Abraham, ka'ap ja ankilistøjk ni ja kugajpxtyøjk ja tkayiktuñ, kø'ømyi ja nadyu'ugyi ttami'awa'anii'ñ.

Tigøjxp ja Moisés kyutujk yikpiktaajky

²¹ ¿Sats idø'on ya'at nja'gyukant? ¿Ka'ap idø'on ja Moisés kyutujk møøt ñamyayi ja Dios myay'ajtin? Ka'ap idø'on yjade'eni, jaa ku ja Dios ja kutujk jeexyip tø tyaky nitsoojkin møøt, ja'ayits ja jaa'y jeexyip yiktagupøjktip, ja'ayi jeexyip yikpadump pøni sa ja tyikutuky. ²² Jabi jade'enxi ja Dios ñøky wya'añ ku adøm nijum pøkñiwa'añ n'ejtnandi. Kuts ja Jesucristo njanchja'wint, jade'en idø'on ja'ayi ja nitso'ok'ajtin nbaajtant midi ja Dios tø tni'adsowi.

²³ Tum ja Moisés adøm ja kyutujk wyinaty tø xniwa'anandi ku kyamiñim ja Cristo, pø ka'anixi ja Dios Teety wyinaty xukja'gyukam ja Cristo yjanchja'win. ²⁴ Ja'abi kutujk adøm y'ijty xuu'wa'anindip xuu'wejtñindip kunim ja Cristo myiiñ, kuts ja njanchja'wa'ant jade'ents ja Dios Teety xkupøjkindit. ²⁵ Kuts ja Cristo myiiñ, ka'ap adøm ja kutujk x'uk'ana'amnindi.

²⁶ Jabi ɪxyamxi adøm ja Dios x'u'nk'ajtnindi ku ja Jesucristo njanchja'windi. ²⁷ Ku Cristo køjxp nnøbejtyindi nayide'en adøm ja ndsinaa'yin nyiknajxyindi sam ja tøjptuni. ²⁸ Ka'ap y'ukpaat'ajtniyi adøm nnayjiwejtsandit nnayjigajxandit o pøn y'israelitjaa'yidi kya'israelitjaa'yidi, tumbidi yikmidumbidi, sam ja tøjxyøjkmidi yaa'dyøjkmidi; tu'ukpi jaa'y adømniidi ku ja Jesucristo nmøøt'ajtnandi. ²⁹ Kuts adøm ja jade'en nmøøt'ajtnant, xjats idø'øn tyimbyaat'atyiyi ndeety'ap'ajtnant ja Abraham jøts xpaat'ajtnindip adøm ja Dios myay'ajtin midi ja ñi'adso'wiyi'ñ.

4

¹ Ukja'gyuki meets ya'at: Ku tu'uk ja u'nkteety y'øøky jøts ttanipaaty tuki'iyi ja pyikta'aky ja myutsku'nk, kuts ja tyimy'ukmutskinim ka'anin ja pyaat'aty tøjkt ja maay øy ja tuki'iyi tjaja'ajtkixy. ² Jabi kuwanixi dø'øn tjamimado'ot ja y'ejx'etpidi kunim ja yjumøjt tpaatt jøts t'axajit ja tyeety ja myaay. ³ Nayide'en adøm idø'øn y'ijty njajtyindi ku ja Cristo kyamiñim. Tum ja møjaa'ychinaa'yin y'ijty nyikmajadaajkyindip øy ja nitso'ok'ajtin tjagamøødi. ⁴ Kuts ja xøøw ja jumøjt yja'jty, kyajx ja Dios Teety ja y'U'nk tøjxyøjkmidi ñikøjxp jøts jade'en kye'jxy israelit jaa'yin, pyadungøjx nayide'en tuki'iyi ja'abi jaa'dyi ja chinaa'yin møøt ja kyutujk. ⁵ Paty ja jade'en myiñ jøts ja wa'ats'ajtin xmø'øyindit pøn y'ijty tpadundip ja Moisés kyutujk, jøts jade'en Dios Teety x'u'nk'ajtnindit.

⁶ Yide'en idø'øn ja tñanky'ijxyi ku adøm ja x'u'nk'ajtna'am ku ja tkexy ja Espíritu Santo adøm n'anmija'wingøjxp; jøts møk ja winmaa'ñ nmøøt'ajtnindit ku janch ja Dios Teety ndeety'ajtyindi. ⁷ Ja Dios Teety adøm idø'øn xtyimy'u'nk'ajtnindip, ka'ap adøm nugo midumbidi. Paty adøm idø'øn xtyimbyaat'ajtyindi ja maay midi ja Dios Teety tøjtni'adsowi, jøts midi ja Cristo xmø'øyindip.

Ku ja Pablo tpamay tpadajy ja janchja'wibitøjkti

⁸ Ka'ap meets y'ijtyip ja Dios Teety x'ijxyi, tum ja awanax agojnax meets y'ijty windsøjkidip winja'widip, midi ka'ap ja Dios'ajtin tmøøt'atti. ⁹ Tøj meets ja Dios Teety xpatni, uk yide'en'ampyts idø'øn ne'egi ngajpxint, tøj meets idø'øn ja Dios Teety mbaajtniyi, ¿sudso meets idø'øn xkupøjkojmi ja wenk tsinaa'yin midi niti møk'ajtin niti nitsoojkin kyayajkpy, nayide'en sam ja mgø'øm ja'adi midi tøj xuk'ixmatsti? ¹⁰ Jøts ɪxyam xjanch'ukjøjpejxti ku ja Dios m'øyjawiyyidit ku x'amaay'attinim ja xøøw ja po', ja xøøw ja jumøjt. ¹¹ A'øy'ampy øts yjawi njøpts'øgi ku øts ndunkjøøjp meets køjxp tøj wyindigøy.

¹² Migu'uktøjkti, tun ja may'ajit jøts xu'undit sam øts idø'øn tøj njøptuni ku øts ja israelit jaa'y chinaa'yin tøj n'ixmajtsni. Kupøjki øts n'ayuujk, ka'axi meets nijuuni xmidsepwa'añ. ¹³ Øy meets xkupijky mijawyeen ku øts ja yiknitsokpi madya'aky nnigajpxy øy øts wyinaty njabama'ayø. ¹⁴ Wan øts nba'am meets mja'axiigyidi, ka'ap meets xpawøjpy. Jade'en meets ne'egi xkupijky sam tu'uk ja Dios y'ankilis tñajtskaxi, uk sam ja Cristo yjawi kø'øm tyimyja'aty ma meets jam. ¹⁵ ¿Tiku mga'ukjotkujk'ajtnidi? Tyimyøj meets ja mba'ayo'owin xñanky'ejxøø ku nbamaa'ychinaay. Patyts ø nwa'añ, wanik meets yjawi mgø'ømween xtyimyju'jty jødsik øts ja xamay'ajttøø, jøts øts jade'en ndso'okt. ¹⁶ ¿Xmidsepwandip meets ɪxyam ku øts ja'ayi tøj nnigajpxy ja tyiiby yjanchpi?

¹⁷ Ja winaagin ja israelit jaa'y pøn taagyøjxp yik'ixpøjktip. Ja'ayi dø'øn ja yjanch'awejxtip jøts meets ja xmibøkt jøts x'ixmatstit ja m'øwyinmaa'ñ midi meets tøj ndukmadøy, jøts jade'en ja abiktyuu' xpadøjkiñidit. ¹⁸ Ka'ap ja sa y'ejxi ku meets ja møøt mnamyayiyidit, ja'ayi dø'øn tøjkip jøts yikxon ja y'øwyinmaa'ñ y'øy'ixpøjkin tñigajpxtit, ejtp jade'en ttu'undit, ka'ap ja'ayi nugu ku meets jam møøt. ¹⁹ Meets u'nk meets unajk, møk meets jadigojk xjanchyikmay xjanchyiktajy. Jaayim øts yøj jade'en njawit kunim ka'pxy ja Cristo xpadungøxtit samdam ja ttsøky'aty. ²⁰ Jøk meets jam møøt jeexyip ɪxyam, jøts øts øy tsuj ne'egi ndukmado'ot ya'at winmaa'ñ; jabi ka'axi øts ja ayuujk n'ukpatni pøj sudso meets njanchñijayit!

Ja Agar jøts ja Sara ñikøjxp ja ejxpajtin yikajpxpidsimy

²¹ Meetsti, pøn ja Moisés kyutujk tpadunwajnidip, nigajpx meets sa dø'øn wya'añ ja'abi kutujk. ²² Pø nømpxi ja wya'añ ku ja Abraham namajtsk ja y'u'nk tpaajty: tu'uk ja tumbi tyik'u'nkpaajty midi nitøøky'ejtnip, jøts jadu'uk ja kyø'øm nidø'øxy yja'. ²³ Ku ja nitøøky tø'øxy y'u'nkpaajty nayide'eñim ja tpaajty sam o pøn tø'øxyøjk, jøts ku ja ñidø'øxy ja y'u'nk tpaajty kidi nugojip ja jade'en yjaty pø ja Diosxi y'ayujk jade'en ka'pxp sam ja wyinajty tø tni'adsowi ku ja tø'øxy y'u'nkpaatt møjaa'gyijxñim. ²⁴ Ejxpajtin øts idø'øn ya'at nbikta'aky. Ja namajtskpi tø'øxy wa' idø'øn ja kyudanaadyip majtskpi ky ja pudøjkin sa ja Dios tø ttanibiktaagi. Midukpiky, ja Agar idø'øn jade'en sa ja Moisés kyutujk, ja' midi yikmøøy jam Sinaí kojpkøjxp. Pøn ya'atpi kutujk ja'ayi tpadundip ka'ap ja ñitso'oktit. ²⁵ Kyudanaapy ja Agar nayide'en ja Jerusalén kajp midi ixyam ñajx'ajttip ja israelit jaa'dyi ma dø'øn wya'andi ku ja nitsok'ajtin yikpaaty ku nbadu'unin ka'pxy ja Moisés kyutujk. Pøn jade'en tpadundip jade'en ñamyayi pyidsimy sam ja tø'øxy midi nitøøky'ejtnidip. Yikmajadaktip idø'øn ja' ja'abi kutujk. ²⁶ Ma ja tsajpjotpit Jerusalén jam ka'ap ja Moisés kyutujk jam tyuñ, jamts adøm idø'øn xpaat'ajtyindi. ²⁷ Jabi ja'axi dø'øn ja Dios kyajpxy tyijpy ku yide'en jap nøkyijxpy wya'añ:

Mets tø'øxyøjk nøy,

mbaat'ajtiyip mxonda'akt ja'agøjxp ku xpaatwa'añ ja m'u'nk.

Jotkujk mnayjawiyit o mets nijuuni xjagapaaty xjaga'ijxñim m'u'nk.

Øy ja mniyaa'y tø waani mja'atsmajtstu'udyi, wimbetp ja jadigojk jøts ja m'u'nk may xpaatt,

yam ja jadu'ukpi tø'øxyøjk nika'ap jade'endi.

²⁸ Migu'uktøjkti, ni'adsowigøjxp adøm ja Dios x'u'nk'ajtyindi nayide'en sam ja Dios ja Isaac tni'adso'wiyiññ midi ja Sara y'u'nk'ajtpy. ²⁹ Jade'en sam Ismael, ja nitøøky tø'øxy y'u'nk, tmidsepwan'ijty ja Isaac, midi ja Sara myajnk'ajtpy, nayide'eñim ixyam ku adøm xmidsep'atwan'ijtyindi ja jaa'y pøn ja Dios yja' tkajanchja'widip, yam adøm ja Espíritu Santo ja myøk'ajtin xyikjujky'ajtyim. ³⁰ Yide'en idø'øn ja Dios ñøky wya'añ: "Jigax ja nitøøky tø'øxy møøt ja y'u'nk, jabi ka'axi pyaat'aty nay ja'abi maay midi ja Sara myajnk paat'ajtiyip." ³¹ Jade'ents migu'uktøjk idø'øndi, ka'ap adøm idø'øn ñamyayi x'u'nk'ajtyindi ja nitøøky tø'øxy, ja Abraham idø'øn ndejint ja ñidø'øxy ndaak'ajtyindip, ja'agøjxp ku ja Dios tu'ugyi yikjanchjawi.

5

Mimøk'atti pøn mnitso'ok'ajtin mduk'ixmatswajniyidip

¹ Tø adøm ja Cristo xukmajtstuujtyindi ja Moisés kyutujk, ka'ap adøm ja xukja'ajtnandi. Ejx'ettits ja nitsoojkin midi ja Cristo tø xamidsøjkyin.

² Madowdi yikxon. Pøni mdamøk'atwandip ja m'ejxpajt midi ne'kxkøjxp, ja Cristo meets idø'øn ja ñitso'ok'ajtin mgayikmøjtøjkijidip. ³ Ixyam meets ndukja'myech jadigojk ku ja'abi jaa'y pøn ja ejxpajt tkupøjkp ñe'kxkøjxp, kuwani dø'øn ja Moisés kyutujk tyimbyadungøjxit. Kuts jade'en tkatu'unt, ja kudigø'øyin idø'øn ja pyaatp. ⁴ Jam meets winaagin winmay ku ja Dios ja xagupøjkint ku yikpadu'unt ja Moisés kyutujk, ja Cristo meets idø'øn ñamyayi abiky mbiktaknip jøts ja Dios Teety chojkin ja pya'ayo'owin x'ixmajtsidi. ⁵ Jabi adømxi nmøøt'ajtyindip ja jøp'ejxin ku ja Dios Teety xkupøjkindit jade'engøjxp ku ja Espíritu Santo xpudøjkindit jøts ku njanchja'windit ja nwindson'ajtim Jesucristo. ⁶ Kuts ja nwindson'ajtim tu'ugyi nmøøt'ejtindit, wan ja ejxpajt tyikmøøt'aty tkayikmøøt'aty ne'kxkøjxp, niti ja kya'ukwanit. Kuxi ja Cristo njanchja'want ja'axi tump, jøts ja'agøjxpxi adøm nmigu'uk tum ja øybi ndamidsøjkyim.

⁷ Øy meets tø m'uktso'onda'aky jawyeen. ¿Pønts idø'øn tø myikwinmaa'nmya'adyidi ku xka'ukpadunidi ja tyiiby ja yjanchpi midi ja Cristo yja'ajtpy? ⁸ Jabi ka'axi ja Dios Teety jade'en mduñidi midi tø mmø'øyidi ja nitsok'ajtin Cristo køjxp. ⁹ Pø yiknija'wipxi

ku tu'ukpi jaa'y ne'egi namay tyikwinmaa'ndyigø y ja myigu'uk. ¹⁰ Dios køjxp øts ja jøp'ejxin nmøøt'aty ku meets jadigojk x'awimbettit midi jawyeen tø nduk'ixpøkti; pøn meets idø'øn myikwinmaa'ndyigøøwyajnidip, ja' idø'øn ne'egi møk ayo'onbaatp øyi yjadyimyjapøni.

¹¹ Kuts meets jeexyip ndaguwanì ku ja ejxpajt ne'kxkøjxp ja'ayi tu'ugyi tyuñ ka'ap øts ja israelit jaa'y jeexyip xmidsepwa'andi xmi'ekyidi. Niti nisa jeexyip kyawa'andi ku øts ja jeexyip n'agajpxmukixy ku ja Cristo tø xku'o'jkandi kruskøjxp, jøts ku nayide'en tyumidi ja israelit jaa'y y'ixpøjkindi. Tu'ugyi øts ja'ayi nnigajpxy ja Cristo yja'. ¹² Pønts meets ya'at tsinaa'yin kuwanì mdukupøkwajnidip, paat'ajtiyip jøts ja ne'egi kø'øm ñankyudigø'øyiñidit.

¹³ Migu'uktøjkti, tø Dios mwi'ijxyiyidi jøts ka' kuwanì x'ukpadunidit ja Moisés kyutujk jøts jade'en ja awa'ats'ajtin xpaattit. Ka'ap yø'øbi awa'ats'ajtin xyikwa'andit ku adøm o tigati ndyimdyu'unandit; ja' ne'egi xyikwa'andit jøts nixem niyam mnachokiyidit sam nayide'en mnabyudøkiyidit. ¹⁴ Ku ya'atpi tu'uk kutujk nbadu'unint, tuki'iyi dø'øn ja ndejint ja Dios kyutujk yikpadunguixy, midi yide'en wamp: "Tsok ja mmigu'uk samdam meets kø'øm mnachøkyi." ¹⁵ Kuts meets mnachepwa'añidi mnachep'ijxyidi, jnay'ejx'etidim, kidi meets kø'øm mnankwyinmaa'ndyigø yidi jøts mjanchja'win jade'en xkayikwindigø'ødyit!

Ja ka'ødyu'unin midi ya naxwiñ yiktanaxp jøts ja øchinaa'yin midi ja Espiritu Santo yajkpy

¹⁶ Ya'at meets idø'øn ndukmadøøpy: jøts ja mdsinaa'yin xyiknaxtit sam ja Espiritu Santo mdamidsøkyidi, jøts jade'en ka' xyikmøj'attit ja ka'øybi midi ya'it tsinaa'yin y'amidøøpy. ¹⁷ Ya'atpi ka'øybi midi ngø'ømdsojkingøjxp nbadunwa'añindip, ka'ap ja Espiritu Santo møøt ñamyayiyi. Tum majada'akwandip ja' jøts ka' xuktunwa'añim pøni midi adøm kø'øm njatsøky'ajtyimp. ¹⁸ Pøni janch ja Espiritu Santo meets mduu'møøjyidip, ka'ap meets ja Moisés kyutujk m'ukpaat'ajtniyidi.

¹⁹ Nigaxi'iky ja chinaa'yin ja'adi pøn ja ka'ødyu'unin pyadundip midi ja ne'kx ja kojpk y'amidøøpy. Ya'atpi pøky y'agujkpy yide'en ja yjujky'ajtin tyiknaxti: øy ja pøn yaa'dyøjk tø'øxyøjk møøt ñamyøøt'atyidi wan tja'amajtskidi tka'amajtskidi, tum ja axøø'kpi yigaappi y'amidip yjotpidip, ²⁰ ja awanax ja agojnax wyindsø'jkidip wyinja'widip, ja miku' tyunk ja kyamimaadip kyami'ejttip. O pøngapøn myi'ekyidi, ja'ayi tyajotkujk'ajttip ku ja myigu'uk tyikjø'ødi tyikya'axti, øy ja myigu'uk ttami'ekyidi ja ñidsinaa'yin. Øy ja tigati ttatsep'ixa'adi, kyø'øm jotkujk'ajtin ja ja'ayi y'ixaadyip, ja'ayi ja chøky'ajttip jøts ja wenk winmaa'yinygøjxp abiky ñabyikta'agiyidit. ²¹ Tyami'ama'at'ajttip o tigati ja myigu'uk, yikjaa'y'oo'k yikjaa'gyudigøøky tyunk'ajttip, ja amu'uky'ajtin kawindiy'ajtin yikmajadaktip. Tum yø'øbi axøø'kpijøtpty yigaappijøtpty idø'øn ja chinaa'yin tyiknaxti. Ixyam meets ndukja'myech jadigojk, pøni pøn ya'atpi tsinaa'yin ne'egi tpadump niwindem xøøw ja tkapaattit ja Dios kyutujk ma ja yjaa'y ttanitanit.

²² Ku ja Espiritu Santo ndsinaa'yin xuu'mø'øytint, winets idø'øn wyingaxi'iky ja tsojkin ja pa'ayo'owin nixem niyam, ndaxondaajkindip ja Dios, jøts ja øy'ajtin nmøøt'ajtint, nja'gyujkandit nduda'aky'ajtint, n'amigu'ukjaa'y'ajtint, n'øyjaa'y'ajtindit, jøts ja windaay'ajtk ngayiktu'unindit, ²³ nmiyujy'ajtindip ja nmigu'uktøjkti jøts ka'ap ja ngø'øm ja' nyikmajadaajkindit. Nima niwindem, niti kutujk adøm xkadatidyu'unint yø'øbi øyjaa'y'ajtk. ²⁴ Pøn ja Cristo ja'ajtiyidip, tø dø'øn ja ñamyayi tkrustsumgøjxnidi tuki'iyi ja ka'øyjaa'y'ajtin midi yikmøøt'ajtp. ²⁵ Pø tødam adøm ja Espiritu Santo ja jemchinaa'yin xjanchmø'øyidi, ttit ku adøm idø'øn ja ngamibøjkindit pøni ma ja xuu'waa'wa'añindi?

²⁶ Ka'ap adøm idø'øn niti nnadyamikajxint, niti nganadyami'ajkiyindit. Jagam jixkø'øm n'ixwejtsint ja tami'ama'at'ajtk.

6

Nixem niyam nabyudokiyidi

¹ Meets migu'uktøjkti, pøn ja Espíritu Santo yja' tmøøt'ajtkøxiyidip, ku xnijawidit ku nidu'uk ja mmigu'uk ja pøky tø myimajada'agyi, pa'ayo'owingøjxp meets idø'øn ja xpudøkidit jaty, jøts jade'en t'awimbetidit ja øybi tsinaa'yin jadigojk. Mdabajaa'ñaxtip ku meets nayide'en jotmøn wyinaty ja pøky mmimajada'akniyidi. ² Nabyudokiyidi nixem niyam jøts ni'amuki jade'en xmimajada'aktit ja ka'øybi, jabi jade'enxi dø'øn wyinaty xpadundi sam ja Cristo ja kyutujk tñigajpxy.

³ Pøni jaaxi pøn jaa'y midi tyimñamyøja'wiyip, nugo ja kø'øm ñawyindaay'aty. ⁴ Nidu'uk nidu'uk adøm idø'øn kø'øm nnija'wandit ku ja ndsinaa'yin nyiknajxyindi øy; kuts øy ñayjawiyit kø'øm idø'øn ja chinaa'yin ja ñadya'ajawiyit, ka'ap ja myigu'uk yja' ttatøjkiyt.

⁵ Kija' adøm idø'øn ndsinaa'yin ngajpx niwaajtsin Dios wyingujkp.

⁶ Tabudokidi ja mbikta'aky pøn ja øgyajpxy ømyadya'aky ñanky'ejxiyip.

⁷ Kidi kø'øm mnawyindaay'atyidi, jabi ka'axi ja Dios jadi'ini yiktañ pøn ja nugo taguyatwajnip. Ku tigati n'ukneejpint, nay ja'ayi dø'øn n'ejxmukojmamp nbøkmukojmamp ku ja xøøw ja jumøjt wyinaty tpatni. ⁸ Nayide'ents idø'øn ja tsinaa'yin: ku pøngapøn ja'abi tsinaa'yin nugo tpaduñ midi ja ñe'kx ja kyojpk ja'ayi y'amidøøpy, ja o'jkin tigø'øyin idø'øn ja wyinaty pyøkmujknip kyonmujknip ku ja tiidyu'unin mye'ent kyida'akt. Pønts jade'en tpadump sam ja Espíritu Santo ñadyamidsøkyiyi, nay ja'ayi dø'øn kø'øm mo'ojiyidip ja jujky'ajtin xemikøjxp. ⁹ Ka'ap adøm idø'øn ja xwindsejvindit ku ja øybi tsinaa'yin nnanky'ejxindit, ku jade'en ndu'unindit xjats idø'øn nyikmø'øyindit ja kawinmaabyi kunuu'kxin. ¹⁰ Paty meets idø'øn xun'ett, jøts pøngapøn xpudøkidit winjaa windsojk pøni juuni pyaat'aty. Ja'abi jaa'y idø'øn ne'egi mguidyimyja'dyigø'ødyip midi adøm nmigu'uk'ajtyindip tu'ukpi janchja'wingøjxp.

Ku ja Pablo kyajpx'abajtñi xjats y'ukajpxwejni y'ukajpxpoo'kxni

¹¹ Kø'øm meets ixyam yikxon ndyimñijayi sam idø'øn pyaat'aty jøts yikxon xja'gyukidit. Ejxti mabaat øts yø nja'ay myøji. ¹² Yø'øbi jaa'y pøn meets mdaguwa'anijidip ja ejxpajtin ne'kxkøjxp, ja'agøjxp ja ttundi jøts ja øy yik'ejxtit yiknimadya'aktit jøts ka'ap jade'en pøn chep'ejxiyidit chepjawiyidit ku jeexyip ja Cristo yja' ja'ayi tñanky'ixpøjkiyidi ku tø xku'o'jkandi kruskøjxp. ¹³ Øy ja ejxpajtin ne'kxkøjxp tjamøødidi, ka'ats idø'øn ka'pxy kø'øm tpadundi midi ja Moisés kyutujk ñigajpxpy. Kuwani meets ja mdukupøkwā'añiyi ja ejxpajtin ne'kxkøjxp, jøts ja jade'en ja'ayi ñadya'agajpxiyidit ñadya'øyjawiyidit ku meets ja yja' tø xpadøjkiniyidi. ¹⁴ Jøts øts ka'ap ø niti nnadyamikexyiyi, ja'ayi øts tu'ugyi nmøk'ajtin'ajtpy ku ja nwindson'ajtim Jesucristo tø xku'oogi kruskøjxp. Paty øts ja yigaappi naxwii'ñit tsinaa'yin nga'ukmøkpiktakni, nika'ap øts ja nayide'en xukmimajada'akni. ¹⁵ Jaa kuxi adøm ja Cristo Jesús møøt nnamyaajyindi, niti kyawa'añ pøni jam ja nmøøt'ajtyindi ngamøøt'ajtyindi ja ejxpajtin ne'kxkøjxp; ja' idø'øn ne'egi tump pøni tø ja axøøkpi n'ixmajchindi jøts ja ndsinaa'yin tø nyiktigajchindi. ¹⁶ Wan ja tpaatti tkupøkti ja øy'ajtin kunuu'kx'ajtin pøn ya'at winmaa'ñ tpadundip, jøts møøt ja israelit jaa'dyi pøn idø'øn ja Dios tyimyja'ajtyidip.

¹⁷ Ixyam ø nnigajpxy jøts ka'ap øts pøn xyiktuu'dukt ku nnigajpxt ja Cristo y'ixpøjkin; jabi yamxi øts nmøøt'aty ja ejxpajt ku tø nyikwøpy nyiktsiiky ku øts ja Cristo ngudani.

¹⁸ Meets migu'uktøjkti, jade'en ø nwa'añ jøts xpaattit xemikøjxp ja Dios kyunuu'kxin. Tiigyajpxy idø'øn, jade'en idø'øn ja yjatt.

JA NØKY MIDI JA PABLO TYANĠGAJX JA EFESIIT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Efeso

¹ Øts Pablo'ajtpi, Dios ø kø'øm chojkingøjxp tø xpikta'aky Jesucristo kyudanaabyi jøts ø jade'en xyikugajpxy'aty. Ya'at nøky ja' øts yø ndanija'ayidip ja Efesiit jaa'y pøn jaty ja Dios yja'ajtpy jøts tjanchjawidi nayide'en ja nwindson'ajtim Jesucristo. ² Paat meets ja kunuu'kxin ja øy'ajtin midi ja Dios Teety møøt ja nwindson'ajtim Jesucristo yajkpy.

Ja møj øy'ajtin midi nbaajtimp ku Cristo nmøøt'eitin

³ Ngajxajkindip ja Dios midi tyeety'ajtpy ja nwindson'ajtim Jesucristo, jabi tøts ja kunuu'kxin xmø'øyim ku ja Cristo nmøøt'ijtyim. Ja' y'øy'ajtin tø xanigajxa'andi ma ja chøøni. ⁴ Namga'anin naxwii'ñit cho'onda'aky jøts ja Dios Teety kø'øm xw'ijxyindi xwigø'ønindi Cristo køjxp ku ja xku'ayo'ombaajta'andi, jøts jade'en adøm wa'ats nwingunøjkxa'ant ja' wyingujkp niti pøky niti kadyeey. ⁵ Windi'ixyip idø'øn kø'øm ja Dios Teety ttanibiktaajkiñi jøts ja x'u'nkupøjkint Jesucristo køjxp. ⁶ Paty ejtp ngajxajkindit ja Dios sa tø tnanky'ijxyi ja myøj kunuu'kxin, ku ja y'U'nk tø tnaajtskaxi midi kawinmaañi chøjkpy. ⁷ Ku xtsojknajxyim adøm ja Dios, paty adøm tø xyiknitsøjkyim ku ja y'U'nk Jesús wyidsuñ wyidajxy, jøts y'o'jkingøjxp xpojkpimee'kxyim. ⁸ Kajaa Dios tø tnanky'ijxyi ja chojkin ku tø xmø'øyim ja wejin ja ja'gyukin, ⁹ jøts jade'en tø tnanky'ijxyi ja yu'uchwinmaa'ñ midi adøm ja kø'øm tø xanibiktaajkim sa dø'øn ja ttunwa'añ. ¹⁰ Jatp idø'øn jade'en sa dø'øn ja wyinmaa'ñ tø ttanibiktaagi, kuts ja xøøw kuts ja jumøjt tpaatt, winets ja Dios Teety tuki'iyi ttagidøjkigyøxt ja nwindson'ajtim Jesucristo ti jaty ejtp øy madsoo, yjanaxwiiñi uk yjatsajpjøtpyi, jøts ja amuum kø'øm tningubajk'att.

¹¹ Kuts adøm idø'øn ja Cristo nmøøt'ajtyim, windi'ixyip adøm ja xwi'ejxna'andi xwigo'onandi ja Dios Teety jøts jade'en xmø'øyindit midi xamidsojkimp. Tuki'iyi dø'øn ja ttuñ sa ja chojkin tø ttanibiktaagi. ¹² Tø dø'øn ja ttuñ jade'en jøts øøts idø'øn ja Dios ndakajxa'akt ja y'øy'ajtin ja myøj'ajtin, jabi øøtsts idø'øn jawyeen tø njanchjawi ja Cristo. ¹³ Meets nayide'en, ku xmadowdi ja Dios tyiy'ajtin midi tningajpxp ja yiknitsoojkin, jøts ku xjanchja'widøø ja Cristo, jade'en idø'øn ja Dios Teety mdamiguy'ejxidøø ja y'Espiritu Santo, jøts ja myiktami'ejxkapidit jøts ku meets ja Dios mja'atyidi. Jade'ents idø'øn ja y'ayuujk tyikniwaajch sam ja jawyeen tø tningajpxy. ¹⁴ Nay ja Espiritu Santo midi meets m'ejxpajtin'ajtpy, ja' myikta'ejxkaptip ku ja Dios ja myaay tyikwa'kxt. Jade'en ja Dios ttu'unt ku wyinaty tø tyiknitsoojkøjxni midi tø tniwanguixy. Jade'ents ja Dios yikwindsø'øgit yikwinjawit myøj'ajtingøjxp y'øy'ajtingøjxp.

Ku ja Pablo t'amidøøy tpoøtsøøy ja Dios jøts ja wejin ja ja'gyukin yikmo'odit pøn ja Dios tpadundip

¹⁵ Tø nnijawit ku meets møk ja nwindson'ajtim Jesús x'ajot'aty, ku mee nayide'en øy tsuj ja tsojkin xmø'øy pøn jaty ja Dios ja'ajtyidip. ¹⁶ Ejtp øts ja Dios ndamøjawi ndagunuu'kxyjawi ku ja mgunuu'kxyidi, ka' mee nja'dyigøy, ejtp meets nni'amidowit nnibøøtsowi ku ø ndsapkajpxy. ¹⁷ N'amidøøpy øts ja kunuu'kxy Dios Teety midi tyeety'ajtpy ja nwindson'ajtim Jesucristo jøts ja mmo'o'jyidit ja wejin ja kajin midi yikxon mdukja'gyukiyidip sa ja y'ejxi tyiyi. ¹⁸ N'amidøøpy øts nayide'en ja Dios jøts mgujajyidit mgudøø'kxyidit, jøts jade'en xnijawidit ti dø'øn m'awejxtip midi tø myiktaniwaadsowidi, ku janch kawinmaañi ja maay midi ja Dios tyagumaawyampy pøn ja yja'ajtpy, ¹⁹ jøts nayide'en ø n'amidøy ja Dios jøts xnijawidit ku niti kya'adaniyi kya'adsø'øgyi ku kawinmaañi ja Dios myøk'ajtin midi adøm ja xabudøjka'amp ku adøm ja njanchja'wa'andit, ²⁰ nay ja'abi møk'ajtin idø'øn midi ñanky'ejxi ku Cristo jap oo'kpi agujkpy wyimbijty jujky jadigojk, jøts ku ja nayide'en chajpajtnaa jøts ja Dios Teety

y'aga'ngyøj'øm ja kutujktaajk myøøjyi. ²¹ Jawani møj idø'øn ja Cristo yikpiktaajky, nipøn windsøn nipøn yikutujkpi tkami'aguijpxy'aty ya naxwiiñ jøts tsajpjotp, icyam jøts xemikøjxp nipøn ja tkamibaat'att. ²² Tuki'iyi dø'øn midi ja Dios tø tyikøjy, ja Cristo dø'øn tnitanaagyøjxp, ja' idø'øn tñigubajk'ajtp niduki'iyi pøn jaty ja Dios tjanchja'widip. ²³ Jade'en sa tu'uk ja jaa'y ñine'kx kyaka'pxyi pøni ka'ap ja kyubajk ja te, nayide'en idø'øn ja janchja'wibitøjk ndejint kyaka'pxyidi pøni ka'ap ja Cristo ja ñigubajk'atyidi, jøts ja ka'ap ja myøk'ajtin myø'øyi pø ja'axi tuki'iyi tyik'ejtp tyiknajxp ja naajx ja tsajp.

2

Tø ja Dios xyiknitsøjkyim chojkingøjxp

¹ Tø meets m'anmija'win y'ats'ookti ku mdsøøni pøky'agujkpy, jøts tø yujukpyøjkti ja m'anmija'win jadigojk Cristo køjxp. ² Ku meets y'ijty xpadundi ja ka'øwyyinmaa'ñ midi tpadundip pøn ja Dios tka'ijxyidip, ku ja miku'windsøn yja' xpabøjkidi midi tkajxp ja tyumbitøjk jøts ja t'atskajpxjot'amøjkidit pøn ja Dios tkabadundip. ³ Nayide'en øø tø njaa'y'aty samdam meets. Tum ja' øøts y'ijty ndumpy ja axøøk ja kya'øybi midi ja ne'kx y'amidøøpy, jøts tum ja' midi yigaap pidsømp winmaa'ñjotpy. Paty øøts idø'øn xjapaat'aty jøts øøts ja møj ayo'on nyikmo'ot nayide'en sam o pøn pojkpitumbi. ⁴ Janch møj ja Dios pya'ayo'owin ⁵ ku tø tyikujukpyiky adøm ja n'anmija'win Cristo køjxp, øy adøm ja axøøkpi ja yigaappi tø yjayik'o'jknii ja n'anmija'win. Jade'ents idø'øn niduki'iyi adøm tø nnitsoojknandi ku ja Dios y'øy'ajtin myøji. ⁶ Ku ja Dios tø tyikujukpyiky ja Jesucristo, nayide'en adøm idø'øn ja ñamyayi møøt njujukpyijkyim. Nayide'en idø'øn ja tpaaty ndejint ku ja tsajpjotpy pyatøjkiñi møøt adøm ja nniikxyim jøts ja jap møøt n'ejtint. ⁷ Paty yø Dios Teety jade'en ttuuñ jøts t'ejtitt tñijawidit pøni ti pøni pøn wyinaty memmp kidakp, jøts jade'en tñanky'ejxit mabaat ja chojkin mabaat ja y'øy'ajtin tø xmø'øyim Cristo køjxp. ⁸ Jabi ja Dios chojkingøjxpxi meets tø mnitsø'øky ku xyiktundi ja mjanchja'win. Ka' meets kø'øm xmøøt'aty ja ñankñitso'ok'ajti, ja Dios ja tyajkp. ⁹ Ka'ap ja n'øchinaa'yin xyiknitsø'ok'ajttint midi adøm kø'øm njatu'uñindip, paty ja nganadyamikajxandit. ¹⁰ Tø ja Dios Teety xanibiktaajkim Jesucristo køjxp jøts ja øchinaa'yin ndu'unint sayim ja wyinmaa'ñ ja tmøøt'aty.

Ja øy'ajtin midi ja Dios Teety tø xmø'øyim Cristo køjxp

¹¹ Ja'myatsti sa meets y'ijty mjatti mgubatti ku meets ja israelit jaa'y xkamigu'uk'attinim, kø'ømyixi ja y'ijty ñadyamøjawiyidi ja Dios y'ejxpajtin midi pyiktaktip ñe'kxkøjxp. Paty meets wenk myiknimadya'aky wenk myikniwinmayi ja'agøjxp ku xkamøøt'atti ja'abi ejxpajtin. ¹² Arootstujpy aduktyujpy meets ojs mdsøøni, ni xkanijawidi pøni pøn pøni ti ja tø tñimiñ midi tyejtipp Cristo. Aduky meets ja mduu', tsi'kxy meets ja mduu' ma y'ukyiknijawit ja øgyajpxy ja ømyadya'aky pøni sadam ja Dios t'ødyunwa'lañ ja naxwii'ñit jaa'y. Ja Israelit jaa'y ja ja'ayi y'ijty tmøøt'ajttip, ka'ap y'ijty tu'ugyi ja Dios Teety x'ajot'atti, niti awejxin niti jøp'ejxin xkajagyapti ya naxwiiñ. ¹³ Ixyamts meets ja Jesucristo mja'ajtinnyidi y'o'jkingøjxp, o meets jagam jixkø'øm ja mdsinaa'yin tø xyiknaxy. ¹⁴ Tøts adøm ja xmø'øyim ja øy'ajtin ja jotkujk'ajtin. Jabi ja'ats idø'øn tø t'awaamuky t'agonmuky ja israelit jaa'dyi møøt pøn ka'israelit jaa'dyi. Jade'en ja tsep tø tyikudigøy. ¹⁵⁻¹⁶ Kuts ja y'o'jky jam kruskøjxp, jade'ents idø'øn tyikudigøjyi ja Moisés kyutujk midi kuwani yikpadump y'ijty, midi tyamøk'ajttip ja israelit jaa'yiyi. Jøts jade'en ja jadu'uk tsinaa'yin tyiktso'ondaajky, jøts jade'en tyiknamyujki ja israelit jaa'y møøt pøn ka'israelitjaa'y'ajttip. Tu'ugyits jade'en yjaa'y'attit jotkujk Cristo køjxp jøts jade'en ja Dios Teety tkamidsep'attit.

¹⁷ Jade'en'ampy ja Cristo myiiñ jøts ja øgyajpxy ømyadya'aky tñigajpxy sa dø'øn ja øy'ajtin nbaajttint midi meets y'ijty mganija'wipnim, jøts midi øøts tø ngaja'gyuki, øy øøts ja tø nja'ixy, øy øøts ja tø njamøøt'aty. ¹⁸ Jabi Cristits adøm xuu'mø'øyindip sudso ja

Dios Teety nbaajtindit ni'amuki wan t'israelitjaa'yidi wan tka'israelitjaa'yidi, jøts tu'ugyi adøm idø'øn ja Espíritu Santo myøk'ajtin nyiktu'uñimp. ¹⁹ Migugajp ja'winiyidip meets ixyam niduki'iyi ja Dios janchja'wibidi, ka'ap ukjade'eni sam y'ijty. Ja Dios meets idø'øn mja'ajtniyidip møøt ja'adi pøn jaty ja y'u'nkja'wip. ²⁰ Jade'en idø'øn tpaaty ja Dios kyajp sam tu'uk ja møj tøjki midi møj tsaa tøjki tapojtsøøn; jøts jade'en ja Cristo sam ja møj tsaa midi yiktapojtsøomp, jøts ja kyudanaabyitøjki møøt ja kyu'aaw jade'endi sam ja mutsk tsaa una'jkindi. ²¹ Adøm idø'øn tsaptøjki'ajtindip ndejint pøn tjanchja'widip ja Dios. Kuts ja jaa'y pøn tka'ijxyidip ja Dios jøts ja tjanchja'wiñidi, jade'ents adøm ja ndsaptøjki myøjandi midi ndejint tøjki tapojtsøøn Cristo køjxp. ²² Nayide'en meets idø'øn ja Dios mja'ajtniyidi jøts tøjki mduktatøjki'iyidi ja y'Espíritu Santo.

3

Kuja Pablo tniigugajpxy'aty ja øgyajpxy ja øy'ayuujk jøts ttukmadøy pøn ka'israelit jaa'dyi

¹ Ixyam ø puxøjki'ajtpy ndsøøni ja'agøjxp ku meets tøjki ndukmadøy ja Jesucristo ja yja' ku meets nayide'en mbaat'aty xpaatt ja' y'ø'y'ajtin. ² Pø mnija'wiñip meets ku øts ja Dios y'ø'y'ajtingøjxp tøjki xpikta'aky jøts øts ja yja' nnigajpxit jøts meets ja øchinaa'yin xyiknajxnit. ³ Sam meets jap nøkyjøjtpy jawyeen tøjki nduk'ixy tøjki nduknijawi ku øts ja Dios tøjki xukmadøy ja yu'uch winmaa'ñ, ku meets nayide'en xpaatt ja' y'ø'y'ajtin sam israelit jaa'y ja tøjki tpaatti. ⁴ Ku ja nøky xkajpxtit, jap meets idø'øn x'ext xnijawit ku øts ja Dios yu'uch winmaa'ñ nnija'wiyi midi ja Cristo yja' tniigajpxip. ⁵ Nijuuni ja'abi winmaa'ñ tøjki yikniigajpxy tøjki yiknijawi, ixyamnim idø'øn ja Dios jade'en tøjki ttuk'ixy ja kyudanaabyitøjki ja kyugajpxtytøjki ku ja Espíritu Santo tøjki y'agajpxiniyidi. Ja'abi jaa'y ja'adi, pøn ja Dios tøjki ñadyamiyojxniyidi. ⁶ Ya'at idø'øn yu'uch wyinmaa'ñ'ajtp midi ja Dios myøøt'ajtpy: ku dø'øn jade'en tjanchjawidit ja øgyajpxy ja ømyadya'aky midi xyiknitso'ok'ajtindip, winets jade'en ni'amuki tpaattit ja Dios myaay ja israelit jaa'dyi sam nayide'en pøn ka'israelit jaa'dyi. Jøts jade'en ñamyayidit jøts tøjki tpaattit ja' midi Dios tøjki tni'adsowi Jesucristo køjxp.

⁷ Ka'ap øts xjapaat'aty ku øts ja øy'ajtin tøjki nyikmøøy jøts øts ja øgyajpxy ja ømyadya'aky tu'ugyi ndu'unt, jabi jade'ents idø'øn ja Dios ja myøk'ajtin tøjki xamidsøky. ⁸ Meets niduki'iyi pøn ja Dios ja'ajtidip, øts idø'øn nayja'wiyip tyimyutsk, jøts øts jade'en ja Dios tøjki xanipiky jøts ndukmado'odit pøn ka'israelit jaa'dyi sa ja myøji ja Cristo y'ø'y'ajtin. ⁹ Tøjki øts ja Dios jade'en xanipiky jøts øts ja naxwii'ñit jaa'y nduk'ext nduknijawit sa dø'øn ja yu'uch winmaa'ñ windi'ixyip tøjki ttanibiktaajkiñi, jaayip ku ja naxwii'ñit tyiktso'ondaajky. ¹⁰ Paty idø'øn ja jade'en yjajty, jøts ja yiktuk'ext yiktuknijawidit ja ankilistøjki jøts nayide'en pøn jaty møj'ajttip jap tsajpøjtpy mabaat idø'øn ja Dios ñijawi'ajtin yja'aty. Jade'en ja tñanky'ijxyi ku ja tøjki tøjki tkonmuky ja øybi ka'øybi jaa'y, tu'ugyi tñankñamyuky janchja'wingøjxp. ¹¹ Jade'en ja tøjki ttuñ sa ja windi'ixyip tøjki ttanibiktaajkiñi ku ja nwindson'ajtim Jesucristo jade'en ja chinaa'yin tñanky'ijxyi tñankñijawiyi. ¹² Ku adøm ja nwindson'ajtim Jesucristo njanchja'wim, agujk jotkujk adøm nwingunøjki'ixniñant ja Dios Teety, niti tsø'øgi niti jøjpawi ja', ja'ayi nmøk'ajtim ja njanchja'win. ¹³ Paty meets nnøjmi jøts ka'ap mjotmay'ooktit ku øts yap puxøjki'ajtpy n'ayøy meets køjxp. Jotkujk meets idø'øn ne'egi mnayjawiyidit, jabi jade'ents idø'øn ja Dios yja' yiknijaty.

Ja Cristo chojkin

¹⁴ Ku nja'myatskixy midi ja Dios tøjki ttuñ, jats øts jade'en ja Dios Teety y'ø'y'ajtin ngunuu'kxyja'wiyi pøn tyeety'ajtpy ja nwindson'ajtim Jesucristo, ¹⁵ jøts pøn tyajkp ja wyinmaa'ñ ja yujky'ajtin jap tsajpøjtpy sam naxwiiñ. ¹⁶ N'amidøøpy øts ja Dios Teety ja myøk'ajtin midi myøøt'ajtpy kawinmaa'ñi jøts ttamigaxit ja Espíritu Santo, jøts jade'en myikjotmøk'atiyidit. ¹⁷ N'amidøøpy øts jøts jam m'anmija'wingøjxp y'ettit xemikøjxp ja Cristo jade'en ku janchja'win xmøøt'atti, jøts jade'en ja tøjki tøjki møk xmøøt'attit midi ja

Dios mdamiyoxtip, ¹⁸ jøts jade'en xja'gyukidit møøt pøn tpaðøjktip ja nwindson'ajtim Jesucristo mabaat idø'on myøji ja chojkin midi kawinmaañi. ¹⁹ Ni'amido'ojip meets jits x'ejxtit xnijawidit ja'abi tsojkin jøts jade'en tuki'iyi mdatøjkigyøjxiyidit ja Dios, øy ja ka' tyimyiknijawigyixy mabaat idø'on ja myøji.

²⁰ Ixyamts idø'on pyaat'aty i jøts adøm ja Dios ndagunuu'kxyja'wa'ant ndamøja'wa'ant ja'agøjxp ku møj ja myøk'ajtin midi tøm xjamø'øyim. Ka'ap adøm ja nwinmaa'ñ mya-jadaajkyim, ni ka'baat ja yikja'gyuki mabaat idø'on ja myøk'ajtin myajada'aky midi adøm xyiktu'unimp. ²¹ ;Wan twindsø'jka'andi twinja'wa'andi ja Dios Teety xemikøjxp ni'amuki pøn jaty ja janchja'wiyip Cristo køjxp! Jade'en idø'on ja yjatt.

4

Tu'ugyi adøm nnayja'wiyindi Espiritu Santo køjxp

¹ Ja nwindson'ajtimgøjxp øts tøm nyiktsumy, paty meets n'amidøy nbøktsøy jøts øy yikxon mjaa'y'attit sam idø'on pyaat'aty ttu'undit pøn ja Dios tøm wyi'ijxyidi wyigøñidi, ma meets idø'on nayide'en tøm myikpiktakmidi. ² Tuda'aky'atti, møøt'atti ja maa'kxujkin; nachokidi nixem niyam, kidi xa'ambøkti ku ti ku sa mjatti. ³ Tu'ugyi m'ettit, ja Espiritu Santo mbudøkiyidip jøts jade'en xemikøjxp y'ett ja jotkujk'ajtin. ⁴ Tu'ukpi jaa'y adøm pøn tpadundip ja Dios, tu'ugyi ja Espiritu Santo jøts tu'ugyi nayide'en ja awejxin nmøøt'ajtyim midi ja Dios tøm tni'adsowi. ⁵ Tu'ugyi adøm ja nwindson'ajtim, jøts tu'ugyi ja njanchja'win, jøts ja nnøbajtin, ⁶ tu'uk ja Dios midi tnideety'ajtp niduki'iyi tuknax. Ja' tnigubajk'ajtp niduki'iyi, adømgøjxp ja tnanky'ijxyi midi ja tyunwampy, jøts møøt ja y'ity pøn jaty ja yja'ajtpy.

⁷ Kija' adøm idø'on tøm nyiktanibiktaajkindi ja ndunkjøøjp, sam ja Cristo kø'øm tta'ejxi, jade'en ja tøm tyaky. ⁸ Paty ja Dios jade'en ja kyajpxy wyaañ ku ja nwindson'ajtim wyimbijty jadigojk tsajpjøtpy ku tyik'awa'atspidsømgijxy pøn ja miku' wyinajty tøm myimajadaajkniiyidi jøts tmo'ot ja myøk'ajtin ja naxwii'ñit jaa'y.

⁹ ¿Tits idø'on jade'en tyijpy ku dø'on ñiiimy ku wyimbijty jadigojk jap tsajpjøtpy? Ja' idø'on ku ya myiiñ naxwiiñ jøts jade'en ja amutsk'ajtin tpaajty. ¹⁰ Nay ja' idø'on patøjkiñi tsajpjøtpy midi ya atsmeen naxwiiñ, jøts jade'en yikpiktaajkni møjwindsøn jøts o ma jade'en tyiknigaxø'økt ja myøk'ajtin. ¹¹ Jøts jade'en nidu'uk nidu'uk tmøøy kija' ja jaa'y tyunkjøøjp, jam pøn kudanaabyitøjkti, jam pøn kugajpxtyøjkmidi, pøn ja øgyajpxy ømyadya'aky tyikyø'ømyidip tyiknaxmidip, jøts jam pøn kajpxwejmidi yik'ixpøjkmidi. ¹² Jade'en ja yjaa'y ja ojs tuu'mø'øy sudso ja tyunkjøøjp ja tpadu'undit, jøts jade'en myiwenit ja yjanchja'win pøn jaty Cristo yja'ajtpy, ¹³ jøts kunim adøm ja yikxon ni'amuki ni'aga'pxi nnija'wa'andit ja Dios U'nk janchja'wingøjxp. Winetnimts ja nwinmaa'ñ myøktaajkindit jøtsnim idø'on iiy nayide'en ndu'unint sam ja Cristo. ¹⁴ Ka'ap adøm ja mutsk winmaa'ñ n'ukmøøt'ajtna'ant sam o pøn tigati tpadungøjy ja'ayi ku tsuj tmadøy, øy ja yjanchi kyajanchi myøjpiktakpy ja'. ¹⁵ Ku adøm idø'on ja Cristo n'aduunaxkøjxint, jaanimts idø'on nmøøt'ajtint ja tsojkin jøts jade'en nduk'ejxna'ant nduknija'wa'ant ja nmigu'uk ja tiy'ajtin, jabi Cristits adøm xnigubajtimp. ¹⁶ Ku ja tnigubajk'aty, sa dø'on øy ñijkxy ñaxy. Pøni sats adøm nidu'uk nidu'uk tøm nyikmø'øyim ja ndunkjøøjp, jade'en adøm ja xpudøjka'amp jøts øy møk y'ettit ja yjanchja'win, jøts myøjidit myayidit ja wyinmaa'ndyi, tyatøjkiniiyidit ja tsojkin.

Ja jemchinaa'yin midi ja Cristo tøm xmø'øyim

¹⁷ Ya'ats øts idø'on nnigajpxpy nwindson'ajtimgøjxp: jøts ka'ap jade'en m'uktsinaañidit sam ja chøøniidi pøn tka'ejx'ajttip ja Dios, midi tmøjpiktaajktip ja katumbi winmaa'ñ, ¹⁸ jøts agootstujpy abel'etstujpy ja yja'gyuki tmøøt'atti. Ka'ap ja tmøøt'atti ja jujky'ajtin midi ja Dios yajkpy, ku ja kø'øm ka' ttsokti ku ja kø'øm ka' tnijawiwya'andi. ¹⁹ Tøm ja chøødyu'un'ajtin ja tyiktigøøñidi jøts jam tøm ñagyiyajkniiyidi ma jam ja y'axøøkpi

yigaappi yiktuñ. ²⁰ Ka' meets jade'en ja Cristo yja' tɔ mduk'ijxyiyidi tɔ mduknijawiyidi, ²¹ pɔni tɔdam meets idø'øn ja xjanchpatmadoji ja yja' ku dø'øn ja jade'en ka' wya'añ, ku dø'øn tɔ myiktukmadowdi ja tyiy'ajtin. ²² Majtstutnidi tuki'iyi pɔni sa y'ijty ja mdsinaa'yin xyiknaxti, ku xpadundi ja y'øbyi kya'øbyi midi pidsømp winmaa'ñjɔtpy, midi mnadyawindaay'ajtidip kø'øm. ²³ Myikjemyiñidip meets idø'øn ja m'aaw ja mjoojt sam ja mwinmaa'yindi nayide'en, ²⁴ jøts jade'en xpøjknidit ja jemchinaa'yin sam ja Dios kø'øm tɔ mdamidsokyidi. Jade'ents ja øchinaa'yin ñigaxi'iky ku øy ku tsuj ja mdsinaa'yin xyiknaxtit, niti pøky niti kadyeey.

²⁵ Paty meets ka' m'uktaay'ajtnit; ku mmigu'uk xmigajpxt tiy janch idø'øn ja møøt mmadya'akt, jabi tu'ugyits adøm idø'øn ja janchja'win nbaduu'ñim.

²⁶ Pɔni m'ambøjktip, kidi mnankpyøkyetyidi; ka'ap ja m'aki xyikta'anidit. ²⁷ Kidi ja miku' xyikmøj'atti.

²⁸ Pøn y'ijty maa'tsp, wan ja tmajtstutni jøts ne'egi tyundøjkiñit, jøts jade'en ja ødyunk ttu'unt jøts jade'en tpudøkit pøn ayoop.

²⁹ Ka'ap axøøkpi kajpxy axøøkpi madya'aky xyiktu'undit, ja øbyi madya'aky ne'egi xyiktu'undit jøts jade'en ja mmigu'uk xmo'odit ja tigajtsin jøts ja kunuu'kxy'ajtin. ³⁰ Kidi meets xyikjotmay'øøky ja Dios ja y'Espiritu Santo, ja'ats meets idø'øn m'ejxpajtin'ajtpy jøts jade'en ja Dios m'ejxkapidit ku meets ja mja'aty, ixyam sam wyinaty ku mmøøgyøjxniyidit tuki'iyi ja nitso'ok'ajtin.

³¹ Majtstutnidi tuki'iyi ja m'aki, kidi mjotma'atti, ja pøjpi tsa'pxpi madya'aky jagam ja yiktanidi sam tuki'iyi ja' midi ka'øy nayide'en. ³² Yikxon meets idø'øn ne'egi m'øy'att, mnabya'ayowidip meets, jøts nayide'en mnamyaa'kxukiyidit jade'en sam meets ja Dios Teety tɔ mmeekxyiyidi Cristo køjxp.

5

Sa dø'øn ja chinaa'yin ja tyiknaxtit pøn ja Dios u'nk'ajtiyidip

¹ Kawinmaañi meets idø'øn ja Dios Teety mdsøkyidi paty meets idø'øn ja xpadu'unt sam ja mutsk unajk tpadundi ja tyeety. ² Nanky'ejxidi ja mdsojkin nayide'en sam ja Cristo xtsøjkyindi jøts ku ja xku'ayo'owim adøm nbøkyøjxp. Jade'ents ja Dios t'øyja'wiyi'ñ kø'øm ku ja jade'en ttuuñ.

³ Ixmatskøjxti tuki'iyi ja kya'øbyi. Kidi ø pøngapøn møøt mnamyøøt'atyidi, kidi xniwængøjxwa'andi tuki'iyi ja jujky'ajtin midi ya naxwiiñ najxp, jabi ja Diosxi meets ja'ayi mja'ajtniyidip. ⁴ Kidi ja axøøkpi ja yiktsø'ødyumbi madya'aky xmøøt'atti, jabi ka'axi jade'embi pyaat'atyiyi. Ja Dios meets idø'øn ne'egi ja y'øy'ajtin mnimadyajkidip. ⁵ Tøts meets xnijawi ku o pøn yaa'dyøjk o pøn tø'øxyøjk ñamyøøt'ajtkøjyidi, ok pønts ja axøøkpi yigaappi tyumpy, ok pønts ne'egi tsojpk midi ja naxwii'ñit yajkpy, ka'apts ja mibaat pyaat'aty tpaatt ja Dios kyutujk ma ja Cristo ttanitanit ja yjaa'y. Jabi wenkpi diosxi dø'øn ndejint y'ajot'ajtnip pøn ja naxwii'ñit øy'ajtin ttajotmay'oo'kp. ⁶ Kidi xyikmajada'akti ja win'øø'mbidi pøn wandip ku yø'øbi winmaa'ñ y'øyi jøts xpadu'undit, pø møkts ja Dios ja tyikastigipaatt pøn ja kabaduujnip. ⁷ Ixmatskøjxti tuki'iyi yø'øbi jaa'y.

⁸⁻⁹ Jabi jaj agujkpyts meets mdsinaañi kuts ja nwindson'ajtim møøt m'etti. Ka'ap jade'en ja mdsinaa'yin x'ukyiknaxnidi sam y'ijtyin. Ku ja nwindson'ajtim jade'en ja kunol'jkin xmø'øyim, jade'ents idø'øn nnanky'ejxint nnankñija'wa'ant ja øbyi tsinaa'yin, sam idø'øn ndejint ja øy'ajtin ja tiy'ajtin jøts midi paat'ajtip ndu'unim. Yikyø'ødyi dø'øn jade'en ja mdunk. ¹⁰ Tun meets ja may'ajt jøts x'ejxtit xnijawidit midi'ibi dø'øn ja Dios chøjkpy. ¹¹ Kidi xundi ja' midi katump, ja' yø ttundip pøn agootstujpy tsinaadyip; ne'egi pudøki meets idø'øn ja' jøts xukpaattit ja kuxiijndya'aky'ajtin. ¹² Janch tsø'ødyu'unin idø'øn ja ñaxy ku adøm nnimadyajkindit sa dø'øn ja chinaa'yin amaa'tsk tyiknaxti. ¹³ Øy idø'øn ja nayide'en tpaaty ku adøm ndukja'gyukandit mabaat idø'øn ja chinaa'yin ja

kya'øyidi, wan wyinaty jade'en ja Dios o pøn tpabøjkni. ¹⁴ Paty idø'øn ja wijkyajpxy wya'añ:

Wejnidi kajnidi meets;

kidi agootstujpy abe'etstujpy m'uktsinaañidi,
ja Cristits ja kuno'jkin kudøø'kxin tyakp.

¹⁵ Patyts meets idø'øn øy x'ejxtit sa dø'øn ja mdsinaa'yin xyiknaxtit. Kidi jade'en md-søønidi sam pøn kube'ets kumon, wijy keyy xyiknaxtit. ¹⁶ Wijy keyy mnabyikta'agiyidit jøts tum ja øybi ttundi, jabi ja ka'øybixi yjawi icyam nankmyøjtøk'wyajniyip. ¹⁷ Kidi mgawinmaa'mbyaatti, ixa'adi nijawidi pøni ti dø'øn ja nwindson'ajtim tømдамidsøkyidi. ¹⁸ Kidi mnadyamiyøxyidi ja nøø ja pa'ak ja amu'ukyjaa'y'ajtin midi ja windigø'øyin tyajkp, yikmøj'atti yikmajada'akti, nadyamiyojxidi ne'egi ja Espiritu Santo. ¹⁹ Ja nwindson'ajtim idø'øn ne'egi mnimadya'aktip, ku ja Salmos xkajpxtit jøts ja y'øøjik xawin'ø'ødit. Tu'ugyi ja m'aaw ja mjoojt xpikta'aktit. ²⁰ Nwindson'ajtim Jesucristo køjpx xamøja'wikyunaxtit ja Dios Teety ku ja kunuu'kxin tyaky køx kida'ak.

Sa dø'øn chøønidi ja teety ja taak ja u'nk ja una'jk pøn ja Cristo tpadundip

²¹ Jade'ents ja Dios xawindsø'øgidit ku nixem niyam mnagyupøkidit.

²² Ja tø'øxyøjkti pøn amajtskti ja ñiyaa'y pyadu'undip, nayide'en idø'øn sam ja nwindson'ajtim tpadu'undit. ²³ Ja yaa'dyøjk tñigubajk'ajtp ja ñidø'øxy, nayide'en sam ja Cristo tñigubajk'aty ja yjaa'y, pøn nayide'en yiknitsøjkpy. ²⁴ Jade'en sam ja Cristo kyupiky'atyiyi ja yjaa'y, nayide'ents idø'øn ja amajtsk tø'øxyøjkti ja ñiyaa'y tkupiky'ajtmidit tuki'iyi.

²⁵ Ja amajtsk yaa'dyøjkti, choktip ja ñidø'øxy ja nayide'en sam ja Cristo tøm tøsøky ja yjaa'y ku ttamiyøxy ja yjujky'ajtin. ²⁶ Paty ja jade'en ttuun jøts tjibijky tñigøøn ja yjaa'y niti pøky niti kadyeey, tyikwatsni jade'en nøbajtingøjpx ku ja øgyajpxy ømyadya'aky yikpaduñ yikjanchjawi, ²⁷ jøts jade'en møøt y'ett jøts jade'en tñanky'ejxit tsuj wa'ats, ni tu'uk kya'øybi tyikwingaxø'økt. ²⁸ Jade'ents idø'øn ja yaa'dyøjk ttsoktit ja ñidø'øxy sam t'ejx'etti ja kyø'ømne'kx ja kyø'ømgojpk. Pøn idø'øn ja ñidø'øxy ttsojpk kø'øm idø'øn ja ñadyamidsøkyi. ²⁹ Pø ka'axi pøn ja ñe'kx tmidsep'aty, y'ejx'ijtpy ja' jøts yjujky'ett chuxk'ett; tyimñayide'en idø'øn ja Cristo ttunmi møøt ja yjaa'y, ³⁰ jabi ñe'kx'ajtpyxi dø'øn ja ndejint ja yjaa'y ma adøm nayide'en tøm nyikpiktaajkyindi ma dø'øn ndejint adøm nbajk'ajtyindi nxixy'ajtyindi. ³¹ Sam jap nøkyijpxy wya'añ: "Myajtstu'utp ja yaa'dyøjk ja tyeety ja tyaaak jøts jade'en ja ñidø'øxy møøt y'ett ejximdam tu'ukpi jaa'y." ³² Nnija'wip øts ku ya'atpi madya'aky janchtyimchep, ja' idø'øn yø wya'añ jøts yikja'gyukit waani sa dø'øn adøm ja Cristo møøt tu'ugyi njaa'y'ajtyim. ³³ Nayide'ents idø'øn tñigajpxmi ku nidu'uk nidu'uk ja yaa'dyøjk ttsoktit ja ñidø'øxy sam kø'øm ñabya'ayøyidi, jøts nayide'en ja tø'øxyøjk tkajpxkyupøktit ja ñiyaa'y.

6

¹ U'nk una'jkti, ja' meets idø'øn mdunkjøøjp'ajtpy ku ja mdeety xpadu'undit. Jade'en xyiknigaxø'øktit ku meets ja Dios xjanchjawi, jade'en idø'øn pyaat'aty. ² Ja myidu'ukpi ka'ama'ayin midi myøøt'ajtpy ja awejxin, ya'at idø'øn ja': "Windsø'øgi ja mdeety jøts ja mdaak, ³ jøts jade'en øy jotkujk xyiknaxt jøts yo'ont ja mdsinaa'yin ya naxwiiñ."

⁴ Meets u'nkteetyi, kidi o tigati m'u'nk xa'ohti, ots ja jade'en mmidsepwa'anidit jøts ka'ap m'ukyikajpxkyupøjknidit. Ja'gyuki køjpx meets idø'øn ja ne'egi møøt mgajpxt mmadya'akt jøts jade'en xuk'ejxtit xuknijawidit ja nwindson'ajtim ja tyiy'ajtin.

⁵ Tumbitøjkti, mimadowdi ja mwindsøndi ya naxwiiñ. Windsø'øgidit, padundi tuki'iyi midi ñi'ane'empy sam idø'øn pyaat'aty ni midu'unint ja Cristo.

⁶ Tungøjxti ejtp midi y'ane'empy, ka'ap jaayi yijy mnabyikta'agidit ku ja m'ijxyidi jøts jade'en ñadyijyi myikajxa'aktit. Jade'ents idø'øn ne'egi xu'undit sam ndejint ja Cristo

yikmiduñ, jøts tuki'iyi ja m'aaw ja mjoojt xpikta'aktit, jøts jade'en ja Dios yja' xpadu-ujnidit midi kò'òm tò ttanibiktaagi. ⁷ Kidi mdunk xuñ a'aka jot'aka, ja nwindson'ajtim idø'øn ne'egi mdawindsø'ogip jøts ka' x'ixa'at ja jaay' kyajxajkin. ⁸ Pø tøts xnijawidi ku adøm nidu'uk nidu'uk xkumaa'yin ja nwindson'ajtim pøni sa adøm ya øy tø ndu'uñim, wan pøn awa'atstum ka'awa'atstum tø tyiknaxy.

⁹ Meets yiktumbitøjkti, yikxon meets ja mdumbi ana'am, kidi xwinwopti xjøjwopti. Ja'myats meets ku meets ja nwindson'ajtim nayide'en xmidunmi midi tsajpjøtpty tsinaapy, jøts ka'ap ja' twi'ixy twigøñ, tuknax adømdi ja' wyingujkp, wan tumbi tkatumbi.

Ja nigubojkin midi myøøt'ajttip pøn ja Cristo tjanchja'widip

¹⁰ Ixyam migu'uktøjkti, yikmøkidi ja møk'ajtin midi tø mdatøkiiyidi ku ja nwindson'ajtim xmøøt'atti. ¹¹ A'ejxidi abaadidi ja mnigubojkin midi ja Dios yajkpy, jøts jade'en møk xwindanidit ja miku' jøts ka' xyikmajada'aktit ja tyaay'ajtin. ¹² Ka'axi adøm nmøøtseptuñim ja jaay', ja'ats adøm møøt ja tsep nyiknajxyim pøn kayik'ejxp kayiktomp, midi yiktseptump, ku ja tnigubajk'aty tuki'iyi ja kya'øbyi ya naxwiiñ pøn ja Dios yja' tkatsojkip. ¹³ Paty meets x'ejxmukt xkonmukt tuki'iyi ja nigubojkin midi ja Dios yajkpy, jøts jade'en xmimajada'aktit wyinaty ku ja miku' ja kya'øy'ajtin møk tyikmiñ. Kuts ja jade'en xu'undit, møk mda'andit. ¹⁴ Møk mnabyikta'agidit, ja' møk'atti ja tiy'ajtin nayide'en ndejint sam ku nnachujma'ant, møk ndu'unint. Ja øchinaa'yin ja tiichinaa'yin midi mee mdumpy, ja' mnadyagubokiiyidip sam ja tseptumbi yiknitsø'ogyi ja pujx midi kyachwiiñ. ¹⁵ Nay'a'ejxiyidi nay'abaadiyidi jøts xkajpxyø'ødyit ja øgyajpxy ja ømyadya'aky midi ja øy'ajtin yajkpy, tyimñayide'en ndejint xu'undit sam ja soldadi ja kyø'øk ttawa'agi jøts jade'en t'a'ejxi ja tsep. ¹⁶ Yø janchja'wints idø'øn ne'egi mmøøt'attip jøts ka' sa mjattit o ti o sa mjatuñidi ja miku'. Jade'en idø'øn ndejint mnigubokiiyidit sam tu'uk ja møj pujx tkayiknaxy ja tsujxjøjpx ja tsujxpa'a' ku ja soldadi ja pujx ñadyagubøkyi. ¹⁷ Janchjawidi ja yiknitsø'ok'ajtin jøts jade'en ja m'anmija'win niti nisa kyajattit, jade'en n'ukpiktaajkint sam tu'uk ja soldadi pyujxkujup y'adaniyi. Tamøk'atti ja øgyajpxy ja ømyadya'aky midi ja Espiritu Santo mmøøjyidip jøts jade'en xniguboktit ja tiy'ajtin ja øy'ajtin sam ndejint ja soldadi ja y'espadi ja chinaa'yin yiknitsø'ogyi. ¹⁸ Dios'ajot'ajtingøjxp meets ya'at xungøxt, jøts ja Dios x'amido'odit xpøktso'odit tum ja y'øbyi midi ja Espiritu Santo kyupi-jkpy. Ku ya'at xu'undit jøp'ejxti jøpjawidi, kidi meets jatyi xaka'akwa'añ, ni'amidowidi nibøktsowidi pøn jatyi ja Dios yja'ajtpy. ¹⁹ Ni'amido'owidik øts nibøktso'owidik øts nayide'en jøts ja Dios xmo'ot ja winmaa'ñ jøts øts agujk jotkujk nnigajpxt ja ñitso'ok'ajtin midi y'ijty ja Dios kyananky'ejxipnim. ²⁰ Tø øts ja Dios xnajtskaxi kugajpxy'ajtpi, ja'agøjpx ø tø nyiktsumy. Amidowdi ja Dios jøts øts tuki'iyi nyiktungøxt ja møk'ajtin sa dø'øn pyaat'aty ku øts yø'øbi winmaa'ñ nnanky'ejxiyit nnankñijawiyit.

Ja kajxpoo'kxin midi tyagugøjxiñip

²¹ Yø Tíquico, yø' idø'øn mduknija'wigyøxyidip pøni ti pøni sa øts idø'øn yam nduñ. Adøm nmigu'uk yø' pøn øts yam møk ja pudøjkin xmøøpy jøts jade'en ja nwindson'ajtim Jesucristo yja' nyikmøjit nyikaja'it. ²² Paty meets ndanigaxi, jøts mdukmadowiyidit sa øøts idø'øn yam jøts øøts jade'en xajotkujk'att.

²³ Paat meets migu'uktøjkti ja tuda'aky'ajtin, ja tsojkin møøt ja janchja'win midi ja Dios Teety ñajtskajxip ñajts'ejxip møøt ja nwindson'ajtim Jesucristo. ²⁴ Jøts Dios Teety ja kunuu'kxidip pøn ja chojkin tø ttamiyoxti ja nwindson'ajtim Jesucristo xemikøjxp. Tiigyajpxy idø'øn, jade'en idø'øn yjatt.

JA NØKY MIDI JA PABLO TYANĠGAJX JA FILIPENSĠT JAA'Y

Ku ja Pablo jap puxøjkjøtpy tnijayi pøn tjanchja'widip ja nwindson'ajtim Jesucristo yja' jam Filipos kajpxkøjxp

¹ Pablo jøts ja Timoteo, øøts nwindson'ajtim Jesucristo nwindson'ajtpy. Ixyamts meets ja nøky tu'uk ndanijayi niwine'en ja Dios Teety mja'atyidi jam Filipos kajpjotp, møøt ja windsøndøjkti jøts ja møjaa'dyøjkti, niðuki'iyi wine'en møøt m'etti ja Jesucristo. ² Paatti kupøkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Ku ja Pablo tni'amidowi tni'bøktsowi ja janchja'wibitøjkti

³ Ejtp øts ja Dios Teety ndukmøjawi øy mee winaak ojk nja'myech. ⁴ Ku øts Dios n'ajot'aty amumjoojt øts ja Dios n'amidøy nbøktsøy jøts ja mbudøkiyidit; ⁵ pø tu'ugyixi adøm ja winmaa'ñ ixyambaat nyikyø'øyindi midi ja Dios yja'ajip, nayide'en sa ja xpadøjkyi'okwandøø. ⁶ Øts wamp jøts ku ja Dios Teety tyikmiweni tyikaja'i y'adø'øtst ja myøk'ajtin midi ja tø mdukpadsø'onda'agyidi, kunim mye'ent jadigojk ja nwindson'ajtim Jesucristo. ⁷ Øwyyinmaapy øts idø'øn ja'agøjxp ku njanchokti jøts ku nay ja Dios kyunuu'kxin x'adsinaajyidi. Nitaniwym øts ja yja' jøts wa'ambyim øts jøts ku ja tyiyi yjanchi, øy øts ja tø njadyimyjagupuxøjktøki uk øy øts wyinaty ja kudunktøjk ja windsøndøjk njadyimyjawinguwa'agidi. ⁸ Pø Diosxi tnija'wip wine'en mee njanchøky nayide'en sa nwindson'ajtim Jesús xtsøjkyim. ⁹ Jade'en øts idø'øn n'amidøy nbøktsøy ja Dios jøts ku øy tsuj mnamyayidit ku ja tyiiby xwinma'adyit, jøts ku ja ja'gyukin xjagyaptit øy juuni. ¹⁰ Ku jade'en xnijawidit jøts xpadu'undit midi øy midi tsuj, jade'ents xjagyaptit m'anmija'win øy wa'ats jøts niti pøky mgapaadiyidit ku mye'ent ja Cristo. ¹¹ Øy wa'ats wyimbidsø'ømdit ja mdunk midi ja nwindson'ajtim mdamidundip, jøts ja yjade'embid idø'øn ja Dios wyindsø'jkinja'wip ja yjade'embid idø'øn ja myøja'wip.

Ja Cristo øts xjagyajp amuum jøts ja' øts amuum xyikjujky'ajtp øy yjuuni'att

¹² Migu'uktøjk, nimadowdi meets, øy øts idø'øn yjawi njemjaty ndejaty, ne'egi nabyudøki ja yjawi tø t'ukpatni, jinaxy ø ne'egi ngajpxwa'kxi ja Dios kyajpxy ja y'ayuujk. ¹³ Tyumnija'widip ja tøjk'adinaabyi ja'adi, jøts nayide'en øy pøn, ku øts ja' nyiktagudsumi ku øts ja nwindson'ajtim yja' nyikø'øyi. ¹⁴ Jøts ku jade'en tø t'ejxti tnijawidi adøm ja nmigu'uk pøn ya'ajttip jøts ku øts yajp tsumy n'ity, ne'egi jinaxy ja tø yjotmøktā'akti jøts ja jade'en tkajpxwa'kxidi ja Dios kyajpxy ja y'ayuujk.

¹⁵ Jats ya pøn øy'ajtin tsuj'ajtingøjxp tkajpxwa'kxtip ja Cristo yja', jats nayide'en pøn winaagin nugo tsepjøjxp ta'ajkingøjxp ttundip, ¹⁶ jøts ja kyø'øm ja' tyikmøjtøkidi, jøts ja ja'ayi nugo xjaaktsepnipøkwa'andi ku øts yap puxøjkjøtpy; ¹⁷ pønts ttundip y'øwyyinmaa'ngyøjxp, ja'agøjxp ja jade'en ttundi ku øts ja xpa'ayowdi, pø ñija'widipxi jøts ku ø nyam'aty, ku øts møk ja Dios yja' nyikyø'øyi. ¹⁸ Jøts tiku øts nugo ndyimya'aty ndyimdyajt? Wan pøn tyikyø'øy y'øwyyinmaa'ngyøjxp uk kya'øwyyinmaa'ngyøjxp, pø nugo tum ja Cristo yja' tkajpxwa'jkxidi; yø' ø ndajotkujk'ajtpy.

Jøts jaaktyimxyonda'akp øts yikxon, ¹⁹ pø nnija'wipxi øts ku øts ya'at ayo'on tuki'iyi nmimadakøxt, ja'agøjxp ku meets ja Dios x'ajot'aty jøts meets xni'amidowi xni'bøktsowi jøts ku øts nayide'en xpudøki ja Espiritu Santo. ²⁰ Ja'ats ø njøp'ijxpy jøts øts ja ka' ndatsø'dyunt, tu'uk amumjoojt øts ja ngajpxit ja yja'. Ixyam idø'øn pyaat'aty yjaaktyimñigaxø'økt yikxon ja Cristo myøk'ajtin midi ø nyiktumpy, njajujky'aty øts uk nja'øøky njadigøy øts, ka' øts ja nwandijy. ²¹ Pø ja Cristoxi øts amuum xjagyajp, ja'ats ø nmøk'ajtpy. Nja'øøky øts, jinaxy øts ja øy xwimbidsø'ømxit. ²² Pøni jaakjujky'ajtpst

øts ya, nay'øy'ajtppts ja nayide'en, jøts øts ja Dios yja' njaakyikyø'øyt, jade'ents ø ka'ap nnijawī pø midī'ibi. ²³ Tum jade'en tum øy, midī'ibi øts ngupøkp ngagupøkp: ne'egi jadyimyja'ats'ookwamp øts, jøts øts ja Cristo xemikøjxp nmøøt'ejtnit, ne'egi jadyimyja'øy'ajtp ja jade'en; ²⁴ jadu'ukts ja winmaa'nmyi, ne'egi jinaxy yjawī chøkyi jøts meets ka'ap jade'eñi nmajtstu'utt, jaakjujky'ajtp øts. ²⁵ Patyts ø nwa'añ jøts ku mee njaakmøøtja'ajtp jøts njaakpudøkidit jøts xajotkujk'attit ku tu'ugyi janchja'wingøjxp xyikmīwenidit xyikajajidit ja Dios yja'. ²⁶ Jade'ents meets njaakminabyaādīt ja nwindson'ajtim Jesucristo kyunuu'kxingøjxp amuum.

²⁷ Yø' mjadyimy'ejxtip yø mdsinaa'yin, jade'en xu'undit sa ja nwindson'ajtim yja' wya'añ. Øy meets jam nja'ats'ixy kø'øm, uk øy øts jadyimyjamā jagam, ja' ø ndsøjkpy jøts øts ejtp nnijawīt jøts ku meets ni'amuki mnabyudøkiyidi, tu'ugyi ja mwinmaa'ñ xyik'etti, xem yam ni'ijtyi xniwinmayidi janchja'wingøjxp sa y'øyt sa tyuda'akt ja Dios y'øyajpxy ja y'øy'ayuujk. ²⁸ Ni xkatsø'øgidit pøn ja mdamidsep'ajtidip. Wā'ats yiknijawīdi jøts ku ja windigøy yjattit; jøts meets, ja nitso'ok'ajtin mee mbaatp midī ja Dios yajkpy. ²⁹ N'øyja'windip ku nwindson'ajtim njanchja'windi, jøts nayide'en ku ngu'ayo'ombaaajtindi. ³⁰ Nay ja' ayo'on mbaattip midī ø tø nbaaty. Tu'ugyi yø tum jade'en n'adsinaa'yindi jøts mnija'widipts sa øts ixyam n'ayo'ombat'adi'ich.

2

Ku Cristo yik'ayowim yjaty jøts ku tyik'awa'añ ja myøk'ajtin sam ka'ap pøn

¹ Jøts pøni myikjotmøktaajkidip ja Cristo, pøni mdajotkujk'ajtidip ja y'ayo'ejxin, pøni jap ja Espiritu Santo xmøødiyidi, pøni mnija'widip sa ja chojkin sa ja pya'ayo'owin, ² yikxondaktik øts ku yikxon mdsøønidī mdanīdi, tu'ugyi tum jade'en mnamyayidi ni'amuki jøts tu'ugyi mwinmaydi. ³ Kidi ti xundi mgø'ømwinmaa'ngyøjxp uk xyiktundi ja namyikaxi; yø' øy, ku tuda'aky jøts møj'ejxti ja mmigu'uk. ⁴ Kidi ja ngø'ømja'ajip nugo ndyimyikmøjtøjka'am, pø ja'axi tsojkip sudso ja nmigu'uk nbudøjka'am.

⁵ Yikyø'odyi ja winmaa'ñ nayide'en sa ja nwindson'ajtim Jesucristo. ⁶ Øy ja wyinaty amuum ja Dios'ajtin tjajagyepy, ka'ap ja wya'añ jøts ja kuwani tyimñayide'en tmi'abaaty ja Dios Teety. ⁷ Ojts ja kø'øm tjibiky midī ja wyinaty amuum yja'ajtpy jøts ja jade'en ñabyikta'agyi sa øy pøn tumbi ku ja ya ñaxwiiñ'ajty. ⁸ Jøts ku ja jade'en jaa'yin myiñ, ojts ja tkupiky'aty ku ja yjemjaty tyejaty. Ejtp øy tpaduñ jabaat ku ja y'ø'jky, øy tsaach'ijxyim ja o'jkin yjayikmøøy jam kruskøjxp. ⁹ Ja'agøjxp ja Dios Teety ja ojts myøjawīyi jøts ja yikmøjtøjkiyøø, ka'ap pøn myi'abaadyi øy yjapøni, ¹⁰ ku pøn myadobaadit ja nwindson'ajtim øy madsoo, nagyuxendyakøxidip ja ni'ijtyi, ¹¹ jøts ja niduki'iyi t'ejxkaptit jøts ja wya'andit jøts ku ja' wyindsøni ja Jesucristo, tum Dios y'øy'ajtingøjxp.

Sam ja jaj sam ja tøø'kxp jade'en ja jaa'dyi pøn ja Dios ja'ajtidip

¹² Migu'uktøjkti, nayide'en ndsøky jinaxy xmimado'odit øy øts yam jagam, sam ø xmimadowdi ejtp ku meets jam y'ijty møøt ndsøøni. Windsø'øgi ja Dios, tuda'aky mnabyikta'agidit, jotmay'atti sudso ja nitsoojkin xpaattit. ¹³ Ku ja tsojkin xjagyapti jøts mdunwā'andi, ja Dios jade'en myikwinmaa'jyidip, jøts nay ja' mbudøkiyidip ku ja xundi jade'en sa ja Dios mdamidsøkyidi øy tsuj.

¹⁴ Ejtni xoni tuki'iyi xu'undit, kidi amikajpxy xpøkti, ¹⁵ jøts ka'ap pøn mbøky'ejxidit, ja' myik'awa'andip jøts ku Dios m'u'nk'atyidi, øy wā'ats mjaa'y'attit mā ja ka'øy jaa'dyi mā ja kawindiy jaa'dyi. Jade'en meets jam mgaxø'økt sam ja xøøw tkujajy tkudii'kxy mā koots, ¹⁶ jade'en'ampy ku ja Dios ja kyajpxy ja y'ayuujk xyikyø'øyidit. Jøts ku ja Cristo mye'ent jadigojk, møk mee ndaxonda'akt ku ø nnijawīt ku ø ka' nugo tø ñiyikyø'øyi ja Dios yja', ka' ø nugo ja ndunk ñiwindigøy. ¹⁷ Øy øts yø pøn xjaduku'oogi, ja' ñamyayi ka'pxp ja windsø'jkin midī ja Dios y'ity mmøødyip ku ja xjanchjawīdi. Xondakp øts

jade'en, niduki'iyi nxondaajkindit. ¹⁸ Jotkujk'at mee nayide'en, ja'agøjxp ku øts nayide'en njotkujk'aty.

Yikajxtip ja Timoteo møøt ja Epafrodito

¹⁹ Pøni wamp ja nwindson'ajtim Jesús, ngaxp øts tsojk ja Timoteo jøts ja m'ats'ejxidit jøts ø njotkujk'att ku ja tmime'ent ja kajpxy ja ayuujk sa meets jam. ²⁰ Pø ka'axi jadu'uk pøn nayide'en wyinmay sam ø nwinmayin, sam mee njotmay'atyin jøts ja øy'ajtin xpaattit; ²¹ tum kø'øm winmaa'ñxi pøngapøn yiktundip jøts ka'ap ja nwindson'ajtim Jesucristo yja' t'uktunk'ajtniyidi. ²² Tøts xnijawidi sa Timoteo øy tyuñ, sa øts ja møøt ja Dios kyajpxy ja y'ayuujk ngajpxwa'kxiyi, jade'en øts ja xpudøki sam ja jaa'y ja y'u'nk pyudøkiyi. ²³ Jade'ents ø nwinmay pøni sa øts yø nja' y'ukwin'øyi ngaxpts øts ja' jøts m'ats'ejxidit; ²⁴ n'ajot'ajtpy øts Dios jøts meets kø'øm tsojk n'ats'ext.

²⁵ Paat'ajtipts yjawī nayide'en ndanigaxit ja Epafrodito, ja nmigu'uk, pøn øts amuum møøt nduñ, pøn meets ojts xaniguexy jøts øts ja xpudøkit ku ti jaty y'ity kya'ity. ²⁶ Mjanch'ejxwajnidip ja' niwine'en mjam'atti, jøts mjanchjotmay'atyidi ja'agøjxp ku tø xnijawidi jøts ku y'ity pyikyiyi. ²⁷ Tøts ja yjanch'atspikyiyi, jawaani ja tø kya'øøky; tøts ja Dios y'ayo'ijxyi jøts øøts ja tø xpudøki jøts ø nayide'en kyajinaxt ja njotmay, ti øts yam ndaxømpy. ²⁸ Ja'agøjxp meets ja ndyimdyanigaxwa'añ jøts xaxonda'aktit ku jadigojk xpaattit x'ejxtit jøts øts jade'en ka' nugo ndyimjotmay'ookt. ²⁹ Taxonda'akti ku ja jam yja'att. Jade'en pyaat'atyī tu'ugyi ja Dios xjagyejpxindi pøn jaty nayide'en tpadundip sam ja Epafrodito, minamyayidi yikxon; ³⁰ jawaani tø kya'øøky ku tmiduñ ja Cristo. Tø tmīwanjaty yik'ayowim ku øts ja pudøjkin xmø'øy, jøts meets ja ñamyayī mgudanīyi øy mee mgaya'aty.

3

Ja tsinaa'yin midi tīy janch

¹ Migu'uktøjk, tajotkujk'ajtiidi ja Dios kyunuu'kxin. Ka' øts n'adsepjawi øy øts yam jadigojk nja'at nay yø', tø ø nnijawī jøts ku meets yø xyiktu'unt. ² Øyim mnay'ejx'etidit, jam ja jaa'y pøn ja wenk winmaa'ñ tyikyø'ødyip, pøn ttundip ja ka'øyi, ja' pøn tta'ødyøkiwyandip ja Dios ku ja ttsuki ñe'kx jøts ja ejxpajt jade'en ñabyiktaajkxiyidi. ³ Jade'en ne'egi tpaaty, adøm idø'on nmøøt'ajtyindip ja ejxpajt ja'agøjxp ku adøm ja yja' tu'ugyi nyikmøjtøjka'andi, jøts ku ja Cristo Jesús ndaxondaajkyindi, jøts ka'ap nmi'agijxyindi nmijotkijxyindi ja'ayi midi kaxø'kp iiy ja'ayi nikijxy. ⁴ Wa'ambimts øts inet jøts ku ja nayide'en y'øyi ku jade'en ja nachuki ñaxy kostumbri køjxp. Jawaani ka'pxy øts ja ne'egi ndyimñijawī ja'abi tsinaa'yin; ⁵ ku ngue'jxy kyiduktujk xøøw øts ojts ja ejxpajt nyiktu'unxi, israelit jaa'yxi øts; ja Benjamin øts ndeety'amøjip, jøts hebreit etjotp ø ngue'exy, jøts nay jam øts ndeety ndaak choondi. Fariseotøjk øts y'ijty møøt nnamyayī, nay ja Moisés øts y'ijty nbaduujnip ja kyutujk; ⁶ møk øts ja nnitani, jantyimdyøøp øts ja njawi, jøts øts ja jaa'y nbawidetti ndagumatsiwya'andi pøn jaty ja Cristo tjanchja'widip. Ka' øts y'ijty pøn ja kutujk xawindsø'øy sa ja tyikutuky, nadyijyi tñigajpxy midi'ibi øy midi'ibi tøøp. ⁷ Midi'its øts y'ijty jade'en nmøja'wip, jade'en øts yø ixyam nja'wiñi jøts ku ka' mā tyuñ, ja'agøjxp ku øts ja nwindson'ajtim Jesucristo tø nnija'wiyi ja pya'ayo'owin. ⁸ Jøts pøni ti øts ja njaak'øyja'wip, tum kudigøøpy øts njawi, mā t'ukmi'abaat ku ja nwindson'ajtim Jesucristo nnija'want. Ja'agøjxp øts tuki'iyi tø n'ixmajtskixy, aayin pista'agin ja tuki'iyi ñøjkxkøjxni, ja'ayi øts tu'ugyi njøp'ijxpy ja Cristo ⁹ jøts øts ja møøt n'ett, kaja'agøjxpip ku øts ja kutujk ka'pxy nbaduñ, jade'en'ampy ku øts ja nwindson'ajtim Jesucristo tyiy'ajtin njanchja'wiyi jøts øts ja Dios Teety jade'en tø xkupiky. Ja'ats ja Dios kyupijky pøn ja janchja'wiyip. ¹⁰ Ja' ø ndsøjkpy jøts øts yikxon ndyimñijawit sa ja nwindson'ajtim tyiy'ajtin jøts øts ja myøk'ajtin ja xmo'ot midi ja yjagyejpy ku ja ojts tmimajada'aky ja o'jkin ku yjujkyijky xemikøjxp, nja'ayøø ø

nayide'en, uk njadyimyja'øøky ø nayide'en sa ja y'ø'jky, ¹¹ jøts øts jade'en njøp'ext ja jujkpyøjkin nayide'en sam ja yujkpyijky.

Ja' njotmay'ajtimp sudso nbaajtint ja øy'ajtin

¹² Ka' nwa'añ jøts ku øts jade'en tuki'iyi ngøjø'ømit'ajtni, uk ka' nwa'añ jøts ku øts tyimwya'atsni tyimy'øyni; tu'ugyits øts ja nbanøjkx'adi'ich, jøts njøp'ijxpy øts ja nbaatt midi øts ja nwindson'ajtim Jesucristo tø xaniwaadsowi patki'jyi. ¹³ Ka' øts migu'uk nwa'añ, jøts ku øts ja jade'en tø ndyimbyatkixy tuki'iyi; nja'dyigøøgyijxpy øts ixyam sa jaty ø tø njaty ngubety ti jaty tø tyuñi, ja' ø ndumpy jøts øts ja njotmay'aty midi mempnim kidakpnim, ¹⁴ jøts nja'jtint ma pyaat'aty ma yjøpkixy jøts ja Dios ja y'øy'ajtin xukpaajtint jap tsajpjøtpy midi ja xaniwaadsoo'wa'amp, jøts adøm ja nyikmø'øyint ja'agøjxp ku ja Cristo møøt n'ijtyindi.

¹⁵ Wine'en ja Dios møk njanchja'wa'andi, paat'ajtip jøts jade'en tu'ugyi nwinmaa'yindit. Pøni sats pøn wyinmay, jam pøn ja wenk winmaa'ñ tpaaty, nay ja Diosts ja tuknijawiyip midi tøøp. ¹⁶ Tu'ugyits yø winmaa'ñ nbøjkindit, jøts yø' idø'on nyiktu'unindip amuum sam adøm yø tø nnija'wa'ant.

¹⁷ Pa'ejxtik øts, migu'uktøjk, jøts ejxti nayide'en pøn nay yø'øbi tyiktundip midi mee tø nda'ane'emy. ¹⁸ Jaa may pøn ja nwindson'ajtim Jesucristo yja' tkamøjawidip jøts ja wyinmaa'ñ ja' yiktundip jøts jade'en chøønidi. Tø meets yø kawinaak ojk ndukmadø, ixyats øts jadigojk yik'ayowim nnigajpxkojmi. ¹⁹ Ka'ap ja wyindø'ødit, windigøy ja nøjkx yjatti. Ja kyø'ømwinmaa'ñ sa kø'øm ttsokti, ja' yikmøjtøjkidip, ja' ñamyayi dios'ajttip. Ne'egi jinaxy ja ñadyamikexyidi midi'ibik idø'on ja yjawi tyatsø'ødyu'undip, ja' nugo yjotmay'ajttip sa jaty ti jaty ya naxwiiñ. ²⁰ Ja' adøm amuum xkøjø'ømit'ajtindip jap tsajpjøtpy, jøts ja' adøm njøp'ijxyindip jøts ku ja jap choont ja nwindson'ajtim Jesucristo pøn ja pøky ttuknitso'ok'ajtp. ²¹ Ja' adøm xyikwimbejtindip xyiktigajtsindip jøts nayide'en njajtint sam ja kø'øm amuum ja kunuu'kxy'ajtin tmøødi, jøts nay ja myøk'ajtin ja jade'en yik'awampy ku jade'en xu'unin, pø ja'axi tuki'iyi tñitanaagyøjxp øy ti.

4

Xondakunaxti ku Dios xjagyejpyindi

¹ Njantyimyja'ats'eixwandip mee migu'uktøjk, mee ndajotkujk'ajtpy, meets jam Dios wyingujkp ndamajada'akp, jøts tu'ugyi jaaktyimy'ajot'atti ja Dios.

² Ngajpxñigajxidip øts ja Evodia jøts ja Síntique jøts ø møk nnøjmi, wan tnayja'gyukiyidi tkajpx'øyidi ti ka'ø'xyidip jøts tu'ugyi ja Dios yja' tyikyø'øyidit, pø tum ja'axi køjø'ømit'ajtidip. ³ Mets migu'uk, pudøki yø Evodia møøt ja Síntique, ja' øts ojts ngajpxwa'kxi ja Dios kyajpxy ja y'ayuujk møøt ja Clemente jøts møøt jadu'ukti pøn jaty øts ojts xmøøtundi. Wa'ats ja Dios ja ñijawiyidi pøn jaty ti jaty ja xyøøwdi.

⁴ Ejtp ja Dios yja' xaxondaajkidit. ¡Njaaktyimñigajpxpy øts yikxon jøts mxonda'aktit!
⁵ Wan øy pøn mnijawiyidi jøts ku mee tuda'aky mjaa'y'aty. Ja'myats'etti ku tsojk ja nwindson'ajtim myenit.

⁶ Kidi ti x'ayo'onjawidi, tukmadowdi ne'egi ja Dios ku ja x'ajot'attit; ja' m'amido'odip mbøktso'odip ti mga'ejtxidip, jøts tukmøjawidi tukunuu'kxyjawidi ku wyinaty myikmo'odi midi m'amidoodip. ⁷ Jøts ja mmo'ojidit ja y'øy'ajtin ja tuda'aky'ajtin midi ka'ap ti tmi'abaaty sa adøm njaniwinmaa'yam; ja'ats tyikjotkujk'atp ja mwinmaa'ndyi jøts ja m'anmija'windi jøts ku ja nwindson'ajtim Jesucristo møøt m'etti.

Ja' mwinma'adyip midi øy

⁸ Yø', migu'uktøjk, mjotmay'attip midi tiy midi janch, midi xpaat'ajtindip, midi øy pidsømp, midi wa'ats, midi tsøkyim, midi øy agajpxy pidsømp o madsoo. Tum ja y'øybi mwinma'adyip midi øñigajpxni øñimadyakni.

⁹ Yiktundi midi tɔ nduk'ixpɔkti, sɑ jaty tɔ n'ana'amdi, jade'en xu'undit sɑ ɔts ojts nwa'añ jɔts sɑ ɔts ojts kɔ'ɔm x'ejxti ku ɔts ja ojts nduñ: tundits jade'en, winets ja Dios nijuuni mga'ixmatsidit, ejtp ja yjotkujk'ajtin ja mmøøgyunaaxiyidit.

Ku ja filipensit jaa'y tmay'atti ja Pablo

¹⁰ Xyikxondakp ɔts ja Dios jɔts ku meets jadigojk xja'myech. Kidi jade'enip ø ndijy jɔts ku meets tɔ xtyimyja'dyigøøñi, ja ku ka' ñibidsømi juuni mee xpudøkit. ¹¹ Ni ka'ap ø nwa'añ jɔts ku ɔts yam sɑ ndyimyjaty. Tø ɔts yø n'ejxandigøøñi. Yø'øyi ø ndajotkujk'ajtpy midi nmøøt'ajtpy. ¹² Wa'ats ø nnijawi sɑ yik'ayowim nyiknajxint, jɔts nayide'en sɑ ngumeeñ'ajtint. Tø ɔts yø nyikyujy jɔts ɔts øy midi ngawingudsø'øgit, øy ø ngay øy ø ngakay, uk øy ti y'lity kya'lity. ¹³ Øy ø midi nwinguwa'agi, ja nwindson'ajtim Jesucristo nmøk'ajtpy, ja' ø xkuwamp. ¹⁴ Øy'ajtpys ku meets ja n'ayo'on nayide'en mnadyapaadyidi jɔts ɔts jade'en xpudøkidi.

¹⁵ Mnayinija'widipts wine'en jam Filipino kajpxkøjx mgugajp'atti, ku ɔts ja Dios kyajpxy ja y'ayuujk ojts ngajpxwa'kx'okwajni, ku ɔts ojts nnijkxy jam Macedonia kajpkøjxp, pø meeçixi ojts xaniguexy ja pudøjkin midi ja Dios mdamiyojxtip ja'agøjxp ku ja wyinaty ja myøk'ajtin tɔ xpaajtiyidi. ¹⁶ Jɔts ku ɔts jam wyinaty Tesalónica kajpkøjxp, nayi meetsxi ojts xaniguexy ja meeñ majtsk ojk, jɔts ɔts ja nyiktu'unt ti jaty ø ka'ejtxip. ¹⁷ Kayø'øjip ø nugo njotmay'ajtpy jɔts ɔts ja nugo n'axajit øy ti; ja' ø ndsøjkpy jɔts meets yjaaknipatt ja mja' jam Dios wyingujkp. ¹⁸ Tits ø kayikmøøpy, ne'egi o ti tɔ nyikmø'øy. Tyimchaachjam yø kajaa midi yø Epafrodito tɔ xamigaxidi. Jɔts jade'en ja Dios yø tjawi kunuu'kxy, sɑ ja poom pya'akxuuky, ja windsø'jkin yø ñamyayi yikmøøpy. ¹⁹ Ja Dios pøn xjagyajpindip, ja' mmo'ojidip, ja' tyikwimbetp tyiktigatsp pøni ti mga'ejtxidip. Ja nwindson'ajtim Jesucristo møøt ja Dios Teety, ja' tjagyajptip ja kunuu'kxin ja jotkujk'ajtin midi nijuuni niwindem kagudigøøpy. ²⁰ iXemikøjx Dios Teety møj janch ja kunuu'kxin tjagyepy! Jade'en idø'on ja yjatt.

Ku kyajpx'abaadiwya'añ jɔts ja kajpxpoo'kxin t'ukyajkni

²¹ Nguejpxy ɔts ja kajpxpoo'kxin nwindson'ajtim Jesucristo køjxp jɔts xukmado'odit niduki'iyi pøn jaty ja Dios jagyajpidip. Ñayi kyajxmidi ja kajpxpoo'kxin ja'adi pøn jaty ɔts yam nmøøtti. ²² Niduki'iyi pøn ja Dios ja'ajtidip ya, jɔts ja'adi pøn namyajyidip ma ja romanit windsøn ja tyøjk, nayi mdanigajxidip ja kajpxpoo'kxin ja'adi.

²³ Ja nwindson'ajtim Jesucristo mgunuu'kxidip niduki'iyi. Tiigyajpxy idø'on, jade'en idø'on ja yjatt.

JA NØKY MIDI JA PABLO TYANĠGAJX JA COLOSĠT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Colosas kajpkøjxp

¹ Pablo øts, øts ja Dios tø xamidsøky jøts øts ja tø xpikta'aky nwindson'ajtim Jesucristo kyudanaabyi. Jade'en'ampyts øts møøt ja Timoteo ² ya'at nøky nja'ay jøts øø ndanijayi pøn jam Colosas kajpjotp ja'ajtidip ja Dios, pøn jaty jam tjanchja'widip ja Cristo, ja yiknitsokpi. Wants ja Dios Teety ttuñ ja may'ajt jøts ja myo'ojidit ja kunuu'kxin jøts ja myo'ojidit ja tuda'aky'ajtin.

Sa ja Pablo tni'amidowi tni'bøktsowi pøn jaty ja Dios tjanchja'widip jøts ja ttukmadøy ja Dios

³ Ejtp øøts ja Dios ndukmøjawi ndukunuu'kxyjawi midi nwindson'ajtim Jesucristo tyeedyip ku øøts ja' n'ajot'aty meets køjxp. ⁴ Tøts øø nnimadøy jøts ku meets ja nwindson'ajtim Jesús møk xjanchjawi pøn yiktejp Cristo, jøts ku nayide'en xtsokti xpa'ayowdi ja mmigu'uk pøn jaty ja Dios ja'ajtidip, ⁵ ja'agøjxp ku tu'ugyi xjöp'ejxti midi myikmo'owandip midi jap pøkji'iky ejtp jap tsajpjøtpy. Tøts xnijawidi tigøjxp xjagyapti ja jöp'ejxin, ja'agøjxp ku tø xmadowdi ja Dios kyajpxy ja Dios y'ayuujk, ja Dios tyiy'ajtin midi yiknitsokp. ⁶ Nay yø'øbi kajpxy nay yø'øbi madya'aky midi ojts myiktukmadowdi, janch møjtak'adøtsp yø ixyam, jøts tum øy wyimbidsimy øy madsoo wine'en ja naxwii'ñit, nayide'en yjaty sam tø mjatti kuyip xmadoo'okwandøø ja Dios chojkin ja pya'ayo'owin, jøts tø xnijawidi jøts ku yø tyiyi jøts ku yø yjanchi. ⁷ Yø'øxi øøts ja mmigu'uk Epafras ojts mduk'ixpikyidi pøn øøts amuum nmøøtumpy jøts yjanchpaduujnip ja nwindson'ajtim yja' ja', jøts ja' meets idø'on jam tø mbudøkiyi. ⁸ Nay ja' øø tø xukmadøy sa meets ja tsojkin xjagyepy midi ja Espiritu Santo mmøøjyidip.

⁹ Patyts ku øøts ja jade'en ja'ayi nnimadøøy, winetyipts øøts ja Dios nijuuni ngamimøñ meets køjxp, ejtp øøts ja n'amidøy jøts ja Dios yikxon mduknijawiyidit ja winmaa'ñ sa ja ttsøky, jøts ja mmo'ojidit wine'en ja wijy'ajtin kejy'ajtin, jøts nayide'en sa xnimadojidit ja Dios yja'. ¹⁰ Jade'ents øøts ja n'amidøy nbøktsøy jøts yikxon mjaa'y'attit sam idø'on pyaat'aty ttu'undit pøn ja Dios ja'ajtidip, jøts tum ja' mdu'undip midi ja Dios tyajotkujk'ajtpy, midi øy midi tsuj wimbidsømp m'ødyu'uningøjxpti, jøts yikxon xnijawidit ja Dios. ¹¹ N'amidøøpy øøts ja' jøts ja mmo'ojidit ja kyunuu'kxin ja myøk'ajtin, jøts xmidanidit øy midi ayo'on, jøts xyiktuda'aktit ja mwinnmaa'ndyi midi ne'egi mdajotkukidip, ¹² jøts ja Dios Teety xukmøjawidit xukunuu'kxyjawidit jøts ku ja tø xanibiktaajka'am ku adøm xpaat'ajtyim jøts adøm ja xmø'øyim mā ja kyunuu'kxin, midi ja yikmøødyip pøn jaty ja Dios ja'ajtidip. ¹³ Pø ja'axi tø xukniwaajchim mā amuum myajada'aky ja wimbeets'ajtin ja kugoots'ajtin yja', jøts ja tø xyiktøjka'am mā ja Dios U'nk ja kutujk ttanitanani ja yjaa'y, ¹⁴ pøn ojts tyaky ja nitso'ok'ajtin jade'en'ampy ku tø xku'o'jkandi jøts adøm ja xpojkpimee'kxyindi.

Ku ja Cristo ojts xku'o'jkandi adøm nbøky, jade'en'ampyts ja Dios Teety jadigojk xmijotjimbijtyindi

¹⁵ Ka'ap ja Dios Teety yik'ixy yiknijawi, jade'en'ampyts ojts ñanky'ijxyi ku ja y'U'nk tyikmiñ, pøn tu'uk møj, ka' pøn jade'en. ¹⁶ Ja' Dios Teety tyukyik'øyyiñ tuki'iyi ti jaty ejtp tsajpjøtpy, ti jaty ejtp naxwiiñ, midi kaxø'jkp midi kagaxø'jkp. Jøts ja tyik'øyi sa ja ankilistøjk ñagyutujkmø'øyidi, ja'ats ja tyik'øyyiñ jøts ja' ja tja'ajtp. ¹⁷ Jaayim ja yiknitsokpi wyinatyni, ja Cristo, jøtsnim øy ti kyaxi'ikñim, jøts ja' tuki'iyi tkøjø'ømit'ajtp ti jaty ja'ajtp. ¹⁸ Ja' tni'gubajk'ajtp ja jaa'y pøn ja Dios yja'ajtpy, jøts ja' tjagyajp amuum yø'øbi jaa'dyi. Ja' tyikjujky'ajtp jøts ja' midu'uk tmimajadaajk ja o'jkin ku ja yjujkyjyky,

jødsyim ja jøp'am ejtp tyimy'ity. ¹⁹ Ja Dios Teetyts ja kò'øm tyikjajt jøts ja tyikdiosjajty ja nwindson'ajtim Jesucristo amuum, ²⁰ jøts nay ja' nayide'en tyikjajt nwindson'ajtim Jesucristo kòjxp jøts ñamyi'øy'atidit tuki'iyi midi ejtp tuktsajp'agida'aky, jøts yjotkujk'attit wan tjàpønidi midi ja'ajttip naxwiiñ, jøts midi jap nayide'en tsajpjøtptyi. Jade'en'ampyts ja yjotkujk'ajtin ja ñamyayi tpaatti ku ja nwindson'ajtim Jesucristo y'ø'jky kruskòjxp.

²¹ Ja mga'øwiyinmaa'ñ ja mga'ødyunk ja' meets y'ijty myik'ejt看idip jagam ixkò'øm, jøts m'am mjotp xmiotma'atti ja Dios; ja Diosts tø myikjotkukiyidi jøts ja tø xmiotjimbetti, ²² ja'agòjxp ku ja nwindson'ajtim y'ø'jky jøts ja wemp ijxy tyimy'ats'ayo'ombaaajty ñikòjxp kyubajkp. Jade'en'ampyts ja jade'en ttuuñ jøts meets ja Dios Teety xwingunòjxkit ku tø mbøkwyatsnidi, niwine'en mga'ukyikpøky'ejxnidit. ²³ Jade'engòjxpts chøkyi jøts tu'ugyi amumjoojt xyikyø'ødyit ja mjanchja'win tìy'ajtingòjxp. Kidi meets ja xkajøp'ejxni sa tø xnijawidi midi yiknitsokp. Yø'øbi kajpxy yø'øbi ayuujk yikajpxwa'kxp øy sudso ya naxwiiñ. Pablo øts jøts øts yam tø nyiktanipiky jøts øts ja jade'en ngajpxwa'kxi ja yja'.

Ku ja Pablo yiktanipiky jøts tpudøkit pøn jaty ja Dios tjanchja'widip

²⁴ Jotkujk øts nnayjawiyi øy mee njagu'ayowi. Nay jade'en ø ñamyayi ja ayo'on nbaaty sa ja nwindson'ajtim Jesucristo ku ja tku'ayo'owiyi'ñ pøn jaty ja janchja'wiyip. ²⁵ Øts tø xaja'aty jøts øts ja nbudøkidit pøn ja Dios tjanchja'widip. Ja' øts ja Dios tø xanipiky jøts meets nmo'ot ka'pxy ja Dios kyajpxy ja Dios y'ayuujk, ²⁶ jøts mee ndukmado'ot midi pøn tkanija'wipnim midi y'ity yu'uch'ejtp, ma wìndi'ixyip ja jade'en pøn tkanijawi. Ixyamts ja Dios ttuknijawiwya'añ ja jaa'y pøn jaty ja paduujniyip ja yja'. ²⁷ Ja'ats ja Dios ja tuknijawiwya'jidip ti øy'ajtin idø'on ja yjade'embì yjagyepy jøts ja yikmo'odit pøn ka'israelit jaa'dyi. Jøts ja' idø'on y'ity kayiknijawip jøts ku ja Cristo ja' mee mjagyajpìp, jøts ja' tyajkp ja jøp'ijxy'ajtin jøts ku nøjkx xpaajtidi ja Dios y'øy'ajtin ja Dios chuj'ajtin.

²⁸ Ja Cristo øøts ja yja' nnigajpxip, jøts øøts niduki'iyi øy pøn ngajpxwiyj jøts øø nyik'ixpiky øy pøn, jøts yikxon tnmado'odit, jøts jade'en nidu'uk nidu'uk tnijawidit yikxon ku tmøøt'etti ja Cristo. ²⁹ Yø'øts ø nduñ'ajtpy jøts øts jade'en amumjoojt nnadyamiyøxyi, øy ø nwanjaty, ja'ats nyiktumpy ja Cristo myøk'ajtin midi øts ja xmøøpy.

2

¹ Ja' ø ndsøjkpy jøts meets xnijawit sa mee ngamijotkuki ku øts ja Dios n'amidøy ja pudøjkin meets kòjxp jøts nayide'en pøn jaty tsinaadyip jam Laodicea, nmijotigøøpy øts nayide'en ja nmigu'uk pøn ø xka'ijxy'ajttipnim. ² Ja'ats ø ndsøjkpy jøts xjagyaptit ja tsojkin amumjoojt nixem niyam midi ja Dios yja'ajip midi øy midi tsuj pidsømp, ku ja awejx'ajtin xjagyaptit jøts xja'gyukidit sa xnijawidit ja Cristo pøn ja Dios nugo ajawi ka' pøn ttuknijawi; ³ ja'ats idø'on tmøøt'ajtp ja øy'ajtin ja tsuj'ajtin, ja wejin ja kajin. ⁴ Jade'engòjxp meets ya'at ndukmadøy jøts kidi pøn mwindaay'atyidi pøn tum jaayi tkajpxtip. ⁵ Øy ø kò'øm nguidyimyjam'aty, jamts øts ja nwinmaa'ñ nyik'ity, jøts ndaxondakpy øts ku ø nnijawi ku øy yikxon xundi jøts nayide'en ku tu'ugyi xjanchjawidi ja Cristo.

⁶ Paty ja'ayi xu'undit midi tsojkip, sa myiktani'ejxidi myiktaguwanidi ku xjanchja'wiy'okwandøø ja nwindson'ajtim Jesucristo, ja'ats idø'on tu'ugyi mdu'undip jøts ja jade'en møøt m'ettit. ⁷ Ja' amuum mnadyagidøkiyidip jøts ja' idø'on mmøk'ajtin'attip. Ja'axi mjanchjawidip sa ojs myiktani'ejxidi myiktaguwanidi jøts jade'en ejtp ja Dios xukmøjawidit xukunuu'kxyjawidit sam ja tø xnijawidit ku ja ixpøjkin myikmøødyi.

Ja øchinaa'yin midi yikpatp Cristo kòjxp

⁸ Øyim mnay'ejx'etidit; kidim ja xmi'bøkti ja jaa'y pøn mdawin'øønwanjidip ja ixpøjkin, midi wenk winmaa'ñ tyikyø'ødyip uk midi tyiktundip ja tum ja taay; ja' ja yiktundip sa ja jaa'y chinaa'yindi sa jaa'y wyinmaa'ndyi, ka'axi ja tyikmøjtøjkiyidi ja Cristo yja'.

⁹ Pø ja Cristoxi kò'øm amuum tmøøt'ajtkøjxp ja Dios'ajtin, ¹⁰ jòts kumi mmøøt'ijtpy meets ja', tits mee mjaaka'ejtxip. Ja' tuki'iyi tjagyajp jòts ka'ap ja pøn myi'abaadyiyi, wan ja ma tyimyjatsoondi, wan tjamiku'ku'pyi uk wan tjanayjapi tsajpjøtpy. ¹¹ Ku meets ja jade'en xmøøt'ity ja Cristo, tø meets ja ñamyayi mbiktaajkxiyi ja ejxa'anin kyunuu'kxìngøjxp, ka'aaps ja nayide'en tøm biktajkxiyidi sam ja israelit jaa'y ñadyuñidi. Ja' mee m'ejxa'anin'ajtpy ku xpaatti ja nitso'ok'ajtin jòts ja mbøky mniwa'achidi midi yiktump ku ya naxwiiñ njaa'y'ajtyindi. ¹² Ku ja nøbajtin xpaatti, jade'en meets idø'on ñamyayi ja Cristo møøt m'ø'jky, jòts nayide'en ñamyayi mjujkpyøjkti, ja'agøjxp ku tøm xjanchjawidi ja Dios, pø ja'axi ja myøk'ajtin majadaajk ku ja Cristo yjujkpyijky. ¹³ Jade'en ja ngajpxin, øøky meets y'ijty myik'ejtniyidi ja mbøky ku ka'anin ja ejxa'an xpaatti, midi yikpatp nwindson'ajtim Jesucristo køjxp; xjats icyam ja Dios tøm mmøøyidi ja jujky'ajtin jòts mee ñamyayi møøt mjujky'aty ja nwindson'ajtim Jesucristo, ja' mee mmaa'kxip tuki'iyi ja mbøky. ¹⁴ Tøts ja Dios tjibiky ja kutujk jòts ka' y'uktunit midi y'ijty myiktanigutujk'ajtip, midi y'ijty xjanch'adsejpinidip jòts ja xuktaja'jtyindi ja nbøky jòts adøm ja yiktagubejtyindi. Jade'en'ampy ja Dios ja tyikudigøøy ku ja nwindson'ajtim kyiruspejty. ¹⁵ Ja'ats ja tyamimajadaajk ja miku' jòts ja tøm tyik'amutskiyi ja myøk'ajtin jòts ja jade'en ttuk'ixy ttuknijawi ja naxwii'ñit jaa'y.

Jotmay'atti ja Dios yja'

¹⁶ Jade'en'ampyts ka' pøn xmøøpikta'aktit ku pøn mdabayø'øwya'andit ja mgaajyik ja m'uujkikti, uk ku ja xøøw xkabadundi midi winsamaan jòts midi wimbo' yiktump. ¹⁷ Ja' yø y'ity wya'añ jòts yøm tñigajpxy midi menwamp, ya'at tsinaa'yin y'ijty tunkpatp ku ja Cristo kyamiñim ku ja jaa'y ja tjøp'ejxti. Kuts ja tøm myiñ, ja' idø'on tu'ugyi yikjanchja'wiñip. ¹⁸ Kidits ja jaa'y mdukmajtstu'udyidi ja nwindson'ajtim pøn ñadyijyi janch tuda'aky nabyiktaajkidip, jòts wya'andi ku ja ankilis ne'egi yikwindsø'øgit. Ja' ñigajpxtip ñimadyaktip midi nijuuni kya'ejxtipnim kyamadoodipnim, jòts jade'en øy ñadyamøøpikta'agyidi ja kyø'ømwinmaa'ñ. ¹⁹ Ka'ap ja tmøøt'etti ja Cristo, pøn møj pøn jøp'am, pøn yikmøjja'wip, jòts pøn amuum yikjanchja'wip ku ja yja' ja yiknijawi jòts jade'en tyika'pxy'ity ja jaa'y pøn nayide'en myøøpy ja møk'ajtin, sam ja Dios kò'øm tøm ttanibiktaagi.

²⁰ Pøni janch idø'on ku ja Cristo namyayi møøt tøm mjantyimy'ookti, tigtøjxpts ku jade'en mdsinay'adø'øtsti sam ja'ajindi, pøn ja Dios yja' tkabaduujnidip? Ja' yikmajadaktip jòts ñadyanigutujk'atyidi ja kyø'øm'ana'amin, ²¹ ku yide'en ñay'ane'emyidi: "Kidi yøm xji'kxy, uk kidi yøm yjade'embì xji'kxy, kidi yøm xøñ." ²² Yøm yjade'embì ana'amin, tum ja' yøm ñi'ane'empy midi waani ejtp jòts ja ñajxni jade'en sam o ti pikta'aky midi tøm tyuñ jòts ja ka' ti y'ukwani, jade'ents ja jaa'y ja kyutujk jade'en ja y'ixpøjkin. ²³ Øy idø'on ja yjawi njantyiyja'wa'ant, jabi øyxi ja yik'ayowim yikpadu'unt tsø'øgi køjxp. Nitits ja kyawa'añ, kaja'ajipxi xpudøjka'am jòts nbøky xniwaajtsint.

3

¹ Jòts kumi tøm mee ñamyayi mjujkpyiky nayide'en ku ja nwindson'ajtim Jesucristo yjujkpyijky, ja'agøjxp xjotmay'ajtidit ja nwindson'ajtim yja', pø ja'axi ja Dios Teety amuum tøm myøøyi ja møk'ajtin. ² Ja' ejtp mwinmaa'ñ'attip midi ja Dios yja'ajip jòts ka'ap ja xyikmøøtøkidit midi ya naxwiiñ. ³ Jade'ents ngajpxin ku ja Cristo y'ø'jky jòts mee ñamyayi nayide'en tøm m'øøky, ka' x'uktatøjkiñidit ja ka'øybi midi ya naxwiiñ. Ja nwindson'ajtim mee mgøjø'ømit'ajtniyidip jòts mee mjujky'aty xemikøjxp ma ja Dios, ⁴ jòts ku ja Cristo kyaxø'økt nayide'ents meets ja wyinaty møøt mgaxi'iky jòts meets nayide'en ja y'øy'ajtin ja xyondaajkin xpaajtyidit.

Ja øchinaa'yin jòts ja ka'øchinaa'yin

⁵ Paty x'ixmatstit tuki'iyi ja ka'øbyi: ka' pøn amajtskjaa'y tmøøt'att ja wenk yaa'dyøjk uk ja wenk tø'øxyøjk, ka'ap ja axøøk winmaa'n xyiktu'undit, jøts nayide'en ka' ti x'amā'at'attit. Jade'en yø tuki'iyi tpaaty ku yø xu'undit ejximdam jeexyip xwindsø'øgidi ja awanax ja agojnax. ⁶ Yø'øgøjxp ja Dios tkexy ja ayo'on jøts ja ttuktagida'aky ja yjade'embijaa'y pøn ja kamimadojyip; ⁷ jøts ku y'ity ka'anīm xjanchja'wiyidi ja Dios yja', tuki'iyi meets yø y'ity nayide'en xuñ. ⁸ Ixyamts, ixmajtskøjxnidi yø ka'øbyi, yø ambøjkin, yø axøøk winmaa'n, yø ka'ødyu'unin, yø nawyngajpxnaxi jøts yø ka'øy'ayuujk. ⁹ Kidi mnawyindaay'atyidi, pø tøxi x'ixmatsti sa y'ijty mjaa'y'atti, ti jaty y'ijty mdundip. ¹⁰ Tøts ja Dios myiktigachidi jøts ja yjembyi tø xpadøkidi, pøni sa meets ja yja' xjanchja'wiyi, nayide'ents meets ja myiktigachi kunīm yikxon xtyimñijawidit sa ja Dios. ¹¹ Jøts ka' chøkyi wan pøn tgriegitjaa'yi uk t'israelitjaa'yi, wan ja t'ejxa'aninmøødidi uk tka'ejxa'anmøødidi, wan ja abiky mā ttsoondi uk wan ja tja'ajidi pøn ja Dios tkanija'widipnim. Yjaja'ajidi ja' pøn tmidundip ja windsøn, uk pøn najtspøki ejttip, tum ja nwindson'ajtim Jesucristo ja' yja', jøts myøøt'ijtpy ja øy pøn.

¹² Mdsojkip meets ja Dios, ja'agøjxp meets ja tø mwilijxyi jøts ja tø mja'bikyidi. Tsøonidits yikxon. Yiktundi ja øy'ajtin amuum, ja ayo'ejxin, ja jotwa'añ'ajtin, ja windsø'jkin, ja wijy'ajtin jøts ja tuda'aky'ajtin. ¹³ Namyiduda'aky'atidi xem yam jøts namyaa'kxukidi ku pøn ti tuñ jøts ja myigu'uk tpo'ky'ixy. Nayide'en xu'undit sam ja nwindson'ajtim Jesucristo mbojkipimee'kxyidi. ¹⁴ Ka'a'pts ti jade'en sam ja tsojkin sam ja pa'ayo'owin, ja'ats idø'on myiktu'undip, pø ja'axi amuum tsojkip, ja'axi øy ti tyik'øgyaxø'kp jøts niti jadu'uk jade'en abiky kyatsøkyi. ¹⁵ Ja Diosts ja yjotkujk'ajtin, ja Diosts ja xyondaajkin mwinnmaa'nmyo'ojidip, pø ja'agøjpxi ja Dios tø mdukpabikyidi ja yja' jøts ja'abi jotkujk'ajtin xyiktu'undit ni'amuki niwine'en ja Dios xja'ajtyindi. Tukmøjawidits tukunuu'kxyjawidits ja Dios.

¹⁶ Jøts ja'gyukiyidi yikxon ja nwindson'ajtim Jesucristo kyajpxy ja y'ayuujk jøts ja xwinmaa'n'attit. Nadyuk'ixpøkidi jøts nagyajpxjot'amøjkiyidi nixem niyam, ja wejin ja kajin myiktu'undip. Øøjidi ja Salmos, jøts øøjidi ja kunuu'kxkyajpxy jøts jade'en xukmøjawidit xukunuu'kxyjawidit ja Dios. ¹⁷ Ku ti xunwa'andi uk xkajpxwa'andi, ja nwindson'ajtim Jesús myøk'ajtin myik'awajnidip, jøts jade'en'ampy ja xukmøjawidit xukunuu'kxyjawidit ja Dios Teety, ja' myøk'ajtingøjxp.

Sa yjaa'y'attit pøn tjanchja'widip ja Cristo o madsøo

¹⁸ Jøts ja tø'øxyøjk pøn amajtskti, mimadowdi ja mniyaa'y, jade'en pyaat'atyidi pøn tjanchja'widip ja nwindson'ajtim. ¹⁹ Jøts nayide'en ja yaa'dyøjkmidi pøn amajtskti, yikxon xjagyaptit ja mnidø'øxy. Kidi møøt atsep a'aki mdsøonidi. ²⁰ Jøts u'nk una'jkmidi, mimadowdi ejtp ja mdeety ja mdaak, jade'en ja Dios ttsøky. ²¹ Jøts u'nkteety u'nktaak nayide'enmidi, ka' nugo xyik'ambøktit ja m'una'jkjøts kidi t'ayojidi. ²² Jøts pøn midundip, mimadowdi ja jaa'y pøn mwindsøn'ajtip, jøts kidi jaayi nugo nadyijyi myuujy'atti ku ja m'ijxyidi jøts ja jade'en nugo m'øyjawiyidit. Mdu'undipxi dø'on sam pyaat'atyidi Dios wyindsø'jkingøjxp. ²³ Yikxon xu'undit ku ti xunwa'andi, ja Dios meets ja mdamidumpy jøts kidi ja jaa'yip øy ja' mjayiktuñidi. ²⁴ Tøts xnijawidi jøts ku ja nwindson'ajtim mmo'ojidit ja øy'ajtin jøts meets ja mdukpaadit ja kyunuu'kxin. Kumi Cristo meets ja yja' mdu'unxip, nay ja' meets ja kø'øm mmo'ojip. ²⁵ Pønts ja kya'øbyi ttump, nayide'ents ja ka'øy'ajtin ja tikmo'odit. Ka'ap ja Dios ja t'ixy wan ja tjapønidi, tuknax ja tum jade'en ttu'unt pøni sa tø yjaa'y'atti.

4

¹ Jøts meets windsøn pøn ja tunk tmøøt'ajttip, øy yikxon mjaa'y'attit jøts jade'en xyiktu'undit ja mdumbi sam pyaat'atyidi. Ja'myatsti jøts ku ja nwindson'ajtim jap tsajpjøtpy midi mee mwindsøn'ajtmip.

² Kidi mjetmondi, ejtp ja Dios x'ajot'attit, ejtp ja øy ti xukmøjawidit xukunuu'kxyjāwidit. ³ Amidowdi pøktsowdi jøts øøts ja nwindson'ajtim ja nnøø' ja nduu' xyik'awajtsit, jøts øøts ja ngajpxwā'kxit ja y'øgyajpxy ja y'ømyadya'aky, jøts nayide'en yiknigajpxt wā'ats ja Dios Teety wyinmaa'ñ, sudso ja nitso'ok'ajtin yikpaaty Jesucristo køjxp, ja'axi øts yam mgudsumchinaa'yip, pø ja'axi ngajpxwā'kxpy. ⁴ Ajot'attits Dios jøts øts ja kyajpxy ja y'ayuujk øy pøn nduknija'wiyit sam idø'on pyaat'aty ndu'unt.

⁵ Øy yikxon mjaa'y'attit, migu'ukwā'andi pøn ja Dios yja' tkania'wip jøts ttukmadowdi, kidi ja xøøw ja jumøjt nugo xyikwindigøydi. ⁶ Øy tsuj ja mmadya'aky xyikpidsøømdit, jøts mjattip nayide'en ja adsojimbejtk sã nidu'uk nidu'uk øy pøn x'adso'odit.

Ku kyajpx'abaadiwya'añ jøts ja kajpxpoo'kxin t'ukyajkni

⁷ Ja nmigu'uk Tíquico meets jam mdukmadowip sã øts yam. Janch øy yø pyudøki, janch tsuj tmiduñ ja Dios. Tø øts yø nmøøtwidity. ⁸ Paty meets ja yam ndaniguexy jøts ja mgajpxjot'amøjkiyidit, jøts ja nayide'en mdukmadowidit sã øøts yam. ⁹ Ja Onésimo ja jam møøt ñijkxy, adøm ja nmigu'uk pøn amumjoojt tpaduujnip ja Dios yja'. Meets yø' mjaa'y. Yø'øts meets ja mdamimadya'agip ti yam tuujnip jattip.

¹⁰ Jøts øts ja nmigu'uk Aristarco pøn øts yam nmøøtsumchinaapy, ja' yam nayide'en mdanigajxidip ja kajpxpoo'kxin, jøts ja Marcos nayide'en ja yja' tkajxmi, ja Bernabé ja myigu'uk. Tøts ja myiktukmadowdi ja Marcos; pøni mbaajtidip jam, øy yikxon xkupøktit. ¹¹ Nayi mgajpxpoo'kxidip ja Jesús pøn nayide'en yiktejp Justo. Yø'øyi dø'on israelit jaa'y'ajttip pøn tmidundip ja Dios, pøn ø tø nmøøtundi, jøts yø' øts yam njanchta-jotkujk'ajttip. ¹² Nayi mdanigajxidip ja kajpxpoo'kxin ja Epafra pøn ja nwindson'ajtim tmidump, nay meets ja mjaa'y. Ejtp ja mni'amidowiyidi mnibøktsowiyidi ku Dios ja t'ajot'aty jøts tu'ugyi øy yikxon xpanøjkxtit ja Dios, uk amuum mnadyamiyoxidit jøts ja xu'undit sã ja ttsøky. ¹³ Kumi wā'ats ø n'ixy nnijawi sã ja Epafra mdajotigøyi, jøts nayi tyajotigøøpy ja nayide'en pøn tsinaadyip jam Laodicea kajpkøjxp jøts jam Hierápolis kajpkøjxp. ¹⁴ Nayi mgajpxpoo'kxidip ja Lucas, pøn tsøyip jøts nayide'en ja Demas.

¹⁵ Kajpxpoo'kxtits adøm ja nmigu'uktøjkti pøn ja Dios ja'ajtidip midi tsinaadyip jam Laodicea, jøts nayide'en xkajpxpoo'kxtit ja Ninfas møøt ja'adi pøn ja Dios tjanchja'widip, pøn jam namyujkidip ja' tyøjkjotp. ¹⁶ Ku yø nøky x'uk'ejxkøxtit winets ja xanigaxtit jøts wan t'ejxti pøn ja Dios tjanchja'widip jam Laodicea, jøts meets ja nøky nayide'en x'ejxmit midi jam tso'omip. ¹⁷ Jøts nøjmidi ja Arquipo jøts ku ka'pxy tpadu'unt sã ja nwindson'ajtim tø tyunkmø'øyi.

¹⁸ Øts njaapy yā'at kajpxpoo'kxin jøts meets ja ndaniguexy. Jøts xja'myatstibim øts ku Dios x'ajot'attit jøts ku øts yam ndsumy'ity. Dios mgunuu'kxidip. Jade'en idø'on ja yjatt.

JA MYĪDU'UKPI NØKY MIDI JA PABLO TYANĪGAJX JA TESALÓNĪKIT JAA'Y

Ku ja Pablo tnijayi pøn ja nwindson'ajtim tjanchja'widip

¹ Pablo ø nxøw, jøts øø yam nguejxy ja nøky møøt ja Silvano jøts møøt ja Timoteo, jøts øøts ja ndaniguexy pøn jaty tjanchja'widip ja Jesucristo yja' jam Tesalónica kajpkøjxp, pøn møøt amumjoojt t'etti ja Dios Teety jøts møøt ja nwindson'ajtim Jesucristo. Nay ja'ats amuum mgunuu'kxidip jøts ja jotkujk'ajtin mmo'ojidit møøt ja nwindson'ajtim Jesucristo.

Ku ja Tesalónikit jaa'y tyiktaañ ja ejxpajt sa ja Dios yikjanchjawī

² Ejtp øøts ja Dios ndukmøjawi ndukunuu'kxyjawi ku meets ja xjanchjawi, jøts ku øøts ja Dios n'ajot'aty ejtp mee nja'myech. ³ Ku mee ngajpxpaaty ku øøts ja Dios n'ajot'aty ka'ap øøts ja nja'dyigøy ja m'øy'ajtindi, sa ja tsojkin ja pa'ayo'owin xmøøt'atti, jøts sa ja ajot'ajtin møk'ampy xjagyapti jøts xjøp'ejxti ku mye'ent jadigojk ja nwindson'ajtim Jesucristo. ⁴ Meets migu'uktøjkti, pøn jaty ja Dios janchja'widip, Dios mee mdsojkip jøts nay ja' tø mwī'ijxyidi jøts mee mnitso'ok'att. ⁵ Jade'en'ampy øøts nnijawi ku øøts jam ojts ja Dios y'øgyajpxy ja y'ømyadya'aky ngajpxwa'kxyi mā meets jam, kidi øødsip ja ojts jade'en nugo ngajpxy, pø jamxi ja Espiritu Santo ja myøk'ajtin ja tmøødiyī jøts ja jade'en wa'ats yiknijawit jøts ku ja'abi kajpxy jøts ku ja'abi ayuujk tyiyi yjanchi. Wa'atsxi xnijawidi jøts ku øøts ja nduun, kidi øødsip ja kø'øm nadyamiduujnip pø ja'agøjpxxi øøts ja nduun jøts meets ja xyiktu'unt.

⁶ Ja Espiritu Santots mee mmøøjyip ja xyondaajkin jøts meets ejtni xoni xkupøkti ja Dios y'øgyajpxy ja Dios y'ømyadya'aky øy meets ja kawine'en tø xkuwanjati. Xjats meets nayide'en xuñ sa tø xpa'ejxti ku øøts ja ayo'on nmidani midi ja nwindson'ajtim tø ttunjøpi. ⁷ Xjats jade'en tø mbidsømdi jøts ejxpajt mwā'andi jøts ja mni'ejxu'udyidi niduki'iyi pøn jaty ja Dios tjanchja'widip, pøn jam tsinaadyip Macedoniit jøts jam Acayit etjotp. ⁸ Jade'ents idø'on ja Dios y'øgyajpxy ja y'ømyadya'aky tø xyikwa'kxyidi, jøts kidi jamyip meets ja jade'en nugo tø xuñ Macedonia uk jam Acaya, yiknija'wip yø o mādsøo jøts ku meets ja Dios amuum xjanchjawi. Ti sa øø njaakwa'ant, ti øø njaakniyājpxp. ⁹ Ja'axi ja kø'øm tmadyaktip jøts ku øøts jam ojts n'øch mā meets jam jøts y'øjja'widip ja' sa meets jam ojts xkupiky, jøts øy ja yikxon tñimadya'akti sa mee xmajtstuuity ja'abi winmaa'ñ midi ja Dios kyaja'ajip, jøts ku ja Dios tu'ugyi tø xpabøjkinaxwa'akti pøn xemikøjxp ejtp, pøn tu'ugyi Dios'ajtp. ¹⁰ Jøts ñayñimadyaktip ja nayide'en sa meets nwindson'ajtim Jesús xjøp'ixy jøts ku ja jadigojk wyimbett jap tsajpjøtpy ja Dios U'nk, pøn ja Dios Teety tyikniwaajts ja o'jkin jøts ja tyikjujkyjky. Ja'ats adøm idø'on xuknitso'ok'ajtindip ja' ayo'on midi memp midi wingomp.

2

Sa ja Pablo kyajpxwa'kxy jam Tesalónica

¹ Mnija'widipts migu'uk ja'adi, jøts ku øøts jam n'ats'øjch mā meets jam, ka'ap øøts ja nxøw nugo wyindigøøy. ² Øy øøts jam wyinaty Filipit kajpkøjxp tø nyikjemduñ, mnija'widipts ja wa'ats jøts ku øøts ja Dios tø xjanchpudøki jøts øøts ja kyajpxy jøts øøts ja y'ayuujk ja tø nyiknajxyi amumjoojt midi xyiknitso'ok'ajtindip, jøts meets ja tø myiktukmadøy yam idø'on ja tsep yjanchjatuñi. ³ Jøts ka'ap øøts ngajpxigøy ti jaty øøts ojts ngajpxwa'kxy, jøts kidi wenk winmaa'ñip øø njagyejpy ku øøts jam jade'en ojts ngajpxy jøts nika' myikwin'øøndi. ⁴ Pø tiy'ajtinxi yø', tøxi ja Dios kø'øm tyikutuky jøts øøts ja tø xanipiky ja kyajpxy ja y'ayuujk midi yiknitsokp, jøts jade'ents øøts ja tø ngajpxnaxy.

Jøts ni ka'ap øøts ja n'ixa'ay jøts øøts ja kuwani ndyimyikta'øy'ext uk ndyimyiktaka-jxa'akt, pø ja Diosxi yikmidump jøts ja'ats tu'uk tu'uk t'ejxp sa jaty pøngapøn yja'y'aty. ⁵ Jøts mnija'widipts ku øø ka' nugo ngajpxy sa jaty ojts myiknøjmidi jøts nigidi taayip øø n'ixaapy sudso øøts ja meen nbøkt. Ja Dios yø tnija'wip jøts ja' yø t'ejxp. ⁶ Niwindii øø ngawa'añ jøts øøts ja jaa'y xwindsø'ogit, wan meedsi uk øy tyimyjapøni. Xpaat'ajtpimts øøts, øy øøts ja jeexyip jade'en tønđuñ jøts meets jeexyip ja nwindson'ajtim Jesús kyutujk møk'ampy tøn danipiky, pø ja'axi øø nbadumpy. ⁷ Ka'ap øøts jade'en tøn n'adi'ich; øy yikxon mee tøn miyujy'aty sam ja u'nktaak tyikyeeke tyiktsø'øky uk t'ejx'ity ja y'u'nk ja y'unajjk. ⁸ Njanchøjky meets mjanchpa'ayøøpy meets, jade'en pyaat'aty jøts øøts jeexyip ka'ap ja Dios kyajpxy ja'ayi nugo tøn nyajkiyi, ngu'o'jkipaas meets jeexyip ja'agøjxp ku ndsokti ja'agøjxp ku nba'ayowdi. ⁹ Mee migu'uktøj, wa'ats inet xja'myatsti sa øøts y'ijty nduñ nbiky, sa øøts nnamyiwinnmaa'mbyaadyi jøts øø nbaaty ja nidsinaajyk. Ku øø nduñ xinaxy tsunaxy, ngamaa'y nga'ity øøts, jøts jade'en ka'ap myik'adsepti ku myikmo'odi jade'en ja Dios y'øgyajpxy ja Dios y'øy'ayuujk.

¹⁰ Mee nagyø'øm mnija'wip jøts møøt ja Dios, jøts ku ka' ti tundigø'øyin myiktu'unxidi. Yikxon øø njaa'y'aty jøts øøts jade'en ka' ti pøky xaja'aty øy øø pøn xjapøky'ejxwa'añ. ¹¹ Jøts mnayi mnija'widip nayide'en sa nidu'uk jaty tøn myik'ayo'ejxti ku myikajpxjot'amøjkidi, jade'en sam ja jaa'y ja tyeety yjagyepyyi. ¹² Tøxi myiktukmadowdi jøts ku øy yikxon mjaa'y'attit sam pyaat'aty pøn ja Dios ja'ajtidip, pø ja'axi kø'øm wamp jøts meets ja mdaniwaadsowiyi ja kyutujktaajk ma ja amuum xyiktuujnidit ja myøk'ajtin, ja y'øy'ajtin jøts ja xyondaajkin.

¹³ Ja'agøjxpts øøts idø'on ja Dios ja ndukmøjawi ndukunuu'kxyjawi ku meets ja kyajpxy ku meets ja y'ayuuujk ja ojts xmadojyi midi mee ndukmadoow. Ojts ja xjanchkupøkti jade'en jøts ku ja Dios ja tja'aji, kidi nugo jaa'y'ipxi ja' yja'. Jøts janch tiy janchts idø'on ja', jøts ku ja Dios ja tkajpxyi jøts ku ja Dios ja t'ayuuujki, jøts ja mbudøkiyidi pøn jaty ja tjanchja'widip. ¹⁴ Mee migu'ukti, ku tøn xku'ayo'ombaadidi ja Dios, kawine'en ja mmigugajp tøn mdagubetyidi, nayide'en tøn mjatti sam ja jaa'dyi pøn ja Dios tjanchja'widip pøn ja nwindson'ajtim Jesucristo tjanchja'widip pøn tsinaadyip jam Judea, pøn nayide'enxi ja tøn yjatti, nayide'en ja myi'israelit jaa'y ja kyamee'kxyidi. ¹⁵ Yø'øbi israelit jaa'yts idø'on tyik'oo'ktøø ja nwindson'ajtim Jesús. Nayide'en ttungojmidi sam ja tøn tyik'ookti ja kyø'øm migu'uk pøn jaty ja Dios kyugajpx'ajtpy, jøts øøts ja tøn xpawøpy. Niwine'en ja Dios ja tkayikjotkujk'atti jade'en, jøts yjanchtumwenk'ejxtip ja jaa'y øy pøn, ¹⁶ jøts ku øøts ja Dios yja' njadukmadoowa'anmiyi pøn ka'israelit jaa'dyi jøts ja ñitso'oktit, ka'ats øøts ja jade'en xuktunwami. Xjats jade'en ja pyøky nugo tyikmiweni'adø'øtsti. Ixyamnims inet ja Dios ja møk ayo'on tøn tyuktagida'agidi.

Ku ja Pablo øy tjapaatwa'añ jadigojk ja Tesalónikit jaa'y

¹⁷ Mee migu'uktøj, ku ojts nnawya'kxyindi jøts waani ñajxy ja et ja xøøw, nja'myajts'ijtpyim meets øy mee njaga'ijxy jøts øøts njanchja'atsnøjkwaa'añ kawinaak ojk jøts mee n'ats'ext. ¹⁸ Ojts øøts njadyimyja'uktsøøñ; øts meets jam kø'øm kawinaak ojk tøn njadyimy'ats'ejxwa'añ, jaty jatyits øøts ja miku' xyiktuu'duky jøts øøts jam nganijky. ¹⁹ Jøts tigøjxp øø nxonda'aky, ti øøts idø'on ndaxondakpy, ti øøts idø'on njøp'ijxpy, ti øøts idø'on ndajotkujk'ajtpy, pøn meetsxi dø'on ndajotkujk'ajtpy ku mye'ent ja nwindson'ajtim Jesucristo. ²⁰ Meetsxi dø'on ndajotkujk'ajtpy ku øø nxonda'aky.

3

¹ Jade'en'ampy øø tøn nwinmay jøts øø nda'ant yam Atenas kajpkøjxp ku øø ka' n'ukmajadakni, kumi ka' øø n'ukmidanaañi jadine'en ja jotmay, ² paty øø tøn nguexy tu'uk ja nmigu'uk pøn jam tøn m'ats'ijxyidi. Timoteo øøts nguexy, ja'axi ja Dios tmidump jøts ejtp øøts ja tøn nmøøtuñ ku øøts ja nwindson'ajtim Jesucristo y'øgyajpxy ja y'øy'ayuuujk tøn ngajpxwaa'kxyi midi ja nitso'ok'ajtin tyajkp, ja'ats mdukmadowidip

jøts ja mgajpxjot'amøjkiyidit jøts ja m'ajot'ajtin tu'ugyi xyik'ettit, ³ jøts jade'en ka' pøn t'ixmatst øy idø'on ja tsep jade'en y'ity. Wa'atsxi kø'øm xnijawidi jøts ku jade'en ja ayo'on nbaajitindit. ⁴ Jøts ku øø nay jam wyinaty møøt meets, ojtsxi øø nnigajpxy jøts mee ndukmadøy jøts ku n'amjajitindit ndsaachjajitindit; tøts xnijawidi jøts ku jade'en tø yjanchjaty. ⁵ Paty øts, kumi ka' øts jadine'en n'ukjotkujk'ajtni, ja'agøjxp mee tø ndaniguexy ja jaa'y jøts ja tyiktø'øt sa ja mjanchja'win xyik'etti, ja'ats ø ndsø'jkp uk wan meets ja miku' tø mduktuñidi ja yja' jøts jeexyip ja Dios kyajpxy jade'en nugo ñiwyindigøy sa meets ja ojts njadukmadøy.

⁶ Tøts ja Timoteo wyimbity jam Tesalónica jøts ja yam tø tmija'aty ja kajpxy ja ayuujk midi yikjotkujk'atyim jøts ku meets ja janchja'win møj xjagyepy jøts xyiktuujniði xem yam ja Dios chojkin. Yide'ents ja yam wya'añ jøts ku meets ejtp xja'myech, jøts ku nayide'en ja tsojkin xjagyajpti jøts øø xjapaatwa'añ nayide'en sam mee nja'ejxwami. ⁷ Ñiyjot'amøkpøjpk øø migu'uk yjawi, ku øø nnimadøy jøts ku tu'ugyi ja Dios xjanchjawidi, yam øøts idø'on yjawi yide'en tsep'agujkpy njaty. ⁸ Ku øøts jade'en nnimadøy jøts ku ja Dios tu'ugyi amumjoojt møøt m'etti, jade'en øø nnayjawiyi tyimxyajimbejtp øøts yjawi. ⁹ Ku meets jade'en xuñ, øy øøts ja Dios møj njanchtamøjawi ku meets jade'en xpadundi ku jade'en xwindsø'øgidi ja Dios. ¹⁰ Xjats øøts yide'en xinaxy tsunaxy ja Dios n'amidøy jøts mee ndyimy'ats'ext, kø'øm ndyimy'atspaattit, jøts ka'pxy myiktukmado'odit ti jaty mjaaka'ejtxidip jøts ja mjanchja'win tu'ugyi t'ettit.

¹¹ Ja' øø ndsøjky jøts øøts ja Dios Teety, jøts øøts ja nwindson'ajtim Jesucristo xpudøkit jøts øøts jam nnøjkxt jøts jam m'atsyik'ejxtit. ¹² Nay ja Diosts myikmøjta'agiyidip ja mwinmaa'ñ jøts ja tsojkin møj xjagyaptit nixem niyam, jøts xminamyayidit øy pøn møøt nayide'en sam mee myiktsoktin sam meets ja tsojkin ndamijagyapi. ¹³ Nay ja Dios Teety mmo'ojidip ja myøk'ajtin jøts xmidanidit ku sa mjattit, jade'ents ja mja'bikyidi jøts mgapøky'ijxyidi ku ja nwindson'ajtim Jesús jadigojk mye'ent møøt niduki'iyi pøn jaty ja Dios ja'ajtidip.

4

Sa ja Dios xajotkujk'ajtin

¹ Ixyamts øø migu'uk nnigajpxy jøts mee myiktukmadowdi ja nwindson'ajtim Jesús y'ana'amingsøjxp: jøts ku jade'en xun'ettit sa øøts ojts nyik'ixpiky jøts ku mdsøønidið mdanidit jade'en sa ja Dios ttajotkujk'aty. Tun'ettits meets ja jade'en.

² Mnija'widipxi ja ana'amín midi myikmøødyi, midi øø tø nnigajpxy ku jade'en tyikutuky ja nwindson'ajtim Jesús. ³ Ja' Dios chøjkpy jøts ja tu'ugyi xnadyamiyoxidit; jøts kidi nugo mnamyøøt'atyidi pøni ka'adam ja xnijaa'yidi pøni ka'adam ja xnidø'øxyidi, ⁴ ku pøn y'amajtskiwya'añ, ka'ap ja patki'iyi nipøn tø'øxyøjk tkamøøt'att. Ja' øy wa'ats pidsømp jøts ja jade'en kø'øm ñawyindsø'øgyi. ⁵ Jøts kidi nugo mbøkti ku mnachuj'ijxyidi ja'ayi sam ja jaa'y y'adi'ichin pøn ja Dios tkanija'wip. ⁶ Kidi pøn ja myigu'uk ñidø'øxy twin'øø'nidi, møk nwindson'ajtim mdagubatidit, pø tøxi øø nnigajpxy. ⁷ Ja'ats adøm ja Dios tø xanibiktaajka'am jøts adøm øy tsuj njaa'y'ajitindit. Ka'ap ja jade'en wya'añ ja Dios jøts ja kya'øbyi ndu'unint. ⁸ Jade'ents idø'on, pøni pøn yø'øbi ixpøjkin tkamøjpiktakp kidi myigu'ugip ja jade'en wyinaty tyumpy, ja Dios idø'on ja wyinaty jade'en kyamimadøøpy, pøn adøm ja y'Espíritu Santo tø xmø'øyim.

⁹ Wine'en ja tsojkin wine'en ja namya'ayin xem yam, ka' øts ja ngajpxwa'añ. Ti ja øts ja nugo njaañit, pø tøxi Dios kø'øm mdukjatyidi jøts xem yam mnamyayidit mnachokidit. ¹⁰ Ejtp meets ja mmigu'uk jade'en xminamyayi pøn ja Dios tjanchja'widip jam Macedonia. Ja'ayi ø nugo nnigajpxy jøts ja n'øyjaa'y'ajtin møk xjaakyik'awa'andit, jøts myøjit ja m'amigu'uk'ajtindi. ¹¹ Øy jotkujk idø'on mdsøønidið mdanidit, ja mdunk ja mbøjk ja' idø'on mjotmay'attip pø jade'enxi øø nxumiwa'añ, ¹² jøts ja abikpyi jaa'y mwindso'øgyidit jøts kidi ti mga'ijtxyidi.

Sa ja nwindson'ajtim jadigojk mye'ent

¹³ Mee migu'utøjk, ka'ap øø ndsøky jøts jadi'iñi mda'andit, ni xkanijawidinim sa yjatt añmi'oo'kpi, jøts kidi jade'en mjotmay'ookti sam jadu'uk yjotmay'ooktin pøn ka' ti awejx'ajtin tjagyapti, pøn tkania'widip ja Dios. ¹⁴ Pøni nmibijkyimts adøm ja Jesús ku ja tø y'øøky jøts ku ja tø yjukpyiky jadigojk, sudsots adøm ja ngamibøjkim jøts ku ja Jesús jadigojk wyimbett ku ja Dios Teety ja møøt tyikjukpyøkt ja añmi'oo'kpi pøn jaty ja wyinaty tø y'atsjanchjawiyidi.

¹⁵ Paty idø'on myiktukmadowdi nwindson'ajtim y'ixpøjkingøjxp, jøts ku adøm, pøn jaty wyinaty juky'ajtipnim ku ja nwindson'ajtim mye'ent, kidi adømp tyimy-jawyenigyojindip jøts nika'anin ja' pøn tø y'ookti. ¹⁶ Pø kø'ømnimxi ja nwindson'ajtim kyida'akt jam tsajpjotp jøts ja kyajpxt kyutujkingøjxp, jøts ja kyajpxt sam ja møj ankilis, jøts ja pujxuujx ja tyiktu'unt midi ja Dios yja'ajtpy. Winetnimts ja yjukpyøktit jawyeen pøn tø t'atsjanchjawidi ja Cristo, pøn tø y'ookti tyigøydi; ¹⁷ jøtsnim adøm pøn juky tandipnim jaanimts adøm ja møøt nnøjxindit yootsjøtpy ma ja nwindson'ajtim nminabyaajtindit jam tsajpwemp. Jøts ja nwindson'ajtim jade'en xemikøjxp nmøøtjuky'ajtindit. ¹⁸ Paty mjadyimñagyajpxjot'amøjkidyidit xem yam, yø'øbi kajpxy yø'øbi ayuujk myiktu'undip.

5

¹ Migu'uktøjk, ka' chøkyi jøts ø nja'at ti xøøw ti jumøjt mye'ent ja nwindson'ajtim. ² Wa'atsxi meets ja xnijawi jøts ku ja nwindson'ajtim yja'att jotmøn tu'ukpi xøøw, yam ja wyinaty ka'ap pøn tjøp'ixy. Jotmøn ja mye'ent sam ja maa'tspi koots y'atsmiñ. ³ Ku jaa'y wya'andit: "Jotkujkixyam, ka' ti tyuñi, ka' ti kumay", winets ja jotmøn tyaja'atpatidi jøts ja ayo'on myo'ojidit møk, jade'en tyaja'adidit sam ja tøøxyøjk y'u'nkpikyin pøn ja y'u'nk tnikøjxp'ajtp jøts niwine'en ja chookin ja tkapaattit. ⁴ Jøts meets migu'uktøjk, ka' meets mwimbeeds mgugoodsi. Me'emp ja juuni xøøw ja nwindson'ajtim jøts ka' nugo jotkumoni mbaadiyidit ejxim ja jaa'y adsu'jky yikwimeech. ⁵ Pø Diosxi mjagyajpidip jøts adøm wimbeets kugoots nga'ijtyindi. ⁶ Paty ka'ap jade'en nugo njotmo'onindit sam jadu'ukpi y'adø'øtsta'an, njøp'ejxindip idø'on ja' wijy kejy. ⁷ Pøn nugo najtspøki ejtp, ja wimbeets'ajtin ja kugoots'ajtin ja yikmajadakpy; jøts pøn mujkip kujxip, nay ja' ja yikmajadakpy. ⁸ Jøts kujaji kudøø'kxi adøm, patyts adøm ejtp wijy kejy n'ejtindit. Kuwani njanchja'windit amumjoojt ja Dios yja' jøts nnachojka'andit nnamyajya'andit. Jade'en idø'on nnadyagubojka'andit ja Dios yja' ejxim ja soldadi ñadyagubøkyan ja pyujx jøts ja nisa kyajaty. Jøts njøp'ejxindip adøm ja nitso'ok'ajtin, jade'en idø'on ja ñamyayi tpaaty sam ja soldadi pyujxkujup midi ja kyubajk ja adanaajyiyip. ⁹ Pø kidi ja'ajpxi adøm ja Dios tø xanibiktaajka'am jøts adøm n'ayo'ombaajtindit, pø ja'axi ja chøjkpy jøts adøm ja øy'ajtin nitso'ok'ajtin nbaajtindit nwindson'ajtim Jesucristo køjxp. ¹⁰ Adømxixi ja nwindson'ajtim Jesucristo tø xku'o'jkindi jøts adøm ja møøt njujuky'ajtindit. Nbaajtimpxi ja' xemikøjxp øy njadyimyjajujuky'ajtyindinim uk øy wyinaty tø njadyimyja'o'jknandi. ¹¹ Paty jotmøk mnabyikta'agidit jøts xem yam mnabyudøkiyidit sam ixa mmendi mbatti.

Ku ja Pablo ja jaa'y tkajpxwijy pøn tø tjanchjawidi ja Dios

¹² Migu'uktøjkti, ndukmadowdip ixyam jøts waani xwindsø'øgidit pøn ttundip ma meets jam, pøn jam nduu'møøjyidip, pøn jam mda'ana'amidip ja nwindson'ajtim yja'. ¹³ Øy tsuj xaxonda'aktit ku jade'en tyundi, yiktundi ja tuda'aky'ajtin, yikxon namyiyujy'atidi nixem niyam.

¹⁴ Jøts nayide'en migu'uktøjk ndani'ana'amdi, jøts xukja'gyukidit pøn katunwandip, kajpxjot'amøjkidi pøn yø'øbi tkadajotkukidi ku ja yikjemandi yiktedundi, pudøkidi pøn waani jot'amutsk'ajtpnim jøts tuda'aky mjaa'y'attit øy pøn møøt.

¹⁵ Øyim mnay'ejxidit jøts kidi pøn nayide'en ttuñ ja myigu'uk sam ja tø kyayik'ødyuñin. Tum ja y'øybi ne'egi ejtp mdu'undip. Øy xwindsø'øgidit ja mmigu'uk nixem niyam jøts nayide'en øy pøn møøt.

¹⁶ Øy jotkujk m'ettit. ¹⁷ Ajot'at'etti ja Dios Teety. ¹⁸ Pøni ti jaty tuujnip, tukmøjawiidi tukunuu'kxyjawidi ja Dios, yø' ja Dios chøjkpy jøts meets jade'en xu'unt pøn jaty tjanchja'widip ja nwindson'ajtim Jesucristo.

¹⁹ Kidi ja Espíritu Santo xyiktuu'dujkidi ja myøk'ajtin midi meets ja mdunwa'anxiyip mjujky'ajtingøjxp. ²⁰ Jøts kidi xkagupøkti ja mmigu'uk pøn amuum kunuu'kxip ja Dios jøts ja tkajpxi ja Dios y'øgyajpxy ja Dios y'ømyadya'aky. ²¹ Yikxon tuki'iyi x'uk'ejxtit, jøts midi øy, ja'ats mbaajtidip. ²² Exmajtskøxti ja kya'øybi.

²³ Jøts nay ja Dios, pøn ja jotkujk'ajtin tyajkp, nay ja' wa'ats myik'ejtxiyidip ja mjaa'y'ajtindi kunim ja nwindson'ajtim Jesucristo wyinaty myiñ. ²⁴ Pø tøxi ja Dios mwi'ijxyidi, jøts tiy janch ja wya'añ jøts tuki'iyi ja jade'en ttungøxt sa ja tø wya'añ.

Ku ja Pablo t'ukajpxpoo'kxni ja myigu'uk

²⁵ Migu'uktøjkti, ni'amido'owik øøts, nibøktso'owik øøts.

²⁶ Yiknajxidik øøts ngajpxpoo'kxin jøts ja mmigu'uktøjk xkajpxpoo'kxtit sam ja Dios tsøkyin.

²⁷ Jøts nayide'en ndanipøkti Dios y'ana'amingøjxp, jøts ya'at nøky xukmado'odit niduki'iyi ja mmigu'uk pøn ja Dios tjanchja'widip.

²⁸ Mgunuu'kxidip ja nwindson'ajtim Jesucristo. Jade'en idø'on ja yjatt.

JA MYĪMAJTSKPI NØKY MIDI JA PABLO TYANĪGAJX JA TESALÓNIKIT JAA'Y

Ku ja Pablo tnijayi pøn ja nwindson'ajtim tjanchja'widip

¹ Pablo ø nxøw, jadu'uk txøw'aty Silvano jøts jadu'uk Timoteo. Ja' øts ya'at nøky ndanija'ayidip pøn jaty ja Jesucristo tjanchja'widip jam Tesalónica kajpkøjxp, pøn ja Dios Teety møøt y'etti jøts møøt ja nwindson'ajtim Jesucristo. ² Paatti kupøkti ja Dios Teety y'øy'ajtin ja Dios Teety kyunuu'kxin midi ja yajkpy møøt ja nwindson'ajtim Jesucristo.

Tyidyu'ump ja Dios Teety pøn tø kya'øyja'y'aty ku ja nwindson'ajtim mye'ent

³ Migu'uktøjkti, pøn jaty ja Dios tjanchja'widip, ejtp øøts ja Dios ndukmøjawī ndukunuu'kxyjawi meets køjxp sam idø'on pyaāt'aty jøts øøts jade'en ndu'unt. Møjyi y'adøjtsidipxi ja mjanchja'windi jøts nayide'en ja tsojkin midi ja Dios mmøøjyidip jøts ja mmigu'uk xtsøktit xpa'ayo'odit. ⁴ Xondakp øøts, xjats øøts jade'en nnimadya'aky mā jaty ja Dios tjagyepy ja yjaa'y, jøts meets jade'en myiknimadya'akti ku tuda'aky mjaa'y'atti jøts ku ja mjanchja'win xyikmajada'akti øy m'amjatti mdsachjatti uk ja ayo'on xpaatti. ⁵ Jade'ents yø yikja'gyuki jøts ku ja Dios ka' nugo tya'oo'kpety ku tyidyuñ, m'ejxip meets ja' jøts ku mee mbaat'aty jøts meets ja myiktøkiyidit mā ja kyutujk ja ttanitanī ja yjaa'y, pø ja'axi dø'on ixja mgu'ayo'owidip.

⁶ Paat'ajtidipts ja' ku ja Dios yik'ayøyi pøn mga'ødyuujnidip, ⁷ jøts ja myikpoo'kxidit tuknax møøt øøts, ja'abi xøw ku ja nwindson'ajtim Jesús wyinaty myiñ, ku tsajpjøtpy tmigida'akt ja myøk'ajtin møøt y'ankilistøjk. ⁸ Ja' ja ñime'emp jøts ja ttiidyu'unt pøn ja Dios tkamøja'widip ni tkabaduujnidi ja y'øgyajpxy ja y'ømyadya'aky. ⁹ Xemikøjxp ja nøjkx tyimgyudigøydi, jade'en ja yiktiidyu'undit jøts ja jagam yikpikta'aktit mā nwindson'ajtim ja kya'ejxidit, mā ja tkapaajtidit ja y'øy'ajtin ja myøk'ajtin ku ja mye'ent. ¹⁰ Ku dø'on ja nwindson'ajtim mye'ent ja'abi xøw jøts ja wyindsø'øgyit pøn jaty ja yja'ajtpy jøts ja kyajxa'agiyit niduki'iyi pøn jaty ja janchja'wiyip, tøts meets ja xjanchjawi midi øø tø nnigajpxy ku ja tø myiktukmadowdi.

¹¹ Ja'agøjxpts meets idø'on ejtp nni'amidowī nnibøktsowī, jøts øø n'amidøy jøts øø nbøktsøy ja Dios jøts ja m'øy'ejxidit, pø tøxi ja kø'øm m'a'ejxiyidi; jøts nayi n'amidøøpy øøts jøts nayi nbøktsøøpy øøts jøts ja Dios ja myøk'ajtin tyiktu'unt jøts ja jade'en tyik'amøjatt sa meets ja tsojkin xjagyepy ku xunwa'andi midi tum øy jøts midi ja Dios mdamidundip.

¹² Ku jade'en xyiknaxti ku jade'en mjujky'atti, jade'en idø'on ñamyayi ja nwindson'ajtim Jesucristo xwindsø'øgidi, amuumts ja Dios Teety, amuumts ja nwindson'ajtim Jesucristo ja y'øy'ajtin mdakajxa'agidit.

2

Ja' pøn møj pøkyump

¹ Mee migu'uktøjk, ku dø'on ja nwindson'ajtim Jesucristo myenwa'ant ku ja nminabyaajita'andit, ja'ats øts yam nnigajpxwampy, ² jøts kidi nugo mwinmaamy'a'atti, ni xkatsø'øgidit paat ja' ku ja wenk kajpxy wenk ayuujk myiktukmadowdi jøts ku ja Dios ja tyaky, uk xmadowdi ja ka'ama'ayin, uk myiktanigaxti ja nøky, ñadyijyi jade'en tpikta'akti jøts ku øøts ja nguexy, ñadyijyi wya'andi jøts ku tø yja'aty ja et ja xøw ku ja nwindson'ajtim myiñ. ³ Niwine'ents ja yjade'embi taay xkamibøktit. Kuts idø'on ja et ja xøw wyinaty kya'pxwani, jawyeen ja yide'en yjatt, tum midsep ja Dios yik'ejxnit, ka'ap ja y'ukyiktsojknit. Ja dø'on kyaxø'økt ja yikpøkyumbi pøn ja xemikøxpit kudigø'øyin tø yiktanibiktaajkiñi. ⁴ Ja' idø'on ja Dios tmidsep'ajtp, ja' ja tka'øyja'wip tuki'iyi midi jaty ja

Dios yja'ajtpy, uk midi jaty paat'ajtip jøts ja yikwindsø'øgit. Ja'atp paat ja jap tsaptøjkjøtpy midi ja Dios yja'ajip jøts ja jap y'ixa'akt samí Diosin. Ja' kø'øm nadyejip jøts ku ja Diosi.

⁵ Ku njam'ajty mā meets jam, ¿kidi ja xja'myatsti ku øts yø ojts nnigajpxy? ⁶ Jøts wa'ats meets ja xnijawí tigøjxp ja yjaakta'ani, jøts ja ka' tsojk kyaxi'iky ku ja et ja xøøw ka'aním tpaat'aty. ⁷ Jaanits ja' midi ja ka'ødyumbi yja'ajtpy kuuyi ja ja'ayi yjiwa'akt midi ja tyik'amøjkíp. ⁸ Jøts ja jaty kyaxø'økt, ja nwindsøn'ajtim Jesús ja tyik'ookp, ja'ayi ja tpixujt. Jøts ku ja mye'ent amuum kudøø'kx møøt, ja'ayits ja tyuktagudigø'øpy. ⁹ Ja' midi idø'øn ja'atp, ja miku' ja' yja' jøts ja' tmija'atp ja møk'ajtin, jøts ja yikxon tmija'att ja taay jøts ja nadyijyi tnankyja'ejxit ja y'ijxyimbi kya'ijxyimbi. ¹⁰ Jøts ja tum ja ka'øybi ja tyiktu'unt jøts ja jade'en twindaay'att pøn nøjkx windigøødyip, tøxi tkawa'andi ja tyiibyí ja yjanchpi midi yiknitsokp. ¹¹ Xjats ja Dios ja nayide'en tyikjaty, wan jade'en tyikwindaay'atti ja'agøjxp ku tø tyundigøydi jøts ja tjanchjawídi jade'en ku yikwindaayídi, ¹² jøts jade'en niduki'iyi yiktabayø'ødyit ja pyøky, tøxi tkatijawídi tkajanchjawídi midi tiy midi janch. Ja' ne'egi chojktíp tyumjaka'øybi.

Tø ja Dios ttanibiktaagi jøts ñitso'ok'attit ja Tesalónikit jaq'y

¹³ Meets køjxp øøts ja Dios ejtp ndukmøjawí ndukunuu'kxyjawi, mee migu'uktøjkíti wine'en ja nwindsøn'ajtim mdsøky'atyídi. Patki'iyipxi ja Dios tø mdanibiktaagiyídi jøts mnitso'ok'attit, ja'agøjxp ja Espíritu Santo wa'ats myik'ijtyídi jøts ku nayide'en tø xjanchjawídi ja tyiibyí ja yjanchpi. ¹⁴ Jade'en'ampy ja Dios tø mjotøkiyídi ku øø tø nnigajpxy ja øgyajpxy ja ømyadya'aky midi yiknitsokp, jøts jade'en xpaattit ja kunuu'kxin midi yja'ajtpy ja nwindsøn'ajtim Jesucristo.

¹⁵ Jade'ents migu'uktøjk idø'øn, ndukmadowdi jøts tu'ugyi xyik'ettit ja mjanchja'win, jøts kidi xja'dyigøydi ja ana'amín midi øø tø nyaky ku øøts jam kø'øm n'ats'øjch, jøts nayide'en midi nøkyøjxp tø myiktanigaxti. ¹⁶ Ja nwindsøn'ajtim møøt ja Dios Teety, ja' y'øy'ajtingøjxp tø xtsøjkyídi. Tø ja nayide'en xmø'øyídi ja kajpxjot'amøki midi xemikøjxp, jøts ja yikxon njøp'ejxin. ¹⁷ Wants ja nayide'en tyikmøjki ja m'aaw ja mjoojtíti jøts tu'ugyi xwindanidit jøts jade'en xnigajpxtít uk xu'undit tum ja y'øybi.

3

Amidowdi pøktsowdi ja Dios jøts øøts ja kyajpxy nyikyø'øyiyit

¹ Migu'uktøjkíti, ja' øts yam njaaknigajpxwampy jøts øø xni'amidowit xnibøktsowit wan ja jaq'y tsojk tñimadowdi ja nwindsøn'ajtim y'øgyajpxy ja y'ømyadya'aky pøn jaty tsinaadyip øy madsoo, jøts tsojkingøjxp tkupøktit nayide'en sam meets ja tø xkupøkti. ² Jøts nayide'en x'amido'odit ku Dios x'ajot'attit jøts øø x'ixmatst ja ka'øyjaa'dyi ja kawíndiy'ajtpídi, jabi ka'axi niduki'iyi ja jaq'y ja janchja'win tmøødídi sam adøm. ³ Øyts ja nwindsøn'ajtim, ja' mee tu'ugyi mdukmí'ettip ja winmaa'ñ jøts ja m'ejx'etidit jøts ja miku' mgamimajada'agídit. ⁴ N'ajot'ajtpy øøts ja nwindsøn'ajtim jøts ku xundi jade'en jøts xun'adø'øtstít sa jaty mee n'ane'emy. ⁵ Wan ja nwindsøn'ajtim nagyø'øm mbudøkiyídi jøts xjaaknijawídit sa ja Dios xtsøjkyídi jøts nayide'en xjagyaptit ja jotmøk'ajtin ja tuda'aky'ajtin sam ja Cristo.

Paat'ajtiyip tu'ugyi nnadyamiyojxa'ant ja ndunkjøøjp

⁶ Mee migu'uktøjkíti, ja nwindsøn'ajtim Jesucristo køjxp øøts yam n'ane'emy jøts xma-jtstu'uttit ja mmigu'uk pøn katunwandip uk pøn tkabadunwandip chinaa'yingøjxp ja xpøjkin midi tø myiktukmadowdi, midi øø tø nnigajpxy. ⁷ Mnija'widipxi sa mjujky'attit sa mdsøønidit mdanidit jøts xpadu'undit nayide'en sa øø nduñ; ka'axi øø juuni ngatuñ ku øøts jam ndsøøni mā meets jam. ⁸ Uk ngagujuy øøts ja ndsapkaaky, jadi'iñi øøts ja nugo ngay, ka'ats yjade'eni, tump øøts, jotigøøpy øøts xinaxy tsunaxy jøts jade'en nidu'ugin mgayik'adsepti. ⁹ Øy øøts idø'øn ja xpaat'aty jøts meets xyakt ja pudøjkin, jøts øøts ja n'amido'ot, ka'apts øøts jade'en nduñ, tump øøts, pøjkp øøts, jøts jade'en myiktuk'ejxti

sa xu'undit. ¹⁰ Ku øøts jam ndsinaay ku myikmøøtsinaadyi, yide'enxi øø nyajky ja tiy'ajtin: Pøni pøn katunwamp ka'ats kya'aty. ¹¹ Jade'en øø tø nyiktamimadya'aky jøts ku meets jam winaagin pøn jadi'iñi nugo tyiknajxtip, niti tkatundi. Ja'ayi tyuñ'ajttip sudso niti tkatu'undit, ne'egi ja myigu'uk tyikwinmaamya'atti. ¹² Yø'øbi jaa'yts øøts idø'øn nni'ane'empy ja nwindson'ajtim Jesucristo kyutujkøjxpit jøts wan ttajotkujk'atti ja tyunk jøts jade'en tpaattit midi tyajujky'attip.

¹³ Migu'ukti, kidi juuni x'ixmatsti ja ødyu'unin. ¹⁴ Ku jam pøn tkamøjpikta'akwa'ant midi øø nnigajpxy ya'at nøkyjøtpy, øyim x'ejxtit pøn jade'en adøtspjøts kidi xunk'atti, wan iiy wine'enin tsø'ødyunjawidi. ¹⁵ Kidi xmidsepøkti, jade'en x'ana'amdit sam pyaat'aty: jaa'y ja myigu'uk t'ane'emy.

Ku ja Pablo y'ukajpxpoo'kxni

¹⁶ Jøts ja nwindson'ajtim tyakp ja øy'ajtin, ja' ejtp mgunuu'kxidip øy madsoo, øy tigati yjatuñi, ja nwindson'ajtim ni'ijtyi mjagyapidip.

¹⁷ Øts ngøjø'øm meets ya'at kajpxpoo'kxin ixyam ndanijayi. Jøts øts nxøøw nayide'en nbikta'aky sa øts ejtp nduñ ku øts ja nøky nguexy. Pablo. ¹⁸ Ja nwindson'ajtim Jesucristo niduki'iyi mmo'ojidip ja kunuu'kxin. Jade'en idø'øn ja yjatt.

JA MYĪDU'UKPI NØKY MIDI JA PABLO TYANĪGAJX JA TIMOTEO

Ku ja Pablo ojts tnijayi ja Timoteo

¹ Øts idø'øn Pablo'ajtp. Øts ja Jesucristo ngudanaapy sam øts tø xpikta'aky ja Dios Teety midi xyiknitsoojkimp jøts nayide'en ja nwindson'ajtim Jesucristo pøn njøp'ijxyindip jøts ja nitso'ok'ajtin xmø'øyindit. ² Mets Timoteo ya'at nøky ndanija'ayip. Mjagya-jpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxiip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Ku yikni'ane'emy jøts kyayikupøkt ja ka'øy'ixpøjkin midi ka' tyiyi yjanchi

³ Tan meets jam Efeso kajpjtøp sam tø nda'ane'emy ku øts jam wyinaty nnøjkxwa'añ jam Macedonia. Ana'am ja jaa'y midi jam winaaginidi jøts kidi ja tnanky'ixpikyidi ja winmaa'ñ midi ka' tyiyi yjanchi ⁴ jøts nayide'en kidi nugo tyikmøjtøkidi ja kwenti ja madya'aky midi nisudso'ampy katidyøjkip. Nugo amyøn tsaachyøn tnimadya'aky ja aptøjkti. Nugo adøm njakajpxy'ajtyindi sudso tpaaty, nisudso'ampyts kyatidyøki. Niwine'en adøm ja xkabudøjka'andi jøts adøm nbaduujnin ja Dios yja' midi adøm ja tø xanipijkyim midi tø nyikmø'øyindi janchja'wingøjxp.

⁵ Jøts ja'agøjxp ya'at myikta'ane'emy jøts nixem niyam ja tsojkin xjagyaptit midi ja Dios yja'ajip, midi yiktump øy'ajtingøjxp øwyinmaa'ngyøjxp ku ja nadyamiyoxi ñaxy amuum janchja'wingøjxp. ⁶ Tøts yø winaagin tmajtstutnidi jøts nugo ñanktyuu'tigøyidi ku tpabøkti ja winmaa'ñ midi nisudso katidyøjkip, nugo nadøki tnikyajpxy'atti. ⁷ Ja' chojktip jøts kyajpxwejp'i'attit sa ja Moisés kyutujk wya'añ, ni tkaja'gyukidits ja wyinmaa'ñ kø'øm sa jaty wya'andi, ni ja y'ixpøjkinbaat tkanijawidi midi nadyijyi ñigajpxtip amimøjnija'wibim ty janch.

⁸ Nnija'windip adøm jøts ku ja'abi kutujk y'øyi ku jade'en tyunkpaaty sam tø yik-tanibiktaagi. ⁹ Jøts yiknijawit nayide'en jøts ku nima ja kutujk kyayiktanibiktaagi ja øyjaa'y midi katundigøødyip; pø ja'axi ja kutujk wya'añ ku ja tø kyøjy jøts ja tyu'unt ma ja jaa'y pøn tum nay'adsep tjä'widip, pøn kamadoodip. Jaa ja tyuñ ma ja ka'øyjaa'dyi, ma ja møjpøkyjaa'dyi; pøn tkawindsø'jkidip ja Dios, pøn tkawindsø'jkidip ja tsinaa'yin; pøn ja yikjaa'y'oo'k tyunk'ajtpy, øy ja tyeety ja tyaak ja tyik'oøktit tyiktigø'ødyit. Jats idø'øn ja kutujk tyunkpaaty jøts ja tpayø'øy ¹⁰ pøn namyøøt'ajtidip nugo, yam ja ka'ap y'amajtsk'atti; uk tmøøt'atti myiyaa'dyøjk myidø'øxyøjk; pøn jaa'myaa'tstip, pøn myigu'uk twin'øøndip, pøn ja Dios nugo tniwambajttip jøts ja myigu'uk twin'øøndi. Nayide'ents ja kutujk tpayø'øy pøn ja øy'ixpøjkin tkatsojpk, ¹¹ ja øy'ixpøjkin midi tnigajpxp ja øgyajpxy ja ømyadya'aky, ja Dios yja' midi yiknitsookp, midi øts yam tø nyiktanipiky.

Tyamøja'wip ja Pablo ja Dios ku ja pya'ayoyiyi

¹² Ndukmøja'wipts ndukunuu'kxyja'wipts øts ja nwindson'ajtim Jesucristo pøn ø tø xyikjotmøktä'aky jøts øts ya'at ndunkjøøjp ndu'unt. Tøxi øts ja x'ixy jøts ku øts ja nmi'øy'aty, xjats øts ja tø xpikta'aky jøts øts ja jade'en nmidu'unt. ¹³ Ja' øts idø'øn jade'en kø'øm xump, øy øts idø'øn ja y'ijty nja'axøøkmigajpxy, øy øts idø'øn ja y'ijty njabawidity jøts øts ja nmatswa'añ ngawindiy'ajtingøjxp jøts øts ja y'ijty nyik'amjaty nyiktsaachjaty. Møj ja Dios ku øts ja xpa'ayøøy, ka'ap øts ja wyinajty njanchjawinim, ni nganijawi øts pøni ti øts jade'en ndumpy. ¹⁴ Paty øts ja nwindson'ajtim møj ndukmøjawwi ku øts ja xukjanchja'wiyi ja yja', jøts jade'en ja nmigu'uk ndsojkindit nminamyajyindit ku møøt n'ejtindit ja Cristo Jesús.

¹⁵ Tiy'ajtin yø' jøts niduki'iyi njanchja'wa'ant: ku ja nwindson'ajtim myiñ ya naxwiiñ jøts ja tyiknitso'ok'ajty ja pøjkpitumbi jaa'y. Møj tundigøøbyi øts y'ijty, nika' pøn jade'en. ¹⁶ Jade'engøjxp øts ja Dios xpa'ayøøy jøts yik'ext yiknijawit sa ja Jesús møj ja tyuda'aky'ajtin tjagyepy ku øts ja xpojkpimee'kxy. Jade'en ø ndunjøpi sudso yikpaatt ja jujky'ajtin midi xemikøjxp ku ja yikpabiky yikjanchjawi. ¹⁷ Paty nayide'en nwindson'ajtyindip xemikøjxp, ni kya'øøky ni kyadigøy ja', ka'ap ja yik'ixy. Ja'ayi dø'øn tu'ugyi ejtp, pøn tnija'widyaapy. Jade'en idø'øn ja y'ejxi tyiyi.

¹⁸ Mets u'nk Timoteo, mets ya'at ndanipijkpy jøts yikxon xpadu'undit ja Dios yja' samdam mmimadyajkidi ja Dios kyugajpxtyi. Mjanchjawip ja nwindson'ajtim amumjoojt jøts øy ja mwinmaa'ñ xyik'ett. ¹⁹ Jaa winaagin jade'en yjajttøø ku ka' tmøjpiktaktøø sam tjanijawidi, jade'ents ja yjanchja'win tø tyuu'tigøydi ²⁰ sam yjajttøø ja Himeneo jøts ja Alejandro. Tøxi øts ja kutujk nmø'øy ja Satanás jøts o sagasa ja y'ayo'on ja tpaajtidit jøts jade'en tjā'gyukidit jøts ku ja Dios kyayikwindsøy.

2

Ku Pablo ttukmadøøy ja Timoteo sudso tkugajpxa'akt o pøngapøn jaa'y

¹ Ixya meets jawyeen ndukmadøy jøts ndanipøkti jøts møk xukunuu'kxyjawidit ja Dios jøts x'amido'odit xpøktso'odit jøts tpudøkit ja naxwii'ñit jaa'y. ² Kuwandaagidi ja windsøndøjk ja kudunktøjk jøts øy tsuj nyiknaxindit agujk jotkujk, jøts ja Dios jade'en ni'amuki xkunuu'kxindit ku amumjoojt nwindson'ajtyindip ja nwinja'wa'ant. ³ Ku jade'en nbadu'unint jade'ents t'øyjawi ttsujawi ja Dios midi xyiknitso'ok'ajtimp, ⁴ Jabi jade'enxi ja ttsøky jøts niduki'iyi nnitso'ok'ajtindit jøts nnija'wa'andit ja tyi'byi ja yjanchpi. ⁵ Tu'ugyi jaa ja Dios Teety, jøts nayi tu'ugyi ja' midi xyiknitso'ok'ajtim jam Dios wyindum: ja nwindson'ajtim Jesucristo, ja' pøn jaa'y'ajtin nayide'en myøøt'ajtpy. ⁶ Ojts ja nwindson'ajtim Jesucristo ñagyøyakyi jøts ja ojts xku'oo'ka'am adøm nbøkyøjxp jøts adøm nitso'ok'ajtin jade'en nbaajtyindi, xjats ja jade'en enkyi tø yiknijawinim ku ja xøøw ja jumøjt tø tpaatynim sa ja yjajty kyubejty. ⁷ Ja'agøjxp øts tø nyikpikta'aky kugajpxy'ajtpi ku'aaw'ajtpi jøts øts ja janchja'win jøts øts ja tiy'ajtin nduk'ixpøktit pøn ka'israelit jaa'dyi. Tiy janch øts idø'øn nwa'añ, ka' nugo ndabyaaty, pø ja Cristoxi øts amuum njanchja'wip.

⁸ Paty ø nwa'añ, jøts o ma pøn tja'myatstit ja Dios, ka'ap ja tsep, ka'ap ja aka y'øyi. Tu'ugyi amuum nbiktaajkin ja njanchja'win. ⁹ Jøts ja tø'øxyøjk, tuda'aky'ajtin øyjaa'y'ajtin yiktundip. Ka'ap ja ja'abi wet tpikta'aktit midi namyikaxi kaxø'kp midi ja myigu'uk nugo tyukta'amutskidip. Kidi namyikajxingøjxp ja wyaay tyik'øyidi tyikpaadidi. ¹⁰ Jade'en ne'egi tpudøkidit ja myigu'uktøjk ku ja øy'ajtin tyiktu'undit sam ja'adi pøn ja Dios tø ñadyamiyøxyidi. ¹¹ Ku ja Dios yja' yikajpxwa'kxy, amøñi ja tø'øxyøjk tpatmado'odit, tuki'iyi ja yujy'ajtin tpikta'aktit. ¹² Ka'ap mibaat ja tø'øxyøjk tkajpxwa'kxit ja Dios yja'. Ka'ap ja yaa'dyøjk tyik'amutskit, ja' tsojkip jøts amøñi y'ettit. ¹³ Jabi jawyeenxi ja Dios tyikaxi'jky ja Adán jøtsnim ja Eva. ¹⁴ Jøts ja Adán ka'ap ja yikwin'ii'ñ. Ja tø'øxyøjk ja' ne'egi yikwin'øø'n, jøts ku yikwin'ii'ñ jade'ents ja pøky tpaajty. ¹⁵ Jade'en'ampy ja tø'øxyøjk ja nitso'ok'ajtin tpaatti ku ja u'nktaak'ajtin tyik'awa'andi, ku ja janchja'win tpadu'undit, ku tjagyaptit ja tsojkin jøts ja wa'ats'ajtin, jøts møøt'ñadyabudøkiyidit ja ja'gyukin.

3

Sa yjaa'y'attit pøn ana'amp tsaptøjkjotp

¹ Janch tiy'ajtin yø': janch øy yø'øbi tunk pøn tnwindson'ajtwamp ja Dios yja'. ² Paty nayide'en øy tsuj yjaa'y'attit jøts ka' nugo o sa yiknøjmidit. Pøni jam ñidø'øxy, tu'ugyi ja tmøøt'att, ka'ap ja kawinaak. Tuda'aky yjaa'y'att, sam ja tyunk tmøøt'aty ja'ats

pyadu'ump. Jøts twindsø'øgit twinjawit pøn nimejnip nija'jtíp jam tyøjkjotp; jøts øy tsuj nayide'en yik'ixpøkt; ³ ka'ap y'øyi jøts y'amu'u'kyjaa'y'att jøts ka'ap tsep t'ixa'at. Ka'ap ja myigu'uk nugo twin'øont jøts ja meeñ jade'en tpaatt. Ja' tsojkip jøts ja pa'ayo'owin ttu'unt jøts ka'ap ja meeñ nugo pøkpaat tjawit. ⁴ Øy tsuj y'u'nkteety'att sam pyaat'aty jøts tuki'iyi t'ext yjønnotp, jøts ja y'u'nk øy tsuj wyindsø'øgiyit; ⁵ ku jade'en pøn tkatu'unt yjønnotp tyøjkjotp sam u'nkteety'ajtin, ¿sudsots ja t'ana'amt pøn ja Dios tjanchja'widip? ⁶ Ka' pyaat'aty ana'ambi tyøkit pøn tjemyabøjkíp ja Dios yja', ku ja nugo ñamyøjpikta'agit, jøts ku nayide'en yjatt sam ja miku' tø tyaja'adyi ja ayo'on. ⁷ Nayide'en chøkyi jøts ttunjøpit ja øy'ajtin ja tuda'aky'ajtin jøts jade'en wyindsø'øgiyit pøn ja Dios yja' tkabaduujnipnim, jøts ka'ap ja jade'en pøky tyaja'adyit jøts nayide'en ka'ap ja miku' nugo wyin'øoniyit.

Sa yjaa'y'attit ja møjaa'dyøjk pøn tundip tsaptøjkjotp pøn tpudøjkíp ja ayoobi jaa'y

⁸ Nayide'en ja møjaa'dyøjk pøn tkumaadyip ja ayoobi jaa'y jøts tyuda'aky'att y'øyjaa'y'att jøts køøm ñawyindsø'øgiyit. Ka' ti ttu'undit, ka' ti tkajpxtit. Ka' myuktigø'ødyit jawyeen ja'adi, jøts ka'ap ja meeñ nugo pøkpaat tjawidit. ⁹ Øy tsøky wa'ats tnijawidit sa ja Dios yikjanchjawí midí y'ijty kayiknija'wíp, jøts ja wyinmaa'ñ øy tsuj wa'ats tmøøt'attit. ¹⁰ Ja' tsojkip jøts yik'ext yiknija'wít pøni ka' ti tundigø'øyin tmøøt'atti, møjaa'y'attipts ja' jøts tkuma'adyit ja ayoobitøjk. ¹¹ Nayide'en ja ñidø'øxy tyuda'aky'ajtmidit y'øyjaa'y'ajtmidit. Ka' nugo yjemgajpxtit pyagajpxtit. Ja' tyu'undip midí tiy'ajtin. ¹² Ja møjaa'dyøjk tu'ugyi ja ñidø'øxy ja tmøøt'att, jøts øy t'ext ja y'u'nk y'una'jk jam yjønnotp tyøjkjotp. ¹³ Ja møjaa'dyøjk pøn øy tsuj tundip sa ja tø yiktanipøkti, jinaxy ja myøjtøkidi jinaxy ja yikwindsø'øgidi jøts ja nayide'en ka' tsep t'ukja'wiñidi tnigajpxtit sudso yikjanchjawí ja nwindson'ajtim Jesucristo.

Sa Dios ja wyinmaa'ñ tnanky'ijxyi midí y'ijty kayiknija'wípnim

¹⁴ Tsojk ø nnøjkxt jøts me n'ats'ext; ixyamts mets ya'at nøky ndanijayi. ¹⁵ Ku øts jotmøñ nda'anigyojt, jøts xnija'wít sa njaa'y'ajtindit møøt ja nmigu'uk pøn tø tjanchja'wiñidi ja Dios, pøn amuum ja'ajtniyidip ja Dios, ja yikjujky'ajtpi, pøn tnigubojktíp ja tyiibyí ja yjanchpi. ¹⁶ Janch tiy'ajtin yø', ku janch møj ja Dios wyinmaa'ñ midí y'ijty kayiknija'wíp. Ixyamts yik'ixy yiknija'wí jabi jade'enxi jap jaabyety y'ity ku: Jaa'yin ja nwindson'ajtim Jesús ñanky'eixyi ya naxwiiñ; jøts ja Espíritu Santo tnigajpxy ku ja' tiy'ajtin tmøøt'aty jøts nayide'en ja ankilistøjk y'eixøø ñija'wiyøø. Tø yikajpxwa'kxy ja Jesús y'ixpøjkin o magajp, jøts jade'en tpadundi ja naxwii'ñit jaa'y jøts ja chajpajtnaa ma ja Dios Teety jap. Jade'en ja nøky wya'añ.

4

Sa winaagin tmajtstu'uttit ja Dios'ajot'ajtk

¹ Tiy'ajtin ja Espíritu Santo wya'añ ku winaagin tmajtstu'uttit ja Dios'ajot'ajtk ku wyinaty wyingøñ jøts kyøxt ja naxwii'ñit. Jøts ja tpadu'undit ja ixpøjkin midí ka' tyiyi yjanchi, midí ja miku' yja'ajtpy. ² Ja'abi jaa'y ja tmado'odip pøn taay'ajttíp pøn ja pyøky tkaja'widip øy ja tjanijawídi ku møj tø tyundigøydi. ³ Jade'en wya'andit jøts ku ka' n'amajtska'ant jøts ka'ap o ti njøø'kxint øy ja Dios ja køøm tø tjabikta'aky; pø tøxi ja Dios ja ttanibiktaagi jøts ja nyiktunkpaajtindit tuki'iyi ja pikta'aky, pøn jaty ja Dios tjanchja'widip pøn jaty tnija'widip ja tyiibyí yjanchpi yjøø'kxtipts ja', wan Dios ja ttamøjawa'wídi ttagunuu'kxyjawa'wídi. ⁴ Midí ja Dios tø tyik'øyi, tum øy ja', ka'ap adøm ja ngagupøjkint. Ndamøja'wímp ja Dios ja' ku nyiktunkpaajtint, ⁵ ku ja jade'en ndu'unint kunuu'kxyts ja wyimbejni ja pikta'aky sam ja kyajpxy wya'añ.

Sa ja Jesucristo øy tsuj yikmiduñ

⁶ Ku ya'at øy xuk'ixpøkt ja migu'uktøjk, øy idø'øn ja Jesucristo wyinaty xmiduñ, jøts m'ajot'atp ja', myiktunkpaatp ja' ja ixpøjkin sudso n'ajot'ajtim ja Dios midi ixymbaat mgamajstutpy. ⁷ Ka' xmøjpikta'akt ja kajpxy ja ayuujk midi ka' tyuñ. Amumjoojt ja Dios yja' xpaduujnit; ⁸ øy nugo njanay'ejx'ejtint jøts møk møjaaaw nyiknajxint, ja Dios yja' ne'egi møj ku nbaduujna'ant. Ja'ats xpudøjka'amp jøts øy tsuj ndsinaa'yint jøts nayide'en ja øy'ajtin xukpaajtint xemikøjxp. ⁹ Janch yø' tøy yø', paat'ajtip jøts yø niduki'iyi nbadu'unint. ¹⁰ Ja'agøjxp møk ndu'unint øy njagu'ayo'ombaaajtindi øy njayikjemdu'uñindi nyiktedu'uñindi. Ka' ti ngumaa'yindit, jabi tøxi ja Dios xmø'øyiindi ja jøp'ejxin jøts niduki'iyi tyiknitso'okt pøn jaty pabøjkiyip.

¹¹ Yø'øbi winmaa'ñ idø'øn mni'ana'amp jøts nayide'en xnanky'ixpøkit. ¹² Øy tsuj jawyeen xunjøpit sam pyaat'atyin tpadu'undit pøn ja Dios tjanchja'widip jøts jade'en myikupøkt øy mja'una'jkinim; jøts ja m'ayuujk øy tsuj xyikpidsø'ømt møøt ja m'øyjaa'y'ajtin, møøt ja mba'ayo'owin, møøt ja mjanchja'win. ¹³ Ku øts jam udyaa'gyi nja'att, kajpx ja nøky jam mā mnamyukyidi sa ja Dios kyajpxy wya'añ. Yikxon xukwinjawit ja migu'uktøjk jøts ja yjotmøkt'a'aktit, yikxon waani xyik'ixpøkt. ¹⁴ Yiktuñ ja møk'ajtin ja wijy'ajtin midi ja Dios tø mmø'øyi, Dios waan ku ja møjaa'dyøjk ojts mgønixajyi.

¹⁵ Tu'ugyi xu'unt yø'øbi winmaa'ñ jøts jade'en t'ejxtit tnijawidit sa tø xyikmiweni xyikaja'aji ja mja'gyukin jøts ja mjanchja'win. ¹⁶ Øyim mnay'ejx'ettit kø'øm midi mwinmaa'ñ'ajtpy, midi mduk'ixpijkpy, midi mduknija'wip ja migu'uktøjk, tu'ugyi xyik'ett midi mdumpy. Ku jade'en xu'unt mbaatpts ja øy'ajtin jade'en, nayide'en ja'adi pøn tmadoodip ja ixpøjkin.

5

Sa ja Timoteo møøt y'ett pøn ja Dios tjanchja'widip

¹ Ka' xwindso'ot, ka'ap o sa xnøjmit ja møjaa'dyøjk; ne'egi tuda'aky xkajpxwejt sam ja mdeedyin; nayide'en ja una'jktøjk øy tsuj xjawit sam ja mgø'ømigugin. ² Nayide'en ja møjaa'dyø'øxy xwinjawit xwindsø'øgit sam ja mdaagin, jøts nayide'en ja kiixyuna'jkti sam ja mgø'øm'uchin, jade'en ja mduda'aky'ajtin xyiktu'unt.

³ Pudøki ja ku'øktyø'øxy pøn ti kadyimy'ejtxip. ⁴ Pøni jamts ja ku'øktyø'øxy møøt y'u'nk y'una'jk møøt y'ap y'ok, jade'en ja una'jk pyaat'atyidi jøts ja tpudøkidit ja tyeety tyaak jøts ja tyikwimbejtniyidit ku ja tø y'ijxyidi, yø' Dios y'øyja'wip, jade'en Dios ttsøky. ⁵ Ja ku'øktyø'øxy pøn nadyu'uk tø tyañ, pøn nipøn ka'ejt, ejtpts ja Dios ja t'ajot'aty jøts ja pyudøkiyit, ka'ap ja Dios ja tja'dyigøy jøpy ux. ⁶ Jamts nayide'en ja ku'øktyø'øxy pøn ja Dios tka'ajot'ajtp. Tyumpy ja' pøni ti ja tyunwampy, øøky ja ñabyiktaajkniyi. ⁷ Tukmadow yikxon, wan tnijawi jøts ka' pøn øy sa ñøø'mxiyit. ⁸ Jamts winaagin tkajotmay'aty ja myigu'uktøjk, abiky tpikta'aky ja yjøøn ja tyøjk jøts ja t'ixmajtsni ja Dios'ajot'ajtk. Tyimwyenkts ja ne'egi pyidsimy, ka'ap jade'en pøn ja janchja'win tkajagyajptinim.

⁹ Yø ku'øktyø'øxy yiklisti'atp midi tugi'pxy jumøjt pøni tøts ja tu'ugyi ñiyaa'y tø t'atmøøt'aty, paat'ajtiyip ja mibaat yikpudøkit. ¹⁰ Mibaat ja yikpudøkit ja'agøjxp ku tø y'øyjaa'y'aty, pøni tø y'u'nk y'una'jk yikxon tyikyeeke tyiktsø'øky, pøni tø øy tsuj t'adsøy ja jaa'y pøn tøjka'yø'ødyip, pøni tø yikxon twinjawi twindsø'øgi ja myigu'uk pøn tø tkupøjknidi ja Dios, pøni tø tpudøki pøn amjajtip tsaachajtip, uk pøni tø ttuñ jadu'uk øy ti may'ajt øy ti pudøjkin.

¹¹ Ka' mibaat yikjaabyatt ja ku'øktyø'øxy pøn una'jknim; ja'agøjxp ku jotmøñ y'amajtskit, jade'en'ampyts ja Cristo yja' ka'pxy tka'ukpadu'uniyit, ¹² jøts yikpøky'ixy ku tø tmajstutni ja' midi tø t'ukpadøki. ¹³ Jats ja' pøn nugo ttunk'ajtp ja tøk'ayø'øky, ja nuux'ajtin ja pagajpxk nugo jade'en myiwidijtpy, jøts nugo ttatøki midi jagapaat'ajtiyip. ¹⁴ Paty y'øyi jøts y'amajtskit pøn ku'øktyø'øxy una'jknim, jøts ja y'u'nk t'ext tjagyapt

sam pyaat'aty jønjøtpy tøjkjøtpy n'ejxint njagyajpint, jøts ka' nugo ja jaa'y pyagajpxiyit. ¹⁵ Jamts winaagin pøn ja Dios yja' tømajtstuuji, ja miku' yja' tømpanøjkyi. ¹⁶ Pøni pøn ja Dios yja' tømkujøykidi jøts pøni jam ja myigu'uk ku'økyø'øxy, mibaat ja køm tømudøkidit pøni ti ja ka'ejtxip, jøts ja ka' pyudøkyidit ja møjaa'dyøjk midi tundip jap tsaptøjkjøtpy. Jade'en'ampyts nayide'en yikpudøkit ja ku'økyø'øxy pøn ja myigu'uktøj kadyimy'ejttip.

¹⁷ Ja møjaa'dyøjk midi tniğutujk'ajttip ja janchja'wibidi jøts nwindso'jka'ant nwinja'wa'ant. Jamts ja' midi xuk'ejximp xuk'ixpøjkimp ja Dios kyajpxy, ne'egits ja møj nwindso'jka'ant jøts ja nbudøjka'ant. ¹⁸ Jabi jade'enxi jap jaabyety y'ity: "Kidi ja mdsakaa ajeñ xyik'okti ku ja xyiktunwa'andit." Jøts nayide'en: "Ku jaa'y nyiktu'unint kuwani myijuu'ñ ja ttsøky." Jade'en ja nøky wya'añ midi iza tømxijawidi.

¹⁹ Ka' xmøjpkita'akt ku yikni'øønit ja møjaa'dyøjk pøni ka'ap ja a'ejxnaxpi te majtskin uk tigøøgin. ²⁰ Pøni tundigø'yadøsttip ja møjaa'dyøjk, mibaats ja jam yiktamigajpxt ma ñamyukyidi ja janchja'wibidi jøts jade'en tjøtsø'øgidit tjøpjawidit ku tyundigøydi. ²¹ Ku ya'at jade'en ndanipiky wa'ats Dios Teety tmadøy, wa'ats ja nwindso'n'ajtim Jesucristo tmadøy møøt ja ankilistøjkti, jøts øy yikxon idø'on xpadu'unt yø ana'amín, ka' pøn nugo xukta'oo'kpatt. Pøni pøn tundigøødyip tuknax ja xpayø'øty. ²² Ka' nugo ajawi xpikta'aktit ja møjaa'dyøjk midi tniğutujk'atp ja janchja'wibidi, jawyeen yik'ext yiknijawit pøni sa yjaa'y'aty, kuts kya'øyjaa'y'aty jøts ja pyøky ttapaatt ja janchja'wibidi, øyim mnay'ejx'etit jøts ja pøky mgapaadit.

²³ Kidi nugo tsuxknøø xumi'uuky, pø pøj'ejtpxi xijy mjoojt, vino m'uukp waani.

²⁴ Pøn tundigøødyip midi yiknija'wip wa'ats, ja'ats yikpayø'øpy, midi'its kayiknija'wip jaanimts ja yiknijawit ku ja payø'øyin xøøw y'ett. ²⁵ Nayide'en ku ja øybi ndu'unint; øy ja jatyi yjagayiknijawi, kuwani yiknijawi udyalgyi. Ka'ap ja jadi'ñi tyañ.

6

¹ Yø tumbitøj øy tuda'aky yjaa'y'attit jøts twindsø'øgidit yikxon ja wyindsøndi, jøts ka' nugo ja Dios yikpagajpxt, jøts nayide'en ka' nugo nyiktabagajpxint ja n'ixpøjkin. ² Nayide'ents ja tumbitøj pøni jam ja wyindsøn midi nayide'en tpadump ja Dios yja', ne'egi møjts ja twindsø'øgidit, pø pyadumpxi nayide'en. Jade'ents ja ne'egi tømudøkidit sam ja tsojkin tjagyapti. Me Timoteo, tukmadow kajpxwa'kx yø'øbi ana'amín midi nnigajpxpy.

Sa ja Dios yja' nbaduujna'ant jøts agujk jotkujk n'ejtint

³ Pøni jam pøn tkajpxwa'kxy ja wenk ixpøjkin midi ka' tminabyaadyi ja nwindso'n'ajtim Jesucristo yja', midi tkawindsø'jkip ja Dios, ⁴ nugo ja ñamyikexyi, ka'ap ja tnijawit pøni ti kyajpxpy. Nugo tyikjø'øpy ja winmaa'ñ ja ixpøjkin; jøts jade'en nugo ja tsep tyiknaxkida'aky ku nixem niyam ja ñanky'amutskiwyaa'ñidi. ⁵ Nugo ja y'awa'an'ajtk tyiktunidi ku tka'uknija'wiñidi ja tyiiby. Nugo win'øø'ningøjxp nadyijyi ja Dios yja' ttuujnidi. Jade'en ja wyinmaydi jøts jade'en tijy ja kumeeñ'ajtin yikpaatt. Mets Timoteo, majtstu'ut yø' pøni pøn jade'en jaa'y'ajttip, kidi xminamyayi. ⁶ Jade'en'ampy adøm ja jotkujk'ajtin nmøøt'ajtyim ku ja Dios yja' nbaduujña'am øy meeñ o ti ngamøøt'ajtyim. ⁷ Ka' ti pøn tmimiñ ku ngaxi'jkyimp ya naxwiñ, nayide'ents ku nwindigøø'ña'ant, ka'ats ti n'uk'ejxna'ant; ⁸ pøni nbaajtyimp ja ngaajyik ja n'uujkik jøts ja nwet ja nnaamy, ndajotkujk'ajtimpts idø'on ja'. ⁹ Jamts pøn ja kumeeñ'ajtin ttsojpk. Tyumpy, o ti ttu'unt, jøts ja jade'en o sa nugo tpaatt ja meeñ, kømømts ja jade'en ñankyuu'tigøydi, ka' tja'gyukidi pøni ti tyundip. Køm ayo'on ja jade'en ñankyukpaadyidi, jade'ents ja nugo ñankwyindigøydi. ¹⁰ Ne'egi nugo xyiktundigøø'yint xyikajpxigøø'yint ku ja kumeeñ'ajtin ndsojkin; jamts pøn winaagin nugo tsojk'anaxy jøts ja pabøjkin ja janchja'win tka'ukpaduni, jøts ja jade'en ja ayo'on ñadyukpaadyit.

Sa ja Timoteo yikxon tniğubajk'att ja janchja'win

¹¹ Mets Timoteo, kidi me nayide'en m'adøtsmi, pø Diosxi mets ja yja' mbadu-ujnip. Yikyø'øy mets ja mdsinaa'yin øy tsuj, ja m'ajot'ajtin jøts ja mjanchja'win. Jøts xminamyayit øy pøn ja mmigu'uktøjk, jøts ja tuda'aky'ajtin yujy'ajtin xyiktu'unt. ¹² Nitani møk yø janchja'win; kidi xmajtstu'uty midi ja Dios tø mdamidsøkyiyi midi xemikøjxp ejtp, jabi øy tsujxi tø xukmadøy ja mayjaa'y sa ja janchja'win xjagyepy. ¹³ Ja Dios Teety midi xyikjucky'ajtindip, ñija'wipts ja', sam ixyam n'ane'emy, nayide'ents ja nwindson'ajtim Jesucristo ttukmadøøy ja tiy'ajtin ja Poncio Pilato. ¹⁴ Paty yikxon xpadu'unt jade'en, midi tø myiktanipiky, ka' xyiktigatst, jøts ka' pøn mbøky'ejxiyit. Jade'en xu'unt kunim ja nwindson'ajtim Jesucristo mye'ent. ¹⁵ Ku tpaatt ja xøøw ja jumøjt, jøts ja Dios Teety ja tkaxt ja nwindson'ajtim ya naxwiiñ. Tu'ugyi Dios Teety myøji midi ja øy'ajtin ja xondaajkin tmøøt'ajtp. Møk ja kutujk tjagyepy, ka' pøn windsøndøjk jade'en. ¹⁶ Yø' tu'uk møj, ka' y'øøky, xemikøjxp ja y'ity. Jaj agujkpy chøøni ma ka' pøn mibaat pyaadyi y'ijxyi. Yikwindsø'jkip yikwinja'wip ku ja myøk'ajtin tmøøt'aty xemikøjxp! Jade'en idø'øn ja y'ejxi.

¹⁷ Ana'am pøn kumeeñ'ajtp ya naxwiiñ jøts ka'ap nugo ñadyamikaxiyit. Ka'ap yø kumeeñ'ajtin nugo ñadya'agajpxiyit, ka'ap yø y'ity. Ne'egi øy ku Dios t'ajot'attit amumjoojt, pø ja'axi ejtp xemikøjxp jøts tuki'iyi xmø'øyim ja øy'ajtin ja jotkujk'ajtin. ¹⁸ Nøjmi ja kumeeñ jaa'y jøts yikxon yjaa'y'attit, jøts tpa'ayo'odit ja myigu'uktøjk pøn ti ka'ejtxip. ¹⁹ Ku jade'en tpadu'undit jøts ja øy'ajtin jade'en tpaattit, jøts tmøøt'ettit ja Dios xemikøjxp.

Midi ja Timoteo jaakyiktanipøjkp

²⁰ Mets Timoteo, møjpihta'ak midi tø myiktanipiky. Kidi xmøjpihta'aky ja ka'øy ayuujk midi ja Dios yja' tkaminabyaajtip, midi ñadyijyi yiktejp ku ja tyiy'ajtin. ²¹ Tø winaagin tyuu'tigøydi pøn yø jade'embi winmaa'ñ tpadump. Jade'en ja yjanchja'win tka'ukpadunidi.

Dios mgunuu'kxip, mets Timoteo. Jatp idø'øn jade'en.

JA MYĪMAJTSKPĪ NØKY MIDI JA PABLO TYANĪGAJX JA TIMOTEO

Ku ja Pablo ojts tnĳayi ja Timoteo

¹ Pablo øts, jøts øts ja nwindson'ajtim Jesucristo ngudanaapy, øts xkajxp ja Dios Teety sam øts ja tø xamidsøky jøts øts ja yja' ndukmado'ot ja naxwii'ñit jaa'y sa nbaajtint ja øy'ajtin xemikøjxp ku ja Jesucristo møøt n'ejtint. ² Mets Timoteo ya'at nøky ndanija'ayip. Mjagyajpnĳxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Sa ja Timoteo tyiknĳgaxø'økt ja Cristo ja yja'

³ Ndamøja'wip øts ja Dios ku me nni'amidoo'wi y'ity jøpy ux. Ja' øts idø'on ja yja' nbadumpy samdam ja t'øyjawi sam nayide'en ja møjaa'dyøjk y'ijty ttundi. ⁴ Nja'myejchp øts sa myaajxy ku nnawya'kxyim. Wamp øts o me ma njanch'ejxpaatt jøts njotkujk'att. ⁵ Nja'myejchp øts nayide'en sam ja Dios Teety xjanchjawĳ. Jabĳ jawyeenxi ja mdigamøj jøts ja mdaak nayide'en tyiktundøø ja yjanchja'win.

⁶ Paty mets ixyam ndukja'myech jøts øy tsuj xyikmiwenit ja mdunkjøøjp midi ja Dios tø mdanĳpikyĳ ku mets ojts ngønĳajy. ⁷ Ka'ap ja Dios Espĳritu Santo tø tpikta'aky jøts øy ti ngudsø'jka'ant. Nayĳ Espĳritu Santo ja myøk'ajtin xmø'øyimp jøts amumjoojt ndu'unint jøts ja tsojkin jøts ja øyja'gyukin nmøøt'ajtin. ⁸ Ka' ti xtsø'ødyunjawit sam ja Dios yja' xkajpxwa'kxi, jøts ni øts xkatsø'ødyunjawit ku øts nay ja' nyiktagudsumi. Kupøk o myikjemduñ myikteduñ myikjemnøjmĳ myiktenøjmĳ ku tka'øyjawidi ja Dios kyajpxy midi xyiknitso'ok'ajtimp. Jade'en xmĳdanit sam ja Dios ja myøk'ajtin tyaky. ⁹ Jade'en ja Dios ttsøky jøts ja xyiknitso'ok'ajtin jøts nayide'en amumjoojt nnadyamiyojxint. Kidi ja'agøjxpĳ adøm ja xtsøjkyim ku adøm n'øyjaa'y'ajtyim nga'øyjaa'y'ajtyim. Ma windiixyĳ adøm ja Dios jade'en xamidsøjkyim, ka'anĳm wyĳnaty ja naxwii'ñit cho'onda'aky. Ja nwindson'ajtim Jesús køjxp adøm ja nitso'ok'ajtin nbaajtint ku møøt n'ejtint. ¹⁰ Tø ja Dios Teety tnankya'ijxyĳ sa ja pa'ayo'owin tjagyepy adømgøjxp ku ja nwindson'ajtim Jesucristo xanĳguejxyim. Sa ja y'ø'jky jøts yjujkyjky, nayide'ents adøm nbaajtint sam ja tø tnajtstuni. Jade'ents Cristo køjxp ja o'jkin xka'ukmĳmajadaajkna'ant jøts xemikøjxp ja jujky'ajtin nbaajtint ku ja y'ayuujk tnĳtanaay sam ja wyĳnaty tø ttanĳbiktaagi.

¹¹ Dios ø tø xpikta'aky jøts øts ya'at ja kyajpxy ja y'ayuujk ngajpxwa'kxit jøts øts yø ngudanit, jøts ø nduk'ixpøkt pøn ka'israelit jaa'dyi. ¹² Paty øts ixyam øy ti ngu'ayo'ombaadi. Ka'ap ø ti ndsø'ødyunjawĳ, pø Diosxi øts ja yja' nbaduujnĳ. Wampøts øts jøts øts ja Dios xpøkjø'knit kunĳm ja tĳdyu'unin xøøw mye'ent.

¹³ Mets Timoteo, sam ø tø nnajtstuni, tu'ugyĳ ja øy ĳxpøjkin jade'en xyikyø'øty, ja Dios yja'. Jade'ents ja Dios xjanchjawit jøts ja mmĳgu'uktøjk xpa'ayo'ot xminamyayit nayide'en sam ja nwindson'ajtim Jesucristo xamidsøjkyim ku møøt n'ijtyim. ¹⁴ Ja Espĳritu Santo midi adøm nmøøt'ajtyĳndĳp, ja' pyudøjkingøjxp xpadun'ett ja Dios yja' midi tø mdanĳpikyĳi.

¹⁵ Tøxi me xnĳjawĳ sam øts ja Asiit jaa'y xmajtstuttøø, ja Figelo møøt ja Hermógenes paat. ¹⁶ Diosts ja kunuu'kxiyĳ ja Onesíforo møøt ja myĳgu'uktøjkti ku øts ja kawinaak ojk xnĳmiñ jøts ø xpudøki. Ka'ap ja tsø'ødyu'unin tjagyepy øy ø njatsumy'ity. ¹⁷ Ne'egi øts ja x'ixaay ya Roma ku øts ja ma xka'ijxy kunĳm øts ja xpaajty. ¹⁸ Wan ja Dios ja pya'ayo'ajtin tmø'øy ku ja tĳdyu'unin xøøw tpaatt. Wa'atsxi me xnĳjawĳ sa ojts xpudøjka'am jam Efeso kajpjojp.

2

Sa Timoteo mək tmidanit ja ayo'on Jesucristo kəjxp

¹ Mets u'nk Timoteo, jotməkəkək, yiktun ja mək'ajtın midı ja nwindson'ajtim Jesús yajkpy. ² Ja ıxpəkın midı m'ıjxpy midı mnıja'wıp sam ɵts ja mayjaa'y nyık'ıxpıky, ja'ats nayıde'en mdanıpəkək pən ɵy tsuj jaa'y'ajtp, midı ɵy tsuj yık'ıxpəkək nayıde'en.

³ Mək xmidanı ja ayo'on midı mbatpy ku ja nwindson'ajtim Jesucristo yja' xpaduujni. Mək nabyıkta'agi jade'en sam pən yıkexy tseptumbı. ⁴ Ka'axı mıbaat ja tseptumbı pyaat'atyı jɵts nugo ajawı o ti ttatəkıt. Tu'ugyı ja yja' tyıkyɵ'ɵdyıt sa ja wyındson ja y'ane'emyıdı. ⁵ Nayıde'en ja kuyajtpı, tu'ugyı ja yja' ja ttu'undıt sa ja tɵ yık'ana'amdı, winets ja tpəkıtıt ja nıguyaty. ⁶ Nayıde'ents ja kamdumbı nayja' paat'ajtıyıp kɵ'ɵm tpəkjɵ'ɵkt ja pyıkta'aky. ⁷ Pawınmaaıyık ɵts yɵ n'ayuuık, nayı nwindson'ajtımts mbudəkıyıp jɵts xja'gyukıt.

⁸ Ja'myats ja nwindson'ajtim Jesucristo sa ojts yjuıkpyıky jap oo'kpi jutjɵtpy midı ja rey David y'ap'ajtpy. Yɵ' ɵts ja yja' ngajpxwa'kxiyıp sa ja ɵy'ajtıxukpaajtınt. ⁹ Yɵ' kajpxwa'kxıngɵjxp ɵts ɵy nyıkmi'ekyı, mɵkts ɵts yɵ nwindanı, jade'ents ɵ nyık'ıxy ejxim tu'uk ja mɵj tundıgɵɵbya'an; ɵy ɵts njayıktsumy ka'ap ja Dios kyajpxy jaayı tyañ. ¹⁰ Ja'agɵjxp ɵts yɵ ayo'on mək nwindanı jɵts nıtso'ok'attıt pən ja Dios tɵ wyı'ıjxyı jɵts tpaattıt ja ɵy'ajtıx midı xemıkɵjxp xmɵ'ɵyım ja nwindson'ajtim Jesús.

¹¹ Janch تی'ajtıx yɵ':

Ku ja Cristo mɵət nayıde'en n'ɵ'jkyım, nayıde'ents ja mɵət njujky'ajtınt;

¹² pənı ngu'ayo'ombaaıta'am ja yja', xmɵ'ɵyımpts ja' ja y'ɵy'ajtıx ma ttanıanı ja yjaa'y. Pənı ka' ja ngupıjkyım, nayıde'ents ja xkagupəkınt.

¹³ Pənı ngamək'ajtıngɵjxp adɵm ja njanchja'wın kyamajadaajkyım, jade'eñım ja Dios tyıkyɵ'ɵy ja yujy'ajtıx jɵts ja pudəkın ja xmɵ'ɵyım, ka'ap ja Dios mıbaat nıay'ıxmajtısyıt kɵ'ɵm, paty ja xkaja'dyıgɵ'ɵyım.

Yıkyɵ'ɵpy jade'en ja Timoteo sa tɵ yıktanıpıky

¹⁴ Mets Timoteo, tukja'myats pən jaty ja Dios yja' tjanchja'widıp jɵts kıdı nugo kyajpxımbetti kyajpx'adɵtı, kıdı nugo tkajpxyɵndı midı ka' tyuñ; nıankyuu'tıgɵyıdıp yɵ jade'en. ¹⁵ Amumjooıt nabyıkta'agi sa ja Dios yja' xpaduujıt jɵts ɵy tsuj yɵ mdunk pyıdsɵ'ɵmt Dios wyıngujkp. Ka' ti nugo xtsɵ'ɵdyunjawıt ku ja تی janch xkajpxwa'kxi ja Dios tyıy'ajtıx. ¹⁶ Kıdı xpabıky yɵ'ɵbı ayuuık pən jam nugo o sa kajpxtıp. Pən jade'en ttundıp, ja kya'ɵyjaa'y'ajtıx ıdɵ'ɵn ja yıkmıwenıdıp. ¹⁷ Pən jade'en nugo kajpxtıp, jade'ents ja kya'ɵy'ıxpəkın ja myɵjıdı myayıdı jɵts ja wındıgɵ'ɵyın nugo tyıknaxkıda'aktı. Jade'en y'adɵ'ɵtstı ja Himeneo jɵts ja Fileto, ¹⁸ ku kɵ'ɵm tɵ nıankyuu'tıgɵyıdı jɵts ja wy'a'andı ku ka' y'uk'ejtııt ja jujkpyəkın ku ja o'jkın nbaajtınt ya naxwııñ. Jade'ents ja myıgu'uk wınaagin tɵ ttukmajtıstı'uttı ja yjanchja'wın. ¹⁹ Ka'ap mıbaat pən tyıktıgatst ja Dios wyınmaa'ñ, jabi yıde'enxı jaabyety y'ıty: "Wa'ats ja Dios Teety ja t'ıxy tnıjawı pən padu'unxıp ja yja'"; jɵts nayıde'en wy'a'añ: "Wan tmajtıstıtnıdı ja ka'ɵyı, pən ja Cristo yja'ajtpy."

²⁰ Jade'en n'ukpıktaajkınt ku jaa'y xnıme'enınt xnıja'jtıt nıjənıjotp ndɵjkıjotp, jɵts nduk-tajɵ'kxa'ant ja' midı ɵy midı tsuj midı tsobatp; jɵts ja' midı ka' chobaaty, ja'ats o pən tyıktı'ump. ²¹ Nayıde'ents ıdɵ'ɵn adɵmdı, ku ɵy tsuj nnay'ejx'ejtındıt jɵts nja' nayıde'en chobaajtınt Dios wyıngujkp; jade'en'ampıys ıdɵ'ɵn ja xyıktı'unınt jɵts nmıgu'uktɵjk nbudɵjka'ant.

²² Majtıstı'ut yɵ unajk wınmaa'ñ midı ka' tyuñ. Tu'ugyı xyıkyɵ'ɵty ja تی'ajtıx jɵts ja mjanchja'wın, jɵts xminamyayıt ja mmıgu'uktɵjk ɵy tsuj pən tu'ugyı t'ajot'ajtp ja Dios. ²³ Nnımaapıys mets jɵts ka' xpadəkıt yɵ'ɵbı ayuuık midı katump. Mnıja'wıp ku jade'en ja tsep nugo yıkpaaty. ²⁴ Pən tpaduujıp ja Dios yja' ka'ap ja nugo ajawı o ti ttatəkıt ma ja tsep, ma jaa'y o ti ttındı. Ja' ja tyu'ump ɵy'ajtıx tuda'aky'ajtıx ɵy pən mɵət. Ja y'ıxpəkın

ja tyuk'exp tyuknijawip sam ja tuda'aky'ajtin nayide'en tmøøt'att. ²⁵ Jade'ents ja øy tsuj tkajpxuda'akt pøn ja wenk winmaa'n̄n tmøøt'ajttip midi ka' tyiyi, wan ja Dios pyudøkiyi jøts tyigatstit ja wyinmaa'n̄n jøts tpadu'undit ja tyiiby yjanchpi. ²⁶ Wan tmajtstu'utti ja miku' yja' ku ja nugo tø wyin'iñidi jøts ja nugo tø tyuktuñi pøni sa ja ttsøky.

3

Sa jaa'y wyinaty ku ja tidiyu'unin xøøw tpaatwani

¹ Me Timoteo, nayide'en xnijawit ku wyingoni ja xøøw ja jumøjt jøts nwindson'ajtim mye'ent, janch tsep ja xøøw ja jumøjt ñaxt. ² Øy sa pøn y'adø'øtstit. Kyø'øm winmaa'n̄n ja nugo yikmøjtøkiwya'andip, meeñ ja nugo may choktip, namyikaxi winmaa'n̄n ja nugo yiktu'undip. Tpatit tñaxtit ja Dios, ka'ap ja tyeety ja tyaak twindsø'øgidit, niti ja tkamø'lejxtit tkamøjawidit jøts ni tkawindsø'øgidit ja Dios yja'. ³ Ka'ap ja ti tsojkin, ka'ap ja ti øy'ajtin tmøøt'attit. Pagajpxk ja' yø tyunk'attip, ka'ap ja maa'kxujkin tjagyaptit, tyunwandip o ti ttunwa'andit, nugo øy pøn tmidsep'atwa'andi øy wyinaty pøn tuda'akyjaa'y'aty. ⁴ Kyøyakp ja kyø'øm migu'uk, adø'øtsp o sa y'adø'øtst. Kyø'øm ja' y'ixa'ap, ka'ap ja Dios yja' ne'egi t'ixaa'jyit. ⁵ Ejxingøjxp nadyijyi ja Dios yja' tpaduujnidit pø sa ja y'am yjotp, ka'ap ja tmøjpiktaajkit ja ñitso'ok'ajtin.

Me Timoteo, ka'ap yø jade'embijaa'y xunk'att. ⁶ Adøtstip o sa y'adø'øtsti, tøjk tøjkidip jøts ja tøøxyøjk twin'øøndit pøn ñadyu'uk'ejxtip pøn y'amutsk'ejxtip. Nayide'ents ja tøøxyøjk, jaa'y'ajtp ja' o sa yjaa'y'aty. Kyupijky ja nugo, ⁷ ixpøjkin ja jade'en tijy yikmøøpy, nisudso'ampyts ja jade'en tkaja'gyuki ja Dios tyiy'ajtin. ⁸ Nayide'en sam ja Moisés y'ijty kyayikpaduñ ja yja' sa ja yjawa'añ ku ja kyamibøjkøø ja ximaabyi Janes møøt ja Jambres, nayide'ents yø jade'embijaa'y tkamibøjkmidi ja Dios yja'. Tum wenk ja wyinmaa'n̄n yikyø'ødyi, ka'ap ja Dios jade'en kyupikyidi. ⁹ Ka' nugo ajawi myajada'aktit ja yja', kuwani yiknijawi ku ja myo'tpi winmaa'n̄n nugo tyikmøjtøkiwya'andi. Nayide'ents yjajtmidøø ja namajtskpi midi twindsøow ja møjaa'y Moisés.

Midi ja Pablo yjaak'uktanipøknip ja Timoteo

¹⁰ Mets Timoteo, øy tsuj mets ja n'ixpøjkin xyikyø'øyi. Nayide'en mjaa'y'aty sam ø njaa'y'atyin, tu'ugyi ja mwinmaa'n̄n xyikyø'øy, ja øy'ajtin tuda'aky'ajtin jøts ja janchja'win. Nayide'en mjaty ¹¹ sam njajty sam ngubejtyin. Mnija'wip pøni sa njajty jam kajpjotp midi yiktejp Antioquía jøts nayide'en jam Iconio møøt ja Listra ku øts ja Dios yja' ngajpxwa'kxi. Jamts øts ja jaa'y xjemduñ xeduñ, jøts øts nwindson'ajtim nja'myejch xjats ø møj xpudøjkiyiñ. ¹² Janch tiy'ajtin yø', yikjemdu'undip yiktedu'undip pøn ja Cristo yja' nadyamiyoxwajniyip; ¹³ jøts ja' pøn ja myigu'uk nugo twin'øøndip kø'øm ja ñanktyuu'tigøyidi, nisudso'ampy ja kya'øyidi ja yja'adi ku nugo jade'en ñawyin'iñidi ja xem ja yam.

¹⁴ Mets Timoteo, tu'ugyi mets yø mja' jade'en xyikyø'øty sam tø x'ixpiky sa tø xnijawi. Mnija'wipxi pøn mduk'ejxi pøn mduk'ixpøjki, ¹⁵ ku yø mutskyi xnija'wiyiñ yø Dios kyajpxy, midi xyikujajtaajkimp, midi xyiknitso'ok'ajtimp ku njanchja'wa'ant ja nwindson'ajtim Jesucristo. ¹⁶ Tu'ugyi ja Dios kyajpxy ja y'ayuujk jade'en y'ity, sa ja tø yikwinmaa'n̄myø'øy pøn tø tjaadyañ. Nay yø' xuknija'wamp ja tyiiby ja yjanchpi. Ku ndundigø'øyint ngajpxigø'øyint nay yø'øts xuknija'wimp ku yø pyøkyi. Xmø'øyimpts yø' ja ixpøjkin sa ja øy'ajtin ja tuda'aky'ajtin njagyajpint, ¹⁷ jade'en'ampyts ja Dios yja' ka'pxy nnija'wa'ant jøts jade'en ndu'unint tum ja øybi tum ja tsujpi.

4

¹ Mets ixyam ndanipijky Dios Teety wyingujkp jøts nayide'en nwindson'ajtim Jesucristo wyingujkp midi nanky'ejxyip ja møj windsøn'ajtin pøn tidiyu'ump ja jujkpyi jøts ja øøkpyi, ² jøts xkajpxwa'kxiyit ja yja'; tu'ugyi jade'en pojy'i'iky xpadu'unt wan pøn mgupiky mgagupiky. Ana'am pøn tundigøøpy pøn kajpxigøøpy jøts xukja'gyukit.

Jade'ents tuda'aky xuk'ext xuknijawit ja ixpøjkin. ³ Pyaatp ja xøøw ja jumøjt ku ja jaa'y tkawa'andit yø'øbi ixpøjkin; pyikta'aktip ja' kyø'øm yik'ixpøjkipidi pøni sa ja ttsoktit pøni sa ja tmadowa'andit. ⁴ Yø tyiiby yjanchpi ka'ap yø ttsoktit, ja' yø ne'egi choktip ja kwenti ja madya'aky midi kayikja'gyukip. ⁵ Me Timoteo, tu'ugyi møk xyik'ett yø mwinmaa'ñ, møk nabyikta'agi øy ja ayo'on yja'ity, nadyamiyoxi amumjoojt ja kajpxwa'kxin sa ja nitso'ok'ajtin nbaajtint, tu'ugyi jade'en xyikyø'øty yø mdunk.

⁶ Jøts øts, tøts øts jade'en nadyamiyøxyi ja Dios yja', jøts øts yjawi tsojk ja o'jkin nbaatt. ⁷ Møk ø tø nwindani ja Dios yja' jøts øts jade'en nyikjøpkøjxni ja ndunk ja nwinmaa'ñ. Tø øts ja njanchja'win jade'en nmi'ity. ⁸ Ja øy'ajtin øts xjøp'ejxp jøts øts ja nbaatt, ja'agøjxp ku øts ja Dios tø xkupiky. Jaanims øts ja nyikmo'ot ku ja tiidyu'unin ka'pxy xukpaajtint. Ni kidi øtsip ja nadyu'uk yikmo'op, niduki'iyi ja tpaattit pøn tjøp'ejx'ajttip jøts ja nwindson'ajtim mye'ent.

Ku ja Pablo ttukmadøy ja Timoteo sa tyu'unt

⁹ Tun wan ja may'ajt jøts tsojk mme'ent jøts ø x'ext; ¹⁰ pø tøxi øts ja Demas xmajtstu'uty, kyø'øm winmaa'ñ ja yiktunwampy, jøts tø ñijkxy jam Tesalónikit kajpjotp. Jam øts ja Cresente tø nguexy Galaciit y'etjotp, jøts ja Tito tø ñijkxy jam Dalmacia y'etjotp. ¹¹ Ja Lucas øts ixyam møøt njaak'ity. Ixa' jam ja Marcos jøts møøt mme'ent, jøts øts ja xpudøkit. ¹² Nayide'ents ja Tíquico tø nguexy jam Efeso kajpjotp. ¹³ Ku mme'ent, xyikmejnip øts ja nnixox midi jam nyiktaan Carpo tyøjkjotp jam Troas; xja'myajtsip øts ja nlibri jøts øts ja nnøky xjadyimyikmejnip midi nyiktumpy.

¹⁴ Tø øts xmídundigøy møj ja Alejandro midi ka'tsp; Dios wyingujkpts ja tkubatt pøni ti tø ttuñ. ¹⁵ Øyim mnay'ejx'etit møøt ja', jot'ambøjkp ja' ku ja Dios ja yja' yikajpxwa'kxi.

¹⁶ Ku øts myijawyeen nwinguwa'jkijii'ñ ja windsøndøjk ja kudunktøjk, nipøn ø xk-abudøjkijii'ñ; xmajtstutkøjxnidi øts ja' niduki'iyi. Øts wamp jøts ja Dios ja kyad-abayø'øyidit. ¹⁷ Ja nwindson'ajtim øts xpudøjkijii'ñ jøts øts ja møk'ajtin xmøøy, jøts øts nyikyø'øy ja kajpxwa'kxin sa ja nitso'ok'ajtin nbaajtint, jøts øts ndukmadøøy niduki'iyi pøn ka'israelit jaa'dyi. Jade'ents øts ojts ja nwindson'ajtim xuu'mø'øy mā jaty øts n'ayo'ombaaty. ¹⁸ Xyiknitso'ok'ajtip øts ja nayide'en ja n'anmija'win jøts øts ngapaatt ja ka'øybi jøts ø xpøkjø'økt jap tsajpjøtpty mā ja y'ity. iKunuu'kxy'ejtpim ja Dios xemikøjxp! Jade'en idø'on ja y'ejxi tyiyi.

Ku ja Pablo kyajpxpøø'kxy jøts ja kunuu'kxin t'ukyajkni

¹⁹ Kajpxpoo'kx jam ja Prisca møøt ja Aquila, jøts nayide'en ja Onesíforo ja myigu'uktøjk. ²⁰ Tø øts ja Erasto nyiktañ jam Corinto, tø ja Trófimo pya'ambety jam Mileto kajpjotp, paty øts jam tø nyiktañ. ²¹ Tsojk mme'ent ka'anin ja xuxpyoj tpaaty. Møj ja kajpxpoo'kxin mdaniguexyi ja Eubulo møøt ja Pudente. Nayide'ents ja kajpxpoo'kxin mdaniguexyi ja Lino, jøts ja Claudia, møøt niduki'iyi adøm nmigu'uk janchja'wibidi.

²² Møøt ja nwindson'ajtim Jesucristo m'ett, jøts niduki'iyi ja Dios mgunuu'kxidit. Jade'en idø'on ja yjatt.

JA NØKY MIDI JA PABLO TYANĠGAJX JA TITO

Yide'en yiknijayi ja Tito

¹ Pablo'ajtp øts, Dios Teety ø nmidumpy, jøts øts nwindson'ajtim Jesucristo ngudanaapy, ku øts ja xamigaxi jøts øts ja yja' ja ndukjanchja'wiyit pøn ja Dios Teety tø twi'ixy, jøts nayide'en tnijawidit ja tyiy'ajtin sa ja Dios øy tsuj yikpaduñ, ² jøts jade'en t'awejxtit ja juky'ajtin midi xemikøjxp etp. Ya'atpi tsinaa'yin ja Dios kø'øm tø tni'adsowi namga'anin wyinaty ja naxwii'ñit cho'onda'aky. Niwindem xøøw ja Dios Teety kyawindaay'aty, midi tø ttanibiktaagi, pyadumpy ja'. ³ Ku ja xøøw ja jumøjt tø tpatni sam ja kø'øm tø ttanibiktaagi xjats ja kyajpxy tnanke'ejxit jøts øts idø'on ngajpxwa'kxt midi øts ja Dios Teety yiknitsokpi tø xanipiky. ⁴ Ixyamts me Tito nnijayi. Ndyimy'u'nkja'wip mets, ja'agøjxp ku tu'ugyi janchja'win ndamujkyim, jade'en øts ja tsojkin nmøøt'aty jøts xpaatt ja kunuu'kxy'ajtin ja pudøjkin jøts ja øy'ajtin midi ja Dios Teety yajkpy møøt ja nwindson'ajtim Jesucristo pøn adøm nyiknitsokpi'ajtyindip.

Ja tunkjøøjp midi ja Tito pyatwa'jkjy#ñ jam Creta

⁵ Ku mets jam nyiktaañ Creta, ja'agøjxp øts ja jade'en nduuñ jøts mets xyika'pxt xyik'abaadit ja tunkjøøjp midi øts jam wyinaty tø nyikts'onda'aky. Jade'en ø nwa'añ ku mets tu'uk tu'uk xpikta'akt pøn tni'adøjy'atp ma jaty ñamyukyidi kajp kajp ja jaa'y pøn ja nwindson'ajtim tjanchja'widip. ⁶ Ja'abi møjaa'y'ajtpi mbikta'akp pøn øy tsuj tsinaapy, pøn niti windsø'yin, pøn tu'ugyi tmøøt'ajtp ja ñidø'øxy, jøts ja y'una'jk nay ja'abi janchja'win pyadundip, jøts øy tsuj ja chinaa'yin tyiknaxmidi. Myimadoodip ja tyeety, niti windsø'øyin ja jade'en tkapaattit. ⁷ Pøn idø'on jade'en tnigubajk'ajttip, pø ja Diosxi yja' ja y'ejx'ejtidip, paty idø'on pyaat'aty kuwani øy ja chinaa'yin tyiknaxtit. Ka'ap idø'on ja kyujuun'ajtin ja tyikmajada'aktit. Ka'ap winjaa windsojk y'akidit; ni ja amu'uky'ajtin ni ja tsep'ixaaky ja tkatunk'attit, jøts ka'ap ja meeñ nugo tjaa'xmukwa'andit. ⁸ Jabi yide'enxi dø'on ne'egi ja chinaa'yin tyiknaxtit, yikja'ada'aktip o pøn jaa'y jam tyøjkjotp øy tsuj, tum ja øy'ajtin ja myigu'uk ja tyamidsoktip, ja'gyukin idø'on ja myøøt'attip jøts tum ja' tyu'undip midi øy paat'ajtiyip. Pyadungøxtip idø'on ja', midi ja Dios y'øjja'wip jøts ka'ap ja kø'øm ja' tyikmajada'aktit. ⁹ Ja'ayi dø'on ja tu'ugyi tyimyjanchjawidip ja tyi'ajtin midi tø nduk'ixpøkti, jøts jade'en ja myigu'uk ttakajpxjot'amøkidit ja'abi tiiby'ixpøjkin, nayide'en ttukja'gyukidit pøn wyinaty t'agajpxukp ja'abi ixpøjkin.

¹⁰ Jabi mayxi ja jaa'y jaadi pøn tkamimadoodip ja Dios yja', sam winaaagin ja israelit jaa'dyi pøn nugo jemgajpxtip tegajpxtip jøts ja myigu'uk twin'øøndi. ¹¹ Ja'abi jaa'dyi, amøñi pyaat'aty nyikta'anint, jøts ka'ap ja ka'øybi ixpøjkin ttuktawinmaa'ndyigø'ødyit tu'ukpi jøøn tu'ukpi tøj, ja meeñts ja nugo y'ixaadyip ku ja y'ixpøjkin tyakti.

¹² Nay yø kø'øm yide'en ojts ja myigugajp ñimadya'agyidi pøn wa'ats najtsja'wigyøjxp ti jaty tunip jatip, ja' yide'en waan: "Yide'en ja Creta jaa'y yjuky'atti: o tyimdyayidi, janch awa'andi, nuux'ajtin ja yikmajada'aktip jøts ja yji'kxy nugo ja tta'aawiwya'andi."

¹³ Janch idø'on ja wyaañ; paty meets idø'on møk xamigajpxtit ja chinaa'yin jøts jade'en tyikmøkidit ja yjanchja'win pøn ja nwindson'ajtim yja' tø tpadøjkiñidi. ¹⁴ Jøts ka'ap jade'en nugo tmibøktit ja madya'aky midi yik'ø'yidip yikpaajtidip ja israelit jaa'dyi, ni tkamøjpiktaajkidit ja y'ana'amindi pøn jagam jixkø'øm tyiktandip ja Dios tyiy'ajtin.

¹⁵ Pønts ja Dios yja' ja'ayi tpaduujnip, tyum'øy'ejxtip ja' midi ja Dios kø'øm tø tyik'øyi, jamts ja'amidi pøn wamidip ku ja yikpøkpyety; paty ja jade'en ttejt ku ja pøky ja ja'ayi twinmaa'ñ'atti jøts tum yikpøkpyajtpi t'ejxti; jabi agoostujpxyi ja wyinmaa'ñ ja y'etti jøts jade'en tka'ejxkapti midi øy uk midi'its ka'øy. ¹⁶ Jade'en idø'on ja chaachwa'andi kuk idø'on ja Dios ja t'ijxyidi, pø sudso dø'on ja Dios ja t'ijxyidi; jabi wenkts ja chinaa'yin

ja tyiknaxti, ja kyawindi'y'ajtin ja yikmajadaktip, ka'ap ja madoogukin ja wine'enin tmøødidi, nisudso'ampy ja ødyu'unin ja tkayikwingaxø'økti.

2

Ja tiiby i xpøjkin

¹ Pøni midi mets Tito mnigajpxpy, ja tiiby i xpøjkin idø'øn ja møøt ñabyaadit. ² Tuknijawi ja møjaa'dyøjkti jøts ejxkujk yjaa'y'attit, tuda'aky yikxon ñabyikta'agidit, jøts ja'gyukidip idø'øn yiktu'undip idø'øn ja wyijy'ajtin; møk tyik'ettit ja Dios'ajot'ajtin møøt ja tsojkin, møøt ja pa'ayo'owin jøts møøt ja tuda'aky'ajtin. ³ Jøts ja møjaa'dyøxy nayide'eni yjaa'y'ajtmidit sam pyaat'aty pøn ja Dios tpadundip. Ka'ap ja jigajpxk pagajpxk ja ttunk'attit, ni ja mu'ugyi ja ku'uxyi tkayikmajada'aktit. Øybi tsinaa'yin idø'øn ja ne'egi ñanky'ejidip, ⁴ jøts jade'en ttuk'ejxtit ttuknijawidit ja tøxyøjk pøn nam amajtskidipnim sa ja ñiyaa'y sa ja y'u'nk y'unajk ja møøt øy yikxon chøønidit tyanidit. ⁵ Myøøt'attip idø'øn ja ja'gyukin ja'adi. Tum ja wa'atspi tum ja øybi tsinaa'yin idø'øn ja pyadu'undip. Ja yjøøn ja tyøjk idø'øn ja' kyamijotkukidip, pøn jam tso'ondip ja'ttip myiduda'aky'attip idø'øn ja'. Pøni ti y'ane'empy ja ñiyaa'dyi, pyadu'undip idø'øn ja'. Jade'en idø'øn ya'at tpadungøxtit jøts ja Dios y'øgyajpxy ja y'ømyadya'aky kyayikjigajpxt kyayikpagajpxt.

⁶ Taguwani mets Tito ku ja wajtyøjkti ja ja'gyukin tmøøt'attit, ⁷ jøts idø'øn ja kø'øm jawyeen mjøptunip pøni sa dø'øn ja øchinaa'yin tpadu'undit. Ku dø'øn ja wyinaty xkajpxwejwa'añ, yikxon idø'øn ja xnigajpxt, niti nixi'iky niti taxi'iky xkajawit. ⁸ Tiy ka'pxy idø'øn ja i xpøjkin xnanky'ejxit jøts ka' nipøn jade'en m'agajpxkuyit. Jøts kø'øm ttatsø'dyunt ja jaa'y pøn wyinaty nugo mjigajpxiyip mbagajpxiyip jabi ja'gyukidipxi ja kø'øm ku meets ja tiy'ajtin xnigajpxy.

⁹ Kajpxwej ja tumbitøjkti jøts tpadungøxtit ja wyindsøndi; yikxon idø'øn ja yjaa'y'attit jøts ka' twindsø'odit ja wyindsøn. ¹⁰ Ka'ap idø'øn ja tma'jtsit ja pyikta'aky pøn ja yiktuujnip. Yiknigaxø'økp idø'øn ja y'øyjaa'y'ajtin jøts o pøn jaa'y jade'en ttsujawit ja tsinaa'yin midi ja Dios yiknitsokpi yajkpy.

¹¹ Jabi tøxi ja Dios ja øy'ajtin tnanky'ijxyi midi tyiknitso'okwamp tuki'iyi ja naxwii'ñit jaa'y; ¹² ja'agøjxpts ja Dios ja y'øy'ajtin tnanky'ijxyi jøts xuknija'wint jøts n'ixmajtsint midi ja Dios tkaminamyajyip sam nayide'en midi n'am njotp xmimajada'akwa'andip, jøts ja tsinaa'yin ya nyiknajxint ja'gyuki køjxp, samdam nayide'en øy tiy ja Dios ttsøky'aty jøts ja tu'ugyi nwindsø'jkant nwinja'want. ¹³ Nayide'en idø'øn ja xuknija'wim sa dø'øn n'awejxint jotkujk ja øy'ajtin, midi ja Dios kø'øm tø tni'adsowi, ku ja mye'ent kyida'aktaju'ukjotp, ja Jesucristo yiknitsokpi pøn ndios'ajtyindip. ¹⁴ Nagyøyajkiyi ja', jøts adømgøjxp ja xku'o'jkindi jøts jade'en axøø'kpi yigaappi agujkpy nga'ejtindit, jøts jade'en nbaajtint tu'ugyi ja wa'ats'ajtin jøts ja'ayi nnadyamiyojxandit, jøts tum ja øybi n'amindip njotpindip.

¹⁵ Ya'at mets Tito idø'øn mnanky'ixpøkiyip, mgajpxjot'amøkip idø'øn, jøts nayide'en møk ja mgutujk xamigajpxt pøn tkamimadowandip ja'abi i xpøjkin. Kidi mets ja jaa'y kø'øm myik'amutskiniyi.

3

Sa dø'øn ja chinaa'yin tyiknaxtit pøn ja nwindson'ajtim tjanchja'widip

¹ Tukja'myatsti ku tkajpxkyupøktit ja windsøndøjkti samdam nayide'en ja kudunktøjk tmimado'odit, jøts tpadu'undit tuki'iyi ja ødyunk midi wyinaty tø yiktaguwani. ² Nipøn idø'øn ja wenk tkanimadya'aktit, nika' idø'øn ja tsep ja t'ixa'adit. Ja øy'ajtin idø'øn ja ja'ayi yikmajada'aktip, ja tuda'aky'ajtin idø'øn nixem niyam ja myigu'uk tyamay'attip.

³ Jabi nayide'enxi adøm y'ijty ngakajpxkyupijkyim jøts ja Dios yja' ngamimadooja'am jøts jade'en nwidijtyim kube'ets kugoots. Tum ja axøø'kpi yigaappi y'ijty nyikmajadaajkyindip midi n'amindip njotpa'andip; jap adøm y'ijty ja nxøøw ja njumøjt

nyiknajxyindi ma wyindsøn'aty ja ka'øy'ajtk mōøt ja windi'ĩñ'ajtk, øy y'ijty pøngapøn mōøt ndyimñamyi'ambijkyindi, sam adøm idø'øn kø'øm y'ijty ndyimyjotkidaajkyim. ⁴ Kuts adøm ja Dios ja yiknitsokpi tnanky'ejxøø ja y'øy'ajtin, sa ttsøky'aty ja naxwii'ñit jaa'y, ⁵ jade'en adøm idø'øn ja xyiknitsøjkyim, kaja'agøjxpi ja ttuun ku adøm ja øchinaa'yin wyinaty tø nmøøt'ajtyim, jabi pa'ayo'oningøjxpxi dø'øn ja ojs xyiknitsøjkyim, xukyikniwaajchim ja nbøky jade'en jøts ja jemchinaa'yin ja Espiritu Santo xukpaajtyim. ⁶ Ja yiknitsokpi køjxp ja nwindson'ajtim Jesucristo køjxp ja Dios Teety tø xmø'øyim kawine'en ja Espiritu Santo jøts ja xpudøjka'am, ⁷ jøts ja Dios Teety y'øy'ajtingøjxp xkupøjkindit jøts nyikmø'øyindit ja juky'ajtin midi xemikøjxp etp midi adøm n'aweix'ajtyindip.

⁸ Tyimdyiy idø'øn ya'at, paty øts idø'øn ndsøk'aty jøts mets winjaa windsojk xkajpxt ya'atpi ixpøjkin jøts jade'en pøn ja Dios tjanchja'widip tunkjøøjp'attit tum ja y'øybi tyiiby. Tyum'ødyunguixpy ya'atpi ixpøjkin, øy yø pøngapøn t'ødyuñ. ⁹ Kidi xyikmøjtøki nugo ja kugoots madya'aky midi niti kyawa'añ, jøts ka'ap ja apmadya'aky ja møjaa'y ayuujk nugo xunk'att, ni xkadatøkit pøn ja Moisés kyutujk nugo ttamadya'akpyattip. Ni ma ja tiy'ajtin ja' tkamøøt'atti.

¹⁰ Pøni jam pøn tnankñawya'kxwa'añidi ja Jesucristo yjanchja'wibitøjkti, tawindsø'øy tuk'ojkin uk majtsk'ojkin, kuts wyinaty mgamimadøyi, jagam ja x'ixwejtsnit; ¹¹ jabi jade'enxi mets xnijawit ku ja'abi jaa'y tø ja chinaa'yin ja ka'øybi myimajadajkniiyi jøts kø'øm ja pyøky ja ñi'øøniyi.

Ku ja Pablo ttanipiky ja kyø'øm jotmay ja Tito

¹² Ku me wyinaty ndanigaxi ja Artemas uk ja Tíquico, tun ja may'ajtin jøts øts waani wyinaty x'ats'ixy jam Nicópolis, jabi jamxi øts tø ndanibiktaagi nyiknaxwa'añ ja et ja xøøw kunim ja møk xux ñaxt. ¹³ Tabudøki øy tigati ja nitanaabyi midi yiktejp Zenas jøts nayide'en ja Apolos, mo' ja pudøjkin jøts yjaakwidettit kunim ja tyunk tyik'abaadidit nugo ku ti kya'ijtxyidi. ¹⁴ Nøjmi ja nmigu'uktøjkti pøn jamdi mets mōøt jøts mbudøkiyidit, jøts jade'en tnijawidit sa ja øchinaa'yin wyingaxø'økt ku tpudøkidit ja myigu'uk pøn ti ka'ejtxip.

Ku ja Pablo kyajpxpøø'kxy jøts ja kunuu'kxin t'ukyajkni

¹⁵ Pøn jaty øts ixyam mōøt, mdanigaxidip ja kajpxpoo'kxin ja'. Tukja'myats niduki'iyi ja nmigu'uktøjkti pøn jaty tu'ugyi ja janchja'win tmøøt'ajtmidip ku øøts ixyam ja kajpxpoo'kxin nguexy. Paat meets ja Dios kyunuu'kxin niduki'iyi. Jade'en idø'øn ja yjatt.

JA NØKY MIDI JA PABLO TYANĠGAJX JA FILEMÓN

Yide'en ja Pablo tnijayi ja Filemón

¹⁻² Øts idø'øn Pablo'ajtp. Øts yam tsumy ku nwindson'ajtim yja' nbaduujni. Ixyam mee nnijayi møøt yø Timoteo pøn jaty namyukidip jam mdøjkjotp, jøts nayide'en øø nja'myech ja ndsø' Apia jøts Arquipo midi nayide'en tump sam øts nduñ. ³ Paatti meets niduki'iyi ja Dios Teety jøts ja nwindson'ajtim Jesucristo kyunuu'kxin møøt ja y'øy'ajtin.

Sa ja Filemón tjagyepy ja tsojkin ja pa'ayo'owin møøt ja Dios'ajot'ajtin

⁴ Ku øts ja Dios n'ajot'aty nxumikajxajkpy øts ja Dios ku me nja'myech, ⁵ ja'agøjxp ku tø nnijawi ku mets nayide'en xtsojki ja nwindson'ajtim Jesús yja', jøts pøn jaty ja janchja'wiyip. ⁶ N'amidøøpy øts ja Dios jøts tjä'gyukiyidit yikxon ja y'øy'ajtin midi nbaajtyindip ku njanchja'wa'andi ja nwindson'ajtim. Wa'nts tum jade'en ttundi, pøni sa tø xukmadøy pøn jaty tø tpabøkti. ⁷ Janch jotkujk øts ixyam ku nmadøy ku xpa'ayøy ja mmigu'uk jøts xkajpxjot'amøki, jøts jade'en xyikjotkujk'aty.

Ku Pablo t'amidøy ja may'ajtin jøts yikupøkt jadigojk ja Onésimo

⁸ Øy øts ja Cristo kyutujk nayide'en njamøøt'aty jøts me n'ana'amt pøni ti jaty mdu'ump, ka'ats mets ixyam n'ana'amwa'añ ⁹ ja'agøjxp øts ixyam migu'uk'ajtingøjxp tu'uk ja may'ajt n'amidoowa'añ. Møjaa'ñip øts ixyam jøts tsumyim n'ity nwindson'ajtingøjxp, ¹⁰ paty mets n'amidøy ja may'ajtin jøts xkupøkt jadigojk ja Onésimo midi øts yam tø ndukja'gyuki ja Dios yja'.

¹¹ Ku ojts jawyeen nmøøtsinaay yø Onésimo, ka'ap øy y'ijty ti t'ødyuñ. N'ajot'ajtna'amp ixyam ¹² paty ndaniguexy jadigojk jøts xkupøkt, ¿kidits øts jeexyip xkupiky? ¹³ Jade'en ø njatsøky'aty jøts ja yam jeexyip tyañ, jøts øts ja jeexyip xpudøki sam mets jeexyip kø'øm xpudøki. ¹⁴ Ixyamts mets ja ndaniguexy ja'agøjxp ku ka'ap mibaat ja mgutujk njinajxit, jabi yide'enxi njawa'añ pøni xunwajnip meets ja may'ajtin, ka'ap ja xu'unt ana'amingøjxp, mgø'ømdsojkingøjxp idø'øn ja xu'unt. ¹⁵ Pø ja'agøjxp idø'øn ja ojts chøøñ jøts ja mniwimbetiyit jadigojk xemikøjxp, ¹⁶ jits ka'ap jade'en x'ukyiktunit ejxim jiyujkin, jade'en xjawit ejxim n'uchin ejxim nmigu'ukin. Njanchpa'ayøøpy øts yø', jawaani møk mets yø xpa'ayo'ot, ka' nugo jaa'y x'ext, jade'en x'ext sam adømin, tøxi tpabiky ja nwindson'ajtim yja'.

¹⁷ Paty ø nwa'añ, pøni xmigu'ukja'wip øts, kupøk ejxim øts jeexyip xkupiky. ¹⁸ Pøni tø mmidundigøyi, uk japts mmiojyiyi, øts ja ngubajtkøjxp. ¹⁹ Kø'øm øts ixyam nwa'añ jøts ngubajtkøxt ja yoj, paty ø kø'øm ndyimyja'ay; ka' yjawi njadukja'myajtswa'añ ku me tø mnañito'jkniiyi. Kidim xjanchja'wiñi, taxi'iky yø'. ²⁰ Sam ø nwa'añ, tun waani ja may'ajt jøts ø xyikjotkujk'att ja'agøjxp ku tu'ugyi njanchja'windi ja nwindson'ajtim.

²¹ Nnajtsja'wip øts ku xpadungøxt sa jaty øts ixyam nwa'añ. ²² Jøts nayide'en x'awejxtip øts; jotmøñ mee nninijkxy sa jam ja Dios x'amidowdi.

Ku ja Pablo t'ukyajkni ja kajpxpoo'kxin jøts ja kunuu'kxin

²³ Nayide'en mdaniguexyidi ja kajpxpoo'kxin ja Epafra, pøn øts ixyam møøt nd-sumchøøni nwindson'ajtingøjxp. ²⁴ Nayi kyajxtip ja kajpxpoo'kxin ja Marcos, møøt ja Aristarco, møøt ja Demas jøts ja Lucas, midi øts xpudøjkidip.

²⁵ Mbaajtidip ja nwindson'ajtim Jesucristo kyunuu'kxin ja y'øy'ajtin. Jade'en idø'øn ja yjatt.

JA NØKY MIDI YIKTANIJA'AYIDØØ JA HEBREOS JAA'DYĪ

Dios U'nk køjxp adøm ja Dios Teety xmiġajpxyim

¹ Janch tiġach idø'øn ja Dios Teety y'ijty ñanky'ijxyiyi, ku dø'øn ja kyugajpxy ttuknijawiwya'añ pøni ti jaty idø'øn ja tyukmadowampy ja møjaa'dyøjkti. ² Ixyamnim idø'øn ja kyø'øm U'nk kugajpxy tø tkexy. Y'U'nk køjxp idø'øn ja Dios Teety ojts tuki'iyi tyik'øyi ja naajx jøts ja tsajp, jøts nay ja y'U'nk tø ttagidøjkiguixy køx kida'ak midi ja wyinaty tø tyik'øyi. ³ Ja Dios U'nk idø'øn tnanky'ejxip ja Dios Teety ja myøj'ajtin, jøts nay ja' ja tnanky'ejxip sa dø'øn ja Dios Teety t'ixy; nay ja'ats ja myøkwinmaa'ñ ja myøk'ayuujk tpatanaagyøjxp tuktsajp'agida'aky ja pikta'aky midi ja Dios Teety tø tyikøjy. Ja Dios Teety ja møøt yikutuky y'aga'ngyøj'øm jam tsajpjotp, ku adøm ja ya jawyeen tø x'ukyikpojkipiwaajchim.

Jawaani møj ja Dios U'nk, ka'ap ja ankilis jade'endi

⁴ Tø ja Dios U'nk jawaani møj wyimbidsimy jøts ja Dios Teety y'ankilis ne'egi ka', ja'agøjxp ku ja Dios U'nk tø tmidañ jawaani møj ja kutujk. ⁵ Jabi nijuunixi ja Dios Teety tkanimaay tu'uk ja y'ankilis yide'en:

Mets idø'øn n'U'nk'ajtpy;

øts mets ja juky'ajtin ti nmø'øy,

ni ja Dios Teety tkanimaamyi tu'uk ja y'ankilis:

Øts me n'u'nk'atp,

jøts øts me xeety'atp.

⁶ Yide'ents tø wyami ku ja myøjtu'umts U'nk tø xaniguejxyim ya naawiiñ:

Wan niduki'iyi øts ja n'ankilis mwindsø'øgiyi.

⁷ Ku ja y'ankilis tnimadyajkmi, yide'en ja Dios Teety wya'añ:

Øy øts ja n'ankilis o sa nnanky'ejxyit,

nayide'en sam ja pojin, uk sam ja jøøn yowin.

⁸ Kuts ja y'U'nk tnimadya'aky yide'ents ja tnimaamyi:

Xemikøjxp me Dios U'nk mgutujk y'ity;

tiy mets mgutujk ja mdiidyu'unin y'ity.

⁹ Mdsøky'ajtpy mets ja tyiiby jøts ka' x'ejxwa'añ ja ka'øbyi;

paty ja mDios Teety jawaani øy ja jotkujk'ajtin tø mmø'øyi,

jøts ni ka'ap jade'en o pøn tø yiktuñ.

¹⁰ jøts nayide'en wyami:

Mets Dios U'nk, tø xanibiktaajkiguixy tuki'iyi ku yø naawii'ñit tø xyikøjy,

jøts mgø'jotp ja tsajp tø pyidsimy.

¹¹ Køxtip naxtip yø', jøts mets xemikøjxp me mdañ.

Nayide'en yø yjattit sam wet pyachi;

¹² jøts mets ja xpøkjø'økt ane'eky ade'kxy, jøts jadigojk xyikjemyit xyik'øyt.

Mets idø'øn xemikøjxp jade'eñim m'ejtp, nijuuni xøøw mets mdsinaa'yin kyakixy.

¹³ Jøts nijuuni ja Dios Teety tu'uk ja y'ankilis tkanimaay:

Ya yikutuk n'aga'ngyøji'jy,

kunimts mets mmidsep nduktekpya'an'att.

¹⁴ Dios Teety idø'øn myidundip niduki'iyi ja ankilis, nayi Dios Teetyts kajxidip jøts tpuðøkidit pøn jaty ja nitso'ok'ajtin tkupøkwandip.

2

Ka'ap ja nitso'ok'ajtin ngamøjpiktaajkin

¹ Ja'agøjxp idø'on nyikmøja'am nyikøjxpa'am pøni sa tø nmadø'øyim jøts kidi ja nwinmaa'ñ nyiktigajchim, tu'ugyi ja nyikyø'øyim. ² Tø dø'on ja ayuujk yjanchwindiy midi ja ankilis ja israelit jaa'y tyukmadowdi, pøn jatyts ja tkabadundøø, yiktiidyundi ja', jøts ja ayo'on yikmøødyøø sam idø'on pyaat'atyiyi. ³ Pøni jade'endam ja yjajttøø, ¿sudsots adøm idø'on ndejint nga'ayo'ombaaajtindit pøni ka'ap adøm ja møy nitso'ok'ajtin nmøjpiktaajkyim? Jabi jawyeenxi ja nwindson'ajtim kø'øm tø tnigajpxy, pønts ja tpat-madoodidøø, tøts ja ayuujk ja jawyeen tiibyøkti jøts ja tø ttsøonidi, jitsnim øøts ja tø xukmadøy. ⁴ Tøts ja Dios Teety nayide'en kø'øm tyaky ja ejxpajt ku dø'on ja y'ayuujk ja wyindiy, ku ijxyimbi ka'ijxyimbi tyiknaxkida'aky, nayide'en ja Dios Espíritu Santo tø xmø'øyim ja møk'ajtin sam ja kija' tø xamidsøjkyim.

Nayide'en ja Jesucristo yjaa'yjajty sam ja myigu'uk naxwii'ñit jaa'y

⁵ Ja tsinaa'yin ja juky'ajtin midi memp ja'tp Cristo køjxp, midi øts ixyam nnigajpxy, ka'ap ja ankilistøjk ja mibaat tniwindsøn'attit. ⁶ Jabi yide'enxi ja David ja Dios Teety t'ajot'aty jøts ja tø tjaadyañ:

¿Tyimbyøn idø'on yø jaa'y'ajtp ku yø niwine'en xkaja'dyigøy?

¿Ti tyimbyøn idø'on yø naxwii'ñit jaa'y midi oo'kp tigøøpy ku yø xmijotigøy?

⁷ Tø yø waani x'atsyik'amutski jøts tø x'atmøjpikta'aky ja m'ankilis,

ixyamts ne'egi jawaani møy tø xmø'øy ja møj'ajtin jøts ja øy'ajtin,

⁸ jøts tuktsajp'agida'aky tyikutujkøxt.

Ku dø'on ja Dios tuki'iyi tø ttagidøjkiguixy ja jaa'y, niti dø'on ja tø tkayiktañ midi ja jaa'y kya'ana'amp. Ots ja yjade'eni, ka'anims adøm n'ijxyim ku tuki'iyi myimadooguixyi.

⁹ N'ijxyindipts adøm ja Jesús pøn ja Dios Teety waani tø t'atsyik'amutski, ni ja ankilis tø tka'atmibaat'aty. Tøts ixyam tmøøgyojmi ja møj'ajtin jøts ja windsø'jkin jawaani møj, ja'agøjxp ku ja o'jkin ja tø tkupiky, ku ja Dios Teety ja jade'en tø tyamidsøkyiyi jøts adøm ja xku'o'jka'ant.

¹⁰ Dios Teety køjxp tuki'iyi y'ijty, jøts tum ja' idø'on paat'ajtiyip; ja'ats ja Dios Teety chøjkpy jøts nayide'en ja y'u'nk ja myaay tpaattit ja øy'ajtin. Paty idø'on ja Dios Teety tø ttamidsøky ja nwindson'ajtim Jesucristo jøts ja y'ayo'owin jøts ja y'o'jkin jade'en ttuktabaja'ñaxy, sa dø'on ja naxwii'ñit jaa'y y'ejxidi tyiyidi, jits jade'en jawaani øy xukja'gyukant sudso ja nitsoojkin nbaajtint. ¹¹ Jabi nay ja'axi ja tyeety'ajttip pøn jaty tø pyojkpiwa'atsti, jøts nay ja'ats ja tyeety'ajtmip pøn yikpojkwatp. Paty ja Dios U'nk tkadatsø'ødyuñ ku adøm ja xmiga'axa'am, ¹² sam jap wya'añ nøkyjøtpy:

Mets Dios Teety idø'on nmimadya'akp ku øts ja nmiga'ax nmigajpxt,

jøts tu'ugyi øø wyinaty n'iy mets køjxp.

¹³ Jøts nayide'en jap jaabyety wyami:

N'awejx'etp øts ja Dios Teety.

Jøts abiky ñømgøjmi:

Ixyam ø møøt n'u'nk n'unajjk, midi øts ja Dios Teety tø xmø'øy.

¹⁴ Jade'en sam ja naxwii'ñit jaa'y ja juky'ajtin tmøøt'ajttøø, ja'agøjxp idø'on ja nwindson'ajtim Jesucristo yjaa'yjajty jøts jade'en ja o'jkin tkupøkt, jøts jade'en tmimajada'aky ja miku' midi ja o'jkin tniwindsøn'ajtp. ¹⁵ Jade'en ja nitso'ok'ajtin xuktajotkujk'ajttint jøts jade'eñi dø'on ja o'jkin nga'uktsø'jkiñant. ¹⁶ Wa'ats yikja'gyuki ku ja nwindson'ajtim ja' tkanimiñ jøts ja ankilis tpudøkit, jabi tum naxwii'ñit jaa'yxi ja ja'ayi ñimimpy, pøn teety'amøjkøjk'ajttip ja Abraham. ¹⁷ Ja'agøjxpts ja nayide'en yjaa'yjajty sam ja myigu'uk naxwii'ñit jaa'y, jøts jade'en t'ayo'ext sam nayide'en ja Dios Teety tpadun'ett, ku ja kyø'øm o'jkin ja ttayikpojkwatp'ach ja naxwii'ñit jaa'y. Ja'agøjxp idø'on ja amuum ndeety'ajtyindi. ¹⁸ Tø dø'on ja jawyeen ttanaxy ja ayo'on, ja winmaa'ñ, jøts

nayide'en yikxon tɔ yikwinmaa'ñ'ixy, paty idø'øn myayi ja pudøjkin pøn jaty nayide'en ya jajtip kubajtip.

3

Jawaani møj ja Jesús, ka'ap ja Moisés

¹ Kunuu'kxy mee migu'uktøjkti, meetspi dø'øn mbaat'ajtiyip jøts yikxon x'ejxtit ja Cristo Jesús, pøn tɔ nyiktaniguexyindi jøts pøn ndeety'ajtyindip, ja'agøjxp ku meets idø'øn ja Dios Teety tɔ mwi'ijxyidi jøts ja mja'atiyidit. ² Ejtp ja Jesús tiy ja Dios Teety tmimadøy pøni ti ja tɔ tyaguwaniiyi, sam ja Moisés nayide'en tu'ugyi tmiduun ja Dios Teety ma ja janchja'wibi jamdi. ³ Jawaani møjts ja Jesús ja wyindsø'jkin pyaadyi jøts nika' jade'en ja Moisés, nayide'en idø'øn ja tpaaty, sa jawaani møj yikwindsø'øgi ja tøjkojpi jøts nika'ap ja tøj jade'en. ⁴ Ots idø'øn ja jaa'y may yjadøjkojti, tum ja Dios Teety tuki'iyi tɔ ttanibiktaagi wine'en ijty tuktsajp'agida'aky. ⁵ Janch øy idø'øn ja Moisés yjatuun, ku ja janchja'wibitøjk ttukmadøoy ja Dios kyajpxy y'ayuujk, pøni ti dø'øn ja wyinaty tyunwampy ja Dios. ⁶ Tu'ugyits adim ja Cristo xpawinmaa'yim wine'en adøm njanchja'wa'am, ja'agøjxp ku ja tkøjø'ømit'ajtkixy, pø Diosxi ja' ja y'u'nk. Ja' tsojkip jøts møk ja winmaa'ñ nbiktaajkint, jits jotkujk n'aweixint ja øy'ajtin midi memp midi ja'tp.

Ja janchja'wibi pyoo'kxinxøwdi Dios wyingujkp

⁷ Paty yide'en ja Dios Espiritu Santo wya'añ, sam jap jaabyety y'ity nøkyijpxy: Pøni mmadøopy meets ja Dios Teety kyajpxy ixyam, ⁸ kidi jade'en mgujuun'atti sam ja jaa'y ttundi jam abak etjotp, ku tkagupøjkti ja Dios, jøts ja yujy'ajtin nugo ttaguyajtidi. ⁹ Jam øts idø'øn ja m'apteety m'aptaak xwinmaa'nmyøk'ejxti, øyi ja tja'ejxti tjanija'widi ja ijxyimbi ka'ijxyimbi wixijkxy jumøjt midi jaty øts jam njatungunajpxy. ¹⁰ Paty øts idø'øn n'atsemi'ambøjkti, winets ø nwaañ: "Ejtp mee mjadigøy m'anmija'wingøjxp, jøts ka' xtsojkti jøts øts ja nduu' xpaduujnidit." ¹¹ Ja' øts idø'øn ja ndami'ambøjkti, jøts ø nwandaajky ku kyatøkidit ma øts ja n'uktamidsojkti. ¹² Migu'uktøjkti, nay'ejx'etidim tu'uk jadu'uk, jøts xkamajsttu'uttit ja Dios ja yikjujky'ajtpi, jøts ja' ejtp xjanchjawidit. ¹³ Nay jaakjamnim ja xøow ja jumøjt, nagyajpxjot'amøjkiyidi xem yam jabom jabom, jøts ja pøky mgawin'øonidit, jøts ja Dios ejtp xmimado'odit. ¹⁴ Pøni tu'ugyi nyikyø'øyim ja janchja'win pøni sa ja tɔ nyiktso'ondaajkyim, kuwani ja Cristo møøt nbaajtin ja øy'ajtin.

¹⁵ Paty xja'myatstt ku ja ayuujk wya'añ:

Pøni mmadøopy meets ja Dios Teety kyajpxy ixyam, ka'ap nayide'en mgujuun'attit sam ja ttundøø pøn ja Dios Teety tkamimadoodøø.

¹⁶ ¿Pønts idø'øn ja Dios kyajpxy tjamadoodøø jøts ja tka'ukpadunidøø? Ja' dø'øn jade'en adøtsti pøn ja Moisés yik'awa'atspidsøøm jam Egipto etjotp. ¹⁷ ¿Pønts idø'øn ja Dios myijotma'jt wixijkxy jumøjt? Ja'ats idø'øn jade'en jajttøø pøn jaty pøkyundi, jøts ja jamiyi abak etjotp y'oo'ktøø. ¹⁸ ¿Pønts idø'øn ja Dios tyamiwandaajki ku ja kyatøkidit ma dø'øn ja Dios wyinaty tɔ y'uktamidsøkyidi? Ja' dø'øn ja'adi pøn tkamimadowdi ja Dios. ¹⁹ Ixyats adøm n'ijxyim, ja'agøjxp ja øy'ajtin ja tkapaattøø ku ja Dios ja tkamibøjktøø.

4

¹ Ka'anim ja tpaaty jøts adøm ja Dios Teety nmøøtnøjkxna'ant poo'kxpi, paty idø'øn tsø'øgi jawi ndsinaa'yinditnim ja ku wyinaty pøn nidu'ugin kyanaxy. ² Nayide'en adøm tɔ

nyiktukmadø'øyim ja nitsoojkin ayuujk, sam ja møjaa'dyøjk yjayiktukmadowdi; ka'apts ja ti øy'ajtin tpaatti ja kuxi ja tkamibøjktøø øy ja tjamadoodøø. ³ Adømts idø'on ja Dios Teety møøt nbaajtint ja poo'kxin ku adøm ja tømibijkyim, jabi yide'enxi ja Dios kø'øm tøm wya'añ:

Ja'agøjxp øts idø'on ja nmi'ambøjkti ku øts ja xkamibøjktøø, jøts øts ndyimñimy ku nijuuni xøøw xkamøøtpoo'kxtit.

Jade'en idø'on ja Dios wya'añ, øy ja wyinaty ja tyunk tøm tjayik'abajtyini ku ja wyinaty tuki'iyi tøm tyikojkixy, jøts t'agajpxujky jøts ja tpaattit ja poo'kxin pøn mimadoolip; ⁴ pø japxi nayide'en jaabyety y'ity ti dø'on ja Dios Teety tyuun kyiwixujk xøøw:

Poo'kx ja Dios kyiwixujk xøøw ku ja tyunk tyik'abajtyiñ.

⁵ Jøts nayide'en jap jaabyetyimi:

Ka'ap øts ja xmøøtpoo'kxtit pøn xkamibøjktip.

⁶ Ka'anim ja jaa'y ñiga'pxidi jøts tpaattit ja poo'kxaajk, øy ja tøm tjamadowdi ja nitsoojkin ayuujk, ka'ap ja poo'kxaajk ja tøm tpaatti ku ja tøm kyamadowdi; ⁷ paty ja Dios Teety jadu'uk ja xøøw ja et tøm tñigajpxy midi adøm ixyam n'ijxyindip ndsinaa'yindip, jabi Davidxi dø'on ja Dios kyajpxy yiktumpy ku ja wya'añ sa jap jaabyety y'ity nøkyijxpy:

Pøni mmadøøpy meets ja Dios kyajpxy ja y'ayuujk, kidi xkamibøkti.

⁸ Ku ja Josué jeexyip ja israelit jaa'y ja poo'kxin ti tmøøni, ka'ap ja Dios Teety jeexyip jadu'uk ja xøøw ja et tñigajpxy ma ja poo'kxin yikyakt. ⁹ Patyts idø'on y'aweix'ityiyi ja kunuu'kxy poo'kxin, niduki'iyi pøn ja Dios tjanchja'widip. ¹⁰ Pøn ja Dios Teety møøt pyøø'kxy, nayi tøm ja wyinaty ya naxwiñ tyikixy ja y'ødyu'unin. Jotkujk idø'on ja pyoo'kxnit sam ja Dios pyøø'kxy ku tyik'abajtyiñ ja tyunk tuktsajp'agida'aky.

¹¹ Kuwanits nmijotigø'øyindit jøts ja'abi poo'kxin nijum nbaajtindit, jøts nipøn tkabadu'unt ja jaa'y pøn tkamibøjkti ja Dios.

¹² Jabi xemikøjpxxi ja Dios Teety y'ayuujk y'ity, jøts jawaani wenk yiktsaachi myøk'ajtingøjxp, niti tsujx adsow jøpi jade'en kyayiktsaachi, ja kuxi tyimya'aty anmija'winjotp jøts jade'en tñanky'ijxyiyi pøni ti yiktunwamp uk yikwinmaa'ñ'ajtp.

¹³ Niti dø'on ja Dios tkayu'uchjawi, tyumnija'wigyijxpy ja' tuki'iyi jøts ja' idø'on wyinaty nwinguwa'jka'amp jøts ndsinaa'yin ndagidøjkant.

Ja Jesucristo idø'on tu'uk møjteetywindsøn

¹⁴ Ja Jesús midi dø'on Dios U'nk'ajtip, ja' adøm idø'on njawanimøjteety'ajtyindip, ja'ats idø'on ja Dios Teety tøm twinguwa'agi, paty adøm idø'on ja nDiosja'myajtsin møk nyik'ejtint. ¹⁵ Xja'gyuka'amp adøm ja Jesús midi dø'on møjteety'ajtp, ja'agøjxp ku ja tñijawi sa adøm ndsinaa'yim ya. Pøm tøm ja nayide'en ja ka'øwyinmaa'ñ yjayikmø'øy jøts ja tøm tkagupiky, jøts jade'en ja pøky tøm tkatuñ. ¹⁶ Tja'myejchims ja Dios, jøts wan tñinijxyim jotkujk jøts n'amido'owint pya'ayo'owingøjxp ja pudøjkin ma ngama-jadaajkyim.

5

¹ Wi'ijxy idø'on jam israel kajpkøjxp, tu'uk jadu'uk ja teety, jøts tøm yikpikta'aky jaa'gyudanaabyi, jøts ja jiyujk'øøky ja Dios ttawindsø'ogidit ttawinjawidit jøts idø'on ja jaa'y pyøky ñiwa'adsiyit jøts ja Dios tmaa'kxt. ² Kumi nayide'en yøm teetyti pyojkpitumbijaa'yidi, paty yøm tja'gyukidi pøn jaty tsuj kadsinaadyip jøts pøn jaty tundigøødyip; ³ ja'agøjxpts idø'on ja wyindsø'jkin tpikta'akti ku ja nayide'en pyojkpitumbijaa'y'ajtti, jøts ku ja jaa'y tkudanidi.

⁴ Nipøn ja kø'øm kyananktyeetypidsimy; ja Dios Teety idø'on ja møjtyip, jøts nay ja' idø'on tkunuu'kxp tkuwamp sam yiktuñ ja Aarøn pøn myidu'ukpi møjteety'ajti ja israelit jaa'y. ⁵ Nayide'en yjajty ja Cristo; ka'ap ja kø'øm ñankmyøjteetypidsøjmi, ja Dios Teety ja møjtyi ku dø'on ja ñimaajyi:

Mets idø'øn n'U'nk'ajtpy;

øts mets ja juky'ajtin ya tømø'øy.

⁶ Jøts ku nayide'en ja Dios Teety wyaamaa:

Mets idø'øn xemikøjxp møjteety'atp,

jøts jade'en mdunt sam ja Melquisedec ttuñ.

⁷ Møk ja Cristo ja Dios Teety twingajpxajky tminuu'kxajky ku ya chinaay naxwiiñ, jøts twinjiy twinyaajxy ja Dios Teety, midi tmøøt'ajtp ja kutujk jøts ja o'jkin tkapaatt tka'ext, jøts ja Dios Teety myadooji ku ja tu'ugyi yikxon t'ajot'aty. ⁸ Kuwani dø'øn ja Cristo ja ayo'on tkupøjki sam adøm, øy ja yjaDios U'ngi, kuwani ja tømanky'ijxyi ja mado'owin;

⁹ kuts ja jade'en tjajgyukiyi'ñ ja naxwii'ñit ayo'on, jade'ents tmibaat'ajty sudso ja yiknitsoojkin ka'pxy tmo'ot pøn jaty ja mimadojiyip, ¹⁰ ja'agøjxp ku møjteetywindsøn ja Dios Teety wyinaty tøm pyiktaajkniiy sam ja Melquisedec y'ijty tyety'aty.

Yik'ejxtip ja janchja'win ku ja jotmøñ yikmajtstutnit

¹¹ Kajaanim ja kyayiknigajpxy ya'atpi ayuujk ja'agøjxp ku meets yjawi xkaja'gyukiwya'añ, jade'en'ampyts inet idø'øn ja yjawi ngajatt sudso ndukmado'odit.

¹² Meetspik idø'øn jeexyip mdukyikyuujnidip ja mmigu'uktøjkti, kawinaak xøøw ja m'ixpøjkin xjayikyø'øñidi jøts ni jade'enbaat xkaja'gyukidinim ja ixpøjkin midi ka'mabaat chepi. Ne'egi jade'en meets yjawi mwimbejtni sam ja mutsku'nk ja'ayi ja che'tsknøø tkupiky, jøts ka'ap ja kaaky ja tojx ja ttsøky. ¹³ Maxu'ngin idø'øn ndejint wyinmay pøn tkaja'gyukipnim sudso n'øchinaa'yint, kuts ja nduk'ixpøkwa'anin midi niwyaani tsep ka'ap ja tkupiky, nayide'en idø'øn ja sam ja maxu'nk ja'ayi tkupiky ja che'tsknøø jøts ka'ap ja wenkpi jii'kxy. ¹⁴ Pønts tjajtnip t'ixa'at ja øybi uk ja kya'øybi, ja'ats ja Dios y'ixpøjkin tnijawiwyaangøjxp øy ja wine'en yjatsep jøts yikja'gyukit.

6

¹ Jade'en nyiktaa'nint pøni ti jaty jawyeen tøm nyiktukmadø'øyim, ku ja Cristo tøm njanchja'wa'am, jøts ja Dios yja' njaaknija'wigyojint jøts ja ja'gyukin nmøøt'ajtint. Ka'ap ja nugo ngajpxjimbejtint ngajpx'adøjint sudso nmajtstuujtint ja ka'øy chinaa'yin, midi ja o'jkin tukpatp, jøts sudso ja Dios njanchja'windit, ² jøts pøni ti dø'øn nøbajtin'ajtp, pøni sudso jaa'y tkunuu'kxy ja myigu'uk, jøts sudso ja jaa'y yjujkpyøktit jadigojk, jøts sudso ja tiidyu'unin y'ett. ³ Paty adøm nja'uknijawigyojint pøni ti jaty yiktukmado'owimp, pøni jade'en ja Dios xamidsøjkyim.

⁴ Ku pøn jaa'y tuk'ojkyi tøm ttajotkujktøki ja Dios y'ixpøjkin, ku ja Espíritu Santo tøm yikwijiidi yikejiidi ⁵ jøts ja Dios kyajpxy nekim tøm t'ukupøkti, jøts nayide'en tøm tyatøkiyidi ja Dios chojkin ja myøk'ajtin midi ixyam jøts midi xemikøjxp ejtp. ⁶ Pøni tøm ja tjajdyigøydi ja Dios jøts ja kyø'øm ka'øchinaa'yin ja tøm t'awimbetidi jadigojk, nisudso ja kya'ukjotimbejtnidit ku ja Dios U'nk ja kyiruspajtin jade'en nugo ttaguyajtidi, jits ja nugo o magama ttaxe'ekti. ⁷ Jade'ents ja yjatti sam ja naajx ku tyu'uy, y'uktichp nøø, kuts ja pikta'aky jam yikxon y'ity jøts ja tyikjotkujk'aty pøn jaty tøm ñe'epiti. Dios idø'øn ja kunuu'kxip ja naajx. ⁸ Kuts ja pikta'aky ja tkayik'ity, ku nugo ujts jøts kujp tyik'ity, tits ja wya'ant, ka'ap ja y'øyi. Mi'ambøjkipts ja Dios ja jøtsnim ja yiknitsa'att.

Jade'en idø'øn ndejint ja naxwii'ñit jaa'dyi.

Ja awejx'ajtin midi jotkujk xyik'ejtimp

⁹ Ots ø migu'uktøjk jade'en njakajpxy, njanchja'wipts øts, ku meets ja Dios tøm mgunuu'kxyiyi, ku tøm myikmo'odi ja nitso'ok'ajtin. ¹⁰ Pøm janch tiyxi ja Dios jits ka'ap ja mdajaa'dyigøyidit pøni ti jaty meets ja tøm xuujni, jøts ku ja tøm xuk'ejxti wine'enin ja xtsojkti, ku ja mmigu'uk midi nayide'en tjanchja'widip ja Jesús tøm xpudøkidi, midi meets ixyam mjaaktun'adichpñim. ¹¹ Ja'ats øø ndsøjkpy, jøts meets jade'en mdsinaa'yin xyikyø'ødyit jotkujk jøts tsuj, kunim ja øy'ajtin xpaattit midi m'awejxtip. ¹² Ka'ap øø

ndsøky jøts mee mnuux'ookt, ja' øø ndsøjkpy jøts ja jaa'y xpa'ejxtit pøn jaty ja øy'ajtin tpaattip y'awejx'ajtingøjxp ku ja Dios tjanchjāwidi.

¹³ Jade'en ja mōjaa'y Abraham yjajty ku ja Dios tyamini'adso'owiyi ja øy'ajtin. Kyø'øm jujky'ajtin ja Dios tyakajpx, ja'agøjxp ku wyinaty nīpøn jawaani mōj kya'ity; ¹⁴ xjats yide'en ja Abraham yiknimaay: “Ngunuu'kxp mets, jøts ja m'u'nk m'ap nyiknamayit.”

¹⁵ Tuda'aky ja Abraham ja t'awejx'ijty midi idø'øn ja Dios ñigajpx, jøts ja Dios ja myøøjyi midi wyinaty tō tyamidsøkyi. ¹⁶ Ku jaa'y tigati ttamøjtøkiwya'andi ttajanchtøkiwya'andi, ja' ja y'agajpxtip pøn jawaani mōj, jøts ja nīsa kya'ukyiknimaañidit. ¹⁷ Paty idø'øn ja Dios ojts ja kyajpxy tyimyiktañ, jøts ja yikjanchjāwit ja y'ayuujk, jøts ku ja tuki'iyi tpadu'unt pøni ti jaty ja wyinaty tō ttamidsøky ja jaa'y. ¹⁸ Majtsk idø'øn ja winmaa'ñ midi ja Dios myøøt'ajtpy jøts ka'ap ja taay'ajtingøjxp ttuñ; tu'uk ja wyandaajkin midi adøm idø'øn xamidsojkimp, jøts tu'uk ja kyajpxy y'ayuujk midi ja awejx'ajtin xmø'øyimp ku ja wyandaajkin ja tpadu'unt. Jade'ents adøm ja Dios xyikjotkujk'ajtyim, jøts n'awijxyimpts adøm pøni ti dø'øn xmø'øyimp. ¹⁹ Ya'at awejxin adøm idø'øn ja n'amija'win tu'ugyi xyik'ejtindip, sam ja kud#byajt tu'ugyi tyik'ity ja pikta'aky, midi'its adøm idø'øn nadyagumajtsa'amp jøts adøm ja Dios nbaajtint. ²⁰ Jam idø'øn ja møk y'ity tsajpjotp ma ja Cristo jawyeen tō tyøki jøts ja tuu' tyik'awa'atst, jøts idø'øn ja jade'en xemikøjxp tō tyañ mōjteetywindsøn sam ja Melquisedec.

7

Nayide'en ja Jesús tyety'aty sam ja Melquisedec

¹ Salemit windsøn idø'øn y'ijty ja Melquisedec jøts ja tsajpjotp Dios tnideety'ajtmi. Kuts idø'øn ja Abraham wyinaty ja myidsep tō tmimajada'aky ixats idø'øn ja Melquisedec ojts y'atspaatsøyi jøts kyunuu'kxi. ² Jøts ja Abraham tmøøy tukpiky ja majkpikpyi pikta'aky pøni ti jaty idø'øn ja wyinaty tō t'atspiky. “Ka'pxy tiidyumbi windsøn” idø'øn ja Melquisedec y'ayuujkpidsimy; kuts ja tniwindsøn'aty ja Salem kajp midi tyijpy “jotkujk'ajtin”, ixyats ja Melquisedec wyimbidsømni “ja windsøn pøn kyajp ttamidsojpk ja øy'ajtin jøts ja jotkujk'ajtin.” ³ Ka'ats idø'øn ja tyety tyaak ja pøn, ni myigu'uk; ku dø'øn ja ñanky'ejxpaajti, ni kyayiknigajpxmi ja kya'axin jøts ja y'o'jkin; paty idø'øn ja Dios U'ngin t'ixy, ja teety midi xemikøjxp teety'ajtp.

⁴ Janch mōjts idø'øn ja Melquisedec wyimbidsimy, ku dø'øn ja Abraham, midi adøm ndeety'amøjkojpk'ajtyindip, ja tmøøy tukpiky ja myajkpikpyi pikta'aky midi ja wyinaty tō t'atspøjkxi ja myidsep. ⁵ Jade'en ja Moisés kyutujk yjawa'añ jøts ja teety pøn yiktso'ondaajkidi ja Leví jøts t'amido'odit ja jaa'y tukpiky ja myajkpikpyi pikta'aky, øy ja tjamigu'ugidi, uk tu'ugyi tjakojpgk'atti ja Abraham. ⁶ Øts ja Melquisedec jade'en yjagateety'aty sam ja'adi pøn yiktso'ondaajkidi ja Leví, y'amidoow ja nayide'en tukpiky ja myajkpikpyi pikta'aky ja Abraham pøn wyinaty ja Dios tō tyamiwanda'agiyi ja øy'ajtin. Jøts ja Melquisedec tkunuu'kxy ja Abraham; ⁷ nīpønts sa kyawa'añ, ku ja yjawanimøji pøn kunuu'kxp, jøts ka'ap ja' pøn yikunuu'kxp. ⁸ Tum oo'ktipts ja jaa'y pøn ya naxwiiñ tukpiky ja myajkpikpyi pikta'aky yikmøødyip, ka'apts ja Dios kyajpxy jade'en tñigajpxy ku ja Melquisedec tō y'oo'kni, nømp ja wya'añ ku ja yjujky'atynim. ⁹ Nayide'en idø'øn n'ukwa'anint, øy idø'øn ja teetytøjk pøn ja Leví ñigubajk'ajtpy ixyam tjayikmukti tukpiky ja myajkpikpyi pikta'aky, kuwani dø'øn ndejint kø'øm tjagubajtmidi ja yjade'embī nay winet ku ja Abraham tmøøy ja yja' ja Melquisedec. ¹⁰ Ja'agøjxp idø'øn ja ndejint ja ttuñ ku ja tmøjnigojpgk'aty ja Leví pøn wyinaty kaka'xpnim naxwiiñ, ku ja Abraham ja Melquisedec pyaatsoji.

¹¹ Ja Levíit teety idø'øn midi ja Aarón yiktso'ondaajkidi, ja' idø'øn tmøødyi ja kutujk ja Israel kajp. Kudsik idø'øn jeexyip ya'atpi teety ttukpaattøø ja Dios pøn jaty ja kyutujk paduujnidip, ka'ats jeexyip chøjkyi jøts ja teety jadu'uk kyaxø'økt midi tkawindsøn'ajttip ja Aarón, jøts nayide'en tyety'attit sam ja Melquisedec. ¹² Kuwani dø'øn tyigach ja

kutujk ku ja teety tyigatsti; ¹³ ni tu'uknimts ja teety kyabidsimy abikyajpkøjxp, sam ja nwindson'ajtim Jesucristo midi dø'on jade'en yiknigajpxp jap nøkyijxpy. ¹⁴ Yiknija'wipxi ja' ku ja nwindson'ajtim Jesucristo tatskojpk'aty ja Judá, jøts ka'ap ja Moisés tyikutujky ku teety jam Judá etjotp pyidsø'ømdit.

¹⁵ Jawaani øyts ja ne'egi wyingaxi'iky, ku yiknijawi jøts ku ja Jesús ja jemdyeety'ajtin ñanky'ejxiyi, nayide'en sam ja Melquisedec. ¹⁶ Kyø'øm møk'ajtingøjxp ja Jesucristo tpaajty ja teety'ajtin, ja ku tmøøt'aty ja juky'ajtin xemikøjxp; jøts ka'ap ja pyidsimy jam jaa'y agujkp, pøn jaty idø'on paat'ajtiyip ja teety'ajtin, sam ja kutujk ja'ayi ttanibiktaagi. ¹⁷ Pø yide'enxi ja Dios Teety ja ñigajpxyi:

Mets idø'on xemikøjxp mdeety'atp,
jøts jade'en mdunt sam ja Melquisedec ttuñ.

¹⁸ Paty ja Moisés yjawyeen'ana'amín tø kyudigø, ku ja møk'ajtin tkayaky sudso yikpadu'unt; ¹⁹ jøts niwine'enin ja ka'øchinaa'yin tø tyiktigach. Ixyamts nmøøt'ajtyindi tu'uk ja jøp'ijxy'ajtin midi øy midi møj jøts midi ja Dios xukpaajtimp.

²⁰ Diosts idø'on kø'øm ja y'aaaw y'ayuujk tø tyaky jøts idø'on ja nwindson'ajtim Jesucristo xemikøjxp tyeety'att. ²¹ Ja abikpyi teety, ka'ap ja jade'en tø yiktamidsokti sam idø'on ja nwindson'ajtim Jesucristo tø yiktamidsøky, sam jap jaabyety nøkyijxpy wya'añ: Pøni tø ja Dios wya'añ ka'ap ja y'aaaw y'ayuujk ja tyiktigatst, ku ñimy:

“Mets idø'on xemikøjxp mdeety'ajtp,
jøts jade'en mdunt sam ja Melquisedec ttuñ.”

²² Paty idø'on ja Jesús jawaani tø myøjtøki, ku ja jawaani øy ja tyeety'ajtin midi tyajkp ja nitsoojkin. ²³ Yam janch namay ja jadu'ukpi teety, jøts tum jøpwetsti y'etti ku y'ookti, wenkpits ja tyunk tmidandip; ²⁴ ka'ats ja Jesús jade'en, nijuuni xøøw ja kya'øøky, paty ja tyeety'ajtin ja nipøn tkadukmidañ. ²⁵ Ja'agøjxpts idø'on ja jade'en xemikøjxp tyik'awa'atpidsimy pøn jaty ja Dios t'ixaadyip, ku ja xemikøjxp yjujky'aty jøts ku adøm ejtp xni'amido'owa'am.

²⁶ Ya'atpi teety'ajtpi adøm idø'on jeky tø n'awijxim; ja nwindson'ajtim Jesucristo ja' idø'on øyjaa'y pøn tkamøøt'ajtp ja ka'øwyinmáa'ñ, ni ja pøky, pøn ja pojkpitumbi jaa'y tø kyadapaadyi ja ka'øchinaa'yin øy ja tø tjamøøtsøøni, jøts pøn ja Dios Teety møøt yikutuky.

²⁷ Tø dø'on ja tu'ugyi ja Dios wyindsø'øk'ajtin tyika'pxi, ku ja ayo'on kø'øm tø tkupiky. Ka'ap ja jade'en tø ttuñ sam ja jadu'ukpi teetyti, pøn jabom ja Dios twindsø'jkidip jøts ja kyø'ømbøky yikmaa'kxtit, jøtsnim ix'oock ja jaa'y nayide'en tkugajpxti jøts ja pyøky ja wya'atstit. ²⁸ Tum naxwiil'ñit jaa'y ja Moisés y'ana'amín yikteety'ajtpy, pøn nayide'en ja pøky øy myimajada'agiyidit; tøts yø'øbi ana'amín kyugøxi jøts ja Dios Teety ja y'aaaw y'ayuujk tø tyaky jøts ja y'U'nk, ja nwindson'ajtim Jesucristo, tø tpikta'aky øy tyeety'ajtpi pøn xemikøjxp ja wya'ats'ajtin møøt y'ity.

8

Ja Jesús xkugajpxindip Dios Teety wyingujkp

¹ ¿Midi'ibits idø'on tsojkip yikxon ja'gyuki? Ja' idø'on ku adøm ja møjteetywindsøn nmøøt'ajtyim jøts ja jam tø y'ixa'aky Dios Teety y'aga'ngyøjø'øm yikutujkpi, ² jøts ja jam tyeety'aty tsaptøjkjotp midi ja Dios Teety kø'øm tø tkøjy, ka'ap ja jaa'y ja tø ttukyikøjy.

³ Windsø'øk'ajtin, tamay'ajtin, ja' idø'on ja teety tyundip, paty idø'on nayide'en ja nwindson'ajtim Jesucristo kuwani pyaat'aty jøts ja windsø'øk'ajtin tmo'ot ja Dios Teety.

⁴ Ku ja nay ya jeexyip chøøni naxwiil', ka'ap ja yjeexyip tyeety'aty, pø jaaxi teety ya pøn jade'en ttundip sam ja Moisés wya'añ. ⁵ Nugo agojnaxts ja abikpyi teetyti myidundip, tum ja' y'agojnax midi jam tsajpjotp. Ja'agøjxp ja jade'en yiknijawi ku Moisés ja Dios ñimaajyi, ku dø'on ja wyinaty tu'uk ja tsaptøjk tyik'øyiwya'añ, ku yide'en yiknimaay: “Yikxonim x'ext, jøts nayide'en pyidsø'ømt sam tø nduk'ixy kojpkøjxp.” ⁶ Ja øy'ajtin, ja

tiy'ajtints adøm ja nmøjteetywindsøn myidumpy, ja'agøjxp ku ja tkugajpxy tkudani ja øy'ajtin, midi adøm ja Dios Teety kø'øm tø xamidsøjkyim.

⁷ Kuk idø'øn jeexyip nisā kya'ejxi ja jawyeen kutujk midi ja Moisés ja Dios tukajpxnajxøø, ka'ats jeexyip jadu'uk chøkyi sam ja Cristo yja' tø tñanky'ijxyi. ⁸ Ja kuxi ja Dios tkaka'pxyjawi ja jawyeen kutujk sam ja kø'øm wya'añ jap nøkyijxpy:

Yide'en ja Dios Teety wya'añ: Me'emp ja xøøw ja jumøjt

ku øts ja Israelit jaa'y jøts ja Judajit jaa'y nmo'odit jadu'uk ja kutujk pøni kyupøjktip.

⁹ Ka'ap ja jade'en t'ext sam ja' midi tø njatumi møøt ja myigugajp, midi jekyip tsinaadyøø, ku øts ja nwaapidsømdi Egipto y'etjotp;

kumi ka'ap ja tpadundi, paty øts ja nmajstuttøø.

¹⁰ Yide'en yjaakwa'añ ja Dios Teety, yide'ents idø'øn ja y'ett, midi øts idø'øn ndunwajnip ja Israelit kajp:

Ndukja'gyukip øts ja øgyutujk ja'adi,

jøts øts ja y'anmija'wingøjxp nbiktaajkidit.

Ja'ats øts idø'øn niDios'attip,

jøts øts ja ngajp'attit.

¹¹ Ka' dø'øn pøn wyinaty ja myigu'uk niti tkadukyikyujti pøni ti dø'øn ja tyu'ump;

ja'agøjxp ku øts ja wyinaty ja møj ja mutsk tø nduknijawidi jøts øts ja niduki'iyi x'ejxkaptit.

¹² Nmaa'kxidip øts ja' ja kya'øchinaa'yin, jøts nijuuni øts ja pyøky ja nga'ukja'myajtsniyidit.

¹³ Ku dø'øn ja Dios Teety ja jemy ayuujk ja jemy winmaa'ñ tnigajpxy, mijaa'yinip idø'øn ja myijawyeembi kutujk; kuts ja tø myijaa'yini, pojin ja kyudigøøñit.

9

Ja naxwii'ñit tsaptøjk jøts ja tsajpjotpit tsaptøjk

¹ Jamts idø'øn y'ijty tmøøt'aty ja jawyeen kutujk sudso yikwindsø'øgit ja Dios jam tsaptøjkjotp midi ya naxwiiñ. ² Yide'en idø'øn y'øyyiñ ja tsaptøjk ya naxwiiñ, midi dø'øn jawyeen yikpatp ku ndøjka'ant, ja' idø'øn xyøøw'ajtpy Kunuu'kxy Et, japts idø'øn y'etti ja seri adøø'yin, jøts ja pøjkpajt mā ja kunuu'kxy chapkaaky y'etti. ³ Japts myimajtsk adiidyuky jixki'py tyañ, ja amaagyunuu'kxy et; ⁴ mā jap tu'uk ja altajr midi tum amuum oori mā kyøxøøy ja poom, jøts tu'uk ja mutskaaxi midi oori nimøch mā ja kutujk jap y'ity. Japts mutskaaxijøtpy tu'uk ja tu'jtsu'nk midi tmøøt'ajtp ja maná midi dø'øn yjøø'kxtøø ja israelit jaa'y jam abak etjotp. Nayi jap idø'øn kaaxijøtpy y'ijty ja Aarón ja tyajk midi ojts jadigojk xyimomy, jøts ja tsaa mā jap kyøjja'ayø ja kutujk ja ñi'ayuujk. ⁵ Jamts kaaxi ñikøjxp y'etti ja ankilistøjk ja y'agojnax, midi tyiknigaxø'ktip jøts ku ja Dios jam, jøts ja kyajnk ja ttanimu'uxti mā ja pøky y'ijty yikmee'kxy. Wants ya'at ja'ayi t'uknijawam.

⁶ Kuts idø'øn ja jade'en tø ttanibiktaagidi, winets idø'øn y'ijty ja teety tyøkidi jap mijawyeen tøjkjøtpy midi Kunuu'kxy Et yiktejp, jøts idø'øn ja windsø'jkin ja yikjujky'ajtpi t'atmo'odi pøni juuni ja kø'øm tsojkin'ajttøø. ⁷ Jøts idø'øn jap myimajtsk tøjkjøtpy midi yiktejp Amaagyunuu'kxy Et, tuk'ojkjyits ja winjumøjt ja møjteetywindsøn jap tyøki; ja jiyujk ni'jpy idø'øn ja myidøjkip midi y'atswa'xpy mā ja pyøky jawyeen yikmaa'kxt jøtsnim ja jaa'y yja' nayide'en. ⁸ Yide'ents idø'øn ja Dios Espíritu Santo xukja'gyukam ku dø'øn jap nipøn nugo kyatøki myimajtsk tøjkjøtpy mā txøøw'aty Amaagyunuu'kxy Et. Japyi ja midu'uk tøjkjøtpy ja'ayi xyumitøkidi. ⁹ Yø' adøm idø'øn n'ejxpajtin'ajtimp wine'enin naxwii'ñit jaa'y'ajtyindi, jøts nnija'wa'ant ku ja winmaa'ñ kyawa'ach øy ja wine'en ja wyindsø'jkin tjayika'pxtøø. ¹⁰ Ja' idø'øn ja wyindsø'jkin'ajttip sudso kya'adyit sudso y'uuktit, jøts sudso ñanky'øyyidit ñankchujyidit, sam ja møjjaa'y chinaa'yin tyikutuky. Niwine'enin ja anmija'win ja tkayikwa'ats'aty. Ja'ats ja jade'en tyungunajxtip kunim ja Dios kø'øm tø tyiktigach.

11 Tøts idø'on ja nwindson'ajtim Jesucristo myiñ, ja'ats idø'on ixyam tñimøjteetywindsøn'ajtp ja jemchinaa'yin midi ya tø tyañ. Jawaani øy idø'on jøts jawaani tsuj idø'on ja tsaptøjk mā dø'on ja tyuñ, ka'ap ja jaa'y ja tkøjy, paty idø'on ja kyanaxwii'ñit tsaptøjki. 12 Tø dø'on ja nwindson'ajtim Jesucristo ñaxy jap myimajtsk tøjktøtpy midi xyøøw Amaagyunuu'kxy Et, ka'ats ja t'ukmidøjkiñi ja mutsk chiibi ni'jpy jøts ja løjch ñi'jpy; kyø'øm ni'jpy ja myidøjkip tuk'ojkøjxp ja'ayi, midi adøm idø'on xemikøjxp tø xuktanitsøøjkyim. 13 Yikwachptsik idø'on y'ijty ja pøky ja tsigiduuri ni'jpy, jøts ja tsapaxuna'jk ni'jpy, jøts nayide'en ja tsigivaki jaam midi yiknitøødyip jam altajrkøjxp, ku dø'on ja y'ijty ñadyaninuugyidi nikijxy jøts ja pøky jade'en tyikwa'atswa'andi xjats ja kunuu'kxin ja jade'en tpattoø. 14 Pøni jade'ents ja', jawaani kajaats idø'on ja nwindson'ajtim Jesucristo ja ñi'jpy yikpøkwy'a'ach jøts kyunuu'kxy, pø patyxi ja Dios Espiritu Santo køjxp ñagyøyajkiyi pakwya'ach, midi ja Dios Teety kyupijky, jøts idø'on ja ñi'jpy ja tyikwa'atst ja ka'øchinaa'yin midi ja kudigø'øyin xukpaajtimp, jøts ja Dios jøts ja yikjujky'ajtpi jade'en nmimado'owin.

15 Paty idø'on ja Jesucristo møj yik'ajot'aty ku yjemgyutujk tø tyiktso'onda'aky, pø ja'axi ja kyu'o'jkip jøts yikpøkmyaa'kxtit pøn jaty tø pyøkyundi ku ja møjaa'gyutujk y'ijty tyuñim, jøts ja jaa'y tpaattit ja xemikøjxpit øy'ajtin, midi ja Dios Teety ttamidsøjkiyidip windi'ixip. 16 Jabi jade'enxi yiktuñ ku ja maay wya'kxy, jaanim ja wya'kxy ku ja jaa'y y'øøkñim. 17 Jøts ka'ap ja ayuujk mibaat nugo myøjtøkit pøni nay jujky'ajtpnim ja kumaay. 18 Kuwanixi ja ni'jpy ojts chuñ xye'kxy ku ja møjaa'gyutujk cho'ondaajky. 19 Ku dø'on ja Moisés wyinaty ja kajp tø ttukmadøy ja Dios kyutujk y'ana'amin, winets tñixajiyiñ tukmutsk øøxy ja ujts aay møøt ja tsajpts wet, jøts ttuktaxø'øky ja tsigini'jpy ja chiibi ni'jpy, midi nøø wyinaty møøt tø yik'adaamuky, xjats ttanixejtwidity ja kutujk nøky jøts niduki'iyi ja jaa'y nayide'en. 20 Winets wyaañ: "Ya'at ni'jpy idø'on tyikmøjtøjkip ja Dios kyutujk midi mee tø myiktamidsøky." 21 Tyanawa'jx idø'on ja Moisés ja ni'jpy nayide'en ja tsaptøjk, jøts tuki'iyi pøni ti jaty yiktundip, ku dø'on ja Dios ja t'atswindsø'øgidi. 22 Jade'en idø'on kyutukyi jøts ku ja ni'jpy tuki'iyi tyikwa'atst, kuts ja ni'jpy kya'ett ka'ats ja pøky yikmee'kxy.

Cristo y'ayo'ongøjxp ja pøky wya'ach

23 Paty idø'on chojki ja ni'jpy jøts wya'atstit ja pikta'aky jap tsaptøjkøtpy, midi y'agojnax'ajttip ja tsajpjøtpyit tsinaa'yin. Jawaani øy pyaat'atyiyi ja tsajpjøtpit'ajtin ja windsø'øgi, midi ja Cristo kø'øm tø ttuñ. 24 Jøts ka'ap ja Cristo jam tyeety'ajty tsaptøjkjøtp midi ya naxwiiñ ja jaa'y tø tkojti, jøts tsajpjøtpit tsaptøjk ja' nugo y'awanax. Jamxi dø'on ja tyimchajpjøtp tø tyøki, mā adøm ja ixyam x'agø'dujkyim x'axajtujkyim Dios Teety wyingujkp. 25 Tuk'ojkyi dø'on ja Jesucristo ja o'jkin tø tkupiky, ka'ap ja jade'en tø ttuñ sam ja jadu'ukpi teetywindsøndi midi dø'on y'ijty winjumøjt ja'ayi tmidøjkip ja ni'jpy jam tsaptøjkjøtp jøts ni tkakø'ømni'jpyi ja'adi. 26 Ka'ats idø'on ja Jesucristo jeexyip nayide'en ttumi, tøts idø'on ja jeexyip may'ojk y'oo'kni kuyip cho'ondaajky ja naxwii'ñit, ka'ats ja jade'en tø ttuñ. Ixja tø kya'pxy, ixja tø tyiy ja et ja naxwii'ñit, tuk'ojk ja o'jkin ja ja'ayi tø tkupiky jøts ja pøky tuki'iyi xemikøjxp tyikwa'atst. 27 Nayide'en sami jaa'y niduki'iyi tuk'ojk y'oo'kti, jøts yiktiidyu'unditnim, 28 nayide'ents ja Cristo tuk'ojkyi tø y'øøky, jøts may ja jaa'y tyikwaajtsit ja pyøky. Kuts idø'on wyinaty jadigojk ñanky'ejxpaadyiyi, ka'ap ja yikpøkwyatspi wyinaty y'ukmeni, ja' ja wyinaty ñimimpy pøn jaty ja awejx'ajtiyip.

10

1 Ja jemgyutujk idø'on ja' y'aga'ax ja nugo kutujk midi ja Moisés yiktaan, paty idø'on ja kyamajada'aky nijuuni. Øy ja jiyujk ja namay tjayik'ookti winjumøjt, ka'ats ja pøky ja tyikwa'ach. 2 Ku dø'on ja jeexyip ja pøky tyikwa'ach, jøts ja øchinaa'yin jeexyip tyaky, tuk'ojkyits idø'on ja jeexyip jade'en yjaty. Ka'axi ja jeexyip y'uknabyøkyja'winiyidi. 3 Kumi ka'ats ja yjade'eni pø ximija'myatstipxi ja pyøky ja'adi ku ja winjumøjt tjatundi

ja windsø'jkin, ⁴ ja'agøjxpts ja jade'en yjatti ku ja pøky ni ja tsigini'jpy ni ja chiibi ni'jpy tkayikwa'ach ni juuni.

⁵ Paty idø'øn ja Jesucristo ja Dios Teety tnimaay ku ya myiñ naxwiiñ:

Ka'ats xtsøky'aty jøts myiktawindsø'øgit ja jiyujk, patyxi øts tø xyikjaa'yjaty jøt øts ja ne'kx jøts øts ja ni'jpy tø xmø'øy.

⁶ Ka' myikjotkujk'aty ku ja jiyujk yjanitøøy, ni ja windsø'jkin midi jayiktump jøts ja pøky xmaa'kxt.

⁷ Winets ø nwaañ: "Ixam ø Dios Teety, jøts ø nbadu'unt pøni ti me nmi'ana'amwampy sa jap jaabyety nøkyjxpy y'ity."

⁸ Ku dø'øn ja jawyeen tø tnigajpxy ku ja Dios Teety tkadajotkujk'aty ja windsø'jkin ku dø'øn ja jaa'y ja jiyujk tjayik'ookti, jøts ku tigati tjayiktøømyidi jøts ja pyøky wya'atstít sam idø'øn ja yjagutujkyi. ⁹ Winets ja nwindson'ajtim Jesucristo wyaañ: "Ixam ø Dios Teety, jøts ø nbadu'unt pøni ti mdsøjkpy." Yikudigøøpyts idø'øn ja nwindson'ajtim Jesucristo ja jawyeengutujk jøts ka kyø'øm windsø'jkin ttawinguwijch. ¹⁰ Tøts adøm idø'øn ja Dios xkunu'kxyim, pø tøxi ja nwindson'ajtim Jesucristo xemikøjxp tuk'ojkyi ja ñine'kx tkøyaky midi idø'øn ja Dios Teety tø tmø'øy adømgøjxp.

¹¹ Tum jade'ents ja israelit teety tundinim, nay ja jiyujk ja tyawindsø'jkidip ja Dios, øy ja pøky ja ni juuni tjagayikwa'ach. ¹² Tuk'ojkyits ja Jesucristo ja'ayi tø y'øøky jøts adøm ja nbøkwyaaajtsindit, jøts ja jam tø y'ixa'aky yikutujkpi, Dios Teety y'aga'ngyøj'øm. ¹³ Jamts ja y'awixy kunim ja myidsep yikpikta'akt tyekyji'py jøts ja ttekpya'an'att, ¹⁴ pø tøxi ja tu'ugyi ja wyindsø'øk'ajtin ttamajada'aky ku ja kø'øm tø ñadyagidøkiyi ja Dios Teety, jøts jade'en xemikøjxp tø tyik'awa'atspidsimy pøn jaty ja kunuu'kxin tø tmø'øy. ¹⁵ Jøts ja Dios Espíritu Santots ja kajpxy nayide'en tyiktuu'yø'øpy tyiktuu'wejtsp ku wya'añ yide'en:

¹⁶ Midi øts idø'øn yø jaa'y ndamidsojkip, ku dø'øn ja xøøw ja jumøjt tpaatt, yide'en øts idø'øn ja wyinaty nduñ.

Ndukja'gyukip øts ja ngutujk jøts øts ja nbiktaajkit y'anmija'wingøjxp.

¹⁷ Jøts yjaakwa'añ:

Ka'ap øts ja pyøky ja wyinaty n'ukja'myajtsniyi, ni ja kya'øy'ajtin.

¹⁸ Paty idø'øn nja'gyuka'ant yikxon pøni tø ja pøky xemikøjxp yikmee'kxy, ka'ats y'uktsojkniiyi jøts ja Dios Teety njaaktawindsø'jka'ant o ti jøts ja xpojkipmaa'kxint.

Møk ja Dios janchja'win nbiktaajkint

¹⁹ Paty migu'uktøjk idø'øn ka' tsø'øgijawi nwingunøjkxindit ja Dios Teety jap tsajpjøtpy, pø tøxi ja nwindson'ajtim Jesucristo xkudsuna'am xkudajxa'am. ²⁰ Ja'ayi tsojkip jøts adøm ja nwindson'ajtim Jesucristo ja yjemdyuu' nguyø'øyint midi ttukpatp ja xemikøjxpit juky'ajtin, jøts midi ja nwindson'ajtim Jesucristo tø awa'ats tyiktañ kyø'øm y'o'jkingøjxp. ²¹ Ja nwindson'ajtim Jesucristots adøm idø'øn nmøjteetywindsøn'ajtyimp jam tsajpjøtp; ²² paty idø'øn tu'ugyi ja n'anmija'win nbiktaajkint ku ja Dios Teety n'ajot'ajtint, jøts tu'ugyi dø'øn ja janchja'win amumjoojt nmøøt'ajtint; pø tøxi ja xyikpøkwyaaajchim jøts adøm nga'uknabyøkyja'wiña'ant, tøts nayide'en ja nøbajtin nøø xyikwaajchindi. ²³ Yikxonimts idø'øn ja n'awejxint midi ja Dios tø t'agajpxuky ku adøm ja kyutujk ja tø ngupijkyim. Pyadu'ump ja' ja y'ayuujk. ²⁴ Ja' adøm idø'øn n'ixa'ayimp sudso xem yam nnabyudøjka'ant jøts nnachojka'ant. ²⁵ Ka'ap adøm ja jaa'y chinaa'yin nyikmøjtøjka'ant pøn jaty kamendip ku nnamyujkyandi Dios ajot'ajtpi, nagyajpxjot'amøjkamp adøm idø'øn ne'egi, ixa ja nwindson'ajtim Jesucristo wyingoni.

²⁶ Ku adøm kø'ømsojkingøjxp ja Dios yja' n'ixmajtsint, ka'ats ja maa'kxujkin yikpaatt, jabi ka'axi ja abiky yiknitsokpi y'ukmenit. ²⁷ Ja'ayits adøm njøp'ejxindip pøni jade'en adøm ndsinaa'yin, jøts ja Dios Teety ja myøktiidyu'unin nbaajtint, jøts xemikøjxp ja tø'øyin xmø'øyindit midi dø'øn pyaattip pøn ja Dios tmidsep'ajttip. ²⁸ Pø nayide'enxi y'ijty yiktundi pøn tkamimadoodip ja Moisés y'ana'amin, ku namajtsk uk nidigøøk ja

a'ejxnaxpi kyajpxti, kuwanits ja y'ijty y'øøky, niwine'en ja kyayik'ayo'ejxti. ²⁹ Jawaani kajaats ja pyaāt'atyidi ja ayo'on pøn jaty ja Dios U'nk nugo t'uktaa'nwidejtnidip, jøts ja y'o'jkin tka'ukmøjpiktaajkniiyidi midi tø yikpojkwā'achidi, jøts nayide'en ja Dios Espiritu Santo tø t'ukmigajpxigøøñidi yam ja yjaba'ayøyi. Pø ja y'o'jkinxi ja Cristo y'ejxā'anin'ajtpy ku dø'øn ja Dios Teety chojkin tø tnigajpxy, midi tø yjayikpøkwyā'achidi pøn ja ka'ukmøjpiktaajkniiyidip. ³⁰ Pø nnija'wampxi ku ja Dios Teety tø wyā'añ: “Øts xpaat'ajtp jøts øts ndagubattit ja pyøky; øts yø nmo'odip kija' ja y'ayo'on pøni wine'en yø pyaāt'atyidi.” Jøts nayide'en wyami: “Ndiidyu'ump øts ja ngajp.” ³¹ Janch kawinmaañi dø'øn ja y'ayo'on'ixy pøn ja Dios, pøn ja yikjujky'ajtpi tyukpatpy myøk'ajtingøjxp ja y'aki!

³² Kidi mee xja'dyigøy ku ja nwindson'ajtim yja' x'ejxidi jøts ja chinaa'yin xpadøjkidyøø, winets o sagasa xkujajtidøø ja mjanchja'win. ³³ Jam mee niwinaagin pøn ja mayjaa'y m'ejxidi ku myikta'oiti jøts myiktatsee'kti ja mdsinaa'yin, jøts nayide'en xajotmay'ookti ja mmigu'ukti pøn o sagasa yiktundip. ³⁴ M'ayo'ejx meets ja tsumyjaa'y, jøts mimadaajk meets ja jotkujk ku ja mbikta'aky tuki'iyi myikpøjkigyøxtøø, pø nnija'wipxi meets ku jam tsajpjtøp jawaani y'øyi xpaattit midi xemikøjxp etp. ³⁵ Wan ttuñi pøni ti tuujnip, awejx'et meets ja ejtp pøni ti ja nwindson'ajtim tø t'agajpxuky, myikmo'op meets ja kajaa. ³⁶ Tudā'aky ja Dios Teety y'ana'amīn paduñ tšøky, jøts ja tyakt pøni ti ja tø t'agajpxuky. ³⁷ Pø yide'enxi ja nøky wyā'añ:

Jawaani jaak'awejx'etti,

tsojk ja mye'ent ja nwindson'ajtim pøn ja øy'ajtin xmø'øyim.

³⁸ Midi'its øts idø'øn ngupijky, janchja'wingøjxp idø'øn t'awixy'aty ja øy'ajtin, pøni windsi'jkyts ja', ka'ats øts ja ndajotkujk'att.

³⁹ Ka'ats adøm nwindsi'jkyjaa'yandi midi pojin yikmimajadaktip, tum ja'abixi adøm pøn ja janchja'win ttajujky'ajttip, jøts jade'en ja n'anmija'win xemikøjxp nyiknitsoojkindit.

11

Ti dø'øn janchja'win'ajtp

¹ Ja' dø'øn janchja'win'ajtp ku amumjoojt tu'ugyi n'awejxint pøni ti dø'øn yikmø'øyim jøts ku amumjoojt nmibøjkint midi nga'ijxyindip. ² Ja yjanchja'win idø'øn ja ndeety'amøjtøjk yiktakajxajkti.

³ Ja janchja'win adøm xukmibøjkimp ku ja Dios ja tsajp ja naajx jøts tuki'iyi tø tyik'øyi y'ayuujkøjxp ja'ayi, jøts ja' midi ixyam n'ijxyindip ka'ap ja y'ity te.

⁴ Janchja'wingøjxp ja Abel øy ja Dios twindsø'jkøø, yam ja Caín kajade'en, paty ja Dios ja Abel tkupijky jøts ja'agøjxp ja wyindsø'jkin tkupøjki. Ots ja Abel tø yja'oo'kni, tø ja ejxpajtin ja xemikøjxp tyiktañ ku ja janchja'win ja tmøøt'ajty.

⁵ Janchja'wingøjxp ja Enoc yiktaniwawi ja xemikøjxpit tsinaa'yin øy ja o'jkin ja tjagapaajty, jøts ja tka'ukpatnidi ku tja'ixaadyøø pø tøxi ja Dios ja wyinaty pyawa'anii. Yide'ents jap nøkyijxpy wyā'añ ku ja Dios ya naxwiiñ tyikjotkujk'ajty. ⁶ Janch tsepts jøts ja Dios nyikjotkujk'ajtint, pøni ka'ap ja janchja'win yikmøøt'aty, ja kuxi ja Dios yikpaatwa'añ, jawyeen idø'øn ja njanchja'want ku dø'øn ja jaa, jøts ku ja nayide'en tkunuu'kxy pøn jaty ja ixaajyiyip.

⁷ Janchja'wingøjxp idø'øn ja Noé ja Dios tmibijky, jøts tmimadøøy ku ja tyukmadooji pøni ti jaty idø'øn tunwajnip wyinaty, o dø'øn niti kyagaxi'ikñim, jøts ja barki tyik'ø'yiyi'ñ midi yiknitso'ogip wine'enin jam tyøjkjotp yjaa'y'atti. Ja yjanchja'win ja tyamø'ajt jøts ja ttuk'ijxy pøn jaty ja pøky ttunk'ajttip, jøts nay ja'agøjxp ja Dios tyaxonda'agyi.

⁸ Yjanchja'win ja Abraham yikmadooji, ku ja Dios ojts myigajpxyi jøts ja kyajp tmajtstuupty, jøts tnidsø'ñ ja naajx ja et midi ja Dios ttamidsojki, øy ja tjaganijawi pøni ma dø'øn ñijxy. ⁹ Ja'agøjxp idø'øn ja Abraham chinaay jam etjotp midi dø'øn ja Dios ttaniwaadsojyi ku janchja'win ja tmøøt'aty, jøts jabyøø'kxyin ja jam chinaay. O magama ja tyøjk tkojwidettøø sam ja tuu'yø'øbyidi. Jøts nayide'en ja y'u'nk Isaac møøt ja Jacob

ttundøø, jabi nayide'enxi ja Dios ja tyamiguy'ejxidøø ja naajx ja et. ¹⁰ Ja'agøjxp ja jade'en ttuun ja Abraham, ku tjøp'ijxy'aty ku tyukpaattit ja kajp midi ja Dios køøm yik'øyip yikpaadip, ja tsajpjotpit kajp midi tu'ugyi etp.

¹¹ Nay ja janchja'win ojts ja Sara tyukmibiki ku ja tu'uk ja y'u'nk tpaatt øy ja wyinaty tø yja'amøji kyidakni. Pyaajt idø'on ja y'u'nk ja ja'agøjxp ku tjanchjaa'wiyi'ñ jade'en sa ja Dios ñimaajyøø. ¹² Ots idø'on ja ñiyaa'y Abraham yjadyimyøjaa'yini, ojts idø'on tnigojpkteety'aty janch namay ja naxwii'ñit jaa'y, ejxim maadsa', uk ejxim pu' mejy'agøøm kyamachooni.

¹³ Tum oo'køjxtits yø jaa'y, ixa jade'en tø yikja'myatsti, jøts nika' ja ya naxwii'ñ yikmøgyijxy pøni ti jaty ja Dios wyinaty tø tni'adsowi; ttuk'ejxidits ja jagamyi ja yjanchja'win midi ja Dios yakwanguijxy jøts jade'en ttaxondaktøø, jøts ja jade'en tnankñija'widøø ku ja ya naxwii'ñ nugo ñaxti. ¹⁴ Pønts jade'en ttundip, y'ixaadyipnim idø'on ja' tu'uk ja kajp ma tu'ugyi chinaañidit. ¹⁵ Kuk ja ttajotmay'oo'knidi ja kyajp midi yiktandi, wimbejtitsik ja jadigojk nay jam. ¹⁶ Kumi øgyajpts ja jawaani ja chojktip midi dø'on jam tsajpjotp, paty ja Dios jam a'ejxi abaadi tyik'ity tu'uk ja kajp jøts ka'ap ja tyatsø'dyuniidi, kajpja'wiyidip ja'.

¹⁷ Nay ja janchja'win ja Abraham ja Dios ttukmimadoozi ku myøkwimmaa'ñ'ejxyi jøts ja tyu'umts majnk y'amidoozi jøts ja Dios ja ttuktawin'oogit. Tø ja Abraham wyinaty tkupiky jøts ja tyu'umts majnk twindsø'jkin'att, o dø'on ja Dios køøm wyinaty tø ñii'mxyi: ¹⁸ "Yø Isaac mets idø'on myikmayiyip." ¹⁹ Ja'agøjxp idø'on ja Abraham jade'en ttuun ku ja twinmay ku ja Dios myø'ajtin myøzi jøts tyikjujkyøkt ja oo'kpi jaa'y. Oo'kpi agujkpy idø'on ja Abraham ndejint ja y'u'nk wyimbijty jadigojk øy idø'on ja yjaga'øøky.

²⁰ Janchja'wingøjxp ja Isaac t'agajpxuujky ja kunuu'kxin midi ja y'u'nk Jacob jøts ja Esaú paadidip. ²¹ Jøts ku ja Jacob wyinaty y'ookwani, janchja'wingøjxp idø'on ja ttami'awa'anii'ñ jøts ja José y'u'nk y'una'jk tpaattit ja kunuu'kxin. Xjats ojts winda'aky t'ajot'aty ja Dios jøts ja tyajk ojts ñadyagudijyiyi. ²² Janchja'win ja José yikwajni, kuk ja israelit jaa'y pyidsø'ømdit Egipto y'etjotp, jøts tni'ana'ami sudso ja pyajk yiktu'unt.

²³ Janchja'wingøjxpts ja Moisés ja tyeety tyaak yu'uch yik'ejttøø tigøøk po'; ja'agøjxp ku t'ejxti ku ja janch tsuj jøts ka'ap tsø'jkidyøø ja windsøn kyutujk pøn wyinaty tø ñimy jøts ku tuki'iyi ja mutskuna'jk y'ooktit. ²⁴ Jøts nay ja janchja'win ja Moisés kaduktsojki jøts ja Egipto windsøn ñøøx ja taak tejt ku wyinaty tø yaa'dyøjkjatni. ²⁵ Nugo ku ja nayide'en tkupijky pøni sa jaty ja myigu'uk israelit jaa'y yiktundi, jøts ka'ap ne'egi nugo ttaxøøñ ja naxwii'ñ'ajtin midi naxp midi tigøøpy. ²⁶ Jade'en ja wyinmaa'y ku ne'egi jawaani øy jøts ja Cristo o sagasa tmijatt, midi dø'on yiknigajpx me'emp, ka'ap ja tmøjpiktaajky pøni wine'enin jam ja meen jøts ja pikta'aky Egipto; ja' y'awijxpy midi ja Dios mo'ojip. ²⁷ Ja janchja'win ja Moisés yiktsoo'nøø jam Egipto etjotp, ka'ap ttsø'jkii'ñ ja windsøn y'aki, nugo ku ja tpadunguixy ja y'øwyinmaa'ñ ejximdam ja Dios ja jeexyip tyimy'ixy.

²⁸ Janchja'wingøjxp ja Moisés tyiktso'onda'aky ja paski xøøw ku tyikutujky jøts ja israelit jaa'y ja ni'jpy ttawinja'adit ja tyøjk'agaj, jøts ja yjagyoozi majnk ka'ap ja Dios Teety y'ankilis yik'oogidit sam ja Egipto jaa'y y'ajttøø. ²⁹ Janchja'wingøjxpts ja israelit jaa'y ttanaxti ja Tsajpts Mejy ejxim jaa'y yø'øy tø'øts naxkøjxp; kuts ja egiptit jaa'y nayide'en tjatunwandøø winets ja ñøjøø'kxti niduki'iyi.

³⁰ Janchja'wingøjxpts ojts ja Jericó kajp ja ñawaap kyidaagijxy, ku ja israelit jaa'y wixujk xøøw ja kajp tni'awidejttøø. ³¹ Jøts nayi janchja'wingøjxp ja Rahab, ja ka'ødyø'øxyøjk, ojts møøt kya'øøky pøn tkamimadoodip ja myigugajp, ku ja wyinaty øy tsuj tø twindsø'øgi ja israelit jaa'y pøn kajptøjkidi ejxpi koobi.

³² ¿Ti jaty ø njaakmadya'akp? Ka'ap ja et ja xøøw ñibaadi ku ø nnimadyaktøkit ja Gedeón, ja Barac, ja Sansón, ja Jefe, ja David, ja Samuel jøts ja jaa'dyi midi y'ijty ja Dios y'aaw y'ayuujk'ajtpy ku ti tnigajpxwa'añ. ³³ Janchja'wingøjxp idø'on yø tø tmimajada'akti ja wenk kajp, jøts tiy øy tø kyudunk'atti jøts ja Dios ja pyudøjkin tø tpaatti

sa ja wyinaty tō tni'adsowi. Ja mōj kaa jadi'iñi tō t'apanmujkidi ja y'apajk, ³⁴ jōts ja mōj jōñon nayide'en tō tmimajada'akti, jōts tsujx kumy tō kya'ookti. Jōts tō yjotmōkpōkti pōn kajotmōkti, jōts ja y'awa'ambi midsep tō tmimajada'akti. ³⁵ Jam idō'ōn ja tō'ōxyōjk pōn janchja'wingōjxp ja ñiya'y tō t'ejxpaatti jadigojk jujky.

Mayts y'oo'kmidi ayo'on agujkp, jade'en idō'ōn ja ne'egi ttsoktō jōts ka'ap ja Dios yja' t'ixmajtsidō ja'agōjxp ku ja t'awejax'atti ja jujky'ajtin xemikōjxp. ³⁶ Jōts may nayide'en yikxon tō yiktaxe'ekti jōts tō yikwopti, jōts ja pujxkuwōñ tō yikpitaajkidi jōts tō yiktsumdi. ³⁷ Jōts nayide'en tō tsaaga'ach y'oo'kmidi, uk tapoodits, jōts tō yikmōjwinmaa'ñ'ejxti, jōts tsujxkōjxp tō y'oo'kmidi; jōts ja borreegi'ak jōts ja chiibi'ak yik'ayowim tmiwidejttō, o sagasa ja ayo'on tpaattō. ³⁸ Ja'abi jaa'y idō'ōn tō wyidetti abak etjotp, kojpkōjxp, jōts tsaa ankjōtpy, tsaa jutjōtpy. Niwine'en ja naxwii'ñit jaa'y ja'abi jaa'y kyapaat'atyiyi. ³⁹ Ots idō'ōn yō ōy tsuj tō yik'ejxti yikpaatti ku janch mōj ja yjanchja'win, ka'ap yō ti tō yikmo'odi pōni ti dō'ōn ja Dios tō t'uknigajpxy; ⁴⁰ pō tōxi ja ttanibiktaagi kō'ōm jawaani ōy jōts ja y'ōbyidsō'ōmdit adōm mōōt.

12

Ja Jesús adōm n'ejxpajt'ajtimp

¹ Janch mayts adōm ja jaa'y ñija'wa'andi pōn jaty ja janchja'win tō tmōōt'atti jōts ja tō tñankñigaxi'igyidi. Wants adōm tmajtstuujtina'am tuki'iyi pōni ti jaty xyikjotkōjximp, jōts ja pōky nayide'en nmajtstuujtint midi yjawī xyikpak'amujkna'amp, jōts yikxon njaakpadungojndit tuda'aky ja ōchinaa'yin. ² Ja Jesús adōm n'ejxpajt'ajtimp pōn ja janchja'win tyajkp jōts pōn nayide'en tjaakyik'ōyip jōts tjaakyiktsujip. Tō ja Jesús jam kruskōjxp y'ōōky, ots ja yjatsō'ōdyuñ, ja'abi o'jkin ka'ap ja tō tmōjpkita'aky, pō ñija'wipxi ja' ku ja ayo'on ja ttanaxt jōts ja tpaatt ja jotkujk'ajtin ja xondaajkin; jōts ja tō y'ixa'aky yikutujkpi mōōt ja Dios Teety jam y'aga'ngyōjō'ōm.

³ Paty mee kidi mjotkixy ni mga'amutskidit, ja Jesús meets ja'myats jōts ja xni'ejxu'uttit ku pojkpitumbi kyōjō'ōm kawinōñon tō y'ayo'ombaaty. ⁴ Ka'anīm meets ja pōky xmōōtseptuñ jōts xkudaxit. ⁵ ¿Uk tō meets idō'ōn ja xja'dyigōōñi sa adōm Dios Teety y'u'ngin xja'ane'emyindi? Pō yide'enxi jap jaabyety nōkyijxpy:

U'nk, kupōk ja ayo'on midi ndaniguejxpy jōts mdsinaa'yin xyiktigatst, jōts kidi x'ayooji ku me n'ojt.

⁶ Pō tum ja'axi ōts ja chinaa'yin tigach ndamidsōjkpy pōn jaty ō ndsōjkpy, jōts ja ayo'on nmō'ōy pōn jaty n'u'nk'ajtpy.

⁷ Midani meets idō'ōn ja ayo'on, pō ja'agōjxpxi meets ja Dios ja mmō'ōyi ku y'u'nk y'una'jkin mdsōkyidi. ¿Uk jaa dō'ōn ja jaa'y pōn nijuuni ja tyeety tō kyakajpxwijyi?

⁸ Pōni ka'ats meets ja Dios mgajpxwijyi sami dō'ōn ja y'unk y'una'jk ja ttamidsōjky, mga'u'nktejpts meets idō'ōn ja', wenk u'nk meets ja mdijyi. ⁹ Nayide'enxi mutskyi ja ndeety ndaak tō xkajpxwijyindi, jōts adōm ja y'ijty ōy tsuj nmigajpxyindi, yayits ja y'ana'amīn ja yjatundi naxwiiñ. ¿Sudsots adōm idō'ōn ja Dios Teety midi jam tsajpjotp ngagupōjkint ja kyajpxwejin? Pō ja jujky'ajtinxi adōm ja xukpaatwa'animp.

¹⁰ Ja'ayi adōm ja ndeety ndaak xakajpxwejin pōni sudso dō'ōn ja tja'gyukidi ku ja tsinaa'yin tyiyi ya naxwiiñ; kuts ja Dios x'ane'emyindi, tiyts ja y'ane'emy, jōts ja' ja xani'ana'amīndip sudso ja wa'ats'ajtin nbaajtin nayide'en sam ja'. ¹¹ Nipōn ja ayo'on tjanchjagatsōky ku ja yikpaaty, janch mōk ja yikjawi; pōnts ja ayo'on pōnts ja kastigi tpattip, ku wyejti kyajti, ja'ats idō'ōn ja chinaa'yin tiy tsuj tyikyō'ōdyip, ka' ti, ka' sa, ka'ap ja tsep.

Ja ayo'on ku ja Dios kyajpxy kyayikmīmadōy

¹² Yikmøkpøkti mgø' mdeky pøni tø ja y'anuu'kxyinidi. ¹³ Ixa'adi ja tiy'ajtindi jøts ja mmigu'uk pøn ja yjanchja'win kamøktinim mba'ejxyidit jøts ja kyatuu'tigø'ødyit, jøts ja jade'en ne'egi yjotmøkpøktit.

¹⁴ Øy tsujim ja mdsinaa'yin xyikyø'ødyit, tuda'aky ja jaa'y niduki'iyi møøt mdsøonidit; ku wyinaty jade'en mgajaa'y'atti sudso ja Dios x'ejxtit, pø ka'axi jadi'iñi nugo ñiyik'ixy ñiyikpaaty. ¹⁵ Yikxonim wanidi, ejxim xka'ukpatnidi ja kyunuu'kxin midi ja Dios pya'ayo'ajtingøjxp mmo'owajnidip, øy ja jade'en tø yja'ukwa'añ ku ja mbudøkiyidit; kidim ta'am ujtsin mnabyikta'agyidi midi pa'amdump jøts ni xkayiktsokmi ja mmigu'uk. ¹⁶ Kidi nugo mnamyøøt'atyidi pøni ka'adam ja xniyaa'yidi xnidø'øxyidi, tum ja Dios yja' ne'egi mjotmay'attip; kidi Esaújin xundi pøn nugo y'u'nk ttaguyajt ja yjagyooi, tuktey ja tokx ja'ayi ttagugøøy. ¹⁷ Mnijawidipxi ja nayide'en ku ja Esaú ja tyeety kya'ukmøø'ñiyi ja kunuu'kxin ku ja tja'uk'amidoona; øy ja wyinmaa'ñ ja tja'uktayaaxnaa ni sudso ja kya'ukyikmøø'ña ja kunuu'kxin.

¹⁸ Ka'anin meets idø'on ja Dios myøk'ajtin nayide'en xpaajti sam adøm ndeety'amøj t'ejxti ku ja kojpk Sinaí ñitøøwyidity. Ni ja xaachkoots meets xka'ijxñim ma ja anaaw ja widsuk adsø'jkibim wyidity, ¹⁹ jøts nayide'en ka' xmadowdinim ja pujxujx midi yjawi xyiknajtimp ku ja nmado'owint, jøts nika' ja ayuujk tø xmadowdinim janch møk midi dø'on kyamidanaadyi ja jaa'y jøts yjanuu'kxaknidi, jøts jade'en jya'ukyikmigajpxnidit. ²⁰ Ja'agøjxp idø'on ja jade'en ku ja adsø'jkibim ja kutujk yikmøødyi midi wamp: "Pøni pøn yø kojpk tyømpy pyatpy yika'tspa'ookp inet ja', uk yikumba'ookp øyi yajiyujki." ²¹ Janch adsø'jkibim idø'on ja t'ejxti tuki'iyi, ja sa Moisés paat kø'øm wyaañ: "Xjanchyikmibejpnip øts ya'at et."

²² Ka'ats meets, ja Dios kyunuu'kxy'et jade'en tø xpaatti, jabi jotkujkxi meets ja Dios ja yikjuyk'ajtpi y'øy'ajtin tø x'ejxi møøt ja y'ankilis kamachooni ²³ pøn ja Dios twin'øøgunajxtip. Tøts nayide'en xpaatti pøn ja Cristo tø tjanchja'wimyidi pøn ja ñitso'ok'ajtin abaadi awejxnidip. Ja Dios meets idø'on tø xwingunøjkxidi midi dø'on niduki'iyi ttiidyungøxp, jøts ja øyjaa'y'oo'kpi y'anmija'win midi ja Dios jam møøt chinaañidi, nayide'en meets ja møøt ja winmaa'ñ xyikyø'øñidi. ²⁴ Jøts ja Jesús tø xpatmidi pøn jam Dios Teety wyingujkp xkugajpxindip pøn ja ñi'jpy xnitanaa'yindip. Ka' xukpøky'ajtyim ja y'o'jkin, ja maa'kxujkin ja ne'egi yajkpy jøts ka'ap ja Abel y'o'jkin jade'en.

²⁵ Paty idø'on yikxon x'ejxtit jøts ja kyajpxy y'ayuujk xku'oojkidit, pø kuwanixi ja y'ayo'ombaatti pøn jaty ja Dios kyugajpxy tkamimadoodøø. Jawaani kajaats adøm xpaat'ajtant ja ayo'on, pøni ka'ap adøm ja Dios kyajpxy nmadooja'am ku adøm ja tsajpjotp kø'øm xjamigajpxyim. ²⁶ Ojts idø'on ja møk ujk ñajxy ku ja Dios kyajpxy jam Sinaí kojpkøjxp. Yide'en ixyam ja y'ayuujk wya'añ jadigojk: "Ku øts wyinaty jadigojk ja ujk nyikmiñ ka'ap ja naajx ja'ayi y'adø'øtst, nayide'enxi ja tsajp y'adøtsmit." ²⁷ Ku dø'on ja Dios wya'añ ku tyik'adø'øtst ja'ayi jadigojk tuki'iyi, ja' idø'on ja tyijpy ku ja tuki'iyi tyikudigø'øty midi jaty jawyeen tø tyik'øyi. Ka'ats ja sa yjattit midi xemikøjxp ja chinaa'yin tø yiktanibiktaagi. ²⁸ Ja'abi øy'ajtints adøm idø'on ja Dios tø xamidsøjkyim, ka'ats idø'on ja nijuuni sa yjatt, xemikøjxp idø'on ja y'ett. Paty adøm ja Dios ngajxajkint, jøts øy tsuj nwindso'jka'ant pøni sa dø'on ja pyaat'aty jøts pøni sa dø'on ja ttsøky; ²⁹ pø ja' kuxi adøm ja nDios jade'en yikwindigøy sami jøøn.

13

Sudso tsinaa'yingøjxp ja Dios nwindso'jka'ant

¹ Kidim xja'dyigøydi, ejtpim mnachokidit xem yam Cristo køjxp. ² Kidim xja'dyigøydi, jøts ejtp xtøjkmo'odit pøn jaty mdøjkjotp ja'ttip, pø mayxi jade'en tø yjatti ku ja jabyøø'kxy ja tyikpoo'kxti, ja Diostam idø'on ja y'ankilis ja yikpoo'kxtip øy ja tjaganijawidi.

³ Nayide'en ja tsumyjaa'y xja'myatstit ejximdam meets jeexyip mdsummy. Ja'myatsti pøn jaty ja chinaa'yin tø tkuwanjatidi jabi mnija'widipxi pøni sa dø'øn ja'abi ayo'on.

⁴ Yikxonim x'ejx'ettit m'amajstk'ajtin jøts øy tsuj mnamyøøt'atidit, tyidyumpy ja Dios ja wyinaty pøn jaty namyøøt'atidip jadi'iñi yam ja tkaniyaa'yi uk tkanidø'øxyi.

⁵ Kidi ja meen ni ja pikta'aky nugo mganadyapikmyo'ojidit; tajotkujk'atti pøni ti jam mmøøt'ajttip pø tøxi ja Dios wya'añ: "Ni juuni me ngaja'dyigø'øty, ni nga'ixmatst." ⁶ Paty adøm nwa'anint jotkujk:

"Ja ndeety'ajtim øts idø'øn xpudøjkip,

ka'ap øts ja ndsø'øgit pøni sa xunwa'añ tu'uk ja jaa'y."

⁷ Kidi xja'dyigøydi pøn jaty tø mgajpxwijyidi jøts ja Dios y'ayuujk tø mdukmadøydi; pawinmaydi sa ja chinaa'yin tø tyikøxti tyikubatti, jøts tundi jade'en sa ja yjanchja'win ja'adi.

⁸ Tu'ugyi dø'øn ja Jesucristo y'ity, nay ja' jekyip, nay ja'ats ixyam, nay ja'ats wyinaty xemikøjxp ejtp. ⁹ Paty idø'øn xkamibøktit pøni ti jaty abiky jøts tigach mjayiktuk-madoodip. Dios y'øy'ajtingøjpxxi ja anmija'win y'øy'aty jøts ka'ap ja ja'agøjxp ku yik-paduñ sudso kya'pxy ja ka'ayin ja uujkin, jabi ni juunixi ya'atpi tsinaa'yin ja øy'ajtin tø tyukpaadyidi pøn jaty ja øy tjanchjabadundip.

¹⁰ Jawaani øy adøm nwindso'jkin jøts ka' mibaat twindsø'jkin'attit ja møjteetywindsøndi pøn ja møjaa'gyutujk tyiktundipnim. ¹¹ Ku ja møjteetywindsøn tyoxti ja jiyujk ni'jpy Amaagyunuu'kxy Tøjkjotp jøts ja pøky wya'atst, kajp pa'am ja jiyujk nine'kx ja tyiknøjkxti jøts ja jam tyiknitøødyi. ¹² Nayide'ents idø'øn ja Cristo kø'øm y'ø'jky kajp pa'am jøts ja naxwii'ñit jaa'y ttagunuu'kxy ja kyø'øm ni'jpy. ¹³ Wants t'ixmajtsnandi ja møjaa'gyutujk jøts ja Cristo n'anøjkxandit, øy ja sa njaguwanjajtandi sam ja yjajty. ¹⁴ Pø ka'axi adøm ya naxwiiñ ja tsinaa'yin xemikøjxp nmøøt'ajtyindi, n'ixa'ayindipnimxi adøm ja' midi dø'øn me'empnim ja'atpnim. ¹⁵ Ja Jesucristo adøm ja y'o'jkin xpudøjka'amp jøts ja Dios Teety ejtp nyikjotkujk'ajtin ku ja kyø'øm U'nk ja ndawindsø'jka'ant; jøts nayide'en ja Dios ja n'aaw ja n'ayuujk ndadaxondaajkint. ¹⁶ Jøts kidi xja'dyigøydi ku ja Dios nayide'en twindsø'jkinjawi ku ja mbikta'aky xem yam mnadyabudøkiyidi.

¹⁷ Mimadowdi pøn jaty mgajpxwejidip; pø ja'axi dø'øn m'anmija'win t'ejx'ejttip jøts ñija'widip ja' ku ja Dios ja wyinaty nay ja' tyamachidi. Pudøkidi jøts jotkujk mmøøtunidit, kidi ayowim xundi, pø ni meetsxi wyinaty jotkujk mgatsøøni.

¹⁸ Ni'amido'ojik øøts, nibøktso'owik øøts, nitiixi ngapøkyjawi jøts jade'en øøts ja nd-sojkin wya'añ ku ja n'anmija'win wa'ats jade'eñim y'ett. ¹⁹ Tundi may'ajt jøts øts jawaani møk xni'amidoowidit jøts wyinaty nnabyaatkojma'andi tsojk.

Yikyajkp ja kunuu'kxin jøts ja kajpxpoo'kxin

²⁰⁻²¹ Ja Dios Teety, pøn ja øy'ajtin tyajkp, ja' mgunuu'kxidip mguwa'anidip, jøts nwindso'n'ajtim ja y'o'jkin mdabudøkiyidit jøts øy tsuj mdsøønidit mdanidit jøts ndungøjxindit pøni ti tø xamidsøjkyim. Mutsk borreegi u'ngin adøm idø'øn ja nwindso'n'ajtim Jesucristo x'ejx'ijtyindi pøn ja ñi'jpy tø tyaky jøts ja Dios Teety kyajpxy tø tyik'adujki, pøn adøm idø'øn xkøj'ømit'ajtimp, øy ja ti xmø'øyint pøni ti jaty ja xamidsojkimp. Øy'ajtin agujkp ja Cristo xemikøjxp y'ett. Jade'en idø'øn ja y'ejxi.

²² Migu'uktøjkti, tuda'aky waani ya'at nøky xpa'ejxtit jøts xja'gyukidit ti dø'øn nda'ana'amdip. Winmadowdi waani ya'at ayuujk, øy idø'øn yø wine'en kyidyimgyajaaji. ²³ Nijawidi ku adøm nmigu'uk Timoteo tø pyuxøjktøjkpidsimy; pøni nabyaajtip øø pojn, nmøøtnøjkxp øts ja wyinaty.

²⁴ Kajpxpoo'kxti pøn jaty m'ana'amidip jøts niduki'iyi ja janchja'wibitøjkti. Nayide'en mguejxyidi ja kajpxpoo'kxin ja Italiit jaa'y.

²⁵ Mbaattip ja Dios kyunuu'kxin niwine'enin jam mdsøønidit. Jade'en idø'øn ja yjatt.

JA NØKY MIDI JA SANTIAGO YJAAY

Ku ja Santiago tnijayi ja israelit jaa'y pøn tø ñawya'kxniyidi

¹ Santiago'ajtp øts. Øts ja Dios Teety, øts ja nwindson'ajtim Jesucristo nmidumpy. Ixyam mee nnijayi jøts øts ngajpxpøø'kxy niduki'iyi ja israelit jaa'y pøn jaty tø choondi ya jøts tø ñøjkxti tsinaabyi abiky tsoo.

Ja wijy'ajtin ja nija'win midi ja Dios yajkpy

² Meets migu'uktøjk, mbaat'ajtip meets ka' ti xkumayjawidit øy yjadyimyiñ o midi ayo'on. ³ Nnija'windipts ku ja ayo'on ja myiñ, jade'ents ja Dios x'ejxint xnija'wint ku tu'ugyi ja nwinmaa'ñ nyik'ijtyindi, kuts ja Dios amumjoojt njanchja'windit jøts jade'en'ampy ja øy'ajtin ja tuda'aky'ajtin njagyajpindit. ⁴ Øy ka'pxy yikxon mwinma'adyit, winets nayide'en yikxon mwimbidsø'mxiyidit ja m'øwyinmaa'ñ jøts xjagyaptit ja ja'gyukin, kidi mwa'andi jøts ku ti mga'ijtxyidi.

⁵ Jøts pøni jats meets winaagin pøn ka'ejtxidip ja wijy'ajtin, ja ja'gyukin, amidowdits ja Dios jøts ja mmo'ojidit, pø ja'axi tuki'iyi tyajkøjxp, ka'ap ja ti t'ama'at'aty jøts ka'ap ja ti tyamigajpxy. ⁶ Ja'ats idø'on tsojkip jøts tu'uk amumjoojt n'amido'owint, ka' nwinmaa'yint majtsk aaw majtsk joojt. ⁷ Pøni pøn jade'en winmaapy, ka'ap ja Dios ja ti y'ukmø'øñiyit, ⁸ ja'agøjxp ku ixyam ti t'uktsøky jøts jabom ja wyinmaa'ñ tyiktigatskojmi, ka' tu'ugyi ja wyinmaa'ñ tyik'ity.

⁹ Jøts pøni pønts ayoop winmaapy, pøn tpaduujnidip ja Dios yja', jotkujk idø'on t'ejxnidit, tyaxonda'aktip idø'on ku Dios nøjkx wyaadso'oniyidi jøts ja yiknitso'ok'atidit. ¹⁰ Jøts nayide'en pøni jam pøn kumeeñ'ajtp jøts pøni pyaduujnidip ja Dios yja', jotkujk idø'on ja ñayjawiyidit øy myeeñ ja yjagayiktamø'ejxti. Jabi yiknitso'ogidipts ja Dios ja' ku wyinaty twingunøjkxiñidi. ¹¹ Tigøøpy ja kumeeñ jaa'y ja myeeñ ku ayo'on myiñ. Nayide'en ñamyayi jyaty sam ja ujts pijy u'ngin jyaty ku ja xøøw cha'ayiyi jøts ja tyøtskøjxni ja pyijy.

Ku ja ka'øbyi x'amutsk'ejxwa'añidi

¹² Janch jotkujk meets ku tuda'aky mjaa'y'atti øy ja ayo'on xjapaatti; ku jade'en mmajada'akti, winets ja mmø'øyiidi ja Dios ja jujky'ajtin midi xemikøjxp, midi ja Dios mdamidsojkiyidip, jade'en'ampy ku ja Dios xtsojkti. ¹³ Ku pøn ñayjawiyi ka'øbyi ttunwa'añ, kyø'øm winmaa'ñ ja yiktump, ka'ap ja Dios yø'øbi winmaa'ñ tyaky; ka'axi ja Dios twinmaa'ñ'aty jøts ja axøøkpi yiktu'unt, jøts nipøn ja jade'en tkawinmaa'nmyø'øy jøts ja jade'en ttu'unt. ¹⁴ Ku pøn jade'en ttunwa'añ ja ka'øbyi, kyø'øm winmaa'ñ, kyø'øm tsojkin ja jade'en pyadundip. ¹⁵ Yø'øbi ka'øwyinmaa'ñ, pøky yø'; jøts ku ja pøky yikmøøt'aty, ja o'jkin tigø'øyin ja yajkpy.

¹⁶ Migu'uktøjk, kidi mnawyin'iñidi; ¹⁷ tuki'iyi ja øybi tsujpi midi nmøøt'ajtyindip, Dios yø tyajkp, tøxi ja tpikta'aky ja jaj ja tøø'kx jam tsajpwemp. Tu'ugyi ja', ka'ap ja tyigach. ¹⁸ Tø ja Dios xmø'øyim ja øy'ajtin midi xemikøjxp ku njanchja'wa'am ja kyajpxy ja y'ayuujk, ja tiiby ja janchpi, ja'agøjxp ja jade'en ttuñ jøts adøm nyiktso'ondak'okwa'anint pøn ja pyabøjkpi'ajtip, sam ja ttamidsøkyin.

Sa yikpaduñ ja Dios yjanchja'win

¹⁹ Paty, migu'uktøjk, njaaknigajpxy jøts tuda'aky mjaa'y'attit. Yikxon xmadow'ettit ja mmigu'uk sa wya'añ, kidi mnay'øøjyidi, jøts kidi mmigu'uk xmi'ambøkti. ²⁰ Nisudso'ampy idø'on ja Dios xkadajotkujk'ajtyindi ku ja nmigu'uk nmijot'ambijkyindi. ²¹ Paty mastu'utti tuki'iyi midi ka'øy, ja ka'øwyinmaa'ñ jøts ja ka'ødyunk. Møj pikta'akti

yikxon ja Dios kyajpxy midi tø myiktukmadøwdi; pø yø'øxi tyanitso'ok'attip ja n'anmija'windi.

²² Padundi dø'øn pøni sã jaty ja Dios kyajpxy wya'añ, kidi ja'ayi nugo xmadøwdi. Nawy'in'øø'nindip nugo ku ka' nbadu'unint. ²³ Pøni pøn jade'en adøtsp, jade'en ja ñamyayi n'ukpiktaajkint ejxim ja jaa'y pøn tku'ejxip ja wyeen ja y'aaw jap ejxjøtpy ²⁴ jøts ku ka' wya'ãdsi. Ku ñijkxy, ka' tja'myech jøts wyimbujt. ²⁵ Jotkujk idø'øn ja ñayjawiyidit pøn ja Dios kyutujk tpaduujnidip midi xyik'awa'atspidsø'mimp, ka'ap ja ja'ayi nugo tpatmadøy.

²⁶ Pøni mwandip jøts ja Dios yja' xpaduujnidit, jøts nay jaty ja mdoojts nugo xyik'awidetti yam nadyiyi ja Dios yja' xpaduujnidi, jade'ents nugo mnawy'in'iiñidi jøts ka' x'ukpadunidi jade'en. ²⁷ Ja' ja Dios Teety kyupijky ku nbudøjka'ant ja ku'øky'u'nk jøts ja ku'øky'øxy pøn ayoodip, jøts nayide'en ka' nugo nbøkyu'unint ya naxwiiñ.

2

Ka'ap pøn ñay'øy'ejxidit kyanay'øy'ejxidit wan tjaþøni

¹ Meets migu'uktøjkti, pøn jaty tjanchja'widip ja nwindson'ajtim Jesucristo ku ja wa'ãdsi ku ja myøji, kidi meets pøn x'øy'ejxti xka'øy'ejxti wan tjaþøni. ² N'ukpiktaajkimp tu'uk ja madya'aky, pøni tøjkidip ja jaa'y jap ma meets mnamyukyidi, tu'uk kumeeñ jaa'y janch xyøxy janch wyeti janch ñaamyi, jøts jadu'uk ayoobi jaa'y nipach xpach, ³ jøts ku ja'ayi øy tsuj xkajpxpoo'kxti, ja' pøn janch kumeeñ pøn janch xyøxy, jøts ja øybi tsinaabyajt xmo'odi, jøts ja ayoobi xkamøjpikta'akti jade'en xnøjmidi jøts wan ttani uk najxkijxy chøønit, ⁴ pø yide'en'ampxyi yik'ixy yiknijawwi ku tu'uk x'øyjawi jøts jadu'uk xka'øyjawi. Ka'ap jade'en y'øyi, mbøkyundip jade'en.

⁵ Ukmadøwdi, migu'uktøjk, jøts ja'gyukidi ya'at: Ja ayoobi jaa'y pøn ejttip ya naxwiiñ, ja' idø'øn ja Dios Teety tø wyi'ijxyidi jøts ja tjanchjawidit ja Dios yja' jøts yikmo'odit ja y'øy'ajtin midi ja Dios ja yjaa'y tyanitanaapy, pø tøxi ja ttamidsøky jøts ja tmo'ot pøn tsojkijip. ⁶ Jøts meets, jade'en meets ja ayoobi jaa'y nugo xtsø'ødyundi ku xkamøj'ejxti. Nayide'en meets ja kumeeñ jaa'y mjatuumiyidi ku myikni'øø'nidi jam kudunk wyindump. ⁷ Yø' nayide'en tka'ødyejtíp tka'øñimadyaktíp ja nwindson'ajtim Jesus pøn adøm xyiknitso'ok'ajtindip.

⁸ M'øy'adøtsp meets wyinaty pøni mbadundip ja Dios Teety y'ana'amin midi yide'en wamp: "Tsok ja mmigu'uktøjk, windsø'øgi ja mmigu'uktøjk, jade'en xtsokt jøts jade'en xwindsø'øgit sã kø'øm mnachøkyi jøts sã kø'øm mnawyindsø'øgiyi." ⁹ Pøni jamts meets ja mmigu'uktøjk x'øy'ejxti xka'øy'ejxti wan tjaþøni, mbøkyundipts idø'øn jade'en, ka'ap ja Dios y'ana'amin jade'en xpaduujnidi. ¹⁰ Øy ja Dios kyutujk ka'pxy njabadunwa'añindi jøts jam tu'uk y'ana'amin kyayikpaduñ, pøkyu'unindipts adøm idø'øn ku ka' ka'pxy yikpaduñ. ¹¹ Nay ja' midi tyikutujk, jøts yide'en ñiimy: "Kidi mmigu'uk ñiyaa'y ñidø'øxy xpøjkxi", nay ya'at tyikutujkmaa jøts: "Kidi myikjaa'y'øøky." Øy pøn ja myigu'uk ñidø'øxy ja tjaþapøjkxi jøts ja ne'egi yikjaa'y'øøky, pøkyumpts ja jade'en ku ja Dios yja' ka'pxy tø tkabaduujni. ¹² Øy yikxon ngajpxint ndu'unint sam ja Dios ttsøky, jabi nay ja'abi kutujkxi xidyu'unimp midi ja nitso'ok'ajtin nayide'en tyajkp. ¹³ Pøni pønts ja myigu'uk tø tka'ayo'ixy, nayide'ents ja Dios ja nøjx ka'ayo'ijxyim tyidyuñiyi; pønts ja myigu'uk t'ayo'ejxp, pyaatpts ja' ja øy'ajtin ku ja tiidyu'unin ñaxt.

Ja janchja'win jøts ja ødyu'unin

¹⁴ Migu'uktøjkti, çti ja ñiwya'ant ku ja'ayi nwa'añim ku ja Dios njanchja'wa'am jøts nika'ap ja øybi n'ukpadu'una'am? Ka'ap jade'en ja nitso'ok'ajtin nbaajint. ¹⁵ Ku n'ukpiktaajkint ku tu'uk nmigu'uk ti kya'ijtxyi ejxim ja kyaaky ja wyet, ¹⁶ jøts nnimaa'yint: "Mbaatp ja mwet ja mnaamy ja mji'kxy", jøts ka' ti nmø'øyint pøni ti

yjatsøjkpy. ¿Ti ja ñiwya'ant jade'en? ¹⁷ Ku ja Dios njanchja'wa'am jøts nika'ap ja nmigu'uk n'ukpudøjkiña'am, ka'ap ja janchja'win jade'en tyuñ.

¹⁸ Jamts pøn jawamp: “Mets ja Dios mjanchja'wip, jøts ka'ap ja mmigu'uk xpudøki; jøts øts, øy øts ja Dios ngajanchjawi, nbudøjkip øts ja nmigu'uk.” Jade'en'ampyts idø'øn ja janchja'win yik'ixy yiknijawi ku nbudøjka'am ja nmigu'uk, kuts ja nmigu'uk ngabudøjka'ant nisudso'ampyts ja Dios jade'en ngajanchja'wa'andi. ¹⁹ Mjanchja'widip meets ku jaa tu'uk ja Dios, øyi jade'en; nayide'enxi ja miku' tjanchjawi ku jaa ja Dios, kyudsøjkipts ja'. ²⁰ Kidi nugo mgujuun'aty, ¿ka' xnijawi ku ja njanchja'win jade'en wyingaxi'iky ku ja nmigu'uk nbudøjka'ant? ²¹ Jade'en'ampy ja n'apteety'amøj Abraham ja Dios kyupøjki ku ja tpaduñ sam ja Dios ttsøkyin jøts ja y'u'nk Isaac ttamiyox. ²² Ja'gyukidi meets jade'en jøts ku ja Abraham jade'en tnanky'ijxyi ja yjanchja'win ku jade'en tpaduñ, jøts jade'en ttuk'abaaty ka'pxy ja yjanchja'win. ²³ Y'abaajt idø'øn jade'en ja Dios kyajpxy ku wya'añ: “Ojts ja Abraham tjanchjawi ja Dios, ja'ats ja Dios y'øjja'wiyiñ jøts ja ojts tkupiky.” Paty ja Dios myigu'ukjawiyi ja Abraham.

²⁴ M'ejxtip mnija'widip ixja sa ja Dios tkupiky ja jaa'y ku ja tpaduñ, jøts ni kidi ja'ayip tu'ugyi sam ja yjanchjawi. ²⁵ Nayide'en ja ka'ødyø'øxy Rahab ja Dios kyupøjkøø jade'engøjxp ku ja t'ødyuñ ja Dios kyugajpxy; ku tjønmoøy ttøjkmøøy jøts abiky tyuu' ttajøpkajxyiñ ku ja myidsep wyinaty pyayø'øyi. ²⁶ Ka'ap jade'en tyuñ ku ja Dios njanchja'wint ku ngabadu'unint sam ja ttsøkyin. Jade'en ja tpaaty sam ja jaa'y'øøgyin, ka'ap ja ñine'kx tyuñ ku y'anmija'win kya'uk'ejtnei.

3

Sam nugo yø toojts yiktakajpxy

¹ Meets migu'uktøjk, ka' pyaat'aty jøts mee niduki'iyi myik'ixpøkt. Pøn t'ejxtip pøn tnija'widip, ja' ka'pxy tpadundip. Nay jade'ents ja møk yiktabayø'ødyit ku ja ka'pxy tkabadu'undit. ² Tum jade'en ja tundigø'øyin yikjagyepy; winaagin ja' pøn katundigøødyip kakajpxigøødyip, ja' idø'øn janch'øy jaa'y ku ja tpaduñ ku ja ñay'ejx'ityiyi. ³ Jade'en'ampyts ja kawaay kyajpxy kyupiky ku ja axots tmøøt'aty y'aawjøtpy midi yikwa'k'øyip, øy midi'ampy nduknøjxint. ⁴ Ku n'ukwinma'ayint nayide'en sam tu'uk ja barki yø'øy; øy janch jamøj ja' jøts ja poj ja wyetsmiñi wyetsxøpyi, mutskts ja pujxu'nk midi ja jaa'y yikyø'øpy, jøts ja tyikyø'øy pøni ma ja ttsøky. ⁵ Nayide'en yø toojts; win'ii'nxyip ja' midi xyikajpxigø'øyimp. Jade'en yø' kidim ja jøøn tyøøbyikyin jøts ja tyøømyøji, jøts ja et tyøøyi. ⁶ Jade'en yø toojts ejxim ja jøøn tyøøyin. Yø' amuum xyikma'jtimp ku xyikajpxigø'øyint xyiktundigø'øyint. Miku' yø jade'en xuktu'unimp. ⁷ Yikyujpy ja jaa'y o midi jiyujk, wan tjooni wan tsa'añi jøts ja' midi tsinaadyip mejjyotp. ⁸ Ka' pøn mibaat jade'en ja toojts tmimada'aky, tundigøøpy yø nugo. ⁹ Nayi toojts xyikajpximp ku ja Dios nja'myejchim n'ajot'ajtyim, nayø'øts ja nmigu'uktøjk xukmigajpxigø'øyimp, Diosts jade'en ñamyayi nmigajpxigø'øyimp ja y'agojnajxy midi kø'øm tø tpikta'aky. ¹⁰ Nayi aawjøtpy pyidsimy ja øgyajpxy tsujkajpxy, jøts nay jaayi pyidsimy ja axøøkajpxy. Migu'uktøjk, ka'ats idø'øn jade'en yjapaat'aty. ¹¹ Ku n'uk'ejxint ma ja wa'ats nøø pyidsimy, tu'ugyixi ja wya'atsnøø'aty, ka'ap jam ja tya'mtspi, ka'ap jam ja pya'akpi. ¹² Migu'uktøjk, ¿m'uk'a'ejxip meets tyøømit jam iigi kipkyøjxp ja wenk tsa'am? Ka'axi mibaat nayide'en ja nøø pyidsimy jam nøømu'utjotp ja tya'mtspi ja pya'akpi.

Ja ja'gyukin midi ja Dios yajkpy

¹³ Pøni jap pøn tnimadøy tnijawi, wan tnanky'ijxyi sa ja y'øy'ajtin ja y'øyjaa'y'ajtin, wan jade'en ja ja'gyukin tyiktuñ jøts ka' ñamyikaxit. ¹⁴ Pøni ja meets ti mnadyami'ama'at'atyidi ku nugo kø'øm jade'en xwinmaa'ñ'atti, ka' ja ja'gyukin jade'en xnanky'ijxyidi, taay yø jade'en pyidsimy. ¹⁵ Ka'ap ja Dios jade'en xuknija'win jøts

jade'en n'adøøjtsint, ja' jade'en adøøtstip pøn ka'øyyaa'dyi ku ja miku' jade'en tyuktuñidi. ¹⁶ Ma y'ity ja windi'iñ'ajtin jøts ja nadyami'ama'at'ati, nay jam y'ity ja tsep jøts o ti axøøk'ajtin. ¹⁷ Pøn ja ja'gyukin ja Dios møyjyip, ja'ats øyyaa'y'ajttip, wa'ats chinaa'yin ja tyiknaxti; ka'ap cheptundi chepkajpxti, myøøt'ajttip ja tuda'aky'ajtin jøts ja ja'gyukin. Tsaach'ejxtip jøts ja øy'ajtin ttundi; ja myøkwinmaa'n pyadundip, ka' twindaay'atti ja wyinmaa'n. ¹⁸ Pøn tja'gyukip tkajpxkukip, ja'ats ja øy'ajtin ttukpatp ja myigu'uk.

4

Ka' nmīnamyaa'yint ja ka'øy'ajtin midī ya naxwiñ

¹ ¿Ma chøøn ja tsep ja aka midī mdundip? Køømyi xyiktso'onda'akti ku ti mnadyami'ama'at'atyidi. ² M'animp m'adsøjkpy pøni ti mmigu'uk myøøt'ajtpy, kuts ja xkapaatti winets ja tsep xyiktøkidi, jøts jade'ents ja mmigu'uk xyik'ookti. Ka'ap agujk jotkujk m'etti ja'agøjxp ku ja Dios xka'amidowdi xkabøktsowdi midī mdsøjktip. ³ Pøni m'amidoodip mbøktsoodip jøts ka' myikmo'odi, jade'engøjxp ku øy ka'øy x'amidowdi jøts xyiktunwa'andi nugo ma ka' pyaat'aty. ⁴ ¡Meets mga'øwyinmaadyip! ¿Ti kidi meets xnijawi ku øy møøt nnayja'win ja' midī ja Dios kyatsøjkpy, jade'en'ampyts idøøn adøm ja Dios nmīdsepøjkna'am jøts nga'ukja'myajtsna'am? ⁵ Yide'en jap nøkyijxpy wya'añ: “Øy xtsojk'anajxyim ja Espiritu Santo midī ja Dios xukmi'ejtimp jøts ka' t'øyjawi ku wenkpi nbadu'unint.” ⁶ Dios ne'egi xmay'ajtimp xpudøjkimp sam ja kyajpxy ja y'ayuujk yide'en wya'an: “Myi'ambijky ja Dios pøn namyøjpiktaajkiyip; pønts tuda'aky'ajtp øy'ajtp, pudøjkiyipts ja Dios ja'.” ⁷ Amumjoojt mnadyamiyoxidit ja Dios. Møk windanidi ja miku' jøts mniwa'adsiyidit. ⁸ Wīngunøjxkidi ja Dios jøts ja ne'egi mniimeniyidit. Yikwa'atsti ja mbøky, meets, ku nugo ja Dios majtsk'aaw majtskjoojt xtsokti, ku xpadundi nayide'en ja ka'øybi. ⁹ Jotmay'ookti, taya'axti ja mbøky. Kidi jotkujk mnayjawi yidi ku tø mbøkyundi. Yikmendi ja mwinmaa'n jøts xjagyaptit ja jotmay. ¹⁰ Nabyikta'agidi yik'ayowim nwindson'ajtim wyīngujk, jade'ents ja ñitso'ok'ajtin ja møy mmo'ojidit.

Ka' nugo nbayø'øyint ja nmøøtjanchja'wibi

¹¹ Meets migu'uktøjk, kidim mnabyagajpxyidi nidu'uk ja nidu'uk. Pønts jade'en pagajpxp, pønts ja myigu'uk jade'en tpøky'ejxp, ja Dios ja kyutujk ja jade'en wyīndsojip ma wya'añ jøts ku ja nmigu'uk ndsojkint, tīdyumbits ja ne'egi nugo ñabyikta'agyī jøts ni tkabaduñ køøm ja kutujk. ¹² Tu'ugyi ja' pøn ja kutujk tmøøt'ajtp, nay ja'ats xpayø'øyimp, ja'ats nayide'en xyiknitso'ok'ajtimp, nay ja' xyikwindigø'øyimp. ¿Mbøn mets ku xpøkpyayø'øwya'añ ja mmigu'uk?

Ka' yiknijawi pøni ti memp jabom wixøjpk

¹³ Ukmadowdi meets sa x'ukwinmaydi: “Jabom wixøjpk njaa'mint abikyajp jøts jam tukjumøjt n'ejtint. Najxint ndøjka'ant, jamts ja meñ jade'en nbaajtint”, ¹⁴ nipøn tkanijawī pøni ti memp kidakp jabom wixøjpk. Jade'en adøm n'ijtyindi ejxim ja yoots n'ejxint, jøts nay jaayi n'ejxint, tø tyigøøgyojmi. ¹⁵ Yide'en ne'egi mwā'andit: “Pøni xpudøjkimp ja Dios, winets jade'en ndu'unint pøni ti jaty ndunwa'añimp.” ¹⁶ Meets ja mgø'øm winmaa'n mee myiktunwampy jøts ja namyikaxi; ka'øyts idøøn yø jade'en pyidsimy. ¹⁷ Pøn wa'ats tjanija'wip jøts ja ka'pxy tkabaduñ, pøkyundipts ja jade'en ne'egi.

5

Sa ja kumeñ jaa'y yikajpxwejtī

¹ ¡Madowdi meets kumeñ jaa'y! Mdaya'axtip ja mwinmaa'n ku ja ayo'on xpaattit x'ejxtit. ² Tuki'iyi ja mjujky'ajtin jadi'iñi pyutskøjxnit jøts ja m'øybi wet ja m'øybi naamy ja kipkyaa'tspi jadi'iñi tyikwindigø'øty. ³ Towigyøjxp ja oori ja plati midī mmøøt'ajttip, jade'ents idøøn m'ukyik'ejxtit m'ukyiknijawidit ku møøt mwindigø'ødyit ja mbikta'aky. Tøxi ja mgumeñ'ajtin øy xpaatti, wīngompxi ku ja tīdyu'unin mye'ent. ⁴ Ja kamdumbi

pøn tø xkamijuudyi, ja' myiktabayø'ødyip. Wa'ats ja nwindson'ajtim ja t'ixy tnijawi ku ja mdumbi jade'en xkamijuudyi. ⁵ O meets ya naxwiiñ jotkujk xyiknaxti, o ti kø'øm tø mnadyamay'atyidi, wingompts ja xøøw ku ja tiidyu'unin mye'ent. ⁶ Tø ja xmidundigøydi pøn ti tkatump pøn ti tkanija'wip, jade'en idø'on ku nugo tø xpayø'ødyi jøts xyik'ookti ku ka'ap ja møk'ajtin tjagyapti.

Ja tuda'aky'ajtin jøts ja dios'ajot'ajtin

⁷ Meets migu'uktøjk awejxti tuda'aky, kunim ø nwindson'ajtim mye'ent, nayide'en sam ja kamdumbi tuda'aky t'awixy ja tuu jøts ja pyikta'aky tøkukt. ⁸ Nayide'ents meets x'awejxti tuda'aky, kidi nugo mjotigøydi, wingomp jøts mye'ent ja nwindson'ajtim Jesucristo. ⁹ Meets migu'uktøjkti, kidi nugo mnagyajpxyidi mnay'øjyidi jøts ka' myikpayø'ødyit; wingompxi ja Dios pøn ja naxwii'ñit jaa'y tiidyunidip. ¹⁰ Migu'uktøjkti, windanidi ja m'ayo'on nayide'en sam ja Dios Teety kyugajpxy twindanaay ja yja'. ¹¹ Jotkujk ja'adi pøn tø tyiknaxti amumjoojt ja y'ayo'on. Pø tøxi xnijawidi sam ja Dios kyugajpxy Job ja ayo'on t'ijxy, jade'ents ja øy'ajtin ja Dios myøøjyi; x'ayo'ejximpts xpudøjkimpts ja Dios jade'en.

¹² Meets migu'uktøjk, yø' mdu'undip ku ti xkajpxtit ku ti xu'undit, tiy'ajtin mgajpxtip. Kidi nugo xuk'ejxti ja Dios ku nwa'anint "Tiy ja", tiy'ajtints ja; kuts nwa'anint "Ka'ap ja tyiy'ajtin", tyimwya'animpts jade'en ku ka'ap tyiy'ajtin, ka'ats ja Dios jade'en xpayø'øyint.

¹³ Pøni jam pøn y'ayøy wyinmay, wan ja Dios t'ajot'aty. Pøni pønts agujk jotkujk tyiknajxp, wants ja t'øwdi ja kunuu'kxy ayuujk. ¹⁴ Pøni pøn pøjkip, wants ja twaadsoy ja møjaa'dyøjk pøn tundip tsaptøjkjotp, jøts ja kyugajpxidit jøts aceite tpiakta'aktit nwindson'ajtim køjxp. ¹⁵ Ku amumdu'uk t'ajot'attit ja nwindson'ajtim, tso'okpts ja pamaa'y. Pøni tø tyundigøy, yikpojkipimaa'kxpts ja'. ¹⁶ Paty nayide'en mnadyamimayatsidit ja mbojkpi nidu'uk ja nidu'uk, jøts ajot'atti ja Dios pøni pøn pøjkip jøts cho'okt. Pøn øyjaa'y'ajtp jøts amumjoojt ja Dios t'amido'ot tøktsot, jade'ents ja Dios myøk'ajtin myajada'akt. ¹⁷ Ja Dios kyugajpxy pøn txøøw'ajt Elias nayide'en ja y'ijty sam adømin; ku ja Dios ja t'amidøøy jøts kyatu'ut, winets ja tuu kya'ukmenaa tigøøk jumøjt jagujkp. ¹⁸ Jøts ku jadigojk t'ajot'ajty ja Dios jøts tyu'ut, xjats myiiñ ja tuu jadigojk xjats ja pikta'aky y'øyiyii'ñ.

¹⁹ Migu'uktøjkti, pøni jaa pøn tka'ukpaduni sam jawyeen tø t'ukpaduñ, jats ja' pøn ja nayide'en tukpaduniyip, ²⁰ mnijawidipts nayide'en ku tø tyiknitso'ok'aty ja mmigu'uk y'anmija'win jøts yikmaa'kxtit ja pyøky.

JA MYĪDU'UKPI NØKY MIDI JA PEDRO YJAAY

Ku ja Pedro tnijayi ja janchja'wibitøjk pøn tø ñawya'kxniyidi

¹ Øts idø'øn Pedro nxøøw'ajtpy, øts ja Jesucristo ngudanaapy. Ja' ø tø xkexy xjats øts ya'at nøky yam nja'ay, jøts meets ndanijayi wine'enin jam muum abikyajpkøjxp mdsinaañidi, ku jam tø mgakwa'kxnidi mgajpkøjxp jøts jam tø mnøjkxti jam Ponto, jam Galacia, jam Capadocia, jam Asia jøts Bitinia. ² Tøyip meets ja Dios Teety mwi'ejxniyi jøts ku meets ja m'u'nk'atiyit sayim ja tniwinma'ayiyii'ñ. Yø Espíritu Santo meets ja mdabudøjkiyip, jade'en'ampyts meets ja Jesucristo yja' xpaduujniyi ja'agøjxp ku ja tø myikwaajtsiyidi ja mbøky, pø adømxí nbøky ja xkubajta'am ku ja chuuñ tyajxy. Dios mjanchkunuu'kxidip jøts øy tsuj xyiknaxtit.

Ja tsinaa'yin midi awejxingøjxp nyiknajxyimp

³ Tkajxajkyim ja Dios Teety pøn ja nwindson'ajtim Jesucristo tyeety'ajtpy, ku ja xjanchpa'ayø'oyindi jøts ja jadigojk xukpaajtyin ja jujky'ajtin xemikøjxp. Xjats ja jade'en tø xja'bikyindi jøts ja xukjøp'ijxyindi amumjoojt ja'abi jujky'ajtin, kumi tø ja Jesucristo ttunjøpi ku ja y'ø'jky ku ja jadigojk pyidsimy jujky'ajtpi xemikøjxp. ⁴ Paty tu'ugyi njøp'ejxin jøts ku ja Dios ja myaay xmø'oyim, pø tøxi ja t'a'ejxi jap tsajpjøtpty pøni ti ja xmøøwya'animp midi tum øy, midi nisa kajajtp. ⁵ Jøts kumi m'ajot'ajtpy meets Dios amumjoojt, jade'ents meets ja myøk'ajtin ja mdabudøkiyi kunim meets ja jujky'ajtin xtyimbyaatt midi xemikøjxp, jøts jaanim ja tñanky'ejxit wiingyubety ti jaty ja jap tø t'a'ejxi.

⁶ Paty meets idø'øn ejtni xoni m'ett øy idø'øn ixyam xjanchjagu'ayo'ombaadidi yø'øbi winmaa'ñ. ⁷ Nayide'enxi dø'øn ndamija'gyukin ja m'ajot'ajtindi sam ja oori: kuwanimxi net ja jawyeen y'atswidø'ty winets ja yik'ijxñim pøni janchtyimy'øbyujx idø'øn ja'. Nayide'ents ku ja janchja'win møk nmøøt'ajtin ku ja tmimajadakixy ja ayo'on pøni sa ndyimyjagujajta'am ja øwyinmaa'ñ, ja'ats idø'øn jawaani tyimy'øy pø ka'axi ja jade'en wyindigøøy sam oori. Jade'en meets ja mjanchja'win yikmøk'ixy ku xmidanaagyøxtit ja ayo'on, ja'ats mee myiktagupøkp, nay ja'ats mee myiktawindsø'øgip myiktamøja'wip jam nwindson'ajtim wyingujkp ku ja jadigojk ñankñigaxø'øgiyt.

⁸ Mwampy mdsøjkpy meets ja nwindson'ajtim Jesucristo, m'ajot'ajtpxi meets ja' øy meets ja xjaga'ijxñim, patyts meets xmøøt'aty ja kunuu'kxin, ⁹ jøts ku xnijawidi ku ñitso'ok'atti ja m'anmija'windi xemikøjxp; jats idø'øn m'ajot'ajtin tyundi, jade'en idø'øn ja wyingaxi'iky.

¹⁰ Tøyip Dios Teety kyugajpxy tpamaydi tpadajti yø'øbi nitsoojkin ayuujk, jøts tnigajpxti jøts ku meets Dios y'ø'y'ajtingøjxp mmo'owa'añiyim yø yjade'embi. ¹¹ Ja Espíritu Santo midi ja Cristo tkajxp, ja' ja kugajpxy ttukmadoojidøø sa jaty ja Cristo yiknitsokpi wyinaty yjatwa'añ ku ja y'ayo'ombaatt, jøts sa nayide'en yikwindsø'øgit yikwinjawit. Ja'ats ja nugo pyamaadyip pyadajtip ja tyimy'ukpøn idø'øn ja' jøts juunim idø'øn ja yjatyimy'ukme'ent ku ja Espíritu Santo ja jade'en tyukmadøyidi. ¹² Ku ja Espíritu Santo ja jade'en tyukmadøyidi jøts ku ja ka' tpaattit t'ejxtit midi wyinaty ttunwajnip, adømnimts inet ja ixyam nbaajtyim n'ijxyim jøts ja myiktukmadowdi ja nitsoojkin ayuujk nayide'en sa jaty ja Espíritu Santo ja tø tyuknijawiyidi pøn jaty kajpxwa'kxtip jøts ku dø'øn ja jade'en tø yjaty. Ankilis paat ja tjantyimy'ejxwa'andi tjantyimñijawiwya'andi sudso'ampy adøm nnitso'ok'ajtyindi.

Xwaadso'ojimp ja Dios jøts ja ndsinaa'yin wa'ats tsuj nyiknajxint

¹³ Paty øy jawyeen xwinma'adyit ku ti xunwa'andit, kidi møj kamøj o ti xjawidi, jade'ents mdsinaa'yin øy xyikyø'ødyit. Amumjoojt meets ja Dios y'ø'y'ajtin ja

kyunuu'kxin xjöp'ejxidit midi ja yakwampy ku nwindson'ajtim Jesucristo mye'ent jadigojk. ¹⁴ Madowdi, jade'en mmado'odit sam jaa'y y'u'nk myimadøyin. Kidi jade'en m'uktsinaañidi sa y'ijty mga'ochøonidi ku Dios wyinaty ka'anin xpabøjkidi ja yja'. ¹⁵ Øy tsuj mjaay'attit jøts jade'en x'aduunaxtit ja Dios Teety wya'ats'ajtin y'øy'ajtin, pøn idø'on tømwi'ijxyidi; ¹⁶ pø yide'enxi jap nøyijxpy wya'añ: "Øy tsuj mjaay'attit sam øtsin, kumi ka' ø nbøkmyøødi."

¹⁷ Pøni mdeetyja'wip meets ja Dios Teety, windsø'øgip meets idø'on ja ejtp, pø ja'axi ka'pxy tiidyu'ump sa pønjabøn ja chinaa'yin tyikyø'øy, ka' pøn ja tiidyu'unin tkapaatt. ¹⁸ Jabi ja Dios Teetyi meets tømduknitso'ok'atyidi ja ka'øchinaa'yin midi adøm ja n'apteety'amøj tømamendi tømabatti; mnija'widipts wa'ats jøts kidi oorip platip ja yiktaguyajkip, windigøy'ejtpxi yø'. ¹⁹ Ja' ja yiktaguyakiyi'ñ ku ja nwindson'ajtim jade'en wyidsuun wyidajxy, øy ja niti pøky tjagamøødi sam ja borreeg'u'nk y'ijty yiktamiyøxy ja Dios Teety. ²⁰ Windi'ixyip ja tanibiktaagi y'ejni, namga'anin ja naxwii'ñit cho'onda'aky, xjats ja yamnim tømyni ku kyøjxwa'añ ja naxwii'ñit jøts ja xa'ødyøkidit ma ja Dios Teety. ²¹ Ja nwindson'ajtimgøjxp meets ja Dios Teety xpabiky midi tømtyikjujkyipy jadeigojk xemikøjxp; jade'en'ampy ja tømø'øy ja myøk'ajtin, ja kyutujk, jøts ja njanchja'win amumjoojt, jøts tu'ugyi njöp'ejx'ejtin ja Dios.

²² Jade'ents ja m'anmija'win wa'ats y'etti ku ja Dios tyiy'ajtin xmimadojidi midi ja Espiritu Santo xuknija'windip. Jade'en'ampyts mnabya'ayowidit, tsokti, wa'andi ja mmigu'uk sa Dios ttsøkyin. ²³ Jade'en idø'on tømpaaty, tømmeets jadigojk mga'axigach, ka' meets ja ñamyayi x'ukteety'ajtni ja jaa'y midi oø'ktip tigøødyip, ja Dios meets ja kyajpxy tømtyikjujky'atigachidi midi nijuuni sa kajajtp. ²⁴ Kumi nømp ja':

Jade'en idø'on naxwii'ñit jaa'dyi sam o ti ujtšin,

jøts ja tyunk jade'en sam ujtspijy midi ja tyiknigaxø'kp.

Paty tuki'iyi wyindigøy, ti ti uktamp ku ujtš tyi'ich, pø nayide'enxi ja pyijy wyindigøy;

²⁵ jøts kuts ja Dios ja kyajpxy, ejtp ja xemikøjxp, ka'ap ja kyudigøy.

Yø øgyajpxy yø ømyadya'aky mee myiktukmadoop.

2

¹ Paty x'ixmatstit tuki'iyi ja mga'ødyu'unindi, ja mga'øwyinma'andyi, wine'en mwìn'øø'ndi, wine'en o ti mnadyawindaay'atyidi, wine'en x'ama'at'atti, xka'ødyejti, xka'øbyikta'akti pøngapøn. ² Nayide'en sam tu'uk ja maxu'nk ñamgaxi'iky jøts ja chetsk tsojk mabaadyim tømpaatwa'añ, jade'ents meets idø'on xtsoktit ja Dios kyajpxy y'ayuujk, midi øy midi wa'ats, jøts jade'en ja mjanchja'win myiweni'adø'øtstit, jøts ja nitso'ok'ajtin xpaattit, ³ pøni tødam idø'on xjanchnijawidi ku ja nwindson'ajtim yja' y'øyi.

Ja Cristo dø'on ja xemikøjxpit jujky'ajtin tyajkp

⁴ Mbaattip m'ejxtip ja nwindson'ajtim Jesús, yø' xyikjujky'ajtimp xemikøjxp, jade'en ja myøk'ajtin tjagyepy ejxim tu'uk ja jønts tsaajin. Jats may pøn tkatsojkip pøn tkaja'gyukip, tøts ja Dios Teety yø twi'ixy jade'en ejxim ja pojtspi ja øybi tsa twi'ixy midi yiktunwampy. ⁵ Nayide'en meets sam ja pojtspi ja øybi tsa twi'ixy midi yiktumpy ku tsaptøjk tyik'øyi. Jade'ents meets ja Dios Teety myiktunwa'añiyi jøts xpaduujnidit ja yja' ku ja amuum mnadyamiyoxidit jøts ku nayide'en ja mbikta'aky xamiyoxtit, ja' idø'on ja jade'en mdawindsø'øgidip, jøts ja Dios Teety xkupøjkindit ku jade'en ndu'unindit Jesucristo køjxp. ⁶ Paty ja Dios kyajpxy wya'añ:

Nbiktakpy øts jam Sion jade'en tu'uk ja ejxpajt ejxim ja tsa ma pøch cho'onda'aky, tu'ugyits ja yikpa'ext jade'en;

pøn ja tømpadump jade'en, ka'ap ja wyinguwopi yjöpkuwopi, pyaatp ja øy'ajtin ja'.

⁷ Pøn yø tømøja'wip tjanchja'wip, møj yø', yø' xyiknitso'ok'ajtimp; pønts tkamøjpiktakp, pøn tkajanchja'wip jatyi, jatpts idø'on ja yide'en sam ja Dios kyajpxy wya'añ:

Ja tsa midi ja pojtspi kya'a'ejxip tyiktunwa'añ,

ja'ats ne'egi ja Dios tɔ t'a'ejxi jɔts ja ne'egi yikxon tyiktuñ.

⁸ Xjats nayide'en ja Dios kyajpxy wya'añ:

Jade'en yɔ', ejxim tu'uk ja tsa'a midi ja jaa'y tyagidaapy.

Jade'en yɔ' yjatti wyinguwopidi yjɔpkuwopidi ku tkabadundi ja ɔy ayuujk midi ñigajpxy ja nwindson'ajtim yja'; jade'en ja Dios tɔ ttanibiktaagi jɔts jade'en yjattit.

Pɔn ja Dios ja'ajtyidip

⁹ Tum ja' meets pɔn ja Dios tɔ wyi'ijxyidi, meets mmidumpy ja nwindson'ajtim Jesucristo yja', jade'ents meets wa'ats mjaa'y'atti jɔts tu'ugyi ja Dios mja'atyidi pɔn ñiwindsɔn'ajtpy ja tsajpjotpit jɔts naxwii'ñit, ja'agɔjxp jade'en tɔ myikwi'ejxti jɔts xkajpxwa'kxtit xkajpxyɔ'odyit sa ja Dios janch ɔy janch mɔj. Nay ja'ats ojts ɔy tsuj myikujajtaajkididi myikudɔ'kxaajkididi ku y'ijty m'etti agootstujpy. ¹⁰ Ka'ap meets ja Dios y'ijty m'u'nk'atyidi, ixyamts meets ja mja'ajtniyidi. Ka'ap y'ijty pɔn mba'ayoyidi, mba'ayojidipts ja Dios ixyam.

Yikxon xpadu'undit ja Dios

¹¹ Meets migu'uktɔjk, tɔg'ayɔ'ɔbyi adɔm n'ijtyindi ya, tsajpjotpy adɔm ngugajp'ajtyindi xemikɔjxp paty mee mɔk nminuu'kxa'aky, kidi xyikmajada'akti ja ka'ɔyjaa'y'ajtin midi tmimada'akwamp winjaa windsojk ja anmija'win. ¹² Jagyapti ja tuda'aky'ajtin ja ɔyjaa'y'ajtin ma pɔn ja Dios tkanijawinim. O meets ja wine'en mjabagajpxyidi jɔts mee myiktijy ka'ɔyjaa'dyi, kuts t'ejxti ku tnijawidi ku tsuj mjaa'y'atti winets ja Dios ja twindsɔ'ɔgidi twinjawidi jɔts jade'en ja nitso'ok'ajtin tpaattit ku wyinaty ja tiidyu'unin xɔɔw yja'aty.

¹³ Ja nwindson'ajtim Jesús kɔjxp xkupɔktit xmimado'odit ja kudunktɔjk jɔts ja mɔj windsɔn, ¹⁴ jɔts ja tyumbi nayide'en midi tpayɔ'ɔpy ja tundigɔɔbyidi ja kajpxigɔɔbyidi, midi'its ɔyjaa'y'ajttip tuda'akyjaa'y'ajttip, ja'ats y'ɔyja'wip. ¹⁵ Jade'ents ttsɔky ja Dios jɔts ɔy tsuj mjaa'y'attit jɔts jade'en xyik'amo'ondit pɔn nugo agubojidip, pɔn tkanija'widip.

¹⁶ Tɔ meets ja ɔy'ajtin myikmɔɔñidi, jɔts ka' ti nugo ajawi mmimajada'agidit. Ka' mwa'andit jɔts ɔy sagasa m'adɔɔtsnidit ku ja ɔy'ajtin tɔ xpaatti. Ja' tu'ugyi mbadu'undip midi ja Dios ñi'ane'empy. ¹⁷ Windsɔ'ɔgidi winjawidi niduki'iyi sam pyaat'atyin. Tsokti ja mmigu'uktɔjkti pɔn nay ja'abi janchja'win pyadundip midi meets, windsɔ'ɔgidi winjawidi ja Dios, jɔts nayide'en ja windsɔndɔjk kudunktɔjk.

Ja ejxpajt midi ja Cristo tɔ xmɔ'ɔyim ku y'ayo'ombaaty

¹⁸ Tumbitɔjkti, kajpxkyupɔjkkɔjxti ñiti jot'aka ja mwindsɔndi, wan tja'awa'anidi tka'awa'anidi, wan ja tja'gyukidi tkaja'gyukidi. ¹⁹ Jabi ɔyxi ja' ku ja Dios tuki'iyi xamijawidit ja m'ayo'on ku myikjemandi myiktedundi ñiti pɔkyɔjxp, paty ja amgujk jotkujk xmidanidit. ²⁰ Ku meets xku'ayo'ombaattit o ti o ma ɔy tsuj tɔ xkayik'oyidi, ɔti ɔy'ajtin meets idɔ'ɔn mdsaa'paatp? Kuts meets ɔy tɔ mjatuñ jɔts kuwañim myik'ayo'ombaadyidi pɔn m'ana'amidip, ya'at idɔ'ɔn ja Dios y'ɔyja'wip ku meets tuda'agyi xkupiky'aty ja ayo'on. ²¹ Paty meets ja Dios tɔ mwaadsɔyidi, jabi tɔxi Cristo y'ejxpajt tyiktañ ku y'ayo'ombaaty ñiti akikɔjxp jɔts meets ja xpadu'undit jade'en. ²² Ñiti pɔky ja tkatuñ, ñiwindem xɔɔw ja jaa'y ja tkawindaay'ajty; ²³ ku ja y'ijty yikmi'akikajpxy, ka'ap ja nayide'en y'adsɔy; ku ja y'ijty tyik'ayo'ombaatti, ka'ap ja tmidsepiky pɔn jade'en tuujnidip. Dios Teety ja ne'egi tyanipijky ja ka'pxy tiidyunk. ²⁴ Kɔ'ɔm idɔ'ɔn ja Cristo adɔm ja nbɔky tuki'iyi tku'o'jkigyijxy jam kruskɔjxp, jɔts ka'ap adɔm nyikmɔj'ajtin ja nbɔky jɔts jade'en ɔy tiy ja ndsinaa'yin nyiknaixint. Pyaajt ja tsaachi'ajtin ja', jɔts adɔm jade'en nnitsoojkindit. ²⁵ Jabi jade'enxi y'ijty sam ja borreegi tyigoyin, tɔts meets jadigojk xniwimbity ja nwindson'ajtim Jesucristo pɔn m'ejx'ejtidip jɔts pɔn ttunk'ajtp ja m'anmija'windi.

3

Sa dø'øn pyaat'atyi chøønidit ja amajtsk jaa'y

¹⁻² Jade'en meets tø'øxyøjkti, kajpxkyupøkti ja mgø'ømniyaa'dyi jøts xuk'ejxtit xuknijawidit ja tiy'ajtin ku meets ja mjaa'y'ajtin tuda'aky xyiknaxy. Jats idø'øn winaagin ja yaa'dyøjkti pøn tkagupøjktipnim ja øgyajpxy ja ømyadya'aky, ja'ayi meets ja jade'en xukupøktit mjaa'y'ajtingøjxp, niti kajpxy niti madya'aky. ³ Jøts ka'ap meets ja mdsuj'ajtin xmi'ajtt xmi'ookt midi ja'ayi nikijxy kaxø'kp ku tum ja oori, tum ja wimbatjaaxy wimbatwøøky, jøts tum ja tsowibi wet xjotmay'attit. ⁴ Jabi wa' tsuj'ajtinxi meets idø'øn ne'egi myiktu'ump midi m'am mjoojtp yik'øyyaa'y'ajtp, ja'abi midi kawindigøøpy. Janch øy ñaxy idø'øn ja jam Dios wyingujkp. ⁵ Jade'ents idø'øn y'ijtyip ñajxmi ja tø'øxyøjkti pøn ja Dios yja' tpadundip ku ja nayide'en tmøøt'ajtti ja tuda'aky chinaa'yin. Yjanchja'widip idø'øn ja Dios ja y'ijty jøts ja ñiyaa'y tuki'iyi tkajpxkyupøjkidi nayide'en. ⁶ Jade'ents idø'øn ja Sara yjaa'y'ajty, tuki'iyi tkajpxkyupøjkijxy ja ñiyaa'y Abraham, jade'en ja tpikta'aky sam tu'uk møj øy windsøn. Pøni øy meets mjaa'y'aty, nayide'ents meets idø'øn xu'unt sam ja Sara tø tjøptuni jøts jade'en ja mniyaa'y xkatsø'øgidit.

⁷ Nayide'en meets yaa'dyøjkmi, ja'gyukidi ja mnidø'øxyi, windsø'øgidit sam ja pyaat'atyidi. Kidi meets ja xamøj'aty ku ja nayide'en kyamøkidi sa meets, jabi nay ja'abi øchinaa'yinxi dø'øn ja Dios tø myø'øyiidi midi meets tø xpaaty y'ø'y'ajtingøjxp. Tundi jade'en, jøts ka'ap ja Dios mgamo'ojidit midi jaty m'amidoodip mbøktsoodip.

Ku ja øy'ajtin yiku'ayo'ombaadi

⁸ Jade'ents idø'øn xyiknaxtit ja mdsinaa'yin: øy tsuj mnachokidit sam tu'uk jaa'yin, nabya'ayowidi nixem niyam jøts xyiknigaxø'øktit jade'en ja mduda'aky'ajtin. ⁹ Kidi meets ja kya'øyi nayide'en xyikwimbity jøts ja mmigu'uk xuk'ayojiwya'andi ja ka'øgyajpxy ja ka'ø'y'ayuujk. Ni'amidowip meets idø'øn ja ne'egi ja kyunuu'kxin, pø ja'axi adøm tø nyiktaniwaadsø'yim jøts ja Dios kyunuu'kxin nbaajtindit. ¹⁰ Jabi yide'enxi dø'øn ja Salmos wya'añ:

Pøni pøn idø'øn øy tsuj ja xøøw ja tsinaa'yin yiknaxwampy,
y'ejx'etp idø'øn ja tyoojts ja', jøts ja yigaappi y'axøøkpi ja tkakajpxt
jøts ja y'aaw tkadataay'att.

¹¹ Paat'ajtp idø'øn ja t'ixmatst ja yigaappi jøts ja y'øyi chujpi tpadu'unt ne'egi, y'ixa'ap idø'øn ja øy'ajtin jøts tuki'iyi tpanøjkxt.

¹² Jabi Dios Teetxyi idø'øn t'ejx'ejtp pøn øy jaa'y'ajttip jøts nay ja' tmado'op ja tsapkaajpxy, ka'ats idø'øn ja møøt ñamyayi pøn ja y'axøøkpi yigaappi yikmajadaktip.

¹³ ¿Pønts meets idø'øn ndejint mdamidsepwa'aniiyidip ku ja y'øyi chujpi xunwan'ettit?

¹⁴ Pøni jats pøn wyinaty mjanchtuku'ayo'ombaadiyidi ku ja y'øyi xjatu'undit, øyjawidi kunuu'kxyjawidi meets idø'øn ja ne'egi, jabi møjxi ja Dios y'ø'y'ajtin tyikwimbejtnit. Patxyi meets idø'øn niti nipøn xkatsø'øgidit, ¹⁵ nadyamiyoxiyidi ja Cristo pøn adøm nwindson'ajtyimp. Awejx'et meets idø'øn ja', ku pøn tyiknidøøwit tiku xpaduñ ja mjanchja'win jade'en, ku x'adsojimbettit, tsuj tuda'aky meets idø'øn ja xu'unt. ¹⁶ Yikxon meets idø'øn m'ø'y'att jøts xmøøt'attit jade'en ja m'aaw ja mjoojt jotkujk, jøts ku wyinaty pøn mdamigajpxyidi ja Cristo yjanchja'win, kø'øm ja kyajpxy ja myadya'aky ja ttatsø'ødyu'undit ku meets ja jade'en nugo mnitaayibyetyiyidi. ¹⁷ Øyts ja ne'egi ku ja øy'ajtin ngu'ayo'ombaajta'ant pøni jade'endam ja Dios kø'øm ttsøky jøts idø'øn jade'en ne'egi ngatu'unint ja axøøkpi ja yigaappi.

¹⁸ Jabi nayide'enxi Cristo kø'øm tø y'ayo'ombaati adøm nbøkyøjxp, tuk'ojkyi ja tø ttanaxy ja ayo'on. Øy ja y'ijty yja'øyyaa'y, ayo'ombaajt ja' adømgøjxp wine'en nga'øyyaa'y'ajtyindi, jøts jade'en ja Dios Teety xukwingunøjkxa'andi. O dø'øn ja ñine'kx wyindigøøy, jujky'ajtppts ja ixyam jadigojk. ¹⁹ Ja Espíritu Santo myøk'ajtin ja

yiknøjkxøø ma dø'øn jap namay anmija'win t'awejxti ja y'ayo'on di, jøts ttukmadøø ja nitso'ok'ajtin. ²⁰ Ya'atpi jaa'dyi ku yujuky'ajttøø ka' idø'øn ja tmøjpiktajktøø ja Dios sa ja Noé tjanigajpxy yam ja Dios ja yjanchja'awijxyidi. Ixyam idø'øn wyinaty ja Noé tyik'øyi tyik'abaadi ja møj barki ma dø'øn niwaani ñitsokti, niduktujk idø'øn ja'adi ka'pxy pøn jap barkijøtptyi yikanaanwidejtidi ja møj nøø, jøts jade'en sa kyajajttøø. ²¹ Yø'øbi nøøjts ndamiguy'ejxa'amp ja nøø midi tump ku nnøbajntin midi tø xukpaajtyim ja nitso'ok'ajtin. Ka'ap ja nøbajntin ja' wya'añ jøts ja ne'kx ja'ayi wya'ats'ejtindit. Ku dø'øn nnøbajntin, ja Dios idø'øn n'amido'owimp jøts ja nbøky xyikwaajtsa'ant. Jade'en'ampyts idø'øn ja nøbajntin tyuñ jøts ja nwindson'ajtim xukniwaajtsim ja ka'øyi pø ja'axi ja kyujukpyøjkijyññ jadigojk xemikøjxp. ²² Jøts ja øjts chajpety, øjts tpu'ixaagi ja Dios Teety y'aga'ngyø'ø'om, ja' tniwindsøn'ajtp ja ankilistøjk jøts wine'en y'etti niduki'iyi ja yikutujkpitøjkti, tum ja' amuum paajtip.

4

Jade'en nbadu'undit sam ja Dios ja ndunkjøøjp tø xmø'øyi

¹ Tøxi ja Cristo y'ayø, nayide'en meets idø'øn xkupiky'att ja ayo'on. Ku jade'en xu'undit tø wyinaty ja pøky xkayikmøj'atti, ² jøts jade'en mjaaktsøønidit ya naxwiiñ sam ja Dios kø'øm ttsøky'aty, jøts ka'ap ja mgø'øm ja' xu'undit, ja kya'øyi. ³ Tø meets xyikjotkidakøjy jekyip ku xpadundi y'ijtyip pøn ja Dios tka'ejxidip. Ja' y'agujkpy meets y'ijty mdsøøni ma ja axøøkpi yigaappi, ma ja awanax agojnax nayide'en xwindsø'øgidi xwinjawidi, midi idø'øn kapaat'ajtyip nbadu'unint. ⁴ Ja'abi jaa'dyi, kumaap ja tjawidi ku meets ja xka'ukpadu'unxiniyidi ja y'axøøkpi yigaappi tsinaa'yin, paty meets myikjigajpxy myikpagajpxy. ⁵ Ka'ap meets ja xmøjpikta'akt, kyøyaktip ja kø'øm ja tiy'ajtin jøts ja yiktiidyu'undit, ja' ja nøjkx tiidyuujnidip pøn ttiidyump ja oo'kpi jøts ja jujukpyi. ⁶ Ja' pøn tø y'oo'kni, tø yiktuk'ixy yiktuknijawi sudso dø'øn ja y'anmija'win xemikøjxp ndejint y'uktsøønit møøt ja Dios. Jaayip idø'øn ja ñamyayi tpadso'ondakni ja xemikøjxpit jujuky'ajtin ku ja Dios yja' tkupøjkijyidi, øy ja kawine'en yjayiktiidyundi ya naxwiiñ, tjapaatti tja'ejxti ja kajkin ja o'jkin ja'adi.

⁷ Wingtonixi jits kyudigøøgyøjxint tuki'iyi ja pikta'aky, paty meets ja y'øyi winmaa'ñ xyiktu'undit jøts xamija'myatsidit ja Dios. ⁸ Ja tsojkin meets idø'øn ne'egi mmøøt'ajtp, jabi yajkpxyi ja maa'kxujkin ja', jøts ka'ap ja tsep ni ja aki ja tkayikmajada'aky. ⁹ Nagyupøkidi mjønnotp mdøjkjotp, pøni pøn jam memp ja'tp, kidi ti x'ama'at'atti. ¹⁰ Kija' meets idø'øn xu'unt ja mdunkjøøjp sam ja Dios tø mmø'øyi jøts jade'en mnadyabudøkiyidit nixem niyam pøni sa Dios ja kunuu'kxin kox kida'ak tø mmø'øyi. ¹¹ Pøni jaa pøn tnigajpxwa'añ ja Dios yja', ja Dios idø'øn ja y'ayuujk ja wyinmaa'ñ ja yiktuujnip. Pøni jaa pøn myigu'uk tpudøkiwya'añ tuki'iyi dø'øn ja tyiktungøxt ja møk'ajtin midi ja Dios yajkpy. Jøts jade'en ja Dios Teety ndamøja'wa'ant ndagunuu'kxyja'wa'ant ja ndunkjøøjp nwindson'ajtim Jesucristo køjxp, pøn tu'ugyi ja øy'ajtin ja møk'ajtin tmøøt'ajtp xemikøjxp. Jade'en idø'øn yjatt.

Ku ja Cristo nbadu'unint, ayo'ombaajtim

¹² Meets migu'uktøjk, kidi kuma'ayin xjawidi ku møk m'ayo'ombaatti, kidi mnømdi ku jade'en kyapaat'aty. ¹³ M'øyjawip meets idø'øn ne'egi ku meets idø'øn Cristo møøt m'ayo'ombaaty, jøts nayide'en wyinaty xaxondaknidit ku tñanky'ejxit ja myøj'ajtin ja y'øy'ajtin ku wyinaty myeni jadigojk. ¹⁴ Jotkujk meets idø'øn mnayjawiyidit ku myikwingajpxtit myikpagajpxtit Cristo køjxp; jabi ja Diosxi meets ja y'Espiritu Santo mmøøt'ajtip. Axøøk yigaap ja nwindson'ajtim ja tñimadya'akti, ka'ap meets nayide'en, ja'axi meets mwindsø'jkip mwinja'wip. ¹⁵ Møk tsø'ødyu'unin møk payø'øyin ne'egi ñaxy ku nyikjaa'y'o'jkint ku nma'jtsint, ku tigati ndatøjka'ant ndakajpxa'ant midi'ibi adøm

xkapaat'ajtimp. ¹⁶ Ka'ats ja ne'egi chø'odyu'uni ku ja Cristo yja' ngu'ayo'ombaajta'ant. Ndamøja'wa'amp ndagunuu'kxyja'wa'amp adøm idø'øn Dios ja ne'egi.

¹⁷ Ixyam adøm idø'øn ndiidyunk tyuu'na'amp pøn jaty ja Dios ja'ajtidip. Møkts adøm ja ndiidyunk ñajxindit, ¿sats idø'øn ja yja' mye'endit kyida'aktit pøn ja Dios tkabadundip?

¹⁸ Jabi ja øyjaa'yts ja ñitsoojkin ñiyjøjxk tkapattip, ¿sats idø'øn ndejint tyimyjattit pøn ja Dios tkamimadoodip, pøn ja chinaa'yin tyiknajxtip pøky'agujkpy? ¹⁹ Patyts pøn ja Dios yja' tmi'ayo'ombaajtidip sam ja kø'øm tø tyamidsøkyidi, ka'ap ja mibaat t'ixmatstip ja y'øybi, tyun'etibyim ja'adi, amuum ja y'anmija'win ttamiyoxtit ja Dios pøn yikojidip yiktsoojkidip, nijuuni ja kyamajststu'udyidi.

5

Ku ja Cristo yjanchja'wibi yikajpxwejt

¹ Ixyam ngajpxwejwa'añ pøn jam mnigubajk'ajtiyidip, ja møjaa'dyøjkti, jabi nayja'abi tunkxi nmøøt'ajtpy, ja ku øts idø'øn kø'ømyi ndyimy'ijxy sa dø'øn ja Cristo y'ayo'ombaajty. Nbaatp øts nayide'en ja øy'ajtin sam nayide'en ja møjaa'dyøjkti, ku wyinaty ja nwindsøn'ajtim tø ttukmibaat'aty. ² Paty øts ixyam mee møjaa'dyøjk nnøjmididi jøts yikxon x'ejx'ettit pøn ja Dios yja' tpaduujnidip mididi meets tø myiktagidøki; kø'ømdsøky idø'øn meets ja xu'unt sam idø'øn ja Dios kø'øm ttsøky'aty, ka'ap akikøjxp jøts ni meengyøjxp ja xkatu'undit. ³ Kidi meets ja mgutujk nugo xamajada'aky, tuda'aky idø'øn ja xuu'mo'odit jøts ja m'øchinaa'yin xuk'ejxpajtin'attit. ⁴ Kuts jade'en wyinaty myeni ja møj ejx'etpi jøts meets xpøkt ja møj øy'ajtin mididi niwindem xøøw ja kyudigø'øyin kaja'tp.

⁵ Ixyam meets una'jktøjkti ngajpxwejwamidi, mimadoow meets idø'øn tuki'iyi ja kyutujk ja møjaa'dyøjkti, sam meets niduknax nixem niyam mnagyupøkidit. Jabi jade'ents ja wijkyajpxy wya'añ ku ja Dios ka' ttsøky pøn kø'øm namyøjpiktajkidip, jøts ja' tpuðøki y'øy'ajtingøjxp pøn tmøøt'ajtp ja tuda'aky'ajtin. ⁶ Ku xmiduda'aky'attit ja Dios myøk'ajtin, nay ja'ayi dø'øn kø'øm mgunuu'kxyidip ku ja xøøw jumøjt wyinaty tpaaty. ⁷ Tagidøkididi ja Dios tuki'iyi mididi mbamaadyip mbadajtip jabi ja'axi ja tyunk'ajtpy jøts adøm ja xtsojkint.

⁸ Nay'ejx'etidim, wijy kejy nabyikta'agidi; jabi oxii ma y'ixy kyø y ja miku', ja mmidsep pøn mduk'ixmatswajniyidip ja mjanchja'win. ⁹ Mimøk'atti, tamøk'atti ja mjanchja'win, ja'myatsti ku nayide'en ja mmigu'uktøjk y'ayo'ombatmididi o madsoo sam meets. ¹⁰ Ku adøm wyinaty tø n'uk'ayo'ombaajtyindi waani, xjats adøm idø'øn ja Dios xyik'øø'yandit jøts xmøøgyøjxindit ja møk'ajtin jøts jade'en nisa nga'ukjajtnindit. Xpa'ayo'ondip idø'øn ja Dios ku kawinmaañi xkunu'kxindi, jøts ku kø'øm tø xwaadsø'yim jøts adøm n'ejxindit nbaajtindit ja y'øy'ajtin ja myøj'ajtin xemikøjxp møøt ja Jesucristo. ¹¹ Tu'ugyi dø'øn ja Dios Teety myøk'ajtin møj mididi niwindem xøøw ja kyugøjx'ajtin kamemp. Jade'ents idø'øn ja yjatt.

Ja kajpxpoo'kxin mididi tyagugøjxiñip

¹² Yjanchpadumpy tuda'aky'ampy ja janchja'win yø Silvano adøm nmigu'uk. Ixyamts øts ja ndamigaxi tu'uk ja nøky mididi tø nja'ay jøts meets ngajpxwejwa'añ jøts ku Dios kyunuu'kxin tø mmø'øyidi jøts jade'en'ampy tñanky'ijxyi pøni ti jaty tø xpaatti x'ejxti. Mdsojkidip meets ja Dios jøts kidi mibaat x'ixmatsti, tu'ugyi yikxon xpanøjxtit.

¹³ Mdanigajxidip øts ja kajpxpoo'kxin ja Babilonia janchja'wibidi pøn ja Dios tø t'awaawmujkmi nayide'en sam meets. Nayide'en ja mgajpxpoo'kxmiyidi ja mixy Marcos mididi n'u'nkja'wip pøn øts xpudøjkip. ¹⁴ Nagyajpxpoo'kxidi nixem niyam sam tu'ugyi ja jaa'y ñamyayidi Cristo chojkingøjxp.

Jade'en ø nwa'añ jøts ja øy'ajtin xmøøt'attit pøn ja nwindsøn'ajtim Jesucristo yja'ajtpy. Jade'ents idø'øn yjatt.

JA MYĪMAJTSKPĪ NØKY MIDI JA PEDRO YJAAY

Ku ja Pedro tnijayi pøn tjanchja'widip ja nwindson'ajtim Jesucristo

¹ Øts idø'øn Simón Pedro nxøøw'ajtpy. Øts ja nwindson'ajtim Jesucristo nmidump jøts øts ja nayide'en ngudanaapy. İxyam meets ja nøky ndanigaxi pøn nayide'en tø xpaatti ja janchja'win sam øøts ja nja', ja'agøjxp ku ja nwindson'ajtim Jesucristo tyiyi kya'pxyi.

² Jade'en sam x'ejxtit xnijawidit ja Dios Teety jøts ja nwindson'ajtim Jesús, nayide'en idø'øn mdaja'adiyidit ja y'øy'ajtin kyunuu'kx'ajtin.

Ja' midi yiknigajxø'øgiyip pøn tjanchja'widip ja Cristo

³ Myøk'ajtingøjxp adøm ja Dios Teety xmø'øyim køx kida'ak midi xka'ejtxa'amp jøts jade'en øy tsuj ja ndsinaa'yin nyiknajxint, sam ja ajot'ajtin nayide'en yikmo'ot, jabi tøxi Cristo xuk'ijxyim pøn tø xwi'ijxyim xwigø'øñim y'øy'ajtingøjxp myøk'ajtingøjxp.

⁴ Nay yø'øbi køjxp adøm nayide'en tø xmø'øyim ja y'øybi, ja awejx'ajtin sam idø'øn ku tijy xyiknitso'okwa'añim ya naxwiñ, ma ja tigø'øyin kadye'eyin y'ity, jøts jade'en ja kyunuu'kxy y'øy'ajtin xukpaajtint. ⁵ Pøni nbaatwa'añimp idø'øn ya'at, ja janchja'win idø'øn nmøøt'ajtimp; ku ja wyinaty nmøøt'ajtyimp, winets ja tiichinaa'yin ja øchinaa'yin n'ixa'ayint; ku ja wyinaty tø nbaajtyim xjats idø'øn nbadøjka'ant sudso ja Dios yja'nnija'wa'ant midi tø ttanibiktaagi; ⁶ kuts ja wyinaty nmøøt'ajtna'am, jøts ja yja' jade'en nbaduujna'ant jøts adøm ja ngø'øm ja' n'ixwejtsint; kuts ja wyinaty jade'en tø ndu'uñim xjats idø'øn ja maa'kxujkin nbadøjka'ant jøts nyiktu'unint nixem niyam, jøts ja Dios yja' køx kida'ak jade'en nnadyamiyojxa'ant; ⁷ kuts idø'øn nmøøt'ajtna'ant xjats idø'øn ja nmigu'uk adøm nixem niyam møøt nnamyaajya'ant; jøts jade'en ja tsojkin nmøøt'ajtint midi kamastu'udyim yikja'wip.

⁸ Kuts ya'at xyikmøjidit xyikyajkidit midi mmøøt'ajttip, ¿ja ti nugo meets ndejint tø x'ejxni xnija'wiñi ja nwindson'ajtim Jesucristo? Jabi ka'axi ja mdsinaa'yin nugo xyiknaxtit ya. ⁹ Pønts ya'atpi winmaa'ñ tkaba'ayoodip, jade'en idø'øn tyimyjaty sam tu'uk ja jaa'y kube'ets kugoots y'etwa'añi kø'ømdsojkingøjxp; ka'ap ja t'ukja'myajtsni ku ja nwindson'ajtim Jesucristo ja pyojkpi tø tku'oogi jøts ku yam yjapaat'ajtniyi jøts ja chinaa'yin tyiktigajtsnit. ¹⁰ Jade'ents mee migu'uktøjkti, nanky'ejxidi dø'øn ku meets ja Dios tø mwi'ijxyidi tø mwigø'ñidi, jøts jade'en niti nima ja mjanchja'win kyawinguwopidit. ¹¹ Jøts jade'en wyinaty agujk jotkujk mdøjkiñidi ma ja nwindson'ajtim Jesucristo ja kyutujk ja yjaa'y ttanitani, ma ja yiknitsokpi xemikøjxp xyik'ejtint.

¹² Paty meets ya'at ejtp ndukja'myats'ett, øy yø xanija'wiñidi øy yø xjadamøk'ajtnidi Dios tyiy'ajtin midi mmøøt'ajttip. ¹³ Øy øts idø'øn ja njawi ku meets njaakajpxwejt, ku njaakajky'att, ¹⁴ jabi tøxi øts ja nwindson'ajtim Jesucristo xuknijawi ku øts tsojk ya'at naxwiñit nmajstutnit. ¹⁵ Tuki'iyi øts yø n'aaw njoojt nbikta'akt, jøts xja'dyangøxtit yø' kajpxwejin, jøts jade'en ku wyinaty tø nja'oo'kni njadigøøñi, ejtp yø xja'myats'ettit.

Pøn t'ejtøø wyemp y'amp sa Cristo tnanky'ejxøø ja myøj'ajtin

¹⁶ Øy meets mwa'ant ku myikwindaay'atti ku meets tø ndukmadøy ja ixpøjkin midi ñigajpxpy ja nwindson'ajtim Jesucristo myøk'ajtin jøts ku ja mye'ent jadigojk. Ka'ap øøts yø kø'øm tø nyik'øyi yø' madya'aky, jabi tøxi øøts idø'øn kø'øm ndyimy'ixy ja nwindson'ajtim y'øy'ajtin ja myøj'ajtin. ¹⁷ N'ejx øøts ku ja Dios Teety tyikjajty jøts ja Cristo ja windsø'jkin winja'win tpaatt, ku ja ñine'kx tyigajch jøts ku amuum chamaambijkyaju'uk agujkp. Nmadoow øøts nayide'en ja Dios Teety y'aaw y'ayuujk ku yide'en wyaañ: “Øts ya'at n'U'nk midi kawinmaañi ndsojknajxpy, midi øts İxyam øy yikxon ndajotkujk'ajtpy.” ¹⁸ Kø'ømxi øøts idø'øn ndyimyadøøy ja Dios Teety y'ayuujk midi

tsajpjøtpty kidaajk, jabi jamxi øøts wyinaty kojpkøjxp midi kunuu'kxy, møøt øøts ja nwindson'ajtim jam wyinaty.

¹⁹ Kidi yø'øypxi dø'on ja'ayi nugo ejxpajt'ajtp, pø tøxi ja Dios Teety ja kyajpxy tpaduñ midi ja kyugajpxy windi'ixyip yjaadyandøø. Øy'ajtp idø'on jade'en ku jade'en xu'unt ku xunk'attit yø'øbi kajpxy, yø'øbi ayuujk, midi ja wejin ja kajin xmø'øyimp jøts ja kugoots'ajtin jade'en xmajtstuujtint. Jade'ents Cristo ja yja' xagujajamp xagudøø'kxamp kunim ja mye'ent jadigojk jøts kø'øm ñanky'ejxiyitnim. ²⁰ Ja ku dø'on jawyeen kuwani xnijawidit jøts ku ja Dios kyajpxy ka' nugo øy pøngapøn nugo ajawi tjā'gyuki, ²¹ jabi ka'axi ja Dios kyugajpxy kyø'øm winmaa'ñ ttakajpxtøø. Dios Teety miyøxy ja'adi, jøts tñigajpxidi ja yja' sa jaty ja Espiritu Santo wyinmaa'nmyøøjyidøø.

2

Pøn ñanky'ixpøjkidip ja taay'ajtin

¹ Nayide'en idø'on Israelit jaa'y y'ejtmidi pøn ñadyijyi nañikajpxidip ja Dios kyugajpxy; nayide'en meets idø'on winaagin xnitaayibyajtmidit ja Dios yja', pøn idø'on kø'øm t'ejxma'tnidip ja nwindson'ajtim midi tø yiknitsø'gyidi; kø'øm idø'on ja myøj'ayo'on wyinaty tsojk t'ixa'adi. ² Namay idø'on jaa'y ja tpabøktit ja y'axøøkpi tsinaa'yin, jøts ja'agøjxpti wenk yiknimadya'akt ja Dios kyajpxy midi yiknitsoojkp. ³ Kuts ja meen ja t'amidit tjotpidit, jade'en meets idø'on mwigaadsidit mwibøkidit, ku o tigati kajpxy mdawindaay'atidit meengyøjxp; ja'atp idø'on ja myøj'ayo'on ja'adi, niti nitsoojkin, jabi jekyipxi dø'on tø yiktanibiktajkiñidi ku jade'en yjattit.

⁴ Ka'ap ja Dios tmaa'kxuujky ja y'ankilistøjkti pøn kamimadooijyidi, jagam idø'on ja tñajtswojpiyiñ mā ayodaajk jap, jøts jap kube'ets kugoots tsumy t'awejxti ja tiidyu'unin. ⁵ Nika'ap nayide'en ja Dios tmaakxuujkmi ja jaa'y pøn jekyip tsinaamyidøø ku ja Noé yjujky'ajty. Ja kom tuuxi dø'on tyanigajx, jøts jade'en tuki'iyi ja naxwii'ñit ñijaa'xni ñigomni, jøts jade'en y'o'jkøjxtøø ja ka'øyjaa'dyi. Ja'ayi tyiknitsø'jky ja niwixujkpi jaa'y jøts ja Noé pøn ja tiichinaa'yin tñigajpx. ⁶ Nayide'en tyikutujkmaa jøts kyudigø'odyit ja kajp midi txøøw'ajtøø Sodoma jøts Gomorra, jade'en tyikudigøøy, nugo jaam tyiktaañ, jøts jade'en t'ejxpajt'attit ja ka'øy jaa'y pøn wyinaty ja chinaa'yin tyiknaxwandipnim. ⁷ Yiknitsoojk ne'egi ja Lot, pøn y'ijty øyjaa'y'ajtp jøts pøn nayide'en tjanchø'odyunja'widip ja y'axøøk tsinaa'yindi. ⁸ Jabom jabom idø'on ja y'ijty yjotmay'øøky ku t'ixy tñijawi sa ja'abi jaa'y yjanch'adø'øtstøø. ⁹ Jade'ents idø'on, maajyip idø'on ja nwindson'ajtim jøts ja xpudøjka'ant mā ja yigaappi y'axøøkpi xmimajada'akwa'añim wine'en adøm tø nadyamiyojxna'andi ja nwindson'ajtim yja', jøts nayide'en myaa'miyi tyik'ayo'ombaatt øy pøn tundigøøbyidi ku wyinaty ja tiidyu'unin myiñ kyida'aky.

¹⁰ Yik'ayo'ombaattp ja Dios ja'adi dø'on pøn kø'øm ja y'axøøk tsojkin tpadundip jøts pøn ttekpya'an'ajttip ja nwindson'ajtim kyutujk. Namyikajxidip ja', ap tyimñayjawiidi; ka' ñadyijyi tyimchø'ogidi jøts tka'ømyigajpxti tka'ødyejti ja kutujk'ajtin midi jap tsajpjøtpty, ¹¹ yam ja ankilistøjkti niti nisa kyawa'andi jam nwindson'ajtim wyingujkp, jawaani møkts ja ne'egidi ja kyutujk.

¹² Nayide'en idø'on ja'adi sam ja jiyujkindi, niti ja'gyukin tkamøøt'atti, nugo ja yjujky'ajtin yikjujky'atyidi, ja'ayi t'awejx'atti sa ja myigu'uk tmatsttit uk yikmatsttit kø'øm, sa ja o'jkin tigø'øyin tpaattit. Tum wimbet ja tmadooijidi ja Dios yja'. Ka'ap ja tjagyapi ja madoogukin; tyimñayide'en idø'on ja y'ooktit sam ja jiyujkti nugo ñaxti, ¹³ kyu'ayo'ombaadidip sam ja myigu'uk tø tyik'ayo'ombaatti. Jotkujk idø'on ja tjanch'ukjawiidi ja y'øybi yjøkchpi midi pojin najxp; nugo dø'on ja chø'ødyundi ku meets ja mxøduñ møøt, jøts ñadyijyi yjanch'uknankyjotkujk'atyidi jøts meets ja jade'en xpabøkt.

¹⁴ Ka' idø'on ja tø'øxyøjk ja nugo t'ejxtit, ja' idø'on ja wyinmaa'ñ'attit jøts tmøøt'attit; ka' idø'on ja pøkyu'unin yjotnaxyidi. Ja win'øø'nik ja'ayi tyunk'ajttip jam mā pøn ja yjanchja'win kyamøjkidinim; tuki'iyi tniwa'anwa'angøjxti ti jaty ja myigu'uk yja'ajttip;

ja dø'on møk ayo'on ja Dios ttukpaadidip. ¹⁵ Abiktyuu' idø'on tø tpabøknidi ku ja tiidyuu' tø t'ixmatsti. Wa' idø'on ja y'ejxpajtin pyaduuñidip ja Beor myajnk midi Balaam xyøøw, pøn ñadyijyi kyajpxnajx ja Dios yja'. Ya'at jaa'y, o dø'on ja tigati ttunwaañ, jøts jade'en ja meeñjingaap taagyøjxp tpaaty, ¹⁶ kunim idø'on ja Dios tu'uk ja jachu' tyikajpxt jøts ja pyøky yiktawindsø'ty jøts jade'en ja kyujuun'ajtin tka'ukyikmajada'knit.

¹⁷ Jade'en idø'on ya'at jaa'dyi sam tu'uk ja tøøts nøømu'ut ni tukxa'kx ja ñøø. Nayide'en ja'adi, sam ja poop yoots midi katuup, nugo pyojwidity; jap idø'on ja kyastigi agootstujpy tø yiktanibiktaajkiñidi. ¹⁸ Jabi tum wenkxi ja myadya'aky ja'adi, tum ja katumbi kyajpxy'ajttip, jøts ja jaa'y twindaay'atti ku ja y'axøøk winmaa'ñ ttukpadundi yam ja wyinaty namnim tø tja'uk'ixmajtsmidi ja'abi tsinaa'yin. ¹⁹ Ja tsinaa'yin ja tyaguwa'anidip ma øy sa y'adøtsnedit. Tø ja kø'øm tniymiwanajajtnidi jiyujkin ja axøøkpi tsinaa'yin. Ku pøn nugo tyimykajada'aky yø yjade'embi, janch amøñi dø'on ja tpaduñ øy yjawi sa tmijajtni. ²⁰ Jawaani møk idø'on ja ayo'on tpaattit pøn ja nitso'ok'ajtin tø t'ukpaaty nwindson'ajtim Jesucristo køjxp, jøts jadigojk ja kya'øy'ajtin tpadundøjkigyojmidi. ²¹ Ne'egi øy jeexyip tpaaty ku jeexyip tkanijawidi ja tiichinaa'yin, jøts jade'en jeexyip tka'uk'ixwejtsni ja Dios kyutujk midi øy midi wa'ats, midi wyinaty tø y'ukyikmo'odi. ²² Jabi tøxi dø'on ja' ayuujk tyiy ku jaa'y y'ukwa'añ ku ja uk ja y'iich jadigojk tniwimbity, jøts ku ja kuch midi namdseepnim jits ja jadigojk nay jaayi ja mo'onts tsemujkojmi. Jade'en idø'on yø ndejint yø'øbi jaa'dyi.

3

Ku ja nwindson'ajtim mye'ent jadigojk

¹ Meets migu'uktøjkti, ya'at idø'on myimajtsk nøky midi mee ndanija'ayip. Nayide'ents meets ixyam ndanijayi sam jawyeen, jøts ku meets x'ejxkapt ja tiowyinmaa'ñ midi ngajpxpatpy. ² Jade'en ø nwa'añ ku meets xja'myatst ja Dios kyugajpxy sa ja y'ayuujk tyikwaañ pøn ja Dios tø ñadyamiyøxyidi, jøts nayide'en xja'myajtsmidit ja nwindson'ajtim kyutujk pøn yiknitsoojkp, sam øøts tø nnigajpxy pøn ja kyudanaabyi'ajttip.

³ Jawyeen idø'on tyimbyaat'aty meets xnijawit ya'at: ku wyinaty myeni kyidakni ja tiidyu'unin, winets idø'on ja jaa'y kyaxøøktit midi tyaxe'ektip tuki'iyi ja Dios yja', jøts nugo tniðsøønidit midi axøøk wyinmaa'njyøtpy myøøt'ajttip, ⁴ jøts yide'en wya'andit: "¿Samts idø'on ja Cristo y'ayuujk tø yjajtni kuts idø'on ja tijy wyimbett jadigojk? ¿Windemnimts idø'on ja yjatt? Jabi nitits kyamiñ kyaja'aty, jade'eñim y'ity sayim ja n'apteety tyiknaxtøø." ⁵ Kyaja'myajtstip idø'on yø' ku naxwii'ñit kawinaak ojk tø yjadigach, jabi windi'ixyipxi ja tsajp ejtni jøts ja naajx pyidsimñim nøøjøtpy, Dios Teety y'ana'amingøjxp. ⁶ Kyaja'myajtstip idø'on nayide'en ku ja Dios kawinaak xøøw anaduu' tkejxy, jøts ja naxwii'ñit jaa'y jade'en kyudigøøgyøxtøø. ⁷ Y'awixy'ajttip idø'on yø', jawaani møj ja ayo'on midi wyinaty memp sam ja kø'øm tø ttanibiktajkiñi ku tnajtskaxit ja jønyow. Ja'abi jøøn idø'on yiktøoyidip ja ka'øyjaa'dyi ku wyinaty ja tiidyu'unin ñaxy.

⁸ Mnija'wip meets nayide'en ku ka'ap ja nwindson'ajtim ja xøøw ja jumøjt tmøjpikta'aky, jade'en ja t'ixy ja tu'ukpi xøøw sam ja tukmilbi jumøjt. ⁹ Kidi meets mwinmay sam winaagin wya'andi ku ja nugo tyaa'ni ku kyamiñ jadigojk sam ja kyajpxy tø tpikta'aky, møk idø'on tyuda'aky'ajtin ja tyikmajada'aky jøts ja jadine'en xmaa'kxujkyim. Ja' chøjkpy jøts ka'ap pøn nugo wyindigøøty jøts ja ndsinaa'yin nyiktigajtsint.

¹⁰ Jade'en idø'on ja nwindson'ajtim jotkumoni ja tyiidyu'unin tmøøtja'att, jade'en sam maa'tspa'an adsu'jkyi koots myiñ yam niti kyayikjøp'ixy. Kuts ja nwindson'ajtim yja'att jade'en, winets idø'on tsajp pyømemga'akt ku ja kyudigøøyin tø myeni. Winets tyøøbyøjkøxnidit tuk'ojkyi ja tøø'kxpi tsamambi midi jam tsajpwemp, jøts yø naxwii'ñit tuki'iyi tyigøøñit jønyow agujkpy.

¹¹ Jabi jade'enxi dø'øn ja ayo'on ñaxkida'akt ya naxwiiñ, jjadits adøm idø'øn nganadyamiyojxa'ant ja Dios! ¹² Yikyijyidi ja mxøøw ja mjumøjt jøts ja yja' xyikmayidit, jøts jade'en chojkit ja xøøw ja jumøjt ku wyinaty kyudigøøgyixy jønyow agujkp tuki'iyi midi jam tsajpwemp jøts ya naxwiiñ; ¹³ ja'ats idø'øn adøm n'awejxindip ja jembyi tsajp ja jembyi naajx midi ja Dios tø tni'adsowi kø'øm, ma dø'øn niduki'iyi ja jaa'y ja y'øybi ja tyiiby i ttu'undit.

¹⁴ Paty meets migu'uktøjkti, ku ya'at xjøp'ijxy'attit, tum ja' meets mdu'ump midi ja Dios chøjkpy, tsokti ja tuda'aky'ajtin, nixem niyam mnamyayidi jøts jade'en ja Dios mbaadiyidit niti pøky niti kadyeey. ¹⁵ Ja'gyukidi ku ja nwindson'ajtim tsojk kyamiñ, paty idø'øn ja ttuñ jøts nyikmøja'ant nyikmaya'ant ja nitso'ok'ajtin, ja tyuda'aky'ajtin idø'øn ja jade'en yiknigaxi'kpy. Nayide'en meets idø'øn tø mdanija'ayimidi yø'øbi winmaa'yin ja Pablo, adøm nmigu'uk, ku tyiktuñ ja ja'gyukin midi ja Dios tø myø'øyi. ¹⁶ Tum ya'atpi i xpøjkin idø'øn kyajpx'ijtpy ma ja nøky ja jaa'y ttanijayi, øy idø'øn ja muum tsep ku nja'gyukiwya'anint, jaa dø'øn ja kaja'gyukibidi, jøts pøn ja yjanchja'win kamøktaktipnim tum wenk idø'øn ja i xpøjkin ja tjuutti, ka'ap jade'en ja Pablo yjawa'añ ñøkyjøtpy. Nayide'en idø'øn ja ttumidi tuki'iyi ja Dios kyajpxy kyø'ømgudigø'øyingøjxpti.

¹⁷ Paty mee migu'uktøjkti, jabi mnija'wiñidipxi meets ya'at tuki'iyi. Nay'ejx'etidi jøts ka' xpabøktit sa yø' jaa'y wya'andi, ku taagyøjxp myikpøjkiwya'andi ja mjanchja'win. ¹⁸ Ne'egi ja' pawinmaydi sa ja nwindson'ajtim Jesucristo ja tyiy'ajtin xnija'wiyidi. Yikmøjidi ja tsojkin ja pa'ayo'owin midi ja yiknitsokpi tø xmø'øyim, pøn ja y'øy'ajtin myøj'ajtin xemikøjxp ejtp. Jade'ents idø'øn yjatt.

JA MYËDU'UKPÏ NØKY MIDI JA JUAN YJAAY

Ja' midi xyikjujky'ajtindip

¹ Ya'atpi nõky øø nguejxpy, jøts mee ndukmadøy ja Jesucristo, ku ja jaayim wyinaty ku cho'ondakijxy tuktsajp'agida'aky. Nay ja' øø tø n'ixy tø nmadøy jøts nayide'en øø tø ndukpaaty ja ngø' ndeky; yø' y'ayuujk yø' wyinmaa'yin adøm ndajujky'ajtyindip. ² Tø ja ñankñigaxi'igiyi, øøts tø n'ixy øøts tø nnijawï, paty mee ndukmadøy ixyam ku ja ejtp møøt chøøni ja Dios Teety, tøts idø'on ixyam xnimi'iñindi. ³ Tyiibyï øøts ndyimñigajpxy midi øøts idø'on tø ndyimy'ixy ndyimyadøy; paty mee ndukmadøy jøts meets m'ett amuki møøt øøts, kumi tyimdyiy tyimyjanch ku øø møøt n'ity ja Dios Teety jøts nayide'en møøt ja y'U'nk Jesucristo. ⁴ Yø'øbi ayuujk yø'øbi winmaa'yin meets ixyam ndanija'ayip jøts yikxon ejtni xoni mwinmaa'ñ y'ettit.

Janch wa'ats ja Dios ejxim ja jajin

⁵ Yø' øøts nnigajpxwampy yø øy'ayuujk yø ømyadya'aky midi øøts ja tø xukmadøy: jøts ku ja Dios Teety janch øy janch wa'ats ejxim ja jajin, jøts niwine'enin ja ka'øy'ajtin tkamøødi. ⁶ Kuts nwa'a'ñindi ku ja Dios Teety nmøøt n'ijtyindi jøts nika' n'ukpaduu'na'andi ja n'ayuujk, nugo adøm ja nmidundigøy adijchindi. Yø' idø'on møj taay ku jade'en nugo nwa'a'ñindi. ⁷ Kuts ndsinaa'yindit øy wa'ats ejxim ja Dios Teety chøøni, winets nixem niyam tu'ugyi ja winmaa'ñ nmøøt'ajtindit, jade'en idø'on ja y'U'nk Jesús xyikpøkwyaaajchindi midi jaty ndu'uñindip ku ja wyidsuun wyidajxy. ⁸ Xjats ku nugo nichøky nwa'a'ñindi jøts ku ka' ndundigøø'yindi, nugo kø'øm nnawyindaay'ajtya'andi jøts tiy ngakajpxyindi. ⁹ Kuts ndamimadyakøxindit ja Dios Teety nbøky, njøp'ejxindip ja' ku ja ttu'unt midi paat'ajtip, jøts nay ja xpojkipmaa'kxindip jøts nay ja' jaty xyikwaajtsindip midi jaty adøm ndundigøø'yin'ajtyindip. ¹⁰ Kuts nugo nwa'a'nint ku ka'ap nbøky nmøøt'ajtyindi, jade'en idø'on ja nbiktaajkyindi jøts ku ja tyaa yi ja Dios Teety, niwine'enints jade'en ngamimadoo'ja'ant ja kyajpxy ja y'ayuujk.

2

Jesucristo amuum xnikajpxuujtimp

¹ Meets u'nkti unajkti, ya'at meets ndukmadøøpy tuki'iyi ku ka'ap mbøkyu'undit, jøts pøni pøn wyinaty sa tyimyajtp paty xnijawidit ku jaa nmøøt'ajtyindi tu'uk ja nikajpxutpi jam Dios Teety wyingujk, ja Jesucristo dø'on ja' pøn janch, pøn tiy. ² Tø ja Jesucristo tku'ayo'ombaadi adøm ja nbøky, jøts nigidi adømyipti, niduki'iyi dø'on nayide'en ja naqxwii'ñit jaa'y.

³ Pøni nbadu'uñindip ja Dios ja kyutujk sa ja tø xuk'ijxyindi xuknija'wa'andi, jade'en'ampts adøm ja x'u'nkja'wa'ant. ⁴ Jøts pøni pøn wamp ku ja y'u'nk'atyiyi ja Dios jøts nika'ap ja tpaduujniyi ja kyutujk, ja' nugo kajpxigøøpy, nugo ja tyaa yi. ⁵ Jøts pøni pøn amumjoojt nadyamidsøky'ajtip ja Dios, ja'ats tpaduujnip ja Dios kyutujk; jade'ents ja yiknijawï ku nwindson'ajtim ja møøt y'ity. ⁶ Pøni pøn tyimwyamp ku møøt tyimy'ity ja Dios, wants nayide'en tyiknaxy sami Jesús tyiknajxy.

Nbadu'unimp ya'at jembyi ana'amïn

⁷ Migu'ukti, ka'ap meets ja jemgyutujk ixyam ndanijayi; nay ja' yø' midi mee tø xmadowdi xnijawidi ku ja mdsinaa'yin xyiktso'ondaktøø jadigojk. ⁸ Yø' meets ixyam njaaktukmadøøpy, yø kutujk, midi janch øy janch tump, øgyajemgyutujk, ja ku ja xem ja yam nnachojkindit jade'en sa ja Cristo ttuun, jøts mbaat'ajtiyip meets nayide'en xu'unt. Yø'øbi winmaa'ñ tyikudigøøpy ja ka'ødyunk, jade'ents ja tsinaa'yin y'øyi pyaadi.

⁹ Jøts pøni pøn nugo wamp ku ja tpaduñ ja jemchinaa'yin, yam ja myigu'uk ja tmi'ambikñim tmijotma'atynim, ja ka'ødyunk ja wyinaty pyadun'adichpnim. ¹⁰ Pøni pøn twamp ttsojpk ja myigu'uktøjkti øpyøni, ja' idø'øn tpadump ja øchinaa'yin jøts niwine'enin ja pyøky kyanadyukpaadyi jade'en. ¹¹ Jøts pøni pøn ja myigu'uktøjk tmi'ajkidip, ja' nugo tsinaapy ka'ødyunk agujkpy, ka' tnijawi pøni ti tyumpy kyajpxy, jade'en ja wyimbejtnei ejxim ja kugoots jaa'y.

¹² Meets u'nkti meets una'jkti, ixyam mee nnijayi jøts ndukmadowdi ja'agøjxp ku ja Dios Teety tø mbojkmee'kxyidi Jesucristo køjxp. ¹³ Teetyi taakti, nayide'en meets ixyam ndukmadø y'a'at ayuujk kumi tø mee xpabiky ja Jesús yja' midi jaayim wyinaty ku cho'ondakijxy tuktsajp'agida'aky. Meets wajtyøjkti meets kiixye'edi, ixyam mee ndukmadø y'a'at ayuujk kumi tø xmimajada'akti ja miku' yja'.

Nayide'en meets u'nkti meets una'jkti ndanijayi ya'at ayuujk, kumi tø m'u'nk'atyidi ja Dios Teety. ¹⁴ Meets teetyi taakti, jade'en meets ixyam ndanijayi ya'at ayuujk kumi tø xjanchjpabøjkti ja Jesús yja' midi jaayim wyinaty ku cho'ondakijxy tuktsajp'agida'aky. Nayide'en meets wajtyøjkti kiixye'edi ixyam ndanijayi ya'at ayuujk ku ejtp mjanchmøkwinmaydi jøts ku ja Dios Teety kyajpxy y'ayuujk tø xpabøjkidi amumjoojt, jøts nayide'en ku tø xmimajada'akti ja miku' yja'.

¹⁵ Kidi nugo xtsojkti ja pøkyunk ni ja pikta'aky midi ya' ejtp naxwiiñ. Jøts pøni pøn t'anømp t'adsojpk ja pøkyunk jøts nika' ja Dios Teety ne'egi ttsøky'aty jade'en. ¹⁶ Yide'en idø'øn ja naxwii'ñit jaa'y tjanchojkti ja pøkyunk midi winmaa'ñjøtpy mee'nxidip, jøts midi tyimchuj'ejtjip tyimchujawidip. Ja'ats nugo ja pikta'aky nadyamøja'wiyidip, ja' ja nugo pyawinmay'ejtjip midi jaty jaa kayik'ødyump ya' naxwiiñ, yamts ja Dios Teety ja jade'en tø tkadanibiktaagi. ¹⁷ Windigøøpy y'ity midi yikpøkyump ya' naxwiiñ, midi nugo yiktsojk anaxp; jøts pøni pøn tpadump sa' jaty ja Dios ttsøky, ja'ats y'anmija'win xemikøjxp jujky'atp.

Pøn miøbjkip ja Cristo, jøts pøn ja kamibøjkkip

¹⁸ Meets u'nkti una'jkti, tø jabaat tpaaty ja et ja xøøw ku myenwa'añ tu'uk ja jaa'y pøn ja Cristo møk myidsep'atwampy, pøn meets nayide'en tø xnijawi xnimadø; ixyamts nayide'en tø kyaxø'knidi namay pøn tmidsep'ajttip ja Cristo, paty jade'en yiknijawi ku tø jabaat ja et ja xøøw tpaaty. ¹⁹ Nay adøm nmigu'uk jade'en winaagin adøtstip pøn adøm tø xmajtstuuftyindi paty ja tmidsep'atwa'andi ja Cristo; nigidits ja' pøn adøm nwinmaa'ñ møøt tuknaxti, ku jeexyip ja'adi, tø ja jeexyip møøt ndaa'ñindi. Jade'en idø'øn jyaty ku winaagin xpuwaajchindi, paty wa'ats yiknijawi ku ka' yikxon tmøøt'atti ja winmaa'ñ sa adøm nja'.

²⁰ Adømms ja Cristo tø xuktatøjka'andi ja Espiritu Santo, ja'agøjxp ixyam nnija'wa'andi ja tyiiby'i ja yjanchpi. ²¹ Paty meets ixyam nnijayi ku xnijawidi midi tyy midi janch, ka'ap ø nwa'añ ku ka' xnijawidi; wa'ats mee xnijawi ku ja tyiiby'i ja yjanchpi ka' nayide'en sa ja taay.

²² ¿Pønts idø'øn taay'ajtp? Ja'ats idø'øn pøn wamp ku ja Jesús ka' yiknitso'ok'aty. Pø ja'axi tkawamp tkatsojpk ja Dios Teety møøt ja y'U'nk Jesús. ²³ Pøni pøn tkawandip tkatsoktip ja Dios Teety y'U'nk, ja Dios Teety idø'øn wyinaty jade'en kayiktsojpk; jøts pøni pøn twandip ttsoktip ja y'U'nk Jesús, ja Dios Teety idø'øn wyinaty jade'en yiktsojpk.

²⁴ Paty øøts idø'øn nnigajpxy jøts xwinmaa'ñ'attit ja øgyajpxy ja øy'ayuujk midi tø xpabøkti jøts midi yajkpy ja øchinaa'yin; pøni mwinmaa'ñ'ajttip yø', jade'en ja Dios Teety jøts ja y'u'nk Jesús møøt n'ijtyindi. ²⁵ Kumi Jesús kø'øm ñi'adso'owi ku ja xmø'øyint ja øchinaa'yin midi xemikøjxp yikmøøt'atp.

²⁶ Ja'agøjxp mee nnijayi ku nugo myikwindaayidit. ²⁷ Pø tøxi ja Jesucristo mmø'øyindi ja Espiritu Santo, paty ka' pyaat'aty jøts pøn jadu'uk mgajpxwejiyidit, pø ja Espiritu Santoxi mee kø'øm myikwejiyip myikajiyip midi tyy midi janch jøts ka' tyaayi. Meets

migu'uktøjkti, jade'en idø'øn y'ejxi tyiyi jøts yikxon mdsøønidit mdanidit amuki møøt ja Cristo, jade'en sã kø'øm mdukjatyidi ja Espiritu Santo.

²⁸ Jøts jade'en wingujk jotkujk njøp'ejx'ejtindit ku ja mye'ent ja Jesús, jøts jade'en ka' nmitsø'ødyu'unindit. ²⁹ Pø tøxi meets xnijawi ku ja Jesucristo y'øyi tyiyi, jøts kuwani xnijawidit nayide'en jøts ku pøn øy tiy yjaa'y'aty, ja'ats ja Dios u'nk'ajtiyip.

3

Sã ja Dios x'u'nk'ajtyindi

¹ Ejx ja Dios Teety xjanchøjkyindi, jøts ja wya'añ ku ja x'u'nk'ajtyindi x'una'jk'ajtyindi, pø janch jade'enxi adømdi. Pø patyimxi adøm ja ka'ødyumbi xka'ejxkajpyindi xkanija'windi kumi ka'ap ja t'ejxti tnijawidi pøni pøn ja Dios Teety. ² Migu'uktøjkti, tø dø'øn ja Dios x'u'nkpijkyindi xmaa'byijkyindi; ka'anims xuknija'wa'andi pøni sudso njaa'y'ajtindit wiingyubety. Ja'ayi nugo nnija'wa'andi jøts ku ja Jesús ñankñigaxøøkwa'aníyi jadigojk, jøts jade'en njaa'y'ajtindit njujky'ajtindit nayide'en sam ja', pø yik'ejpxi ja' sam idø'øn ja chøøni tyani. ³ Pøni pøn tjøp'ejxp jade'en, ja'ats nay'ejx'ejtip jøts ja pøky kyapaadit, jøts ja jade'en chøønit sami Jesús wya'ats'atyin.

⁴ Jøts pøni pøn tundigø'y'ejtp, ja' Dios kyutujk kyamøjpktaajkidip, pø yø'øxi tundigø'øyin'ajtp ku ja Dios kyutujk kyayikmimadøy. ⁵ Pø tøxi mee xnijawi ku ja Jesucristo ya tø myiñ naxwiiñ jøts adøm xyikpøkwyaaajtsindit, jøts nayide'en xnijawidi ku ja janch wa'ats, ni tu'uk ja pøky tkamøødi. ⁶ Jade'en idø'øn, pøni pøn møøt y'ity ja Jesús, ka'ap ja jade'en y'ukpøkyun'adøtsnidi sam ja jaa'y pøn tkidyimñija'widip ja Jesús. ⁷ Meets u'nkti unaj'kti, kidi nugo myikwindaayidi; pøn y'øybi tyiiby' tpadump, yø' idø'øn øy jaa'y'ajttip nayide'en sam ja Cristo y'øy'ajtin wya'ats'atyin. ⁸ Pønts ejtp tyimdyundigøøpy, ja miku' yja' pyaduujnidip, pø ja'axi jade'en tyiktso'ondaajk ja pøkyu'unin ja win'øø'nin. Paty idø'øn ja Jesús ojs myiñ jøts ja tyikudigø'øty ja miku' pyøkyu'unin, ja wyin'øø'nin, sã jaty ja y'adi'ich.

⁹ Ka'ap y'ukpøkyunidi pøn ja Dios u'nk'ajtniyidip, pø ja'axi kø'øm møøjyidip ja myøk'ajtin; paty ka' nugo y'ukpøkyun'adøtsnidi, pø Diosxi u'nk'ajtniyidip. ¹⁰ Yide'en'ampy idø'øn yiknijawi pøn ja Dios u'nk'ajtidip jøts pøn ja miku' u'nk'ajtidip, kumi ka'ap ja Dios ja tja'aji pøn ja myigu'uk tkatsojktip, jøts pøn tundigø'y'ejttip.

Nachojkindip ja xem ja yam

¹¹ Yø'øbi kajpxy yø'øbi ayuujk midi mee tø xnijawi ku ja m'øchinaa'yin xyiktso'ondaktøø, yø' idø'øn tyijpy ku nnachojka'andit nixem niyam. ¹² Jøts ku ka'ap jade'en njaa'y'ajtindit sam ja Cain ku ja y'uch ja tyik'øøjky, ja' pyadumpy ja miku' yja'. ¿Ti ja tyuku'o'jkøø? Ja'agøjxp ku ja tkabaduñ ja miku'.

¹³ Meets migu'uktøjkti, kidi sã xjawidi ku mmi'ambøjkidit yø ka'ødyumbidi. ¹⁴ Tø adøm nmajstuujujtyindi yø ka'ødyunk jøts ja øchinaa'yin tø nbabijkyindi, jade'en idø'øn yiknijawi ku nixem niyam nnachøjky'a'andi. Pøni pøn tkawamp tkatsojpk ja myigu'uk, ja' pyadun'adichp ja ka'ødyunk. ¹⁵ Jøts nayide'en pøn tmi'ambøjpk tmijotmatp ja myigu'uk jade'en ja pyidsømni sã yikjaa'y'lookpi, pø mnija'wixpi meets ku ka'ap ja yikjaa'y'lookpi y'anmija'win y'ity xemikøjxp, windigøøpy ja'. ¹⁶ Nnija'windip sã Jesucristo xtsøjkyindi amumjoojt, paty adøm ja xku'o'jkandi; jøts nayide'en adøm ja xpaat'ajtyindi ndsojkindit ja nmigu'uktøjkti sam adøm tø nyiktsøjkyindi sam adøm tø nyiku'o'jkandi. ¹⁷ Pøni pønts jotkujk tyiknaxp, yja'ijxpy ku ja myigu'uk y'ayøywinmay, niwine'enin tkidyimdy'a'ayo'ixy ja pyikta'aky midi ja myøøt, ¿sudsots ja nugo wya'añ jøts ku Dios ja twa'añ ttsøky? ¹⁸ Meets u'nkti unaj'kti, ka'ap y'øyi ku nugo nwa'anindit jøts ku nmigu'uktøjkn dsøjkyindi; yø' ne'egi øy ku ndyimbyadu'unindit tiy janch. Yø'øts jade'en wingaxø'kp ku ja nachoki amumjoojt yikmøøt'aty.

Sudso jotkujk nnayja'wa'ant Dios wyingujkp

¹⁹ Jade'en idø'øn yiknijawijøts ku nbadu'uñindi ja tyiiby ja yjanchpi, jøts jade'en idø'øn niti ngagumaa'yindit Dios wyingujkp; ²⁰ kuts kø'øm nnañi'øø'na'andit, ku nmaa'yindit ndajindit ku ja Dios tø x'u'nkpijkyindi, pø kø'ømxi ja jade'en tø xtsøjkyindi jøts møj ja', ja' tuki'iyi tnija'wip sa adøm njawinmaa'yindi. ²¹ Jøts ku ngamaa'yindit ngatajindit winets ngatsøjka'andit jam Dios wyingujkp. ²² Ja' adøm tuki'iyi xmø'øyindip ti jaty adøm n'amidowa'añindip nbøktsowa'añindip ja'agøjxp ku nbadu'uñindi sa ja x'ane'emyindi pøni sa ja ttsøky. ²³ Yide'en idø'øn ja y'ana'amin ku njanchja'windi ja y'U'nk Jesucristo, jøts nayide'en nachojki'indit nixem niyam sam ja Jesús kø'øm xa'ane'emyindi. ²⁴ Pønts jade'en tjanchpadundip ja y'ana'amin, ja'ats ja Dios tmøøt'ejtjip jøts ja nayide'en myøøt'ityidi. Jade'en'ampy nnija'windi kudam ja tø xuktatøjka'andi ja y'Espíritu Santo jøts ja jade'en kø'øm xmøøt'ijtyindi.

4

Ja Espiritu Santo jøts ja' midi tkaminamyajjip ja Cristo

¹ Mee migu'uktøjkti, kidi nugo xmibøjkti ja jaa'y pøn wandip jøts ku ja tnigajpxidi ja Dios y'øgyajpxy ja y'øy'ayuujk, ejxti yikxon pøni janchpi tyiiby dø'øn ja kyajpxtip, pø may adøtstipxi ja jaa'y ya naxwiñ pøn windaay'ajttip. ² Yide'ents meets ja xnijawidit: ja' idø'øn ja wyinatyi pøn tjanchja'widip jøts ku Jesucristo ya y'atsnanky'ejxøø tyimyjaa'yin, ja'ats idø'øn ja Dios Teety møøt'y'ity. ³ Pønts jade'en tkamibøjkp ja Jesús, ja'ats idø'øn ja Dios Teety kamøøt'ejtjip; ja ka'øwyinmaa'ñ ja ne'egi yiktumpy midi tkaminamyajjip ja Cristo. Tøxi xnimadowdi jøts ku ja mye'ent ja ka'ødyumbi øy juuni; tøts idø'øn ja yjanchmiñ, pø jaanixi ja wyinmaa'ñ ja ya naxwiñ.

⁴ U'nkti unaj'kti, Dios mee mja'ajttip, tøxi xmimajada'akti pøn mwindaay'atwajnidip; pø tyimyøkxi ja' pøn mee mmøøt'ejtjip jøts nika'ap ja jade'en myøki ja ka'ødyumbi yja'. ⁵ Ja' ja nugo tyunk'ajttip ja ka'ødyunk ja ka'øwyinmaa'ñ paty ja tum jap ttuk'ixpøkti ja jaa'y jøts ja jade'en yikmøjawidit. ⁶ Diosts adøm xja'ajttindip jøts ja xmibijkyindi pøn jaty ja Dios møøt'ejtjip. Ja'ats xkamibøjkindip pøn kamøøt'ejtjip ja Dios; jade'en'ampyts nnija'wa'an pøn tpadundip ja y'øybi ja tyiiby jøts pøn tpadundip ja taay'ajtin.

Dios amuum ja tsojk'ajtin myøøt'ajtpy

⁷ Mee migu'ukti, xpaat'ajttindip ejtp nixem niyam nnachojkandit, jabi Dios wyingujkpxi chøøñ ja øchojkin. Pøn ja myigu'uk ttsojkp, pøn ja myigu'uk tpa'ayoop, ja'ats idø'øn ja Dios tjanchja'wip jøts ja jade'en y'u'nk'atyiyi. ⁸ Pøn tkatsojkp tkaba'ayoop ja myigu'uk, ja'ats tkidyimyjanchja'wip ja Dios, kumi ejtp ja Dios ttsøky ja jaa'y, ejtp ja tpa'ayøy. ⁹ Jøts adøm ja ojts xani'ejxa'andi sa ja xjanchøjkyindi xpa'ayø'øyindi ku ja tyu'umtspi U'nk ja ojts xaniguejxyindi, jøts ja øchinaa'yin xmø'øyindi y'oo'kingøjxp. ¹⁰ Yide'en'ampy idø'øn ja Dios chojkin ja pya'ayo'owin y'ejxi tyiyi: pø nigidi adømxi ja tø ndsøjkyindi nba'ayø'øyindi jawyeen, pø ja'axi adøm kø'øm tø xtyimchøjkyindi jøts ja y'U'nk ja xaniguejxyindi jøts ja xku'ayo'owandit ja nbøky.

¹¹ Migu'uktøjkti, pøni tødam ja Dios xtsøjkyindi, ti kuts adøm nganachøjkyindi nayide'en ja xem ja yam. ¹² Pøn ja Dios tø t'uk'ixy, nipøn ja tka'ixy; pøni nachojka'andipts nabya'ayo'owa'andipts nixem niyam jade'en ja xmøøt'ijtyindi jøts ja jade'en njaaktyimchojkint. ¹³ Nnija'windip ku ja Dios møøt'n'ijtyindi jøts xnamyøøt'ejtjip ja nayide'en, ja'agøjxp ku ja tø xuktatøjka'andi ja y'Espíritu Santo. ¹⁴ Tø øøts n'ixy, tø øøts nnijawi wemp'am, paty øø nwa'añ jøts ku ja Dios Teety tø tjanchkexy ja y'U'nk yiknitsokpi ya naxwiñ. ¹⁵ Pønts tjanchja'wip jøts wya'añ ku ja Jesús Dios U'ngi, ja'ats ja Dios tmøøt'ejtjip jøts nayi møøt'ejtjip ja nayide'en.

¹⁶ Jade'en'ampy adøm ja tø nnija'wa'andi jøts ku xjanchøjkyindi xpa'ayø'øyindi ja Dios. Pø ja'axi ejtp tsojkp, pø ja'axi ejtp pa'ayoop; pønts ja tsojkin yikwingaxi'kpy, ja' ja Dios møøt'ejtjip. ¹⁷ Ku jade'en nbadu'unint, jade'en ja nyikmøjtajkint ja

øwɪnmaa'ñ, jøts ja jade'en ngawingudsø'jkant ku ja mye'ent tiidyumbi; ja'agøjxp ku ja nayide'en xukwinmaa'yimp ja tsojkin ja pa'ayo'owin sam ja xtsøjkyindi sam ja xpa'ayø'øyindi. ¹⁸ Niwine'enin ja Dios chojkin ja Dios pya'ayo'owin xkayiktsø'jkandit. Yjaaktyimiyiktigøøgyijxpy ja tsø'øgi ja ne'egi, jøts pø yiku'ayo'owipxi ja tsø'øgi ku pøn chø'øgi, ja'ats idø'øn tkayikmøjtøjkipnim ja Dios chojkin ja Dios pya'ayo'owin.

¹⁹ Ja'agøjxp adøm ja Dios ndsøjkyindi kumi jawyeen ja jade'en tø xtsøjkyindi. ²⁰ Pøn nugo wamp: "Ndsøjkpy øts ja Dios", jøts ni ka'animdimit ja myigu'uk ja twa'añ ttsøky, ja'ats idø'øn taayip. Sudso'ampyts ja Dios tjaaktyimchokt, pø ka'axi ja kyaxi'iky, ti ja' net ja yjaaktsokp pø ja myigu'ukxi ja kyatsøjkpy pøn yja'ijxpy wiiñ'ajy. ²¹ Jøts ja Dios yide'en xmø'øyindi ja y'ana'amín: pøni pøn ja Dios ttsojpk, nayide'en ja myigu'uk ja twa'ant tsokt.

5

Sudso'ampy ja ka'ødyumbi yja' xkamimajadaajkint

¹ Pøn jaty tjanchja'widip ku ja Jesús yikejxy ya naxwiiñ yiknitsoyki, ja'ats ja Dios Teety u'nk'ajtiyidip; pøni chojkitip tam ja Dios Teety jade'en, nayide'ents idø'øn ja ttsojkitip tpa'ayo'odit pøn jaty ja Dios Teety y'u'nk'ajtpy. ² Kuts ja Dios ndsojkindit jøts ja jade'en ndyimbyadu'unindit sa ja y'ana'amín ja wya'añ, jade'ents ja nnija'wa'ant ku ja nayide'en ndyimchøjkyindi pøn ja yja'ajtpy. ³ Kuts jade'en ndsojkindit ja Dios, ja' idø'øn ja tyijpy ku dø'øn ja y'ana'amín nbadu'uñindi, jøts ka'ap ja mabaat chepi. ⁴ Jøts pøn jaty ja Dios møøt y'ity, ka'ats ja tmibøjkidi ja ka'ødyumbi yja'. Pø paty ja Dios janchja'win xuktamajadaajkyindi jøts ja xkadukmibijkyindi ja ka'ødyumbi yja'. ⁵ Pønts tkamibøjkti ja ka'ødyumbi yja', ja'ats idø'øn tjanchja'widip ja Jesús jøts ku ja Dios U'ngi.

Ku ja Jesús yiknigajpxy ku ja Dios U'ngi

⁶⁻⁷ Nnija'windip adøm ku ja Jesús Dios U'ngi, jabi kø'ømxi ja Dios Teety ja tyimñigajpxy ku ja Jesús ñøbejty jøts ku nayide'en wyinaty y'ookwaanimi; jøts ja Espiritu Santo ejtp nayide'en tnigajpxmi, jabi myøøt'ajtpy ja tiy'ajtin ja'. ⁸ Tigøøkts adøm idø'øn ja ejxpajtin nmøøt'ajtyindi midi tnigajpxtip ku ja Jesús Dios'u'nk'aty. Ja myidu'ukpi, ja Espiritu Santo kyajpxy y'ayuujk ja' midi xuknija'wandip ja tyiiby ja yjanchpi. Ja myimajtskpi, ja Dios Teety y'ayuujk ja' midi yikmadoow ku ja Jesús ñøbejty; jøts ja myidigøøkpi, nay ja Dios Teety y'ayuujk ja' midi yikmadoow tsajpjøtpy kyida'aky ku ja Jesús wyinaty y'ookwani. ⁹ Sa ja jaa'y tyiy'ajtin ngupijkyindi, ¿ti Dios idø'øn ja tyiy'ajtin njaakidyimgyupøjkin? Pø ja'axi jawaani tyimdyiy tyimyjanch ku ja tnigajpxy sa ja y'U'nk ja yjajty kyubejty. ¹⁰ Pøn tjanchja'wip ja Dios U'nk, kø'ømst ja tja'gyuki ja tiy'ajtin; jøts pøn tkajanchja'wip ja Dios ku ja tnigajpxy sa y'U'nk yjajty kyubejty, ja'ats taadyejp ja Dios. ¹¹ Ya'at tiy'ajtin xuknija'windip jøts ku Dios tø xmø'øyindi sa n'anmija'win xemikøjxp yjuky'ajtindit, ja y'U'nkts ja'abi juky'ajtin tmøøt'ajtp. ¹² Pønts møøt y'ity ja Dios U'nk, yikmøøpyts ja'abi juky'ajtin ja'; jøts pøni ka'ap jade'en yikmøøt'ity, niwindem jade'en ngapaajtindit ja'abi juky'ajtin.

Ku ja kajpxwejin jøts ja kajxpoo'kxin y'ukyikyajkni

¹³ Ya'at mee ndanija'ayip wine'enin jam xjanchjawidi ja Dios U'nk, jøts xnijawidit ku ja jam xmøøt'ajtnidi ja juky'ajtin midi xemikøjxp.

¹⁴ Jade'ents ngawingudsø'jkindi ja Dios ku n'amido'owin nbøktso'owin pøni ti ja kø'øm xamidsojkindip, ja' ja myadøøpy. ¹⁵ Tøts inet nnija'windi ja Dios kudam ja tmadøy ja amido'owin ja pøktso'owin, jøts nay jaty x'adsowimbijtyindi pøni ti dø'øn tø n'amidø'øyindi.

¹⁶ Pøni n'ijxyindip nnija'windip ja nmigu'uk ku ja ttundi ja pøky midi ttukja'dyigøøpy ja Dios, jatyits ngu'amidoo'wandit jøts ja Dios ja myaa'kxukiyit. Jabi jaaxi ja kajabøky midi

ja anmija'win tyikwindigøøpy jøts ja Dios tyukja'dyigøy, kidi ja'apts ndijpy. ¹⁷ Tumbøky yø tundigø'øyin kajpxigø'øyin; jamts ja winaagin midi tkayikwindigøøpy anmija'win.

¹⁸ Nnija'windipts ja' pøn ja Dios Teety møøt y'ity, ka'apts ja pøky'agujkpy chøøni; pø Dios U'nkxi axajtujkiyip jøts ja miku' ja sa kyatuniyit.

¹⁹ Pø nnija'windipxi adøm ja' ku adøm ja Dios xja'ajtyindi, jøts may ja'amidi pøn ja miku' tø ñiwangøjxniyidi.

²⁰ Jøts nay yiknija'wip ja' ku ja Dios U'nk tø xnimii'ñindi, jøts ja tø xuknija'wandi midi tu'ugyi ndios'ajtyindip. Ja' tu'ugyi møøt n'ijtyindi ja y'U'nk Jesucristo. Ja'ats idø'øn tu'ugyi ndios'ajtyindip, ja'ats tyajkp jøts ja n'anmija'win xemikøjxp yujky'ajtindit.

²¹ U'nk unajkti, nay'eix'etiyidi yikxon, kidi nugo o ti xdiospiкта'akti, kidi jade'en o ti xwindsø'øgidi. Jade'en idø'øn ja yjatt.

JA MYĪMAJTSKPI NØKY MIDI JA JUAN YJAAY

Ja tiy'ajtin, ja tsojkin jøts ja pa'ayo'owin

¹ Mets u'nk Ciria, mōjaa'y'ajtp øts, ixyamts meets ya'at nøky ndanijayi møøt m'u'nk m'una'jkti wine'enin ja Dios tō m'a'ejxiyidi jøts ja jade'en mja'atyidi. Jade'ents mee ndsøky, jade'ents mee nba'ayøy, jøts kidi øtsip tu'ugyi, pø nayide'enxi meets ja mdsøkyidi mba'ayøyidi pøn jaty ja y'øybi tyiiby tpadundip. ² Ja' øts jade'en xyik'adøtsp ja ku nmøøt'ajtyindi ja y'øybi tyiiby jøts nijuuni adøm ja xkamajstuuptyindi. ³ Dios Teety jøts ja Dios U'nk, ja'ats mee mgunuu'kxidip mba'ayoojidip jøts mmø'øyidi ja øy'ajtin ja jotkujk'ajtin tiy janch sa ja ttsøjkyin.

⁴ Jade'en øts ja m'u'nk ja m'una'jk winaagin njanchtaxonda'aky ku øts ja nbaaty ku øts ja n'ixy tpadundi ja y'øybi tyiiby jade'en sam ja Dios Teety ja tō xa'ane'emyindi. ⁵ Mee migu'uktøjkti, mdyimdyu'undip ja may'ajt jøts ja xem ja yam nmigu'uk ndsojkindit nba'ayo'owindit. Kidi ixyamnim yø jade'en yikmadøy, jaayip yø yikmadoods'o'ondakni ku ja ndsinaa'yin nyiktigajchindi. ⁶ Yø' idø'øn tsojkin'ajtp, yø' idø'øn pa'ayo'owin'ajtp ku ja Dios kyutujk nbadu'unin; jøts yø' idø'øn kyutujkin'ajtpy midi tō xmadowdi ku mdsinaa'yin tō xyiktigatsti, jøts xem yam mnachokidit mnabya'ayowidit.

Pømbi win'øø'ndip

⁷ Jats may ixyam ja win'øø'mbidi pøn tkajanchjawidip ja Jesucristo ku ja y'atsnanky'ejxøø jaa'yin. Pønts jade'en win'øø'mp, ja'ats idø'øn tkawamp tkatsojpk ja Cristo. ⁸ Øyim mnay'ejx'etidit, kidi xkamøjpikta'akti ja ixpøjkin midi mee tō nduk'ixpiky. Jade'en Dios øy ti mmo'ojidit pøni ti ja mdamidsojkidip.

⁹ Pønts nugo tyimwyinmay'anajxp nika'ap ja t'uktajotkujk'ajtniyi ja Cristo y'ixpøjkin, ja'ats kamøøt'ejtip ja Dios; pønts jade'en tjantyimbyadump sa ja y'ixpøjkin wya'añ, ja'ats idø'øn møøt'ejtyip ja Dios Teety jøts ja Dios U'nk. ¹⁰ Kuts pøn mninøjkxidit mjøn jotp mdøjkjotp, yamts meets ja xanijawi jøts ku wenk ixpøjkin ja tmøødi, kidi meets ja xyiktøki jam mdøjkjotp, jøts kidi meets ja xmo'odi ja kajpxpoo'kxin; ¹¹ pønts ja tkajpxpoo'kxp, ja'ats idø'øn tpadump ja ka'øy ixpøjkin.

Sa ya'at ayuujk yjøpkixy

¹² Maynim øts ja winmaa'ñ nmøødi midi mee ndukmadoowampy, jøts ka' meets ja nugo ndanijayi wya'añ; ndyimñinøjkxwampy mee kø'øm jøts ixy windani ndukmado'odit, jøts jade'en ndyimdyajotkujk'ajtindit.

¹³ Ja m'uch pøn ja Dios tō y'a'ejxiyi, ja'ats ja y'u'nk ja y'una'jk yam mdanigajxiyip ja kajpxpoo'kxin. Jade'eñi øts ja ayuujk nguexy, jade'en idø'øn yjatt.

JA MYĪDIGØØKPI NØKY MIDI JA JUAN YJAĀY

Øy tsuj ja Gayo yiknigajpxy

¹ Møjaa'y'ajtp øts, ixyamts øts ya'at nøky ndanijayi mets migu'uk Gayo, ja'agøjxp ku nijuuni ngaja'dyigøy.

² Migu'uk, wamp øts jøts øy yikxon xyiknaxt møk mōjaāw, nayide'en sam ja Dios øy tsuj myik'ityi. ³ Njanch'øjja'wipts øts, njanchuja'wipts øts, jøts ku øts ja jaa'y winaagin xnimendøø pøn nmigu'uk'ajtyindip, jøts øts ja xamimadya'akti jøts ku mets øy tsuj mjaa'y'aty sam ja Dios kyajpxy wya'añin. ⁴ Midi'ibi øts idø'on njaaktyimy'øjja'wip njaaktyimchuja'wip pø nmadøøpxyi øts jøts ku øts nmigu'uk ja møj ja mutsk tpaduujniidi ja Dios kyajpxy.

⁵ Migu'uk, øy'ajtp ku øy tsuj mjaa'y'aty ku jade'en nmigu'uk xpudøki pøn jaty tminaxtip tmidøkidip ja Dios kyajpxy øy ja xjaga'ijxy'aty. ⁶ Tøts øøts ja winaagin xukmadowdi sa mets ja xtsøky sa mets ja xpa'ayøy. Jaaaktyimdyun ja may'ajt jøts ja xjaakpudøkit sam ja Dios tkupikyin, ku ja jam jade'en yja'attit choondit. ⁷ Pø ja'axi ja tø tniidsoondi jøts ja jade'en tmiwidejtidi ja Dios kyajpxy, jade'ents ja ka'ap tkupøkti ja pudøjkin midi ja jaa'y ja møøjyidip pøn jaty tkanija'widipnim ja Dios. ⁸ Patyts adøm xpaat'ajtyindi jøts ja ndyimbyudøjkandit ku ja jade'en tmiyø'ødyi tminaxti ja y'øbyi ja tyiiby.

Ka'ap y'øjja'y'aty ja mixy Diótrefes

⁹ Tø meets ja nøky ndanijayi jøts mee ndukmadøy yø'øbi winmaa'ñ, ja' ku ja mixy Diótrefes tkamøjpikta'aky ja n'ayuujk ja n'ana'amin, ja'ats ne'egi kø'øm nabyiktaajkip windsøn jøts niwine'enin øts ja xkamimadøy. ¹⁰ Paty ku øts wyinaty nniikxy, møk øts ja ndawingugajpxit ku adøm ja xwingajpxyindi xpagajpxyindi ku ja xnidaay'ajtyindi. Nayide'ents ja tkadajotkujk'aty, yjaaktyimy'ane'empy ja myigu'uk ja', jøts ja ka'ap tkupøktit pøn jaty tmija'ttip tmidso'ondip ja Dios kyajpxy, pønts ja jade'en tjagabadunwamp, jatyits ja tpawøpy jøts ja ka' t'uktuktatøjkiñi ma ja Dios kyajpxy yikpatmadøy.

¹¹ Migu'uk Gayo, nijuuni jade'en xkatu'unt sam ja ka'ødyumbi ttuñ, tum ja øybi mdu'ump. Pøn jade'en øy jaa'y'ajtp, ja'ats ja Dios ja'ajtyip, pønts ka'øy'ajtp, ja'ats idø'on tka'ejxp tkanija'wip ja Dios.

Janch øyja'y'ajtp ja Demetrio

¹² Øy tsuj yiknimadya'aky ja Demetrio. Ñanky'ejxip ku ja tpaduñ ja y'øbyi ja tyiiby. Nayide'ents øø nwaami, nyiktiidyøjkip øøts ja nayide'en, pø mnija'widipxi ku øø ka'ndaayi.

Ja kajpxpoo'kxin midi ya'at nøky tyagugøjxip

¹³ Maynim øts ja winmaa'ñ nmøødi midi me ndukmadoowampy, jøts ka' mets ja nugo ndanijayi wya'añ; ¹⁴ ndyimñinøjkxwampy me kø'øm jøts ixy windani nnagyajpxindit.

¹⁵ Øy yikxon xyiknaxt. Ixyam mmigu'uk mdaniguexyiyi ja kajpxpoo'kxin pøn jaty yam tsinaadyip. Tunts ja may'ajt jøts nayide'en xkajpxpoo'kxt pøn jaty jam nmigu'uk'ajtyindip.

JA NØKY MIDI JA JUDAS YJAA_Y

Ku ja Judas tnijayi pøn jaty ja Dios tø twi'ixy

¹ Judas'ajtp øts. Øts ja Jacob nmiga'ax'ajtpy. Nmidumpy øts ja nwindson'ajtim Jesucristo jøts meets ya'at nøky ndanijayi pøn jaty ja Dios tø tyamidsøkyiyi jøts ja yja'atiyit, ku ja tø y'agø'dukiyi y'axajtukiyi ja nwindson'ajtim Jesucristo, ku ja møøt y'etti. ² Mbaattip yikxon ja Dios kyunuu'kxin jøts øy tsuj mba'ayowiyidit jøts ja øy'ajtin myikmo'odit.

Pøn nugo jawindaay'atwamp

³ Meets migu'uktøjk, o meets ja nøky kawinaak ojk tø njadanijayiwyaa'añ sa dø'øn y'ejxi tyiyi ja nitso'ok'ajtin midi njagyejpyindip, ixyamts mee nnijayi jøts tu'ugyi xyik'ettit ja mjanchja'win midi ja Dios tu'ugyi tø xmø'øyim, ku ja xja'ajtyindi. ⁴ Jabi tøxi ja jaa'y jam tmidøki ja win'øø'nin jøts meets ja mdukpadunwa'añidi midi ja tiy'ajtin kyamøøt. Pø wampxi ja Dios kyajpxy jøts ja tyik'ayo'ombaatt sam pyaat'atyyi ku ja kya'øyjaa'y'atti, wandipts ja' øy ja ti ttu'undit maa'kxukidip ja Dios ja'. Ka'ap ja Dios Teety yja' ttsojkidi pøn xja'ajtindip møøt ja nwindson'ajtim Jesucristo.

⁵ O meets ja xjanijawi, nduknijawiywampy meets ja jadigojk jøts ku ja Dios Teety ojts tyik'awa'atspidsimy ja Israelit jaa'y jam Egipto, xjats tyikwindigøy ja' pøn ja kamibøjkiyi kabaduujniyi. ⁶ Jøts nayide'en ja ankilistøjk winaagin ja yja' ka' t'ukpadunidi sam pyaat'atyi, Diosts ja tø myachi jøts ja tø pyikta'agy i agootstujpy, jam ja y'awejxti ku ja tiidyu'unin mye'ent. ⁷ Nayide'ents ja yjajtmidi ja Sodoma kajp jøts Gomorra kajp, jøts midi jaty jam kajp wingon ejttøø. Øy sa y'adøtstøø, yaa'dyøjk namyøøt'ajtidip tukyaa'dyøjk, tø'øxyøjk namyøøt'ajtidip tuktø'øxyøjk. Jade'ents ja ka'øybi ttundøø. Jøts ja Dios xemikøjxp tø yik'ayo'ombaadyidi ma xemikøjxp tyøy. Jade'ents yø xuk'ijxyimp xuknija'wimp jøts ka'ap jade'en n'adøøjtsint.

⁸ Øyi tjanijawidi pøn meets ixyam nugo mwin'øø'nip, kyø'øm winmaa'njotpy ja jade'en ttundi ku ja kya'øyjaa'y'atti jøts ka' tmøjpikta'akti ja Dios kyutujk. Nugo twindsøy ja ankilistøjk midi ja Dios myøøtsinaapy. ⁹ Janch wenk idø'øn ja Dios yø'øbi jaa'y twindsowdi, nika'ap ja møj ankilis Miguel twindsøøy ja miku' jade'en ne'egi, ku ja Moises ñine'kx tyiktsepjajtidi sudso dø'øn ja yiktu'unt. Ne'egi yide'eñi ja'ayi tnimaay, “Dios paat'ajtiyip pøni sa ja mdunwa'añi.” ¹⁰ Yø jaa'y midi mwin'øø'nidip ku yø ti kø'øm tkaja'gyukidi, ja'ats yø kyajpxtip ka'øy; ja'ayi nugo ñija'widip jøts yø jade'en y'adø'tsttit ejxim jiyujkin, kø'ømts yø nugo jade'en ñankwyindigøyidi.

¹¹ Ayo'ombaattip ja'adi ku nay ja' tpadundi sam ja Cain yjaa'y'ajty ku ja myigu'uk ja tyik'ø'jky. Tundip nayide'en sam ja Balaam jøts ja meen patp tjawidi. Jade'en nøjkx wyindigøydi sam ja Coré ku y'lookøxti ku ja Dios tmidsepøjktøø. ¹² Nugo mdsø'ødyuñidi meets ma mee mgaadyi m'uukti tukpabøjkpitøjk, ku meets yø ka'ap mnimiñidi amumjoojt, jøts ku yø nugo ku'uxyi kyaydi y'uukti jøts yø jade'en nugo mdaxi'ikyidi, niti windsø'jkin tkabikta'akti, kø'øm ja ne'egi ñay'ejx'ityidi, ka'ap ja t'ixy pøni ti ja tø yiktaguwanidi. Jade'en ja'adi ejxim ja yoots n'ejxint midi ka' tyu'uy, jøts nayide'en ejxim tu'uk ja tsaa'mguipy midi katøømip, øy ja tyøø'm'ajtin ja tjapaaty, windigøy y'ejtnidipts ja jadi'ñi. ¹³ Tum ja ka'øybi tyundip jøts ne'egi o sa tyimy'adø'øtswa'andi tsø'ødyumbim. Jade'ents tø tyuu'tigøødyi jøts xemikøjxp jap y'ettit agootstujpy.

¹⁴ Ja møjaa'y Enoc pøn myiwixujk najtskaxi, ku ja Adan jawyeen, ja' ja Dios kyuga-jpxy'ajit jøts yide'en tnigajpxy ja ka'øy jaa'y, jøts wyaañ: “Jøts ø n'ijxy ja nwindson'ajtim ku ja mil'ampy tmøøtmiñ ja pyabøjkpitøjk, ¹⁵ jøts pøky pyayø'øwya'añ pøn ka'øyjaa'y'ajttip, pøn tø tyundigøydi kyajpxigøydi jøts ku tø twindsowdi ja nwindson'ajtim.” ¹⁶ Yø'øbi jaa'y

nugo ña'amdi nugo pyagajpxti, ja y'øy'ajtin yø nugo yjayiktunwandip jøts ja jaa'y øy tsuj nadyijyi tmigajpxti ja'agøjxp ku nugo tkajpxwyetswa'andi.

Ku ja pabøjkpitøjkyiktukmadøy sa yjaa'y'attit

¹⁷ Meets migu'uktøj, ja'myatsti sa ja nwindson'ajtim Jesucristo kyudanaabyi mduk-madoodø ¹⁸ ku wyandøø yide'en: "Ku wyingøn jøts ja nwindson'ajtim mye'ent jats kyaxø'øktit ja jaa'y pøn tka'ødyejtíp tka'øgyajpxtíp ja Dios yja'. Ka'øyjaa'y'ajttíp ja' jade'en sa ja kø'øm ñadyamidsøkyidi." ¹⁹ Yø' nugo tyikwinmaa'nmya'atwamp ja jaa'y; ja'ayi chojktíp ja kya'øybi jøts ka'ap Espíritu Santo ja tmøøt'attit.

²⁰ Meets migu'uktøjkti, tu'ugyi mnabyikta'agidit jøts tu'ugyi xyik'ettit ja mjanchja'win midi ja Dios yajkpy. Ku ja Dios x'ajot'attit, ja Espíritu Santo mbudøkiydip.

²¹ Xtsojkindip ja Dios, xpa'ayo'owindip ja Dios, paty øyim mnay'ejx'etidit sam ja ttsøkyin. Njöp'ejx'ejtindip ku ja nwindson'ajtim Jesucristo xmø'øyint ja øy'ajtin midi xemikøjxp.

²² Yikjotkujk'attit ja' pøn pyamaapy pyadajpy pøni midi'ibi pyabøkp. ²³ Tuu'mo'odi kajpxwejtí ku tyundigøydi jøts ka'ap ja ayo'on tpaattit; jøts xpa'ayo'ot nayide'en pøn ka'øyjaa'dyi, øyim mnay'ejx'etidit kø'øm, jøts ka'ap jade'en xu'undit sam ja'adi.

Ku ja Judas tkajxa'aky ja Dios jøts tyikjøpkijxy ja ñøky

²⁴⁻²⁵ Tu'uk ja Dios møj, pøn tnija'wip, pøn xyiknitso'ok'ajtimp, ja'ats ja myøk'ajtin xa'ejx'ejtimp jøts ka' ndundigø'øyint, jade'en'ampyts agujk jotkujk xukwinguwa'jka'ant ja' wyindump, ku niti pøky ngamøøt'ajtint. Ja'ats tmøøt'ajtp ja øy'ajtin ja møk'ajtin nwindøn'ajtim Jesucristo køjxp, jaayip ku ja tyiktso'ondakijxy tuki'iyi, jøts kunim ja nayide'en tyikjøpkøxt. Jade'en idø'øn ja y'ejxi tyiyi.

YA'AT AYUUK JA JESUCRISTO TYUKNIJA'WI KUMAA'YJØTPY JA JUAN

Ku ja Jesucristo tuk'ijxy ja Juan sa ja naxwii'ñit yjatt

¹ Ya'at idø'øn tiy'ajtin midi ja Dios Teety tyukmadoow ja Jesucristo, jøts ja pyadumbi pyabøjkpi ttuk'ext ttuknijawit sa nøjkx yjatt kyubatt tsojk ya naxwiiñ. Nay øts ja tiy'ajtin tuki'iyi tø xuk'ixy tø xuknijawi sa tu'uk y'ankilis tø xukmigajpxy. ² Xjats øts njaadyangijxy tuki'iyi pøni ti jaty ja Dios Teety møøt ja nwindson'ajtim Jesucristo tø xuk'ixy xukmadø.

³ Tya'øy'ajtidip ja Dios kyunuu'kxin pøn ya'at nøky t'ejxp jøts tpadu'unt, nayide'ents ja' pøn tmadoop, pø wingompxi dø'øn jøts jade'en yjatt sam yø nøky wya'añ.

Ku ja Juan tnija'ayiyi'ñ pøn jaty ja Dios tjanchja'widip ja niwixujkpi kajp

⁴ Øts Juan, øts meets ya'at nøky ndanija'ayip pøn ja Dios tjanchja'widip, ja niwixujkpi kajp midi jam Asia y'etjotp. Paat meets ja kunuu'kxin øy'ajtin midi ja Dios yajkpy, ja' midi xemikøjxp juky'ajtp, nayide'ents mgunuu'kxidit ja niwixujkpi ja'win midi møøt y'ity ja Dios Teety. ⁵ Wan mgunuu'kxyidi nayide'en ja nwindson'ajtim Jesucristo pøn tnanky'ejxip ja tiy'ajtin, jøts pøn myijawyeen tø yjukpyøjkojmi jap oo'kpi jutjøtpy. Ja'ats nayide'en tnigutujk'ajtp niduki'iyi ja møj windsøndøjkti ya naxwiiñ. Nayide'en ja Cristo xpa'ayø'øyimp sa tø xyikpøkwyaaajchim ku tø wyidsuñ wyidaxy adøm nbøkyøjxp. ⁶ Tøts ja xpiktaajkyim jade'en øyjaa'y møjaa'y, jøts nbadu'unindit ja Dios Teety yja' midi tyeety'ajt nwindson'ajtim. |Wan tja'myejchim xemikøjxp ja Dios y'øy'ajtin myøk'ajtin! Jade'en idø'øn ja yjatt.

⁷ |Meets, uk'ejxti ukmadowdi, jade'en idø'øn ja Cristo mye'ent yootsjøtpy! Jøts niduki'iyi n'ejxint, nayide'en ja'adi pøn ja nwindson'ajtim yik'ayo'ombaajti kruskøjxp; janch ya'axtip janch jilidyip ja naxwii'ñit jaa'y ku jade'en t'ejxtit. Jade'en idø'øn ja yjatt.

⁸ Yide'en ja Dios Teety wya'añ pøn ja myøk'ajtin møj, jøts pøn xemikøjxp juky'ajtp: “Øts idø'øn ja tso'ondaajkin jøts øts nayide'en ja jøpkøjxin'ajtin nyajkpy.”

Ku ja Juan t'ijxy ja Cristo

⁹ Øts Juan, meets nmigu'uk'ajtpy ku ixyam nayide'en ngu'ayo'ombaajtindi ja nwindson'ajtingøjxpit, paty adøm xmø'øyim ja øy'ajtin ja tuda'aky'ajtin jøts ja xyik'ejtint ma ja kyutujk xanatanaa'yimp. Jam øts wyinaty ndsumchøøni ma txøøw'aty Patmos jam mejy kyujk'am, ja'agøjxp ku øts ja Dios kyajpxy ngajpxwa'kxi jøts ja Jesucristo yja' nnigajpxi. ¹⁰ Domingi xøøw wyinaty ku øts ja Espiritu Santo adsu'jky xatøki, jøts kumaa'yjøtpy møk øts xjiguyaaaxi ejxim tu'uk ja puxujx, ¹¹ yide'en ja wya'añ:

—Øts idø'øn nyiktso'ondaajk tuki'iyi jøts nay øts nyikjøpkøxp. Midi jaty m'ejxp mnijawip, tanijayi pøn ja Dios ja'ajtip ma niwixujkpi kajp jam Asia y'etjotp. Ja' xyøøw ja kajp: Efeso, Esmirna, Pérgamo, Tiatira, Sardis, Filadelfia jøts Laodicea.

¹² Xjats n'ejxjimbijty pøn øts xmigajpxp, jøts n'ejxpaaty wixujk ja kandleeri midi tum oori. ¹³ Jam wixujkpi kandleeri kujk'am n'ijxy tu'uk ja jaa'y jade'en sam adømin, jade'en ja wyet tyek'ok'am paat kyida'aky. Tum oori ja chum kyaxi'iky midi ja'tp kyachwiiñ. ¹⁴ Ja kyubajk, janch amuum poop ja wyaay kyaxi'iky ejxim ja poop pixyin, ejxim tsap'øøpkyin, jøts ja wyeen jade'en kyaxi'iky ejxim jønyowin. ¹⁵ Ja tyeky, jade'en kyaxi'iky janch amuum tsamamp ejxim ja pujx n'uk'ejxint midi janch tøø'kxp, midi øyip ornijøtpy; ku ja kyajpxy, møk idø'øn nmadoo'wint, jade'en ejxim ja møj nøø y'iichin. ¹⁶ Jam y'aga'ngyøjøm tmach'ity wixujk ja maadsa', jøts y'aawjøtpy pyidsimy tu'uk ja

yõñchujx midi janch jøpxuulñ jøts adsow jøøjp. Jade'en kyaxi'iky ja wyeen ja y'aaw ejxim ja xøøw møk y'añin.

¹⁷ Ku øts n'ijxy jade'en, winets øts ojts øøky nayjawiyi nnaxkida'aky ja' tyekyjø'øm, jøts øts ojts y'aga'ngyø' xanixajy jøts ø xnimaay:

—Kidi mdsø'øgi; øts idø'øn, tø nyiktso'onda'aky tuki'iyi nayide'en sa nyikjøpkøxt.

¹⁸ Jujky'ajtp øts idø'øn øy tø nja'øøky, xemikøjxp njujky'aty jøts øts ja møk'ajtin njagyejpy, jøts øts nyikjujkyøkt pøni pøn tø y'oockti tyigøydi. ¹⁹ Jaadyangøx tuki'iyi midi ixyam m'ijxpy, midi ixyam mnija'wip, jøts midi jatwamp. ²⁰ Jade'en idø'øn ja twandijy midi tø x'ixy, ja wixujkpi maadsa' n'aga'ngyø'øm jøts ja wixujkpi kandeeleri nayide'en: ja wixujkpi maadsa', yø' twandejp pøn ø ngugajpxy'ajtpy ma øts ja njanchja'wibitøjk jamdi ma wixujkpi kajp jam, jøts ja kandeeleri ja janchja'wibitøjk ja'adi, pøn jam'ajttip.

2

Ya'at ayuujk ja nwindson'ajtim tyaniguejpxy ja yjaay ma ja wixujkpi kajp: Yide'en jawyeen yiktanija'ayiyiñ ja Efesit jaa'y

¹ Nijayi øts ngugajpxy midi jam Efeso sa øts ixyam nnigajpxy: “Yide'en ja wya'añ pøn jam y'aga'ngyø'øm tmach'ejtp ja wixujkpi maadsa' jøts pøn jam tanaapy wixujkpi kandeeleri kujk'am: ² Wa'ats ø nnijawi tuki'iyi pøni ti mdumpy; nnija'wip ø tuki'iyi sa møk mduñ øts køjxp, jøts sa mduda'aky'aty, nayide'en ø nnijawi ku xkagupiky pøn ka'øyjaa'y'ajttip. Tøxi x'ixy tu'uk jaty pøn nugo nadyejidip øts ngudanaabyitøjkti, ka'ap ja tyiy'ajtin wyingaxi'iky, nugo ja wyindaayidi. ³ Øy møk ja maa'kxujkin tø xjagyepy ku tø xpaduujni øts nja', jøts ku tø xku'ayo'ombaadi øts køjxp, jøts ka'ap ja jotkøjxin tø xmøøt'aty. ⁴ Tu'uk øts nga'øyjawi mets ja mjaa'y'ajtin: ku mets ka' nayide'en x'uktsojknii sam xyiktso'ondaajky. ⁵ Paty ø nwa'añ, ja'myats pøni ma tø mduu'digøy, jøts xyiktigatst ja mwinmaa'ñ, jøts nayide'en xu'unt sam jawyeen tø xuñin. Pøni ka' xuñ jade'en, nbøjknip øts yø kandeeleri midi mmøøt'ajtpy. ⁶ Ots idø'øn yjade'eni, mjagyejpy nayide'en ja øy'ajtin ku nayide'en xkatsøky ja nicolaitas y'ixpøjkin sam ø ngatsøkyin. ⁷ Madowdi yikxon sam ja Espíritu Santo tmigajpxy pøn ja Dios ja'ajtip, yide'en ja wya'añ: Pøni pøn tmimajadakp ja miku' yja', ja'ats nmo'op ja øy'ajtin xemikøjxp ma Dios y'ity.”

Yide'en ja Esmirnit jaa'y yiktanija'ayiyiñ ja ayuujk

⁸ Nijayi nayide'en øts ngugajpxy pøn jam ejtp ma øts njanchja'wibitøjk jam Esmirna kajpjtøp: “Yide'en ja wya'añ pøn tuki'iyi tø tyiktso'onda'aky jøts pøn nayide'en tyikøxp, ja' pøn o'jk jøts yjujkyøjkojmi oo'kpi y'agujkpy: ⁹ Nnija'wip ø tuki'iyi pøni ti mdumpy; pøni sa m'ayøy mwinmay, øy yø meeñ kyidyimy'ity, tø ja Dios mdsuj'ijxyi mdsujawiyi ja' wyingujkp. Nnija'wip øts ku mjemigajpxyi mdemigajpxyi winaagin pøn nugo nadyejip israelit jaa'y, yø' yide'en nugo tjayikmajada'akwajnidip ja miku' yja', pø ka'axi Dios ja tja'aji. ¹⁰ Kidi mdsø'øgidi pøni sa mjattit mgubattit; yø miku' mnankchumwajniydip jøts nidu'uk nidu'uk myikjot'ejxtit, jøts xmajtstu'uttit ja Dios yja'; øy yø mjayik'etidit majk xøøw puxøjkjøtpy, tu'ugyi ja mwinmaa'ñ xyik'ettit o mjadyimy'oockti, øts mee nmo'op ja jujky'ajtin midi xemikøjxp. ¹¹ Madowdi yikxon sa yø Espíritu Santo tnigajpxy pøn ja Dios ja'ajtip, yide'en ja wya'añ: Pøni pøn tmimajadakp ja miku' yja', ka'ap ja tpaatt t'ext ja ayodaajk. Ka'ap ja y'anmija'win sa yjatt.”

Yide'en ja Pérgamit jaa'y yiktanija'ayiyiñ ja ayuujk

¹² Nijayi nayide'en øts ngugajpxy pøn jam ejtp ma øts njanchja'wibitøjk jam Pérgamo kajpjtøp: “Yide'en ja wya'añ pøn tmøøt'ajtp ja yõñchujx yjøpxuulñ adsow jøøjp: ¹³ Nnija'wip ø tuki'iyi pøni ti mdumpy jøts ku jam ja miku' møk y'ane'emy ma mdsøøni, ka' xja'dyigøy ja mjanchja'win øy øts njanchja'wibitøjk yjadyimy'ø'jky pøn txøøw'ajit Antipas, pøn øy tsuj xpaduujni øts n'ayuujk. ¹⁴ Ya'at øts n'øy'ijxpy nga'øy'ijxpy pøni ti mdumpy: jam meets winaagin jam Pérgamo, pøn tkamajtstu'utwamp sam ja Balaam

ja y'ixpøjkin jekyip tyik'ity, ja'ats ojts t'agajpxi ja Balac jøts ttukmado'ot ja israelit jaa'y sa tyundigø'ødyit. Ojts ttukmadø y jøts tjøø'kxtit midi tø wyinaty yiktamiyøxy ja maxandsaa, jøts nayide'en o sa pøn ñamyøøt'atiyidit. ¹⁵ Nayide'en meets jam winaagin pøn tkamajstutu'utwamp ja nicolaítas y'ixpøjkin midi øts ngatsøjkpy. ¹⁶ Paty ø nwa'añ, jøts tyiktigatsttit ja wyinmaa'ñ; pøni ka'ats, tsojks ø nnøjkxt jøts ndatseptu'unt ja nyøñchujx midi pidsømp n'aawjøtpy. ¹⁷ Madowdi yikxon sa yø Espíritu Santo tnigajpxy pøn ja Dios ja'ajtip: Pøni pøn tmimajadakp ja miku' yja', ja'ats nmo'op ja jii'kxy midi yiktejp maná midi yu'uch ejtp; nayide'ents ø nmo'ot ja mutsk tsa'a'u'nk midi poop, japts tu'uk ja xøøw kyøxja'ayi midi jemy jøts midi ka' yik'ixy yiknijawi, ja'ayi tu'uk tnija'wip pøn ja yikmøøpy."

Yide'en ja Tiatirit jaa'y yiktanija'ayiyi'ñ ja ayuujk

¹⁸ 'Nijayi nayide'en øts ngugajpxy midi jam ejtp ma øts njanchja'wibitøjk jam Tiatira kajpjotp: "Yide'en ja Dios U'nk wya'añ pøn ja wyeen jade'en kaxø'kp ejxim ja jøn'ayowin, jøts ja tyeky ejxim tu'uk ja pujx midi janch tøø'kxp tsamamp: ¹⁹ Nnija'wip øts tuki'iyi pøni ti mdumpy, sa mmigu'uk xpa'ayøy, sa ja Dios kyajpxy xpaduujni, sa xpudøki pøn ti ka'ejttip jade'en sa mduda'akyjaa'y'aty. Tø øts nja' xyikmiweni xyikaja'aji jawaani øy yam, ka'ap jade'en sam jawyeen tø xyiktso'onda'aky. ²⁰ Ya'at ø n'ijxpy nga'øyja'wip mets køjxp: ku xkupiky ja ka'ødyø'øxy Jezabel, pøn ñadyijyi ja Dios kyajpxy tkajpxip, nugots ja y'ixpøjkin ja ttawin'iñ øts ja njanchja'wibitøjk kuk idø'øn øy o sa pøn ñamyøøt'atiyit jøts ku tjøø'kxtit midi tø yiktamiyøxy ja maxandsaa. ²¹ Tøts øts nayide'en njanøjmi jøts tyiktigatst ja wyinmaa'ñ sam pyaat'aty, ka'ats ja tpadunwa'añ: ka' tmajstutu'utwa'añ ja kya'øy'ajtin. ²² Øts ja nwandu'ump sa ja yuu ja pa'am pyaadiyit, nayide'en niduki'iyi pyaatkøxyit ja ayo'on pøn jaty møøt tø tyundigøy. ²³ Nwandu'umpts øts nayide'en ja y'u'nk ja y'una'jk pøn ka'ødyø'øxy'ajttip. Jade'en idø'øn t'ejxtit tnijawidit niduki'iyi øts njanchja'wibitøjk sam øts wa'ats n'ejxkapy sam pøn tu'uk jadu'uk wyinmaa'ñ tjagyeypy y'am yjotp. Nidu'uk nidu'uk meets ndiidyu'undit pøni sa jaty pøn tø y'adø'tsti. ²⁴ Ka'ap øts sa nwa'andijy ku ja ka'ødyø'øxy yja' tø xkabaduujni ku ja miku' kyootswinmaa'ñ tø xkayikmajadaajkidi. ²⁵ Padun'etti xemikøjxp ja winmaa'ñ midi myiktundip kunim ø nme'ent. ²⁶ Pøni pøn tmimajadakp ja miku' yja' jøts nayide'en ttu'unt sam ø ndsøkyin, ja'ats nmo'op ja møk'ajtin jøts tniwindsøn'att niduki'iyi ja naxwii'ñit jaa'y. ²⁷ Yø'øbi møk'ajtin midi øts ja Dios Teety tø xmø'øy, nay yø'øts mdaba'ejxtip mdabayø'ødyip ja naxwii'ñit jaa'y. ²⁸ Nayide'ents meets nmo'ot ja øy'ajtin jøts meets møøt n'ett xemikøjxp. ²⁹ Madowdi yikxon pøni sa jaty ja Espíritu Santo tnøjmi ja janchja'wibitøjk pøn ejtip jam ma niwixujkpi kajp."

3

Yide'en ja Sardisit jaa'y yiktanija'ayiyi'ñ ja ayuujk

¹ 'Nijayi nayide'en øts ngugajpxy pøn jam ejtp ma øts njanchja'wibitøjk jam Sardis kajpjotp: "Yide'en ja wya'añ ja' pøn tkajxp ja niwixujkpi kugajpxy jøts midi tpøkjø'kp ja wixujkpi maadsa': Wa'ats ø nnijawi pøni ti mdumpy. Ots myiktijy myikwa'añ ku øy tsuj mduñ, nnija'wip øts ku ka' mduñ. ² Jawidi, nay'ejx'etidi, jøts ka' jadi'iñi mwindingø'ødyit; n'ijxpy nnija'wip øts midi mdumpy ku ka'ap tyiy'aty Dios wyindump. ³ Ja'myatsti ja øy'ayuujk ja øgyajpxy midi tø xmadowdi tø xukpøkti; nay yø' mbadu'undip jøts ja mwinmaa'ñ xyiktigatsttit. Ku xkatu'unt sam nwa'añ, winets ø nme'ent adsu'jky sam ja maa'tspi myiñ, nika'ap ja xnijawit pøni juuni nme'ent ejxpi payø'øbyi. ⁴ O meets yø'øbi winmaa'ñ tø xjababiky, jamts winaagin pøn øy wa'ats jaa'y'ajttip, ja'ats ø møøt n'ity xemikøjxp sam pyaat'aty. ⁵ Pøni pøn tmimajadakp ja miku' yja', ja'ats ja wa'ats'ajtin tsuj'ajtin tpaatp, ka'ats øts ja xyøøw nyiktigøjyi midi tø yikja'ay jap nøkyjotpy ma jap y'ity ja jaa'y xyøøw pøn jujky'ajttip xemikøjxp. Ngajpxkaxø'jkijxpy øts ja jam Dios Teety

wyindump jøts jam y'ankilis wyindump. ⁶ Madowdi yikxon pøni sa jaty ja Espíritu Santo tnøjmi ja janchja'wibitøjk pøn ejtp jam ma niwixujkpi kajp.”

Yide'en ja Filadelfiit jaa'y yiktanija'ayiyi'ñ ja ayuujk

⁷ Nijayi nayide'en øts ngugajpxy pøn ejtp jam ma øts njanchja'wibitøjk jam Filadelfia kajpjo: “Yide'en ja wya'añ ja' pøn øy'ajtp wa'ats'ajtp, ja janchpi ja tiiby, nayide'en ja møk'ajtin tjagyepy jade'en ejxim ja rey David y'ijty yikutuky: Ku ja tuu' nyik'awa'ach ka' pøn mibaat tyik'awa'atst. ⁸ Nnija'wip øts tuki'iyi pøni ti mdumpy. Tøts ja mduu' nyik'awa'ach midi ka' mibaat pøn tyik'adukt; øy ja møk'ajtin waani tø xjagyepy tøts ja n'ayuujk xmøjpiktaajki, ka'ap ø tø xkagupiky. ⁹ Jamts winaagin pøn nugo nadyejip israelit jaa'y jøts øts nja' ñadyijyi xyiktuujni. Ka' tyiy'ajtin, taay ja pyiktakpy ku ja miku' yja' tyiktuujni, nay øts ndukupøkp jøts mwindsø'øgiyt, m'ejxkapiyt ku mee ndsøky. ¹⁰ Tø øts n'ayuujk xpaduujni ku øy tuda'aky mjaa'y'atti sa dø'øn nda'ane'emy, nayide'ents nbøkji'kpy n'ejxji'kpyts meets m'øy'ajtin. Jats yik'ext ku ja møk ayo'on ku ja tiidyu'unin ñaxkida'akt jøts ja payø'øyin tyunit pøn jaty tø y'øy'atti ya naxwiin. ¹¹ Me'emp øts tsojk. Yik'etim yø mwimmaa'ñ jade'en sa tø xpaduñ, ka' pøn mibaat ja Dios yja' mbøkxiyt. ¹² Pøni pøn tmimajada'kp ja miku' yja', ja'ats møjtøkip ma ja Dios, nijuuni ja tkamajstuttit; nayide'ents meets ja Dios xyøøw ndawinja'att jøts ja kyajp midi yiktejp jemy Jerusalen, yø' tsoomp jam Dios wyingukp; ndawinja'apts meets njemxyøøw nayide'en. ¹³ Madowdi yikxon sa yø Espíritu Santo tnøjmi pøn ja Dios ja'ajtp ma niwixujkpi kajp.”

Yide'en ja Laodiceit jaa'y yiktanija'ayiyi'ñ ja ayuujk

¹⁴ Nijayi nayide'en øts ngugajpxy pøn ejtp jam ma øts njanchja'wibitøjk jam Laodicea kajpjo: “Yide'en ja wya'añ ja' pøn tyakp ja tiy'ajtin, pøn tyiktso'ondakøjx tuki'iyi: ¹⁵ Nnija'wip øts tuki'iyi pøni ti mdumpy, ku nugo ejxingøjxp øts nja' xpaduujni, ka'ap amumjoojt. Øy'ajtp ku tu'ugyi xpadu'undit, pøni ka'ats, majtstu'utkts øts! ¹⁶ Kumi ka' xnijawidi pøni midi ndunwandip, nugo mee møk xyikjotkixy, ndyimyajtstu'utwampy mee ne'egi. ¹⁷ Nømp mee mwa'añ jøts ku meets jotkujk xyiknaxy, ku niti mgadigø'øxy; ka'ats mnayjawiyi ku niti mga'ijtxyi, ku nugo wimbeets kugoots xyiknaxy. ¹⁸ Yide'ents idø'øn ja kajpxwejin nmøø'y, jøts ø x'amido'ot xpøktso'ot midi øts nmøøt'ajtpy, jade'ents xpaatt ja øy'ajtin, ja wa'ats'ajtin jøts ja ja'gyujkin. ¹⁹ Jade'engøjxp meets ixyam møk n'ane'emy ku mee nba'ayø. Møk xwindanidit jade'en sam øts xmijotimbettit. ²⁰ Ejx ku meets ya ngugajpxi y'ity ya mdøk'agi'y; pøni pøn øts n'ayuujk xmadojip jøts øts nja' xkupøjkit, ejtpøts øts ja møøt n'ett. ²¹ Pøni pøn tmimajada'kp ja miku' yja', møøts øts ja n'ett, jøts øts ja kutujk nmo'ot nayide'en sam øts ja Dios Teety tø xmø'øy ku øts ja miku' yja' nmimajadaajki, møøts øts ja Dios Teety n'ity. ²² Madowdi yikxon sa ja Espíritu Santo tnøjmi ja janchja'wibitøjk ma jam ja niwixujkpi kajp.”

4

Sa ja Dios Teety yikajxa'aky jap tsajpjøtpy

¹ Ku tø jade'en y'ukjaty jøts n'ejxpaaty ja tsajp y'awa'adsi ejxim ja tøjkaawin; jøts ja ayuujk nmadøøy møk sam ja trompeta'an midi øts jawyeen xmigajpx, jøts øts xnimaay: —Pat yam, jøts nnanky'ejxit tuki'iyi sa yjatwa'añ kyubatwa'añ.

² Tø øts wyinaty ja Espíritu Santo xatøki, kumaa'yjøtpy n'ixy jade'en tu'uk ja tsinaabyajt jap tsajpjøtpy ejxim ja møj windsøn yja'ajin, jamts chøøni tu'uk ja jaa'y ³ midi jade'en kaxø'kp ejxim ja tsaa midi janch tøø'kxp tsamamp, sa ja jaspe tsaa, uk ja cornalina tsaa; jamts i'jch tø ñawyidityi, jade'en tyi'kxy sam ja esmeralda tsaa. ⁴ Ma ja møj tsinaabyajt jam, jamts ø n'ixy ee'pxmaktaxk ja tsinaabyajt nawidity, jamts ja møjaa'dyøjk ni'ee'pxmaktaxk chøøni, amuum poop ja wyetti jøts tkujup'atti ja koroni janch amuum oori. ⁵ Møk ja anaaw ja widsujk pyidi'iky ma møj tsinaabyajt jam; nay jam wyingukp

wixujk ja jøøn tyøøbyiky, ja niwixujkpi ja'win idø'øn ja' midi ja Dios Teety møøt y'ity. ⁶ Nay jam møj tsinaabyajt wyindump kyaxi'iky tu'uk ja mejy, janch wa'ats janch tøø'kxp ejxim keega'an.

Jøts jam nayide'en ja møj tsinaabyajt ñawidityi namaktaxk ja jiyujk midi may ja wyeen tmøøt'ajttip, kaxø'kp yjøxki'py kaxø'kp wyindujy. ⁷ Ja myidu'ukpi jiyujk, jade'en ja kyaxi'iky ejxim tu'uk ja kaajin: ja myimajtskpi jiyujk, jade'en ja kyaxi'iky ejxim ja tsakaajin; ja myidigøøkpi jiyujk, jade'en ja wyeen ja y'aaw kyaxi'iky ejxim ja jaa'yin; jøts ja myimaktaxkpi jiyujk kyaxi'iky ejxim ja weejts kyakwidityin. ⁸ Tu'uk jaty ja jiyujk tudujk ja kyank tmøøt'aty, may ja wyeen nayide'en kyaxi'iky yjøxki'py jøts wyindujy; xinaxy tsunaxy ja Dios tja'myatsti jøts ñøm'etti:

Janch øy janch wa'ats me Dios Teety,

Mets tu'ugyi ja møk'ajtin mjagyejpy,

jøts xemikøjxp mjujky'aty.

⁹ Xjats ku ja jade'en ja nimaktaxkpi jiyujk ttundi, ku ja jade'en tja'myatsti ja' midi xemikøjxp ejtp, midi tsinaapy møj tsinaabyajt køjxp, ¹⁰ xjats ja ñ'ee'pxmaktaxkpi møjaa'dyøjk jaty ñagyuxendya'agyidi, jøts ja kyoron tkiidyakti jam møj tsinaabyajt wyingujk jøts wya'andi:

¹¹ Mets Dios Teety, mets amuum møj sam pyaat'aty myikwindsø'øgit myikwinjawit.

Pø tøxi xyiktso'ondakijxy tuki'iyi mdsojkingøjxp jøts jade'en y'lett.

5

Ja nøky jøts ja Borreek U'nk

¹ Xjats n'ijxy ja' pøn jam tsinaapy møj tsinaadyajkøjxp ku jam tmach'ity y'aga'ngyøjøm tu'uk ja nøky abidityi midi ja'ay jøtpy jøts ñikøjxp, wixujk weents ja cha'ayi, jøts ja jade'en y'aduky. ² Winets ø n'ijxy tu'uk ja møj ankilis jøts ja møk t'amidøy:

—¿Pøn paat'ajtip tyik'awa'atst yø nøky, jøts t'agø'øtstu'utt yø seeyi?

³ Nipøn ja tkanadyaja'ejxyi tyik'awa'atst, ni tsajpjøtpy ni naxwiin ni naxpatkipy, nipøn ja tkawin'ejxwa'añ. ⁴ Xjats øts nyaaxni njiñi, nipøn kyayikpaaty pøn tyik'awa'atst ja nøky jøts yik'ext yiknijawit, nipøn ja tka'ukwin'ejxwani. ⁵ Xjats øts xnimaay ja møjaa'y tu'uk:

—Kidi mjanchya'axy, jaa tu'uk pøn tnigubajk'ajtp ja Judajit jaa'y, jøts pøn ja rey David y'apip, yø'øts tø myajada'aky jøts t'agø'øtstu'utt ja wixujkpi seeyi jøts tyik'awa'atst ja nøky.

⁶ Xjats ø n'ijxy tu'uk ja Borreek U'nk tyani ma møj tsinaabyajt jam, ja' kyujk'am ma ja møjaa'dyøjkti, jøts ma ja nimaktaxkpi jiyujk jam. Jamts ja yik'ijxy kyaxi'iky sam ti yjaty kyubety y'ayo'ombaaty. Wixujk ja wyaj tmøøt'aty jøts wixujk ja wyeen; jade'en yø tijy yø wixujkpi ween sam ja niwixujkpi ja'win midi ja Dios tø tkexy ya naxwiin. ⁷ Xjats ja Borreek U'nk tninijxy pøn wyinaty tsinaapy møj tsinaabyajtkøjxp jøts tpøjki ja nøky midi wyinaty myøøt'ajtpy y'aga'ngyøjøm. ⁸ Ku ja tpijky ja nøky, winets ja nimaktaxkpi jiyujk jøts ja ñ'ee'pxmaktaxkpi møjaa'dyøjk ñagyuxendya'ajkidi jam Borreek U'nk wyingujk. Nidu'uk nidu'uk ja møjaa'dyøjk tmøøt'atti ja kow midi yiktejp arpi, jøts nayide'en tkondi ja poom tøøy'iñ, tum oori ja', jade'en yø poom tijy sam ja Dios'ajot'ajtin midi kyajpxtip pøn jaty ja Dios Teety ja'ajtip. ⁹ Jamts yide'en ja jemy iij tyikwandøø:

Mets idø'øn mbaat'ajtip yø nøky jøts yø seeyi xkøøtst;

ja pø tøts xniwanguixy niduki'iyi ja jaa'y, o midi kajp o midi ayuujk,

jade'engøjxp ku tø m'ayo'ombaaty ma tø mdsuñ tø mdaxy.

¹⁰ Tø øøts xyikmøjtøki jøts øø nbadu'unt sam ja Dios tsøkyin, jøts øø nwindson'att ja naxwiin'it.

¹¹ Winets ø n'ixy ja ankilis namay tni'awidetti ma ja møj tsinaadyaajk jam, nay jamts wyinaty ja nimaktaxkpi jiyujk jøts ja møjaa'dyøjkti, ¹² møk y'øøwdi tum jade'en jøts wya'andi:

Janch øy ja Borreek U'nk midi tø y'ayo'ombaaty,
paat'ajtíp jøts tpaatt ja møk'ajtin ja øy'ajtin, ja wejin ja kajin.
Paat'ajtíp yikwinjawit yikwindsø'ogit.

¹³ Xjats nmadø y nayide'en ku y'øøwdi niduki'iyi ja naxwii'ñit jaa'y jade'en tsajpjøtpy
naxkijxy, jøts jade'en øy ja ma jøts wyā'andi:

Janch øy janch møj ja Borreek U'nk,
paat'ajtíp yikwinjawit yikwindsø'ogit xemikøjxp.

¹⁴ Xjats nayide'en ja nimaktaxkpi jiyujk wyandøø:

—jOts jade'en!

Xjats ja ñi'ee'pxmaktaxkpi møjaa'dyøjk niduki'iyi ñagyuxendya'jkøxidi jøts twindsø'ogidi
ja Dios.

6

Ja wixujkpi seeyi

¹ Jøts ø n'ijxy ja Borreek U'nk ku ja myidu'ukpi seeyi t'ago'otstu'uty ja wixujkpi seeyi,
jøts nmadøø y tu'uk ja ñimaktaxkpi jiyujk ku møk yjanchwina'añ jade'en sam ja anaawin,
jøts yide'en wyā'añ:

—jMen x'uk'ixy!

² Jøts ø n'ijxy tu'uk ja poop kawaay, pønts ja tyatsinaajyip, arki ja tu'uk pyagajpy. Tu'uk
ja koroni yikmøø y ku tø myajada'aky ma tsep, tyun'adø'øtswampy jøts cho'ongojmi.

³ Xjats ja Borreek U'nk ja myimajtskpi seeyi t'agø'øtstu'uty, jøts ja myimajtskpi jiyujk
wyaañ:

—jMen x'uk'ixy!

⁴ Jøts jadu'uk ja kawaay kyaxi'iky, tsajpts ja ñine'kx. Pøn ja ttatsinaapy ja'ats yikmøø y
tu'uk ja amøjtsujxyøñ jøts yiktanipijky jøts ja cheptu'unt, jøts niduki'iyi ja naxwii'ñit jaa'y
ñañibidøkøxyit, xem ja yam ñanky'oogiyidit, ka'ap ja jotkujk'ajtin ma.

⁵ Xjats ja Borreek U'nk ja myidigøøkpi seeyi t'agø'øtstu'uty, jøts ja myidigøøkpi jiyujk
wya'añ:

—jMen x'uk'ixy!

Winets ø n'ixy tu'uk ja yøk kawaay, pøn ja ttatsinaapy, tati'yin ja wyejts'ijtpy kyøjøøm.

⁶ Jats ja ayuujk nmadøø y jam ñimaktaxkpi jiyujk kyujk'am, ku wyā'añ yide'en:

—Wimbatp nøjkx ja trigo jøts nayide'en ja cebada midi amuum tump; aceite jøts ja
vino ka' wyimbatt.

⁷ Xjats ja Borreek U'nk ja myimaktaxkpi seeyi t'agø'øtstu'uty, jøts ja myimaktaxkpi
jiyujk wyā'añ:

—jMen x'uk'ixy!

⁸ Winets ø n'ixy tu'uk ja pu'ts kawaay, pøn ja ttatsinaapy ja'ats yiktanipøjk jøts ja
yikjaa'y'ookt. Ix'oojk ja pyamiñi pøn tkudanaapy ja ayodaajk. Xjats ja yiktaguwa'anøø
jøts tyik'ayo'ombaatt jawaani kagujkwa'kxy ja naxwii'ñit jaa'y, jade'en'ampyts ja
tyik'ookt ku tkaxt ja tsep, ja yuu, ja pa'am jøts ja awa'an jiyujk.

⁹ Jats ja Borreek U'nk ja myimagoxkpi seeyi t'agø'øtstuujty, jøts n'ijxy altajr patki'py
may ja anmija'windi pøn tø tku'oogidi ja Dios yja'. ¹⁰ Ja'ats kajpxtip møk, jøts ja Dios
yiknimaay:

—Janch øy janch wa'ats me Dios Teety, jøts xuñ ja tiy'ajtin. Juuninim xpayø'øty
xiidyu'unt ja jaa'y pøn øøts tø xyik'øøky ya naxwiiñ.

¹¹ Jøts yikmøø y ja poop wet jøts yiknimaadyi jøts pyoo'kxtit y'awejxtitnim øy winø'ønin.
Wan t'uknamyukyidi ja migu'uktøjk pøn tku'ookwajnipnim ja Cristo yja'.

¹² Xjats ku ja Borreek U'nk t'agø'øtstuujty ja myidudujkpi seeyi, xjats ja tsaachmøk
ujx ñajxy. Jøts ja xøøw amuum yøk yjajty ejxim tu'uk ja yøk wetin, jøts ja po' tsajpts
kyaxi'iky ejxim ja wa'ats tsajpts ni'jpyin, ¹³ jøts ja maadsa' kya'y naxkijxy, jade'en ejxim

ja tsaachmøk poj tyikajtskø'øy ja ujts tøm. ¹⁴ Jøts ja tsajp jadi'iñi ñawya'kxkøjxniyi, jade'en ja yjajtni ejxim ja nøky jadi'iñi y'abidejtmuky, jøts ja kojpk jøts ja naajx midi mejy kyujk'am tuki'iyi tyigatskøjxni mā ja y'uk'ijty. ¹⁵ Xjats ja jaa'y kyakwidejtnidi, t'ixaabyi naxwā'knidi ja nayu'utstaajk, tyøjkiñøø tsaa jutjøtpy tsaa ankjøtpy øy mā. Jajttip ja windsøndøjk ja kumeendyøjk, ja møj ja mutsk. Jajttip ja soldadi wyindsøndøjkti, nayide'ents ja jaa'y pøn mijuy kamijuy tundip. ¹⁶ Jøts wyanidi ku ayo'on jade'en t'ejxti:

—jWan ja kojpk wan ja tsaa ne'egi xyik'o'jknindi jøts jade'en xka'ukwin'ejna'ant ja' pøn jam tsinaapy møj tsinaabyajt køjxp, jøts nayide'en ja Borreek U'nk ka' x'ukmøø'ña'ant ja møj ayo'on!

¹⁷ Tøxi ja xøøw jade'en kya'pxy ku ja møj ayo'on jade'en yik'ijxy, nipøn ja jade'en tkamimajada'aky.

7

Ku ja Israelit jaa'y yikmø'øy ja ejxa'an pøn jaty ja Dios tyami'ejxip tyamidsojkip

¹ Ku ja jade'en yjajty jøts ø n'ijxy nimaktaxk ja ankilis ku ja wyinaty tyani naxwii'ñit eskiini køjxp, jamts ja poj ja t'axajtuky jøts ja møk poj niwine'en kyanaxkida'akt naxwiingyijxy mejkyijxy, jøts ja aay jøts ja kipy kyapojwidett. ² Jamts ø n'ijxy jadu'uk ja ankilis xøbidsimbyi myiñ, jap ja Dios syeeyi tmøøt'ajtti pøn xemikøjxp jujky'ajtp. Nay ja'ats møk tnimaay ja nimaktaxkpi ankilis midi wyinaty tø yiktanipiky jøts tuki'iyi tyikwindigøøgyøxt tuktsajp'agida'aky, jøts wya'añ:

³ —Uk'awejxti. Kidi xkaxti ja ayo'on kunim øøts ja ejxa'an nbikta'akt jaa'y wyimbojkøjxp nidu'uk nidu'uk, pøn jaty ja Dios yja' tpaduujnidip. Jaanimts xyikwindigøøty ja naajx, ja mejy jøts ja aay ja kipy.

⁴ Jade'en ø nnimadøy ku tukmagø'pxy ja wixijky myaktaxk mil tø yik'ejxandi ja israelit jaa'y pøn ja ñimakmajtskpi y'apteety'ajttøø. ⁵ Nimakmajtsk mil idø'on yik'ejxandi pøn tyatsk'apip ja møjaa'y Judá. Nimakmajtsk mil yik'ejxandi pøn tyatsk'apip ja møjaa'y Rubén jøts nimakmajtsk mil nayide'en pøn tyatsk'apip ja møjaa'y Gad, ⁶ nimakmajtsk mil yik'ejxandi pøn tyatsk'apip ja møjaa'y Aser, nimakmajtsk mil yik'ejxandi pøn tyatsk'apip ja møjaa'y Neftalí, nimakmajtsk mil yik'ejxandi pøn tyatsk'apip ja møjaa'y Manasés, ⁷ nimakmajtsk mil yik'ejxandi pøn tyatsk'apip ja møjaa'y Simeón, nimakmajtsk mil yik'ejxandi pøn tyatsk'apip ja møjaa'y Leví, nimakmajtsk mil yik'ejxandi pøn tyatsk'apip ja møjaa'y Isacar, ⁸ nimakmajtsk mil yik'ejxandi pøn tyatsk'apip ja møjaa'y Zabulón, nimakmajtsk mil yik'ejxandi pøn tyatsk'apip ja møjaa'y José, jøts nimakmajtsk mil yik'ejxandi nayide'en pøn tyatsk'apip ja møjaa'y Benjamín.

Ja mayjaa'y pøn ja poop wet wyet'ajttip

⁹ Ku jade'en nnimadøøy jøts ø n'ijxy janch may jaa'y nikyamachooni. Choondi o magajp, o ti ayuujk tkajpxti pøni sã jadu'uk ja nidu'uk ja kajp ja y'ayyujk tjagyepy; jam twindanidi mā møj tsinaabyajt jøts nay jam mā Borreek U'nk, poop wet wyet'ajttip jøts tiixy'aay tkøñidi. ¹⁰ Niduki'iyi dø'on tjā'myatsti ja Dios jøts møk wya'andi:

Yø Dios Teety xyiknitso'ok'ajtim,
pøn jam tsinaapy møj tsinaabyajtkøjxp,
nayide'ents ja Borreek U'nk.

¹¹ Jamts ja ankilistøjk nawidity tnadanidi mā møj tsinaabyajt jam, mā ja møjaa'dyøjk jøts mā ja nimaktaxkpi jiyujk, jøts ñagyuxendyaajkidi ja' wyingujkp mā ja møj tsinaabyajt jam; møj tjanchja'myajtsti ja Dios, ¹² jøts wyandøø:

Nmøja'wip øøts, njanchja'wip øøts Dios Teety.

Mets ja møk'ajtin, ja ja'gyukin jøts ja øy'ajtin mmøøt'ajtpy xemikøjxp. Jade'en idø'on xemikøjxp y'ejxi.

¹³ Jøts nidu'uk ja møjaa'dyøjk wyaañ jøts x'amidøøy:

—¿Pøñ idø'øn yø'ødi ixja poop wetxøødi, ma dø'øn yø choondi?

¹⁴ Jøts ø nnimaay:

—Mets møjaa'y, mnija'wip mets yø'.

Jøts ø xnimaay:

—Yø' dø'øn jap tø ñaxti ma ja møj ayo'on jam, ja Borreek U'nk ñi'jpy tø yikpøkwy'a'achidi. ¹⁵ Paty idø'øn jam y'etti møj tsinaabyajt wyingujkp ma ja Dios chøøni, jamts ja tpaduujnidi ja Dios yja' xinaxy tsunaxy; jøts ja pyøkjø'øgidit xemikøjxp ja' wyingujkp. ¹⁶ Ka'ap ja ayo'on t'uk'ejxnidit, kya'ukyu'ooknidit kya'uktøjtsiñidit, ni an niti kya'ukpaajtniyidit, ¹⁷ jade'engøjxp ku ja Borreek U'nk t'ejx'ity jøts ttukpaatwa'añ ttuk'ejxwa'añ ja wa'ats nøø midi xyikjujky'ajtim xemikøjxp; nayide'ents ja Dios tyiktigø'ty ja yjotmay'o'jkindi.

8

Ja myiwixujkpi seeyi jøts ja poomdø'øy'ii'ñ midi tum oorì

¹ Ku ja Borreek U'nk ja myiwixujkpi seeyi t'agø'øtstuupty, jøts kujkp hora'an y'amongøjxti niduki'iyi jam tsajpjotp. ² Nay jatyi n'ijxy ja niwixujkpi ankilis midi jam tanaadyip Dios wyingujkp ku ja yikmøødyi nidu'uk nidu'uk ja puxujx. ³ Jøts jadu'ukpi ankilis myiñ jøts jam tyanaay'øy'ii'ñ altajr wyingujkp midi tum oorì, poomdø'øy'ii'ñ ja myimeen, jamts yikmøøy altajr wyingujkp may ja poom, jade'ents ja altajrkøjxp ttawinjøjky; jøts jamts ja nayide'en y'ity y'amido'owin pyøktso'owin ja'adi pøn jaty ja Dios ja'ajtip. ⁴ Jøts ja poom jok jam yja'aty Dios wyindump møøt ja y'amido'owindi ja pyøktso'owindi pøn ja Dios tmøja'widip tjanchja'widip. ⁵ Xjats ja ankilis tnixajiy'ii'ñ ja poomdø'øy'ii'ñ jøts tpiktaajky ujts ja jøndsabajk midi wyinaty altajrkøjxp, jøts tko'widijty jam naxkøjxp; winets ja møk anaaw jøts ja widsuk y'adi'ich, jøts ja tsaachmøk ujx.

Ja ñiwixujkpi puxujx

⁶ Xjats ja niwixujkpi ankilistøjk tjøp'ejxti ttaxu'uxwa'andi ja puxujx.

⁷ Ku ja myidu'ukpi ankilis xyuujxy, jøts ja møk tuu myiñ jøts ja tøtst jøts ja jøøn møøt ja ni'jpy ñaxkidaajky. Jade'en tyøøy ja naxwii'ñit jawaani kyagujkwa'kxy, møøt ja kipy møøt ja ujts kyudigøøy.

⁸ Ku ja myimajtskpi ankilis xyuujxy, winets yjawi tigati ñaxkidaajky jam mejyotp ejxim ja møj kojpkìn, ja'ats jam tøøbyøjk; jøts ja mejy wyimbijty jawaani kagujkwa'kxy wa'ats ni'jpyin. ⁹ Jawaani kagujkwa'kxy ja jiyujk kya'ookøxti midi jam wyinaty tsinaadyip, jøts ja barki nayide'en wyindigøøy.

¹⁰ Ku myidigøøkpi ankilis xyuujxy, winets tu'uk ja maadsa' tsajpwemp kyatska'ay, tyøøy jade'en ejxim ja møj jøønin. Naxkidaajky ma may ja møj nøø yø'ødyi jøts ma ja kom nøø pyidsimy. ¹¹ Ja'abi maadsa' txøøw'ajtp Ajenjo, jøts ja nøø ja tyikma'tnaa. May ja y'ooktøø pøn jaty ja t'uktøø, janch ta'am ja wyimbejtnaa ja nøø.

¹² Ku ja myimaktaxkpi ankilis xyuujxy, xjats ojts waani wyindigøøy ja xøøw, ja po' jøts ja maadsa'. Nayide'en ojts xyaachkugoodsigyijxy sam yø xøøw yø po' wyindigøøy.

¹³ Winets n'ejxpaaty tu'uk ja ankilis ñaxy tsajp kujk'am, jøts ja møk wya'añ:

—¡Meets naxwii'ñit jaa'y, mjanch'ayo'odip meets ku xmado'odit ja puxujx ku ttaxu'uxtit ja nidigøøkpi ankilis!

9

¹ Ku ja myimagoxkpi ankilis xyuujxy, jøts n'ijxy tu'uk ja maadsa', tø wyinaty ñaxkida'aky naxwingijxy. Xjats yikmøøy ja ñi'awaajts ma ja møj jut jam midi nøjkxp ayodaajk. ² Xjats ja møj jut tyik'awaajch xjats ja jok yikxon jap pyidsimy sam møj orni jøtpyin; jøts ja xøøw tyikwingoodsiñaa, ni poj niti tka'ukyikyø'øñi. ³ Japts jokjotpy may pyidsømdi ja møj mu' jøts tuki'iyi ja naxwii'ñit twinguyø'øyigyøjxnaa; jade'en ja yikejxy sam ja kajpyin jøts ja naxwii'ñit jaa'y tyik'ayo'ombaatt. ⁴ Ka'ap ja jade'en tø yikexy jøts ja

aay ja ujts ja tyikwindigø'øty ya naxwiiñ. Ja' ja pyayø'øpy pøn jaty ja Dios y'ejxa'anin tø kyabikta'agyi midi yikpiktaktip wyimbojkwemp. ⁵ Ka'ap ja jaa'y tjadyimyik'øøky, ayo'on ja myøøpy jøts ja jajyi ja tøøyi tukmiba'am tsøøni magoxk po'jin; jade'en ja pya'am ja tjawidi ejxim ja kajpy xøjpint. ⁶ Møk ja tjawidi, jadyimwyandip ja' jøts tyimy'ooktit; o kø'øm ñanky'oogidit, ka'anims ja y'o'jkin kya'pxti.

⁷ Jade'en ja møj mu' kyaxø'økti ejxim ja møj kawaayin midi nay'a'ejxiyip tseptumbi nøjkxtip; tum jade'en ja kyubajk kyaxø'økti koroni kujupy midi amuum oori, jøts ja wyeen ja y'aaw jade'en kyaxi'iky ejxim ja jaa'yin. ⁸ Jade'en ja wyaay tmøøt'atti ejxim ja tø'øxyjkin, jøts ja tyøøjts jade'en t'ixy ejxim ja kaajin. ⁹ Tum pujx ja amuum y'ak'ajttip, jøts ku kyajkwidetti jade'en møk yikmadøy ejxim ja maakyareti midi kawaay myinøjkxtip tseptumbi. ¹⁰ Jade'en ja tyu'tst tmøøt'atti ejxim ja kajpyin. Ja'ats ja tyukta'ayo'ombatpy ja jaa'y jøts tukmiba'am tsøøni magoxk po'. ¹¹ Jamts tu'uk ja ankilis midi tso'omp jap ayodaajkjøtpy, ja'ats tniwindsøn'ajtp ja møj mu'; ja'ats txøøw'ajtp Abadón ja hebreit ayuujk, jøts ja griegit ayuujk Apolión midi tyijpy pøn yikwindigøøpy.

¹² Jade'en idø'øn ja myidu'ukpi ayo'on ñajxy; naxkida'akpts ja mimajtskpi ayo'on.

¹³ Xjats ja myidudujkpi ankilis ttaxuujxy ja puxujx, winets pyidsimy ja ayuujk jam nimaktaxkpi tsakaa waj agujkp jam altajrkøjxp jam Dios wyingujkp. ¹⁴ Xjats ja myidudujkpi ankilis yiknimaay midi ja puxujx tmøøt'ajtp:

—Migaji ja ñimaktaxkpi ankilis midi jamdi ma ja møj nøø midi yiktejp Eufrates.

¹⁵ Xjats ja jade'en yikmigajidøø jøts tyik'ookti jawaani kagujkwa'kxy ja naxwii'ñit jaa'y. Jabi a'ejxixi y'ejtni jøts ja jade'en yjattit ja'abi xøøw ja'abi jumøjt. ¹⁶ Namajtsk magø'pxy millones idø'øn ja ankilis cheptumbi midi idø'øn jade'en yikjaa'y'ooktip, midi kawaagyøjxpti.

¹⁷ Yide'en ø n'ijxy kumaa'yjøtpy ja kawaay, jøts ja' pøn ttatsinaadyip, pujx ja myøøt'ajttip kyachwiiñ, tsajpts, tsujxk jøts pu'ts jade'en ja kyaxi'iky. Ja kawaay kyubajk jade'en ja kyaxø'økti ejxim ja kaajin jøts ja y'aawjøtpy pyidsimy ja møj jønyow møøt ja jok jøts jøky. ¹⁸ Jøts jade'en'ampyts ja mayjaa'y y'ookøxti, jawaani kagujkwa'kxy idø'øn kyawindigøøgyøxtøø. ¹⁹ Ja'ats idø'øn ja kawaay tya'awa'an'ajtpy ja y'aaw jøts ja tyu'tst; jade'en ja tyu'tst ja t'ixy tsaa'ngyubajkin, jade'ents ja jaa'y ja tyik'ayo'ombaaty.

²⁰ Pønts jaaktandi ka'abyim ja tmajtstu'utti ja ka'ødyunk ja ka'øwyinmaa'ñ. Wyindsø'jkiy'ejttip ja miku'tøjkti jøts øy ti awanax agojnax. Nayide'en twindsø'øgidi ja nugo dios agojnax midi oori øyip, midi plati øyip, midi bronze øyip jøts nayide'en midi kipy øyip, ka'ap ja y'ixy, ka'ap ja yø'øy, jøts ka'ap ja myadøy. ²¹ Ni jade'en ja tkamjøjpiktaajky ku ayo'on tø yjinaxy, yik'ook'adichpim ja myigu'uk ja', jøts ja miku' tunk ttun'adø'øtsti, ñamyøøt'atyidi øy pøn møøt myigu'uktøjkti, jøts myaats'adø'øtsti.

10

Ja ankilis midi tkon'ejtp tu'uk ja mutsk libri'u'nk

¹ Kuts jade'en yjajty jøts ø n'ejxpaaty tu'uk ja møj ankilis. Yoots'agujkp kyida'aky jam tsajpwemp jøts ja l'jch jam kyaxi'iky y'agubajkp. Jade'en ja wyeen ja y'aaw t'ixy ejxim ja xøøw y'añin, jøts ja tyeky jade'en ejxim ja jønyowin. ² Jam tu'uk ja libri'u'nk tmøøt'aty jøts ja t'agiibyajky kyøjø'øm, jøts ja y'aga'ndyeky ttawinwa'aky ja mejy jøts ja y'anajtyeky naxwingijxy. ³ Jøts ja chap'aay møk ejxim ja møj kaa myu'uyin jøts nay jaty wixujk ojk ja anaaw pyijy. ⁴ Ixyam øts wyinaty njaadyanwa'añ sa ja anaaw wya'añ jøts ø nmadøøy ja ayuujk midi kidakp tsajpwemp jøts ø xnimaay:

—Amaa'tsk'at yø' sam tø wya'añ yø anaaw, kidi xjaadyañ.

⁵ Jøts ja ankilis midi tuktamajndyeky tawa'kpajt ja mejy jøts jaduktamajndyeky ja naxwii'ñit, ja'ats y'aga'ngyø jam tkonjø'jk, ⁶ jøts ja tkajpxwa'kxy ja Dios tyiy'ajtin pøn tø tyiktso'ondakijxy tuki'iyi tuktsajp'agida'aky, jøts yide'en wya'añ:

—Ka' y'ukyø'øñit ja xøøw ja jumøjt; ⁷ kuts xyu'uxt ja myiwixujkpi ankilis, tø wyinaty kya'pxy ja Dios wyinmaa'ñ midi ja'ayi tyuknija'wiyii'ñ ja kyugajpxtyøjkti. Ka'ap ja o pøn nugo ajawī ttuknijawī.

⁸ Xjats ja ayuujk nayide'en nmadoogojmi midi tsajpjøtpty tsoo'mp, jøts ja jadigojk xmiğajpxkojmi jøts wya'añ:

—Nøjkx atspøjkit ja libri'u'nk midi jam agiibyaky kyii'y'ijtpy ja ankilis, ja' midi tanaapy mejkyøjxp jøts naxkijxy.

⁹ Jøts ja ankilis nninijkxy xjats ja libri'u'nk n'amidøøy jøts ø xmo'ot, jøts ø xnimaay:

—Ixya ja libri, mats jøts x'ixpøkt. Øy tsuj mnayjawiyit ku x'ixpøjk'okwa'ant, ku x'ixpøjkøxnit jøts ja jotmay'øøgyi xpatnit.

¹⁰ Xjats ja libri n'axajiyii'ñ jøts ja n'ixpijky, janch øy janch tsuj øts nja'wiyii'ñ, kuts ja nyikøjxnaa ja libri, jøts ja jotmay'øøgyi xpatnaa. ¹¹ Jøts ø xnimaagyojmi:

—Kuwanī jadigojk xkajpxwa'kxt ja Dios yja' sa chøønidit sa tyanidit niduki'iyi ja naxwii'ñit jaa'y, wan tmøji wan tmutski.

11

Namajtsk ja jaa'y pøn testigi'ajttip

¹ Jøts tu'uk ja kapy nyikmøøy midi yiktajpxp, jøts ø xnimaay:

—Tani jøts xkejpxit ja Dios chaptøjk møøt ja altajr, jøts nayide'en xmacho'ot pøn jaty jap twindsø'jkip ja Dios. ² Ka'ap yø xkepxt yø tsaptøjk aaw, tsaptøjk øjx jøts ja tsaptøjk paa' ja agøjxp ku wenk jaa'y myenwa'andi jøts jap wyidettit, jade'ents ja tyikma'attit ma jaty ja wyidettit jap Dios kyajpjøtpty, wixijkxy myajtsk po' y'ettit jade'en. ³ Ngaxp øts namajtsk ja ngugajpxy midi tum yøk wet twet'ajttip, ja'ats xkajpxip ja nja' tigøøk jumøjt jagujkp.

⁴ Ja namajtskpi kugajpxy, jade'eñi n'ukpiktaajkin ejxim ja olivi kipyin, jøts nayide'en ejxim ja majtskpi kandleeri midi jam ejtp nwindson'ajtim wyingujkp. ⁵ Pøni pøn midundigøøwyajnip, yikpidsømdip ja jøøn ja y'aawjøtpty, jade'eñits ja myidseptøjk tyik'ookøxtit tyikwindigøøgyøxtit. ⁶ Yø namajtskpi kugajpxy yjagyajpti ja møk'ajtin jøts ka'ukyiktunit winø'ønin ja Dios yja' tkajpxwa'kxidit. Nayide'en ja nøø tyikjajtnidit wa'ats ni'jpyin, jøts tkaxtit kawinaak jøøjp ja pa'am sa ja kø'øm t'a'ejxidit. ⁷ Kuts ja jade'en tkajpxwa'kxkøxtit ja Dios yja', winets tu'uk ja møk awa'an jiyujk pyidsø'ømt jam ayodaajkjotp jøts ja namajtskpi kugajpxy yik'oogiyit. ⁸ Jamts ja oo'kpi jadi'iñi tya'ant, jam ja wyibejpnit jam tuu' kujk'am, nay ja kajp ma ja nwindson'ajtim Jesucristo kyiruspejty. Nugo dø'øn jade'en yø kajp yiktijy Sodoma jøts Egipto. ⁹ Tigøøk xøøw jagujkp yik'ejxtit yiknijawidit ja oo'kpi. Øy pøn jaa'y o magajp mye'endit jøts ka' tnankyikpidi'igyi ja oo'kpi. ¹⁰ Xjats ja naxwii'ñit jaa'y jade'en agujk jotkujk ñayjawiyidi, janch nixem niyam o ti ñadyamay'atyidi ja agøjxp ku tø y'ookti ja'adi pøn møk tø yik'ayo'ombaadyidi pøn ja Dios yja' tkajpxwa'kxidip. ¹¹ Xjats ku myidigøøk xøøw jagujkp'ajty, winets ja Dios tyikjujkyiky jadigojk ja oo'kpi. Janch tsø'jkidøø ja'adi pøn jaty jam wyinatyi. ¹² Winets ja namajtskpi kugajpxy møk yikmiğajpxti, tsajpjøtpty ja kyajpxy, jøts yiknimaydi:

—Pat yam.

Jøts chapajtnidi tsajpjøtpty yoots'agujkpy jøts ja myidseptøjk y'ejxidøø ñija'wiyidøø. ¹³ Jøts nay jaty ja møk uix ñajxy, jøts wixujk mil ja jaa'y y'ookti ku ja kajp kyuja'wiyii'ñ kyujejtyii'ñ. Janch tsø'jkidip ja' pøn jaty jaaktandøø, jøts ja Dios ja tjanchja'myajtsti midi jap tsajpjøtpty.

¹⁴ Jade'en ja myimajtskpi ayo'on ñajxy; tsojks mye'ent ja myidigøøkpi.

Ja myiwixujkpi puxujx

¹⁵ Xjats ku ja myiwixujkpi ankilis ttaxuuixy ja pyuxujx, jøts møk yikmadøø may ja ayuujk jap tsajpjøtpty jøts wya'añ:

Ixyam ja kutujk ñaxkida'aky midi ja Dios Teety jøts nwindson'ajtim Jesucristo yja'ajttip;

jøts xemikøjxp ja tyiktu'undit mā y'ijty ja naxwii'ñit jaa'y yja' tyiktundi.

¹⁶ Xjats kyuxanidi jøts ñaxkowdi ja ni'ee'pxmaktaxkpi møjaa'dyøjk pøn jam tsinaadyip Dios wyingujkp, jøts ja Dios tmøjawidi twindsø'øgidi, ¹⁷ jøts yide'en wyā'andi:

Janch møj me Dios Teety,

tu'ugyi me m'ity xemikøjxp.

Møj øøts nmøjawi ngunuu'kxyjawi ku tø xyikmajada'aky ja mmøk'ajtin

jøts ja mgutujk mā ja naxwii'ñit jaa'y.

¹⁸ Jøts ja naxwii'ñit jaa'y mmijot'ambikyiyi,

tø kya'pxy jøts ja ayo'on xmo'ot jøts nayide'en xiidyu'unt ja oo'kpitøjk.

Jøts xmo'ot ja øy'ajtin pøn jaty ja mja' tø mbadu'unxiyi pøn jaty tø tkajpxwa'kxy wan tmøji wan tmutski.

Tø kya'pxy jøts nayide'en xyikwindigø'øty pøn jaty tø tmidundigøy ja naxwii'ñit jaa'y.

¹⁹ Xjats ja Dios chaptøjk y'awaajch jap tsajpjøtpy jøts yik'ixy ja kaaxi mā jap y'ity ja Dios kyutujk. Xjats ja møk uyx ñajxy jøts ja anaaw, jøts ja widsuk jøts ja møk tøst ñaxkidaajky.

12

Ja tø'øxyøjk jøts ja awa'andsaa'ñ

¹ Xjats winet kyaxi'iky tu'uk ja møj ejxpajt jam tsajpwemp: jamts tu'uk ja tø'øxyøjk tyani po' kyubajkp. Jade'en yø møk chamamy sam ja xøøwin, jøts tkujup'aty tu'uk ja koroni midi makmajtsk maadsa' tjagyajp. ² Jøtpyts ja tø'øxyøjk wyinaty, ka'axwampsts jøts møk ja y'u'nk ja yik'ayøyi jøts kyaxø'økt. ³ Winets jam tsajpwemp n'ijxy jadu'uk ja ejxpajt: jamts tu'uk ja awa'andsaa'ñ, amuum tsajpts ja ñine'kx jøts wixujk ja kyubajk, majk jaty ja wyaj nidu'uk nidu'uk ja kyubajk tmøøt'aty, jøts ja koroni nayide'en tu'uk jaty tkujup'aty. ⁴ Jøts ja tyu'tst ttabajaa'xkijxy may ja maadsa' jam tsajpwemp, jøts naxkijxy ja tnajtswøjyih'ñ. Jam tyanaay'øiyih'ñ mā ja tø'øxyøjk jam kya'axwa'añ jøts ja y'u'nk jaty tsu'jtsit ku ja kya'axt. ⁵ Ka'ax ja', mixyu'nk ja', ja'ats nøjkx niwindsøn'aty møk'ampy ja naxwii'ñit jaa'y. Xjats ja y'u'nk ja Dios tpøjknaa jøts ja tyiknijkxy mā ja møj tsinaabyajt jam; ⁶ jøts ja tø'øxyøjk kyeejky, jøts jam ja ñøjkxni mā abak et, mā ja Dios jam wyinaty ja y'et tø t'a'ejxi, jamts ja kya'aty agujk jotkujk, jade'ents jam chøønit tigøøk jumøjt jagujkp.

⁷ Xjats ku jade'en yjajty winets ja tsep tyuujni jap tsajpjøtpy. Ja møj ankilis Miguel møøt ja y'ankilistøjk minamyajtsi ja awa'andsaa'ñ møøt ja y'ankilistøjk ja' møøtmi. ⁸ Ka'ap ja myajadaktøø ja awa'andsaa'ñ; ka'ap ja mā y'uk'etnibajtniyi tsajpjøtpy. ⁹ Jøts ja jade'en yikpawojpnaa, yikaxni naxwingijxy. Yø' dø'øn ja møj miku' windsøn midi yiktejp Satanás midi twin'øø'n ja naxwii'ñit jaa'y.

¹⁰ Winets nmadøøy møk ja kajpxy jap tsajpjøtpy midi yide'en wamp:

—Tø ja Dios ja naxwii'ñit jaa'y tyiknitso'ok'aty. Tøts ja myøk'ajtin tnanky'ijxyiyi jøts ja kutujk tmø'øy ja Cristo sa ttanitanit ja yjaa'y; tøts ja nayide'en tpawøpy ja' midi xinaxy tsunaxy tni'øø'nip jam Dios wyindump ja' midi tø y'ookti Dios køjxp. ¹¹ Tø tmimajada'akti ja miku' yja', ja'agøjxp ku ja Borreek U'nk tø tkudsuni tkudaxi ja naxwii'ñit jaa'y, jøts ku tø tñigajpxkøxti sa tjanchjawidi ja Dios yja', wan tjaty pøni sa yjaty. ¹² Ejtni xoni meets pøn jap tsajpjøtpy, jøts janch yik'ayow meets pøn ya naxwii'ñ tyiknajxtip. Tø meets ja miku' mnimee'niyidi jøts awa'an'ampy mga'ødyunidit, ñija'wipxi ja' ku tsojk kya'pxt.

¹³ Xjats ku ja awa'andsaa'ñ tja'wiyih'ñ ku ja ya naxwii'ñ tø yikajxni, xjats ja tø'øxyøjk ja tpayø'øy pøn ja y'u'nk wyinaty tø tyikaxi'iky. ¹⁴ Winets ja tø'øxyøjk yikmøøy majtsk ja weejts myøjkajnk, jøts ja kyajknijjxy mā ja y'et ja jam abak etjotp. Jade'en ja tñikejky ja awa'andsaa'ñ. Jamts ja kya'aty yjøø'kxt amgujk jotkujk tigøøk jumøjt jagujkp.

¹⁵ Jøts ja awa'andsaa'ñ ja møj kom nøø tyikpidsiimy y'aawjotpy, jade'ents ja tø'øxyøjk ja tyikjø'øtwa'añ; ¹⁶ jøts ja tø'øxyøjk ja naxwii'ñit pyudøjkiiyi. Møj et aaw awaajts, japts ja nøø jadi'iñi tyøtskøjxnaa. ¹⁷ Jade'ents ja awa'andsaa'ñ møk tmi'ambijky ja tø'øxyøjk, jøts

ja tmidsepiky ja y'ap ja y'ok. Jade'en idø'øn ja'adi pøn ja Dios yja' tpaduujnidip sam ja nwindson'ajtim Jesucristo tnigajpxy.

13

Namajtsk ja møj ka'øy jiyujk

¹ Jam ø mejy'agø'øm nwa'k'øyiyi'ñ jøts ø n'ijxy jam pyidsimy tu'uk møj ka'øy jiyujk. Wixujk ja kyubajk tmøøt'aty jøts majk ja wyaj. Tu'uk tu'uk ja wyaj tmøøt'aty ja koroni, jøts jam kyubajkøjpx yikja'ay ja letri midi ja Dios kya'øyja'wip. ² Jade'en ja kyaxi'iky ejxim ja møj kuxibyijyin, jøts ja tyeky kyaxi'iky ejxim ja osa'an, jøts ja y'aaw ejxim ja kaajin. Ja'ats ja awa'andsaa'ñ møøjyi tuki'iyi ja myøk'ajtin ja kyutujk midi ja wyinaty myøøt'ajtpy. ³ Jade'en ja kyubajk tu'uk kyaxi'iky ku janch møj tø chaachi, tyimyik'ookwajnip. Ka'ats ja yik'o'jki, tsoojk ja'. Kuts ja t'ejxti ja naxwii'ñit jaa'y, ñigyumaap ja tja'widyøø xjats ja tpadundi ja yja'. ⁴ Nayide'ents ja tmøjawidi twindsø'øgi ja awa'andsaa'ñ, ja'agøjpx ku wyinaty tø tmø'øy ja myøk'ajtin ja kyutujk ja møj ka'øy jiyujk, jøts ja nayide'en yikwindsø'øgi. Yide'en ja wya'andi ja naxwii'ñit jaa'y: —jPøn jade'en t'uktu'ump sam yø møj ka'øy jiyujk, pønts jade'en ukmajada'akp!

⁵ Xjats ja møj ka'øy jiyujk yikmøøy ja tuu' jøts ja møk'ajtin jøts tjemnøjmit ttenøjmit ja Dios yja', wixijkxy myajtsk po' y'ett. ⁶ Jade'en idø'øn ja ttuuñ; tuki'iyi tmigajpxigøøy midi ja Dios yja'ajtpy jøts ja xyøøw jøts ja chinaadyaajk, jøts midi ejtp tsajpjøtpy, tuki'iyi ja yikmigajpxigøøgyijxy. ⁷ Nayide'en yikmøøy ja tuu' jøts tmøøtseptu'unt pøn jaty ja Dios yja' tpaduujnip kunim ja tmimajada'akt; jade'en ja kyutujk yikmøøy jøts tniwindsøn'att niduki'iyi ja naxwii'ñit jaa'y. ⁸ Jøts ja naxwii'ñit jaa'y jade'en twindsø'øgi ja møj ka'øy jiyujk, ja' tpadundip jade'en pøn jaty kajaabyety jap nøkyjøtpy kuuyip ja naxwii'ñit cho'ondaajky. Yø' nøky ja Borreek U'nk myøøt'ajtpy midi tø y'øøky adømgøjpx.

⁹ Øy yikxon madowdi. ¹⁰ Pøni pøn ja myigu'uk tsump, nayide'ents ja yiktsu'umt; jøts pøni pøn ja myigu'uk tyik'ookp, nayide'ents ja yjatt. Paty chøkyi mduda'akyjaa'y'attit jøts x'ajot'attit ja Dios sam pyaat'aty pøn ja Dios yja' tpaduujnip.

¹¹ Jøts jadu'uk ø n'ijxy møj ka'øy jiyujk pyidsimy naxjøtpy. Majtsk ja wyaj tmøøt'aty jade'en sam ja borreegi wajin, jøts jade'en kyajpxy sam ja møj awa'andsaa'ñ. ¹² Nayide'en ja kyutujk tjagyepy sam ja myiga'øy jiyujk midi ja kyubajk tsaachiyi'ñ, jøts yø tnøjmit ja naxwii'ñit jaa'y jøts yikwinjawit yikwindsø'øgit. ¹³ Nayide'ents ja myilagri'ajtin tnanky'ijxyi, møj jøøn tyiktsøøñ tsajpwemp jøts naxkijxy tyiknaxkida'aky, jøts ja jaa'y ttuk'ixy wyemp amp. ¹⁴ Jade'en'ampy ja jaa'y twin'iiñ ku myilagri'ajtin tnanky'ijxyi, xjats ja naxwii'ñit jaa'y tnimaay jøts tyik'øyt ja tsamaxan ja awanax midi t'ejpx jade'en sam ja møj ka'øy jiyujk midi tsaachiyi'ñ. ¹⁵ Xjats ja yikmøøy ja møk'ajtin jøts tyikjujkyøkt tyikajpxt ja tsamaxan, pønts ja kawindsø'jkijyip, yik'ookp ja'. ¹⁶ Xjats nayide'en ja møj ka'øy jiyujk ja y'ejxa'anin tpiktaajky kyøjø'øm uk wyimbojkwemp tuki'iyi ja naxwii'ñit jaa'y, wan tmøji wan tmutski, wan tkumeeñ jaa'yi, wan t'ayoobi jaa'yi, øy ja yjawindsøndøjkidi, øy ja yjatumbitøjkidi. ¹⁷ Ka'ap pøn mibaat ti tjuy, ti tkajpxy, ti ttøøky, ku ja y'ejxa'anin tkamøøt'atti midi ja møj ka'øy jiyujk tø tpikta'aky. Ja' y'ejxa'anin'ajtpy ja xyøøw jøts ja ñumeri. ¹⁸ Yø'øbi numeri ka'ap yø o pøn tnijawi; ja' yø tnija'wip pøn yikxon t'a'ejxip. Yø jade'embi numeri, jade'en yø kyajpxy ejxim ja jaa'yxøøwin, tudujk magø'pxy ja tugi'pxyudujk jade'en ja'.

14

Ku ja tukmagø'pxy wixijkxy myaktaxk milbi jaa'y y'øøwdi

¹ Kuts jade'en yjajty jøts ø n'ejxpaaty ja Borreek U'nk jam tyani kojpkøjpx ma yiktijy Siøn. Tukmagø'pxy ja wixijkxy myaktaxk mil ja jaa'y tmøødi pøn wyinaty wyimbojkwemp tø yikpikta'aky ja Dios Teety xyøøw jøts ja Borreek U'nk yja'ami. Ja'ats idø'øn ja y'ejxa'anin'ajttip. ² Jøts nmadøøy møk wyina'añ tsajpjøtpy ejxim ja møj nøø

y'iichin jøts ja møk anaawin; jade'en yikmadøy wyinaa'ñ ejxim ja maagyow midi yiktejp arpi. ³ Jamts ja jemy'iiy t'øøwdi mā ja møj tsinaabyajt jam, mā ja nimaktaxkpi jiyujk jam jøts ja møjaa'dyøjkti. Nipøn ja'abi iiy tkajaty, ja'ayi t'ajttip pøn nitso'ok'ajtti ya naxwiiñ, tukmagø'pxy ja wixijxxy myaktaxk mil jade'en ja'adi. ⁴ Wa'ats øy tsuj yjaa'y'atti jøts ka'ap ja o pøn tø'øxyøjk tmøøt'atti, tu'ugyi tpadundi ja Borreek U'nk pøni mā ja ñijxxy. Yø' dø'øn ojts jawyeen ñadyamiyøxyidi mā ja Dios Teety jøts ja Borreek U'nk, jade'en yø ttanitso'ok'atti. ⁵ Ka'ap ja win'øø'nin, ka'ap ja taay'ajtin tjagyapti, øy tsuj wa'ats yjaa'y'atti Dios wyingujkp.

Kyugajpxy'atti ja nidigøøkpi ankilis

⁶ Winets ø n'ejxpaaty jadu'uk ja ankilis midi kajkwidejtp jam tsajp kujk'am. Ayuujk myimimpy jøts tkajpxwa'kxwa'añ sa ttanitso'ok'attit ja naxwii'ñit jaa'y o magajp o mā'ayuujk. ⁷ Jøts møk kyajpxy yide'en:

—Windsø'øgidi winjawidi ja Dios, tø kya'pxni jøts ja tiidyu'unin ñaxkidaknit. Jade'ents xwindsø'øgidit ja Dios pøn ja tsajp ja naajx tyik'øyiyi'ñ tuki'iyi.

⁸ Xjats jadu'uk ja ankilis pyamiñi midi waan:

—Tø ja møj kajp Babilonia wyindigøy, ja'agøjxp ku tuki'iyi ja naxwii'ñit twin'iiñ jøts ttuktuñ sam ja kya'øyjaa'y'atti.

⁹ Xjats ja ankilis jadu'uk pyamengojmiyi, jøts ja møk nayide'en wya'añ:

—Pøni pøn ja twindsø'jkip ja ka'øy jiyujk jøts ja y'awanax, jøts jade'en yik'ejxa'andit wyimbojkwemp uk kyøjø'øm, ¹⁰ yø'øts ja ayo'on yikmo'odip ja'agøjxp ku ja Dios tø tyikjotma'atti; jade'ents ja jøøn jøts ja jøky tyukpaadidit tyuk'ejxidit Dios y'ankilis wyindump jøts mā ja Borreek U'nk jam. ¹¹ Xemikøjxp ja ayo'on jap t'ejxtit, nijuuni ja poj xyuxy'ajtin tkapaajtidit. Xinaxy tsunaxy ja y'etti pøn tø twindsø'øgidi ja ka'øy jiyujk jøts ja y'awanax, sam ja tø yik'ejxandi nidu'uk ja nidu'uk. ¹² Jade'ents yø chøkyi jøts møk y'ettit tyuda'aky'attit pøn ja Dios ja'ajtidip jøts ja y'ana'amin tpaduujnidi, jøts pøn ja Jesús møøt tu'ugyi ettip.

¹³ Winets nmadøøy møk kyajpxy tsajpjøtpy jøts ø xnøjmi:

—Ja' ya'at: “Pyaattipts ja øy'ajtin xondaajkin ku y'ooktit tyigø'ødyit pøn ja nwindsøn'ajtim Jesucristo tjanchja'widip.” Nayide'en ja Espíritu Santo wya'añ jøts y'ejtnit ejtni xoni jøts ja y'øy'ajtin pyudøkiyit nayide'en.

Sa ja Dios ttidyunwa'añ ja naxwii'ñit jaa'y

¹⁴ Xjats ø n'ejxpatkojmi, jam ø n'ixy tu'uk ja jaa'y chøøni poop yootskøjxp, koroni kyujp'ajtpy midi tum amuum oori, jøts ja møj tsujx tkap'ity. ¹⁵ Jøts jadu'uk ja ankilis pyidsimy mā ja Dios chinaadyaajk jøts møk tmigajpxy midi jam yootskøjxp tsinaapy:

—Kajpjø'øk yø tsujx jøts xyikpidø'økt yø pikta'aky; tiempi yø' jøts pyidø'knit, tø yø myijaani yø pikta'aky midi naxwii'ñit'ajtp.

¹⁶ Xjats ja' midi tsinaapy yootskøjxp, nay jatyits ja møj tsujx ttaapo'otmujky ja pikta'aky.

¹⁷ Xjats jadu'uk nayide'en ja ankilis pyidsimy mā ja Dios chinaadyaajk jap tsajpjøtpy, jam tu'uk ja møj tsujx janch jøøjp nayide'en tkapi. ¹⁸ Altajr wyingujkp jadu'uk ja ankilis chøøñ midi t'ejx'ejtp ja jøøn jam altajrkøjxp. Ja'ats møk tyajxixy'ñ midi ja tsujx tmøøt'ajtp, jøts tnimaay:

—Kajpjø'øk yø møj tsujx jøts xyikpidø'økt yø uvi tsa'am kumi tø yø myijaani.

¹⁹ Jøts ja ankilis ja tsujx tyiktuuñ naxkijxy, jade'ents ja uvi tsa'am tyikpidi'jky, japs ja t'abøjkixy'ñ y'abøjk'ii'ñjøtpy mā yikmøø'kxt, jade'en idø'øn yø tijy ku ja Dios møk ja ayo'on tyiknaxkida'akt. ²⁰ Jam kajp wingon ja uvi tsa'am yikmii'kxy, jøts ja ni'jpy kom'ampy pyidsimy. Kawaay y'aawgijxy ja yja'aty jadine'en ja kyøjki, jøts yø'øy tigøøk magø'pxy kilometri.

15

Ja wixujk ayo'on midi ja ankilistøjk yikme'endip

¹ Kuts jade'en yjajty jøts n'ixy tsajpwemp jadu'uk ja ejxpajt, janch adsø'jkibim: jade'ents ja niwixujkpi ankilis tmimiñ ja wixujkpi ayo'on midi tø yiktanipiky, kuts ja ayo'on ñaxt jade'ents ja Dios y'ambøjkin yjöpøxt.

² Jøts ø n'ejxpaaty tu'uk ja mejy janch wa'ats, janch tøø'kxp, jønyowin kyaxi'iky. Jamts mejy'agø'øm tyanidi niduki'iyi pøn tø tkabadundi ja ka'øy jiyujk yja' jøts ja y'awanax, sam nayide'en ja ñumeri tø tkagupøjkidi. Jamts ja kow ja tmøøt'atti midi ja Dios tø myø'øyidi.

³ Jøts ja t'owdi ja møjaa'y Moises y'iyy pøn ja Dios kyugajpxy'ajt, jøts ja t'øømidi ja Borreek U'nk yja', midi nømp:

Tu'ugyi me Dios Teety ja møk'ajtin xjagyepy.

Jøts midi tø xyik'øyi, janch øy janch tsuj jøts kamidaabyaadyim;

janch tiy'ajtin ja' midi mdumpy midi mbiktakpy, jøts xnideety'aty xnimøjaa'y'aty ja naxwii'ñit jaa'y.

⁴ ¿Pøn Dios Teety mga'uktsø'øgiyip, jøts pønts mga'ukwindsø'øgiyip?

Pø tu'ugyixi mets mwa'adsi.

Mwinjawiyip mjanchjawiyipts niduki'iyi ja naxwii'ñit jaa'y,

ja'agøjxp ku mdiy'ajtin xnanky'ijxyi sa mduñ sa mbiky.

⁵ Nay winets ø n'ejxpaajty ku ja Dios chinaadyaajk y'awajch jap tsajpjøtpy ma yikpøkji'iky ja Dios kyutujk. ⁶ Nay japts pyidsømdi ja niwixujkpi ankilis midi myimendip ja wixujkpi ayo'on. Ja' wyet'ajttip ja øybi wet midi janch tøø'kxp janch tsamamp. Midi chum'ajtpy, amuum oori ja', kyachwiiñ ja chum yja'aty. ⁷ Nay winets ja ñamaktaxkpi jiyujk nidu'uk ja niwixujkpi ankilis tmøøy kitu'uk ja kopi midi amuum oori. Ujts ja ayo'on ja tmøøt'aty midi ja Dios yajkpy, midi xemikøjxp jujky'ajtp. ⁸ Jøts nayide'en ma ja Dios chinaadyaajk tø ja jok kawinø'øn jap tø tya'tspøjkni. Ja Dios myøk'ajtin jade'en adøtsp jøts nipøn jap mibaat kya'uktøjkiñi kunim yjöpøxt ja wixujkpi ayo'on midi ja niwixujkpi ankilis yiktamigajxidip.

16

¹ Kuts jade'en yjajty xjats nmadøøy møk kyajpxy jap ma ja Dios chinaadyaajk, xjats ja niwixujkpi ankilis tnimaay:

—Nøjkx atsyiktawaatstít yø wixujkpi kopi jam naxwingøjxp, ja ayo'on yø myøøt'ajtpy midi ja Dios yajkpy.

² Winets ja myidu'ukpi ankilis tyiktawaajch ja kyopi jam naxwingøjxp, jøts ja jaa'y pyatkøjxniiyi ja tsamaax jøts ja ka'øbyu'uts. Ja' jajttip niduki'iyi pøn ja ka'øy jiyujk ja y'ejxa'anin tmøøt'ajttip jøts pøn twindsø'jkidip ja y'awanax.

³ Xjats ja myimajtskpi ankilis mejyjotp ja kyopi tyiktawaajch, jøts ja yjajtnaa wa'ats ni'jpy ejxim ja jaa'y ni'jpyin ku pøn chaachi, jøts ja y'oo'køjxni niduki'iyi midi jaty jam tsinaapy mejyjotp. ⁴ Jøts ja myidigøøkpi ankilis ja kyopi tyiktawaajch møj nøøjotp jøts ma jaty ja nøømu'ut. Nayide'ents ja wyimbejtnimaa wa'ats ni'jpy. ⁵ Winets nmadøøy ja ankilis midi tníwindsøn'ajtp ja nøø ku wya'añ:

—Me Dios Teety, tiy'ajtin ku jade'en xuñ. Janch øy janch wa'ats mets, jøts xemikøjxp me m'ity, ⁶ ja'agøjxp jade'en yjatti ku mets ja mjanchja'wibitøjk yikjemandi yiktedundi, tø tyik'ookti, kawinø'øn tø tyiktsuñ tyiktaxy. Paty mets ja nøø xyikwimbejtni wa'ats ni'jpy jøts yø t'uukti; jade'ents yø pyaat'atyidi.

⁷ Nmadøøy nayide'en ku jap altajrwimpy kyajpxy yide'en:

—Mets Dios Teety, tu'ugyi mets ja møk'ajtin xjagyepy, ku naxwii'ñit jaa'y jade'en tø xpayø'øy, tiy'ajtingøjxp idø'øn ja tø xuñ.

⁸ Jøts ja myimaktaxkpi ankilis tyiktawaajch ja kyopi jam xøøw wyingøjxp, jøts ja xøøw ja myøk'ajtin tpijky, jøts ja jaa'y chaaba'oo'kniiyi ja xøø'an. ⁹ Øy ja kawinø'øn ja

xø'an yjatsa'yidi ni jade'embaats ja wyinmaa'n ja tkayiktigatsti. Ni jade'embaat ja Dios tkaja'myatsti ku ayo'on tja'ejxti, ne'egi ja Dios tmigajpxigø'y'adø'øtsti.

¹⁰ Jøts ja myimagoxkpi ankilis tyiktawaajch ja kyopi ma ja møj ka'ø'y jiyujk ja myøjtsinaabyajt jam, jøts tuki'iyi kyoodsigyijxy winø'ømbaat t'ane'emy ja yjaa'y. Øy ja ayo'on ja møk tja'ejxti, jadi'iñits ja tjantyimyimajada'akti. Nugo ja tyoojts ja tjanch'atsu'utsmukti; ¹¹ ni jade'embaats ja tkamajststu'uty ja kya'ø'y'ajtin midi ja tyundip, ne'egi ja tmigajpxigø'y'adø'øtsti ja Dios pøn jap tsajpjøtpty, ja'agøjxp ku ayo'on ja jade'en ttuk'ijxy.

¹² Xjats ja myidudujkpi ankilis tyiktawaajch ja kyopi møj nøøjotp midi yiktejp Eufrates. Ku jade'en ttuun jøts ja tyijch, jøts ja tuu' jam y'awaajch, jøts ja møj windsøndøjk jam ñajxti midi tsoo'ndip xøøbidsimdsø'ampy.

¹³ Winets ø n'ijxy ku ja miku' pyidsimy jap awa'andsaa'n y'aawjøtpty. Nayide'en pyidsømi jap møj ka'ø'y jiyujk y'aawjøtpty, jøts nayide'enmi jap kugajpxtyøjk y'aawjøtpty midi nadyejidip ku ja Dios tkugajpxy'atti jøts twindaay'atti nugo ja jaa'y. Nidigøøk ja miku' jade'en pyidsømdi ejxim ja pokleenin. ¹⁴ Yø'øbi miku' jade'en ja møj ejxpajt ñanky'ejxip jøts niduki'iyi ja møj windsøndøjk tyiknamyukøxwa'añi pøn ya naxwiiñ. Jade'ents ja tsep t'a'ejxidit ku ja xøøw tpaatt jøts ja Dios tmime'ent ja myøk'ajtin midi ka' pøn tmi'abaaty. ¹⁵ Yide'en ja Dios wya'añ: "Ukmadowdinim, adsu'uky ø nme'ent ejxim ja maa'tspa'an, nipøn tkanijawi. Tya'ø'y'ajttip ja Dios kyunuu'kxin pøn nay'ejx'ejtidip nabyøk'kidip. Ka'ap øts xmidsø'ødyu'unt ku nme'ent." ¹⁶ Jøts ja møj windsøndøjk ñamyukøjxidøø ma jam hebreo ayuujk tejt Armagedón.

¹⁷ Xjats ja myiwixujkpi ankilis tyiktawaajch ja kyopi pojotp jøts yikmadøøy møk kyajpxy midi tsoo'mp jap tsajpjøtpty ma ja Dios chinaadyaajk, jøts wya'añ:

—Tø y'øyigyixy jøts tyunit jøts yjatit.

¹⁸ Jøts møk ñaxkidaajky ja widsuk, jøts wyinanguejky ja anaaw, jøts ja tsaachmøk uix myiñ midi ka'anin windii yik'ijxy yiknijawi ya naxwiiñ. ¹⁹ Xjats ja møj kajp Babilonia y'ajaabajky tigøøk ween. Jade'en'ampy jade'en ja Dios tyuñidi ku ja kya'ø'yjaa'y'atti jøts jade'en ambøjkin'ampy tyukji'kxyidi ja ayo'on. Tuki'iyi ja kajp wyindigøøgyijxy jøts yjaajø'kijxy ya naxwiiñ. ²⁰ Wyindigøøgyijxy ja naajx midi jam mejkyujk'am jøts ja kojpk nayide'en yjajty. ²¹ Nayide'en ja jaa'y pyajtigøøjyøø ja tøtst midi je'mch'ajtp wixijky kili tu'uk tu'uk. Ni jade'en ja jaa'y tkaja'myatsti ja Dios øy yø sa wyan'adø'øtsti, øy ja ayo'on møk tø yjayikmo'odi.

17

Ku ja ka'ødyø'øxy tø pyajtniyi ja myiwino'ø'mbi

¹ Kuts jade'en yjajty, jøts myiñ nidu'uk ja ñiwixujkpi ankilis midi tmøøt'ajttip ja wixujkpi kopi, jøts ø xnimaay:

—Men, jøts ø n'uktuk'ext sa y'ayo'ombaatt ja ka'ødyø'øxy pøn jam tsinaapy mejwyingøjxp. ² Yø møj windsøndøjkti pøn ya naxwiiñ, tø yø tmøøtpøkyundi yø ka'ødyø'øxy. Jade'ents ja naxwiiñit jaa'dyi tø ttuktuñ ttuknijawi ja kya'ø'yjaa'y'ajtin, jøts jade'en tu'ugyi tø yikwin'øø'nidi.

³ Nayi kumaa'yjøtpty ja Espíritu Santo xuk'ijxy ku øts ja ankilis xyiknijky jam møj abak etjotp, jamts ø n'ijxy tu'uk ja tø'øxyøjk ttatsøøni tu'uk ja møj ka'ø'y jiyujk, tsajpts ja' jøts wixujk ja kyubajk, majk ja wyaj tmøøt'aty, amuum nija'ay ja y'ak midi kya'ødyamigajpxy ja Dios. ⁴ Jøts ja tø'øxyøjk ja wyet twet'aty tsuu'nk jøts tsajpts, amuum oori xyox'ajtpy, jam n'ijxyimbi nga'ijxyimbi. Jamts ja kopi tu'uk tmach'ity midi amuum oori, ujts ja kopi nayide'en tmøøt'aty midi kyada'ø'yjaa'y'ajtpy; ⁵ jøts wyimbojkwemp ja letri tmøøt'aty midi ka' nugo ajawi yiknijawi. Yide'en ja tijy: "Ja møj Babilonia midi tnigubajk'ajtp ja ka'ødyø'øxyøjkti, ja ka'ødyunk jøts ja ka'øwyinmaa'n." ⁶ Jøts nay jatyi n'ijxy ku ja

ka'odyø'øxy myu'ugyi, ja ni'jpy tam ja muujkip pøn ja Dios ja'ajtip ku ja Jesús yja' tø tku'oogidi. Nigyumaap njawi ku jade'en n'ijxy. ⁷ Xjats ja ankilis xnimaay:

—¿Tiku nigyumaap xjawi? Ixyam n'uktuknijawit sudso'ampy idø'on yø jade'en tijy yø tø'øxyøjk jøts yø ka'øy jiyujk midi ja tø'øxyøjk tyatsinaapy, midi wixujk ja kyubajk jøts majk ja wyaj. ⁸ Yø ka'øy jiyujk midi ixyam m'ijxpy, jekyip yø jaayi y'ijty. Ka'ap yø ixyam ma y'ukyik'eixni; øy jade'en tø yjaty, pidsømgøjmip jap ayodaajkjøtpy jøts ñøjkxt ma wyindigø'ty xemikøjxp. Jøts ja jaa'y pøn ja xyøøw kayikja'ay jap nøkyjøtpy ma jap y'ity ja jaa'xyøøw midi jujky'ajtip xemikøjxp, yø'øts nigyumaap tjawidip ku ja t'eixkojmidit ja ka'øy jiyujk ku ja nay jaa yujky'aty.

⁹ Ukmadow yixxon midi ndukmadowampy: Yide'en yø wixujkpi kubajk twandijy yø wixujkpi kojpk ma yø tø'øxyøjk chøøni. ¹⁰ Nayide'en yø wixujkpi kubajk twandijy niwixujk ja windsøndøjkti. Tø wyindigøy nimagoxk, jøts nidu'uk ixyam wyindsøn'aty, jøts jadu'uk ka'anim ja myiñ. Kuts ja mye'ent, ka'ap ja jeky y'lett. ¹¹ Jøts ja ka'øy jiyujk midi ya ejt naxwiiñ jøts ka' ixyam ma y'uk'eitni, ja' idø'on etp myiduktujkpi windsøn. Ja' idø'on ndejint yjapatpy ja niwixujkpi windsøn pøn øy sa tø yikajpxpaaty, jøts jade'eñi ja kyudigø'øyin ñaxt.

¹² Ja majkpi waj midi tø x'ixy, ja' wyandijpy nimajk ja windsøndi, ka'anim ixyam ja kutujk yiktanipøkti; pyøktipts ja kyutujk jøts tu'uk hori ja'ayi møøt wyindsøn'attit ja ka'øy jiyujk. ¹³ Tu'ugyi ja wyinmaa'ñ tyik'etti yø nimajkpi windsøndi jøts tmo'odit ja myøk'ajtin ja ka'øy jiyujk. ¹⁴ Xjats møøt cheptu'undit ja Borreek U'nk, mimajada'akidipts ja' ja'agøjxp ku møk ja myøk'ajtin tjagyepy; nipøn ya naxwiiñ kyajade'eni, pøn ja møøtti kø'øm ja Dios Teety ja tø wyi'ijxyidi jøts ja tø yajxiyidi, myiduda'aky'ajtip ja'.

¹⁵ Jøts ja ankilis nayide'en xnimaay:

—Yø mejy midi tø x'ixy ma yø tø'øxyøjk chøøni, yø' wyandijpy niduki'iyi naxwii'ñit kajp. ¹⁶ Jøts ja nimajkpi windsøndøjkti midi wyandijpy ja ka'øy jiyujk wyaj, ja'ats kyadami'eixiwyampy ja ka'odyø'øxy jøts tyiktuu'duktit; jøts jade'eñi tyikwindigø'ødyit jønjøtpy. ¹⁷ Tundi jade'en sam ja Dios kø'øm tø mwinmaa'nmyø'øyidi sam ja kø'øm ttsøky, paty tkajpxmuktit ja windsøndøjk jøts ja kyutujk tmo'ot ja ka'øy jiyujk kunim yø ttu'undit jade'en sam ja Dios tø ttanibiktaagi. ¹⁸ Yø ka'odyø'øxy pøn tø x'ixy, jade'en yø' sam yø møj kajp Babilonia midi niduki'iyi ja naxwii'ñit ja windsøndøjk y'ane'empy.

18

Ku ja møj kajp Babilonia wyindigøy

¹ Xjats ku jade'en yjaty winets n'ijxy tu'uk ja ankilis ku ja tsajpjøtpy kyidaajky, møk ja kyutujk tmimiiñ jøts ja naxwii'ñit tyikjajtaajky ku ja møk tyi'kxy chamamy. ² Xjats ja ankilis møk kyajpxy jøts wya'añ:

—Tø ja møj kajp Babilonia wyindigøy. Miku' tsinaadyaajk tø wyimbejtne jøts tum ja ka'øy jiyujk jam tsinaadyip. ³ Ja'agøjxp jade'en yjaty ku ja naxwii'ñit jaa'y tø ttukpaduñ ja kya'øy'ajtin. Tø ja windsøndøjk møøt y'øyjaa'y'aty kya'øyjaa'y'aty. Pønts atstooktip atsyaktip tø ja ttamøktøjkiñidi ku ja ttookti midi yiktundip ja pøkytumbi.

⁴ Xjats ø nmadøøy jadu'uk ja ayuujk midi tso'omp tsajpjøtpy, xjats wya'añ:

—Pidsømdi meets jam kajpjotp pøn jaty ø nja'ajtpy. Kidi nugo ja pøky xpaatti jøts kidi nayide'en ja ayo'on nugo xpaatti. ⁵ Tø yø jade'embj kajp ja pyøky ñipajtni, xjats ja Dios ka' tja'dyigøy ku jade'en kya'øyjaa'y'atti. ⁶ Wan yø tjaty nayide'en sam yø tø tka'ødyuñ ja naxwii'ñit jaa'y. Wan jawaani møj tkubety ja kya'øy'ajtin. ⁷ Pø øyxi ñamyikejxyi, møj ñayjawi, wants t'ixy tñijawi nayide'en ja ayo'on. Wampts ja' y'am yjotp: “Windsøn'ajtpyim øts ixyam; ka'ap ø nmay ndajy sam ja ku'økyø'øxyin, ka'ap ø sa njatt.” ⁸ Ja'agøjxp tuktoñi nøjkx ñaxkida'aky mayjøøjp ja ayo'on: ja o'jkin, ja yuu, ja pa'am, jøts nayide'en nøjkx tuki'iyi tyøøyjø'køxti; ja Dios janch møj ku ja ayo'on jade'en myo'ojidit.

⁹ Jøts ja naxwii'ñit windsøndøjkti tpaya'axtit tpajø'ødit ja kajp mā ja tō pyøkyundi, ku t'ejxtit ku ja tō yjønmajsniyi, jøts ja jok nugo pyidø'kni. ¹⁰ Jagam ja tsø'øgi y'a'ejxuktit, ja ku ja nayide'en yjattit, jøts yide'en wya'andit:

—iMjanch'ayøøy meets Babilonia! Janch møk ja møk'ajtin y'ity xmøøt'atti. Pø tøxi tuktøñi mwindigøy.

¹¹ Nayide'en ja too'kpi ajuubyitøjk, pyaya'axtip ja', ja'agøjxp ku ka' pøn jade'en y'ukjuuñit sam y'ijtyin, ja tyøøky myimaadyip myidajtip ti jaty ja myøøt'ajttip: ¹² jap oori, jap plati, jap n'ijxyim nga'ijxyim, jap ja øybi wet, tsuu'nk jøts tsajpts; jap nayide'en mayjøøjp ja kipy midi pa'akxukp, jap tsaadsech tsaagueegidi, jap bronze jøts ja nugo pujx, ¹³ japts nayide'en ja kanela, to'kx tsøøy, poom, mirra, jøts ja pa'akxukpi, jap ja vino, aceite, y'øybi ariin way jøts ja ariinbajk; jap nayide'en ja jiyujk midi tsimchømp, jap ja borreegi, jap ja kawaay jøts ja karreti. Nay jap ja tumbi jaa'y tyøøgyi pøn tundip sam ja jiyujkin. ¹⁴ Xjats ja too'kpitøjk wya'andit:

—Tø wyindigøøgyixy tuki'iyi midi y'ijty mdsojktip; tō tyigøøgyixy ja mgumeeñ'ajtin ja mjujky'ajtin, nijuuni jadigojk kya'ukyikpatnit.

¹⁵ Jøts ja too'kpitøjk, tsø'jkidip ja', jøts jagam y'a'ejxuktit ku nayide'en y'ayo'ombaattit, pyaya'axtip pyajø'ødip ja', ¹⁶ jøts wya'andit:

—iMjanch ayøøy meets Babilonia kajp! Janch tsuj meets mgajp y'ijty sam tu'uk ja tø'øxyøjk tsuj ñaxyøxyin, ku øybi wet tpikta'aky wan tsuu'ngi wan tsajptsi, kuts o midi'ibi xox tpikta'aky wan ja oori jøts ja tsaadø'kxpi. ¹⁷ iPø tøxi tuktøñi kyugøxi ja mgumeeñ'ajtin ja mjujky'ajtin!

Jøts nayide'en pøn jaty jam tundip barki jotp, jagamyi ja tyandøø. ¹⁸ Jøts t'ejxpaattøø ja jok ku tō tyøøbyøjkni ja kajp, jøts møk wyandøø:

—iNimā jade'en ja kajp ejxim ya'at tō y'ityin!

¹⁹ O sa yja'adø'tsnidi o sa ñadyu'uniyidi, ja' møk yja'widip ku ja kajp jade'en yjaty, chap'aawdi, jøts wya'andi:

—iMjanch'ayøøy mee Babilonia kajp! iJa mgumeeñ'ajtin ja mjujky'ajtin øø tō ndama-jada'aky pøn jaty ja barki tmøøt'ajttip yam mejyjøøjty, jøts jotmøñ tō mdyimgyudigøødyi!

²⁰ Taxonda'akti meets pøn jap tsajpjøtpy, meets kugajpptyøjk, meets janchja'wibitøjk, pø tøxi ja wyindigøy ja ka'øgyajp jøts jade'en ja Dios tō tpayø'øy ku tō myika'ødyundi.

²¹ Xjats tu'uk ja møj ankilis tkiyji'iky tu'uk ja amuum møj paandsaa jøts ja mejyjotp tkuwibejpiyi'ñ, jøts ja wya'añ:

—Jade'en yø Babilonia kajp wyindigøy ejxim yø tsaā yikuwibejpi mejyjotp, jøts nijuuni xøøw kya'ukyik'ejxnit. ²² Nimā jadigojk ti kya'ukyikmadooni kajpjøøjty ja xuxpi ja kowbi; nimā pøn ti tka'uktunidi, nimā pøn kya'ukjøjtsnidi. ²³ Niti jaj niti tøø'kx kya'ukaxø'kni jøts niti jade'en kya'ukyikmadooni sam ti y'ityin xyødundi. Tø yø kajp wyindigøy, øy ja too'kpi yajkpidi tō tjamøøt'atti møj, øy tuki'iyi ja naxwii'ñit kajp tō tjawin'øø'nguixy møøtpi ja kya'øy'ajtin.

²⁴ Ja'agøjxp yø kajp jade'en tō yjaty ku jam tō tyik'ookti ja Dios kyugajpxy jøts ja Dios yjanchja'wibitøjk. May ja jaa'y tō tyik'ookti o magajp.

19

¹ Kuts jade'en yjajty jøts nmadøøy ku mayjaa'y kyajpxti jap tsajpjøtpy jøts møk wya'andi:

iTu'ugyi adøm nDios Teety janch møj janch øy! Ja'ats tu'ugyi xyiknitso'ok'ajtindip.

² Tiy'ajtingøjxp ja Dios ttidyuñ; t'ayo'onmø'øy ja ka'ødyø'øxy, ja'agøjxp ku ja naxwii'ñit jaa'y tō tyikma'aty ja' kya'øy'ajtingøjxp;

paty ja Dios ja tpayø'øy ku jade'en tō tyik'ookti ja yjanchja'wibitøjk.

³ Xjats jadigojk wyangojmidi:

—iJanch møj ja Dios! Nijuuni yø kajp kyatøøy'amø'øty, jok'ejtp yø'.

⁴ Xjats ja ñi'ee'pxmaktaxkpi mōjāa'dyōjk jōts ja nimaktaxkpi jiyujk ñagyuxendyaajkidi jam Dios myōjtsinaadyaajk wingujkp, Dios tja'myatsti jōts wya'andi:

—jJade'en, ku Dios janch mōj!

⁵ Jōts yikmadōy ja kajpxy ja ayuujk mā ja mōj tsinaabyajt jam, midi wamp yide'en: Winjāwidi kunuu'kxyjāwidi meets ja Dios, pōn tpadundip pōn twindsō'jkidip wan tmōjidi wan tmutskidi.

Ku ja Borreek U'nk yikxōdu'unt

⁶ Xjats nmadōy nayide'en ejxim ja mayjāa'y kyajpxyin, sam ja mōj nōō ōō'tspin wyina'añ jōts ja tsaach mōk anaaw, jōts wya'añ yide'en:

jJanch mōj ja Dios! Tō ñaxkida'aky ja kyutujk jōts jade'en xniwindsōn'ajtindit.

⁷⁻⁸ Wan t'ōy'ajtyim wan txondaajkyim, wan twinjā'wa'am wan twindsō'jka'am.

Tōxi tpaaty ja yja' midi yiktejp Borreek U'nk jōts tmōōtsinaawya'añ tmōōt'etwā'añ ja yjanchjā'wibitōjk pōn ōy'ajttip wā'ats jāa'y'ajttip.

Jade'en idō'on yō tijy sam ja jāa'y ja xōōw ttundi ku y'amajtskidi.

⁹ Xjats ja ankilis xnimaay:

—Ja' jade'en: “Tya'ōy'ajttip pōn tō yikway mā ja Borreek U'nk xyōduñ.”

Jōts ja yjaakwā'añ:

—Yō' ayuujk midi tō xjaadyañ, tiy janch yō', Dios tyiy'ajtin yō'.

¹⁰ Xjats ō nagyuxendyaajki ankilis wyingukp jōts nwindso'ogiwya'añ, jōts ō xnimaay:

—Ka'ap jade'en m'adō'tst; pō tu'ugyixi ja Dios Teety yikwindsō'ogi. Nayide'enxi ōts ja nwindso'najtim Jesús yja' nbaduujni sam metsin, sats ja mmijanchjā'wibitōjkindi. Ja Jesús kyajpxy y'ayuujk nbagajpxa'amp pōn jaty ja Dios ja'ajtiyip.

Ja jāa'y pōn ttatsinaapy ja poop kawaay

¹¹ Xjats ō n'ejxpaaty ja tsajp y'awaajch; jamts kyaxi'jky tu'uk ja poop kawaay, ja'ats ja ttatsinaapy pōn ōy pōn tiy'ajtin mōōt, jōts tpayō'ōwya'añ ttiidyunwā'añ ja naxwii'ñit jāa'y.

¹² Janch tōō'kxp ja wyeen ejxim ja jōnyowin, jōts kyubajkōjxp may ja koroni tmōōt'aty. Jamts ja xyōōw yja'ayi wyimbojkwemp, ōy ja pōn tja'ijxy ka'ap ja pōn t'ejxkapy, ja' kō'ōm tnija'wip. ¹³ Amuum ni'jpy ja wyet midi wyet'ajtpy, jōts ja xyōōw, Dios kyajpxy ja' Dios y'ayuujk ja'. ¹⁴ May ja myōōtseptumbi pyayō'ōyi pōn tso'ondip jap tsajpjōtpy. Amuum poop, ōybi wet, wā'ats wet wyet'ajttip jōts tum poop kawaagyōxpti. ¹⁵ Jajts y'aawjōtpy pyidsimy tu'uk yōñchujx, janch jōōjp ja', ja'ats tyayiktsaachip ja naxwii'ñit jāa'y ku ja mōk tniwindsōn'atwā'añ ja naajx ja kajp; mōk ja ayo'on ja payō'ōyin tyiknaxwā'añ ku ja Dios Teety tō yjanchjot'ambiky. ¹⁶ Yjixki'py ja xyōōw yja'ayi jōts pyuugyixy. Jade'en ja twandijy ku mōk ja kutujk tmōōt'aty, nipōn yā naxwiiñ kyajade'eni.

¹⁷ Winets ō n'ijxy tu'uk ja ankilis jam xōōw wyindump, jōts tmigajpxy ja jiyujk midi kajkwidejttip tsajpwemp, jōts wya'añ yide'en:

—Mendi namyukidi jōts xka'adyit x'a'uxidit ja Dios yja', ¹⁸ jōts xtsu'utstit xjōō'kxtit ja windsōndōjk ja soldaditōjk. Nayide'en xtsu'utstit ja kawaay jōts pōn ja tatsinaajyip. Niduki'iyi xjōō'kxtit pōn ja jāa'y yiktuujnip jōts pōn midundip, wan tmōji wan tmutski.

¹⁹ Xjats ō n'ijxy ja mōj ka'ōy jiyujk jōts ja windsōndōjk pōn yā naxwiiñ mōōt ja syoldaditōjk, ja'agōjxp tō ñamyukyidi ku cheptunwā'andi mōōt ja' pōn ttatsinaapy ja poop kawaay. ²⁰ Jōts ja ka'ōy jiyujk yiktsuumy mōōt ja' pōn nugo win'ōō'ndip ñadyijyi ku Dios ja tkajpxnaxpi'aty. Jade'en ñadyijyi tñanky'ejxi ja myilagri'ajtin jōts jade'en ja jāa'y twin'i'ñ jōts yikmo'odit ja mōj ka'ōy jiyujk y'ejxa'anin jōts jade'en twindsō'ogidit ja y'awanax. Xjats ja mōj ka'ōy jiyujk mōōt ja' midi nugo win'ōō'mp yikuwibejpidyi mejyotp, mā yjanchtōy yjanča'ay ja nōō. ²¹ Ja'ats ja tya'ookōxti ja myigu'uk midi ja yōñchujx tmōōt'ajtp y'aawjōtpy, jōts ja jiyujk ja yjō'kxkōxiyidi midi kajkwidejttip.

20

Sa ja kutujk midi tukmil jumøjt etp

¹ Xjats ø n'ijxy tu'uk ja ankilis midi tso'omp tsajpjøtpy, jøts ja tkøñ'ity ja ñi'awaajts ja ayodaajk jøts nayide'en tu'uk ja møj pujxkadeen. ² Myajts ja ankilis ja møj ka'øchaa'ñ midi yiktejp møj miku' ja Satanás, jøts yikøxøjch, yikpakxøjch jøts tukmil jumøjt y'ett ³ y'ayo'ot ma yikuwibejpiyi'ñ ayodaajkjøtpy. Jap ñi'adujkpejty jøts ja seeyi yikpiktaajky ja agaj, jade'engøjxp jøts ka'ap ja naẁwii'ñit jaa'y nugo ajawi t'ukwin'øø'nit. Tukmil jumøjt y'ayo'ot, winets yikmajtstu'utt øy win'øø'nin.

⁴ Winets ø n'ijxy ja møj windsøndøjk chøø'nidi jam møj tsinaabyajtkøjxp. Tø yikmo'odi ja kutujk ja møk'ajtin jøts tidiyu'unin ttu'undit. Nayide'en ja yik'ijxy ja anmija'windi pøn ja kyubajk tø wyinakti, ku ja tkajpxwa'kxti ja nwindson'ajtim Jesús yja'. Jade'ents ja Dios yja' tø tpaduujnidi. Ka'ap ja twindsø'øgidi twinjawidi ja møj ka'øy jiyujk jøts nika'ap ja y'ejxa'anin yikpikta'akti wyimbojkøjxp jøts kyøjø'øm. Yik'ijxy ku ja yjujkpyøkøxti jøts tukmil jumøjt møøt wyindsøn'attit ja Cristo. ⁵ Yø'øts jawyeen jujkpyøktøø, pønts jaaktandøø jaanimts ja yjujkpyøktit kunim ja tukmil jumøjt ñaxt. ⁶ Tya'øy'ajtip tyaxondaajkip ja Dios yja' pøn jawyeen jade'en jujkpyøktøø. Ja'ats ja Dios ja'ajtidip jøts ka'ap ja y'ayo'odit ku ja myimajtskpi o'jkin ñaxt. Pyadundip ja Dios yja' jøts møøt wyindsøn'attit ja Cristo tukmil jumøjt.

⁷ Ku wyinaty tø kya'pxy tukmil jumøjt winets yikmajtstu'utt ja Satanás. ⁸ Ku pyidsø'ømt, wyin'øø'mp ja' ja naẁwii'ñit jaa'y. Nøjkx twin'ñiñ nayide'en ja kajp ma yiktijy Gog jøts Magog, jøts ñamyukidit ja tseptumbi niduki'iyi ja syoldadi. Janch namay ja'adi, ka'ap ja myachooni. ⁹ Namyujkidøø jam møj jøgyøjxp jøts tnawidejtkøxti ma jam y'etti pøn jaty ja Dios ja'ajtidip, pøn ja chøjkpy. Xjats ja Dios ja jøøn tnajtskajxyi'ñ jap tsajpjøtpy jøts niduki'iyi tyøøgyijxy. ¹⁰ Xjats ja miku' nayide'en yikmaajch ja'agøjxp ku ja jaa'y nugo twin'ñiñ. Nay jam yikpiktaajky mejyotp ma yjanchtøøy yjanča'ay ja nøø. Møøt ja' ja møj ka'øy jiyujk, jøts ja' midi nadyejip kugajpxy pøn nugo twin'øø'mp ja naẁwii'ñit jaa'y. Jamts y'ayo'odit xemikøjxp xinaxy tsunaxy.

Ku ja Dios tidiyu'unt ja jaa'y ma ja pyoop tsinaabyajt jam

¹¹ Jøts ø n'ijxy tu'uk ja møj tsinaabyajt, poop ja', jam ja Dios chøøni. Xjats ja tsajp, xjats ja naajx tuki'iyi wyindigøøgyijxy Dios wyingujkp, nima niti kya'uk'ejtni. ¹² Jøts ø n'ijxy ja jaa'y, Dios wyingujkp tyaniði pøn tø y'ookti, ja møj ja mutsk ja'adi. Jamts ja nøky yik'ijxy sa tø yjaa'y'atti nidu'uk nidu'uk. Nayide'ents ja nøky jam yik'ejxmi ma ja xyøøw jap yjaabyetyidi pøn jaty ja Dios yja' tø tpaduujni, xjats jade'en niduki'iyi yikpayø'ødyi. ¹³ Jam ja'adi pøn tø y'ookti mejyøtpy jøts nayide'en pøn tø y'ookti naẁkijxy. Jamts ja yikpayø'ødyi tu'uk tu'uk pøni sa tø yjaa'y'atti. ¹⁴ Winets ja Dios tyikjøpkixy ja o'jkin tigø'øyin jøts ka' pøn y'uk'ooknit jadigojk. Ja' tøødyip pøn tø tyundigøydi jap mejyøtpy ma yjanchtøøy yjanča'ay ja nøø. ¹⁵ Ja' jade'en yikpiktaktip jam, pøn ja xyøøw jap ka'ejttip nøkyøtpy, pøn tkabadundip ja Dios yja'.

21

Ku ja tsajp ja naajx jadigojk y'øyiyi'ñ jemy

¹ Nay winets ø n'ijxy ja jemchajp ja jemñaajx jadigojk; pø tøxi ja tsajp ja naajx wyindigøy midi jawyeen ejt. Nayide'ents ja mejy kya'uk'ejtnaa. ² Xjats ø n'ijxy tu'uk ja jemgyajp kyida'aky tsajpjøtpy, kunuu'kxy Jerusalén xyøøw'ajtpy, Dios wyingujkp ja chøøñ. Janch tsuj janch xøxy ja kajp, jade'en ja kyaxi'iky ejxim ja jaa'y pyøkwaa'ñin.

³ Winets nmadøøy møk kyajpxy jap tsajpjøtpy, xjats wya'añ:

—Ejx sa ja Dios tmøøtsinaawya'añ ja naẁwii'ñit jaa'y. Ja' amuum ja'ajtidip jøts ja ja' xemikøjxp tmøøt'ett. ⁴ Yiktigø'øpy ja yjotmaydi ja yjotmay'o'jkindi. Ka'ap ja o'jkin y'uk'ejtnit y'ukpaajtniyit, ka'ap ja jajyi tøøyi t'uk'ejxnit; sam tø y'uk'ityin, tø ja ñaxy.

⁵ Xjats ja wyaañ pøn jam tsinaapy møj tsinaabyajtkøjxp:

—Uk'ejxim sã øts tuki'iyi jemy nyik'øyigyøxt.

Xjats jade'en wyangojmi:

—Jaabyat ya'at ayuujk ja'agøjxp ku tyiyi yjanchi, ka' ma ndagudsø'jka'ant.

⁶ Winets øts xnimaagyojmi jøts yide'en wya'añ:

—Tø y'øyigyixy. Øts idø'øn nyiktso'ondaajk tuki'iyi jøts nayide'en nyikjøpkøxt. Pøni pøn tøøtsip, øts ja nøø ja nmo'op midi yikjujky'ajtp xemikøjxp, jøts may'ajt ja'. ⁷ Pøni pøn tmimajadaajkip ja miku' yja', ja'ats nmo'op ja øy'ajtin; jade'ents øts ja n'u'nk'att jøts nmøøt'ett xemikøjxp. ⁸ Pøn tkawamp øts nja', pøn tkamibøjkp, pøn xkatsojkip øts nja', pøn yikjaa'y'o'kp, pøn ka'øyjaa'y'ajtp, pøn ja miku' yja' tyiktuujnip, pøn twindsø'jkip ja maxandsaa, pøn taay'ajttip, ja' nøjkxkøxtip xemikøjxp jam meyjotp ma yjanchtøø yjancha'ay ja nøø.

Tsuj kyaxi'iky ja jemgyajp Jerusalén

⁹ Winets tu'uk myiñ ja ñiwixujkpi ankilis midi ojts tyikmiñ ja wixujkpi ayo'on ya naxwiiñ, jøts ø xnimaay:

—Men, jøts ø nduk'ext ja janchja'wibitøjkp pøn møøt y'ettit ja Borreek U'nk.

¹⁰ Nayi kumaa'yjötpy ja Espiritu Santo xuk'ijxy, ku øts ja ankilis jam møj kojpkøjxp xyiknijkxy, jøts ø xuk'ijxy ja kunuu'kxy jemgyajp, ja Jerusalén midi kidakp tsajpötpy jam Dios wyingujkp. ¹¹ Janch tsuj janch tøø'kxp ja kajp sam ja Dios chinaadyaajkin, jade'en chamamy ejxim ja wa'ats tsaadøø'kxpa'an, tajajnaxp jade'en sam ja wa'ats keega'an. ¹² Køjxp nabojts'awidity ja kajp jøts makmajtsk ja agaj tjagyepy, jamts ja ankilis tyanidi ma jaty ja agaj. Jam agajkøjxp kyøxja'ayidi ja xyøøw pøn ja Israelit jaa'y y'aadsip kyugojip, namakmajtsk idø'øn ja'adi jøts tu'uk tu'uk ja agaj ja xyøøw tmøøt'ajtti.

¹³ Tigøøk ja agaj tyañ aga'ñ tso'ampy, jøts ja jadigøøkp agaj tyañ anajy tso'ampy. Xjats ja jadigøøk agaj tyanmi windujy tso'ampy, nayide'en jadigøøk agaj tyañ jixkø'øm tso'ampy.

¹⁴ Makmajtsk ja tsaa yiktapojsøø'ñ ja pøch, jøts tu'uk jaty ja tmøøt'aty ja xyøøw pøn jaty ja Jesús kyudanaabyi'ajtpy.

¹⁵ Ja ankilis midi ø xmimadyakp jam ja takejpx ja tmøødi, tum oori, xjats ttakijpxy winø'ønin ñabojs'awidity ja kajp, jøts nayide'en winø'ønin myøji ja agaj. ¹⁶ Kwadradi ja kajp, ni sudso'ampy kyayøñi kyakoni. Majtsk mil ja majtsk magø'pxy kilometri tuktamajñ jaty, jøts nayide'en kyøxpi. ¹⁷ Winets nayide'en tkijpxy ja pøch, tugui'pxy myaktaxk metri ja myajpx'ajtin tjagyepy. Jade'en ja ankilis tkijpxy sam adøm nguijpxyin.

¹⁸ Amuum jaspe tsaa tø ttaapøch, jøts ja kajp amuum oori ja', jøts wa'ats keegi kyaxi'iky.

¹⁹ Ma ja makmajtskpi tsaa tø yiktapojsøø'ñ, mayjøøjp ja øybi tsaa'u'nk tø yiktaxøxy. Ja myidu'ukpi tsaa tmøøt'aty ja jaspe, jøts ja myimajtskpi tsaa tmøøt'aty ja zafiro. Ja myidigøøkp tmøøt'aty ja ágata, jøts ja myimaktaxkpi tmøøt'aty ja esmeralda. ²⁰ Ja myimagoxkpi tsaa txox'aty ja ónice, jøts ja myidudujkpi tsaa txox'aty ja cornalina. Ja myiwixujkpi tsaa txox'aty ja crisólito jøts ja myiduktujkpi txox'aty ja berilo. Ja myidaxujkpi tsaa txox'aty ja topacio jøts ja myimajkpi tsaa txox'aty ja crisoprasa. Ja myimaktu'ukpi tsaa txox'aty ja jacinto jøts ja myimakmajtskpi txox'aty ja amatista. ²¹ Tum perla ja makmajtskpi agaj, jøts amuum oori ja møj tuu' midi najxp kajpjotp, jajp tsamamp ja'.

²² Ka'ap ja tsaptøjkp jam yik'ijxy jemgyajpjotp. Ka'ap ja chøkyi, kumi amuum ja Dios ja tkajp'aty møøt ja Borreek U'nk. ²³ Ka'ap ja chøkyi jøts ja xøøw ja po' jam y'a'nt kajpjotp. Kø'øm ja Dios Teety jøts ja Borreek U'nk ja y'aju'uk ja y'ajaj tyikjajt tyiktøø'kxt.

²⁴ Nay ja' tkudøø'kxidip tkujajidip ja naxwii'ñit jaa'y pøn tø ñitso'ok'atti, jøts nayide'en ja windsøndøjkti pøn ja y'øy'ajtin jam tø tminøjkxti. ²⁵ Awa'ats jam y'ity ma ja pøch agaj jam. Nijuuni jam kyakoodsi, xiiñ jam y'ity. ²⁶ Xjats jam tminøjkxti ja naxwii'ñit jaa'y

ja y'ø'y'ajtin ja wya'ats'ajtin; ²⁷ ka'ap jam tyøkit pøn ka'ø'y'ajtip, pøn ja myigu'uk nugo twin'øø'mp twindaay'ajtp jøts o ti tkadam'ejxiwya'añ. Ja'ayi jam tøjkidip pøn ja xyøøw jap jaabyety jap nøkyjøtpy, ma jap y'ity ja jaa'y ja xyøøw pøn jujky'ajttip xemikøjxp. Ja'abi nøky tmøøt'ajtp ja Borreek U'nk.

22

¹ Xjats ø xuk'ijxy ja ankilis tu'uk ja møj nøø. Midi yik'ukp janch wa'ats ja', ja'ats xyikjujky'ajtim xemikøjxp. Janch ti'kxy ja', jøts ja jam pyidsimy ma ja Dios Teety chøøni møøt ja Borreek U'nk. ² Jamts ja møj tuu' kujk'am yø'ø'y ja nøø. Adsow aduuk ja kipy jam yøn nøøba'am. Ja' tyøøm yiktajuky'ajtp xemikøjxp. Wimbo' wimbo' ja tyøøm'aty jøts ja y'aay tsøø'y'aty ja naxwii'ñit jaa'y. ³ Pøn jap tsinaadyip ka' pøn y'ukjemñimaa'yniyi y'uktenimaa'yniyi. Ja Dios Teety jam tu'ugyi ejtp møøt ja Borreek U'nk, ja'ats windsø'jkijidip ja yjanchja'wibitøjk. ⁴ Ejxiyidip nijawiyidip wemp'am ja Dios Teety, jøts nay ja xyøøw myøøt'ajtidip wyimbojkwemp. ⁵ Ka'ap ja koots'ajtin jam y'uk'ejtnit; ka'ap ja jaj ka'ap ja xøøw t'ukyiktunit; Dios Teety tkujajip tkudøø'kxip, ja'ats jam windsøn'attip xemikøjxp.

Wingomp ja ku ja Jesucristo mye'ent

⁶ Winets ja ankilis xnimaay yide'en:

—Tiy janch ya'at ayuujk midi ixyam tø xjaadyañ, ka' nugo xkudsø'øgit. Nay ja Dios Teety pøn y'ijty tyukajpxwa'kxpy ja kyugajpxy, tøts ja nayide'en tkejxy ja y'ankilis jøts ttukmado'ot ja pyadumbi pyabøjkpi sa tsojk yjatwa'añ kyubatwa'añ.

⁷ Nøøm ja nwindson'ajtim:

—iMe'emp øts tsojk! iTya'ø'y'ajttip tyajotkujk'ajttip pøn ja Dios kyajpxy tmøjpiktaajkip sa yap nøkyjøtpy yjaabyetyi!

⁸ Xjats øts nmadøøy n'ijxy kø'øm sa øts ya'at nøkyjøtpy tø njaadyañ. Winets øts ja ankilis wyingujky nagyuxendyaajki sam øts ja xuk'ijxy jøts øts ja nwindson'øgit. ⁹ Jøts øts ja xnimaay:

—Ka'ap jade'en m'adø'øtst; pø tu'ugyixi ja Dios Teety yikwindsø'øgi. Nayide'enxi øts ja nwindson'ajtim Jesús yja' nbaduujni sam metsin, sats ja mijanchja'wibitøjkindi, jøts niduki'iyi pøn jaty tmøjpiktakp midi yap nøkyjøtpy jaadyañ.

¹⁰ Jøts nayide'en ja ankilis xnimaay:

—Ka' nugo x'amaatsk'att ja Dios kyajpxy midi yap nøkyjøtpy jaadyañ. Wingompxi jøts yjatt kyubatt jade'en. ¹¹ Wan jade'en tjaa'y'atti pøn ka'ø'y'ajttip, jøts pøn ja Dios yja' tpaduujnip, wañim ja tyikyø'ødyi jade'en ja yjaa'y'ajtin.

¹² Yide'ents ja nwindson'ajtim wya'añ:

—Tsojk ø nme'ent jøts ø nmime'ent ja ø'y'ajtin. Ja'ats ndamay'atp nidu'uk nidu'uk sa tø yjaa'y'atti. ¹³ Øts idø'on nyiktso'ondaajk tuki'iyi jøts nayide'en nyikjøpkøxt.

¹⁴ Tya'ø'y'ajttip tyajotkujk'ajttip pøn tø ñitso'ok'aty. Awa'ats ja tyuu'di jøts ja tyøkidit jam kunuu'kxy kajpjojp. Jamts tpaattit ja kipy midi jam yiktajuky'ajtp xemikøjxp.

¹⁵ Ka'ap jam tyøkidit pøn ka'ø'yjaa'y'ajttip pøn ja miku' yja' tpaduujnidip, pøn maa'tstip, yikjaa'y'oo'ktip, jøts pøn ja myigu'uk nugo twin'øø'mp.

¹⁶ —Tø øts ja n'ankilis nguexy jøts tuki'iyi yiknigajpxkøxt ya'at Dios kyajpxy, jøts jade'en yiknijawit pøn jaty ja Dios ja'ajtidip jam niwixujkpi kajp. Øts ndeety'ap'ajtpy ja møj windsøn David. Jade'en øts ja naxwii'ñit jaa'y nyikujajtaagi sam ja møj jaxyøøw midi jøpyidsømp.

¹⁷ Xjats ja Espíritu Santo jøts ja nwindson'ajtim yjanchja'wibitøjk wya'andi jøts ø nwindson'ajtim yiknøjmi:

—iMen!

Pøn jaty tmadoop yø'øbi ayuujk wan nayide'en twa'andi:

—iMen!

Jøts pøn ttsojpk ja øy'ajtin ja xondaajkin wan tmiñ jøts tpaatt ja may'ajt.

¹⁸ Ixyam ø nnigajpxy pøn jaty yam tmadoop ja Dios kyajpxy sam yap nøkyjøtpy yjaabyetyi: Pøni pøn nugo tyiktigajtsip ya'at ayuujk jøts ne'egi tiy tijy midi ka' tyiy'ajtin, Diosts ja ayo'on mo'ojip sam yap nøkyjøtpy yja'ayi. ¹⁹ Pøni pøn yø Dios y'ayuujk tyiktigajtsip jøts ka'pxy tka'ukajpxnidi sam yap nøkyjøtpy yja'ayi, Diosts ja pøjkiñip ja y'ø'ajtin jøts ka' tyøkidit ma ja kunuu'kxkyajp jam midi yø nøky ñigajpxy.

²⁰ Xjats ja nwindson'ajtim wya'añ pøn ya'at tnigajpxp:

—Tsojk nme'ent.

Jøts ø n'adsojimbijty:

—Øy jade'en. ¡Men, nwindson'ajtim Jesús!

²¹ Ja nwindson'ajtim Jesucristo mgunuu'kxidip meets niduki'iyi. Jade'en idø'on ja y'ejxi tyiyi.